

**Deus ekawěntup
Kawěn iisuat ekawěn**

Novo Testamento

na língua Mundurukú

LIVRARIA CRISTĀ UNIDA

Brasília, DF

1980

Apresentação

O NOVO TESTAMENTO é o livro que fala a respeito de Jesus Cristo. O nome — Novo Testamento — quer dizer que foi escrito depois da vinda de Cristo, e que trata do novo acordo que Deus fez com seu povo. São as Boas-Notícias de Deus prometidas àqueles que crêem em Jesus Cristo como seu Senhor e Salvador. Este livro não é para ser lido como se lê qualquer outro. Não dá apenas informações, mas produz modificações profundas naqueles que lêem estas Boas-Notícias e crêem nelas.

O Novo Testamento é formado por vinte e sete livros, escritos por doze autores, durante cinquenta anos, mais ou menos. Embora esses livros tenham sido escritos em épocas diferentes, e por diferentes autores, o assunto central é o amor de Deus pelos homens, revelado na pessoa de Jesus Cristo.

Este livro pode ser dividido assim:

(1) Os quatro Evangelhos. Contam a história da vida, dos milagres, dos ensinamentos, da morte e da ressurreição de Jesus.

(2) Os Atos dos Apóstolos. Este livro conta como o evangelho foi anunciado durante trinta anos, começando em Jerusalém e continuando até à capital do Império, a cidade de Roma.

(3) As cartas do apóstolo Paulo. Foram escritas para ajudar as igrejas e os cristãos, no começo do cristianismo. Em seguida vêm outras cartas, que foram escritas aos cristãos em geral, ou a certas igrejas ou pessoas, em particular.

(4) O Apocalipse é o último livro do Novo Testamento, e bem diferente dos outros. Ele ensina a respeito da vitória do Reino de Deus e da autoridade e poder de Jesus Cristo. O Apocalipse é difícil de entender, especialmente para os que estão começando a ler o Novo Testamento. Mas a sua mensagem principal, que é também a do Novo Testamento todo, está anunciada de maneira bem clara: "Agora o poder para governar o mundo pertence a nosso Senhor e ao seu Cristo, e ele reinará para sempre!" (Apocalipse 11.15).

A Chave de Pronúncia

O alfabeto Mundurukú comparado com o alfabeto Português.

Mundurukú	Português	
a	a	em 'arara'
ã	ã, a	em 'irmã', 'canto'
b	b	em 'bota'
c	t	em 'tio' (dialeto carioca)
d	d	em 'doente'
e	e	em 'fé'
ẽ	e	em 'em', 'tempo', 'vento'
g	f	não há em Mundurukú (veja abaixo)
h	g	não há em Mundurukú
i	rr	em 'correndo' (dialeto carioca)
ĩ	i	em 'ido'
j	i	em 'sim', 'lindo'
k	d	em 'dia' (dialeto carioca)
'	c, q	em 'carro', 'quilo'
		não há em Português, mas é como uma pequena pausa dentro da palavra
	l	não há em Mundurukú
m	m	em 'mãe'
n	n	em 'nariz'
ḡ	nh, n	nh (em banho) ao início da sílaba, n (em manga) no final da sílaba e após vogal nasalizada
o	o, u	em 'avó', 'pula' (não se distinguem as duas vogais em Mundurukú)
õ	o, u	em 'ponte', 'marrom', 'mundo', 'mutum'
p	p	em 'pai'
r	q	não há no alfabeto Mundurukú, veja k
s	r	em 'cara'
	s, ç, ss	em 'senhor', 'caça', 'fracasso'
	t	em 'também'
u		representa uma vogal que não há em Português
ũ		é como o u acima, mas nasalizado
w	v	não há em Mundurukú
x		não há em Português, mas é como a transição do <u>u</u> para o <u>a</u> de 'sua'
y	x, ch	em 'xicara', 'chegar'
		não há em Português, mas é como a transição do <u>i</u> para o <u>a</u> de 'tia'
	z	não há em Mundurukú

Em Mundurukú, as letras m, n, e ḡ, quando no final da sílaba e após uma vogal não-nasalizada, são pronunciadas como se fossem: bm, dn, e gng. Não se pronuncia uma vogal depois das letras p, t, e k, quando estas aparecem no final da frase.

Ijoptup peap ekawën

Jesus Cristo muwëğap ekawëntup	Página
Mateus emudupmubararaktup	11
Marcos emudupmubararaktup	134
Lucas emudupmubararaktup	205
João emudupmubararaktup	323
Jesus Cristo emumujuyü e'eap ekawën	411
Cartadup	
Paulo emudupmubararaktup	
Roma ka watwat peaptup	535
Corinto ka watwat peaptup-koapatup	589
Corinto ka watwat peaptup-xepxepatup	639
Galácia eipi watwat peaptup	672
Éfeso ka watwat peaptup	691
Filipos ka watwat peaptup	709
Colosse ka watwat peaptup	721
Tessalônica ka watwat peaptup-koapatup	733
Tessalônica ka watwat peaptup-xepxepatup	744
Timóteo beaptup-koapatup	751
Timóteo beaptup-xepxepatup	766
Tito beaptup	776
Filemom beaptup	783
Judeuyü beaptup	786
Tiago emudupmubararaktup	826
Pedro emudupmubararaktup-koapatup	839
Pedro emudupmubararaktup-xepxepatup	854
João emudupmubararaktup-koapatup	863
João emudupmubararaktup-ipidaseatup	876
João emudupmubararaktup-kanomûmaptup	878
Judas emudupmubararaktup	880
João be Deus o'ğubapukiaptup	885
Mapas	944

JESUS CRISTO MUWĒĠAP EKAWĒNTUP- -MATEUS EMUDUPMUBARARAKTUP

1 Kuyjeayū Jesus Cristo diwatwat. Ixe Jesus tiwat ijop'in ma Davi dak, Abraão dak. Ixe Davi Abraão naxeġebit osunuy. Kuyjeayū osodop ip. Tobuyū osodop ip. Ite diwatwat ma. Ibūrū ma osodop ip: ² Isaque ebay Abraão osunuy. Jacó ebay Isa- que o'e. Judá ebay Jacó osunuy- -Judá kitpiyū ebay dak. ³ Peres ebay Judá osunuy, Zera ebay dak. Ixi Tamar osunuy. Esrom ebay Peres osunuy. Arão ebay Esrom osunuy. ⁴ Aminadabe ebay Arão osunuy. Na- som ebay Aminadabe osunuy. Salmom ebay Nasom osunuy. ⁵ Boaz ebay Salmom osunuy. Raabe Boaz xi osunuy. Obede ebay Boaz osunuy. Obede xi Rute osunuy. Jessé ebay Obede osunuy.

Imên o'e. 14 em osodop- -14 gerações osodop.

⁶ Davi ebay Jessé osunuy- -kuyibit kukukat ebay. Salomão ebay Davi osunuy. Urias tayxibuk Salomão xi osunuy. ⁷ Roboão ebay Salomão osunuy. Abias ebay Roboão osunuy. Asa ebay Abias osunuy. ⁸ Josafá ebay Asa osunuy. Jorão ebay Josafá osunuy. Uzias ebay Jorão osunuy. ⁹ Jotão ebay Uzias osunuy. Acaz ebay Jotão osunuy. Ezequias ebay Acaz osunuy. ¹⁰ Manassés ebay Ezequias osunuy. Amom ebay Ma- nassés osunuy. Josias ebay Amom osunuy. ¹¹ Jeconias ebay Josias o'e, Jeconias kitpiyū ebay dak.

Imên Josias o'e, itakomaayū Israel naxeġebitbit tujowatwan pima Babilônia eipi be. Imên o'e dak. Wara'at 14 em osodop- -14 gerações osodop.

¹² Tujowat puje, Salatiel ebay ixex Jeconias osu- nuy. Zorobabel ebay Salatiel osunuy. ¹³ Abiúde ebay Zorobabel osunuy. Eliaquim ebay Abiúde osunuy. Azor ebay Eliaquim osunuy. ¹⁴ Sadoque ebay Azor osunuy. Aquim ebay Sadoque osunuy. Eliúde ebay Aquim osunuy. ¹⁵ Eleazar ebay Eliúde osunuy. Matã ebay Eleazar osunuy. Jacó ebay Matã osunuy. ¹⁶ - ¹⁷ José Maria itop osunuy. Jacó Maria itop ebay osunuy. Jesus Maria'it osunuy. Cristo i ibutet, ixex Jesus putet.

Imên o'e dak. Warara'at 14 em osodop- -14 gera-
ções osodop. Ibūrū ma Jesus tobuyū.

¹⁸ Jesus Cristo kapap. Jesus xi José wadip osu-
nuy. Maria i ibutet osunuy. Yukreğ o'e, jewebumün
awap. Deus biōğbuk o'ğu'ukreğ.

¹⁹ Yukreğ puje, José iboam itaybit o'e. Icēmat
osunuy José. Maria musūsūn pin ġu osunuy ibadip-
yū etabun. Imēnpuye José ibu'u osunuy jewebumün.
Iba'arēm suiwat ojuy.

²⁰ José bit ijop i'e pin pima, Deus ekawēn tojt-
jot'ukat ma oajēm José kay, jexeyxey bima.

— José! — io'e. — Davi diwacat ēn! Epararam
ġu juy Maria eju jewebumün âm- -ewadip eju. Deus
biōğbuk Xipan o'ğu'ukreğ. ²¹ I'it je'kap- -ağ-
katkat'it'it. Ibuten Jesus i esubutetmōğ. I'it puten.
Judeuyū bewi ikērēat ju'uk je'e ipiat'ajoap puxim —
io'e- -Deus ekawēn tojtjot'ukat o'e José be.

²² Soat ijop o'jebapuk. Deus o'e jekawēn muwēnu-
wēn'ukayū be iap tağ o'jebapuk. ²³ Imēn ixe o'e apēn
Deus o'e iap tağ:

Eya'ōpicūğcūğ cuy epesop. Ayacat
yukreğ je'e. Ayacat i'it je'kap. Ağ-
katkan je'e. Yaypan'isuat je'it ġukap.
Emanuel i ibuten je'e, i.

(Emanuel o'e Deus omuy wuyweju.)

²⁴ Jewurūğ puje, José o'e soat Deus ekawēn tojt-
jot'ukat o'e cebe. Deus ekawēn tağ José o'jewebu-
mün Maria eju. ²⁵ I'it kap awap, o'jepo ġu buk cewe-
ju. Maria'it o'subutetmōğ Jesus i, ikap puje.

2 O'kap Jesus Belém ka be, Judéia eipi be.
Gebuje itaybit cīcāayū oajēm Jerusalém ka
kay. Kasopta jujuap itaybit cīcā ip. Herodes Judeuyū
kukuk'ukat pima, oajēm ip. Kaxijēmap eipi bewi oa-
jēm ip.

² — Poce bekicat omuy? — io'e ip. — Xeku Ju-
deuyū kukuk'ukan em- -ixe bekicat. Kasopta ocetajo-
jo oceka be- -kaxijēmap eipi be. Tawaru ma o'jedae-

bapuk. Imēnpuye ocetaybit bekicat o'kap iam. Ya'ō-bacaat xeku. Ocajēm ixe mubuyxi am — io'e ip.

³ Imēnpuye Herodes yağuybabi'üm o'e, Jerusalém ka watwat tak.

⁴ Judeuyū epaiyū kukukayū o'tomuwā Herodes. Moisés ekawēn imutaybitbin'ukayū dak o'tomuwā ixe. O'je'awero ip Herodes kay.

— Poce Deus emunaē je'kap? — io'e cebe ip.

⁵ — Belém ka be, Judéia eipi be — io'e ip Herodes pe. — Imēn Deus ekawēn muwēnuwēn'ukat kuy tupmubararağ o'e- -Deus ekawētup. ⁶ Kuy o'e:

Belém ka bewi eykukukat omuyku- -
Judá eipi bewi. Imēnpuye iboceayū
je'e iboap ika muboğuboğ. Eykukukat
Israel naxeğebitbit mujujum je'e.

Imēnpuye ikaboğ je'e iboka, i.

Imēn Deus ekawēn muwēnuwēn'ukat kuy tupmubarağ o'e- -Deus ekawētup — io'e ip.

⁷ Ğebye Herodes itaybit cīcāyū o'tomuwā- -kaxijēmap eipi bewiyū. Iba'arēm o'tomuwā. Oajēm ip, o'tomuwā buye.

— Puju ixe kasopta o'jedaebapuk kabi be- -eyeipi be? — i biğ ma o'e- -Herodes o'e.
Kasopta muwēnuwēn o'e ip Herodes eju.

⁸ — Epeju Belém ka kay — Herodes o'e cebe ip. — Bekicat kudadam cīcā epeju. Tobuxik puje, ixe awēğ cuy epeyawēğmuwēn owebe, owebe ijo am, ixe mubuyxin am — Herodes o'e itaybit cīcāyū be.

Herodes pit bekicat mubuyxin ojuy ğu.

⁹ - ¹⁰ Herodes ekawēn co buje, o'jēm ip. Belém ka kay o'ju ip. Cucum pima, kasopta o'ju cewap ip. Icockok cīcā ip o'e waram, tajojom puye. Cum. Cum. Cum. O'jedaecū. Bekicat tuk'a ase o'jedaecū.

¹¹ Oajēm ip uk'a kay. Oōm ip.

Ğebye bekicat o'jojojo ip. Ixi eju osunuy bekicat- -Maria eju. O'jēğ'aecōğcōğ ip bekicat topa-be, imubuyxin am. Jebubut mūn'a o'yadomudip'uk ip. Ibubun o'ğūm ip Maria be. Ouro o'ğūm ip. Darut'a o'yaūm ip. Tade'oatup o'tupūm ip- -mirradup. Soat o'ğūm ip bekicat peam.

¹² Xet. O'jexeyxey ip, jexet pima.

— Epeyepit ġu juy Herodes kay — Deus o'e ce-xeybi.

Imēnpuye o'jepit ip jeipi kay wara'at e daġwi ma.

¹³ Itaybit cīcāayū ijēm puje, Deus ekawēn tojot-jot'ukat o'jebapuk José kay- -Maria itop kay. Ixet pima, jexeybi o'jebapuk. O'jekawēn José eju.

— Ecenapōn cuy Egito eipi kay — io'e José be. — Bekicat etujupa'um, ixi dak. Bomaku epesop cuy — i'e'em cebe. — Ajēm puje, epesop cuy Egito eipi be, Herodes bekicat kudadam puye. Ixe kudadam je'e yaokam — io'e José be. — Emukūyjo buje, epeju juy Egito eipi bewi — io'e Deus ekawēn tojot-jot'ukat.

— Hm hm — José o'e.

¹⁴ O'jenapōn. Egito eipi kay o'ju ip. Bekicat o'tujupa'um ixima daġ, ixi dak.

¹⁵ Oajēm ip. Osodop ip Egito eipi be Herodes itait pima, osodop ip. Ce'ū buje, o'jepit ip jeka be.

Deus ekawēn muwēnuwēn'ukat cuk adi o'jekawēn kuyjeayū be.

Egito eipi bewi okpot otomuwā, i juk
o'e Deus, io'e.

Imēn Deus o'e. Ipot muwēnuwēn o'e. Jesus muwēnuwēn o'e. José itait pima, Deus ja'ō mucūġ ām o'ġuġē.

¹⁶ Wara'at e daġ itaybit cīcāayū epit puje, Herodes itaybit o'e jemuġuykuku iam. Cekay ip itakoma jījā o'e. Te'e ma o'e.

Kuy bima kasopta o'jedaebapuk- -xepxep koato bima. Iboam osunuy itaybit Herodes. Imēnpuye jebekitkit o'ġuju xepxep koatoayū yaokam, pūġ koatoayū dak yaokam. Kap'isuat tak ip o'yaokaka.

O'ġuju Belém ka be- -Belém ka tēġ ma dak.

¹⁷ Imēn Deus tak o'ġuġē. Ja'ō mucūġ ām o'ġuġē. Jeremias kuyje imēn kawēnwēn o'e Deus a'ō daġ.

¹⁸ Kuyje Jeremias o'e:

Raquel o'ya'ijojo ip- -Rama ka beacat. O'tōtōn cīcā Raquel ya'ōberen. Iġuycūġ cīcā o'e ixe. Iba'ore iboceayū be Raquel mucok am. Bekit-

kit'üm'üm kay o'tötön. O'tötön jena-
xegebitbit oe'ü'ü buye, o'ğuy'üm
puye, i juk o'e Jeremias Deus a'ö
dağ.

¹⁹ Herodes e'ü buje, Deus ekawën tojotjot'ukat
waram o'jebapuk José kay. Ixet pima jexeybi o'jeba-
puk. Egito eipi be o'jebapuk.

²⁰ O'jekawën José eju.

— Kuy oe'ü ip- -bekicat aoka pinayū — io'e
cebe. — Bekicat etujowat, ixi dak. Israel eipi kay
epeju juy — io'e José be.

— Hm hm — José o'e.

²¹ Aripit. O'jepit Israel eipi kay. Bekicat o'tuju-
pit, ixi dak. O'jepit ip. ²² Imēnpit iparara o'e José
Herodes ipot puxim- -Arquelau buxim. Judéia eipi
kukukan o'e Herodes'üm tieğ Arquelau. José iboam
itaybit pima, iparara o'e Judéia eipi be jajēm am.
Galiléia eipi be o'ju ip José jeparara pibun. O'ju ip,
waram ma jexeyxey buye.

— Eğuy ğu juy Judéia eipi be — Deus o'e Jo-
sé be, jexeyxey bima.

²³ Oajēm ip Nazaré ka kay. Osodop ip Nazaré
ka be, Judéia eipi be. Imēn Deus ekawën muwēnu-
wēn'ukayū juk o'e ip bekicat muwēnuwēn pima.

Nazaré ka wat je'babuk xeku, i.

Soat ma apēn Deus ekawën muwēnuwēn'ukayū o'e
iap tağ o'jebapuk. Imēnpit soat etabun xipat'üm cīcā
osodop ip- -Nazaré ka wat.

3 Gebujeat kabia João Batista o'ju. Judéia
eipi be o'ju- -Jordāodi be- -uk'a'ūmat pe.
O'ju, Jesus Nazaré ka be bima. Ipi juacat mutay-
bitbin oeku ixé João.

² — Epeyepere juy ikērēat muğēğēap. Deus soat
kukanap kabia jajēm dao ma. Deus a'öbi ijoceyū
muju am jajēm — io'e ipi juacat pe.

³ - ⁴ Camelodap muğēğē osunuy João doti. Jekpu-
mūnpu dak ixee muğēğē osunuy. Ixat osunuy arobi-
dadek puximat, eit koğūnpi dağ tak.

Kuyje Isaiás ixe João muwēnuwēn o'e Deus a'ōbi Israel naxegebit pe.

Aḡokatkat jewāwāwām uk'a'ūmat pe,
i. Imēn jewāwām: “Soat e juy epe-
suemukacūḡ wuykukukat ajēm ām,”
i. “Ie juy epesuemudim ceku am,” i,
io'e.

Imēn e'em Isaiás emudupmubararaktup.

⁵ Gebuje isu ma Jerusalém ka watwat o'ju ip João kay. O'ju João ekawēn a'ijo am. Soat Jordāodi wābu korerenayū dak o'ju, Judéia eipi beacat tak.

⁶ Soat ip o'jewemubatisasan Jordāodi be. O'jewemubatisasan João be. O'ḡubatisasan ixe João.

— Deus etabun ikērēat kuḡ oceju. Imēnpit ikērēat epere pin oce'e. Imēnpuye ocemubatisasan cuy ece — io'e ip João be.

Ijop ekawēn muwēnuwēnayū o'ḡubatisasan João. ⁷ Fariseuyū cucum o'e ip jewemubatisasan Jordāodi be. Saduceuyū dak cucum o'e ip.

João o'jekawēn cebe ip- -Fariseuyū be, Saduceuyū be dak.

— Deus xewi eyenapōn pin, eykay itakoma buye. Eyenapōn pin ikērēat ipi cīcāat puxixim. Abu jeymukūyjo eyenapōn ām? — io'e. — Puybu'it'it puxim eyju. Wuye'ūap mubapukatpu buxim eyju — io'e. — Apēn puybu o'jenapōn wuykat pewi wuykat mupik pima, imēn tak eyenapōn pin Deus o'supi'ajoiat pewi — io'e. ⁸ — Cūḡ ma juy epeku soat etabun. Ikērēat cuy epeyepere — io'e.

Imēn soat itaybit e'em iḡuycūḡ cīcā ip ikērēat e'e buye iam, ḡasū cūḡ ma je'ku ip iam tak.

⁹ — Tūybe Deus ipiat supi'ajoat ḡu wuywebe, wuyju Abraão naxegebitbit puye iān purut eyju e'em — io'e João cebe ip. — Cedaḡ ḡu eyju je-waḡuydadam. Iba'ore ḡu Deus pe wita'a muwexat am Abraão naxegebitbiyūm, jekay kūyjobicayūm — io'e. ¹⁰ — Ḡaxīn ma o'a kukat jajēm ya'a'e'ūmat'ip takat am, yop xik am daxa be — io'e. — Ixe buxim Deus tak ḡaxīn ma ipiat supi'ajoat kūyjobit'ūmayū be, eywebe — João o'e.

¹¹ — Wara'acat omuyku onomuju. Ixe obodi ma ya'öbuyxi. Soat podi ma ya'öbaca. Ön pit ajo peğap ġu cebeam? Cedağ ġu kuka oce ixe a'öbuy-watwat'ukan, oboğ ġu buye. Ön ma eymubatisasan idibi be. Ixe bit Deus biöğbuk ġuöm eywebe, ya'ö dağ eyeku am. Apën daxa be taixee mupik, imën tak Deus biöğbuk pe ikërëat ġuy'ü. ¹² Wuyju taixee xixiğ tumüntata mujëm äm taixee bewi. Tumüntata muxipanpan wuyje tamün'a be. Taixee mupikpiğ daxa be. Imënpuxim Deus küyjobicayü muwajëjëm küyjobit'ümayü xewi. Küyjobicayü ixe xe jeedop soat em. Küyjobit'ümayü bit soat em ipiat supi'ajojo — João o'e cebe ip- -Fariseuyü be, Saduceuyü be dak.

¹³ Jesus oajëm Jordäodi be, ixe jemubatisaan João be. João bit ibu'u o'e Jesus mubatisasan.

¹⁴ — Okay du ejut? — João o'e Jesus pe. — Ön ġu bit. Ēn acä juy ece omubatisan — io'e João Jesus pe.

¹⁵ — Ğasü ma — io'e João be. — Omubatisasan cuy ece. Imën cuy ace, cüğ ma wuyeku am Deus etabun.

— Xipat — João o'e.

O'ğubatisan.

¹⁶ Idibi bewi o'jeu Jesus. Kabi ma o'jekoce. Pukaso jo'iat o'jojojo pupum- -Ibiöğbuk xipacat. Jesus kay oajëm. Oöm Ibiöğbuk xipacat cebe- -Jesus pe.

¹⁷ Ğebu je Deus o'jekawën kabi bewi.

— Ite okpot- -wemukukpinput — io'e. — Soat em ocokcok cïcä cekay — Deus o'e.

4 Gaxin ma Ibiöğbuk xipacat Jesus o'tujowat uk'a'ümat pe. O'tujowat, ibiöğbuk kërëayü kukukat pe ibuyxijo am. ² Uk'a'ümat pe osunuy Jesus ade kabia- -40 kabia. 40 ixima dak osunuy. Jekönkön ġu osunuy. Repi'ajojom cïcä osunuy.

³ Ibiöğbuk kërëayü kukukat oajëm Jesus kay.

— Jesus — io'e. — Deus ipot ën pima, a'öbi ma wita'a juy eyamuwexat päo'am, ere jijä buye — io'e.

⁴ — Ap! — io'e. — Imën e'em Deus ekawëntup:
Wuyetabêg wuyxat o'om puye ġu-
Deus wuymutaicin puye, i. Wuyju je-
kukum, Deus a'ôbuyxi buye acâ, i —
io'e Jesus.

⁵ Ġebuje ibiôġbuk kërëayū kukukat Jesus o'tujowat Jerusalém ka be, Deus a'ôbi ika xipacatka be. Deus eju kawënwënap'a kay oajëm ip- -yaboġat'a kay. O'jeu ibo uk'a jeje. Uk'a yaberenat'a o'yadop. O'jomôġ ibo uk'abi jeje.

⁶ — En Deus ipot pima, ecewemuy'at ijop'abi jejewi ipi ju — io'e. — Imën e'em Deus ekawëntup:
Deus ekawën tojtjot'ukayū ġuju xipan ekuk am, i. Ixeyū jeak ekay wita'a be ei mucakcakap puxim, i —
io'e.

— Imën e'em Deus ekawëntup — io'e Satanás. — Deus ekawëntup tomuju ecewemuy'at — io'e.

⁷ — Ap! — io'e Jesus.

“Cëm paxi Deus ja'ô daġ e'em?”

i'ümġu juy epe'e, i — io'e Jesus.

— Imën tak e'em Deus ekawëntup — io'e Jesus.

⁸ · ⁹ Ġebuje ibiôġbuk kërëayū kukukat Jesus o'tujowat co'a kay- -yaberenat'a kay.

Ibocewi soat o'ġubapuk Jesus pe. Jebacaap, ipi juacat, ipi juacat muju'ukayū; soat ip o'jojojo. Idip cīcā ma osodop ip. Ixe biôġbuk kërëat kukukat ja'ôbuyxi ojuy Jesus pe. Imënpuye ixe o'e Jesus pe:

— Soat kuka ijop oġüm ewebe, owap ën a'ecôġ-côġ puje, omubuyxin puje dak — io'e.

¹⁰ — Ap! — io'e Jesus. — Ecenapôn oxewi, Satanás! Deus ekawëntup e'em:

“Xipat ën,” i juy epe'e Deus pe acâ,

i. Deus a'ô kay acâ epesop kūyjobin-
eykukukat a'ô kay, i — Jesus o'e.

¹¹ Imëneju o'jenapôn ibiôġbuk kërëayū kukukat Jesus xewi. Deus ekawën tojtjot'ukayū oajëm ip Jesus buywat am ġebuje bit.

¹² Itaybicayū Jesus pe o'ḡuwēn ip João omuy daomūnmūnap'a be iam. Imuwēn puje, o'ju Galiléia eipi be Jesus.

¹³ Jesus o'ju Cafarnaum ka kay. Nazaré ka bewi o'ju. Oajēm. Osunuy Cafarnaum ka be iodi xe- -Galiléiadi xe. Zebulom eipi be osunuy, Naftali eipi be dak.

¹⁴ Kuyje Isafas juk o'e Deus a'ōbi:

¹⁵ Judeu'ūmayū kabiaat cīcāat o'jojojo ip- -yoboḡat. Jeipi be o'jojojo ip- -Galiléia watwat, iodi wābu watwat, Jordāodi winabuat ka watwat tak. Zebulom watwat o'jojojo ip, Naftali watwat tak. ¹⁶ Kabiokboḡ pe kaxikxik'iaiyū kabiaat o'jojojo. Kabiaat cīcāat oajēm kuy je'ū ojuyayū kay, i juk o'e Isafas.

O'jekawēn kuyjeayū be.

¹⁷ Ibocewi Jesus kawēnwēn o'e adeayū be.

— Ikērēat mujurūḡrūḡap cuy epeyepere! Eyḡuy-cūḡ cuy epesop, ikērēat kuḡ puye. Deus soat kukanap kabia jajēm dao ma- -kabi beat soat kukanap — io'e.

Imēn soat em kawēnwēn o'e Jesus.

¹⁸ Pūḡ kabia Jesus Pedro o'jojojo, André dak. André Pedro kitpit osunuy. Pedro butet osunuy Simāo Pedro i. Ixeyū o'jojojo Jesus. Xīḡxīḡ'i bima Galiléiadi wābu be o'jojojo. Axima bubuap xixiḡ ip o'e iodi be, axima bubu'ukayū osodop ip puye.

¹⁹ — Epesot okay, oweju jekuku am — io'e Jesus cebe ip. — Axima bubu'ukayūm cuk adi epesop. Iḡasū kawēn idipat epeḡuwēnuwēn ijodiat pe imutabun ip okay — io'e Jesus cebe ip.

²⁰ Axima bubuap o'suiwat ip dao ma.

O'ju ip Jesus kay, ceweju jekuku am.

²¹ Jesus wara'acayū o'jojojo- -xepxepayū- -Tiago, João dak. O'jojojo, ibocewi cucum pima. João Tiago kitpit osunuy. Zebedeu ipotpoyū osodop ip. Kobe be osodop ip Zebedeu eju. Axima bubuap muwaketken o'e ip.

— Epesot okay, oweju jekuku am — Jesus o'e Zebedeu ipotpoyū be.

²² Kobe o'suiwat ip, jebay dak. O'suiwat ip cekobe be.

O'ju ip Jesus kay. Dao ma o'ju ip, Jesus eju jekuku am.

²³ O'ju Jesus soat tağ--Galiléia eipi dağ. Adeayū mutaybitbin o'e Deus eju kawēnwēnap'a be. Kawēn idipat muwēnuwēn o'e adeayū be. Deus soat kukanap muwēnuwēn o'e. Iwātaxipiyū o'ģu'ada'ada. Ibaca'ūmayū mubacacan o'e Jesus.

²⁴ Imēneju itaybicayū Jesus awēğ o'ģuwēnuwēn. Soat Siria eipi beacat o'jekūyjojo. Soat iwātaxipiyū: ipi kuğayū, ibiōğbuk kērēat kuğayū, yağuybabi'ūm'ukayū, ijebit e'ūat puximayū; soat ip o'tujowat Jesus kay. Soat ip o'ģu'ada. ²⁵ Adeayū o'ju ip Jesus tomuju--ade jījā. Galiléia eipi bewiyū, Dez Cidades ka bewiyū, Jerusalém ka bewiyū, Judéia eipi bewiyū, Jordāodi winabu wiayū; soat ip o'ju Jesus tomuju.

5 Adeayū jojom pima, o'ju Jesus, ade jījā ip puye. Co'a kay o'ju. O'jeu co'a dağ. Oabik iboce. Cebekitkit oajēm Jesus kay--ceweju etaybitbinayū.

² Gebuje o'jekawēn jebekitkit pe. Imutaybitbin o'e Jesus.

³ — Icokcok okay itabutpinayū, jetaybicap puye — io'e Jesus. — Itaybit ip Deus oce mubacanucan pima acā, Deus a'ō dağ oceku iam. Icokcok ip, soat em Deus xe jeedop puye.

⁴ — Waayū dak icokcok ip — Jesus o'e. — “Epetōtōn ġu juy epesop,” Deus waayū be e'em. Imēnpuye icokcok cīcā je'e ip — io'e Jesus.

⁵ — Icokcok ya'ōkadidim warara'cat kukayū. Xipacat je'jat ip Deus xewi--apēn Deus o'e'e iap tağ.

⁶ — Icokcok cīcā jeedop ip- -Deus xe cūḡ cīcāayū. Apēn idibi kay wuyju, wuybipuruk pima, imēn tak Deus bikuyap kay ixeyū dak jajēm. Apēn puybit kay dak wuyrere bima, imēn tak Deus bikuyap taḡ jeku pin ip. Imēnpuye Deus ibikuyap je'ḡūm cebe ip- -cūḡ cīcāayū be. Cūḡ cīcā e'em ip — io'e Jesus.

⁷ — Icokcok cīcā jeedop wara'acat kay itabotaidabotbocayū — io'e. — Deus tak itabotaidabotbot jeenuy cekay ip — io'e Jesus.

⁸ — Icokcok cīcā jeedop ip- -yaḡuy'isuayū. Deus cocom jeedop ip — io'e Jesus.

⁹ — Icokcok itakomaat mudinudin'ukayū. Jekpotpoyū buxim Deus tak jukuk ip — io'e Jesus.

¹⁰ — Icokcok cīcā jeedop ip- -Deus bikuyap taḡ jekuku'ukayū. Ipiat ajojom ip, Deus bikuyap taḡ jekukum puye. Imēnpit soat em Deus xe jeedop ip — io'e.

¹¹ — Okay eyetabut puye, adeayū itakoma jeedop eykay. Imēnpit eycokcoḡ ma epesop — io'e cebe ip. — Eycokcoḡ ma epesop, eymuymuy ip pima, xipat'ūm eykuk ip pima dak, eyawēḡ mukērērērēm ip pima dak. Eycokcoḡ ma epesop itakomaayū imēn jeykuk, okay eyetabut puye — Jesus o'e. ¹² — Imēn tak kuyjeayū Deus ekawēn muwēnuwēn'ukayū xipan ḡu o'jukuk ip. Eycokcoḡ cīcā epesop. Kabi be bit, Deus xe bit, ade kuḡ epesop- -idipat kuḡ — io'e Jesus.

¹³ O'jekawēn jebekitkit pe. Wuymutaybinap muwēnuwēn o'e Jesus- -imēnpuximap ekawēn.

— Ipi juacat pima eyju, kawta buxim epesop — io'e. — Kawta tayu buye, xipat cīcā. Imēnpit takō'ōm puje, xipat ḡu kuka. Te'e ma kuka atakuk. Apēḡām tak takuḡ kuka acesop? Taxik am acā. Taxik puje, tamucakucaḡ kuka wuyju — io'e Jesus.

Imēnpuximap kawēnuwēn o'e Jesus. Kawta wuyxat mukun. I'o pin wuyju, wuyxat pe kawta opop puye. Imēnpuxim Jesus kay itabucayū ekukuap cuy ipi juacat mudim. Jekuku ojuy ipi juacat Deus a'ō daḡ, Jesus kay itabucayū ekukuap jojo buye.

Tayu'üm pima bit, xipat ġu kuka kawta. Aceta-xik kuka, tamucak am. Imēnpuxim tak cebekitkit Jesus kay itabut'üm'üm jekukum pima bit, xipat ġu kuka, ipi juacat mudim'üm kuka buye.

¹⁴ - ¹⁶ Ipi juacat etabixe kabiahamat puximayū epesop — io'e Jesus. — Xipan eyekukuap cocom pima ip, Deus awēġ mubuyxin jeedop ip- wuyebay awēġ- kabi beat awēġ — io'e Jesus. — Apēn e daġ wuyjojo but, kabiaham pima; imēnpuxim Deus awēġ buyxin put warara'acayū, xipan eyju jekukum pima — io'e Jesus.

— Ipi juacat eyju bima, kabiaat puxim epesop — io'e. — Aġokairi co'a be wuysukamuy bima, ika ba'arēm ġu o'sukadop. Ikamunēm pa'ore. Kuy bi ma ikabapuk soat pe, co'a jeje buye — io'e. — Eyju dak iba'arēm ġu epesop, xipan epekuku bima. Soat pe eyekukuap je'bapuk. Imēn ipi juacat pe kabiaat puxim eyju, itaybit ip puye ajo xipat Deus xe iam, eyekukuap cocom ip pima — io'e.

— Lamparina musop puje, ico diotpe ġu ajomuy. Uk'a be acejomōġ imūn ceje. Um ma ajomuy kabia i'e am soat uk'a beat kay, soat ijo but am.

¹⁷ O'jekawēn Jesus jebekitkit pe.

— Epeyewaġuy ġu juy “Osodot teku Moisés ekawēn mu'üm ām, Deus ekawēn muwēnuwēn'ukat imutaybitbinap mu'üm ām tak” i. Imēġām ġu ojut. Ojut ma imutaybit am apēn ape iboap ekawēn osodop iam — io'e Jesus. ¹⁸ — Moisés ekawēn i'üm pa'ore cebe ip. Soat Deus o'e iap taġ je'bapuk — io'e Jesus. — Kabi oi'üm kuka, ipi dak. Deus ekawēn pit i'üm ġu. Pūġ a'ō dak ka'ūma ma i'üm. Soat epa'ūmap jajēm. Iboap ekawēn tak jeedop- Moisés ekawēn. Iboap kay ġebum cuy epesop — io'e.

¹⁹ — Imēnpit pūġpūġ Moisés ekawēn kay ġu. Kūyjobit ġu ip Moisés ekawēn kay. Warara'acayū mutaybitbin ip kūyjobit'üm ām Moisés ekawēn kay. Kabi be bima, Deus xe bima, “Teku Deus a'ō kaysū ā. Xipatput acā teku,” i je'e soat kūyjobit'ūmayū be.

— Pūgpūg ma Moisés ekawēn kay jījā. Kūyjobit cīcā ip. Warara'acayū mutaybitbin ip kūyjobit am Moisés ekawēn kay. Kabi be bima, Deus xe bima, “Teku Deus a'ō kay jījāat. Xipacat teku,” i je'e soat kūyjobicayū be.

²⁰ — Oḡuwēn eywebe: Deus bikuyap taḡ eyeku bimap acā, eywebe ajēm put Deus kay. Fariseuyū bodi ma Deus bikuyap taḡ eyeku'ūm pima, Deus xe ḡu epesop soat em--Moisés ekawēn imutaybitbin'ukayū bodi ma dak — io'e Jesus.

²¹ — Eyju juk epeya'ījojo apēn Moisés o'e iam. Epeyaoka ḡu juy. Pūg em tak ka'ūma. Wara'at o'yaokaiat epetujowat cuy ibimāmāat ekawēn coco'ukat pe, i — Jesus o'e.

²² — Ōn pit e'em eywebe: Soat cuy epetujowat ibimāmāat ekawēn coco'ukat kay--jewaḡo kay itakomaayū. Iboce ipiat supi'ajoat itakomaat pe. “Ka'ūmaat ma ēn” i'e'e'ukat pe bit itakomaat podi ma ipiat supi'ajoat ibimāmāat ekawēn coco'ukayū kukukat a'ō daḡ. “Akpīdapi” i'e'e'ukat pit daxaboḡ kay je'ju--ipiat'ajoat ka kay — io'e.

²³ - ²⁴ — Imēneju eykitpit epeḡudin cuy, eykay itakoma bima. Iūmūmap epesuiwat Deus eju kawēnwēnap'a be. Ajo epetojot imōḡ ām Deus etabi-xeat'a be, ijop epesuiwat. Epeju juy eykitpit kay, imudin am — io'e Jesus. — Epeju juy, juk epeōm ma'ḡu Deus tuk'a be. Epeju juy, eyju ḡebum puye “Okitpit itakoma okay,” i — io'e Jesus.

— Eykitpit mudin puje acā, epeyepit iūmūmap ūm ām Deus pe — io'e Jesus.

²⁵ — Eybure eymuymuy bima, eyweroap teida'ūm pima, dao ma juy epeḡudin eybure. Xipan epeyekawēn — io'e Jesus. — Cucum pima ibimāmāat ekawēn coco'ukayū kay, xipan epeyekawēn cebe — io'e. — Imēn eyekawēn'ūm pima, imudin'ūm pima, eymuymuyat eydujowan ibimāmāat ekawēn coco'ukayū xe. Ixeyū eydujowan daomūnmūnap'a kukat kay, eymōḡ ām daomūnmūnap'a be. Eyenapōn pa'o-re kuka epe'e ibocewi bit — io'e. ²⁶ — Icēmān ōn

e'em eywebe. Daomūnmūnap'a be epesop soat em. Soat ġu eyeweroap teida'ūm pima, jeymujēm ġu ip daomūnmūnap'a bewi — io'e Jesus cebe ip.

²⁷ — Moisés o'jekawēn kuyjeacat pe — Jesus o'e.

Ecepo ġu juy wara'at ayacat eju-
etayxi eju acā. Aoyū dak jepo ġu juy
ip wara'at aġokatkat eju- -jektop eju
acā, i — io'e.

— Eyetaybit iboam — io'e Jesus. ²⁸ — Imēnpit ōn e'em eywebe: Ayacat kay aġ pima eyju, dabi'o pin pima dak, kuy ceweju jepo iap co'i epe'e. Eyaġuy be ma kuy ibapuk ayacat kay — io'e Jesus. ²⁹ — Imēnpuye epeyepere juy jeakap ikērēat kay. Eyba'at kadiata'ūm pima bit purut, kuka ikērēat epeġuġē. Imēn ikērēat epeġuġē ġu ipiat'ajoap puxixim — io'e -Jesus o'e.

Imēn Jesus o'e, Jesus xe wuyta wuybikuyap puxim. Wuybikuyap pewi wuyju ikērēat kay bima, iboap ibikuyap taġ jekukum ġu juy acesop. Puġ ēm tak ka'ūma.

³⁰ — Epeyepere juy ikērēat muġeġēap tak — io'e Jesus. — Eyba'at kadiatpu'ūm pima bit purut, kuka eybum ikērēat epeġujurūġ. Imēn ikērēat epeġuġē ġu, ipiat'ajoap puxixim — io'e Jesus. Imēn Jesus o'e, Jesus xe wuyba wuye'eap puxim. Wuye'eap pewi wuyju ikērēat mubapuk pima, iboap e'eap taġ jekukum ġu juy acesop. Jepere juy wuyju.

³¹ — Moisés o'jekawēn waram kuyjeacat pe.

Aġokatkat jetayxi epere pin pima,
otayxim ġu ēn ġasū bit iaptup cuy
tupūm cebe. Imēn cuy etupūm cebe,
cepere am, i — Jesus o'e.

³² — Ōn pit e'em eywebe: Aġokatkat jetayxi epere buje, jetayxi wara'at eju o'jepo ġun ma'ġu, ixe aġokatkat ikērēat kuġ Deus xe. Ixe ayacat waram jewebumūn puje, ikērēat kuġ Deus xe, itop ikērēat o'ġuġē buye. Wara'at aġokatkat tak ixe ayacat eju jewebumūn puje, ikērēat kuġ Deus xe — io'e Jesus.

³³ — Moisés o'jekawēn.

Icēmān cuy epe'e. Eybu'um ġu juy eytabucap kay epesop. Eya'ō daġ cuy epeku soat em. Eya'ō kay juy epesop- -ajo imuġēap ojuy iap kay. Kuy juk epeyekawēn Deus pe: 'Wa'ō kay'ūm pima, ipiat osupi'ajoat owebe,' i juk epe'e. Imēneju eya'ō kay juy epesop, i — io'e Jesus.

³⁴ — Ōn pit e'em eywebe: Eyetabucap epe'e bima, epeyekawēn ġu juy Deus pe: "Wa'ō kay'ūm pima, ipiat osupi'ajoat owebe," i ġu juy epe'e. Pūġ em tak ka'ūma — io'e Jesus. — "Etaybit icēmān kabi kake. Imēnpuxim cuy etaybit icēmān e'em ōn ewebe," i'ūmġu dak cuy epe'e warara'acat pe. Imēn epe'e bima, "Etaybit icēmān Deus kake," i bima bit purut ka epe'e, kabi Deus abikbikap puxim puye. Imēn pima bit purut ka epe'e, Deus kabi be omuyiat puye.

³⁵ — "Etaybit icēmān ipi kake. Imēnpuxim cuy etaybit icēmān e'em ōn ewebe," i'ūmġu dak cuy epe'e warara'acat pe. Imēn epe'e bima, "Etaybit icēmān ipi o'ġuġēiat kake," i bima bit purut ka epe'e, ipi Deus imūnka buxim puye. Imēn pima bit purut ka epe'e, Deus ipi o'ġuġē buye.

— "Etaybit icēmān Jerusalém ka kake. Imēnpuxim cuy etaybit icēmān e'em ōn ewebe," i dak ūmġu juy epe'e warara'acat pe. Imēn epe'e bima, "Etaybit icēmān Jerusalém ka watwat kukukat kake," i bima bit purut ka epe'e, Deus Jerusalém ka watwat kukukat cīcāat puye.

— Imēneju epe'e ġu juy soat pe. Pūġ em tak ka'ūma. Soat kake ip, Deus a'ōbiat ebapukpukap puye.

³⁶ — "Etaybit icēmān wa'a kake. Imēnpuxim cuy etaybit icēmān e'em ōn ewebe," i dak ūmġu juy epe'e warara'acat pe. Imēn ġu juy epe'e, eywebe iba'ore buye yaypan'isuat waram ebapuk am, yaypan cīcā buje; eywebe iba'ore buye dak yaypan cīcā ebapuk am, yaypan'isuat pima — io'e Jesus.

³⁷ — I juy epe'e, "Icēmān," i. I dak epe'e, "Ka'ūma." i. Imēn acā epeyekawēn cuy, ibiōḡbuk kē-rēayū kukukat pewi beku wara'at ekawēn ajēmjēm puye -dapxi iap ekawēn ajēmjēm puye — io'e.

³⁸ — Moisés cuk o'jekawēn.

Aḡokatkat ta'ūm pima, eyju dak wara'at epesutamu'ūm, i. Aḡokatkat tūy'uk puje, wara'at tak epetūy'uk cuy, i — io'e Jesus.

³⁹ — Ōn pit e'em eywebe: Ikērēm eykukayū eyba'at kadi eydopaoka buje ip, wara'at kadi koreren epe'e eydopa, wara'at kadi eydopaoka am — io'e Jesus. — Ikērēm ḡu juy ip epejukuk — io'e. ⁴⁰ — Eyekamixa kay ip pima, ibimāmāayū kay eydujowan pima, epeḡūm cuy cebe ip. Eyekabek tak epeḡūm — io'e Jesus. ⁴¹ — Wara'at ka bewiat sorara a'ōbi pūḡ kilometroat taḡ jebubut ey mudujowan puje, epetujowat cuy xepxep kilometroat taḡ.

⁴² — Eyxewi iojuy buje, epeḡūm cuy cebe. Eyweju o'jekawēn pima: "Eybubut epeḡūm cuy owebe darem. Waram iūmūm eywebe ma," i; darem cuy epeḡūm cebe — io'e Jesus.

⁴³ — Kuyje Moisés o'jekawēn.

Eyduk'a xeyū xipan epejukuk, i. Eykay itakomaayū bit xipan ḡu juy epejukuk, i — io'e Jesus.

⁴⁴ — Ḡasū oce eywebe: Eykay itakomaayū xipan cuy epejukuk. Xipan ḡu eykukayū beam cuy epeyekawēn Deus eju — io'e Jesus. — "Ōn odin ip cekay," i juy epe'e, kawēnwēn pima Deus pe.

⁴⁵ — Imēn jekukum pima, kabi beat ipotpoyūm epe'e. Soat peam Deus kaxi o'ḡuju kabi be-xipacayū beam, xipat'ūmayū beam tak — io'e Jesus. — Soat peam tak Deus muba'at o'ḡuju ipi kay-cūḡat peam, cūḡ'ūmat peam tak — io'e. ⁴⁶ — Eykayayū acā ikukpin eyxe bima, imēn xipat Deus xe du? Ka'ūma. Apēnpuye Deus a'ōbi xipacat ūmap wi-wim eyju? Jeyipi iecuḡap peam dinheiro bubu'ukayū imēn tak ixeyū xe jekayayū ikukpin jekuku ip-eyxe

cekay'üm cīcāayū imēn jekuku ip. Eykay'ūmayū dak xipan cuy epejukuk — io'e Jesus. ⁴⁷ — Eybureyū eju acā eyekawēn puje, ajo ġu e'em cīcā eyju. Imēn tak Deus kay itabut'ūmayū jekuku ip.

⁴⁸ — Wuyebay xipāt cīcāat soat em. Ixe buxim cuy epesop- -wuyebay icēmat puxim cuy epesop- -kabi beat puxim — io'e Jesus.

6 O'jekawēn Jesus jebekitkit pe.
— Eyday'em'um cuy epesop — io'e Jesus.
— Wara'acayū be eyjojoap puxim ġu cūġ ma epeku-ku — io'e. — Imēn cuy epeġuġē ġu ixeyū be eyjojoap puxim. Imēn epeġuġē bima, Deus xewi ka'ūmġu jey-jat, eye'eap puye. Ixe kabi beat xewi ka'ūmġu epejat — io'e ya'ījojo'ukayū be. ² — Imēnpuye ibubutbet'ūmat kay eyetabotaidabotbot pima, cebe eyebut-but'in ūmūm pima, eyawēġ epeyawēġmupōġpōġ ġu juy — Jesus o'e. — Eymuġuykuku'ukayū jawēġ mupōġpōġ ojuy ip imēn ma. Deus tuk'a be jawēġ mupōġpōġ ip, e daġ tak. Jebureyū ekawēn kay jījā ip, “Xipāt cīcāat ēn,” i bima cebe ip. Iboap ekawēn kay jījā ip. Icēmān oce eywebe. Jebikuyap taġ je'jat ip. Imēnpit ka'ūma ma je'jat Deus xewi — io'e Jesus ya'ījojo'ukayū be.

³ — Eyju bit ibubutbet'ūmat pe iūmūm pimāp, iba'arēm ma juy epeġūm, jebure jījāat cuy itaybit ġu iūm ām je'e — io'e cebe ip. ⁴ — Iba'arēm iūmūm pima eyju, ixē kabi beat o'jojojo- -wuyebay. Xipacat je'ġūm eywebe. “Xipāt ēn oxe,” Deus e'em eywebe — io'e Jesus.

⁵ — Eyju bit warara'acāt muġuykuku'ukat puxim ġu juy epesop. Soat etabutpe ip kawēn pin Deus eju. Deus eju kawēnwēnap'a be kawēn pin ip soat etabutpe- -uk'a ukpibubu daġ tak. Warara'acāt pe je-jojoan acā ip kawēnwēn Deus eju. Warara'acāt kawēn ām ojuy ip. “Xipāt ip. Deus kay jījā ip,” i. Warara'acāt o'jewaġuy cebe ip ojuy ip. Warara'acāt ijo-jom ip iap acā je'jat ip. Deus xewi bit ka'ūma ma je'jat ip.

⁶ — Eyju bit eyduk'a be juy epeōm, Deus eju kawēn ām — Jesus o'e cebe ip. — Eyduk'a exīntabi juy epetomudip, warara'acat pe eyjojoap puxim. Epetomudip, kawēn ām kabi beat eju- -ijo ba'oreat eju- -wuyebay eju. Deus imēn eyjojo. Xipacat je'gūm eywebe. "Xipat ēn oxe," i'e'em tak eywebe — io'e Jesus cebe ip. ⁷ — Deus eju kawēnwēn pima, eyejoojuyap ade em ġu juy epeyekawēn — io'e. — Imēn Judeu'ūmayū o'jekawēn ip Deus baroyū be. Tūybe ocekawēn kay ya'ijoyo je'e oceju ade ma kawēnwēn puye iān je'e ip. ⁸ — Eyju bit ka'ūma. Imēn epeyekawēn ġu juy Deus eju. Deus eyebay buxim. Kabi beat teku. Eyekawēn awap, itaybit ajo-kuġ ġu eyju iam — io'e.

⁹ — Imēn cuy epe'e, Deus eju kawēnwēn pima: "Bay!" i juy epe'e kabi beat pe. "Soat cuy ibuyxin ebutet kuġ jeenuy," i. ¹⁰ "Ġaxīn ma juy soat kukukan eġuy," i dak. "Soat kukukan eġuy bima, ipi juacat cuy jekukum jeedop ip ebikuyap taġ apēn kabi beacat cucum ip ebikuyap taġ," i. ¹¹ "Ġasū ocexan cuy eġūm ocewebe," i. ¹² "Apēn oceju ġebum ġu apēn warara'acayū be juk adi warēmtag ocejuk iap kay; imēn tak ġebum ġu juy eġuy apēn cuk adi ikērēat oceġujurūġrūġ iap kay," i dak. ¹³ "Oca'ō mubacanican cuy eġuy ocewebe ikērēat mujurūġap puxim. Ikērēat tak eju'uk cuy ocewebewi," i dak cuy epe'e — io'e Jesus.

— Imēn ma juy epe'e Deus eju kawēnwēn pima — io'e. ¹⁴ — Eyju ġebum'ūm pima apēn warara'acayū be juk adi ikērēm eykuk iap kay; ikērēat epeġujurūġrūġ cīcā ma'ġu, Deus tak jeġebu ġu apēn juk adi ikērēat epeġuġēġē iap kay. Kabi beat jeġebu ġu- -wuyebay — io'e. ¹⁵ — Eyju ġebum pima bit apēn warara'acayū be juk adi ikērēm eykuk iap kay, Deus tak jeġebu apēn juk adi ikērēat epeġuġēġē iap kay. Wuyebay xeku — io'e Jesus.

¹⁶ — Deus kay ġebumap kay jekōnkōn'ūm pima eyju, eyġuycūġcūġ ġu juy epesop. Eymuġuykuku'uk-ayū iġuycūġcūġ oekuku ip, Deus kay ġebumap kay jekōnkōn'ūm pima ip. Iġuycūġcūġ oekuku ip, soat itaybit ojuy, “Teku Deus kay ġebumap kay jekōnkōn ġu iam. Jebureyū juk o'jekawēn ip. “Deus kay jījāat teku,” i. Imēnpuye jebikuyap taġ cuk o'jat ip- -soat ma. Iboap kay ġebum cuy eyju — io'e Jesus. ¹⁷ — Eyju bit Deus kay ġebumap kay jekōnkōn'ūm pima, epeyewedopawuywuy juy. Epeyewedapmusem cuy dak — io'e. ¹⁸ — Imēn wara'acayū itaybit ġu ip teku jekōnkōn ġu iam. Deus acā je'e itaybit iba'arēm jekōnkōn ġu teku iam. Ijo ba'oreat acā itaybit. Xipacat je'ġūm eywebe. “Xipat ēn oxe,” i dak e'em Deus eywebe — io'e Jesus.

¹⁹ O'jekawēn jebekitkit pe.

— Eywebeam ade bubuk epeġuxipan ġu juy epesop — Jesus o'e. — Ijoce imuxipan ġu juy. Ijoce kopi'i eybubut jo'o. Hi'ep eybubut iokok an e'em. Ibukurukat eyduk'a be ōm'ōm eybubut tujupa'um am — io'e. ²⁰ — Kabi be bit Deus xe epesop soat em. Eycokcok cīcā epesop. Kopi'i kake ġu Deus xe. Hi'ep kake ġu dak. Ibukurukayū kake ġu dak — io'e. ²¹ — Eybubut ijodi bima soat em ġebum epesop eybubut kay. Kabi be eyġuy pin pima bit, ġebum epesop kabi beat kay. Imēnpuye eycokcok cīcā epesop Deus xe soat em — io'e Jesus.

²² — Wuyeta kabiaap puxim. Wuyjebit peam ixē kabiaap. Wuyetadip pima soat ijo but wuywebe. Kabia daġ ajeku. Soat ijobucap wuyekukuap puxim- -Deus xe cūġ ma wuyekukuap puxim. ²³ — Wuyetakērē bima bit, ijo ba'ore wuywebe. Kabiok taġ ajeku. Kabiok taġ jekukuap ikērēat mujurūġrūġap puxim. Imēnpuye kabiaap kabiok e'em pima, kabiok cīcā e'em wuywebeam. Ikērēat mujurūġrūġ cīcā wuyjuyū.

²⁴ — Pūġ'a be, uk'a be bima, iba'ore ibuywat-wat'ukat pe xepxepayū beam kapik am. Kariwa-

wayū wara'at taḡtaḡtaḡ e'em pima, itakoma kuka o'e pūḡ kay, jekariwa kay, wara'at jekariwa ikuk pin cīcā bima. Kūyjobit kuka o'e pūḡ a'ō kay, wara'at a'ō kay kūyjobit'ūm pima. Imēnpuxim dinheiro kay jījā bima, Deus kay jījā ḡu epe'e — io'e Jesus. ²⁵ — Imēnpuye oḡuwēn eywebe: Eyaḡuy'ūm ḡu juy epesop eybubut kay — Jesus o'e cebe ip. — “Ajo paxi acejo'o?” i'ūmḡu juy epe'e — io'e. — “Ajo paxi acetikōn?” i'ūmḡu dak cuy epe'e — io'e. — “Ajo paxi aceḡuōm wuydotim?” i'ūmḡu dak cuy epe'e. Xipat eyxat kuḡ pima, eydoti kuḡ pima dak. Imēnpit ibodi ma xipat soat em Deus xe eydop am — io'e.

²⁶ — Gebum cuy epesop wasū kay — io'e Jesus. — Pupum ip kaḡi be. Taidadam ḡu ip. Jeku beat tak pupum ḡu ip, jeku bewiat mūn'a be imōḡ ām. Imēnpit Deus ixat ūmūm cebe ip -wasūyū be. Deus xe wasū teiboḡ ḡu -wuyebay xe -kabi beat xe. Imēnpit aḡ cekay ip. Imēnpuxim wuykay dak soat em aḡ. ²⁷ Ade koato mabuk wetabēḡ oḡuy iap kay ḡebum cīcā bima, eyetabēḡ xe'e? Ka'ūma. Gaxīn ma aco'i epe'ū.

²⁸ — Pām eydoti dak? Apēnpuye eyaḡuybabi'ūm eydoti kay? Eyaḡuybabi'ūm ḡu juy. Gebum cuy epesop apēn tūmūntitit aypapan iap kay. Tūmūntitit kapikpiḡ ḡu. Jesay muḡēḡēm ḡu dak ip. ²⁹ Icēmān ōn e'em eywebe. Salomāo ibubut adeat osunuy. Idip cīcāat kuḡ osunuy -jesay kuḡ. Salomāo dipap podi ma bit titip tip taḡatip. ³⁰ Gasū ma tūmūntitit titetabēḡ e'em. Kuyaje bit tite'ū e'em. Titip Deus a'ōbi. Imēnpuxim ja'ōbi dak eyemukaypinput je'ḡūm eywebe. Eyetabutsu ma'ḡu cekay — io'e Jesus. ³¹ — Imēnpuye eyaḡuybabi'ūm ḡu juy epesop. “Ajo paxi acejo'o?” i'ūmḡu juy epe'e. “Ajo paxi acetikon?” i dak. “Ajo paxi aceḡuōm?” i dak — io'e. ³² — Judeu'ūmayū yaḡuy'ūm iboap kay -soat kay. Eyebayat pit itaybit eyju ikuḡ'ūm pima iam -kabi beat.

³³ — Koap ḡebum cuy epesop Deus soat kukan je'e iap kay -Deus ebikuyap kay dak. Imēn ḡebum pima, Deus soat je'ḡūm eywebe. Eyxan je'ḡūm, eydotim tak — io'e.

³⁴ — Imēneju eyaḡuybabi'ūm ḡu juy epesop kuyajeat kabia kay. Kuyaje jajēm pima, eyetaybit epe'e ajo o'jebapuk ixe kabia iam--ajo xipat, ajo xipatpūt tak. Gasū bit eyaḡuybabi'ūm ḡu juy epe-sop kuyajeat kabia kay — io'e Jesus.

7 O'jekawēn jebekitkit pe.
— “Eykērē jījā Deus xe,” i'ūmḡu juy epe'e warara'acat pe. Imēn tak Deus “Eykērē oxe,” i'ūmḡu je'e eywebe. ² “Ikērēat kuḡ ēn,” i'ūmḡu juy epe'e warara'acat pe. Imēn e'em'ūm pima, Deus “Ikērēat kuḡ eyju,” i'ūmḡu dak je'e eywebe. Apēn warara'acat pe eyekawēnap puxim Deus tak je'e eywebe ajo xipat jexe, ajo xipat ḡu jexe. Warara'acat pe epeḡūm pima, Deus tak je'ḡūm eywebe. Apēn cuk epeḡūm iap puxim epejat — io'e Jesus.

³ Wuymutaybitbinap ekawēn muwēnuwēn o'e Jesus- imēnpuximap ekawēn. Jebekitkit pe imuwēnuwēn o'e, itaybit am ip. Warara'acat ekukuap mukorēm ām, wuyekuku bima, imukorēmap tōm puxim Jesus xe, ip puxim tak cexe. Imēnpuye Jesus o'jekawēn jebekitkit pe.

— Te'e ma eyju jeakaḡ eybure eta beatōmtōm kay, eyeta beap'ip cocom'ūm pima. ⁴ Te'e ma eyju e'em cebe: “Ma. Otōmtōm'uk eta bewi,” i, eyeta beap'ip cocom'ūm pima — io'e Jesus. ⁵ — Eyju jewemuḡuykukukum. Koam eyeta beap'ip cuy epeyop'uk.

— Yop'uk puje, iba'ore ḡu je'e eyewebe tōmtōm'uk am eybure eta bewi. Yop'uk puje, xipan epe'e ijojom — io'e.

Imēn Jesus wuymutaybitbin warara'acat kay ḡu juy acejeak iam--wuyekay acā juy acejeak ikērēat muḡē buje iam--yopīt ma ikērēat muḡē buje iam, yoboḡ ma ikērēat muḡē buje iam tak.

⁶ — Wekawēn icēmān — io'e Jesus. — Soat pe ḡu juy epeḡuwēn wekawēn. Akurice buximayū be ḡu juy epeḡuwēn, wa'ō kay ḡu ip puye. Ya'ōpuruḡ jede ip. Warēmtaḡ webekitkit o'jukuk ip — Jesus o'e. — Xipat ma wekawēn. Soat pe ḡu juy wekawēn epeḡu-

wën. Dajebaro buximayū be dak ġu juy epeġuwën. Itaybit ġu ip ya'ödip ma iam. Ixeyū be wekawën kawën te'e maap puxim — Jesus o'e cebe ip.

⁷ O'jekawën jebekitkit pe.

— Deus xewi juy epejoojuy. Iojuyjuy bima, epejat. Ixe xewi juy epejokudada. Ikudadam pima, epe-tobuxik. Ixe xewi iojuyjuyap xīntabi be taġtaġtaġ'iap puxim. Xīntabi be taġtaġtaġ'i bima, tomudip'uk ip eymuōm ām. ⁸ Soat ojujuy'ukat je'jat; soat kudada'ukat tobuxik; xīntabi taġtaġtaġ'iat pe xīntabi tomudip'uk ip — io'e.

⁹ — Wita'a ġu epeyaūm eyipotpot pe “Pāo'a kay ōn” i'e buje. Ka'ūma ma ey'in wita'a o'yaūm kuka cebe pāo'a yaūmap tieġ. ¹⁰ Puybu ġu epesubuūm cebe, “Axima kay ōn” i'e buje. Kaūma ma ey'in puybu o'subuūm kuka cebe aximaūmap tieġ. ¹¹ Eyju ikērēat kuġ. Imēnpit eyju ma xipacat ūmūm eyipotpoyū be. Apēn eyju iūmūmap podi ma eyebayat pit xipacat ūmūm jexewi iojuyjuy'ukayū be- -kabi beat pit. ¹² Eybikuy warara'acat pe xipan eykuk am. Imēnpuye xipan cuy warara'acat epejukuk. Iju Moisés ekawën, Deus ekawën muwēnuwën'ukayū emumutaybitbinap tak.

¹³ Jesus tak o'jekawën.

— Epeōm cuy xīntabi itok'īt taġ. Xīntabi itokboġ pit daxaboġ kay wuymujujuap e ma- -ipi-at'ajojoap kay. E pa'ore'ūmat e. Xīntabi itokboġ. Ade wuyjuyū ie daġ jekukum. ¹⁴ Xīntabi itok'īt pit e pa'oreat e xīntabi. Wuytait'icap e. Pūġpūġ ma wuyjuyū ie dobuxixiġ.

¹⁵ Jesus tak o'jekawën jebekitkit pe.

— Eyday'em'um cuy epesop eymuġuykuku ojuyayū kay- -jewexe Deus ekawën muwēnuwën'ukayū kay. Omuyku ip. Ovelha jo'i ma'ġu ip jajēm, badi bit ip ika'uayū buxim, akurice buxim. Eykay itakomaayū ma ip, xipacat co'iaiyū ma'ġu ip jajēm — io'e. ¹⁶ — Eyetaybit widaōhō ya'a'e ġu e'em- -uva'a iam. Eyetaybit tak aru'ip taġ fiġo'a'e ġu e'em

iam. Imēn eyetaybit widaōhō, aru'ip tak. Ya'a nomuju eyetaybit iboyūm. Imēnpuxim tak eyetaybit je'e abuyū jewexe Deus ekawēn muwēnuwēn'ukayū iam. Xipat'ūm cekukuap tomuju eyetaybit ixeyūm.

¹⁷ — Yopxipacat'ip ya'a xipat e'em. Yopxipat'ūmat'ip ya'a dak xipat ġu ma e'em. ¹⁸ Yopxipacat'ip pit yaku'ūm an ġu aypapan. Yopxipat'ūmat'ip tak yaku an ġu aypapan. ¹⁹ Yop yaku'ūmat'ip soat wuyju ixixiġ, takatkan daxa be ixik am. ²⁰ Apēn yopxipat'ūmat'ip ya'a dak xipat ġu ma e'em; imēnpuxim jewexe Deus ekawēn muwēnuwēn'ukayū xipat ġu jeku.

— Imēneju eyetaybit epe'e pebicayū jewexe Deus ekawēn muwēnuwēn'ukayū, xipat'ūm cekukuap tomuju — io'e Jesus.

²¹ — Deus soat kukanap kabia je'e ip owebe: “Ēn ocekekukat,” i. Soat pit jeōm ġu Deus xe kabi be -webay ibikuyap taġ cekuibiyū acā -kabi be omuyat a'ō kayayū acā — Jesus o'e.

²² — Ġebujeat kabia Deus abuyū ikērēat kuġ iap ġuwēn. Adeayū je'e'e ip owebe: “Ocekekukat! A'ōbi ocekuku. Xipacap oceġuwēnuwēn -Deus soat kukukaniap muwēnuwēn oceju,” i. “A'ōbi ibiōġbuk kērēayū oceġujēmujēm wuyjuyū xewi,” i dak je'e. “A'ōbi ocewebe i'e ba'oreat oceġubapukpuk,” i dak je'e.

²³ — Ġebuje ōn jeya'ōbu.

— “Wetaybit ġu oġuy eyjum. Pūġ em tak ka'ūma,” ioce'e — Jesus o'e. — “Wede epe'e oxewi. Ikērēat muġēġēm acā epekuku,” ioce'e dak — Jesus o'e.

²⁴ — Wa'ōkayayū itaybicat puxim ip -aġokatkat puxim ixeyū wekawēn coco'ukayū. Ixe aġokatkat uk'a o'yamuy wita'a jeje. Uk'a'abi'ip o'yopmuy wita'a jeje. ²⁵ Muba'at oajēm wita'a jejeiat'a kay -muba'atxixi. Muba'at idibi o'timuboġ. O'tiajēm. Kabidoxixi dak o'subidoakaka. Imēnpit o'ya'at ġu yacem puye, wita'a jeje buye — io'e Jesus cebe ip.

²⁶ — Wa'ō daġ ġu jekuku'ukayū itaybit'ūmat puxim -warēmtaġ ma uk'a o'yamuyiat puxim ip -wekawēn kay'ūmayū. Wa'ījom ip. Inaka kūyjobit

ḡu ip wa'ō kay. Warēmtaḡ uk'a o'yamuyiat puxim-
aḡokatkat puxim-yaḡuyba'arēmat puxim. Ixe aḡo-
katkat uk'a o'yamuy ipi ju, ka'oririt pe. Cem ḡu
o'yamuy.

²⁷ — Muba'at oajēm ka'oririt peat'a kay. Idibi
o'tiajēm- -tiboḡati. Kabido dak o'subidoajēm. O'su-
bido'at bidoboḡ ya be. O'ya'at. Iḡo'a o'ya'ūm cīcā,
o'ya'at puye — io'e Jesus.

²⁸ Soat yaḡuybabi'ūm ip osodop, Jesus ekawēn
epere buje.

— Wara'an wuymutaybitbin Jesus — io'e ip.
— Idim cīcā teku wuymutaybitbin — io'e ip.

²⁹ Ja'ōbi imutaybitbin Jesus osunuy. Moisés
ekawēn imutaybitbin'ukayū buxim ḡu imutaybitbin
osunuy.

8

Guyjom o'kop Jesus co'a bewi. Ade dak o'-
kop ip Jesus tomuju. ² Kopkom pima, iere-
pat oajēm Jesus kay, jemu'ada am. O'jēḡ'aecōḡcōḡ
cewap, Jesus ya'ōbuyxiat puye.

— Kariwa — io'e Jesus pe. — Ebu'u'ūm pima,
omu'adam ece — io'e Jesus pe.

³ — Obu'u ḡu. Jemu'ada ōn — Jesus o'e.
O'jebaepucūḡ. O'ḡucay. O'je'ada dao ma. Irep topi-
bit xipat o'e.

⁴ — E'adaap cuy eḡuwēn ḡu warara'acat pe —
io'e. — Paī kay juy eju — io'e. — Ecewemubapuk
cebe emu'adaam itaybit am — io'e. — Xepxem
cuy pukaso eḡūm paī be Moisés ekawēn taḡ. Imēn
ece'e soat ijoceayū itaybit am Jesus ierepat o'ḡu'a-
da iam. Ēn pit eḡuwēn ḡu e'adaap. Paī ma juy
ḡuwēn e'adaap — Jesus o'e ierep tūbit pe.

— Hm hm — io'e.

⁵ Cafarnaum ka be Jesus ajēm puje, sorarayū
kukukat oajēm. Jesus kay oajēm.

— Kariwa! — io'e Jesus pe. ⁶ — Obuywat-
wat'ukat opop oduk'a be. Ipi jījā opop. Jebit
oe'ūat puxim. Iwātaxipi jījā ma. Ikop pa'orean —
io'e Jesus pe.

⁷ — Ijom puk òn pit, imu'ada am — Jesus o'e.

⁸ — Ka'ûma, Kariwa — io'e. — Eju ġu juy oduk'a kay, wa'òbuyxi'ûm puye, Judeu'ûmat òn puye. A'òm ma juy eġu'ada. "Ece'ada juy," i ên e'em pima, obuywatwat'ukat je'ada — io'e Jesus pe.

⁹ — Òn tak warara'acat mujujum. Wa'ò kay kūyjobit ip wesorarayū. Pūġ pe òn e'em, "Ejêm," i bima, je'jêm. Wara'at pe òn e'em, "Ejot," i bima, je'dot. Obuywatwat'ukat pe òn e'em, "Imên cuy ece," i bima, imên je'e.

— Apên wesorarayūm wa'ò kay, imên tak a'òbi ma obuywatwat'ukat je'ada — io'e Jesus pe.

¹⁰ Iboap co buje, Jesus itabēġ o'e.

— Soat Judeuyū etabucap podi ma itabut okay iġo sorarayū kukat, Judeu ġu ma'ġu — io'e Jesus jenomujuacayū be. ¹¹ — Adeayū jajêm ip Deus dopap pe -Judeu'ûmayū, mesa koreren jabik âm Abraão eju, Isaque eju dak, Jacó eju dak. Soat eipi bewi jajêm ip. Pūġ ixeyū'in kaxijēmap ka bewi jajêm ip. Wara'acayū ixeyū'in kaxiajēmap ka bewi jajêm ip, kabi beat soat kukan pima. Icokcok cîcâ e'em ip — io'e Jesus. ¹² — Ajêmjêm ip pima, Deus Israel na-xeġebitbit joxik ip wūy ma kabiokboġ pe. Iboce ma tōtōn jeedop. Tūy yēyēy ipi bun jeedop — io'e Jesus jenomujuacayū be.

Ipiat'ajoap ka be iap muwēnuwēn o'e Jesus - kabiokat ka be iap.

¹³ — Eju eduk'a kay — Jesus o'e sorarayū kukat pe. — Kuy ebuywatwat'ukat o'je'ada, okay etabut puye — io'e Jesus.

O'je'ada ġebuje bit. Ibuywatwat'ukat o'je'ada.

¹⁴ O'ju. Jesus oajêm Pedro duk'a be. Oòm. Pedro daxijo o'jojojo. Ipa'i jījā opop xeku. ¹⁵ Jesus o'ġucay ipa'iat. O'subaixik. Imēnpuye ipa'i'ûm o'e. Xipat o'e. O'kop cama bewi. Jesus xat o'ġuġē ce-beam.

¹⁶ Katpuje ma iboceayū ibiōġbuk kērēat kuġayū o'tujowat ip Jesus kay. Imu'ada am, o'tujowat ip.

Ade osodop ip-*iwātaxi*piayū. *Ibioğbuk kārēayū* o'ğujēm Jesus *ikukayū* bewi.

— Epejēm — io'e cebe ip.

O'jēm ip Jesus a'ōbi. *Iwātaxi*piayū dak o'ğū'ada'ada.

¹⁷ *Isaías* juk o'jekawēn *kuyjeayū* be. Deus *ekawēn* *muwēnuwēn'*ukat juk o'jekawēn. Jesus *muwēnuwēn* o'e.

*Iwātaxi*piayū o'ğū'ada xeku, *ibaca'*ūmayū dak, i juk o'e *kuyjeayū* be.

Jesus o'ğujēm *xipat'*ūmayū *jemumukukukayū* *xewi-**ibiōğbuk kārēayū*. Imēn Jesus e'eap puye, soat itaybit o'e *icēmān* *Isaías'*ūm *ekawēn* iam.

¹⁸ *Adeayū* o'je'awēro ip Jesus kay. Timudek pin Jesus, ade buye.

— *Ğa'a* — io'e. — Iodi atimudek cuy.

¹⁹ *Moisés* *ekawēn* *imutaybitbin'*ukat tak oajēm.

— *Omutaybitbin'*ukat — io'e cebe. — Soat ka dağ ojekuku eweju ejuap tağ — io'e.

²⁰ — *Tapu* — Jesus o'e. — *Oweju* jekukuayū *ya'ūmğū* *jedopdopap'a* — io'e cebe- *Moisés* *ekawēn* *imutaybitbin'*ukat pe. — Kak *ikūykēy*. Wasū dak *topipe*. Ōn pit *ka'ūma*. *Ya'ūmğū* *odopdopap'a* — io'e- *Jesus* o'e- *soat wağo* o'e.

²¹ — *Kariwa'* — io'e *wara'at* Jesus pe. — *Koap* *webay'ūm* *ojokot*. *Ğebu*je cum puk ōn eweju — io'e Jesus eju jekukuat.

²² — *Kā'ā*. Ejot cuy okay — Jesus o'e cebe. — Deus *ekawēn* *kay'ūmat* *jedadipyū'ūm'ūm* jokot. Ēn pit *ka'ūma*. *Oweju* juy *ejekuku* — io'e.

²³ Kobe be oōm Jesus. O'timudek ip, *wīnābu* o'timudek ip- *Jesusyū*.

²⁴ Timudekdeğ pima ip, *kabidoxixi* oajēm. Oajēm iodi kay. *Topapūn* kobe o'e idibim, *kabidoxixi* ajēm puje. Kobe dağacat *iparara* ip o'e *kabido* *buxixim*. Jesus pit *ixet* kobe be. ²⁵ Jesus o'ğuwurūğ ip- *ceweju* *etaybitbinayū*.

— *Kariwa'* — io'e ip. — *Ocedaxijom* ece. *Akōm* wuyju!

²⁶ O'jewurūg Jesus.

— Apēgām puxim eyparara? — io'e. — Apēnpuye eyetabutbūt okay? — io'e ipararaayū be. — Eypararam ġu juy epesop. Okay juy eyetabut cīcā.

— Ebidopon! — io'e kabido be. — Edipon! — io'e iodi be.

Imēnpuye kabidoxixi o'subido'ūm. Iodi dak tistem cīcā o'e Jesus a'ōbi.

²⁷ — Apen ibo o'jebapuk? — io'e ip. — Abu sute? Kabidoxixi o'subido'ūm ya'ōbi. Iodi dak kūyjobit ya'ō kay — io'e ip.

Jesus muwēnuwēn o'e ip jewewebe.

²⁸ Kabido'ūm puje, o'timudek ip. Gadara eipi dağ oeku Jesus. Xepxep osodot ip- -ibiōgbuk kērēat kuğayū. Ika'u jījā o'e ip. Ce'ū'ūayū mōgmōgāp pewi osodot ip. Bomaku nuynuy soat em. Ixeyū buxixim, e dağ kapkap ġu o'e ip- -ibo ka watwat- -Gadara ka watwat.

²⁹ — Deus ipot ēn — io'e ip Jesus pe. — Ağ cuy ocesūy. Jajēm ġu juy ocekey ipiat'ajoan ocewebe ipi ūm awap ma — io'e ip Jesus pe.

^{30 - 31} — Ite ağokatkayū xewi ocemujēm puje, ocemujum ece dajebaro be- -ibiōgbuk kērēayū o'e cebe.

Imēn ma o'e ip, dajebaro bomaku wurūrūrūg puyeadade dajebaro.

³² — Epejēm — Jesus o'e.

O'jēm ip ağokatkayū xewi.

O'ju dajebaro kay. Oōm. Imēnpuye dajebaroyū daudaum o'jenapōn co'a pēnpēn tağ. Iodi be o'kop ip. Oakōmkōm ip. Jeabokaboğ ip oap.

³³ Dajebaro kukukayū owatwat ip. Soat muwēnuwēn o'e ip ağoka watwat pe. Dajebaro aokaap awēg muwēnuwēn o'e ip ağoka be. Ibiōgbuk kērēat kuğ to-pibiyū awēg tak yawēg muwēnuwēn cīcā o'e ip.

³⁴ Ġebuje Jesus o'topabe ip- -ağoka watwat- -soat.

— Ejēm cuy oceka bewi — io'e ip Jesus pe.

O'jēm.

9 O'jepit Jesus. Jeipi be o'jepit- -Cafarnaum ka be. O'jepit, waram timudek puje.

² Aḡoka watwat ijebit e'ūat o'tujowat Jesus kay. Ixexecap pe ixe ijebit e'ūat o'tujowat ip. Jesus itaybit o'e cekay itabut ip iam. Imēnpuye o'jekawēn ijebit e'ūat pe:

— A'ōcam cuy — io'e cebe. — Ikērēat kuy oju'uk ewebewi, tapu. Iboap ikērēat kay ḡebum ḡu oce, i'uk puje — io'e. — Pūḡ em tak ka'ūma — io'e- -Jesus o'e ijebit e'ūat pe.

³ — Ite Jesus “Deus co'i ōn,” i napa ma teku e'em — Moisés ekawēn imutaybitbin'ukayū napa ma o'e.

Pūḡpūḡ ixeyū'in napa ma o'e jewewebe.

⁴ Jesus itaybit o'e apēn jewaḡuydadam ip iam.

— Apēnpuye ikērēm epeyewaḡuy? — io'e Jesus Moisés ekawēn imutaybitbin'ukayū be. ⁵ — “Ikērēat oju'uk ewebewi,” i kuy oce cebe — io'e. — Imēnpit eyetabut ḡu ikērēat'uk put owebe iap kay — io'e. — “E'āy,” i oce ibima, “Ecexiḡxiḡ,” i dak, eyetabut ḡu kuka epe'e okay — io'e.

⁶ — Soat waḡo ōn — Jesus o'e. — Wa'ōbi teku oḡu'ada. Imu'adaap co buje, “Ja'ōbi ma teku o'ḡu'ada,” i epe'e — io'e cebe ip.

Gebuje Jesus o'jekawēn ijebit e'ūat pe.

— E'āy — io'e cebe. — Eju eduk'a kay. Exexecap cuy etujowat eweju — io'e.

⁷ O'āy. Jexexecap kuḡ o'ju jeduk'a kay.

⁸ Adeayū iparara jījā o'e ip, iboap tobuxik puje.

— Ka'ūmḡu xipacat Deus co'iat — io'e ip. — Deus Jesus a'ō mubacaat puye. Imēnpuye ixe Jesus pe ikērēat i'uk put wuyzewi — io'e ip.

⁹ Ibocewi Mateus o'jojojo Jesus.

Oajēm Jesus Mateus kay. Ixe Mateus xik'i osunuy jekapikpikap'a be- -iecuḡap edinheiro bubuap'a be.

— Ejot. Oweju ejeku — io'e Mateus pe. O'āy. Oeku Jesus eju.

¹⁰ Mateus tuk'a be oajēm ip-adeayū, jekōn ām. Oabikbik mesa koreren iecuḡap edinheiro bubu'ukayū, Deus xe ikērēan e'e'ukayū dak, Jesus tak, Jesus eju etaybitbinayū dak. Soat ip oabikbik mesa xe jekōn ām.

¹¹ — Apēnpuye ixeyū eju eymutaybitbin'ukat jekōnkōn- iecuḡap edinheiro bubu'ukayū eju? Ikērēat muḡēḡē'ukayū eju dak? — Fariseuyū o'e Jesus etaybitbinayū be.

Imēn kawēnwēn o'e ip, Jesus jekōnkōn o'jojojo ip puye.

¹² - ¹³ O'jede ḡu imutaybitbinayū. Jesus pit Fariseuyū o'ya'ijojo. O'jekawēn.

— Iwātaxipi'ūmayū wuyanūgtata'ukat kay je'ju ḡu- iwātaxipiyayū acā — io'e. — Imēnpuxim ōn tak jewexe xipacayū nomuwā ām ḡu ojet- xipat'ūmayū nomuwā ām acā. Ikērēat uk am ixeyū bewi ojet. Imēnpuye ocekon ikērēat muḡēḡē'ukayū eju — io'e.

— Cum cuy eyju eymutaybitbinayū kay — io'e — eytaybit am apēn Deus ekawēntup e'em iam — io'e Jesus Fariseuyū be. — Imēn opop ibararakat:

Idip ma oxe warara'acayū eyetabotaidabotbot pima. Imēnpit idip ḡu oxe warara'acayū kay ḡu eyetabotaidabotbot pima, obuyxi am carneiroyū mu-piḡ ma'ḡu eyju, i — io'e.

— Imēnpuye ijoce jewexe xipacayū nomuwā ām ḡu ojet- xipat'ūmayū nomuwā ām acā — io'e Jesus.

¹⁴ João Batista eju etaybitbinayū oajēm ip Jesus kay.

— Apēnpuye Fariseuyū jekpiwan ma jewemurere Deus eju kawēn ām- ocejū dak, eweju etaybitbinayū bit jekōnkōn ip pima? — io'e ip.

¹⁵ — Oweju etaybitbinayū jekōnkōn, ōn ceweju ip puye. Ōn pit ceweju ip'ūm pima, jekōnkōn ḡu ip. Jekpiwan ma jewemurere ip Deus eju kawēn ām. Imēn soat itaybit e'em iḡuycūḡ cīcā ip iam. Ōn iwadip puxim. Iwadip cexe ip pima, abu ixeyū'in iḡuycūḡ e'em- jewebumūnap epeta be to-muwāibiyū'in? Ka'ūma ma! Imēnpuxim oweju etay-

bitbinayū jekōnkōn ip. Jewebumūnap epeta be to-muwāibiyū buxim ip — io'e Jesus.

¹⁶ Jesus wuymutaybinap ekawēn o'ḡuwēn cebe ip- -imēnpuximap ekawēn. Imēn o'ḡuwēn.

— Paḡo iisuan ḡu imuwaketken wuyju- -toti iorokat muwaketken. Iisuat pit imuwaket puje, je-wa'i'in biḡ ma idieḡboḡ e'em — io'e Jesus.

¹⁷ — Uva'abidi tiisuati dak acetimōḡ yayisuat'a daḡ — io'e Jesus. — Ya iisuat taḡ'ūm pima, o'jeae-baḡ kuka — io'e. — Imēnpuye uva'abidi tiisuati ace-timōḡ timūn'a be- -yayisuat'a be, uva'abidi cedie-puyat puxixim, tiporoyat puxixim, timūn'a'ūmap puxixim — io'e Jesus João Batista eju etaybitbinayū be.

Iboam e'em pima, "Wekawēn paḡo iisuat puxim, uva'abidi tiisuati buxim tak," i'e ojuy osunuy. Imēn Jesus o'e. Kawēn iisuat ma Jesus ekawēn o'e ḡasū bit. Fariseuyū ekawēn taḡ ḡu o'e, Saduceuyū ekawēn taḡ ḡu o'e dak.

¹⁸ Judeuyū kukukat tak oajēm Jesus kay. Ixe osunuy Deus eju kawēnwēnap'a kukukat. O'jēḡ'ae-cōḡcōḡ Jesus topa be, ibuyxi am.

— Odaxit ḡaxīn ma oe'ū — io'e Jesus pe. — Ejot pima bit, eḡu'ada. Jetait — io'e Jesus pe. — Ebuesubumōḡ ijeje bima, je'ada odaxit — io'e.

¹⁹ — Ḡa'a — io'e.

O'ju ip- -Jesusyū. ²⁰ - ²¹ Cucum pima, pūḡ ayacat oajēm Jesus tomuju, cesay mucay am- -Jesus eka-bek ukpu mucay am. 12 koato bun ma ixe ayacat iwātaxipipin o'e, doybucukcuḡ ḡu buye.

— Cesay mucay buje ma, oce'ada — ixe ayacat o'e jewebe ma.

Jesus ekabek o'ḡucay. ²² O'jekorepēn Jesus.

Ḡebye Jesus ayacat o'jojojo.

— A'ōcam cuy — io'e ayacat pe. — Etabut okay. Imēnpuye ḡaxīn ma eceje'ada — io'e.

Dao ma o'je'ada ixe ayacat.

²³ Oajēm ip Judeuyū kukukat tuk'a kay. Ade wawam ip osodop. Jebubut'uk muydedeayū dak o'-

jojojo Jesus. Imuydedem ip Judeu babi daḡ. Cebabi daḡ tak wāwā ip osodop.

²⁴ — Ce'ū ḡu teku. Yaypan'isuat ixet ā — io'e Jesus wawaayū be.

Jesus itaybit o'e yaypan'isuat'ūm oe'ū iam. Inaka waram imutain. Imēnpuye "Ixtet ā," io'e. Wawai-biyū bit jewaywayway ip o'e Jesus kay. Jesus o'e cebe ip:

— Epejēm uk'a bewi — io'e.

O'ḡujēm.

²⁵ Ijēm puje, Jesus oōm yaypan'isuat kay. O'subaixik. Dao ma o'je'ada. Itait o'e waram ḡuto ce'ū topibit, Jesus o'subaixik puye. Ixe o'kop- -ce'ū topibit.

²⁶ Ipi juayū ce'ū topibit awēḡ o'yawēḡmupōḡ ip. Jekawēnwēn o'e ip soat taḡ- -soat ibo eipi daḡ.

²⁷ Jesusyū eipi kukukat ka bewi cēm puje, xep-xep o'ju Jesus tomuju- -ita'ūmayū.

— Etabotaidabotbon cuy eḡuy ocekey — io'e ip. — Ocemu'ada am — io'e ip Jesus pe- -Davi'ūm naxeḡebit pe- -Judeuyū ajojoyū'ūm'ūm kukukat naxeḡebit pe.

²⁸ Oajēm ip Jesus kay, ixē jeduk'a be oīmōm pima.

— Eyetabut tu okay- -eyemu'ada ōn iap kay? — io'e Jesus cebe ip.

— Hm hm — io'e ip. — Ocetabut, kariwa.

²⁹ · ³⁰ O'sutamucay Jesus ita'ūmayū. O'je'ada.

— Eyju eyetabut okay buye, ōn jeymu'ada — io'e Jesus itā'ūm topibiyū be.

Itate o'e, Jesus o'sutada buye.

— Eymu'adaap epeḡuwēn ḡu juy eybureyū be- -ka'ūma be ma — io'e Jesus.

³¹ Imēnpit je'adaap o'ḡuypōḡpōḡ ip soat kaka daḡ.

³² Jesusyū uk'a be cēm cēm pima, iboceayū ibiōḡbuk kērēat kuḡat o'tujowat Jesus kay. Cekawēn pa'oreat o'e ixē, ibiōḡbuk kērēat kuḡ puye. O'tujowat ip Jesus pe, imu'ada am. ³³ O'je'ada Jesus

a'ōbi. Aḡokatkat pewi ibiōḡbuk kērēat cēm puje, xipan o'jekawēn ma, o'je'ada buye.

— Abu yaḡuyḡuy imēn o'jebapuk iam? — adeayū o'e ip jewewebe. — Ka'ūma ma ijo'iat imēn wuyjojojo ḡu Israel eipi be -wuyeipi be — io'e ip.

³⁴ Imēnpit Fariseuyū o'jekawēn. Napa ma o'jekawēn ip.

— Jesus ibiōḡbuk kērēat mujēmjēm cebewi ibiōḡbuk kērēayū kukukat a'ōbi -Satanás a'ōbi — io'e ip napa ma.

³⁶ O'ju Jesus ikaboḡatka daḡ, ika'īcatka daḡ tak. O'ju aḡoka watwat mutaybitbin. Judeuyū Deus eju kawēnwēnap'a be imutaybitbin o'e. Deus soat kukanap o'ḡuwēnuwēn soat pe -kawēn idipat. Imēn ma imutaybitbin ip oeku. Ibomaayū mu'ada'adam oeku: iwātaxipipiyū, ibaca'ūmayū dak -soat mu'ada'adam oeku. ³⁶ Itabotaidabotbot ma iboka watwat kay Jesus osunuy, yaḡuybabi'ūm osodop puye. Ovelha buxim ip, jekukat'ūm pima ip. Imēnpuxim ika beacat ikukuk'ukat'ūmayu osodop ip, ka'ūmḡu ibuywatwat'ukat puye.

³⁷ Imēneju Jesus o'jekawēn jewēju etaybitbinayū be.

— Kadai ya ade opop -kadai'a -yaopat'a. Pūḡ-pūḡ pit omuyku ip yabu am — io'e cebe ip. ³⁸ — Epeyekawēn cuy kapikpik'ukayū kukukat pe. I juy epe'e cebe: "Kapikpik'ukayū eḡuju juy kadai'a bu am," i — io'e Jesus jewēju etaybitbinayū be.

Imēn Jesus kawēnwēn o'e, Jesus eju adeayū ceku pin ip puye. Apēn kadai ya ade o'yadop -kadai'a yaopat'a; imēn tak adeayū ceku pin ip Deus emunaē eju. Imēnpit pūḡpūḡ oekuku Jesus kawēn muwēnuwēn ijodiacat pe. Imēnpuye imuwēnuwēn'ukayū kukat eju juy jekawēn ip Deus eju.

— Adeayū juy eḡuju ekawēn muwēn ām — i juy e'em ip cebe.

10 Jesus doze beayū o'tomuwā- -jeweju etaybit- bin'ukayū. O'tomuwā, ja'ōbi soat mu'ada am- -iwātaxipiyū mu'ada am, ibiōgbuk kērēayū mujēm ām tak- -ja'ōbi imujēm ikuḡayū bewi- -soat ip pewi. Ja'ōbacaap o'ḡūm cebe ip- -doze beayū be.

² - ⁴ Doze beayū ibutet doze butet pe osodop ip. Ibūrū ma ibutet osodop ip- -Jesus emumujuyū butet: Koapat Simão i, André i, Tiago i, João i, Filipe i, Bartolomeu i, Tomé i, Mateus i, wara'at Tiago, Tadeu i, wara'at Simão, Judas Iscariotes i. Ibūrū ma ibutet osodop ip.

Wara'at putet Pedro i ibutet osunuy- -Simão butet. André Pedro kitpit osunuy. Tiago, João dak, Zebedeu ipotpoyū osodop. João Tiago kitpit osunuy. Mateus iecuḡap peam Israel naxeḡebitbit xewi dinheiro bubu'ukat osunuy. Wara'at Tiago Alfeu ipot osunuy. Wara'at Simão Israel eipi kay cīcāat osunuy. Judas Iscariotes ḡuyjom Jesus o'ḡūm cekay itakomaayū be yaoka am. Ibūrū ma osodop ip- -doze beayū- -Jesus eju jekuku'ukayū.

⁵ - ⁶ Doze beayū o'ḡuju Jesus.

— Epeju Israel naxeḡebitbit kay — io'e cebe ip. — Itabidaoyū buxim ip — io'e. — Ovelhayū buxim ip — io'e Jesus. — Wara'at eipi bewiyū kay epeju ḡu — io'e doze beayū be. — Israel naxeḡebitbit kay acā juy epeju. Judeu'ūmayū kay ḡu epeju, Samaria eipi beayū kay ḡu dak — io'e. ⁷ — “Ijasun Deus soat kukan je'e,” i juy epe'e Judeuyū be, Israel naxeḡebitbit pe cucum pima eyju — Jesus o'e doze beayū be.

⁸ — Iwātaxipiyū epeḡu'ada juy ip — io'e cebe ip. — Ce'ū'ūayū dak epeḡutait. Waram jetait ip — io'e Jesus. — Ierepayū epeḡu'ada juy — io'e cebe ip. — Ibiōgbuk kērēayū dak epeḡujēm cuy ibiōgbuk ikērēat kuḡayū bewi — io'e Jesus. — Imēn epe'e juy wa'ōbi- -ce'adaap epe'e juy. Epeteida ḡu juy. Imēn ām cuk oḡūm wa'ōbacaap eywebe teidam ḡu — io'e Jesus cebe ip.

⁹ — Dinheiro epetujowat ḡu juy eyweju. Ouro epetujowat ḡu, prata dak ka'ūma. Cobre dak ka'ū-

ma. Epetujowat ġu juy dinheiro mūn'a be. ¹⁰ Cumap pubut mūn'a dak epeyadujowat ġu juy. Xep-xem cuy epetujowat ġu- -eydoti, pūġ ma acā. Sandália dak ka'ūma. Eyba'ip tak epeyoptujowat ġu juy. Eybuywacayū ma juy eyxan je'ġūm. Imēnpuye eybut epetujowat ġu juy — io'e Jesus.

¹¹ — Ajēm pima aġoka be jeduk'a be eyġuyġuy pinat epetobuxik cuy. Ixe duk'a be juy epesopsop, ibo aġoka be bima — io'e Jesus. ¹² — Ixeyū duk'a be ōmōm pima, epeyekawēn tuk'a beayū eju. Kato juy epe'e cebe ip — io'e Jesus.

¹³ — Gebuje eyekawēn kay ya'ōpīcūġcūġ je'e ip. Ya'ōpīcūġcūġ je'e ip, eyekawēn kay buye. Imēnpit wara'acayū eyekawēn kay'ūm pima bit, ya'ōpīcūġcūġ ġu je'e ip. Epajēm cexe ip. Imēnpit te'e ma epe'e, "Wuykabia," cebe ip. "Epeōm," i ġu je'e ip, eyekawēn kay'ūm puye.

¹⁴ — Eykay'ūmayū bewi epejēm cuy, eyekawēn kay'ūmayū bewi dak. Cēm pima eyesandália epeġu-poypoy, "Deus ipiat supi'ajoat eywebe ya'ō kay'ūm puye" iap mubapuk am ibo ka watwat pe. Imēn cuy epe'e cebe ip, aġoka bewi wan pima, uk'a bewi wan pima — Jesus o'e doze beayū be.

¹⁵ — Deus kūyjobit'ūmayū be ipiatpi'ajoap kabia bima, Sodoma ka watwat pe ipiat supi'ajoat, Gomorra ka watwat pe dak. Ixeyū be iap podi ma bit ibo ka watwat pe ipiat supi'ajoat, eyekawēn com ip ibu'u buye. Iboap kay ġebum cuy epesop — io'e.

¹⁶ — Ya'ōpīcūġ cuy epesop — io'e cebe ip. — Eymujum ōn. Ovelha buximayū eyju. Widayū parakpe eyju ovelhayū buxim. Imēnpuxim eykay itakomaayū parakpe eyju. Ovelhayū be bit i'e ba'ore akuriceyū be. Imēnpuxim eywebe i'e ba'ore eykay itakomaayū be.

— Wa'ōbi eyju buje, itaybit cīcāayūm epesop. Aġ cīcā juy epesop. Dao ġu juy eyetakomām cekay ip — io'e Jesus.

¹⁷ — Aġ cuy epesop — io'e. — Eykay itakomaayū jeydaomūn. Jeydujowat ip wuyekawēn coco-

'ukayū be. Jeymupokupok ip Deus eju kawēnwēn-ap'a be jetakomaap kay. Ixeebum jeymupokupok ip — Jesus o'e. ¹⁸ — Eyju webekitkit puye jeydujowat ip ipi kukayū be, kariwayayū be dak. Jeydujowat itaybit am eyetabucap xipat cexe ip iam ma, eyetabucap xipat'ūm cexe ip iam pit. Kawēn idipat epeḡuwēn cebe ip, Judeu'ūmayū be dak — io'e Jesus. ¹⁹ — Eyaḡuybabi'ūm ḡu juy epesop, eyetaybit'ūm puye ajom epeyekawēn iam, apēn epeyekawēn iam tak. Eydujowatwan pima ip, Deus ḡuwēn eywebe ajom epeyekawēn iap. Imēn jeymutaybin. ²⁰ Wa'ōbi juy epeyekawēn. Imēn epeyekawēnwēn Deus biōḡbuk ma kawēnwēn je'e eywebewi- -Wuyebay biōḡbuk — Jesus o'e cebe ip.

²¹ — Adeayū jebadipyū kay itakoma je'e, ixeyū webekitkit puye. Iwaḡo jekitpit tujowat cekay itakomaayū be yaoka am. Ikitpit tak jewaḡo tujowat yaoka am. Ipotpet tak itakoma jījā je'e jebay kay. Jebay tujowat cebe ip, yaoka am — io'e. ²² — Soat ixeyū itakoma jījā je'e eykay, eyju webekitkit puye. Ipiat pibun eyetaxi bima, Deus a'ō daḡ jekukum cuy eyju. Ḡuyjom Deus jeymuyū, cexe soat em eyedop am — io'e.

²³ — Eywebe ipiat supi'ajojo bima, epeyenapōn cuy. Imēn e'e ip pima pūḡ ka be, epeyenapōn cuy wara'at ka be- -aḡoka be — io'e cebe ip. — Soat waḡo ōn — Jesus o'e. — Waram wajēm awap, ade aḡoka daḡ epeju- -Israel naxeḡebitbit eipi daḡ — io'e Jesus.

²⁴ — Imutaybitbin'ukat podi ḡu je'e jeweju etaybitbinayū itaybit ip. Kariwa podi ḡu dak je'e jekapikipiḡ'ukayū kapikipiḡ ip. ²⁵ Imēnpuye kapikipiḡ'ukayū icokcoḡ cuy jeedop ip, jekariwa buximayū ip puye. Itaybitbinayū dak icokcoḡ cuy jeedop ip jemu-taybitbin'ukat buximayū ip puye. Ijoceayū cekariwa a'ō ya'ōmuy ip pima, "Belzebu teku," i bima ip, cebekitkit a'ō dak ijo'i ma ya'ōmuy je'e ip. Cekariwa muymuy ip pima, cebekitkit tak imuymuy ip cekariwa muymuyap podi ma — io'e Jesus.

²⁶ — Eypararam ġu juy epesop ixeyū e'eap puxim — io'e jebekitkit pe. — Yajuyjuyat jewedobuxik ġuyjom. Iba'arēmat ibapuk je'e soat xe. ²⁷ Imēnpuxim ajo oġuwēn eywebe, kawēnwēn wuyewewēju ma, ijop epeġuwēn soat pe ġuyjom — io'e. — Ibadadaap kay epeya'ijojo, ijop soat pe epeġuwēn ġuyjom — Jesus o'e.

²⁸ — Eypararam ġu juy epesop eyaoka ojuyayū buxixim — io'e jebekitkit pe. — Wuyjebit aoka but ip. Imēnpit wuybiōġbuk aoka ba'ore cebe ip — io'e. — Deus puxim pit cuy eypararam epesop. Wuyjebit muy'ūm put cebe, wuybiōġbuk tak. Ipiat'ajojoap pe imu'ūm put — Jesus o'e.

²⁹ — Xepxep pe pidiwe dei tei'it ma-pūġpūġ centavo ma-wasū yopīcat tei. Imēnpit pūġ wasū yopīcat at'an pima, Deus itaybit ixē wasū o'at iam. Deus a'ōbi acā je'at — Jesus o'e. ³⁰⁻³¹ — Deus xe teibōġ ġu wasūdei. Imēnpit aġ cekay. Imēnpuxim wuykay dak aġ soat em. Deus itaybit wuyadap pebūrūdap iam. Imēneju eyaġuybabi'ūm'ūm ġu juy epesop. Deus soat itaybit wuyekuku iam — io'e.

³² — Eyju “Jesus ebekitkiyū oceju,” i soat pe e'em pima, ōn tak “Teyūku webekitkit,” i oce webay be-kabi beat pe — io'e Jesus jewēju etaybitbinayū be. ³³ — Eyju bit e'em warara'acayū be, “Jesus bureyū ġu oceju,” i bima, ōn tak “Iteyū bure ġu ōn,” i oce webay be-kabi beat pe — io'e Jesus.

³⁴ — Epeyewaġuy ġu juy: “Jesus osodot kaba'ūm wuydop am,” i. Ojot puye, ipi watwat wara'at taġtaġtaġ ma jekuku. Itakoma je'e ip jewewekay. Pajam jewaokakam je'e ip — Jesus o'e. ³⁵⁻³⁶ — Ibadipyū itakoma cīcā je'e jewewekay, pūġpūġ ixeyū'in okay itabut puye — Jesus o'e. — Cebay ma okay je'e. Ipot pit okay ġu je'e. Ixi ma okay je'e. I'iyū okay ġu je'e-ayacayū. I'it tayxi okay ġu je'e. Yuktayxi okay je'e. Imēneju wara'at taġtaġtaġ ma jeku ip — Jesus o'e cebe ip.

³⁷ — Eyebay kayap podi ma okay'ūm pima, oweju jekukuayū ġu epesop, eyxi kayap podi ma

dak, eyekpotpoyū kayap podi ma dak, eydaxityū kayap podi ma dak. ³⁸ Owebeam je'ū ibu'u'ūmat puximayū acā webekitkit ma oxe. Korosa jeje je'ū ām, korosa dujuwatwan ōn pima, webekitkit tak cucum onomuju. Cucum ip korosa kuḡ, je'ū ām. Apēn aḡokatkat korosa dujuwatwan cucum, korosa jeje jebamupayam je'ū ām; imēnpuxim cuy epeku soat em owebeam je'ū ibu'u'ūmat puxim.

³⁹ — Eye'ū bima, ōn ma obuyxi eyxe buye, ibin ma soat em eyetabēḡ epesop Deus xe. Eywebe ma jewaḡuyḡuy: “Ōn ma obuyxiat,” i bima bit, soat em ipiat'ajojoap pe epesop eye'ū buje — Jesus o'e cebe ip.

⁴⁰ — Ḡasū epeju Israel naxeḡebitbit kay. Wa'ōbi epeju — Jesus o'e jeweju etaybitbinayū be. — Pūḡ ixeyū'in eyewebe je'e, “Epeōm,” i. Imēnpuxim ma owebe dak je'e ip — io'e Jesus. — Imēnpuxim ma oḡujuat pe dak je'e ip — io'e. ⁴¹ — Deus ekawēn muwēnuwēn'ukat pe dak je'e, “Eōm,” i. Ixe dak iōm pin, Deus ekawēn muwēnuwēn'ukat puye. Iōm pin. Imēnpuye Deus cekapikaptei je'ḡūm cebe, kapikaptei ūmūm pima jekawēn muwēnuwēn'ukat pe.

— Cūḡ cīcāt pe dak je'e, “Eōm,” i. Ixe dak iōm pin, cūḡ cīcāt puye. Iōm pin je'e. Imēnpuye Deus cekapikaptei je'ḡūm cebe, kapikaptei ūmūm pima cūḡ cīcāt pe. ⁴² Wara'acat webekit'isuat pe idibi ma tiūm ticukati, ixe webekit puye, Deus tak xipacat je'ḡūm idibiūmat pe — io'e. — Iboap kay ḡebum cuy epesop — io'e Jesus.

11 Ibocewi o'ju Jesus aḡokaxiriyū be. Wūy ḡu osodop boyūku. Doze beayū muju bujep, aḡokaxiri beayū mutaybit am o'ju. Deus ekawēn muwēnuwēn oeku Jesus.

² João Batista Cristo awēḡ o'yawēḡcoco daomūn-mūnap'a be. Bekitkit o'ḡuju Jesus kay. Jeweju etaybitbinayū o'ḡuju João. O'ḡuju, ja'ō daxijo am.

³ — “Deus emumuju ajēmap wiwim oceju,” i juy epe'e cebe — io'e João. — “Ēn ma du ixe?”

Wara'at ġu xe'e ocejowiwi?" i juy epe'e cebe — io'e João.

— Hm hm — io'e ip.

João a'ō daxijo am o'ju ip.

Oajēm ip cekay- -Jesus kay.

— Ēn ma du omuykuiat? Wara'at ġu xe'e ocejowiwi? — io'e ip Jesus pe.

⁴ — Epeyepit cuy João kay — io'e cebe ip. — Epejojoiap cuy epeġuwēn João be, epeyekūyjojoiap tak — io'e. ⁵ — Ita'ūm topibiyū o'e itate ġasū. Tao-kērē topibiyū dak xipan ip o'e jexīġxīġ ġasū. Irep topibiyū dak xipan o'e ġasū. Ya'ōpi'ūm topibiyū dak ya'ōpipe o'e ip. Jekūyjom ip o'e. Ce'ū topibiyū dak waram itabēġ o'e ġasū. Tadaibotbocayū dak kawēn idipat cocom ġasū- -Deus ipot awēġ cocom.

⁶ — Imēneju: "Ecokcoġ eġuy okay etabut am ebu'u'ūm pima. 'Ite ġu omuykuiat,' ie'em pima bit, ecokcoġ ġu eġuy," i juy epe'e João be — io'e Jesus.

— Hm hm — io'e ip.

⁷ Cēm cēm ip pima, Jesus João o'ġuwēn ibo ka beayū be.

— João jom cuk epeku uk'a'ūmat pe — io'e Jesus. — Pām ixē João? Ajo-buxim ixē o'e? Ip'ūn'ūn kay kabido ajēm puje, je'ipe'adedem. Yaġuykorerenayū ite'ip puxim, soat em jewaġuy muwarururun puye. João bit yaġuykoreren ġu. Itē'ip puxim ġu. ⁸ João doti teiboġ ġu. Teiboġat kukayū adeayū kukat tuk'a be opop ip- -ibubut adeayū. ⁹ João bit ibubut adeat ġu. Deus ekawēn muwēnuwēn'ukat xeku. Warara'acat podi ma João ya'ōbuyxi- -Deus ekawēn muwēnuwēn'ukayū bodi ma.

¹⁰ — Imēn Deus ekawēntup e'em- -João muwēġaptup:

Aġ cuy epesop, ie'em Deus, i. Wemu-
muju oġuju ewap ajēm puje, emuxi-
pan am, i.

Imēn e'em Deus ekawēntup- -João muwēġaptup — io'e.

¹¹ — Kuyjeayū bodi ma João ya'ōbuyxi. Ka'ūma ma omuy João Batista jo'i ya'ōbuxian. Deus xe bit-

kabi beat xe bit- -yopīcat João bodiat ya'ōbuyxiat wekawēn kayayū'in — Jesus o'e. ¹² — Ixe João Deus awēg o'yawēgtojojot ipi juacat kay- -Deus soat kukanap awēg. Iboap awēgcocom pima ip, cekay jījā ip, Deus xe nuynuy pin cīcā ip puye. Imēn gāsū dak cekay jījā ip — io'e. — Deus xe ajēm pin ip — io'e.

¹³ — João ajēm awap, Deus ekawēn muwēnuwēn'ukayū dak iboap awēg cuk o'yawēgtojojot- -soat ip. Imēn tak Moisés ekawēn tup e'em — io'e Jesus.

¹⁴ — Iboap awēg kay eyetabut pima, eyetabun tak Elias jajēmiap João jo'i ma oajēm. ¹⁵ Epeya'ōpicūg-cūg cuy epesop — io'e Jesus cebe ip.

¹⁶ Jesus waram o'jekawēn adeayū eju.

— Oḡuwēn eywebe, abu-buxim gāsūacat iap iam eyetaybit am. Bekitkit puxim ixeyū- -pasiaham ip iap pe pubutbucayū buxim. Jewāwāwām ip jebureyū- -bekitkiyū. ¹⁷ “Tēgētēg'a oceyamuyde eywebe ya'ījo am. Eydaobu'u'u eyju bit da'i'in,” ie'em ip. “Wa ocesop jewexe i'ūmcocom. Eybu'u eyju bit oceweju tōtōn,” i'e'em ip. Ijoyū buxim gāsūacat — io'e Jesus.

¹⁸ — João Batista oajēm eykay. Ixe vinhodi o'-tikōn ḡu. Ire oeku Deus eju jekawēn ām. Soat pit napa ma e'em João muwēnuwēn: “Ibiōḡbuk kērēat kukat teku,” i.

¹⁹ — Soat waḡo ōn. Ojot eykay. Soat xat o'om ojeku, soat tikōnkōn tak. Soat pit napa ma e'em omuwēnuwēn: “Ika'o'on'ukat teku,” i. “Teku ie-cuḡap peam dinheiro bubu'ukat pure,” i dak. “Teku ikērēat mujurūḡrūḡ'ukat pure,” i dak — io'e. — Wuyju Deus emumutaybitbinap taḡ jekukum pima bit, warara'acayū je'e omuwēnuwēn, João muwēnuwēn tak, “Deus xe cūḡ ma wuymutaybitbin,” i — Jesus o'e.

²⁰ Jesus tak o'jekawēn iboceat pe. Ikērēan e'e- 'ukayū muwēnuwēn o'e Jesus. Ikērēat epere'ūmayū muwēnuwēn o'e. Ikērēat kuḡ o'e ip. Imēnpit iḡuycūḡ ḡu ip ikērēat kay. Jesus a'ōbi iba'oreat cuk o'jebapuk ixeyū etabun. Jesus a'ōbi o'jebapuk. Imēnpit ikērēat mujurūḡrūḡ. Imēn o'e- -Corazim ka watwat

o'e, Betsaida ka watwat tak, Cafarnaum ka watwat tak.

²¹ — Karem ma ipiat epesupi'ajo jījā, Corazim ka watwat! — Jesus o'e. — Karem ma ipiat epesupi'ajo jījā, Betsaida ka watwat — io'e. — Ka'ūma buk epejojoiap cuk adi oğubapukpuk eyetabut pe eyka be bima — io'e. — Tiro ka be iboap mubapuk pima, Sidom ka be dak, kajuk ikērēat mujurūgrūgāp o'jepere ip- -ibo ka watwat. Itabut kajuk ip Deus kay — io'e. — Ibo ka be iboap mubapuk pima, kajuk ikurususucāt o'ğūōm ip jedotim. Daxa daypi bewiaptōm tak kajuk o'tōmōğ ip jabi jeje. Imēn kajuk o'e ip, “Oceğuycūğ cīcā ikērēat kuğ oceju buye” iap mubapuk am; “Gasū bit ikērēat ağūgē ġu” iap tak mubapuk am jebureyū be — io'e.

²² — Deus kūyjobit'ūmayū be ipiat supi'ajoat iap kabia bima, Tiro ka watwat pe ipiat supi'ajoat, Sidom ka watwat pe dak. Imēnpit Tiro ka be iap podi ma, Sidom ka be iap podi ma dak eywebe ipiat supi'ajoat. Iboap kay ġebum cuy epesop — io'e Jesus Corazim ka watwat pe, Betsaida ka watwat pe dak.

²³ — Cafarnaum ka watwat! — io'e. — Deus jeymuyu ġu kabi kay — io'e Jesus. — Jeymukop ipiat-pi'ajojoap kay bit. Ka'ūma buk epejojoiap cuk adi oğubapukpuk eyetabut pe eyka be bima — io'e. — Iboap mubapuk pima Sodoma ka be, ikērēat kajuk o'jepere ip. Deus kajuk ağoka o'sukamupik ġu — io'e Jesus.

²⁴ — Deus kūyjobit'ūmayū be ipiat supi'ajoat iap kabia bima, Sodoma ka watwat pe ipiat supi'ajoat, Tiro ka watwat pe dak. Imēnpit Sodoma ka be iap podi ma Deus ipiat supi'ajoat eywebe. Iboap kay ġebum cuy epesop — io'e Jesus Cafarnaum ka watwat pe.

²⁵ - ²⁶ Jesus o'e ġebu je bit.

— Bay — io'e. — Ēn acā soat kukukat- -kabi beacat kukukat, ipi juacat kukukat tak — io'e. — Apēn ēn e'em iap mubapukpuğ ēn jewexe itaybit cīcāayū be ġu- -imutaybitbin'ūmayū be acā — io'e. — Ixeyū acā wekawēn imutaybitbin ēn. Imēn xipāt

oxe. Ocokcok cīcā imēn ebikuy buye. Ocokcok cīcā xipat exe buye dak — io'e Deus pe.

²⁷ — Soat ma juk webay o'gūm owebe — io'e cebe ip. — Warara'acat ġu itaybit abu, Deus ipot iam- -cebay acā. Imēnpuxim warara'acat ġu itaybit abu ipot ebay iam- -ipot acā. Jebay mubapuk am, ipot ibikuy bima acā warara'acat itaybit je'e abu Deus iam — Jesus o'e cebe ip.

²⁸ — Okay epesot. Ikērēat oju'uk eywebewi — io'e Jesus cebe ip. Deus a'ō kay kūyjobit ojuy ip. Imēnpit kūyjobit ġu ip.

²⁹ — Eymutaybitbin oce. Webekitkit e'em. Wa'ō-puruġ'ūmat ōn. Waġuybabibi. Yoboġat pin ġu ōn. Eywebewi ikērēat oju'uk. ³⁰ Wa'ō kayap iba'ore ġu imuġē ām. Kūyjobit am okay dak iba'ore ġu eywebe. Wara'at ikērēat kay eyebu'um epe'e, eywebewi ikērēat oju'uk puye — Jesus o'e soat pe.

12 Gebuje Jesusyū o'ju trigodip taġ. Sábado bima o'ju, Judeuyū jebodoydoyap kabia bima. Trigodadot o'tadot'uk ceweju etaybitbinayū. Trigoda o'tabu ip, jerere buye. O'ta'o'o ip. ²Ta o'om pima, Fariseuyū ixeyū o'jojojo. Jesus eju etaybitbinayū o'jojojo ip.

— Ak'i! — Fariseuyū o'e Jesus pe. — Eweju etaybitbinayū Moisés ekawēn taġ ġu jekukum ip. Jebodoydoyap kabia be kapikpiġ ip. Cūġ ma ġu e'em ip. Trigodadot uk'uġ ip. Imēnpuye ikērēat kuġ ip, wuywebe jebodoydoyap kabia be kapikpi buye — io'e cebe.

³⁻⁴ — Tā. Ikērēat kuġ ġu ip — io'e Jesus. — Kuyje Davi o'om Deus eju kawēnwēnap'a be. Ire bima, o'om Davi, cewejuayū dak. Deus emesa bewi paō'a o'ya'o'o ip-Deus etabixe o'yamōġ ip iat'a- -paīyū be acā ya'opi ġu iat'a. Moisés ekawēn taġ ġu ijop'a o'ta'o'o ip- -Daviyū. Apēn Davi o'e'e iaptup opop Deus ekawēntup pe. Kuy epetupcoco- -iboaptup — io'e Fariseuyū be.

⁵ — Deus eju kawēnwēnap'a be paīyū kapikpiḡ ip soat kabia. Jebodoydoyap kabia jekukum ip Moisés ekawēn taḡ ḡu yaboḡat'a be. Wara'at taḡ jekukum ip, kapikpiḡ puye. Imēnpit ikērēat kuḡ ḡu ip Deus xe. Iboaptup ekawēn eyetaybit-Deus ekawēntup. Kuy epetupcoco-iboaptup tak — io'e Jesus.

⁶ — Icēmān ocekawēn eywebe. Deus eju kawēnwēnap'a Israel naxeḡebitbit o'yamuy- yaboḡat'a. O'yamuy ip, wuyju yamubuyxin am. Imēnpuye Deus eju kawēnwēnap'a kukukayū ya'ōbacaayū. Imēnpit ya'ōbaca jījāat omuy ijoce ḡasū — io'e Jesus cebe ip.

Jewebe ma o'e Jesus, "ya'ōbaca jījāat" i'e'em pima.

⁷ Warara'acayū kay eyetabotaidabotbocap kay ōn, i Deus juk o'e — io'e Jesus cebe ip. Owebeam carneiro mupikap kay ḡu bit ōn-eyetabotaidabotbocap kay acā, i — io'e Jesus.

Ijoptup ekawēn eyetaybit pima, "Ikērēat kuḡ ip," i kajuk epe'e ḡu ikērēat kuḡ'ūmayū muwēnuwēn pima — io'e Jesus Fariseuyū be. ⁸ — Soat waḡo ōn. "Epeyekapik cuy," i ōn e'em pima jebodoydoyap kabia be dak, cedaḡ kuka o'e eyekapikap Deus xe — Jesus o'e.

⁹ O'ju Jesus ibocewi.

Oajēm Deus eju kawēnwēnap'a kay- -Judeuyū e'aweroroap'a kay. Oōm.

¹⁰ Ḡebuje aḡokatkat o'tobuxik iḡo'a be. Pūḡbūnū'a o'subūnū'anuy ibūnū'akērē.

Pūḡpūḡ o'je'aweroiayu'in Jesus muymuy ojuy ip.

— Jesus Moisés ekawēn taḡ ḡu jekukum — i'e ojuy ip warara'acayū be. Imēnpuye:

— Jebodoydoyap kabia bima, xipat tu exe ibūnū'a kērēat mu'ada am? Imēn tu Moisés ekawēn taḡ ma? — io'e ip Jesus pe.

¹¹ - ¹² — Xipat Moisés ekawēn taḡ warara'acayū ikukpin wuyxe bima — Jesus o'e Fariseuyū be. —

Jebodoydoyap kabia bima eyōhō o'at pima ipikūy-kūy be i'uk'uḡ ip ipikūykūy bewi-ixe ovelha — io'e. — Abu jeōhōyū uḡ ḡu? Ka'ūma ma. Ovelha ikukpin ip, jeōhōyū buye. Imēnpuye i'uḡ ip. Imēn tak wuyju ovelha bodi ma wuykukpin Deus xe. Imēnpuye xipat Moisés ekawēn taḡ wuywebe xipacat muḡē ām jebodoydoyap kabia be — io'e Jesus.

¹³ — Paya'i ece ebu — io'e ibūnū'akērēat pe. O'jewebumupaya. O'je'ada ibūnū'akērē topibit. Wara'atpūnū'a jo'i o'e. Ibūnū'adip o'e.

¹⁴ Fariseuyū bit o'jēm yabewi. O'jewede ip Jesus xewi. O'jewawē ip Jesus aoka am, kapikipiḡ Sábado kabia be buye. ¹⁵ Imēnpuye Jesus o'ju ibocewi. Fariseuyū ekawēn itaybit puye, o'ju. Adeayū o'ju Jesus tomuju. Iwātaxipiayū o'ḡu'ada'ada- -soat ip.

¹⁶ — Wawēḡ epewawēḡmuwēn ḡu juy. Pūḡ em tak ka'ūma — io'e cebe ip.

¹⁷ Ibo o'jebapuk apēn Deus ekawēn muwēnuwēn'ukat o'e iap taḡ- -apēn Isaiás kuyje o'e iap taḡ.

¹⁸ Deus o'e: Ija otaēiat- -obuywat-wat'ukat- -ōn cekay jījāiat- -omucokcokcok'ukat. Obiōḡbuk ojomōḡ cebe. Ajo cūḡ ma oxeiap ḡuwēn soat pe- -Judeu'ūmayū be. ¹⁹ Ya'ōxikxiḡ ḡu je'ku. Jewāwām ḡu je'ku. Soat ka daḡ tak kawēnwēn ḡu je'ku. ²⁰ Ikērēan e'e jījāayū daxijo xeku ikērēat pewi. Okay itabut cīcā'ūmayū ḡutabut cīcā okay. Imēn ma je'kuku soat pewi ikērēat uk'uḡ- -Deus kayayū bewi. ²¹ Soat ipi juacat Deus emunaē kay je'e, i.

Imēn Isaiás o'ḡuwēn kuyjeayū be.

²² Ḡebye iboceayū aḡokatkat o'tujowat. Ita'ūmat osunuy ixē aḡokatkat. Cekawēn pa'oreat tak o'e ixē, ibiōḡbuk kērēat imuyde'ūm'ūm puye. O'tujowat ip. O'je'ada Jesus a'ōbi. Ijojom o'e, o'je'ada buye. Xipan kawēnwēn o'e- -ibiōḡbuk kērēat kuḡ tūi-

bit o'e, o'je'ada buye. ²³ Iboceayū yaḡuybabi'ūm o'e ip- -soat ip.

— Davi naxeḡebit paxi sute? — io'e ip.

Jesus muwēnuwēn o'e ip.

²⁴ Fariseuyū bit Jesus awēḡ o'yawēḡcoco.

— Ixe Jesus ibiōḡbuk kērēayū o'ḡujēm aḡokat-kayū bewi Belzebu a'ōbi- -ibiōḡbuk kērēayū kukukat a'ōbi- -Satanás a'ōbi ma — i napa ma o'e ip.

²⁵ Jesus itaybit osunuy apēn ixeyū jewaḡuyḡuy iam.

— Pūḡ eipi watwat jewewaju ma jewaoka buje, jewemu'ūm ip. Pūḡ ka kukukat jebekitkit mujēm puje, abu kuka o'e ya'ō kay? Ka'ūma ma. Pūḡ tiwat kukukat pe jebekitkit mujēm puje, abu kuka o'e ya'ō kay? Ka'ūma ma — io'e Fariseuyū be. ²⁶ — Imēnpuxim Satanás pe jebekitkit mujēm puje, abu kuka o'e ya'ō kay? Ka'ūma ma. Imēn Satanás a'ōbacaap mu'ūm kuka o'e. Imēneju Satanás ja'ōbacaap ūmūm ḡu owebe ibiōḡbuk kērēayū mujēm ām- -jebekitkit mujēm am — io'e Jesus. ²⁷ — Belzebu a'ōbi ōn ibiōḡbuk kērēat mujēmjēm pima, abu a'ōbi dak eyebekitkiyū imujēmjēm ip? Jewemuḡuykukukum eceju iap mubapukpuḡ cīcā eyebekitkiyū.

²⁸ — Deus biōḡbuk a'ōbi ibiōḡbuk kērēayū oḡujēm. Belzebu a'ōbi ḡu oḡujēm. Ibiōḡbuk kērēayū o'jēm ip puye, kuy eyetaybit Deus soat kukukan je'e iap mubapukpuḡ ōn eywebe iam — io'e cebe ip.

²⁹ — Wuyōm pa'ore wuykay isapka'oreat tuk'a be ibubut pu am. Imukiriḡ acā koam — io'e. — Imukirik puje bit, wuyōm put soat pu am- -uk'a beap pu am — io'e Jesus.

Imēn Jesus o'e, jebacaap Satanás bacaap podi ma buye. Ibodi ma buye, Jesus pe ibiōḡbuk kērēayū mujēm put ikukayū xewi.

³⁰ — Imēn tak okay'ūmat itakoma okay — io'e Jesus. — Webekitkit mu'awerom obuywatwat'ūmat imuypōḡpōḡpōḡ- -webekitkit muypōḡpōḡpōḡ — io'e.

³¹ — Imēnpuye oḡuwēn eywebe. Ipi juacayū be Deus muymuy buje, iboap imuymuyap kay soat em Deus ḡebum ḡu je'e. Deus iboap ju'uk cebewi ip. Ixeyū be Deus biōḡbuk muymuy buje bit, iboap imuy-

muyap kay soat em Deus ġebum je'e. Cebewi ip iboap i'uk pa'ore Deus pe; apĕn eyju napa ma e'em, "Ijop e'eap Satanás a'ōbi o'jebapuk," i. Imĕn tak kuy eyetaybit Deus a'ōbi ijop e'eap o'jebapuk iam — Jesus o'e.

³² — Soat waġo ōn — io'e Jesus. — Omuyuy puye ip, Deus jeġebu ġu iboap kay soat em. Iboap ju'uk cebewi ip. Deus biōġbuk muymuy ip pima bit, Deus jeġebu iboap kay soat em-ġasū, waram tak ġebum je'e. Iboap kuġ jeedop ip soat em-ikĕrĕat kuġ -Deus biōġbuk muymuyap kuġ — io'e Jesus.

³³ — Wuyetaybit yopkĕrĕat'im. Yopkĕrĕat'ip puye, ya'a e'em yakĕrĕat'a. Wuyetaybit yoptipat'im tak. Yoptipat'ip puye, ya'a e'em yadipat'a. Yoptipat'ip, ya'a dak soat em jeenuy yaku. Yopkĕrĕat'ip pit, ya'a dak soat em jeenuy yakĕrĕat'a. ³⁴ Imĕn puybu tuypiatpu buximayū eyju, ikĕrĕat kuġ cĭcā buye. Iba'ore dak eywebe idipat ekawĕn muwĕn ām. Apĕn wuyju jewaġuyġuy, imĕn wuyju e'em. Imĕn tak iba'ore ġasūacat pe idipat ekawĕn muwĕn ām, yaġuykĕrĕ buye. ³⁵ Apĕn xipacat idipap uk'uġ imuxipanpanap'a bewi, imĕn tak wuyaġuydip pima, wuyekawĕn tak idip ma e'em, wuye'eap tak. Wuyaġuy nomuju ma wuyju jekawĕnwĕn. Xipat'ūmat idip'ūmap uk'uġ imuxipanpanap'a bewi. Imĕn tak wuyaġuydip'ūm pima, wuyekawĕnkĕrĕ e'em, wuye'eap tak — io'e Jesus cebe ip.

³⁶ · ³⁷ — Oġuwĕn eywebe. Wuyekawĕntip pima, "Idip ma eyju oxe," i je'e Deus wuywebe kūyjobit'ūmayū be ipiat supi'ajoap kabia. Wuyekawĕnkĕrĕ bima bit, "Ikĕrĕat kuġ eyju oxe," i je'e Deus wuywebe.

— Deus ipiatpi'ajoan kūyjobit'ūmayū be iap kabia bima te'e ma juk adi acekawĕn iap aġuwĕn Deus pe — io'e Jesus.

³⁸ — Ocekukukat! — Fariseuyū o'e cebe. — Ka'ūma buk ocejojojoiap eġubapuk cuy ocewebeam — io'e ip.

Imên tak Moisés ekawên imutaybitbin'ukayû o'e Jesus pe.

³⁹ — Ka'ûma — io'e. — Ikêrêat kuğ eyju. Deus kay eyetabut ġu. Ka'ûma buk eyejojoioiap co pin eyju. Imênpit oğubapuk ġu eywebeam. Jonas awêğ acâ ka'ûma buk eyejojoioiap tieğ e'em eywebeam. -Deus ekawên muwênuwên'ukat awêğ — Jesus o'e.

⁴⁰ — Soat wağo òn — io'e Jesus. — Ixe Jonas osunuy ebapûğ kabia axima yoboğat uk pe. Ebapûğ ixima osunuy dak. Apên Jonas osunuy axima yoboğat uk pe, imênpuxim ma oğuy ebapûğ kabia ipi be, ebapûğ ixima dak — io'e Jesus. — Deus a'ôbi ixe Jonas o'jêm axima yoboğat uk pewi. Cejêmap Nínive ka watwat pe ka'ûma buk o'jojoioiap osunuy. Òn tak imênpuxim Deus a'ôbi waram ocetait we'ûap tomukadi — io'e Jesus.

⁴¹ — Kuyje Nínive ka watwat iğuycûğ o'e ip ikêrêat kuğ puye ip — Jesus o'e. — Ikêrêat mujurûğ-rûğap o'jepere ip- -ikêrêat e'e'ukayû. O'jepere ip, Jonas Deus ekawên o'tojot puye. Deus ipiatpi'ajoan kûyjobit'ûmayû be iap kabia Nínive ka watwat je'babuk soat etabut pe. Ixeyû je'e ġasûacat pe: "Eyju ikêrêat kuğ Deus xe," i, eyju wekawên kay'ûm puye. Jonas kay o'e ip Deus ekawên muwênuwên pima Jonas. Òn pit Jonas etaybicap podi ma wetaybit cîcâ Deus ekawên muwên âm. Imênpit eyju wekawên kay ġu — Jesus o'e.

⁴² — Kuyje kaxi etajoreğat ka kukat oajêm wûyat ka bewi. Ayacat oajêm Salomão ekawên co am- -itaybit cîcâat ekawên co am.

— Deus ipiat'ajoan kûyjobit'ûmayû be iap kabia ixe ayacat je'babuk soat etabi xe. "Ikêrêat kuğ eyju Deus xe," i je'e ġasûacat pe, eyju wekawên kay'ûm puye. Salomão kay o'e ixe, itaybit cîcâap muwênuwên pima Salomão. Òn pit Salomão etaybicap podi ma wetaybit cîcâ. Imênpit eyju wetaybicap kay ġu — Jesus o'e.

⁴³ — Ağokatkat pewi ibiôğbuk kêrêat cêm puje, ixe ibiôğbuk jekukum idibi'ûmat tağ, jebodoyap kudadam. Jebodoyap pit tobuxik'ûm pima, kuka o'e je-

webe ma: “Jepin ma òn kuy bima onuyap kay,” i — Jesus o'e. — Jepitpin.

— Yajēm puje, ixe aḡokatkat tobuxikxiḡ. Ka'ümḡu ibiōḡbuk kērēat opop ixe aḡokatkat pe ḡasū. Ixe aḡokatkat uk'a buxim- -yabuk'a buxim- -yabi'ōḡ'ōḡat'a buxim- -yaxipanat'a buxim. ⁴⁵ Imēnpuye ixe ibiōḡbuk kērēat cēm cēm ma'ḡuto. 7 beayū dobuxikxiḡ- -ibiōḡbuk kērēayū dobuxikxiḡ- -ibodi ma xipat'ūmayū dobuxikxiḡ. Ixeyū dak òmòm ixe aḡokatkat pe- -7 beayū. Òmòm koapat ibiōḡbuk kērēat eju. Kuy bima ixe aḡokatkat tadaybot osunuy. Ḡasū bit ibodi ma tadaybot o'e. Imēnpuxim ma dak ḡasūayū jeedop. Ikērēat ḡubapukpuk cīcā ip — io'e Jesus.

⁴⁶ Ixi oajēm Jesus kay- -ikitpitpit tak. Warara'a-cat pe kawēnwēn pima oajēm ip. Akiju osodop ip. — Ocekawēn pin Jesus eju — io'e ip iboceayū be.

⁴⁷ — Exi oajēm, ekitpityū dak — io'e- -puḡ aḡokatkat o'e Jesus pe. — Akiju opop ip. Cekawēn pin ip eweju — io'e Jesus pe.

⁴⁸ — Icēmān iḡo oxiat. Boyūku okitpitpicat — io'e Jesus.

⁴⁹ Pacuḡ'i o'e jebekitkit kay.

— Webekitkit pit oxī jo'i oxe, okitpitpit co'i dak — io'e. ⁵⁰ — Kabi beat a'ō kay buye, okitpitpit co'i oxe, wuyīxīt co'i dak ip, oxī jo'i dak ip- -Deus bikuyap taḡ jekuku'ukayū — io'e Jesus.

13 Ixe kabiam ma Jesus o'jēm uk'a bewi. Iodi kay oajēm. Oabik iodi wābu be. ² Ade jījā o'je'awero Jesus xe. Imēnpuye kobe be oòm ixe. Oabik kobe be. Adeayū bit kapurūḡ pe ma osodop ip kacūḡcūḡ'i.

³ Ḡebye o'jekawēn adeayū be. Wuymutaybitbin-ap ekawēn muwēnuwēn o'e adeayū be. Adeap muwēnuwēn o'e. Koap imēn o'e:

— Aḡokatkat o'ju — Jesus o'e. — Jekadai damuduudu am o'ju. ⁴ Tamududum pima, xepxepa

o'ta'at. E bitako dağ o'ta'at — io'e Jesus. — Ixeda wasūyū o'ta'o'o, ajēmjēm pima ip — io'e Jesus.

⁵ — Wara'ata karatūg'a parak tağ o'ta'at. Ade ġu ka'wi o'e iboce. Ierūn ma o'e ka'wi. Imēnpuye dao ma kadai o'tanokap — io'e Jesus. ⁶ — Imēn tak kaxiepiat e ajēm puje, kaxie o'ğuy'ū ibo kadai — io'e. — Ikaraw o'e. Oe'ū tābujū ba'ore buye — io'e Jesus.

⁷ — Wara'ata widaōhōda picūğ pe o'ta'at. Widaōhō yaypan pima, iğo kadai o'tipmu'ūm.

⁸ — Wara'ata ma katō be o'ta'at. Iğoda o'ta'acoğ. Katō be o'ta'acoğ — io'e Jesus. — Ta'ade o'e. Pūğpūğ kadai be ta'adesu o'e -30 be o'e ta -katō peata. Wara'at kadai be ta'ade o'e -60 be o'e ta. Wara'at kadai be ta'ade jijā o'e -100 be o'e ta — io'e. ⁹ — Wekawēn eyetaybit pin pima, eya'ōpicūğcūğ cuy wa'ō kay — io'e.

¹⁰ Gebuje doze beayū oajēm Jesus kay.

— Apēnpuye ocemutaybitbinap ekawēn acā ece-kawēn ijoceayū eju? — io'e ip.

¹¹ — Itaybit ġu ip puye Deus soat kukan je'e iam. Iba'arēm ijoceayū be. Eyju bit eymutaybitbin ōn, eyetaybit am kabi beat soat kukan je'e iam — io'e Jesus. ¹² — Xipan'ūm ya'ijo buje, yopīt ma juy eyetaybin. Xipan ya'ijo buje bit, yoboğ cuy eyetaybin -ade jijā. ¹³ Imēnpit ijoceayū mutaybitbinap ekawēn muwēnuwēn ōn cebe ip. Jeakağ ip. Inaka ijojom ġu ip. Wekawēn pa'arēm cexe ip, wekawēn com ma'ğū ip — io'e Jesus doze beayū be.

¹⁴ — Isaías cuk o'jekawēn apēn ġasū o'jebapuk ġasūacat pe iam. Ġasūacat muwēnuwēn o'e kuyje.

Ya'ijojom je'e ip iboceayū. Imēnpit itaybit ġu ip je'e. Ijojom je'e ip. Imēnpit itaybit ġu je'e ip ajom sute e'em iam. ¹⁵ Jağuyumu'ūm ojuy ip: Ja'ōpi o'jewa'ōpinomudip ya'ijoap puxim. Jeta o'sutanomudip ijoap puxim. Imēn'ūm pima bit kadi ijojom ip, ya'ijojom tak. Imēn'ūm pima bit kadi ip itaybit o'e. Okay itabut

kuka o'e ip. Õn kuka adi ip oġu'a-
da, ikērēat uk'uġ cewebewi, io'e
Deus, i juk o'e Isafas — io'e Jesus.

— Ġasūacat muwēnuwēn pit o'e — Jesus o'e.

Imēn Jesus o'e itaybit ġasūacat itaybit pin pima, ip kajuk iġuycūġ ikērēat kuġ puye iam-ikērēat kajuk o'jepere ip, kajuk Deus ikērēat o'ju'uk ixeyū bewi buye iam.

¹⁶ — Eyju bit eycokcok epesop. Eyju ijojo pin. Ya'ijo pin tak. Eyeta itaisuata jo'i — Jesus o'e doze beayū be. — Wekawēn kayap eyeta itaisuatate iap puxim. Eya'ōpipe iap puxim tak. Imēnpuye soat wekawēn epeya'ijojo. Imēnpuye eyetaybit soat wekawēn. Soat epejojojo, apēn cuk ocece iap.

¹⁷ — Kuyje ajo eyju ijojom iap co pin cīcā osodop ip ade Deus ekawēn muwēnuwēn'ukayū, Deus xe cūġ cīcāayū dak. Imēnpit o'jojojo ġu ip. Ajo eyju kūyjojom iap co pin cīcā ip osodop. Imēnpit o'jekūyjo ġu ip. Ġebu'i juy epe'e iboap kay — Jesus o'e.

¹⁸ — Epeya'ijojo juy kadaida mududumap ekawēn kay, eyetaybit am apēġape ibo wekawēn iam — io'e doze beayū be. ¹⁹ — Deus ekawēn a'ijojoayū iġoda buxim- -e be ta'at'anata buxim. Deus soat kukan ekawēn ya'ijojo ip. Imēnpit itaybit ġu ip apēġape Deus ekawēn iam. Satanás oajēm cekay ip- -Deus ekawēn a'ijojoayū kay. Yaġuyba'ūm'ūm ip cekawēn kay- -Deus ekawēn kay, Satanás oajēm ip cekay buye — io'e Jesus cebe ip.

²⁰ — Wara'acayū Deus ekawēn o'ya'ijojo ip. Ixeyū iboapta buxim ip- -karatūġ'a parak taġata buxim ip. Dao ma Deus ekawēn cocom o'e ip. Koap icokcok cīcā e'em ip- -ijojoayū. ²¹ Imēnpit kadai tabue'ūmat puxim ip. Deus ekawēn badi ġu ōm-ōm cebe ip. Ibureyū itakoma cekay ip. Ipiat supī'ajoat cebe ip. Imēneju ibu'u ip jetabut am Deus kay.

²² — Warara'acayū o'ya'ijojoiyū widaōhō parak taġata buxim. Ixeyū Deus ekawēn o'ya'ijojo ip. Imēnpit soat em ġebum ip jemukaypinput kay. Tuybe ocokcok cīcā oce dinheiro kuġ pima iān

e'em ip. Deus ekawēn kay ip yopīt ma itabut. Deus ekawēn muwēnuwēn ġu ip warara'acayū be-
jebureyū be — io'e.

²³ — Warara'acayū o'ya'ījojoayū iġoda buxim-
katō beata buxim. Ixeyū Deus ekawēn kay jījā ip. Apēġape Deus ekawēn iam ip itaybit. Deus ekawēn taġ jekukum ip. Ixeyū duk'a xeyū dak Deus ekawēn taġ jekukum, Deus ekawēn a'ījom pima. Ade Deus ekawēn kay itabut jeedop ip. Ade ip e'em soat ka daġ-
-Deus kay itabucayū. Kadai'ip puxim ixeyū-
ya'a'eat'ip puxim. 30 be o'e takuġ'iat'ip puxim ip, 60 be o'e takuġ'iat'ip puxim tak, 100 be o'e takuġ'iat'ip puxim tak — io'e Jesus jewēju etaybitbin-
ayū be.

²⁴ Deus soat kukanap muwēnuwēn o'e Jesus. Imēnpuye wara'acat tak imuwēnuwēn o'e iboceayū be-
-wuymutaybitbinap-
-imēnpuximap ekawēn.

— Deus soat kukanap muwēnuwēn pimap, kat pe wuyju tiotatam pimap puxim — io'e Jesus. — Wuyju tiotatam pimap tiotataat jekat pe xipacata o'taida.

²⁵ — Ixet. Ixima daġ oajēm ip-
-itakomaayū. Ixi-
dipta o'tadum ip trigoda paraktaġ-
-trigoda jo'iata. O'tadum ip. O'jenapōn itakomaayū — Jesus o'e.

²⁶ — Ġebye ixidip o'jedipuk kadai paraktaġ, yaypapan pima. ²⁷ Imēnpuye ibuywatwat'ukayū o'jekawēn ip jekariwa be.

— “Kariwa,” io'e ip. “Xipacata du etadum ekat pe?” io'e ip.

— “Hm hm,” io'e.

— “Abu ixidipta o'tadum kadai paraktaġ?” io'e ip.

²⁸ — “Okay itakomaayū o'tamudu,” io'e.

— “Ixidip tu acetip'uk tu?” io'e ip.

²⁹ — “Iba'ore,” io'e cebe ip. “Trigodip kuka epe-
tip'uk, ixidip uk'uġ pima. Imēnpuye trigodip'ukap puxixim tip uġ ġu eyju,” io'e.

³⁰ — “Imēneju ixidip tiptop cuy trigodip'ukap puxim. Yaypan pima, tip pupu'ukayū be ocekawēn: ‘Koap ixidip puk epetip'uk tipmūnmūn ām, daxa be

tip mupik am. Trigodip pit epetipu, ta'uk am tip pewi, oduk'a be tamōg ām, ' i oce'e tip pupu'ukayū be. Soat tarun pimap, tip pupum ip," i — io'e Jesus.

Imēn Jesus iboceayū mutaybitbin o'e.

³¹ Jesus waram o'jekawēn iboceayū be. Wuymutaybitbinap o'gūwēn- -imēnpuximap ekawēn. Deus soat kukanap muwēnuwēn o'e.

— Deus soat kukanap mostardada buxim — io'e Jesus. ³² — Iboda wuykat pe atadaida. Ta'īcata mostardada, taidadam pima. Warara'ata bodi ma ta'it ma. Imēnpuxim Deus soat kukanap koap ma pūgpūg ma ikukan. Ade gū cekay itabucayū. Mostardada bit aypapan cīcā, taida buje. Wara'at kadai bodi ma aypapan e'em. Wasū ajēmjēm jedopi mōg ām tāku jeje, yaypan pima. Imēnpuxim Deus soat kukanap gūyjom pit ade jījā ikukan. Ade cekay itabucayū — io'e Jesus.

³³ Jesus waram o'jekawēn- -wuymutaybitbinap- -imēnpuximap ekawēn. Imēn o'jekawēn.

— Deus soat kukanap pāo'a muyuhuhuptōm puxim — io'e Jesus iboceayū be. — Trigonōm kuḡ osunuy ayacat- -ebapūg copo. Ixe ayacat pāo'a muyuhuhuptōm o'tōmpu. O'tōmōg trigonōm pe. O'tōmupinā. Soat taḡ o'jenōmupōgōg- -trigonōm taḡ. Imēnpuxim soat ka watwat Deus soat kukukan je'e iap awēg coco- -kabi beat soat kukan je'e iap awēg — io'e Jesus.

³⁴ Imēn o'jekawēn Jesus iboceayū be. Wuymutaybitbinap ekawēn acā o'jekawēn cebe ip. Soat em o'jekawēn Jesus imēn ma.

³⁵ Imēn o'jebapuk apēn Deus ekawēn muwēnuwēn'ukat o'e'e iap. O'jekawēn ixe:

Wuymutaybitbinap ekawēn acā ceweju ip oḡuwēnwēn. Ya'ōba'arēm ipi ebapuk ebi kaap ekawēn oḡuwēnwēn, i.

Imēn cuk o'e Deus ekawēn muwēnuwēn'ukat.

³⁶ Gebuje Jesus o'ju uk'a be. Adeayū xewi o'ju. Imutaybitbin'ibiyū oajēm ip Jesus kay.

— Iba'arēm ocewebe. Ocewebe juy eḡuwēn apēḡape-ixidip muwēnuwēn iape — io'e ip Jesus pe.

³⁷ — Kā — io'e. — Aḡokatkat co'iat ōn. Xipacata o'taidaiat co'i ōn. Soat waḡo ōn. ³⁸ Ikat soat ipi beayū co'i. Xipacata Deus kay itabucayū jo'iat. Ixidip Satanás kay itabucayū jo'iat-ibiōḡbuk kē-rēayū kukukat kay itabucayū jo'i. ³⁹ Itakomat ibiōḡbuk kērēat kukukat co'i. Tabubuap co'i ipi juacayū'ūmap. Tip pupu'ukayū Deus ekawēn tojot-jot'ukayū jo'iyū — io'e Jesus.

⁴⁰ — Imēn e'em ipi'ūmat kabia, ipi juacat'ūmap. Apēn wuyju ixidip pupum pima, tip mupik am; imēnpuxim je'e ipi juacat'ūmap. ⁴¹ Soat waḡo ōn. Wa'ōdojotjot'ukayū oceḡudot, soat xipat'ūmayū uk am xipacap pewi, wara'acat pe xipat'ūmat muḡēḡe'ukayū dak.

⁴² — Gebuje jomōḡ ip daxaboḡ pe, ipiat'ajojoap pe. Iboce ip jeedop jetōtōn. Tūy yeiyei je'e ip ipi bun.

⁴³ — Soat Deus a'ō kay kūyjobit pin pima, Deus ebekitkit jeedop ip isop Deus xe. Kaxi buxim ip isop jeedop, Deus soat kukan pima. Eya'ōpicūḡ-cūḡ cuy epesop wa'ō kay — io'e Jesus.

⁴⁴ Jesus iboceayū mutaybitbin o'e. Deus soat kukanap kabia muwēnwēn o'e.

— Deus soat kukanap kabia teiboḡat puxim-xipacap puxim — io'e Jesus. — Ikat pe iba'arēmat puxim — io'e. — Aḡokatkat ibo xipacap o'tobuxik wara'at kat pe. Cekay jījā o'e. Imēnpit waram o'ḡunēm. Icockok cīcā o'e. Soat ikuḡat o'ḡūm wara'acat pe dinheiro bu am ma.

— Waram o'jepit. Ibo kat o'jat kat iwat xewi. Imēnpuxim wuywebe ḡasū dak ajo wuyju ikuḡiat iūm put, Deus xe wuynuy am. Soat iūm put wuywebe, wuynuy pin cīcā cexe buye — io'e Jesus.

⁴⁵ — Deus soat kukanap kabia wara'acat puxim tak-aḡokatkat jekukuap puxim — io'e Jesus. —

Pérola'a kudadamat ixe. Teiboğat'a kudadam o'e.

⁴⁶ — Ixe ağokatkat pérola'a o'yadobuxik- -yaboğat'a. Ade dinheiro o'ğūm yadeim- -pérola'a deim. Soat ikuğat o'ğūm wara'acat pe, dinheiro bu am ma — io'e Jesus.

— Ibocewi oajēm pérola'a kukukat pe. Ya-boğat'a o'yabu yakukat xewi. Imēnpuxim wuyju dak. Wuybikuyap pupum Deus xewi. Wuywebe ajo wuyju ikuğiat iūm put Deus pe, cexe wuynuy am, Deus soat kukan pima wuynuy pin cexe buye — io'e Jesus.

⁴⁷ — Deus soat kukanap axima bubuap puxim tak — io'e Jesus. — Ağokatkayū ixe axima bubuap o'joxik iodi be. Ade o'jat ip ibubuap pe- -axima — io'e Jesus. ⁴⁸ — Ibubuap topapūn pima, ixe ağokat-kayū tojojon ka'oririt kay, axima naē ām. Kaxik-xik'i o'e ip ibubuap akokoreren. Taēhēm o'e ip ibubuap pewi. Xipacat ico be ip mōgmōğ. Xipat'ūmat ixixiğ ip — Jesus o'e.

⁴⁹ - ⁵⁰ — Imēn je'e ipi'ūmat kabia — io'e. — Deus ekawēn tojtjot'ukayū jajēm ijodi wuyjuyū naēm- -xipat'ūmayū naēm xipacayū xewi. Jajēm ip xipat'ūmayū xik am daxaboğ pe, ipiat'ajojoap pe. Ibocewi jeedop ip tōtōn xipat'ūmayū. Tūy yeiei ip je'e ipi bun — io'e.

⁵¹ — Ijop ekawēn eyetaybit tu- -soat? — io'e je-weju etaybitbinayū be.

— Hm hm — io'e ip. — Kuy ocetaybit.

— Xipat — io'e Jesus.

⁵² — Deus soat kukan pima, Moisés ekawēn imutaybitbinayū webekitkin je'e- -soat ip. Bekicat ebay buxim ip. Ibutut muxipanpanap'a bewi iisuat uk'uğ, kuyat uk'uğ tak xeku. Imēnpuxim ixeyū dak itaybit cīcā Moisés ekawēn. Ijop ekawēn kuyat uk'uğap puxim. Wekawēn pit iisuat uk'uğap puxim — io'e Jesus cebe ip.

⁵³ Imutaybitbinap epere buje, Jesus o'ju jeka kay- -Nazaré ka kay. ⁵⁴ Oajēm. Iboceayū mutaybit-

bin o'e Deus eju kawēnwēnap'a be. O'yağuyba-bi'üm iboceayū.

— Apēn sute soan itaybit imēn? — io'e ip. — Apēn xe'e sute o'ğubapuk wuywebe i'e ba'oreap? — io'e ip jewewebe.

⁵⁵ — José ipot ġu du sute? — io'e ip jewewebe.

— Karepiğa ipot ġu du sute? — iboceayū o'e. Tūybe Jesus José ipot iān o'e ip.

— Maria i xixi butet ġu du? — io'e ip. — Ikitpityū butet Tiago i, José i, Simão i, Judás i. Soat ip ikitpityū ġu du? — io'e ip jewewebe. ⁵⁶ — Iixityū dak ijoce ma ġu du wuyweju- -soat iixityū? — io'e ip. — Apēn cuk sute itaybit cīcā ġasū? — io'e ip.

⁵⁷ Itakoma ip o'e cekay.

— Wuyju bit kūyjobin ġu juy ajop ixē a'ō kay, ixē wuyjo'iat puyē — i napa ma o'e ip.

— Soat ka dağacat ibuyxim ma Deus ekawēn muwēnuwēn'ukat kuğ. Jaypanap ka beayū bit ibuyxim ġu ikuğ- -ipi beayū bit, uk'a beayū bit tak — io'e Jesus.

⁵⁸ Ade ġu o'ğubapuk Jesus- -Deus a'ōbacaap. Iba'ore o'e, ipi beayū itabut'üm cekay buye.

14 Herodes Jesus awēğ o'yawēğcoco. Ipi kukukat osunuy ixē Herodes iğebuject- -Galiléia eipi kukukat.

² — Ixē ağokatkat João Batista i ibutet — Herodes o'e, tūybe iboap icēmān iān o'e buye. Imēn kawēnwēn o'e jebuywatwat'ukayū be. Jesus muwēnuwēn o'e.

— Waram ġuto o'jetait João je'ūap tomukadi — i cedağ ġu o'e. — Imēnpuyē Deus a'ōbaca am wuywebe i'e ba'oreat mubapukpuğ teku — Herodes o'e.

³ Kuy bima Herodes jebekitkit o'ğuju João kay. João uk puje, o'ğukirikirik. O'ğukirikirik imōğ ām daomūnmūnap'a be. Ayacat cekayap puyē, o'jomōğ- -Herodías cekayap puyē. Herodes kitpit tayxi osunuy

ixe ayacat- -Filipe tayxi. Imên daomünmünap'a be Herodes João o'guômat, João ekawên puye.

⁴ — Cûğ ġu ewebe ixe ayacat kuk am. Deus xe cedağ ġu ekitpit tayxi eju jewewbumün âm- -ixe Herodías eju jewebumün âm — i juk o'e João ipi kukukat pe- -Herodes pe.

⁵ Imênpuye Herodes João aoka ojuy. Imênpit Judeuyü xe João Deus ekawên muwēnuwēn'ukat osunuy. Imênpuye Herodes iparara o'e Judeuyü buxim.

⁶ Peta bima bit Herodías it o'jebapuk da'i'in Herodesyü etabut pe. O'jebapuk Herodes kapap epeta buye. Cekay jījā o'e Herodes- -ayacat yaypan'isuat kay.

⁷ — Da'i'iap kay jījā ōn — io'e yaypan'isuat pe. — Emukaypinut eğuwēn owebe — io'e. — Deus etabun ōn e'em ewebe emukaypinut oğüm ewebe — Herodes o'e. — Deus cuy ipiat supi'ajoat owebe, wa'ō dağ ġu iüm pima — io'e.

⁸ — Ijocce ma João Batista a prato be eyaüm owebe — io'e.

Imên yaypan'isuat o'e.

— Imên ece, o'it — i juk o'e cebe ixi.

Imênpuye yaypan'isuat o'e imên ma. ⁹ Yaüm pin ġu o'e Herodes. Ibu'u o'e. Iğuycūğ o'e, yaypan'isuat imên o'e buye. O'yaüm an pit cebe, jekawên puye, itakoyiyü buye dak- -jewejuayü buye. Jekawēn tağ o'yaüm.

¹⁰ — Daomünmünap'a kay eju — io'e sorara be. — João a eya'uk — io'e cebe.

¹¹ — Hm hm — sorara o'e.

O'ju. O'ya'uk. O'yadojot prato be. O'yaüm ayacat'isuat pe. Imên Herodes juk itaybit João oe'ü iam.

O'yadujowat jexi kay ixe.

Imēneju Herodes tūybe João'üm waram o'jetait iän o'e, Jesus awēğ yawēğcocom pima.

¹² João eju oekuku'iyü oajēm João'üm kay. Ijebit o'tujowat witabikūy be, ikot am.

Jebabim ikot puje, o'ju ip. Oajēm Jesus kay. João'üm awēğ muwēnuwēn o'e ip.

¹³ Tobuxik puje, o'jēm Jesus adeayū xewi. O'ju kobe dağ ağoka'ūmat kay. Oajēm. Adeayū dak o'ju ip. E dağ pit o'ju ip, Jesus cucumap awēg cuk o'ya-wēg coco ip puye. Oajēm ip ağoka'ūmat pe, Jesus ajēm awap.

¹⁴ Kobe bewi cēm puje, Jesus ade jījā o'jojojo. Itabotaidabotbot o'e cekay ip.

Gebuje iwātaxipipiyū o'ģu'ada Jesus.

¹⁵ Jesus eju etaybitbin'ukayū o'jekawēn cebe.

— Katpuje ma oexe buye, jexat pupu am ip eģuju ağoka kay — io'e ip. — Ijoceayū eģuju juy. Ka'ūmģu ixat ijoce, ağoka'ūmat puye — io'e ip. — Iteyū juy eģuju jexat pupu am dinheiro deim — io'e ip Jesus pe.

¹⁶ — Ka'ūma — Jesus o'e. — Je'ju ğu juy ixeyū, jexat pum. Eyju ma ixan epeģūm cebe ip — io'e.

¹⁷ — Pūģpūģ ma ixat kuğ oceju — io'e ip. — Cinco be ma pāo'a opop. Axima dak opop-xepxep ma — io'e ip.

¹⁸ — Pāo'a epeyadojot, axima dak — io'e jewegu etaybitbinayū be.

¹⁹ — Soat epabikbik. Xikxikxik'i — io'e wara-ra'acayū be-adeayū be.

Kaxikxik'i osodop ip. Pāo'a o'yabu Jesus. Axima dak o'jat. Xepxep ma o'jat.

Gebuje Deus eju o'jekawēn. Jeapūnpūn o'e kabi kay.

— Bay, ēn xipat — io'e. — Pāo'a eyaūm oce-xat'am — io'e.

O'yadakat jebum. O'yaūmūm jewegu etaybitbinayū be. O'yaūmūm ip iboceayū be. Imēn Jesus o'yamu'a-coğ. Ya'ade jījā o'e. Cewegu etaybitbinayū o'yaūm adeayū be. ²⁰ O'jo'o'o soat ip. Ibeģbeğ ip o'e.

Cepoyat puje, Jesus eju etaybitbinayū o'jat ico be. Doze be ico o'ģunopapūn ip cepoyan-pāo'a epoyan, axima epoyan tak. ²¹ Ağokatkayū 5 mil be osodop ip. Aoyū dak bekikit eju, ade ip osodop. Adeayū osodop ip-jekōnkōnayū.

²² — Owap cuy winābu epeju kobe daḡ — io'e jeweju etaybitbinayū be. — Eyju cucum pima, ijo-ceayū mujum puk ōn ika be — io'e.

— Hm hm — io'e ip.

Ōmōm ip kobe be. O'ju. ²³ Warara'acayū o'ḡuypit Jesus ika be.

Co'a kay jaḡepūḡ ma o'ju, jekawēn ām Deus eju. Oajēm. Kabiok pima co'a jeje osunuy jaḡepūḡ ma.

²⁴ Kobe daḡayū bit iodi bicūḡpe o'e ip. Wūy ma ipi bewi o'e ip. Tipodoy tiboḡ cīcā o'e. Kobe mupok-upoḡ o'e kabidoxixi buye. Kopūḡ. Kopūḡ. Kopūḡ. O'-subidoajēm topabe.

²⁵ Kaxi jēm awap ma xīḡxīḡ o'e. Idibi adopa daḡ xīḡxīḡ o'e.

Oajēm jeweju etaybitbinayū kay. ²⁶ Iparara jījā o'e ip. Tūybe axik sute iān o'e ip iodi adopa daḡ xīḡxīḡ puye.

— Axik tu sute? — io'e ip.

O'jewāwā ip, iparara jījā buye.

²⁷ — Axik ma ḡu ōn. Eya'ōcam cuy epesop. Ey-pararam ḡu juy. Ōn ā — Jesus o'e cebe ip.

²⁸ — Kariwa! — Pedro o'e. — Ēn pima, “Ejot idibi jeje,” i ece owebe. “Ejot ijodi,” i juy ece owebe — Pedro o'e cebe.

²⁹ — Ejot — io'e.

O'jēm kobe bewi. Xīḡxīḡ o'e idibi adopa daḡ, ajēm ām Jesus kay. ³⁰ Iparara bit o'e tipodoy buye. Imēn-puye oakōm pin.

— Kariwa! — io'e. — Odaxijom ece iodi bewi — io'e ya'ōberen.

³¹ O'jebumupaya Jesus dao ma. O'subuijik Pedro. O'jat. Jesus Pedro o'jat.

— Etabutbūt ma okay — io'e cebe. — Etabun cīcā juy okay — io'e Jesus.

³² Kobe be oōm- -xepxem. Kabido o'subido'ūm ḡebuḡe bit.

³³ — Icēm. Deus ipot ēn — kobe beayū o'e ip Jesus pe.

Jesus oibuyxin ip.

³⁴ - ³⁶ Iodi mudek puje, Genesaré eipi kay oajēm Jesusyū. Jesus itaybit o'e ip- -Genesaré watwat. O'ju ip eipi daḡ- -soat taḡ. Iwātaxipiyū dakoykoy o'e ip- -soat. Iwātaxipiyū o'tojotjot ip Jesus kay.

³⁶ — Iwātaxipiyū esay ukpi mucay pin cīcā je'ada am — io'e ip Jesus pe.

Genesaré watwat o'e ip.

— Ha'a — Jesus o'e.

O'je'ada ip- -soat o'ḡucay'iyū- -soat iwātaxipi topi-biyū.

15 Fariseuyū oajēm Jesus kay Moisés ekawēn imutaybitbin'ukayū eju. Jerusalém ka bewiyū osodop ip- -soat ip.

(Kuyje Fariseuyū oekuku ip aypapayū'ūm'ūm ekawēn taḡ.

— Jekōn awap jewebuwuywuy'uk'ūm pima, xipat ḡu wuyxe — io'e ip kuyje. Imēnpuye Fariseuyū oajēm Jesus kay.)

² — Apēnpuye eweju etaybitbinayū jewebuwuywuy'uk ḡu ip, jekōn awap? — io'e ip Jesus pe. — Xipat ḡu imēn — io'e ip. — Wuyajojoyū'ūm'ūm ekawēn taḡ ḡu ip jekukum, jewebuwuywuy ḡu ip puye — io'e ip cebe.

³ — Pām eyju? — Jesus o'e. — Apēneju Deus ekawēn taḡ ḡu eyju jekukum? Apēneju wuyajojoyū'ūm'ūm ekawēn taḡ acā eyju jekukum? Deus ekawēn taḡ ḡu eyju jekukum — io'e Jesus cebe ip.

⁴ — Xipan cuy ebay ejukuk, exi dak,

i.

Imēn Deus ma juk o'e — io'e Jesus.

— Jebay muymuy'ukat cuy epeyaoka,

jexi muymuy'ukat tak, i.

Imēn Deus o'e — io'e Jesus. ⁵ — Eyju warara'acat mukūyjojom pima bit, e'em: " 'Dinheiro kuka adi oḡūm eywebe eybuywat am,' i juy epe'e eyebay be," i'e'em eyju bit warara'acat mukūyjojom — io'e Jesus. ⁶ — Eyju dak e'em warara'acat pe: "Gebuje cūḡ ma e'em ewebe ebay jukukuk xipan'ūm pima," i — io'e Jesus. — Imēn ma ajojoyū'ūm'ūm ekawēn taḡ ip

jekukum, Deus a'ô mubuyxi'ûm'ûmat eyju — Jesus o'e Fariseuyû be.

⁷ — Wuyjuyû muğuykuku'ukayû eyju — io'e Fariseuyû be. — Kuyje ma juk Isafas emuwên icēmân. Imên o'e:

⁸ “ ‘Deus kay oceju,’ i napa ma e'em iteyû wuyjuyû,” i. “Imēnpit okay ġu ip,” i'e'em Deus, i juk o'e Isafas — io'e Jesus. ⁹ “ ‘Ën xipat,’ i te'e ma e'em ip,” i. “Imēnpit xipat ġu ôñ ip cexe,” io'e Deus, io'e Isafas. “ ‘Deus ekawên eymutaybitbin oceju bit,’ i napa ma e'em ip. Imēnpit wuyjuyû ekawên acâ adeayû mutaybitbin ip,” i'e'em Deus, i juk o'e Isafas — io'e Jesus.

¹⁰ Gebuje Jesus adeayû o'tomuwâ. Oajēm ip.

— Ya'ôpicûğcûğ cuy epesop, eyetaybit am — io'e cebe ip. ¹¹ — Ajo ômôm eybi be iap ġu ey mukêrêrêrên ġu — io'e. — Ajo cêmcêm eybi bewi acâ ey mukêrêrêrên — io'e. — Iboap kay juy epeğebu — io'e cebe ip.

¹² — Etaybit tu Fariseuyû itakoma ekay iam-ekawên puye, itakoma iam? — ceweju etaybitbinayû o'e Jesus pe.

¹³ — Wetaybit — Jesus o'e. — Kadaidip webay o'taيداğuiaptip ju'uk Deus. Apên wuyju tipkêreatip ju'uk ku bewi; imēnpuxim Deus Fariseuyû emumutaybitbinap ju'uk wuyağuy bewi — io'e Jesus.

¹⁴ — Eyağuybabi'ûm ġu juy itakomaayû kay — io'e. — Ikukukat ita'ûmat puxim ip- -Fariseuyû. Iku-kukat ita'ûmat pima, jekukukat tomuju wara'at ita'ûmat cucum pima, xepxem ma ip at'an je'e ipi-kûykûy be, ita'ûmayû ma ip puye.

¹⁵ Ibocewi Pedro o'e:

— Wuywebe ômômap ġu wuymukêrêrêrên- wuybinûn peat acâ iat ekawên iba'arêm ocexe. I juy ece ocewebe apêgape ekawên, iba'arêm puye — io'e Jesus pe.

¹⁶ — Eyju adeayū buxim: ka'ūmḡu eyetaybit — io'e Jesus. ¹⁷ — Ajo ōmōm eybi be, ijop kapkam eydada be. Ġuyjom cēmcēm eywebewi — io'e. ¹⁸ — Ajo cēmcēm eybi daḡwi, ixe eymukērērērēn, eybinūn pewi cēmcēm puye — io'e. ¹⁹ — Soat em ijodiat jewaḡuydadam ikērēat kay: warara'acat aokakam ip, warara'acat tayxi kaykay'uk ip, aoyū kaykay'uk ip, warara'acat pubut tujupa'ūm'ūm'uk ip, warara'acat awēḡ mukērērēn'uk ip, warara'acat awēḡtatam ip. Soat eybinūn pewi jebapukpuḡ, soat em ikērēat kay ḡebum puye acā — Jesus o'e. ²⁰ — Ijodiacat ikērēat mujurūḡrūḡ'uk, aypapa'ūm'ūm ekawēn taḡ jewebuwyuy'ūm puye ḡu- -soat em ikērēat kay ḡebum puye acā. Iḡo aḡuykērēat acā eymukērērērēn. Iboam eyetaybit ḡu buk? — io'e jewēju etaybitbinayū be.

²¹ Ibocewi o'ju. Jesus Tiro ka tēḡ ma o'ju. Sidom ka tēḡ ma dak oeku.

²² Ayacat oajēm Jesus kay- -Canaā eipi wat- -Judeu'ūmat.

— Kariwa! — io'e ya'ōberen. — Etabotaidabotbon cuy okay. Ibiōḡbuk kērēat kuḡ o'it, ipiat'ajojom cīcā ibiōḡbuk kērēat kuḡ puye — io'e Jesus pe- -Davi diwacat pe.

Ayacat ma i'it osunuy. ²³ O'jede ḡu Jesus. Imēnpuye Jesus eju etaybitbinayū o'jekawēn ip Jesus pe.

— Soat em ixe ayacat wuynomuju ma ya'ōkarey. Esu'it mu'ada juy. Ġebuḡe juy eḡunapōn — io'e ip Jesus pe.

²⁴ — Iba'ore — io'e. — Deus omuju Israel naxeḡebitbit kay acā — Jesus o'e. — Itabidaoat puximayū kay- -ovelha buximayū kay — io'e.

²⁵ Jesus wap o'jēḡ'aecōḡcōḡ ayacat.

— Kariwa — io'e. — Obuywan ece — io'e.

²⁶ — Ka'ūma. Xipat ḡu oxe, bekicat xat'a yaxixiḡ pima, akurice be ya'om — io'e.

²⁷ — Icēmān, Kariwa — io'e. — Imēnpit akuriceyū wuyxat epoyat o'om. Mesa bewi i'at puḡe, akurice io'om.

²⁸ — Ka — io'e. — Wetaybit ġasū okay etabut cīcā iam — io'e. — Ebikuyap taġ e'it mu'ada oce — io'e.

Ġasū ma je'it o'je'ada.

²⁹ Ibocewi o'ju iodi be- Galilíadi be. O'jeu. Oajēm co'a jeje Jesus. Oabik.

³⁰ Jesus kay oajēm ip- -ade jījāayū. Taokērēayū dujotjon ajēmjēm o'e ip, ita'ūmayū dak, jekawēn pa'oreayū dak, warara'acayū iwātaxipipiyū dak. Jesus kay imu'ada am ip o'tojot.

Oajēm ip. O'jomōġ Jesus wap. Soat ip o'jomōġ. Soat ip o'je'ada. ³¹ Yaġuybabi'ūm o'e ip- -adeayū, xīġxīġ pa'ore topibiyū o'jojoko ip puye. Yaġuybabi'ūm o'e ip, kawēn pa'ore tūbiyū dak o'jojoko ip puye. Ita'ūm topibiyū tate o'e.

— Ka'ūmġu xipacat Deus co'iat. Israel naxeġe-bitbit Deus mubuyxi. Ixe a'ōbi o'je'ada ip — io'e yaġuybabi'ūmayū.

³² Ġebuġe Jesus jewēju etaybitbinayū o'tomuwā.

— Wetabotaidabotbot adeayū kay — io'e Jesus. — Ibaca'ūm ip, ixat'ūm puye. Irere ip. Xepxep xet oweju ip jekukum. Ġasū bit ixat'ūmġu ip o'e. E daġ jeku am iba'ore e'em cebe ip, irere jījā buye, ibaca'ūm puye ip. E daġ ma ip kuka o'tao'ūm'ūm repibun puye dak — Jesus o'e jewēju etaybitbinayū be. — Obu'u kawēn ām cebe ip: “Eyduk'a kay juy epeyepit,” i, irere buye — io'e.

³³ — Pomawi pāo'a oceyabu soat muykōn ām? — io'e ip. — Ya'ūmġu uk'a iġo ka be. Iba'ore yabu am — io'e ip.

³⁴ — Pebūrū pāo'a opop? — io'e cebe ip.

— 7 be — io'e ip. — Pūġpūġ ma axima'it'it tak — io'e ip.

³⁵ — Kazikzik'i epabik — Jesus o'e iboceayū be- -adeayū be.

Oabikbik ip ipi ju.

³⁶ Pāo'a o'yabu Jesus- -7 beat'a. Axima dak o'jat. O'jekawēn Jesus jebay be- -Deus pe.

Soat xat o'takat Jesus- -pāo'a, axima dak. O'ya-
mu'acoğ cîcâ. Ya'ade jîjâ o'e. Ade axima dak,
imu'acoğ puye. Iûmûm o'e jeweju etaybitbinayû be.
Cexat ûmûm o'e ip iboceayû be. ³⁷ Soat ip o'jo'o'o
ip. Ibeğbeğ iboceayû o'e. Ixat o'jepoyat. 7 beap ico
be o'ğunopapûn ip cepoyan- -axima epoyan, pāo'a
epoyat'am tak. Jesus eweju etaybitbinayû o'ğunopa-
pûn. O'tujowat ip. ³⁸ 4000 beayû o'jekôn ip- -
ağokatkayû. Bekitkiyû dak o'jekôn ayacayû eju.

³⁸ Ğe buje Jesus ixeyû ibeğbeğayû o'ğuju. Kobe
dağ Jesus pit o'ju Magadâ ka kay.

16 Fariseuyû oajêm ip, Saduceuyû dak. Oajêm
ip Jesus kay. Pûğpûğ ajêmjêm o'e Jesus eju
kawên âm.

— Ocewebe i'e ba'oreat eğubapuk cuy ocewebe
— io'e ip Jesus pe. — Deus a'ôbacaap co buje, ace-
tabun ên Deus xewiat iap kay — io'e ip.
Iboap muwên o'e ibuyxijo am.

²⁻⁴ — Oğubapuk ğu juy — Jesus o'e cebe ip. —
Ğasûacat ikêrêat kuğayû ip. Deus kay itabut'ûmayû
ip. Eywebe i'e ba'oreat oğubapuk ğu.

— Kan pima eyju e'em, "Kuyajeat kabia idip
ma e'em, kabi ipakpuk puye," i. Kabia isum pima
eyju e'em, "Muba'at oajêm ğasû, kabi ipakpuk puye,
kabikerere buye dak," i. Eyetaybit cîcâ apênape kabi
ipakpukat iam, kabi kay ağ puye. Imênpit eyetaybit
ğû apênape oce'e'eap iam. Ajo juk o'jebapuk Jonas
pe iap puxim pit ğuyjom je'bapuk eyetabun — io'e
Jesus.

Imên Jesus o'jekawên cebe ip, itaybit puye ip apêna-
pe kabi ipakpukat iam, ijojom pima ip. Imênpuxim
Jesus e'e'ap cuk o'jojojo ip. Itaybit kuka o'e ip Je-
sus bacaap Deus xewi osunuy iam.

— Kuyje Jonas o'jêm axima boğat uk pewi. I-
cêmân kuyjeacat pe i'e ba'oreat o'e. Imênpuxim ğasû
ağokatkat waram ğuto itait je'e, ce'û'ûayû dopap
pewi cêm puje xeku. Ğasûacat pe i'e ba'oreat je'e
xeku waram itaicap. Wara'at ğu eywebe i'e ba'oreat

ġubapuk eyetabun- -xe ku waram itaicap acā Deus ġubapuk — io'e Jesus.

Ibocewi Jesusyū o'ju ip wara'at ka be.

⁶ O'timudek ip. Oajēm wara'at ka be.

Pāo'a o'yadujowat ġu Jesus eju etaybitbinayū, ġebum'ūm puye ip.

⁸ — Aġ cuy epesop Fariseuyū epāo'a muyuhuhaptōm kay, Saduceuyū enōm kay dak — Jesus o'e cebe ip.

⁷ Ġe buje o'jekawēn ip jewewebe.

— Jesus imēn o'jekawēn wuywebe, pāo'a wuyadojot ġu buye — io'e ip.

Cedaġ ġu o'e ip. ⁸ Jesus pit ixeyū ekawēn o'ya'ijojo.

— Yopīt ma eyetabut okay — io'e cebe ip. —

Apēnpuye eyewewebe kawēnwēn eyju: "Imēn xe ku o'e, wuyju pāo'a kuġ ġu buye," i? Imēn ġu juy epe'e — io'e Jesus. ⁹ — Eyetaybit ġu buk? — io'e cebe ip.

— Ġebum ġu du eyju 5 be pāo'a oyaūm 5000 beayū xat'am iap kay? Ġebum cuy epesop iboap kay — io'e. — Ġebum ġu du eyju pēbūrū ico epeġunopapūnpūn yaepoyan? Ġebum cuy epesop iboap kay dak — io'e.

¹⁰ — Ġebum ġu du eyju 7 be pāo'a oyaūm 4000 beayū xat'am iap kay? Ġebum cuy epesop iboap kay dak. Ġebum ġu du eyju pēbūrū ico epeġunopapūnpūn yaepoyan? Ġebum cuy epesop iboap kay dak.

¹¹ — Eyetaybit ġu buk tu pāo'a muwēnuwēn ġu ōn iam? Eyetaybin cuy. Aġ cuy ixeyū be pāo'a muyuhuhaptōm kay- -Fariseuyū epāo'a muyuhuhaptōm kay, Saduceuyū epāo'a muyuhuhaptōm kay dak — io'e cebe ip.

¹² Imeneju itaybit ip Jesus pāo'a muyuhuhaptōm i'e buje, Fariseuyū emumutaybitbinap i'e ojuy osunuy, Saduceuyū emumutaybitbinap tak. Imēn ip o'ġukūyjo. Xipat ġu cemumutaybitbin ip. Deus xe cedaġ ġu ip imutaybitbin- -Fariseuyū, Saduceuyū dak. Wuyjuyū muġuykuku'ukayū ip osodop.

¹³ O'ju ip Cesaréia eipi tēġ ma- -Filipe eipi tēġ ma. Oajēm.

— Abu xe'e òn wuyjuyū xe? — io'e cebe ip-soat waḡo o'e.

¹⁴ — “Teku waram ḡuto o'jetait'iat,” i'e'em ip-pūḡpūḡ e'em ip — io'e ip. — “Teku João Batista-waram ḡuto o'jetait'iat,” pūḡpūḡpūḡ e'em — io'e ip. — “Teku Elias-waram ḡuto o'jetait'iat,” i'e'em warara'acayū — io'e ip. — “Teku Jeremias-waram ḡuto o'jetait'iat,” i'e'em warara'acayū — io'e ip. — “Teku kuyjeat-Deus ekawēn muwēnuwēn'ukat-waram ḡuto o'jetait'iat,” i'e'em warara'acayū — io'e ip.

¹⁵ — Pām eyju? — io'e. — Abu òn eyxe bit? — io'e.

¹⁶ — Cristo ēn — Simão Pedro o'e Jesus pe. — Deus emunaē ēn. Soat em itaicat ipot ēn-Deus ipot ēn — io'e Jesus pe.

¹⁷ — Icēmān, Simão — Jesus o'e. — Ijoceayū dak iboap ekawēn o'ḡuwēn ḡu ip ewebe-Deus acā-webay acā-kabi beat acā. Ecokcok ēn, João ipot — io'e.

¹⁸ — Icēmān oḡuwēn ewebe: Èn Pedro. “Deus ipot ēn,” exe iap ekawēn kay itabucayū webekitkin e'em ip, itabut puye ip. Okay itabucayū oe'ū ip ma'ḡu, jetait waram, ibaca jījā buye. Satanás ebekitkit bacaap podi ma e'em okay itabucayū bacaap.

¹⁹ — Ajo cūḡ ma exe ijoce, iboap tak cūḡ ma je'e Deus xe kabi be — io'e Pedro be. — Ajo bit cūḡ ḡu exe ijoce, iboap tak cūḡ ḡu je'e Deus xe kabi be. Imēnpuye a'ōbi Deus emunaē kay itabucayū jeedop ip Deus xe-okay itabucayū. Deus soat kukan pima, cexe jeedop ip — Jesus o'e Pedro be.

²⁰ — Ḡasū dak cuy omuwēnuwēn epekuku ḡu wara'acayū be. “Teku Deus emunaē,” i'ūmḡu juy epeku — io'e jewēju etaybitbinayū be.

²¹ Jesus jewēju etaybitbinayū mukūyjojom o'e apēn kuka o'jebapuk cebe iam.

— Jerusalém ka be oju — io'e cebe ip. — Ika watwat zipan ḡu okuk soat ip-Judeuyū kukukayū, paīyū kukukayū, Moisés ekawēn imutaybitbin'ukayū. Ipiat'ajom òn, ixeyu buye — io'e jewēju etaybitbin-

ayū be. — Waoka ip — io'e Jesus. — Imēnpit xep-xep xet kap puje bit, waram ocetai — io'e Jesus.

²² Pedro ibodi ma o'tujowat jewēju, kawēn ām.

— Jaoka ġu ip. Deus bikuyap tomuju ġu, Kariwa — io'e Pedro. — Je'babuk'ūma — io'e.

Imēn Pedro o'e Jesus pe. Imukorēm pin, Pedro xe xipat ġu kuka o'e imēn pima bit.

²³ O'jekorepēn Jesus.

— Mūġ ece! — io'e Pedro be. — Satanás eka-wēn puxim ēn kawēnwēn. Satanás tak ibu'u owebe we'ū ām adeayū beam. Deus aġuy daġ ġu ēn jewaġuyġuy- -ipi juacat aġuy daġ acā ēn. Imēnpuye Deus bikuyap taġ jekuku am, ēn omubu'un ojuy — io'e Jesus Pedro be.

²⁴ Ġebuġe Jesus o'jekawēn jewēju etaybitbinayū eju.

— Oweju jeku pin pima, eywekay ma eyaġuy-ba'ūm cuy; eybu'um ġu dak cuy eye'ū ām owebeam; wa'ō daġ tak cuy epeku — io'e cebe ip.

²⁵ — Imēneju owebeam eye'ū buġe, soat em eye-tait epesop Deus xe eye'ūap tomukadi. Eybu'u eye'ū ām owebe am pima bit, epajēm ġu Deus kay — io'e.²⁶ — Ajo-kuġ tak epesop soat tarekrek kuġ ipi juat kuġ, eybiōġbuk ipiatpi'ajojoap pe imēnpit? Ka'ūma kuġ ma! — Jesus o'e cebe ip. Tei'ūmġu soat em Deus xe wuydopaptem — io'e.

²⁷ — Soat waġo ōn — Jesus o'e, kawēnwēn pima jewebeap pe ma. — Ocepit ma wekawēn tojtjt'uk-ayu eju, webay a'ōbacaap eju dak, idip cīcāap eju dak. Yajēm puġe, teim je'ġūm soat pe- -apēn oekuku iaptem — io'e. ²⁸ — Pūġpūġ pit jeedop wajēmap wiwim itabēġ- -ijodiat. Oxe xe ma jeedop ip, soat kukan ōn pima. Wajēmap co'ūm puġe, je'ū ġu ip — io'e Jesus- -soat waġo o'e.

17 5 xet kap puġe, o'ju ip co'a kay- -yaumat'a kay. Jesus ebapūġ ma o'tujowat- -Pedro, Tiago dak, João dak. Tiago kitpit osunuy ixe João. Jaġepūġ ma o'tujowat ip.

Oajēm ip. ² Co'a jeje Jesus o'jewemuwarurun ebapūgayū wap. Kaxi sopsepap puxim topasopsep o'e- -Jesus topa. Iisuat puxim jekabek- -Jesus ekabek. Irut cīcā o'e.

³ Gebuje Moisés'ūm o'jebapuk, Elias'ūm tak. O'jebapuk ebapūgayū wap. Jesus eju jekawēn ām o'jebapuk ip. O'jekawēnwēn ip Jesus eju.

⁴ Kawēnwēn epere buje, Pedro o'e Jesus pe:

— Kariwa — io'e. — Xipat ma wuyju ijoce am. Xipat exe bima, xijap ojomōg ijoce. Pūg edopam ojomōg. Wara'at Moisés'ūm dopam ojomōg, wara'at Elias'ūm dopam — io'e Jesus pe.

⁵ Kabikerereat tak oajēm cekay ip- -Jesusyū kay. Isopsepat osunuy. Ixeyū dak o'yajuy isopsepan. Deus isopsepat pidasewi o'jekawēn- -kabikerereat pidasewi.

— Teku okpot. Ikukpin cīcāat oxe. Omucokcokap cīcā okpot. Eya'ōpicūgcūg cuy epesop ya'ō kay — io'e- -Deus o'e.

Imēn kawēnwēn o'e Deus. Jesus muwēnuwēn o'e.

⁶ Ijo buje, ebapūgayū o'jēg'aecōgcōg ip. Iparara jījā o'e ip Deus kabikerereat pidasewi o'jekawēn puye. ⁷ Jesus pit o'jēg'aecōgcōg'iaiyū o'gucay.

— Epe'āy juy — io'e cebe ip. — Eypararam gū juy epesop — io'e.

⁸ Jeakağ ip pima, Jesus ma o'jojojo ip. Ka'ūmgu warara'acayū o'jojojo ip. O'āy ip. O'kop ip Jesus eju. O'kop ip co'a jejewi. ⁹ Kopkom pima, Jesus o'jekawēn ebapūgayū eju.

— Gasū gū juy epejojoioiap epeguwēn warara'acayū be — io'e cebe ip. — Guyjom pit epeyawēgmuwēnuwēn put, waram wetait puje — io'e- -soat wağo o'e.

¹⁰ — Apēnpuye Moisés ekawēn ocemutaybitbin'ukayū e'em. "Koap Elias'ūm omuyku," i? — io'e ebapūgayū Jesus pe.

Imēnpuye Jesus kawēnuwēn o'e. Elias muwēnuwēn o'e.

¹¹ — Elias'ūm awēg itaybit gū buye ip — io'e Jesus. — Elias'ūm co'iat kuy oajēm, soat muxipan am- -wajēmap peam imuxipan. Adeayū ağuyumuwaru-

run itabut am ip Deus kay — io'e Jesus. ¹² — Imên Elias'ùm co'iat kuy oajêm ma ijoceayû kay. Ixeyû bit ixem itaybit ġu o'e- -Moisés ekawên eymutaybitbin'ukayû. Warêmtaġ ma ip o'jukuk. Ikêrêm cîcâ ip o'jukuk. O'ġudadaibotbon cîcâ ip. Imên ma ôn tak ipiat osupi'ajojo, xipan ġu ip okuk puye — io'e Jesus- -soat waġo o'e.

¹³ Imên Jesus eju etaybitbin'ukayû itaybit o'e Jesus ekawên- -João Batista ajêmap ekawên.

¹⁴ Jesusyû oajêm adeayû kay. Iboceat o'jêġ'aecôġ-côġ- -aġokatkat. O'jêġ'aecôġcôġ Jesus wap.

¹⁵ — Okpot kay etabotaidabotbon cuy, Kariwa — io'e. — Axik opop cebe. Ipiat'ajojom ibiôġbuk kêrêat pibun — io'e aġokatkat Jesus pe. — Ade em o'at'at daxe be. Ade em oakômkom idibi be — io'e.

¹⁶ — Eweju etaybitbin'ukayû kay otojot. Okpot otojot. Imênpit itaybit ġu ip ibiôġbuk kêrêat mujêm âm. Iba'ore cebe ip okpot mu'ada am — io'e Jesus pe.

¹⁷ — Deus kay itabut'ûmayû eyju! — Jesus o'e. — Soat em wara'at taġ epeyaġuyġuy buye, eyetabut'ûm Deus kay. Soat em ikêrêan e'e buye dak. Puġûn oġuy eyxe? Ade koato eyxe oġuy bima dak, kuka eyetabut'ûm ma epesop okay. Imênpit ekpot etojot cuy okay ġasû — io'e cebay be. O'tojot.

¹⁸ Ibiôġbuk o'ġukorêm Jesus.

— Ejêm — io'e Jesus ibiôġbuk kêrêat pe.

O'jêm jekukat xewi- -aġokatkat ipot xewi. O'je'ada ġaxîn ma ibiôġbuk kêrêat kuġ topibit.

¹⁹ Yaġepûġ ma bima, oajêm ip Jesus kay. Jesus eju etaybitbinayû oajêm.

— Apênpuye ocewebe ibiôġbuk kêrêat mujêm pa'ore? — io'e ip cebe.

²⁰ — Deus kay eyetabutbût puye — Jesus o'e. — Deus kay eyetabucap yopît pima, ka'ûmġu iba'ore kuka eywebe. Eyetabucap yopît pima, mostardada buxim acâ okay eyetabucap pima, kuka epe'e co'a be: "Ecenapôn ijocewi. Wara'at ka be eju juy," i.

Iḡo'a dak o'jenapōn kuka wara'at ka be — io'e cebe ip.

²¹ — Deus a'ōbi'ūm pima bit, o'jēm ḡu kuka ip -ibiōḡbuk kērēayū. O'jēm ḡu kuka ip ikukukayū bewi. Deus kay ḡebum pima, wuyju jekōnkōn ḡu e'em acā o'jēm ip, Deus eju wuyekawēnwēn'uk pima dak — io'e Jesus.

²² Ḡebuje o'je'aweroro Jesusyū Galiléia eipi be.

— Soat waḡo ōn — Jesus o'e cebe ip. — Ipi juacayū odujowan ip oaoka pinayū kay. ²³ Okay itakomaayū oaoka ip. Imēnpit ebapūḡ kabia kap puje, ōn pit waram ocetait Deus a'ōbi — io'e aweroayū be. Imēn Jesus o'e buye, iḡuycūḡcūḡap kuḡ ma acā ip o'e-aweroayū o'e.

²⁴ Cafarnaum ka kay oajēm ip. Israel naxeḡebit-bit pewi dinheiro bubu'ukayū osodop ibo ka be. Deus eju kawēnwēnap'a muxipanpan'ukayū beam ibubum o'e ip.

— Emutaybitbin'ukat dinheiro je'ḡūm tu ibub'ukayū be Deus eju kawēnwēnap'a muxipanpan'ukayū beam? — io'e ip Pedro be.

²⁵ — Hm hm — Pedro o'e. — Je'ḡūm — io'e.

O'jepit. Dexe. Jesus o'jekawēn Pedro eju.

— Apēn xipat exe, Simão? — io'e. — Abu-bewi ipi kukukayū dinheiro je'jat ip? Jekpotpoyū bewi du? Wara'acayū bewi ḡu xe'e? — io'e Pedro be.

²⁶ — Jekpotpoyū bewi ḡu-wara'acayū bewi acā — io'e.

— Hm hm — Jesus o'e. — Imēnpuye ipi kukukat ipotpoyū dinheiro je'ḡūm ḡu ip dinheiro bubu'ukayū be — io'e Jesus. — Imēnpuxim Deus ipot tak dinheiro je'ḡūm ḡu juy Deus eju kawēnwēnap'a muxipanpan'ukayū be.

²⁷ — Inaka wuyju dinheiro aḡūm cebe ip — Jesus o'e. — Itakomān ḡu juy ip wuykay. Eju iodi kay — io'e Pedro be. — Piḡa ejoxik cuy idibi be — i'e'em. — Axima juy eju'uk piḡa bewi koap ma. Axima bi ixik puje, dinheiro'a eyadobuxik axima bi be. Axima bi bewi eyabu juy — io'e.

— Ibo'a eyadujawat dinheiro bubu'ukayū kay Deus eju kawēnwēnap'a muxipanpan'ukayū beam-dinheiro'a. Yamuxipanpanayū dei je'e owebewi, ewebewi dak — io'e Jesus Pedro be.

— Hm hm — io'e Pedro.

O'ju. O'yabu. O'yaūm.

18 Gaxīn ma oajēm ip-imutaybitbinayū. Oajēm Jesus kay, Pedro cēm awap.

— Abu je'e ya'ōbuyxian wuy'in warara'acat podi ma, Deus xe acesop pima? — io'e ip Jesus pe.

² Imēnpuye Jesus bekicat o'tomuwā jekadi am. Jesusyū bidase cūḡ'i osunuy bekicat.

³⁻⁴ — Wara'acat podi ma wuyetabun ibuyxiat pin'ūmat. Bekicat puxim ixe. Iḡasū xipacat xeku Deus xe, soat kukan pima ōn. Iboap kay juy ḡebum epesop — io'e Jesus cebe ip. — Wara'at taḡ jekukum epesop — io'e cebe ip. — Bekicat puxim cuy epesop. Apēn ite bekicat ya'ōbaca pin ḡu, imēn tak eyju eya'ōbaca pin ḡu juy epesop. Eya'ōbaca pin'ūm pima, xipan epeyeku Deus xe. Eya'ōbaca pin pima, Deus xe ḡu epesop, soat kukan pima ōn — io'e Jesus.

⁵ — Eyju xipan bekitkit kuḡ pima, xipan okuḡ tak epesop — io'e Jesus.

Ijop bekicat Jesus itabun'isuat puxim. Jesus tieḡ Jesus kay itabun'isuat ju'kuk xipan pima, Jesus tak ju'kuk xipan ijo'iat.

⁶ — Bekicat mubu'un puje okay itabut am, ikērēat mujurūḡrūḡ eyju, okay itabucat mubu'un puje. Imubu'un puje, Deus cuy ipiat supi'ajoat eykay. Imēn ey'e awap, xipat kuka juk o'e wita'a yaboḡat'a mukirik am eyaḡobu eju iodi be eymuakōm — io'e cebe ip. ⁷ — Oḡuycūḡ cīcā, eyju wara'acat mubu'un pima, okay jetabut am. Okay itabucat ikērēan e'e ip, warara'acat cocom ip pima-ikērēan e'e'ukayū jojom ip pima. Imēnpuye ikērēan e'e'ukayū itabotaidabotbot cīcā jeedop ip, wara'at osubuyxijo buye.

⁸ — Epeyepere juy ikêrêat muğugêap eybômbicuk pima bit purut ka. Eybu'üm pima bit purut ka, ikêrêat epeğugê ğu. Imên eyajêm Deus kay, ikêrêat muğegêm ğu buye. Xipat kuka o'e eyôm âm Deus kay püğpu bima dak. Xipat ğu kuka o'e eyôm âm ipiat'ajojoap pe xepxepu ma -daxa epirêm'ûmap pe.

— Epeyepere juy ikêrêat mujurûğrûğap. Eyî'üm pima bit purut ka, ikêrêat epeğujurûğrûğ ğu. Imên kuka eywebe ipiat'ajoap puxixim, daxa epirêm'ûmap pe eyjuap puxixim. Imên eyajêm Deus kay, ikêrêat kay ğu epekuku buye. Xipat kuka o'e eyôm âm Deus kay taokêrêat pima dak. Xipat ğu kuka o'e eyôm âm ipiat'ajojoap pe taokêrêat'ûmat ma -daxa epirêm'ûmap pe.

⁹ — Epeyepere juy jeakap ikêrêat kay. Eyeta'üm pima bit purut ka, ikêrêat epeğêğê ğu, ipiat'ajoap puxixim, daxa epirêm'ûmap pe eyjuap puxixim. Imên ikêrêat muğêğê'üm pima, eyajêm Deus xe, ikêrêat kay ğu buye. Xipat kuka o'e eyôm âm Deus kay püğta bima dak. Xipat ğu kuka o'e eyôm âm ipiat'ajojoap pe xepxepa ma -daxa epirêm'ûmap pe.

¹⁰ — Eyday'em'um cuy epesop — io'e jeweju etaybitbinayü be. — Okay itabun'isuayü mubekitkin ğu juy epesop. I oce eywebe, Deus ekawên tojtjot'ukayü ixeyü kuğ soat em. Deus ekawên tojtjot'ukayü jebikuyap tağ cepit put ip Deus kay, ceweju kawên âm -webay eju -kabi beat eju. Imênpuye eyday'em'um cuy epesop — io'e Jesus cebe ip.

¹¹ — Soat wağo ôn. Ijodi ojot ikêrêat mujurûğrûğ'ukat taxijo am — Jesus o'e — Imênpuye okay itabun'isuayü mubekitkin ğu juy epesop — io'e cebe ip.

¹² Jesus wuymutaybitbinap ekawên o'ğuwên cebe ip ğebu je bit.

— Apên kuka o'e jeöhöyü kukukat, iöhö oitabidao bima? Jeöhö kudadam je'e xeku. 100 be iöhöyü - -ovelha. Püğ ixeyü'in pit oitabidao bima, kudadam je'e. Co'a koreren tağ warara'acat kônkon pima, je'ju itabidaoat kuda am. 99 beayü bewi je'ju — io'e.

¹³ — Icēmān ōn e'em eywebe, itabidao topibit tobuxik puje, icokcok cīcā ma je'e, jeōhō o'tobuxik puye. Icocok cīcā je'e itabidaoat kuḡ oexe buye. Itabidao'ūmayū kay icokcokap podi ma je'e itabidaoat kay icokcokap — Jesus o'e cebe ip. ¹⁴ — Jeōhōyū kukat ibu'u jeōhō be itabidao am. Imēnpuxim Deus ibu'u pūḡ pe ma okay itabun'isuayū be ma wūy ma jedop am jexewi- wuyebay xewi- kabi beat xewi — io'e Jesus.

¹⁵ — Eykitpit ikērēat eywebe e'em pima, epeyekawēn ceweju. Iboap ikērēat muwēnuwēn cuy epesop. Eyaḡuyupūḡ ma epeyekawēn eykitpit eju. Eyekawēn kay bima, eyburem epesop- eykitpit, eyju dak — io'e Jesus. ¹⁶ — Eyekawēn kay'ūm pima bit, eyweju epe-tujowat pūḡ, xepxep eyekawēn co am. Waram cuy epeyekawēn eykitpit eju. Eywejuayū juy imēn e'e'eap ya'ījo.

— Ya'ījo buje, soat jekawēn put wuyjuyū be: “Aceya'ījo soat e'e'eap. Imēn o'e,” i. Imēn xepxep ekawēn taḡ, ebapūḡ ekawēn taḡ ḡu xe'e'i. Imēn opop ibararak Deus ekawēntup pe — io'e Jesus.

¹⁷ — Ixeyū ekawen kay'ūm pima dak, okay itabucayū mukūyjom cuy eyju, jeawero puje ip. Ixeyū ekawēn kay'ūm pima bit, Judeu'ūmat puxim epejukuk- eykitpit epejukuk. Wuywebewi iecuḡap peam dinheiro bubu'ukat puxim epejukuk- cekay'ūmat puxim — io'e cebe ip.

¹⁸ — Icēmān e'em ōn eywebe. Ipi juacat pe, “Deus xe cūḡ ma ekukuap,” i ey'e buje, kabi be bima iboap kukuap cūḡ ma je'e. Ipi juacat pe, “Deus xe cūḡ ḡu ekukuap,” i ey'e buje bit, kabi be bima iboap kukuap cūḡ ḡu je'e Deus xe — Jesus o'e cebe ip.

¹⁹ — Xepxem kawēnwēn pima eyju Deus eju pūḡ taḡ ma, eybikuyap taḡ ma webay je'e eywebeam- kabi beat je'e — io'e cebe ip. ²⁰ — Xexep xe'e, ebapūḡ ma xe'e omubuyxi am jeawerorom pima, ōn tak e'em ixeyū xe — io'e.

²¹ Gebuje Pedro o'jekawēn Jesus eju.

— Oce xe ibuyxiat — io'e. — Pebūrū em cuy ocegebu ġu ikērēat kay? -owebe okitpit ikērēan e'eap kay? 7 em ma du? — io'e Jesus pe.

²² — Ka'ūma — Jesus o'e. — 7 em ġu ma. Ade em ma-490 em ma — io'e Pedro be.

²³ Pedro ekawēn buye, Jesus o'jekawēn iboceayū be. Deus soat kukanap muwēnuwēn o'e. O'jekawēn iboceayū mutaybitbin.

— Webay ipi kukukat puxim — io'e Jesus. — Kabi beat webay. Imēnpit ipi kukukat puxim. Ipi kukukat oajēm jekapik'ukayū kay. Kapik'ukayū bewi ceweroaptei bu am, oajēm ipi kukukat.

²⁴ — Koap em kapik'uk'ukat o'tujot ip jekariwa be. Ade jījā ceaweroap o'e- -mil be dinheiro'a- -prata muġēġēat'a. ²⁵ Imēnpit ixe kapik'uk'ukat kaka ġu dinheiro. Cedinheiro o'e ġu ceaweroap teida am. Imēnpuyē jekariwa ja'ōbi o'ġuju soat tuk'a beat ūm ām, teida am- -itayxi ūm ām, ipotpoyū ūm ām tak. ²⁶ O'jēġ'aecōġcōġ cewap.

— “Imēnpuk,” io'e jekariwa be. “Oteida ġuyjom soatei,” io'e kapik'uk'ukat.

²⁷ Kapik'uk'ukat a'ō buye, cekariwa itabotaidabotbot o'e cekay.

— “Eaweroaptei eġūm ġu juy owebe,” cekariwa o'e cebe. “Pūġ em tak ka'ūma,” io'e kapik'uk'ukat pe.

— “Xipat cīcāat ēn,” io'e kapik'uk'ukat.

²⁸ — O'ju. Kapik'uk'ukat o'ju jebureyū kay- -kapik'uk'ukat kay. Dao ma o'topabijuk jekapikap peayū. Pūġ ma ceaweroap 100 dinheiro osunuy. Yopīt ma dinheiro osunuy. O'jat jebure yaġobu eju.

— Gebuje o'yaġobuaha.

— “Eaweroap owebe eteida,” io'e.

²⁹ O'jēġ'aecōġcōġ cewap.

— “Obure!” io'e. “Etabotaidabotbot okay,” io'e. “Ōn soat oteida ġuyjom- -weaweroap,” io'e jebure be.

³⁰ — Ixe imēnpit: “Ap!” io'e. “Gaxīn ma ōn cekay,” io'e.

— “Iba'ore. Dinheiro kuġ ġu ōn,” io'e. Imēnpuyē ibure daomūnmūnap'a be o'ġuju.

— “Eaweroap teida buje acā, ecejēm,” io'e ibure.

³¹ Warara'acat kapikpik'ukayū itakoma ip o'e jebure awēg cocom pima.

— Gebuje ip jeipi kukukat pe o'ju. Soat o'gūwēn ip jeipi kukukat pe — io'e Jesus.

³² — Gebuje kapikpik'ukat ekariwa o'tomuwā.

— “Kapikpik'ukat,” io'e. “Xipat'ūmat,” io'e cebe. “Juk ece owebe, 'Imēnpuk. Guyjom cuy oteida,' i. Imēnpuye eteida'ūmap kay kuy gēbum gū oce.

³³ Wetabotaidabotbot oğuy ekay ōn pit. Imēnpuxim ma juy eğuy ēn tak ebure kay,” io'e — io'e Jesus.

³⁴ — Kariwa itakoma jījā o'e kapikpik'ukat kay. Imēnpuye o'gūju daomūnmūnap'a be ipiat'ajo am.

— “Teida buje acā dak ecejēm,” io'e cebe. ³⁵ Eyu dak eyetabotaidabotbot'ūm pima eywağoyū kay, ikērēat kay gēbum puye; imēnpuxim webay dak-kabi beat tak itabotaidabotbot gū je'e eykay, ikērēat kay gēbum puye — io'e Jesus cebe ip.

19 Jekawēn epere buje, Jesus Galiléia eipi bewi o'ju. Jepitpin o'e Jesusyū. Judéia eipi kay oajēm. Wara'at kadi be ma oeku. Jordāodi wīnābu ma oeku. ² Adeayū o'ju Jesus tomuju. Ade jījā. O'ju ibo ka beayū- iwātaxipipiyū. Soat o'gū'ada. Judéia eipi be o'gū'ada Jesus.

³ Fariseuyū oajēm ip cekay waram. Jesus a'ō muwarurunap ojuy ip.

— Wuyawēwēap tağ tu wuytayxi epereperem, wuyxe cūg'ūmap tağ jekukum pima xeku? — io'e ip cebe.

⁴ — Epetupco juy Deus ekawēntup — Jesus o'e cebe ip. — Imēn ibodup e'em:

Kuyje soat muğēgē'ukat ağokatkat o'gūgē, ayacat tak. Ixeyū o'gūgē xep-xem ma jekuku am, i — io'e Jesus.

⁵⁻⁶ — Imēnpuye Deus o'jekawēn cebe ip- ağokatkat pe, ayacat pe dak.

Jetayxi bu buje, ağokatkat cēmcēm jebay duk'a bewi, jetayxi eju cucum.

Jektop pu buje, ayacat tak jektop eju
cucum, i.

Xepxep ma ip. Imēnpit pūḡat puxim ip o'e jewekuḡ
soat em jeweweju ip cucum puye. Imēnpuye eytayxi
juy epeyepere ḡu. Pūḡat puxim eyju Deus a'ōbi.
Deus xe eyju pūḡ ma — io'e Jesus.

⁷ — Apēneju Moisés o'e: "Eytayxi epere pin pi-
ma, 'Otayxim ḡu ece ḡasū bit' iaptup cuy epetupmu-
bararak. Ḡejuje ibodup epetupūm ayacat pe, epere
am," i?

⁸ — Moisés imēn o'e, eybu'u jījā buye ya'ō daḡ
jeku am. Kuyje bit imēn ḡu o'e. Kuyje Deus soat
o'ḡuḡē.

⁹ — Ibocewi e'em ōn eywebe. Aḡokatkat jetayxi
epere buje, wara'at pu am pima, ikērē cīcāat
muḡēḡēm. Itayxi koapat jektop eju acā o'jepo. Imēn
pima, ixē aḡokatkat ikērēat muḡēḡēm itayxi be.
Imēnpuye ikērēat o'ḡubapukpuk ixē aḡokatkat — Je-
sus o'e.

¹⁰ — Ibu'u'u ip pima jewewekay, xipat kuka o'-
jewebumūn ḡu — io'e ip-Jesus eju etaybitbinayū
o'e cebe.

¹¹ Ḡejuje Jesus o'jede.

— Soat pe ḡu ōn e'em imēnpit. Pūḡpūḡ ma iḡo
ekawēn taḡ jekukum. Deus ixeyū mubacan'ūm pima,
iba'ore cebe ip jaḡepūḡ ma jeku am.

¹² — Iḡo ekawēn taḡ jewebumūnmūn ḡu ip Deus
a'ōbi. Deus soat kukanap kay jījā ip. Imēnpuye jew-
ebumūnmūn ḡu ip. Warara'acat pit jewebumūnmūn
ḡu ip- aḡokatkayū. Jewebumūnmūn ḡu jekapap pi-
bun; iba'ore cebe ip ayacat mu'ukreḡ am. Warara'at
tak jewebumūnmūn ḡu pūḡ ma o'subudakacap pi-
bun; iba'ore cebe dak.

— Imēneju soat pe ḡu ōn e'em. Iḡo ekawēn
kayayū be acā ōn e'em. Cekay buca'yū iḡo ekawēn
taḡ cuy jekukum ip — io'e.

¹³ Ḡejuje iboceayū bekitkit o'tojot ip Jesus kay.
Bekicat yabi jeje jebumōḡ ām, o'tojot Jesus kay. Be-
kicat peam kawēn ām Deus eju, o'tojot ip.

— Bekicat cuy epetojot ġu juy Jesus kay — io'e ceweju etaybitbinayū iboceayū be. Imēn iboceayū o'ġukorēm ip.

¹⁴ — Āġ jeedot ip bekitkit okay — Jesus pit o'e. — Imubu'un ġu juy okay imudot am. Ixe bekitkit oxe yajēm pin ip. Imēnpuxim Deus soat kukanap kabilia soat ip yajēm pin oxe-okay itabucayū — io'e. — Imēnpuye epeġudot cuy okay — io'e.

¹⁵ O'jebumōġ bekitkit abi jeje, bekicat peam kawēn âm Deus pe. O'ju.

¹⁶ Pūġ em ibubut adeat oajēm Jesus kay.

— Omutaybitbin'ukat! — io'e Jesus pe. — Soat em Deus xe oġuy pin wetait. Apēn xipacat oce'e juy, soat em cexe oġuy am? — io'e.

¹⁷ — Apēnpuye ecekawēn owebe, “Apēn xipacat oce'e juy?” i. Pūġ acā xipat cīcāat. Deus xeku. Apēn wuye'ajojoyū'ūm'ūm pe Moisés o'e iap taġ cuy jekukum ecesop — io'e. — Imēn jekukum pima, etait eġuy cexe soat em.

¹⁸ — Ajo a'ō daġ cuy oceku Moisés ekawēn'in? — io'e.

— Iġo a'ō daġ — io'e Jesus.

Warara'acat epeyaoka ġu juy, i. Warara'acat tayxi kay ġu juy, i dak. Eybukuruġ ġu juy epesop, i dak. Warara'at awēġ mukērērērēn ġu juy epesop, i dak. ¹⁹ Ibuyxim cuy eyebay epejukuk, eyxi dak, i dak. Eyxeat ikukpin epejukuk eywekukap puxim, i dak — io'e Jesus.

²⁰ — Ijop ekawēn taġ ojekukuku-soat taġ — io'e. — Ajo dak ġuto oġuġē? — io'e.

²¹ — Soat taġ oweju jekuku am, ebubut cuy eteida-soat ma. Ibo juy dinheiro tei'ūma eġūm ta-daibocayū be — io'e. — Imēn e'e buje, ade je'e ebubut kabi be — io'e.

— Ġebuje ejot okay, oweju jekuku am soat em — io'e Jesus.

— Iba'ore — io'e.

²² Iguycūg cīcā o'e, Jesus ekawēn puye, ibubut ade jījā buye. Tacup o'e jebubun. O'jenapōn ixe.

²³ Ġebuġe Jesus o'jekawēn jewēju etaybitbinayū eju.

— Iba'ore jījā ibubut adeat ōm ām Deus xe kabi be — io'e cebe ip. — Ibu'u jījā ip Deus a'ō kay am, itabut cīcā ip jebubut kay buye. ²⁴ Camelo ikap pa'ore awi daobi'atok taġ. Imēnpit ibodi ma iba'ore ibubut adeat ōm ām Deus xe, kabi be — io'e.

²⁵ Jewaġuy muġēgēm o'e ip, iboap co buje.

— Abu jewedaxijo but? — io'e ip.

²⁶ Imēnpuye Jesus o'jeak cekay-iboceayū kay.

— Wuywedaxijo ba'ore soat em Deus xe wuydop am — io'e cebe ip. — Deus pe bit soat i'e but — io'e. — Deus pe soat daxijo but — io'e Jesus.

²⁷ — Pām oceju? — Pedro o'e. — Kuy soat oce-suiwat eweju jeku am. Ajo dak ocejat? — io'e.

²⁸ — Icēmān ōn e'em eywebe. Soat waġo ōn — io'e Jesus. — Ipi be wepit puje, iisu e'em soat ma ipi daġ. Xik'i e'em ōn. Israel diwacayū kay ya'ījojo oce'e. Wa'ōbuyxi jījāat oce'e. Ajo xipat Deus xe iap oġuwēn cebe ip-ajo xipat'ūm Deus xe iap tak. Eyju ma dak Israel diwacayū epeyewede-^{doze} beayū diwacayū. Eyju dak xixik'i epesop. Epeġuwēn cebe ip ajo xipat Deus xe iap, ajo xipat'ūm Deus xe iap tak.

²⁹ — Owebeam soat xewi o'juaiyū ade jījā je'jat ip. 100 beat je'jat ip. Jeduk'a bewi o'juaiyū, jeipi bewi o'juaiyū dak, jebadipyū xewi o'juaiyū dak; jewaġo xewi o'juaiyū, jekitpit xewi o'juaiyū, jebay xewi o'juaiyū, jexi xewi o'juaiyū, jekpotpoyū xewi o'juaiyū, jedaxityū xewi o'juaiyū-^{soat} ip ade jījā xipacat je'jat ip. Deus xe dak itait jeedop ip soat em — io'e Jesus. ³⁰ — Ade ya'ōbuyxiayū'in yopīcayūm jeedop ip. Ade yopīcayū'in ya'ōbuyxiayūm jeedop ip — io'e Jesus.

20 Deus soat kukan pima, uva'a kuġ jekat peat puxim ixe. Xeku kapikpikayū kudadam o'e, jewebeam kapik am. Imēn Jesus ekawēn o'e jewējuacat mutaybit am. Wuymutaybitbinap muwēnuwēn o'e-^{imēnpuxim}ap ekawēn.

— Ixe uva kuḡ jekat peat o'ju jebuywatwacayū kudadam. Kabia isum o'ju, jekat pe tujowat am — io'e. — O'ju — io'e.

² — “Gasū epeju, okat pe obuywat am,” io'e cebe ip-soat pe. “Pūḡ kabia oteida-eyekapik-apteim. Okat pe eyepere buje, oteida. Pūḡ isurūḡat'a eyekapikaptei e'em--prata'a,” i.

Imēn o'e cebe ip, iboaptei ibabi daḡ o'e buye- -jeka beacat pabi daḡ.

— “Xipat,” io'e ip.

Imēnpuye soat o'ju ip ikat pe, ibuywan.

³ — Kabia isusu ma o'ju waram kapikpikayū kuda am. 9 hora bima o'ju. O'tobuxik warara'acayū-xerem ḡu pēnpēnayū.

— Oajēm ka'ūmḡu pēnpēnayū kay. Ceaweroroap pe oajēm- -tarekrek muxipanap'a be.

⁴ — “Epeju okat pe. Oteida eywebe eyekapikap-tei- -ajo cūḡ ma iaptei,” io'e cebe ip.

— “Hm hm,” io'e ip. “Ebuywan oceju.”

⁵ Imēnpuye ip o'ju.

— Kariwa waram o'ju. Kaxicuḡ ma waram o'ju. Uvadip kat iwat o'ju. Warara'acayū o'tujowat jekat pe, kapik am.

— Katpujesu warara'acayū o'ḡuju jekat pe, kapik am tak. 3 hora bima o'ḡuju.

⁶ — Katpuje oeku. 5 hora bima, oeku. Warara'acayū o'tobuxik-ka'ūma pēnpēnayū. Ceaweroroap pe ip o'e.

— “Apēnpuye eyju kabia bun kapikpiḡ ḡu?” io'e cebe ip.

⁷ — “O'e ḡu ocewebe buye, oceju ḡu,” io'e ip.

— “Gasū bit eyju dak ōn jeymuju. Oteida eywebe,” io'e.

— “Hm hm,” io'e ip.

Imēnpuye o'tujowat jekat pe, kapik am.

⁸ — Kaxi cēm pima, ixē uvadip kat iwat jedi-nheiro kukukat o'tomuwā.

— “Kapikpikibiyū etomuwā juy, cekapikaptei ūm ām,” io'e. “Katpuje ajēmibiyū ekapikaptei juy eḡūm cebe koam. Ḡebuje katpujesu ajēmibiyū be juy eḡūm. Ḡebuje kaxicuḡ ajēmibiyū be. Ḡebuje kabia

isusu ajēmibiyū be. Kabia isu ajēmibiyū ekapikaptei eḡūm kanomūm," io'e cebe.

— "Hm hm," io'e jekariwa be.

⁹ — Katpuje ajēmibiyū o'tomuwā -5 hora be ajēmibiyū. Cekapikaptei o'ḡūm cebe ip, ajēm puje. Pūḡ kabia ekapikaptei o'ḡūm cebe ip. O'jat. O'ju ip.

¹⁰ — Kabia isu ajēmibiyū ekapikaptei o'gum kanomūm. Tūybe ade ocejat ocekapikaptei iān o'e ip. Imēnpit ibitbit ma ip o'jat jedinheiro- jekapikaptei- katpuje ma ajēmibiyū ekapikaptei, kabia isu ajēmibiyū ekapikaptei dak. ¹¹ Imēnpuye uvadip kat iwat kay ip o'e jemāmāmām.

¹² — "Katpuje acā kapikpiḡ o'e ip- -wara'acayū. Cūḡ ḡu o'e tei jo'iat kuka ocedei," io'e ip. Jemāmāmā ip. "Pūḡ hora acā kapikpiḡ o'e ip. Ocejū bit kapikpiḡ soat em ma- -kabia isum pima, kaxicuḡ pima dak. Kajepi kuḡ cīcā oceju, kapikpiḡ puye," io'e ip.

¹³ — "Obure," io'e uvadip kat iwat jemāmāmāmāat pe. "Xipat ōn. Oḡūm ekapikaptei wa'ō daḡ. Cūḡat ōn.

— " 'Pūḡ kabia ekapikaptei oteida- -eyekapikapteim,' i'e buje, ēn tak 'Xipat,' iece owebe," io'e jemāmāmāmāat pe. ¹⁴ "Imēn eywebe oḡūm, katpuje ma ajēmibiyū be dak oḡūm," io'e. "Teku ekapikaptei," io'e. "Etujopit eduk'a kay," io'e.

¹⁵ — "Etakoma ḡu okay eḡuy, odacup gu buye," io'e cebe. "Wedinheiro ma beku," io'e. "Ōn būrūku poro teida pin," io'e uvadip kat iwat jemāmāmāmāat pe.

¹⁶ — Imēntak — Jesus o'e. — Deus icēmat cīcāat. Ajo xipat cexe iam, ajo xipat ḡu cexe iam kawēnwēn je'e soat pe. Soat ijo'in ma je'e — io'e Jesus. — Imēnpuye ade ya'ōbuyxiayū'in yopīcayūm jeedop ip. Ade yopīcayū'in ya'ōbuyxiayūm jeedop ip — io'e.

¹⁷ Jerusalēm ka kay cucum pima, Jesus jeweju etaybitbinayū jewekay o'tomuwā adeayū parakpewi. O'jekawēn cebe ip.

¹⁸ — Eya'ōpicūḡcūḡ cuy epesop! — io'e cebe ip. — Jerusalēm ka kay cum wuyju — io'e Jesus.

— Soat waḡo òn. Iboceayū osubamukirik, okay itakomaayū be odujowat am- -paīyū kukukayū be, Moisés ekawēn imutaybitbin'ukayū be dak. “Ikērēat kuḡ ēn ocexe,” i je'e ip owebe — io'e Jesus. — “Eje'ū juy,” i je'e ip owebe — io'e.

¹⁹ Judeu'ūmayū be odujowat ip — io'e. — Owaywayway jījā je'e ip. Omupokupok ip. Korosa jeje oba mupaya ip. Oaoka ip. Imēnpit xepxep xet kap puje, waram ḡuto ocetai — io'e doze beayū be.

²⁰ Ḡebuje Zebedeu tayxi oajēm Jesus kay. Je'iyū eju oajēm- -aḡokatkayū eju. Ojēḡ'aecōḡcōḡ Jesus wap. Ibikuyap kay o'e Jesus xewi.

²¹ — Ajo-kay ēn? — io'e Jesus cebe.

— O'iyū dak imēn cekay, pūḡ xik'i eba'at kadi, wara'at eba'ūḡat kadi. Imēn òn cekay, ēn soat kukan puje — io'e. — I juy ece owebe: “Ekawēn taḡ oce'e ewebe,” i — io'e Jesus pe.

²² — Iba'ore — Jesus o'e cebe ip. — Eyetaybit pūn'ūma eyju iboap ojuyjuy oxewi. Apēn owebe ipiat o'supi'ajoat ip iap puxim tu eywebe dak ipiat supi'ajoat ip? — io'e.

— Hm hm — io'e ip. — Ocewebe dak ipiat supiajoat ip apēn ewebe ipiat o'supi'ajoat ip iap puxim — io'e Zebedeu ipotpoyū.

²³ — Ha'a — io'e Jesus. — Apēn owebe ip ipiat o'supi'ajo iap puxim ma eyju dak ipiat epesupi'ajojo — io'e cebe ip. — Imēnpit wa'ōbi ḡu jeedop ip oba'at kadi- -webay a'ōbi acā jeedop ip. Wa'ōbi ḡu jeedop ip oba'ūḡat kadi- -webay a'ōbi acā jeedop ip. Deus a'ōbi acā ixeyū iboka kazikzik'i jeedop- -Deus o'taēiyū — io'e Jesus.

²⁴ Warara'acat iboam co buje bit, itakoma o'e ip xepxepayū kay- -Zebedeu ipotpoyū kay. 10 beayū itakoma o'e ip.

²⁵ Imēnpuye Jesus:

— Epesot cuy okay — io'e cebe ip- -soat pe. — Eyetaybit Judeu'ūmayū kukukayū soat em ya'ōpuruḡ jebekitkiyū mujujum iam — io'e cebe ip. — Ikukukayū soat em biḡ ma jebekitkiyū mukapikpiḡ'uk ip iam — io'e. — “Oca'ōbuyxi jījā,” i'e'em ip jebekit-

kit pe soat em. ²⁶ Eyju bit ka'ūma. Imēn ġu juy epeyewekuk. Eyju bit kariwaboġ pin pima, warara'acat puywatwan cuy epesop. ²⁷ Ya'ōbuyxian pin pima, eybureyū beam tei'ūma epeyekapikpik cuy — io'e Jesus.

²⁸ — Imēntak soat waġo òn — Jesus o'e. — Warara'acat pe obuywat am ġu ojet ijodi. Warara'acat puywatwat'ukan ojet. Adeayū daxijo am ma ojet. Soat em itabēġ jeedop ip kabi be, cewebeam oje'ū buye — io'e Jesus.

²⁹ Jericó ka bewi o'ju ip -Jesusyū- -adeayū. Jesus tomuju o'ju ip. ³⁰ Xepxepayū oabik e bitako daġ- -ita'ūmayū.

— Jesus ijoma kapkam — adeayū o'e ita'ūmayū be.

Gebuje ya'ōberen o'tomuwā ip Jesus kay.

— Davi naxeġebit ěn. Etabotaidabotbon cuy eġuy ocekey — ita'ūmayū o'e Jesus pe.

³¹ — Mūġ'i juy epesop! — io'e adeayū.

O'ġukoreġ. Imēnpit biġ ma o'jewāwā ya'ōberen.

— Kariwa! — io'e ma'ġuto. — Davi naxeġebit ěn. Etabotaidabotbon cuy eġuy ocekey — io'e ip Jesus pe.

³² O'jecū Jesus.

— Epesot okay — io'e ita'ūmayū be.

O'ju ip cekay- -Jesus kay.

— Ajo-kay eyju oxewi? — io'e cebe ip.

³³ — Ocetadam ece — io'e ip jekariwa be.

— Jetada òn — io'e Jesus. ³⁴ — Ita'ūmayū kay wetabotaidabotbot — io'e.

Ita o'sutamucay itamudim am.

Iboap e isum ma o'jewetada. O'jecoan ip. Jesus tomuju o'ju ip, o'je'ada buye.

21 Jerusalém ka tēġ pima Jesusyū, oajēm ip Betfagé ka kay. Co'a bicūġpe osunuy- -Oliveiradip'a bicūġpe.

Ibocewi jeweju etaybitbinayū o'ġuju Jesus. Xepxep o'ġuju. Wara'at aġoka kay o'ġuju.

² — Epeju juy aḡoka kay- -wuywapat ka kay — io'e.

O'ḡukūyjo.

— Bomaku epeju. Dao ma jumenta epetobuxik. I'tit'it eju ma juy epetobuxik — io'e. — Ikirikirik opop ip. Epeḡuwekap cuy.

— Imuwekap puje, epetojot okay jumenta, i'tit tak — io'e Jesus xepxepayū be.

— Hm hm — io'e ip. — Ocetojot cuy.

³ — “Ajo pēnpēn eyju?” i'e'em iboceayū eywebe bima, “Ikuḡ'ūm puye, ocekariwa jumenta kay, i'tit'it kay dak,” i juy epe'e cebe ip — io'e Jesus. — “Ha'a. Epetujowat ḡaxīn ma,” iboceayū je'e eywebe — Jesus o'e. — Okay imujujum je'e — Jesus o'e.

— Hm hm — io'e ip.

⁴⁻¹¹ Jesus a'ōbi o'ju ip. Jumenta o'tobuxik ip. Ikirikirik osunuy. O'ḡuwekap ip. I'tit'it tak o'ḡuwekap ip.

Jesus kay o'tujuajēm. Jeekabek jumento ukxabi jeje o'jomōḡ ip. Oabik Jesus iekabek ceje jumento ukxabi jeje Ade jījā iboceayū jeekabek o'ḡupayapaya ip Jesus wap e daḡ, ya'ōbuyxi ceze ip puye.

— Xipat cīcāat Jesus — io'e adeayū- -Jesus wap cuibiyū, tomujuayū dak. — Davi naxeḡebit teku. Deus kuy imucokcokcoḡ, Deus a'ōbi oajēm teku wuykay buye. Deus ya'ōbuyxi jījā. Idip cīcā — io'e ip ya'ōberen, icokcok cīcā buye.

Jerusalém ka kay oajēm Jesus. Soat Jerusalém watwat yaḡuybabi'ūm o'e ip, jetabiba'arēm puye.

— Abu sute? — io'e ip.

— Jesus teku — adeayū o'e cebe ip. Itaybicayū o'e. — Nazaré ka wat teku. Deus ekawēn muwēnuwēn'ukat teku- -Galiléia eipi bewiat — io'e ip.

Imēn soat o'jebapuk apēn Deus ekawēn muwēnuwēn'ukat o'tupmubararak Deus a'ōbi. ⁵ Imēn cuk adi o'jekawēn:

Jerusalém watwat cuy epeḡukūyjo:

“Eykukukat omuyku. Jumento ukxabi jeje xik'i omuy- -jumenta'it'it ukxabi jeje. Ya'ōdidiat eykukukat je'e,” i juy epe'e — i juk o'e- -Deus ekawēn muwēnuwēn'ukat o'e.

¹² Oajēm Jesus puca deidada'ukayū kay. Deus eju kawēnwēnap'a be osodop ip, puca bubu'ukayū dak. Yaboġat'a be osodop ip. Dinheiro mutrokakan'ukayū emesa o'ġuy'at. Wūn'i! Pukaso deidada'ukayū abikbikap o'ġudu'udu. Batku! Yabikbikap o'ġuy'at Jesus. O'ġujēm soat ip.

¹³ — Deus ekawēntup e'em:

Oduk'a soat ka daġwiacat oweju kawēnwēnap'am je'e, i'e'em Deus ekawēntup.

Eyju bit Deus tuk'a epeyamuwexat ibukurukat dopdopap'am — Jesus o'e cebe ip.

Imēn o'e Jesus, dinheiro bu am, Deus tuk'a be ajēm-jēmāyū muġuykukum ip puye.

¹⁴ Taokērēayū oajēm Jesus kay. Ita'ūmayū oajēm. Deus eju kawēnwēnap'a be osodop ip. Soat o'ġu'ada Jesus- -ita'ūm topibiyū, taokērē topibiyū dak.

¹⁵ — Xipat cīcāat teku — bekicat o'e, Jesus muwēnuwēn o'e. — Davi naxeġebit teku — i'e'em ip. Idip ma o'jekawēn ip. Paīyū kukukayū bit itakoma o'e ip Jesus kay, Deus eju kawēnwēnap'a be ma bekicat o'jekawēn puye, ade o'ġu'ada buye dak. Moisés ekawēn imutaybitbin'ukayū dak itakoma o'e.

¹⁶ — Eya'ījojo ġu du bekitkit ekawēn? — io'e ip Jesus pe.

— Hm hm — Jesus o'e. — Oya'ījo ma. Imēn taġ Deus ekawēntup e'em:

Deus bekitkit o'ġutaybit cedaġ ma jawēġmudim am- -yopīcat tak, i.

Iboaptup cuk epetupcoco ġu du? — io'e Jesus. — Iboam eyetaybit — io'e paīyū kukukayū be.

¹⁷ O'ju Jesus Jerusalém ka bewi. Betânia ka kay oajēm. Jexecap ka kay oajēm.

¹⁸ Kabia bima, o'jepit Jerusalém ka be. Jepitpin pima, ire o'e Jesus. ¹⁹ Figueira'ip o'yopcoco, jepitpin pima. E bidase osunuy ibo figueira'ip.

Oajēm yopkay- -figueira'ip kay. O'yadobuxik ġu figueira'a. Ya'ūmġu figueira'a. Tup acā o'tuptobuxik. Tōh!

— A'a'e ġu ece'e — io'e Jesus figueira'ip pe. — Waram ma dak ka'ūma — io'e.

Gebuje figueira'ip dao ma o'je'ip'e'ū.

²⁰ Jesus eju etaybitbinayū yopco buje, yağuyba-bi'ūm o'e ip.

— Apēneju dao ma iğo'ip yoporo ġasū? — io'e ip.

²¹ — Soat em eyetabut okay bima, eyju dak kuka epe'e apēn figueira'ip pe oce iap puxim. Epeyopmupuruk kuka — Jesus o'e cebe ip. — Ka'ū-ma ibo bit. Eywebe dak i'e but ite co'a be: “Wede ece ijocewi. Aakōm cuy idixidi be,” i. Imēn yaakōm, Deus yamuakōm puye, Deus kay eyetabut puye.

²² Deus kay eyetabut pima, epejoojoy epejat, Deus eju kawēnwēn pima dak — io'e Jesus.

²³ Jay. Waram oajēm ip Jerusalēm ka be. Deus eju kawēnwēnap'a be oōm ip. Adeayū mutaybitbin o'e Jesus yaboğat'a be. Imutaybitbin pima, paīyū kukukayū oajēm, Judeuyū kukukayū dak.

— Abu-a'ōbi ēn jekukum? Deus a'ōbi du? Abu-a'ōbi ijop e'eap tağ jekukum ēn? — paīyū kukukayū o'e cebe.

Imēn tak Judeuyū kukukayū o'e cebe.

²⁴ — Koap cuy eyju ma omukūyjom cuy epe'e apēn oce — Jesus o'e. — Iboap muwēn puje, ōn tak ocede eywebe eyetaybit am abu-a'ōbi jekukum ōn iam.

^{25 - 27} — Abu-a'ōbi juk oeku João Batista? Abu-a'ōbi juk ocemubatisasan o'e xeku? Deus a'ōbi ma du eyxe? Ijodiat a'ōbi ġu xe'e eyxe? — io'e Jesus cebe ip.

— Ocetaybit ġu — io'e ip Jesus pe.

Imēn o'jekawēn ip Jesus pe, jeyağuy dağ.

— Cebe wuy'e buje, “Deus a'ōbi,” i, “Apēn-puye dak eyetabut ġu João kay?” i kuka o'e wuywebe — io'e ip jewewebe.

— “Ijodiat a'ōbi,” i wuy'e bima bit, adeayū itakoma kuka o'e ip wuykay, ixeyū xe João Deus eka-wēn muwēnuwēn'ukat puye — io'e ip jewewe be.

Imēneju o'jekawēn ip Jesus pe: — Ocetaybit ġu — io'e ip.

— Kā — io'e. — Abu-a'ōbi João Batista oeku iap epeḡuwēn ḡu owebe. Ōn tak oḡuwēn ḡu eywebe abu-a'ōbi ōn jekukum iap — io'e Jesus.

²⁸ Jesus o'jekawēn tak.

— Eya'ōpicūḡcūḡ cuy epesop wekawēn kay — Jesus o'e iboceayū be.

Wuymutaybinap ekawēn o'ḡuwēn. Uvadip kat iwat muwēnuwēn o'e.

— Ixe uva'a kukat xepxep ipotpoyū osodop. Koapat pe o'jekawēn: “Okpot,” io'e cebe. “Kapiḡ cuy ēn ḡasū okat pe.”

²⁹ — “Ap!” io'e.

Imēnpit ḡūjrom o'jewaguy: “Kapiḡ cuy ōn webay beam,” i.

Imēnpuye o'ju jebay kat pe kapiḡ.

³⁰ — Wara'at pe o'jekawēn- cebay o'jekawēn: “Okpot,” io'e wara'at pe. “Kapiḡ cuy ḡasū okat pe.”

— “Hm hm,” io'e. “Kapiḡ puk ōn. Cum puk ōn,” io'e jebay be.

Imēnpit o'ju ḡu jebay kat pe.

^{31 - 32} — Pebicat jebay bikuyap taḡ oeku? — Jesus o'e iboceayū be.

— Koapat ma — io'e ip.

— Cūḡ ma epeyekawēn — Jesus o'e. — Yapoayū ixe koapat puxim ip, iecuḡap peam dinheiro bubu'ukayū dak. Ibuxim ip, João kay itabut puye ip. Deus soat kukan pima, ixeyū dak Deus xe jeedop ip. Eyju bit ka'ūma! João oajēm imuwēn ām apēn cūḡ ma Deus etabun iap. Eyju bit eyetabut ḡu cekay. Cekay itabucayū epejojo. Imēnpit eyetabut ḡu João kay — io'e Jesus. — Ikērēat kuḡ epesop. Imēnpit eyḡuycūḡ ḡu epesop ikērēat kay-eyetabut'ūmap kay. Deus a'ō kay jekuku pin ḡu eyju — Jesus o'e paīyū kukukayū be, Judeuyū kukukayū be dak.

³³ Waram tak o'jekawēn Jesus- wuymutaybit- binap ekawēn- imēnpuximāp ekawēn. Aḡokatkat jek- kat o'tiotaap muwēnuwēn o'e.

— Aḡokatkat uva bune o'subunedaída — io'e Je- sus. — Pere ḡebujep — Jesus o'e.

— Gebuje korara o'ġuġē jekat etako daġ. Uvadip koreren o'jomuy. Pere. Uva'abidi muwesogsoġap tak o'ġuġē jekat pe.

— Gebuje uvadip wiwimap'a o'yamuy jekat pe-kadaidip wiwiap'a-umat'a. Pere. O'jepere.

— Gebuje uvadip wiwimayū o'jomuy jekat pe, uvadip wiwi am bomaku. Uva'a o'yaūm cuy ip ikat iwat pe. Imēn teim ip iūm cuy uvadip iwat pe.

— Ikat iwat wara'at eipi kay o'ju. Iboma omuy wara'at eipi be.

³⁴ — Yabubuap ekaxi ajēm puje, jebuywatwat-ukayū o'ġuju jekadai'a bu am-pūġpūġ'a jekat peat'a'in.

³⁵ — Oajēm ip uvadip wiwiayū kay.

— "Ijo'a bum ocesot," io'e ip. "Ikat iwat a'ōbi ocesot," io'e ip.

— "Ap!" uvadip wiwiayū o'e.

Ibu'u ip o'e yaūm ām. Uvadip wiwiayū oajēmiayū o'jat ip. Pūġ ixeyū'in o'yaoka ip. Poġ. Wara'acayū ixeyū'in o'yabuġbuġ ip wita'am. Warara'acayū ixeyū'in yaokakam ip. O'jenapōnpōn ip-ikat iwat buywatwat'ukayū.

³⁶ — Waram ġuto wara'acayū o'ġuju ixekadaidip iwat. Jebuywatwat'ukayū o'ġuju cekay ip-uvadip wiwiayū kay. Ade o'ġuju.

— Oajēm ip. Uvadip wiwiayū bit oajēmiayū o'jat ip. Pūġpūġ o'yaokaka ip. Wara'acayū o'yaoka ip. Warara'acat o'yabuġbuġ ip. Imēnpuye ibuywatwat'ukayū o'jepit jekariwa kay-ikat iwat kay.

³⁷ — Imēneju ikat iwat jekpot o'ġuju cekay ip-uvadip wiwiayū kay. Tūybe ibuyxim ip okpot jukuk iān o'e-ikat iwat o'e. O'ġuju. Jekpot o'ġuju.

³⁸ — Oajēm ipot cekay ip. Ajēmjēm pima, o'jojo-jo ip.

— "Ġa'a," io'e ip jewewebe. "Ayaoka. Ikat iwat ipot teku. Cebay e'ū buje, ite ma uvadip iwan je'e. Ayaoka juy. Imēn tip iwacayūm acesop!" io'e ip — io'e Jesus. ³⁹ — Ipot o'jat ip. O'tujowat ip. Ikat etako be o'yaoka ip. Poġ.

⁴⁰ — Ikat iwat waram ajēm puje, apēn je'e jekat peayū be? — Jesus o'e ya'ijojoayū be.

⁴¹ — Uvadip wiwiayū aokam — io'e ip. — Ajēm puje, yaoka. Ipiat supi'ajoat cebe ip, yaoka ip. Wara'acayū jomuy tip wiwi an. Gebuje ixeyū uva'a yaūm ip, yarum puje — io'e ip Jesus pe.

⁴² — Imen e'em Deus ekawēntup:

Uk'a muymuy'ukayū o'e, "Ite'a xipat ġu wita'a," i, i. Yakērē o'e cexe ip, i. O'yaxik ip, i. Warara'acat pit o'e, "Ite'a yadip ma," i, i. Uk'a muycemucemat'am o'e, i. Iboap xipat cīcā wuyxe, Deus imēn o'e buye, i'e'em Deus ekawēntup.

Iboaptup epetupcoco ġu du? — io'e Jesus cebe ip. Iġo'a Cristo buxim- -yamuycemucemat'a.

⁴³ — Juk epetupcoco — io'e Jesus.

— Imēneju Deus soat kukan pima, ixe xe ġu epesop. Ixe bikuyap e'e'ukayū acā ixe xe jeedop ip — io'e Jesus paīyū kukukayū be, Moisés ekawēn imutaybitbin'ukayū be dak.

⁴⁴ — Iġo'a jejewi je'at puje, o'jewenōmnōmnōm kuka. Ijodiat ceje iġo'a at puje, tōm'a kuka o'e ip — io'e Jesus.

Iboap ekawēn o'ġuwēn Deus a'ōbi ōn jekukum iam ixeyū mukūyjoap ojuy.

⁴⁵ Paīyū kukukayū Jesus ekawēn o'ya'ijojo ip, Fariseuyū dak. Ade wuymutaybitbinap ekawēn o'ya'ijojo. Deus ekawēn itaybit o'e ip ixeyū muwēnuwēn o'e iam.

— Jesus ijop ekawēn o'ġuwēn wuymukorēm ām — io'e ip jewewebe.

⁴⁶ Jesus daomūn ojuy o'e ip. Iparara bit o'e ip adeayū buxixim. Adeayū xe Jesus Deus ekawēn muwēnuwēn'ukat o'e, ibuye iparara o'e ip Jesus daomūn ām.

22 Waram Jesus o'jekawēn jewējuavū be. Wuy- mutaybitbinap ekawēn o'ġuwēn- -imēn- puximap ekawēn. Ipi kukukat muwēnuwēn o'e jewējuayū mutaybit am.

² — Deus wuynomuwā jewekay iap ipi kukukat adeayū o'tomuwā jekpot ewebumūnap epeta kay iap puxim. Ixe ipi kukukat peta o'ḡūḡē, jekpot o'jewebumūn puye — io'e Jesus.

³ — Jebuywatwat'ukayū o'tomuwāiyū be o'ḡuju tomuwā ām, jekpot epeta beam ip tomuwā ām, puybit o am. O'ju ip. O'tomuwā. Imēnpit o'takoyiyū oajēm ḡu ip, taobu'u ip puye.

⁴ — Wara'acayū o'ḡuju ḡuto- jebuywatwat'ukayū.

— “I juy epe'e otomuwāiyū be: ‘Kuy biopak oyaoka- biopak'it'it tak. Soat ma opop, peta be i'o am. Epesot cuy,’ i. ‘Ade puybit puye,’ i,” ixe o'e- ipi kukuk'ukat o'e jebuywatwat'ukayū be.

O'ju ip.

⁵ — O'tomuwāiyū bit osodot ḡu. O'taobu'un ip. Jewaywayway ip o'e. Oajēm ḡu ip peta kay. O'ju ip wara'at ka be. Pūḡ ixeyū'in kadaidip pe o'ju. Wara'acayū tarekrek mūn'a be o'ju ip. O'ju ḡu peta be. Peta iwat ekawēn kay ḡu o'e ip.

⁶ — Ḣebuje warara'acat ixeyū'in ibuywatwat'ukayū o'jat ip. Xipan ḡu o'jukuk ip. O'yaoka ip. Oe'ū. Poḡ. ⁷Ipi kukukat itakoma jījā o'e ibuye. Sorarayū o'ḡuju, jemunomuwāayū aokam, aḡokaxirixiri kasukamuy'ūm ām.

⁸ — Ḣebuje jebuywatwat'ukayū be o'jekawēn. “Kuy peta opop, okpot jewebumūn puye. Imēnpit wemunomuwāayū xipat'ūmayū. Imēnpuye ixeyū ajēmap cūḡ ḡu oxe,” io'e.

⁹ — “Epeju juy e daḡ, uk'a ukpibubu daḡ tak,” io'e jebuywatwat'ukayū be. “Wara'acayū epetakoy- e daḡayū. Soat cuy epetakoy- epetobuxikiayū,” io'e.

— “Hm hm,” io'e ip.

¹⁰ O'ju ip. O'takoy. E daḡayū o'takoy. Soat pupum ip o'e- o'tobuxikiayū- xipacayū, xipat'ūmayū dak.

— O'tujowat ip jekariwa kay. Imēnpuye yanopapūn o'e jewebumūnap'a cemudakoyūm.

¹¹ — Ḣebuje jemudakoyayū kay oajēm. Ipi kukukat oajēm, ijo am. Jewebumūnap ekabek kuḡ'ūmat o'tobuxik.

¹² — “Apēnpuye juk eōm, obure?” io'e. “Jewebu-

mūnap ekabek kuḡ ḡu ēn," io'e cebe.

O'jede ḡu, yaḡuybabi'ūm o'e buye.

¹³ — "Epesubamūnmūn cuy- -ceba, sui dak epe-
suumūnmūn," io'e ipi kukukat jebikuyap e'e'ukayū
be. "Epejoxik cuy kabiokboḡ pe, wuy Deus wi," io'e
ixe ipi kukukat. "Bomaku aḡokat kayū tōtōn jeedop.
Tūy dak ip jenūy yeiyei je'e ip ipi bun," io'e — io'e
Jesus, o'ya'i'joioiyū be imutaybitbin pima.

¹⁴ — Ade ma o'takoyiayū e'em ip. Pūḡpūḡ pit o'-
taēiayū e'em ip- -Deus o'taēiayū — io'e Jesus ixeyū
be.

Ibūrū ma o'e Jesus ekawēn. Imēn o'jekawēn Jesus
ade ma Deus kay o'takoy buye. Imēnpit pūḡpūḡ acā
ip Jesus eju jekukum. Pūḡpūḡ acā Deus xe.

¹⁵ Fariseuyū o'jeawero ip, Jesus a'ō muwarurun
ojuy ip puye.

— Apēn Jesus ekawēn aḡukorēm? — io'e ip je-
wewebe.

¹⁶ Jewewebe imēn kawēn puje, Fariseuyū jeweju
etaybitbinayū o'ḡuju ip Jesus kay. Herodes ebekitkit
tak o'ḡuju ip. Oajēm soat ip.

— Ocemutaybitbin'ukat — io'e ip Jesus pe. —
Soat em ēn icēmān e'em. Apēn Deus ibikuy ocewebe
jeku am iam ēn ocemutaybitbin. "Iḡo du xipat exe?"
i'ūmḡu ēn e'em warara'acat pe emutaybit am. Ka-
cūḡ kadiat cocoap tomuju ḡu ēn e'em "Teku xipat,"
i — io'e ip.

¹⁷ — Cedaḡ tu exe dinheiro ūmūm oceju bima
Roma ka kukukat peam? - -César peam? Ixe wuyedi-
nheiro ojuyjuy cebeam teidadam- -César beam. Teida
buje, wuyawēwēap ekawēn taḡ ḡu kuka ajeku? —
io'e ip.

¹⁸ Imēnpit Jesus itaybit ikērēm okuk pin ip iam.

— Apēnpuye eyju wa'ōmuwarurun ojuy? — io'e.
— Omuykukum ojuy eyju — io'e cebe ip. ¹⁹ — Di-
nheiro isurūḡat cuy epetojot owebe- -pūḡ'a'in- -
dinheiro'a yaūm Roma ka kukukat peat'a'in — io'e
cebe ip.

O'yadojot ip dinheiro isurūḡat'a- -yopīcat'a- -prata
muḡēḡēat'a.

²⁰ — Abu-biōḡbuk ija'a be -dinheiro'a be? — io'e. — Abu-butet tak ija'a be?

²¹ — César biōḡbuk, ibutet tak — io'e ip.

— Imēnpuye iḡo'a César pubut'a -dinheiro'a — io'e. — Cemuojujuy epeḡūm César be wuyeipi kukat pe — io'e. — Deus pe dak cuy epeḡūm cemuojujuy — io'e.

²² Iboap ekawēn buye, mūḡ ma osodop ip. O'jēm ma ip Jesus xewi. O'yaḡuybabi'ūm ip.

— Ya'ōmuypit pa'ore wuywebe — io'e ip jewewebe.

²³ Ixe kabiam Saduceuyū oajēm Jesus kay. Judeuyū osodop ip. Tūybe wuye'ū buje waram ḡuto acejetait ḡu iān o'e ip.

²⁴ — Ocemutaybitbin'ukat! — io'e ip Jesus pe. — Moisés juk kuyjeayū mutaybitbin osunuy:

Iwaḡo e'ū buje, jekitpit jewebumūn
cuy jewaḡo'ūm tayxibuk eju, itayxi-
buk i'it'et'ūm pima, i. I'it'et pima,
iwaḡo'ūm tieḡ ipotpot kuka o'e i'it, i.

— Imēneju ocetaybit ḡu abu-tayxim e'em ixe ayacat iam, waram ce'ū'ūayū etait puje — io'e ip cebe. ²⁵ — 6 beayū osodop ip iwaḡo kitpityū. Iwaḡo jewebumūnat o'e. Oe'ū, jekpotpet'ūm puxe ma. Imēnpuye pūḡ ixeyū'in o'jewebumūn jewaḡo'ūm tayxibuk eju -jewaḡo nomjuat. ²⁶ Oe'ū ixe dak. Jekpotpet'ūm puxe ma. Imēnpuye wara'acat o'jewebumūn itayxibuk eju -pūḡ ixeyū'in. Oe'ū ixe dak. Jekpotpet'ūm puxe ma. Imēn o'jewebumūn ip -ikitpiyū -soat ip. Pūḡpūḡpūḡ ma o'jewebumūn ip itayxibuk eju. Soat oe'ū ip -pūḡpūḡpūḡ ma.

²⁷ Ibocewi ixe ayacat i'it'et puxe ḡu ma ixe dak oe'ū. ²⁸ Imēn pima, ajo cūḡ ma exe? Abu-tayxim je'e ixe ayacat waram ḡuto wuyetait puje? Soat ip o'jewebumūn ixe eju -7 beayū — io'e ip Jesus pe.

²⁹ — Cedāḡ ḡu eyju jewaḡuyḡuy — Jesus o'e. — Tūybe waram acetait ḡu iān eyju. Eyetaybit ḡu Deus ekawēn iam. Deus bacaam tak eyetaybit ḡu. Deus warara'acat podi ma jebacaap kuḡ iam — Jesus o'e.

³⁰ — Waram jetait puje, wuyjuyū jewebumūnmūn

ġu ip. Kabi beat co'i ip je'e- -Deus ekawēn tojt-
jot'ukat co'i — Jesus o'e cebe ip.

³¹ - ³² — Imēntak Deus oe'ūiayū kukukat ġu-
itabēġayū kukukat acā. Imēnpit juk o'jekawēn ixe:

On Deus, i. Abraão itabut mabuk

okay, Isaque dak, Jacó dak, i.

Imēn Deus cuk o'e. "Itabut ip okay," io'e Deus, wa-
ram ġuto ip o'jetait puye. Ce'ū'ūayū ġu itabut Deus
kay- -itabēġayū acā.

— Imēneju wuyetaybit ce'ū'ūayū waram ġuto
itabēġ jeedop ip iam. Wuyetaybit tak Deus ce'ū'ūayū
kukukat ġu iam, Deus ekawēntup e'em. Epetupco —
io'e Jesus.

³³ Adeayū iboap co buje, yaġuybabi'ūm o'e ip,
imutaybitbinap puye.

³⁴ Fariseuyū bit Saduceuyū o'ġuymūġ iap awēġ
co buje, o'jeawero ip Jesus pe. ³⁵ Pūġ ixeyū'in o'jeka-
wēn Jesus eju. Moisés ekawēn imutaybitbin'ukat osu-
nuy xeku. Jesus a'ōmuwarurun ojuy xeku.

³⁶ — Ocemutaybitbin'ukat! — io'e Jesus pe. —
Pu-ġu Moisés ekawēn'in yoboġ cīcā wuymukūyjobit
am? — io'e Jesus pe.

³⁷ — Iġo ekawēn:

Deus cuy ikukpin cīcā epejukuk, i.

Warara'acat kukpinap podi ma juy

epejukuk. Eyxe ikukpin cīcā buye,

ibikuyap taġ cuy epeku soat em; xipa-

cat kay dak cuy epesop ġebum, i.

³⁸ — Imēn imubararakap opop Deus ekawēn tup pe.
Iġodup kay kūyjobin cīcān ma epesop. Iġodup wa-
ra'atup podi ma — io'e cebe. ³⁹ — Wara'at tak ixe
ekawēn'in yoboġ cīcā wuymukūyjobit am.

Imēn e'em:

Xipan cuy warara'acat epejukuk eye-

wekukap puxim ma, i.

⁴⁰ Iġodup pewi soat tup o'jebapuk- -Deus ekawēn mu-
wēnuwēn'ukayū emumutaybitbinaptup, Moisés eka-
wēntup tak, soat o'jebapuk iġodup pewi.

⁴¹ Fariseuyū eawero buje, Jesus o'jekawēn cebe ip.

⁴² — Abu ipot ixē Cristo? Abu Deus emunaē? — Jesus o'e cebe ip.

— Davi naxegebit xeku — io'e ip.

⁴³⁻⁴⁴ — Apēnpuye ixē Davi kuyje o'jekawēn Deus biōgbuk a'ōbi: “Cristo okukukat,” i? Imēn o'tupmubararak kuyje:

Cristo okukat- -Deus emunaē, i. Deus o'jekawēn Cristo be, i. “Xik'i. Ekay itakomaayū a'ōbacaap cuy oğuy'ūm,” io'e, i. “A'ō kay kūyjobin jeedop ip,” io'e, i. “Ēn ixeyū kukan'ūm pima, oxe ma juy eğuy,” io'e, i.

⁴⁵ Davi juk o'e Cristo be- -Deus emunaē be: “Ēn ma okukukat,” io'e. Imēnpuye ibapuk ma wuyxe Davi naxegebit acā ġu Cristo osunuy- -Davi kukukat tak osunuy — io'e Jesus.

⁴⁶ Ibocewi ka'ūmğuat o'jede Jesus pe. Cede ba'o-re osodop ip Jesus pe. Ya'ōbabi'ūm ip o'e Jesus a'ō-bu am.

23 Gebuje Jesus o'jekawēn adeayū be, jeweju etaybitbinayū be dak.

² — Fariseuyū itaybit cīcā ip Moisés ekawēn imutaybit am. Moisés ekawēn itaybitbin'ukayū dak itaybit. Imutaybitbin cuy ip ja'ōbi, itaybit puye Moisés ekawēn muwēn ām — io'e Jesus. ³ — Imēnpuye soat cuy epe'e ya'ō dağ kūyjobin cuy epeku soat i'e'e iap tağ. Imēnpit cekukuap tağ ġu juy epeku, Deus kay kūyjobit'ūm ip puye. Deus ekawēn imutaybitbin ip. Deus a'ō kay bit kūyjobit'ūm — io'e Jesus cebe ip.

⁴ — Ixeyū e'em warara'acayū be: “Moisés ekawēn tağ cuy epeku- -soat tağ,” i. Imēnpit soat tağ ġu ixeyū dak jekukum Moisés ekawēn tağ — io'e. — Eybuywatwan ġu ip Moisés ekawēn tağ eyeku am. Pūğ em tak ka'ūma — io'e Jesus.

⁵ — Soan ma e'em ip warara'acat pe jejojoan. Deus ekawēntupat ekawēn mubarararağ ip wara'atup

pe. Ibo dup mōgmōg ip tupmūn pe -tuperenaptup. Igo mūn pe mōgmōg ip jedopa'a daḡ, jeba daḡ tak warara'acat pe tup mūn jojoan. Imēn ojuy ip ixeyū kay warara'acat aḡuy daḡ, "Deus kay cīcāat teku," i warara'acat pe i'e am.

— Jesay iwaruat kuḡ ip jekukum warara'acat muak am jekay. Jesay ukpi muboḡuboḡ ip warara'acat pe jejojo am.

⁶ — Petatam pima kariwayū nuyap pe abik ojuy ip. Ya'ōbuyxiat tūyap pe abik ojuy ip Deus eju kawēnwēnap'a be, jebureyū be jejojo am. ⁷ Icockok cīcā ip warara'acat "Eya'ōbuyxi jījā" i'e buje cebe ip, adeayū etabixe tarekrek pupuap pe. Icockok warara'acat "Omutaybitbin'ukat" i'e buje cebe ip. Imēn icockok cīcā ip warara'acat pe ibuyxim ikuk am soat etabut pe.

⁸ — Ikitpitpiyū buximayū eyju bit- -soat — io'e Jesus jewejuayū be. — Ōn ma eykukukat. Wara'acat pit ka'ūma. Imēnpuye i'ūmḡu juy warara'acayū eywebe, "Ocemutaybitbin'ukat," i, eyju ikitpitpiyū buxim puye — io'e Jesus. ⁹ — Ipi ju bima, "Warara'acat podi ma ya'ōbuyxiat ēn," i'ūmḡu juy epe'e. Pūḡ ma soat podi ma ya'ōbuyxiat- -kabi beat acā- -wuyebay acā — io'e. ¹⁰ — Warara'acayū "Okukukayū eyju," i'ūmḡu juy ip eywebe. Imēn cuy ḡu ip, ōn acā eykukukat puye. Ōn Deus emunaē — io'e Jesus. ¹¹ — Ya'ōbuyxiat podi ma eyeweweju, eybuywatwat'ukat ma e'em — io'e. ¹² — Ya'ōbuyxi pin'ūmat yoboḡ e'em Deus xe — io'e.

¹³ O'jekawēn Jesus Fariseuyū be, Moisés ekawēn imutaybitbin'ukayū be dak.

— Karem ma ipiat epesupi'ajo! Ipi juacat muḡuykuku'ukayū eyju! Iba'ore warara'acat pe itaybit am ajo xipat Deus xe iam. Xipat Deus xeap ekawēn itaybit ḡu ip. Deus kay kūyjobit ḡu ip, iboap ekawēn epeḡuwēn ḡu buye. Deus kay eyju kūyjobit ḡu. Warara'acat mubu'u'un tak eyju Deus xe wuy-nūyap puxixim- -Deus kay wuyjuap puxixim.

(¹⁴ — Karem ma ipiat epesupi'ajo! Ipi juacat muḡuykuku'ukayū eyju — io'e Jesus Fariseuyū be, Moisés ekawēn imutaybitbin'ukayū be dak. — Itayxi-

buk muḡuykukukum eyju, ibubut pu am — io'e. — Ibun ma eyju jewexe kawēnwēn Deus eju, “Teku ya'ōbuyxiat,” i'e ojuy eyju warara'acat pe. Deus pit ipiat supi'ajoat eywebe warara'acat pe ipiat supi'ajoat podi ma — io'e Jesus.)

¹⁵ — Karem ma ipiat epesupi'ajo, Fariseuyū, Moisés ekawēn imutaybitbin'ukayū dak — io'e Jesus. — Soat taḡ jekukum eyju wara'acat kudadam. Iku-dadam cīcā eyju, imutabun am- -Deus kay imutabun am- -eyetabucap puxim imutabun am.

— Imutabun puje, imuwexaxan eyju ikērēat murūrūḡ'ukayūm. Ipiat'ajojoap kay cumayūm ip imuwexaxan eyju. Eybodi ma xipat ḡu ip — io'e.

¹⁶ — Karem ma ipiat epesupi'ajo. Ya'ōpi'ūmat puximayū eyju. Imēn ma warēmtaḡ ma warara'acat mutaybitbin eyju — Jesus o'e cebe ip. — Warara'acat mutaybitbin eyju: “ ‘Etaybit icēmān Deus eju kawēnwēnap'a omuy iam. Imēnpuxim cuy etaybit icēmān e'em ōn ewebe iam tak,' i epe'e bima, cedaḡ ma epesop Deus xe eya'ō daḡ ḡu ma'ḡu epekuku,” i'e'em eyju warara'acat pe — io'e Jesus.

— Wara'at imutaybitbin eyju dak. “ ‘Etaybit icēmān Deus eju kawēnwēnap'a be ouro opop iam. Imēnpuxim cuy etaybit icēmān ōn e'em ewebe iam tak,' i epe'e bima, cedaḡ ḡu kuka epe'e Deus xe, eya'ō daḡ ḡu epekuku,” i'e'em eyju warara'acat pe — io'e Jesus.

¹⁷ — Eyetaybit ḡu! Ajom xe'e eyetaybit? Ka'ūma ma! Ya'ōpi'ūmat puximayū eyju. Ajo yoboḡ Deus xe- -ceweju kawēnwēnap'a du? Yabeat ouro ḡu xe'e? Deus eju kawēnwēnap'a yaboḡ ma. Ouro xipat Deus eju kawēnwēnap'a be buye — io'e.

¹⁸ — Warēmtaḡ ma eyju warara'acat mutaybitbin. Warara'acat pe e'em eyju, “Wara'at pe epe'e bima, ‘Etaybit icēmān wūnca mupikpikap'a caixa'a opop Deus eju kawēnwēnap'a be iam. Imēnpuxim cuy etaybit icēmān e'em ōn ewebe iam tak,' i. Imēn e'em pima, cedaḡ ma epesop Deus xe eya'ō daḡ ḡu ma'ḡu epekuku,” i'e'em eyju warara'acat pe — io'e Jesus.

— Warara'acat pe e'em eyju dak: “Wara'at pe

epe'e bima, 'Eтайbit icēmān wuyju wūnca ūmūm paī be imupik am iḡo'a be iam. Imēnpuxim cuy etaybit icēmān e'em ōn ewebe iam tak,' i. Imēn e'em pima, cūḡ ma kuka epesop Deus xe, eya'ō daḡ ḡu ma'ḡu epekuku," i'e'em eyju warara'acat pe — io'e Jesus.

¹⁹ — Ya'ōpi'ūmat puximayū eyju! Abuat ḡasū ma ibaca eyxe? Wūnca mupikpikap'a ma du? Ya'a jeje imōḡap ḡu xe'e? Wūnca mupikpikap'a ma yabaca — io'e. — Ajo-mōḡ'i buje iat Deus pubut ma e'em. Imēnpuye imōḡap bacaap podi ma wūnca mupikpikap'a ma ibaca — io'e Jesus.

²⁰ — Imēneju wuyekawēn taḡ cuy ace'e, "Oce'e xe'e Deus eju kawēnwēnap'a be, wūnca mupikpikap'a be," i bima. Imēn ma kawēnwēn pima, wūnca mupikpikap'a muwēnwēn tak wuyju- -soat imōḡap tak — io'e Jesus.

²¹ — Imēneju warara'acat pe e'em pima: "Apēn etaybit icēmān Deus eju kawēnwēnap'a oyamuy iam; imēnpuxim cuy etaybit icēmān e'em ōn ewebe iam," i bima, eya'ō daḡ cuy epeku. Imēn Deus eju kawēnwēnap'a muwēnuwēn pima, Deus muwēnuwēn tak, Deus omuy buye ibo'a be.

²² — Imēneju warara'acat pe e'em pima: "Apēn etaybit icēmān kabi kake iam; imēnpuxim cuy etaybit icēmān e'em ōn ewebe iam," i bima, eya'ō daḡ cuy epeku. Imēn kabi muwēnuwēn pima, Deus abikbikap muwēnuwēn tak, Deus muwēnuwēn tak, Deus omuy jabikbikap ceje xik'i buye — io'e.

²³ — Karem ma ipiat epesupi'ajojo! Ipi juacat muḡuykuku'ukayū eyju! — i dak o'e cebe ip. — Soat em eybubut mu'awerorom 10 be, pūḡat ūm ām eyju Deus pe. Wara'at pit eyju imuxipanpan eybubun. Eyju puybit mukunukunaptup ūmūm Deus pe. erva-doce dak ūmūm, puybit mude'o'onaptup tak ūmūm. Xipat eywebe iboap ūmūm Deus pe. Imēnpit soat Moisés ekawēn kay kūyjobit ḡu eyju, soat Deus a'ō kay'ūm puye. Soat ḡu cūḡ ma epeḡuḡē Deus etabun. Deus a'ō kay juy epe'e. Warara'acayū xipan cuy epejukuk. Warara'acayū kay eyetabotaidabotbon cuy. Soan cuy epe'e cūḡ ma Deus etabun. Cūḡ ma jījā epeḡūm puybit mukunukunaptup pewi- -yopīcat

pewi. Imēnpit soat em epekuku Deus kay kūyjobitaū ma — io'e Jesus.

²⁴ — Warara'acayū kukuk'ukayū eyju! — io'e Jesus. — Imēnpit ya'ōpi'ūmat co'iyū eyju. Tikōnkōnat puxim eyju. Tikōnkōnapti mukapkam tekū paḡo daḡ, ikoēro uk am tikōnkōnapti bewi. Imēnpit camelo uk pin ḡu tikōnkōnapti bewi — Jesus o'e.

Imēn o'jekawēn Jesus itaybit am ip. Ikoēro yopīcat ūmūmap puxim. Deus xe yoboḡ pit warara'acayū xipan ajukuk iap. Imēnpuyē camelo Deus xe yoboḡat puxim.

²⁵ — Karem ma ipiat epesupi'ajojo! — Jesus o'e Fariseuyū be, Moisés ekawēn imutaybitbinayū be dak. Ipi juacat muḡuykuku'ukayū eyju. Kopo iokokat puxim eyju. Kacūḡ kadi acā eyju kopo wuywuy, prato wuywuy dak. Yabi bit ka'ūma. Yabi okok cīcā. Prato buxim eyju dak. Eyokok. Ade bubut epejat. Iparaḡ epejat warara'acat pubut, ibui bewi ip. Ade eybubut imēn ibu ibit. Eydacup puyē, epejat. Imēnpuyē prato iokokat puxim eyju.

²⁶ — Ya'ōpi'ūmat puximayū eyju! Ikērēān ḡu juy epesop. Epejat ḡu juy wara'acayū bubut. Eydacum ḡu juy epesop. Xipan ma epeku — io'e Jesus Fariseuyū be.

²⁷ — Karem ma ipiat epesupi'ajojo! — io'e Jesus Fariseuyū be, Moisés ekawēn imutaybitbin'ukayū be dak. — Ce'ūat topap puxim eyju, ce'ū'ūayū dao kuḡ ibima. Yarucat'a ika beat'a- wita'a. Yadip'a o'ya-joioiyū xe. Ikūydip ḡu iḡo'a'a binūn pe, witabikūy be. Ikūykērē jījā badi, ce'ūat tao opop puyē. Iḡēmat tak — io'e. ²⁸ — Imēnpuxim badi ma eyju ikērēat kuḡ cīcā, dapxi jījāyū dak eyju. Kacūḡ kadi bit eyju xipacayū jo'i — io'e Jesus cebe ip.

²⁹ — Karem ma ipiat epesupi'ajojo! — io'e Jesus Fariseuyū be, Moisés ekawēn imutaybitbin'ukayū be dak. — Eyju Deus ekawēn muwēnuwēn'ukayū-ūm'ūm etaypi mubapukap'a epeyamuy wita'a. Ixe-yū'ūm'ūm kay ḡebum am epeyamuy-Deus xe xipan e'e'ukayū'ūm'ūm kay. Idip cīcāat epeḡuḡē — io'e Jesus.

³⁰ — Epekawēn: “Kuyje ocetait pima, kajuk Deus

ekawēn muwēnuwēn'ukat oceyaoka ġu," i'e'em eyju te'e ma. "Ocedobuyū'ūm'ūm ekukuap taġ ġu kuka ocejuku," i dak e'em eyju te'e ma.

³¹ Te'e ma imēn e'em eyju. Ibapuk e'em soat xe eyju eydobuyū'ūm'ūm naxeġebitbit- -o'yaokaiayū naxeġebitbit, cekukuap co'i eyju dak jekukum puye.

³² — Karem ma ipiat epesupi'ajojo! — io'e cebe ip. — Ikērēat cuy epeġuġē eydobuyū'ūm'ūm co'i ixeyū ekapikap. Ikērēat co'i juy epeġuġē. Eydobuyū'ūm'ūm ekapikap muġēġē juy epe'e. Deus ekawēn muwēnuwēn'ukayū aokaap muġēġē juy epe'e — io'e. — Imēn cuy epeġēġē kuyjeayū'ūm'ūm ekapikap epere am — io'e.

³³ — Puybu buxim eyju- -wuye'ūap puybu tūy-piat puxim, ikērē jījāat kuġayū eyju buye. Puybu'it'it puxim tak. Iba'ore eywebe ipiat'ajojoap ka bewi eyenapōn ām — io'e Jesus.

³⁴ — Ōn e'em eywebe: Deus ekawēn muwēnuwēn'ukayū oġuju eykay, itaybit cīcāayū dak, wekawēn imutaybitbin'ukayū dak, i. Pūġpūġ epeyaoka- -ixeyū'in. Wara'acayū epesubamupaya korosa be, ce'ū ām. Wara'acayū epeġupokupok Deus eju kawēnwēnap'a be. Ixeyū epeġujēm soat ka bewi. Wara'at ka kay, wara'at ka kay epeġuju ip — io'e Jesus cebe ip.

³⁵ — Imēneju soat ibapuk je'e eywebe. Ipiat'ajojoap pe ibapuk je'e. Eydobuyū'ūm'ūm ikērēat kuġ- -ūmayū o'yaoka ip. Koap Abel'ūm o'yaoka ip. Ikērēat o'ġuġē ġu Abel'ūm. Kanomūm Zacarias'ūm o'yaoka ip- -Baraquias ipot. Deus eju kawēnwēnap'a be bima, o'yaoka ip, wūnca mupikapupikap'a xe bima. Eyju eyukpiwat ma soat ixeyū'ūm'ūm aoka am. Soat ibapuk je'e eywebe ipiat'ajojoap pe — io'e Jesus.

³⁶ — "Eyju ma karem ma ipiat epesupi'ajojo," i ōn e'em. Ġasūayū be ipiat supi'ajojoat Deus- -soat supi'ajojoat — io'e Jesus.

³⁷ — Jerusalēm ka watwat! — io'e cebe ip. — Deus ekawēn muwēnuwēn'ukayū aokakam eyju- -Deus emumujuyū. Yabuġbuġ tak eyju ip wita'am. Sapokay'it'it jexi kay. Jedaudaum jexi eġebadap tiot-

pe kajuk pibun. Eyju bit okay ġu. Eybu'u jġjā eyeta-but am okay, eykukpin cġcā a'ġu oxe — Jesus o'e.
³⁸ — Jeywat ōn aġokatkat jeduk'a iwacap puxim — Jesus o'e. ³⁹ — Imēnpuye icēmān ōn e'em eywebe. Waram ojo ġu eyju waram wajēm'ūm pima. Wajēm puje: "Deus xipan wuykukukat a'ōbi yajēm'ibit jukuk," i epe'e — Jesus o'e.

24 Gebuje o'jēm Jesus. Deus eju kawēnwēnap'a bewi o'jēm- -yabogat'a bewi. Ijēm puje, imutaybitbin'ukayū oajēm Jesus kay.

— Ak'i — io'e ip Jesus pe. — Uk'a yadipat'a ijoceat'a. Eyajo juy — io'e ip. Imēn ip kawēnwēn o'e ade o'yadop ibo ka be buye- -Deus tuk'a'ayū.

² — Soat ma epejojo ġu du? — io'e Jesus. — Ya'ade opop ijoce. Imēnpit ya'dop ġu ġuyjom pit — io'e. — Soat'a je'aedu. Xepxep'a jewa'a tēġtēġ ġu je'e- -wita'a — io'e Jesus.

³ O'ju Oliveira'a be- -co'a be. Xik'i osunuy iboma. Oajēm ip cekay- -Jesus kay. Ceweju etaybitbin-ayū oajēm. Jaġepūġ pima, oajēm ip cekay.

— Puġūn soat'a je'aedu? — io'e ip Jesus pe. — Puġūn je'bapuk? Pām ēn? Puġūn ajēm waram? Puġūn Deus ipi ġu'ūm? — io'e ip.

⁴ — Ġuyjomsūm — io'e Jesus. — Koap ma eymuġuykuku pinayū jajēm ip eykay. Kawēnwēn jajēm ip. Epeya'ijojo ġu juy iboap ekawēn. Eyday'em'um epesop ixeyū be eymuġuykukuap puxixim — io'e.

⁵ — Adeayū omuyku. "Cristo ōn ma- -Deus emunaē," i napa ma je'e ip. Warara'acayū itabun je'e ip. Ixeyū ade ġuġuykuku — io'e Jesus. ⁶ — Jenopaġo-ġōmap muwēnuwēn e'em ip. Yaokakaap epeya'ijojo. Eypararam ġu juy epesop. Imēn cuy je'bapuk. Imēnpit soat puk oi'ūm ġu. ⁷ Pūġ eipi watwat nopāġoġōm je'e wara'at eipi watwat eju. Pūġ ka watwat nopāġoġōm je'e wara'at ka watwat eju. Pūġ ka daġ ipi jexixim. Wara'at ka beayū iren je'ku ip — Jesus o'e cebe ip. ⁸ — Yopīt ma ipiat supi'ajojo ip koam- -ipi

juayū. I'tipin'isumapi jo'i ma je'e koam. Guyjom pit ipiat supi'ajo jījā ma ip — io'e.

⁹ — Gebuje ipiatpi'ajojoap kay jeydujowat ip. Jeydujowat ip eyaokam. Kawēnwēn je'e ip eymuwēnuwēn: "Ocexe yukpiwan teku. Oe'ū juy ocexe," i. Soat itakoma je'e eykay- wuyjuyū, pariwayū, warara'acayū. Soat ma ipi juacayū. Soat eykay ġu jījā je'e okay eyetabut puye — io'e Jesus cebe ip- jewēju etaybitbinayū be.

¹⁰ — Ixe kabia ade ip wuywat. Itabut okayayū oibu'un okay. Eymuwēnuwēn je'e ip eykay itakomaayū be, ipiat'ajoan eywebe. Eykay'ūm cīcā je'e ip. ¹¹ Jewexe Deus ekawēn muwēnuwēn'ukayū jajēm ip- ade. Imēnpuye ade ġuġuykuku ip. Imuġuykuku'ukayū e'em ip. ¹² Imēn ikērēat ade e'em iboce.

— Imēneju xipan ġu ip jewekuk. Xipan warara'acat kukap suiwat ip. ¹³ Pūġpūġ okay itabucayū jeedop ip, wajēm puje. Ipiatpi'ajojom ma'ġu ip okay ibu'u'ūm pima, ixeyū idaxijo Deus itakomaayū xewi — io'e Jesus. ¹⁴ — Wawēġ muwēnuwēn je'e ip- Jesus soat kukukat awēġ. Kawēn idipat muwēnuwēn je'e ip. Soat eipi daġ ijop awēġ muwēnuwēn je'e ip- soat eipi watwat itaybit am. Icēmān itaybit ip — io'e Jesus cebe ip. — Imēn soat mu'ūmap kabia jajēm — io'e Jesus cebe ip.

¹⁵ — Imēneju ipararu jījāat epejojojo Deus eju kawēnwēnap'a be- yaboġat'a be- bodiat'a be- Deus nuynuyap'a be. Daniel'ūm ekawēn taġ epejojojo- Deus ekawēn muwēnuwēn'ukat ekawēn taġ. (Eyetaybin cuy epezop ijoptup coco'ukayū!)

¹⁶ — Ipararu jījāat iġo'a be bima, jenapōn cuy ip co'a bicūġ kay- Judéia eipi watwat — io'e. Imēn kawēnwēn o'e Jesus. Apēn je'babuk ġuyjom iap muwēnuwēn o'e Jesus, itaybit puye.

¹⁷ — Eyduk'a eakiju bima, epeōm ġu juy eyduk'a be eybubut pum- yabeat pum — io'e. ¹⁸ — Eykat pe bima, epeyepit ġu juy eyduk'a kay eyeekabek pum — io'e. — Epejat ġu juy. Dao ma epeyena- pōn — io'e Jesus. ¹⁹ — Ixeyū kabia daġ iba'ore jījā je'e yukreġayū enapōn ām, je'it mutitinayū enapōn

ām tak. ²⁰ “Ihi bima ġu juy ocenapōnap, tirem puye, kajuk puye dak,” i juy epe'e Deus pe. “Sábado bima ġu dak cuy, jebodoydoyap kabia buye,” i — io'e Jesus.

²¹ — Ixeyū kabia daġ soat ipi juayū ipiat supi'ajojo jījā. Ibiatpi bit ipiat asupi'ajo ġu, Deus pe ipiat mubapuk'isum — io'e. — Waram pit ibiatpi ġu acesupi'ajo-ixeyū kabia daġ acā — io'e. ²² — Deus pe ipiatpi'ajojoap kabia mu'ūm'ūm pima, ka'ūma ma kuka o'jewedaxijo. Imēnpit: “Pūġpūġ kabia ipi watwat supi'ajojo,” i'e'em Deus. “Pūġpūġ kabia acā,” i'e'em Deus, jemunaēyū daxijo am, ikukpin cīcā cexe buye — io'e.

²³ — Wara'acat je'e eywebe napa ma: “Ak'i! Goku Cristo- -wuydaxijojo'ukan- -Deus emunaē,” i. “Ak'i! Goku ixē,” i dak. Imēn i'e buje, eyetabun ġu juy epesop ixeyū ekawēn kay — io'e. ²⁴ — Jewexe Deus emunaēhēyū je'bapuk, jewexe Deus ekawēn muwēnuwēn'ukayū dak. Wuymucoatcoanap ġu'bapuk ip Deus ebekitkiyū muġuykuku ojuy. Eywebe i'e ba'o-reat ġu'bapuk ip imuġuykuku ojuy. ²⁵ Apēn ġuyjom jajēm ip adeayū muġuykuku ojuy iap kuy oġuwēn eywebe. Gebu'i epe'e wekawēn kay, ixeyū be eymuġuykukuap puxim — io'e. ²⁶ — Ixeyū je'e napa ma: “Ak'i! Teku uk'a'ūmat pe,” i. Imēn i'e buje, epeju ġu juy uk'a'ūmat pe. Ixeyū je'e dak napa ma: “Ak'i! Teku ikaba'arēmatka be,” i. Imēn i'e buje, eyetabun ġu juy iboap kay — io'e Jesus jewēju etaybitbinayū be.

²⁷ — Soat waġo ōn. Xiririxiririkiat jesopsom kaxijēmap kadiwi i'acap kadibe. Iboap co'i ōn oajēm. Imēn wajēm puje, soat itaybit je'e ip. Iba'arēm ġu wajēmap je'e. ²⁸ Urupuyū je'awerorom iġēmat kay i'o am. Imēnpuxim Deus jajēm ipiatpi'ajoan ikērēat murūrūġ'ukayū be — io'e Jesus.

²⁹ — Ipiatpi'ajojoap kabia kap puje, kabi beacat muycēmčēmap iaruaru je'e — io'e. — Kaxiepiat kaxiepi ġu je'e. Kabiok je'e. Kaxiamat tak kaxiam ġu je'e. Kabiok je'e. Kasoptayū dak ida'at kabi kadiwi — io'e.

³⁰ — Gebuje okop ipi kay. Soat tōtōn je'e ip- -ipi juacayū- -soat ip. Soat waḡo ōn. Ojojo ip kabikerereat taḡwi kopkom. Wa'ōbacaap kuḡ okop, odipap kuḡ tak. ³¹ Parasuy jo'iat Deus ḡuyde- -yoboḡat. Jekawēn tojtōt'ukayū ḡuju soat taḡwi. Cemunaēhēyū ḡu'awero ip. Soat taḡwi ḡu'awero ip- -ipi daḡwi — io'e Jesus.

Imēn Jesus waram jeedocap o'ḡuwēn jeweju etaybit-binayū be.

³² — Ḡebum cuy epesop wajēmap kay, figueira'ip kay ḡebum pima. Figueira'a bikit cēm puje, “Koato ijasun ma,” i'e'em eyju, dup cēm pima — io'e. ³³ — Imēnpuxim ipiat'ajoap kabia ajēm pima, “Ḡaxīn ma Deus emunaē jajēm,” i juy epe'e. Wekawēn puye, eyetaybit epe'e — io'e Jesus. ³⁴ — Ḡasūayū'in iboap coco je'ū awap, soat pe wekawēn je'bapuḡ- -soat ma. Ḡebum cuy epesop iboap kay — io'e Jesus jewejuacat pe. ³⁵ — Kabi i'ūm, ipi dak; wekawēn pit i'ūm ḡu. Wekawēn kayayū bit soat em jeedop — io'e Jesus.

³⁶ - ³⁷ — Soat waḡo ōn. Waram oajēm ōn. Abu itaybit wajēm ām? Ka'ūma ma itaybit ip wajēm ām. Deus ekawēn tojtōt'ukayū itaybit ḡu- -kabi beayū. Ōn tak wetaybit ḡu. Webay acā itaybit. Ka'ūma ma owiwim pima, oajēm. Imēnpuxim tak Noé kabia be ka'ūma ma iwiwim pima muba'atxiri oajēm kuyje — io'e Jesus. ³⁸ — Muba'atxiri ajēm awap, soat ip ti-kōnkōn'uk osodop. Jekōnkōn'uk ip osodop. Jewebumūnmūn'uk ip osodop. Imēn ma osodop, kobexixi be Noé ōm awap. ³⁹ Itaybit ḡu osodop ip ajo je'bapuḡ iam. Kobexixi be Noé ōm puje acā, muba'atxiri ajēm puje acā itaybit o'e ip. Itabut ḡu ip Noé kay osodop. Imēnpuye muba'atxiri wiwim ḡu ip. Imēnpuye dak soat ip oakōm. Wajēm puk pima, imēn ma dak. Ka'ūma ma wajēmap wiwim je'e — io'e Jesus.

⁴⁰ — Wajēmap kabia be xepxep kapikpiḡ e'em jekat pe- -aḡokatkayū. Pūḡ ixeyū'in tujowat jeweju- -Deus emunaē eju. Wara'acat tujowat ḡu. ⁴¹ Trigo muḡēḡēap ka be xepxep trigo muḡēḡēm e'em- -aoyū.

Imugēgēm pima, pūg ixeyū'in tujowat jewēju- -Deus emunaē eju. Warara'acat tujowat ġu — io'e. ⁴² — Aġ cuy epesop — io'e cebe ip. — Eyetaybit ġu buye pujuat kabia eykukukat jajēm iam — io'e Jesus.

⁴³ - ⁴⁴ — Ixima dağ uk'a beat iwiwim pima, ibukurukat ajēmap puxim, iōmap puxim; ixet ġu kajuk ixē uk'a beat — io'e Jesus cebe ip. — Imēnpuxim wuyju wuykukukat wiwim'ūm pima, ixē dak imēnpuxim jajēm — io'e Jesus.

⁴⁵ — Kariwa jekapikpik'ukat kay pimaap, itaybit cīcāat kudadam je'e. Xipacat muğēgē'ukat kudadam je'e. Iġo kapikpik'ukat warara'acayū kukuk'ukat kariwa a'ōbiat. Irere bima ip, soat em ixat je'ġūm ip cebe- -warara'acayū be- -kapikpik'ukayū be. Jexat o am awero am ip cebe, icūğ ām je'ġūm. ⁴⁶ Jekariwa a'ō kay kūyjobin pima, iġo kapikpik'ukat icokcok je'e jekariwa ajēm puje. ⁴⁷ Icēmān ōn e'em eywebe — io'e. — “Obubut kukukan cuy ece- -soat ma,” i je'e cekariwa iġo kapikpik'ukat pe. ⁴⁸ Imēnpit je'ġūm ġu wara'at pe- -kapikpik'ukat pe, “O'jekuyan ma wekariwa,” i'e'em puye. Ikērēat kuğ xeku. ⁴⁹ Ibureyū mukupogē je'e. Tikōnkōn je'e ika'oayū eju. Jekōnkōn tak je'e ceweju ip. ⁵⁰ Jekariwa wiwim ġu xeku. Itaybit ġu je'e pu kabia wekariwa jajēm iam, pu ehora iam tak.

⁵¹ — Iwiwim'ūm pima, je'pit cekariwa. Ipiat supi'ajoat jekapikpik'ukat pe. Jekapikpik'ukat ipiat supi'ajo wuyjuyū muğuykuku'ukayū ipiat supi'ajojoap co'i. Ixeyū tōtōn cīcā ip je'e ipiat'ajojoap ka be. Ipi kuğ puye, tūy yeiyei ip je'e dak — io'e Jesus jewēju etaybitbinayū be.

25 Deus soat kukanap kabia muwēnuwēn o'e Jesus o'ya'iġojiayū mutaybitbin pima. Imēnpuye wuymutaybitbinap muwēnuwēn o'e itaybit am ip. Imēnpuximap ekawēn muwēnuwēn o'e.

— Deus soat kukanap kabia ayacayū cucumap kabia buxim — io'e Jesus. — Ixē ayacayū yaypan'isuyū osodop ip- -10 beayū. Jewebumūnat kay o'ju ip

lamparina kuḡ. Jewebumūnat dopabijuk am o'ju ip.
² 5 beayū ixeyū'in yaḡuysacayū osodop ip. Warara'acayū 5 beayū yaḡuyba'arēmayū osodop — Jesus o'e.
³ — Yaḡuyba'arēmayū o'tidujowat ḡu ip daxadi-lamparina beapti. O'tidujowat ḡu ip timūn'a be.
⁴ Yaḡuysacayū acā o'tidujowat daxadi timūn'a be.

⁵ — Ixet pin ip. Etapok'i e'em. Ixet osodop ip-10 beayū. Ixet,ibun jewebumūnat puye. Xet.

⁶ — Iximadakpe iboceayū o'tomuwā 10 beayū be.
 — “Ak'i!” io'e ip. “Jewebumūnat oajēm,” io'e ip. “Epeju cekay, topabijuk am,” io'e ip 10 beayū be.

⁷ — O'ḡuwurūḡ ip. O'kop ip-10 beayū. Lamparina mudipudim osodop ip, imusopusop am.

⁸ — Ḡebuḡe yaḡuyba'arēmayū o'jekawēn yaḡuysacayū be.

— “O'ti'ūm. Imēnpuye iba'ore ocewebe lamparina musop am. Daxadi epetiūm cuy ocewebe,” i ip o'e.

⁹ — “Ap!” yaḡuysacayū o'e. “Iba'ore ocewebe tiūm am eywebe. Pūḡti ma ocedaxadi. Epeju, ti bu am. Dinheiro juy epeḡm warara'acayū be-tideim,” io'e ip.

O'ju ip, ti bu am.

¹⁰ — Jewebumūnat oajēm peta muḡēḡēat tuk'a kay. Cucum pima ip daxadi bum, oajēm. O'ju jewebumūnat eju yaḡuysacayū. O'ju ceweju, kuy buye ip. Oōm ip ceweju.

— Bik. O'tomudip ip xīntabi.

¹¹ — Oajēm ḡuyjom. Yaḡuyba'arēmayū oajēm. O'tomuwā.

— “Kariwa!” io'e ip. “Xīntabi etomudip'uk ocewebeam,” io'e ip.

¹² — “Wetaybit ḡu ma eyjum,” io'e cebe ip — io'e- -Jesus o'e.

Pere. Imēn 10 beayū be kawēnwēnap pi o'jepere Jesus. Apēn ixē jewebumūnat kay 10 beayū oekuku, imēnpuxim wuyju be jekukum, Deus soat kukan pima. Pūḡ wuy'in iwiwim je'e Deus soat kukanap kabia bima. Warara'acayū wuy'in iwiwim ḡu je'e.

¹³ — Aḡ cuy epesop ekariwa jajēmap kay — io'e

Jesus iboceayū be. — Eyetaybit ġu buye puju eyekariwa jajēm iam. Ajo hora iam eyetaybit ġu. Ajo kabia iam eyetaybit ġu. Aġ cuy! — io'e cebe ip.

¹⁴ Waram Jesus o'jekawēn iboceayū be. Deus soat kukanap kabia muwēnuwēn o'e.

— Deus soat kukanap kabia aġokatkat cuap kabia buxim — io'e Jesus. — Ixe cucum o'e wūy ma. Wara'at eipi be cucum o'e. Cucum awap, kapik-pik'ukayū o'tomuwā- -jebuywatwat'ukayū. Jebubut o'ġūm cebe ip. O'ġūm imuxipanpan am. ¹⁵ Dinheiro'a o'yaūm cebe ip. Ajo-xe imuxipanpan pucat o'yaūm cebe ip. Pūġ ixeyū be 5 mil iat'a o'yaūm. Wara'acat pe 2 mil iat'a o'yaūm. Warara'at pe pūġ mil iat'a o'yaūm- -dinheiro'a.

— Ibocewi o'ju wara'at eipi be.

¹⁶ — Ġejuje 5 mil iat'a juk o'yabuiat wara'at dinheiro'a o'yabu- -wara'at 5 mil iat'a. Imēnpuye 10 mil iat'a kuġ o'e. ¹⁷ Wara'at ibuywatwat'ukat ijo'i ma o'ġuġē dinheiro'am- -ibo 2 mil iat'am. Imēnpuye 4 mil iat'a kuġ o'e. ¹⁸ Yabi beat pit ibo pūġ mil iat'a o'yamōġ ipikūykūy be. O'jokot. Batku. O'yamōġ. Pere.

¹⁹ — Ade xet kap puje, oexe. Cekariwa oexe. O'jekawēn jekapik-pik'ukayū be. Jedinheiro'a muwēnuwēn o'e. ²⁰ Imēnpuye 5 mil iat'a juk dinheiro'a o'yadojot jekariwa be- -10 mil iat'a o'yadojot.

— “Juku, Kariwa,” io'e. “Ijoce edinheiro'a- -5 mil iat'a. Wara'at oyabu- -wara'at 5 mil iat'a. Soat ebubut'a. Edinheiro'am ġasū- -10 mil iat'a. Wara'at 5 mil oyabu ibo 5 mil iap,” io'e jekariwa be — io'e Jesus.

²¹ — “Xipat,” cekariwa o'e cebe. “Xipacat ěn. Wedinheiro'a muxipan cīcā ěn. Yopīt ma o'e. ěn pit wa'ō daġ imuxipanpan cīcā owebeam.

— “Imēneju ade obubut muxipan ece owebeam,” io'e — io'e Jesus.

— “Ġa'a! Peta oġuġē ġasū. Acekōnkōn,” io'e cekariwa.

²² — Imēnpuye dak 2 mil iat'a juk o'yabuiat di-

nheiro'a o'yadojot ixē be-jekariwa be. 4 mil iat'a o'yadojot.

— “Juku, Kariwa!” io'e. “Ijoce edinheiro'a-2 mil iat'a. Wara'at'a oyabu-wara'at 2 mil iat'a. Soat edinheiro'am ḡasū. 4 mil iat'a oyabu ibo 2 mil iap,” io'e cebe — io'e Jesus.

²³ — “Xipat,” cekariwa o'e cebe. “Xipacat ēn. Wedinheiro'a muxipanpan cīcā ēn. Yopīt ma o'e. Wa'ō daḡ imuxipanpan cīcā eḡuy owebeam.

— “Imēneju ade bubut cuy eḡuxipan owebeam,” io'e — io'e Jesus.

— “Ga'a! Peta oḡuḡē ḡasū. Acekōnkōn,” io'e cekariwa.

²⁴ — Ḡejuje pūḡ mil iat o'yabuiat o'jekawēn ixē be-jekariwa be.

— “Kariwa!” io'e. “Kuy juk wetaybit edacup iam--warara'at ekat pewi ejat iam-etiotata'ūmap kat pewi,” i napa ma o'e cebe. “Kuy juk wetaybit ekapikap'ūmat pewiata etabu iam,” i napa ma o'e dak. ²⁵ “Oparara ebuxim ibuye. Edinheiro'a oyamōḡ ipikūykūy be-mil iat'a. Juku,” io'e. “Edinheiro'am-ebubut'am.”

²⁶ — “Ibu'u'uat ēn,” cekariwa o'e. “Ikērēat kuḡ ēn. Etaybit tu warara'at ekat pewi ojat iam? Wekapikap'ūmat pewiata otabu iam etaybit tu? ²⁷ Imēn etaybit pima, wedinheiro'a eyaūm cuy dinheiro'a muxipanpan'ukat pe wara'at dinheiro'a bu am owebeam,” io'e. “Wepit puje, eyaūm kuka owebe,” io'e.

²⁸ — “Dinheiro'a juy epeyabu cebewi-pūḡ mil iat'a,” cekariwa o'e warara'acayū be. “Epeyaūm cuy wara'at pe-10 mil iat'a kuḡat pe,” io'e kapikpikayū be. ²⁹ “Imēn ma. Adeat kukat pe wara'at je'ḡūm ip. Imēnpuye ade jījā ikuḡ e'em. Imēnpit yopīcat kukat xewi ixē yopīcat je'jat ip,” io'e cekariwa. ³⁰ “Ite ibu'u'uat tak epejoxik cuy kabiokboḡat ka be-tōtōnap ka be-tūy yeiyeiat ka be,” io'e cekariwa — io'e Jesus.

Imēn Jesus soat o'e iboceayū imutaybit am. Cekariwa dinheiro muxipatpan cīcāayū o'ju ip peta be ce-weju. Imēnpuxim Deus a'ō kayayū jeedop ip Deus xe soat em. Ipikūykūy be cekariwa dinheiro mōḡat pit

o'joxik ip kabiokboğat ka be. Imēnpuxim Deus ipiat supi'ajoat ja'ō kay'ūmayū be. Imēn Jesus imutaybitbin o'e.

³¹ Jesus o'jekawēn waram iboceacat pe.

— Soat wağo òn. Odipap kuğ wajēm puje, soat kukan oce'e. Deus ekawēn tojtjot'ukayū jajēm ip oweju. Jay. Ajo xipat Deus xe iap oceğuwēn, ajo xipat ġu iap tak.

^{32 - 33} — Ipi juacayū je'awero owap. Apēn ovelha kukuk'ukat ovelhayū o'taē bodeyū bewi, imēnpuxim òn tak ipi juacayū bewi wa'ō kayayū otaē - kūyjobitbicayū. Kacūğcūğ'i jeedop ip oba'at kadi. Kūyjobitbit'ūmayū bit oba'ūğ kadi kacūğcūğ'i jeedop ip.

³⁴ — Cūğ'i buje, ocekawēn oba'at kadiayū be.

— “Deus kuy eymucokcok cīcā. Webay kay juy epesot! Eyka be juy epeōm- -kuy osukamuxipaniap ka be. Deus kuy ipi muğēğēm pima, cuk eyka muğē dak,” ioce'e cebe ip. ³⁵ “Epeōm! Xipan cīcā juk adi eyju okuk. Ore bima, puybit cuk adi epeğüm owebe. Obipuruk pima, idibi juk adi epetiüm owebe. Oka be'üm pima, xipan cuk adi eyju okuk eyduk'a be. ³⁶ Ka'ümğu wekamixa bima, kamixa juk epeğüm owebe. Owātaxipi bima, epajēm obuywat am. Òn daomūnmūnap'a be bima, epajēm okay,” ioce'e cebe ip.

³⁷ — “Kariwa!” Deus xe cūğ cīcāayū e'em. “Ere jekukum ejojo ġu oceju. Puybit cuk oceğüm ġu ewebe. Ebipuruğ jekukum tak ejojo ġu oceju. Idibi juk ocetiüm ġu ewebe,” i'e'em ip. ^{38 - 39} “Ewātaxipi ġu ejojo oceju. Cuk ocajēm ġu ekay ebuywat am, ēn daomūnmūnap'a be bima,” i. “Eduk'a'e'ūma jekukum ejojo ġu oceju. Oceju ġu xipan ekuk cuk acesop oceduk'a be. Kamixa dak cuk oceğüm ġu ewebe,” i'e'em ip.

⁴⁰ — “Owebe epeğüm ġu,” ioce'e cebe ip. “Imēnpit webekitkit pe epeğūmiap owebe epeğūmiap puxim. Omubuyxin cīcā webekitkit. Yopīt ma ip ipi juacat etabun. Imēnpit ixeyū be epeğūmiap, owebe

epeḡūmiap puxim ma," ioce'e — io'e Jesus. — Soat kukan oce'e — io'e.

⁴¹ — Gebuje ōn e'em cebe ip-oba'ūḡ kadiayū be. "Deus xe ikērēat mujurūḡrūḡ'ukayū eyju. Imēnpuye Deus jajēm eykay ipiat'ajoan eywebe. Epeyena-pōn cuy oxewi. Ipiatpi'ajojoap pe soat em epesop-daxaboḡ pe-ibiōḡbuk kērēayū kukukat ka be. Deus o'ḡuḡē ibiōḡbuk kērēayū kukukat kam-ixe ekawēn tojtot'ukayū kam tak," ioce'e — io'e Jesus. ⁴² — "Xipan ḡu juk adi okuk epesop. Ore bima, puybit cuk adi epeḡūm ḡu owebe. Obipuruk pima, idibi juk adi epetiūm ḡu owebe. ⁴³ Oka be'ūm pima, xipat ḡu juk adi eyju okuk eyduk'a be. Ka'ūmḡu wekamixa bima, kamixa juk adi epeḡūm ḡu owebe. Owātaxipi bima, kuy obuywatwan ḡu epesop. Ōn daomūnmūnap'a be bima, epajēm ḡu okay," ioce'e cebe ip — Jesus o'e.

⁴⁴ — "Kariwa!" Deus xe ikērēat mujurūḡrūḡ'ukayū e'em. "Ere jekukum ejojo ḡu oceju. Imēnpuye puybit cuk oceḡūm ḡu ewebe. Ebipurūḡ jekukum ejojo ḡu oceju. Imēnpuye idibi juk ocetiūm ḡu ewebe. Ewātaxipi ḡu ejojo oceju. Imēnpuye juk ocajēm ḡu ekay ebuywat am. Ēn daomūnmūnap'a be ḡu eḡuy. Imēnpuye juk ocajēm ḡu ekay," i. "Eduk'a'e'ūma jekukum ejojo ḡu oceju. Imēnpuye oceju ḡu xipan ekuk cuk acesop oceduk'a be. Ejojo ḡu oceju, ekamixa'ūm pima. Imēnpuye kamixa juk oceḡūm ḡu ewebe," i'e'em ip.

⁴⁵ — "Webekitkit pe ḡu epeḡūm iap, owebe ḡu epeḡūm iap puxim," ioce'e cebe ip. "Ipi juacat etabun webekitkit yopīt ma. Imēnpit ixeyū be ḡu epeḡūm iap, owebe ḡu epeḡūm iap puxim," ioce'e-soat kukan oce'e — Jesus o'e. ⁴⁶ — Imēntak ixeyū je'ju ipiatpi'ajojoap pe jedop am — io'e Jesus. — Deus xe cūḡ cīcāayū acā jeedop ip Deus tēḡ ma-itait jeedop ip soat em Deus xe — io'e Jesus jewejuayū be.

26 Wuymutaybinap ekawën mutaybitbin epere buje, Jesus o'jekawën jeweuacat pe.

² — Eyetaybit xepxep xet kap puje, Páscoa epeta jajëm iam. Ijop Páscoa bima, ijoceat odujowat okay itakomaayū kay obamupaya am. Korosa be oba mupaya ip. Waoka ip — io'e Jesus-soat waḡo o'e.

³ Ḡebuje paīyū kukukayū o'jeawero ip uk'a yaboḡ cīcāat'a be-ibuyxi jījāat tuk'a be-Caifás tuk'a be. Judeuyū kukukayū dak o'je'awerowero. ⁴ O'jewagūyda soat ip. Jesus daomūnūnap muwēnuwēn o'e ip. Apēn oce'e iam kawēnuwēn o'e jewewebe. Yaoka ojuy ip iba'arēm.

⁵ — Páscoa bima bit Jesus ataomūn ḡu, adeayū be wuyaokaap puxim — io'e ip jewewe be. Ixe Páscoa epeta bima Judeuyū pāo'a o'o'uk ip osodop-yamuyuhuhaptōmtēm'ūmat'a. Ijop epeta muḡēḡēm pima, apēn Deus wuye'ajojoyū'ūm'ūm o'ḡujēm Egito eipi bewi iap kay ḡebum'uk ip osodop.

⁶ ⁷ Ierep tūibit tuk'a be ayacat oajēm-Simão duk'a be. Jesus xik'i o'e jekōnkōn jeweu itaybitbinayū xe. Tide'oati kuḡ oajēm Jesus kay. Jesus'a abi be o'timōḡ Betānia ka be. O'timōḡ timūn'a bewi-wita'a muḡēḡē'a bewi-alabastro'a muḡēḡē'a bewi. Tideiboḡ cīcā ixedi tide'oati. ⁸ Imēnpuye itakoma ip o'e ayacat kay Jesus eju etaybitbinayū.

— Te'e ma iḡodi tide'oati mu'ūm teku — io'e ip. ⁹ — Tide'oati deida buje, kajuk teiboḡ o'jat! Ade kuka juk dinheiro isurūḡat o'jat prata muḡēḡē. Tadaybotbocayū be kuka juk dinheiro o'ḡūm — io'e ip. ¹⁰ Jesus itaybit apēn kawēnwēn ip iam. Imēnpuye o'jekawën cebe ip.

— Ite mukorēm'rēm ḡu bit cuy epe'e — io'e cebe ip. — Xipacan ma teku o'e owebe. Apēnpuye eyetakoma ite kay? Eyetakoma ḡu juy epesop cekay — io'e Jesus cebe ip. ¹¹ — Tadaybotbocayū soat em ma eyxe — io'e. — Eybikuy bima, ixeyū buywan put eywebe. Ōn pit soat em ḡu oḡuy eyxe. Soat em ḡu xipacan ey'e but owebe — io'e. ¹² — Ite ayacat ojebit o'ḡude'on, oje'ū ḡu buk ma'ḡu. Wetabēḡ pima

ma kuy omude'on witabikūy be omōḡ awap — io'e.
¹³ — Okay itabucayū ijop ekawēn ḡuwēnuwēn soat
 kaka daḡ- -kawēn idipat. Apēn ite ayacat o'tidi wa
 be iap ḡuwēnuwēn tak ip soat kaka daḡ. Soat ka
 watwat ḡebum je'e apēn ixē o'e iap kay. Ḡebum cuy
 epesop iboap kay — io'e cebe ip.

¹⁴ Ḡebuḡe Judas Iscariotes oajēm paīyū kukukayū
 kay. Pūḡ doze beayū'in ixē Judas osunuy. ¹⁶ Ixē o'je-
 kawēn paīyu kukukayū be.

— Pebūrū epeteida owebe Jesus ūmap teim? —
 Judas o'e.

— 30 be prata'a — io'e ip.

— Xipat — Judas o'e.

O'yaūm ip. ¹⁶ Imēnpuye Judas oeku:

— Pu kabia Jesus puap kabia? — io'e jewebe
 ma.

Imēn oekuku kudadam.

Ḡebuḡe bit ma aḡu Judas oeku Jesus pu ojuy
 itakomaayū be iūm ām.

¹⁷ Oajēm ip Jesus kay- -doze beayū. Páscoa epeta
 osunuy. Iboap epetam Judeuyū pāo'a o'o'uk- -
 yamuyuhuhaptōmtēm'ūmat'a. Ovelha dak aoka-
 ka'uk osodop ip Páscoa epeta bima- -koapat kabia
 bima.

— Poce ovelha ocejoyoy peta ajēm pima? — io'e
 ip Jesus pe.

¹⁸ — Epeju juy okay itabucat pe- -aḡokatkat pe
 — io'e. — Jerusalém ka be xeku omuy. I juy epe'e
 cebe: “ ‘Omuyku eduk'a kay,' wuymutaybitbin'ukat
 o'e ewebe. 'Páscoa be i'o am omuyku, oweju etaybit-
 bin'ukayū dak,' io'e ewebe,” i. “ ‘Ōn oje'ū ḡasū,'
 io'e dak ewebe,” i dak. Imēn cuy epe'e cebe — io'e
 Jesus jeweju etaybitbinayū be.

¹⁹ — Hm hm — io'e ip.

O'ju ip Jerusalém ka be.

Oajēm. Jesus kay itabucat tuk'a oōm. Apēn cuk
 ixē o'e, Jesus kay itabucat pe o'e ip- -soat ma. Iḡo'a
 be ovelha o'joyoy ip peta ajēm pima. Soat muxipan-
 pan o'e ip peta beam.

²⁰ Katpuje ma Jesus oajēm. Oabik mesa koreren doze beayū eju. O'jekōnkōn ip iḡo'a be. ²¹ Jekōnkōn pima ip, o'jekawēn doze beayū eju.

— Icēmān ōn e'em eywebe. Pūḡ ey'in jekawēn okay itakomaayū be. Poce oḡuyiap ḡuwēn ixeyū be, odobuxik am. Imēn oūm epe'e okay itakomaayū be waoka am — io'e cebe ip.

²² Iḡuycūḡcūḡ cīcā ip o'e.

— Kariwa! Ōn xe'e? — io'e'e ip pūḡpūḡpūḡ.

²³ — Oweju pāo'a mudirem pūḡ pe ma prato be cekōnkōnat okay itakomaayū be oūm waoka am.

²⁴ Soat waḡo ōn. Apēn oje'ū iaptup taḡ oje'ū- -Deus ekawēntup taḡ — io'e Jesus. — Karem ḡu ipiat supi'ajo oūmat pit. Xipat kuka adi a'ḡu ixē bit o'jebapuk'ūma — io'e Jesus.

²⁵ — Omutaybitbin'ukat! — Judas o'e- -itakomaayū be Jesusūmat o'e. — Ōn tu jeūm itakomaayū be?

— Hm hm. Ēn ma — io'e Jesus jeūmat pe.

²⁶ Jekōnkōn ip pima, Jesus pāo'a o'yabu.

— Bay! Xipat ēn — io'e Deus pe. — Ocexat'am eyaūm ocewebe — io'e.

O'yamuweka. O'yaūm jeweju etaybitbinayū be.

— Juku — io'e Jesus. — Epeya'o. Ijop'a ojebit — io'e cebe ip. — Pāo'a muwekaap puxim ip obamupaya — io'e.

²⁷ Uva'abidi dak o'timōḡ tikōnkōnap pe.

— Bay! Xipat ēn — io'e Deus pe. — Ocexati etiūm ocewebe — io'e.

O'tiūm cebe ip.

— Juku — io'e. — Ijopti juy epetikōn- -soat eyju juy epetikōn — io'e doze beayū be.

²⁸ — We'ū buje jedoyekereren oce "Adeayū bewi ikērēat oju'uk," io'e Deus puye. Imēnpuye Deus ijop kērēat kay ḡebum ḡu. Adeayū ḡuisun Deus ekawēn iisuat xe. Cūḡ ma jeedop ip cexe- -Deus xe — io'e.

²⁹ — Waram ḡu otikōn uva'abidi soat ipi watwat webay a'ō kay kūyjobit'ūm pima. Soat ipi watwat ya'ō kay kūyjobin pima bit, tiisuati otikōn uva'abidi — io'e Jesus.

³⁰ Jekōn puje, jebibododon ip o'e Deus kay. O'ju ip.

Oajēm ip- -soat ip. Co'a kay oajēm- -Oliveira-dip'a kay. Jay. Jesus o'jekawēn cebe ip- -jewejuayū be. Xīgxiḡ pima co'a jeje, Jesus o'jekawēn.

³¹ — Ijop exima eyju operem — io'e. — Epeye-napōn okay itakomaayū buxixim. Imēn Deus ekawēn-tup omuwēnuwēn:

Ovelha kukuk'ukat oyaoka, i. Soat ip
jepōḡpōḡ iōhōyū, i.

Imēn Deus ekawēntup omuwēnuwēn — io'e.

Imēn kawēnwēn o'e Jesus jeweju etaybitbinayū kukukat puye. Imēnpuxim ovelha kukukat Jesus puxim. Jesus eju etaybitbinayū ovelha buxim kuka ip. Ovelha jepōḡpōḡ ip jekukukat'ūm pima. Jesus eju etaybitbinayū jepōḡpōḡ kuka ip, Jesus e'ū buje.

³² — Imēnpit we'ūap tomukadi Deus waram ḡuto omutait. Oju eywap Galiléia eipi be — io'e Jesus cebe ip.

³³ — Soat ip jepere- -ebureyū. Ekay itakomaayū buxixim iparara buye, ip jepere. Ōn pit jepere ḡu. Pūḡ em tak ka'ūma — Pedro o'e.

³⁴ — Tapu, icēmān ōn e'em ewebe — io'e Jesus Pedro be. — Ijop exima ma “Obure ḡu teku,” i napa ma ece'e ebapūḡ em — io'e. — Sapokay ede awap “Obure ḡu teku,” i napa ma ece'e — io'e Jesus.

³⁵ — Oce ḡu ma buk, “Obure ḡu teku,” i, eweju waokaap puxim — io'e Pedro.

Soat cewejuayū imēn o'e'e.

³⁶ Ḡebuḡe Jesusyū o'ju kadaihiaptip kay- - Getsēmani ka kay.

— Jocebuku epabikbik — io'e jewejuayū be. — Bomaku buk ōn cum, Deus eju jekawēn ām — io'e cebe ip.

Oabik ip.

³⁷ Pedro o'tujowat, Zebedeu ipotpoyū dak. Eba-pūḡ o'tujowat. Iḡuycūḡ cīcā Jesus o'e.

³⁸ — Oḡuycūḡap pibun je'ūmat co'i ōn — io'e

ebapūgayū be. — Epabik — io'e. — Aḡ cuy epesop — io'e. — Oweju epeyeak cuy.

³⁹ Bosusu o'ju, jebay eju jekawēn ām. O'jepo ipi ju jeḡuycūḡap pibun.

— Bay! — io'e. — Ewebe iba'ore'ūm pima, omuwedem ece, owebe ipiat'ajoap puxim. Wa'ōbi bit we'ū pin ḡu. Ēn ebikuy bima bit oje'ū — io'e Deus pe.

⁴⁰ Aripit. O'jepit. Oajēm ebapūgayū kay. Ixet ip osodop.

— Pedro — io'e Jesus. — Eywebe iba'ore du eyḡuy pūḡ hora ma oweju jeak am? ⁴¹ Aḡ cuy epesop! — io'e cebe ip -- ebapūgayū be. — Xen ḡu juy epesop. Deus eju juy epeyekawēn eywebe ikērēat mujurūḡap puxim -eywebe Satanás a'ō kay kūyjobicap puxim — io'e. — Eybu'u jījā ikērēat muḡē ām. Imēnpit ikērēat epeḡuḡē eya'ōbaca'ūm puye. Imēneju Deus eju juy epeyekawēn, ixē a'ōbacaap kuḡ eyeku am — io'e Pedro be.

⁴² O'ju waram.

— Bay! — io'e waram Deus pe. — Ewebe iba'ore'ūm pima, omuwedem ece, owebe ipiat'ajoap puxim. Ēn ebikuy bima bit, oje'ū — io'e Deus pe.

⁴³ Aripit. Jesus waram o'jepit ebapūgayū kay. Ixet ma'ḡuto ip osodop. Itaxeebaca o'e ip, xet pibun.

⁴⁴ Waram o'ju jebay kay, jekawēn ām. Kuyat ekawēn puxim waram o'jekawēn Deus eju.

⁴⁵ Aripit. O'jepit ebapūgayū kay.

— Eyxet mabuk ḡu du? — io'e cebe ip. — Jebodoydoy mabuk ḡu du eyju? — io'e. — Soat waḡo ōn. We'ūap kabia kay ōn ajēm — io'e. — Ḡasū okay itakomaayū oūm ip ikērēat mujurūḡrūḡ'ukayū be waoka am. ⁴⁶ Epe'āy! — io'e cebe ip. — Ak'i juy epe'e! Itakomaayū be oūmat omuyku. Ḡā'ā okay itakomaayū atopabijuk — io'e cebe ip.

⁴⁷ Jesus kay Judas oajēm. Kawēnwēn pima, oajēm. Doze beayū'in osunuy Judas. Jesus eju jeku'uk osunuy. Ade oajēm ip -paja kukuḡayū, jeba'ip kukuḡayū dak. Oajēm ip, Jesus kudadam Judeuyū kukukayū a'ōbi, paīyū kukukayū a'ōbi dak.

⁴⁸ — Oyağobukōn'ibit cuy epejat. Ixe Jesus — Judas juk o'e cebe ip- -Jesus ūm cekay itakomaayū beiat.

— Ocejat cuy — i juk o'e ip- -Judas ejuayū.

⁴⁹ Isum yajēm.

— Wuykat, omutaybitbin'ukat! — Judas o'e Jesus pe.

O'yağobukōn.

⁵⁰ — Obure — io'e Jesus. — Apēn ēn e'em iap, ġasū ma juy ece — io'e.

Oajēm ip Jesus xe, ibu am. ⁵¹ Imēnpuye Jesus ejuat jepaja o'ju'uk iyuk pewi. O'suğuybu'uk pajam paīyū kukukat ebekit ġuybu ikibi.

⁵² — Paja ejomōğ cuy iyuk pe — Jesus o'e. — Pajam wara'at o'yaokaiat ixē dak pajam yaoka ip — io'e Jesus.

⁵³ — Ōn cekay bima, webay doze mil beat o'ğuju kuka- -jekawēn tojtjot'ukayū. Ğaxīn ma kuka o'ğuju okay itakomaayū buxim — io'e jewējuacat pe. ⁵⁴ — Deus ekawēn tojtjot'ukayū ajēm puje bit, iba'ore kuka o'e owebe we'ū ām Deus a'ō dağ pit. Imēn put ma owebe- -we'ū but ma — io'e Jesus.

⁵⁵ Ixe ehora bima, Jesus o'jekawēn yajēmibiyū be- -adeayū be.

— Ade kabia juk adi oğuy Deus eju kawēnwēn- ap'a be- -yaboğat'a be. Imukūyjom cuk adi oğuy. Eyju bit odaomūn iğo'a be ġu bit. Eyju dak epesot odaomūn ām paja kukuğ, eyba'ip kukuğ tak, ibukurukat taomūğap puxim — io'e cebe ip. — Ibukurukat ġu on pit! — io'e cebe ip.

⁵⁶ — Kuy bima o'tupmubararak ip Deus eka- wēntup apēn ip odaomūniaptup — io'e. — “Ibukurukat taomūğap puxim ixē taomūn ip,” i'e'em iğodup — io'e. — Imēn ma odaomūn ip ġasū dak — io'e Jesus.

Soat ip Jesus o'jepere ceweju etaybitbinayū. Soat ip o'watwat.

⁵⁷ O'jacayū o'tujowat ip. Jesus o'tujowat ip Cai- fás kay- -paīyū kukukat kay. Iboceayū juk o'je'awero ip Cai fás tuk'a be. Judeuyū kukukayū o'je'awero ip,

Moisés ekawên imutaybitbin'ukayû dak. ⁵⁸ Pedro bit Jesus nomuju o'ju. Wûy ma o'ju. Païyû kukukat tuk'a naxînôm pe oajêm. Oabik sorarayû parakpe. Oabik, ijo am- -apên je'bapuk Jesus pe iap co am.

⁵⁹ Païyû kukukayû o'je'awero ip, yawêg mukêrê-rêrên'ukayû kudadam, pûg tağ ma Jesus muymuy am, Jesus aokam dapxi a'ô nomuju. Soat o'je'awero ip- -païyû kukukayû, Judeuyû kukukayû, Moisés eka-wên imutaybitbin'ukayû dak- -soat o'je'aweroiyû.

⁶⁰ Oajêm ip je'aweroayû kay. Ade oajêm- -yawêg mukêrêrêrên'ukayû. Imênpit iba'ore o'e Jesus awêg mukêrêrêrên'ukayû. ⁶¹ Xepxep oajêm ġebu je bit- -wuymu-ğuykuku'ukayû.

— Ite ağokatkat o'e: “Deus eju ekawênwênap'a oyamuy'ûm put- -yaboğat'a. Imênpit oyamuy put wa-ram ebapûğ kabiam,” i — io'e xepxepayû- -dapxiyû. ⁶² Imênpuye païyû kukukat ma o'ây, jekawên âm.

— Apênpuye ecede ġu awêg mukêrêrênayû be? — io'e. — Icêm tu ip e'em? — io'e Jesus pe.

⁶³ Jesus mûğ ma osunuy.

— Deus emunaê ên pima, eğuwên cuy ocewebe — koapat païyû kukukat o'e Jesus pe. — Deus a'ôbi- -soat em itaicat a'ôbi eğuwên cuy. Deus emunaê ên tu? Deus ipot tu ên? — io'e.

⁶⁴ — Hm hm. Ixe ipot ma ôn — io'e. — Soat wağo ôn. Ģuyjom ojojom epe'e. Xik'i oğuy Deus xe iba'at kadi. Ixe Deus soat podi ma ya'ôbacaat. Cexe ôn pima ojojom epe'e. Soat kukukan oce ixe eju. Ģuyjom ijodi waram ojot. Kabikerereat tağwi okop — io'e Jesus.

⁶⁵ Imêneju jeekabek o'ğuwek païyû kukukat, jeta-koma pibun.

— Deus muymuy teku — i napa ma o'e. Jesus muwênuwên o'e.

— Epeya'ijojo kuy ixe ekawên. Wara'acayû ġu ajokudada Jesus awêg mukêrêrên âm — io'e cebe ip- -o'je'aweroweroiyû be. ⁶⁶ — Ajo cûğ ma eyxe? Apên tak ace'e Jesus pe? — io'e cebe ip.

— Ikêrêat kuğ teku Deus xe — i napa ma o'e ip- -ibimâmâyû ekawên coco'ukayû. — Imênpuye ayaoka — io'e ip.

⁶⁷ O'je'aweroiayū o'ḡuxiuxi Jesus dopa be -jebidi. Jetakoma pibun o'ḡuxiuxi. O'yaokaka ip.

Pūḡ ixeyū'in Jesus dopa o'topaoka.

⁶⁸ — Cristo! — io'e ip cebe. — Abu edopaoka oce'in?

Imen o'jekawēn ip, kuy Jesus o'topamuekabek paḡōm puye.

⁶⁹ Pedro dak xik'i osunuy uk'a daxirōḡ pe. Paīyū kukukat ebuywatwat oajēm- ayacat'isuat. Oajēm Pedro kay.

— Ēn tak mo Jesus eju ejeku- -Galiléia eipi be-wiat eju — io'e Pedro be.

⁷⁰ — Ōn ḡu. Apēn ēn e'em? Ixe bure ḡu ōn — i napa ma o'e Pedro, soat ya'ijjom pima.

⁷¹ O'ju yanaxīnōm pe. Wara'at ayacat'isuat ixē Pedro o'jojojo.

— Ite Jesus ejuibit — io'e iboceayū be. — Nazaré wat ejuibit — i.

⁷² — Ixe eju ocekuḡu ḡu — Pedro o'e. — Ixe bure ḡu ōn. Deus itaybit Jesus wetaybit ḡu iam — i napa ma o'e Pedro.

⁷³ Ibunbun pima, oajēm cekay iboceayū.

— Icēmān — io'e ip. — Apēn ēn kawēnwēn, imēntak Galiléia watwat kawēnwēn ip. Imēnpuye oecaybit Jesusyū'in ēn iam — io'e ip Pedro be.

⁷⁴ — Dapxiyū eyju! — i napa ma o'e Pedro. — Ixe bure ḡu ōn! Ceweju ōn pit ocekuḡu ḡu — i napa ma o'e. — Ōn icēmān e'em'ūm pima, Deus cuy ipiat supi'ajoat owebe — Pedro o'e. Sapokay o'jede ḡebuje bit.

⁷⁵ Jesus a'ō kay Pedro o'jeḡebu.

— Sapokay ede awap, ebapūḡ em ece'e, "Jesus bure ḡu ōn," i — i juk o'e Jesus Pedro be. Iboap kay o'jeḡebu Pedro. O'ju uk'a naxīnōm pewi. O'tōn cīcā Pedro. Iḡuycūḡ cīcā o'e, ikērēat o'ḡuḡē buye.

27 Kabia isum soat o'je'awero ip- -Judeuyū kukukayū, paīyū kukukayū dak. O'je'awero ip, Jesus aokaap muwēnuwēn ām.

² Jesus o'jacayū o'subamukirik ip jekukukat a'ō-bi. O'tujowat ip. O'ju ip Jesus eju.

Pilatos kay o'ju ip- -ipi kukukat kay.

³ Judas pe itakomaayū Jesus dujowat aokam iap co buje, o'ju waram Judas paīyū kukukayū kay. O'yadujowat dinheiro'a- -prata'a- -30 beat'a. Iḡuycūḡ o'e, o'ḡuḡēap puye. Oajēm cekay- -paīyū kay, Judeuyū kukukayū kay dak. Itakomaayū be Jesus ūmat oajēm. ⁴⁻⁵ O'yaxik prata'a Deus ekawēnwēnap'a be- -yaboḡat'a be. Batku!

— Ikērēat kuḡ ḡu Jesus. Ōn ma ikērēat kuḡ, Jesus omuyap oḡuwēn eywebe buye. Iḡasū bit ip kuy o'tujowat yaoka am. O'tujowat, cekay itakomaayū be ōn iūm puye — io'e.

— Ēn ma ikērēat kuḡ a'ōbi ma- -oceju ḡu bit. Ekpiwan ma — io'e ip.

O'jenapōn Judas. Oe'ū Judas'ūm. O'jewāḡobumukirik. O'jewemutoro. Oe'ū.

⁶ Gebuje: dinheiro'a o'yabu ip.

— Ijop'a yamōḡ pa'ore wuywebe Deus edinheiro mūn'a be — io'e paīyū kukukayū. Jewewebe o'e ip. — Cūḡ ḡu kuka o'e Moisés ekawēn taḡ ijop'a Jesus aokaap ma dei an puye — io'e ip.

⁷ Imēneju o'je'awero ip. Apēn xe'e ace'e iap muwēnuwēn o'e ip. Imēnpuye iḡo'a yaūm ip itīḡ'a buximat'a muḡēḡē'ukat pe jekat teim. Imēn iboap kat o'jat ip. O'jat ce'ū'ūayū kot am iboce- -Jerusalēm ka bewi'ūmayū kot am. ⁸ Jesus aokaap-teim ip o'jat iapka i osunuy ika butet. Ḡasū dak imēn ibutet. ⁹ Imēn o'jebapuk Jeremias ekawēn taḡ- -Deus a'ō muwēnuwēn'ukat ekawēn taḡ. Kuyje Jeremias o'e:

Israel naxeḡebitbit kukukayū dinheiro'a o'yadujowat ip- -prata'a- -30 beat'a. Ijop edinheiro juk o'ḡuwēn ip itakomaayū be Deus emunaē oḡūm iaptei o'e iap, i. ¹⁰ O'yaūm ip itīḡ'a

buximat'a muḡēḡē'ukat pe ikat teim.
Deus a'ōbi o'yaūm ip, i juk o'e Jere-
mias.

¹¹ Oajēm Pilatos kay Jesus o'jaciayū- -ipi kukuk-
at kay.

— Judeuyū kukukat tu ēn? — io'e Pilatos Jesus
pe.

— En ma iboam e'em — io'e Jesus.

¹² Jesus tak o'jomuymuy ip- -Judeuyū kukukayū,
paīyū kukukayū dak. Jesus o'jede ḡu bit ixeyū be.

¹³ — Soat eya'ijojo ḡu du ixeyū o'e iap? — Pila-
tos o'e Jesus pe.

¹⁴ O'jede ḡu bit. Pūḡ em tak ka'ūma. Pilatos yaḡuy-
babi'ūm cīcā o'e, Jesus o'jede ḡu buye.

¹⁵ - ¹⁷ Ḡebye soat o'je'awero ip Pilatos xe. Ju-
deuyū o'je'awero ip.

— Abu oḡujēm cuy daomūnmūnap'a bewi? —
Pilatos o'e cebe ip. — Barrabás ma du? — io'e. —
Jesus Cristo ḡu xe'e? — io'e. — Pebicat oḡujēm cuy?
Cristo butetecat tu? — io'e Judeuyū be- -adeayū be.
Imēn Pilatos o'e, imēn ibikuy buye. Páscoa epeta
bima ipi kukukat Judeuyū emunaē mujēmjēm'uk
osunuy daomūnmūnap'a bewi. Imujēmjēm'uk, jekpi-
wan ma. Ikērēat kuḡ cīcāat osunuy daomūnmūnap'a
be iboap Páscoa bima. Barrabás i osunuy ibutet.
Soat ma itaybit ip ixem. ¹⁶ Imēnpit Pilatos itaybit
paīyū kukukayū itabutkarey o'e ip Jesus kay iam.
Itaybit jetabutkarey pibun Jesus o'tujowat ip iam.

¹⁹ Pilatos tayxi dak ja'ō dujowacat o'ḡuju. Ja'ō-
daxijom o'ḡuju jektop kay. Ipi kukukat pe ibocecat
aweroroap pe o'ḡuju. Iboce Pilatos xik'i osunuy Jesus
awēḡ co am. Oajēm ya'ōdujowacat.

— “Ixe Jesus cūḡat,” etayxi o'e — ya'ōdujowa-
cat o'e itop pe. — “Jesus oajēm wexeybi,” i. “Ipiat
osupi'ajo jījā wexey ixē buye,” i — io'e ya'ōdujowa-
cat. — “Ikērēat cuy eḡuḡē ḡu cebe- -Jesus pe,” i dak
— ya'ōdujowacat o'e Pilatos pe.

²⁰⁻²¹ — Pebicat oğujēm cuy daomūnmūnap'a bewi? — Pilatos o'e waram o'je'aweroiayū be.

— Barrabás — io'e ip.

Imēn o'je'aweroiayū o'e paīyū kukukat ekawēn puye, Judeuyū kukukayū ekawēn puye dak.

— “Barrabás,” i juy epe'e Pilatos pe — paīyū kukukayū juk o'e o'je'aweroiayū be. — “Jesus cuy esubamupaya korosa be,” i juy epe'e Pilatos pe — i juk o'e ip.

Imēnpuye o'je'aweroiayū o'jekawēn ip Pilatos pe.

— Barrabás eğujēm cuy daomūmūmap'a bewi — io'e o'je'aweroiayū.

²² — Pām Jesus? Ite butet Cristo i. Apēn tak oce cebe? — Pilatos o'e o'je'aweroiayū be.

— Esubamupaya juy korosa jeje, yaoka am — io'e ip.

²³ — Ikērēat o'jukuk ġu tekun-pūğ em tak ka'ūma! — io'e Pilatos.

Imēnpit big ma ya'ōberen o'jewāwā ip.

— Esubamupaya juy korosa be, yaoka am.

²⁴ O'je'aweroiayū mukaba'ūm pa'ore o'e Pilatos pe. Jekaba'ūm ġu o'je'aweroiayū.

Ibuje, Pilatos idibi o'tibu. O'jewebuwywuy o'je'aweroiayū etabun, imutaybit am ip ōn ġu okpiwat iam.

— Ōn ġu okpiwat Jesus aoka am. Eyju ma epeyaokaat — io'e Pilatos.

²⁵ — Ipiat acesupi'ajo — io'e ip. — Wuyipotpot tak, yaokaap puye — io'e ip.

²⁶ Ğe buje Pilatos Barrabás o'ğujēmat daomūnmūnap'a bewi. Jesus pit imupokupoğ ip o'e ixee muğēğēbum Pilatos a'ōbi. Ya'ōbi Jesus o'tujowat ip o'je'aweroiayū be, yaoka am, korosa be ibamupaya am.

²⁷ Ğe buje sorarayū Jesus o'tujowat iecuğap tuk'a be. Pilatos a'ōbi o'tujowat ip. O'je'awero ip warara'acayū xe- o'tomuwāayū- sorarayū- jewējuacat'in ma. O'je'awero ip iwaywayway am- Jesus waywayway am. Soat ip sorarayū oajēm. ²⁸ Jesus esay o'ju'uk ip. Iekabek o'ğūōm ip- ipakpukat- iecuğap ee-

kabek puximat. ²⁹ Widaohobune o'subunemuwakên ip yakoreren ma. O'jomôg ip yakoreren. Imên o'gũgê ip Jesus pe, Judeuyũ kukukat puximan imubapuk am, iwaywayway am. Iba'ip o'yopmôg ibui be, iba'at kadi. O'jêg'aecôgçôg ip cewap iwaywayway am.

— Ên ma Judeuyũ kukukat! — io'e ip, iwaywayway am. — Warara'acat podi ma ên a'ôbuyxi — io'e ip, iwaywayway am.

³⁰ O'gũxiuxi ip Jesus ceje. O'yamupāupā ip iba'im. Iwaywayway o'e ip. Pere.

³¹ Ğebu je iekabek ipakpukat o'ju'uk ip. Cesay ip waram o'gũôm. O'tujowat ip yaokam-iba mupaya am korosa be.

³²⁻³³ O'ju ip co'a kay- -Gólgota'a kay. Gólgota'a “ce'uat aririt'a” iape. Cucum pima ip, Cirene kawat o'topabijuk. Simão i ibutet osunuy. Ixe Simão o'gũju ip ibuywat am- -Jesus puywat am, korosa dujowat am. ³⁴ Vinhodi tiũm ojuy ip Jesus pe. Iboceat o'tupmuwekoy uva'abidi be wuypipimu'ũmapti be. O'tikô'ajo Jesus. Tikôn pin gũ o'e.

— Ap! — io'e.

³⁵ Ğebu je sorarayũ Jesus o'subamupaya ip korosa be. Cesay bubum o'e ip- -sorarayũ. Dado xikxiğ o'e ip Jesus tiotpe.

— Abu cesay je'jat? — io'e ip jewewebe.

³⁶⁻³⁸ Tupmubararakaptup kuğ o'e ip sorarayũ. Tupmubarararag o'e ip Jesus puten. Tũybe ajo-ikêrêan ip o'e iân tak ip o'tupmubarararak: “Ibutet Jesus i. Judeuyũ kukukat teku,” i. Ibodup tupararakatup o'tupmôg ip korosa be, Jesus abi ase.

Ğebu je xepxep o'subamupaya ip wara'at korosa be. Ibukurukayũ osodop ip- -xepxep. Jesus pa kadi o'subamupaya ip. Pũg ma Jesus pa'at kadi osunuy; wara'at iba'ũgat kadi.

Oabik ip Jesus kay jeak am. Iwiwim o'e ip. ³⁹ Wara'acayũ kapkam o'e ip korosa etako dağ. Yaa-ruaru. Iwaywayway o'e ip.

⁴⁰ — “Deus eju kawênwênap'a oyamu'ũm- -yaboğat'a,” i juk ece — io'e jewaywaywayayũ Jesus pe. — “Ebapũğ kabiam wara'at'a kuka oyamuy,” i

juk ece — io'e ip. — Ecewe daxijo juy — io'e ip. — Deus ipot ên pima, ekop korosa ejuwi — io'e ip Jesus pe.

⁴¹ Païyū kukukayū dak Jesus kay jewaywayway o'e ip. Moisés ekawên imutaybitbin'ukayū dak ixe kay jewaywayway ip, Judeuyū kukukayū dak. Soat ip jewaywayway o'e ip.

⁴² — Teku wara'acayū daxijojo'uk osunuy — io'e ip. — Imēnpit jewedaxijo ba'ore cebe je'ūap puxim. Israel eipi kukukat ġu du? Ġaxīn ma korosa ejuwi kop puje, ocetabut oce'e cekay — io'e ip.

⁴³ — Deus kay itabut teku. Deus cekay bima, Deus o'taxijo juy ġasū — io'e ip. — O'taxijo juy teku o'e buye, “Deus ipot ōn,” i — io'e ip.

⁴⁴ Ibukurukayū dak imēn o'e Jesus pe -ceweju ibamupaya'ibiyū.

⁴⁵ Kaxi wuyase bima, kabiok o'e ibo kabia -Jesus e'ūap kabia. Soat taġ o'e kabiok -Judeia eipi daġ. Kaxicuġ pima, katpuje bima dak. Ebapūġ hora bun kabiok oeku.

⁴⁶ Katpuje ya'ōberen o'jewāwā Jesus.

— Eli, Eli, lemá sabactani? — io'e.

“Deus, apēnpuye ên opere?” iboap ekawên iape. ⁴⁷ Iboceayū Jesus ekawên o'ya'ijjojo ip.

— Elias nomuwāwām teku — io'e ip, xipan ġu ip o'jekūyjo buye.

⁴⁸ Iboceat o'jedau idibi bubuap munopapūn ām uva'abidim -tideiboġ'ūmatim. Ixe dak idibi bubuap o'jomōġ ip'abi be.

Ġebuje o'yopmuyu Jesus pe imutitit am.

⁴⁹ — Mēnpuk — warara'acayū o'e. — Omuyku paxi Elias taxijo am — io'e ip.

⁵⁰ Waram o'jewāwā Jesus ya'ōberen. Oe'ū ġebuje. Jekpiwan ma oe'ū. (⁵¹ Oe'ū bima paġo Deus eju kawēnwēnap'a be osunuy -yaboġat'a be -uk'a exintabi nomudipap epaġo. Jekpiwan ma ixe paġo o'jewek, Jesus e'ū buje. O'jewek kabi kadi wi ipi kay. Ipi o'jexixi ibo ka be. Wita'a o'je'aewekwek. Jesus oe'ū bima, o'je'aewekwek ip.

⁵²⁻⁵³ Jesus waram ġuto itait puje, ce'ū'ūayū dop-

ap o'tomudip'uk ip, ipi jexixixi buye. O'tomudip'uk ġuyjom. Oe'ūiayū itait o'e waram- -Deus kay itabucayū'ūm'ūm. O'jēm jedopap pewi.

O'ju ip Jerusalém ka kay- -Deus xe xipacat ka kay.

Adeayū kay o'jebapuk ip- -ce'ū osodopiyū.)

⁵⁴ Sorarayū kukukat o'jojoho, cewējuayū dak. Soat o'jebapukiap o'jojoho ip, Jesus oe'ū bima. Ipi jexixixim o'jojoho ip. Soat o'jojoho ip- -Jesus kay jeakayū. Iparara jījā o'e ip.

— Icēmān — io'e ip. — Ite aġokatkat'ūm Deus ipot osunuy — io'e ip.

⁵⁵ Aoyū dak o'jojoho ip wūy wi- -Jesus nomuju tūibiyū- -ibuywatwat tūibiyū. Cēm cēm pima Ġaliléia eipi bewi ibuywatwan ip o'e. Ade osodop ip. ⁵⁶ Ixeyū aoyū parakpe ebapūġ aoyū osodop ip. Ibūrū ma ip osodop: Maria Madalena, wara'at Maria dak, Zebedeu ipotpoyū xi dak. Wara'at Maria Tiago xi osunuy, José xi dak.

⁵⁷⁻⁵⁸ Katpuje ma Arimatéia ka wat oajēm Pilatos kay. José i ibutet osunuy- -ade ibubutbecat- -Jesus kay itabucat.

— Jesus'ūm jebit mukop pin oce — io'e Pilatos pe.

— Ha'a — io'e. — Ijebit cuy eġukop — io'e.

⁵⁹ O'ju José korosa kay. Ijebit o'ġukop korosa ejuwi. Jesus'ūm o'ġukabekbek paġōm- -irucan- -iisuan.

⁶⁰ O'tujowat ce'ū'ūayū dopap kay. Ixe'ūm o'jomōġ witabikūy be- -jemukūymuġēkūy be. Kuy o'sukūymuġē je'ūap puxim.

Ġebuje wita'a o'yamuypen witabikūy nomudip'am. Yaboġat'a o'yamōġ.

Ġebuje José o'jenapōn. ⁶¹ Maria Madalena dak xik'i o'e witabikūy xe, wara'at Maria dak.

⁶² Kuyaje paīyū kukukayū o'je'awero Pilatos wap Sábado bima. Fariseuyū dak o'je'awero.

⁶³ — Kariwa! — io'e ip Pilatos pe. — Itait pima, Jesus cuk o'e: "Ebpūġ kabia bima, waram wetait

oce. Ojebapuk ġuto," i — io'e ip. — Imēn wuy-
muġuykukum xeku — i napa ma o'e ip.

Itabut'ūm ip. Tūybe napa ma e'em iān o'e ip.

⁶⁴ — Imēnpuye juy esukūywiwiat. Sorarayū eġuju
juy ebapūġ kabia topam ip, witabikūy wiwi am —
io'e ip. — Imuju'ūm pima, Jesus kay itabucayū ja-
jēm ip ixima daġ ijebit pu am. Ġebuġe ip napa ma
jījā je'e: "Jesus o'je'ada," i. Xeku juk o'e: "Deus
emunaē oce," i — io'e ip Pilatos pe. — Koapat podi
ma je'e ip napa jījā ma — io'e ip.

⁶⁵ — Ma — io'e. — Sorarayū oġuju eyweju ikūy
wiwi am — io'e Fariseuyū be.

— Hm hm — io'e ip. — Cum oceju.

⁶⁶ O'ju ip Jesus'ūm topap kay. Wita'a mudek
bōrōbu o'subumupaya ip Pilatos a'ōbi-ikūy nomu-
dipap'a pidase. Sorarayū o'jomōġ ip. Ikūy wiwiayū
o'jomōġ ip.

Aripit. O'jepit ip jeduk'a be- -Fariseuyū, paīyū
kukukayū dak.

28 Domingo bima Maria Madalena o'ju, wa-
ra'at Maria dak. Jesus'ūm dopap kay oajēm
ip. Oajēm kabia isum. (² Kuy o'jebapuk Deus ekawēn
tojotjot'ukat kabi bewi. Jesus'ūm dopap pe o'jeba-
puk. Imēnpuye ipi o'jexixi. Wita'a o'ya'uk Jesus'ūm
dopap pewi. Oabik ibo yaboġat'a jeje. ³ Osunuy isop-
sep ān. Xiririkxirikiap puxim osunuy. Kabidiġ bu-
ximat co'i iekabek. Irut cīcā osunuy. ⁴ Sorarayū ipa-
rara jījā o'e ip- -topap wiwimayū. Ce'ū'ūayū buxim
ip o'e iparara. Jexixixim ip Deus ekawēn tojotjot'uk-
at puxixim.)

⁵ Oajēm ip. Maria Madalena oajēm, wara'at Ma-
ria dak. O'jekawēn cebe ip. Deus ekawēn tojotjot'uk-
at o'jekawēn.

— Eypararam ġu juy epesop. Epeyepere. Wetay-
bit Jesus'ūm kudadam eyju iam- -ibamupaya'ibit ku-
dadam iam.

⁶ — Ijoce ġu bit xeku. Itait waram ġuto xeku
apēn cuk o'e iap taġ — io'e. — Epesot. Epejojojo
Jesus'ūm topap — io'e.

⁷ — Ijo buje, dao ma epeju juy Jesus eju etaybit-bit topibiyū kay — io'e aoyū be. — I juy epe'e cebe ip: “Jesus waram ġuto o'jetait. Cum eywap Galiléia eipi be. Iboce ixé juy epejojojo,” i. Wekawēn kay ġebum cuy eyju — io'e cebe ip-Deus ekawēn tojot-jot'ukat o'e.

— Hm hm — io'e ip.

⁸ Dao ma o'ju ip witabikūy bewi. O'ju Jesus eju imutaybitbit topibiyū kay. Iparara o'e ip. Imēnpit icocok cīcā o'e ip. O'jedau ip, imukūyjo am. ⁹ Daudaum pima ip, Jesus aoyū o'tobede.

— Wuykabia — io'e.

O'jēġ'aecōġcōġ ip Jesus wap. O'suibu ip, ibuyxin ikuk am.

¹⁰ — Eypararam ġu juy — io'e cebe ip. — Okit-pitpiyū be epeyekawēn cuy: “Epeju juy Galiléia eipi kay, ijo am,” i — io'e aoyū be.

¹¹ Cucum o'e ip imuwēn ām cebe ip.

Sorarayū dak o'ju ip Judeuyū epaiyū kukukayū kay. Pūġ o'ju- -iwiwim topibiyū'in. O'ju ip Jerusalém ka be. Soat o'ġuwēn ip paiyū kukukayū be o'je-bapukiap.

¹² Ġebuġe paiyū kukukayū o'je'awero ip- -Judeuyū kukukayū dak. Jesus awēġ o'yawēġmuwēn ip.

Ġebuġe dinheiro o'ġūm ip sorarayū be- -Jesus'ūm topap wiwim topibiyū be.

¹³ — I juy epe'e Jesus awēġ tobuxik pinayū be: “Jesus'ūm o'tujowat ip ixima be ma. Jesus eju jekukuk topibiyū o'tujowat ip. Ocexet pima, o'tujowat ip,” i juy epe'e — io'e ip sorarayū be.

¹⁴ — Ipi kukukat iboap co buje, ocejekawēn ce-weju. “Ocecokcok cekapikap kay- -sorarayū ekapikap kay,” ioce'e cebe. Imēn itakoma ġu je'e eykay — io'e ip- -paiyū kukukayū o'e sorarayū be.

¹⁵ — Ha'a — io'e ip. — Ocejū dak imēn Jesus awēġ oceyawēġmuwēn. Dinheiro o'jat ip paiyū kukukayū xewi, o'ġūm puye. Apēn paiyū kukukayū o'e iap taġ o'e ip. Imēnpit iboap ekawēn napaat acā o'e.

Imēneju ibo awēg te'e ma o'yawēgmuypōgṗōg soat Judeuyū daḡ. Ġasū dak o'yawēgmuypōgṗōg ip-ibo awēg.

¹⁶ Galiléia eipi be onze beayū o'ju ip. Jesus o'e iap taḡ o'ju ip. Oajēm ip co'a kay, Jesus dobede am.

¹⁷ Iboce Jesus o'jojojo ip. O'jēg'aecōḡcōḡ ip o'e, ibuyxin ikuk am. Pūḡpūḡ pit o'jetabiebarēm.

¹⁸ Oajēm Jesus ixeyū tēg ma.

— Wa'ōbi soat cucum ip- -soat ipi juacayū, soat kabi beayū dak — io'e Jesus cebe ip- -jejoayū be.

¹⁹ — Epeju juy soat kay- -soat ipi juayū kay — io'e cebe ip. — Imutaybit am ip, epeju juy. Wawēg cuy epeyēkūyjo imutaybitbin ip. Imubatisasan ip epeju juy wa'ōbi, webay a'ōbi dak, Ibiōḡbuk xipacat a'ōbi dak- -Deus biōḡbuk a'ōbi — io'e.

²⁰ — Soat cuk adi oce eywebe iap cuy epe'e soat pe- -ipi juacayū be — io'e Jesus onze beayū be. — Okay soat ip imukūyjobit am, wawēg epe'e — i dak o'e cebe ip. — Ipi opop pima, oju ḡu eywebewi. Soat em oḡuy eyxe. Eyxe oḡuy iap kay ḡebum cuy epesop — io'e Jesus.

— Xipat — io'e ip Jesus pe. — Ēn ma ejekuku oceweju soat em — io'e ip.

Ibūrū ma.

JESUS CRISTO MUWĒĠAP EKAWĒNTUP- -MARCOS EMUDUPMUBARARAKTUP

1 Ijoptup pe ibararak opop Jesus Cristo ekawĕn- -kawĕn idipat ekawĕn- -Deus ipot ekawĕn. ² Ixe o'jebapuk ijodi apĕn Deus ekawĕn muwĕnuwĕn'ukat emudupmubararaktup ekawĕn taĝ- -Isaias emudupmubararaktup ekawĕn taĝ.

Deus o'e: wemumuju oĝuju ewap e mubapuk am ewebeam, i. ³ Ixe wemumuju jewāwāwām uk'a'ūmat pe: E juy epesuemudim wuykukukat kap am, i'e'em. Epesuemucūĝcūĝ cuy ixem, i'e'em.

⁴ Ibo ekawĕn taĝ João Batista o'jebapuk uk'a'ūmat pe. O'jebapuk ijodiat mubatisasan, Deus ekawĕn muwĕnuwĕn tak.

— Ikĕrĕat mujurūĝrūĝap cuy epeyepere — io'e ijodiat pe. — Epeyewemubatisaan cuy “Ikĕrĕat o'ĝujurūĝ ĝu ĝasū bit” i'e am soat pe. Imĕn ey'e buje, Deus ikĕrĕat ju'uk eywebewi — io'e.

⁵ Ade ma o'ju João kay cekawĕn co am. Judéia eipi beayū o'ju, Jerusalém ka beayū dak.

— Ikĕrĕat cuk adi oĝujurūĝrūĝ — io'e ip. — Ğasū bit cuy oĝujurūĝ ĝu — io'e ip.

Imĕnpuye ip o'ĝubatisaan Jordāodi be. ⁶ Ixe João doti camelodap muĝĕĝĕ. Yukpumūnpu kuĝ oeku ixee muĝĕĝĕ. Arobidadek puximat o'o'uk osunuy. Eit kogūnpi daĝat o'o'uk tak osunuy João. ⁷ Imĕn o'e ijodiat pe:

— Wara'at omuyku onomukadi. Ixe ĝu itaybitbit cīcā obodi ma. Owebe bit suiuk'uk pa'ore ka'ūma ma ōn puye — io'e. ⁸ — Idibi be ōn eymubatisasan. Ixe bit Ibiōĝbuk xipacat ĝuōm eywebe eykukan — io'e.

⁹ Jesus oajĕm João kay. Nazaré ka bewi o'jĕm- -Galiléia eipi beatka bewi, ika'icat ka bewi. Oajĕm João kay jemubatisan am. João Jesus o'ĝubatisan

Jordãodi be. ¹⁰ Idibi daḡwi jeu isum kabi ikoce o'jojajo. Deus biōḡbuk o'jojajo. Pukaso buxim o'kop jekay.

¹¹ Deus o'jekawēn kabi kadiwi.

— Okpot ēn-oxe ikukpin cīcāat! — io'e. — Ocokcok cīcā ekay — io'e Jesus pe.

¹² Ḡebuḡe Deus biōḡbuk Jesus o'ḡuju uk'a'ūmat kay. ¹³ Quarenta kabia bun oeku iboce. Satanás te'e ma ikērēat o'ḡujurūḡat cebe. Puca dak oeku iboce-ika'uayū. Deus ekawēn tojtot'ukayū bit oajēm Jesus buywan. Ibuywatwan ip osodop.

¹⁴ Daomūnmūnap'a be ip João muōm puḡe, Jesus Deus ekawēn muwēnuwēn o'e. Galiléia eipi daḡ oeku imuwēnuwēn. Kawēn idipat muwēnuwēn oeku soat kaka daḡ.

¹⁵ — Ḡaxīn ma Deus soat ijodiacat kukukan je'e — io'e. — Ixe be soat kukukat iap ehora oajēm. Imēnpuye ikērēat mujurūḡrūḡap cuy epeyepere! Eyetabun cuy kawēn idipat kay- wuydaxijojoap ekawēn kay — io'e.

¹⁶ Ḡebuḡe Jesus xepxep axima bubu'ukayū o'jojajo. Galiléiadi wābu daḡ cūḡcūḡ pima ip o'jojajo idi wābu daḡ. Simão o'jojajo, André dak. André Simão kitpit osunuy. Axima bubum ip osodop ūrūm. ¹⁷ Jesus o'e cebe ip:

— Epesot cuy oweju — io'e. — Axima bubu'ukayūm cuk adi epesop. Ḡasū bit kawēn idipat epeḡuwēnuwēn ijodiat pe imutabun ip okay — io'e.

¹⁸ Imēnpuye ip dao ma jēḡrū o'suiwat axima bubuap. Jesus eju ip o'ju.

¹⁹ Bosusu o'ju ḡebuḡe Jesus. Xepxep o'jojajo- Tiago, João dak. João Tiago kitpit osunuy. Zebedeu ipotpoyū osodop ip. Jekobe be ip osodop axima bubuap muwaketken axima bu ojuy. ²⁰ Ijo isum ma Jesus o'tomuwā ip.

— Epesop cuy oweju — io'e.

Jebay o'suiwat ip. Ceweju ip kapik'ukayū dak o'suiwat ip jebay xe kobe be. Jesus eju ip o'ju soat em jeku am ceweju.

²¹ Jesus o'ju Cafarnaum ka kay ebadipipayū eju- -jeweju etaybitbinayū eju.

Jebodoydoyap kabia oōm ip Judeuyū e'a-wereroap'a be- -Deus eju kawēnwēnap'a be. Igo'a beayū o'gūtaybinbin.

²² — Idim cīcā teku wuymutaybitbin! — io'e ip. — Moisés ekawēn wuymutaybitbin'ukayū buxim ġu ite wuymutaybitbin. Wuyeajoyū'ūm'ūm a'ōbi wuy-mutaybitbin ixeyū ma. Jesus pit ja'ōbi ma wuy-mutaybitbin — io'e ip jewewebe.

²³ Ġebuje aġokatkat oōm iġo'a be ibiōġbuk kērēat kukat. Ibiōġbuk kērēat cebe osunuy. O'jewāwā ya'ō-beren Jesus kay.

²⁴ — Jesus, Nazaré ka bewiat, apēn ēn em ocewebe? — io'e. — Ocemuy'ūm tu ejot? — io'e. — Wetaybit abu ēn iam. Ēn Deus emumudot. Ikērēat kuġ ġu ēn- -soat taġ eisu — io'e.

²⁵ Imēnpit Jesus ibiōġbuk kērēat o'ġukorēm.

— Ecemūġ cuy! — io'e. — Ejēm cuy cebewi! — Jesus o'e.

²⁶ Ġebuje ibiōġbuk kērēat aġokatkat o'ġukutukutu jījā. O'jewāwāwā ya'ōberen. O'jēm cebewi. ²⁷ Imēn-puye o'jojjo'iaiyū o'jewetakaka jījā ip.

— Ajo sute? — io'e ip. — Ya'ōbuyxiat teku! — io'e ip. Ibiōġbuk kērēat kūyjobit ixē a'ō kay. Ixē itaybit ibiōġbuk kērēat mujēm ām wuyjuyū jebit pe-wi! — io'e ip. — Kawēn iisuan tu ite wuymutaybit-bin? — io'e ip jewewebe.

²⁸ Imēneju soat Galiléia eipi daġayū Jesus awēġ o'yawēġcoco ip.

²⁹ Ġebuje Jesus o'jēm iġo'a bewi. O'ju Simão duk'a kay, André duk'a kay. Pūġ'a uk'a iwat osodop ip- -Simão, André dak. O'ju Tiago eju, João eju dak.

³⁰ Simão daxijo ipa'i jījā opop.

— Simão daxijo ipa'i jījā — io'e ip Jesus pe.

³¹ Jesus o'ju cekay. O'subaixik. O'ġu'aġobucēġ. Ipa'iat oi'ūm ġebuje bit. Xipat o'e. Ipa'i topibit ixan o'ġūm cebe ip- -Jesusyū be.

³² Katpuje ade iwātaxipiayū o'tujowat Jesus kay ibo ka watwat. Axik kukukayū dak o'tujowat cekay. ³³ Soat aḡoka watwat o'je'awero ip uk'a esūntabi be.

³⁴ Ġebuje Jesus o'ḡu'ada'ada ip iwātaxipiayū. Kiiih. Ade osodop ip iwātaxipiayū. Soat iwarururu osodop iwātaxipi cexe ip. Ade axik o'ḡujēmjēm cebewi ip. Itaybit axik osodop ip Jesus Deus emunaē iam. Jesus pit ixeyū be o'ḡuwēnat ḡu.

— Abu ōn iam cuy epeḡukūyjo ḡu ip — io'e cebe ip.

³⁵ Ġebuje Jesus o'kop kuyḡu. Kaxi jēm awap o'kop. O'jēm uk'a bewi. O'ju uk'a'ūmat kay. Iboce o'jekawēn Deus eju.

³⁶ Ġebuje Simāo o'jēm uk'a bewi. O'ju Jesus kudadam, cewejuayū dak. O'tobuxik ip.

³⁷ — Soat ijoceayū ekudadam! — io'e ip cebe.

³⁸ — Ijoce ḡu oḡuy — io'e Jesus pit. — Ġa'a juy wara'at ka watwat kay — io'e. — Kawēn idipat muwēn pin ōn wara'at ka watwat pe. Ixevū be dak ojet imuwēn ām — Jesus o'e cebe ip.

³⁹ Ibocewi soat kaka daḡ oekuku ip Jesusyū--Galiléia eipi daḡ. Deus ekawēn muwēnuwēn oekuku ip Judeuyū e'aweroroap'a be--Deus eju kawēnwēnap'a be. Axik mujēmujēm oekuku ip ibo eipi watwat pawi.

⁴⁰ Aḡokatkat oajēm Jesus kay ierepat. O'jēḡ'ae-cōḡcōḡ cewap Jesus ya'ōbuyxiat puye.

— Omu'ada pin pima, iba'ore ḡu ewebe — io'e Jesus pe.

⁴¹ Ġebuje Jesus itabotaidabotbot o'e ierepat kay. O'jebaepacūḡ cekay. O'ḡucay.

— Emu'ada pin ōn — io'e. — Kuy ōn emu'ada — io'e.

⁴² Ierep tūibit o'je'ada ḡebuje bit. Xipat o'e.

⁴³ — Eduk'a kay juy ecepit — io'e Jesus ya'ōpu-

ruḡ cebe. ⁴⁴ — E'adaap cuy eḡuwēn ḡu warara'acat pe — io'e. — Paī kay juy eju — io'e. — Ecewemu-bapuk cebe — io'e. — Xepxem cuy pukaso eḡūm paī be Moisés ekawēn taḡ. Imēn ece'e soat ijoceayū itay-bit am Jesus ierepat o'ḡu'ada iam. En pit eḡuwēn ḡu e'adaap. Paī ma juy ḡuwēn e'adaap — io'e ierep topibit pe.

⁴⁵ Imēnpit ierep tūibit kūyjobit'ūm osunuy. Jesus a'ō kay ḡu osunuy. O'jēm Jesus xewi. Je'adaap o'ḡuwēnuwēn soat pe jebureyū be. Imēnpuye soat kaka daḡ o'yawēḡcu ce'adaap awēḡ. Imēnpuye Jesus pe ibapuḡ ceku ba'ore o'e ikaboḡatka be. Uk'a'ūmat taḡ acā oeku. Ade ma'ḡu o'ju ip cekay soat kaka daḡwi je'adaap ojuy.

2 Xepxep kabia kap puje, Jesus o'jepit Cafarnaum ka kay.

— Jesus jeduk'a be omuy — io'e ibo ka beayū jewewebe.

² Imēnpuye adeayū o'je'awero ip Jesus duk'a etakobe. Ka'ūmḡu topap o'e warara'acat pe iōm ām uk'a be. Ade osodop ip uk'a be, uk'a esūḡtabi xe dak. Jesus Deus ekawēn ixeyū mukūyjojom o'e.

³ Ḡebuje ebadipdip aḡokatkayū oajēm Jesus kay. Jebure dujuajēm ojuy ip-ijebit e'ūat. ⁴ Imēnpit tujuajēm pa'ore o'e ip Jesus kay ade jījā Jesus akokoreren ip puye. Imēnpuye ebadipdipayū o'jeu uk'a abi jeje. Uk'a ip o'yabimutok Jesus ase. Ijebit e'ūat o'ḡukop ip ixexecap pe. O'ḡukop ip Jesus wap.

⁵ — Teyūku itabut okay — io'e Jesus jewebe ma.

Ḡebuje Jesus o'jekawēn ijebit e'ūat pe.

— Tapu, ikērēat kuy oju'uk ewebewi — io'e.

⁶ Pūḡpūḡ Moisés ekawēn imutaybitbin'ukayū kaxikxik'i osodop ip iḡo'a be. Jewaḡuydadam osodop ip.

⁷ — Teku napa ma e'em! — io'e ip jewewebe. — “Deus co'i ōn,” i napa ma teku e'em — io'e ip. — Abu-be ikērēat uk put wuywebewi -Deus pe acā — io'e ip jewewebe.

⁸ Jesus itaybit o'e apên jewağuydadam ip o'e iam.

— Apênpuye dak eyju imên jewağuydadam? — io'e. ⁹ — “Ikêrêat oju'uk ewebewi,” i kuy oce cebe — io'e. — Imênpit eyetabut ġu ikêrêat'uk put owebe iap kay — io'e. — “E'ây,” i oce ibima, “Ecexiğxiğ,” i dak, “Exexecap cuy etujuxe eduk'a be,” i dak, eyetabut ġu kuka epe'e okay — io'e. ¹⁰ — Soat wağo òn — io'e. — Wa'òbi teku oğ'u'ada. Imu'adaap co buje, “Ja'òbi ma teku o'ğ'u'ada,” i epe'e — io'e cebe ip.

¹¹ Ğejuje Jesus o'jekawên ijebit e'uat pe.

— E'ây — io'e cebe. — Exexecap cuy ejat — io'e. — Eju juy eduk'a be — io'e Jesus cebe.

¹² Ğejuje ijebit e'ũ topibit o'ây. Jexexecap o'jat. O'jêm soat etabun. Imêneju soat itabêğbêğ o'e ip ijojom.

— Ajojoho ġu buk imêğat — io'e ip jewewebe. — Ka'ũmğ u xipacat Deus co'iat — io'e ip.

¹³ Jesus waram o'jêm. O'ju iodi kay- -Galiléiadi kay. Adeayũ o'ju ikudadam. O'tobuxik ip. Ixeyũ mutaybitbin o'e.

¹⁴ Kapkam pima Jesus Levi o'jojoho. Levi Alfeu ipot osunuy. Iecuğap edinheiro bubu'ukat osunuy. Xik'i osunuy dinheiro bubuap'a be.

— Ejot. Oweju ejeku — Jesus o'e cebe.

Levi o'jêm dinheiro bubuap'a bewi. O'ju Jesus eju.

¹⁵ Ğejuje Jesus o'ju Levi duk'a kay. O'jekôn ceweju. Ade iecuğap edinheiro bubu'ukayũ awerom osodop ip iğo'a be. Jekônkôn ip o'e Jesus eju, ceweju etaybitbinayũ eju dak, ade ikêrêat muğêğe'ukayũ eju dak. Ade jîjâ osodop ip Jesus eju jekuku'ukayũ.

¹⁶ Pũğpũğ Fariseuyũ'in ixeyũ o'jojoho- -Moisés ekawên imutaybitbin'ukayũ. Ikêrêan e'e'ukayũ eju Jesus jekônkôn o'e iap o'jojoho ip- -iecuğap edinheiro bubu'ukayũ eju iap tak.

— Apênpuye ekariwa jekônkôn ikêrêat muğêğe'ukayũ eju, iecuğap edinheiro bubu'ukayũ eju dak? — io'e ip Jesus eju etaybitbinayũ be. — Imên xipat ġu — io'e ip.

¹⁷ Iboap co buje, Jesus o'jekawēn ceweju ip.

— Iwātaxipi'ūmayū bit wuyanūgtata'ukat kay je'ju ġu- iwātaxipipiyū acā — io'e. — Imēnpuxim ōn tak jewexe xipacayū nomuwā ām ġu ojojot-xipat'ūmayū nomuwā ām acā. Ikērēat uk am ixeyū bewi ojojot — io'e.

¹⁸ Koap pima João Batista eju etaybitbinayū jekpiwan ma jewemureren ip osodop Deus eju kawēn ām, Fariseuyū dak. Imēnpuye ade o'ju Jesus kay.

— João eju etaybitbinayū jekpiwan ma jewemureren Deus eju kawēn ām, Fariseuyū eju etaybitbinayū dak — io'e ip. — Eweju etaybitbinayū bit jekōnkōn. Apēnpuye dak? — io'e ip cebe.

¹⁹ Ġebuje Jesus o'jekawēn ceweju ip.

— Oweju etaybitbinayū jekōnkōn, ōn ceweju ip puye — io'e. — Tomuwā'ibiyū cucum pima jewebu-mūnap epeta kay, jekōnkōn cīcā ip. Iwadip cexe ip pima, jekōnkōn cīcā ip — io'e. ²⁰ — Ġuyjom pit iwadip ju'uk ip ceparakpewi — io'e. — I'uk puje, jekōn ġu ip — io'e. — Imēnpuxim, ōn ixeyū eju'ūm pima, oweju etaybitbinayū jekpiwan ma jewemuren ip Deus eju jekawēn ām — io'e. ²¹ — Paġo iisuat ajoinūm ġu toti iorokat eju-iwekwekat eju imuwaket am — io'e Jesus. — Paġo iisuat inūm puje paġo iorokat eju, biġ ma kuka o'jewekwek. Iwekat biġ ma kuka o'e yoboġ — Jesus o'e ma'ġuto. ²² — Uva'abidi tiisuati atimuōm ġu ixee muġēġē'a be-timūn'a be-yaokokat'a be — io'e. — Yaokokat'a be tiisuati muōm puje, kuka o'jeapaw. Uva'abidi kuka o'jediepuj. Uva'abidi mūn'a dak kuka o'jeawenōmnōm. Imēnpuye tiisuati atimuōm timūn'a be yaisuat'a be — io'e Jesus.

Iboam e'em pima, "Wekawēn paġo iisuat puxim, uva'abidi tiisuati buxim tak" i'e ojuy osunuy.

²³ Ġebuje Jesus kapkam o'e trigodip taġ Sábado kabia be-jebodoydoyap kabia be. Kapkam o'e jewuju etaybitbinayū eju. Kapkam pima ceweju etaybitbinayū o'tadot'uk, jere buye. ²⁴ Imēnpuye Fariseuyū o'jekawēn Jesus eju.

— Ak'i juy ece! — io'e ip. — Eweju etaybitbin-

ayū kapikpiḡ Sábado kabia be! Trigo dadot uk'ug ip! — io'e ip. — Cūḡ ḡu e'em ip! — io'e ip. — Imēn e'em Moisés' ekawēntup: jebodoydoyap kabia be juy epeyekapik ḡu, i — io'e ip.

²⁵ Ḡebuje Jesus o'jede Fariseuyū be.

— Epetupcoco ḡu du apēn Davi o'e'e iaptup- -Deus ekawēntup? — io'e cebe ip. — Ire bima, Davi oōm Deus eju kawēnwēnap'a be jebureyū eju. ²⁶ Ixe kabia be Abiatar paīyū kukukat osunuy. Pāo'a o'ya'o Daviyū- iḡo beat'a- -Deus etabixe o'yamōḡ ip iat'a. Moisés ekawēntup e'em: Deus etabixeat'a ya'opi, i — io'e. — Paīyū be acā ya'opi ḡu, i'e'em Deus ekawēntup — io'e. — Imēnpit Davi o'ya'o, paī ḡu ma'ḡu. O'yaūm jebureyū be dak — io'e. — Deus pit "Ekērē oxē," io'e ḡu cebe ya'o buje. Apēnpuye dak eyju e'em owebe "Eweju etaybitbin'ukayū cūḡ ḡu e'em," i? — io'e Jesus. ²⁷ — Te'e ḡu Deus o'e: Pūḡ kabia be juy epeyekapik ḡu, i. Imēn ixe o'e ijodiat ebodoy am — io'e. ²⁸ — Soat waḡo ōn. "Epeyekapik cuy," i ōn e'em pima Sábado kabia be dak, cedaḡ kuka o'e Deus xe — Jesus o'e.

3 Sábado kabia be Jesus oōm ma'ḡuto Judeuyū e'aweroroap'a be- -Deus eju kawēnwēnap'a be. Iḡo'a be aḡokatkat osunuy. Pūḡbūnū'a o'subūnū'anūy ibūnū'akērē. ² Fariseuyū o'jeak cīcā Jesus kay Jesus ibūnū'a kērēat ḡu'ada paxi jebodoydoyap kabia be iap com. Jesus muymuy ojuy ip. "Moisés ekawēn taḡ ḡu ēn jekukum" i'e ojuy ip Jesus pe. "Jesus kapikpiḡ jebodoydoyap kabia be- -Sábado kabia be" i'e ojuy ip Jesus muymuy am.

³ — Ejot cuy ijoce — Jesus o'e ibūnū'a kērēat pe.

⁴ Jesus o'jekawēn Fariseuyū eju ḡebuje bit.

— Wuyeaypapayū'ūm'ūm xe cedaḡ tu osunuy wuywebe xipacat muḡē ām jebodoydoyap kabia be? — io'e cebe ip. — Cūḡ ḡu xe'e wuywebe ikērēat muḡē ām? Cedaḡ tu warara'acat aoka am? Cedaḡ ḡu

xe'e warara'acat daxijo am Sábado kabia be? — io'e.

Mûğ. O'jemûğ ip. Cede ba'ore ip o'e.

⁵ Gebuje Jesus o'jeak cekay ip. Itakoma o'e cekay ip, Fariseuyū itabotaidabotbot'ūm ibūnū'a kērēat kay buye. Iğuycūğ tak o'e ibu'u ip jemutaybin jekawēn puye.

— Paya'i ece ebu! — io'e ibūnū'a kērēat pe.

Gebuje o'jewebumupaya. Ibūnū'adip o'e. ⁶ Imēnpuye Fariseuyū o'jēm yabewi. O'jewede ip Jesus xewi. O'je'awero ip Herodes ebekitkit eju- -Judeuyū kukat ebekitkit eju. O'jewawē ip Jesus aoka am kapikiğ Sábado kabia be buye.

Jesus o'ju iodī wābu be jeweju etaybitbin'ukayū eju- -Galilēiadi wābu be.

⁷ Gebuje ade o'ju ip Jesus kay. Soat ka dağwi o'ju ip: Galilēia eipi dağwi, Judēia eipi dağwi dak, ⁸ Jerusalēm ka bewi dak, Idumēia eipi dağwi dak, Jordāodi wīnābu wi dak, Tiro ka tēğatka bewi dak, Sidom ka tēğatka bewi dak. Jesus idipat o'ğugē iam o'jekūyjo ip. Imēnpuye ade jījā ma o'ju ip cekay. Kiiih. ⁹ Jesus o'jekawēn jeweju etaybitbin'ukayū eju.

— Kobe epeğudim owebeam adeayū be omukuğap puxim — io'e cebe ip.

¹⁰ Kuy bima Jesus ade ma o'ğu'ada'ada. Imēnpuye soat iwātaxipiayū ajēm ojuy ip osodop imucay ojuy.

— Omu'ada paxi ixē? — io'e ip jewebe ma.

¹¹ Jesus dobuxik puje ip ibiōğbuk kērēayū kukayū o'jēğ'aecōğcōğ cewap, "Teku ya'ōbuyxiat," i'e'em jewebe ma buye. O'jewāwā ip ya'ōberen:

— Ēn Deus ipot — io'e ip.

¹² — Epeğuwēn ġu juy warara'acat pe: "Teku Deus ipot" i — Jesus pit o'e ya'ōpuruğ cebe ip.

¹³ Gebuje Jesus o'jeu co'a dağ. Jemukaypinayū o'taē jeweju jeku am. Oajēm ip cexe. ¹⁴ Doze beayū o'taē.

— Soat em cuy epeku oweju — io'e cebe ip. — Deus wuydaxijom iap ekawēn cuy epeğuwēnuwēn

soat ka daḡ — io'e cebe ip. ¹⁶ — Wa'ōbacaap oḡūm eywebe ibiōḡbuk kērēat mujēm ām ikukukayū bewi — io'e.

¹⁶ Ibūrū ma ibutet osodop ip- -taē'ibiyū butet: Simão, i, Tiago i, João i ¹⁷⁻¹⁹ André i, Filipe i, Bartolomeu i, Mateus i, Tomé i, wara'at Tiago i, Tadeu i, Simão i, Judas Iscariotes i. Ibūrū ma ibutet ip. Jesus wara'at o'subutetmōḡ Simão buten. Wara'at ibutet Pedro i osunuy. João Tiago kitpit osunuy. Jesus wara'at o'subutetmōḡ João buten- -Tiago buten tak. Boanerges i wara'at ibutet ip osunuy. Boanerges ibaca ip xiririkiap puxim iape. Zebedeu ipotpoyū ip osodop xepxep. Wara'at Tiago Alfeu ipot osunuy. Simão jeipi kay jījāat osunuy. Judas Iscariotes ḡuyjom Jesus o'ḡūm cekay itakomaayū be yaoka am. Ibūrū ma osodop ip doze beayū- -Jesus emumujuyū. ²⁰ Ibocewi Jesus o'ju jebure duk'a be.

Ade ma'ḡuto oajēm ip Jesus kay. Cekōn pa'ore o'e cebuxim ip, ceweju etaybitbinayū dak. ²¹ Ibadipyū iboam jekūyjo buje, o'ju ip Jesus dujupit ojuy jeduk'a be. Tūybe Jesus yakpidapin iān o'e ip jekōn-kōn'ūm puye.

²² Moisés ekawēn imutaybitbin'ukayū oajēm cekay- -Jerusalém ka bewiayū. Jesus ip o'jomuymuy adeayū be.

— Jesus jekukum ibiōḡbuk kērēayū kukukat a'ōbi- -Belzebu a'ōbi- -Satanás a'ōbi — i napa ma o'e ip Jesus muymuy. — Ixe ja'ōbacaap ūmūm Jesus pe ibiōḡbuk kērēat mujēm ām adeayū bewi — io'e ip napa ma.

²³ Imēnpuye Jesus jemuymuy ojuyayū o'tomuwā jewekay- -Moisés ekawēn imutaybitbin'ukayū. O'jekawēn ceweju ip. “Napa ma eyju e'em” i'e ojuy. Wuy-mutaybitbinap ekawēn o'ḡuwēn cebe ip.

— Satanás a'ōbi ḡu ōn imujēmujēm — io'e. — Satanás owebe ibiōḡbuk kērēat mujēmujēmān pima, jebekitkit kuka juk ixē o'ḡujēm! Imēnpit Satanás a'ōbi ḡu ōn imujēmujēm — io'e. ²⁴ — Pūḡ ka kukat jebekitkit mujēm puje, abu kuka o'e ya'ō kay? Ka'ū-ma ma! — io'e. ²⁵ — Pūḡti watwat kukat jebekitkit

mujēm puje, abu kuka o'e ya'ō kay? Ka'ūma ma! — io'e. ²⁶ — Imēnpuxim Satanás jebekitkit mujēm puje, abu kuka o'e ya'ō kay? Ka'ūma ma! Imēneju Satanás ja'ōbacaap ūmūm ġu owebe ibiōġbuk kērēat mujēm ām- -jebekitkit mujēm ām — io'e Jesus. ²⁷ — Wuyōm pa'ore wuykay isapka'oreat tuk'a be ibubut pu am. Imukiriġ acā koam — io'e. — Imukirik puje bit, wuyōm put soat pu am- -uk'a beat pu am — io'e. — Imēnpuxim Satanás a'ōbacaap mu'ūm'ūm pima, iba'ore kuka o'e wuywebe Satanás ebekitkit a'ōbacaap mu'ūm ām — io'e Jesus.

²⁸ — Icēmān ōn e'em eywebe — io'e Jesus. — Wuywebe ikērēat muġē buje, Deus iboap ju'uk wuywebewi- -ikērēat ju'uk — io'e. — Wuywebe Deus muymuy buje dak, Deus iboap ju'uk wuywebewi- -ikērēat ju'uk — io'e. ²⁹ — Wuywebe Deus biōġbuk muymuy buje bit, Deus iboap ju'uk ġu wuywebewi. Iboap i'uk pa'ore Deus pe. Iboap kuġ acesop soat em- -ikērēat kuġ, ibiōġbuk muymuyap kuġ — Jesus o'e.

³⁰ — Ēn ibiōġbuk kērēat a'ōbi jekukum — i juk o'e ip Jesus pe. Imēnpuye Jesus imēn o'ya'ōbu ip imukūyjojom ip.

³¹ Ixi o'ju Jesus kay, ikitpitpit tak. Akiju osodop ip.

— Jesus etomuwā — io'e ip kakijuayū be. — Ceweju ocekawēn pin — io'e ip.

Kaxikxik'i osodop ip Jesus akokoreren akijuacat.

³² — Exi akiju omuy, ekitpitpit tak — io'e ip Jesus pe. — Eweju cekawēn pin ip — io'e ip cebe.

³³ — Icēmān iġo oxiat. Boyūku okitpitpicat — io'e Jesus.

³⁴ Jesus o'jeak jexeayū kay. O'jekawēn ceweju ip.

— Warara'acayū bit oxi jo'i oxe, okitpitpit co'i dak — io'e. ³⁵ — Deus bikuyap taġ jekuku'ukayū okitpitpit co'i oxe, oixit co'i dak ip, oxi jo'i dak ip — io'e.

4 Jesus waram adeayū o'ġutaybin iodi wābu be. Ade jījā o'je'awero ip cexe. Imēnpuye Jesus oōm kobe be. Oabik kobe bitakobu jeje iwābu tēg. Adeayū bit kapurūg pe osodop ip ya'ījojom. ² Wuymutaybitbinap ekawēn o'ġuwēn Jesus. Ade o'ġutaybin ip.

³ — Eya'ōpicūgūg cuy epesop wa'ō kay — io'e cebe ip. — Aġokatkat o'ju jekat pe jekadai damuduudu am. 'Tamududum pima xepxepa o'ta'at ipi ju e bitako daġ — io'e.

— Wasūyū oajēm. O'ta'o'o ip taduduata-cekadaida-e bitako daġata — io'e Jesus.

⁵ — Ibocewi wara'ata o'ta'at karatūg'a paraktaġ. Ade ġu ka'wi o'e iboce. Ierūn ma o'e ka'wi. Dao ma o'tānōkap ka'wi ierūn puye — io'e. ⁶ — Imēnpit kaxiepi bima kaxie kadai o'ġukaraw. O'ġuy'ū. Oe'ū tābujū ba'ore buye — io'e.

⁷ — Wara'ata o'ta'at widaoho parakpe. Yaypan pima widaoho kadai o'ġu'ūm. Oe'ū. O'jew'a'ada ġu — io'e.

⁸ — Wara'ata bit o'ta'at katō be. O'tānōkap. Xipan o'yaypan. Ta'ade o'e. Pūgṗūg kadai be ta'adesū o'e-30 be o'e ta-katō peata. Wara'at kadai be ta'ade o'e-60 be o'e ta. Wara'at kadai be ta'ade jījā o'e-100 be o'e ta — io'e.

Jesus imēn wuymutaybitbinap ekawēn o'ġuwēn.

⁹ — Wekawēn eyetaybit pin pima, eya'ōpicūgūg cuy epesop wa'ō kay — io'e.

¹⁰ Adeayū epit puje, pūgṗūg o'ya'ījojo'iaiyū oajēm Jesus kay. Doze beayū eju oajēm ip.

— Iba'arem ekawēn ocexe — io'e ip cebe. — Apēn ocemutaybin ojuy eġuy kadaida mududuap ekawēn muwēnuwēn? — io'e ip.

¹¹ — Kawēn ibapukan ōn eymutaybitbin — io'e. — Ibaṗūg ma apēn Deus soat ipi daġayū kukukan je'e iap muwēnuwēn ōn eywebe — io'e. — Kuy bima iboam o'ġutaybin ġu. Warara'acayū mutaybitbin pit ōn iba'arēmān, wa'ō kaykūy ip puye — io'e. ¹² — Iba'arēmān ōn ixeyū mutaybitbin. Ya'ījojom ip. Imēnpit itaybit ġu ip. Jekūyjojom ip. Imēnpit weka-

wên pa'arêm cexe ip. Itaybit pima bit kuka juk iğuy-cūğ o'e ip ikērēat kuğ puye. Ikērēat tak kuka juk o'-jepere ip. Ikērēat epere buje ip kuka juk Deus ikērēat o'ju'uk ixeyū bewi — io'e. ¹³ — Kadai damuduuduap ekawên iba'arêm eyxe. Apēntak eyetaybit epe'e owe-be wara'at muwên puje wuymutaybitbinap ekawên muwên puje? Wara'at muwên puje dak, wekawên pa'arêm je'e eyxe — io'e.

¹⁴ — Apēğape ibo wekawên iam ōn jeymutaybin. Kadaida muduuduap Deus ekawên muwēnuwēnap puxim — io'e. ¹⁵ — Deus ekawên coco'ukayū kadaida buxim — io'e. — Pūğpūğ cekawên coco'ukayū e bitako dağata buxim — io'e. — Deus ekawên co isu, Satanás ajēmjēm cekay ip — io'e. — Yağuy-ba'ūm'ūm ip cekawên kay- -Deus ekawên kay — io'e.

¹⁶ — Warara'acayū karatūğ'a paraktağata buxim- -Deus ekawên coco'ukayū — io'e Jesus. — Koap icokcok e'em ip Deus ekawên co am. ¹⁷ Kadai tábube'ūmat puxim Deus ekawên badi ġu ōmôm cebe ip. Ibureyū e'em: "Teyūku Deus ekawên kay," i, iwaywayway am. Ibureyū itakoma cekay ip. Ipiat supi'ajoat cebe ip. Imēneju ibu'u ip jetabut am Deus kay — io'e.

¹⁸ — Warara'acayū widaoho parak tağata buxim Deus ekawên coco'ukayū. Deus ekawên cocom ip — io'e. ¹⁹ — Imēnpit soat em ġebum ip jemukaypinput kay. Tūybe ocokcok cīcā oce dinheiro kuğ pima iān e'em ip. Itabikuku ip soat kay jebubun. Deus ekawên kay bit ip yopīt ma itabut, soat kay itabikuku jebubun puye. Deus ekawên muwēnuwēn ġu ip warara'acat pe jebureyū be — io'e.

²⁰ — Warara'acayū bit katō dağata buxim Deus ekawên coco'ukayū — io'e. — Cekawên co buje, cekawên kay jījā ip. Idipat mujurūğrūğ ip soat peam. Kadai'ip puxim ixeyū- -ya'a'eat'ip puxim. 30 be o'e takuğ'iat'ip puxim ip, 60 be o'e takuğ'iat'ip puxim tak, 100 be o'e takuğ'iat'ip puxim tak — io'e.

²¹ Jesus wara'at kawēn o'ḡuwēn jewēju etaybitbinayū be -doze beayū be dak -wuymutaybitbinap ekawēn.

— Lamparina musop puje, ico diotpe ḡu ajomuy — io'e. — Wuyxexecap tiotpe ḡu dak ajomuy. Um ma ajomuy kabia i'e am wuykay- -soat ijo but am — io'e. ²² — Soat wuyxe iba'arēmat ibapuk je'e. Gasū ade ma wuyetaybit'ūmat. Guyjom pit wuyetaybin ace'e soan ma — io'e. ²³ — Wekawēn co pin pima, eya'ōpicūḡcūḡ cuy — io'e.

Imēn o'ḡuwēn "Wekawēn eyetaybin puje, warara'acat pe juy epeḡuwēn dao ma eyaḡuyba'ūmap puxim" i'e ojuj.

²⁴ — Eya'ōpicūḡcūḡ cuy epesop wa'ō kay — io'e. — Xipan'ūm ya'ījo buje, yopit ma juy eyetaybin. Xipan ya'ījo buje bit, yoboḡ cuy eyetaybin — io'e. ²⁵ — Wara'an eyetaybit pin pima, wara'an ma eyetaybit epesop. Ya'ijom eybu'u buje bit, kuy juk epeya'ījoiap kay jeyaḡuyba'ūm — io'e.

²⁶ Jesus waram wuymutaybitbinap ekawēn o'ḡuwēn.

— Deus soat ipi daḡacat kukukan iap kadai aypapanap puxim — io'e. — Aḡokatkat o'taida jekat pe — io'e. ²⁷ — Taida buje, soat exima xexen ma. Kabia isum kopkom. Nōjēmjēm. Aypapan. Aḡokatkat pit itaybit ḡu apēn aypapan iam. ²⁸ Kadai jekpiwan ma jewa'adadam. Koap dupcēm cēm. Taipuk cēm cēm ḡuyjom. Kanomūm dajēmjēm taipuk taḡ -tajakata — io'e. ²⁹ — Tarum'isum kadai bubum kat iwat kadai bubuap kaxi oajēm puye — io'e. — Imēnpuxim eya'ōbi ḡu warara'acayū itabut je'e Deus kay- -Deus a'ōbi acā — io'e.

Jesus imēn wuymutaybitbinap ekawēn o'ḡuwēn.

³⁰ Jesus waram o'jekawēn.

— Deus ade jījāayū kukukan je'e — io'e. — Ajo-buxim xe'e je'e? Eya'ōpicūḡcūḡ cuy epesop iboap ekawēn kay — io'e. ³¹ — Deus soat ipi daḡacat kukukan iap mostardada buxim- -e da jo'iat puxim. Ipi be taida buje, ta'it ma mostardada. Warara'ata bodi

ma ta'it ma. Aypapan cīcā taida buje bit. ³² Wara'at kadai bodi ma aypapan e'em. Tākuboḡ e'em. Wasū jedopi mōḡmōḡ tāku jeje — io'e. — Imēnpuxim ḡasū Deus pūḡpūḡayū kukukat. Guyjom pit adeayū kukukan je'e — io'e.

³³ Jesus ibo ekawēn puximat o'ḡuwēnuwēn adeayū be. Deus soat kukukan je'e iap ekawēn o'ḡuwēnuwēn cebe ip. Imēnpuye itaybit put ip. ³⁴ Adeayū mutaybitbin pima wuymutaybitbinap ekawēn acā o'ḡuwēn- -kawēn iba'arēmat acā. Jeweju etaybitbinayū mutaybitbin pima bit, ibapuḡ ma o'ḡutaybin ip. Kawēn iba'arēmat ḡu o'ḡuwēn cebe ip- -ibapukat ma.

³⁵ Ixe kabia kabiḡkabiḡ'i bima, Jesus o'jekawēn jeweju etaybitbinayū be.

— Ga'a iodi wīnābu aju — io'e.

³⁶ Ceweju etaybitbinayū o'jewemuwēn ip adeayū be. Jesus kuy kobe be osunuy. Jeweju etaybitbinayū o'tujowat jeweju. Warara'acayū dak o'timudek jekobe daḡ ma ip.

³⁷ Gebuje kabidoxixi oajēm cekobe kay. O'subidoajēm cekay ip- -Jesus kay, jewejuayū kay dak. Kobe be diōmōm o'e tipodoyat. Kobedi tiboḡ o'e. Kobe munopapūn ojuy o'e idibim. ³⁸ Imēnpit Jesus ixet osodop kobe ukpu be. Ixet jadipi jeje.

Gebuje ceweju etaybitbinayū Jesus o'ḡuwurūḡ.

— Ocemutaybitbin'ukat! Ak'adit ma du ēn cekay? — io'e ip. — Je'ūm wuyju! — io'e ip cebe.

³⁹ Jesus o'āy.

Gebuje Jesus kabidoxixi o'ḡukorēm.

— Ebidopon! — io'e kabidoxixi be. — Edipon! — io'e iodi be.

Kabido dao ma o'subido'ūm. Tipo o'e iodi. ⁴⁰ Imēneju Jesus o'jekawēn jeweju etaybitbinayū eju.

— Apēnpuye dak eyparara? Eyetabut ḡu du Deus kay? — io'e.

⁴¹ Iparara jījā ip o'e.

— Abu dak sute? — io'e ip jewewebe. — Ceka-wēn acā kabido o'subidomu'ūm! Dao ma o'timupon iodi! — io'e ip.

5 Jesus winābu oajēm jewēju etaybitbinayū eju. Oajēm ip Gerasa eipi be. ² Kobe bewi Jesus cēm puje, aḡokatkat osodot ce'ū'ūayū mōgmōḡap pewi. Ibiōḡbuk kērēat kukat osunuy. ³ Ixe uk'a be ḡu osunuy -ce'ū'ūayū mōgmōḡap pe acā, ibiōḡbuk kērēat kuḡ puye.

⁴ Ade em Gerasa eipi watwat cuk adi ibiōḡbuk kērēat kuḡat o'taomūnmūn ip. Correntebum cuk adi o'taomūnmūn ip, cabobum tak. Ḡasū bit taomūn pa'ore ip osodop. Iba'ore osodop ip correntebum tak. Ade em ma juk adi o'taomūnmūn ip correntebum, cabobum tak. Imēnpit ixe aḡokatkat correntebu o'subumuwekapkap. Ixe cabobu o'subudakatkat. Ixe muwaḡōn pa'ore o'e soat pe. ⁵ Kabia bun, ixima bun tak e'ū'ūayū mōgmōḡap taḡ oekuku ibiōḡbuk kērēat kuḡat. Co'a daḡ tak oekuku. Soat em jewāwāwām oekuku. Jewemuwerikweriḡ wita'am oekuku. Jewemudadaibotbon oekuku.

⁶ Wūywi ma Jesus co buje, ibiōḡbuk kērēat kuḡat o'jedau Jesus kay. O'jēḡ'aecōḡcōḡ Jesus wap ya'ō-buyxi cexe buye.

⁷⁻⁸ — Ibiōḡbuk kērēat, ejēm. cuy aḡokatkat pewi — Jesus o'e.

Ibiōḡbuk kērēat kuḡat o'jewāwā ya'ōberen.

— Jesus, apēn ēn em owebe? — io'e. — Ēn Deus ipot -soat podi ma ya'ōbacaat ipot! — io'e. — Ipiat'ajoan ḡu juy ēn owebe, Deus etabutpe wuyju buye — io'e Jesus pe.

⁹⁻¹⁰ — Apēn ebutet? — Jesus o'e.

— Obutet Ade i, ade oceju buye — io'e. — Ijop ka bewi ḡu juy ibiōḡbuk kērēat eḡujēm — io'e aḡokatkat Jesus pe.

¹¹ Ade jījā dajebaryū wurūrūrūḡ osodop ip iboce co'a daḡ.

¹² — Dajebaryū be juy eḡuōm — io'e. — Āḡ ocemuōm cebe ip — aḡokatkat o'e.

¹³ — Ha'a — io'e. — Epeōm cuy cebe ip — Jesus o'e.

Ibocewi ibiōḡbuk kērēayū o'jēm aḡokatkat pewi. Oōm ip dajebaryū be.

Ade jījā osodop ip dajebaryū. Kiiih. 2000 be

aco'i osodop ip. Daudaum o'jenapōn ip co'a pēnpēn taḡ. O'kop ip iodi be. Oakōm ip. Jeabokaboḡ oap ip iodi be. Poḡ. Oe'ū'ū ip. ¹⁴ Imēneju dajebaroyū kukayū owatwat ip.

— Jesus ibiōḡbuk kērēayū o'ḡuōm dajebaroyū be — io'e ip warara'acayū be. — Oap ip ade — io'e ip. O'ḡuwēn ip ikaboḡatka watwat pe, koḡūnpi watwat pe dak. Ade o'ju ip apēn o'jebapuk iap com.

¹⁵ O'ju ip Jesus kay. Ibiōḡbuk kērēat kuḡ tūibit o'jojojo ip. Ḡasū bit tadaibot ḡu o'e. Xik'i osunuy. Totite o'e ḡasū bit. Yaḡuysat o'e ḡasū bit. Imēneju itabēḡbēḡ ip o'e ijojom.

¹⁶ Ibocewi o'jojojo'iyū apēn o'jebapuk iap o'ḡuwēn oajēm'iyū be.

— Jesus ibiōḡbuk kērēat o'ḡujēm aḡokatkat pewi — io'e ip. — O'ḡuōm dajebaroyū be — io'e ip. — Oakōm ip iodi be. O'jeabokabok ip. Oap ip — io'e ip.

¹⁷ Imēneju:

— Ejēm cuy oceka bewi — io'e ip Jesus pe Gerasa eipi watwat.

¹⁸ Imēnpuye Jesus oōm kobe be jejēm ām.

Kobe be iōm puje ibiōḡbuk kērēat kuḡ tūibit o'ju Jesus kay.

— Eweju ōn tak cum — io'e. — Exe ma onuy pin — io'e Jesus pe.

¹⁹ — Ap! — io'e Jesus pit. — Oweju ḡu ejot. Eduk'a be juy eju, ebureyū kay — io'e Jesus cebe. — “Kariwa ibiōḡbuk kērēayū o'ḡujēm owebewi,” i juy ece cebe ip — Jesus o'e. — “Kariwa juk xipan okuk,” i juy ece cebe ip — Jesus o'e.

— Ha'a — io'e.

²⁰ Ḡebuḡe o'ju jeka kay. 10 beatka daḡ oekuku: — Jesus ibiōḡbuk kērēat o'ḡujēm owebewi — i'e'em soat pe. Iboam jekūyjo buje:

— Ajo iba'ore cekay- -Jesus kay? — io'e jewewebe.

²¹ Ḡebujep Jesus iodi o'timudek ma'ḡuto kobe daḡ. Timudek puje, ade jījā ip o'ju topabe ka'oririt pe. Kiiih.

²² Judeuyū e'aweroroap'a kukukat o'ju Jesus kay- -Deus eju kawēnwēnap'a kukukat. Ibutet Jairo i osunuy. Taxitxet osunuy. Taxit doze koato osunuy. Jesus dopabijuk puje, o'jēg'aecōgōg cewap, Jesus ya'ōbuyxi cexe buye.

²³ — Tapu, odaxit oe'ū pin — io'e. — Ejot cuy oduk'a be — io'e. — Ebu juy esubumōg cebe imu'ada am. Esubumōg cuy cebe ce'ūap puxim — io'e Jesus pe.

²⁴ Imēnpuye Jesus o'ju ceweju- -Jairo eju.

Ibocewi ade ip o'ju Jesus nomuju. Icēgsūg ip o'e ade jījā buye. ²⁵ Iboce ayacat tak osunuy. Ade koato ma toybucukbucug gū osunuy- -doze koato ma. ²⁶ Ade wuyanūgtata'ukayū ixe ayacat anūgtata'uk ip osodop. Imēnpit biḡ ma xipāt'ūm cīcā o'e. Soat jedi-nheiro o'gū'ūm janūgtataapteim. O'jexere gū. Biḡ ma xipāt'ūm cīcā o'e.

²⁷ - ²⁸ Ixe ayacat Jesus iwātaxipipi mu'ada'adaap awēg o'yawēgcoco.

— Jesus esay mucay buje, oce'ada — ayacat o'e jewebe ma.

Gebuje o'ju Jesus tēg adeayū parakpe- -aweromayū parakpe. ²⁹ Jesus esay o'gucay warara'acat eta'ūmpi. Cesay mucay'isum ma o'toybucuk. Xipāt o'e gēbujē bit. ³⁰ Wa'ōbacaan aco'i oḡu'ada iam itaybit o'e Jesus pit. O'jekorepēn adeayū parakpe gēbujē bit.

— Abu wesay o'gucay? — io'e.

³¹ — Tā! — io'e ceweju etaybitbinayū. — Adeayū wuymukuḡukuḡ iap cocom gū du ēn? — io'e ip. — Apēnpuye ēn e'em "Abu wesay o'gucay?" i? — io'e ip.

³² Imēnpit Jesus o'jeakak soat kay. Abu wesay o'gucay iat kudadam o'jeakak. ³³ Ayacat itaybit o'e Jesus omu'ada iam. Imēnpit iparara o'e Jesus itakoma je'e okay iap puxixim. Ikarabakbak tak o'e jeparara pibun. O'jēg'aecōgōg Jesus wap.

— Ōn ma esay oḡucay — io'e cebe. — Ēn cuk omu'ada — io'e.

³⁴ Imēnpuye:

— Tū'ū, kuy ece'ada etabut okay buye — io'e Jesus. — Ecepit cuy eduk'a be — io'e. — Ecokcoğ cuy eğuy — io'e. — Kuy ece'ada. Xipat ecesüy ġasū bit — io'e.

¹⁵ Jesus puk kawēnwēn ma ayacat eju bima, Jairo duk'a bewiyū oajēm cekay- -Jairo kay.

— Iğuje, edaxit'ūm kuy oe'ū — io'e ip. — Wuy-mutaybitbin'ukat eğüwa'ūm ġu ġasū bit — io'e ip.

¹⁶ Imēnpit Jesus ak'adit ma o'e oe'ū iap awēğ kay.

— Eğüycūğ ġu juy eğuy — Jesus o'e Jairo be. — Etahun pit cuy eğuy okay — io'e.

¹⁷ Ğe buje Jesus ebapūğayū acā o'tujowat jeweju. Pedro o'tujowat jeweju, Tiago dak, João dak. João Tiago kitpit osunuy. Ibūrū ma o'tujowat jeweju.

¹⁸ O'ju ip Deus eju kawēnwēnap'a kukukat tuk'a kay- -Jairo duk'a kay. Ade osodop ip tuk'a be. Wawa ip osodop. Jewāwāwām ya'ōberen ip osodop yaypan'isuat'ūm cocom. ¹⁹ Uk'a be jeōm puje, Jesus o'jekawēn ceweju ip.

— Apēnpuye eyju wawa? Eya'ōkarey jījā oxe! — io'e cebe ip. — Yaypan'isuat ce'ū ġu- -ixet ā! — Jesus o'e wāwāayū be.

Jesus itaybit o'e yaypan'isuat'ūm oe'ū iam. Inaka waram imutain. Imēnpuye:

— Ixet ā — io'e.

²⁰ Wāwāayū itaybit o'e yaypan'isuat'ūm oe'ū iam. Imēnpuye Jesus o'jowayway ip. Jesus soat ip o'ğujēm uk'a bewi.

Ibocewi Jesus yaypan'isuat'ūm ebay o'tujowat jeweju, ixi dak, ebapūğayū dak- -jeweju etaybitbin'ukayū. O'ju ip ce'uat kay. Oajēm. ²¹ Ce'uat o'su-baixik.

— Talitá cumi — Jesus o'e ja'ōm cebe.

(Talitá cumi "Tū'ū, ağobucēğ ece" i ōn e'em ewebe iape wuya'ōm.)

²² Ce'ū topibit waram o'jetait. O'je'ağobucēğ ġe-buje bit. O'kop. O'jexīğxīğ. Imēnpuye o'jojojo'iyū itabēğbēğ o'e ip ijojom.

⁴³ — Ixan cuy eġm cebe — Jesus o'e ixi be. — “Jesus waram odaxit'um o'ġutait,” i'umġu juy epe'e warara'acayū be — io'e cebe ip.

6 Jesus o'ju ibocewi. O'ju jaypanapka kay. Oajēm Nazaré ka be jewēju etaybitbin'uk-ayū eju. ² Sábado bima ade o'ġutaybin Deus eju kawēnwēnap'a be. Jebodoydoyap kabia be ip o'ġutaybin.

Ade ixē ekawēn o'ya'ijojo ip. Ya'ōpicūġcūġ ip o'e cekawēn kay.

— Apēntak iġo aġokatkat itaybit soan kawēn? — io'e ip jewēju. — Abu dak ixē o'ġutaybitbin? Wuywebe i'e ba'oreap mubapukpuġ ġoku — io'e ip. ⁴ — Iġo ġu du karepiġa? — io'e ip. — Maria it ma ġoku. Tiago waġo ma ġoku. José waġo dak. Judas waġo dak. Simāo waġo dak — io'e ip. Iixityū dak ijoce ma wuyweju ma — io'e ip. — Wuyju bit kūyjobin ġu juy ajop ixē a'ō kay, ixē wuyjo'iat puyē — i napa ma o'e ip.

⁴ Imēnpuyē Jesus o'jekawēn cewēju ip.

— Soat ka daġacat ibuyxim ma Deus ekawēn muwēnuwēn'ukat kuġ — io'e. — Jaypanap ka beayū bit ibuyxim ġu ikuġ — Jesus o'e cebe ip.

⁵⁻⁶ Nazaré ka be bima ade em ġu Deus a'ōba-caap o'ġubapuk, itabut'um ip puyē.

— Itabut'um cīcā ip okay — Jesus o'e jewēbe ma.

Warara'acayū bit ixē kay jījā o'e. Imēnpuyē jebu o'jewebumōġ cebe ip- iwātaxipiyū be. O'ġu'ada'ada ip.

Ġuyjom wuyjuyūxirixiri daġ oekukuku. Imutaybitbin ip oekukuku.

⁷ Jesus doze beayū o'tomuwā jewekay. Xepxep-xem ip o'ġujuju warara'acat ka daġ.

Gebuje o'jekawēn cewēju ip.

— Wa'ōbi ma ibiōġbuk kērēat epeġujēmjēm ikuġayū bewi — io'e cebe ip. ⁸ — Eyba'ip acā epeyoptujowat eyjuap taġ — io'e cebe ip. — Eyxan

pit epetujowat ġu, sacola dak ka'ûma, dinheiro isurûġat tak ka'ûma. ⁹Eyesandália dak epetujowat — io'e. — Eyewebeat acā eydoti epetujowat-xepxem pit ka'ûma — io'e. ¹⁰— Pūġka be eyajēm puje, pūġ'a be ma epesopsop uk'a be. Pūġ'a be ma epesop iġo ka be bima — io'e. ¹¹— Pūġka be eyajēm puje, ibo ka watwat pe eykukpin'ûm pima, wara'atka kay juy epeju — io'e. — Ibo ka watwat eya'ijo pin'ûm pima, epejēm cuy ibo ka bewi. Cēm pima eyesandália epeġupoypoy "Deus pe ipiat pi'ajoat puje eywebe, ocekwiatpi ġu oce'e," i'e'em cebe ip — io'e. — "Eyju ma eyukpiwat Deus ekawēn kay'ûm puye," i juy epe'e cebe ip — io'e Jesus.

¹²Imēneju doze beayū o'ju. Ade mukūyjojom oekukuku ip kawēn idipan.

— Ikērēat muġēġēap epeyepere juy — io'e ip. — Cūġ ma juy epeku — io'e ip adeayū be.

¹³Ibiōġbuk kērēat o'ġujēmujēm ip soat pewi. Ixepti o'timōġmōġ ip iwātaxipiyū a jeje imu'ada am.

¹⁴Ġejuje ipi kukukat Herodes Jesus awēġ o'ya-wēġtobuxik soat kaka daġ o'jeawēġepōġpōġ puye. Tūybe waram ġuto o'jetait'iat teku iān o'e ip adeayū.

— João Batista teku — io'e ip pūġpūġ. — Waram ġuto o'jetait teku je'ūap tomukadi — io'e ip. — Imēnpuye Deus a'ōbacaam wuywebe i'e ba'oreat muhapukpuġ teku — io'e pūġpūġpūġ.

¹⁵— Ka'ûma — io'e warara'acat pit. — Elias'ûm teku — io'e ip. — Waram ġuto o'jetait — io'e ip.

— Ka'ûma — io'e warara'acayū bit. — Deus ekawēn muwēnuwēn'ukat'ûm teku — io'e ip. — Waram ġuto o'jetait'iat teku — io'e ip. — Kuyje osunuyiat teku — io'e ip.

¹⁶Imēnpit ipi kukukat Herodes Jesus awēġ co buje, imēn o'jekawēn.

— Oxe bit teku João Batista — io'e. — Kuy bima wemu'a'uk teku. Imēnpit waram ġuto o'jetait — io'e.

¹⁷⁻¹⁹ Kuy bima Herodias Filipe tayxi osunuy. Ikukat Herodes kitpit tayxi osunuy. Herodes pit Herodias o'jat jetayxim. Imēnpuye João Batista o'e Herodes pe:

— Deus xe cedaḡ ḡu ewebe jewebumūn âm ekitpit tayxi eju — i.

Imēnpuye Herodias itakoma jījā o'e João kay. João aoka ojuy o'e. Imēnpuye Herodes João o'ḡuōmat daomūnmūnap'a be jetayxi be yaokaap puxim. Herodias pe João aoka ba'ore o'e, Herodes xe João ya'ōbuyxi buye.

²⁰ — João cūḡ cīcā — io'e Herodes. — Xipat cīcā ixē-ikērēat kuḡ ḡu — io'e.

Herodes João muxipanpan osunuy daomūnmūnap'a be yaokaap puxim. Herodes pe João ekawēn co buje, yaḡuybabi'ūm'ūm osunuy. Inaka João ekawēn co pin cīcā osunuy.

²¹ Ḡebuje Herodes peta o'ḡuḡē jekapap kabia kay ḡebum am. Peta boḡ cīcā o'ḡuḡē ip. Herodes ya'ōbuyxiayū o'tomuwā peta kay jebekitkiyū. Sorarayū kukukayū dak o'tomuwā, Galiléia eipi beayū dak-kariwawa ecuḡapap. Peta kabia bima Herodias o'e jewebe ma:

— Ḡasū ma João oyaokaat — i.

²² Ibocewi Herodias it oōm peta muḡēḡēap'a be. Ayacat osunuy yaypan'isuat. O'jeda'i'in Herodes etabutpe, ceweju jekōnkōnayū etabutpe dak. Da'i'iap co buje, icokcok o'e ip. Imēnpuye:

— Ajo-kay ēn oxewi? — io'e Herodes yaypan'isuat pe. — Emukaypin cuy oḡūm ewebe — io'e. — Ade obubut weipi be. Ipidaseat ma oḡūm ewebe — io'e. ²³ — Deus etabun ōn e'em ewebe — io'e. — Soat emukaypin cuy oḡūm ewebe — io'e. — Ipidase juy oḡūm ewebe obubut. A'ō kay je'e ip webekitkiyū — Herodes o'e.

²⁴ Ixe yaypan'isuat o'jēm. O'ju jexi kay.

— Mamāe, ajo dak ojoojuy? — io'e jexi be.

— “João Batista a juy eya'ukat. Eyaūm owebe,” i juy ece cebe — io'e ixi.

²⁵ Herodes kay yaypan'isuat o'jepit ipi kukukat kay ḡebuje bit.

— **João Batista a juy eyaūm owebe parato be** — io'e ipi kukukat pe. — **Ĝaxīn ma juy eyaūm owebe** — io'e jexi a'ōbi.

²⁶ Ipi kukukat Herodes iĝuycūĝ o'e. Ibu'u jījā ya'uk an osunuy.

— Soat emukaypin cuy oĝūm ewebe — i juk o'e yaypan'isuat pe jewēju jekōnkōnayū etabutpe. Imēnpuye isūsūn o'e jebureyū buxim. “Oyaūm ĝu ewebe” i'eap puxim isūsūn o'e.

²⁷ Ĝejuje o'jekawēn sorara be.

— **João a juy eya'uk** — io'e. — Eyadojot cuy owebe — io'e sorara be ipi kukukat.

Sorara o'ju. João a o'ya'uk daomūnmūnap'a be.

²⁸ O'yadujupit parato be. O'yaūm yaypan'isuat pe. Yaypan'isuat o'yadujowat jexi be. O'yaūm cebe.

²⁹ João'ūm e'ū ām jekūyjo buje, ceweju oeku-ku'iyū o'ju Herodes kay. João'ūm jebit o'tujowat ip. Jebabim o'jomōĝ ip witabikūy be.

³⁰ Ixe be juk o'ĝuju'iyū o'jepit Jesus kay. Soat cuk o'e'e ip iat o'ĝuwēn ip cebe, soat cuk o'ĝutay-bitbitbin iap tak. ³¹ Ade jījā ajēmjēm ip o'e Jesus kay, ceweju etaybitbin'ukayū dak. Cēm cēm tak o'e ip cexewi ip. Ixeyū dak cekōn pa'ore o'e ade ip puye.

Imēnpuye Jesus o'jekawēn ceweju ip.

— Eydaobire jījā — io'e. — **Ĝa'a aju uk'a'ūmat kay** jebodoy am. Wuyju acā aju — Jesus o'e cebe ip.

— **Ĝa'a** — io'e ip.

³² Ĝejuje o'ju ip uk'a'ūmat kay. Kobe daĝ ip o'ju. Ixeyū acā o'ju jebodoy am.

³³ Ijēm puje ip, ade kapurūĝ taĝayū Jesusyū o'jo-jojo.

— Jesus o'jēm jewēju etaybitbinayū eju — io'e ip jewewebe. — **Ĝa'a aju kapurūĝ taĝwi** ixeyū dopabe — io'e ip.

Imēnpuye o'jedau ip kapurūĝ taĝ. O'jedau ip Jesusyū dopabijuk am. Soat kaka daĝwi o'ju ip. Jesus ajēm'ūm awap ma oajēm ip.

³⁴ Kobe bewi jejēm puje, Jesus ade jījā o'jojojo. **Itabotaidabotbot** o'e cekay ip.

— Teyūku ovelhayū buxim oxe- -jekukat'ūmayū buxim — Jesus o'e jewebe ma.

Ade ma ip o'ğutaybin.

³⁵ Kaxi ipi tēğ pima ceweju etaybitbinayū o'ju Jesus kay.

— Ijoce ya'ūmğu uk'a — io'e ip. — Ka'ūmğu wuyxan. Kuy katpuje jījā — io'e ip. ³⁶ — Adeayū juy eğuypit ağoka kay — io'e ip. — Eğuypit ip ikatēğat-ka be jexat pu am — io'e ip.

³⁷ — Eyju ma ixan epeğüm cebe ip — Jesus o'e cebe ip.

— Apēntak pāo'a oceyabu soat xat'am? — io'e ip. — Pāo'a deim kuka o'e teiboğ cīcā. 200 dinheiro isurūğat kuka o'e- -prata muğēğē — io'e ip.

(Pūğ dinheiro isurūğat prata muğēğē pūğ kabia ekapikapteim osunuy).

³⁸ — Pebūrū'a eyju pāo'a kuğ? Epeju buk eye-taybit am — Jesus o'e.

O'ju ip jetaybit am. Itaybit puje ip o'jepit.

— 5 be pāo'a kuğ oceju, xepxep axima kuğ tak — io'e ip Jesus pe.

³⁹ — Epe'e juy adeayū be “Epabik cuy tip kireat ceje,” i — Jesus o'e.

⁴⁰ Soat ip awerom oabikbik. Ade jījā osodop ip. Pūğ eawero 50 be wuyjuyū osodop ip. Wara'at eawero 100 be osodop ip. Wara'at eawero 50 be osodop ip. Wara'at eawero 100 be osodop ip. Ade jījā osodop ip. 5000 ağokatkat osodop ip- -pāo'a omayū. Ixeyū tayxiyū dak ya'om, ipotpoyū dak, taxityū dak.

⁴¹⁻⁴⁴ Ğejuje Jesus o'jekawēn jebay eju- -Deus eju. Pāo'a o'yabu. Axima dak o'jat xepxep. Ixe dak o'jeapūn kabi kay. O'jekawēn Deus eju.

— Bay, ēn xipat — io'e. — Pāo'a eyaūm oce-xat'am — Jesus o'e Deus pe.

Pāo'a o'yadakat.

— Juku pāo'a — io'e jeweju etaybitbinayū be.

Cinco be pāo'a o'yadop. Imēnpit Jesus o'ya-mu'acoğ. Ya'ade jījā o'e. Ceweju etaybitbinayū o'yaūm adeayū be. Xepxep axima osodop. Jesus pit axima o'ğu'acoğ. Imēnpuye ade jījā o'e. Axima dak o'ğüm jeweju etaybitbinayū be. O'ğüm ip adeayū be.

Soat ip o'jo'o'o- -5000 beayü- -ağokatkayü. Soat ip ibeğheğ o'e, Jesus o'ğu'acoğ puye.

Ibocewi ceweju etaybitbinayü cepoyat o'jat. Ico be ip o'ğuôm. Doze be o'ğunopapün ip cepoyan- -pāo'a epoyat'am, axima epoyan tak.

⁴⁵ Gebujeap tomukadi:

— Epeôm cuy kobe be — Jesus o'e jewēju etaybitbinayü be. — Wînābu epeju owap. Betsaida ka kay juy epeju — io'e.

Jesus "Eyduk'a be juy epeyepit," i'e'em pima adeayü be, ceweju etaybitbinayü o'ju wînābu.

⁴⁶ Tuk'a be adeayü muju buje, Jesus o'ju co'a kay jekawēn ām Deus eju.

⁴⁷ Kabiok pima Jesus jağepüğ ma o'e kapurüğ pe. Imēnpit kobe dağayü iodi bicüğ pe o'e ip- -ceweju etaybitbinayü. ⁴⁸ Jesus ip o'jojoho- -kobe dağayü- -tibicüğ peayü. Pipim jekoykoy o'e ip kabido o'subidoajēm topabe buye.

O'ju cekay ip kabiakabia'i bima- -kaxi jēm awap ma. Kuyğu o'ju tibicüğ peayü kay. O'kop co'a dağwi. Idibi adopa dağ xīgxiğ o'ju. Cekay ip o'ju. ⁴⁹ Jesus o'jojoho ip idibi adopa dağ xīgxiğ pima. Tûyhe ite axik iān o'e ip. Jesus co buje soat ip o'jewāwā jeparara pibun. ⁵⁰ Iparara jījā ip o'e.

— Eya'ōcam cuy epesop! Eypararam ğu juy! Ōn ā! — Jesus o'e.

⁵¹ Ibocewi Jesus oôm kobe be ceweju ip. Kabido o'subido'üm ğebuje bit. Dao ma o'tipon. Imēnpuye o'jekuy ip. Yağuybabi'üm o'e ip. O'jojoho ğu buk ip imēğat. ⁵² Ixe kabido o'subidomupon iap o'jojoho ip. Inaka tekü Deus a'ōbacaap kuğ jekukum iap kay itabut ğu ip. Pāo'a o'yamu'acoğ iap o'jojoho ip. Inaka:

— Ka'ūma ma ite jo'i ya'ōbuyxi — i'ümğu o'e ip.

Itabut ğu o'e ip cekay.

⁵³ Iodi mudek puje ip, Jesusyü oajēm Genesaré eipi be. O'jemüğ ip ebikopap pe. Kobe ip o'ğukirik ka'oririt pe.

⁵⁴ Kobe bewi ijēm isum ma ip itaybit o'e teyüku

Jesusyū iam ibo ka watwat. ⁵⁵ Daudaum o'ju ip uk'a'a daḡ iwātaxipiayū dakoykoy. O'tujowat ip Jesus kay. Dopaptup ceje o'tujowat ip. Iwātaxipiayū o'tujowat ip adeayū o'e "Jesus omuyku ijoce" iap pe. ⁵⁶ Aḡoka daḡ Jesus oeku, ikaboḡatka daḡ tak, biopak kukukayū ka daḡ tak. Yajēm puje jebureyū iwātaxipiayū o'jomōḡ je'aweroroap pe.

— Aḡ esay ukpi oceḡucay — io'e ip Jesus pe. Soat ip o'je'ada o'ḡucay'iaiyū. Soat iwātaxipiayū xipat o'e.

7 Fariseuyū o'je'awero ip Jesus kay, Moisés ekawēn imutaybitbin'ukayū dak- -Jerusalém ka bewiaiyū. ²⁻⁴ Aypapayū'ūm'ūm ekawēn taḡ jekuku'uk osodop ip Fariseuyū, soat warara'acayū Judeuyū dak. Jebu'isu bima dak ip jebuwuywuy'uk ma osodop. Tūybe ade em wuybuwuy'ūm pima wuykērē Deus xe iān o'e ip. Imēnpuye ade em jebuwuy'ūm pima, o'jekōn ḡu ip. Tarekrek pupuap pewi jepit puje, o'jekōn ḡu ip ade em jebuwuy'ūm pima. Ade ma ajojoyū'ūm'ūm ekawēn taḡ jekuku'uk osodop ip- -kuyjeayū'ūm'ūm ekawēn taḡ. Imēnpuxim soat em ma kopo'abi wuywuy'uk ip osodop, kamuti'abi wuywuy'uk tak ip osodop, kajarāo'abi wuywuy'uk tak ip osodop. Jesus eju etaybitbinayū bit ade em'ūma o'jewe buwuy jekōn pima- -pūḡ em ā. Fariseuyū iboap o'jojojo.

⁵ Ḡe buje Fariseuyū o'jekawēn Jesus eju, Moisés ekawēn imutaybitbin'ukayū dak.

— Eweju etaybitbinayū wuyajojoyū'ūm'ūm ekawēn taḡ ḡu jekukum — io'e ip cebe. — Cedaḡ ḡu ip jekukum. Ade em'ūma jwebuwuywuy'uk ip jekōn ān — io'e ip imuymuy ip.

⁶ Ḡe buje Jesus o'jekawēn ceweju ip. Ixeyū o'ḡukorēm.

— Kuyje ma juk Isaias emuwēn icēmān — io'e. — Imēn o'e jemudupmubararaktup pe:

Deus e'em:

"Deus kay oceju" i napa ma e'em iteyū wuyjuyū, i. Imēnpit okay ḡu ip,

i'e'em Deus, i juk o'e Isaiás — io'e Jesus. ⁷ — “Ēn xipat,” i te'e ma e'em ip owebe, i. Imēnpit xipat ġu òn ip cexe, io'e Deus, io'e Isaiás. “Deus ekawēn eymutaybitbin oceju bit,” i napa ma e'em ip. Imēnpit wuyjuyū ekawēn acā adeayū mutaybitbin ip, i'e'em Deus, i juk o'e Isaiás — io'e Jesus.

⁸ — Eyju Deus ekawēn iwatiwan aypapayū'ūm'ūm ekawēn taġ eyeku am — io'e Jesus Fariseuyū be, Moisés ekawēn imutaybitbin'ukayū be dak. ⁹ — Deus ekawēn kay ġu eyju- -aypapayū'ūm'ūm ekawēn kay acā! Jewexe eyetaybit cīcā! — io'e. ¹⁰⁻¹³ — Moisés o'e kuyje:

Xipan cuy eyebay epejukuk, eyxi dak,
i.

Waram o'e ġuto:

Jebay muymuy'ukat cuy epeyaoka-
jexi muymuy'ukat tak, i.

Imēn Moisés o'e — io'e. — Imēn eyju warara'acayū muwa'ūm'ūm cebay buywat am, ixi buywat am tak. “ ‘Dinheiro kuka adi oġūm eywebe eybuywat am,’ i juy epe'e eyebay be,” i eyju bit e'em warara'acat mukūyjojom — io'e Jesus. “ ‘Imēnpit ibo edinheiro oġūm cuy Deus pe,’ i juy epe'e eyebay be,” i'e'em eyju bit warara'acat mukūyjojom — io'e Jesus. — “ ‘Ġasū iba'ore owebe eybuywat am,’ i juy epe'e cebe ip,” i eyju e'em imukūyjojom ip — io'e Jesus. — Imēn eyju Deus ekawēn kay ġu. Deus ekawēn ġu warara'acayū mutaybitbin eyju- -eyekawēn acā. Deus ekawēn taġ ġu eyju jekukum- -eyekawēn taġ acā. Soan eyju e'em cedaġ'ūmān — Jesus o'e Fariseuyū be.

¹⁴ Gebuje Jesus waram adeayū o'tomuwā jewekay.

— Eya'òpicūġcūġ cuy apēn òn em iap kay — io'e cebe ip. — Eyetaybin cuy epesop! — io'e. ¹⁵ — Wuywebe iōmōmap ġu wuymukērērērēn- -wuybinūn

peat acā! — io'e. ¹⁶ — Wekawēn eyetaybit pin pima, xipan cuy eya'ōpicūḡcūḡ! — io'e.

¹⁷ Jesus o'jēm adeayū xewi.

Ḡebuje oōm uk'a be jewēju etaybitbinayū eju. O'jekawēn ip cewēju- -Jesus eju.

— “Wuywebe iōmōmap ḡu wuymukērērērēn- -wuybinūn peat acā,” i kuy ece adeayū be — io'e ip. — Iba'arēm ekawēn ocexe — io'e ip.

¹⁸⁻¹⁹ — Eyju dak eyetaybit ḡu du wekawēn? — io'e. — Adeayū-buxim wekawēn pa'arēm tu eyxe? — Jesus o'e. — Eya'ōpicūḡcūḡ cuy epesop wa'ō kay. Eyxat oōm eybinūn pe ḡu- -eydada be acā! Guyjom cēm cēm ḡuto eywebewi — io'e. — Imēneju eyxat ḡu eymukērērērēn — io'e.

Jesus iboam i'e buje “Soat i'opi ḡu wuywebe” iam imutaybin ojuy ip o'e.

²⁰ — Ixat ḡu ijodiacat mukērērērēn — io'e. — Ijodiacat ikērēat mujurūḡrūḡ soat em ikērēat kay ḡebum puye — io'e. ²¹ — Soat em ijodiat ḡebum ikērēat kay. Imēnpuye soat em ikērēat kay jewaḡuydadam ip: aoyū kaykay dak ip, warara'acat pubut tujupa'um'um tak ip; warara'acat aokakam tak ip, ²² warara'acat tayxi kaykay dak ip; itabikuku dak ip warara'acat pubut kay; ikērēat mujurūḡrūḡ tak ip; napapa'uk tak ip; warara'acat muḡuykuku ojuy dak ip; cekawēnkērē dak ip; itabutkarey dak ip; warara'acat awēḡtatam tak ip; yoboḡan pin tak ip; yaḡuyba'arēm tak ip — io'e Jesus. ²³ — Ijodiacat ikērēat mujurūḡrūḡ jexat o'om puye ḡu- -soat em ikērēat kay ḡebum puye acā — Jesus o'e. Imēn Jesus jewējuayū o'ḡutaybitbin.

²⁴ Ibocewi Jesus o'ju Tiro ka kay, iḡo ka tēḡatka kay dak. Oōm uk'a be jenuy ām. Ibu'u osunuy warara'acat pe itaybit am Jesus omuy ijoce iam. Imēnpit cemunēm pa'ore osunuy.

²⁵ Ḡebuje Jesus uk'a be omuy iam o'jekūyjo ayacat. Ixe ayacat it axik kuḡ osunuy jewebe- -ayacat'it'it. Je'it mu'adaap ojuy o'ju Jesus kay. O'jēḡ'aecōḡcōḡ cewap. ²⁶ Grego a'ōm kawēnwēn'ukat

osunuy ayacat. Judeu ġu osunuy. Siro-fenícia eipi bewiat osunuy.

— O'it axik kuġ — io'e. — Eġujēm cuy cebewi — io'e Jesus pe.

²⁷ — Ap! — io'e. — Judeu ġu ěn — io'e. — Koap puk ōn webekitkit puywan-Judeuyū buywan. Ġuyjom acā Judeu'ūmayū osubuywan — io'e. — Cedaġ ġu wuywebe webekitkit xat pum iūm ām akurice be. Icēm ġu du? — io'e Jesus ibuyxijojom.

²⁸ — Icēmān ěn e'em, Kariwa — ayacat o'e. — Imēnpit akuriceyū bekitkit pi nōmnōm acap wiwim mesa diotpe — io'e. — Ōn tak ewebe obuywacap wiwim akurice be ibi nōmnōm acap wiwiap puxim — io'e ayacat.

²⁹ — Icēmān ěn e'em — io'e. — Imēnpuye juy ecepit eduk'a kay — io'e. — Axik kuy oġujēm e'it pewi — io'e.

³⁰ O'jepit je'it kay. Je'it o'tobuxik po'i jexexecap pe. Axik kuy o'jēm cebewi. Xipat o'e.

³¹ Ġebuje Jesus o'jēm Tiro ka tēġatka bewi. Jepitpin pima o'kap Sidom ka daġ, 10 beatka daġ tak. O'ju iodi kay Galilėia eipi beati kay.

³² Ġebuje ibureyū ya'ōpi'ūmat o'tujowat Jesus kay. Ya'ōpi'ūmat ya'ōbabi'ūm tak osunuy.

— Ebu juy esubumōġ ya'ōpi'ūmat pe imu'ada am — io'e ip Jesus pe.

³³ Ġebuje Jesus ya'ōpi'ūmat o'tujowat adeayū parakpewi. Jaġepūġ ma o'tujowat. O'jewebumuy ya'ōpi'ūmat a'ōpi be. O'jexi. Jebidim ya'ōpi'ūmat kō o'sukōmucay. ³⁴ Kabi kay jeapūnapūn pima, o'jepidowat.

— Efatá! — Jesus ja'ōm o'e cebe.

(Efatá "a'ōpi juy ja'ōpietok" iape). ³⁵ Ya'ōpi'ūmat o'jea'ōpietok ġebuje. O'jekōewut tak. Xipan o'e jekūyjojom. Xipan o'e kawēnwēn tak. Jesus o'jepit adeayū kay ya'ōpi'ūm tūibit eju.

³⁶ — Jesus ya'ōpi'ūmat a'ōpi o'ya'ōpimutok iap awēġ epeġuwēn ġu warara'acayū be — io'e Jesus adeayū be.

Imēnpit biġ ma ip o'ġuwēnuwēn yawēġ.

³⁷ Yawēg coco'ukayū itabēgbēg o'e ip ijojom.

— Xipan acā xeku e'em — io'e ip jewewebe. — Ixe a'ōbi ya'ōpi'ūm tūibiyū jekūyjojom o'e gāsū bit. Ixe a'ōbi ya'ōkērē tūibiyū xipan kawēnwēn o'e gāsū bit — io'e ip.

8 Guyjom gūto adeayū oajēm Jesus kay. Eba-pūg kabiabun ixeyū mutaybitbin osunuy Jesus. Ixat ip oi'ūm. Jesus jewēju etaybitbinayū o'tomuwā jewekay.

² — Wetabotaidabotbot iteyū kay — io'e. — Xepxep xet oweju ip jekukum. Gāsū bit ixat'ūmgu ip o'e — io'e. ³ — Jeduk'a kay ip imuypit puje, e daḡ ma kuka juk ip o'tao'ūm'ūm repibun — io'e. — Pūḡpūḡ wūywi oajēmjēm — Jesus o'e jewēju etaybitbinayū be.

⁴ — Apēn iteyū xan acejat? Ka'ūmgu ijoce — io'e ip Jesus pe.

⁵ — Pebūrū'a eyju pāo'a kuḡ? — Jesus o'e.

— 7 be ma — io'e ip.

⁶ — Epabik cuy ipi ju — Jesus o'e adeayū be. jexat kuḡ'ūmayū be o'e.

Gēbuje Jesus ixan o'jat. 7 be o'yabu pāo'a.

— Bay, ēn xipat — io'e. — Eyaūm ocexat'am pāo'a — Jesus o'e Deus pe.

Pāo'a o'yadakat. O'yamu'acoḡ cīcā. Ya'ade jījā o'e.

— Juku. Epeyaūm cuy adeayū be — io'e Jesus jewēju etaybitbinayū be.

Yaūmūm o'e cebe ip ixeyū be yamu'ē'ē ām adeayū be. O'yamu'ē'ē ip cebe ip. ⁷ Axima kuḡ o'e ip pūḡ-pūḡ ma.

— Bay, ēn xipat — io'e. — Axima eḡūm o'cewebe — Jesus o'e Deus pe.

— Judaku — io'e. — Epeḡūm cuy adeayū be — io'e jewēju etaybitbinayū be.

O'yamu'ē'ē ip adeayū be.

⁸ Gēbuje soat ip o'jo'o'o adeayū. Ibeḡbeḡ o'e ip Jesus pāo'a o'yamu'acoḡ puye. Ceweju etaybitbinayū cepoyat o'jat ip. Axima epoyat o'jat ip, pāo'a

epoyat'a dak. 7 be o'yamunopapūn ip cepoyan yoba'a. ⁹ Ade jījā wuyjuyū o'jo'o'o. Ebadipdip mil o'jo'o'o.

Gebuje Jesus adeayū o'ḡuypit ip tuk'a kay. ¹⁰ Ixe oōm kobe be jewēju etaybitbinayū eju. O'ju ip Dalmanuta eipi be.

¹¹ Fariseuyū o'ju Jesus kay. Jesus buyxijo ojuy ip o'ju.

— Ocewebe i'e ba'oreat cuy eḡubapuk ocewebe — io'e ip. — Iboap co buje, acetabun ēn Deus xewiat iap kay — io'e ip cebe.

¹² Imēn o'e ip Jesus buyxijoap ojuy. Jesus iḡuy-cūḡ o'e jekay itabut am ibu'u ip puye.

— Ap! — io'e cebe ip. — Eyju e'em "Ocewebe i'e ba'oreat cuy eḡubapuk ocewebe," i — io'e. — Imēnpit eybu'u'u eyetabut am okay. Imēnpuye eywebe i'e ba'oreat oḡubapuk ḡu eywebe — io'e.

¹³ Ibocewi Jesus Fariseuyū o'suiwat. Oōm kobe be. O'ju winābu jewēju etaybitbinayū eju. ¹⁴ Pūḡ'a ma pāo'a kuḡ o'e ip kobe be. O'yaḡuyba'ūm ip wara'at'a dujowat am jexat'am. ¹⁵ Jesus o'jekawēn ceweju ip.

— Fariseuyū epāo'a muyuhuhaptōm kay ḡu juy epesop, Herodes ebekitkit epāo'a muyuhuhaptōm kay ḡu dak — Jesus o'e.

¹⁶ — Apēnpuye dak ixē kawēnwēn oceweju pāo'a muyuhuhaptōm? — io'e ip jewewebe. — Imēn kawēnwēn oceweju pāo'a kuḡ'ūm puye wuyju — io'e ip.

¹⁷ Jesus itaybit o'e apēn ip o'jekawēn jewewebe iam. Imēnpit pāo'a muyuhuhaptōm i'e buje, Fariseuyū emumutaybitbinap i'e ojuy osunuy.

— "Pāo'a kuḡ ḡu wuyju," i'ūmḡu juy epe'e! — io'e. — Wekawēn pa'arēm tu eyxe? Eyetaybit ḡu du? — io'e. ¹⁸ — Eyetaybit ḡu eyetate ma'ḡu. Jekūyjojom ḡu eyju, eya'ōpiehe ma'ḡu — io'e. — Eyaḡuyba'ūm wa'ōbacaam ma pāo'a oyamu'acoḡ iap kay — io'e. ¹⁹ — Pāo'a oyaūm 5000 beayū xat'am iap kay ḡebum

ġu du eyju? Pebūrū'a yoba'a epeyamunopapūnpūn yaepoyan? — io'e cebe ip.

— 12 beat'a yoba'a — io'e ip.

²⁰ — Ġebum ġu du eyju 7 be pāo'a oyaūm 4000 beayū xat'am iap kay? — io'e. — Pebūrū ico epeġunopapūnpūn yaepoyan? — io'e.

— 7 be ico — io'e ip.

²¹ — Eyetaybit ġu du ka'ūmān ma iba'ore owebe iam? — io'e Jesus.

²² Jesus oajēm Betsaida ka be jewēju etaybitbinayū eju. Iġo ka watwat aġokatkat o'tujowat Jesus kay- -ita'ūmat.

— Ita'ūmat cuy eġucay imu'ada am — io'e ip Jesus pe.

²³ Ġebuje Jesus ita'ūmat o'subaixik. O'tujowat aġoka bewi. Jebidi o'timōġ ita'ūmat eta be. Jebu o'-subumōġ cebe.

— Ijojom tu ěn? — io'e.

²⁴ Ita'ūmat o'jeak.

— Aġokatkayū jojom ōn — io'e. — Imēnpit awaydip co'i ip cūġcūġ oxe — io'e.

²⁵ Jesus jebu o'subumōġ ma'ġuto ita be xipan ġu ijojom puye. Kabia o'e ijojom ġebuje bit. Xipan o'e ijojom.

²⁶ Ġebuje Jesus ita'ūm tūibit o'ġuypit tuk'a kay.

— Ecept cuy eduk'a be — io'e. — Eju ġu juy ikaboġatka kay — io'e.

²⁷ Ġebuje Jesus o'ju jewēju etaybitbinayū eju. O'ju ip aġoka kay ika'icatka kay. Cesaréia eipi daġ o'kap ip- -Filipe eipi daġ. E daġ pima ip o'jekawēn ceweju ip.

— Abu xe'e ōn wuyjuyū xe? — Jesus o'e cebe ip.

²⁸ — “Teku waram ġuto o'jetait'iat,” i'e'em ip soat wuyjuyū — io'e ip. — “Teku João Batista- -waram ġuto o'jetait'iat,” i pūġpūġpūġ e'em — io'e ip. — “Teku Elias- -waram ġuto o'jetait'iat,” i'e'em warara'acayū — io'e ip. — “Teku kuyjeat- -Deus

ekawën muwënuwën'ukat- -waram ġuto o'jetait'iat," i'e'em warara'acayū — io'e ip.

²⁹ — Abu òn eyxe bit? — io'e.

— Èn Cristo- -Deus emunaē èn — Pedro o'e.

³⁰ — Omuwën ġu juy epe'e — io'e Jesus. — Adeayū be: "Teku Deus emunaē," i ġu juy epe'e cebe ip — io'e.

³¹ Jesus jaokaap o'ġuwën jewēju etaybitbinayū be.

— Soat waġo òn — io'e. — Ipiatpi'ajom cîcā òn — io'e. — Judeuyū kukukayū okay'ùm cîcā je'e, Moisés ekawën imutaybitbin'ukayū dak, Judeuyū epaiyū kukukayū dak — io'e. — Oaokaat ip. Xepxep xet kap puje waram ocetait — io'e Jesus.

³² Cekawën bapuk cîcā o'e cebe ip.

Ġebuje Pedro Jesus o'tujowat warara'acayū xewi.

— "Oaokaat ip," i'ùmġu juy ece! — io'e Jesus pe.

³³ Jesus o'jekorepën. Warara'acayū jojom pima, jewēju etaybitbinayū jojom pima dak, Pedro o'ġuko-rêm.

— Mûġ ece! — io'e. — Satanás ekawën puxim èn kawënwën. Satanás tak ibu'u owebe we'ū âm adeayū beam! Deus aġuy daġ ġu èn jewaġuyġuy- -Satanás aġuy daġ acā — io'e.

³⁴ Ġebuje Jesus adeayū o'tomuwā jewekay, jewēju etaybitbinayū dak. O'jekawën ceweju ip.

— Oweju jeku pin pima, eywekay ma eyaġuy-ba'ùm cuy; eybu'um ġu dak cuy je'ū âm owebeam; wa'ò daġ tak cuy epeku — io'e. ³⁵ — Eybu'u je'ū âm owebeam pima, epe'ū'ū. Owebeam ey'ū buje bit, soat em eyetait epesop kabi be eye'ūap tomukadi, kawën idipat muwën âm eye'ū buje dak — io'e. ³⁶ — Ajo-kuġ tak epesop soat tarekrek kuġ ipi daġat kuġ, eybiòġbuk ipiatpi'ajojoap pe imënpit? Ka'ūma kuġ ma! — io'e. ³⁷ — Tei'ùmġu soat em Deus xe wuy-dopaptem. ³⁸ Ġasūacat ikērëat mujurūġrūġ. Deus kay jetabucap o'jepere ip. Okay'ùm cîcā ip. Wa'ò kay ġu dak. Soat waġo òn. "Jesus ebekitkiyū ġu oceju bit," i'e'em ip. Wepit puje òn tak "Webekitkiyū ġu eyju,"

i oce'e cebe ip. Ocepit ma. Idip cīcā je'e wepicap. Deus ekawēn tojtjot'ukayū eju ocepit- -idip cīcāyū eju — io'e. ¹ — Deus soat kukukan pima ka'ūma ma ixe jo'ian je'e ya'ōbacaan. Ixe xe ma epesop ixe soat kukukan pima. Ijo'ūm puje epe'ū'ū ġu pūġpūġ ey'in — io'e Jesus.

9 ² 5 xet kap puje Jesus Pedro o'tujowat jeweju, João dak, Tiago dak. O'ju ip co'a kay-yaumat'a kay. Oajēm ip. O'jeu ip.

Gebuje Jesus o'jewemuwarurun itabun ip. ³ Cesay isopsep cīcā o'e. Irut cīcā o'e. Iba'ore wuywebe say murun am cesay rucap co'iam.

⁴ Gebuje aypapayū'ūm'ūm o'jebapuk iboce. Kabi kadiwi o'jebapuk ip. Moisés o'jebapuk, Elias tak. ⁵ Kawēnwēn osodop ip Jesus eju. Pedro o'jekawēn Jesus eju.

— Ocemutaybitbin'ukat, xipat wuyju ijoceam — io'e Pedro. — Eba-pūġ xijap cuy ocejomōġ- -pūġ edopam, wara'at Moisés dopam, wara'at Elias dopam — io'e.

⁶ Itaybit ġu o'e jede am je-parara pibun. Pedro bureyū dak iparara ip o'e. ⁷ Kabikerereat o'jebapuk. O'ġuba'arēm ip Jesusyū.

Gebuje Deus o'jekawēn kabikerereat pewi.

— Teku okpot — io'e. — Ikukpin cīcā oxe. Eya'ōpicūġcūġ cuy epesop ya'ō kay — io'e.

⁸ Ceweju etaybitbinayū jeakaġ pima, xepxepayū o'jeu ma'ġuto- -kabi kadiwi oajēm'iaiyū. Wara'acat ġu o'jojjo ip- -Jesus acā.

⁹ Gebuje Jesus o'jekawēn jeweju etaybitbinayū eju. Co'a daġwi kopkom pima o'jekawēn ceweju ip.

— Ġasū ġu juy epejojjoiap epeġuwēn adeayū be — io'e. — Soat waġo ōn — io'e. — We'ū buje waram ocetait. Waram wetait puje acā juy epeġuwēn epejojjoiap — io'e.

¹⁰ Imēneju kūyjobit osodop ip Jesus a'ō kay. O'jojjoiap o'ġuwēn ġu ip warara'acat pe. Imēnpit jeweweju ma ip o'jekawēn.

— Apēnpuye ixe o'e "Waram ġuto ocetai," i?
— io'e ip jewewebe ma.

¹¹ — Apēnpuye Moisés ekawēn ocemutaybitbin'ukayū e'em "Elias koam omuyku," i? — io'e ip Jesus pe.

¹² — Icēmān ōn e'em eywebe — Jesus o'e. — Elias co'iat koam omuyku adeayū muisun ām. Adeayū aġuyмуwarurun je'e itabut am ip Deus kay — io'e. — Kuyje omuwēġaptup ip o'tupmubararak. Imēn e'em ibodup:

Ite ipiat supi'ajo jījā, i. Warēmtaġ ma
ip ixe jukuk, i. Itakoma jījā je'e ip
cekay, i'e'em ibodup — io'e Jesus.

¹³ — Icēmān ōn e'em eywebe. Elias co'iat kuy oajēm. Warēmtaġ ma ip o'jukuk. Ikērēm cīcā ip o'jukuk — io'e Jesus. — O'ġudadaibotbon cīcā ip. Kuyjeatup ekawēn taġ ikērēm ip o'jukuk — io'e.

¹⁴ Warara'acayū kay, jewēju etaybitbinayū kay yajēm puje, ade jījā wuyjuyū o'jojojo yakokoreren ip. Moisés ekawēn imutaybitbin'ukayū Jesus eju etaybitbinayū a'ōxikxiġ o'e ya'ōberen.

¹⁵ Jesus co buje adeayū itabēġbēġ o'e ip ijojom. O'jedau ip cekay- Jesus kay.

— Ajēm tu? — io'e ip Jesus pe.

¹⁶ — Oajēm — io'e Jesus. — Apēnpuye eyju oweju etaybitbinayū a'ōxikxiġ? — io'e.

¹⁷ — Ocemutaybitbin'ukat, axik opop okpot pe — io'e pūġ. — Ixe axik okpot a'ōmu'ūmu'ūm, ya'ōpimu'ūmu'ūm tak. ¹⁸ Axik pe ixe bu buje, okpot muy'at'an. Ibidopabok cēmcēm ibi bewi dak, jenūyekūnūykūnūy dak, ibaca'ūm e'em tak — io'e cebay. — Imēnpuye okpot otojot ekay. Ajēm awap "Axik cuy epeġujēm okpot pewi," i juk oce ewēju etaybitbinayū be. Imēnpit iba'ore o'e cebe ip imujēm ām — io'e Jesus pe.

¹⁹ — Eyetabut ġu Deus kay — io'e adeayū be. — Puġūn oġuy eyxe? Ade koato eyxe oġuy bima dak, kuka eyetabut'ūm ma epesop okay — io'e. — Yaypan'isuat cuy epetojot okay — io'e Jesus cebe ip.

²⁰ Imēnpuye yaypan'isuat o'tujowat ip.

Jesus co buje, axik yaypan'isuat o'ğukutukutu jijā. Ipi ju o'at. O'jejorojoro dak ipi ju. Ibidopabok o'jēm ibi bewi.

²¹ — Puju ku ite ekpot o'e imēn? — io'e Jesus cebay be.

²² — Bekin pin ma — io'e. — Ade em imuy'at'an daxa be. Imu'akōmkōm idibi be imuy'ūap ojuy. Etabotaidabotbon cuy eğuy ocekey — io'e. — Ocebuywan cuy ece ewebe i'e but pima — io'e.

²³ — "I'e but ewebe bima," i'ümğū juy ece! Okay etabut pima etaybit ece'e soat i'e but owebe iam — io'e Jesus.

²⁴ — Wetabut cīcā ġū — io'e cebay. — Wetabut-sū ma. Obuywan cuy ece wetabut cīcā am — io'e ya'ōberen ġebuje bit.

²⁵ Adeayū o'jedau cekay ijo am. Ixeyū jo buje, Jesus axik o'ğukorēm.

— Ejēm cuy cebewi — io'e wuyjuyū a'ōmu-ūmu'ūm'ukat pe, ya'ōpimu'ūmu'ūm'ukat pe. — Waram pit eōm ġū juy cebe — io'e.

²⁶ Ğebuje axik o'jewāwāwā ya'ōberen. Ixe dak yaypan'isuat o'ğukutukutu jijā. O'jēm cebewi. Yaypan'isuat ce'ūat puxim o'e. Imēnpuye:

— Oe'ū teku — io'e adeayū. Tūybe ce'ū iān o'e ip.

²⁷ Imēnpit Jesus yaypan'isuat o'subaixik. O'ğū-ağobucēğ. Yaypan'isuat o'āy. Xipat o'e.

²⁸ Uk'a be Jesus om puje, ceweju etaybitbinayū o'jekawēn ceweju.

— Apēnpuye ocewebe axik mujēm pa'ore o'e? — io'e ip.

²⁹ — Soat em ma Deus eju kawēnwēn'uk'ūm pima, iba'ore wuywebe ite buximat mujēm ām — Jesus o'e.

³⁰ - ³¹ Jesus waram ġuto je'ūap o'ğuwēn je'ūm awap. Jesus Galilēia eipi dağ oeku jeweju etaybitbinayū eju. Imutaybin ojuy ip oeku. Imēnpuye ibu'u o'e warara'acayū be itaybit am poce omuy iam.

— Soat waḡo òn — io'e. — Oùm ip okay itako-
maayū be — io'e Jesus. — Oaokam ip. Xepxep xet
kap puje bit, waram ocetait — io'e Jesus.

³² Imēn imutaybin ojuy o'e. Imēnpit pēḡape ite o'e
iam itaybit ḡu o'e ip. Ade em cuk adi o'e'e cebe: —
Ekawēn pa'arēm ocexe — i. Imēnpuye ibisūsūn o'e
ip “Pēḡape ēn e'em” i'e am cebe.

^{33 - 34} Ibocewi Jesus o'ju Cafarnaum ka be jeweju
etaybitbinayū eju.

E daḡ pima jewa'òxikxiḡ ip.

— Òn ma warara'acat podi ma wa'òbuyxiat! —
io'e ip soat.

Oexexe ip Cafarnaum ka be.

Ḡejuje Jesus o'jekawēn ceweju ip. Uk'a be bima
o'jekawēn ceweju ip.

— Apēn cuk epe'e eyewewebe e daḡ pima? —
io'e.

O'jede ḡu ip, e daḡ pima “Òn ma warara'acat
podi ma wa'òbuyxiat,” i juk o'e ip puye. O'jewemu-
sūsūn ip jede am.

³⁵ Jesus oabik.

— Eya'òpicūḡcūḡ cuy — io'e. — Yoboḡan pin
pima, yopičan cuy epesop. Soat puywatwan tak cuy
epesop — io'e Jesus.

³⁶ Ixe dak bekicat o'subuixik. O'tujuajēm cepida-
se ip. O'yakobot. O'jekawēn ma'ḡuto jeweju etaybit-
binayū eju.

³⁷ — Bekitkit xipan cuy epejukuk, eyju webekit-
kit puye — io'e. — Xipan bekitkit kuḡ pima, xipan
okuḡ tak epesop. Xipan okuḡ pima, xipan omudocat
kuḡ tak epesop — io'e Jesus.

³⁸ Ḡejuje João o'jekawēn Jesus eju.

— Kariwa — io'e. — Aḡokatkat cuk ocejojojo —
io'e. — Ibiòḡbuk kērēat mujēmujēm o'e ijodiacayū
bewi “Jesus a'òbi òn jemujēm,” i'e'em — io'e. —
“Imēnmēn ḡu bit,” i juk oce cebe, ixe wuyweju jeku-
ku'uk'ūm puye — io'e.

³⁹ Imēnpit Jesus o'jede:

— “Imēnmen ḡu bit,” i'ūmḡu juy epe'e cebe —

io'e. — Wa'ōbi wuywebe i'e ba'oreat mubapukpuḡ pima, dao ḡu kuka omuy — io'e. ⁴⁰ — Wuykay itakoma'ūmat wuykadiat — io'e. ⁴¹ — Icēmān ōn e'em eywebe. Wara'acat idibi tiūm eywebe tikōn ām eyju Cristo ebekitkit puye. Deus tak xipacat je'ḡūm cebe — io'e.

⁴² — Bekicat mubu'un puje okay itabut am, ikērēat mujurūḡrūḡ eyju, okay itabucat mubu'un puje. Imubu'un puje, Deus cuy ipiat supi'ajoat eykay. Imēn ey'e awap, xipat kuka juk o'e wita'a yaboḡat'a mukirik am eyaḡobu eju idibi be eymuakōm. Imubu'un'ūm pima Deus kuka juk ipiat o'supi'ajoat ḡu eywebe — io'e. ⁴³ — Eybum ikērēat mujurūḡrūḡ pima, epeyewebudakat cuy — io'e. — Xipat kuka o'e eyōm ām kabi be pūḡpu bima dak. Xipat ḡu kuka o'e eyōm ām ipiat'ajojoap pe xepxepu ma-daxa epirēm'ūmap pe — io'e. ⁴⁴ — (Iboce iohe ḡu-soat em ma ierep. Daxa dak jepirēm'rēm ḡu). ⁴⁵ Ikērēat mujurūḡrūḡ ām soat em eyju buje, epeyeweidakat cuy — io'e cebe. — Xipat kuka o'e eyōm ām kabi be eyeicuḡ tak. Xipat ḡu kuka o'e eywebe eyxik am ipiat'ajojoap pe xepxep im ma — io'e. ⁴⁶ — (Iboce iohe ḡu-soat em ierep. Daxa dak jepirēm'rēm ḡu). ⁴⁷ Eyetam ikērēat mujurūḡrūḡ pima, epeyeweta'uk cuy! — io'e. — Xipat kuka o'e eyōm ām kabi be pūḡ etam tak-soat ma Deus a'ō kay iap pe. Xipat ḡu kuka o'e eywebe eyxik am daxaboḡ pe xepxep eta bima — io'e. ⁴⁸ — (Iboce iohe ḡu-soat em ierep. Daxa dak jepirēm'rēm ḡu. Iboceayū soat em ipiatpi'ajojom e'em) — io'e Jesus.

⁴⁹ — Wuyju puybit muyunuyun iḡēmap puxim. Imēnpuxim Deus tak ipiat pi'ajoan wuywebe, wuywebe ikērēat mujurūḡap puxixim — io'e. ⁵⁰ — Kawta tayu bima, xipat cīcā. Tayu'ūm pima bit, xipat ḡu. Apēḡām tak takuḡ kuka acesop? Taxik am acā. Kawta tayuat pit xipat. Xipan cuy epeyewekuk eyju dak — io'e.

10 Jesus oajēm Judéia eipi kay. Jordāodi wīnā-bu oajēm.

Gebuje ade jījā wuyjuyū o'je'awero ma'guto Jesus kay. Adeayū mutaybitbin'uk osunuy iap puxim imutaybitbin ma'guto o'e waram. ² Fariseuyū oajēm. O'jekawēn ip ceweju ya'ōmukorēm ojuy.

— Wuyawēwēap ekawēn taḡ tu wuytayxi epereperem? — io'e ip Jesus pe.

³ — Apēn wuy'ajore Moisés o'e kuyje? — io'e.

⁴ — “Eytayxi epere ojuy bima otayxim ḡu ece ḡasū bit iaptup cuy epetupmubararak cekay,” i juk o'e Moisés — io'e ip. — “Epetupūm cebe eytayxi be. Tup ūm puje, xipat eytayxi epere am,” i juk o'e Moisés — io'e ip Jesus pe. — Itayxi epereap cūḡ ma osunuy Moisés xe. Pām exe? — io'e ip cebe ya'ōmuwarurunap ojuy.

⁵ — Moisés imēn o'e eybu'u jījā ya'ō daḡ jekum puye — io'e Jesus. ⁶ — Kuyje bit imēn ḡu o'e. Kuyje Deus soat o'ḡuḡē — io'e. — Aḡokatkat o'ḡuḡē, ayacat tak. Ixeyū o'ḡuḡē xepxem ma jekuku am. ⁷⁻⁸ Imēnpuye jetayxi bu buje, aḡokatkat cēmcēm jebay duk'a bewi. Jetayxi eju cucum. Jektop pu buje ayacat tak cēmcēm jexi duk'a bewi. Jektop eju cucum. Xepxep ma ip. Imēnpit pūḡat puxim ip o'e jewekuḡ soat em jeweweju ip cucum puye. ⁹ Deus xe ip pūḡ ma. Imēnpuye eytayxi juy epeyepere ḡu — io'e Jesus.

¹⁰ Ḡuyjom uk'a be oōm ma'guto Jesus, ceweju etaybitbinayū dak.

— Ekawēnpa'arēm ocexe — io'e ip Jesus pe. — Ocetayxi epeream cuy ocemutaybin — io'e ip cebe.

¹¹ — Aḡokatkat jetayxi epere buje wara'at pu am jetayxim, ikērēān e'em koapat pe-jetayxi be — io'e.

¹² — Imēnpuxim ayacat jektop epere buje wara'at pu am jektom, ikērēān e'em koapat pe jektop pe — io'e cebe ip.

¹³ Iboceayū je'iyū o'tujowat ip Jesus kay Deus cuy xipan jeykuk i'e am.

— Bekitkit ḡu juy epetujowat Jesus kay — io'e ceweju etaybitbinayū bit cebe ip.

¹⁴ Jesus itakoma o'e jeweju etaybitbinayū kay be-
kitkit tujowat ojuyacat o'ḡukorēm̄rēm̄ ip puye.

— “Bekitkit ḡu juy epetujowat Jesus kay,”
i'ūmḡu juy epe'e — io'e cebe ip. — Āḡ jeedot ip
okay — io'e. — Ixeyū buximayū jeeōm kabi be soat
Deus a'ō kay kūyjobit pima. Jeeōm ip ibu'u'ūm
puye ip Deus pe jekukan — io'e. ¹⁵ — Icēmān ōn
e'em eywebe. Bekitkit ibu'u ḡu Deus pe jekuk an.
Deus pe eykuk an eybu'u bima, Deus xe ḡu epesop
soat Deus a'ō kay kūyjobit pima — io'e.

¹⁶ Bekicat o'yakobot. O'jekawēn Deus eju.

— Bay, xipan cuy iteyū bekitkiyū ejukuk —
io'e.

¹⁷ Ibutut adeat o'ju Jesus kay. Jesus cu ojuy
bima aḡokatkat daudaum oajēm cekay- -yaypan'isuat.
O'jēḡ'aecōḡcōḡ cewap, Jesus ya'ōbuyxi cexe buye.

— Kariwa — io'e. — Ēn xipat cīcā. Soat em
Deus xe onuy pin wetait. Apēntak oce soat em cexe
onuy ām? — io'e Jesus pe.

¹⁸ — Apēnpuye ēn e'em owebe “Xipat cīcā
ēn,” i? — io'e. — Ka'ūmḡu xipacat- -Deus acā —
io'e. ¹⁹ — Kuy etaybit apēn Moisés o'e wuye'ajo-
joyū'ūm'ūm pe iam — io'e. — Imēn o'e: warara'a-
cat epeyaoka ḡu juy, i; wara'acat tayxi kay ḡu juy, i
dak; eybukuruḡ ḡu juy epesop, i dak; napa ḡu juy
epe'e, i dak; warara'acat epeḡuḡuykukuku ḡu juy, i
dak, xipan cuy eyebay epejukuk, eyxi dak, i dak.
Imēn Moisés o'e kuyje. Kuy etaybit ijom soan —
io'e Jesus.

²⁰ — Kariwa, soat ijop ekawēn taḡ ojekukuku be-
kin pin ma — io'e.

²¹ Jesus xe ibubut adeat ikukpin cīcā o'e.

— Wara'an puk ece ḡu — io'e. — Eju — io'e
ibubut adeat pe. — Soat ebubut cuy eteida. Ibo juy
dinheiro tei'ūma eḡūm tadaybocayū be — io'e. —
Imēn e'e buje, ade je'e ebubut kabi be — io'e. —
Imēn e'e buje juy ejot oweju — io'e Jesus.

²² Cekawēn co buje iḡuycūḡ cīcā o'e. Itakoma
dak o'e. Iḡuycūḡ ma o'jēm Jesus xewi ibubut ade
jijā buye. Tacup o'e jebubun. O'ju ḡu Jesus eju.

²³ Imēnpuye Jesus jakokoreren o'jeak adeayū kay. Ixe dak o'jekawēn jewēju etaybitbinayū eju.

— Iba'ore jījā ibubut adeat ōm ām kabi be — io'e. — Ibu'u jījā ip Deus a'ō kay am, itabut cīcā ip jebubut kay buye — io'e.

²⁴ Ceweju etaybitbinayū itabēgbēg o'e ip ijojom cekawēn co buje.

Imēnpuye Jesus o'jekawēn ma'guto ceweju ip.

— Tapupuyū, iba'ore jījā ijodiacat ōm ām kabi be. Ibu'u ip Deus a'ō kay am — io'e. ²⁵ — Camelo ikap pa'ore awi daobi'atok taḡ. Imēnpit ibodi ma iba'ore ibubut adeat ōm ām kabi be — io'e.

²⁶ Jewaḡuymuḡēgēm o'e ip.

— Abu be dak jewedaxijo but? — io'e ip.

²⁷ Ḡebuje Jesus o'jeak cekay ip.

— Wuywedaxijo ba'ore soat em Deus xe wuydop am — io'e cebe ip. — Deus pe bit wuydaxijo but. Soat i'e but Deus pe — io'e Jesus.

²⁸ — Kariwa! Kuy soat ocesuiwat eweju jeku am — io'e Pedro.

^{29 - 30} — Icēmān ōn e'em eywebe — io'e Jesus. — Eyju okay jījā. Eyju kawēn idipat muwēn pin cīcā soat kaka watwat pe. Imuwēgāp ojuy eybubut epere buje, ade epejat wara'at eybubun. Eyduk'a epere buje, ya'ade epeyabu eyduk'am- -100 beat'a. Eywaḡo epere buje, “owaḡo” i epe'e adeayū be- -100 beayū be. Eykitpit epere buje, “okitpit” i epe'e adeayū be- -100 beayū be. Eyxī epere buje “oxi” i epe'e adeayū be- -100 beayū be. Eyebay epere buje “webay” i epe'e adeayū be- -100 beayū be. Eyebekitkit epere buje, “webekitkit” i epe'e adeayū be- -100 beayū be. Eykat epere buje ade epejat eykan- -100 be. Warara'acayū je'e itakoma eykay. Ipiat supī'ajoat ip eywebe. Guyjom pit Deus xe epesop kabi be. Soat em epesop cexe eyetabēg — io'e. ³¹ — Ade ya'ōbuyxiayū'in yopīcayūm jeedop ip. Ade yopīcayū'in ya'ōbuyxiayūm jeedop ip — io'e Jesus.

³² Waram Jesus je'ūmap o'ḡuwēn. Jewēju etaybitbinayū eju cum o'e e daḡ Jerusalēm ka kay. Jesus o'ju koap. Ḡasū ixeyū o'ju tomuju. Yaḡuyba-

bi'üm'üm ip osodop. Iparara osodop ip warara'acayū ixe'yū nomujuayū. Jesus doze beayū o'tomuwā jewekay.

³³ — Eya'ōpicūg̃cūg̃ cuy epesop! — io'e cebe ip. — Jerusalém ka kay cum wuyju. Soat waḡo òn. Oùm ip okay itakomaayū be, paīyū kukukayū be, Moisés ekawēn imutaybitbin'ukayū be dak. “Ikērēat kuḡ ēn Deus xe, ocexe dak,” i je'e ip owebe — io'e. — “E-je'ū juy,” i je'e ip owebe — io'e. — Judeu'ūmayū be oùm ip — io'e. ³⁴ — Owaywayway jījā je'e ip. Jetakomaap pibun ip omuxi. Omupokupok ip. Ġebuje oaoka ip — io'e. — Xepxep xet kap puje bit, waram ḡuto ocetait — io'e Jesus.

³⁵ Ġebuje Tiago oajēm Jesus kay, João dak. Zebedeu ipotpoyū osodop ip.

— Kariwa — io'e ip. — Ocemuojuyjuy eḡūm ocewebe — io'e ip.

³⁶ — Ajo ojuyjuy eyju oxewi? — io'e Jesus.

³⁷ — Soat kūyjobit a'ō kay bima āḡ ocabik exe ixe'yū kuk am eweju- -pūḡ oce'in eba'at kadi, wara'at eba'ūḡat kadi — io'e ip. — Soat kūyjobit a'ō kay iap idip cīcā je'e — io'e ip.

³⁸ — Ap! — io'e. — Eyetaybit pun'ūma eyju iboap ojuyjuy oxewi. Apēn ipiat osupi'ajo iap puxim tu eyju dak epesupi'ajo? — io'e.

³⁹ — Hm hm — io'e ip. — Ocejū dak ipiat ocsupi'ajo ebuxim ma.

— Imēn ma — io'e. — Ipiatpi'ajojom pima bit, “Ipiat esupi'ajoat ḡu juy ocewebe,” i du epe'e? — io'e Jesus.

— Ap! “Ipiatpi'ajoat ḡu juy ocewebe,” i'ūmḡu oce'e! — io'e ip.

⁴⁰ — Ha'a — io'e Jesus. — Obuxim ma eyju dak ipiat epesupi'ajo — io'e. — Ōn ḡu bit e'em: “Abik cuy oba'at kadi oba'ūḡat kadi,” i. Webay imēn i'e but. Ixe ma oweju adeayū kukayū nuy ām o'ḡuxipan. Ixe ma je'e abuyū jabik iboce iap — io'e Jesus.

⁴¹ Xepxepayū ekawēn co buje, warara'acayū ce-weju etaybitbinayū itakoma o'e ip cekay ip- -Tiago

kay, João kay dak. ⁴² Imēnpuye: — Epesot cuy okay — io'e Jesus cebe ip.

— Eyetaybit Judeu'ūmayū kukukayū soat em ya'ōpuruḡ jebekitkiyū mujujum iam — io'e cebe ip. — Kukukayū soat em e'em "Oca'ōbuyxi jījā," i. Biḡ ma ip jebekitkiyū mukapikpiḡ," io'e. ⁴³ — Eyju bit-imēn ḡu juy epeyewekuk. Kariwaboḡ pin pima, warara'acat puywatwan cuy epesop! — io'e. ⁴⁴ — Ya'ōbuyxian pin pima, tei'ūma epeyekapik cuy warara'acat peam — io'e Jesus. ⁴⁵ — Imēntak soat waḡo ōn. Warara'acat pe obuywat am ḡu ojet ijodi. Warara'acat puywatwat'ukan ojet. Adeayū daxijo am ma ojet. Soat em itabēḡ jeedop ip kabi be, oje'ū buye — io'e.

⁴⁶ Ibocewi Jesus oajēm Jericó ka be jeweju etaybitbinayū eju. O'jēm ip Jericó ka bewi wuyjuyūxirixiri eju.

Ḡe buje Jesus oajēm ita'ūmat kay. Ita'ūmat xik'i osunuy e bitakobe. Ibutet Bartimeu i osunuy. Timeu ipot osunuy. Kapkamayū xewi dinheiro ojuyjuy'uk osunuy ita'ūm puye.

⁴⁷ — Jesus Nazareno omuyku — io'e ip kapkamayū Bartimeu be.

Iboap co buje, ita'ūmat o'jewāwā Jesus kay. O'jewāwā ya'ōberen.

— Jesus! Ēn Davi'ūm naxeḡebit — io'e. — Wuye'ajojoyū'ūm'ūm kukukat naxeḡebit — io'e. — Etabotaidabotbon cuy eḡuy okay! — i o'jewāwā ya'ōberen.

⁴⁸ Imēnpuye adeayū ita'ūmat o'ḡukorēm.

— Ecemūḡ! — io'e ip. — Ecewāwā ḡu juy! — io'e adeayū Bartimeu be.

Imēnpit biḡ ma o'jewāwā ya'ōberen.

— Jesus! Davi'ūm naxeḡebit! Etabotaidabotbon cuy eḡuy okay — io'e.

⁴⁹ Ibocewi Jesus o'jecū e bidase.

— Ita'ūmat cuy etomuwā — io'e Jesus adeayū be.

Ita'ūmat o'tomuwā ip.

— Epararam ḡu eḡuy! — io'e ip cebe. — E'āy. Jesus enomuwāwām — io'e ip ita'ūmat pe.

⁵⁰ Bartimeu jeekabek o'joxik ġebuġe jecokcok pi-
bun. Dao ma o'āy. Jesus kay o'jedau.

⁵¹ — Ajo-kay ħn oxewi? — io'e Jesus ita'ūmat
pe.

— Ocemutaybitbin'ukat, wecoat pin oce! — io'e
ita'ūmat.

Ġebuġe Jesus o'jekawħn ita'ūmat eju.

⁵² — Eceptit cuy eduk'a kay — io'e. — Kuy
ece'ada okay etabut puye — io'e Jesus.

Ita'ūm tūibit o'jecoan ġebuġe bit. Dao ma o'e
ijojeom. Xipan o'jojojo. Ixe dak o'ju Jesus eju e daġ.

11 Jesusyū oajħm Jerusalħm ka be. Jerusalħm
ka tġġ pima ip oajħm Betfagġ ka tġġ, Betānia
ka tġġ tak, Oliveira dip'a tġġ tak. Jesus xepxep je-
weju etaybitbinayū o'ġuju ikaboġatka be-
Jerusalħm ka be.

² — Epeju juy aġoka kay- -wuywapatka kay —
io'e cebe ip. — Eyajħm'isu ma jumento epetobuxik-
yaypan'isuat, ikirikat, yakpi jeje ibit'ūmat. Epeġu-
wekap cuy — io'e. — Epetojot cuy okay — io'e cebe
ip. ³ — “Apħnpuye eyju jumento dujowan?” i'e buje
eywebe ijoceat, “Ocekariwa buk cekay darem ma,” i
juy epe'e cebe. “Ġaxħn ma waram očetujupit eykay,”
i juy epe'e cebe — io'e Jesus.

⁴ O'ju ip. Oajħm ip jumento kay. Jumento o'to-
buxik ip- -yaypan'isuat. Uk'a ukpibubu be o'tobuxik
ip. Ikirik xħntabi be o'tobuxik ip. O'ġuwekap ip.

⁵ — Apħnpuye eyju jumento dujowan? — io'e
iboceayū cebe ip.

⁶ — Ocekariwa buk cekay darem ma — io'e ip.
— Ġaxħn ma waram očetujupit eykay — io'e xep-
xepayū cebe ip.

— Ha'a. Epetujowat — io'e iboceayū xepxepayū
be.

⁷ Jumento o'tujowat ip Jesus kay. Jeekabek ip
o'jomōġ jumento ukxabi jeje. Jesus oabik iekabek
ceje jumento ukxabi jeje. ⁸ Adeayū jeekabek o'ġu-
payapaya ip Jesus aġħmap taġ e daġ. Warara'acayū

uktup o'tuptakat koğünpi dağatup. O'tupmōgmōg ip e dağ.

— Wuyekabek ajomōg cuy e dağ — io'e ip. — Ya'ōbuyxiat omuyku! Uktup atupmōg ixe dobede am — io'e ip jewewebe.

⁹ Jesus wap iju'ibiyū o'jewāwā ya'ōberen icokkok cīcā buye, tomujuayū dak.

— Deus xipat cīcā! — io'e ip. — Teku omuyku Deus a'ōbi! — io'e ip ya'ōberen. — Deus a'ōbacaap kuğ teku! Teku xipat cīcā — io'e ip. ¹⁰ — Teku ijo-diacat kukukan jeenuy apēn cuk adi Davi wuy'ajo-reyū kukukan osunuy iap puxim. Deus ya'ōbuyxi jījā. Idir cīcā! — io'e ip Jesus mucokcokcoğ.

¹¹ Ğe buje Jesus oajēm Jerusalēm ka be. Oōm Deus eju kawēnwēnap'a be -yaboğat'a be. O'jeak soat kay- -uk'a beat kay. O'ju jewēju etaybitbinayū eju, Betânia ka be jexet am. O'ju ip katpuje jījā buye. Xet. O'xet ip Betânia ka be.

¹² Kuyaje Jesusyū o'jēm Betânia ka bewi. Cucum pima Jesus ire o'e. ¹³ Wūy wi figueira'ip o'yopcoco- -yoptuptepat'ip. Yajom o'ju ya'a'e paxi iam. Yop xe yajēm puje o'yadobuxik ğu. Tup acā o'tuptobuxik ya'a'e ğu buk puye.

¹⁴ Ğasū bit a'a'e ğu ecesūy wuyjuyū be ya'oap puxim! — io'e Jesus yop pe.

Ceweju etaybitbinayū iboap o'ya'ijojo ip.

¹⁵ Ğe buje Jesusyū oajēm ma'ğuto Jerusalēm ka be. Oōm ip Deus eju kawēnwēnap'a be -yaboğat'a be. Itakoma o'e wuyjuyū muğyukukuku'ukayū kay- -uk'a eaki korerenayū kay. Puca deidada'ukayū o'ğujēm uk'a bewi, puca bubu'ukayū dak. Wūn'i. Jesus dinheiro mutrokakan'ukayū emesa o'ğuy'at. Wūn'i. Pukaso deidada'ukayū abikbikap tak o'ğuy'at jetakoma pibun.

¹⁶ — Ğasū bit cuy eybubut epetujukap ğu Deus eju kawēnwēnap'a dağ -yaboğat'a dağ — io'e ya'ō-puruğ cebe ip.

¹⁷ Uk'a beayū mutaybitbin o'e.

— Imēn e'em Deus kawētup:

Oduk'a soat ka daḡwiacat oweju kawēnwēnap'am je'e, i'e'em Deus ekawēntup.

Imēn e'em Deus ekawēntup — io'e Jesus. — Eyju bit oduk'a be ajēmjēmayū muḡuykukukum dinheiro bu am. Imēn oduk'a epeyamuwexat ibukurukat dopdopap'am — io'e.

¹⁸ Jesus ekawēn o'ya'ijojo paīyū kukukayū, Moisés ekawēn imutaybitbin'ukayū dak. Itakoma jijā o'e ip cekay. "Apēntak Jesus aceyaoka?" iap kay ip o'jewaguy. Adeayū bit "Jesus itaybit cīcā Deus ekawēn ocemutaybit am" i'e'e'uk osodop ip. Imēnpuye paīyū kukukayū iparara o'e ip Jesus aokaap puxim.

— Apēn tak iba'arēm ma Jesus aceyaoka? — io'e ip jewewebe.

¹⁹ Katpuje Jesusyū o'jēm ikaboḡatka bewi. O'jepit ip Betânia ka be jexet am. Xet. O'xet ip.

²⁰ Kabia'isu ma o'kop ip. O'jēm ip ma'ḡuto. O'kap ip figueira'ip tēḡ ma. O'yopkaraw ḡasū bit tābu daḡwi. ²¹ Pedro ḡebum o'e "Ḡasū bit a'a'e ḡu ece-sūy" io'e iap kay.

— Ocemutaybitbin'ukat, ak'i ece! — io'e Pedro. — Eyopmukorēmiat'ip o'yopkaraw-figueira'ip — io'e.

²² — Eyetabun cuy epesop Deus kay! — io'e Jesus. ²³ — Deus kay eyetabut pima, "Wedede ece ijocewi" i'e but eywebe co'a be, "Idixidi be juy aakōm" i dak — io'e. — Eyetabut pima, Deus co'a yamuakōm idixidi be — io'e. — "Yaakōm paxi?" i ey'e'ūm pima, yamuakōm tak — io'e. ²⁴ — Deus xewi iojuy buje, eyetabun cuy epesop "Ite ma Deus je'ḡūm owebe" iap kay. Eyetabut pima, epejat ma — io'e. ²⁵ — Deus eju kawēnwēn pima, eyaḡuyba'ūm cuy epesop apēn cuk adi wara'acat pe ikērēm eykuk iap kay. Eyaḡuyba'ūm puje, eyebay dak kabi beat yaḡuyba'ūm apēn cuk adi ikērēat epeḡuḡē iap kay. Ikērēat ju'uk eywebewi — io'e Jesus. ²⁶ — (Apēn cuk adi warara'acat pe ikērēm eykuk iap kay eyaḡuyba'ūm-ūm pima bit, Deus tak yaḡuyba'ūm ḡu apēn cuk adi ikērēat epeḡuḡē iap kay) — io'e Jesus.

²⁷ Oajēm ma'ğuto ip Jerusalēm ka be. Deus eju kawēnwēnap'a ekorara be xīğxīğ pima paīyū kukukayū o'ju Jesusyū kay, Moisés ekawēn imutaybitbin'ukayū dak, Judeuyū kukukayū dak.

^{28 - 30} — Abu-a'ōbi ija'a becat eğujēm? — io'e ip Jesus pe. — Abu dak “Eğujēm cuy,” i juk o'e ewebe? — io'e ip cebe.

— Abu-a'ōbi João Batista'ūm ijocecat mubatisasan'uk osunuy? — io'e Jesus. — Deus a'ōbi du? Ijodiat a'ōbi ġu xe'e? — io'e cebe ip. — Owebe iboap muwēn puje, ōn tak abu-a'ōbi ōn jekukum iap oğuwēn eywebe — io'e Jesus.

³¹ Iboap co buje o'jekawēn cīcā ip jeweweju.

— Apēn kuka ace cebe? — io'e ip jewewebe. — “Deus a'ōbi” i wuy'e buje, “Apēnpuye dak eyetabut ġu epesop cekay?” i kuka o'e Jesus wuywebe — io'e ip jewewebe. ³² — “Ijodiat a'ōbi,” i wuy'e buje bit, adeayū kuka itakoma jījā o'e wuykay — io'e ip. — Soat ip itabut João Batista'ūm Deus a'ōbi oekuku iap kay — io'e ip jewewebe.

³³ Imēnpuye:

— Ocetaybit ġu — io'e ip Jesus pe.

— Ka — io'e. — Abu-a'ōbi João Batista oeku iap epeğuwēn ġu owebe. Ōn tak abu-a'ōbi ōn jekukum iap oğuwēn ġu eywebe — io'e.

12

Guyjom Jesus wuymutaybitbinap ekawēn o'ğuwēn cebe ip.

— Ağokatkat uvadip o'tiptaida — io'e Jesus. — Tiptaida buje, korara o'ğugē. Uvadip koreren korara o'jomuy. Uva'abidi muwesōğsōğap o'ğugē. Uvadip wiwiap'a o'yamuy -umat'a. Warara'acayū o'jomuy tip wiwi an. Uva'a'in kuka o'yaūm tipwiwi'ukayū be ya'ade tip wiwiapteim. Wara'at'a'in kuka o'yabu jexat'am. Kadai iwat wara'at ka kay o'ju.

² — Yabubuap ekaxi ajēm puje, kadai iwat jebuywatwat'ukayū o'ğuju tip wiwi'ukayū kay jekadai'a bu am.

— “Oxat'a juy epeyadujupit okay,” io'e cebe ip — io'e Jesus.

³ — Imēnpit tip wiwi'ukayū ibuywatwat'ukayū o'jat. O'yaokaka ip. Ibui puḡ ma ip o'ḡuypit kadai iwat kay. Oajēm ip — io'e Jesus.

⁴ — Waram ḡuto wara'at jebuywatwat'ukat o'ḡuju. O'yamupāupā ip. Warēmtooksuḡ ip o'e cebe. O'jepit ip jebui puḡ ma kadai iwat kay — io'e Jesus.

⁵ — Waram ḡuto warara'acayū jebuywatwat'ukayū o'ḡujuju. Pūḡpūḡpūḡ ma imujujum. Imēn ma ikērēm ip o'jukuk. Pūḡpūḡ o'yamupāupā ip. Warara'acayū o'yaokaka ip. Poḡ. Oe'ū'ū ip. O'jepit ip jebui puḡ ma kadai iwat kay — io'e Jesus.

⁶ — Pūḡ ma o'jepoyat cexe- -ipot acā — io'e Jesus. — Cexe ikukpin cīcā osunuy. Amām jekpot ma o'ḡuju.

— “Ibuyxim ip okpot jukuk,” kadai iwat o'e jewebe ma — io'e Jesus.

⁷ — Imēnpit uvadip wiwi'ukayū o'jekawēn jeweweju. “Ak'i! Kadai iwat ipot omuyku!” io'e ip jewewebe. “Cebay e'ū buje, ite ma kadai iwan je'e. Ga'a ayaoka. Wuyju ma uva dip iwan ace'e!” io'e ip jewewebe — io'e Jesus.

⁸ — Gebuje ipot o'jat ip. O'yaoka ip. Poḡ. Oe'ū. Xik. Ijebit o'joxik ip uvadip pewi — io'e Jesus. Imēn wuymutaybitbinap ekawēn o'ḡuwēn cebe ip.

⁹ — “Āḡ puk jeedop ip,” i du je'e uvadip iwat? — io'e Jesus Judeuyū kukukayū be. — Imēn ḡu je'e! Ixe je'ju jekadaidip wiwi'ukayū aoka am — io'e. — Warara'acayū jomuy uvadip wiwian — io'e. ¹⁰ — Imēn e'em Deus ekawēntup:

Uk'a muymuy'ukayū o'e “Ite'a xipat ḡu wita'a,” i, i. Yakērē o'e cexe ip, i. O'yaxik ip, i. Warara'acat pit o'e “Ite'a yadip ma,” i, i. Uk'a muycemucemap'am o'e, i. ¹¹ Iboap xipat cīcā wuyxe, Deus imēn o'e buye, i'e'em Deus ekawēntup.

Iboaptup epetupcoco ḡu du? — io'e Jesus cebe ip- -Judeuyū kukukayū be.

¹² Iboap ekawēn co buje:

— “O'yaxik'iaiyū buxim eyju!” i'e ojuy osunuy Jesus wuywebe — io'e ip jewewebe. — “Tip ipot

o'yaoka'iaiyū buxim eyju" i'e ojuy osunuy wuywebe — io'e ip jewewebe.

Jesus daomūn ojuy o'e ip. Imēnpit iparara o'e ip ixe daomūnap puxim adeayū buxim iparara buye. Imēnpuye Jesus o'suiwat ip- taomūn ojuyayū. Ixeyū dak o'jēm.

¹³ Ğebuje Judeuyū kukukayū Fariseuyū o'ğuju ip Jesus kay. Iecuğap Herodes ebekitkit tak o'ğuju ip cekay. Ixeyū o'ğuju ip Jesus a'ōmuwarurun ojuy. "Ēn iecuğap muymuy" i'e ojuy osodop ip. ¹⁴ Oajēm ip.

— Kariwa — io'e ip. — Soat em ēn icēmān e'em — io'e ip. — Apēn Deus ibikuy ocewebe jeku am iam ēn ocemutaybitbin — io'e ip. — "Iğo du xipat exe?" i'ūmğu ēn e'em warara'acat pe emutaybit am. Kacūğ kadiat cocoap tomuju ğu ēn e'em "Teku xipat" i — io'e ip. — Roma ka kukat wuyedinheiro ojuyjuy cebe teidadam- -César be. Teida buje wuyawēwēap ekawēn tağ ğu kuka ajeku? ¹⁵ Aceteida xe'e? Aceteida ğu xe'e? — io'e ip.

César ip o'jomuyat pin Jesus pe. Imēnpit Jesus itaybit o'e wa'ōmuwarurun ojuy ip iam.

— Apēnpuye eyju wa'ōmuwarurun ojuy? — io'e. — Dinheiro isurūğat cuy epetojot owebe. Ojojo buk — io'e Jesus.

¹⁶ Dinheiro isurūğat o'tojot ip cekay.

— Abu-biōğbuk ija be dinheiro be? — io'e. — Abu-butet tak ija be? — Jesus o'e.

— César biōğbuk, ibutet tak — io'e ip.

¹⁷ — Cemuojujuy epeğm César be- wuyeipi kukat pe — io'e. — Deus pe dak cuy epeğm cemuojujuy — io'e Jesus.

— Itaybitbin ma o'jede — io'e ip jewewebe. Iba'ore o'e ip cebe ya'ōbu am.

¹⁸ Saduceuyū o'ju Jesus kay ğebuje bit. Tūybe wuye'ū buje waram acejetait ğu iān o'e ip. O'jeka-wēn ip ceweju.

¹⁹ — Ocemutaybitbin'ukat — io'e ip. — Imēn Moisés wuymutaybitbin:

Iwaḡo e'ū buje, jekitpit jewebumūn
 cuy jewaḡo'ūm tayxibuk eju itayxibuk
 i'it'et'ūm pima, i. I'itkap puje,
 iwaḡo'ūm ipot tieḡ kuka o'e i'it, i.

Imēn Moisés o'ḡutaybin kuyje — io'e ip. — Imēn
 e'em Deus ekawēntup — io'e ip. ²⁰ — 7 be ikitpit-
 piyū osodop ip — io'e ip. — Koapat o'jewebumūn.
 Ixe koapat'ūm jekpotpet'ūm puxen ma oe'ū — io'e
 ip. ²¹ — Ḡe buje ikitpit o'jewebumūn jewaḡo'ūm tay-
 xibuk eju. Ixe tomujuat'ūm tak jekpotpet'ūm puxen
 ma oe'ū. Imēnpuxim ma oe'ū wara'at'ūm ikitpit'ūm
 tomujuat'ūm — io'e ip. ²² — Ibocewi 7 beayū soat
 o'jewebumūnmūn ip jewaḡo'ūm tayxibuk eju-
 -pūḡ eju ma. Soat ip oe'ū'ū jekpotpet'ūm puxen ma. Soat
 oe'ū ip pima, ayacat'ūm tak oe'ū — io'e ip. ²³ —
 Waram ce'ū'ūayū etait puje, abu-tayxim xe'e je'e?
 — io'e ip. — Soat 7 beayū o'jewebumūnmūn ip ce-
 weju — io'e ip Jesus pe ya'ōbuap ojuy.

²⁴ — Ijo'i ḡu eyju e'em iboam — io'e Jesus. —
 Cedaḡ ḡu eyju jewaḡuyḡuy. Eyetaybit ḡu Deus eka-
 wēn. Eyetaybit ḡu Deus warara'acat podi ma ja'ō-
 bacaap kuḡ iam — io'e. ²⁵ — Waram jetait puje,
 wuyjuyū jewebumūnmūn ḡu ip — io'e. — Kabi beat
 co'i ip je'e-Deus ekawēn tojotjot'ukat co'i — io'e
 Jesus. ²⁶ — Moisés emudupmubararaktup epetupcoco
 ḡu du- -wuye'ū buje waram acejetait iatup? — io'e.
 — Deus ekawēn ibararak opop kadai o'jedipesop i-
 aptup pe. Deus o'e Moisés pe:

On Deus, i. Abraão itabut mabuk
 okay, Isaque dak, Jacó dak, i.

Imēn Deus o'e Moisés pe. Kuyje ixeyū'ūm'ūm oe'ū-
 -Abraão'ūm, Isaque'ūm tak, Jacó'ūm tak. Imēnpit:
 "Itabut mabuk ip okay," io'e Deus — io'e Jesus.
²⁷ — "Itabut ip okay," io'e Deus, waram ḡuto ip o'-
 jetait puye. Ce'ū'ūayū ḡu itabut Deus kay-
 -itabēḡayū acā. Cedaḡ ḡu jījā eyju e'em. "Wuye'ū
 buje waram ḡu acejetait," i te'e ma eyju e'em —
 io'e.

²⁸ Moisés ekawên imutaybitbin'ukat kuy juk oajêm Jesus kay. Jesus ekawên o'ya'ïjo-ya'öbu ojuyayū eju iap ekawên.

— Aiyuuui! Itaybitbit cîcâ o'jede — io'e jexeayū be. — Moisés ade ma wuymutaybitbin cedağ wuyeku am Deus etabutpe iam — io'e Jesus pe. — Pu ġu ixe ekawên'in yoboğ cîcâ wuymukūyjobit am? — io'e.

²⁹ — Imên Moisés o'e — io'e Jesus.

Eya'öpicūğcūğ cuy epesop, Israel na-xeğebitbit, i. Pūğ ma Deusat, i. Ixe kay wuyetabut, i. Ka'ümğü wara'at deus, i. ³⁰ Deus cuy ikukpin cîcâ epejukuk, i. Warara'acat kukpinap podi ma juy epéjukuk. Eyxe ikukpin cîcâ buye, ibikuyap tağ cuy epeku soat em; xipacat kay dak cuy epesop ġebum; kapikpiğ tak cuy epesop cebeam, i.

Imên Moisés wuymutaybitbin — io'e Jesus. ³¹ — Wara'at tak ixe ekawên'in yoboğ cîcâ wuymukūyjobit am.

Imên o'e:

Xipan cuy warara'acat epejukuk eye-wekukap puxim ma, i — io'e Jesus.

— Ade ma Moisés wuymutaybitbin. Ijop ekawên'in kay bit cuy kūyjobin cîcâ ma epesop — io'e Jesus.

³² Ğebu je Moisés ekawên imutaybitbin'ukat o'e:

— Kariwa — io'e Jesus pe. — Etaybitbit ma ên e'em — io'e. — Icēmân ên e'em — io'e. — Pūğ ma Deusat omuy. Ka'ümğü wara'at deusat — io'e. ³³ — Ikukpin cuy Deus ajukuk warara'acat kukpinap podi ma — io'e. — Wuyxe ikukpin. puye, ibikuyap tağ cuy ajeku soat em; xipacat kay dak cuy ajop ġebum; kapikpiğ tak cuy ajop cebeam — io'e. — Xipan tak cuy warara'acat ajukuk wuyewekukap puxim — io'e. — Deus icokcok e'em wuywebe wūnca ūm puje paīyū be imupik am cetabixe. Ibodi ma bit icokcok e'em wuywebe xipan warara'acat kuk puje wuyewekukap puxim — io'e. — Wuyxe ikukpin cîcâ bima dak **icokcok cîcâ e'em** — io'e.

³⁴ Ya'ôetaybit o'jede iap co buje, Jesus o'e cebe:
— Wûy ġu ên Deus ka wi — io'e. — Jekûyjobin
ojuy ên Deus a'ô kay — io'e.

— Abu be jede but Jesus pe? — io'e ip soat
ya'ïjo'ibiyû Jesus edeap co buje.

³⁵ Ibocewi Jesus wuyjuyû mutaybitbin o'e Deus
eju kawênwênap'a be- -yaboġat'a be.

— Apênpuye “Cristo Davi naxeġebit- -Deus emunaē,”
i'e'em Moisés ekawên eymutaybitbin'ukayû?
— io'e Jesus. ³⁶ — Davi o'jekawên Deus biôġbuk a'ô-
bi. Imên ixē e'em ixē emudupmubararak tup pe:

Cristo okukat- -Deus emunaē, i. Deus
o'jekawên Cristo be, i. Xik'i. Ekay
itakomaayû a'ôbacaap cuy oġu'ûm,
io'e, i. A'ô kay kûyjobin jeedop ip,
io'e, i. Ên ixeyû kukan'ûm pima oxē
ma juy eġuy, io'e, i.

Imên Davi kuyje o'tupmubararak Deus biôġbuk a'ôbi
— io'e Jesus. ³⁷ — “Ên ma okukukat,” io'e Davi
Cristo be- -Deus emunaē be. Imênpuye ibapuk ma
wuyxe Davi naxeġebit acā ġu Cristo osunuy- -Davi
kukukat tak osunuy — io'e Jesus.

Adeayû icokcok cîcā ip o'e Jesus ekawên co bu-
je.

³⁸⁻³⁹ — Moisés ekawên eymutaybitbin'ukayû eku-
kuap puxim ġu juy epeku — io'e Jesus adeayû be.
— Eymuġyukukukum ip. Jesay iwaruat kuġ ip jeku-
kum warara'acat muyak am jekay. Jewexe ip ya'ô-
buyxi jîjā. Soat etabutpe ce'aweroroap pe warara'a-
cayû ya'ôbuyxim jewēju ip kawênwên pima, icokcok
e'em ip — io'e. — Kariwayayû abikbikap pe yabik
pin ip Deus eju kawênwênap'a be. Petatam pima
icokcok e'em ip koap jekôn âm kariwawa ekôn'ûm
awap ma — io'e. ⁴⁰ — Itayxibuk muġyukukukum ip
ibubut pu am — io'e. — Ibun ma ip jewexe kawên-
wên Deus eju “Teku ya'ôbuyxiat” i'e ojuy warara'a-
cat pe. Deus pit ipiat supi'ajoat ixeyû be warara'a-
cat pe ipiat supi'ajoat podi ma — io'e Jesus.

⁴¹ Ğebuĵe Jesus oajēm dinheiro mūn'a kay. Ya tēg ma oabik Deus eĵu kawēnwēnap'a be -yaboĝat'a be. Iboce ajēmĵemayū jojom o'e ya be jedinheiro mōgmōĝayū jojom. Ibubut adeayū dinheiro mōgmōĝ ip o'e ade.

⁴² Ğebuĵe itop'ūm e'ū'ibit oajēm-ibubut kuĝ-ūmat. Dinheiro isurūĝat o'jomōĝ ya be xepxep. Ixeyū xepxep isurūĝat tei'īt ma osodop. ⁴³⁻⁴⁴ Jesus o'jekawēn jeweĵu etaybitbinayū eĵu.

— Ak'i ĵuy epesop ixē ayacat kay-ibubut kuĝ'ūmat kay- -itop'ūm e'ū'ibit kay — io'e. — Ixeyū ma ade jexewiat'in o'jomōĝ dinheiro ibubut adeayū — io'e. — Deus xe bit ade ĝu o'jomōĝ ip. Ade kuĝ mabuk ip. Ixē ayacat yopīt ma o'jomōĝ jedinheiro. Deus xe bit ade ĵĵā o'jomōĝ, soat jexewiat o'jomōĝ puye- jexat puap ojuy ma o'jomōĝ puye — io'e. — Aĵo-kuĝ ĝasū ixē ayacat? Ka'ūma kuĝ ma! Imēnpuye Deus xe ixē ayacat warara'acat pe o'jomōĝiap podi ma o'jomōĝ — io'e Jesus.

13 Deus eĵu kawēnwēnap'a bewi Jesus cēm puje, ceweĵu etaybitbinat o'jekawēn ceweĵu uk'a jojom pima.

— Kariwa, ak'i ĵuy ece! — io'e. — Wita'a yaboĝ cīcā ĝu du? Uk'a yadip cīcā! — io'e.

² — Ite'a yadip cīcā du exe? Xipat cīcā du ite'a exe? — io'e Jesus. — Xepxep'a jewa'atēĝtēĝ ĝu je'e wita'a. Soat'a je'aedu — io'e Jesus.

³ Ğuyjom Jesus oabik Oliveira dip'a bicūĝpe-co'a bicūĝpe. Oabik Deus eĵu kawēnwēnap'a weĝūn-yaboĝat'a weĝūn. Ebadipdip ceweĵu etaybitbinayū o'jekawēn ceweĵu. Jaĝepūĝ pima Pedro o'jekawēn ceweĵu, Tiago dak, João dak, André dak- ebadipdip.

⁴ — Puĝūn soat'a je'aedu? Aĵo je'bapuk iboap em pima? Aĵo ĝubapuk Deus je'aedu awap? — io'e ip.

⁵⁻⁶ Ğebuĵe Jesus ixeyū o'ĝutaybin.

— Adeayū omuyku "Deus omudot," i napa ma e'em warara'acayū be. "Jesus Cristo ōn," i napa ma

je'e ip soat pe. Ixeyū ade ġuġuykuku. Imēneju eyday'em'um cuy epesop ixeyū be eymuġuykukuap puxim! — io'e. ⁷ — “Jenopaġōġōm ip ijoxin ma,” i warara'acayū e'em pima, “Jenopaġōġōm ip wūyat eipi be,” i'e'em pima dak, eypararam ġu juy epesop. Imēn cuy je'bapuk. Imēnpit soat puk oi'ūm ġu — io'e. ⁸ — Pūġ eipi watwat nopaġōġōm je'e wara'at eipi watwat eju. Pūġ ka watwat nopaġōġōm je'e wara'at ka watwat eju. Ipi jexixi ijoce, iboce dak soat ka daġ. Reren cīcā je'e ip soat ka daġ. Yopit ma ipiat supi'ajo ip koam ipi daġayū. I'itpin'isumapi jo'ma je'e koam. Ġuyjom pit ipiat supi'ajo jījā ma ip — io'e. ⁹ — Eyday'em'um cuy epesop ixeyū be eymuġuykukuap puxim — io'e. — Eykay itakomaayū jeydaomūn. Jeydujowat ip ibimāmāayū ekawēn coco'ukayū be. Jeymupokupok ip Deus eju kawēnwēnap'a be. Jeydujowat ip iecuġapyū etabixe, ipi kukukayū etabixe dak, eyetabut okay buye. Kawēn idipat epeġuwēn cebe ip — io'e. ¹⁰ — Kawēn idipan soat ka daġayū mukūyjojom'ūm pima, ipi buk i'ūm ġu. ¹¹ Jeydaomūn ip. Ika kukukayū etabixe ip eydujowat puje, eyaġuybabi'ūm ġu juy epesop. “Apēn paxi oce'e?” i'ūmġu juy epe'e. Ixeyū etabixe buje, Deus ma jeymutaybin apēn epe'e iam. Eya bewi ġu juy epeġuwēn. Deus biōġbuk cuy jeymutaybin imuwēn ām — io'e. ¹² — Ixe kabia bima adeayū jebadipyū kay itakoma je'e, ixeyū webekitkit puye. Iwaġo jekitpit je'ġūm cekay itakomaayū be yaoka am. Ikitpit tak jewaġo je'ġūm yaoka am. Cebayū dak jekpot je'ġūm cebe ip yaoka am. Ipotpetayū dak itakoma je'e jebay kay. Jebay je'ġūm ip cebe yaoka am — io'e. ¹³ — Soat itabut'ūmayū itakoma jījā je'e eykay, eyetabut okay buye. Ipiatpi'ajojom ma'ġu eybu'u ġu okay bima, Deus jeydaxijo. Jeydakoy jexeam — io'e.

¹⁴ — Ipararu jījāat epejojo — io'e. — Imōġpiat pe jeedop-Deus eju kawēnwēnap'a be — io'e. — (Eyetarybin cuy epesop ijjudup coco'ukayū!). Ipararu jījāat iġo'a be bima, jenapōn cuy ip co'a bicūġ kay Judéia eipi watwat — io'e. ¹⁵ — Eyduk'a eakiju bima, epeōm ġu juy eyduk'a be yabeat pum — io'e.

¹⁶ — Eykat pe bima, epeyepit ġu juy eyduk'a kay eyesay bum — io'e. ¹⁷ — Ixeyū kabia daġ iba'ore jījā je'e yukreġayū enapōn ām, je'it mutitinayū enapōn ām tak. ¹⁸ “Ihi bima ġu juy ixeyū eġudot ipiatpi'ajo an ocewebe,” i juy epe'e Deus pe. ¹⁹ — Ixeyū kabia daġ soat ipi daġayū ipiat supi'ajojo jījā. Ibitpi bit ipiat asupi'ajo ġu Deus pe ipi mubapuk isum — io'e. — Waram pit ibitpi ġu acesupi'ajo-ixeyū kabia daġ acā — io'e. ²⁰ — Deus pe ipiatpi'ajojoap kabia mu'ūm'ūm pima, ka'ūma kuka o'jewedaxijo. Imēn-pit: “Pūġpūġ kabia acā ipi watwat supi'ajojo,” io'e Deus kuy bima. “Pūġpūġ kabia acā,” io'e Deus, taxi-jo am o'taē'iyū ikukpin cīcā cexe buye — io'e.

²¹ — Wara'acat je'e eywebe napa ma “Ak'! Teku Cristo- -wuydaxijojo'ukan Deus emunaē,” i. “Ak'! Ġoku Cristo,” i dak je'e. Imēn i'e buje, eyeta-bun ġu juy epesop ixeyū ekawēn kay — io'e. ²² — Jewexe Deus emunaēhēyū jebapuk, jewexe Deus eka-wēn muwēnuwēn'ukayū dak. Wuymucoatcoanap ġu-bapuk ip Deus emunaēhēyū muġuykuku ojuy. Deus a'ōbacaap ġubapuk ip imuġuykuku ojuy. ²³ Ġuyjom jajēm ip adeayū muġuykuku ojuy iap kuy oġuwēn ey-webe. Ġebu'i epe'e wekawēn kay ixeyū be eymuġuy-kukuap puxim — io'e.

²⁴ · ²⁵ — Ipiatpi'ajojoap kabia kap puje kabi bea-cat muycemcemap iaruaru je'e — io'e. — Kaxiepiat kaxiepi ġu je'e. Kabiok je'e. Kaxiamat tak kaxiam ġu je'e. Kabiok je'e. Kasopta dak ida'at kabi kadiwi — io'e. ²⁶ — Ġebuje okop ipi kay. Kabikerereat taġwi okop. Soat waġo ōn. Wa'ōbacaap kuġ okop, odipap kuġ tak. Soat ipi daġayū je'e “Jesus warara'acat podi ma ya'ōbaca,” i. “Warara'acat podi ma idip,” i je'e ip. “Abu ixē jo'iat? Ka'ūma ma,” i je'e ip — io'e. ²⁷ — Ġebuje Deus jekawēn tojtjot'ukayū ġuju soat taġwi. Ixeyū ġuju jemunaēhēyū kay. Jemu-naēhēyū ip ġu'awero soat taġwi. Kabi daġwi ixeyū ġu'awero ip, ipi daġwi dak — io'e. Jesus waram jedocap o'ġuwēn jewēju etaybitbinayū be.

²⁸ — Gebum cuy epesop wajëmap kay figueira'ip kay ãebum pima — io'e. — Figueira'a bikit cëm puje, “Koato ijasün ma,” i'e'em eyju, dup cëm pima dak — io'e. ²⁹ — Imënpuxim soat ipi dağayū ipiatpi'ajojom pima, “Gaxīn ma Jesus jajëm,” i juy epe'e — io'e. ³⁰ — Gasūayū'in iboap coco ip je'ū awap. Gebum cuy epesop iboap kay! — io'e. ³¹ — Kabi i'üm, ipi dak. Wekawën pit i'üm ġu. Wekawën kayayū bit soat em jeedop — io'e.

Imën Jesus o'jekawën jeweju etaybitbinayū eju.

³² — Itaybit ġu ip wajëmap kabiam, ipiatpi'ajoap kabiam tak — io'e. — Deus ekawën tojtjot'ukayū itaybit ġu ibo kabiam. Ōn Deus ipot. Ōn tak wetaybit ġu ibo kabiam. Webay acā itaybit — io'e. ³³ — Eyetaybit ġu puje oajëm iam. Imëneju epejowiwi juy ağ. Wajëmap wiwim cīcā juy epesop — io'e. ³⁴ — Wajëmap kariwa epicat puxim — io'e. — Kariwa o'jëm jeduk'a bewi. “Ijoce ma epesop,” io'e jebuywatwat'ukayū be — io'e. — “Epeyekapik oka be,” io'e cebe ip — io'e. — Jeduk'a exīntabi wiwi'ukat pe “Ijoce ma eğuy warara'acat pe obubut tujupa'umap puxim,” io'e kariwa — io'e. — “Wepicap wiwim cuy epesop,” io'e cebe ip — io'e Jesus. ³⁵ — Ixe kariwa buxim ōn tak — io'e. — “Puğün paxi waram wekariwa je'pit?” i eyju e'em. Katpuje paxi ocepit. Iximadakpe paxi ocepit. Kabiakay paxi ocepit. Kabia'isu paxi ocepit. Eyetaybit ġu pūğün ocepit iam — io'e. ³⁶ — Imënpuye juy epejowiwi ağ. Ocepicap wiwim cuy epesop. Obu'u jījā eyxen ma eydobuxik am wepit puje! — io'e. ³⁷ — “Epejowiwi juy ağ,” i ōn e'em soat pe. “Epejowiwi juy ağ,” i ōn e'em eywebe dak — io'e Jesus jeweju etaybitbinayū be.

14 Xepxep kabia peta e awap cekay itako-maayū Jesus daomūn ojuy ip- -Páscoa epeta e awap. Ixe epeta bima Judeuyū pāo'a o'o'uk ip osodop- -yamuyuhuhaptōmtēm'ūmat'a. Ijop epeta muğëğëm pima apën Deus wuydobuyū'üm'üm o'tujujëm Egito eipi bewi iap kay ãebum'uk ip osodop.

Iba'arēm Jesus daomūn ojuy ip. Paīyū kukukayū Jesus aoka ojuy osodop ip, Moisés ekawēn imutaybitbin'ukayū dak. Jesus kay itakoma osodop ip.

² — Petatam pima bit Jesus ataomūn ġu adeayū be wuyaokaap puxim — io'e ip jewewebe.

³ Jesus Betânia ka be osunuy. Simão duk'a be osunuy -ierep tūibit tuk'a be. Jekōnkōn pima ayacat oajēm Jesus kay. Timūn'a kuġ oajēm -wita'a muġēġē'a kuġ. (Wita'a butet alabastro i osunuy.) Tide'oati otinuy ya be. (Tide'oati butet nardo i osunuy.) Judeuyū ce'ūat mude'o'o'uk ip osodop nardodim. Tideiboġ cīcā otinuy. Ayacat oajēm Jesus kay. Timūn'a ū o'su'ūkaka. Tide'oati o'tidi Jesus a be Jesus ikukpin cīcā cexe buye. ⁴Iboceayū bit pūġ-pūġ itakoma o'e ayacat kay ixē o'tidi buye.

— Ak'i! Etidi! — io'e ip. — Etimukereren — io'e ip ayacat pe. ⁵ — Tide'oati deida buje, kajuk teiboġ ejat! Ade kuka juk dinheiro isurūġat ejat prapta muġēġē — io'e ip. — 300 be kuka juk ejat! Tadaybotbocayū be kuka juk dinheiro eġūm — io'e ip cebe.

Ya'ōpuruġ ip ayacat o'ġukorēm o'timukereren puye.

⁶ — Āġ jeenuy ayacat jekpiwan — Jesus pit o'e. — Epeġukorēm ġu juy — io'e. — Cekaykay ġu! Xipacan ma teku o'e owebe! — io'e. ⁷ — Tadaybotbocayū soat em ma eyxe — io'e. — Eybikuy bima, ixeyū buywan put eywebe. On pit soat em ġu oġuy eyxe. Soat em ġu xipacan ey'e but owebe — io'e. ⁸ — Ite ayacat tide'oati kuġ osunuy. Tiūm put owebe. Ojebit o'ġude'on, oje'ū ġu buk ma'ġu. Wetabēġ pima ma kuy omude'on okot awap — io'e. ⁹ — Okay itabucayū kawēn idipat ġuwēnuwēn soat kaka daġ. Apēn ite ayacat o'tidi wa be iap ġuwēnuwēn tak ip soat kaka daġ. Soat ka watwat ġebum je'e apēn ixē o'e iap kay. Ġebum cuy epesop iboap kay — io'e Jesus.

¹⁰ Ġebuje Judas Iscariotes o'ju paīyū kukukayū kay.

— Jesus cuy oğüm eywebe yaoka am — io'e cebe ip.

Ixe Judas Iscariotes doze beayū'in osunuy.

¹¹ Ixe ekawēn co buje, icokcok cīcā o'e ip paīyū kukukayū.

— Dinheiro juy oceğüm ewebe iūmapteim — io'e ip Judas pe.

Imēnpuye “Gasū du Jesus ūm put owebe paīyū kukukayū be?” i'e'em jewebe ma oeku. Cekay itakomaayū be Jesus ūmap kudadam oeku.

¹² Jesus o'jekōn jeweju etaybitbinayū eju Páscoa epeta bima. Páscoa epeta bima Judeuyū ovelha aokaka'uk osodop ip-koapat kabia bima. Soat ip pāo'a o'o'uk osodop- -yamuyuhuhuptōmtēm'umat'a. Ixe kabia be ceweju etaybitbinayū o'jekawēn Jesus eju.

— Poce wuyxan oceğügē Páscoa epeta be i'o am? — io'e ip.

¹³ Gebuje Jesus xepxepayū o'ğuju Jerusalém ka kay jeweju etaybitbinayū.

— Epeju juy ikaboğatka be — io'e cebe ip. — Ağokatkat epetobuxik- -idibi mūn'a kuğat. Ceweju juy epeju — io'e. ¹⁴ — Uk'a be iōm puje, epeōm cuy ceweju — io'e cebe ip. — “Ocekariwa e'em: ‘Apu'a be juy ocekōn Páscoa kabia oweju etaybitbinayū eju?’ i,” i juy epe'e iğō duk'a iwat pe — io'e Jesus. ¹⁵ — Ixe jeduk'a yabimubapuk eywebe- -umat'abi, yabi-boğat'abi — io'e. — Kuy mesa kake iğō'abi be, abikbikap tak. Soat ixipan je'e kuy — io'e. — Iğō'abi be ovelha juy epejoyoy wuywebe i'o am Páscoa kabia be — io'e.

— Ha'a — io'e ip.

¹⁶ Gebuje ceweju etaybitbinayū o'ju ikaboğatka be. Soat o'tobuxik ip apēn cuk cebe ip Jesus o'e iap tağ. Iğō'a be ovelha ip o'joyoy Páscoa kabia be i'o am.

¹⁷ Kabioğ pima Jesus oajēm iğō'a be jeweju etaybitbinayū eju- -doze beayū eju. Oabik ip mesa akokoreren. ¹⁸ Jekōnkōn pima Jesus o'jekawēn ceweju ip.

— Icēmān ōn e'em eywebe — io'e. — Pūğ ey'in

oūm okay itakomaayū be waoka am- -oweju jekōn-
kōnat ma — io'e.

¹⁹ Iḡuycūḡcūḡ o'e ip.

— Ōn xe'e? — io'e'e ip pūḡpūḡpūḡ.

²⁰ — Pūḡ eyju'in — io'e Jesus. — Oweju prato
be pāo'a o'yamuerep'iat ma — io'e. ²¹ — Soat waḡo
ōn. Apēn oje'ū iaptup taḡ oje'ū- -Deus ekawēntup taḡ
— io'e. — Karem ḡu ipiat supi'ajo oūmat pit. Xipat
kuka adi a'ḡu ixē bit o'jebapuk'ūma — io'e Jesus.

²² — We'ūap kay ḡebum cuy epesop — io'e Je-
sus cebe ip.

Jekōnkōn o'e jeweju etaybitbinayū eju. Jekōnkōn
pima Jesus pāo'a o'yabu.

— Bay, ēn xipat — io'e. — Pāo'a eyaūm ocewe-
be — io'e Jesus Deus pe.

O'yamuweka. O'yaūm cebe ip.

— Juku, epeya'o — io'e cebe ip. — Ite ojebit —
Jesus o'e. — Pāo'a muwekaap puxim ip obamupaya
— io'e.

²³ Tikōnkōnap o'jat. Uva'abidi o'tinuy tikōnkōn-
ap pe.

— Bay, ēn xipat — io'e. — Uva'abidi etiūm
ocewebe — io'e Deus pe.

Tikōnkōnap o'ḡūm cebe ip. Soat ip o'tikōn.

²⁴ — Juku. Epetikōn. Ite odoy — io'e Jesus. —
We'ū buje odoy jedoyekoreren "Adeayū bewi ikērēat
oju'uk," io'e Deus puye — io'e. — Imēnpuye Deus
adeayū ḡuisun. Cūḡ ma jeedop ip cexe- -Deus xe —
io'e. ²⁵ — Icēmān ōn e'em eywebe. Waram ḡu otikōn
uva'abidi soat ipi watwat Deus a'ō kay kūyjobit'ūm
pima. Soat ipi watwat ya'ō kay kūyjobin pima bit,
tiisuati otikōn uva'abidi — io'e Jesus.

Imēn Jesus o'e cebe ip: — We'ūap kay ḡebum cuy
epesop — i.

²⁶ Ḡebuje soat ip o'jebibododon Deus kay.
Umat'a bewi ip o'kop. O'ju ip co'a bicūḡpe-
Oliveira dip'a bicūḡpe.

²⁷ Oajēm ip Oliveira dip'a bicūḡpe. Jesus waram
o'jekawēn ceweju ip.

— Soat eyju operem — io'e. — Epeyenapōn — io'e. — Imēn Deus ekawēntup omuwēnuwēn:
Ovelhayū kukukat oyaoka, i. Soat ip
jepōg pōg iōhōyū, i.

Imēn Deus ekawēntup omuwēnuwēn — io'e Jesus.
²⁸ — Imēnpit we'ūap tomukadi Deus waram ġuto
omutait. Ōn ovelha kukukat puxim. Okay itabucayū
ovelhayū buxim. Oju eywap Galiléia eipi be — io'e.

²⁹ — Soat ip jepere obureyū. Ōn pit jepere ġu —
io'e Pedro.

³⁰ — Tapu, icēmān ōn e'em ewebe — io'e Jesus
Pedro be. — Ijop exima ma: “Obure ġu teku,” i
napa ma ece'e ebapūg em — io'e. — Xepxep em sa-
pokay ede awap: “Obure ġu teku,” i napa ma ece'e
— io'e Jesus.

³¹ — Oce ġu ma buk “Obure ġu teku,” i, eweju
waokaap puxim — io'e Pedro.

Ya'ōpurug o'jede. Soat cewējuayū imēn o'e'e.

³² Ġebuġe o'ju ip kadaihiaptip kay. Kadaihiaptip
putet Getsēmani i osunuy.

— Jocebuku epabikkik — io'e Jesus. — Deus eju
buk ōn jekawēn — io'e jeweju etaybitbinayū be.

³³ Ibocewi Jesus o'ju kawēn ām Deus eju. Pedro
o'tujowat jeweju, Tiago dak, João dak. Iğuycūg cīcā
o'e. Yağuy'ūm o'e ipiatpi'ajoap kay.

³⁴ — Je'ūmayū jo'i ōn oğuycūgāp pibun — io'e.
— Ağ cuy epesop ijoce — io'e.

³⁵ Bosusu Jesus o'ju. Iboce o'jepo ipi ju jeğuy-
cūgāp pibun.

Ġebuġe o'jekawēn Deus eju.

— Bay — io'e. — Odaxijom ece we'ūap puxim,
ēn odaxijo pin pima — io'e Deus pe. — Ipiat esu-
pi'ajoat ġu owebe — io'e. ³⁶ — Bay — io'e. — We-
bay ēn. Soat iba'ore ġu ewebe. Omuwedem ece ip
owebe ipiat'ajoap puxim. Wa'ōbi bit we'ū pin ġu.
Ēn ebikuy bima bit, oje'ū — io'e Deus pe.

³⁷ Ġebuġe ebapūğayū kay o'jepit- -Pedro kay, Tia-
go kay dak, João kay dak. Ixet ma ip o'tobuxik.

— Simāo Pedro — io'e. — Exet ma du? — io'e.
— Pūg hora dak tu ağ pa'ore ewebe? ³⁸ Ağ cuy epe-

sop! — io'e cebe ip ebapūgayū be. — Xen ġu juy epesop. Deus eju juy epeyekawēn eyewebe ikērēat muġēap puxim- -eyewebe Satanás a'ò kay kūyjobicap puxim — io'e. — Eybu'u jījā ikērēat muġē ām. Imēnpit ikērēat epeġuġē eya'òbaca'ūm puye. Imēneju Deus eju juy epeyekawēn ixē a'òbacaan kuġ eyeku am — io'e cebe ip.

³⁹ Gebuje bosusu o'ju waram. Kuyat ekawēn puxim waram o'jekawēn Deus eju. ⁴⁰ Jesus waram o'jepit ebapūgayū kay. Ixet ip o'tobuxik ma'ġuto. Itaxebaca o'e ip xet pibun.

— Apēn tak Jesus pe acejede? Wuyxexet teku wuydobuxik — io'e ip jewewebe.

⁴¹ Jesus waram o'jepit bosusu. Waram o'jekawēn Deus eju. Waram ġuto o'jepit ebapūgayū kay.

— Eyxet mabuk tu? — io'e cebe ip. — Jebodoydoy mabuk tu eyju? — io'e. — Kuy o'e xexecap! Soat waġo òn. We'ūap kabia kay òn ajēm — io'e. — Ġasū oūm ip ikērēat mujurūġrūġ'ukayū be waoka am. ⁴² Epe'āy! — io'e cebe ip. — Ak'i juy epe'e! Oūmat omuyku! Ġa'a atopabijuk ip — io'e.

⁴³ - ⁴⁴ Judas oajēm Jesus kay. Yajēm puje, Jesus kawēnwēn mabuk osunuy jewēju etaybitbinayū eju. Ixē Judas doze beayū'in osunuy. Jesus eju jekuku'uk osunuy.

— Wuyajēm puje juy owebe yaġobukōn'ibit cuy epejat — i juk o'e ixē Judas jewējuayū be- -Jesus aoka ojuyayū be. — Cem ma juy epetujowat — i juk o'e cebe ip.

Ixē Judas oajēm Jesus kay. Ceweju adeayū oajēm paja kukuġ, jeba'ip kukuġ tak. Paīyū kukukayū ixeyū o'ġuju Jesus daomūn ām, Moisés ekawēn imutaybitbin'ukayū dak, Judeuyū kukukayū dak. ⁴⁵ Yajēm'isum ma Judas o'ju Jesus kay.

— Ocemutaybitbin'ukat! — io'e Jesus pe. O'yaġobukōn.

⁴⁶ Judas eju oajēmiayu Jesus o'jat. Cem ma o'taomūn ip. ⁴⁷ Imēnpuye Jesus ejuat jepaja o'ju'uk iyuk pewi. Paīyū kukukayū ebekit ġuybuikibi o'suġuybuikibika. O'suġuybu'uk pajam.

⁴⁸ Gebuje Jesus o'jekawēn oajēmiayu eju.

— Eyju dak epesot odaomūn ām paja kukuḡ, eyba'ip kukuḡ tak, ibabikurukat taomūnap puxim — io'e cebe ip. — Ibukurukat ḡu ōn pit! — io'e. ⁴⁹ — Ade kabia adi oḡuy eyxe. Imukūyjojom'uk cuk adi oḡuy Deus eju kawēnwēnap'a be- yaboḡat'a be — io'e. — Iḡo'a be ḡu bit eyju odaomūn. Kuy bima o'-tupmubararak ip Deus ekawēntup apēn ip odaomūn iaptup — io'e. — “Ibabikurukat taomūnap puxim ixē taomūn ip,” i'e'em iḡodup — io'e. — Imēn ma odaomūn ip ḡasū dak — io'e Jesus.

⁵⁰ Gebuje soat ip Jesus o'jepere ceweju etaybitbinayū. Soat ip o'watwat.

⁵¹ Jesus daomūnmūn ip pima aḡokatkat o'ju Jesus nomuju- yaypan'isuat. Jeekabek kuḡ acā oeku. Iekabek o'jat ip Jesus daomūnayū. Yaypan'isuat taomūn ojuy ip. ⁵² Imēnpit jeekabek o'suiwat jedaomūnap puxim. Toti'ūm ma o'jenapōn jeparara pibun.

⁵³ - ⁵⁴ Gebuje taomūn'ibiyū Jesus o'tujowat paīyū kukukat kay.

Wūy ma Pedro o'ju Jesus nomuju jeparara pibun. O'ju paīyū kukukat tuk'a kay. Imēnpit tuk'a naxīnōm pe osunuy. Xik'i osunuy sorarayū parakpe. Jewewewem o'e daxa etako be.

Gebuje paīyū kukukayū o'je'awero ip Judeuyū kukukayū dak, Moisés ekawēn imutaybitbin'ukayū dak. Ixeyū ma ibimāmāayū coco'ukayū osodop ip. O'je'awero ip ibimāmāayū ekawēn cocoap'a be. O'je'awero ip Jesus xipat ḡu iap mubapukap ojuy yoka am. ⁵⁵ Ibimāmāayū ekawēn coco'ukayū warara'acayū kudadam o'e ip Jesus muymuy am. Ibikuy o'e ip xepxepayū be pūḡ taḡ ma Jesus muy am. Jesus aoka ojuy ip. ⁵⁶ Adeayū napa ma ip Jesus o'yawēḡmukērērērēn. Imēnpit pūḡ taḡ ḡu o'yawēḡmukērērērēn ip- -wara'at taḡtaḡtaḡ ma. Jesus muymuy jījā o'e ip. ⁵⁷ Warara'acayū imēn napa ma Jesus o'yawēḡmukērērērēn soat etabutpe.

⁵⁸ — “Ijop'a Deus eju kawēnwēnap'a oyamu'ūm- ijodiat emuamuy'a oyamu'ūm,” i kuy juk o'e ite ma — i napa ma o'e ip. — “Xepxep xet kap puje

wara'at'a oyamuy," i kuy juk o'e ite — io'e ip napa ma. — "Ijodiat emuamuy'am ġu je'e," i juk o'e — i napa ma o'e ip. — Imēn ixē ekawēn oceya'ijojo — io'e ip napa ma.

⁵⁹ Imēnpit pūġ taġ ġu ip o'yawēġmukērērēn-wara'at taġtaġtaġ ma.

⁶⁰ Ixeyū ekawēn co buje paīyū kukukat o'āy soat wap jekawēn ām Jesus eju.

— Apēnpuye ecede ġu awēġmukērērēnayū kay? — io'e. — Icēm tu ip e'em? — io'e Jesus pe.

⁶¹ Imēnpit Jesus mūġ ma osunuy. O'jede ġu.

— Ēn tu Deus emunaē? — io'e. — Soat wuyju e'em: "Ēn xipat cīcā," i Deus pe. Ixe ipot tu ēn? — io'e Jesus pe.

⁶² — Hm hm — io'e Jesus. — Ixe ipot ma ōn — io'e. — Soat waġo ōn — io'e. — Ojojom epe'e. Xik'i oġuy Deus xe iba'at kadi. Ixe Deus soat podi ma ya'ōbacaat. Cexe ōn pima ojojom epe'e. Soat kukukan oce ixē eju. Ġuyjom ijodi waram ojut. Kabikere-reat taġwi okop — io'e Jesus.

⁶³ - ⁶⁴ Iboap co buje paīyū kukukat jesay o'ġuwek jetakoma pibun.

— Tūybe Deus jo'i ōn iān teku e'em — io'e. — Kuy epeya'ijojo ixē ekawēn — io'e. — Warara'acayū ġu ajokudada ixē awēġ mukērērēn ām. Deus muymuy teku — io'e. — Apēntak ace'e cebe? — io'e cebe ip.

— Ġa'a ayaokaat — io'e ip. — Ikērēat kuġ teku Deus xe — i napa ma o'e ip ibimāmāayū ekawēn co-co'ukayū.

⁶⁵ Jesus o'ġuxiuxi ip pūġpūġ ixeyū'in jetakoma pibun ma. Jesus o'topamuekabek ip paġōm. O'yao-kaka ip.

— Abu aokakam i ece! — io'e ip iwaywayway am.

Jesus pu buje sorarayū dak jebum o'yaokaka. Soat taġ ma o'yaokaka ip.

⁶⁶ Pedro mabuk uk'a daxirōġ pe bima, paīyū kukukat puywatwat'ukat o'ju Pedro kay. Ayacat o'ju cekay. ⁶⁷ Ixe ayacat Pedro o'jojojo jewewewem daxa etako be. O'jeak cīcā cekay.

— Ēn tak mo Jesus eju ejeku- -Nazaré ka bewiat eju — io'e Pedro be ayacat.

⁶⁸ — Ōn ġu! Apèn ěn e'em? Ixe bure ġu ōn! — i napa ma o'e Pedro.

Ibocewi Pedro o'ju uk'a ekorara exĩntabi be. Sapokay o'jede ġebu je bit. ⁶⁹ Ixe ibuywatwat'ukat waram Pedro o'jojojo iboce.

— Jesus bure tedaku! — io'e iboceayũ be.

⁷⁰ Imēnpit Pedro napa ma o'e ġuto:

— Ite bure ġu ōn — i.

Ibũnbũn pima iboceayũ o'jekawēn Pedro eju.

— Ocetaybit ěn. Ejojo oceju cewegu. "Ite bure ġu ōn," i'ũmġu juy ece! — io'e. — Ēn tak Galilėia eipi bewiat! — io'e.

⁷¹ — Dapxi ěn! — i napa ma o'e Pedro. — Ixe bure ġu ōn! Cewegu ōn pit oceku ku ġu — i napa ma o'e. — Ōn icēmān e'em'ũm pima, Deus cuy ipiat supi'ajoat owebe — Pedro o'e.

⁷² Sapokay waram o'jede ġebu je bit. Pedro Jesus a'õ kay o'jeġebu.

— Ijop exima ma: "Ite bure ġu ōn," i napa ma ece'e ebapũġ em — i juk o'e Jesus cebe. — Xepxep em sapokay ede awap: "Ite bure ġu ōn," i napa ma ece'e — i juk o'e Jesus cebe.

Iboap kay o'jeġebu Pedro. O'jewemuġuycũġ cĩcā. O'tõn.

15 Kabia isum paĩyũ kukukayũ o'je'awero ip, Judeuyũ kukukayũ dak, Moisés ekawēn imutaybitbin'ukayũ dak, ibimāmāyũ ekawēn coco'ukayũ dak. O'je'awero ip jewawē ām apèn Jesus aceyaoka iam. Jesus o'subamukirikat ip.

O'tujowat ip Pilatos kay- -Judėia eipi kukat kay. Pilatos o'jekawēn Jesus eju.

² — Ēn tu Judeuyũ kukukat? — io'e Pilatos Jesus pe.

— Ēn imēn e'em owebe — io'e Jesus.

³ Jesus o'jomuymuy jĩjā ip Pilatos pe paĩyũ kukukayũ.

⁴ — A'õpicũġ cuy ece! Emuymuy jĩjā ip — io'e

Pilatos Jesus pe. — Apēnpuye ēn jedem ġu? — io'e Jesus pe.

⁵ Imēnpit Jesus mūġ ma osunuy. Imēnpuye Pilatos yaġuybabi'ūm o'e.

— Apēnpuye mūġ ma tekku e'em? — io'e jewebe ma.

⁶⁻⁷ Aġokatkat daomūnmūnap'a be osunuy-iecūġap ebekitkit eju jenopaġoġo'ibiyū xe. Ibutet Barabás i osunuy. Soat ip cuk wara'acat o'yaoka daomūnmūnap'a beayū iecuġap ebekitkit eju jenopaġoġom pima. Páscoa epeta bima iecuġap pūġ ma taomūnmūnat mujēmjēm'uk osunuy daomūnmūnap'a bewi. Adeayū emuojuyjuy mujēmjēm'uk osunuy.

⁸⁻¹¹ Ġebuje adeayū o'je'awero Pilatos xe-iecūġap xe.

— Ijop epeta bima taomūnmūnat mujēmjēm'uk eġuy — io'e ip. — Pūġ cuy eġujēm ġasū dak ocewibe — io'e ip Pilatos pe.

Paīyū kukukayū itabutkarey o'e ip Jesus kay adeayū cekay jījā buye. Imēnpuye o'tujowat ip Pilatos pe. Pilatos itaybit osunuy paīyū kukukayū itabutkarey Jesus kay iam. Paīyū kukukayū kuy o'e adeayū be: — Barrabás cuy epejoojuy Pilatos pe imujēmān daomūnmūnap'a bewi — i.

— Judeuyū kukukat mujēmān pin tu eyju owebe? — io'e Pilatos Judeuyū be.

— Ap! — io'e ip paīyū kukukayū.

¹² — Apēntak oce ite aġokatkat pe-Judeuyū kukukat i eyju e'emat pe? — io'e ma'ġuto Pilatos adeayū be.

¹³ — Esubamupayaat korosa be imuy'ū ām — io'e ip.

¹⁴ — Apēnpuye osubamupayaat? Ikērēat o'jukuk ġu tekku-pūġ em tak ka'ūma! — io'e Pilatos.

Imēnpit biġ ma ya'ōberen o'jewāwā ip:

— Esubamupayaat korosa be imuy'ū ām — i.

¹⁵ Imēnpuye Pilatos Barrabás o'ġujēmat daomūnmūnap'a bewi. O'ġujēmat adeayū mucokcokap ojuy. Jesus o'tujowacat sorarayū be.

— Jesus cuy epeḡupok ixee muḡēḡēbum — io'e sorarayū be. — Epesubamupaya korosa be imuy'ū ām — io'e cebe ip.

Imēn Pilatos o'e adeayū mucokcokap ojuy.

¹⁶ Ḡebuje sorarayū Jesus o'tujowat iecuḡap tuk'a kay. Tuk'a eaki be o'tujowat. Warara'acayū o'takoy ip sorarayū- -jewejuacat'in ma.

— Ḡa'a ite ma ajowaywayway — io'e ip jebureyū be.

¹⁷ Iwaywayway am iekabek ip o'ḡuōm cebe- -ipakpukḡūḡūnat. Widaohobune o'subunemuwakēn ip yakoreren am. O'jomōḡ ip yakoreren.

¹⁸ — Ēn ma Judeuyū kukukat! — io'e ip iwaywayway am. — Warara'acat podi ma ēn a'ōbuyxi — io'e ip iwaywayway am.

¹⁹ O'yamupāupā ip im. O'ḡuxiuxi ip. O'jēḡ'ae-cōḡcōḡ ip cewap iwaywayway am: — Soat podi ma ēn a'ōbuyxi — i'e'em cebe. ²⁰ Iwaywaywayap epere buje iekabek o'ju'uk ipakpukḡūḡūnat. Cesay ip waram o'ḡuōm cebe. O'tujujēm ip uk'a eaki bewi ibamupaya am korosa be imuy'ū ām.

²¹ Tujujēm pima oajēm ip aḡokatkat kay. Aḡokatkat ajēmjēm o'e koḡūnpi bewi. Ibutet Simāo i osunuy. Cirene ka bewiat osunuy. Alexandre ebay osunuy, Rufo ebay dak.

— Korosa juy ejukuk Jesus pe ikukap puxim — io'e sorarayū ixe Simāo be.

²² Jesus o'tujowat ip co'a kay. Gólgota i co'a butet osunuy. (Gólgota ce'ūat aririt'a iape wuya'ōm.) Oajēm ip. ²³ Iboceat mirradup o'tupmuwekoy uva'abidi be wuypipimu'ūmaptim.

— Juku! Etikōn — io'e ip Jesus pe.

— Ap! — io'e bit.

O'tikōn ḡu.

²⁴ Ḡebuje sorarayū Jesus o'subamupaya ip korosa be. Tapoa o'jomōḡ ip Jesus bu be, sui be dak. Korosa o'jomōḡ ip ipikūykūy be. Imēn ma o'subamupaya ip. Karatūḡ'a buximat'a ip o'yamuju ipi juyababarukat'a. O'yamuju ip Jesus esay bu am. Imēn

Jesus esay o'ġu'ê'ê'ê ip jewewedaġ. ²⁵ Kaxi jeum pima Jesus o'subamupaya ip korosa be-9 hora bima.

²⁶ — “Apēnpuye dak o'subamupaya ip imuy'ū ām?” i je'e ip kapkapayū — io'e Pilatos jewebe ma.

Imēnpuye o'tupmubararakat apēnpuye o'subamupaya ip iaptup. “Judeuyū kukukat teku” iaptup o'tupmubararakat Pilatos. O'tupmōġ ip korosa be Jesus abi'ase. ²⁷ Jesus pa mupayapayam pima xepxep ibukurukayū dak o'subamupaya ip wara'at korosa be. Pūġ ma Jesus pa'at kadi osunuy. Wara'at iba'ūġat kadi osunuy. ²⁸ Deus ekawēn tup o'tupmubararakat ip kuyje. Imēn e'em ibodup:

Ikērēat mujurūġrūġ'ukat kukap puxim
ixe dak o'jukuk ip, i.

Jesus pa o'subamupaya ip ijoztup ekawēn taġ.

²⁹ Ġebuje korosa etako daġ kapkapayū Jesus muymuy o'e. Jesus o'jowaywayway jījā ip.

— “Deus eju kawēnwēnap'a oyamu'ūm-ya-boġat'a,” i juk ece — io'e ip cebe. — “Xepxep xet kap puje, wara'at'a oyamuy,” i juk ece — io'e ip Jesus pe iwaywayway am. ³⁰ — Ecewedaxijo juy! Etay-bitbit pima juy korosa ejuwi ekop e'ūap puxim — io'e ip cebe iwaywayway am.

³¹ Imēnpuxim paīyū kukukayū dak Jesus o'jowaywayway jewewaju ma ip, Moisés ekawēn imutaybitbin'ukayū dak.

— Teku warara'acayū daxijojok osunuy. Imēnpit jewedaxijo ba'ore je'ūap puxim — io'e ip jewewebe. ³² — Teku juk o'e: “Deus emunaē ōn,” i, “Judeuyū kukukat ōn,” i dak — i napa ma o'e ip. — Teku Deus emunaē bima, juy je'kop korosa ejuwi je'ūap puxim — io'e ip. — Ikop puje, bit kuka wuyetabut ace'e cekay — io'e ip jewewebe.

Cewaju ibamupaya'ibiyū dak Jesus o'jomuymuy jījā ibukurukayū.

³³ Kaxi wuyase bima kabiok o'e soat taġ Judéia eipi daġ. Ibun ma kabiok oeku. Ebapūġ hora bun kabiook oeku.

³⁴ Katpuje Jesus o'jewāwā ya'ōberen.

— Eloí, Eloí, lemá sabactani? — io'e ja'ôm.

(Ijop ekawên, Deus, Deus, apênpuye ên opere iape wuya'ôm.)

³⁵ Iboap o'ya'íjojo ip iboceayû.

— Eya'ôpicûgçûg cuy epesop! Elias nomuwâwâm teku! — io'e ip, xipan ġu ip o'jekûyjo buye.

³⁶ Iboceat o'jedau idibi bubuap munopapûn âm uva'abidim- -tideiboğ'ûmati. Ixe dak idibi bubuap o'-jomôğ ip'abi be.

Ġebu je o'yopmuyu Jesus pe timutitit am.

— Mênpu! — io'e. — Omuyku paxi Elias imukop am korosa ejuwi — io'e.

³⁷ Jesus o'jewâwâ ya'ôberen. Poğ. Oe'û. ³⁸ Pağo Deus eju kawênwênap'a be osunuy- -yaboğat'a be- -uk'a exıntabi nomudip epağo. Jekpiwan ma ixe pağo o'jewek Jesus e'û buje. O'jewek kabi kadi wi ipi kay. ³⁹ 100 be sorarayû kukat cûğ'i osunuy Jesus wap. Apên Jesus oe'ûiap o'jojojo.

— Icêmân ite'ûm Deus ipot osunuy — io'e.

⁴⁰ Jesus korosa eju bima, aoyû dak iboce ijojom osodop. Wûy wi ip ijojom osodop- -Jesus cocom. Ixeyû aoyû parakpe ebapûğ aoyû osodop ip. Ibûrû ma ip osodop: Maria Madalena, Salomé, wara'at Maria dak. Wara'at Maria José xi osunuy- -Tiago xi dak- -yaypan'isuat xi. ⁴¹ Ixeyû aoyû Jesus eju oekuku Galiléia eipi dağ pima. Ibuywatwan oekuku ip. Ade warara'acayû aoyû dak osodop ip korosa xe. Jerusalm ka be oajêm ip ceweju kuy bima. Soat ip Jesus kay jeakağ osodop.

⁴² Katpuje jîjâ o'e. Kuyaje Sábado je'e- -Judeuyû xe jebodoydoyap kabia. Kabioğkabiog'i bima jexat tata'uk ip osodop Judeuyû Sábado bima jekapikap puxim. ⁴³ Kabioğkabiog'i bima José o'ju Pilatos kay. Ixe José Arimatéia ka bewiat osunuy. Ixe ibimâmâyû ekawên coco'ukat osunuy. Ya'ôbuyxi jîjâ dak osunuy soat xe. Deus pe soat kukukan iap wiwim osunuy. Iparara'ûm o'ju Pilatos kay. Oajêm.

— Jesus'ûm jebit mukop pin oce — io'e Pilatos pe.

⁴⁴ — Kuy du ixē'ūm oe'ū? — io'e Pilatos.
Imēnpuye 100 be sorarayū kukat o'tomuwā.

— Kuy ma du oe'ū Jesus? — io'e sorarayū kukat pe.

⁴⁵ — Hm hm. Kuy ma — io'e sorarayū kukukat.

— Ha'a — io'e José be. — Ijebit cuy eḡkop — io'e.

⁴⁶ Gebuje José Jesus'ūm jebit o'ḡkop korosa ejuwi. Kuy juk paḡo o'jat- -xipacat- -irucat. Ijebit o'ḡkabekek ixem paḡōm. O'jomōḡ witabikūy be.

Wita'a yaboḡat'a o'yamuypen witabikūy nomudip'am. ⁴⁷ Xepxep Mariayū osodop iboce. Maria Madalena iboce osunuy. Wara'at Maria José xi osunuy- -yaypan'isusu xi. Poce Jesus'ūm jebit o'jomōḡ ip iap o'jojojo ip.

16 Sábado jebodoydoyap kabia Judeuyū xe. Kaxi at puje, waram ip jekapikpiḡ ma'ḡuto.

Kaxi at puje ebapūḡ aoyū tide'oati o'tibu. O'tibu ip Jesus'ūm jebit mude'on am. Ebapūḡ aoyū o'ju: Maria Madalena, Salomé dak, wara'at Maria dak- -Tiago xi. Ixeyū ebapūḡayū o'ju.

² Domingo bima o'ju ip witabikūy kay- -kabia'isum ma- -kaxi jēm'isum ma.

¹ — Abu wita'a uḡ ocewebe- -witabikūy nomudip'a? — io'e ip jewewebe.

⁴ Imēn o'jekawēn ip ikūynomudip'a yaboḡ cīcā buye. O'jeak ip witabikūy kay. Kuy wita'a yawede o'yadobuxik ip. ³ Oōm ip witabikūy be. Deus xewiat o'jojojo ip- -yaypan'isuat. Xik'i osunuy iba'at kadi. Cesay irut cīcā osunuy.

Gebuje o'jewetakaka ip aoyū.

⁶ — Epeyekuy ḡu! — io'e cebe ip. — Wetaybit Jesus kudadam eyju iam. Nazaré ka bewiat kudadam eyju- -korosa be ibamupaya'ibit kudadam — io'e. — Ijocē ḡu opop. Kuy o'jetait waram — io'e. — Ak epe'e topap kay. Topap acā — io'e. ⁷ — Epeju juy ḡasū bit — io'e aoyū be. — Ceweju etaybitbin oekuku'iyayū juy epeḡkūyjo — io'e. — Pedro dak cuy epeḡkūyjo. “Kuy o'jetait waram,” i juy epe'e cebe

ip. “Cum eywap Galiléia eipi kay,” i juy epe'e cebe ip — io'e. — “Iboce ma epetobuxik apēn ixē kuy o'e eywebe iap taḡ,” i juy epe'e cebe ip — io'e. — “Waram o'jetait'iat cuy epetobuxik,” i juy epe'e cebe ip — io'e -yaypan'isuat o'e.

* Ḡebuje o'jēm ip. Owatwat ip witabikūy bewi jeparara pibun. Ikarabakbak o'e ip jeparara pibun. Kabi bewiat ekawēn o'ḡuwēn ḡu ip warara'acayū be iparara jījā ip puye.

⁹ Jesus waram o'jetait kabia'isum. Waram o'je-Domingo bima. Koam o'jebapuk Maria Madalena kay- -kuy bima cebewi 7 be ibiōḡbuk kērēayū o'ḡujēmiat kay. ¹⁰ - ¹¹ Jesus eju oekukuiayū wawa o'e iḡuykitkit ip Jesus kay buye. Wawa ip pima Maria Madalena o'ju ixeyū mukūyjom.

— Wuyekariwa waram o'jetait! — io'e cebe ip.

— O'jebapuk okay. Ojojojo — io'e Maria.

Imēnpit itabut'ūm o'e ip Maria ekawēn kay.

— Dapxi ēn — io'e ip Maria be.

¹² Ḡuyjom Jesus o'jebapuk xepxepayū kay. Iwarun ma o'jebapuk cekay ip. O'jebapuk cekay ip cum pima koḡūnpi be. ¹³ Imēnpuye ixeyū o'jepit warara'acayū kay- -jebureyū kay.

— Wuyekariwa itabēḡ ma'ḡuto! Ocejjojo! — io'e ip cebe ip.

— Dapxi eyju — io'e ip xepxepayū be.

Itabut'ūm o'e ip ixeyū ekawēn kay.

¹⁴ Ḡuyjom o'jebapuk onze beayū kay. Jekōnkōn ip pima, o'jebapuk cekay ip. O'ḡukorēm ip itabut'ūm puye waram o'jetait iap ekawēn kay.

— Apēnpuye eyetabut ḡu okay? — io'e. — Oweju oekukuiayū kuy o'e eywebe: “Wuyekariwa waram o'jetait,” i — io'e. — Eyetabut ḡu ixeyū ekawēn kay. Eybu'u jījā eyetabut am waram ocetait iap ekawēn kay — io'e.

Imēn ip o'ḡukorēm.

¹⁵ — Epeju juy soat kaka daḡ — io'e Jesus. — Soat ka daḡayū be juy kawēn idipat epeḡuwēn —

io'e. ¹⁶ — Okay itabut pima, jemubatisasanan pima dak, Deus taxijo — io'e. — “Eykērē oxe,” i je'e Deus okay itabut'ūmayū be bit. “Soat em ipiat epe-supi'ajo,” i dak je'e — io'e. ¹⁷ — Deus ja'ōbacaap je'gūm okay itabucayū be ka'ūma ma ajojojoiap mubapuk am soat etabutpe — io'e. — Iboap a'ōbacaam ibiōgbuk kērēayū gūjēmjēm ip ikuḡayū bewi — io'e. — Warara'acat a'ōm jekawēn ip iisuan — io'e. ¹⁸ — Itaybit'ūma puybu tūypiatpu mucay buje, je'ū ḡu ip — io'e. — Itaybit'ūma tipiati kōn puje, je'ū ḡu ip — io'e. — Iwātaxipipiayū jeje jebu mōḡ puje, je'ada ip — io'e Jesus.

¹⁹ Kariwa Jesus imēn o'jekawēn jeweju etaybitbinayū eju.

Cekawēn eperē buje, Deus Jesus o'ḡuyu kabi kay. Oabik Deus xe ixē eju soat kukukan.

²⁰ Ibocewi ceweju etaybitbinayū o'jēm. Soat ka daḡ o'ju ip. Kawēn idipat muwēnuwēn oekuku ip. Wuyekariwa Jesus ixeyū buywatwan osunuy. Soat **etabutpe** ka'ūma buk ajojojoiap mubapukpuḡ oekuku ip ixē a'ōbi. Imēneju adeayū itabut o'e ip ixeyū ekawēn kay.

JESUS CRISTO MUWĒĠAP EKAWĒNTUP- -LUCAS EMUDUPMUBARARAKTUP

1 ¹⁻² Teófilo, ên a'ôbuyxi soat xe ocexe. On ijudup mubararaġ ewebeaptum- -apĕn cuk adi Jesus Cristo o'e'e wuyetabutpe iaptup. Kuy bima warara'acayū apĕn ixē Jesus Cristo o'e'e iaptup o'-tupmubararak. Koap o'jekawĕn ip ixē eju oeku-ku'iaiyū eju ixē e'eap o'jojojo'iaiyū eju dak. Ixeyū a'ôbi juk ixē e'eaptup o'tupmubararak ip. ³ On pit cuk oce owebe ma:

— On tak cuy ocekawĕn ceweju ip — i. — Soat eju ixeyū eju juy ocekawĕn — i juk oce owebe ma. — “Apĕn ixē Jesus o'e'e?” i juy oce cebe ip — i juk oce owebe ma.

Imĕnpuye ixeyū eju juk ocekawĕn. Soat cuk o'ġuwĕn ip owebe. On tak apĕn o'e'e ip iaptup otupmubararak ewebeaptum ġasū bit, Teófilo. ⁴ Ijudup co buje, ên tak ece:

— Ixeyū juk adi icĕmān omutaybitbin apĕn Jesus Cristo o'e'e iam — i.

⁵ Teófilo, koam apĕn o'jebapuk Zacarias pe iap oġuwĕn ewebe, apĕn o'jebapuk itayxi be iap tak. Herodes Judéia eipi watwat kukukat pima, Zacarias itabĕġ osunuy. Judeuyū epaī osunuy ixē Zacarias. Kapikpik'uk osunuy Abias ebekitkit eju Deus eju kawĕnwĕnap'a be. Abias ebekitkit tak paīyū osodop ip. Zacarias tayxi Arāo badip osunuy- -paīyū kukukat badip. Itayxi butet Isabel i osunuy. ⁶ Ixeyū xepxep-ayū cūġ ma ip osodop Deus xe Kūyjobit ip osodop soat Deus a'ô kay. Deus bikuyap taġ jekuku'uk ip osodop. ⁷ Bekicat kuġ ġu ip osodop, itayxi i'it ta ba'ore buye. Yabut osunuy. Zacarias tak aypa osunuy.

⁸ Gebuje Zacarias o'ju Deus eju kawĕnwĕnap'a kay- -yaboġat'a kay. Ibo'a be kapikpiġ osunuy Deus etabixe paī buye. Kapikpiġ osunuy Abias ebekitkit eju. ⁹ Jebabi daġ ibadipyū juk Zacarias o'taĕ iōm ām

badiat'a be. ¹⁰ Oöm tōmte'oatōm mupik am Deus etabixe. Adeayū dak Deus eju kawēnwēnap'a eakiju ip osodop. Akiju kawēnwēn ip osodop Deus eju, Zacarias badi tōmte'oatōm mupikupiḡ pima.

¹¹ Ġebuḡe Deus ekawēn tojtjot'ukat oajēm Zacarias kay. Cūḡ'i osunuy tōmte'oatōm mupikupikap'a ba'at kadi- -caixa'a jo'iat'a ba'at kadi. ¹² Zacarias yaḡuy'ūm o'e ixe Deus ekawēn tojtjot'ukat co buje. Iparara jījā o'e.

¹³ Ġebuḡe Deus ekawēn tojtjot'ukat o'jekawēn Zacarias pe.

— Tapu, epararam ḡu juy eḡuy — io'e. — Apēn cuk adi ece cebe iap o'ya'ijojo Deus — io'e. — Ġasū ma emumuojuy je'ḡūm ewebe — io'e. — Etayxi ekpon ḡukap. João i juy ibuten je'e — io'e. ¹⁴ — Ey-cokcoḡ cīcā ma epesop bekicat kap puje. Adeayū dak icokcok cīcā je'e eyweju. ¹⁵ Ekpot ya'ōbuyxian je'e Deus xe. Uva'abidi juy idikōn ḡu, wuymuka'o'onapti dak. Ibiōḡbuk xipacat a'ōbi ixe jeku jekap'isum piap — io'e. ¹⁶ · ¹⁷ — Ekpot Judeuyū aḡuymuwarururun je'e ixeyū be Deus kay am, wuykukukat kay am tak. Deus biōḡbuk a'ōbacaap kuḡ ixe jeku Elias ekukuap puxim. Ka'ūma buk ocejojoiap mubapukpuḡ jeku. Ixe omuyku wuykukukat ajēm awap. Ixe cebayū aḡuymuwarururun je'e ixeyū be waram ḡuto jebekitkiyū kay am. Ixe Deus a'ō kay'ūmayū aḡuymuwarururun je'e ixeyū be waram ḡuto kawēn icēmat taḡ jeku am. Ixe ijodiacat ḡubikuy wuykukukat ajēmap wiwi am — io'e.

Imēn Deus ekawēn tojtjot'ukat o'jekawēn Zacarias pe.

¹⁸ Ġebuḡe Zacarias o'jekawēn Deus ekawēn tojtjot'ukat pe.

— Iba'ore ma owebe okpotpet am — io'e. — Kuy aypa oce. Otayxi dak yabut kuy — io'e.

¹⁹ — Gabriel i obutet — io'e. — Deus etabixe cūḡ'i ōn nuynuy. Deus ma omudot jekawēn ām eweju. Ixe omudot iboap awēḡ muwēn ām ewebe- -yawēḡ tipatawēḡ muwēn ām ewebe. ²⁰ Ēn pit etabut ḡu wa'ō kay — io'e. — Imēnpuye ekōmbicaca ecesūy. Ede ba'ore ecesūy. Wekawēn taḡ cebapuk puje bit,

waram ġuto ede but ece'e. Soat ma je'bapuk ixe kambia be apēn ōn e'em ewebe iap taġ — io'e.

²¹ Adeayū dak Deus eju kawēnwēnap'a bewi Zacarias jēmap wiwim ip osodop.

— Apēnpuye dak Zacariasibun cīcā Deus eju kawēnwēnap'a be? — io'e ip jewewebe kakijuayū.

²² Ġebu je Zacarias oajēm akijuayū kay. Cekawēn pa'ore o'e cebe ip. Imēnpuye itaybit ip o'e Deus eju kawēnwēnap'a be bima Zacarias jexey jo'iat o'jojojo iam. Jekawēn ojuy akijuayū eju. Cekawēn pa'ore bit o'e. Imēnpuye jebum acā o'jekawēn ceweju ip.

²³ Deus eju kawēnwēnap'a be jekapikap epere buje, Zacarias o'jepit jeduk'a kay.

²⁴ Ġuyjom ma itayxi o'yukreġ-Isabel. Pūġpōġbi kaxi jeduk'a be ma osunuy Isabel.

²⁵ — Okukukat xipat cīcā oxe! — io'e Isabel. — Koap cuk adi oġuy osūsūn, o'it'et'ūm puye — io'e. — Ġasū bit osūsūn ġu oce oyukreġ puye — io'e Isabel jewebe ma.

²⁶ · ²⁷ Ġebu je Deus jekawēn tojtjt'ukat o'ġuju yaypan'isuat kay- aġokatkat eju o'jepo ġu'iat kay. O'ġuju cekay Isabel 6 kaxi yukeġ puje. Deus ekawēn tojtjt'ukat putet Gabriel i osunuy. Oajēm aġokatkat eju o'jepo ġu'iat kay. Ixe ayacat Galiléia eipi be osunuy. Nazaré ka be osunuy. Maria i ibutet osunuy. José wadip osunuy. José Davi badip osunuy. ²⁸ Oajēm Deus ekawēn tojtjt'ukat Maria kay.

— Tū'ū, ecokcoġ cuy eġuy — io'e. — Deus xipat cīcāat je'ġūm ewebe. Wuykukukat soat em jekukum eweju — Gabriel o'e.

²⁹ Maria yaġuybabi'ūm o'e cekawēn co buje.

— Apēnpuye dak imēn teku odobededem? — io'e Maria jewebe ma.

³⁰ — Tū'ū, epararam ġu juy eġuy — io'e. — Deus xe ekukpin cīcā — io'e. ³¹ — Je'ukreġ. Aġokatkat eceġukap e'in. Jesus i juy esubuteta — io'e. ³² — Ya'ōbuyxian je'e e'it — io'e. — “Deus ipot teku,” i je'e soat ijodiat. “Soat podi ya'ōbacaat ipot teku,” i je'e ip. Deus ixe jomuy Judeuyū kukukan. Kuy bima Davi Judeuyū kukukat osunuy- Jesus eajot. Imēnpu-

xim Jesus Judeuyū kukukan je'e. ³³ Soat em ma imēn Jacó naxegebitbit kukukan jeenuy. Wara'at ġu jomuy ixe dieġ ixeyū kukukan — Gabriel o'e Maria be.

³⁴ — Apēn xe'e dak osu'itkap? Ocepo ġu mabuk a'ġu aġokatkat eju — io'e Maria Deus ekawēn tojt-jot'ukat pe.

³⁵ — Ibiōġbuk xipacat jajēm ekay — io'e. — Je'ukreġ soat podi ma ya'ōbacaat a'ōbi-Deus a'ōbi. Imēnpuye bekicat ikērēat kuġ ġu je'e. Deus ipon je'e.

³⁶ Gebum cuy eġuy ebadip kay-Isabel kay — io'e. — Ixe Isabel o'yukreġ yabut ma'ġu. Kuy aġokatkat opop yuk pe. "I'it ta ba'ore teku," io'e'e ip kuy bima. Ġasū bit 6 kaxi yukreġ. ³⁷ Ka'ūma ma iba'ore Deus pe — io'e.

³⁸ — Ha'a — Maria o'e. — Deus okukukat. Deus a'ōbi soat je'bapuk owebe apēn ēn e'em owebe iap taġ — Maria o'e.

Deus ekawēn tojtjot'ukat o'jēm cexewi.

³⁹ Gaxīn ma Maria o'ju Isabel kay. Dao ma o'ju co'a'uat kapēn pe. Judéia eipi be o'ju. Isabel ka be o'ju. Jay. Oajēm. ⁴⁰ Oōm Zacarias duk'a be-Isabel duk'a be. Isabel o'tobede. ⁴¹ Joroh. Isabel ukpeat o'-jejero yuk pe Maria be Isabel dobede buje. Ibiōġbuk xipacat a'ōbacaat kuġ osunuy Isabel.

⁴² Ġebuġe Isabel o'jekawēn ya'ōberen Maria eju. — Deus xipat cīcā! — io'e. — Deus xipacat ūm-ūm ewebe. Ecokcok soat cokcokap podi ma-aoyū cokcokap podi ma. "Ēn xipat cīcā," i je'e adeayū e'uk peat pe. ⁴³ Deus xipacan e'em owebeam tak! Ēn okukukat xi. Inaka okay ajēm, wa'ōbuyxi ġu ma'ġu — io'e. ⁴⁴ — Ewebe odobede buje, o'uk peat o'jejero jecokcok pibun — io'e. ⁴⁵ — "Soat je'bapuk owebe apēn okukukat e'em owebe iap taġ," i ēn e'em. Imēnpuye Deus xipacan e'em owebeam — Isabel o'e.

⁴⁶ Ġebuġe Maria o'jekawēn Isabel eju.

— "Wuykukukat soat podi ma xipat," i ōn e'em — io'e.

⁴⁷ — Ocokcok cīcā Deus xipan okuġ

puye- -odaxijojo'ukat xipan okuḡ puye
— io'e.

⁴⁸ — Ixe acā okukukat. Odadaybot
ma dak. Imēnpit ixe soat em aḡ okay
— Maria o'e. — “Deus xipacan ixe
ayacat o'jukuk,” i je'e soat ka watwat
omuwēnuwēn — io'e. — Ḡasū imēn
je'e ip, ḡuyjom tak — io'e.

⁴⁹ — Ixe ka'ūma buk ocejojojoiap
o'ḡubapuk owebe. Soat podi ma ixe
ya'ōbaca — io'e. — Ibuyxim cuy ibu-
tet ajukuk — io'e.

⁵⁰ — Deus itabotaidabotbot cīcā
ibuyxim jekukayū kay. Wuydobuyū-
'ūm'ūm kay itabotaidabotbot cīcā
osunuynuy. Ḡasūayū kay dak ita-
botaidabotbot- -soat kay. Guyjomayū
kay dak itabotaidabotbon jeedop —
io'e.

⁵¹ — Deus ja'ōbacaap o'ḡubapuk-
puk. Yoboḡan pinayū o'ḡuypōḡpōḡ.
Ixe'yū e'eap o'ḡu'ūm — io'e.

⁵² — Ika kukukayū o'ḡujēm je-
nuyap pewi. Ya'ōbuyxi'ūmayūm o'e
ip. Ya'ōbuyxi'ūmayū o'jomuy ixeyū
nuyap pe. Ya'ōbuyxi'ayūm o'e ip —
io'e.

⁵³ — Tadaybotbocayū be xipat
cīcāat o'ḡūmḡūm. Soat kuḡ ip o'e.
Ibubut adeayū bit ibuipuk o'ḡujēm-
jēm — io'e.

⁵⁴ — Ixe Israel naxeḡebitbit o'su-
buywatwan cīcā- -ja'ō kay kūyjobicayū
o'subuywatwan cīcā. Xipan wuydo-
buyū'ūm'ūm o'jukukuk apēn cuk adi
o'e'e iap taḡ — io'e.

⁵⁵ — Xipan wuydobuyū'ūm'ūm
o'jukukuk- -Abraão'ūm o'jukukuk, ce-
naxeḡebitbit'ūm'ūm tak o'jukukuk.
Ja'ō daḡ soat em ḡebum osunuy ixeyū
kay. Soat em ixe ḡebum osunuy ixeyū

kay xipan ikuk am — io'e -Maria
o'e.

⁵⁶ Ebapūg̃ kaxi Maria Isabel xe osunuy.
Ibocewi o'jepit jeduk'a be.

⁵⁷ Ija kaxi ajēm puje, Isabel o'su'itkap aḡokatkat.

⁵⁸ - ⁵⁹ Bekicat 8 kabia bima ibadipyū oajēm, ixe
duk'a xeyū dak. Oajēm ip ikap'isuat taypu'aḡobi-
xeedakat am "Deus ebekit teku" i'e am. Soat iba-
dipyū icokcok cīcā o'e ip.

— Deus xipan cīcā ija xi o'jukuk — io'e ip.
Ibutetaat ojuj ip.

— Zacarias i juy asubutetaat cebay butet kadin
ma — io'e ip jewewebe.

⁶⁰ — Ap! — ixi bit o'e. — Ibo ḡu je'e ibutet-
João i acā — io'e ixi.

⁶¹ — Ebadipyū butet João i'ūmḡu — io'e ip ixi
be.

⁶² Ḡebuje o'jekawēn ip cebay eju.

— Apēn ekpot puten je'e? — io'e ip cebay be.
Jebum acā o'jekawēn cebay, cekawēn pa'ore buye.
⁶³ "Taperadup cuy etupūm owebe" iape, cebay o'e je-
bum cebe ip. O'tupūm ip cebe.

Ibocewi o'tupmubararak cebay. Ibutet João i iap-
tup o'tupmubararak. Soat ip itabēḡbēḡ o'e ijojom.
Zacarias i cebay je'e tūybe iān o'e ip.

⁶⁴ Cebay cekawēn put o'e ḡebuje bit. Xipan o'je-
kawēn ḡuto.

— Deus xipat cīcā — io'e. — Ka'ūma ma ixe
jo'iat ya'ōbuyxiat — io'e.

⁶⁵ Imēneju yaḡuybabi'ūm o'e ip tuk'a xeyū.
João kapap awēḡ o'yawēḡmuwēnuwēn ip soat ka
daḡ- -Judéia eipi daḡ, co'a'uat kapēn taḡ tak.
⁶⁶ O'yawēḡtobuxik'iaiyū jewaḡuydadam ip osodop
João kapap awēḡ kay.

— Apēn xe'e je'e ite bekicat yaypan pima? —
io'e ip jewewebe.

Imēn o'jekawēn ip, João Deus a'ōbacaap kuḡ oeku
buye.

⁶⁷Gebuje Zacarias apên ġuyjom je'bpuk iap o'ġuwēn-ikap'isuat ebay. Iboap o'ġuwēn Ibiōġbuk xipacat a'ōbi.

⁶⁸ — Ġa'a ace Deus pe "Ka'ümġu ejo'iat," i. Ixe Deus kay itabut ip osodop Israel naxeġebitbit. Jebekitkiyū o'subuywan. Jebekitkiyū o'taxijo — io'e.

⁶⁹ — Deus wuydaxijojo'ukat o'ġudot wuykay. Ya'ōbacaat o'ġudot wuykay. Wuydaxijojo'ukat Davi naxeġebitbit-Deus a'ō kay kūyjobicat naxeġebit — io'e.

⁷⁰ — Ixe wuydaxijojo'ukat ya'ōbacat cīcā. Ka'ūma ma ixē jo'i ya'ōbaca. Imēnpuxim kuyje Deus ekawēn muwēnuwēn'ukayū o'e'e Deus a'ōbi-soat taġ iisuayū o'e'e — io'e.

⁷¹ — "Deus wuydaxijo wuykay itakomaayū be wuyaokaap puxim. Ixe wuykay'ūmayū a'ōbacaap ġu'ūm ixeyū be wuyaokaap puxim," i'e'e'uk osodop ip — io'e Zacarias.

⁷² — Deus itabotaidabotbot osunuy wuydobyū'ūm'ūm kay apên kuy o'e'e iap taġ. "Wekawēn taġ oce," io'e Deus. Jekawēn taġ o'e'e soat em ma. Cekawēnkērē ġu osunuy- -ceka-wēntip cīcā — io'e.

⁷³ — Ixe o'jekawēn wuydobyūm eju- -Abraão'ūm eju. "Jedaxijo ōn ekay itakomaayū bewi; ebekitkiyū dak otaxijo," io'e Abraão be — io'e.

⁷⁴ — "Jeybuywan ōn eypararam ġu kapik am owebeam," io'e Abraão be — io'e.

⁷⁵ — "Cūġ ma epesop oxe," io'e. "Ikērēat kuġ ġu epesop oxe," io'e. "Soat em epesop oxe eyetait," io'e. Ixe o'e apên cuk adi o'e'e iap taġ — io'e Zacarias.

⁷⁶ — Bekit — Zacarias o'e jekpot pe-ikap'isuat pe. — Wuykukukat wap eceju soat muxipan am ixemudot am. Deus ekawēn muwēnuwēn'ukan ece'e- -soat podi ma ya'ō-bacaat ekawēn muwēnuwēn'ukan — io'e.

⁷⁷ — Adeayū be ece'e "Deus ikērēat ju'uk eywebewi," i. "Deus jeydaxijo," i ece'e cebe ip — io'e Zacarias.

⁷⁸ — Imēn Deus itabotaidabotbot cīcā wuykay. Yukpicegē gū wuykay. Wuydaxijojoap kabia jajēm ixea'ōbi. Ixe jajēm kabia buxim.

⁷⁹ — Ixe kabiok pe jekuku'ukat puximayū gūkabia. Je'ūap puxim ipararaayū gūkabia. Ixe wuymutaybitbin je'e wuywebe xipan jewewekuk am. Kaba'ūm acesop wuyeweweju.

^{79a} — Imēneju adeayū je'e ewebe: "En Deus ekawēn muwēnuwēn'ukat," i — io'e ikap'isuat ebay.

Imēn Zacarias apēn gūyjom je'bapuk iap o'gūwēn Deus a'ōbi.

⁸⁰ Bekicat o'yaypan. Kūyjobit osunuy Deus a'ōkay. Uk'a'ūmat pe osunuy Judeuyū kay jeju'ūm pima- -Judeuyū mutaybitbin'ūm pima.

2 Ixeyū kabia be Augusto cartadup o'tupmubararak- -soat ka kukat. O'tupmuju soat pe jebekitkiyū be. Bekitkit, eykapap ka kay juy epeju eybutet mubararak am taperadup pe i'eaptup o'tupmuju. ² Ka'ūma ma iḡo eipi watwat o'gūweḡūn ijoptup muju awap. Jebekitkit o'gūweḡēḡat Cirênio Síria eipi watwat kukat pima. ³ Imēnpuye soat ixebekitkit o'ju jebutet mubararak am taperadup pe. Jekapap ka be ip o'ju.

⁴ Imēnpuye José dak o'jēm Galiléia eipi bewi- -Nazaré ka bewi. O'ju Judéia eipi be- -Belém ka be- -Davi osunuyiat ka be. Ixe José o'ju Davi diwat osu-

nuy buye. ⁵ O'ju jebetet mubararak am Maria eju-
jetayxi eju. Maria yukreğ osunuy. ⁶ Ixeyū Belém ka
be bima, Maria o'yukpasuk.

⁷ Gebuje Maria o'su'itkap koapat-
ağokatkat. Ikap'isuat o'yamuekabek pağöm.
O'ğuyxet biopak xat mün pe-
cucuayū nuyap'a be topap'üm puye.

⁸⁻⁹ Kabi bewi Deus ekawēn tojtjt'ukat tak o'-
kop ovelha kukukayū kay. Koğūnpi be osodop ip Be-
lém ka tēğ ma. Ovelha kukuğ ip osodop ixima be.
Deus o'ğukabia ovelha kukukayū akokoreren.
Iparara jijā ip o'e kabia jo buje, idip cīcā ma'ğū kabia.

¹⁰ Gebuje Deus ekawēn tojtjt'ukat o'jekawēn
ceweju ip.

— Eypararam ġū juy epesop — io'e. — Kawēn
idipat otojt imuwēn ām eywebe eymucokcok am.
Kawēn idipat otojt soat pe imuwēn ām ijodiat pe.

¹¹ Eydaxijojo'ukat o'kap ġasū. Davi osunuyiat ka be
o'kap — io'e. — Soat kukat ixē-
-ipi dağat kukat. Cristo i ibutet — io'e
Deus ekawēn tojtjt'ukat.

¹² — Ixe ikap'isuat iekabek pağöm.
Po'i biopak xat mün pe. Imēn ōn
eymukūyjojom eywebe tobuxik am
— io'e cebe ip.

¹³ Gebuje warara'acayū o'jebapuk
kabi kadiwi Deus ekawēn tojtjt'ukayū.

— Ka'ūma ma Deus co'iat — io'e ip.
— Soat podi ma ixē ya'ōbuyxi — io'e ip.

¹⁴ — Ka'ūmġū Deus co'iat xipacat — io'e
kabi kadiwiayū. — Kaba'ūm jeedop ip
soat ijodiacat-Deus emumukukpinyū — io'e ip.

¹⁵ Waram ip o'jeu kabi kay Deus ekawēn
tojtjt'ukayū.

Cexewi Deus ekawēn tojtjt'ukayū cēm
puje, o'jekawēn ip jeweweju ovelha
kukukayū.

— Ğa'a aju — io'e ip. — Belém ka
kay juy aju — io'e ip. — Apēn Deus
o'e wuywebe iap cuy ajojo — io'e ip
jewewebe.

¹⁶ Dao ma ip o'ju.

Oajēm ip. Ixeyū dak ikap'isuat o'tobuxik
José eju, Maria eju dak. Po'i osodop
biopak xat mün pe.

¹⁷ Ikap'isuat tobuxik puje, ikapap awēğ
muwēnu-

wën oekuku ip soat ka dağ. Apën Deus ekawën tojt-jot'ukayū bekicat kapap o'ğuwën cebe ip iap muwën-uwën oekuku ip soat ka dağ. ¹⁸ Itabēğbēğ ip o'e cēm paxi iam o'ya'ijoiayū ma. ¹⁹ Maria bit soat em ġebum osunuy apën je'it o'kap iap kay. Iboap kay jewağuy muğēğēm osunuy. ²⁰ Ovelha kukukayū o'jepit kogūnpi be.

— Ēn xipat cīcā — io'e ip Deus pe. — Idip cīcāat ocejojojo — io'e ip. — Idim cuk ěn ocemukūyjo — io'e ip.

Soat o'tobuxik ip apën Deus ekawën tojtjot'ukat o'e cebe ip iap tağ. Imēnpuye:

— Ka'ūma ma ejo'iat xipacat — io'e ip.

²¹ 8 xet kap puje cebaydaap Jesus daypu'ağobuxee o'suxeedakacat Judeuyū babim. Yukreğ awap Deus ekawën tojtjot'ukat o'e Maria be: — Jesus i ibuten je'e — i. Imēnpuye Jesus i o'subutetaat ip.

²² · ²³ Ġebuje cebaydaap Jesus o'tujowat Jerusalēm ka kay. Jetayxi eju o'tujowat. O'tujowat ip ikap'isuat mubapuk am paī be Moisés ekawën tağ. Ibararak opop wuykukukat ekawēntup pe:

Ağokatkat kap puje-koapat kap puje,
ixe ikap'isuat Deus ebekit ma, i.

Imēneju cebaydaap Jesus o'tujowat Jerusalēm ka kay imubapuk am Deus etabixe Deus eju kawēnwēnap'a be. ²⁴ · ³⁰ Imēn e'em wuykukukat ekawēntup:

Bekicat kap puje, wūncā juy eğūm
paī be ixe be imupik am Deus etabi-
xe, i. Xepxep pukaso juy eğūm, i. Pu-
kaso kuğ'ūm pima, xepxep coot cuy
eğūm, i.

Imēn e'em wuykukukat ekawēntup. Imēneju cebaydaap oajēm Jerusalēm ka be ikap'isuat mubapuk am Deus etabixe.

Ġebuje Ibiōğbuk xipacat Simeão oōmat Deus eju kawēnwēnap'a be- yaboğat'a be. Cebaydaap tak Jesus o'tujuajēm Deus eju kawēnwēnap'a be pukaso ūm ām paī be Moisés ekawën tağ. Simeão Jesus o'takoy jebakopixirik ceje.

Ixe Simeão Jerusalém ka be osunuy. Cûg cîcâ osunuy Deus xe. Itabut cîcâ osunuy Deus kay. Judeuyû daxijojo'ukat ajêmap wiwim osunuy. Ibiôgbuk xipacat ixè mutaybitbin'uk osunuy. Ibiôgbuk xipacat o'e Simeão be kuy bima:

— Eje'û gû wuykukukat co'ûm pima- -soat taxijo am Deus emunaê jo'ûm pima — i.

Ġebuġe Simeão Deus o'ġuwênuwên xipan.

— Okukukat — io'e. — Ġasû ôn iju jojom — io'e. — Soat taxijo am etaēiat cocom ôn — io'e. ³¹ — Soat etabixe juk etaēiat cocom ôn — io'e. — Ġasû bit we'û but ocokcoġ — Simeão o'e. — Ġn acâ okukukat — io'e. — Ġasû ôn iju jojom apên cuk ece owebe iap taġ — io'e. ³² — Kabiaap puxim je'e ixè. Judeu'ûmayû mutaybitbin je'e — io'e. — Ebekitkiyû dak kûyjobin jeedop ip warara'acat a'ô kay ġu-ixè a'ô kay acâ-Israël naxeġebitbiyû — io'e. — Edipap kuġ jeedop ip — io'e Deus pe.

³³ Cebaydaap, ixi dak itabêġbêġ ip osodop Simeão ekawên cocom- -bekicat muwênuwênap cocom.

³⁴ - ³⁸ — Xipan cuy ikap'isuat ebayû ejukuk — Simeão o'e Deus pe.

Ġebuġe Simeão o'jekawên Maria eju- -ikap'isuat xi eju.

— A'ôpicûġ cuy eġuy — io'e. — Deus cuk ixè bekicat o'taê — io'e. — Inaka adeayû iju kay ġu jîjâ je'e Judeuyû'in. Deus pit ixeyû ġu'ûm. Ġn tak eġuy-cûġ cîcâ ece'e — io'e. — Ipiat ecesupi'ajo jîjâ paja ewebe ômap puxim — Simeão o'e Maria be. — Warara'acayû bit iju kay jîjâ je'e. Icokcok cîcâ jeedop ip cekay. Deus imên adeayû aġuymubapukpuġ je'e soat pe — io'e Simeão Maria be.

Bekicat ebayû Deus eju kawênwênap'a be bima, Ana oajêm cekay ip. O'jekawên Deus eju.

— Bay, ên xipacat cîcâ — io'e Deus pe- -Ana o'e.

Ixe Ana bekicat o'kapiap o'ġuwên adeayû be Jerusalém ka watwat pe- -Deus jebekitkit taxijoap wiwi'ukayû be. Ixe Ana Deus ekawên muwênuwên'ukat osunuy. Fanuel daxit osunuy. Aser diwat osunuy. Yabut cîcâ osunuy. Yaypan'isu bima juk o'jewebumûn. 7 koato jektop xe osunuy. Kuy ma itop'ûm oe'û. Ixe

Ana 84 koato osunuy ġasū. Deus eju kawēnwēnap'a bewi o'jēm ġu. Soat em ma iġo'a be nuynuy-kabiam, ixima daġ tak. — Ēn xipāt cīcā — i'e'e'uk osunuy Deus pe soat em. Deus eju kawēnwēn'uk osunuy. Jekpiwan ma jewemureren'uk osunuy ceweju jekawēn ojuy.

³⁹ Deus ekawēn taġ paī be bekicat mubapuk eperre buje, cebayū Jesus o'tujupit jeka kay. Nazaré ka kay ip o'jepit-Galiléia eipi be. ⁴⁰ Bekicat o'yaypan. Ibacaan o'e. Jeadipyū bodi ma itaybican o'e. Deus xipacat ūmūm'uk osunuy cebe.

⁴¹ Jesus ebayū waram o'ju ip Jerusalém ka kay Soat em Páscoa epeta be cucu'uk ip osodop Jerusalém ka kay. ⁴² 12 koato bima, Jesus o'ju ġuto jebaydaap, ixi iat eju, peta be cucu'uk puye.

⁴³ Peta eperre buje, cebayū ma o'jepit ip jeka be. Jesus pit o'jecū Jerusalém ka be. Itaybit ġu ip osodop cecūam. ⁴⁴ Tūybe Jesus wuybadipyū eju o'jepit iān o'e ip cebayū. Jepitpin o'ju ip e daġ jeka kay. O'xet ip e bidase. Jesus o'jokudada ip jeadipyū daġ, jebureyū daġ tak. ⁴⁵ Ka'ūmġu. O'tobuxik ġu ip. Imēnpuye ikudadam o'jepit ġuto ip Jerusalém ka be. Ebaṗūġ kabia ikudadam oekuku ip.

⁴⁶ Ġebuje Jesus o'tobuxik ip Deus eju kawēnwēnap'a be-yaboġat'a be. Xik'i osunuy Moisés ekawēn Judeuyū mutaybitbin'ukayū xe-aypapayū xe. Ceka-wēn cocom osunuy. Kawēnwēn osunuy ceweju ip. ⁴⁷ Jesus kay jījā ip o'e soat cekawēn cocoayū, itaybit cīcā buye, cūġ cīcā jededem puye dak.

⁴⁸ Jesus tobuxik puje, cebayū itabēġbēġ ip o'e ijojom.

— Tapu — io'e ixi Jesus pe. — Edaobu'u du eġuy jepin? — io'e. — Ocaġuybabi'ūm cīcā ocesop ekudadam-ōn, ebaydaap tak — io'e-jekpot pe o'e.

⁴⁹ — Aī, apēnpuye dak okudadam epeku? — io'e. — Eyetaybit ġu du webay duk'a be juy ōn iam-Deus eju kawēnwēnap'a be? — io'e-jexi be o'e.

⁵⁰ Imēnpit Jesus ekawēn iba'arēm o'e cexe ip.

⁵¹ Ibocewi o'jepit jebayū eju Jesus. Oajēm jeka

be- -Nazaré ka be. Jebaydaap a'ô kay kûyjobit osunuy. Ixi dak soat em ġebum osunuy apên Jesus cuk adi o'e'e cebe iap kay. ⁵² Ixe Jesus tak jebureyû bodi ma itaybican o'e. O'yaypan. Ikukpin cîcâ osunuy Deus xe, jexeayû xe dak.

3 ¹⁻² Gebuje Deus o'jekawên João Batista eju- -Zacarias ipot eju. João uk'a'ûmat pe osunuy.

— Wekawên cuy eġuwênuwên itaybit'ûmayû be — Deus o'e João be.

O'jekawên João eju Tibério Roma ka kukat pima. 15 koato kuy ika kukat osunuy. O'jekawên ceweju Pôncio Pilatos Judéia eipi kukat pima dak, Herodes Galiléia eipi kukat pima dak, Lisânicas Abilene eipi kukat pima dak, Filipe Ituréia eipi kukat pima dak. Ixe Filipe Traconites eipi kukat tak osunuy. Filipe Herodes kitpit osunuy. O'jekawên João eju Anás Judeuyû epaïyû kukukat pima. Caifás tak Judeuyû epaïyû kukukat osunuy. ³ Imênpuye Jordâodi wâbu daġ oeku João.

Guyjom João Deus ekawên o'ġuwênuwên adeayû be.

— Eyġuycûġcûġ cuy epesop ikêrêat kuġ puye — io'e cebe ip. — Ikêrêat mujurûġrûġap cuy epeyepere — io'e. — Epeyewemubatisasanat cuy — io'e. — Imên ey'e buje, Deus ikêrêat ju'uk eywebewi — io'e. ⁴ — Imêntak e'em Isaías emudupmubararak-tup- -Deus ekawên muwênuwên'ukat emudupmubararak-tup:

Aġokatkat jewâwâwâm uk'a'ûmat pe, i. Imên jewâwâwâm:

Soat e juy epesuemukacûġ wuykukukat ajêmap em, i. Ie juy epesuemudim ceku am, i. ⁵ Kabioreġreġat cuy epeġudim, i. Ipiweġûn je'e, i. Co'a dak epeyamuweġûġûn, i. Iebixirik taġ cuy epesuemujêm, i. Wakenat e be epesuemujêm, i. Soat iekêrêat e iedip

cîcâ je'e, i. ⁶ Wuydaxijo am Deus emunaê coco ip soat ijodiacat, i.

Imên e'em Isafas emudupmubararaktup — io'e João adeayû be.

⁷ Imênpuye adeayû o'ju João be jemubatisanan.

Gebuje João adeayû o'ğukûyjo.

— Deus itakoma eykay, ikêrêat kuğ cîcâ buye — io'e. — Ipiat supi'ajoat eywebe, ikêrêat kuğ puye — io'e. — Eynapôn pa'ore Deus xewi — io'e. ⁸ — Cûğ ma juy epeku kuy ikêrêat mujurûğrûğap ocepere iap mubapuk am warara'acayû be — io'e. — Tûybe Deus ipiat supi'ajoat ģu wuywebe wuyju Abraão naxeğebitbit puye iân purut eyju e'em — João o'e. — Imên ģu juy epe'e — io'e. — Iba'ore ģu Deus pe wita'a muwexat am Abraão naxeğebitbiyûm — io'e. ⁹ — Ğaxîn ma o'a kukat jajêm ya'a'e'ûmat'ip takat am yop xik am daxa be — io'e. — Ixe buxim Deus tak ģaxîn ma ipiat supi'ajoat kûyjobit'ûmayû be — João o'e.

¹⁰ — Apêntak oce'e ipiat pi'ajoap puxim? — io'e ip João be.

¹¹ — Xepxep eyekabek kuğ pima, pûğ cuy epeğum ikuğ'ûmat pe — io'e. — Puybit kuğ pima epeğû-ê'ê juy ikuğ'ûmat pe — io'e.

¹² Iecuğap peam dinheiro bubu'ukayû dak oajêm João be jemubatisanan.

— Pâm oceju? Apêntak oce'e? — io'e ip João be.

¹³ — Iecuğap emumubudei bodi ģu juy epejat cebekitkit pewi-ixe emumubudei acâ — io'e João.

¹⁴ — Pâm oceju? — io'e ip sorarayû dak.

— Puyxibun ģu juy dinheiro epejat warara'acat xewi — io'e. — Napa ģu juy epe'e dinheiro bu am warara'acat xewi. Jemâmâmâm ģu juy epesop eyekapikapte i kuğ-eycokcoğ acâ — io'e.

¹⁵ Soat ģebum cîcâ o'e ip João ekawên kay.

— Ite du Deus emunaê soat taxijo am? — io'e ip jewewebe.

¹⁶ Gebuje João o'jekawên soat pe.

— Ôn ma eymubatisanan idibi be — io'e. — Wara'acat pit omuyku. Obodi ma ixê ya'ôbuyxi.

Soat podi ma ya'ôbaca. On pit ajo pēgap ġu ce-beam? Cedaġ ġu kuka oce ixe a'ôbuywatwat'ukan, oboġ ġu buye. On ma eymubatisasan idibi be. Ixe bit Deus biôġbuk ġuôm eywebe ya'ô daġ eyeku am. Ixe dak ipiat supi'ajoat eywebe cūġ ma eyeku am. ¹⁷ Wuyju taixee xixkiġ tūmūntata mujēm ām taixee bewi. Tūmūntata muxipanpan wuyju tamūn'a be. Taixee mupikpiġ daxa be. Imēnpuxim Deus kūyjobicayū muwajejem kūyjobit'ūmayū xewi. Kūyjobicayū ixe xe jeedop soat em. Kūyjobit'ūmayū bit soat em ipiat supi'ajojo — io'e João.

¹⁸ Imēn adeayū awēwēm oeku João. Kawēn idipat muwēnuwēn oeku.

^{19 - 22} Adeayū mubatisasan epere buje, João Jesus o'ġubatisan.

Gebuje Jesus kay Ibiôġbuk xipacat o'kop. Jesus Deus eju kawēnwēn pima, o'kop. Pukaso jo'i o'kop Ibiôġbuk xipacat.

Gebuje Deus o'jekawēn kabi kadiwi.

— Ēn okpocat — io'e. — Ocokcok cīcā ekay — Deus o'e Jesus pe.

Ġuyjom Herodes João o'ġuômat daomūnmūnap'a be. Ixe Herodes Galiléia eipi kukat osunuy. Kuy bima João o'e Herodes pe:

— Cedaġ ġu ewebe ekitpit tayxi bum etayxim- - Herodias bum — i. — Ēn ikērēat kuġ — io'e Herodes pe.

Herodes ikērēat kukuk'uk osunuy. Waram ikērēat o'jukuk ġasū dak. João ikērēat o'jukuk ġu. Inaka Herodes João o'ġuômat daomūnmūnap'a be.

²³ Jesus 30 koato bima ijodiacat mutaybitbin o'e. — Jesus José ipot — io'e'e ip adeayū. ²⁴ José ebay butet Eli i osunuy. Eli ebay butet Matate i osunuy. Matate ebay butet Levi i osunuy. Levi ebay butet Malqui i osunuy. Malqui ebay butet Janai i osunuy. ²⁵ Janai ebay butet José i osunuy. José ebay butet Matatias i osunuy. Matatias ebay butet Amós i osunuy. Amós ebay butet Naum i osunuy. Naum ebay butet Esli i osunuy. Esli ebay butet Nagai i osunuy.

Nagai ebay butet Maate i osunuy. ²⁶ Maate ebay butet Matatias i osunuy. Matatias ebay butet Semei i osunuy. Semei ebay butet José i osunuy. José ebay butet Joda i osunuy. ²⁷ Joda ebay butet Joanã i osunuy. Joanã ebay butet Resa i osunuy. Resa ebay butet Zorobabel i osunuy. Zorobabel ebay butet Salatiel i osunuy. Salatiel ebay butet Neri i osunuy. Neri ebay butet Melqui i osunuy. ²⁸ Melqui ebay butet Adi i osunuy. Adi ebay butet Cosã i osunuy. Cosã ebay butet Elmadão i osunuy. Elmadão ebay butet Er i osunuy. ²⁹ Er ebay butet Josué i osunuy. Josué ebay butet Eliézer i osunuy. Eliézer ebay butet Jorim i osunuy. Jorim ebay butet Matate i osunuy. Matate ebay butet Levi i osunuy. ³⁰ Levi ebay butet Simeão i osunuy. Simeão ebay butet Judá i osunuy. Judá ebay butet José i osunuy. José ebay butet Jonã i osunuy. Jonã ebay butet Eliaquim i osunuy. ³¹ Eliaquim ebay butet Meleá i osunuy. Meleá ebay butet Mena i osunuy. Mena ebay butet Matata i osunuy. Matata ebay butet Natã i osunuy. ³² Natã ebay butet Davi i osunuy. Davi ebay butet Jessé i osunuy. Jessé ebay butet Obede i osunuy. Obede ebay butet Boaz i osunuy. Boaz ebay butet Sala i osunuy. Sala ebay butet Nassom i osunuy. Nassom ebay butet Aminadabe i osunuy. ³³ Aminadabe ebay butet Admim i osunuy. Admim ebay butet Arni i osunuy. Arni ebay butet Esrom i osunuy. Esrom ebay butet Peres i osunuy. Peres ebay butet Judá i osunuy. ³⁴ Judá ebay butet Jacó i osunuy. Jacó ebay butet Isaque i osunuy. Isaque ebay butet Abraão i osunuy. Abraão ebay butet Tera i osunuy. ³⁵ Tera ebay butet Nacor i osunuy. Nacor ebay butet Seruque i osunuy. Seruque ebay butet Ragaú i osunuy. Ragaú ebay butet Faleque i osunuy. Faleque ebay butet Éber i osunuy. Éber ebay butet Sala i osunuy. ³⁶ Sala ebay butet Cainã i osunuy. Cainã ebay butet Arfaxade i osunuy. Arfaxade ebay butet Sem i osunuy. Sem ebay butet Noé i osunuy. Noé ebay butet Lameque i osunuy. ³⁷ Lameque ebay butet Matusalém i osunuy. Matusalém ebay butet Enoque i osunuy. Enoque ebay butet Jarete i osunuy. Jarete ebay butet Maleleel i osunuy.

Maleleel ebay butet Cainā i osunuy. Cainā ebay butet Enos i osunuy. ³⁸ Enos ebay butet Sete i osunuy. Sete ebay butet Adão i osunuy. Adão Deus ipot osunuy, Deus o'ḡuḡē buye.

4 Jordāodi bewi Jesus epit puje, Ibiōḡbuk xipacat o'tujowat uk'a'ūmat pe. Jesus aḡuydada'uk osunuy Ibiōḡbuk xipacat. ² Uk'a'ūmat taḡ oeku 40 kabia. Jesus Ibiōḡbuk xipacat a'ōbacaap kuḡ osunuy. Ibiōḡbuk kērēayū kukukat tak Jesus o'-subuyxijo iboce. Te'e ma ikērēat mujurūḡat ojuy Jesus pe iboce. 40 kabia Jesus jekōnkōn ḡu osunuy. Ire jījā osunuy.

³ Gebuje ibiōḡbuk kērēayū kukukat o'jekawēn Jesus eju.

— Ēn Deus ipot pima, a'ōbi ma wita'a juy eyamuwexat pāo'am — io'e Jesus pe.

⁴ — Ap! — io'e Jesus. — Imēn e'em Deus eka-wēntup: “Wuyetabēḡ wuyxat o'om puye ḡu-Deus wuymutaicin puye acā,” i — io'e.

⁵ Ibocewi ibiōḡbuk kērēayū kukukat Jesus o'tujowat umat pe. Soat eipi o'ḡubapuk cebe. Dao ma soat eipi daḡacat o'ḡubapuk cebe. Soat ip o'jojoyo.

⁶ — Ōn cuy emuy soat eipi watwat kukukan — io'e. — Wa'ōbi soat eipi watwat kukukan ecesūy — io'e. — “Ēn acā ocekkukat,” i je'e ip ewebe — io'e. — Ibutut adeayū kukukan ecesūy wa'ōbi — io'e. — Soat ma iūm put owebe omunaē be, soat podi ma ōn wa'ōbaca buye — io'e napa ma. ⁷ — “Ēn xipat,” i ēn e'em owebe bima, soat oḡūm ewebe — io'e. — A'ōbuyxian ecesūy wa'ōbi — io'e Satanás Jesus pe.

⁸ — Ap! — io'e Jesus. — Imēn e'em Deus eka-wēntup: “'Xipat ēn,' i juy epe'e Deus pe acā,” i. “Deus a'ō kay acā epesop kūyjobin-eykukukat a'ō kay,” i — Jesus o'e Satanás pe.

⁹ Ibocewi o'tujowat Jerusalém ka be. O'jomōḡ Deus eju kawēnwēnap'abi jeje- yaboḡat'abi jeje.

— Ēn Deus ipot pima, ecewemuy'at ijop'abi jewi ipi ju — io'e Satanás. ¹⁰ — Imēn e'em Deus

ekawëntup: “Deus jekawën tojtjot'ukayū ġuju xipan ekuk am,” i. “Ixyū jedaxijo ewebe xipāt'ūmat eba-pukap puxim,” i. ¹¹ “Ixyū jeak ekay wita'a be eimucakcakap puxim,” i — io'e Satanás.

¹² — Ap! — io'e Jesus. — “Cēm paxi Deus ja'ō daġ e'em?” i'ūmġu juy epe'e — io'e Jesus.

¹³ Ġebuje ibiōġbuk kērēayū kukukat o'jewede Jesus xewi. O'jēm cexewi Jesus puyxijojoap epere buje. Te'e ma Jesus pe ikērēat mujurūġat ojuy. O'jēm.

— Waram ġuto osubuyxijo jījā — io'e jewebe ma ibiōġbuk kērēayū kukukat- -Satanás.

¹⁴ Jesus o'jepit Galilēia eipi kay. Ibiōġbuk xipacat a'ōbacaap kuġ oeku. Soat ibo eipi watwat yajēm-ap awēġ o'yawēġtobuxik.

¹⁵ Ġebuje Jesus kawën idipan ip o'ġutaybitbin Deus eju kawënwēnap'a be.

— Soat podi ma Jesus xipan wuymutaybitbin — io'e ip ya'ijjoayū. — Ka'ūmġu ixe jo'iat xipacat — io'e ip.

¹⁶ Jesus o'ju jaypanap ka kay- -Nazaré ka kay. Jay. Oajēm. Jebodoydoyap kabia bima Judeuyū ōm-ōm'uk ip osodop Deus eju kawënwēnap'a be. Sábado bima ip ōmōm'uk osodop. Jesus oōm jeweju ip iġo'a be. O'āy Deus ekawëntup com iġo'a beacat pe ya'ijjo am.

¹⁷ Ġebuje iġo'a kukukat Deus ekawëntup o'tup-ūm Jesus pe- -Isaías emudupmubararaktup- -Deus ekawën muwēnuwēn'ukat emudupmubararaktup. Jesus o'tupmupaya. Pūġtup o'tuptobuxik. Imēn e'em itedup:

¹⁸ Deus biōġbuk owebe nuynuy, i. Imēnpuye ixe onaē owebe kawën idipat muwēn ām tadaybotbocayū be, i. Ixe omuju owebe: “Taomūnmūnayū daomūnmūnap'a bewi ġujēm ip” i'e am taomūnmūnayū be, i. Ixe omuju owebe: “Ita'ūmayū itate je'e ip” i'e am ita'ūmayū be, i. ¹⁹ Ixe omuju owebe tadaybotbocayū mujēm ām imuda-

daybotbot'ukayū xewi, i. Ixe omuju owebe: "Ġaxīn ma Deus jebekitkit idaxijo" i'e am soat pe, i.

²⁰ Imēn e'em itedup. Jesus ibodup o'tupcoco ya'ōberen. Otupmupirik. Waram o'tupūm yakukukat puy-watwat'ukat pe. Oabik.

Soat iġo'a beacat o'jeak cīcā Jesus kay.

— Apēntak teku? — io'e ip jewewebe.

²¹ Ġebuġe Jesus o'jekawēn ceweju ip.

— Ġasū bit soan o'jebapuk ijudup peat ekawēn taġ-ġasū otupcocoiatup ekawēn taġ — io'e.

²² Soat xe Jesus xipat cīcā osunuy iġo'a beacat xe.

— Jesus ekawēn soat podi ma cekawēntip! — io'e ip jewewebe. — Teku José ipot ġu du? — io'e ip jewewebe.

²³ Jesus o'jekawēn ceweju ip.

— "Tapu, ecewanūġta juy," i wuyju e'em wuyānūġtata'ukat pe — io'e. — Iboap kuka epe'e owebe dak. "Ocejojojo ġu bukiap cuy eġubapuk ocewebe ijo am apēn cuk adi eġubapukpuk Cafarnaum ka be bima," i aco'i eyju e'em owebe — Jesus o'e. ²⁴ — Icēmān ōn e'em eywebe. Deus ekawēn muwēnuwēn'ukat jaypanap ka be bima, ibo ka watwat ixekawēn kay ġu — io'e. ²⁵ — Icēmān ōn e'em eywebe. Kuyje Deus Elias o'ġuju pūġ kay itop e'ū'ibit kay- -Sarepta ka beat kay- -Judeu'ūmat kay- -Sidom eipi beat kay. Ixeyū kabia daġ soat kaka beayū irere oekuku. Ka'ūmġu muba'at osodop ebapūġ koato, ipidaseat koato dak. Soat ip irere jījā osodop. Imēnpuye ade itop e'ū'ibiyū tadaibotbot cīcā osodop ixeyū kabia daġ- -Judeuyū. ²⁶ - ²⁷ Imēnpit Deus Elias o'ġuju Judeuyū kay ġu- -Sarepta ka beacat kay acā- -Sidom ka tēġatka beacat kay acā — Jesus o'e. — Deus Eliseu o'ġuju Naamā kay imu'ada am. Eliseu Deus ekawēn muwēnuwēn'ukat osunuy. Naamā ierepat osunuy. Ade ierepayū Judeuyū eipi daġ osodop ip ixeyū kabia daġ. Imēnpit Eliseu warara'acat ġu o'ġu'ada. Naamā acā o'ġu'ada — Jesus o'e.

²⁸ - ²⁹ Iboap ekawēn co buje oitakomān cīcā ip Je-

sus kay Deus eju kawēnwēnap'a beayū. Jesus o'tuju-jēm ip jeka bewi.

Jesus o'tujuu ip co'a bicūg kay yaoka am. Aḡoka ibo'a pēnpēn taḡ o'sukadop. Co'a bicūg pewi yabitorom Jesus muy'at ojuy ip. ³⁰ Imēnpit Jesus o'kap cepidase ip. Jeju pinap taḡ o'ju.

³¹ Jesus o'ju Cafarnaum ka kay- -Galiléia eipi beat ka kay, ikaboḡatka kay. Judeuyū o'ḡutaybitbin Deus eju kawēnwēnap'a be jebodoydoyap kabia be. Soat esemana imutaybitbin'uk ip osunuy.

³² — Cūg cīcā ma Jesus wuymutaybitbin — io'e ip. — Jesus ja'ōbi ma wuymutaybitbin — io'e ip.

³³ Ḡebuḡe aḡokatkat o'jewāwā iḡo'a beat- -ibiōḡbuk kērēat kukat. O'jewāwā ya'ōberen ibiōḡbuk kērēat cebe buye.

³⁴ — Jesus, apēn ēn em ocewebe? — io'e Jesus pe- -Nazaré ka bewiat pe. — Ocemuy'ū ām tu ejot? — io'e. — Wetaybit ēn — io'e. — Ēn Deus ipot- -ikērēat kuḡ'ūmat ipot — io'e.

³⁵ Ḡebuḡe Jesus ibiōḡbuk kērēat o'ḡukorēm.

— Ecemūg — io'e Jesus cebe. — Ejēm cuy aḡokatkat pewi — io'e ibiōḡbuk kērēat pe.

Aḡokatkat pewi o'jēm ipi ju imuy'at'an pima. Imēnpit warēmtaḡ ḡu aḡokatkat o'jukuk cēmcēm pima. ³⁶ Imēnpuye itabēḡbēḡ o'e ip ijojom- -ibiōḡbuk kērēat o'ḡujēm iap cocomayū.

— Jesus ibiōḡbuk kērēat mujēmjēm ja'ōbi — io'e ip. — Ya'ōbacaat teku — io'e ip jewewebe. — Itaybit ibiōḡbuk kērēat mujēm ām — io'e. — Imēnpuye cēmcēm ip ya'ōbi — io'e ip.

³⁷ Soat ka daḡ Jesus awēḡ o'yawēḡcu- -Galiléia eipi korerenat ka daḡ.

³⁸ Ibocewi Jesus o'jēm Deus eju kawēnwēnap'a bewi.

O'ju Simāo Pedro duk'a kay. Oajēm. Cereḡ. Oōm. Simāo daxijo osodop ibo'a be. Ipa'i jījā osodop.

— Ipa'iat eḡu'ada — io'e ip Jesus pe.

³⁹ Gebuje Jesus o'ju ipa'iat kay. Pa'i o'ğukorēm.
— Ejēm cebewi — Jesus o'e pa'i be.

Imēnpuye pa'i o'jēm. Xipat o'e. Ipa'i topibit o'-kop ġebuje bit. Ixat o'ğugē Jesus peam, cewejuayū beam tak.

⁴⁰ Kaxi at puje ibo ka watwat iwātaxiپیایū o'-tujowat Jesus kay imu'ada am. Soat kuğ ip osodop iwātaxipi. Jesus o'jewebumōğ cebe ip- -soat pe. Soat ip o'ğū'ada'ada. Adah. ⁴¹ Ibiōğbuk kērēat o'ğujēmjēm ikukayū bewi. Poxerewun. O'jēm.

— En Deus ipot — io'e ip ya'öberen- -ibiōğbuk kērēayū o'e.

Itaybit ip osodop Jesus Deus emunaē iam. Inaka Jesus ibu'u osunuy ixeyū be iboap muwēn ām.

— On Deus emunaē iap epeğuwēn ġu juy — io'e cebe ip.

⁴² Kabia'isum Jesus o'jēm Simāo Pedro duk'a bewi. Poxerewun. O'ju uk'a'ūmat pe. Jay. Oajēm. Adeayū Jesus kudadam o'e ip. Jay. Oajēm ip Jesus kay.

— Ejēm ġu juy ocexewi. Ijoce ma juy eğuy — io'e ip Jesus pe.

Gebuje o'jekawēn ceweju ip.

⁴³ — Warara'acayū be dak kawēn idipat oğuwēn- -wara'atka watwat pe dak — io'e. — “Deus soat kukukan je'e,” i juy oce cebe ip — io'e. — Deus cuk omudot ibo ekawēn muwēn ām — io'e Jesus.

⁴⁴ Imēnpuye kawēn idipat muwēnuwēn oeku Deus eju kawēnwēnap'a be. Judéia eipi dağ imuwēnuwēn oeku- -soat kaka dağ.

5

Adeayū o'jewemuwunuwun ip Jesus ekawēn co pin cīcā buye. Jesus cūğ'i osunuy iodi wābu ka'oririt pe. Iodi Genesaré eipi be o'tinuy. Genesaré i tibutet osunuy. Adeayū jewemuwunuwun ip Deus ekawēn co pinayū.

² Gebuje Jesus xepxep kobe o'jojojo kapurūğ pe. Axima bubu'ukayū jekobe be ġu ip osodop. Kuy o'jēm ip. Axima bubuap wuywuy ip osodop kapurūğ

pe. ³ Jesus oôm pûg pe ixeyû ekobe be- -Simão ekobe be.

— Kobe eġuwun — io'e. — Eġuwun cuy kapurûg pewi — io'e Jesus Simão be.

Xik. Jesus oabik kobe be. Kobe be bima adeayû o'ġutaybin- -kapurûg peayû o'ġutaybin.

⁴ Imutaybin pu'u bima, o'jekawên Simão eju- -kobe iwat eju.

— Tibucûg pe aju axima bum — io'e.

Tibucûg pe ip o'ju.

— Axima bubuap cuy eġuakôm tibucûg pe axima bu am — io'e Simão be.

⁵ — Kariwa, ixima bun oceku axima bu ojuy — io'e Simão. — Ocejat ġu. Imênpit waram oceġuakôm imên ên e'em ocewebe buye — io'e.

Sa. Axima bubuap o'ġuakôm.

⁶ Ġebuġe axima o'jat ade. Xeresu ġu axima. Kurkoh. Axima bubuap jewek ojuy axima poxi pibun.

⁷ Wêġwêġ'i o'e ip jebureyû kay- -wara'at kobe beacayû kay. Jebureyû o'takoy yajêm âm jebuywat am. Ibureyû oajêm ibuywat am. Xepxep kobe o'ġuporan ip aximâm. Imênpuġe kobe jepiriġ ojuy axima poxi pibun.

⁸ Iboap co buġe, Simão Pedro o'jêġ'aecôġcôġ Jesus wap jexe ya'ôbuyxi buye.

— Okukukat, wede ece oxewi — io'e. — Ôn ma ikêrêat kuġ. Ên pit a'ôbuyxi. Oxe ġu juy eġuy — io'e- -Simão o'e.

⁹ Simão itabêġ o'e ijojom, soat cewejuayû dak. Itabêġbêġ ip o'e ijojom ade jîjâ axima buye. ¹⁰ Warara'acayû dak itabêġbêġ ip o'e ijojom- -Tiago, João dak. Ixeyû xepxepayû Zebedeu ipotpoyû ip osodop. Simão eju kapikpik'uk ip osodop axima bubum.

Ġebuġe Jesus o'jekawên Simão eju.

— A'ô'cam cuy eġuy — io'e Simão be. — Ġasû bit axima bubu'ukan ġu juy eġuy — io'e. — Kawên idipat muwênuwên'ukan cuy eġuy adeayû be imutabut am ip Deus kay — io'e.

— Ha'a — io'e.

¹¹ Ġebuġe Simão o'ju Jesus kay, cewejuayû dak. Putwedu'i. Jekobe o'tujuu ip kapurûg pe. Soat o'sui-

wat ip ibun Jesus eju jeku am. Soat em Jesus eju oekuku ip.

¹² Ikaboġatka be bima aġokatkat oajēm Jesus kay- ierepat. O'jġġ'aecōġcōġ cewap jexe ya'ōbuyxi buye.

— Kariwa! — io'e Jesus pe. — Ebu'u'ūm pima, omu'adam ece — ierepat o'e.

¹³ Pucūġ. Jesus o'jebaepucūġ cekay.

— Obu'u ġu emu'adam — io'e. — Ġaxin ma ōn jemu'ada — io'e.

Jesus a'ōbi ierep topibit dao ma o'je'ada. Xipat o'e.

¹⁴ — Emu'adaap eġuwēn ġu juy warara'acayū be — io'e Jesus cebe. — Ġasū bit paī kay juy eju — io'e. — Eōhōyū'in cuy eġūm paī be imupik am Deus etabixe ece'ada buye. Eġūm cuy cebe Moisés ekawēn taġ. Eōhōyū'in cuy eġūm cebe e'adaap mubapuk am soat ka watwat pe — io'e.

¹⁵ Imēnpit soat ka watwat Jesus awēġ o'yawēġto-
buxik ip- ierepat o'ġu'ada iap awēġ. Imēnpuye
adeayū o'je'awero ip ixekawēn co am. O'je'awero
ip Jesus pe jewemu'ada am tak. ¹⁶ Jesus pit o'jēm
cexewi ip. Poxerewun. Cexewi ip cēm cēm'uk osunuy
jekawēn ām Deus eju. Uk'a'ūmat pe kawēnwēn'uk
osunuy Deus eju.

¹⁷ Ġebuġe Jesus adeayū o'ġutaybitbin kawēn i-
dipan. Fariseuyū kaxikxik'i osodop iboce, Moisés e-
kawēn imutaybitbin'ukayū dak. Judeuyū osodop ip.
Jesus ekawēn co ojuy osodop ip. Oajēm ip soat kaka
daġwi- -Galiléia eipi daġwi, Judéia eipi daġwi dak,
Jerusalém ka bewi dak. Jesus iwātaxipipiyū mu'a-
da'adam osunuy Deus a'ōbacaap kuġ puye.

¹⁸ Ġebuġe aġokatkayū oajēm Jesus kay. Cexiġxiġ
pa'oreat o'tujuajēm ip Jesus kay. Jay. Uk'a be tu-
juōm ojuy ip cexiġxiġ pa'oreat mōġ ām Jesus wap.

¹⁹ Imēnpit tujuōm pa'ore ip o'e uk'a yapora buye.
Imēnpuye o'jeu ip uk'a abi jeje. Weru. Kawi'a'a
o'ya'uk ip. Cabobum cexiġxiġ pa'oreat o'ġukop ip
yabitokat taġwi. Kop. O'ġukop ip ixexecaptup pe.

O'gukop ip Jesus wap imu'ada am. Uk'a beayū parakpe o'gukop ip. ²⁰ Jesus itaybit o'e teyūku itabut okay iam.

Ġebuĵe Jesus o'jekawēn cexīgxiġ pa'oreat pe.

— Tapu — io'e. — Ikērēat kuy oju'uk ewebewi — io'e.

²¹ Moisés ekawēn imutaybitbin'ukayū, Fariseuyū dak jewaġuydadam o'e ip Jesus ekawēn kay.

— Ite be ikērēat'uk pa'ore wuywebewi. Deus pe acā i'uk put — io'e ip jewewebe. — Teku Deus muymuy — io'e ip napa ma.

²² Jesus itaybit o'e apēn ip o'e jewaġuydadam iam.

²³ — Apēnpuye dak eyju imēn jewaġuydadam? — io'e. — Iba'ore ġu owebe "Ikērēat kuy oju'uk ewebewi" i'e am cebe — io'e. — Iba'ore ġu dak owebe "E'āy" i'e am cebe, "Ece'ada," i dak — io'e. — Ka'ūma ma iba'ore owebe — io'e. ²⁴ — Soat waġo ōn. Ġasū cexīgxiġ pa'oreat eju ocekawēn eymutaybit am owebe ikērēat'uk put ijodiat pewi iam. Deus a'ō-bacaap kuġ ōn ijodi bima dak — io'e cebe ip.

— E'āy! Ecexīgxiġ cuy — Jesus o'e cexīgxiġ pa'oreat pe. — Cūġcūġ cuy eju — io'e. — Exexecaptup cuy etupu — io'e. — Eju juy eduk'a be — io'e cebe.

²⁵ Cexīgxiġ pa'ore topibit o'je'ada. O'āy. Cūġcūġ ma o'e adeayū etabutpe. Jexexecaptup o'tupu. Kuruk. "Ka'ūmgū ejo'iat xipacat," i'e'em Deus pe bima, o'ju jeduk'a be. ²⁶ Imēneju ibo ka watwat itabēg-bēg ip o'e ijojom, o'jexīgxiġ puye.

— O'je'ada xeku — io'e ip. — Xiġxiġ o'e xeku — io'e ip.

Yaġuybabi'ūm ip o'e.

— Ka'ūma buk cexīgxiġ pa'oreat o'ġu'ada wuyetabutpe — io'e ip jewewebe. — Ġasū acā cexīgxiġ pa'oreat mu'adaap ajojojo — io'e ip jewewebe.

²⁷ Ġebuĵe Jesus o'jēm. Porewuh. Cucum pima Levi o'jojomo. Levi dinheiro bubu'uk osunuy iecuġap peam. Ixe Levi kapikipiġ osunuy iecuġap pe teida-daap'a be.

— Ejot cuy okay — io'e Jesus. — Oweju juy ejeku — io'e.

²⁸ Imēnpuye o'ju Jesus kay. Soat o'suiwatibun Jesus eju jeku am.

²⁹ Ğejuje Levi Jesus o'takoy jekōn ām jewēju. O'ju. Oajēm. Jay. Adeayū awerom osodop Levi duk'a be- iecuğap peam dinheiro bubu'ukayū, warara'a-cayū dak. Jesus o'jekōn ceweju ip.

³⁰ Ğejuje Fariseuyū Jesus o'jomuymuy Moisés ekawēn imutaybitbin'ukayū dak- -Fariseuyū ebekitkit.

— Apēnpuye dinheiro bubu'ukayū eju eyju jekōnkōn, ikērēat mujurūğrūğ'ukayū eju dak? — io'e ip Jesus eju etaybitbinayū be.

³¹ Jesus o'jekawēn ceweju ip.

— Iwātaxipi'ūmat ğu cucum wuyanūğtata'ukat kay- -iwātaxipiat acā — io'e. ³² — Imēnpuxim cūğ ma jekuku'ukayū nomuwā ām ğu ojot- -ikērēat mujurūğrūğ'ukayū nomuwā ām acā — io'e. — Ojot “Eyğuycūğcūğ cuy epesop ikērēat kuğ puye” i'e am cebe — io'e Jesus. — “Ikērēat mujurūğrūğap cuy epeyepere” i'e am tak ojot — io'e Jesus.

³³ — João eju etaybitbinayū soat em jekpiwan ma jewemureren xipat je'e am Deus xe — io'e ip Jesus pe. — Deus eju kawēnwēn tak ip soat em — io'e ip cebe. — Fariseuyū eju etaybitbinayū dak ade em ip jekpiwan ma jewemureren jekawēn ām Deus eju — io'e ip. — Eweju etaybitbinayū bit repi'ajojom ğu. Jekōnkōn ip — io'e ip. — Apēnpuye ip repi'ajojom ğu? — io'e ip.

Jesus muymuy ojuy osodop ip.

³⁴ — Iba'ore oweju etaybitbinayū be jekpiwan ma repi'ajo am ōn ceweju ip puye — io'e Jesus. — Ōn iwadip puxim — io'e. — Iwadip cexe ip pima, ka'ū-ma ma jekpiwan ma repi'ajojom jewebumūnap epeta be tomuwā'ibiyū. Jekōnkōn acā ip — io'e Jesus. ³⁵ — Ğuyjom pit iwadip je'jēm cexewi ip. Ijēm puje bit, jekpiwan ma repi'ajo ip — io'e. — Ōn ixeyū xe'ūm pima, oweju etaybitbinayū dak jekpiwan ma repi'ajo ip — io'e Jesus.

³⁶ Gebuje Jesus wuymutaybitbinap ekawēn o'ḡuwēn cebe ip. Imēn o'ḡuwēn.

— Iwuywuy'ūmat ḡu ajoinūm iokokat muwaket am — io'e. — Iwuywuy'ūmat inūm pima, kuka o'jewe-k. Iwuywuy'ūmat kuka o'jewa'i — io'e. ³⁷ — Uva'abidi atimuōm yaokokat'a be ḡu timūn'a be tiisuati- -yaisuat'a be acā — io'e. — Yaokokat'a be timuōm puje, tidai e'em — io'e. — Yaokokat'a timūn'a kuka o'jeaebaḡ. Uva'abidi dak kuka o'jedie-puy — io'e. — Timūn'a dak kuka o'ya'ūm — io'e. ³⁸ — Imēnpit tiisuati atimōḡ yaisuat'a be timūn'a be — Jesus o'e. ³⁹ — Uva'abidi kōn puje kuyati kōn puje, tiisuati kay ḡu ace'e — io'e. — “Kuyati tiku e'em uva'abidi,” i wuyju e'em — Jesus o'e. — Imēnpuxim kuyjeat ekawēn kay bima, wekawēn kay ḡu kuka epe'e — io'e.

6 Jebodoydoyap kabia be ceweju etaybitbinayū trigodadot o'tadot'uk cucum pima ku daḡ Jesus eju. ² O'tamukitikitik ip jebui be. O'ta'o'o ip.

— Apēnpuye eyju ta'uk'uḡ? — io'e Fariseuyū cebe ip. — Kapikpi wuywebe jebodoydoyap kabia be — io'e ip.

Tamukitikitikap kapikap osodop Fariseuyū xe. Imēnpuye Jesus o'jomuymuy ip.

³ — Apēn cuk o'e Davi, ibureyū dak, irere bima? — io'e Jesus Fariseuyū be. ⁴ — Ixe Davi oōm Deus eju kawēnwēnap'a be. Pāo'a o'yabu- -Deus etabixe yamōḡmōḡ'ibit'a. O'ya'o. O'yaūm jebureyū be ya'o-piat'a. Paīyū be acā ya'o pi ḡu o'yadop — io'e. — Iboap ekawētup epetupco ḡu du? ⁵ Soat waḡo ōn — Jesus o'e Fariseuyū be. — Ōn pit e'em apēn i'epi wuywebe jebodoydoyap kabia be iap, apēn i'epi ḡu iap tak — io'e Jesus.

⁶ Gebuje Jesus ibakērēat o'tobuxik. Jebodoydoyap kabia be o'tobuxik. Oōm ma'ḡuto Deus eju kawēnwēnap'a be. Ibo'a be o'ḡutaybitbin. Ibo'a be aḡokatkat osunuy. Pūḡpa ibakērē osunuy- -iba'atpa. ⁷ Jesus

kay aḡ cîcâ o'e ip Fariseuyû, Moisés ekawên imutaybitbin'ukayû dak.

— Jebodoydoyap kabia be dak paxi ḡu'ada? — io'e ip jewewebe.

Fariseuyû “Jesus Moisés ekawên taḡ ḡu jekukum” i'e ojuy napa ma.

⁸ — Omuy muy pin teyûku — io'e Jesus pit jewebe ma.

Ḡebuje Jesus o'jekawên ibakêrêat pe.

— E'ây — io'e. — Ejot cuy ijoce soat pe ejo am — io'e.

Ibakêrêat o'ây. O'ju ibo'a beayû wap.

⁹ Ḡebuje Jesus o'jekawên Fariseuyû eju, Moisés ekawên imutaybitbin'ukayû eju dak.

— Jebodoydoyap kabia be Moisés ekawên taḡ tu wuywebe xipan i'e am? Ikêrêan i'e am ḡu xe'e? — io'e. — Warara'acat taxijo am cekawên taḡ tu? Warara'acat aoka am ḡu xe'e? — io'e.

¹⁰ Ḡebuje Jesus o'jeak soat kay.

— Pacûḡ ece eba — Jesus o'e ibakêrêat pe.

O'jepacûḡ. Ibadip o'e. ¹¹ Imên puye Fariseuyû itakoma jîjâ ip o'e Jesus kay, Moisés ekawên imutaybitbin'ukayû dak, jebodoydoyap kabia bima o'subamudim puye. O'je'awero ip. O'jewawêwê ip pên paxi ace'e Jesus pe i'e am.

¹² Ḡuyjom Jesus o'ju co'a be jekawên âm Deus eju. Ixima bun o'jekawên ceweju.

¹³ Ḡebuje doze beayû o'taê jeweju etaybitbinayûm. Kabia'isum ixeyû o'taê.

— Wa'ôbi epeju wekawên muwên âm soat pe — io'e ixeyû be -doze beayû be.

¹⁴⁻¹⁶ Ibûrû ma ip ibutet osodop: Simão i, André i, Tiago i, João i, Filipe i, Bartolomeu i, Mateus i, Tomé i, wara'at Tiago i, wara'at Simão i, Judas i, wara'at Judas i. Ibûrû ma ip ibutet osodop. Ibûrû ma o'taê jeweju etaybitbinayûm. Tiago Alfeu ipot osunuy. Jesus Simão wara'an o'subuteta. Pedro i wara'at ibutet osunuy. Xepxep putet osunuy wara'at Simão butet tak. Jeipi kay jîjâat i dak ibutet osu-

nuy. André Pedro kitpit osunuy. Judas Tiago ipot osunuy. Xepxep putet osunuy Judas putet. Iscariotes i dak ibutet osunuy. Ixe Judas ġuyjom Jesus o'ġm cekay itakomaayū be yaoka am.

¹⁷ Ibocewi Jesus co'a daġwi o'kop jemunaēyū e-ju- -doze beayū eju.

Ġebuġe adeayū oajēm Jesus kay. Warara'acayū kuy Jesus xe osodop ip- -ceweju etaybitbinayū. Adeayū kawegūnat pe o'je'awero Jesus xe. Wūywi ip oajēm. Judéia eipi daġwi oajēm ip, Jerusalém ka bewi dak, Tiro ka bewi dak, Sidom ka bewi dak. ¹⁸ Oajēm ip Jesus ekawēn co am, jemu'ada am tak. Ibiōġbuk kērēat kukayū dak oajēm cekay imujēm ām. Jesus ibiōġbuk kērēat o'ġujēmujēm ikukayū bewi. Imēnpuye Jesus mucay ojuy ip imu'ada am. ¹⁹ Ixe be imu'ada but osunuy Deus a'ōbacaap kuġ puye. Soat o'ġu'ada'ada iwātaxipiyū.

²⁰ Jesus o'jeak jewēju etaybitbinayū kay. O'jeka-wēn cebe ip. Koap o'jekawēn tadaybotbocayū be.

— Eycokcok cīcā eyju — io'e. — Eybubutbet ġu ġasū. Imēnpit Deus eykukukat — io'e. ²¹ — Eycokcok cīcā eyju. Ġasū acā eyrere. Ġuyjom pit eybeġbeġ epe-sop — Jesus o'e. — Eycokcok cīcā eyju. Ġasū acā eyju wa. Ġuyjom pit jewaywayway epe-sop. ²² Eycok-cok cīcā juy epe-sop warara'acat itakoma eykay bima, eywebe “Oceweju ġu juy epeku- -eyju soat waġo ebe-kitkit puye” i'e buje dak, warara'acat eymuymuy bima dak, warara'acat eyawēġmukērērērēn pima dak — io'e. ²³ — Eycokcoġ cīcā juy epe-sop warara'acat warēmtaġ eykuġ pima eyju webekitkit puye — io'e. — “Eycokcoġ cuy epe-sop,” i ōn e'em eywebe — io'e. — Kabi be ade kuġ epe-sop idipat kuġ. Warēmtaġ ma Deus ekawēn muwēnuwēn'ukayū kukuk'uk osodop ip eydobuyū'ūm'ūm kuyje — Jesus o'e.

²⁴ Ġebuġe Jesus o'jekawēn ibubut adeayū be.

— Karem ġu eydadaybot epe-sop — io'e. — Ġasū eybubut ade — io'e. — Kapikpiġ'ūm pima dak soat

kuḡ eyju ḡasū ma. ²⁶ Karem ḡu eydadaybot epesop. Gasū acā eybeḡbeḡ. Guyjom pit eyrere epesop. Karem ḡu eydadaybot epesop. Gasū acā eyju jewaywayway. Guyjom pit wawa epe'e. Eyḡuycūḡcūḡ epesop — io'e. ²⁶ — Karem ḡu eydadaybot epesop, warara'acat xipan eymuwēnuwēn pima. Imēnpuxim xipan jewexe Deus ekawēn muwēnuwēn'ukayū kukuk'uk ip osodop eydobuyū'ūm'ūm kuyje — Jesus o'e.

²⁷ Gebuje soat pe o'jekawēn.

— Ōn kawēnwēn soat eju eyweju-soat wa'ijo-joayū eju — io'e. — “Ey kay itakomaayū burem cuy epesop,” i ōn e'em eywebe — io'e. — “Xipan cuy ixeyū epejukuk,” i ōn e'em — io'e. ²⁸ — “Xipan cuy omuymuy'ukayū ejukuk,” i juy epe'e Deus pe. Deus eju juy epeyekawēn warēmtaḡ eykukayū beam — io'e.

²⁹ — Pūḡ kadi warara'acat pe eydopaoka buje, epeyaoka ḡu juy. Āḡ puk wara'at kadi jeydopaoka. Warara'acat pe eyekabek pu buje, āḡ cuy eyekamixa dak ju'uk. ³⁰ Eyxewi iojuy buje, epeḡūm cuy soat pe. Warara'acat pe darem eybubut pu buje, “Obubut cuy epetujupit okay,” i'ūmḡu juy epe'e cebe ip. ³¹ Eybikuy warara'acat pe xipan eykuk am. Imēnpuye xipan cuy warara'acat epejukuk — io'e.

³² — Eykayayū acā ikukpin eyxe bima, “Deus cuy xipacat je'ḡūm ocewebe,” i'ūmḡu juy epe'e. Cekayayū ikukpin ikērēat mujurūḡrūḡ'ukayū xe dak. ³³ Xipan eykayayū kuḡ acā bima, “Deus cuy xipacat je'ḡūm ocewebe,” i'ūmḡu juy epe'e. Ikērēat mujurūḡrūḡ'ukayū dak xipan jekayayū kuḡ — io'e.

³⁴ — Eyju darem iūmūm warara'acat pe waram tujupit okay iam eyetaybit puye. Imēn iūmūm pima, “Deus cuy xipacat je'ḡūm ocewebe,” i'ūmḡu juy epe'e. Ikērēat mujurūḡrūḡ'ukayū dak darem ma iūmūm wara'at ikērēat mujurūḡrūḡ'ukat pe dinheiro buap ojuy cexewi — io'e. ³⁶ — Ikērēat mujurūḡrūḡ'ukayū ekukuap puxim ḡu juy epeku! — io'e. — Warēmtaḡ ḡu juy ey kay itakomaayū epejukuk. Xipan cuy ip epejukuk. Darem ma epeḡūm cebe ip ibubut puap

ojuy ġu. Imēn eyeku buje, ade xipacat kuġ epesop kabi be. Deus ebekitkiyūm epesop. Soat podi ma ya'ōbacaat ebekitkiyūm epesop. "Ēn xipacat," i'ūmġu e'em adeayū Deus pe. Deus pit soat em xipacat ūm-ūm cebe ip- -soat pe- -ikērēat mujurūġrūġ'ukayū be dak. ³⁶ Wuyebay itabotaidabotbot soat kay wuykay. Ixe buxim eyju dak eyetabotaidabotbon cuy epesop warara'acat kay — io'e.

³⁷ — "Ekērē jījā Deus xe," i'ūmġu juy epe'e warara'acat pe. Iboap e'em'ūm pima, Deus tak "Eykērē oxe," i'ūmġu je'e eywebe. "Ikērēat kuġ ēn," i'ūmġu juy epe'e warara'acat pe. Imēn e'em'ūm pima, Deus "Ikērēat kuġ eyju," i'ūmġu dak je'e eywebe. Ġebum ġu juy epesop apēn cuk adi warara'acat warēmtaġ eykuk iap kay. Ġebum'ūm pima, Deus tak ġebum ġu je'e apēn cuk adi warēmtaġ wara'acat epejukuk iap kay — io'e.

³⁸ — Warara'acat pe epeġūm pima, Deus tak je'ġūm eywebe. Apēn cuk epeġūm iap puxim epejat. Yoboġat epeġūm pima, eyju dak yoboġat epejat. Topapūn epejat- -iwajem, ibikbiġ tak, kutukutu'i ma dak, cūġ'i ma dak. Apēn warara'acat pe eyju iūmap puxim Deus tak je'ġūm eywebe — io'e.

³⁹ Ġebuje Jesus wuymutaybitbinap ekawēn o'ġu-wēn cebe ip.

— Ita'ūmat pe emubapuk pa'ore wara'at ita'ūmat pe — io'e. — Ita'ūmat pe wara'at ita'ūmat tu-jowat puje, xepxem ma kuka ip o'at ipikūykūy be. ⁴⁰ Eyetaybitbin pima, eyemutaybitbin'ukat podi ġu eyetaybit. Eyewemutaybitan cîcâ bima bit, eyemutaybitbin'ukat co'i eyetaybit epe'e — io'e.

⁴¹ — Te'e ma eyju jeakaġ eybure eta beatōmtōm kay, eyeta beap'ip cocom'ūm pima. ⁴² Te'e ma eyju e'em cebe: "Tapu, ma, otōmtōm'uk eta bewi," i, eyeta beap'ip cocom'ūm pima. Eyju jewewemuġuykukukum. Koam eyeta beap'ip cuy epeyop'uk. Yop'uk puje, iba'ore ġu je'e eywebe tōmtōm'uk am eybure eta bewi — io'e.

⁴³ — Yoptipat'ip pe yakērēat'a'e ġu- -yadipat'a'e

acã. Imēnpuxim yopkērēat'ip pe yadipat'a'e ġu-
yakērēat'a'e acã. ⁴⁴Yajo buje, wuyetaybit ace'e pu-
beat'ip poro iam. Asão'a bubum wuyju widaoho'ip
taġwi ġu--asão'ip taġwi acã. Banka'a bubum wuyju
arū'ip taġwi ġu--banka'ip taġwi acã. ⁴⁶Imēnpuxim
xipacayū ma xipacat mujurūġrūġ. Xipat'ūmayū bit
ikērēat mujurūġrūġ. Apēn wuyju jewaġuyġuy iap pu-
xim wuyju kawēnwēn. Ikērēat kay jewaġuyġuy bima,
ikērēān wuyju e'em. Idipat kay jewaġuyġuy bima bit,
xipacan wuyju e'em — io'e.

⁴⁶ — Eyju te'e ma e'em owebe “Ēn ocekurat,” i,
wa'ō kay kūyjobit'ūm pima — io'e. ⁴⁷ — Abu-buxim
okay ajēmġemayū iap oġuwēn eywebe--abu-buxim
wa'ō kayayū iap tak, ajo-buxim wa'ō daġ jekuku'uk-
ayū iap tak. ⁴⁸Itaybicat puxim ip--aġokatkat pu-
xim. Ixe aġokatkat uk'a o'yamuy. Koap ipikūykūy
o'sukūykot. Ikūyberen o'sukūykot. Wita'a o'yadobu-
xik badi. Uk'a'abi'ip o'yopmuy iġokūy be badiat'a
jeje--wita'a jeje. Cem uk'a o'yamuy. Kabidoxixi oa-
jēm iġo'a kay, muba'atxiri dak. Muba'at idibi o'ti-
muboġ. O'tiajēm iġo'a kay. Imēnpit o'ya'at ġu ya-
cem puye--wita'a jeje buye. Wa'ō kayayū ixe aġokat-
kat puxim--cem jeduk'a o'yamuy'iat puxim — Jesus
o'e.

⁴⁹ — Wa'ō daġ ġu jekuku'ukayū bit warēmtaġ
uk'a o'yamuy'iat puxim--wa'ō kay'ūmayū. Wa'ījo-
jom ip. Inaka kūyjobit ġu ip wa'ō kay. Warēmtaġ
uk'a o'yamuy'iat puxim ip--aġokatkat puxim. Ixe
aġokatkat uk'a o'yamuy ipi ju. Cem ġu o'yamuy.
Idibi o'tiajēm iġo'a kay--tiboġati. Dao ma o'ya'at.
O'ya'ūm cīcã. Wa'ō daġ ġu jekuku'ukayū ixe aġokat-
kat puxim--wa'ō kay kūyjobit'ūmayū. Cem'ūma je-
duk'a o'yamuy'iat puxim ip — Jesus o'e.

7 Adeayū be jekawēn epere buje, Jesus o'ju
Cafarnaum ka kay. Oajēm. Sorarayū kukat
ibo ka be osunuy. ²Ixe ibuywatwat'ukat iwātaxipi
o'e--kariwa xe ikukpinat. Oe'ū pin ibuywatwat'ukat.

³Ġe buje sorarayū kukat pūġpūġ Judeuyū kukuk-

ayū o'ḡuju Jesus kay. O'ḡuju ip Jesus Cafarnaum ka be iam o'jekūyjo buye.

— “Ejot cuy obuywatwat'ukat mu'ada am,” i juy epe'e Jesus pe — io'e sorarayū kukat ixeyū be.

O'jēm ip. Poxerewun. Jay. 'Oajēm ip. O'jekawēn ip Jesus eju.

— Cemuojujuy juy eḡūm ixe sorarayū kukat pe — io'e ip Jesus pe. — Xipat cīcā ixe ocexe — io'e ip. ⁶ — Ocebadiipyū ikukpin cīcā ixe xe — io'e ip. — Deus eju kawēnwēnap'a o'yamuyat ocewebeap'am — io'e ip.

⁶ Imēnpuye Jesus o'ju ceweju ip.

Sorarayū kukat tuk'a wi wūy'ūm pima, sorarayū kukat jebureyū o'ḡuju Jesus dopabe. O'ḡuju ip ja'ō-muwēn ām cebe. O'jēm ip. Poxerewu. Jay. Ibureyū oajēm Jesus kay. O'jekawēn ip Jesus eju.

— Ocebure ocemudot ja'ōmuwēn ām ewebe — io'e ip Jesus pe. — A'ōmudodon ewebe — io'e ip Jesus pe.

— “ 'Kariwa, ecwemuwa'ūm ḡu juy oduk'a kay edot am,' i juy ece,” io'e ocewebe — io'e ip Jesus pe. — “ 'Osūsūn emudon oduk'a be. ⁷ Cedaḡ ḡu emudot am oduk'a be wa'ōbuyxi'ūm puye,' i juy ece cebe,” io'e ocewebe — io'e ip Jesus pe. — “ ‘ “E-ce'ada juy,” i ēn e'em pima, obuywatwat'ukat je'ada. ⁸ Ōn tak warara'acat mujujum. Wa'ō kay kūyjobit ip wesorarayū. Pūḡ pe ōn e'em “Ejēm” i bima, je'jēm. Wara'at pe ōn e'em “Ejot” i bima, je'dot. Obuywatwat'ukat pe ōn e'em: “Imēn cuy ece,” i bima, imēn je'e.' i juy ece Jesus pe,” io'e ocewebe — io'e ip Jesus pe. — Imēn ja'ōmudodon ewebe — io'e ip Jesus pe.

⁹ Iboap co buje Jesus itabēḡ o'e ixeyū ekawēn cocom. O'jekorepēn adeayū kay.

— Soat Judeuyū etabucap podi ma itabut okay iḡo sorarayū kukat, Judeu ḡu ma'ḡu — io'e.

¹⁰ Ḡebuje Jesus kay o'ḡuju'iaiyū o'jepit sorarayū kukat tuk'a kay. Ibuywatwat'ukat o'tobuxik ip-iwātaxipi topibit. Kuy xipat o'e Jesus a'ōbi.

¹¹ O'ju jewēju etaybitbinayū eju. Ade warara'a-

cayū dak o'ju ceweju. Naim ka be o'ju ip. ¹² Jesusyū oajēm ikaboġatka exīntabi be- -Naim ka exīntabi be. Jay.

Ibocewi aġokatkayū yaypan'isuat'ūm tujujēmjēm ip o'e ikaboġatka bewi ikot am. Ce'ūat xibuk i'it'et ġu osunuy wara'at. Jaġepūġ ma dak osunuy ce'ūat xibuk. Itop'ūm e'ū'ibit osunuy. Adeayū o'ju ce'ūat xibuk eju ibo ka watwat.

¹³ Wuykukukat Jesus ite jo buje, itabotaidabotbot cīcā o'e ce'ūat xibuk kay.

— Wa ġu, tū'ū — Jesus o'e ce'ūat xibuk pe.

¹⁴ O'ju ce'ūat kay. Ce'ūat tujujēmjēmap o'ġucay. Ce'ūat tujujēmjēmayū o'jecū ip e bidase.

— Tapu — Jesus o'e. — Aġobucēġ ece — io'e ce'ūat pe.

¹⁵ Ġebuje ce'ū topibit itabēġ o'e. O'je'aġobucēġ. O'jekawēn.

Ġebuje Jesus o'jekawēn ce'ū topibit xi eju.

— E'it waram ġuto o'jetait — Jesus o'e cebe.

¹⁶ Imēnpit soat imu'adaap cocoyū yaġuybabi'ūm cīcā ip o'e.

— Ka'ūmġu ejo'iat xipacat — io'e ip Deus pe. — Deus ekawēn muwēnuwēn'ukat wuykay osodot-ya'ōbuyxiat — io'e ip jewewebe. — Deus osodot jebekitkit com — io'e ip.

¹⁷ Ibocewi Judéia eipi watwat Jesus ce'ūat o'ġu'ada iap awēġ o'yawēġtobuxik- -soat ka watwat.

¹⁸ Ceweju etaybitbinayū be Jesus ce'ūat o'ġu'ada iam João mukūyjo buje, João xepxepayū o'tomuwā jewekay- -jeweju etaybitbinayū. ¹⁹ Ixeyū o'ġuju ja'ō-muju am wuykukukat Jesus kay.

— “Deus emunaē ajēmap wiwim oceju,” i juy epe'e cebe — io'e João. — “Ēn tu ixē? Wara'at ġu xe'e ocejowiwi?” i juy epe'e cebe — io'e João.

Poxerewun. O'jēm ip.

²⁰ Jay. Oajēm ip Jesus kay.

— João Batista ocemudot ekay — io'e xepxepayū Jesus pe. — “Ēn tu omuykuiat? Wara'at ġu xe'e ocejowiwi?” i juk o'e João ocewebe — io'e ip Jesus pe.

²¹ Gasū Jesus tak adeayū o'ḡu'ada'ada João emumudotyū etabutpe. Iwātaxipipiyū o'ḡu'ada'ada. Ibiōḡbuk kērēat o'ḡujēmujēm ikuḡayū bewi. Ita'ūm-ayū o'sutada. Ierepayū o'ḡu'ada'ada. Jesus tak o'jekawēn xepxepayū eju- -João emumudotyū eju.

²² — Epeyepit cuy João kay — io'e cebe ip. — Epejojojoiap cuy epeḡuwēn João be, epeyekūyjojoiap tak — io'e. — Ita'ūm topibiyū itate o'e ḡasū. Taojere topibiyū dak xipan ip o'e xīḡxīḡ ḡasū. Ierep topibiyū dak xipat o'e ḡasū. Ya'ōpi'ūm topibiyū dak ya'ōpipe o'e ip. Jekūyjojom ip o'e. Ce'ū topibiyū dak waram itait o'e ḡasū. Itadaybotbocayū dak kawēn idipat cocom ḡasū — io'e. ²³ — Imēneju eycokcoḡ epesop okay eyetabut am eybu'u'ūm pima — io'e Jesus. — “Ite ḡu omuykuiat,” i'e'em pima bit, eycokcoḡ ḡu epesop — io'e xepxepayū be- -João emumudotyū be.

²⁴ Jesus João o'ḡuwēn adeayū be, cemumudotyū jēm puje.

— João jom cuk epeku uk'a'ūmat pe — io'e Jesus. — Ipi'ūn'ūn kay kabido ajēm puje je'ipe'adededem. Yaḡuykorerenayū ite'ip puxim, soat em je-waḡuymuwarururun puye. João bit yaḡuykoreren ḡu. Wita'a buxim pit ixē. ²⁵ João doti teiboḡ ḡu. Teiboḡat kukayū adeayū kukat tuk'a be opop ip- -ibubut adeayū. ²⁶ João bit ibubut adeat ḡu- -Deus ekawēn muwēnuwēn'ukat acā. Wara'at Deus ekawēn muwēnuwēn'ukayū bodi ma João ya'ōbuyxi. ²⁷ Imēn Deus ekawēntup e'em- -João muwēḡaptup:

Aḡ cuy epesop, i'e'em Deus, i. We-mumuju oḡuju ewap soat ajēm puje emuxipan am, i.

Imēn e'em Deus ekawēntup- -João muwēḡaptup — io'e. ²⁸ — Ka'ūma ma omuy João jo'i ya'ōbuyxian. Deus xe bit, yopīcat João bodiat ya'ōbuyxiat cebekitkiyū'in — Jesus o'e.

²⁹ Iboap ekawēn co buje, — Cūḡ cīcā Deus — io'e soat ma, iecuḡap peam dinheiro bubu'ukayū dak. João ixeyū o'ḡubatisasan. ³⁰ Fariseuyū bit ibu'u jījā osodop ip Deus bikuyap taḡ jeku am, Moisés ekawēn imutaybitbin'ukayū dak. Ixeyū ḡu bit o'ju

João kay jemubatisan am- -wara'acat acā- -iecuḡap peam dinheiro bubu'ukayū acā, wara'at ikērēat mujurūḡrūḡ'ukayū dak.

³¹ Gebuje Jesus waram o'jekawēn adeayū eju.

— Abu-buxim ḡasūacat? Ajoap oḡuwēn eywebe abu-buxim ip iap mubapuk am eywebe? ³² Bekitkit puxim ixeyū- -pasiaham ip iap pe pubutbucayū buxim. Jewāwāwām ip jebureyū kay bekitkiyū.

— “Tēḡtēḡ'a oceyamuyde eywebe ya'ijo am. Eydaobu'u'u eyju bit da'i'in,” i'e'em ip. “Wa ocesop jewexe i'ūmcocom. Eybu'u eyju bit oceweju tōn,” i'e'em ip. Ijoyū buxim ḡasūacat — Jesus o'e.

³³ — João Batista oajēm eykay. Ixe jekpiwan ma irere oeku Deus eju jekawēn ām. Eyju bit napa ma e'em ixē muwēnuwēn: “Ibiōḡbuk kērēat kukat teku,” i. ³⁴ Soat waḡo ōn. Ojot eykay. Soat xat o'om ojeku, soat tikōnkōn tak. Eyju bit napa ma e'em omuwēnuwēn: “Ka'o'on'ukat teku,” i. “Teku iecuḡap peam dinheiro bubu'ukat pure,” i dak. “Teku ikērēat mujurūḡrūḡ'ukat pure,” i dak — io'e. ³⁵ — Wuyju Deus emumutaybitbinap taḡ jekukum pima bit, warara'acayū je'e “Deus cūḡ ma wuymutaybitbin,” i — Jesus o'e.

³⁶ Gebuje Fariseu Jesus o'tomuwā jeweju jekōn ām. Simāo ibutet osunuy. Jesus o'ju Fariseu duk'a be. Oajēm. Oabik jekōn ām ceweju.

³⁷ Gebuje ayacat oajēm Jesus kay. Ixe ayacat ibo ka wat osunuy. Ikērēat mujurūḡrūḡ'ukat osunuy. Ixe itaybit o'e Jesus jekōnkōn Fariseu duk'a be iam. Imēnpuye tide'oati o'tidojot Jesus kay timūn'a be. Timūn'a waenōm muḡēḡē jo'i osunuy- -alabastro muḡēḡē osunuy. ³⁸ Oajēm Jesus kay. Xik'i osunuy Jesus nōḡpikadi, sui xe. Wa osunuy. Iḡuycūḡ osunuy juk adi ikērēat o'ḡuḡē iap kay. Jesus i o'suimubot jetadim. O'suisup jadam. O'suikōn. O'suimude'o'on tide'oatim. Imēn o'e Jesus ikukpin cīcā cexe buye.

³⁹ Iboap o'jojajo Fariseu- -Jesus emunomuwā.

Gebuje Fariseu o'jekawēn jewebe ma.

— Teku Deus ekawēn muwēnuwēn'ukat tu? — io'e jewebe ma. — Deus ekawēn muwēnuwēn'ukat

pima, itaybit kuka o'e abu ite ayacat wuimurerem iam — io'e. — “Ejēm cuy oxewi,” i kuka o'e cebe — io'e te'e ma. — Ite ayacat ikērēat mujurūgrūgxiat — io'e Fariseu jewebe ma.

⁴⁰ Gebuje Jesus o'jekawēn Fariseu be.

— Simão — io'e. — Kawēn puk ōn eweju — io'e.

— Ha'a — io'e. — Ecekawēn puk, kariwa — io'e.

⁴¹ — Xepxep aḡokatkat cewero ip osodop jekariwa eju. Pūḡ ixeyū'in ceweroap boḡ cīcā osunuy. 500 dinheiro osunuy cewero. Wara'acat ixeyū'in ceweroap boḡbuḡ ā osunuy. 50 dinheiro isurūḡat osunuy cewero. ⁴² Xepxem ma teida ba'ore o'e ip jekariwa be. Ixe kariwa bit o'e cebe ip: “Teidam ḡu eyju owebe,” i. “Ka'ūmḡu ḡasū bit je'e oweju eyeweroap,” i. Abu-xe ixe kariwa ikukpin cīcā je'e ixeyū'in? — Jesus o'e. — 500 dinheiro isurūḡat cewero tūibit xe xe'e? 50 dinheiro isurūḡat tūibit xe ḡu xe'e? — Jesus o'e.

⁴³ — 500 dinheiro isurūḡat cewero tūibit xe aco'i — Simão o'e. — Cekariwa o'e ixe be: “Teidam ḡu eyju owebe,” i. “Ka'ūmḡu ḡasū bit je'e oweju eyeweroap,” i. Imēnpuye ixe xe aco'i cekariwa ikukpin cīcā je'e — Simão o'e.

— Hm hm — Jesus o'e. — Ixe xe ma ikukpin o'e cekariwa — io'e.

⁴⁴ Jesus o'jekorepēn ayacat kay. Waram o'jekawēn Simão be bit-Fariseu be.

— Ak'i juy ece ite ayacat kay — io'e. — Eduk'a be oōm puje, ēn ma idibi etiūm ḡu wuiwuyaptim wuybabi daḡ — io'e. — Ite bit wui o'suimubot jetadim. Wui o'suisup jadam — io'e. ⁴⁵ — Ēn ma waḡobu eyaḡobukōn ḡu wuybabi daḡ. Ite bit oibu'un ḡu wuikōn ām — io'e. ⁴⁶ — Ēn ma wa'a eyamude'on ḡu aseptim wuybabi daḡ. Ite bit wui o'suimude'on tide'oatim — io'e. ⁴⁷ — Icēmān ōn e'em ewebe. Ite ayacat ikērēat kuḡ-ade jījāat kuḡ. Imēnpit Deus soat o'ju'uk. Ikērēat o'ju'uk cebewi, cexe Deus ikukpin cīcā buye. Wuywebewi Deus yopīt ma ikērēat uk puje, ikukpin cīcā ḡu Deus wuyxe-ikukpinpūn ā — Jesus o'e. — Ade ikērēat uk puje

bit, ikukpin cīcā e'em wuyxe — Jesus o'e Fariseuyū be.

⁴⁸ Gebuje Jesus o'jekawēn ayacat eju.

— Ikērēat kuy oju'uk ewebewi — Jesus o'e cebe.

⁴⁹ Imēneju ceweju jekōnkōnayū o'jekawēn jeweweju.

— Abu ite ikērēat'uk'uk'ukan! — io'e ip jewewebe.

⁵⁰ — Deus kuy edaxijo, cekay etabut puye — Jesus o'e ayacat pe. — Kaba'ūm cuy eḡuy ḡasū bit — io'e.

8 Ibun'ūm pima Jesus kawēn idipat o'ḡuwēnuwēn. Ikaboḡatka daḡ oeku ika'icatka daḡ tak. Deus soat kukukan je'e iap muwēnuwēn oeku. ² ³ Doze beayū Jesus eju oekuku ip, aoyū dak. Jesus cuk ixeyū aoyū o'ḡu'ada. Ibiōḡbuk kērēat tak cuk o'ḡujēm cebewi ip. Maria Jesus eju oeku, Joana dak, Susana dak, ade warara'acayū dak. Madalena i osunuy wara'at Maria butet. ⁷ be ibiōḡbuk kērēat cuk o'ḡujēm ixē Maria bewi. Joana Cuza tayxi osunuy. Herodes pubut kukukat ixē Cuza osunuy- Galiléia eipi kukat pubut kukukat. Ixeyū aoyū jebut'in iūmūm'uk osodop ip Jesus pe, doze beayū be dak. Jesus eju oekukuku ip Jesus xat muḡēḡēm.

⁴ Ade ka bewi o'je'awero ip Jesus kay cekawēn com. Adeayū e'awero buje Jesus wuymutaybitbinap ekawēn o'ḡuwēn cebe ip.

⁵ — Aḡokatkat kadaida o'tamudu jekat pe — io'e Jesus. — Tamududum pima, ta'ade ḡu o'ta'at e bitako daḡ. Cūḡcūḡayū o'tamucakucak e bitako daḡ puye — io'e Jesus.

⁶ — Ibocewi wasūyū ixeda o'ta'o'o. Tamududum pima wara'ata o'ta'at karatūḡ'a jeje. O'jedae'ū idibi'ūm puye. O'tanokap ḡu. ⁷ Tamududum pima wara'ata o'ta'at widaoho nuybi be. Da aypapan o'e widaoho nuybi be — io'e Jesus.

⁸ — Ibocewi widaoho kadai o'ḡu'ūm. Wara'ata bit o'ta'at katō be. Imēnpuye xipan o'yaypan. Ka-

daim o'e. Pūḡ pe kadai be ta'ada jījā o'tadop -100 be o'tadop — io'e Jesus. — Wa'ījo pin pima, eya'ō-picūḡcūḡ cuy epesop wa'ō kay — Jesus o'e adeayū be.

⁹ Gebuje ceweju etaybitbinayū o'jekawēn Jesus eju.

— Apēnape ibo kawēn? — io'e ip.

¹⁰ — Deus soat kukukan je'e — Jesus o'e. — Deus ibikuy eywebe eyetaybit am iboam. Imēnpuye ibapuḡ ma ōn eymutaybitbin. Warara'acayū be bit imutaybitbinap ekawēn muwēnuwēn ōn. Jeakaḡ ip. Inaka ijojom ḡu ip. Wekawēn pa'arēm cexe ip wekawēn cocom ma'ḡu ip — Jesus o'e.

¹¹ — Apēnape ibo kawēn jeymukūyjo ōn. Deus ekawēn kadaida buxim -tamudu'ibita buxim — Jesus o'e. ¹² — Deus ekawēn cocomayū'in e bitako daḡata buxim. Deus ekawēn cocom ip. Cekawēn co'isum pit Satanás ajēmjēm cekay ip ibiōḡbuk kērēayū kukukat. “Te'e ma eyju iboap cocom,” i napa ma e'em Satanás cebe ip. “Iboap ekawēn kay eyetabun ḡu juy epesop,” i napa ma e'em. Imēn Satanás imubu'u'un ip itabucap puxim Deus kay. Ixeyū mubu'u'un Deus pe ixeyū daxijoap puxim — io'e Jesus.

¹³ — Warara'acat karatūḡ'a jejeata buxim Deus ekawēn cocomayū — io'e Jesus. — Cekawēn co buje, icokcok e'em ip. Wekawēn kay jījā ip. Imēnpit darem ma itabut ip tābube'ūmat puxim. Deus kay jetabucap epereperem ip. Warara'acat ixeyū be ikērēat mujurūḡat puje, ibu'un ip Deus kay jetabut am — Jesus o'e.

¹⁴ — Warara'acat widaoho daḡata buxim Deus ekawēn cocomayū. Wekawēn cocom ip. Guyjom pit soat em ḡebum ip jemukaypin kay. Adem ibu pin ip jebubun. Jebikuyap taḡ ip jeku ojuy, jemucokcokcoḡ. Warēmtaḡ ip jeku ojuy. Imēnpuye ibu'u ip jetabut am Deus kay — Jesus o'e.

¹⁵ — Warara'acat katō beata buxim Deus ekawēn cocomayū. Deus ekawēn cocom ip. Cekawēn kay jījā ip. Oibu'un ḡu ip jetabut am Deus kay. Ixeyū xipat Deus xe. Cūḡ ma ip cexe ixeyū. Cekawēn muwēnu-

wēn ip warara'acayū be imutabut am ip Deus kay. Warara'acat mutabunat kadai buxim-ya'a'eat puxim — Jesus o'e.

¹⁶ Gebuje Jesus wara'at kawēn o'ḡuwēn.

— Imusop puje lamparina kuka ajomuy ḡu ico'a'a diotpe — io'e. — Ajomuy ḡu dak kuka wuy-xexecap tiotpe. Um kuka ajomuy uk'a be omōm'uk-ayū be kabiok taḡ iōmap puxixim. ¹⁷ Imēnpuxim soat imunēm'ibit kuka o'tobuxik ip. Wara'acat pe ya'iōap puxim kawēnwēn ām tak itaybit je'e soat — io'e.

¹⁸ — Imēneju juy eya'ōpicūḡcūḡ epesop wa'ō kay — io'e. — Eyaḡuyba'ūm ḡu juy epesop wekawēn kay. Xipan eya'ōpicūḡ pima, waram jeyetaybin wekawēn. Xipan'ūm pima bit, jeyaḡuyba'ūm wekawēn kay — io'e.

¹⁹ Ixi ajēm ojuy oeku Jesus kay jekawēn ām, ikitpitpiyū dak. Cekay yajēm pa'ore o'e ip adeayū buye.

²⁰ — Exi omuy akiju, ekitpitpiyū dak — io'e ip. — Ejo pin ip — io'e ip.

²¹ Gebuje Jesus o'jekawēn adeayū be.

— Deus ekawēn coco'ukayū oxi jo'i oxe, okitpitpiyū jo'i dak — io'e. — Kūyjobicayū oxi jo'i oxe, okitpitpiyū jo'i dak — io'e.

²² Guyjom Jesus oōm kobe be jewēju etaybitbin-ayū eju. Xik. Oabik.

— Ga'a wīnābu aju — io'e cebe ip.

Timudek ojuy o'ju ip. ²³ Timudekdeḡ pima, Jesus o'xet. Tibicūḡ pe bima kabidoxixi oajēm iodi kay. Idibi o'tiōm kobe be tipodoy buye. Kobe ipoxi o'e idibim. Jepiriḡ ojuy o'e ip. Jakōmap puxixim iparara ip o'e. ²⁴ Imēnpuye ceweju etaybitbinayū Jesus o'ḡuwurūḡ.

— Kariwa! — io'e ip. — Akōm wuyju!

Wūrūh. O'jewurūḡ. Jewurūḡ puje, Jesus kabido o'subidomukorēm. Tipodoyat o'tipon. Iodi tipo o'e.

²⁵ Imēnpuye itabēḡbēḡ ip o'e ijojom dao ma o'tipon iap cocom.

— Apēnpuye eyetabut ġu Deus kay? — io'e Jesus cebe ip.

— Abu dak sute? Kabido kūyjobit ya'ō kay. Tipodoyat tak kūyjobit ya'ō kay — io'e ip jewewebe.

²⁶ Oajēm ip wīnābu- -Gerasa eipi watwat kay, o'timudek puye. Gerasa eipi Galilėia eipi weġūn opop. Jesusyū oajēm.

²⁷ - ²⁸ Ġebuġe Jesus o'jēm kobe bewi. Oajēm aġo-
katkat kay. Ikaboġatka wat osunuy ixe. Ibiōġbuk kē-
rēat kukat osunuy ixe. Ika'uat puxim osunuy. To-
ti'ūm jekuku'uk osunuy kuy bin ma. Uk'a be ġu
osunuy. Ce'ū'ūayū mōġmōġap taġ ma oeku.

— Ejēm cuy aġokatkat pewi — io'e Jesus ibiōġ-
buk kērēat pe.

Imēn Jesus o'e ibiōġbuk kērēat pe aġokatkat ku-
ku'uk puye. Ixe aġokatkat daomūnmūn'uk osodop ip
ibo ka watwat cabobum, correntebum tak kuy bin
ma. Imēnpit cabobu, correntebu dak o'subudakatkat
ixe. Ibiōġbuk kērēat ixe mujuju'uk osodop uk'a'ūmat
pe. Jaġepūġ ma oeku uk'a'ūmat taġ.

Jesus cocom pima, o'jewāwā ixe aġokatkat. O'-
jēġ'aecōġcōġ Jesus wap, jexe ya'ōbuyxi buye.

— Apēn ēn em owebe, Jesus? — io'e. — Ēn
Deus ipot- -soat podi ma ya'ōbacaat ipot — io'e
ya'ōberen. — Ipiat esupi'ajoat ġu juy owebe — io'e
cebe.

³⁰ Ibocewi Jesus o'jekawēn aġokatkat pe.

— Apēn ebutet? — io'e Jesus.

— Ade i — io'e.

Ade i ibutet osunuy ade ibiōġbuk kērēat cebe buye.

³¹ Ġebuġe ixeyū ibiōġbuk kērēayū o'jekawēn Jesus
pe.

— Ocemujum ġu juy ipiat'ajojoap kay — io'e.
— Dajebaroyū be acā juy ocemujum ece — io'e ip
Jesus pe.

³² Imēn o'e ip ade dajebaroyū co'a pēnpēn taġ wūrū-
rūrūġ puye.

— Ha'a — io'e Jesus.

³³ O'jēm ip aġokatkat pewi Jesus a'ōbi. Oōm ip
dajebaroyū be.

Imēnpuye dajebaroyū daudau ip owat co'a pēnpēn taḡ. O'kop ip iodi be. Oakōmkōm ip. O'sūm ip. Poḡ. Oap ip.

³⁴ Dajebaroyū kukukayū iboap o'tobuxik tak. O'-jenapōn ip. Jesus ibiōḡbuk kērēat o'ḡuōm dajebaroyū be iap muwēnuwēn cekuku ip ikaboḡatka watwat pe, koḡūnpi watwat pe dak.

³⁵ Ḡebuḡe o'jekūyjo'iaiyū o'ju dajebaroyū'ūm'ūm com. Oajēm ip Jesus kay. Jay. Ibiōḡbuk kērēat kuḡ tūibit o'tobuxik ip Jesus xe. Xik'i osunuy Jesus xe. Totite o'e. Yaḡuysat o'e. Yaḡuyba'ūm o'e ip oajēm'iaiyū. ³⁶ Imēnpuye o'jojjo'iaiyū ma Jesus ibiōḡbuk kērēat o'ḡujēm iap o'ḡuwēn soat pe. ³⁷ Ibo eipi watwat pit Jesus o'ḡujēm jeka bewi- -Gerasa eipi watwat. Jesus o'ḡujēm ip jeparara pibun.

O'jēm Jesus ixeyū xewi. Porewuh. Oōm kobe be waram timudek am. Xik. Oabik.

³⁸ Ibiōḡbuk kērēat kuḡ tūibit oajēm tak Jesus kay.

— Aḡ eweju oju — io'e Jesus pe. — Eweju ma ojeku — io'e.

³⁹ — Ap! Obu'u. Oweju ḡu juy. Ecepit cuy eduk'a be — io'e ibiōḡbuk kērēat kuḡ tūibit pe. — "Deus xipan cuk okuk," i juy ece cebe ip eduk'a beayū be — io'e cebe.

Ḡebuḡe ibiōḡbuk kērēat kuḡ tūibit o'jepit jeduk'a kay. Soat kaka daḡ oeku.

— Jesus ibiōḡbuk kērēat o'ḡujēm owebewi — i'e'em oeku.

Jesusyū dak waram o'timudek.

⁴⁰ Waram Jesus epit puḡe, Galilēia eipi watwat icokcok o'e iwiwim ip puye. Aḡokatkat oajēm Jesus kay. ⁴¹ Jairo i ixē aḡokatkat putet osunuy. Deus eju kawēnwēnap'a kukuk'ukat osunuy ixē. O'jēḡ'aecōḡcoḡ Jesus topabe Jesus ya'ōbuyxi cexe buye.

⁴² — Ejot cuy oduk'a kay — io'e Jesus pe. — Odaxit ce'ū pin — io'e.

Doze koato Jairo daxit osunuy. Wara'at taxit ka'ūmḡu. Pūḡ ma osunuy.

— Ḡa'a — Jesus o'e.

E dağ cucum pima, adeayū o'ju ip Jesus nomuju. Jesus o'ğukuğukuğ ip, ade buye.

⁴³E dağ cucum pima ayacat oajēm Jesus kay. Jesus tōgpikadiwi oajēm. Ixe ayacat iwātaxipi o'e. Doybucukcuğ ġu osunuy 12 koato bun. Imēnpuye jedinheiro o'ğū'ūm janūgtataapteim. Dinheiro kuğ ġu o'e. Ka'ūma ma kuka o'ğū'ada ayacat. ⁴⁴Jesus esay ukpu o'ğucay ixe. O'toybucuk ġebuġe bit. O'je'ada.

⁴⁵Ġebuġe Jesus o'e:

— Abu omucay? — i.

— Ōn ġu — io'e soat.

— Kariwa — Pedro o'e. — Adeayū ekuğukuğ — io'e. — Akokoreren ip ade — io'e.

⁴⁶— Pūğ'in ixeyū'in omucay — io'e. — Wetay-bit iboam. Deus a'ōbacaap o'jēm owebewi — io'e.

⁴⁷Imēneju ayacat o'e jewebe ma:

— Wemunēm pa'ore oce — i.

Ixe dak oajēm Jesus dopabe. Ikarabakbak o'e jeparara pibun. Tūybe Jesus omukorēm iān o'e. O'jēğ'aecōğcōğ Jesus topabe.

Ġebuġe ixe ayacat je'adaap o'ğuwēn soat etabun.

— Esay oğucay omu'ada am — io'e Jesus pe. — Eekabek ukpu mucay buġe, oce'ada — io'e cebe.

⁴⁸— Tū'ū — Jesus o'e. — Ece'ada, okay etabut puye. Kaba'ūm cuy eğuy ġasū bit — io'e ayacat pe.

⁴⁹Ağokatkat oajēm tak Jairo kay-Jesus xeat kay. Jairo duk'a bewiat oajēm. Oajēm ayacat pe Jesus kawēnwēn pima.

— Edaxit'ūm kuy oe'ū — io'e. — Kariwa Jesus eğua'ūm ġu juy — io'e.

⁵⁰Jesus pit iboap co buġe, o'jekawēn Jairo eju.

— Eğuycūğ ġu juy eğuy — io'e Jesus cebe. — Etabun cuy eğuy okay — io'e. — Etabut pima, je'ada, oe'ū ma'ğū edaxit — io'e.

⁵¹Ġebuġe Jesus oajēm Jairo duk'a kay. Pūğpūğ ā o'ğūōmat jeweju. Pedro oōm ceweju, João dak, Tiago dak, yaypan'isuat'ūm ebay dak, ixi dak. ⁵²Soat ibo'a beayū dak wawa ip osodop yaypan'isuat'um cocom. Jewāwāwām ip osodop. Imēnpuye Jesus o'jekawēn ceweju ip.

— “Wawa ġu juy epesop,” i òn e'em — io'e cebe ip. — Ixe ce'ù ġu-ixet acā — io'e Jesus.

⁵³ Waram ġuto oġu'ada iam itaybit puye, “Ixtet acā” io'e. Imēnpit Jesus o'jowayway ip, ixe'üm oe'ù iam itaybit ip puye uk'a beayū.

⁵⁴ Ġebuje Jesus Jairo daxit'üm pa o'subaixik.

— Tū'ū, aġobucēġ ece — io'e cebe.

⁵⁵ O'ġu'aġobucēġ ġebuje bit waram ġuto o'jetait puye. Itabēġ ma o'e ġasū bit.

— Ixat epeġüm cebe i'o am — Jesus o'e.

⁵⁶ — Ak'i — io'e ip cebay. — Waram ġuto o'jetait — io'e ip.

— Waram ġuto imutaicap cuy epeġuwēn ġu warara'acayū be — Jesus tak o'e cebay be.

Icokcok cīcā o'e waram o'jetait puye.

9 ¹⁻² Waram pima Jesus doze beayū o'tomuwā jewēju etaybitbinayū. Ja'òbacaap o'ġüm cebe ip.

— Ibiòġbuk kērēat cuy epeġujēm wa'òbi — io'e cebe ip. — Iwātaxipiayū juy epeġu'ada wa'òbi — io'e cebe ip. — “Deus soat kukukan je'e,” i juy epe'e soat pe — io'e.

³ Ixeyū mujum pima o'jekawēn cewēju ip.

— Ade ġu juy epetujowat eyjuap taġ — io'e cebe ip. — Eyba'ip ġu epeyoptujowat, dinheiro mūn tak ka'ūma, eyxat tak ka'ūma, dinheiro dak ka'ūma. Eyekamixa dak pūġ ma epetujowat — io'e.

⁴ — Aġoka be eyajēm puje, wara'at'a bebebe ġu juy epesop- -pūġ'a be ma — io'e. ⁵ — Ibo ka watwat ibu'u eykuġ pima, juy epejēm ibo ka bewi. Wara'at ka kay juy epeju. Eyjēm puje ka'wi epeġudu eyei bewi “Deus ipiat supi'ajoat eywebe ya'ò kay'üm puye” iap mubapuk am ibo ka watwat pe — io'e.

⁶ Imēneju doze beayu o'jēm. Soat kaka daġ oekuku ip. Kawēn idipat muwēnuwēn oekuku ip. Iwātaxipiayū mu'ada'adam oekuku ip.

⁷ Guyjom Herodes Jesus e'eap o'ya'iġojo- -Galilēia eipi kukat. Tūybe Jesus waram ġuto o'jetaitiat iān

o'e ip adeayū. Tūybe Jesus João Batista iān o'e ip pūḡpūḡayū.

— João Batista waram ḡuto o'jetait je'ūap to-mukadi — i te'e ma o'e ip Jesus muwēnuwēn.

⁸ Tūybe Elias'ūm waram o'jebapuk ijodi je'ūap to-mukadi iān o'e ip warara'acayū. Tūybe Deus ekawēn muwēnuwēn'ukat'ūm waram ḡuto o'jetait- -kuyjeat- 'ūm iān o'e ip warara'acayū. Imēnpuye Herodes yaḡuy'ūm o'e Jesus e'eap co buje.

⁹ — Abu sute? — io'e Herodes jewebe ma. — Ōn ma João oya'ukat — io'e. — Soat ip ite e'eap mu-wēnuwēn — io'e jewebe ma.

Imēneju Herodes Jesus co pin cīcā osunuy.

¹⁰ Jesus emumujuyū epit puje, soat o'ḡuwēn ip Jesus pe. Apēn cuk adi o'e'e ip iap o'ḡuwēn ip cebe.

Ibocewi Jesus ip o'tujowat jeweju.

O'jēm ip adeayū xewi. O'ju ip Jesus eju Betsai-da ka kay. ¹¹ Adeayū bit o'ju Jesus nomuju, kuy o'-jēm iam itaybit ip puye. Oajēm ip adeayū.

Gebuje Jesus icokcok o'e jenomuju iju buje ip. Gaxīn ma Deus soat kukukan je'e iap o'ḡuwēn cebe ip. Iwātaxipiapiayū o'ḡu'ada. ¹² Imēnpit katpuje jījā o'e. Imēnpuye doze beayū o'ju kawēn ām Jesus eju.

— Ajo kuka o'jo'o ip? Ka'ūmḡu puybit ijoce — io'e ip Jesus pe. — Eḡuypit cuy ip tomukay ma. Ikatēḡatka kay juy ip eḡuju ixat pu am — io'e ip ce-be. — Ixeyū juy eḡuju ixet am — io'e ip. — Ijoce bit ya'ūmḡu uk'a ixet am ip — io'e ip.

¹³ — Eyju ma ixat epeḡūm cebe ip — io'e Jesus pit jeweju etaybitbinayū be.

— Apēntak suteyū xan acejat? — io'e ip Jesus pe. — Cinco be ma pāo'a kuḡ oceju. Axima kuḡ tak xepxep ma oceju — io'e ip. — O'e ḡu kuka cebeam ip. Pomawi dak puybit suteyū xan acejat? — io'e ip Jesus pe.

¹⁴ Imēn o'e ip ade jījā buye. 5000 aḡokatkayū osodop ip Jesus ekawēn cocom.

— Adeayū epeḡuabik — Jesus o'e cebe ip.

— Ha'a — io'e ip.

¹⁵ Soat oabik ip. Kazikzik'i ip o'e.

¹⁶ Gebuje Jesus ixat o'jat. Akoh. Pāo'a o'yabu- - cinco beat'a. Axima o'jat xepxepat. Ixe dak o'jeapūn kabi kay. Apūn.

— Bay, xipat cīcā ēn — Jesus o'e Deus pe. — Ocexan eḡubapuk ocewebe i'o am — io'e.

Ixat o'takatkat jebum. Pāo'a o'yadakatkat. Pan. O'yaūmūm doze beayū be yaūm ām adeayū be. Iūmūm pima o'ḡu'acoḡ axima. Doze beayū ixat o'ḡūmḡūm adeayū be. Soat ip o'jo'o. Ibeḡbeḡ ip o'e. ¹⁷ Doze beayū cepoyat o'ḡuxipan. O'jomōḡ ip ico be. Doze be ico o'ḡunopapūn ip cepoyan. Imēn Jesus yopīcat o'ḡu'acoḡ adeayū xan.

Gebuje Jesus adeayū o'ḡuyypit tuk'a kay. Irerem ḡu ip o'ḡuyypit- -ibeḡbeḡ acā.

¹⁸ Waram pima Jesus o'jekawēn Deus eju. Jaḡepūḡ ma kawēnwēn o'e ceweju. Ceweju osodop ip doze beayū.

Gebuje Jesus o'jekawēn jeweju etaybitbinayū eju.

— Abu dak ōn adeayū xe? — io'e Jesus cebe ip.

¹⁹ — Ēn João Batista pūḡpūḡayū xe — io'e ip. — “Teku João Batista,” i te'e ma e'em ip. “Teku Elias,” i te'e ma e'em warara'acat — io'e ip. — “Teku Deus ekawēn muwēnuwēn'ukat- -waram ḡuto o'jetaitiat,” i te'e ma e'em warara'acat — io'e ip.

²⁰ — Pām eyju? Abu dak ōn eyxe? — io'e.

— Ēn Cristo ma — io'e Pedro. — Deus pe wuy- daxijo am taē'ibit ēn — Pedro o'e.

²¹ — Iboap pit cuy epeḡuwēn ḡu warara'acayū be — Jesus o'e cebe ip. ²² — Soat waḡo ōn. Ōn pit ipiat osupi'ajo — io'e. — Paīyū kukukayū itakoma jījā je'e okay, Moisés ekawēn imutaybitbin'ukayū dak, Judeuyū kukukayū dak. Waoka ojuy je'e ip. Waoka ip ḡuyjom. Xepxep xet kap puje bit, waram ocetait — Jesus o'e.

²³ Gebuje Jesus o'jekawēn soat eju- -cekawēn comayū eju.

— Oweju jeku pin pima eybikuyap taḡ ḡu juy epeku- -obikuyap taḡ acā — io'e. — Wekawēn taḡ cuy epeku — io'e. — Eybu'um ḡu juy epesop eye'ū

ām owebeam — io'e. ²⁴ — Obikuyap tağ eyeku buje, soat em Deus xe eyetait epesop eye'ū buje — io'e. — Eybikuyap tağ eyeku buje bit, wūy ma Deus wi epesop — io'e. ²⁵ — Eye'ū buje soat em wūy ma Deus wi epesop pima, te'e ma eyju soat pupum ijodi eybubun. ²⁶ Soat wağō òn. Waram ojot ijodi Deus ekawēn tojtjtot'ukayū eju- -ikērēat kuğ'ūmayū eju. Waram ojot webay a'ōbi. Soat je'e owebe: "Ka'ūmğū ejo'iat ya'ōbuyxiat," i. "Ka'ūmğū ejo'iat idipat," i dak. Okay eybu'u bima, òn tak obu'un ma oce eykay wedot puje. Wa'ijo am eybu'u bima, òn tak obu'un ma oce eya'ijo am — io'e. ²⁷ — Icēmān òn e'em eywebe — io'e. — Deus soat kukukan je'e. Pūğpūğ puk ijodiatat je'ū ġu iboap com'ūm pima — Jesus o'e.

Jesus imēn waram jedocap o'ğuwēn cebe ip.

²⁸ 8 xet kap puje, Jesus o'ju Pedro eju, João eju dak, Tiago eju dak. O'ju ip co'a kay jekawēn ām Deus eju.

²⁹ Oajēm ip. Jay. Jesus o'jekawēn Deus eju. Kawēnwēn pima o'jedopaewarurun. Iekabek irut cīcā o'e. Isopsep cīcā o'e. ³⁰ Xepxep ağokatkayū dak o'jekawēn Jesus eju- -kuyayū, kuy oe'ū'iyayū. Moisés o'jekawēn, Elias tak. ³¹ Idip cīcā osunuy cebapukap. O'jekawēn ip jeweweju.

— Jesus je'ū Jerusalém ka be Deus bikuyap tağ — io'e ip jewewebe.

³² Imēnpit Pedro o'xet, Tiago dak, João dak. O'xet ip itaxet pinpin ip puye. Jewurūğ puje, Jesus o'jojojo ip. Idip cīcāat o'jojojo ip. Ixeyū dak xepxep ağokatkayū o'jojojo- -Jesus eju kawēnwēnayū.

³³ Gebuje Pedro o'jekawēn Jesus eju xepxepayū cēm pima.

— Kariwa! — io'e Pedro. — Xipat cīcā wuyju ijoceam. Xijap cuy ocejomōğ ebapūğ — io'e. — Pūğ ewebeam je'e, wara'at Moisés peam je'e. Wara'at Elias peam je'e — io'e.

Pedro imēn o'e itaybit'ūm apēn oce iam puye. Yağuybabi'ūm o'e.

³⁴ Kabikerereat tak Pedro o'ğuba'arēm, Tiago

dak, João dak. Kabidiğ pe ip o'e. Iparara ip o'e kabidiğ pe jeba'arêm puye

³⁵ Gebuje kabikerereat pewi Deus ekawên ip o'ya'ijojo.

— Xeku okpot — io'e Deus. — Wemunaê xeku — io'e. — Kūyjobin cuy epesop ya'ô kay — io'e Deus.

³⁶ Ibocewi Jesus acâ o'jojojo ip. Kuy o'jêm xep-xepayū. Warara'acat pe ġu apên cuk o'jojojo ip iap o'ġuwên ip- -jewewebe acâ. O'jojojo ma'ġu ip. O'ġuwên ġu bit ip.

³⁷ Kuyaje Jesus co'a bewi o'kop ebapūğayū eju.

³⁸ Adeayū oajêm Jesus kay. Ağokatkat o'jekawên Jesus eju- -ceparakpeat ip.

— Ocemutaybitbin'ukat — io'e. — Okpot cuy esubuywan! ³⁹ Pūğ ma okpot. Axik pe ikukuk puje, pipim imuy'at'an ipi ju, jewāwāwām ya'ôberen, ibidopabokbek e'em, imuwerikweriğ — io'e. — Ibu'u o'e cêm cebewi — io'e. ⁴⁰ — “Axik cuy epeğujêm okpot pewi,” i kuy oce eweju etaybitbinayū be. Imênpit imujêm pa'ore o'e cebe ip — cebay o'e Jesus pe.

⁴¹ — Tâh! — io'e. — Eyetabut'ûm cîcâ okay — io'e Jesus iboceayū be. — Xipat ġu eyju — io'e. — Puğûn tak oğuy eyxe? Ibun ma okpiceğê eyetabut'ûmap cocom! — Jesus o'e. — Ekpot cuy etojot okay — Jesus o'e cebay be.

⁴² Gebuje axik pipim ağokatkat'it'it o'ğuy'at Jesus kay ajêmjêm pima. O'ġuwerik cîcâ.

— Ejêm cuy ağokatkat'it'it pewi — io'e axik pe.

Ağokatkat'it'it pewi o'ğujêm. Waram ġuto o'ğûm cebay be.

⁴³ — Soat podi ma Deus ya'ôbaca — io'e ip soat o'jojojo'iyū.

Gebuje Jesus o'jekawên jeweju etaybitbinayū eju. Adeayū itabēğbēğ ip o'e ijojom, axik o'ğujêm puye. Gebum osodop ip apên Jesus o'ğujêm iap kay.

⁴⁴ — Eyağuyba'ûm ġu juy wa'ô kay — io'e cebe ip. — Soat wağo òn. Warara'acayū oûm okay itako-

maayū be — io'e. — Gebum cuy epesop wa'ō kay — io'e cebe ip.

⁴⁶ Imēnpit cekawēn pa'arēm o'e ceweju etaybitbinayū xe.

— Apēgape dak cekawēn? — io'e ip jewewebe ma.

Imēnpit isūsūn ip o'e “Apēgape dak ekawēn?” i'e am cebe.

⁴⁶ Ibocewi jewa'ōxikxiḡ o'e ip ceweju etaybitbinayū.

— Abu omuy ya'ōbuyxiat wuy'in warara'acat podi ma? — io'e ip jewewebe.

⁴⁷ Jesus itaybit osunuy yaḡuy ip iam. Imēnpuye beki-cat o'tojot jexe am.

⁴⁸ Gebuje o'jekawēn ceweju ip.

— Cexe okukpin puye xipan ite bekicat kuḡ pima, xipan okuḡ tak epe'e — io'e. — Xipan okuḡ pima, omudocat kuḡ tak xipan epe'e — io'e. — “Ōn pit wa'ōbuyxi” i'e'em'ūmat ya'ōbuyxi Deus xe — io'e Jesus.

⁴⁸ Gebuje João o'jekawēn Jesus eju.

— Kariwa — io'e. — Aḡokatkat cuk ocejojojo. A'ōbi ma ibiōḡbuk kērēat mujēmjēm'uk osunuy — io'e. — “Imēn ḡu bit cuy,” i juk oce cebe, wuyweju'ūm puye — io'e João.

⁵⁰ — Imukorēm'rēm ḡu juy — io'e Jesus pit. — Wuykay itakoma'ūmat wuykadiat — Jesus o'e.

⁵¹ Kabi kay waram Jesus euap ekabia ajēm pin pima: — Jerusalém ka kay juy oju — io'e Jesus jeweju etaybitbinayū be. Iju pin o'e ibo ka kay.

⁵² Ja'ōdujowacayū o'ḡuju jewap. O'ju ip. E daḡ pima aḡoka be oajēm ip Jesus nuyap'a muxipan am-Samaria eipi watwat ka be.

⁵³ Ibo ka watwat pit Jesus kay ḡu o'e, Jerusalém ka kay cum puye. Ibu'u o'e ip imu'abiḡ jeka be. ⁵⁴ Imēnpuye Tiago o'jekawēn Jesus eju, João dak.

— Kariwa — io'e ip. — Ebikuy du ocewebe

daxa mudot am kabi bewi ijop ka watwat muy'ū
ām? — io'e ip.

⁵⁵ — Ap — io'e Jesus pit cekay ip jekorepën pu-
je. — Epeğuy'ū ġu juy ip — io'e.

O'jēm ip ibo ka bewi.

⁵⁶ Soat kaka dağ oekuku ip wara'atka dağ. ⁵⁷ E
dağ cucum pima, ağokatkat oajēm Jesus kay.

— Soat ka dağ ojekuku eweju ejuap tağ — io'e
Jesus pe.

⁵⁸ — Oweju du eku pin? — io'e Jesus. — Kak
ikūykēy — io'e. — Wasū topipe. Soat wağo òn.
Imēnpit ya'ümġu odopdopap'a. Eku pin tu oweju? —
io'e cebe.

⁵⁹ Gebuje Jesus oajēm wara'at ağokatkat kay.

— Oweju juy ejeku — io'e cebe.

— Gasū ġu. Ģuyjom acā — io'e. — Āğ we-
bay'üm ojokot — io'e cebe.

⁶⁰ — Āğ Deus ekawēn kay'ūmat jebadipyū'üm-
'üm jokot — io'e. — Ēn pit oweju juy ejeku — io'e.
— Deus soat kukukan je'e i'e'e'ukan cuy eğuy —
io'e cebe.

⁶¹ Wara'at ağokatkat oajēm Jesus kay.

— Kariwa, eweju juy ojeku — io'e. — Oduk'a
beat pe buk òn jekawēn. “Cum puk òn,” i buk oce
cebe ip — io'e Jesus pe.

⁶² — Biopak kuğ ipi kotkon pima cekorepën puje,
ipi kocap wakēnwakēn'i kuka o'e — io'e Jesus pit.
— Imēnpuxim etabut am ebu'u bima, te'e ma kuka
ece Deus soat kukukan je'e iap ekawēn muwēnu-
wēn'ukan — io'e Jesus.

10 Iboap tomukadi wuykukukat Jesus 70 beayū
o'taē kawēn idipat muwēn ām adeayū be.
Xepxepxem ma ip o'ğuju jewap.

— Soat kaka dağ cuy epeju — io'e cebe ip. —
Ōn tak oju eynomuju — io'e cebe ip. ² — Jeymuju
òn apēn ağokatkat jekat peat'a bum jebuywatwat-
'ukat mujuap puxim — io'e. — Apēn ya'ade opop
kat pe kadai'a yaopat'a iap puxim ade opop ipi ju

Deus ekawēn itaybit'ūmayū. Ade ġu bit Deus ekawēn muwēnuwēn'ukayū. Imēnpuye imuwēnuwēn'ukayū kukat eju juy epeyekawēn--Deus eju. "Adeayū juy eġuju ekawēn muwēn ām," i juy epe'e cebe — Jesus o'e.

³ — Epeju juy ġasū — io'e. — Ōn ma dak jey-muju. Deus ekawēn muwēnuwēn pima, ovelha'it'it puxim epesop--widayū bidaseat puxim, ikērēat kay jġāayū bidase buye — io'e.

⁴ — Sacola ġu juy epetujowat eyjuap taġ, dinheiro mūn tak ka'ūma, eyeiuk tak ka'ūma — io'e. — Ibun ġu juy epesop kawēnwēn warara'acat eju e bidase — io'e.

⁵ — Uk'a be eyōm puje, "Deus cuy ija'a watwat jukuk kaba'ūm ip jedop am," i juy epe'e — io'e.

⁶ — Xipan jewewekuġ ip pima, kaba'ūm ip jeedop iġo'a watwat. Jewewekay itakoma ip pima bit, te'e ma "Deus cuy ija'a watwat jukuk kaba'ūm ip jedop am," i epe'e — io'e cebe ip.

⁷ — Iġo'a be ma epesop uk'a be — io'e. — Soat cuy epejo'o ajo ip o'ġūm eywebe iap. Soati juy epetikōn ajo ip o'tiūm eywebe iapti. Eysūsūn ġu juy epesop eyxat pu am cexewi ip. Cekapikapte juy ateida kapikpik'ukat pe — Jesus o'e.

⁸ — Aġoka be eyajēm puje juy ajo ip o'ġūm eywebe iap epejo'o xipan ip eykuġ pima. ⁹ Iwātaxipi-piayū juy epeġu'ada--ibo ka watwat. "Ġaxīn ma Deus soat kukukan je'e," i juy epe'e cebe ip — io'e.

¹⁰ — Aġoka be eyajēm puje, "Epeōm cuy oduk'a be," i'e'em'ūm ip pima uk'a ukpibubu daġ cuy epeju. ¹¹ "Ka'wi opop ocei eju--eyka beat ka'wi," i juy epe'e cebe ip. "Ka'wi mududum ocei bewi eyukpiwat puye, Deus ekawēn co pin'ūm puye," i juy epe'e cebe ip. "Deus soat kukukan je'e," i juy epe'e. "Eyetaybit ġu iboam, wekawēn kay'ūm puye," i juy epe'e cebe ip — io'e Jesus.

¹² — Icēmān ōn e'em eywebe. Deus kūyjobit-ūmayū be ipiatpi'ajoap kabia bima, Sodoma ka watwat pe ipiat supi'ajoat. Ixeyū be iap podi ma bit ibo ka watwat pe ipiat supi'ajoat, eyekawēn com ip ibu'u buye — io'e Jesus.

¹³ Gebuje Jesus wara'at kaka watwat o'ḡuwēn.

— Karem ma ipiat epesupi'ajo jījā, Corazim ka watwat — Jesus o'e. — Karem ma ipiat epesupi'ajo jījā, Betsaida ka watwat — io'e. — Ka'ūma buk epejojoiap cuk adi oḡubapukpuk eyetabutpe eyka be bima — io'e. — Tiro ka be iboap mubapuk pima, Sidom ka be dak, kajuk ikērēat mujurūḡrūḡap o'jepe-re ip ibo ka watwat. Itabut kajuk ip o'e Deus kay — io'e. — Ibo ka be iboap mubapuk pima, kajuk ikurususucat o'ḡuōm ip jedotim. Daxadaypi be dak kajuk o'e ip kaxikxik'i. Imēn kajuk o'e ip oceḡuycūḡ cīcā ikērēat kuḡ puye iap mubapuk am jebureyū be, ḡasū bit ikērēat aḡujurūḡ ḡu iap mubapuk am tak — io'e.

¹⁴ — Deus kūyjobit'ūmayū be ipiatpi'ajoap kabia bima, Tiro ka watwat pe ipiat supi'ajoat, Sidom ka watwat pe dak. Ixeyū be iat podi ma bit eywebe ipiat supi'ajoat — io'e Jesus.

¹⁵ — Cafarnaum ka watwat — io'e. — Deus jey-muyu ḡu kabi kay — io'e Jesus. — Jeymukop ipiat'ajojoap kay — io'e.

¹⁶ — Eyekawēn kayayū wekawēn tak ip cekay — io'e jewēju etaybitbinayū be. — Eykay'ūmayū ōn tak ip okay ḡu. Okay'ūmayū omudocat tak ip cekay ḡu — Jesus o'e. — Epeju juy ḡasū — io'e. — Wekawēn cuy epeḡuwēnuwēn soat ka watwat pe — io'e.

— Ha'a — io'e ip.

Ibun cīcā ip oekuku kawēn idipat muwēnuwēn.

¹⁷ Gebuje icokcok cīcā ip o'jepit Jesus kay — 72 beayū. O'jekawēn ip Jesus eju.

— Kariwa, ibiōḡbuk kērēayū kūyjobit oca'ō kay, a'ōbi oceju jekukum puye — io'e ip Jesus pe.

¹⁸ — Hm hm — io'e Jesus. — Kabi bewi Sata-nás at'anap ojojojo. Dao ma o'at xiriririkiat puxim — Jesus o'e.

¹⁹ — Eya'ōpicūḡcūḡ cuy epesop wa'ō kay — Jesus o'e. — Wa'ōbacaap cuy oḡūm eywebe. Wa'ōbi juy epeku soat em. Puybu epesubumucak tūypiatpu. Dat tak epeḡucak. Ka'ūma bit jeyaoka. Eykay itakomaayū dak o'e ḡu eywebe, wa'ōbi eyju jekukum puye. ²⁰ Imēnpit eycokcoḡ cuy epesop ibiōḡbuk kērēat

cēm cēm eya'ōbi iap kay ġu- -kabi beatup pe eybutet ibararak opop iap kay acā — Jesus o'e.

²¹ Jesus Ibiōġbuk xipacat a'ōbi icokcok cīcā o'e ġebuġe bit.

Ġebuġe Jesus o'jekawēn Deus eju.

— Bay — io'e. — Ēn acā soat kukukat- -kabi beacat kukukat, ipi juacat kukukat tak — io'e. — Jewexe itaybit cīcāyū xewi eġunēmiap eġubapuk itaybit'ūmayū be — io'e. — Ixeyū be acā iboap eġubapuk, imēn ebikuy buye, xipat exe buye dak — io'e Deus pe.

²² — Soat ma juk webay o'ġūm owebe — io'e. — Warara'acat ġu itaybit cīcā abu Deus ipot iam- -cebay acā. Imēnpuxim warara'acat ġu itaybit cīcā abu ipot ebay iam- -ipot acā. Iboap mubapuk am ipot ibikuy bima acā, warara'acat itaybit je'e abu Deus ipot iam — Jesus o'e cebe ip.

²³ Ġebuġe Jesus jebidadam o'jekawēn jewēju etaybitbinayū eju warara'acat pe ya'ijoap puxim.

— Eycokcok wekawēn cocom puye — io'e. ²⁴ — Kuyġe ajo eyju ijojomap co pin cīcā osodop ip ade Deus ekawēn muwēnuwēn'ukayū, ika kukukayū dak. Imēnpit o'jojojo ġu ip. Eymukūyjojomap co pin cīcā ip osodop. Imēnpit o'jekūyjo ġu ip — Jesus o'e.

²⁵ Ġebuġe Moisés ekawēn imutaybitbin'ukat oajēm Jesus kay. O'jekawēn Jesus eju cekawēn puyxijo ojuy.

— Kariwa — io'e. — Apēntak oce soat em Deus xe onuy ām? — io'e.

²⁶ — Apēn e'em wuyawēwēap ekawēntup? Apēn iboaptup wuymutaybitbin exe? — Jesus o'e.

²⁷ — Imēn e'em wuyawēwēaptup — io'e aġokatkat.

— Deus kay jījā juy epesop, i. Ixe Deus eykukukat, i. Ixe bikuyap taġ jekukum pima, ixe kay jījā epesop; soat em xipacat kay ġebum pima dak; ya'ō kay kūyjobit pima dak; ixe aġuy daġ jewaġuyġuy bima dak, i. Imēn

cuy epeku, i. Xipan cuy eyxeat epejukuk eyewekukap puxim, i.

Imên e'em wuyawêwêap ekawêntup — io'e Moisés ekawên imutaybitbin'ukat.

²⁸ — Icêmân ên e'em — Jesus ma o'e. — Imên eku buje, soat em Deus xe ecesüy etait — io'e.

²⁹ — Abu oxeat pit? — io'e ixé bit jewedayo ojuy.

³⁰ Imênpuye Jesus wuymutaybitbinap ekawên o'güwên abu wuyxeat iam imutaybit am.

— Ağokatkakopkom o'e Jerusalém ka bewi — Jesus o'e cebe. — Ixe ağokatkak cu ojuy Jericó ka kay. Judeu osunuy. Cucum pima ibukurukayü ixé o'topabijuk e dağ.

— Oajêm ip cekay. Toti o'ju'uk ip. Soat o'jat ip cexewi ibubut. O'yaokaka jîjâ ip. Je'ûje'ûm ip o'suiwat ebidakpe.

³¹ — Paï cucum o'e ixé e dağ. Je'ûje'ûmat co buje, o'kap wara'at e bitako dağ. O'subuywan ġu — Jesus o'e. ³² — Imêntak paï buywatwat'ukat oajêm ixé e dağ cucum pima. Je'ûje'ûmat co buje, o'kap wara'at e bitako dağ- -paï buywatwat'ukat. O'subuywan ġu — io'e.

³³ — Gebuje bit Samaria eipi bewiat oajêm cucum pima ixé e dağ. Samaria eipi watwat Judeuyü kay'ûm cîcâ ip. Ixe jo buje, itabotaidabotbot o'e je'ûje'ûmat kay. O'ju cekay taxiyo ojuy. ³⁴ Posûgti o'timôğ werowero be- -uva'abidi, ixépti dak. Werowero o'jomünmün pağôm.

— Je'ûje'ûmat o'tujowat powatwat ajêmjêmap'a kay. Jejumento akpi jeje o'tujowat. Xipan ixé o'jukuk iğo'a be.

³⁵ — Kuyaje xepxep jedinheiro o'jat isurûğat, teiboğat, prata muğêğê. O'ğüm uk'a iwat pe je'ûje'ûmat kukapteim.

— "Xipan cuy ite ejukuk," io'e uk'a iwat pe — io'e Jesus. — "Ijop edinheiro'ûm pima, wara'at oğüm ewebe wedinheiro wepit puje," Samaria eipi bewiat o'e — io'e Jesus.

Imên Jesus wuymutaybitbinap ekawên o'güwên.

³⁶ — Ebağayü je'ûje'ûmat o'jojajo- -ibuku-

rukayū emuaokaka — io'e. — Abu xipan o'jukuk je-
xeat kukap puxim? — Jesus o'e.

³⁷ — O'subuywan'iat — io'e Jesus pe.

— Ixe ekukuap co'i juy ejeku — Jesus o'e. —
Warara'acat puywatwat'ukan cuy eḡuy — io'e Moi-
sés ekawēn imutaybitbin'ukat pe.

O'jēm Jesus xewi.

³⁸ Waram pima Jesus oōm aḡoka be jewēju etay-
bitbinayū eju. O'ju ip ayacat kay- -Marta kay.

— Oduk'a be juy epesop — Marta o'e Jesusyū
be.

— Ma — io'e ip.

³⁹ Marta duk'a be ip osodop. Marta kubit tak
uk'a be osunuy. Ikubit putet Maria i osunuy.

Gebuje Maria Jesus ekawēn o'ya'ījojo jījā jewe-
mutaybin ojuj. Maria ma xik'i osunuy Jesus xe ce-
kawēn cocom. ⁴⁰ Marta bit kapikpiḡ osunuy ixat ta-
tam, ixat tojtjon tak. Yaḡuybabi'ūm o'e jekapikap
kay cekapikap ade buye.

Gebuje Marta o'jekawēn Jesus eju.

— Kariwa — io'e. — Ak'ḡu du ēn okay? Okibit
oibu'un obuywat am. Waḡepūḡ ma ōn wuyxat tatam,
wuyxat tojtjon — io'e. — “Ewaḡo juy esubuywan,”
i juy ece cebe — io'e Jesus pe.

⁴¹ — Ap — io'e Jesus Marta be. — Gebum cīcā
ēn wuyxataap kay- -ekapikap kay. Aḡuykoreren soat
kay ekapikap kay. ⁴² Maria bit wekawēn co pin cīcā.
Soat em ḡu wuyxat dopdom. Soat em pit Maria ḡe-
bum wekawēn kay jeenuy — io'e Jesus.

11 Waram pima Jesus o'jekawēn Deus eju. Pe-
reh. O'jepere.

Gebuje ceweju etaybitbinat o'jekawēn ceweju-
doze beayū'in.

— Kariwa — io'e. — João kuy jewēju etaybit-
binayū o'ḡutaybin kawēn ām Deus eju. Imēnpuxim
oceju dak cuy ocemutaybin ece — io'e Jesus pe.

² — Imēn cuy epe'e, Deus eju kawēnwēn pima —
Jesus o'e.

— “Bay, soat cuy ip jeedop ibuyxim ebutet kuḡ,” i juy epe'e Deus pe -kabi beat pe — io'e. — “Gaxīn ma juy soat kukukan eḡuy,” i dak cuy epe'e cebe — io'e.

³ — “Soat kabia ocezan cuy eḡūmḡūm ocewebe,” i dak.

⁴ — “Oceju ḡebum ḡu apēn wara'acat cuk adi warēmtaḡ ocezukiap kay,” i dak. “Imēnpuye ḡebum ḡu juy eḡuy apēn cuk adi ikērēat oceḡujurūḡrūḡ iap kay,” i dak cuy epe'e cebe.

— “Oca'ōmubacacan cuy eḡuy ocewebe ikērēat kukap puxim,” i dak cuy epe'e — io'e.

— Imēn ma juy epe'e Deus eju kawēnwēn pima — Jesus o'e.

⁵ Gebuje Jesus waram adeayū o'ḡutaybin.

— Apēn kuka epe'e powatwat ajēm puje pāo'a kuḡ'ūm pima? — io'e. — Cum aco'i eyju eybure kay iximadakpe. “Obure, pāo'a kay ōn pūḡ'a ma,” i aco'i epe'e cebe. ⁶ “Wara'at obure oajēm oduk'a be jekuap taḡwi,” i aco'i epe'e cebe. ⁷ “Ya'ūmḡu pāo'a. Ya'a'e bima oyaūm kajuk,” i aco'i epe'e cebe. Ixe eybure je'e eywebe badiwi: “Okaykay ḡu juy,” i. “Kuy oduk'a exīntabi otomudip,” i du je'e? “Webe-kitkit kuy ixexet,” i du je'e eywebe? “Kuy ōn po'i” i du je'e? “Okop pa'ore yaūm ām ewebe,” i du je'e? Imēn tu je'e eywebe? — Jesus o'e. ⁸ — Ka'ūma! Imēn ḡu je'e — io'e. — Eybure je'kop yaūm ām eywebe. Eybure buye ḡu yaūm eywebe. Ibun eyju yaojuyjuy buye bit kuka o'yaūm — io'e.

⁹ — Icēmān ōn e'em eywebe — io'e. — Deus xewi juy epejoojuy. Iojuyjuy bima, epejat. Ixe xewi juy epejokudada. Ikudadam pima epetobuxik. Ixe xewi iojuyjuyap xīntabi be taḡtaḡtaḡ'iap puxim. Xīntabi be taḡtaḡtaḡ'i bima, tomudip'uk ip eymuōm ām. ¹⁰ Soat ojujuy'ukat je'jat; soat kudada'ukat to-buxik; xīntabi be taḡtaḡtaḡ'iat pe xīntabi tomudip'uk ip — io'e.

¹¹ — Puybu ḡu juy epesubuūm eyipotpot pe “Axima kay ōn” i'e buje. ¹² “Sapokay dopsa kay ōn” i'e buje, dat epeḡūm ḡu cebe. ¹³ Eyju ma xipacat ūmūm eyipotpoyū be ikērēat kuḡ ma'ḡu eyju. Eyju xipacat

ümūmap podi ma eyebayat pit xipacat ūmūm eywebe- -kabi beat. Ibiōgbuk xipacat je'gūm soat pe jexewi iojuyjuy'ukat pe — io'e Jesus. Imēn Jesus ijodiacat o'gūtaybin.

¹⁴ Gebuje Jesus ibiōgbuk kērēat o'gūjēm aḡokatkat pewi. Ixe ibiōgbuk kērēat aḡokatkat muyde- 'ūm'ūm'uk osunuy. Cekawēn pa'ore osunuy aḡokatkat.

Aḡokatkat pewi ibiōgbuk kērēat cēm puje bit, xipan o'jekawēn. Imēnpuye adeayū icokcok cīcā ip o'e. ¹⁶ Warara'acayū bit o'jekawēn ip jewewebe.

— Belzebu a'ōbi Jesus ibiōgbuk kērēat mujēm- jēm cebewi- -ibiōgbuk kērēayū kukat a'ōbi- -Satanás a'ōbi — io'e ip napa ma.

¹⁶ — Ka'ūma buk ocejojojoiap cuy eḡubapuk ēn Deus a'ōbi ibiōgbuk kērēat mujēmjēm iap mubapuk am ocewebe — io'e ip warara'acat warēmtaḡ cekuap ojuy.

¹⁷ Imēnpit Jesus itaybit osunuy apēn ixeyū je- waḡuyḡuy iam.

Gebuje Jesus o'jekawēn ceweju ip.

— Pūḡ eipi watwat jeweweju ma jewaoka buje, jewemu'ūm ip. Imēnpuxim pūḡ'a watwat uk'a watwat jeweweju ma jewaoka buje, jewemu'ūm ip — io'e. ¹⁸ — Imēnpuxim Satanás ebekitkit jeweweju ma jewaoka buje, jewemu'ūm ip. Jawaoka buje, ikoro ḡu ip je'e. Imēnpuye “Belzebu a'ōbi ēn ibiōgbuk kērēat mujēmjēm ijodiat pewi,” i eyju e'em napa ma owebe — io'e. ¹⁹ — Belzebu a'ōbi ōn ibiōgbuk kērēat mujēmjēm pima, abu a'ōbi dak eyebekitkiyū imujēmjēm ip? Jewemuḡuykukukum eyju iap mubapukpuḡ cīcā eyebekitkiyū. ²⁰ Belzebu a'ōbi ḡu ōn ibiōgbuk kērēat mujēmjēm- -Deus a'ōbi acā. Deus soat kukukan je'e iap mubapukpuḡ ōn eywebe imujēmjēm pima — io'e Jesus.

²¹ Gebuje Jesus meḡapekawēnku boku iap o'ḡubapuk cebe ip.

— Ibacaat nobano kuḡ jeduk'a wiwim pima, ibukurukat pe iōm pa'ore tuk'a be ibubut pu am. ²² Ibacaat podiat ajēm puje bit ixe kuka ibacaat o'ḡu-

wun pipim jeōm ām. Ibaca jījāat o'e kuka cebe. Cenobano kuka o'jat. Soat ibubut kuka o'jat. Ibubut kuka o'ģu'ē'ē jebureyū be — io'e.

²³ — Okay'ūmat itakoma okay. Imu'awerom obuywatwat'uk'ūmat imuypōģpōģpōģ — io'e.

²⁴ — Aģokatkat pewi ibiōģbuk kērēat cēm puje, idibi'ūmat taģ jekukum jebodoyap kudadam. Jebodoyap tobuxik'ūm pima kuka o'e jewebe ma “Jepin ma ōn kuy bima onuyap kay,” i — Jesus o'e.

²⁵ — Jepitpin. Yajēm puje, ixe aģokatkat tobuxixiģ. Ka'ūmģu ibiōģbuk kērēat opop ixe aģokatkat pe ģasū. Ixe aģokatkat uk'a buxim- -yabi'ōģ'ōģat'a buxim- -yaxipanat'a buxim — io'e.

²⁶ — Ibocewi ixe ibiōģbuk kērēat cēmcēm ma'ģuto. 7 beayū dobuxixiģ- -ibiōģbuk kērēayū dobuxixiģ- -cebodi ma xipat'ūmayū dobuxixiģ. Ixeyū dak ōmōm ixe aģokatkat pe 7 beayū. Kuy bima ixe aģokatkat tadaybot osunuy. Ģasū bit ibodi ma tadaybot o'e — Jesus o'e.

²⁷ Iboam i'e buje ayacat o'jewāwā Jesus kay- -adeayū parakpeat.

— Icokcok cīcā juy exi- -emukapat- -emuytitit'ukat! — io'e Jesus pe.

²⁸ — Hm hm — Jesus o'e. — Deus ekawēn co-co'ukat pit oxi cokcokap podi ma icokcok- -cekawēn taģ jekuku'ukat tak — io'e.

²⁹ Ģejuje Jesus o'jekawēn adeayū be- -jakokoreren je'aweroromayū be.

— Xipat'ūm cīcā ģasūacat! — io'e Jesus. — “Ka'ūma buk ocejojoioiap cuy eģubapuk ocewebe,” i eyju e'em owebe — io'e. — “Ēn Deus a'ōbi jekukum iap cuy eģubapuk ocewebe,” i eyju te'e ma e'em. Ade ģu oģubapuk eywebe epejojo ģu buk iap. ³⁰ Pūģ ma oģubapuk eywebe. Jonas kay juy ģebum epesop. Kuy bima Deus Jonas o'ģuju Deus soat podi ma ya'ōbaca iap mubapuk am Nīnive ka watwat pe. Deus Jonas waram ģuto o'ģutait ce'ūap tomukadi soat podi ma wa'ōbaca iap mubapuk am iģo ka wat-

wat pe. Imēnpuxim Deus omudot eykay ḡasū dak. Ōn soat waḡo — io'e.

³¹ — Kaxi etajoreḡatka kukat je'bapuk soat etabixe-ayacat — io'e. — "Teyūku ikērēat kuḡ oxe," i Deus e'emap kabia bima, ixe ka kukat je'bapuk — io'e. — Ḡasūacat tak je'bapuk ixe kabia be. "Ikērēat kuḡ eyju Deus xe," i je'e ibo ka kukat ixeyū be. Ixe ayacat oajēm wūyatka bewi Salomāo ekawēn co am- -itaybit cīcāat ekawēn co am. Ōn eyxe ḡasū. Salomāo etaybicap podi ma ōn wetaybit cīcā. Imēnpit eyju wekawēn kay ḡu — Jesus o'e.

³² — "Teyūku ikērēat kuḡ oxe," i Deus e'emap kabia bima, Nīnive ka watwat je'bapuk soat etabut-pe. Ixeyū je'e ḡasūacat pe: "Eyju ikērēat kuḡ Deus xe," i. Nīnive ka watwat oibu'un ikērēat mujurūḡām. Ikērēat mujurūḡrūḡap o'jepere ip Jonas pe Deus ekawēn muwēn puje. Ōn eyxe ḡasū. Jonas etaybicap podi ma wetaybit cīcā Deus ekawēn muwēnām. Imēnpit eyju wekawēn kay ḡu — Jesus o'e.

³³ — Imusop puje, lamparina aḡunēm ḡu ico diot-pe. Ipikūykūy be ḡu ajomuy. Um acā ajomuy uk'a be ōmōmayū be soat co am — Jesus o'e. ³⁴ — Imēnpuxim wuyeta lamparina buxim. Wuyetadip pima, soat ijo but wuywebe. Kabia daḡ ajeku. Wuyetakērē bima, ijo ba'ore wuywebe. Kabiok taḡ ajeku. Kabiok taḡ jekukuap ikērēat mujurūḡrūḡap puxim. ³⁵ Aḡ cuy epesop ikērēat mujurūḡap puxim. ³⁶ Ikērēat mujurūḡrūḡ'ūmap kabia be jekukuap puxim. Ikērēat mujurūḡrūḡ'ūm pima, kabia buxim wuyju — Jesus o'e.

³⁷ Jesus ekawēn epere buje Fariseu o'jekawēn ce-weju.

— Ejot cuy oduk'a be jekōnām — io'e.

O'ju ceweju. Oabik jekōnām. ³⁸ Jekōn pima Jesus Judeuyū babi daḡ ḡu o'jewebuwy. Imēnpuye Fariseu itabēḡ o'e ijojom.

³⁹ Ḡebuje Jesus o'jekawēn ceweju ip.

— Fariseuyū — io'e. — Kacūḡkadi acā eyju kopo wuywuy, prato wuywuy dak. Yabi bit ka'ūma. Yabiokok cīcā. Prato buxim eyju dak eyokok, eyeta-

bikuku jījā buye, ikērēat mujurūgxi buye dak — io'e.
⁴⁰ — Eyaḡuyba'arēm! Kacūgkadiat o'ḡuḡēiat badiat tak o'ḡuḡē. ⁴¹ Eybubut'in cuy epeḡūm tadaybotbo-cayū be. Iūmūm pima, xipat epesop Deus xe — io'e.

⁴² — Karem ma ipiat epesupi'ajojo — Jesus o'e Fariseuyū be. — Soat em eybubut mu'awerorom 10 be. Pūḡat ūmūm eyju Deus pe. Wara'at pit eyju imuxipanpan eybubun. Eyju puybit mukunukunaptup ūmūm Deus pe, arrudadup ūmūm tak, posūḡ puximatup ūmūm tak, puybit peaptup ūmūm tak. Xipat eywebe iboap ūm ām Deus pe. Imēnpit cedaḡ ḡu warara'acat kuḡ eyju- -warēmtaḡ ma! Deus ikukpin ḡu eyxe. Imēn xipat ḡu! Xipan cuy warara'acat epejukuk. Ikukpin cuy Deus epejukuk — io'e.

⁴³ — Karem ma ipiat epesupi'ajojo, Fariseuyū — Jesus o'e. — Eyju abik ojuy ya'ōbuyxiat tūyap pe Deus eju kawēnwēnap'a be. Eycokcok cīcā warara'acat pe ibuyxim eykuk am soat etabutpe — io'e.

⁴⁴ — Karem ma ipiat epesupi'ajojo, Fariseuyū — Jesus o'e. — Eyetaybit Judeu be ce'ūat etaypi jeje cexīḡxīḡpi iam. Eyju wuyjuyū'ūm'ūm etaypi buxim iba'arēmat puxim. Wuyju itaypi daḡ kapkam itaypi opop ijoce iam wuyetaybit'ūm puye. Imēnpuxim eyju warara'acat pe ikērēat mujurūḡan — io'e.

⁴⁵ Gebuje Moisés ekawēn imutaybitbin'ukat o'jekawēn Jesus eju.

— Tapu, ēn oceju dak ocemukorēmrēm imēn e'em Fariseuyū be bima — io'e.

⁴⁶ — Hm hm — Jesus o'e. — Eyju dak karem ma ipiat epesupi'ajojo — io'e. — Warara'acat ukxabi be ipoxiat mōḡmōḡat puxim eyju. Eyju e'em warara'acat pe: "Moisés ekawēn taḡ cuy epeku- -soat taḡ," i. Imēnpit soat taḡ ḡu eyju dak jekukum ixekawēn taḡ — io'e.

⁴⁷ — Karem ma ipiat epesupi'ajojo — io'e. — Eydobuyū'ūm'ūm ade Deus ekawēn muwēnuwēn'ukayū'ūm'ūm oyaoka. Ixeyū'ūm'ūm etaypi mubapukap'a epeyamuy wita'a yadipat'a. ⁴⁸ Iḡo'a muymuy bima, "Ocedobuyū'ūm'ūm cūḡ ma oekuku," i eyju e'em napa ma. Ixeyū'ūm'ūm ekukuap taḡ eyju dak warēmtaḡ ma jekukum. ⁴⁹ Imēnpuye kuyje Deus o'e:

Wekawēn muwēnuwēn'ukayū juy oġu-
ju cekay ip wa'ōdujowatwat'ukayū
dak, i. Pūġpūġ ip yaoka ixeyū'in, i.
Ipiat supi'ajoat ip warara'acayū be
dak, i — Jesus o'e.

— Imēn Deus o'e kuyje, itaybit soan puye. ⁵⁰⁻⁵¹ Deus
ipiat supi'ajoat ġasūacat pe cekawēn muwēnuwēn-
'ukayū'ūm'ūm o'yaoka buye. Kuy jījā ixeyū'ūm'ūm
o'yaoka ip. Deus ipi mujurūġ puje, ixeyū'ūm'ūm
o'yaoka ip. Koap Abel'ūm o'yaoka ip. Kanomūm Za-
carias'ūm o'yaoka ip. Deus eju kawēnwēnap'a be
bima o'yaoka ip, iōhō mupikupikap xe bima. Deus
ipiat supi'ajoat ġasūacat pe ikērēat o'ġujurūġrūġ ip
puye — io'e.

⁵² — Karem ma ipiat epesupi'ajo — Jesus o'e
Moisés ekawēn imutaybitbin'ukayū be. — Eyju wara-
ra'acat muġuykukukum kawēn icēmān itaybicap pu-
xim ip. Eyetabut ġu kawēn icēmat kay. Eyju wara-
ra'acat mubu'u'un tak kawēn icēmat kayap puxim
— io'e.

⁵³ Ibocewi Jesus cēm puje itakoma jījā o'e ip Je-
sus kay Moisés ekawēn imutaybitbin'ukayū, Fari-
seuyū dak. Jesus o'jomuymuy ip. Jawa'ōmukorēmṛēm
o'e ip. Ixe ekawēn cocom cīcā ip o'e. Yawēġmukērē-
rēn ojuy ip. Cekawēn puyxijo ojuy ip. ⁵⁴ Ixe warēmtaġ
e'em pima, kuka o'jomuymuy ip. Warēmtaġ e'em pi-
ma, kuka o'yawēġmukērērēn ip.

12 Tak ġu ip o'ju Jesus kay- -ade jījā. Jewemu-
cakucakan ip o'e, ade buye.

Gebuje Jesus o'jekawēn jeweju etaybitbinayū
be- -doze beayū be.

— Aġ cuy epesop Fariseuyū be eymuġuykukuap
puxim — io'e. — Ixeyū emumutaybitbinap pāo'a
muyuhuhaptōm puxim. Ixeyū emumutaybitbinap
taġ ġu juy epeku — io'e. — Jewexe ip xipat. ² Ya-
juyjuyat jewedobuxik ġuyjom. Iba'arēmat ibapuk je'e
soat xe. ³ Kabiok taġ epeyekawēn iap ya'ijojo ip ka-

biam. Badiat'a be eybidadadam epeyekawën iap ġu-wën ip soat a'öpiju — io'e. — Imëneju warara'acat muġuykukukum ġu juy epesop xipacat oceju iam. Fari-seuyū ekukuap puxim ġu juy epeku — io'e.

⁴ — Obureyū — io'e. — Eyaoka ojuyayū buxim ġu juy eypararam epesop. Ixeyū be eyaoka but ma. Ġuyjom pit eybiōġbuk mu'ūm pa'ore cebe ip. ⁵ Deus buxim acā juy eypararam epesop. Ixe be bit wuyaoka pi ġu. Wuye'ū buje dak ipiat'ajojoap pe wuybiōġbuk xik put cebe. Imëneju juy ixē buxim eypararam epesop — io'e.

⁶ — 5 be pidiwe dei tei'īt ma- -pūġ centavo ma. Deus pit yaġuyba'ūm ġu wasūyū kay. Pūġ kay dak yaġuyba'ūm ġu. ⁷ Deus itaybit wuyadap pebūrūdap iam. Deus xe teiboġ ġu wasūdei. Imēnpit aġ cekay. Imēnpuxim wuykay dak aġ soat em. Imëneju eyaġuybabi'ūm'ūm ġu juy epesop — io'e.

⁸ — Icēmān ōn e'em eywebe. Soat waġo ōn. Eyju “Jesus ebekitkiyū oceju,” i'e'em pima, ōn tak “Teyūku webekitkit,” i oce Deus ekawën tojtjot'ukayū be. ⁹ Eyju e'em warara'acayū be “Jesus bure ġu oceju,” i bima, ōn tak “Iteyū bure ġu ōn,” i oce Deus ekawën tojtjot'ukayū be. ¹⁰ Soat waġo ōn. Omuy muy bima, eyju ikērēat kuġ Deus xe. Deus iboap ju'uk eywebewi ikērēat. Ibiōġbuk xipacat muy muy bima bit, Deus iboap ju'uk ġu eywebewi ikērēat — io'e.

¹¹ — Warara'acayū jeydujowat Deus eju kawën-wēnap'a be ipi kukukayū dopabe dak, iecuġap dopabe dak. Eydujowat puje, eyaġuybabi'ūm ġu juy epesop eywedayo am. “Pēn paxi oce,” i'ūmġu juy epe'e — io'e. ¹² — Ixeyū dopabe eydujowat puje Ibiōġbuk xipacat jeymukūyjo jekawën ām — io'e.

¹³ Ġebuġe aġokatkat o'jekawën Jesus eju adeayū parakpeat.

— Tapu — io'e. — “Ebay'üm pubut cuy eġu'ē'ē ekitpit pe,” i juy ece owaġo be — io'e Jesus pe.

¹⁴ — Ap! — io'e. — Deus cuk omudot eykay eyemāmāap coco am ġu, ce'ūat pubut mu'ē'ē ām ġu dak — io'e.

¹⁵ — Eyetabikukum ġu juy epesop! Soat em Deus xe wuyetait acesop ade wuybubut pupum puye ġu-cekay wuyetabut puye acā — io'e.

¹⁶ Ġebuje Jesus wuymutaybitbinap ekawēn o'ġu-wēn aweromayū be.

— Ibutut adeat kat katō be osodop. O'jewa'ada jījā. Ya'ade o'e — io'e. ¹⁷ — Imēnpuye ibubut adeat o'jekawēn jewebe ma.

— “Okat pewiat mūn'a yaboġ ġu,” io'e. “Apēn-tak oce? Je'e ġu, ya'ade jījā buye,” io'e jewebe ma — io'e Jesus. ¹⁸ — “Imēn ma oce. Okat pewiat mūn'a oyamuy'at- yaboġbuġat'a. Yaboġat'a oyamuyat,” io'e jewebe ma. “Yamuyisuat'a be okat pewiat oġuxipan, soat obubut tak,” io'e jewebe ma. ¹⁹ “ ‘Ocoġkoġ oġuy. ade obubut puye,’ i juy oce owebe ma,” io'e jewebe ma. “ ‘Soat kuġ oġuy,’ i juy oce owebe ma,” io'e jewebe ma. “ ‘Kapikpiġ ġu oġuy jebodoydoy acā, jekōnkōn acā dak, tikōnkōn acā dak,’ i juy oce owebe ma,” io'e jewebe ma ibubut adeat — Jesus o'e.

²⁰ — Imēnpit Deus o'jekawēn ixe ibubut adeat pe.

— “Aġuyba'arēm!” io'e. “Ade jījā juk adi eġuxipan ewebeam ma,” io'e Deus. “Ijop kabiok ma ece'ū,” io'e. “Abu je'jat ebubut e'ū buje?” io'e Deus — io'e Jesus.

²¹ — Pūġpūġayū soat em ġebum apēn xe'e wara'at'in ojat obubun iap kay. Deus kay ġebum ġu ma'ġu ip. Ixe aġokatkat puxim ip- yadaodaat puxim — Jesus o'e.

²² — Imēnpuye eyaġuy'üm ġu juy epesop eybubut kay — io'e jewēju etaybitbinayū be. — “Ajo paxi acejo'o?” i'ümġu juy epe'e — io'e. — “Ajo paxi aceġuōm wuydotim?” i'ümġu dak cuy epe'e. ²³ Xipat

eyxat kuḡ pima, eydoti kuḡ pima dak. Ibodi ma bit xipat soat em Deus xe eydop am — io'e.

²⁴ — Ġebum cuy epesop wasū iokat kay — io'e. — Taidadam ḡu ip. Jeku beat pupum ḡu dak ip. Jeku bewiat mūn'a'e ḡu ip. Imēnpit Deus ixat ūm-ūm cebe ip- -wasūyū be. Deus xe teiboḡ ḡu wasū. Imēnpit aḡ cekay ip. Wuykay dak aḡ soat em ma. ²⁵ Ade koato mabuk wetabēḡ oḡuy iap kay ḡebum cīcā bima, eyetabēḡ xe'e? Ka'ūma. Ġaxīn ma aco'i epe'ū. ²⁶ Iboap iba'ore eywebe bima, te'e ma eyaḡuy'ūm ijodiap kay- -eydoti kay, eyxat kay dak — io'e.

²⁷ — Ġebum cuy epesop koḡūnpi daḡatit kay- -apēn dit aypapan iap kay. Kapikiḡ ḡu tūmūntitit. Jedoti muḡēḡēm ḡu dak ip. Icēmān ōn e'em eywebe. Salomāo ibubut adeat osunuy. Idip cīcāat kuḡ osunuy jesay kuḡ. Salomāo dipap podi ma bit titip tip taḡatip. ²⁸ Ġasū ma tūmūntitit titetabēḡ e'em. Kuya-je bit tite'ū e'em. Deus a'ōbi titip. Ja'ōbi dak eyemukaypinut je'ḡūm eywebe eyetabutsū ma'ḡu cekay — io'e Jesus.

²⁹ — “Ajo paxi acejo'o,” i'ūmḡu juy epe'e, “Ajo paxi aceḡuōm,” i dak — io'e. ³⁰ — Deus kay itabut'ūmayū yaḡuy'ūm iboap kay. Wuyebayat pit itaybit wuyju ikuḡ'ūm pima iam- -kabi beat. ³¹ Ġebum cuy epesop Deus acā wuykukukat iap kay. Iboap kay ḡebum pima, Deus soat je'ḡūm eywebe. Eyxan je'ḡūm, eydotim tak — io'e.

³² — Eypararam ḡu juy epesop — io'e. — Wuyebay Deus eykukukat ovelha kukuk'ukat puxim. Ixe ibikuy eywebe jekukan — Jesus o'e.

³³ — Eybubut'in cuy epeteidaat eyedinheiro bu am — io'e. — Ixe dinheiro juy epeḡūm tadaybotbo- cayū be. Iūmūm pima eybubut ade epe'e kabi be. Eybubut iwekwek ḡu je'e kabi beat. I'ūm ḡu dak. Ka'ūmḡu ibukurukat kabi be eybubut tujupa'um am. Kopi'i eybubut jo'o ḡu kabi be. ³⁴ Eybubut ijodi bima, soat em ḡebum epesop eybubut kay. Kabi be bima bit ḡebum epesop kabi beat kay — io'e.

³⁵ · ³⁶ — Kariwa ajēmap wiwimap puxim cuy epe-
sop wajēmap wiwim — io'e. — Ixe kariwa juk o'ju
jewebumūnap epeta kay. Cepicat wiwim ibuywat-
wat'ukayū. Lamparina kuḡ ip- -isopsepat kuḡ. Jekari-
wa ajēmap wiwim ip xīntabi nomudip'uk am cebeam
yajēm puje, cetaḡtaḡ puje. ³⁷ Aḡ ip tobuxik puje icok-
cok je'e ip ixeyū ibuywatwat'ukayū jekariwa ajēm
puje. Icēmān ōn e'em eywebe. Ixe kariwa jeōm je-
duk'a be. Ixat je'ḡūm cebe ip. "Ga'a acekōn," i je'e
jebuywatwat'ukayū be. ³⁸ Iximadak pe, iximadak
pepu i aco'i jajēm. Yajēmap wiwim ip tobuxik puje,
icokcok je'e ip ixeyū ibuywatwat'ukayū. ³⁹ · ⁴⁰ Imēn-
puxim cuy aḡ epesop wepicap wiwim- -soat waḡo epi-
cap wiwim. Ocepit eyju wepicap wiwim'ūm pima,
aḡ'ūm pima dak. Ibukurukat ajēmap ehoram itaybit
pima, jeduk'a kajuk o'yaiwat ḡu uk'a iwat. O'yaiwat
ḡu puyxibut'ūm iōmap puxim. Imēnpuye juy aḡ epe-
sop wepicap kay — io'e Jesus.

⁴¹ Gebuje Pedro o'jekawēn Jesus eju.

— Kariwa — io'e. — Ēn ijop ekawēn muwēnu-
wēn ocewebe ya'ījo am acā du? Soat pe ya'ījo am ḡu
xe'e? — io'e.

⁴² — Ōn ijop ekawēn muwēnuwēn xipan jekariwa
bubut kukayū be ya'ījo am- -itaybicayū be ya'ījo am
— io'e. — "Obubut kukukan cuy ece," i'e'em kari-
wa cebe ip. "A'ō kay jeedop ip kūyjobin warara'a-
cayū obuywatwat'ukayū," i'e'em kariwa. "Ixeyū xan
cuy eḡūmḡūm," i'e'em cebe, cedaḡ kapikpiḡ puye —
io'e. ⁴³ — Jekariwa a'ō kay kūyjobin pima, ixe ibuy-
watwat'ukat icokcok je'e jekariwa ajēm puje. ⁴⁴ I-
cēmān ōn e'em eywebe — io'e. — "Obubut kukukan
cuy ece," i je'e kariwa ixe jebuywatwat'ukat pe. ⁴⁵ —
"O'jekuyan ma wekariwa," i'e buje bit, ḡebuje'isum
ma jajēm cekariwa. Kapikpiḡ'ūm pima jajēm. Ixe
ibuywatwat'ukat warara'acayū kaykay bima, jajēm.
Jekpiwan ma jekōnkōn cīcā bima jajēm. Ika'o bima,
jajēm. ⁴⁶ Jebuywatwat'ukat yajēmap wiwim'ūm pima
jajēm, yajēmam itaybit'ūm pima dak. Imēnpuye ce-
kariwa ipiat supī'a'ioat jebuywatwat'ukat pe. Jebuy-

watwat'ukat ġuju kūyjobit'ūmayū dopap pe jenuy am. ⁴⁷ Apēn jekariwa ibikuy osunuy jekapikam iam itaybicat yoboġ ipiat supi'ajojo jewemuxipan'ūm pima, kūyjobit'ūm pima dak. Yoboġ ipiat supi'ajojo itaybit puye. ⁴⁸ Apēn jekariwa ibikuy osunuy iam itaybit'ūmat pit yopīt ma ipiat supi'ajojo kūyjobit'ūm pima. Yopīt ma ipiat supi'ajojo itaybit'ūm puye. Ade ikuġat cuy ade je'ġūm warara'acat pe. Ade o'jatiat xewi juy ade acejoojuy — io'e.

⁴⁹ — Daxa buxim okop ijodiacat pe wara'at taġtaġtaġ ma jewaġuy ām — Jesus o'e. — Iboap wekapikap. Wekapik epere ojuy ōn. ⁵⁰ “Warara'acat ipiat supi'ajoat ewebe,” i juk o'e Deus owebe. “Aokam ip,” i juk o'e. Deus bikuyap taġ weku pin cīcā soat em. Soat em ġebum ōn iboap kay. ⁵¹ Tūybe teku osodot kaba'ūm wuydop am iān eyju e'em. Imēġām ġu ojot. Ojot ijodiacat pe wara'at taġtaġtaġ ma jeku am. ⁵² Ibadipyū wara'at taġtaġtaġ ma jeku ōn ojot puye. Xepxepayū pūġ taġ ma jeku ip. Ixeyū badipyū bit wara'at taġ ma jeku ip ebapūġayū. ⁵³ Cebay ma okay je'e. Ixe ipot pit okay ġu je'e. Ixi ma okay je'e. Ixe'it pit okay ġu je'e. Yuktayxi ma okay je'e. Ixe ayacat uktayxi bit okay ġu je'e. Imēneju wara'at taġtaġtaġ ma jeku ip — Jesus o'e.

⁵⁴ Ġebuje Jesus wuymutaybitbinap ekawēn o'ġuwēn adeayū be.

— Kaxi'acap pewi kabikerereat ebapuk puje “Muba'at omuyku,” i eyju e'em. Icēmān ajēmjēm. ⁵⁵ Kaxietajoreġat pido ajēm puje “Kaxiepi jījā ġasū,” i eyju e'em. Icēmān kaxiepi je'e. ⁵⁶ Eyetaybit muba'at ajēm iam kabi kay aġ puye. Eyetaybit kaxiepi je'e iam kabido jojom puye. Imēnpit eyetaybit ġu ajo ġuyjom je'bapuk eywebe iam wekawēn cocom ma'ġu eyju. Wekawēn pa'arēm eyxe — io'e.

⁵⁷ — Eyju jewawēwēm ġu dak cedaġ ma eyeku

am. ⁵⁸ Eykay itakomaat e'em eywebe "Eyweroap cuy epeteida owebe," i. "Teida'üm pima, jeydujowan òn ibimãmāayū ekawēn coco'ukat kay," i. Imēn i'e buje, ixe juy epeğudin e dağ pima. E dağ pima itakomaat mudin'üm pima. ixe jeydujowat ibimãmāayū ekawēn coco'ukat kay. Ibimãmāayū ekawēn coco'ukat tak jeydujowat sorarayū kay. Sorarayū jeymuòm daomünmünap'a be. ⁵⁹ Soat ġu eyweroap teida'üm pima, jeymujēm ġu ip daomünmünap'a bewi — Jesus o'e.

13 Gebuje pūğpūğayū o'jekawēn Jesus eju. — Iecuğap Pilatos Galiléia eipi watwat'in o'yaokaat — io'e ip. — O'yaokaat ip Deus eju kawēnwēnap'a be bima, wūnca ūmūm pima paī be imupik an Deus etabixe — io'e ip.

² — "O'yaokaat ixeyū ağokatkayū warara'acat podi ma xipat'üm puye-Galiléia eipi watwat podi ma," i du eyju e'em? ³ Imēn ġu juy epe'e'e! Icēmān òn e'em eywebe. Ikērēat epere'üm pima, Deus kay eyetabut'üm pima dak, ipiat'ajojoap kay epeju eyju dak — io'e. ⁴ — Waram pima oap ip Siloé ka watwat 18 beayū. Oap ip uk'a o'je'aedu buye-umat'a. O'ğucak ip. "Oap ip soat podi ma xipat'üm puye-Jerusalém ka watwat podi ma," i du eyju e'em? Imēn ġu juy epe'e'e! ⁵ Ikērēat epere'üm pima, Deus kay eyetabut'üm pima dak, ixeyū buxim epeju ipiat'ajojoap kay eyju dak — io'e Jesus.

⁶ Gebuje Jesus wuymutaybitbinap ekawēn o'ğuwēn adeayū be-figueira'ip ekawēn.

— Ağokatkat figueira'ip o'yoptaida jekat pe, uvadip pe — io'e Jesus. — Oajēm figueira'ip kay figo'a kudadam. ⁷ O'yadobuxik ġu. Imēnpuye o'jekawēn uvadip wiwi'ukat pe — io'e.

— "Tapu, ebapūğ koato juk adi oajēm ija'ip kay figueira'ip kay," io'e cebe — io'e. — "Yaopap ekaxi bima juk adi oajēm figo'a kudadam," io'e — io'e. —

“Ya'ümġu. Oyadobuxik ġu. Te'e ma ijop'ip omuy. Eyopxik cuy,” io'e uvadip wiwi'ukat pe — io'e.

⁸ — Ġebuje tipwiwi'ukat o'jekawēn tip iwat pe — io'e Jesus.

— “Kariwa, jewebuyxijo buk,” io'e. “Ijop koato ġu eyopxikat,” io'e. “Oyokobidoġ cuy yokobi koreren. Tūmüntūntūn otūnmōġ yokobi koreren,” io'e. ⁹ “Wara'at koato bima ya'a'e bima, xipat je'e. Ya'a'e'üm pima bit oyopxik,” io'e tip iwat pe — Jesus o'e.

¹⁰⁻¹² Waram pima Jesus Deus eju kawēnwēnap'a beayū o'ġutaybin. Sábado bima ip o'ġutaybin jebodoydoyap kabia bima. Jesus ayacat o'jojajo iġo'a be. Ixe ayacat ikokpiwakun osunuy ade koato- -18 koato bun. Ikokpiwakun osunuy ibiōġbuk kērēat a'ōbi. Ce'aġobucēġ pa'ore osunuy ibiōġbuk kērēat a'ōbi. Jesus ixē o'ġudot jekay.

— Tū'ū — io'e. — Ōn jemu'ada — io'e.

¹³ O'jewebumōġ ixē jeje. O'ġu'ada ġebuje bit. O'sukokpimucūġ. O'sukokpimudim. Ikokpicūġ o'e.

— Bay, xipat cīcā ēn owebeam — io'e Deus pe. ¹⁴ Deus eju kawēnwēnap'a kukuk'ukat pit itakoma o'e Jesus kay, jebodoydoyap kabia bima ayacat o'ġu'ada buye. Tūybe imu'ada pi jebodoydoyap kabia be iān o'e. Imu'adaap kapikap co'i osunuy cexe.

— Seis kabia bima cūġ ma wuywebe wuyekapik am — yakukuk'ukat o'e iġo'a beayū be. — Jebodoydoyap kabia be bit epesot ġu jemu'adaan- -wara'at kabia be acā — io'e cebe ip.

¹⁵ Ġebuje Jesus o'jekawēn iġo'a beayā be.

— Tūybe imu'ada pi wuywebe iān eyju e'em — io'e. — Jebodoydoyap kabia bima epeġuwekap ġu du eyōhō- -biopak? — io'e. — Jumento dak epeġuwekap ġu du tujujēm ām korara bewi idibi kōn ām? Soat eyju eyōhō muwekapkam soat kabia bima- -jebodoydoyap kabia bima dak. ¹⁶ Imēnpuye cedaġ ma owebe ixē ayacat mu'ada am ġasū. Abraão naxeġebit puxim itabut ixē. 18 koato bun Satanás ixē ayacat kokpi muwakunkun'uk osunuy- -ibiōġbuk kērēayū kukuk'ukat — io'e Jesus.

¹⁷ Cekay itakomaayū ma isūsūn o'e ip Jesus edeap co buje. Warara'acayū bit icokcok o'e ip Jesus kay.

— Ka'ūma buk ocejojojoiap mubapukpuḡ Jesus wuyetabutpe — io'e ip. — Idip cīcāat mubapukpuḡ wuyetabutpe — io'e ip.

¹⁸ Ġebuḡe Jesus waram wuymutaybitbinap ekawēn o'ḡuwēn.

— Apēn je'e Deus soat kukukan pima? — io'e. — Apu ekawēn tak oḡuwēn iboam eymukūyjo am? — io'e.

¹⁹ — Aḡokatkat mostardada o'taida jekat pe. Mostardada ta'it ma. O'yaypan cīcā bit. Mostarda'im o'e. Yoboḡ o'e. Wasūyū jedopi o'jomōḡmōḡ takū daḡ. Imēnpuxim koap Deus ade'ūmayū kukukan je'e. Ġuyjom pit soat kukukan je'e — Jesus o'e.

²⁰ — Apu ekawēn tak oḡuwēn waram eymukūyjo am Deus soat kukukan je'e iam? — io'e. ²¹ — Trigonōm kuḡ osunuy ayacat-ebapūḡ copo. Ixe ayacat pāo'a muyuhuhuaḡtōm o'tōmpu. O'tōmōḡ trigonōm pe. O'tōmupinā. Soat taḡ o'jenōmepōḡpōḡ trigonōm taḡ. Imēnpuxim soat ka watwat Deus soat kukukan je'e iap awēḡ coco — io'e.

²² Ġebuḡe Jesus o'ju Jerusālēm ka kay. Cucum pima soat ka daḡ oekuku-ika'īcatka daḡ, ikaboḡatka daḡ tak. Soat kaka daḡ imutaybitbin oekuku.

²³ Ġebuḡe aḡokatkat o'jekawēn Jesus pe.

— Kariwa, taxijojoi'ibiyū xepxep ma du je'e? — io'e.

²⁴ — Tapu, okay eyetabucap xīntabi be wuyōmap puxim. Eyetabun cuy epesop okay! — io'e. — Kabi kayat exīntabi itokboḡ ḡu-itok'it ma — io'e. — Soan cuy epe'e kabi be eyōm ām! Icēmān ōn e'em eywebe. Adeayū ōm ojuy je'e. Imēnpit iōm pa'ore je'e ip. ²⁵ Uk'a iwat je'kop xīntabi nomudim. Tomudip puje, eyōm pa'ore epesop. Kacūḡkadi epesop. Xīntabi be taḡtaḡtaḡ'i epesop. "Kariwa, ocewebe xīntabi etomudip'uk oceōm ām," i epe'e. Imēnpit ka-

riwa je'e eywebe "Wetaybit ġu pomawiacat eyju iam," i — Jesus o'e. ²⁶ — "Jekōnkōn tak ocesop eweju," i epe'e cebe. "Ocemutaybitbin cuk ejeku oceka daġ," i epe'e. ²⁷ Imēnpit kariwa je'e eywebe: "Icēmān ōn e'em eywebe. Wetaybit ġu dak pomawiacat eyju iam," i. "Eyōm pa'ore ijoce eyju ikērēat kuġ oxeye. Epejēm," i je'e — io'e Jesus. ²⁸ — Ġebuġe epe-tōtōn. Eyġuycūġcūġ cīcā ma epesop. Deus soat kukukan pima, Abraão cexe jeenuy. Isaque dak, Jacó dak. Deus ekawēn muwēnuwēn'ukayū dak Deus xeedop ip. Wūy wi ixeyū epejojojo. "Wūy ma juy epesop owi," i je'e Deus eywebe. ²⁹ Adeayū jajēm soat eipi daġwi- kaxijēmap kadiwi, kaxi'acap kadiwi dak, kaxijēmap coreġwi dak, kaxie joreġwi dak. Soat ip jabik jekōn ām Deus ka be Deus soat kukukan pima — Jesus o'e.

³⁰ — Koapayū kanomūmayūm je'e. Imēnpuxim kanomūmayū koapayūm je'e — Jesus o'e.

³¹ Ġebuġe isum ma Fariseuyū oajēm Jesus kay.

— Aoka ojuy Herodes- oceipi kukat — io'e ip Jesus pe. — Ecenapōn cuy ijocewi ixeye be aokaap puxim — io'e ip.

— Ocenapōn ġu — io'e. — Deus ibikuy bima acā oje'ū. Herodes eymuġuykukuku'ukat kak puxim — Jesus o'e. — Epeju juy cekay. Wa'ō juy epeya'ō-muwēn cebe. ³² "Ġasū, kuyaje dak ibiōġbuk kērēat oġujēmjēm ijodiat pewi," i juy epe'e cebe — Jesus o'e. — "Iwātaxipipiyū oġu'ada'ada," i juy epe'e. "Kuyajebusu wekapikap oġu'ūm," i. ³³ "Oje'ū. Imēnpit wekupinap taġ ojeku ġasū, kuyaje dak, kuyajebusu dak." i juy epe'e cebe — Jesus o'e. — "Eka be ġu oje'ū, Jerusalēm ka be acā," i juy epe'e Herodes pe — io'e Jesus.

³⁴ — Jerusalēm ka watwat. Deus ekawēn muwēnuwēn'ukayū aokakam eyju — io'e Jesus. — Yabuġbuġ tak eyju ip wita'am. Sapokay'it'it jexi kay. Jedaudaum jexi eġebadap tiotpe kajuk pibun. Eyju bit okay ġu. Eybu'u jījā eyetabut am okay, eykukpin cīcā a'ġu oxeye — Jesus o'e.

³⁵ — Eya'ōpicūġcūġ cuy epesop wa'ō kay — io'e.

— Jeywat òn aḡokatkat jeduk'a iwacap puxim — Jesus o'e. — Icēmān òn e'em eywebe. Waram ojo ḡu eyju waram wajēm'ūm pima. Wajēm puje, "Deus xipan wuykukukat a'òbi yajēm'ibit jukuk," i epe'e — Jesus o'e.

14 Jebodoydoyap kabia bima Jesus o'ju aḡokatkat tuk'a kay-*-Fariseu duk'a kay-*ya'òbuyxiat tuk'a kay. Sábado bima o'ju. Jekòn ām ceweju o'ju.

²Iyehuhuat Jesus xe osunuy. Uk'a beayū o'jeak Jesus kay. Tūybe imu'ada pi osunuy jebodoydoyap kabia be iān o'e ip. Imu'ada buje, kuka o'jomuymuy ip.

³Gebuje Jesus o'jekawēn Fariseuyū eju, Moisés ekawēn imutaybitbin'ukayū eju dak.

— Wuyawēwēap ekawēn taḡ tu iwātaxipiat mu'ada am jebodoydoyap kabia bima? Cedaḡ ḡu xe'e? — Jesus o'e.

⁴Ya'òbu'u osodop ip jedem. Mūḡ ma ip osodop.

Gebuje Jesus iyehuhuat o'subaixik. O'ḡu'ada. Iyehuhu ḡu o'e. Xipat o'e. O'ḡuypit tuk'a be.

⁵Gebuje waram o'jekawēn Fariseuyū be, Moisés ekawēn imutaybitbin'ukayū be dak.

— Soat eyju kapikpiḡ jebodoydoyap kabia be — io'e. — Ipikūykūy be eyipot at puje, epeju'uk ḡu du kuka jebodoydoyap kabia bima? Eyeòhò biopak at puje dak, epeju'uk ḡu xe'e kuka? Dao ma kuka epeju'uk! Imēnpuye te'e ma eyetakoma okay — io'e.

⁶Ya'òbu ba'ore o'e ip cebe.

⁷Gebuje Jesus wuymutaybitbinap ekawēn o'ḡuwēn jekòn ām takoy'ibiyū be. Ixeyū takoy'ibiyū kariwa boḡat nuyap pe abik ojuy ip o'e. Imēnpuye ijop ekawēn o'ḡuwēn cebe ip.

⁸— Jewebumūnap epeta be eydakoy buje, kariwa yoboḡat tūyap pe ḡu juy epabik-*-ka'ūmaap* tuyap pe acā — io'e. — Kariwa yoboḡat aco'i o'takoy ip-eybodiat. ⁹Kariwa yoboḡat tuyap pe eyabik puje, eydakoyat jajēm eykay. "Wede'i ece. Ēn kariwa ḡu," i

je'e eywebe — io'e. — "Igo bit kariwa. Igo abik pin enuyap pe," i je'e eywebe — io'e. — Imên i'e buje, eysūsūn epe'e. Jeymuabik ka'ūmaap tuyap pe — io'e. ¹⁰ — Eydakoy buje juy epeju. Ka'ūmaap tuyap pe juy epabik. Eydakoyat pe iboap co buje, jajēm eykay. "Obure, kariwa yoboğat tuyap pe juy abik, ên kariwa buye," i je'e eywebe — io'e. — Imên i'e buje, eyweju jekōnkōnayū xe eya'ōbuyxiayūm epe'e — io'e. ¹¹ — Eya'ōbuyxian pin pima, Deus xe eya'ōbuyxi ġu epesop. Eya'ōbuyxian pin'ūm pima bit, cexe eya'ōbuyxiayūm epesop — io'e Jesus.

¹² Ġebu je Jesus o'jekawēn jedakoyat pe.

— Peta muğēğēm pima, ibubut adeayū acā ġu juy etomuwā. Ibubut adeayū acā ġu juy etomuwā, ebureyū acā ġu dak, ewağoyū acā ġu dak, ebadipyū acā ġu dak, eduk'a xecat kariwaat acā ġu dak. Ixeyū waram cuy jenomuwā apēn cuk ixeyū enomuwāap puxim. Apēn cuk eğūm iap puxim ejat. ¹³ Peta muğēğēm pima tadaybocayū dak etomuwā, taokē-rēayū dak, taojereayū dak, ita'ūmayū dak. ¹⁴ Ixeyū be waram iūm pa'ore ewebe apēn cuk cebe ip eğūm iap puxim. Deus pit xipacat je'ğūm ewebe. Waram ġuto cūğ ma jekuku'ukayū'ūm'ūm etait puje, Deus xipacat je'ğūm ewebe — io'e.

¹⁵ Ceweju jekōnkōnat o'jekawēn Jesus eju ibo ekawēn co buje.

— Deus soat kukukan pima icokcok cīcā je'e ceweju cekōn'ibit — io'e.

¹⁶ — Hm hm — Jesus o'e. — Abuyū jekōn Deus eju iap oğuwēn eywebe — io'e. — Ağokatkat petaboğ o'ğūğē. Jebureyū o'tomuwā-ibubut adeayū — io'e.

¹⁷ — Soat ixipan pima jebuywatwat'ukat o'ğuju jemunomuwayū dakoy am. O'ju.

— "Kuy soat ixipan," io'e. "Epesop cuy wekariwa epeta be," ibuywatwat'ukat o'e tomuwā'ibiyū be — io'e Jesus.

¹⁸ — Imēnpit tomuwā'ibiyū "Ocedaobu'u," io'e ibuywatwat'ukat pe. O'taobu'un ip peta kay.

— "Ipi ojat okat mōğ ām," io'e ibuywatwat'ukat pe — io'e Jesus. — "Cum puk ōn ipi jom," io'e. "I-

mēnpuye odaobu'u ekariwa epeta be," io'e. "Imēn cuy ece ekariwa be," io'e — io'e Jesus. ¹⁹ — "10 be ojat biopak," wara'acat o'e. "Cum puk ōn ibuyxijom ip," io'e. "Imēnpuye odaobu'u ekariwa epeta be. Imēn cuy ece ekariwa be," io'e — io'e Jesus.

²⁰ — "Kapusu ma juk ocewebumūn ayacat eju," wara'acat o'e. "Oju ba'ore ekariwa epeta be. Imēn cuy ece cebe," io'e — io'e Jesus.

²¹ — Imēneju ibuywatwat'ukat o'jepit jekariwa kay- -peta iwat kay. Taobu'u'uayū a'ō o'ya'ōmuwēn jekariwa be — Jesus o'e. — Iboap co buje cekariwa itakoma jījā o'e. — "Tadaybocayū juy etojot wepeta kay taobu'u'uayū dieḡ," io'e jebuywatwat'ukat pe. "Cexīḡxīḡ pa'oreayū juy etojot, taokērēayū dak, ita'ūmayū dak," io'e. "Dao ma eju ikaboḡatka kay," io'e. "Uk'a ukpibubu daḡ cuy eju, e daḡ tak," io'e. "Soat ip etojot wepeta kay," io'e cebe — io'e Jesus.

²² — O'ju ikaboḡatka kay. Tadaybocayū o'tojot jekariwa duk'a be.

— "Kariwa," io'e. "Otojojot ip a'ōbi," io'e. "Imēnpit eduk'a be wuydop pun mabuk," io'e — io'e Jesus.

²³ — "Waram cuy eju tadaybocayū kay," io'e cebe. "E daḡ cuy eju, koḡūnpi daḡ tak. Eḡuōm ip oduk'a be yamuporan am. 'Epesot cuy wekariwa epeta be,' i juy ece cebe ip," io'e — Jesus o'e. ²⁴ — "Ōn soat kukukan pima koap tomuwā'ibiyū jekōn ḡu oweju- -pūḡ tak ka'ūma," io'e peta iwat — io'e Jesus.

Imēn Jesus wuymutaybitbinap ekawēn o'ḡuwēn jewaju jekōnkōnat pe.

²⁵ Waram pima Jesus o'jekawēn adeayū be. Ceweju jekuku'uk osodop ip. O'jekawēn ceweju ip.

²⁶ — Oweju eyeku pin pima, okay jījā ma juy epesop — io'e. — Eyebay kayap podi ma okay'ūm pima, webekitkin ḡu epe'e, eyxi kayap podi ma dak, eytayxi kayap podi ma dak, eybekitkit kayap podi ma dak, eywaḡo kayap podi ma dak, eykibit kayap podi ma dak, eykipit kayap podi ma dak. Jewekayap podi ma okay'ūm pima dak, webekitkin ḡu epe'e —

io'e. ²⁷ — Owebeam je'ū ām eybu'u bima, webekitkin ġu epe'e, oweju jekum eybu'u bima dak — io'e Jesus.

²⁸ — Yaberenat'a muy pin pima, koam kuka yamuyaptei epeġuweġūn — io'e. — “Je'e paxi wedinheiro?” i juy epe'e eyewewebe ma. ²⁹ Imuweġūn'ūm pima yamuy epere ba'ore kuka o'e eywebe. Imuweġūn'ūm pima eyedinheiro kuka oi'ūm ipi kayat muy buje. Ipi kayat'a jojoayū kuka eywaywayway — io'e. ³⁰ — “Ak'i juy epe'e iġo'a kay,” i kuka o'e ip. “Yaberenat'a muy ojuy. Imēnpit o'yamuy ġu cedinheiro oi'ūm puye,” i kuka o'e ip eywaywayway — io'e Jesus.

— Uk'a muy pin pima wuyju e'em “Je'e paxi wedinheiro?” i. Imēnpuxim eyju dak webekitkit pin pima. “Ipiat'ajojom pima paxi kuka ocebu'un?” i juy epe'e eyewewebe ma — io'e Jesus.

³¹ — Wara'at ka kukat eju jenopaġōġō ojuy bima, aġoka kukat koam kuka o'jewawē jebureyū eju-itaybit cīcāayū eju. “Wuyesorarayū adesū- -10,000 beayū,” i kuka o'e cebe ip. “Wuykay itakomaayū esorarayū bit ade jījā- -20,000 beayū,” i kuka o'e cebe ip. “O'e paxi wuywebe ixeyū mu'ūm ām?” i kuka o'e — io'e. ³² — Itaybit cīcāayū be: “Iba'ore wuywebe” i'e buje, ipi kukukat iparara kuka o'e. Oibu'un kuka jenopaġōġōm. Jexewi wūy bima, jebekitkit kuka o'ġuju cekay ip jekay itakomaayū mudin am — io'e. — “Ga'a juy acenopaġōġōm ġu,” i kuka o'e cebe — io'e Jesus.

— “O'e paxi wesorarayū be itakomaayū mu'ūm ām?” i'e'em ipi kukukayū. ³³ Imēnpuxim eyju dak webekitkit pin pima, “Guyjom paxi ocebu'un?” i juy epe'e eyewewebe ma. Soat eybubut iwan eybu'u bima, webekitkin ġu epesop — Jesus o'e.

³⁴ — Kawta xipat. Imēnpit takō'ōm puje, te'e ma kuka atakuk. ³⁵ Tamuyun pa'ore wuywebe. Taxik am acā xipat. Imēnpuxim okay eybu'u bima, te'e ma kuka epe'e: “Cristo ebekit ōn,” i. Wekawēn a'ījo pin pima juy xipan epeya'ījo.

15 Gebuje iecuḡap peam dinheiro bubu'ukayū o'ju Jesus kay, warara'acayū ikērēat mujurūḡrūḡ'ukayū dak. O'ju ip Jesus ekawēn com.

²Gebuje Fariseuyū Jesus o'jomuymuy Moisés ekawēn imutaybitbin'ukayū dak.

— Ite aḡokatkat ikērēat mujurūḡrūḡ'ukat purem. Jekōnkōn ceweju ip — io'e ip.

³Iboap co buje, Jesus wuymutaybitbinap ekawēn o'ḡuwēn cebe ip jemuymuyayū be.

⁴ — Eyju 100 be eyōhō kuḡ aco'i- -ovelha kuḡ — io'e. — Pūḡ oitabidao bima, wara'acat eyōhō kuka epesuiwat koḡūnpi daḡ itabidaoat kuda am. Tobuxik'ūm pima kuka epeju itabidaoat kuda am. Epejo-kuda kuka tobuxik puje. ⁵Tobuxik puje, eycokcok kuka epe'e. Eya'ōpi'a jeje kuka epejomōḡ. Eyduk'a be kuka epetujuxe. ⁶Eyduk'a be eyōm puje, eybureyū kuka epetomuwā, eyduk'a xeyū dak. “Oceōhō oacetobuxik! Eycokcoḡ cuy oceweju,” i kuka epe'e cebe ip — io'e. — “Ovelha oacetobuxik- -itabidao oekuiat,” i kuka epe'e. ⁷Icēmān ōn e'em eywebe. Itabidao oekuiat puxim ikērēat mujurūḡrūḡap o'jepere i-at- -ovelha buxim — io'e. — Imēnpuye Deus icokcok e'em ade cūḡayū kay. Imēnpit jekay ikērēat mujurūḡrūḡ'ukat etabun puje, ibodi ma icokcok e'em Deus, ikērēat mujurūḡrūḡap epere buje dak — io'e Jesus. Imēn Jesus wuymutaybitbinap ekawēn o'ḡuwēn cebe ip.

⁸Gebuje Jesus wara'at ekawēn o'ḡuwēn cebe ip.

— Ayacat 10 be dinheiro kuḡ- -isurūḡat kuḡ- -teiboḡat kuḡ- -prata muḡēḡē kuḡ. Pūḡ ma o'jepa'ūm. Imēnpuye ixe ayacat lamparina o'ḡusop jedinheiro kuda am.

— Jedinheiro o'jokudada. Jeduka o'yabi'ōḡ jedinheiro kudadam. Tobuxik'ūm pima ikudadam mabuk — io'e.

⁹ — Tobuxik puje, jebureyū o'tomuwā ayacat, jeduk'a xeyū dak. “Wuycokcoḡ cuy ajop wedinheiro otobuxik puye- -isurūḡat- -cepa'ūm'ibit,” i'e'em ixe ayacat cebe ip.

¹⁰ — Icēmān ōn e'em eywebe — io'e. — Deus

ekawēn tojtjot'ukayū icokcok e'em pūg ma itabun Deus kay buje-ikērēat mujurūgrūgāp epere buje dak. Ixe ayacat cokcokap puxim icokcok e'em — io'e Jesus.

Imēn Jesus wuymutaybitbinap ekawēn o'gūwēn adeayū be.

¹¹ Gebuje Jesus wara'at ekawēn o'gūwēn cebe ip.

¹² — Aḡokatkat xepxep ipotpot kuḡ osodop. Ikitpit o'jekawēn jebay be. "Bay," io'e. "Ebubutei'in cuy eḡūm owebe obubuteim," io'e. "E'ūap wiwim ḡu ōn obubut pu am," io'e jebay be — io'e Jesus. — Imēnpuye cebay jebubutei o'ḡu'ē'ē jekpotpoyū be-xepxepayū be. Ade ma o'ḡūm cebe ip — Jesus o'e.

¹³ — Ibun'ūm pima ikitpit jebubut o'jat. O'ḡuxipan. Oibu'un jebay xe. O'jenapōn jebay xewi. Poxerewun. O'jēm jebay duk'a bewi. O'ju wūyatka kay. Jay. Oajēm. Ibo ka be te'e ma jebubut o'ḡu'ūm. ¹⁴ Ūm. O'ḡu'ūm. Warēmtag ma o'ḡu'ūm soat — Jesus o'e. — Muba'at'ūmḡu oeku. Ibun cīcā oeku. Imēnpuye ibo ka watwat irere jījā ip o'e. ¹⁵ Ikitpit tak ire jījā o'e ibubut oi'ūm puye — Jesus o'e. — Ikitpit o'ju ibo ka beat kay. O'jekapik ixe aḡokatkat eju. Ixe aḡokatkat ikitpit o'ḡuju jeōhō muykōn ām-dajebaro muykōn ām — Jesus o'e. ¹⁶ — Ikitpit dajebaro xat'a kay o'e jexat'am, reren cīcā buye. Imēnpit o'ḡūm ḡu cebe — Jesus o'e. ¹⁷ — Gebuje ikitpit o'yaḡuysan. O'jewaḡuy. O'jekawēn jewebe ma.

— "Webay eju kapikpik'ukayū ma soat kuḡ jexat kuḡ," io'e jewebe ma. "Ōn pit ijoce oje'ū repibun!" io'e jewebe ma — io'e Jesus. ¹⁸ — "Jepin puk ōn webay kay," io'e jewebe ma. "Ocekawēn webay eju," io'e. " 'Bay,' i juy oce cebe. 'Ikērēat kuḡ ōn Deus xe, exe dak,' i juy oce cebe," io'e. ¹⁹ " 'Ōn ekpot. Imēnpit ekpon ḡu juy oce ḡasū bit, a'ōmubuxi'ūm'ūm ojeku buye. Eweju ocekapik acā dinheiro bu am,' i juy oce webay be," io'e ikitpit jewebe ma — io'e Jesus.

²⁰ — Gebuje o'jēm wūyat ka bewi. O'jepit jebay kay. Cebay duk'a wi wūy bima, cebay bit ikitpit o'-

jojojo. Tadaybot cīcā o'e jekpot ibubut kuḡ'ūm puye. Itabotaidabotbot cīcā o'e jekpot kay — io'e.

— Gebuje cebay o'jedau jekpot kay. O'topabijuk. O'yakobot. O'yaḡobukōn jecokcokap kuḡ. ²¹ Ipot o'jekawēn jebay eju. "Bay," io'e. "Ikērēat kuḡ ōn Deus xe, exe dak, a'ōmubuyxi'ūm'ūm ojeku buye," io'e. "Ekpon ḡu oce ḡasū bit. Eweju ocekapik acā," io'e ipot jebay be — io'e Jesus. — "Ka'ūma!" io'e cebay bit. "Okpon ma ēn soat em," io'e — io'e Jesus. ²² — Cebay o'jekawēn jebuywatwat'ukayū be ḡebuje bit. "Daosuw!" io'e. "Xipacat cuy oḡūm okpot pe," io'e cebay. "Iekabek cuy epetojot-xipacat," io'e. "Epeḡuōm cuy okpot pe," io'e cebay. "Ibumūn cuy epeḡuōm ibu be," io'e. "Suiyuk cuy epeḡuōm sui be," io'e cebay. ²³ "Biopak'it'it cuy epejat-kuy aḡuxep'iat," io'e. "Epeyaoka juy," io'e. "Ga'a peta aḡuḡē," io'e. "Ga'a acewemucokoḡ," io'e. ²⁴ "Tūybe okpot'ūm oe'ū iān cuk oce," io'e. "Ḡasū bit wetaybit oce itabēḡ ma iam," io'e. "Warēmtaḡ ma oeku wūyat ka daḡ," io'e. "Ḡasū bit oexe," io'e cebay. "Ga'a peta aḡuḡē," io'e. Icocok cīcā o'e ip — Jesus o'e. — Petatam o'e ip. Jeda'i'in o'e ip — io'e.

²⁵ — Tuk'a be jewemucokoḡ ip pima, wara'at ipot tak jekat pe osunuy kapikpiḡ-koapat. Oexe jebay duk'a be. Uk'a wi wūy'ūm pima, cedarukrekat'a a'ō o'ya'ōdobuxik, da'i'iyū a'ō dak. ²⁶ Jebay eju kapikpik'ukat o'tomuwā. "Ajo pēnpēn i'eayū?" io'e iwaḡo cebe. ²⁷ "Petatam ip ekitpit oexe buye," io'e kapikpik'ukat. "Ebay biopak'it'it o'yaokaat-kuy aḡuxep'iat," io'e. "O'yaokaat, xipan oexe buye," io'e — Jesus o'e.

²⁸ — Imēnpit iwaḡo itakoma o'e. Taobu'u jījā o'e uk'a be jeōm ām jekitpit tobede am — Jesus o'e. — Gebuje cebay oajēm jekpot kay akiju-koapat kay. "Eōm cuy," io'e cebay jekpot pe-koapat pe — io'e Jesus. ²⁹ — "Ap!" io'e. "Ade koato juk adi ocekapik-pik cīcā eweju," io'e. "Puju oḡuy kūyjobit'ūm a'ō kay? Soat em cuk adi a'ō kay oḡuy," io'e. "Imēnpit cuk bode'it'it eyaokaat ḡu owebe peta muḡē ām obureyū beam," io'e jebay be iwaḡo — io'e Jesus. ³⁰ — "Ite ekpot peam pit eyaoka," io'e. "Soat edinheiro

o'ġu'ūm yapoyū eju jepoapteim," io'e jebay be — io'e Jesus. — "Cexe buje bit, ěn peta muġĕġĕm!" io'e. "Biopak'it'it aokakam ěn," io'e iwaġo — Jesus o'e.

³¹ — "Tapu," io'e. "Soat em ěn oweju. Obubut ebubun je'e soat," io'e. ³² "Tūybe okpot'ūm oe'ū ekitpit'ūm iān cuk oce," io'e. "Ġasū bit wetaybit oce itabĕġ ma iam. Warĕmtaġ ma oeku wūyatka daġ," io'e. "Ġasū bit xipan oexe," io'e. "Imĕneju cedaġ ma wuywebe peta muġĕ ām, wuymucokcok am tak," cebay o'e — Jesus o'e. — Ikĕrĕat mujurūġrūġap o'jepereiat jebay kay o'jepit'iat puxim — io'e Jesus. Imĕn Jesus wuymutaybitbinap ekawĕn o'ġuwĕn Fari-seuyū be, Moisis ekawĕn imutaybitbin'ukayū be dak.

16 Gebuje Jesus wara'at ekawĕn o'ġuwĕn jeweku etaybitbinayū be.

— Ibutut adeat jedinhoiro o'ġūm aġokatkat pe imuxipan am jewebeam — io'e.

— "Warĕmtaġ ebubut mu'ūmu'ūm edinhoiro kukat," io'e ibureyū ibubut adeat pe — Jesus o'e.

² — Imĕnpuye ibubut adeat jekaxero o'tomuwā. " 'Warĕmtaġ ebubut mu'ūmu'ūm edinhoiro kukat,' i'e'em obureyū owebe," io'e ibubut adeat — io'e Jesus. — "Cūġ ġu ěn obubut kuġ," io'e. "Imĕnpuye soat ip cewero oweju iaptup etupmubararak omutaybit am," io'e. "Ġasū bit ěn kapiġ ġu oweju," io'e — io'e Jesus. — "Wara'at ma ojomuy edieġ," io'e. Cekaxero o'jĕm.

³ — Gebuje cekaxero o'jekawĕn jewebe ma.

— "Apĕntak oce ġasū bit?" io'e jewebe ma. "Wekariwa o'e owebe 'Ġasū bit ěn kapiġ ġu oweju,' i," io'e jewebe ma. "Iba'ore owebe kapik am kat pe, obaca'ūm puye," io'e. "Osūsūn oce warara'acat xewi dinhoiro ojuy am," io'e jewebe ma. "Wetaybit apĕn oce iam," io'e. ⁴ "Wekariwa oġuġuykuku," io'e jewebe ma. "Ixe eju ōn kapikpiġ'ūm pima, warara'acayū je'e owebe: 'Eōm cuy oduk'a be eġuy am,' i," io'e jewebe ma cekaxero — io'e Jesus.

⁵ — Imĕneju cekaxero ceweroap kuġayū o'tomu-

wā. Pūḡpūḡpūḡ ma ip o'tomuwā. Pūḡpūḡpūḡ ma ip ceweju o'jekawēn.

— “Pebūrū eweroap wekariwa eju?” io'e koap oajēmiat pe.

⁶ — “Ade jījā omuyku ixepiti weweroap teida am- -1000 be bahi'uk,” io'e.

— “Juku. Eweroaptup etupu,” io'e. “Ade ḡu omuyku bahi'uk ixepitim weweroap teida am- -50 ma iam cuy eḡubararak tup pe,” io'e cekaxero koap oajēmiat pe — Jesus o'e.

⁷ — “Pām ēn? Pebūrū eweroap wekariwa eju?” io'e warara'acat pe.

— “Ta'ade omuyku weweroap teida am trigoda- -1000 be trigoda,” io'e.

— “Juku. Eweroaptup etupu. “Ade ḡu omuyku weweroap teida am trigoda- -800 be iam cuy eḡubararak,” cekaxero o'e cebe — Jesus o'e.

⁸ — Imēnpuye kaxero itaybit cīcāat osunuy jekariwa xe, imuḡuykuku'uk ma'ḡu — io'e Jesus.

— “Ētaybit cīcā,” io'e cekariwa jekaxero be — Jesus o'e. — Itaybit cīcā ḡu Deus ekawēn kayayū jebubut kuḡ. Cekawēn kay'ūmayū bit itaybit cīcā jebubut kuḡ — Jesus o'e.

Imēn Jesus wuymutaybitbinap ekawēn o'ḡuwēn cebe ip.

⁹ — Ceweroap teibubu'ukat ekukuap puxim ḡu juy epeku — io'e Jesus. — Eybubut'in cuy epeḡūm tadaybotbocayū be iburem am ip. Cebe ip iūmūm pima, ixeyū eybureyū jeydobede kabi be eyexe buje. Soat em kabi be epesop — Jesus o'e. ¹⁰ — Eyju cedaḡ yopīcat kuḡ pima, cedaḡ ma yoboḡat tak epejukuk. Warēmtaḡ yopīcat kuḡ pima bit, warēmtaḡ ma yoboḡat tak epejukuk — io'e. ¹¹ — Eyju warēmtaḡ ijodiap kuḡ pima- -dinheiro kuḡ, Deus kabi beat je'ḡūm ḡu eywebe- -idip cīcāat. ¹² Eyju warēmtaḡ wara'acat pubut kuḡ pima, ka'ūma ma wara'at je'ḡūm eywebe eybubun. ¹³ Pūḡ'a be uk'a be bima, iba'ore ibuywatwat'ukat pe xepxepayū beam kapik am. Kariwawayū wara'at taḡtaḡtaḡ e'em pima, itakoma kuka o'e pūḡ kay jekariwa kay, wara'at jekariwa ikukpin cīcā bima. Kūyjobit kuka o'e pūḡ a'ō kay

wara'at a'ō kay kūyjobit'ūm pima. Imēnpuxim dinheiro kay jījā bima, Deus kay jījā ġu kuka epe'e — io'e Jesus.

¹⁴ Soat Fariseuyū iboap o'ya'ijojo. Ixeyū Jesus o'jowaywayway dinheiro kay jījā ip puye.

¹⁵ Ġebuje Jesus o'jekawēn Fariseuyū eju.

— “Cūġ ma oceju Deus xe,” i napa ma eyju e'em warara'acat pe — io'e. — Deus pit itaybit ajo kay eyju ġebum iam. Ijodiat xe xipat cīcāat Deus xe xipat ġu — io'e.

¹⁶ — Moisés ekawēn taġ jekuku'uk osodop ip kuyjeayū, Deus ekawēn muwēnuwēn'ukayū dak. Ġuyjom pit João Batista o'e'e adeayū be: “Deus soat kukukan je'e,” i. Deus ekawēn muwēnuwēn'ukayū imēnpuxim imuwēnuwēn ġasū dak soat ip. Ġasū adeayū ibikuy Deus pe jekukan. ¹⁷ Kabi i'ūm, i'pi dak. Deus pe wuyawēwēap ekawēn pit i'ūm ġu- -pūġ em tak ka'ūma — io'e. — Soat em cedaġ cīcā wuywebe wuyeku am ixē ekawēn taġ — io'e Jesus.

¹⁸ — Aġokatkat jetayxi epere buje, wara'at pu am jetayxim, ikērēat kuġ Deus xe. Imēnpuxim ceperē'ibit eju jewebumūn puje, ikērēat kuġ Deus xe aġokatkat — io'e cebe ip.

¹⁹ Ġebuje Jesus wuymutaybitbinap ekawēn o'ġuwēn cebe ip.

— Aġokatkat jexat o'jo'o'o- -iku jījāat o'jo'o'o — io'e. — Ibutut adeat osunuy. Ixat ku jījā osunuy. Jessay idip cīcāat kuġ osunuy. ²⁰ Tadaybocat tak oabik ixē ibubut adeat tuk'a exīntabi be- -aġokatkat. Xīntabi xe abikbik'uk osunuy soat kabia. Lázaro i tadaybocat putet osunuy. Ade werowero kuġ osunuy ixē Lázaro daġ soat taġ. ²¹ Oabik iboce ibinōmnōm kay itabiku buye, cemesa be jedudumat o pin puye. Imēntak akuriceyū oajēm cewerowero kōnkōn ām.

²² — Lázaro'ūm e'ū buje, Deus ekawēn tojotjot'ukat ixē'ūm o'tujuu Abraão kay- -Deus xeat kay. Iku jījāat o'om osunuy Abraão eju. Ixē ibubut adeat'ūm pit oe'ū. Aġokatkayū ixē'ūm o'jokot.

²³ — Ġebuje ibubut ade osunuyiat Abraão o'jojo-

jo wūy wi. Ipiat'ajojoap pewi o'jojojo. Lázaro dak o'jojojo Abraão xe.

²⁴ — “A jot!” io'e ibubut ade tūibit Abraão be. “Etabotaidabotbon cuy eḡuy okay,” io'e ya'ōberen. “Lázaro juy eḡudot okay idibi be ibu'abi muakōm ām okō mucuk am idibim,” io'e. “Ipiat'ajojom cīcā ōn daxa be,” io'e.

²⁵ — “Ka'ūma, oḡuju ḡu,” io'e Abraão bit. “Etabēḡ pima, ade idip cīcāat kuḡ cuk adi eḡuy. Lázaro bit ikērēat kuḡ cuk adi osunuy itabēḡ pima. Ēn ma ecokcok cuk adi eḡuy. Ixe bit tadaybot osunuy. Ēbum cuy eḡuy iboap kay. Gasū bit ixe ma icokcok. Ēn pit ipiat'ajojom,” io'e.

²⁶ — “Imēntak katek omuy wuypidase. Itediakat pe iju ba'ore iḡodi kay eykay. Ibodiakat pe dak tot pa'ore ijodi ocekey. Iba'ore cebe ip katek puye,” Abraão o'e.

²⁷ — “A jot,” io'e Abraão be. “Eya'ōpicūḡ cuy wa'ō kay! Lázaro juy eḡuju webay duk'a kay, okitpitpiyū kay,” io'e. ²⁸ 5 be opop ip webay duk'a be. Eḡuju ixeyū mukūyjo am ipiat'ajojoap pe tocap puxim,” io'e.

²⁹ — “Ka'ūma,” io'e. “Oḡuju ḡu,” io'e Abraão. “Ekitpitpiyū Moisés ekawēntup kuḡ, Deus ekawēn muwēnuwēn'ukayū emudupmubararaktup kuḡ tak,” io'e. “Kūyjobin cuy ekitpitpiyū jeedop ibo dup a'ō kay,” io'e.

³⁰ — “A jot, ebu'um ḡu juy ixe muju am,” io'e. “Ce'ūat tomukadi waram o'jetait'iat co buje bit, iḡuycūḡ je'e ip ikērēat kuḡ puye,” io'e. “Ikērēat mujurūḡrūḡap jepere ip,” io'e ibubut ade tūibit.

³¹ — “Ka'ūma. Oḡuju ḡu,” Abraão o'e. “Ekitpitpiyū kūyjobit'ūm Moisés a'ō kay. Kūyjobit'ūm tak ip Deus ekawēn muwēnuwēn'ukayū a'ō kay. Ce'ū'ū-ayū dopdopap pewiat tobuxik puje dak, waram ḡuto o'jetait'iat tobuxik puje, itabut ḡu je'e ip. Imēnpuye oḡuju ḡu cekay ip,” Abraão o'e — Jesus o'e.

17

Gebuje Jesus o'jekawēn jewēju etaybitbinayū eju.

— Adeayū wuyumbu'un wuyetabucap eperē am — io'e. — Imēnpit Deus ixeyū ġuju ipiat'ajojoap kay. ² Warara'acat pe okay itabut'isuat mubu'un puje, ikērēat kuḡ ip Deus xe. Imēnpuye imutabut'ūm awap xipat kuka wuywebe ixeyū aoka am-yaḡobu eju wita'a mukirik am yapoxiat'a mukirik am ticōḡ pe imuakōm ām. Xipat ġu wuye'ū ām. Ibodi ma xipat ġu wuyju am ipiat'ajojoap kay. Ikērēm ġu juy epesop eyewewebe- idim acā — io'e.

³ — Eybure be ikērēat mujurūḡ puje juy epeḡu-kūyjo. Ikērēat kay iḡuycūḡ pima, ḡebum ġu juy epesop apēn cuk adi ikērēat o'ḡujuruḡ iap kay. ⁴ Sete em aco'i ikērēat mubapukpuḡ eywebe pūḡ kabia. ⁷ em tak “Oḡuycūḡ ikērēat oḡubapuk ewebe buye” i'e buje, juy ḡebum ġu epesop apēn cuk adi ikērēat o'ḡujurūḡ iap kay — io'e Jesus.

⁶ Gebuje cemumujuyū o'jekawēn jekukukat eju- -Jesus eju.

— Ocebuiwan cuy ece biḡ ma ocetabut am Deus kay — io'e ip cebe.

⁶ — Deus kay eyetabutbūt pima, eyemuojuy je'ḡūm eywebe — io'e. — “Ixe-ip cuy eyop'uk tābu daḡwi” i'e buje cebe, Deus yop'uk. “Eyoptaida juy ticōḡ pe” i'e buje, Deus yoptaida — io'e.

⁷ — Eya'ōpuruḡ eybuywatwat'ukat kuḡ-eykat kotkot'ukat kuḡ-eyōhō kukuk'ukat kuḡ-ovelha kukuk'ukat kuḡ — io'e. — Jekapikap pewi yajēm puje, “Xik'i buk. Ecebodoy,” i'ūmḡu eyju e'em cebe. ⁸ “Oxan cuy ejoda,” i'e'em eyju cebe. “Dao ma eḡudot okay,” i dak. “Wekōn eperē buje acā ecekōn,” i'e'em eyju cebe. ⁹ Eybuywatwat'ukat eya'ō daḡ kapikpiḡ pima, “Xipat cīcā eyju,” i'ūmḡu eyju e'em cebe. ¹⁰ Deus a'ō daḡ jekukum pima, “Xipat cīcā oceju,” i'ūmḡu juy epe'e eyju dak. “Ocekukat a'ō daḡ oce-kuku,” i acā juy epe'e — Jesus o'e.

Imēn Jesus o'jekawēn jewēju etaybitbinayū eju.

¹¹ Jesus o'ju Jerusalém ka kay. Kapkam o'e Galiléia eipi dağ, Samaria eipi dağ tak.

¹² Ğebu je 10 be ierepayū Jesus o'topabijuk ağoka be yajēm pima. Kacūğcūğ'i osodop ip bosusu cewi.

¹³ — Jesus! Kariwa! — io'e ip ya'ōberen. — Eta-botaidabotbon cuy eğuy oce kay! — io'e ip Jesus pe.

¹⁴ Ixeyū jo bu je, o'jekawēn ceweju ip.

— Epeju juy paī kay, ix e be eyjo am — io'e ierepayū be.

O'ju ip.

Jeju bu je ip o'je'ada ierep topibiyū. Xipat o'e ip.

¹⁵ Ğebu je pūğ ma o'jepit Jesus kay ixeyū'in je'adaap tobuxik pu je.

— Deus, ēn xipat cīcā — io'e.

¹⁶ O'jēğ'aecōğcōğ Jesus topabe ya'ōbuyxi jexe buye.

— Xipat cīcā ēn, Kariwa — io'e. — Ēn omu'ada — io'e ya'ōberen.

Samaria eipi beat osunuy ix e o'jepitiat.

¹⁷ Ğebu je Jesus o'jekawēn ceweju.

— Dez be ğu du oğ'u'ada? — io'e. — Pu warara'acayū- -9 beayū? — io'e Jesus. ¹⁸ — 9 beayū ğu o'jepit "Xipat cīcā ēn omu'ada" i'e am Deus pe. Ite Samaria eipi beat acā o'jepit — io'e jexeayū be.

¹⁹ — E'āy — Jesus o'e cēğ'aecōğcōğ'ibit pe. — Ōn emu'ada, etabut okay buye — io'e.

²⁰ Waram pima Fariseuyū o'jekawēn Jesus pe.

— Puğūn Deus soat kukukan je'e? — io'e ip.

— Ixe soat kukukan pima, ibapuk ğu je'e wuyxe — io'e. ²¹ — "Bomaku Deus soat kukukan," i'ūmğū ace'e, "Jodiku Deus soat kukukan," i'ūmğū dak — io'e. — Ibapuk ğu warara'acat xe. Deus wuykukukan pima, wuywebe nuynuy — io'e Jesus.

²² Ğebu je Jesus o'jekawēn jeweju etaybitbinayū eju- -doze beayū eju.

— Guyjom ojo pin cīcā epesop- -soat wağo jo pin. "Ocebikuy jījā ğaxīn ma soat wağo jajēm oce kay," i epe'e — io'e. — "Ocebikuy pūğ kabia oce xe am," i epe'e — io'e Jesus. — Imēnpit eyxe ğu oğuy — Jesus o'e.

²³ — Warara'acayū napa ma je'e eywebe "Ak'i juy epe'e," i, "Soat waḡo o'jepit," i, "Bomaku omuy," i. "Soat waḡo o'jepit," i je'e ip eywebe. "Joceku omuy," i napa ma je'e ip. Epeju ḡu juy okudadam ya'ōbi ip. Eyetabun ḡu juy epesop ixeyū a'ō kay — Jesus o'e.

²⁴ — Wepit puje, eyetaybit epesop-soat waḡo epit puje — io'e. — Xiririkiat soat taḡ kabiam. Jodi-wiku kabiam, bodiwidaku. Soat ijodiat xiririkiat cocom. Imēnpuxim soat ijodiat wepicap jojo. ²⁵ Imēnpit koam cuy ipiat osupi'ajo — io'e. — Ade ḡasūacat okay ḡu je'e — io'e.

²⁶ — Wepit puje, ijodiat jeku apēn Noé kabia be juk adi oekuku ip iap puxim. ²⁷ Jekōnkōn'uk osodop ip Noé itabēḡ pima, tikōnkōn'uk tak, jewebumūnmūn'uk tak. Aḡ'ūm pima, dao ma muba'atxiri oajēm — io'e.

— Kobexixi be Noé ōm puje, muba'atxiri oajēm soat kay ipi juacat kay. Soat ipi juacat o'ḡu'ūm. Oe'ū'ū ip — io'e. ²⁸ — Imēnpuxim ip oekuku Ló itabēḡ pima — io'e. — Jekōnkōn'uk osodop ip, tikōnkōn'uk tak, jebubut pupu'uk tak, teidada'uk tak, taidada'uk tak, uk'a muymuy'uk tak. Sodoma ka watwat aḡ'ūm pima dao ma Deus daxa o'ḡudot iḡo ka kay. ²⁹ Sodoma ka bewi Ló jēm puje, Deus daxa isopat o'ḡudot kabi kadiwi daxa daxik tak. Soat ibo ka watwat'ūm'ūm o'ḡu'ūm — io'e. ³⁰ — Soat waḡo ōn. Wepit puje ka'ūma ma wepicap wiwim je'e. Apēn kuyje oekuku ip iap puxim jeku ip ijodiat — io'e.

³¹ — Wepit puje, jeduk'a be ḡu juy jeōm akijuat yabeat pu am — io'e. — Jepit ḡu juy jeduk'a kay jekat peat. ³² Gebum cuy epesop Ló tayxi epit ojuyap kay — io'e. ³³ — Oburemap tomuju eybu'u je'ūm pima, soat em ipiat'ajojoap pe epesop eye'ū buje. Je'ūm eybu'u'ūm pima bit, soat em Deus xe epesop eye'ū buje — io'e.

³⁴ — Wepicap exima be xepxepayū ixet ip jeedop pūḡ pe ma kama be. Deus pūḡ ma tujowat jewaju. Wara'at pit suiwat. ³⁵ Imēnpuxim xepxep aoyū tadedem ip jeedop. Deus pūḡ ma tujowat jewaju. Wara'at

pit suiwat. ³⁶ Xepxep aḡokatkat jekat pe kapikpiḡ ip je'e. Deus pūḡ ma tujowat jewēju. Wara'at pit suiwat — io'e.

³⁷ — Poma ip tujowat, Kariwa? — io'e ip Jesus pe.

— Urupuyū je'awerorom iḡemat kay i'o am. Imēnpuxim Deus ja'jēm ipiatpi'ajoan ikērēat muju-rūḡrūḡ'ukayū be — io'e Jesus.

18 Gebuje Jesus wuymutaybitbinap ekawēn o'ḡuwēn jewēju etaybitbinayū be soat em cuy epeyekawēnwēn Deus eju iam ixeyū mutaybit am, eybu'un ḡu juy epesop Deus eju jekawēn ām iam tak.

² — Ibimāmāmāat ekawēn coco'ukat osunuy ika-boḡatka be — io'e Jesus. — Tūybe Deus ya'ōbuyxi ḡu iān o'e. Warara'acat kuḡ tak ibuyxim ḡu osunuy — Jesus o'e.

³ — Itop'ūm e'ūibit ade em ma ajēmjēm ixē ibimāmāmāat ekawēn coco'ukat kay — io'e. — O'taobu'un ḡu cekay. — “Obuywan cuy ece okay itakomaat pe okaykayap puxim,” io'e'e itop'ūm e'ūibit — Jesus o'e.

⁴ — Ade kabia ibimāmāmāat ekawēn coco'ukat ibu'u osunuy itop'ūm e'ūibit puywan. Guyjom pit o'jekawēn jewebe ma. “Deus ya'ōbuyxi ḡu oxe,” io'e jewebe ma — io'e. — “Warara'acat tak ibuyxim ḡu ojukung,” io'e jewebe ma — io'e. ⁵ — “Imēnpit ixē itop'ūm e'ūibit cuy osubuywan ixē be omu'ukpiceḡḡḡḡap puxim,” io'e jewebe ma — io'e. — “Ibuywan'ūm pima, soat em kuka oajēmjēm okay, omu'adaodao kuka,” io'e jewebe ma — Jesus o'e.

⁶ — Ixē ibimāmāmāat ekawēn coco'ukat itop'ūm e'ūibit o'subuywan jemu'ukceḡḡḡap puxim cūḡ ḡu ma'ḡu jekukum — io'e. ⁷ — Pām Deus? Eyxe Deus ibu'u du jemunaēhēyū buywan- -soat kabia, soat ixima be dak jekay jewāwāwā'ukayū buywan- -“Obuywatwan cuy ece” i'e'e'ukayū buywan? ⁸ Ibu'u ḡu ixeyū buywan — io'e. — Soat em aḡ cekay ip. Gaxīn ma ixeyū buywan — io'e. — Soat waḡo ōn. Ocepit

cuy ijodi. Wepit puje Deus kay itabucayū xe'e otobuxik? Tobuxik pin cīcā oxe. Imēnpuye juy eybu'un ġu epesop Deus eju jekawēn ām — Jesus o'e.

⁹ Gebuje Jesus wara'at ekawēn o'ḡuwēn jewexe xipacayū be- -warara'acat mubuyxi'ūm'ūmayū be- -“Oceju acā xipat Deus xe” i'e'e'ukayū be.

¹⁰ — Xepxep aḡokatkat o'ju Deus eju kawēnwēn-ap'a kay- -yaboḡat'a kay — io'e. — Oajēm ip Deus eju jekawēn ām. Pūḡ Fariseu osunuy. Wara'at iecuḡap peam dinheiro bubu'ukat osunuy — io'e.

¹¹ — Gebuje Fariseu o'jekawēn Deus eju. Jaḡepūḡ ma cūḡ'i osunuy. Jewexe ya'ōbuyxi jījā osunuy. Imēn o'jekawēn:

— “Deus,” io'e. “Ocokcok oce warara'acat puxim ġu ōn etabixe buye,” io'e. “Ixeyū ma itabikuku warara'acat pubut kay. Ōn pit ka'ūma,” io'e. “Ixeyū ma warēmtaḡ ma jekukum. Ōn pit ka'ūma,” io'e. “Ixeyū ma jepopom warara'acat tayxi eju. Ōn pit ka'ūma,” io'e. “Iḡo buxim ġu dak ōn- iecuḡap peam dinheiro bubu'ukat puxim ġu,” io'e. ¹² “Pūḡ semana be xepxep kabia okpiwat ma ōn jewemureren kawēn ām eweju,” io'e Deus pe. “Wedinheiro'in ōn iūmūm ewebe,” io'e. “10 be ikuḡ pima, pūḡ ma ōn iūmūm ewebe,” io'e — Jesus o'e.

¹³ — Iecuḡap peam dinheiro bubu'ukat pit cūḡ'i osunuy wūy ma Fariseu wi. Isūsūn osunuy kabi kay jeak am ya'ōbuyxi'ūm cexe buye. Yatoro ma o'jekawēn Deus eju. O'jewekūmpiokaka jeḡuycūḡap pibun, ikērēat kuḡ puye — io'e. — “Deus,” io'e — io'e. — “Ikērēat kuḡ ōn,” io'e — io'e. — “Imēnpuye etabotaidabotbon cuy eḡuy okay,” io'e — io'e Jesus.

¹⁴ — Icēmān ōn e'em eywebe — Jesus o'e. — Jeduk'a be ixeyū epit puje, Fariseu ġu cūḡ ma o'e Deus xe- iecuḡap peam dinheiro bubu'ukat acā — io'e. — Eya'ōbuyxian pin cīcā bima, eya'ōbuyxian ġu epesop Deus xe. Eya'ōbuyxian pin'ūm pima bit, eya'ōbuyxian epesop cexe — Jesus o'e.

¹⁵ Gebuje Jesus eju etaybitbinayū warara'acat

o'ğukorēm. O'ğukorēm ip Jesus kay mucayan bekitkit tojtjon puye. ¹⁶ Imēnpit:

— Ebekitkit cuy epetojot okay — io'e Jesus cebayū be ip.

Ġebuĵe Jesus o'jekawēn jeweju etaybitbinayū eju--doze beayū eju.

— Bekitkit mubu'un ġu juy okay imudot am — io'e. — “Epeju ġu juy Jesus kay,” i'ūmġu juy epe'e cebe ip. Deus ixeyū buximayū kukukan je'e soat kukukan pima. ¹⁷ Icēmān ōn e'em eywebe. Bekitkit ibu'u ġu Deus pe jekukan. Imēnpuxim Deus pe eykukan eybu'u'ūm pima, cexe epesop ixē soat kukukan pima — io'e.

¹⁸ Ġebuĵe aġoka kukat oajēm Jesus kay. O'jekawēn Jesus eju.

— Tapu — io'e. — Ēn xipāt, cedaġ ocemutaybitbin puye — io'e. — Apēntak oce soat em Deus xe onūy ām? — io'e Jesus pe.

¹⁹ — Apēnpuye dak ēn e'em owebe “Ēn xipāt,” i? — Jesus o'e. — Ka'ūmġu xipacat--Deus acā — io'e. ²⁰ — Etaybit Deus pe wuyawēwēap ekawēn — io'e. — “Warara'acat tayxi kaykay ġu juy epesop,” io'e Deus. “Warara'acat epeyaoka ġu juy,” i dak. “Eyetabikum ġu juy warara'acat pubut kay,” i dak. “Napa ġu juy epe'e,” i dak. “Ibuyxim cuy eyebay epejukuk, eyxi dak,” i dak o'e Deus wuywebe — Jesus o'e.

²¹ — Soat taġ ibiat ekawēn taġ cuk adi ojekuku bekin piman ma — io'e.

²² Iboap co buje, Jesus waram o'jekawēn cebe.

— Pūġ ma buk omuy ewebe i'e am — io'e. — Soat ebubut cuy eteida dinheiro bu am. Dinheiro juy eġūm ikuġ'ūmayū be — io'e. — Iūm puje, ebubut ade ece'e kabi be — io'e. — Ġebuĵe juy ejot. Oweju juy ejeku — io'e Jesus.

²³ Iġuycūġ cīcā o'e iboap co buje, ade jījā ibubut puye. Tacup osunuy. Ibu'u o'e jebubut ūm tadaybotbocayū be. Xerewun. O'jēm Jesus xewi.

²⁴ Aġoka kukat cēmap co buje, Jesus o'jekawēn jeweju etaybitbinayū eju-iġuycūġat cēmap co buje.

— Iba'ore jījā ibubut adeat Deus pe jekukan — io'e Jesus. ²⁵ — Iba'ore camelo be ikap am awi dao-bi'atoḡ. Imēnpuxim iba'ore jījā ma ibubut adeat Deus pe jekukan, ibu'u ip puye — io'e.

²⁶ — Abu be dak kuka o'e taxijo but? — io'e o'ya'ījojo'iaiyū.

²⁷ — Ijodiat pe jewedaxijo ba'ore — io'e. — Deus pe bit iba'ore ḡu soat ma — Jesus o'e.

²⁸ Ḡebuḡe Pedro o'jekawēn Jesus eju.

— Ocejū bit soat ocesuiwat eweju am — Pedro o'e Jesus pe.

²⁹ — Icēmān ōn e'em eywebe — Jesus o'e. — Deus bikuyap taḡ eybadip iwat puje, eywebe epesuiwat podi ma epejat — io'e. — Eyduk'a beayū acoli epesuiwat, eytayxi dak, eywaḡo dak, eyebay dak eyxi dak, eyebekitkit tak. ³⁰ Deus bikuyap taḡ iwat puje, eywebe epesuiwat podi ma epejat — io'e. — Eyetait pima Deus xipacat je'ḡūm eywebe. Eye'ū buje dak waram ḡuto epeyetai — io'e. — Soat em Deus xe epesop — Jesus o'e.

³¹ Adeayū parakpewi Jesus doze beayū o'tujowat. O'jekawēn ceweju ip.

— Eya'ōpicūḡcūḡ cuy epesop wa'ō kay — io'e cebe ip. — Jerusalēm ka kay aju — io'e. — Soat waḡo ōn. Kuyjeayū emudupmubararaktup ekawēn taḡ adeayū warēmtaḡ ma ip okuk — io'e. ³² — Ixeyū oūm Judeu'ūmayū be okay itakomaayū be. Owaywayway ip je'e. Warēmtaḡ ma ip okuk. Omuxiuxi ip. Omupokupok ip. ³³ Oaoka ip. Imēnpit xepxep xet kap puje, waram ḡuto ocetai — io'e Jesus cebe ip- -doze beayū be.

³⁴ Imēnpit doze beayū xe cekawēn pa'arēm osunuy Jesus ekawēn.

— Apēnape ite e'em? — io'e ip jewewebe. — Cekawēn pa'arēm ocewebe — io'e ip.

³⁵ Jericó ka be Jesus ajēm pima, ita'ūmat dinheiro o'joojuy kapkapayū xewi. ³⁶ E bitako daḡ xik'i bima kapkapayū daobiwēḡ cocom ixē ita'ūmat.

— Apēnpuye eyju kapkam ijoma? — io'e kapkapayū be.

³⁷ — Jesus ijoma kapkam puye- -Nazaré ka be-wiat — io'e ip cebe.

³⁸ Gebuje ita'ūmat o'jewāwā Jesus kay.

— Jesus! — io'e. — Davi naxegebit ēn! — io'e. — Etabotaidabotbon cuy eḡuy okay — io'e ya'ōberen.

³⁹ Imēnpuye kapkapayū ita'ūmat o'ḡukorēm.

— Ecemūḡ cuy! — io'e ip.

Imēnpit biḡ ma o'jewāwā ya'ōberen.

— Jesus! — io'e ma'ḡuto. — Davi naxegebit ēn! Etabotaidabotbon cuy eḡuy okay — io'e.

⁴⁰ Jesus oajēm ita'ūmat kay. O'jecū e bidase.

— Ixe ita'ūmat epetojot okay — io'e jexeacat pe.

O'tojot. O'jekawēn cebe, yajēm puje.

⁴¹ — Ajo-kay ēn oxewi? — io'e- -Jesus o'e.

— Wetadam ece — io'e.

⁴² — Jetada ōn — io'e Jesus. — Etate ece'e Deus kay etabut puye — io'e.

⁴³ Jesus iboap e isum ma o'jewetada. Jecoatcoan o'e. Ixe dak o'ju Jesus eju.

— Ka'ūmḡu ejo'iat xipacat — io'e Deus pe.

Imēneju soat o'jojojo'iaiyū:

— Ka'ūmḡu ejo'iat xipacat — io'e ip Deus pe.

19 Jesus oajēm ikaboḡatka kay- -Jericó ka kay. Kapkam oeku ibo ka daḡ. ² Ibo ka be aḡo-katkat osunuy. Ibutet Zaqueu i osunuy. Iecuḡap peam dinheiro bubu'ukat osunuy. Ibutut adeat osunuy.

³ Ixe dak Jesus co ojuy o'e. Imēnpit Jesus co ba'ore osunuy taoapīn puye. Ijo ba'ore osunuy adeayū Jesus akokoreren oekuku buye.

⁴ Imēnpuye Zaqueu o'jedau Jesus topabe. Jesus co am o'jeu figueira'ip eju. O'jeu ijop'ip tēḡ ma je'-kap iam itaybit puye.

⁶ Ibo'ip tiotpe yajēm puje, Jesus o'jeapūn Zaqueu kay.

— Zaqueu — io'e. — Ekop cuy! — io'e. — Dao-suw! — io'e. — Eduk'a be òn cum — Jesus o'e.

⁶ Zaqueu dao ma o'kop ip ejuwi. Icocok o'e Jesus tuk'a be cu ojuy buye.

— Ejot cuy oduk'a be — io'e Jesus pe.

⁷ Iboap o'jojjo'iaiyū Jesus o'jomuymuy ip jeweweju.

— Jesus o'ju Zaqueu duk'a be — io'e ip jewewebe. — Ixe Zaqueu ikērēat mujurūgrūgxi! — io'e ip jewewebe.

⁸ Gebuje Zaqueu o'jekawēn Jesus eju jeduk'a be.

— Kariwa — io'e. — A'ōpicūg cuy eḡuy. Ikērēat cuk adi oḡjurūgrūgiap cuy ocepere. Obubut'in oḡm ikuḡ'ūmayū be. Ipidase oḡm cebe ip — io'e. — Adeayū muḡuykukukum cuk adi oḡuy dinheirom — io'e. — Ebadipdip dinheiro juy oḡm pūg dinheiro ojat'iat pe soat pe — io'e Zaqueu.

⁹ — Zaqueu, Deus edaxijo ḡasū bit — io'e Jesus. — Xipat ixe be edaxijo am ēn Abraão naxeḡebit puye. ¹⁰ Soat waḡo òn. Ijodi ojot ikērēat mujurūgrūg'ukat kudada am. Ixeyū daxijo am ojot — io'e Jesus.

¹¹ Adeayū be iboap co buje, Jesus wuymutaybitbinap ekawēn o'ḡuwēn cebe ip. Jerusalém ka be Jesus oajēm pin. Tūybe ḡaxīn ma Deus soat kukukan je'e iān o'e ip adeayū. Imēnpuye iboap ekawēn o'ḡuwēn Jesus.

¹² — Kariwa yoboḡat cu ojuy wūyatka kay — io'e Jesus. — Wūyat ka watwat ixe kariwa yoboḡat muy ojuy jekukan. ¹³ Iju'ūm pima 10 beayū o'ḡudot jewekay jebuywatwat'ukayū. Pūḡpūḡpūḡ ma o'ḡūm soat pe dinheiro isurūḡat. Soat ip pūḡpūḡpūḡ o'e ikuḡ. "Ōn ijoce'ūm pima, epeyekapik ijop kuḡ dinheiro kuḡ wara'at pu am- -dinheiro bu am," io'e ixe kariwa cebe ip. ¹⁴ Imēnpit cebekitkityū'in itakoma osodop ip jekariwa yoboḡat kay. Imēnpuye itakomaayū jebureyū o'ḡuju jekariwa nomuju jekawēn ām ceweju. E daḡ ip o'e cebe: "Ēkay ḡu oceju," i. "Ocekukat pin ḡu ewebe," io'e ip cebe e daḡ — Jesus o'e.

¹⁵ — Gebuje o'ju wūyat ka kay — io'e. —

Wūyat ka be bima ibo ka watwat ixe kariwa yoboğat o'jomuy jekukan. Ade ka kukan ip o'jomuy. O'jēm wūyat ka bewi. Jay. Oajēm ġuto jeka be — io'e. — Jebuywatwat'ukayū o'tomuwā jewekay. 10 be dinheiro o'ġūmġūm cebe'iaiyū o'tomuwā. Itaybit pin o'e pe-būrū paxi ip dinheiro o'jat wara'at iam — io'e Jesus.

¹⁶ — Gebuje ibuywatwat'ukat oajēm jekariwa kay — io'e. — “Kariwa,” io'e. “Pūğ dinheiro eġūm owebe isurūğat. 10 be ojat wara'at,” io'e — Jesus o'e.

¹⁷ — “Xipat ěn,” io'e. “Xipan cīcā juk adi ecekapik,” io'e. “Xipan cuk adi ecekapik pūğat kuğ ewebe oġūm'iat kuğ- dinheiro kuğ- yopīcat kuğ,” io'e. “Imēnpuye 10 be aġoka kukan ecesūy,” io'e kariwa cebe — Jesus o'e.

¹⁸ — Ibocewi wara'at oajēm ibuywatwat'ukat — io'e. — “Kariwa,” io'e. “Ixeat kuğ pima, 5 be ojat wara'at,” io'e wara'acat — Jesus o'e.

¹⁹ — “5 be ikaboğatka kukan ecesūy- -wūyat eipi ka kukan,” io'e kariwa cebe — Jesus o'e.

²⁰ — Ibocewi wara'at oajēm ibuywatwat'ukat — io'e. — “Juku, kariwa,” io'e. “Edinheirom. Pūğ ma,” io'e. “Ocekapik ġu wara'at pu am. Oġuekabek pit paġōm,” io'e. ²¹ “Oparara ebuxim, ěn warara'acat mudadaybotbon puye,” io'e. “Ēn ibubum warara'acat xewi iūmūm ġu ma'ġu,” io'e. “Ēn ibubum cexewi ip taidadam ġu ma'ġu,” io'e ibuywatwat'ukat — Jesus o'e.

²² — “Xipat'ūm cīcā ěn,” io'e kariwa. “Ajo pēğap ġu ěn?” kariwa o'e ya'ōberen jebuywatwat'ukat pe. “ ‘Ocekapik ġu wara'at pu am,’ i ěn e'em owebe. ‘Oġuekabek paġōm,’ i ěn e'em owebe,” io'e. “ ‘Ēn warara'acat mudadaybotbon,’ i ěn e'em owebe,” io'e.” ‘Ēn ibubum warara'acat xewi iūmūm ġu ma'ġu,’ i ěn e'em owebe,” io'e. “ ‘Ēn ibubum cexewi ip taidadam ġu ma'ġu,’ i ěn e'em owebe,” io'e. ²³ “Apēnpuye dak dinheiro eġūm ġu dinheiro muxipanpan'ukat pe ixe be wara'at pu am? Ixe be iūm puye, wara'at kuğ kajuk ece'e dinheiro kuğ,” io'e kariwa — Jesus o'e.

²⁴ — “Pūğ ma ikuğat pui bewi juy cedinheiro

epejat," io'e kariwa jexeayū be. 10 be ikuḡat pe juy epeḡūm," io'e — Jesus o'e.

²⁵ — "Kariwa, imēn ḡu bit," io'e ip. "Teku kuy 10 be ikuḡ!" io'e ip kariwa be.

²⁶ — "Imēn ma ōn e'em," io'e kariwa bit. "A-deat kukat pe wara'at je'ḡūm ip. Ade'ūmat kukat xewi bit je'jat ip," io'e kariwa — Jesus o'e.

²⁷ — "Okay itakomaayū juy epetojot ijoce," io'e. " 'Ocekukat pin ḡu ewebe,' i juk o'e ip owebe," io'e. "Ixeayū juy epetojot ijoce," io'e. "Ixeayū ma epeyaoka wetabixe," io'e kariwa — Jesus o'e.

Imēn Jesus wuymutaybitbinap ekawēn o'ḡuwēn cebe ip.

²⁸ Jesus iboap e buje, o'ju Jerusalēm ka kay. Jēju etaybitbinayū wap o'ju Jesus. ²⁹ Oajēm ip Bet-fagé ka xe, Betânia ka xe dak, co'a xe. Co'a butet Oliveira dip'a i osunuy. Ajēm pima xepxepayū o'ḡuju wara'atka be jēju etaybitbinayū.

³⁰ — Epeju juy aḡoka kay- wuywapatka kay — io'e xepxepayū be. — Iboce jumento'it'it epetobuxik- ikirikat- -yakpi jeje'ibit'ūmat. Ixe jumento'it'it epeḡuwekap — io'e cebe ip. ³¹ — Ixe juy etojot ijoce — io'e. — "Apēnpuye dak eyju jumento'it'it muwekapkam?" i'e buje ip, "Ocekariwa cekay, ikuḡ'ūm puye," i juy epe'e cebe — io'e cebe ip.

³² O'ju ip xepxepayū.

Oajēm ip jumento'it'it kay. O'tobuxik ip apēn cuk Jesus o'e iap taḡ. ³³ Imuwekapkam pima ōhō iwat o'jekawēn cebe ip.

— Apēnpuye eyju jumento'it'it muwekapkam? — io'e ōhō iwat.

³⁴ — Ocekariwa cekay, ikuḡ'ūm puye — io'e xepxepayū.

— Ha'a — io'e.

³⁶ O'tujowat ip Jesus kay. Oajēm. Jumento'it'it akpi jeje jeekabek o'jomōḡ ip. Cēju etaybitbinayū Jesus o'ḡuju jumento'it'it akpi jeje- iekabek ceje.

³⁶ Jerusalēm ka xe Jesus ajēm pima, adeayū jeekabek o'ḡupayapaya ip Jesus wap e daḡ ya'ōbuyxi cexe ip puye. ³⁷ Jesus o'tobede jijā ip ḡebuḡe. Icockok cīcā ip

o'e Oliveira dip'a pēnpēn taḡ kopkom pima -soat cebekitkit. O'jewāwā ip Jesus kay.

— Deus xipat cīcā — io'e ip ya'ōberen. — Teku ka'ūma buk ajojojoiap mubapukpuḡ jekukum — io'e ip. ³⁸ — Wuykukukat omuyku Deus a'ōbi — io'e ip jewewebe. — Ka'ūma ma ixē jo'iat idipat! — io'e ip. — Kaba'ūm jeedop ip kabi watwat — io'e ip. — Deus cuy xipacat je'ḡūm cebe — io'e ip Jesus cocom pima.

³⁹ Imēneju Fariseuyū o'jewāwā Jesus pe adeayū parakpewi.

— Tapu — io'e ip. — “Epeyemūḡ cuy,” i juy ece eweju etaybitbinayū be, warēmtaḡ ma ip e'em puye — io'e ip.

⁴⁰ — Iteyū mūḡ'i bima, wita'a ma kuka o'jeae-wāwā odobede am — io'e.

⁴¹ Jajēm puje, Jerusalēm ka kay o'jeak Jesus. O'tōn ika jojom pima ade ika watwat kūyjobit'ūm puye. O'jekawēn ika jojom pima.

⁴² — Jerusalēm ka watwat, Deus omudot eydaxijoap ojuy kaba'ūm eydop am — io'e Jesus. — Obikuy jījā ḡasū ma eymutaybit am iboam. Eyju bit eybu'u ixē be eydaxijo am. Imēnpuye wekawēn ba'a-rēm eyxe — io'e. ⁴³ — Imēnpuye ḡuyjom eykay itakomaayū korara jo'iat jomuy ip eyka koreren jeōm ām eyaokaka am — io'e. — Ka'wi muḡēḡē ip jomuy. Jeymukoreren ip eyenapōnap puxixim. Jeyakodip ip — io'e. ⁴⁴ — Jeymu'ūm ip. Soat eyka watwat ḡu'ūm ip. Ka'ūma ma jepoyat. Ikaboḡatka sukamu'ūm cīcā ip. Wita'a yamudu ip -soat'a uk'a muḡēḡēap'a. Pūḡ'a iwat ḡu ip wara'at'a jeje. Deus omudot eydaxijo am. Eyju bit okay ḡu. ḡasū ocedaxijo pin Deus iam eyetaybit ḡu. Imēnpuye soat ip jeymu'ūm. Pūḡ tak epeyepoyat ḡu. Soat ip jeymu'ūm — io'e Jesus.

⁴⁵ Jesus oajēm Deus eju kawēnwēnap'a kay-yaboḡat'a kay. Ya be oōm. Aḡokatkayū o'ḡujēm uk'a ekorara bewi-ōhō deidada'ukayū.

⁴⁶ — Imēn e'em Deus ekawēntup: “Oduk'a bit cuy yanuy Deus eju kawēnwēnap'am” i — io'e cebe

ip. — Eyju bit epeyamuwezat ibukurukayū munēm-ap'am — io'e cebe ip.

⁴⁷ Jesus adeayū mutaybitbin osunuy soat kabia Deus eju kawēnwēnap'a be- -yaboğat'a be.

Gebuje paīyū kukukayū Jesus aoka ojuy oeku ip- -Moisés ekawēn imutaybitbin'ukayū dak, warara'acayū dak- -Judeuyū kukukayū. Jesus aoka ojuy osodop ixeyū ma.

⁴⁸ Adeayū bit Jesus ekawēn kay jījā osodop. Imēnpuye Jesus aoka ba'ore o'e cekay'ūmayū be.

20 Jesus imutaybitbin pima paīyū kukukayū oajēm cekay. Oajēm ip Jesus kawēn idipat muwēnuwēn pima Deus eju kawēnwēnap'a be- -yaboğat'a be. Oajēm ip Moisés ekawēn imutaybitbin'ukayū eju, Judeuyū kukukayū eju dak. ² Soat ip o'jekawēn Jesus eju.

— Abu-a'ōbi juk ija'a beayū eğujēm? — io'e ip. — Abu-a'ōbi ēn jekukum? — io'e ip. — Iboam cuy ocemukūyjom ece — io'e ip.

³ — Eyju ma omukūyjom cuy epe'e — Jesus o'e.

⁴ — Abu-a'ōbi ġu juk João ijodiat mubatisasan oeku? Deus a'ōbi du? Ijodiat a'ōbi ġu xe'e? Iboam cuy epe'e omukūyjom — io'e cebe ip.

⁵ Gebuje o'jewa'ōxikxik ip jeweweju.

— Apēn xe'e acejede? — io'e ip. — “Deus a'ōbi” i'e buje cebe, “Apēnpuye juk eyetabut ġu João kay?” i je'e Jesus wuywebe — io'e ip. ⁶ — “Ijodiat a'ōbi,” i'e buje bit cebe, adeayū wuyabuğbuğ je'e wita'am, ixeyū xe João Deus a'ōbi juk adi oeku buye — io'e ip jewewebe.

⁷ Imēnpuye:

— Ocetaybit ġu abu-a'ōbi juk João ijodiat mubatisasan oeku iam — io'e ip cebe.

⁸ — Ōn tak jeymukūyjo ġu abu-a'ōbi ōn jekukum iam — io'e Jesus.

⁹ Gebuje Jesus wuymutaybitbinap ekawēn o'ğuwēn adeayū mukūyjo am Deus a'ōbi ōn jekukum iam.

— Aḡokatkat ibune'īcatpune o'taida uvabune — io'e Jesus. — Ixe uvadip iwat aḡokatkayū o'jomuy tip wiwi an. “Wekadaidip cuy epetipwiwi,” io'e cebe ip. O'ju wara'at ka be ixeyū aḡokatkayū tip wiwim pima. Ibun cīcā osunuy wara'at ka be — io'e.¹⁰ — Yaopap ekaxi bima tip iwat uva'a kay o'e. Jebuywatwat'ukat o'tomuwā.

— “Eju juy wekadaidip kay,” io'e. “Uva'a juy eyadojot oxat'am,” io'e. Imēn jebuywatwat'ukat o'ḡuju uva'a bum. O'jēm. Jay. Oajēm uvadip pe. Imēnpit tip wiwi'ukayū ibuywatwat'ukat o'yamupāupā tip iwat buywatwat'ukat. O'ḡujēm ip tip pewi. Ibui puḡ ma o'ḡujēm ip. Pūḡ'a dak ip o'yaūm ḡu cebe. Jebui puḡ ma o'jepit tip iwat pe — Jesus o'e.

¹¹ — Ibocewi tip iwat wara'at o'ḡuju uva'a kay jebuywatwat'ukat.

— “Eju juy uvadip kay wekadaidip kay,” io'e wara'at pe. “Uva'a juy eyadojot oxat'am,” io'e.

— Xerewun. O'jēm ibuywatwat'ukat. Jay. Oajēm uvadip pe. Imēnpit ixe wara'acat tak o'ḡujēm ip. Ixe dak ip o'yaokaka jījā. Warēmtaḡ ma o'jukuk ip. Ibui puḡ ma o'ḡujēm ip. Pūḡ'a dak ip o'yaūm ḡu cebe. Jebui puḡ ma o'jepit kadai iwat pe — io'e.

¹² — Ibocewi wara'at o'ḡuju uva'a kay jebuywatwat'ukat. Ixe wara'acat oajēm tip pe. Ixe dak ip o'yamupāupā. Ixe dak o'ḡujēm ip tip pewi. Jebui puḡ ma o'jepit tip iwat pe — io'e.

— Imēn kadaidip wiwi'ukayū ebapūḡayū o'ḡujēm tip pewi. Tip iwat buywatwat'ukayū o'ḡujēm ip. Ebapūḡ em ip ibui puḡ ma o'ḡuyipit kadaidip iwat kay.

¹³ — Imēneju tip iwat o'jekawēn jewebe ma.

— “Apēn paxi oce?” io'e jewebe ma. “Okpot cuy oḡuju tip kay yabum,” io'e. “Oxe ikukpin cīcāat cuy oḡuju. Ibuyxim ma ip okpot jukuk,” io'e jewebe ma.

¹⁴ — Kadaidip tip iwat jekpot o'ḡuju tip kay. Xerewun. O'jēm. Jay. Oajēm tip pe. Imēnpit ipot co buje, tip wiwi'ukayū o'jekawēn jewewebe.

— “Ga'a tip iwat ipot ayaoka,” io'e ip jewewebe. “Cebay e'ū buje, teku soat je'jat jebay'ūm pubut,” io'e ip. “Tip kukan je'e,” io'e ip. “Ga'a ayao-

ka. Wuyju ma ibubut ajat. Wuyju ma tip kukan ace-sop," io'e ip jewewebe.

¹⁵ — Tip iwat ipot o'tujujēm ip tip pewi. Kacūg kay o'tujowat ip. Ipot'ūm o'yaoka ip — io'e Jesus imutaybitbin.

— Apēn je'e tip iwat jekpot'ūm o'yaoka'iaiyū be? — io'e Jesus ja'ījojomayū be. ¹⁶ — Oḡuwēn ey-webe. Kadaidip iwat je'ju tip wiwi'ukayū kay. Yaoka ip. Warara'acayū jomuy ixeyū'ūm'ūm tieg jekadaidip wiwi an — io'e.

— Cēm tu? — io'e Jesus ekawēn cocoayū. — Imēn xe'e je'e? — io'e ip Jesus pe.

¹⁷ — Icēmān — io'e Jesus. — Omuwēgaptup imēn e'em:

"Ite'a wita'a xipat ḡu," io'e uk'a muymuy'ukayū jewewebe, i. Ite'a o'yaxik ip, i. Imēnpit o'yaxikiat'a xipat cīcāat'am o'e, i. Wara'at'a muy-cemap'am o'e ce'aedup puxim, i.

Imēn e'em Deus ekawētup-omuwēgaptup — io'e Jesus. ¹⁸ — Iḡo'a jejewi je'at puje, o'jewenōmnōmnōm kuka. Ijodiat ceje iḡo'a at puje, tōm ā kuka o'e ip — io'e.

Iboap ekawēn o'ḡuwēn Deus a'ōbi ōn jekukum iam ixeyū mukūyjoap ojuy.

¹⁹ O'ya'ījojo'iaiyū oitakomān Jesus kay ibo ekawēn cocom puye-Moisés ekawēn imutaybitbin'ukayū, paīyū kukukayū dak.

— Jesus ijop ekawēn o'ḡuwēn wuymukorēm ām — io'e ip jewewebe.

Imēnpuye Jesus pu ojuy o'e ip. Imēnpit iparara o'e ip adeayū buxim. ²⁰ Ixeyū dak dinheiro o'ḡūm aḡokatkayū be Jesus ekawēn puyxijo am.

— Jewexe juy Jesus ekawēn kay epeku — io'e ip. — Ixe dobatban cuy epeku — io'e ip cebe. — Ixe ekawēn puyxijojom cuy epeku — io'e ip. — Warēm-taḡ ma aco'i jekawēn — io'e ip. — Warēm-taḡ ma cekawēn puje, iecuḡap kay juy atujowat — io'e ip. — Iecuḡap a'ōbi acā yaoka but wuywebe — io'e ip.

O'ju ip Jesus kay. Jay. Oajēm ip.

²¹ — Tapu — io'e ip. — Ocetaybit cedağ ma ên kawênwên iam. Cedağ ma ên ocemutaybitbin tak — io'e ip cebe. — Kacûğ kadi kay ġu ên ağ- -badiat kay acā — io'e ip.

Imên o'e ip ya'ijoyoayū muğuykuku ojuy Jesus kay oceju iam.

²² — Cedağ tu exe wuywebe dinheiro ūm âm soat xe ya'ōbuyxiat pe- -wuyeipi kukat pe- -César be? Aceğūm ġu xe'e? — io'e ip Jesus pe.

²³ Jesus pit o'e jewebe ma: — Iteyū wekawên puyxijo ojuy — i.

²⁴ — Dinheiro isurūğat cuy epetojot okay — io'e Jesus cebe ip- -jedobatbanayū be- -jekawên puyxijojo ojuyacat pe.

— Juku — io'e ip.

O'ğubapuk cebe.

— Abu-biōğbuk ija cebe? — io'e. — Abu-butet tak? — io'e.

— César biōğbuk- -soat xe ya'ōbuyxiat biōğbuk — io'e ip. — Ixe butet tak opop cebe — io'e ip.

²⁵ — César emukaypin cuy epeğūm cebe — io'e. — Deus emukaypin pit cuy epeğūm cebe — io'e Jesus.

²⁶ Jesus ekawên puyxijo ba'ore o'e cebe ip soat etabun. Cede ba'ore o'e ip. Mūğ ma osodop ip.

— Itaybit cīcā teku jede am — io'e ip. — Ya'ō- muypit pa'ore wuywebe — io'e ip jewewebe.

²⁷ Saduceuyū oajēm Jesus kay. Saduceuyū Judeuyū dak osodop ip. Tūybe wuye'ū buje acejetait'ū- ma waram iān o'e ip. O'jekawên ip Jesus eju.

²⁸ — Tapu — io'e ip. — Moisés Deus pe wuya- wēwēaptup cuk adi o'tupmubararak ocewebeaptum — io'e ip. — Imên e'em ibodup:

Ağokatkat wağō'ūm e'ū buje, ikitpit puk cuy jewebumūn jewago'ūm tayxibuk eju itayxibuk i'it'et'ūm pima, i. Jewebumūn cuy imu'ukreğ am, beki- cat muaypan am jewağō'ūm tieğ, i.

²⁹ Imên Moisés o'tupmubararak — io'e ip.

Ğebuje 7 beayū o'ğuwên ip Jesus pe- -ikitpitpiyū.

— Koapat o'jewebumün. Ixe koapat'üm oe'ü jekpotpet'üm pima ma — io'e ip. ³⁰ — Gebuje jewaḡo'üm tomujuat o'jewebumün jewaḡo'üm tayxibuk eju. Ixe tomujuat'üm oe'ü jekpotpet'üm pima ma'ḡuto — io'e ip. ³¹ — Ibocewi warara'acayū o'jewebumünmün jewaḡo'üm tayxibuk eju 5 beayū-koapat tayxibuk eju -pūḡ eju ma. Soat ip o'jewebumünmün ceweju. Jekpotpet'üm pima ma oe'ü'ü ip soat ma — io'e ip. ³² — Soat ip ce'ü buje, ayacat'üm tak oe'ü. ³³ Soat o'jewebumünmün ceweju 7 beayū. Imēneju waram wuyetait puje, abu-tayxim xe'e je'e? — io'e ip Jesus pe.

³⁴ - ³⁵ Gebuje Jesus o'jekawēn Saduceuyū be.

— Ijodiat ma jewebumünmün — io'e. — Waram o'jetait'iaiyū bit jewebumünmün ḡu. Deus ixeyū o'ḡutait ce'ūap tomukadi. Jewebumünmün ḡu ip. ³⁶ Waram o'jetait'iaiyū waram ḡu je'ū, Deus ekawēn tojot-jot'ukat puxim ip puye. Deus ipotpoyū ip, Deus ixeyū o'ḡutait ce'ūap tomukadi buye — io'e Jesus. ³⁷ — Napa ma eyju e'em "Waram acejetait ḡu," i. Waram epyetait — io'e. — Waram acejetait wuye'ü buje iam cuk adi o'ḡutaybitbin Moisés — io'e. — Ixe Moisés tipsopat ekawēntup o'tupmubararak. "Deus Abraão kukukat, Isaque kukukat tak, Jacó kukukat tak," i juk o'e Moisés, ce'ü'ü ip puje. ³⁸ Deus ce'ūat kukukat ḡu -itaicat kukukat acā. Imēnpuye wuyetaybit ixeyū'üm'üm waram o'jetait ce'ūap tomukadi iam. Soat itait Deus xe-itaicayū, waram o'jetait'iaiyū dak — Jesus o'e.

³⁹ — Etaybit cīcā ma jede am — io'e Moisés ekawēn imutaybitbin'ukat.

⁴⁰ Ya'ōbabi'üm ip o'e Jesus a'ōbu am.

⁴¹ Jesus pit o'e cebe ip:

— Adeayū e'em "Deus emunaē Davi naxeḡebit," i — io'e Jesus cebe ip. ⁴² — Imēn e'em Davi Salmodup pe:

Deus o'e okukukat pe: "Xik'i abik oba'at kadi," i. ⁴³ "Ekay itakomaat a'ōbacaap oḡu'üm," i. "Kūyjobit jee-dop ip a'ō kay," i — io'e.

44 — Imēn Davi e'em Salmidup pe- -jebibodonap-
tup pe — io'e. — Davi o'e Deus emunaē be “Oku-
kukat” i. Imēnpuye Deus emunaē Davi naxegebit acā
ḡu osunuy. Davi kukukat tak osunuy — io'e Jesus
cebe ip.

45 Gebuje Jesus o'jekawēn jewēju etaybitbinayū
eju. Doze beayū eju o'jekawēn adeayū a'ōpiju.

46 — Eyday'em'um cuy epesop Moisés ekawēn
eymutaybitbin'ukayū be eymuḡuykukuap puxim —
io'e. — Tūybe soat podi ma oca'ōbuyxi iān e'em ip
— io'e. — Jesay ukpi wēnēḡwēnēḡān ip jekukum soat
pe jejojoan. Icocok cīcā ip warara'acat pe ibuyxim
ikuk am soat etabutpe — io'e. — Kariwa yoboḡat
tūyap pe abik ojuy ip Deus eju kawēnwēnap'a be.
Peta kabia be dak cucum ip kariwa yoboḡat tūyap
kay yabikap ojuy. 47 Aḡokatkat'ūm e'ū buje, itayxi-
buk pubut pupum ip. Cekawēn wa'ūm cīcā ip Deus
eju warara'acat pe “Eyetaybit cīcā Deus eju kawēn
ām” i'e am cebe ip. Jewexe Deus eju ip kawēnwēn.
Deus xe ḡu ip ya'ōbuyxi- -jewexe acā. Imēnpuye soat
podi ma ipiat supi'ajo ip — io'e Jesus.

21 Gebuje Jesus o'jeak dinheiro mūn'a kay-
isurūḡat mūn'a kay. Dinheiro mūn'a Deus
eju kawēnwēnap'a be o'yanuy. Ibutut adeayū dinhei-
ro mōḡmōḡ ip o'e iḡo'a be. Xeresu ḡu o'jomōḡmōḡ ip
ya be.

2 Gebuje Jesus ayacat o'jojojo- -itop'ūm e'ūibit-
tadaybocat. Ixe ayacat dinheiro isurūḡat o'jomōḡ
iḡo'a be- -xepxep ā o'jomōḡ. Xepxepatei teiboḡ ḡu
osodop- -tei'it ma.

3 - 4 — Icēmān ōn e'em eywebe — Jesus o'e je-
xeayū be. — Ibutut adeayū ma ade o'jomōḡmōḡ ip.
Yopit ma bit jexewiat'in o'jomōḡmōḡ ip ya be jedi-
nheiro'in. Ixe ayacat pit soat jexewiat o'jomōḡ jedi-
nheiro. Ka'ūma ma o'jepoyat cexe. Tei'icat o'jomōḡ.
Inaka soat o'jomōḡ jedinheiro. Jexat pu ojuyap tak
o'jomōḡ. Imēnpuye Deus xe ayacat teiboḡ o'jomōḡ

tei'it ma'ġu wuyxe. Deus xe warara'acat podi ma o'jomōġ — io'e Jesus.

⁵ Ġebuje ceweju etaybitbinayū o'jekawēn Jesus eju.

— Tapu, ak'i juy ece — io'e ip. — Deus eju kawēnwēnap'a yadip cīcā! — io'e ip. — Wita'a muġēġē'a yadip cīcā! — io'e ip. — Adeayū juk adi jedinheiro o'ġūmġūm yamudipapteim — io'e ip.

⁶ — Icēmān — io'e Jesus cebe ip. — Yadip cīcā ġasū. Ġaxīn ma bit soat'a je'aedu. Xepxep'a jewa'a-webotbon ġu je'e wita'a — io'e Jesus.

⁷ — Tapu, puġūn xe'e je'aedu? — io'e ip. — Ajo je'bapuk ġasū je'aedu iam ocemutaybit am? — io'e ip.

⁸ — Eyday'em'um cuy epesop warara'acat pe ey-muġuykukuap puxim! — io'e. — Napapa'ukayū jajēm. “Cristo ōn,” i napa ma je'e ip warara'acat pe. “Ijodiat taxijojo'ukan Deus emunaē ōn,” i napa ma je'e ip. “Ġaxīn ma Deus soat kukukan je'e,” i napa ma je'e ip. Eyetabun ġu juy epesop ixeyū ekawēn kay — io'e. ⁹ — Soat kaka daġ nopagōġōm je'e ip-ijoxīn ma, wūy dak. Nopagōġōmap awēġ tobuxik puje, eyaġuykorereren ġu juy epesop. Imēn cuy je'e koam. Imēnpit soat i'ūmap kabia oajēm ġu buk.

¹⁰ — Pūġ eipi watwat nopagōġōm je'e wara'at eipi watwat eju. Pūġ ka watwat nopagōġōm je'e wara'at ka watwat eju. ¹¹ Soat kaka daġ ipi jexixi. Soat ka daġ je'e reap. Soat ka daġ je'e iwātaxipipi ade. Xipat'ūm cīcāat je'bapuk. Wuymparararanap tak je'bapuk kabi be — io'e.

¹² — Iboap ebapuk awap itakomaayū jeydaomūn. Ipiat supi'ajoat ip eywebe. Jeydujowat ip Deus eju kawēnwēnap'a be Judeuyū be eymuymuy am. Dao-mūnmūnap'a be ip jeymuōm. Jeydujowat ip iecuġap dopabe ika kukukayū dopabe dak, okay eyetabut puye. ¹³ Ixeyū dopabe bima juy kawēn idipat epeġuwēn cebe ip — io'e. ¹⁴ — “Apēn paxi oce'e cebe ip?”

i'ümġu juy epe'e. "Apên paxi ocewedayo?" i'ümġu dak cuy epe'e. Eyaġuybabi'üm'üm ġu juy epesop apên paxi ocewedayo iap kay. ¹⁵ On ma jeymutaybin jedem ixeyū dopabe bima. Eya'ômuypit pa'ore je'e cebe ip eykay itakomaayū be — io'e. ¹⁶ — Eyebay ma jeyūm eykay itakomaayū be eyaoka am, eywaġoyū dak, eybadipyū dak, eybureyū dak. Ixeyū ma ey'in yaoka pūġpūġ. ¹⁷ Soat eykay ġu jijā je'e okay eyetabut puye — io'e. ¹⁸ — Ōn pit soat em aġ oġuy eykay. Soat em ōn xipan jeykuk. ¹⁹ Eyetabun cuy epesop okay ipiat'ajojom ma'ġu eyju. Soat em Deus xe epesop eye'ū buje — io'e Jesus.

²⁰ — Sorarayū be Jerusalém ka mukoreren puje, eyetaybit epesop ġaxīn ma ip ikamu'üm iam. ²¹ Jerusalém ka koreren pima, jewat cuy ip co'a kay jao-kaap puxim Judéia eipi watwat. Jeka bewi juy ip je'jēm ġu ikaboġatka watwat. Ikaboġatka kay ġu juy ip jenapōn koġūnpi watwat. ²² Jenapōn ġu juy ip ixekabia be Deus jekay itakomaayū be jeweig puye. Ixe soat pe jeweik jemudupmubararaktup ekawēn taġ-kuyjeatup ekawēn taġ — io'e.

²³ — Yukreġayū ipiat supi'ajojo jijā ixekabia be, jekūm pe je'it kukayū dak. Judéia eipi watwat ipiat supi'ajojo jijā. Deus ipiat supi'ajoat Judeuyū be itakoma jijā buye. ²⁴ Cekay itakomaayū Judeuyū yaokaka pajam. Warara'acat ip taomūn. Taomūnmūn ip tujowat wara'at ka daġ. Jerusalém ka sukamu'üm Judeu'ūmayū. Imēn je'bapuk Judeu'ūmayū soat kukukan pima — Jesus o'e.

²⁵ — Iwaruat je'bapukpuk kaxiepiat pe, kaxiaat pe dak, kasopta be dak. Soat ka watwat yaġuybabi'üm'üm cīcā je'e. Yaġuybabi'üm'üm je'e ip soati jediexixi jijā buye, tipodoy jijā buye dak. ²⁶ Soat kabi beacat muycemcemap jearere. Soat ya'ōca'üm je'e jeparara pibun. Ya'ōca'üm je'e ip ipararuat ebapuk puje — io'e.

²⁷ — Ġebuġe ip oġo — io'e Jesus. — Kabikereremat

eju oajēm puje ip ojo — io'e Jesus. — Soat waḡo òn. Ixeyū ojo. “Ka'ūma ma ejo'iat ya'òbacaat,” i je'e ip owebe — io'e Jesus. — “Soat podi ma edip,” i je'e ip owebe — io'e Jesus. ²⁸ — Iboap ebapuk puje, ḡaxīn ma taxijojom epe'e. Imēnpuye eycokcoḡ cuy epesop. Eya'òcam cuy epesop — io'e. Imēn Jesus o'jekawēn cebe ip.

²⁹ Ḡebuje Jesus wuymutaybitbinap ekawēn o'ḡuwēn jexeayū be.

— Figueira'ip cuy epeyopcoco, wara'at'ip tak. ³⁰ Tupkireatup cēm puje, eyetaybit ḡaxīn ma koato je'e iam. ³¹ Imēnpuxim ipararuat ebapuk puje, eyetaybit epe'e ḡaxīn ma Deus soat kukukan je'e iam — io'e.

³² — Icēmān òn e'em eywebe. Soat ḡasūacayū e'ū awap soat je'babuk wekawēn taḡ. ³³ Kabi i'ūm, i'pi dak. Wekawēn pit i'ūm ḡu. Soat em wekawēn kay itabut jeedop ip adeayū — io'e.

³⁴ — Aḡ cuy epesop wajēmap kay — io'e. — Puybitxim ḡu juy epesop kawedixim ḡu dak, tarekrek pupuxim ḡu dak — io'e. — Aḡ cuy epesop wepit pujeap kay. ³⁵ Aḡ'ūm pima epeyekuy wepit puje puca ekuyap puxim ibu buje. ³⁶ Imēnpuye soat em ma aḡ cuy epesop wepicap kay. Soat em cuy epeyekawēn Deus eju — io'e. — “Bay, ocemutaxin cuy eḡuy ipiat'ajoap puxim,” i juy epe'e Deus pe. “Bay, ocebuywatwan cuy eḡuy soat waḡo kay ocajēm puje ocesūsūnap puxim,” i juy epe'e cebe — Jesus o'e.

³⁷ - ³⁸ Soat kabia Jesus adeayū mutaybitbin'uk osunuy Deus eju kawēnwēnap'a be -yaboḡat'a be. Kabia'isum adeayū je'aweroro'uk ip osodop iḡo'a be Jesus ekawēn com. Kabiogkabiog'i bima o'jepitpit Jesus Oliveira dip'a bicūḡpe xexen.

22 Peta ajēm pima paīyū kukukayū Jesus aoka ojuy ip, Moisés ekawēn imutaybitbin'ukayū dak. Peta butet Páscoa i osunuy. ²Ixe epeta bima Judeuyū pāo'a o'o'uk osodop- -yamuyuhuhuptōm-tēm'ūmat'a. Soat kabia Jesus aoka ojuy oekuku ip paīyū kukukayū, Moisés ekawēn imutaybitbin'ukayū dak.

— Apēn ġu xe'e aceyaoka? — io'e ip jewewebe. Adeayū eta'ūm pima ip yaoka ojuy oekuku, adeayū buxim iparara ip puye.

³⁻⁴ Ġebuġe Judas o'ju paīyu kukukayū kay oi-bu'un Jesus kay buye. Kūyjobit o'e Satanás a'ō kay. Ixe Judas xepxep putet osunuy. Iscariote i wara'at ibutet osunuy. Doze beayū'in osunuy ixe. Deus eju kawēnwēnap'a wiwi'ukayū kukukayū kay dak o'ju. Jekawēn ām ceweju ip o'ju. Oajēm cekay ip. Jay.

— On ma Jesus oġūm eywebe yaoka am — io'e. — Apēn xe'e oġūm eywebe? — io'e Judas.

⁵ Icokcok cīcā ip o'e paīyū kukukayū, Deus eju kawēnwēnap'a wiwi'ukayū kukukayū dak.

— Ocewebe Jesus ūm puġe, dinheiro oce'ġūm ewebe iūmapteim — io'e ip Judas pe.

⁶ — Ha'a, dinheiro juy eġūm owebe — io'e cebe ip.

Imēneju soat kabia paīyū be Jesus ūm ojuy oeku Judas. Adeayū eta'ūm pi iūm ojuy oeku.

⁷⁻⁸ Peta ajēm puġe, Jesus Pedro o'ġuju ikaboġatka be, João dak. Ixe epeta bima Judeuyū pāo'a o'o'uk osodop ip yamuyuhuhuptōmtēm'ūmat'a. Ovelha aokaka'uk ip osodop Páscoa epeta bima. Imēnpuye Jesus Pedroyū o'ġuju soat muxipan am.

— Ikaboġatka be juy epeju — io'e. — Ovelha juy epejat. Epeyaoka juy. Epejoyoy juy wuywebe i'o am Páscoa kabia be — io'e cebe ip- -Pedro be, João be dak.

⁹ — Pu'a be xe'e oceyoyoy wuyxat? — io'e ip.

¹⁰ — Eya'ōpicūġcūġ cuy epesop! — io'e. — Ika-boġatka be eyōm puġe, aġokatkat eydopabijuk- -idibi mūn'a kukat. Ixe nomuju juy epeju — io'e. — Ixe

be uk'a be iōm puje, eyju dak epeōm iġo'a be — io'e. ¹¹ — Uk'a iwat pe juy epeyekawēn. “Ocemutay-bitbin'ukat o'jewa'ōmudot ewebe,” i juy epe'e cebe. “ 'Pu'abi be ebikuy omujum jekōn ām oweju etaybitbinayū eju Páscoa kabia bima?’ i juk o'e ocemutay-bitbin'ukat,” i juy epe'e uk'a iwat pe — io'e Jesus. ¹² — Uk'a iwat yabimubapuk eywebe umat'abi, yaboġat'abi, soat opop iat'abi — io'e. — Ibo'abi be juy ovelha epejoyoy wuyxan — io'e cebe ip. ¹³ O'ju ip ikaboġatka be. Apēn cuk adi Jesus o'e cebe ip iap taġ o'tobuxik ip soat taġ. Ovelha o'joyoy ip iġo'abi be.

¹⁴ Jekōn pima Jesus o'jekawēn jemumujuyū eju-doze beayū eju. Kaxikxik'i osodop ip mesa be.

¹⁵ — Páscoa xat o pin cīcā ōn eyweju ijop epeta bima — io'e. — Ġaxīn ma juy ōn ipiat'ajom — io'e.

¹⁶ — Deus soat kukukan'ūm pima Páscoa xat ojo'o ġu. Imēnpit Deus soat kukukan pima, ojo'o waram — io'e.

¹⁷ Ġebuġe Jesus uva'abidi o'timuōm tikōnkōġap pe.

— Bay, ēn xipat cīcā — io'e Deus pe.

Tikōnkōġap o'ġūm jeweju etaybitbinayū be.

— Juku — io'e. — Epetikōn. Epetimu'ē'ē eywebe — io'e. ¹⁸ — Ijodi ġu waram uva'abidi otikōn. Deus soat kukukan pima bit, waram otikōn — io'e Jesus.

¹⁹ Ġebuġe pāo'a o'yabu.

— Bay, ēn xipat — io'e Deus pe.

O'yadakāt. O'yaūm cebe ip.

— Iju'a ojebit — io'e. — Eywebeam oje'ū. Ya'o buġe we'ūap kay juy ġebum epesop — io'e cebe ip.

²⁰ Jekōn epere buġe, uva'abidi o'tiūm cebe ip.

— Ijudi kōn puje, odoymukererenap kay juy ġebum epesop — io'e. — Ġasū Deus ikērēat ju'uk eywebewi odoymukereren puye, oje'ū buye. Ikērēat ju'uk eywebewi apēn kuyje ixe o'e iap taġ — io'e Jesus. ²¹ — Mesa be xik'i owejuat ma oūm okay itako-maayū be — io'e. ²² — Soat waġo ōn. Oje'ū apēn

cuk adi webay ibikuy osunuy iap tağ. Imēnpit Deus ipiat supi'ajoat oūmat pe — io'e.

²³ — Abu xe'e wuy'in kuka Jesus o'ğūm cekay itakomaayū be? — io'e ip jewewebe Jesus eju jekōn-kōnayū.

²⁴ Ğebu je Jesus eju etaybitbinayū o'jewa'ōbubu jeweweju.

— Abu wuy'in soat podi ma ya'ōbuyxian je'e? — io'e ip jewewebe.

O'jewa'ōxixkik ip. ²⁵ Jesus o'jekawēn cebe ip.

— “Kūyjobin cuy epesop wa'ō kay,” i'e'em ijodiat kukukayū jebekitkit pe. “Kariwa yoboğat ōn,” i'e'em ip — io'e. — Ijodiat bure ip adeayū xe. ²⁶ Eyju bit imēn ğu juy epesop. Kariwa yoboğat pin pima, ya'ōbuyxi'ūmat puxim cuy epeku — io'e Jesus cebe ip. — Warara'acat kukukat pin pima juy ibuywatwan ip epesop — io'e cebe ip. ²⁷ — Abu kariwa yoboğat? — io'e. — Jekōn âm mesa be xik'iat tu? Ixat tojtjot'ukat ğu xe'e? Jekōn âm mesa be xik'iat ma kariwa yoboğat. Imēnpit eyxe bima wuyxat tojtjot'ukat puxim cuk adi ojekuku. Warara'acat puywatwan cuk adi ojekuku — io'e Jesus. ²⁸ Eybu'un ğu juk adi epesop okay, warara'acat a'ğū ipiat o'supi'ajoat owebe — io'e. ²⁹ — Kuy bima webay o'e owebe “Soat kukukan ecesūy,” i. Imēnpuxim “Eyju dak soat kukukayūm epesop oweju,” i ōn e'em eywebe. ³⁰ Ōn soat kukukan pima, wemesa be epeyekōn oweju — io'e. — “Eyju ikērēat kuğ Deus xe,” i epe'e kūyjobit'ūmayū be. “Eyju ikērēat kuğ ğu Deus xe,” i dak cuy epe'e kūyjobicayū be. Imēn epe'e Israel naxeğebitbit pe -doze be tiwatwat pe — io'e Jesus jeweu etaybitbinayū be.

³¹ — Simão — io'e Jesus Simão Pedro be. — Eya'ōpicūğ cuy — io'e. — Satanás kuy o'e owebe “Simão buyxijo pin ōn, itabut paxi je'e wa'ō kay iam,” i — io'e Jesus Simão be. — Satanás itabucayū xewi emujēm pim apēn wuyju tarekrekata mujēm-jēm taixee bewi iap puxim — io'e. — “Ha'a. Esu-buyxijo,” i juk oce Satanás pe — io'e Jesus. —

“Soat cuy esubuyxijo oweju etaybitbinayū,” i juk oce cebe — io'e Jesus. ³² — Imēnpit kuy ocekawēn Deus eju ewebeam. “Simão juy esubuywan itabucap epe-reap puxim,” i oce Deus pe — Jesus o'e. — Waram okay etabun pima, eykitpitpiyū juy esubuywan itabut cīcā am ip okay — io'e Jesus.

³³ — Kariwa, jeiwat ġu ōn — io'e Simão Jesus pe. — Obu'un ġu ekay — io'e. — Daomūnmūnap'a be dak cuy oju eburem. We'ūap kay ma juy oju eburem — io'e Pedro.

³⁴ — Pedro — io'e. — Sapokay ede'ūm awap, ebapūġ em “Ixe bure ġu ōn,” i ece'e — io'e Jesus pit.

³⁵ Gebuje o'jekawēn wara'acayū eju- jeweju etaybitbinayū eju.

— Patorōn kuġ'ūm cuk adi ōn eymuju, sako kuġ'ūm tak, bolsa kuġ'ūm tak, eyiuk kuġ'ūm tak — io'e. — Irerem tu juk adi epekuku? — io'e.

— Ka'ūma. Xipan cuk adi oceku — io'e ip.

³⁶ — Ġasū bit — io'e cebe ip — patorōn kuġ pima juy epetujowat eyekuap taġ — io'e. — Sako kuġ pima juy epetujowat. Payao kuġ'ūm pima juy eyeekabek epeteida ibu am — io'e. ³⁷ — Imēn e'em Deus ekawēntup-omuwēġaptup:

“Ikērēat muġēġē'ukat ēn,” i napa ma

ijodiat e'em Deus emunaē be, i.

Ibodup ekawēn taġ je'e ip owebe ġasū — io'e Jesus.

³⁸ — Kariwa, ak'i ece — io'e ip. — Xepxep oceju payao kuġ — io'e ip.

— O'e ma burut — io'e.

³⁹ Ibocewi o'jēm ip jekōnkōnap'a bewi umat'abi bewi.

Jesus o'ju co'a kay- -Oliveira dip'a kay- -cucu'uk osunuyiap'a kay. Ceweju etaybitbinayū dak o'ju to-muju. ⁴⁰ O'jekawēn ceweju ip yajēm puje.

— Epeyekawēn cuy Deus eju eywebe ikērēat kukap puxim — io'e.

⁴¹ Jesus o'jewerūġ jeweju etaybitbinayū xewi. Bosusu o'ju. Jaġepūġ ma o'e.

Ĝebuje Jesus o'jekawēn Deus eju. Jēg'aecōgōgō o'jekawēn.

⁴² — Bay, ebu'u bima bit ipiat esupi'ajoat ĝu owebe — io'e Deus pe. — Imēnpit obikuyap taĝ ĝu juy ece-ebikuyap taĝ acā — io'e.

⁴³ Ibocewi Deus ekawēn tojtjot'ukat o'kop kabi kadiwi Jesus a'ōmucan am.

⁴⁴ Biĝ ma ja'ōbuyxim o'jekawēn Deus eju. Jeĝuy-cūĝat pibun ma oe'ū pin. Topa'adiayey o'e toy buxim, iĝuycūĝ cīcā buye. O'jedopadoyebot ipi ju.

⁴⁵ Deus eju jekawēn epere buje o'āy. Kirik'āy. Jeweju etaybitbinayū kay oajēm. Jay. Ixexet ma ip o'tobuxik. Ixexet ip jeĝuycūĝap kuĝ ip yoboĝ cīcā buye.

⁴⁶ — Apēnpuye eyxexet? — io'e. — Epeyewurūĝ cuy! — io'e cebe ip. — Epeyekawēn cuy Deus eju eywebe ikērēat kukap puxim — io'e.

⁴⁷ Warara'acayū dak oajēm Judas eju. Ixe Judas warara'acayū wap oajēm jaku Jesus iam imutaybin am ip. Ixe doze beayū'in osunuy.

Oajēm Jesus kay Judas. Oajēm Jesus aĝobu kōnām tobede am.

⁴⁸ — Judas — io'e Jesus. — Soat waĝo ōn — io'e. — Waĝobu kōn tu ēn oūm ām okay itakomaayū be? — io'e.

⁴⁹ Ĝebuje Jesus eju etaybitbinayū itaybit o'e Jesus pum ip iam.

— Kariwa, oceyaoka du ip pajam? — io'e ip Jesus pe.

⁵⁰ Pūĝ ixeyū'in tak paīyū kukukat puywatwat'ukat o'suĝuybu'uk pajam. Tep. Iba'at kadiat ĝuybu o'suĝuybu'uk.

⁵¹ — Imēn ĝu bit epesop! — io'e Jesus jeweju etaybitbinayū be.

Cay. O'suĝuybumucay. O'suĝuybumuwedap. Ĝuybudip o'e.

⁵² Ĝebuje Jesus o'jekawēn Judas ejuayū eju-paīyū kukukayū eju, Deus eju kawēnwēnap'a wiwi'ukayū kukukayū eju dak, Judeuyū kukukayū eju dak.

— Epajēm odaomūn ām ibukurukat taomūnap puxim — io'e. — Eyba'ip kukuḡ epajēm — io'e Jesus. ⁵³ — Soat kabia Deus eju kawēnwēnap'a be juk adi oḡuy. Epesot ḡu juk adi odaomūn ām iḡo'a be bima — io'e. — Ḡasū bit okuk put eywebe eybikuyap taḡ. Eybikuyap taḡ eyeku but ḡasū. Kabiokboḡ taḡ jekuku'ukayū kukat ijodiat kukat ḡasū. Sata-nās ijodiat kukat ḡasū. Eyju dak kūyjobit ixē a'ō kay — io'e Jesus.

⁵⁴ Judas ejuayū Jesus o'jat. O'tujowat ip paīyū kukukat duk'a kay. Pedro dak o'ju Jesus nomuju. Wūy ma oeku Jesus nomuju. Oajēm ip.

⁵⁵ Ḡebuje daxa o'ḡusop ip paīyū kukat tuk'a xe, uk'a ekorara be. Oabikbik ip daxa etako be. Pedro xik'i o'e ixeyū parakpe.

⁵⁶ Ḡebuje ayacat Pedro o'jojoho- -yaypan'isuat- -paīyū kukukat puywatwat'ukat. O'jojoho Pedro daxa ekabia daḡ puye. O'jeak cekay.

— Ixe dak Jesus eju oeku — io'e ixē ayacat.

⁵⁷ — Ka'ūma — Pedro bit o'e napa ma. — Tū'ū, ixē bure ḡu ōn — io'e napa ma jebuap puxim.

⁵⁸ Wara'acat Pedro o'jojoho ibun'ūm pima aḡo-katkat.

— Ēn tak ejeku Jesus eju — io'e cebe.

— Ka'ūma — Pedro o'e. — Jekukum ḡu ōn ce-weju. Ojeku ḡu ōn pit ceweju — io'e napa ma.

⁵⁹ Pūḡ hora kap puje, wara'acat o'jekawēn.

— Icēmān ēn ma Jesus eju ejeku — io'e. — Galiléia eipi bewiat ēn — io'e Pedro be.

⁶⁰ — Tapu — Pedro bit o'e. — Wetaybit ḡu apēn ēn e'em iam — io'e napa ma. — Ixe bure ḡu ōn pit — io'e napa ma.

Sapokay o'jede iboam i'e buje. Kariwa Jesus o'jekorepēn.

⁶¹ Ḡebuje o'jeak Pedro kay. Pedro dak o'jeḡebu Jesus a'ō kay- -kuy bimaap a'ō kay.

— Ebapūḡ em napa ma ece'e "Jesus bure ḡu ōn," i — i juk o'e Jesus Pedro be.

⁶² Kacūḡ kay Pedro o'ju. Jesus bure ḡu ōn iap kay o'jeḡebu. Imēnpuye o'tōn cīcā.

⁶³ Iwiwi'ukayū Jesus o'jowayway- -o'jat'iaiyū. Jesus o'ḡupokupok ip. ⁶⁴ Jesus eta o'sutamuekabek ip paḡōm.

— Abu emupok exe? — io'e ip cebe iwaywayway am.

⁶⁵ Jesus o'jomuymuy jījā ip. Warēmtaḡ ma ip Jesus o'jukuk.

⁶⁶ Ḡebuḡe Judeuyū kukukayū o'je'awero ip, paīyū kukukayū dak, Moisés ekawēn imutaybitbin'ukayū dak. Judeuyū awēwē'ukayū yoboḡayū ip osodop. Kabia'isum ip o'je'awero. Jesus o'tujowat ip ixeyū kay. Waram ḡuto Jesus o'jowaywayway ip.

⁶⁷ — Ēn tu Deus emunaē? — io'e ip. “Cemunaē bima bit cuy ece ocewebe,” io'e ip Jesus pe.

— Ōn eymukūyjo bima, okay eyetabut ḡu kuka epe'e — io'e Jesus pit. ⁶⁸ — Omukūyjom cuy epe'e i ōn e'em eywebe bima, kuka omukūyjom ḡu epe'e.

⁶⁹ Imēnpit soat waḡo ōn. Ḡaxīn ma oabik Deus ba'at kadi- -soat podi ma ya'ōbacaat ba'at kadi. Ixe jo'i wa'ōbaca oḡuy — io'e Jesus. — Jewejojoi ma ocesop oca'ōbacaap kuḡ — io'e.

⁷⁰ — Deus ipot tu ēn? — io'e ip Jesus pe.

— Eyju ma iboam e'em — io'e.

⁷¹ — Apēḡām kuka warara'acat atakoy Jesus muy am? Kuy o'e! Kuy ixekawēn oceya'ījojo — io'e Judeuyū kukukayū. Deus muymuy xeku — io'e ip napa ma.

Oibu'un ip awerom.

23 Gebuḡe Jesus o'tujowat ip Pilatos kay- -iecuḡap kay. Jesus o'jomuymuy ip Pilatos pe.

² — Ite aḡokatkat warēmtaḡ ma ocemutaybitbin — io'e ip Pilatos pe napa ma. — “Kūyjobin ḡu juy epesop wuyeipi kukat a'ō kay,” i'e'em Jesus ocewebe — io'e ip napa ma. — “Eyedinheiro juy epeḡūm ḡu César be- -wuyeipi kukat pe,” i'e'em ocewebe — Judeuyū napa ma o'e Pilatos pe. — “Adeayū kukukat

ôn," i'e'em teku — io'e ip napa ma Judeuyū. —
 "Deus emunaē ôn," i'e'em teku — io'e ip.

³ — Judeuyū kukukat tu ēn? — Pilatos o'e Jesus pe.

— En ma iboam e'em — io'e Jesus.

⁴ — Ite aḡokatkat ikērēat kuḡ ḡu oxo bit — io'e Pilatos soat pe paīyū kukukat pe, je'awero'ibiyū be dak.

⁵ — Warēmtaḡ ma teku ebekitkit mutaybitbin — io'e ip napa ma Pilatos pe. — Koap warēmtaḡ ma Galiléia eipi watwat mutaybitbin oekuku. Soat taḡ imutaybitbin oekuku- -Judéia eipi daḡ. Ḡasū ijoce oa-jēm. Teku ebekitkit mubu'u'un César a'ō kayap puxim — io'e ip napa ma.

⁶ — Teku Galiléia eipi bewiat tu? — io'e Pilatos cebe ip.

— Hm hm — io'e ip.

⁷ Imēnpuye Pilatos Jesus o'ḡuju Herodes kay, Herodes Galiléia eipi kukukat puye, Jesus tak Galiléia eipi bewiat puye dak. Ixe Herodes Jerusalém ka be osunuy ixeyū kabia be.

⁸ Oajēm ip Herodes kay. Herodes Jesus o'jojojo. Icokcok cīcā o'e ijojom pima. Kuy bima Herodes ijo pin osunuy Jesus awēḡ o'yawēḡtobuxik puye.

— Wuywebe i'e ba'oreat paxi ḡubapuk wetabut-pe? — io'e jewebe ma.

⁹ O'jekawēn Jesus eju.

— Abu-a'ōbi ēn jekukum? — io'e cebe. — Ojo-jojo ḡu buk iat mubapuḡ tu ebu'u wetabutpe? — io'e cebe.

Mūḡ ma osunuy Jesus pit. ¹⁰ Paīyū kukukayū dak Jesus o'jomuymuy jījā, Moisés ekawēn imutay-bitbin'ukayū dak.

¹¹ Herodes tak Jesus o'jowayway jījā. Warēmtaḡ ma Jesus o'jukuk, cesorarayū dak. Cesay idipat o'ḡuôm ip Jesus pe iwaywayway am.

Gebujep waram Jesus o'ḡuju Pilatos kay. ¹² Ixe kabia dak Herodes Pilatos burem o'e. Kuy bima itakoma jījā osodop ip jewewekay.

¹³ Ĝebuĵe Pilatos paĭyū kukukayū o'tomuwā, Judeuyū kukukayū dak, warara'acat tak Judeuyū.
¹⁴ O'jekawēn cebe ip.

— Ite aĝokatkat epetojot okay — io'e. — “Ite aĝokatkat warēmtaĝ ma ocemutaybitbin,” i juk epe'e owebe — io'e. — Kuy ocekawēn ceweju eyetabun — io'e. — Oxe bit ikērēat o'ĝujurūĝ ĝu- -pūĝ em tak ka'ūma — io'e. — Te'e ma eyju e'em “Ikērēat kuĝ teku,” i — io'e. ¹⁵ — Herodes tak o'jekawēn ceweju — io'e. — Herodes xe dak ikērēat kuĝ ĝu — io'e. — Imēnpuye waram Jesus o'tujupicat ip ocekey. Cedaĝ ĝu ocewebe bit yaoka am. ¹⁶ Imēnpuye imupok puje oĝuwekap jekpiwan ma iju am — io'e Pilatos.

¹⁷⁻¹⁸ — Ap! — io'e adeayū ya'ōberen Pilatos pe. — Ite aĝokatkat eĝujēm ĝu — io'e ip. — Eyaoka ma! — io'e ip. — Barrabás pit eĝujēm daomūnmūnap'a bewi. Ite aĝokatkat pit eĝujēm ĝu — io'e ip ya'ōberen.

Iĝo epeta bima Pilatos pūĝ ma daomūnmūnap'a beat mujēmjēm'uk osunuy. Ixe Barrabás daomūnmūnap'a be osunuy. ¹⁹ Kuy bima ixe Barrabás iecuĝap ebekitkit eju o'jenopaĝōĝōm. Jenopaĝōĝōm pima wara'acat o'yaoka. Imēnpuye daomūnmūnap'a be osunuy.

²⁰ Ĝebuĵe Pilatos ma Jesus muwekap ojuy o'e.

— Jesus ma oĝuwekap — io'e adeayū be.

²¹ Adeayū bit Jesus pamupayaat ojuy korosa be ce'ū ām.

— Jesus cuy epeyaokaat! — io'e ip Pilatos pe. — Jesus juy esubamupayaat korosa be ce'ū ām — io'e ip ya'ōberen.

²² — Apēnpuye dak osubamupayaat? — io'e Pilatos. — “Ikērēat o'ĝujurūĝ ĝu,” i ōn e'em — io'e. — Cedaĝ ĝu wuywebe yaoka am — io'e. — Oĝupukupokat acā. Imupukupok puje, juy oĝuwekap — io'e.

²³ — Ap! — io'e ip. — Jesus esubamupayaat korosa be — ixeyū bit o'e.

Imēn o'e ip ade em ma. Ya'ōberen o'jewāwā ip. Imēnpuye:

²⁴ — Iteyū bikuyap taĝ oce, biĝ ma cewāwāwāap

puxim ip — io'e Pilatos jewebe ma. — Ixeyū etabun imuwekap pa'ore owebe — io'e jewebe ma.

— Ha'a — io'e adeayū be-aweromayū be. — Eybikuyap tağ cuy oce — io'e Pilatos cebe ip.

²⁶ Imēnpuye Pilatos Barrabás o'ğujēmat daomūn-mūnap'a bewi- -iecuğap ebekitkit eju o'jenopağōğōm-iat o'ğujēmat- -wara'acat o'yaoka'iat o'ğujēmat- -adeayū o'joojuy imujēm ām'iat o'ğujēmat. Jesus pit o'ğūm adeayū be.

— Eybikuyap tağ cuy epe'e cebe — io'e Pilatos. Jesus o'jat ip.

²⁶ Ğebu je sorarayū Simão o'jat. Cirene ka bewiat o'jat ip- -koğūnpi bewi ajēm'ibit. O'jat ip Jesus korosa dujowan co'a kay bima. Korosa o'jomuy ip Simão a'ōpi'a jeje. O'tujowacat Jesus nomuju. ²⁷ Adeayū dak o'ju Jesus nomuju.

Aoyū dak o'tōn cīcā Jesus kay. Iğuycūğ cīcā ip o'e Jesus kay.

²⁸ Imēnpit Jesus o'jekorepēn cekay ip.

— Tū'ū'ūyū — io'e cebe ip- -Jerusalém ka wat-wat pe- -aoyū be. — Eyewewekay acā juy epetōtōn- -okay bit ka'ūma — io'e. — Ey'iyū kay dak cuy epetōtōn — io'e. ²⁹ — Ipiat epesupi'ajojo. Ipiat'ajojom pima soat je'e "İcokcok e'em i'it kapkap'ūmayū, i'it'it'ibit'ūmayū dak, i'it muytin'ūm'ibiyū dak," i — io'e Jesus. ³⁰ — Adeayū ce'ū pin je'e ixē kabia be ipiat'ajojom puye. "Ocejeje juy a'a'at ocemuy'ū ām," i je'e ip co'a be. "Ocemunēm cuy," i je'e ip co'a'ūn'a be — io'e. ³¹ — "Imēn yopkicat'ip kukuğ pima, apēn xe'e kuka yopkarawat'ip o'jukuk ip?" i'e'em eyju — io'e Jesus waayū be.

Imēn Jesus o'e cebe ip warēmtağ ip jekuğ puye.

³² Xepxepayū dak o'tujowat ip Jesus eju yaoka am- -iecuğap a'ō kay'ūmayū.

³³ Co'a be yajēm puje Jesus pa o'subamupaya ip korosa jeje. Ce'ūat'a ririt'a i omuy co'a butet. Iecūğap a'ō kay kūyjobit'ūmayū dak o'subamupaya ip wara'at pe korosa be- -xepxepayū. Pūğ korosa o'jomuy ip ipikūykūy be Jesus ba'at kadi. Wara'at o'jomuy ip iba'ūğat kadi. Jesus tak o'jekawēn Deus eju.

³⁴ — Bay — io'e. — Ġebum ġu juy apĕn ip warĕmtaġ okuk iap kay, itaybit ġu ip ajo pĕnpĕn oceju iam puye — io'e Jesus.

Ġebuġe dado o'joxikxik ip Jesus pa o'subamupaya'iaiyū. Jesus esay mu'ĕ'ĕ ām jewewebe o'joxikxik ip ipi ju. Dado karatūġ'a buxim o'yanuy. Ibararuk o'yanuy. ³⁵ Adeayū dak osodop Jesus cocom. Judeuyū kukukayū bit warĕmtaġ o'e ip Jesus pe iwaywayway am.

— Teku warara'acat o'taxijo — io'e Judeuyū kukukayū. — Teku Deus emunaĕ bima, juy jewedaxijo — io'e ip iwaywayway am. — Deus pe wuydaxijo am o'taĕ'ibit pima juy jewedaxijo — io'e ip.

³⁶ Sorarayū dak Jesus o'jowaywayway. Uva'abidi ūm ojuy ip o'e cebe tikōn ām-tideiboġ'ūmati.

³⁷ — Ēn Judeuyū kukukat pima juy ecedaxijo — io'e sorarayū.

³⁸ Taperadup toro'i oeku korosa eju Jesus abi ase-tupararakatup- -Judeuyū kukukat teku iap mubapukatup.

³⁹ Ġebuġe wara'at korosa ejuat Jesus o'jomuy-muy- -iecuġap a'ō kay kūyjobit'ūmat.

— Ēn Deus emunaĕ bima, ocedaxijom cuy ece — io'e ya'ōberen Jesus pe. — Ecedaxijo dak cuy — io'e.

⁴⁰ Wara'at ejuat pit jebure o'ġukorĕm korosa ejuat.

— Eparara ġu du Deus puxim? — io'e jebure be. — Wuyewewēju ma wuyju je'ūm korosa eju. ⁴¹ Cedaġ wuywebe je'ū ām ikĕrĕat cuk adi aġujurūġ-rūġiap teim — io'e. — Ite bit o'ġujurūġrūġ ġu ikĕrĕat — io'e.

⁴² — Jesus — io'e ixē wara'at. — Ġebum cuy okay eġuy ĕn soat kukukan pima — io'e Jesus pe.

⁴³ — Icĕmān ōn e'em ewebe, ġasū ma ĕn oweju ecesūy onuyapka be- -idip cīcāatka be — io'e Jesus ixē wara'at pe.

⁴⁴ - ⁴⁵ Paġo oicuk jekpiwan ma- -Deus eju kawĕn-wĕnap'a beat epaġo- -xīntabi nomudip epaġo. Oicuk ipidase ixē paġo bit.

Kaxi wuyase bima kabiok o'e soat tağ ipi dağ. Kaxiepiat o'jepirēm. O'jekabia ġu. Ibun ma kabiok oeku- -ebapūğ ehora.

⁴⁶ Ġebuġe Jesus o'jekawēn Deus pe.

— Bay — io'e. — Ağ cuy eğuy okay. Je'ūm cuy ōn ebikuyap tağ — io'e ya'ōberen.

Oe'ū. ⁴⁷ 100 be sorarayū kukat o'jeak cekay. Apēn oe'ū iap o'jojojo.

— A'ōbuyxi soat podi ma — io'e Deus pe. — Icēmān ite ağokatkat ikērēat kuğ ġu osunuy — io'e.

⁴⁸ Korosa be ce'ūap com o'je'awero'iaiyū dak o'jepit ip jeduk'a be. O'jepit ip jewekūmpi okakam jeğuycūğap pibun. ⁴⁹ Jesus bureyū dak wūywūy ma korosa wi ip osodop, aoyū dak- -Galiléia eipi bewi Jesus eju yajēm'ibiyū. Kacūğcūğ'i osodop ip Jesus e'ūap cocom.

⁵⁰ Ġebuġe José o'ju Pilatos kay- -Arimatéia ka bewiat- -Judéia eipi bewiat. Ixe Judeuyū awēwē'ukat yoboğat osunuy. Xipat cīcā osunuy. Cūğ cīcā osunuy. Soat xe ya'ōbuyxi osunuy. ⁵¹ Warara'acayū juk adi Jesus aoka ojuy osodop ip Judeuyū awēwē'ukayū yoboğayū. José bit ka'ūma. Deus soat kukukan iap wiwim osunuy José bit. ⁵² Oajēm Pilatos kay ixé José.

Ġebuġe korosa ejuwi Jesus'ūm jebit mukop ojuy o'e.

— Jesus'ūm jebit cuy oju'ukat — io'e Pilatos pe.

— Eju'uk cuy — io'e Pilatos.

⁵³ O'ju i'uğ. Oajēm. Jesus'ūm jebit o'ju'uk korosa ejuwi José. Jesus'ūm jebit o'jomūnmūn pağōm- -idip cīcāan, irucan. Imūnmūn epere buje, o'tujowat witabikūy kay. Jesus'ūm jebit o'jomōğ witabikūy be ikūykot'isuatkūy be.

⁵⁴ Sexta-feira osunuy. Katpuġe jījā o'e. Gaxīn ma jebodoydoyap kabia Judeuyū be.

⁵⁵ Aoyū o'ju José eju- -Galiléia eipi bewiaiyū. Witabikūy o'sukūyjojo ip. Apēn Jesus'ūm jebit o'jomōğ'iap o'jojojo ip.

⁵⁶ Ibocewi o'jepit ip jeduk'a be. Tōmte'oatōm o'-tōmuwekoy ip Jesus'ūm jebit mude'onap ojuy. Kuya-

je acā ijebit mude'on ojuy ip osodop, kuy jebodoydoyap kabia buye. Kapikpi kuka o'e kuyaje.

24 Judeuyū ebodoydoyap kabia bima aoyū o'jebodoy jawēwēap ekawēn taḡ. Kabia'isum pit waram o'ju ip witabikūy kay. Domingo bima ip o'ju. Tōmte'oatōm tujowan o'ju ip Jesus'ūm mude'on ojuy. Jay. Oajēm ip.

² Yajēm puje wita'a o'yadobuxik ip yawede-ikūynomudip'a. ³ Oōm ip witabikūy be. Jesus'ūm jebit o'tobuxik ḡu ip. ⁴ Yaḡuybabi'ūm cīcā ip o'e tobuxik'ūm puye.

— Apēn xe'e ixe o'e? — io'e ip jewewebe.

Xepxep aḡokatkayū dak o'jebapuk aoyū wap-kabi bewiyū. Cesay kuḡ osodop ip isopsupat kuḡ. ⁵ Jeparara pibun ma ip o'jēḡ'aecōḡcōḡ cewap ip. Aḡokatkayū dak o'jekawēn aoyū be.

— Tū'ū'ūyū — io'e ip. — Apēnpuye eyju itaicat kudadam ce'ūat topapkūy be? — io'e ip. ⁶ — Ixe ijocē ḡu. Deus ixe o'ḡutait waram. O'ḡuyu kabi kay — io'e ip. — Ḡebum cuy epesop ixe a'ō kay. -Galilēia eipi be bima iap a'ō kay. ⁷ “Soat waḡo ōn,” i mo o'e eywebe. “Ikērēat mujurūḡrūḡ'ukayū be oūm ip,” i mo o'e eywebe — io'e ip. — “Obamupaya ip korosa be. Oje'ū. Imēnpit xepxep xet kap puje waram ocejē-tait,” i mo o'e eywebe — io'e aoyū be ixeyū aḡokatkayū.

⁸ Gebuje Jesus a'ō kay o'jeḡebu ip. O'jēm ip witabikūy bewi. ⁹ Aripit. O'jepit onze beayū mukūyjo am apēn cuk ip o'jojojo iam. Jay. Oajēm ip. Soat o'ḡuwēn ip onze beayū be- -Jesus eju oekuku'iyū be, warara'acayū be dak. ¹⁰ Maria Madalena soat o'ḡuwēn Jesus emumujuyū be, Joana dak, Tiago xi dak, warara'acayū dak. Tiago xi butet Maria i osunuy. Soat o'ḡuwen ip Jesus emumujuyū be. ¹¹ Warēmtaḡ ma tūybe aoyū kawēnwēn iān o'e ip. Itabut ḡu ip o'e cekawēn kay.

¹² Pedro bit dao ma o'ju witabikūy kay. Oajēm. O'jeerot. Itaburuh. O'jetaburut witabikūy kay. Paḡo

acā o'jojoho -idip cīcāat- -irucat. Wara'at pit o'jojoho ġu.

— Ka'ūmġu Jesus! — io'e.

Ibocewi o'jepit jeduk'a be. Yaġuybabi'ūm cīcā o'e.

— Apen xe'e o'e ip Jesus'ūm jebit pe? — io'e jewebe ma. — Poma xe'e ijebit o'tujowat ip? — io'e.

¹³ Ixe kabia be xepxep Jesus eju oekuku'iyū o'ju Emaús ka kay. Emaús ka 10 kilometros osunuy Jerusalém ka wi. ¹⁴ E daġ ip kawēnwēn oeku. Apēn Jesus'ūm o'tobuxik ġu ip witabikūy be iam kawēnwēn ip oeku. ¹⁵ Kawēnwēn pima Jesus oajēm ixeyū kay- -xepxepayū kay. Ceweju ip o'ju e daġ. ¹⁶ Jesus o'jojoho ip. O'jetabiebarēm ip Jesus teku iam. Tūybe Jesus ce'ū mabuk opop iān o'e ip.

¹⁷ — Apēn eyju kawēnwēn e daġ? — io'e Jesus cebe ip.

Topaġuycūġcūġ o'jecūcū ip. ¹⁸ Ixeyū'in o'jede Jesus pe. Cleopas i ibutet osunuy.

— Soat Jerusalém ka watwat itaybit apēn o'jebapuk ibo ka be ġasū iam. Ēn acā etaybit ġu! — io'e.

¹⁹ — Apēn xe'e o'jebapuk? — io'e Jesus cebe ip.

— Apēn Jesus pe o'e ip iap awēġ eyawēġtobuxik ġu du- -Nazaré ka bewiat pe iap awēġ? — io'e. — Ixe Jesus Deus ekawēn muwēnuwēn'ukat osunuy. Soat xe ya'ōbuyxi osunuy. Ocejoho ġu iap mubapukpuġ oekuku Deus a'ōbi. Ixe juk cedaġ ocemutaybitbitbin — io'e. ²⁰ — Paīyū kukukayū wuyka kukukayū dak Jesus o'ġūm Judeu'ūmayū be yaoka am. Jesus pa o'subamupaya ip korosa be — io'e. ²¹ — Ocejho bit tūybe ixe Judeuyū taxiġo iān cuk adi oce'e — io'e. — Inaka ebapūġ kabia kuy o'kap ce'ūap kabia. ²² Imēnpit oce'in ip ocaġuy mubabi'ūm aoyū — io'e. — Witabikūy be o'ju ip kabia'isum. Ikudadam ip oeku — io'e. ²³ — Jesus'ūm jebit o'tobuxik ġu ip ikūy be — io'e. — Ocekay o'jepit ip — io'e. — “Deus ekawēn tojtjot'ukayū ocejoho,” i mo o'e ip ocewebe — io'e Jesus pe. — “Kabi bewiat ocejoho,” i mo o'e ip ocewebe — io'e. — “Jesus waram o'je-

tait," i mo o'e ip ocewebe — io'e Jesus pe. ²⁴ — Wara'at ocebureyū o'ju witabikūy kay — io'e. — Apēn aoyū o'e iap tağ o'tobuxik ip — io'e. — Jesus pit o'jojojo ġu ip — io'e Jesus pe.

²⁵ — Eyetaybin wa'ūm cīcā Deus ekawēn muwēnuwēn'ukayū'ūm'ūm ekawēn — io'e Jesus cebe ip. — Eyetabun wa'ūm cīcā! ²⁶ Cedağ osunuy Deus xe Cristo imēn ipiat'ajo am, je'ū ām tak- -wuydaxijo am Deus emunaē. Cedağ osunuy waram kabi kay jeu am soat kukukan- -Deus co'i ya'ōbacaan- -Deus co'i idipan — io'e Jesus cebe ip.

²⁷ Jemuwēnuwēğaptup ekawēn o'ğukūyjojo ip soatup ekawēn- -Deus ekawēntup ekawēn- -Moisés emudupmubararaktup ekawēn, soat Deus ekawēn muwēnuwēn'ukayū emudupmubararaktup ekawēn tak. Iboaptup ekawēn o'ğukūyjojo ip.

²⁸ Imēn oajēm ip jejuapka kay- -Emaús ka kay.

— Bosusu ma buk oju — Jesus o'e cebe ip.

²⁹ — Ocexe juy eğuy — ixeyū bit o'e. — Katpuje jījā o'e kuy. Kabiog wuyju — io'e xepxepayū Jesus pe.

Imēnpuye Jesus o'ju ceweju ip cexe ip jenūy ā. Oōm ip tuk'a be.

³⁰ Ğebye Jesus pāo'a o'yabu jekōn pima ceweju ip.

— Bay, ēn xipat — io'e Deus pe.

O'yadakatkat. O'yaūm cebe ip. ³¹ Jetaan ip o'jeak. Teku Jesus iam itaybit ip o'e. Imēnpit Jesus o'jepa'ūm.

³² — Oca'ōxabida karabakbakān oce'e e dağ oceweju kawēnwēn pima, Deus ekawēn muwēnuwēn pima — io'e ip jewewebe.

³³ Ğebye o'jēm ip mesa bewi. Aripit. O'jepit ip Jerusalēm ka kay. Jay. Oajēm ip.

Ğebye onze beayū o'tobuxik ip- -jebureyū. Awe-rom ip o'tobuxik.

³⁴ — Wuykukukat waram o'jetait — io'e ip xepxepayū be. — Simāo itaicat o'jojojo — io'e ip.

³⁵ Ğebye xepxepayū apēn Jesus o'e cebe ip iap o'ğuwēn jebureyū be.

— Jesus o'jebapuk ocekey e dağ — io'e ip. —

Pão'a dakat puje, ocetaybit oce'e teku Jesus iam — io'e xepxepayū cebe ip.

³⁶ Dao ma Jesus o'jebapuk aweromayū kay imēn kawēnwēn pima ip.

— Kaba'ūm cuy epesop — io'e.

³⁷ O'jekuy ip. Iparara jījā ip o'e. Tūybe axik iān o'e ip.

³⁸ — Apēnpuye eykuykuykuy? — io'e Jesus. — Apēnpuye eyju e'em "Cēm tu Jesus waram o'jetait?" i? Apēnpuye eyetabut ġu okay? — Jesus o'e. ³⁹ — Ak epe'e obu kay, wui kay dak. Goku tapoa kuybut — io'e. — Obu kukuġ cuy epe'e — io'e. — Wui kukuġ tak cuy epe'e. Asubit'ūm! Axik tu ōn eyxe? Axik taohe ġu. Ōn pit odaohe — io'e Jesus.

⁴⁰ Imēn e'em pima, o'jewebumubapuk cebe ip. O'jeweimubapuk.

⁴¹ Imēnpit itabut ġu ma buk o'e ip Jesus kay jecokcok pibun, yaġuybabi'ūm'ūm ip puye.

— Ajo opop eyxe i'o am? — Jesus tak o'e cebe ip.

⁴² Axima yoyoy o'ġūm ip cebe i'o am. ⁴³ O'jat. Etabutpe ip o'jo'o.

⁴⁴ Ġejuje o'jekawēn ceweju ip.

— Moisés apēn warēmtaġ itakomaayū okuk iaptup o'tupmubararak, Deus ekawēn muwēnuwēn'ukayū'ūm'ūm tak — io'e. — Davi dak apēn warēmtaġ ip okuk iaptup o'tupmubararak Salmodup pe-jebibododonaptup pe — io'e. — Ixeyū'ūm'ūm emudupmubararakatup pe iap taġ ma ip okuk ikērēm — io'e. — Eyweju ōn pima iboap oġuwēn eywebe — io'e Jesus.

⁴⁵ Ixeyū mutaybitbin o'e apēnape Deus ekawēn iam.

⁴⁶ — Imēn e'em iġodup:

Deus emunaē juy ipiat supi'ajo, i. Je'ū juy, i. Xepxep xet kap puje, waram jetait ġuto, i. ⁴⁷ Ixe a'ōbi itabucayū juy kawēn idipat ġuwēn soat ka watwat pe, i. Koap Jerusalém ka watwat pe juy ġuwēn ip, i. Ġuyjom wa-

ra'atka watwat pe juy ġuwēn ip, i. "Ikērēat mujurūgrūġap cuy epeyepere," i juy je'e ip, i. "Ikērēat mujurūgrūġap epere buje, Deus ikērēat ju'uk eywebewi," i juy je'e ip, i.

Imēn e'em iġodup, — io'e Jesus. ⁴⁸ — Wekawēn epeya'ījojo. We'ūap tak epejojojo ma. Soat ka watwat pe juy iboap epeġuwēn — io'e Jesus cebe ip. ⁴⁹ — "Jeya'ōmucan ōn," io'e webay eywebe — io'e. — Webay a'ōbi ōn jeya'ōmucan — io'e Jesus. — Deus pe eya'ōmucanap wiwim cuy epesop ikaboġatka be- -Jerusalém ka be — io'e. — Ġaxīn ma juy jeya'ōmucan — io'e cebe ip.

⁵⁰ Jesus ixeyū o'tujowat Betânia ka be.

Ġebuje o'jekawēn Deus eju cebeam ip.

— Bay, xipan cuy teyūku ejukuk — io'e Deus pe.

⁵¹ Bosusu o'ju cexewi ip Deus eju kawēnwēn pima.

Ġebuje Deus o'tujowat jewekay, kabi kay.

⁵² — Bay, ēn xipāt cīcā — io'e ip Deus pe tujo-wacap cocoayū. — Ka'ūma ma ejo'iat ya'ōbacaat — io'e ip cebe.

Ġebuje o'jepit ip Jerusalém ka kay. Icokcok cīcā ip osodop. ⁵³ Deus eju kawēnwēnap'a be osodop ip soat em- -yaboġat'a be. — Bay, ka'ūma ma ejo'iat ya'ōbuyxiat — i'e'em ip osodop.

JESUS CRISTO MUWĒĠAP EKAWĒNTUP- -JOÃO EMUDUPMUBARARAKTUP

1 Jesus Cristo oajēm Deus mubapuk am ijodiayū be. Ipi muġē awap Deus mubapuk-puk'ukat kuy osunuy. Deus xe osunuy. Deus co'i osunuy. ²Ixe Deus xe osunuy ipi muġēm pima. ³Deus eju ixe soat o'ġuġē- -ipi daġat, kabi beat tak. Ka'ūma ma kajuk o'e ipi daġ ixe imujurūġ'ūm pima. ⁴Ja'ōbi dak ixe itabēġayū mujurūġrūġ'uk osunuy. Ixe icēmān wuymutaybitbin'uk osunuy Deus ekawēn- -apēn kaxi wuy mukabiahap puxim. ⁵Ixe oajēm ijodi Deus ekawēn wuy mutaybin am. Ade jījā ikērēat mujurūġrūġ'ukayū osodop ijodi. Imēnpit ixe ekawēn muwēnmu'ūm pa'ore osodop ip.

⁶Ixe ajēm awap Deus warara'acat o'ġudot ijodi aġokatkat. Ja'ōbi o'ġudot. João i ibutet osunuy. ⁷Oajēm Jesus Cristo muwēn ām- -kabiaap puximat muwēn ām ijodiayū be. Ixe o'ġuwēnuwēn adeayū mutabun am cekay. ⁸João ma ixe Deus mubapukpuk'ukat ġu osunuy. Oajēm ixe muwēn ām acā.

⁹— Ixe kawēn icēmat wuy mutaybitbin je'e — io'e João. — Ixe jajēm ijodi — io'e João. — Soat mutaybitbin jeku Deus ekawēn — io'e João.

¹⁰Deus mubapukpuk'ukat oajēm ipi kay. Ijodi oekuku. Soat ipi daġacat ixe emumuġē osodop ip. Inaka ibu'u o'e ip jetabun cekay. ¹¹Jebadipyū kay oajēm- -Judeuyū kay. Inaka itabut ġu o'e ip cekay. ¹²Warara'acayū bit ixe kay osodop ip. Itabut ip osodop ixe kay. Imēnpuye:

— Deus ebekitkiyū eyju ġasū, okay eyetabut puye — io'e cebe ip.

¹³Bekitkit jebapukpuġ ijodi ayacat'uk pewi kapkam puye; aġokatkat aoyū dabi'o pin e'em puye dak; aġokatkat jekpot mujurūġ pin puye dak. Imēn ġu bit wuyju Deus ebekitkin e'em. Ijodiayū Deus ebekitkin e'em Deus ibikuy buye acā. ¹⁴Deus mubapukpuk'ukat ijodian o'e. Jesus Cristo ijodian o'e. Wuyxe osunuy. Pūġ ma Deus ipot osunuy. Wara'at

ka'umġu- -ixe acā. Ijodiyū ikērēat mujurūgrūg oeku-ku. Inaka ixe xe ikukpin cīcā osodop ip. Icēmān ixe Deus ekawēn wuymutaybitbin'uk osunuy. Imēneju:

— Warara'acat podi ma tekū idip — i juy ace'e'e wuyewewebe.

¹⁵ João Batista abu Deus mubapukpuk'ukat iap muwēnuwēn oeku adeayū be. Ixe imēn o'e:

Omuykuiat ma ya'ōbuyxi, i. Ōn pit ka'ūma, i. Okap awap ixe itabēg osunuy iwaġo ma'ġu ōn, i. Imēnpuye obodi ma ya'ōbuyxi ixe ma, i. Ixe kuy oġuwēn eywebe, io'e — João o'e.

Imēn abu Deus mubapukpuk'ukat iap muwēnuwēn oeku João Batista.

¹⁶ Soat kabia ixe xe wuykukpin cīcā ikērēat mujurūgrūg ma'ġu wuyju. Soat podi ma xipan wuykuġ, ixe xe wuykukpin puye.

¹⁷ — Eyju cūg ma Deus xe cekawēn taġ jekukum pima — i juk adi o'e'e Moisés'ūm wuydobuyū'ūm'ūm pe. — Deus xe eykukpin cīcā ikērēat mujurūgrūg ma'ġu eyju — i juk adi o'e'e Jesus Cristo bit.

Ixe kawēn icēmat muwēnuwēn oekuku. ¹⁸ Ka'ūma ma Deus o'jojoho buk. Ixe ipot pūg ma. Ipot acā o'jojoho. Ipot ikukpin cīcā jebay xe. Ixe jebay mubapukpuk'uk osunuy wuywebe. Deus mubapukpuk'ukat ixe.

¹⁹ - ²⁸ Judeuyū kukukayū jepaiyū o'ġuju João Batista kay. O'ġuju ip jekawēn ām ceweju. Jerusalēm ka beayū osodop ip ixeyū Judeuyū kukukayū. Paiyū buywatwat'ukayū dak o'ġuju ip. Levitayū i ibuywatwat'ukayū butet osunuy. Fariseuyū ixeyū o'ġuju João kay. Betānia ka xe o'jekawēn ip. Jordāodi wīnābu o'jekawēn ip. João iboceayū mubatisasan osunuy ijudi be. Oajēm ip João kay. Jay. João ibu'u ġu o'e jekawēn ām ceweju ip.

— Abu ēn? — io'e ip João be.

— Cristo ġu ōn — io'e João. — Ijodiyū daxijojukan Deus emunaē ġu ōn.

— Abu ēn? — io'e ma'ġuto ip. — Elias du ēn?

— io'e ip. — Deus ekawên muwênuwên'ukat tu ên? Waram ġuto du ekop oce kay? Kuyjeat tu ên? — io'e ip cebe.

— Ka'ūma — io'e. — Elias ġu ôn.

— Deus ekawên muwênuwên'ukat tu ên - ocemumuwiwiat? — io'e ip.

— Ka'ūma — io'e. — Eyemumuwiwiat ġu ôn — io'e.

— Abu ên? — io'e ma'ġuto ip. — Abu ên iap cuy eġuwên oce webe. Abu ên iap muwên pin oceju ocemudocayū be — io'e ip João be.

— Uk'a'ūmat pe wuyjuyū mukūyjojom pit ôn — io'e João. — "Ikêrêat mujurūġrūġap cuy epeyepere," i ôn e'em cebe ip. "Wuykukukat jajêm," i ôn e'em. "Kūyjobin cuy epesop ya'ô kay," i ôn e'em cebe ip — io'e. — Imên ôn e'em cebe ip Isaias ekawên taġ - kuyat ekawên taġ - Deus ekawên muwênuwên'ukat ekawên taġ — io'e.

— "Deus ekawên muwênuwên'ukat ġu ôn," i juk ece oce webe, "Eymumuwiwiat ġu ôn," i dak, "Elias ġu ôn," i dak — io'e ip. — Apênpuye dak ên wuyjuyū mubatisasan? — io'e ip.

— Ôn ma ijodiayū mubatisasan idibi be — io'e João. — Wara'at pit omuy wuyparakpe. Eyetaybit ġu ixem. Deus ekawên eymutaybitbin cuk adi ojekuku. Ġasū bit ixem jeymutaybin. Omuykuiat ya'ôbuyxiat. Ôn pit ixem jo'i'ūmġu. Wa'ôbuyxi ġu ôn pit ixem buxim — io'e João.

²⁹ Kuyaje João jekay Jesus ajêmap o'jojajo.

— Ak'i juy epe'e! — io'e João adeayū be. — Teku Deus emunaê. Paīyū cordeiro aokaka'uk osodop ip ikêrêat uk am wuydobuyū'ūm'ūm pewi — io'e. — Imênpuxim teku je'ū ikêrêat uk am wuywebewi — io'e. ³⁰ — Ixe oġuwên eywebe kapusu — io'e. — "Ġasū bit wara'at Deus ekawên jeymutaybin," i juk oce eywebe. "Okap awap ixem kuy itabêġ osunuy iwaġo ma'ġu ôn," i juk oce eywebe. "Imênpuye ixem ya'ôbuyxiat. Ôn pit ixem jo'i'ūmġu. Wa'ôbuyxi ġu ôn pit" i juk oce eywebe — io'e. ^{31 - 33} — Ôn pit wetaybit ġu oġuy abu ixem osunuy iam. Imênpit Israel naxeġebitbit

mutaybin ojuy oğuy abu Deus emunaē iam. Imēn-puye ojet ijodiacat mubatisasan — io'e. — Ōn pit wetaybit ġu oğuy abu ixe iam — io'e João. — Imēn-pit Deus cuk o'e owebe: “Obiōğbuk je'kop wemunaē kay,” i. “Ixe be jeedop,” i. “Ixe epejojo,” i. “Ixe je-biōğbuk ġuōm ijoceayū be,” i.

Imēn omudocat cuk o'e owebe — io'e- -João o'e.

Imēn João Jesus muwēnuwēn oekuku.

— Deus biōğbuk ojojojo — io'e João. — O'kop kabi kadiwi. Pukaso jo'i osunuy ibiōğbuk. Jesus abi jeje o'jecūğ — io'e João. ³⁴ — Ixe ma ojojojo. Ixe Deus ipot. Iboap oğuwēn eywebe — io'e João ibo-ceayū be.

³⁵ Kuyaje João Batista waram Jesus o'jojojo. João cūğ'i osunuy jewēju etaybitbinayū eju- -xepxepayū eju. ³⁶ Jesus cūğcūğ o'e cewap ip.

— Ak'i juy epe'e! — io'e João. — Teku Deus emunaē — io'e. — Cordeiro e'ūap co'i teku je'ū ikē-rēat uk am wuywebewi — io'e.

³⁷ Iboap co buje, Jesus kay o'ju ip João eju etaybitbinayū- -xepxepayū. João ip o'suiwat Jesus kay jeju am.

³⁸ Jesus o'jekorepēn.

— Ajo-kudadam eyju? — io'e Jesus.

— Ocemutaybitbin'ukat, poce ēn? — io'e ip.

³⁹ — Ğa'a onuynuyap'a kay aju — io'e Jesus.

O'ju ip Jesus eju. Oajēm ip Jesus nuynuyap'a be. Katpuje ip oajēm- -16 hora bima. Uk'a be ip oōm. Jesus eju ip osodop ixe kabia. ⁴⁰ Pūğ ma ixeyū'in André i osunuy- -xepxepayū'in. André kuy João ekawēn itaybit osunuy. Imēneju Jesus eju o'ju. Ixe André Simão kitpit osunuy.

⁴¹ Ğebu je André o'ju Simão kay- -jewağo kay.

— Cristo ocetobuxik — io'e Simão be.

(Wuydaxijo am Deus emunaē iape Cristo.)

⁴² O'tujowat Jesus kay. Jesus Simão o'jojojo.

— Ēn aco'i Simão — io'e. — João ipot aco'i ēn.

Wara'at ebuten ġasū — io'e. — Ojomōğ ebuten. Céfo i ebuten je'e — io'e Jesus.

(Céfo Pedro iape Grego a'ōm, wita'a iape Munduru-kú a'ōm.)

⁴³ Kuyaje:

— Cum puk òn Galiléia eipi kay — io'e Jesus. Jesus Filipe o'tobuxik e daḡ pima.

— Filipe, oweju juy ejeku — io'e.

⁴⁴ Filipe Betsaida ka bewiat osunuy, André dak, Simão Pedro dak. Pũḡka bewiat ip osodop.

⁴⁵ Ḡejuje Filipe Natanael o'tobuxik.

— Deus emunaē ocetobuxik — io'e Natanael be. — Moisés ixe muwēḡaptup o'tupmubararak kuyje — io'e. — Deus a'òbi o'tupmubararak. Deus ekawēn muwēnuwēn'ukayū'ūm'ūm tak ixe muwēḡaptup o'tupmubararak. Jesus i ibutet. José'ūm ipot ixe, Nazaré ka bewiat — io'e.

⁴⁶ — Apēn ēn e'em? — io'e Natanael. — Nazaré ka bewi ḡu Deus emunaē jajēm — io'e.

— Ejot cuy ijom — io'e Filipe bit.

⁴⁷ Jesus Natanael o'jojojo ajēm pima.

— Ak'i juy epe'e — Jesus o'e jewejuacat pe. — Teku Israel naxeḡebit — io'e. — Wuymuḡuykuku-ku'ukat ḡu teku! Icēmān e'e'ukat ma teku! — io'e.

⁴⁸ — Ēn pit ojojo ḡu buk — io'e. — Apēntak ēn etaybit òn? — io'e Natanael.

— Filipe be enomuwā buje òn ejojo wūy ma'ḡu ēn — io'e Jesus. — Ēn figueira'ip kabicuk pe bima ejojo òn — io'e. — Wa'òbacaam òn ejojo — io'e.

⁴⁹ — Ocemutaybitbin'ukat — io'e. — Ēn ma Deus ipot — io'e. — Icēmān ēn ma Israel naxeḡebit-biyū kukukat — io'e.

⁵⁰ — Etabut okay, “Ēn figueira'ip kabicuk pe bima ejojo òn,” i juk oce buye. “Jesus itaybit cīcā,” i ēn e'em. Ḡuyjom pit obacaap ojomōḡ ijodiacayū be. Iboap epejojojo. “Soat podi ma Jesus ya'òbaca,” i ece ḡejuje bit — io'e. ⁵¹ — Icēmān òn e'em eywebe — io'e Jesus soat pe ijodiacayū be. — Soat waḡo òn — io'e. — Koce'i je'e kabi. Deus ekawēn tojtjtjot'uk-ayū je'kop okay. Jeu dak ip oxewi. Soat iboap epejojojo — io'e Jesus cebe ip.

2 Xepxep xet kap puje Jesus o'ju jewebumün-ap epeta kay. O'ju jewēju etaybitbinayū eju-doze beayū eju. Judeuyū peta muḡēḡē'uk osodop ip jewebumün puje. Caná ka be peta o'ḡuḡē. Ibo ka Galiléia eipi be o'sukadop. ²Jesusyū juk o'tomuwā ip. Ixi dak o'ju ceweju ip.

³ Gebuje uva'abidi kay o'e ip o'ti'ūm puye.

— Uva'abidi o'ti'ūm — io'e ixi Jesus pe.

⁴ — Aī — io'e Jesus. — I'e but ḡu iboap owebe. Gasū bit cūḡ ḡu owebe Deus a'ōbacaap mōḡ ām.

⁶ Gebuje ixi o'ju peta iwat a'ōbuywatwat'ukayū kay.

— O'it a'ō kay juy epe'e — io'e cebe ip.

⁶ Idibi mün'a o'yadop iboce 6 be. Wita'a muḡēḡē o'yadop yaboḡat'a. 80 litro opop pūḡ'a be idibi, 100 litro dak. Judeuyū jewebuwywuy'uk ip osodop jekōn puje, jekōn eperē buje dak. Jevasília wuywuy'uk osodop ip soat em. Imēnpuye ti'ade o'tidop iḡo'a be.

⁷ O'jekawēn ibuywatwat'ukayū be ixe Jesus.

— Idibi juy epetibu ite'a munopapūn ām-pote'a munopapūn ām — io'e. — Epeyamunopapūn-pūn cuy ip idibim — io'e.

Idibi o'timuōm ip pote'a be. Yanopapūn o'e.

⁸ — Ti'in cuy epeti'uk yabewi — Jesus o'e cebe ip. — Eyekariwa kay juy epetidujowat — io'e.

O'ti'uk ip yabewi. O'tidujowat ip jekariwa kay.

⁹ Idibim ḡu o'e. Uva'abidim o'jediewexat. Peta iwat o'tikōn. Peta iwat ma itaybit ḡu o'e abu o'timuwexat uva'abidim iam. O'ti'uk'iyū bit itaybit o'e.

Gebuje peta iwat jewebumūniat o'tomuwā.

¹⁰ — Soat oceju koam tiku jījāti ūmūm ocebu-reyū be. Ibeḡbeḡ ip pima, oceju tikōōmati ūmūm cebe ip. Ēn pit imēn ḡu e'em. Gasū acā tiku jījāti ūmūm ēn ocewebe! — io'e.

¹¹ Imēneju ceweju etaybitbinayū oitabun cekay.

— Deus a'ōbacaap kuḡ teku — io'e ip.

Jesus idibi o'timuwexat uva'abidim. Jesus koam wuywebe i'e ba'oreat o'ḡubapuk Caná ka beayū eta-butpe Galiléia eipi be. Ōn Deus a'ōbacaap kuḡ iap o'ḡubapuk adeayū be.

¹² Iboap tomukadi Jesus o'ju Cafarnaum ka be. O'ju jexi eju, jekitpityū eju dak, doze beayū eju dak. Ade xet ġu osodop ip iġo ka be- -pūġpūġ ā.

¹³ Ġebuġe o'ju Jerusalém ka kay jewēju etaybit-binayū eju. O'ju ip Judeuyū epeta kay. Peta muju-rūġrūġ'uk osodop ip Judeuyū jeġebu am Egito eipi bewi Deus wuydobuyū'ūm'ūm o'tujujēm iap kay. Páscoa i iġo epeta butet osunuy. ¹⁴ O'ju Deus eju kawēnwēnap'a kay- -yaboġat'a kay. Oajēm. Oōm. Adeayū o'jojajo ya be. Biopak teidada'ukayū o'jojajo uk'a naxirōġ pe. Carneiro teidada'ukayū dak o'jojajo. Pukaso deidada'ukayū dak o'jojajo. Soat ip o'jojajo yanaxirōġ pe. Ajēmġemayū edinheiro mutrokakan ip osodop warara'acayū.

¹⁵ Jesus oitakomān uk'a beacat kay. Ixibu o'su-bumukirik bōrōbum. Iōhōyū o'ġuwat ya bewi soat. Bioooh. Aki kay o'ġujēm. Dinheiro mutrokakan'ukayū dak o'ġujēm. Biopak deidada'ukayū dak o'ġujēm. Carneiro deidada'ukayū dak o'ġujēm. Soat ip o'ġujēm. Buġ. Dinheiro mutrokakan'ukayū emesa o'ġuy'at. Duoooooh. O'jedu. Soat o'ġudu dinheiro isu-rūġat mesa bewi.

¹⁶ — Soat cuy epetujujēm ite'a naxirōġ pewi! — io'e Jesus pukaso deidada'ukayū be. — Webay duk'a be ġu juy epeteidada! — io'e.

¹⁷ O'jeġebu ip Deus ekawēn kay doze beayū. Ibo-dup pe ibararak opop:

Bay, ijop'a eduk'a! i. Inaka warēmtaġ
e'em ip ite'a be, i. Imēnpuye wetako-
ma jījā, i.

¹⁸ Ġebuġe Judeuyū kukukayū o'jekawēn Jesus eju. — Abu-a'ōbi iteyū eġujēm Deus eju kawēnwēnap'a bewi? — io'e ip Jesus pe. — Deus a'ōbacaap cuy ejomōġ ocewebe — io'e ip. — Iboap mōġ puje, "Cūġ ma cebe iteyū mujēm ām," i kuka oce'e — io'e ip.

¹⁹ — Eywebe Deus eju kawēnwēnap'a muy'at pu-je, wara'at'a juy oyamuy ōn ma — io'e Jesus. — Xepxep xet kap puje, wara'at'a oyamuy uk'a — io'e Jesus cebe ip.

²⁰ — Iba'ore ewebe wara'at'a muy ãm xepxep xet — io'e ip. — Ocejū ite'a muymuy ade koato- -46 koato — io'e ip Jesus pe.

²¹ Jesus ekawën cekawën pa'arēm o'e cexe ip. "Uk'a" i'e buje, jejebit o'ḡuwën Jesus. ²² Ce'ũ'ũayũ xewi Deus pe Jesus muyu buje, Jesus ekawën kay o' - jeḡebu ip doze beayũ.

— Deus ekawëntup pe ibararak icēmān — io'e ip. — Jesus icēmān o'e'e ocewebe — io'e ip jewewebe.

²³ Adeayũ oitabun Jesus kay ixe Jerusalém ka be bima- -Judeuyũ Páscoa epeta muḡēḡēm pima. Ōn Deus a'ōbacaap kuḡ iap o'ḡubapukpuk Jesus. Iboap co buje itabut o'e ip cekay. Imēnpit pũḡpũḡayũ yopīt ma itabut o'e. ²⁴ Jesus pit itaybit osunuy apēn ixeyũ jewaḡuyḡuy iam. Imēnpuye ibapuḡ ḡu o'jewemuwën cebe ip. ²⁵ Abu-be Jesus e'em: — Apēn teku jewaḡuyḡuy — i? Ka'ũma be ma. Jewewebe ma itaybit osunuy.

3

¹⁻² Ixima be Nicodemos oajēm Jesus kay. Nicodemos ya'ōbuyxiat osunuy. Judeu osunuy. Fariseu osunuy.

— Ocemutaybitbin'ukat — io'e Jesus pe. — Ocetaybit ēn ocemutaybitbin'ukat iam. Wuywebe i'e ba'oreat mubapukpuk'ukat ēn. Deus a'ōbacaap mōḡ- mōḡ'ukat ēn. Abu-be Deus a'ōbacaap mōḡ put? Deus bikuyap taḡ jekuku'ukat pe acā! Ocexe ēn Deus xewiat — io'e Nicodemos.

³ — Icēmān ōn e'em ewebe — io'e Jesus. — Waram eykap'ũm pima, iba'ore Deus pe eykukan — io'e.

⁴ — Apēn kuka dak waram akap aypa bima? Iba'ore! — io'e Nicodemos. — Waram xe'e kuka aōm wuyxi uk pe? Iba'ore! — io'e.

⁵⁻⁶ — Aoyũ uk pewi wuykap puje, wuyebay ipot- poyũm acesop — io'e Jesus. — Deus biōḡbuk a'ōbi bit Deus ebekitkiyũm acesop. Wuyaḡuyisum aceku.

Icēmān ōn e'em ewebe — io'e Jesus. — Idibi be ey-mubatisasan'ūm pima Deus eykukukan ġu je'e, Deus biōġbuk eywebe'ūm pima dak — io'e. ⁷ — “Deus ebekin cuy eġuy,” i ōn e'em ewebe — Jesus o'e. — “Aġuyisum cuy ejeku,” i ōn e'em ewebe. Aġuyba-bi'ūm ġu juy eġuy wa'ō kay — io'e Nicodemos pe. ⁸ — Kabido jekpiwan ma pidojujum. Kabido a'ījojom pit wuyju. Eyetaybit ġu poma pidojujum iam, poma-wi o'subidodot iam tak. Imēnpuxim eyetaybit ġu dak apēn kuka Deus ebekitkiyūm acesop ibiōġbuk a'ōbi iam — io'e.

⁹ — Apēn paxi kuka o'jebapuk? Ekawēn pa'arēm oxe — io'e Nicodemos.

¹⁰ — Ēn Israel naxeġebitbit mutaybitbin'ukat- - Judeuyū mutaybitbin'ukat — io'e Jesus. — Ēn pit a'ōbuyxi adeayū xe. Apēnpuye dak wekawēn pa'arēm exe? — io'e. ¹¹ — Icēmān ōn e'em ewebe — io'e Jesus. — Wetaybicap muwēnuwēn ōn. Kuy ojojoiat muwēnuwēn ōn. Inaka ēn wekawēn kay ġu — io'e. ¹² — Ipi daġayū e'eap muwēnuwēn pima, etabut ġu wekawēn kay. Kabi beayū e'eap muwēn puje, iboap kay dak etabut ġu kuka epe'e — io'e. ¹³ — Wara-ra'acat ġu o'kop kabi kadiwi o'jojoiap muwēn ām ipi daġacat pe. Ōn acā okop — io'e. — Soat waġo ōn — io'e. ¹⁴ — Moisés puybujo'iatpu o'subumu'āy ip-takūbi daġ- -bronze muġēġēbu. Uk'a'ūmat pe o'su-bumu'āy kuyje. Iġobu kay ceak'ibiyū oe'ū ġu puybu nuy pibun. O'je'ada ip soat. Imēnpuxim itakomaayū obamupaya korosa be we'ū ām. Soat waġo ōn — io'e. ¹⁵ — Okay itabucayū yaġuyisum jeku ġasū- -soat ip. Soat em itait jeedop ip Deus xe je'ū buje dak — io'e Jesus. ¹⁶ — Deus xe wuykukpin cīcā ajop. Imēnpuye jekpot o'ġudot wuykay. Pūġ ma ipot. Ixe ipot kay wuyetabut pima, soat em ġu wuye'ū acesop. Ce'ū'ūayūm ġu acesop. Waram ecejetai. Soat em wuyetait acesop Deus xe — io'e. ¹⁷ — “Ipiat osupi'a-joat eywebe ikērēat kuġ eyju oxe buye,” i'e ojuy ġu Deus. Imēnpuye jekpot o'ġukop ipi kay. O'ġudot ipi daġayū daxijo am ipiatpi'ajojoap kay cuap puxim — io'e. ¹⁸ — Deus ipot pūġ ma. Deus e'em ġu “Ikērēat kuġ eyju oxe,” i jekpot kay itabucayū be. Deus kuy

o'e "Ikērēat kuḡ eyju oxe," i itabut'ūmayū be bit, jekpot kay itabut'ūm puye. ¹⁹ Deus ipot osodot ipi kay apēn ikērēat Deus xe iap mubapuk am wuywebe, apēn cūḡ ma iap mubapuk am tak. Ixe kabiaap puxim. Ijodiayū bit ikērēat mujurūḡrūḡ. Kabiok taḡ jekuku'ukat puxim ip. Imēnpuye ip ibu'u jetabut am Deus ipot kay — io'e. ²⁰ — Ikērēat mujurūḡrūḡ'ukayū ibu'u jījā jemutaybinan ajo ikērē Deus xe iam. Imēnpuye Jesus ekawēn a'ijojom ḡu ip. Ibu'u jījā ip warara'acat pe itaybit am ikērēat mujurūḡrūḡ teyūku iam. Kabiok taḡ jekuku'ukat puxim ip — io'e. ²¹ — Idipat mujurūḡrūḡ'ukayū bit itabut Deus ipot kay, ōn pit Deus ekawēn taḡ jekukum iap mubapuk am warara'acat pe. Kabia daḡ jekuku'ukat puxim ip — io'e.

Imēn Jesus o'jekawēn Nicodemos eju.

²² ḡuyjom Jesus o'ju Judéia eipi kay. Jeweju etaybitbinayū eju o'ju--doze beayū eju. Iboceayū mubatisasan osodop ip. ²³ João Batista dak Enom ka be osunuy. Imubatisasan ip osunuy iboceayū mutaybit am teyūku João Batista ebekitkiyū iam. Salim ka xe osunuy tiboḡ puye. Adeayū cucum o'e João kay. Imēn João imubatisasan ip osunuy, ²⁴ daomūnmūnap'a be ḡu buk puye. ²⁵ João eju etaybitbinayū o'jewa'ōxixik ip Judeu eju.

— Abu ḡu cūḡ ma wuyjuyū mubatisasan teyūku webekitkiyū iap mubapuk am? — io'e ip jewewebe. — Jesus ḡu xe'e? — io'e ip. — João Batista ḡu xe'e? — io'e ip jewewebe.

²⁶ Imēnpuye o'jekawēn ip João eju.

— Ocemutaybitbin'ukat — io'e ip. — Aḡokatkat iboceayū mubatisasan ḡasū! Kuy bima ixe oceweju oeku Jordāodi wīnābu bima — io'e ip. — Ixe juk adi eḡuwēn ocewebe — io'e ip. — Soat iboceayū cum cekay acā "Oceju ixe ebekitkiyūm ḡasū bit" i'e am — io'e ip.

²⁷ — Ocokcok cīcā adeayū cum Jesus kay buye — io'e João bit. — Deus acā wuymōḡmōḡ wuya'ōbuyxian — io'e. ²⁸ — "Ōn pit Cristo ḡu--Deus emunaē ḡu ōn," i juk adi oce eywebe — io'e João. —

“Deus acā omudot tot awap,” i juk adi oce eywebe. Kuy wekawēn epeya'ijojo — io'e João. ²⁹ — Wuyewebumūn puje jewebumūnat jetayxi bum — io'e João. — Jewebumūnat pure bit jewebumūnat xe nuynuy. Ibure icokcok e'em jewebumūnat icokcok puye. Jewebumūnat pure buxim ōn — io'e João. — Ōn tak ocokcok cīcā adeayū cum Jesus kay ya'ōkayayūm — io'e. ³⁰ — Ade jījā je'e ip Jesus a'ō kayayūm. Wa'ō-kayayū bit ade ġu je'e ip- -pūġpūġ ā. Imēnpit ocokcok cīcā — io'e João.

Imēn João o'jekawēn jeweju etaybitbinayū eju.

³¹ Kabi kadiwi oajēmiat itaybit cīcā. Soat podi ma itaybit. Ipi daġat pit ka'ūma. Itaybit ipi daġayū e'e am. Ipi daġayū e'e am acā kawēnwēn. Kabi bewiat pit itaybit cīcā. ³² O'jojojoiap muwēnuwēn ixe. O'ya'ijojojoiap muwēnuwēn tak. Inaka pūġpūġ acā itabut ya'ō kay. ³³ Ixe a'ō kay itabucat pit e'em: — Deus cūġ wuykuġ — i soat pe jebureyū be.

³⁴ Deus emumudot Deus ekawēn muwēnuwēn. Cebay tacup ġu. Jebiōġbuk muōmōm jekpot pe. Imēnpuye soat em jebay biōġbuk a'ōbi jekukum ipot. ³⁵ Deus xe jekpot kukpin cīcā. Imēnpuye soat ja'ōbacaap o'ġūm jekpot pe.

— Okpot pit wa'ōbaca jo'i — io'e Deus.

³⁶ Deus ipot kay itabucat yaġuyisum jeku ijodi bima. Ce'ū buje itait jeenuy Deus xe. Itabut'ūmat pit Deus xe ġu ma jeenuy itait. Soat em Deus itakoma jījā cekay- -ja'ō kay kūyjobit'ūmat kay.

4

¹⁻³ Ibocewi Jesus o'jēm Judéia eipi bewi, Fariseuyū Jesus awēġ o'yawēġtobuxik puye. Adeayū juk Fariseuyū o'ġukūyjojo.

— Ade ġu João Batista eju etaybitbinayū — io'e Fariseuyū be. — Jesus eju etaybitbinayū bit ade jījā — io'e ip. — Ade iboceecat mubatisasan Jesus — i napa ma o'e ip.

Imēnpit Jesus ġu iboceecat mubatisasan osunuy idibi be- -ceweju etaybitbinayū acā.

Jesus epit ojuy Galiléia eipi kay jewēju etaybitbinayū eju.

⁴ — Ga'a aju Samaria eipi dağ — io'e Jesus.

— Ga'a — io'e ip.

⁵ Ibocewi oajēm ip ağoka be- -Sicar ka be. Kuyje Jacó jekat o'ğūm jekpot pe- -José be. Sicar ka José katpuk tēğ ma o'sukadop.

⁶ Jesus o'ju idibikūy kay. Iğokūy Jacó juk o'sukūykat kuy bima. Jesus taopipi o'e cūğcūğām. Jebodoy am oabik. Oabik idibikūy xe o'sukopibareren puye. Kaxicuğ o'e. ⁷ ⁸ Jesus eju etaybitbinayū o'ju ağoka be jexat pum.

Ijēm ip puje, ayacat oajēm ikūy be- -Samaria eipi beat. Idibi bu ojuy oajēm.

Ğe buje Jesus o'jekawēn ayacat eju.

— Etibu buk wekōnaptim — io'e Jesus.

⁹ — Ap! — io'e. — Ēn Judeu. Ōn pit Samaria eipi beat — io'e ayacat. — Apēnpuye ēn e'em owebe "Etibu buk wekōnaptim," i? — io'e.

Judeuyū ibu'u jījā osodop Samaria eipi beat ewa'e bewi jekōn ām. Imēnpuye ayacat o'e ibu'u jewa'e beati ūm Jesus pe.

¹⁰ — Deus tei'ūma iūmūm wuywebe. Etaybit ġu iboam — io'e. — "Etibu buk wekōnaptim," i oce ewebe. Etaybit ġu dak abu ōn iam — io'e. — Etaybit ōn ibima, "Etibu buk wekōnaptim," i kuka ece owebe. Oxewi tiojuyjuy bima, ekōnaptim kuka otiūm ewebe. Itedi kōn puje, ağuyisum eceku. E'ū buje dak soat em etait ecesūy Deus xe — io'e Jesus.

¹¹ — Tapu — io'e. — Tibubuap kuğ ġu ēn — io'e. — Ikūyberen cīcā idibikūy. Pomawi kuka iğodi etibu- -wuymutaitcapti? — io'e. ¹² — Ocedobu'ūm ya'ōbuyxi osunuy- -Jacó'ūm — io'e ayacat. — Soat xe ya'ōbuyxi osunuy. Ixe'ūm itekūy o'sukūykat ocewebeam kuyje. Ixe Jacó'ūm tikōnkōn'uk osunuy itekūy bewiati. Cebekitkiyū dak tikōnkōn'uk osodop, iōhōyū dak. Ya'ōbuyxi osunuy ixē'ūm Jacó'ūm. Ēn pit ibodi ma'ğū a'ōbuyxi? — io'e Jesus pe.

¹³ — Itekūy bewiati kōn puje, waram tak ebipuruk ece'e — io'e Jesus. ¹⁴ — Wemudiūmti kōn puje bit, waram ebipuruk ġu ece'e- -pūğ em tak ka'ūma —

io'e. — Wemudiūmti bit tiwaru. Idi'a buxim je'e ewebe- -tiapep'ūmati buxim. Imēnpuxim je'e wemudiūmti. Tiapap ġu je'e. Wemudiūmti kōn puje, waram eybipuruk ġu epe'e. Itedi kōn puje, eyaġuyisum epeku ijodi. Soat em eyetait epesop Deus xe eye'ū buje dak — Jesus o'e cebe.

¹⁵ — Tapu — io'e. — Itedi buk etiūm owebe! — io'e. — Etiūm waram obipurukap puxim — io'e. — Etiūm puk waram ijoce tibum wajēmap puxim — io'e Jesus pe.

¹⁶ — Ektop cuy eġudot okay — io'e cebe. — Ektop eju juy ecepit — io'e.

¹⁷ — Tā — io'e. — Oktoptep ġu — io'e.

— Icēmān ēn e'em "Oktoptep ġu," i — io'e.

¹⁸ — Cinco beayū eju juk a'ġu ecwebumūn- -emumukukukyū eju — io'e. — Ġasū ewejuat ektop ġu — io'e. — Imēn ikērē Deus xe — io'e. — Icēmān ēn e'em pit "Oktoptep ġu," i — io'e.

¹⁹ — Tapu — io'e. — Ġasū bit iba'arēm ġu o'e oxe. Ēn Deus ekawēn muwēnuwēn'ukat ma — io'e ayacat. ²⁰ — "Cūġ ma wuywebe Deus kay ġebum am ijoce ma- -co'a be- -Gerazim'a be," i juk adi o'e ocedobuyū'ūm'ūm. Eyju bit Judeuyū. "Cūġ ma wuywebe Deus kay ġebum am wara'atka be ġu- -Jerusalém ka be acā," i eyju e'em — io'e. — Abuyū icēm ġu e'em exe? — io'e Jesus pe.

²¹ - ²² — Tū'ū, eya'ōpicūġcūġ cuy wa'ō kay — io'e Jesus. — Eyju Samaria eipi beayū — io'e. — Eyju e'em Deus pe "Ēn ma ocekkukat," i. Imēnpit eyetaybit ġu abu ixē iam. Oceju bit Judeuyū. Oceju bit ocetaybit abu ixē iam. Deus Judeu o'taē ijodiayū daxijojo'ukan — io'e. — Ġuyjom ma " 'Ēn ocekkukat,' i juy ace'e wuyebay be Gerazim'a be acā," i'ūmġu epe'e; "Jerusalém ka be acā," i'ūmġu dak. Soat ka daġ "Ēn ocekkukat," i epe'e'e cebe — io'e.

²³ — Ġaxīn ma Deus pe eykkukan epesop — io'e. — Ixe bikuyap taġ epeku. Ixe ekawēn kay kūyjobin epesop. Imēn eyeku buje, Deus kay ġebum epesop soat em. Eyebay ibikuy imēn ma eyeku am — io'e Jesus.

²⁴ — Deus ijebitbet ġu. Ijo ba'ore eywebe — io'e. — Ixe kay juy ġebum epesop ijojom ġu ma'ġu. Ixe biōġ-

buk a'ôbi juy epesop ġebum cekay. Cekawên taġ tak cuy epesop ġebum cekay- -kawên icêmat taġ — io'e Jesus.

²⁵ — Wetaybit Cristo omuyku iam. Wuydaxijo am Deus emunaê omuyku — io'e ayacat. — “Deus emunaê ixe,” i wuyju e'em, “Wuydaxijo ixe,” i dak — io'e. — Yajêm puje soan ocemutaybin ixe — io'e.

²⁶ — Ōn ma Cristo — Jesus o'e ayacat pe. — Ōn ma kawênwên eweju — io'e.

²⁷ Iboam e buje, ceweju etaybitbinayū o'jepit Jesus kay jexat kuġ. Yaġuybabi'ūm o'e ip ibapuġ ma Jesus ayacat eju kawênwên puye. Imēnpit:

— Ajo-kay ên ayacat xewi? — i'ūmġu o'e ip Jesus pe.

— Apēnpuye ên kawênwên ayacat eju? — i'ūmġu dak ip o'e cebe.

²⁸ Ġebuje ayacat o'jepit jeka kay. O'ju jeka beacat kay. Timūn'a o'yaiwat idibikūy xe. Jay. Oajēm.

²⁹ — Epesot cuy aġokatkat com — io'e cebe ip- -jeka beacayū be. — Idibikūy xe omuy — io'e. — “Ēn cuk adi ikêrêat eġujurūġrūġ,” i juk o'e owebe — ayacat o'e. — Ixe xe'e Cristo? — io'e. — Ixe xe'e Deus emunaê? — io'e ayacat.

³⁰ O'ju ip Jesus kay. O'jēm ip aġoka bewi.

³¹ Aġoka bewiayū ajēm awap ceweju etaybitbinayū o'jekawên Jesus eju.

— Ocemutaybitbin'ukat — io'e ip. — Juku wuyxat — io'e ip. — Ġa'a acekōn! — io'e ip.

³² — Oxat ġu omucokcokcoġ- -wara'at acā. Eytaybit ġu iboam — io'e- -Jesus o'e.

³³ — Warara'acat xe'e ixat o'tojot cebe? — io'e ip jeweweju.

³⁴ — Eyju ma eycokcok eyxat kuġ pima. Ōn pit ocokcok omudocat bikuyap taġ weku am — io'e. — Omudocat kapikap o'ġūm owebe. Ocokcok oce wekapikap mu'ūm ām — Jesus o'e cebe ip. ³⁵ — “Ebadipdip kaxi kap puje, wuyku beat'a yaop je'e,” i eyju ma e'em. “Ġaxīn ma yaop,” i ōn pit e'em eywebe. Imēnpuxim eyxe adeayū ibu'u jemutabun am okay. “Ak'i epe'e iteyū kay- -ajēmjēmayū kay,” i ōn pit e'em — Jesus o'e. — “Ġaxīn ma ip itabun

okay," i — io'e. ³⁶ — Kadaidaidada'ukat jekapikaptei bubum, jeku beat'a bubu'ukat tak. Icockok e'em ip jeku beat'a kuḡ pima. Imēnpuxim omuwēnuwēn'ukat icockok je'e warara'acat pe itabut puje, warara'acat mutabunbun'ukat tak. Itabucayū soat em itait jee-dop ip webay xe kabi be — Jesus o'e. ³⁷ · ³⁸ — Ōn cuk eymuju omuwēn âm adeayū be. Icēmān wuyju e'em "Wara'at taidadam. Warara'at pit yabubum," i. Imēnpuxim pūḡpūḡayū omuwēnuwēn. Warara'acayū itabut'ūmayū mutabunbun. Adeayū epeḡutabun ḡasū cebe ip omuwēn puje. Itabut je'e ip warara'acayū kuy omuwēn puye — Jesus o'e.

³⁹ · ⁴⁰ Ḡebuje aḡoka bewiyū oajēm cekay- -Jesus kay. Oitabun ip cekay. Ade oitabun Samaria eipi watwat. Itabut ip o'e ayacat o'jewemuwēn puye.

— "Ikērēat eḡujurūḡrūḡrūḡ," i juk xeku o'e owe-be — i juk ayacat o'e cebe ip. Itabut ip o'e cekay.

— Ocexe juy eḡuy — io'e ip Jesus pe.

— Ha'a. Oḡuy — io'e.

Xet. Xet. Xepxep xet osunuy iḡo ka be. ⁴¹ Warara'acayū Jesus kay itabut o'e cekawēn co buje. Ade jījā itabut o'e cekay.

⁴² — Koap ma ekawēn oceya'iḡojo. Imēnpuye oce-tabut cīcā ixe kay — io'e ip ayacat pe. — Ixe ekawēn oceya'iḡojo ḡasū bit. Ixe ipi daḡacat taxijojou'ukat wuyxe — io'e ip.

⁴³ Xepxep xet o'kap. Jesus waram o'ju Galiléia eipi kay. Ixe ka Galiléia eipi be o'sukadop- -Nazaré ka.

⁴⁴ — Warara'acayū xe Deus ekawēn muwēnuwēn'ukat ya'ōbuyxi. Jeka beacat xe bit ka'ūma — i juk o'e Jesus.

⁴⁵ Galiléia eipi watwat pit Jesus o'topabijurūḡ. Icockok ip o'e. Jesus osunuy ya'ōbuyxi cexe ip. Peta muḡēḡēm ip osodop Jerusalém ka be. Jerusalém ka be bima Jesus e'eap o'jojjo ip. Ja'ōbacaap mōḡ-mōḡap o'jojjo ip. Imēnpuye icockok ip o'e Jesus dopabijurūḡ puje.

⁴⁶ Jesus o'jepit Caná ka kay- -idibi o'timuwexat

uva'abidim iat ka kay. Caná ka Galiléia eipi be o'-sukadop. Ipi kukat ebekit iğoka be osunuy- -Caná ka be. Ixe ipot iwātaxipi jījā osunuy. Po'i osunuy ipot Cafarnaum ka be. Oe'ū pin ipot jewātaxipiap pibun.

⁴⁷ — Jesus oajēm ijoce — adeayū o'e ipi kukat ebekit pe. — Oajēm Judéia eipi bewi — io'e ip cebe.

Ipi kukat ebekit o'ju Jesus kay. Jay. Oajēm.

— Ejot cuy oduk'a be — io'e. — Okpot eğu'a-da! — io'e Jesus pe. — Oe'ū pin okpot — io'e.

⁴⁸ — Deus ja'ōbacaap mōgmōğap coco'ūm puje, kuka eyetabut ġu epe'e okay — io'e Jesus — wuywe-be i'e ba'oreat mubapukpukap coco'ūm puje dak.

⁴⁹ — Kariwa — io'e. — Ejot cuy okpot e'ū awap — io'e.

⁵⁰ — Ecepit cuy eduk'a be — io'e Jesus. — Ekpot kuy o'je'ada. Oe'ū ġu — io'e.

Iwātaxipi topibit ebay itabut o'e Jesus a'ō kay. Aripit. O'jepit jeduk'a kay. Jesus eju ġu o'jepit- -jağepūğ ma. ⁵¹ Jeduk'a be kapikpik'ukayū ixe o'topa-bijuk e dağ- -jeduk'a be yajēm pima.

— Ekpot oe'ū ġu — io'e ip. — O'je'ada jījā — io'e ip cebay be.

⁵² — Poce kaxi bima o'je'ada? — io'e.

— Wuyase bima o'je'ada kapusu — io'e. — Ipa'iat oi'ūm — io'e ip cebay be.

⁵³ — Wuyase bima ma Jesus o'jekawēn oweju — io'e cebay. — “Ekpot kuy o'je'ada,” io'e owebe — io'e.

Imēneju itabut o'e Jesus kay. Tuk'a beacat tak itabut o'e ip cekay- -soat ip.

⁵⁴ Imēn Jesus waram wuywebe i'e ba'oreat o'ğu-bapuk adeayū etabutpe- -Galiléia eipi beacat etabut-pe. O'ğubapuk Judéia eipi bewi ijēm puje.

5 Guyjom Jesus waram o'ju Jerusalém ka kay. Oajēm. Judeuyū peta muğēğēm osodop ibo ka be. ²Jerusalém ka be idibi'it'iti o'tinuy. Betesda i tibutet osunuy Judeuyū a'ōm. Ovelha muōmōmap

exĩntabi xe o'tinuy ixedi- -ağoka ekorara exĩntabi xe. Pũğpõğbi iwãtaxipiat nuyap'a o'yadop idibi'it'iti akokoreren. ³Ade iwãtaxipiyũ kapopo'i osodop joyũ'abeku. Ita'ũmayũ osodop ip, cexĩğxĩğ pa'oreayũ dak, ijebit e'ũayũ dak. (Timukoruyap wiwim ip osodop iwãtaxipiyũ. ⁴Deus ekawẽn tojotjot'ukat ajẽmjẽm'uk osunuy iğodi be. Idibi mukoruy buje, iwãtaxipiyũ kopkop'uk ip osodop idibi kay. Koap kopat acã o'je'ada.) ⁵Jesus oajẽm iğodi xe.

Gebuje Jesus ağokatkat o'jojojo iğodi xe. Ixe ağokatkat ade koato iwãtaxipi osunuy. 38 koato iwãtaxipi osunuy. ⁶Ade koato po'i osunuy jewãtaxipiap kuğ. Jesus itaybit o'e iboam.

— Tapu, e'ada pin tu? — io'e Jesus cebe.

⁷— Hm hm — io'e ağokatkat. — We'ada pin oce. Imẽnpit ka'ũmğũ obure odujukop am idibi kay timukoruy buje — io'e. — Okop pa'ore. Okop pin pima, warara'acat ma kom. Ixe ma o'je'ada — io'e. — On pit ka'ũma — io'e.

⁸— E'ãy — io'e Jesus. — Exexecaptup cuy etupu — io'e. — Xĩğxĩğ ece — io'e.

⁹O'je'ada gẽbujẽ bit ağokatkat. Jexexecaptup o'tupu. Xĩğxĩğ o'e. Xipat o'e. Judeuyũ xe jebodoydoyap kabia osunuy. Sábado osunuy. ¹⁰Imẽnpuyẽ Judeuyũ kukayũ o'jekawẽn ağokatkat eju- -ce'ada'ibit eju.

— Jebodoydoy oceju ijop kabia. Cũğcũğ ğũ — io'e ip. — Ka'ũmğũ wuyekapikap ğasũ. Wuymutaybitbinap tağ ğũ ẽn e'em — io'e ip. — Cũğ ğũ ewebe exexecaptup tujowat am ğasũ. Kapikpiğ ẽn exexecaptup tujowatwan — io'e ip.

¹¹— “Exexecaptup cuy etupu,” i juk o'e owebe omu'adaat — io'e. — “Xĩğxĩğ ece,” io'e owebe — io'e ce'ada'ibit.

¹²— Abu o'e ewebe “Exexecaptup cuy etupu,” i; “Xĩğxĩğ ece,” i dak? — io'e ip. — Apẽn ibutet? — io'e ip.

¹³Imẽnpit ce'ada'ibit itaybit ğũ o'e jemu'adaat puten. Imu'ada buje, Jesus dao ma o'jẽm adeayũ parakpewi. Imẽnpuyẽ ce'ada'ibit itaybit ğũ o'e ibuten.

¹⁴ Jesus ce'ada'ibit o'tobuxik ġuyjom. Deus eju kawēnwēnap'a be o'tobuxik- -yaboġat'a be.

— Kuy ece'ada — io'e. — Ikērēat cuy eġujurūġ ġu waram ewātaxipinap puxim — io'e Jesus imu'ada'ibit pe.

— Hm hm. Ikērēat oġujurūġ ġu — io'e.

¹⁵ Ce'ada'ibit o'jēm. O'ju Judeuyū kukukayū kay.

— Kuy bima wetaybit ġu oġuy abu omu'ada iam — io'e. — Ġasū bit wetaybit oce ibuten — io'e. — Jesus i ibutet — io'e cebe ip.

¹⁶ Imēnpuye Judeuyū kukukayū Jesus kaykay o'e ip. Yaoka ojuy ip Jesus aġokatkat o'ġu'ada jebodoydoyap kabia be buye.

¹⁷ Imēneju Jesus o'jekawēn cebe ip.

— Webay soat kabia jekapikap kuġ e'em. Imēnpuxim ōn tak wekapikap kuġ e'em — io'e Jesus cebe ip.

¹⁸ Imēnpuye Jesus aoka ojuy ip Judeuyū kukukayū.

— Jesus o'jekapik jebodoydoyap kabia be. Aġokatkat o'ġu'ada — io'e ip. — Imēn cūġ ġu Deus xe — i napa ma ip o'e. — Jesus o'e “Deus webay,” i — io'e ip. — “Deus webay” i'e'em pima, “Deus a'ō-bacaap co'i ōn tak wa'ōbaca,” i'e'em tak — io'e ip. — Imēnpuye juy ayaoka — io'e ip.

Imēn o'jekawēn ip jeweweju.

¹⁹ Ġebuje Jesus o'jekawēn Judeuyū kukukayū eju.

— Icēmān ōn e'em eywebe — io'e. — Deus ipot ōn. Wa'ōbi ġu ōn e'em- -webay a'ōbi acā. Webay e'eap cocom ōn. Webay e'eap taġ acā ōn e'em, ixe ipot puye — io'e. ²⁰ — Webay xe okukpin cīcā. Webay a'ōbi iwātaxipiat mu'ada'ada'uk oġuy. Idip cīcā o'e iwātaxipiat mu'adaap. Iboap podi ma idipat ġu-bapuk webay — io'e Jesus. — Eyetabēġbēġ epe'e iboap cocom- -webay e'eap cocom — io'e. ²¹ — Webay ce'ū'ūayū mutaicin. Waram ip itait. Kabi kay ixeyū muyuhum. Ōn tak waram ce'ū'ūayū mutaicin. Obikuy bima waram imutaicin ōn ixe ipot puye — io'e. ²² — Deus ġu e'em ijodiacat pe “Eykērē oxe,” i.

Owebe ma webay e'em "Ēn ma ece 'Ikērēat kuḡ eyju Deus xe," i ijodiacat pe — io'e Jesus. ²³ — Imēnpuye adeayū je'e owebe "Ēn Deus ipot," i. "A'ōbuyxi jījā ēn," i. "Deus tak ya'ōbuyxi jījā," i je'e ip. Warara'acayū xe wa'ōbuyxi'ūm pima, webay dak kuka o'e ya'ōbuyxi ḡu. Omudocat tak kuka o'e ya'ōbuyxi ḡu cexe ip — io'e Jesus. ²⁴ — Icēmān ōn e'em eywebe — io'e. — Wa'ō kay kūyjobicayū yaḡuyisum jekukum-omudocat kay itabucayū — io'e. — Soat em Deus xe jeedop ip itait — io'e. — "Ikērēat kuḡ eyju oxe," i'ūmḡu je'e Deus okay itabucayū be. "Soat em ipiat osupi'ajoat eywebe," i'ūmḡu dak je'e cebe ip — io'e Jesus. — "Soat em ipiatpi'ajoap pe juy epesop," i'ūmḡu je'e cebe ip- "Soat em oxe ma juy epesop," i acā — io'e Jesus. ²⁵ — Icēmān ōn e'em eywebe. Deus ipot ōn. Ġaxīn ma ojēm eyxewi. Oajēm waram. Wajēm puje, wa'ōberen ocewāwā. Ce'ū'ūayū wa'ījojo. Waram ḡuto jetaip ip wa'ōberen wewāwā buje. ²⁶ Warara'acat Deus mutaicin ḡu. Ja'ō-bi ma itabēḡ e'em. Wa'ōbi ma ōn tak wetait — io'e. — Ōn tak webay jo'i — io'e. ²⁷ — Soat waḡo ōn. Webay a'ōbi acā ōn e'em pūḡpūḡayū be "Eykērē ḡu Deus xe," i. Ya'ōbi acā "Eykērē Deus xe," i ōn e'em warara'acayū be — io'e. ²⁸ — Eyaḡuybabi'ūm ḡu juy epesop wekawēn kay. Ġuyjom ma ce'ū'ūayū wa'ījojo — io'e. ²⁹ — Ce'ū'ūayū xewi jeu ip jedopap pewi. Xipacat mujurūḡrūḡ'ukayū jeu kabi kay. Soat em Deus xe jeedop ip. Ikērēat mujurūḡrūḡ'ukayū dak jeu. "Eykērē oxe," i je'e Deus cebe ip. Ixeyū ḡuju ipiat'ajoap pe — io'e.

³⁰ — Wa'ōbi ḡu ōn kawēnwēn- -pūḡ em tak ka'ū-ma. Obikuyap taḡ ḡu ōn jekukum-omudocat bikuyap taḡ acā. Kuy owebe Deus e'eap taḡ acā ōn kawēnwēn. Imēneju cūḡ ma owebe "Ikērēat kuḡ eyju Deus xe" i'e am pūḡpūḡayū be; "Xipat eyju Deus xe" i'e am warara'acayū be — io'e. ³¹ — Ōn acā omuwēnuwēn pima, "Deus a'ōbi ōn e'em," i'e'em pima, "Dapxi ēn," i kuka juk epe'e. Wa'ō kay eyeta-but ḡu kuka epe'e — io'e Jesus. ³² — Wara'acat tak omuwēnuwēn. Webay dak omuwēnuwēn. Ixe icēmān

e'em. Wetaybit icēmān ixe omuwēnuwēn iam — io'e.
³³ — Eybureyū juk epeḡuju João Batista kay — io'e
 Judeuyū kukukayū be. — Ixe João icēmān omuwēnu-
 wēn oeku. ³⁴ “Xipan cuy epe'e omuwēnuwēn,”
 i'ūmḡu ōn pit e'em warara'acayū be. “João icēmān
 omuwēnuwēn oeku,” i ōn e'em eywebe, eydaxijo ojuy
 ōn puye — io'e Jesus. ³⁵ — Lamparina kuḡ pima
 wuyetaybit poma aju iam. João Batista lamparina
 buxim osunuy. João Deus ekawēn muwēnuwēn oeku.
 Imēnpuye eyetaybit cūḡ ma jeku am Deus xe iam.
 Darem ma eycokcoḡ epesop ixe ekawēn com — io'e.
³⁶ — João omuwēnuwēn oeku. Adeayū okay itabut
 o'e. Webay a'ōbi wa'ōbacaap mōḡmōḡ ojeku eyeta-
 butpe. Iboap tobuxik puje adeayū e'em owebe “Ebay
 juk omudot ocekey,” i. ³⁷ Webay omuwēnuwēn. Omu-
 docat omuwēnuwēn. Eyju bit kūyjobit ḡu webay a'ō
 kay. Webay kay eyetabut ḡu dak — io'e Jesus. ³⁸ —
 Webay juk omudot ijodi. Webay a'ōmupubutbun
 eyju bit, eybu'u jījā eyetabut am okay buye — io'e.
³⁹ — Eyju Deus ekawēntup cocom cīcā. “Deus eka-
 wēn taḡ jekukum pima, cebekitkiyūm acesop,” i eyju
 e'em. “Soat em Deus xe acesop wuyetait,” i dak
 eyju e'em. Imēnpit Deus ekawēntup tak omuwēnu-
 wēn — io'e. ⁴⁰ — Inaka eybu'u jījā eyetabut am
 okay. Okay eyetabun pima, soat em epesop eyetait
 Deus xe — io'e. ⁴¹ · ⁴² — Wetaybit apēn eyju je-
 waḡuyḡuy iam. Wetaybit cīcā eyju Deus kay ḡu jījā
 iam — io'e Jesus.

— Imēnpuye eywebe ibuyxim okukap kudadam
 ḡu ōn — io'e Jesus. ⁴³ — Webay a'ōbi ojot. Imēnpit
 eyju eyetabut ḡu jījā okay. Ja'ōbi warara'acat tot
 puje bit, ixe kay kuka eyetabut epe'e — io'e. ⁴⁴ —
 Pūḡ ma Deusat. Ka'ūmḡu wara'at. Eyju bit Deus pe
 xipan eymuwēnuwēnap kudadam ḡu- wuyjuyū be xi-
 pan eymuwēnuwēnap kudadam acā. Imēneju eybu'u
 jījā eyetabut am okay — io'e. ⁴⁵ · ⁴⁶ — Eyju te'e ma
 e'em “Moisés emudupmubararaktup taḡ oceju jeku-
 kum,” i. “Imēnpuye oceju cūḡ cīcā Deus xe,” i eyju
 te'e ma e'em — io'e. — Moisés cuk adi omuwēnu-
 wēn Deus ekawēntup pe. Imēnpuye Moisés a'ō kay
 eyju kūyjobit pima, wa'ō kay dak kuka juk kūyjobit

epe'e. "Teyūku ikērē," i'ūmġu ōn pit e'em webay be. Deus acā je'e eywebe "Eykērē oxe, Moisés a'ō kay kūyjobit'ūm puye," i. ⁴⁷ Moisés emudupmubara-raktup kay eyetabut ġu. Imēnpuye wa'ō kay dak i-ba'ore eymutabut am — io'e Jesus Judeuyū kukuk-ayū be.

6 Ibocewi Jesus iodi o'timudek- -Galiléia eipi beati. Tiberiades tibutet osunuy.

² Gebuje adeayū o'ju Jesus kay.

— Jesus juk adi iwātaxipipiyū o'ġu'ada'ada. Wuywebe i'e ba'oreat o'ġubapukpuk — io'e ip. — Waram tak paxi iwātaxipiat ġu'ada? — io'e ip jewewebe.

Imēnpuye o'ju ip tomuju. ³ O'jeu Jesus co'apēn pe. Jeweju etaybitbinayū eju oabik- -doze beayū eju. ⁴ Judeuyū epeta wap osodop ip- -Páscoa epeta wap.

⁵ - ⁶ Gebuje Jesus adeayū o'jojojo.

— Teyūku oġubeġbeġ ixan — io'e jewebe ma. — Filipe du itabut adeayū mubeġbeġ put Jesus pe iap kay? — io'e Jesus jewebe ma.

Imēnpuye:

— Apēn xe'e juy pāo'a aceyabu iteyū xat'am- -soat xat'am? — io'e Jesus Filipe be.

⁷ — 6 kaxi be wuyekapikap teim pāo'a bu buje, kuka o'e ġu adeayū xat'am — io'e Filipe.

⁸ Wara'acat o'jekawēn Jesus eju jeweju etaybin'i-biyū'in. André o'jekawēn ceweju. Simão Pedro waġo osunuy André.

⁹ — Ak'i! — io'e André. — Yaypan'isuat otobuxik. Cinco be pāo'a kuġ. Axima kuġ tak xepxep — io'e. — Imēnpit apēġām kuka ajat cexewi? O'e ġu kuka adeayū xat'am — io'e.

¹⁰ — "Epabik cuy," i juy epe'e adeayū be — Jesus o'e jeweju etaybitbinayū be.

O'jekawēn ip adeayū be. Oabikbik ip adeayū kap'idip ceje, tip'ade o'tiptop puye. Ade jġā ip osodop. Cinco mil aġokatkayū osodop aoyū parakpe, be-kitkiyū parakpe dak.

¹¹ Ġebuje Jesus pāo'a o'yabu. O'jekawēn Deus eju.

— Bay, ēn xipat — io'e cebe. — Ocxat'am eyamudot ocewebe — io'e.

O'yaūm doze beayū be pāo'a. Yaūmūm pima o'yamu'aren cīcā. Ya'ada jījā o'e. Doze beayū pāo'a o'yaūmūm kaxikxik'iaiyū be. Axima dak o'gūm doze beayū be. lūmūm pima o'gu'aren cīcā. Doze beayū o'gūmḡūm cebe ip- -kaxikxik'iaiyū be. Kuy jemu'opinput o'jat ip. Ibeḡbeḡ ip o'jekōn. ¹² Soat ip ibeḡbeḡ o'e Jesus ixat o'gu'aren cīcā buye.

— Ceaepoyat'a juy epeyabu — io'e Jesus doze beayū be. — Epeyamuxipan — io'e. — Axima epoyat tak cuy epejat. Epeḡuxipan cuy — io'e. — Epejat cuy ierepap puxim — io'e cebe ip.

¹³ Soat cepoyat ip o'jat. Paḡeiro'a jo'iat'a be o'guōm ip. O'yamuporan ip cepoyan. Doze be o'yamunopapūn paḡeiro'a jo'iat'a..

¹⁴ Imēn Jesus wuywebe i'e ba'oreat o'gubapuk soat etabutpe. Ixat o'gu'aren cīcā. Imēnpuye:

— Ite ma Deus ekawēn muwēnuwēn'ukat! — io'e ip jewewebe o'jojojo'iaiyū. — Ade koato ma ixē ajēmap wiwim ocesop — io'e ip jewewewbe ma.

¹⁶ Jesus dakoy ojuy ip o'e. “En ma juy ocekukan ece” i'e ojuy ip cebe.

— Odakoy ojuy ip jekukukan — io'e. — Ġasū bit obu'u ixeyū kukukan — io'e Jesus jewebe ma.

Imēneju o'jepit jenomukay ma. Jaḡepūḡ ma o'ju co'a daḡ.

¹⁶ Kabiogkabiog'i bima ceweju etaybitbinayū o'-kop iodi kay- -doze beayū. ¹⁷ Iodi mudek ojuy ip.

— Ga'a acepit Cafarnaum ka be — io'e ip jewebebe.

Kobe be ip oōm. Kabiok o'e. Jesus oajēm ḡu buk. ¹⁸ Tipodoyboḡ cīcā o'e kabidoboḡ puye. Daum cīcā kobe tipodoy daḡ. ¹⁹ Wūy jījā o'jekoykoy ip. 5 kilometro o'jekoykoy ip. Jesus o'jojojo ip. Xiḡxiḡ oeku idibi adopa daḡ Jesus. Yakōmkēm ḡu tipodoy daḡ. Xiḡxiḡmīh. Ti'adopa daḡ cūḡcūḡ ma oajēm. Oa-

jēm pin kobe kay. Iparara jījā ip o'e ti'adopa dağat tobuxik puje- -xīgxīğat tobuxik puje.

— Ajo xe'e tekü ti'adopa dağat? — io'e ip jewewebe.

²⁰ — Eypararam ġu juy epesop — io'e. — Wara'at ġu òn. Òn ma — io'e Jesus.

²¹ Iparara ġu ip o'e doze beayū Jesus ekawēn co buje. Icokcok cīcā ip o'e. Imēnpuye:

— Eōm kobe be — io'e ip cebe.

Kobe dak o'jemūğ wīnābu. Jejuap ojuy ka be o'jemūğ. Muğ.

²² Kuyaje tomukudadaayū Jesus o'tobuxik ġu.

— Apu Jesus? — io'e ip jewewebe. — Pūğ ma juk kobe ijoce osodop kapusu — io'e ip. — Jesus pit oōm ġu ibo be kobe be — io'e ip. — Ceweju etaybitbinayū acā juk oōm kobe be. Ixe bit ka'ūma — io'e ip. — Apoma o'ju? — io'e ip jewewebe.

²³ Kawēnwēn pima wīnābuayū oajēm jekobe dağ. Tiberiades ka bewi ip oajēm. O'jemūğ ip. Muğ. Wuyjuyū be pāo'a o'oap pe o'jemūğ ip. Jebay eju kapusu wuykukukat Jesus o'jekawēn iap pe o'jemūğ ip.

²⁴ — Jesus pit ijoce ġu omuy — io'e ip - tomukudadaayū o'e yajēm'ibiyū be. — Ceweju etaybitbinayū dak ijoce ġu omuy — io'e ip. — Ğa'a atimudek eyekobe dağ — io'e ip.

— Ğa'a — io'e ip.

Imēnpuye ip oōm kobe be -Tiberiades ka bewiayū ekobe be. Poroğ. Oōm ip soat. Toktek. O'timudek ip wīnābu. Cafarnaum ka ebikopap pe ip o'jemūğ Jesus kudadam.

— Ğa'a Jesus ajokudada!

— Ğa'a! — io'e ip.

²⁵ O'tobuxik ip. Wīnābu ip o'tobuxik.

— Ocemutaybitbin'ukat — io'e ip. — Puje ajēm ijoce? — io'e ip. — Ekudadam oceku — io'e ip Jesus pe.

²⁶ Ğe buje Jesus o'jekawēn ceweju ip.

— Icēmān òn e'em eywebe — io'e Jesus cebe ip.

— Kapusu pāo'a epeyabu oxewi. Eybeḡbeḡ epesop oxewiat'am. Gasū epesot okudadam “Ēn xipat cīcā” i'e am ḡu- -pāo'a o pin puye acā — io'e Jesus cebe ip. ²⁷ — Eyxat kay acā ḡu juy epeyeḡebu. Eybeḡbeḡ eyxan ijodi bima acā — io'e. — Wara'at tak opop eyxat eyaḡuyumisusunap xat — io'e. — Ixe xat o buje, eyaḡuyisum epeku ijodi bima. Soat em epesop eyetait Deus xe eye'ū buje dak — io'e. — Soat waḡo ōn. Deus webay. “Obikuyap taḡ ēn jekukum soat em,” i juk o'e Deus owebe — io'e. — “Imēnpuye ēn ma ibiat xat ūmūm'uk eḡuy wuyjuyū be,” i juk o'e owebe — io'e. — Eyju dak Deus bikuyap taḡ cuy epekuku soat em ma — io'e.

²⁸ — Apēn xe'e oceku soat em Deus bikuyap taḡ? — io'e ip Jesus pe.

²⁹ - ³¹ — Deus e'em “Wemumudot kay eyetabun cuy epesop,” i — io'e. — Ōn ma Deus emumudot — io'e. — Okay eyetabut puje, Deus bikuyap taḡ eyju jekukum — io'e Jesus.

— Ocedobuyū'ūm'ūm pāo'a jo'iat'a o'o'uk ip osodop uk'a'ūmat taḡ pima — io'e ip Jesus pe. — Imēn e'em Deus ekawēntup:

Moisés pāo'a mudodot'uk osunuy ce-
kay ip- -kabi bewiat'a, i — io'e ip.

— Deus a'ōbi Moisés ja'ōbacaap mōḡmōḡ'uk osunuy pāo'a jo'iat'a mudodon — io'e ip. — Pām ēn? A'ōbacaap cuy ejomōḡ ocetabutpe — io'e ip. — Imōḡ puje ocetabut oce'e ekay — io'e ip.

³² — Icēmān ōn e'em eywebe — io'e Jesus cebe ip. — Ja'ōbi ḡu Moisés pāo'a jo'iat'a mudodot'uk osunuy eydobuyū'ūm'ūm pe- -Deus a'ōbi acā. Moisés Deus xewiatxat ḡu imudodot'uk osunuy cekay ip. Deus pit jexewiatxat mudodon eywebe- -eyaḡuyumisusunap xat — io'e Jesus. ³³ — Deus cuk omudot jexewi kuyje pāo'a jo'iat'a mudocap co'i — io'e. — Ōn kabi kadi wiatxat co'i ojot ijodiat aḡuyumisun am — io'e. — Okay itabucayū yaḡuyisum jeku — io'e. — Ōn ijodiat aḡuyumisusun'ukat — io'e.

³⁴ — Kariwa — io'e ip Jesus pe. — Ibiatxat cuy eḡūm ocexan. Soat em cuy eḡūmḡūm ocewebe.

³⁵ — Ōn Deus xewiatxat — Jesus o'e. — Ōn ma

ijodiat aḡuymaisusun — io'e. — Okay eyetabut puje, soat em eyckoḡ epesop ibeḡbeḡat co'i. Okay eyetabut puje soat em eyckoḡ epesop ibipuruk'ūmat co'i — io'e Jesus. ³⁶ — “Eybu'u eyetabut am okay,” i juk adi ocece eywebe — io'e Jesus. ³⁷ — Webay pūḡ-pūḡayū mutabunbun okay. Imēnpuye itabut ip okay. “Eyetabun ḡu juy epesop okay,” i'ūmḡu ōn pit e'em cebe ip- -itabun ojuyayū be- -pūḡ pe dak ka'ūma — io'e. ³⁸ — Kabi kadiwi juk oajēm obikuyap taḡ weku am ḡu. Omudocat bikuyap taḡ weku am oajēm — io'e. ³⁹ — Soat em aḡ ōn okay itabucayū kay. Imēnpuye jetabucap epereperem ḡu ip- -pūḡ tak ka'ūma. Waram ixeyū oḡuyu kabi kay ce'ū'ūayū muyuap kabia be. Oḡuyu ip omudocat bikuyap taḡ — io'e Jesus. ⁴⁰ — Okay itabucayū oḡuyu ce'ū'ūayū xewi, webay soat ce'ū'ūayū muyuap kabia be — io'e. — Soat ip jeedop itait Deus xe soat em- -abu ōn iam itaybicayū. Imēn webay ibikuy — io'e Jesus.

⁴¹ Imēneju Jesus ekawēn kay ḡu ip o'e Judeuyū kukayū. Jawa'ōxikxiḡ o'e ip jeweweju.

— “Ōn Deus xewiat,” i teku e'em — io'e ip. — “Kabi kadiwiat xat co'i ōn,” i teku e'em — io'e ip. ⁴² — Jesus ma teku! — io'e ip jewewebe. — José'ūm ipot teku — io'e ip te'e ma. — Wuyetaybit ixim, cebay'ūm tak. Apēntak “Deus xewi ojot,” i teku e'em? Dapxi teku — io'e ip te'e ma.

⁴³ — Wa'ōxikxiḡ ḡu juy epesop — io'e Jesus. ⁴⁴ — Webay wuyjuyū mutabunbun okay- -omudocat — io'e. — Imutabun'ūm pima, kuka itabut ḡu ip o'e okay. Okay itabucayū acā oḡuyu kabi kay. Webay soat ce'ū'ūayū muyuap kabia be ip oḡuyu. Soat em jeedop ip webay xe — io'e. ⁴⁵ — Kuyje Deus ekawēn muwēnuwēn'ukayū o'tupmubararak. Imēn ibararak opop tup pe:

Deus soat wuyjuyū ḡutaybin, i. Imēn e'em iḡodup pe — io'e. — Webay ekawēn cobuje, itabut ip okay ijodiacat, webay be imutaybin puje dak — io'e. ⁴⁶ — Pūḡ ma webay o'jojojo. Warara'acat pit ka'ūma — io'e. — Ōn acā webay ojojojo — io'e. ⁴⁷ — Icēmān ōn e'em eywebe — io'e- -Jesus o'e. — Okay eyetabut pima, soat em epesop eyetait

Deus xe eye'û buje — io'e. ⁴⁸ — Õn ma Deus xewiatxat — io'e. — Ijodiat aḡuymuisusun òn — io'e. ⁴⁹ — Wuydobuyû'ûm'ûm mana'a o'o'uk osodop uk'a'ûmat pe bima. Inaka oe'û'û ip. ⁵⁰ Kabi bewiat kay eyetabut puje, Deus wi wûy ḡu epesop — io'e. ⁵¹ — Õn ma kabi bewiat — io'e. — Kabi bewi ojet ijodiat aḡuymuisun am. Okay itabucayû yaḡuyisum jeku ijodi bima. Soat em jeedop ip itait Deus xe ce'û buje. We'û buje, oën osuënûm ijodiat xatën — io'e.

⁵² Iboap co buje, jewa'òxikxiḡ ip o'e Judeuyû kukayû.

— Apëntak sute jeën iënûm wuywebe iën'o am? — io'e ip jewewebe.

Jesus ekawën cekawën pa'arêm osunuy ixeyû xe -Judeuyû kukayû xe. (Oën'oat okay itabucat iape. Imênpit itaybit ḡu ip osodop iboam.)

⁵³ — Icēmân òn e'em eywebe — io'e Jesus. — Soat waḡo òn. Oën'o'ûm pima Deus ebekitkin ḡu epe'e. Odoy kôn'ûm pima dak cebekitkin ḡu epe'e — io'e. ⁵⁴ — Oën'o buje bit, Deus ebekitkin epesop. Odoy kôn puje dak, cebekitkin epesop. Soat em epesop Deus xe eyetait — io'e. — Oën'oat oḡuyu kabi kay webay ce'û'ûayû muyuap kabia be. Odoy kônat oḡuyu ibo kabia be — io'e. ⁵⁵ — Wuyjuyû mutaicinatën oën. Odoy wuyjuyû mutaicinatoy — io'e Jesus. ⁵⁶ — Obiôḡbuk omuy oën'oat pe -odoykônat pe — io'e. — Obiôḡbuk a'òbacaap kuḡ jekukum ip. Õn tak pûḡ taḡ ma jekukum ceweju ip — io'e Jesus. ⁵⁷ — Webay ja'òbi ma itabêḡ soat em ma. Ixe ma omudot. Õn tak wetabêḡ ijodi webay a'òbi — io'e. — Imênpxim òn ma okay itabucayû aḡuymuisusun. Yaḡuyisum jekukum ip wa'òbi -oën'oayû — io'e - Jesus o'e. ⁵⁸ — Imên ma kabi kadi wiatxat — io'e. — Pão'a jo'iat'a buxim ḡu -wuydobuyû'ûm'ûm xat puxim ḡu. Wuydobuyû'ûm'ûm pão'a jo'iat'a o'o'uk ip osodop — io'e. — Oe'û'û ip -ya'o'o'ukayû'ûm'ûm ma. Kabi bewiat xat òn. Soat em jeedop ip itait Deus xe oën'o'oayû — io'e - Jesus o'e.

⁵⁹ Jesus iboam o'e Judeuyû e'aweroroap'a be - Deus eju kawënwënap'a be. Iḡo'a beacat mutaybinbin osunuy Cafarnaum ka be. Oën'oat okay itabucat

iape. Odoykōnat tak okay itabucat iape. Imēnpit cekawēn pa'arēm osunuy ixeyū xe. ⁶⁰ Imēneju:

— Cekawēn pa'arēm cīcā wuyxe — io'e ip jewewebe cekawēn o'jojoho'iaiyū. — Cekawēn kay ġu wuyju — io'e ip.

⁶¹ Warara'acayū be jemukūyjo'ūm pima, Jesus itaybit o'e ixeyū ekawēn. Imēnpuye o'jekawēn ceweju ip.

— Wekawēn pa'arēm tu eyxe? — io'e. — Eybu'u du eyetabut am okay wekawēn kay'ūm puye? — io'e Jesus. ⁶² — Soat waġo ōn. Wekawēn pa'arēm eyxe bima, eyetabut ġu okay — io'e. — Kabi kay waram omuyuap tobuxik puje dak eyetabut ġu kuka epe'e okay — io'e. — Oka kay wepicap co buje dak kuka eyetabut ġu epe'e okay — io'e Jesus. ⁶³ — Ijodiat aġuymuisusun oēn o'o am ġu — io'e. — Deus biōġbuk acā ijodiat aġuymuisusun — io'e. — “Oēn cuy epesuēn'o,” i juk oce eywebe — io'e. — Imēnpit okay eyetabun cuy epesop iam eymutaybin ojuy oġuy — io'e. — Wekawēn kay eyetabut pima, obikuyap taġ epeku-eyaġuyisum epeku — io'e Jesus. ⁶⁴ — Imēnpit pūġpūġ ey'in itabut ġu okay — io'e Jesus.

(Jesus kuy itaybit o'e abuyū ibu'u osodop itabut am okay iam. Itaybit o'e abu oūm okay itakomaayū be iam tak. Kuy bima itaybit o'e iboam doze beayū naē buje.)

⁶⁵ — Soat ġu eyetabut okay — io'e. — Webay emumutabunbunyū acā itabut je'e okay. Kuy iboap oġuwēn eywebe — io'e.

⁶⁶ Kuy bima ceweju oekuku'iaiyū Jesus kay ip ibu'u o'e, cekawēn kay'ūm puye.

Ġebuġe oibu'un ip Jesus eju jeku am. ⁶⁷ Jesus o'jekawēn doze beayū eju-jeweju etaybitbinayū eju.

— Pām eyju? — io'e. — Eyju dak tu eybu'un oweju? — io'e.

⁶⁸ — Kariwa — io'e Simão Pedro. — Abu-eju kuka oceku? — io'e Jesus pe. — Ēn acā apēn itabucayū yaġuyisum jekukum iap ekawēn muwēnuwēn ocewebe — io'e. — Ēn acā Deus xe epesop iap ekawēn muwēnuwēn ocewebe — io'e. ⁶⁹ — Ekay acā oce-

tabut — io'e. — Ocexe ên acã Deus emumudot — io'e. — Ocexe ên acã xipacat — io'e. — Ên acã ikê-rêat ejukuk ġu — io'e- -Simão Pedro o'e.

⁷⁰ — Õn cuk eynaê — io'e Jesus. — Doze beayū juk otaê — io'e. — Imēnpit pūġ ey'in Satanás a'ō-kayan o'e — io'e.

⁷¹ Jesus Judas o'ġuwēn- -Simão Iscariotes ipot o'ġuwēn. Ixe Judas doze beayū'in osunuy. Inaka Jesus ūm ojuy o'e cekay itakomaayū be yaoka am.

7 Ibocewi Jesus Galiléia eipi daġ oeku. Judeuyū kukukayū Judéia eipi be osodop ip. Ixeyū Jesus aoka ojuy. Imēnpuye Judéia eipi daġ o'ju ġu Jesus. ² Judeuyū epeta wap osunuy. Cepetaboġ cīcā osunuy. Xijap mōġmōġ'uk ip osodop. Xijap pe dopdom osodop ip iġo epeta bima.

³ Ġebye ikitpityū o'jekawēn Jesus eju.

— Ejēm cuy ijocewi — io'e ip Jesus pe. — Judéia eipi kay juy eju — io'e ip. — A'ōbacaap cuy ejomōġ a'ō kayayū etabutpe ixeyū be "Teku ya'ōbaca jījā" i'e am — io'e ip. ⁴ — Iba'arēm ġu wuyju e'em xipan jewemuwēn pin pima. Eju juy — io'e ip. — Ka'ūma buk ocejojojoiap cuy eġubapuk — io'e ip. — Xipan jewemuwēnat cuy soat pe — io'e ip.

⁵ Jesus kitpityū imēn o'e itabut'ūm cekay buye.

⁶ — Cūġ ġu mabuk oju am peta kay — io'e Jesus. — Cūġ ma bit eyju am. Soat em cūġ ma eyju am. ⁷ Deus kay'ūmayū eykay ġu itakoma ip. Okay bit itakoma jījā ip "Ikêrêat mujurūġrūġ eyju," i òn e'em cebe ip puye — io'e. ⁸ — Eyju ma peta kay epeju — io'e jekitpityū be. — Õn pit oju ġu iġo epeta kay. Cūġ ġu mabuk oju am — io'e Jesus.

⁹ Jesus imēn o'e jekitpitpiyū be. O'jēm ip ikitpitpiyū. Jesus pit Galiléia eipi be osunuy pūġpūġ xet.

¹⁰ Ebapūġ xet kap puje, Jesus o'ju peta kay. Soat eta'ūmpi ma o'ju. Iba'arēm ma o'ju.

¹¹⁻¹³ Ġebye Jesus o'jokudada ip Judeuyū kukukayū. Petatam pima o'jokudada ip.

— Apu Jesus? — io'e ip jewewebe.

Adeayū ibidadada ma jekawēnwēn osodop Judeuyū kukukayū be ja'ōdobuxikap puxim. Jesus peam jewa'ōxikxiḡ ip osodop.

— Xipat cīcā teku — io'e pūḡpūḡ ixeyū'in.

— Ka'ūma — io'e warara'acayū bit. — Wuy-muḡuykukuku'ukat teku — io'e ip napa ma.

Adeayū imēn ibidadada ma jekawēnwēn ip o'e.

¹⁴ Jesus o'ju Deus eju kawēnwēnap'a kay-yaboḡat'a kay. Peta muḡēḡēm pima o'ju. Iḡo'a beacat mutaybitbin osunuy.

¹⁵ Judeuyū kukukayū Jesus ekawēn kay ḡu ip o'e.

— Apēnpuye dak sute itaybit? — io'e ip. — Wuymutaybitbin'ukat xe ḡu osunuy jemutaybinan. Cūḡ ḡu cexe wuyjuyū mutaybin am — io'e ip soat pe iḡo'a beacat pe.

¹⁶ — Wa'ōbi ḡu ōn adeayū mutaybitbin-omudocat a'ōbi acā — io'e Jesus. ¹⁷ — Wa'ōbi du eyxe ōn eymutaybitbin? Pām ḡuto Deus a'ōbi? — io'e. — Deus bikuyap taḡ jeku ojuyat itaybit je'e Deus a'ōbi ōn eymutaybitbin iam — io'e cebe ip.

¹⁸ — Pūḡpūḡayū Deus a'ōbi ḡu ijodiat mutaybitbin-ja'ōbi acā. Cūḡ ḡu imutaybitbin ip. “Xipan omuwēnuwēn cuy epe'e,” i'e'em ip ya'iḡojo'ibiyū be. Warara'acayū bit Deus a'ōbi ijodiat mutaybitbin-jemudocat a'ōbi. “Xipan Deus muwēnuwēn cuy epe'e,” i'e'em ip. Icēmān e'em ip. Napa ḡu ip e'em.

¹⁹ Moisés Deus ekawēn cuk adi o'ḡuwēnuwēn eydobyuyū'ūm'ūm pe kuyje. Imēnpit soat eyju kūyjobit ḡu iboap ekawēn kay. Abu ey'in iboap ekawēn kay kūyjobit? Ka'ūma ma! Eyju dak waoka ojuy. Apēnpuye? — io'e Jesus.

²⁰ Adeayū Jesus ekawēn o'ya'iḡojo Deus eju kawēnwēnap'a beacayū.

— Akpidapi ēn — io'e ip napa ma adeayū Jesus pe. — Ka'ūma ma aoka ojuy — io'e ip Jesus pe.

Itaybit ḡu ip osodop adeayū Jesus aoka ojuy iam Jerusalém ka be powatwat.

²¹ — Jebodoydoyap kabia be wa'ōbacaap ojomōḡ pūḡ em ma — io'e Jesus. — “Cūḡ ḡu teku e'em,” i

juk adi epe'e iboap co buje. "Sábado be kapikpiğ teku," i juk adi epe'e — io'e. ²² — "Wuydo-buyû'ûm'ûm ekawên tağ ağokatkat'it'it epetaypu'ağobixeedakat," io'e Moisés kuyje. "Ikap'isuat epetaypu'ağobixeedakat teku Deus ebekit iap mubapuk am," io'e Moisés kuyje. Jebodoydoyap kabia bima dak eyju ixeedakatkan Moisés ekawên mupubutbunap puxim — io'e. ²³ — Sábado bima eyju ixeedakatkan Moisés ekawên mupubutbunap puxim. Sábado bima owebe iwātaxipiat mu'ada buje bit, eyetakoma juk adi epe'e okay! "Ēn jebodoydoy ġu! Kapikpiğ ěn," i eyju e'em owebe. "Ēn Moisés ekawên mupubutbun," i eyju e'em owebe. "Ikērēat mujurūrūğ ěn," i eyju e'em owebe — io'e Jesus. ²⁴ — Dao ġu "Ēn ikērēat mujurūrūğ," i juy epe'e warara'acat pe — io'e. — Tūybe teku ikērēat mujurūrūğ iān eyju e'em. Cekuku am eyetaybit'ûm pima, "Ēn ikērēat mujurūrūğ," i'ûmġu juy epe'e'e — io'e Jesus.

²⁵ — Ite aoka ojuy ġu du wuyka kukayû? — io'e ip Jerusalém ka watwat jewewebe. ²⁶ — Ak'i juy epe'e — io'e ip. — Ijoce ma omuy — io'e ip. — Soat etabutpe teku kawēnwēn — io'e ip. — Imēnpit ka'ūma ma ibubum — io'e ip. — Wuyka kukayû dak itabut xe'e Jesus Deus emunaē iap kay? — io'e ip jewewebe. ²⁷ — Teku Deus emunaē ġu wuyxe — io'e ip Jerusalém ka watwat'in. — Deus emunaē ajēm puje, abu xe'e itaybit je'e pomawi osodot iam? Ka'ūma ma! Imēnpit wuyetaybit pomawi teku osodot iam — io'e ip.

²⁸ Jesus adeayû mutaybitbin mabuk osunuy Deus eju kawēnwēnap'a be- yaboğat'a be.

— Eyetaybit ġu abu ōn iam — io'e Jesus. — Eyetaybit ġu pomawi ojot iam. Wa'ōbi ġu ojot-omudocat a'ōbi acā. Ixe icēmān e'em soat em. Eyetaybit ġu abu ixe iam — io'e. ²⁹ — Ōn pit wetaybit ixem — io'e. — Ojot cexewi. Ixe ma omudot ijoce — io'e Jesus.

³⁰ Imēneju itakomaayû Jesus daomūn ojuy ip.

Deus pit jewebe ma o'e: — Jesus daomün ġu buk ip — i.

Imēnpuye ka'ūma ma o'jat.

³¹ Tak ġu o'ya'ijojo'iyū bit itabut o'e ip Jesus kay. Ade jījā itabut o'e.

— “Deus emunaē ja'ōbacaap jomōġ,” i wuyju e'em — io'e ip. — Ite aġokatkat ja'ōbacaap mōġmōġ cīcā. Wuywebe i'e ba'oreat mubapukpuġ ite ma. Imēneju ite ma Deus emunaē ocexe — io'e ip.

³² Imēnpuye Jesus daomün ojuy o'e ip Fariseuyū. Adeayū Jesus muwēnuwēn iam o'jekūyjo ip Fariseuyū. Fariseuyū eju paīyū kukukayū Deus eju kawēnwēnap'a wiwi'ukayū o'ġuju Jesus daomün ām.

³³ — Darem ma buk ōn eyxe — io'e Jesus adeayū be. — Ġaxīn ma ocepit omudocat kay — io'e. ³⁴ — Okudadam epeku. Odobuxik ġu eyju. Ojuap kay eyju ba'ore — io'e.

³⁵ — Apoma sute je'ju? — io'e Judeuyū kukukayū. — Poce iba'ore kuka wuywebe tobuxik am? — io'e ip. — Je'ju du sute Judeuyū xe jenuy ām Grécia eipi watwat xe jenuy ām? — io'e ip. — Ipōġpōġayū kay du sute je'ju Judeu'ūmayū mutaybit am? — io'e ip. ³⁶ — “Okudadam epeku,” i juk o'e ocewebe — io'e ip. — “Imēnpit eyju odobuxik ġu,” i juk o'e — io'e ip. — “Ojuap kay eyju ba'ore,” i juk o'e — io'e ip. — Cekawēn pa'arēm ocexe — io'e ip Fariseuyū, paīyū kukukayū dak.

³⁷ Waram Jesus o'jekawēn peta muġēġēayū be. Peta epere buje o'jekawēn cebe ip. Ibo kabia yoboġ cīcā osunuy Judeuyū xe.

— Wuybipuruk pima, idibi kay jījā wuyju — io'e. — Abu yaġuyisum ceku pin cīcā? — io'e Jesus ya'ōberen. — Eyetabun cuy epesop okay! — io'e. — Okay eyetabut pima, eyaġuyisum epeku — io'e Jesus. ³⁸ — Okay itabucayū be idibi buxim jeenuy badi — io'e. — Imēnpuye yaġuyisum ip jeku — io'e. — Imēn e'em Deus ekawēntup — io'e -Jesus o'e.

³⁹ Imēn e buje Deus biōġbuk o'ġuwēn Jesus. Deus biōġbuk ōmōm Jesus kay itabucayū be. Jesus

iboam o'e ipi kay Deus biðgbuk ajēm awap. Ixe oajēm ġu buk, Jesus jebay xe jenuy ām o'jeu ġu buk puye.

⁴⁰ Jesus ekawēn co buje pūġ taġ ġu o'jekawēn ip adeayū- wara'at taġtaġtaġ ma.

— Teku Deus ekawēn muwēnuwēn'ukat- -ocemumuwiwiiat ma — io'e pūġpūġ ixeyū'in.

⁴¹ — Deus emunaē teku — io'e warara'acayū.

— Ka'ūma — io'e warara'acayū bit. — Deus emunaē ġu teku. Teku Galiléia eipi bewiat! — io'e ip. — Deus emunaē Galiléia eipi bewi ġu jajēm — io'e ip.

⁴² — Imēn e'em Deus ekawēntup:

Davi naxeġebit Deus emunaē, i. Be-

lém ka be je'kap- -Judéia eipi be, i.

Davi osunuyiat ka be je'kap, i — io'e

ip.

— Imēn e'em Deus ekawēntup — io'e ip.

⁴³ Pūġ taġ ġu ip o'jekawēn adeayū Jesus muwēnuwēn. Jawa'ødawunuwun ip osodop. ⁴⁴ Jesus daomūn ojuy ip yawiwi'ukayū. Imēnpit o'taomūn ġu buk ip.

⁴⁶ Jesus kuġ ġu yawiwi'ukayū o'jepit. Oajēm ip kuy o'ġuju'iaiyū kay- -paīyū kukukayū kay, Fariseuyū kay.

— Apēnpuye Jesus epetojot ġu? — io'e ip yawiwi'ukayū be.

⁴⁶ — Ixe ekawēn kawēntip cīcā ocexe! Abu-buxim ixekawēnwēn? Ka'ūma buxim ā! — io'e ip.

⁴⁷ — Eyju dak eymuġuykuku du ixekawēn? — io'e ip Fariseuyū. ⁴⁸ — Ya'ōbuyxiayū itabut ġu ip cekay- -pūġ tak ka'ūma — io'e ip. — Oceju dak ocetabut ġu cekay- -pūġ tak ocetabut ġu ma — io'e ip. ⁴⁹ — Adeayū bit itaybit ġu Moisés ekawēn. Imēnpuye Deus e'em cebe ip “Eykērē oxe,” i, “Ipiat osupi'ajoat eywebe,” i — io'e ip. — Iteyū acā itabut cekay- -Moisés ekawēn itaybit'ūmayū acā — io'e ip Fariseuyū yawiwi'ukayū be.

⁵⁰ Nicodemos pit o'jede Fariseuyū be- -jebureyū

be. Ixe Nicodemos ibimāmāmāayū ekawēn coco'ukat osunuy. Kuy bima o'ju Jesus kay jekawēn ām cewēju.

⁵¹ — Jesus puk atujuajēm ġu wuykay cekawēn co am, imuymuy'ukayū ekawēn co am tak — io'e Nicodemos. — Cekawēn co'ūm pima, “Ite juy ayaokaat, ikērēat kuġ puye,” i'ūmġu juy ace'e. Imēn Moisés cuk adi wuymutaybitbin — io'e Nicodemos.

⁵² — Galiléia eipi bewiat co'i ēn kawēnwēn. Deus ekawēn itaybit'ūmat co'i ēn kawēnwēn — io'e ip Nicodemos wayway. — Ite aġokatkat napa ma e'em “Deus ekawēn muwēnuwēn'ukat ōn,” i. Deus ekawēntup cuy etupco! — io'e ip Nicodemos pe. — “Ka'ūmġu Deus ekawēn muwēnuwēn'ukat Galiléia eipi beat,” i'e'em ibiatup — io'e ip Nicodemos pe.

⁵³ Soat ip o'jepit jeduk'a be.

8 Jesus pit o'ju co'a kay- -Oliveira dip'a kay.

² Kabia isum Jesus waram o'jepit Deus eju kawēnwēnap'a be- -yaboġat'a be. Adeayū o'je'a-wero Jesus ekawēn co pin puye. Ixe oabik. Adeayū mutaybinbin o'e.

³ Gebuje Fariseuyū eju Moisés ekawēn imutaybitbin'ukayū ayacat o'tojot Jesus kay. Ayacat itoptep ma'ġu osunuy. Inaka warara'acat itop kay itabiku osunuy. Warara'acat itop eju o'tobuxik ip Fariseuyū. O'tojot ip Jesus kay. Adeayū etabutpe ip o'tojot.

⁴ — Kariwa — io'e ip Jesus pe. — Ite ayacat ocetobuxik wara'acat itop eju. Imēnpuye ocetojot ekay — io'e ip. ⁵ — Moisés o'e wuydobuyū'ūm'ūm pe: “Wara'acat itop eju jepopomat cuy epeyabuġbuġ wita'am,” i. Imēn Moisés ocemutaybitbin. Pām ēn? Apēn ēn ece'e? — io'e ip Jesus pe.

⁶ Imēn o'e ip Jesus pe. Tūybe cūġ'ūma jede iān o'e ip. “Cūġ ġu ēn e'em,” i'e ojuy ip Jesus pe. “Moisés ekawēn taġ ġu ēn e'em,” i'e ojuy ip cebe.

Jesus o'je'aetoro. Ipi mukorepkorem o'e jebum. Koreh. Yatoroh ipi mukorepkorem o'e.

⁷ — Apēn ēn ece'e? — io'e ip waram.

Kirik'ây. O'ây.

— Ey'inat ikêrêat kuḡ'ûm pima, ixe juy koam wita'a yamuju cekay ayacat abuḡ am — io'e Jesus cebe ip.

⁸ Waram o'je'aetoro. Waram jebum ipi mukorep-korem. Koreh.

⁹ O'jêm ip cekawên co buje. Koap aypapayû o'jêm ôn tak ikêrêat kuḡ iam itaybit puye. Warit. Xerewun. Wara'at. Xerewun. Wara'at. Xerewun. Guyjom warara'acayû o'jêm yaypan'isuayû. Warit. Xerewun. Wara'at. Xerewun. Soat ip o'jêm. Jesus acâ o'jepoyat. Ayacat Jesus xe o'e cûḡ'i.

¹⁰ Kirik'ây. Jesus o'ây. O'jeak ayacat kay.

— Tû'û — io'e. — Apôma o'ju ip “Ën ma ikêrêat kuḡ cîcâ Deus xe,” i'e ojuyayû? “Ga'a ayaoka wita'am,” i'e ojuyayû? — io'e -Jesus o'e.

¹¹ — Kariwa — io'e. — Ka'ûmḡu ip — io'e. — O'jêm ip — io'e. — Weiwat xeyûku.

— “Ikêrêat kuḡ cîcâ ên,” i'ûmḡu ôn tak e'em ewebe — io'e Jesus. — Eju juy — io'e. — Waram pit eḡujurûḡ ḡu ikêrêat — io'e Jesus.

¹² Waram pima Jesus o'jekawên adeayû eju.

— Kabia buxim ôn — io'e. — Deus ekawên eymutaybitbin ôn cûḡ ma eyeku am. Okay itabucayû kabiok taḡ jekuku'ukayû buxim ḡu. Ikêrêat mujurûḡ-rûḡ'uk ḡu ip. Cûḡ ma ip jekukum kabia daḡ jekuku'ukat puxim. Yaḡuyisum jekukum ip — io'e.

¹³ — Ën acâ xipan jewemuwênuwên — io'e Fari-seuyû. — Cûḡ ḡu ên kawênwên — io'e ip napa ma.

¹⁴ — Cûḡ ma ôn kawênwên — io'e Jesus. — Eyetaybit ḡu pomawi ojot iam, poma ôn cum iam tak — io'e. — Ôn pit wetaybit pomawi ojot iam, poma ôn cum iam tak — io'e. — Cûḡ ma ôn kawênwên wetaybit puye — io'e. ¹⁵ — Eyju e'em “Cûḡ ḡu ên kawênwên,” i, eyxe warara'acat e'eap ibapuk'ûm ma'ḡu. Imên ḡu ôn pit e'em — io'e. ¹⁶ — “Cûḡ ḡu ên kawênwên,” i ôn e'em pima bit, cûḡ ma kuka oce. Cûḡ ma kuka oce, omudocat tak imên e'em puye. Webay omudot. Pûḡ taḡ ma oceju e'em — io'e. ¹⁷ — Imên e'em Moisés ekawêntup:

Xepxepayū pūḡ taḡ ma kawēnwēn pima, “Teyūku icēmān e'em,” i kuka o'e ip ya'ijoyo'ibiyū, i — io'e Jesus.

¹⁸ — Ōn ma xipan jewemuwēnuwēn. Webay dak xipan omuwēnuwēn-omudocat. Pūḡ taḡ ma omuwēnuwēn oceju-ōn, webay dak — io'e.

¹⁹ — Poce omuy ebay? — io'e ip Jesus pe.

— Eyetaybit ḡu abu ōn iam, abu webay iam tak — io'e. — Abu ōn iam eyetaybit pima, abu webay iam tak kuka eyetaybit epe'e — io'e.

²⁰ Imēn Jesus o'e Deus eju kawēnwēnap'a beyaboḡat'a be. Adeayū mutaybitbin osunuy. Dinheiro muōmōmap'a xe imutaybitbin osunuy. Cekay itakomaayū Jesus daomūn ojuy. Imēnpit o'taomūn ḡu ip taomūnap kabia ḡu buk puye.

^{21 - 24} Waram Jesus o'jekawēn Judeuyū kukukayū eju.

— Gaxīn ma ojēm ijocewi — io'e Jesus. — Te'e ma epeku okudadam eydaxijoap ojuy. Epe'ū Deus pe eywebewi ikērēat uk'ūm pima. Ojuap kay eyju ba'ore — io'e. — “Epe'ū Deus pe ikērēat uk'ūm pima,” i kuy oce eywebe. Ōn Deus xewiat iap kay eyetabut'ūm pima, epe'ū Deus pe eywebewi ikērēat uk'ūm pima — io'e Jesus.

— “Ojuap kay eyju ba'ore,” i teku e'em — io'e ip Judeuyū kukayū. — Jewaoka du sute? — io'e ip jewewebe.

— Eyju ma ipi daḡacat. Ōn pit kabi bewiat — io'e Jesus. — Eyju ma jewaḡuyḡuy ijodiat aḡuy daḡ. Ōn pit ka'ūma.

²⁵ — Abu ēn? — io'e ip.

— Iebikam piman ma juk ocevemuwēn abu ōn iam — io'e. ²⁶ — Adeat muwēn pin mabuk ōn eywebe. “Cūḡ ḡu eyju kawēnwēn” i'e pin mabuk oce eywebe. Omudocat ekawēn muwēnuwēn acā ōn. Ixe icēmān e'em — io'e Jesus.

²⁷ Jesus jemudocat muwēn puje, jebay o'ḡuwēn. Iboap ekawēn pit Judeuyū kukayū itaybit ḡu.

²⁸ — Soat waḡo ōn — io'e Jesus. — Obamupaya epe'e we'ū am korosa be. Obamupaya buje,

"Icēmān xeku kabi bewiat," i epe'e. "Ja'ōbi ġu xeku oeku-jebay a'ōbi acā," i epe'e — io'e. — "Wuyebay e'eap muwēnuwēn xeku oeku," i epe'e — io'e Jesus.²⁹ — Soat em omudocat bikuyap taġ ōn jekukum. Imēnpuye soat em aġ okay. Ixe opere ġu — io'e Jesus.

³⁰ Imēneju ade oitabun Jesus kay-ya'ījojo-'ukayū'in.

³¹ Jesus waram o'jekawēn Judeuyū kukukayū eju. Pūġpūġ ixeyū'in o'e: — Teku icēmān e'em — i.

— Wekawēn kay kūyjobit pima, oweju etaybitbinayūm epesop — io'e Jesus.³² — Kawēn icēmat muwēnuwēn ōn eywebe — io'e. — Kawēn icēmān eyetaybit pima cekariwa be imudadaybotbot'ibiyū buximayūm ġu epesop — io'e cebe ip.

³³ — Abu ocemudadaybotbot'uk osunuy? Ka'ūma ma! — io'e ip. — Abraão naxeġebitbit oceju! — io'e ip. — Apēnpuye ēn e'em ocewebe "Cekariwa be imudadaybotbot'ibiyū buximayūm ġu epesop," i? — io'e ip.

³⁴ — Icēmān ōn e'em eywebe — io'e Jesus. — Cekariwa be imudadaybotbot'ibiyū be iba'ore jekariwa epere am. Imēnpuxim ikērēat mujurūġrūġ'ukat pe iba'ore ikērēat mujurūġrūġap epere am, Satanás ixe ekariwa buye — io'e.³⁵ — Cekariwa be imudadaybotbot'ibit ma soat em ġu cekariwa duk'a be dopdom. Kariwa imujēm pin pima, ġujēm. Kariwa ipot pit, soat em jebay duk'a be dopdom. Cebay ixe ġujēm ġu — io'e.³⁶ — Ōn ma Deus ipot. Owebe eydaxijo buje, Satanás ġu eykukukan jeenuy — io'e. — Imēnpuye ikērēat mujurūġrūġap epere but epesop — io'e.³⁷ — Icēmān eyju Abraão naxeġebitbit — io'e. — Inaka eyju oaoka ojuy wa'ō kay kūyjobit'ūm puye — io'e - Jesus o'e.³⁸ — Webay be omutaybitbinap muwēnuwēn ōn eywebe. Satanás ebekitkit eyju. Ixe ekukuap taġ eyju dak jekukum — io'e Jesus.

³⁹ - ⁴⁰ — Ka'ūma! Ocedobu'ūm ekukuap co'i oceju jekukum- -Abraão'ūm ekukuap co'i — io'e ip te'e ma.

— Deus kawēn icēmat o'ġuwēn owebe — Jesus

o'e. — Iboap ekawên acā oġuwên eywebe. Inaka eyju ma oaoka ojuy kawên icēmat kay'ūm puye — io'e. — Abraão bit kawên icēmat kay kūyjobit cīcā osunuy. Abraão naxeġebitbit eyju. Ixe'ūm ekukuap co'i ġu bit eyju jekukum — Jesus o'e. — Apēnpuye dak? — io'e. ⁴¹ — Satanás ekukuap co'i eyju jekukum — io'e.

— Satanás ekukuap co'i ġu oceju jekukum. — Deus ekawên taġ ma — io'e ip. — Deus acā ocebay — io'e ip.

⁴² — Deus xewi ojut. Wa'ōbi ġu ojut. Ixe ma omudot — io'e Jesus. — Deus eyebay bima, kajuk okukpin eyxe oġuy — io'e. ⁴³ — Wekawên kay jekūyjobin pin ġu eyju. Imēnpuye wekawên pa'arēm eyxe — io'e. ⁴⁴ — Ibiōġbuk kērēayū kukat ebekitkiyū eyju. — Satanás ebekitkiyu — io'e. — Jesus o'e. — Apēn ixe ikērēat mujurūġrūġ iap co'i eyju dak ikērēat mujurūġrūġ — io'e. — Ixe warara'acat aokaka'uk osunuy ipi mujurūġ isum. Gasū dak wuyjuyū muy'ū'ū'uk ixe — io'e. — Kawên icēmat kay kūyjobit'ūm osunuy ixe — io'e. — Iba'ore ixe be kawên icēmat kay kūyjobit am. Icēm ġu tekū e'em. Napa ma e'em. Napa ma e'em pima, je'e pinap taġ e'em cexe. Dapxi tekū — io'e. — Icēm'ūmān e'em ip ixe ebekitkiyū. ⁴⁵ Icēmat ōn pit e'em eywebe — io'e. — Inaka eyetabut ġu wekawên kay — io'e. ⁴⁶ — Ka'ūma ma icēmān e'em owebe “Ikērēat mujurūġrūġ ēn” i — io'e. — Icēmān wekawên. Apēnpuye eyetabut ġu wekawên kay? — io'e. ⁴⁷ — Kūyjobit ip cekawên kay Deus ebekitkit. Eyju bit Deus ebekitkit ġu. Imēnpuye Deus ekawên kay ġu eyju — io'e Jesus Judeuyū kukayū be.

⁴⁸ — Icēmān oceju e'em ewebe “Ibiōġbuk kērēat a'ōbi ēn e'em” i, “Akpídapi ēn,” i dak — io'e ip. — “Cūġ'ūma ēn jekukum Samaria eipi wat puxim,” i oceju e'em ewebe. Icēmān oceju e'em — io'e ip.

⁴⁹ — Icēm ġu eyju e'em — Jesus o'e. — Ibiōġbuk kērēat a'ōbi ġu ōn e'em. Webay kuġ ōn ibuyxim. Eyju bit obuyxim ġu okuġ — io'e. ⁵⁰ — Ōn ma obuyxim okuġap kudadam ġu — io'e. — Webay bit

obuyxim okuḡ. Ixe obuyxim ḡu okukat ḡuju ipiat'ajo-
joap pe — io'e. ⁵¹ — Icēmān ōn e'em eywebe — io'e.
— Wekawēn taḡ jekuku'ukat soat em ḡu jeedop
ce'ū'ūayū xe — io'e Jesus.

⁵² — Ibiōḡbuk kērēayū kukat a'ōbi ēn kawēnwēn
— i napa ma o'e ip Judeuyū kukukayū. —
Abraão'ūm oe'ū. Deus ekawēn muwēnuwēn'ukayū-
'ūm'ūm tak oe'ū'ū. "Wekawēn taḡ jekuku'ukat soat
em ḡu jeedop ce'ū'ūayū xe," i ēn pit e'em — io'e
ip. ⁵³ — Ocedobu'ūm oe'ū- -Abraão'ūm. Abraão bit
toto osunuy ya'ōbuyxiat. Ixe'ūm podi du a'ōbuyxi?
— io'e ip. — Deus ekawēn muwēnuwēn'ukayū-
'ūm'ūm tak oe'ū'ū. Ixeyū'ūm'ūm pit toto osodop
ya'ōbuyxiayū. Ixeyū'ūm'ūm podi du a'ōbuyxi? —
io'e ip. — Abu dak ēn? — io'e ip Jesus pe.

⁵⁴ — Ōn ma xipan jewemuwēnuwēn pima, abu
kuka wa'ō kay o'e? Ka'ūma ma! — io'e. — Webay
bit xipan omuwēnuwēn. "Ka'ūmḡu okpot co'iat ya'ō-
buyxiat," i'e'em ixe. "Ēn acā ocekukukat," i te'e ma
eyju e'em webay be — io'e Jesus. ⁵⁵ — Eyju ma eye-
taybit ḡu abu ixe iam. Ōn pit wetaybit ixem. "We-
taybit ḡu ixem," i ōn e buje, napa ma kajuk oce.
Eybuxim kajuk oce dapxi. Imēnpit wetaybit cīcā
ixem. Kūyjobit ōn cekawēn kay — io'e. ⁵⁶ — Wuydo-
bu'ūm Abraão'ūm itaybit o'e ipi kay tekū jajēm
wuydaxijojo'ukan iam. Imēnpuye icokcok o'e — io'e
Jesus.

⁵⁷ — Aypa ḡu ēn — io'e ip. — Cinquenta koato
ḡu buk ēn — io'e ip. — Abraão ejojojo ḡu! — io'e
ip. — Icēm ḡu ēn e'em — io'e ip Jesus pe.

⁵⁸ — Icēmān ōn e'em eywebe — io'e Jesus. —
Abraão kap awap ma kuy wetabēḡ oḡuy — io'e.

⁵⁹ Gebuje wita'a o'yabu ip Jesus kay yamuju am
Judeuyū kukukayū. Yaoka ojuy ip napa ma tūybe
e'em iān. Jesus pit o'jemunēm adeayū parakpe. Xe-
rewun. O'jēm Deus eju kawēnwēnap'a bewi-
yaboḡat'a bewi. Akiju o'jēm.

9 Gebuje Jesus ita'ūmat o'jojoho doze beayū eju cūgcūg pima. Ikap puje ma ita'ūm osunuy. Dinheiro ojuyjuy'uk osunuy ita'ūm puye.

² — Ocemutaybitbin'ukat — io'e ceweju etaybitbinayū. — Apēnpuye ite ita'ūm o'kap? Ita'ūm o'kap ite ma ikērēat mujurūgrūg puye du? — io'e ip. — Pām ġuto cebay ikērēat mujurūgrūg puye du? Pām ġuto ixi ikērēat mujurūgrūg puye du? — io'e ip.

³ — Ita'ūm ma o'kap ikērēat mujurūgrūg puye ġu, cebay ikērēat mujurūgrūg puye ġu dak, ixi ikērēat mujurūgrūg puye ġu dak — io'e Jesus. — Deus ja'ōbacaap jomōg wuyetabutpe jabeku. Imēnpuye ita'ūm o'kap — io'e. ⁴⁻⁵ — Apēn kaxi wuymukabiahham iap puxim ōn tak Deus ekawēn ijodiat mutaybitbin ijodi bima cūg ma ceku am ip. We'ū buje kabiok je'e — io'e. — Deus omudot kapik am jewebam ja'ōbacaap mubapukpuk am. Deus peam cuy acejekapik wuyekapik put pima. Ģuyjom iba'ore je'e wuywebe wuyekapik am cebeam.

⁶ O'jexi ipi ju. Xih. A'a'a. Ka'wi o'ġu'a'a jebidim. Wūnxik. Poroġ. Ka'wi'a'a o'yamuy ita'ūmat eta be imu'ada am. (¹⁴) Judeuyū ebodoydoyap kabia be o'yamuy ita be imu'ada am.

⁷ — Eju juy idibi'it'iti be- -Siloédi be — io'e Jesus. — Ecedopawuy juy idibim — io'e. (Siloé timudot'ibiti iape wuya'ōm).

Xīgxīg. O'ju jewedopawuy.

Jay. Oajēm idibi'it'iti kay. O'jewedopawuywuy. Boroboro'i. Itate o'e. O'jeu. Jecoatcoan o'e.

⁸ Imēnpuye ita'ūm tūibit tuk'a etakobeayū o'jekawēn ip jewewaju, ita'ūm tūibit o'jojoho'iayū dak.

— Ijoce dinheiro ojuyjuy'uk osunuyiat ġu du sute? — io'e ip jewewebe.

⁹ — Ijoce osunuyiat teku — io'e ip pūġpūġpūġ.

— Ka'ūma. Ijoce osunuyiat ġu teku — io'e warara'acayū. — Ixe buximat acā teku — io'e ip.

— Ōn ma ijoce dinheiro ojuyjuy'uk oġuy — io'e ita'ūm tūibit. ¹⁰ — Apēn etate ġasū? — io'e ip cebe.

¹¹ — Aġokatkat oajēm okay — io'e ita'ūm tūibit. — Ibutet Jesus i — io'e. — Ka'wi o'ġu'a'a. O'yamuy weta be weta mu'ada am. "Eju juy Siloédi be,"

i juk o'e owebe — io'e. — “Ecewedopawuy juy,” i dak — io'e. — Imēnpuye oju. Ocewedopawuy. Weta-te oceu — io'e ita'ūm tūibit. — Wecoan put oce — io'e.

¹² — Poce omuy ixē Jesus? — io'e ip.
— Iye. Wetaybit ġu — io'e.

¹³ Ġebuje Fariseuyū kay tuk'a etakobeayū ita'ūm tūibit o'tujowat.

¹⁴ - ¹⁶ — Apēn ecewetada ġasū? — io'e ip Fariseuyū ita'ūm tūibit pe.

— Ka'wi'a'a o'yamuy weta be — io'e. — Ocewedopawuy. Wetate ġasū oce — io'e.

— Itadaat o'jekapik jebodoydoyap kabia be-Sábado bima — io'e ip Fariseuyū. — Moisés ekawēn taġ ġu ite jekukum. Deus a'ōbi ġu ite e'em — i napa ma o'e ixeyū Fariseuyū.

— Ikērēat mujurūġrūġ'ukat ġu itadaat! Apēn kuka ikērēat mujurūġrūġ'ukat pe wuywebe i'e ba'o-reat mubapuk put? — io'e warara'acayū.

Imēneju pūġ taġ ġu ip Jesus muwēnuwēn o'e Fariseuyū. Wara'at taġtaġtaġ ma kawēnwēn ip o'e.

¹⁷ — Pām ēn? — io'e ip ita'ūm tūibit pe. — Ixe etadaat. Abu ixē exe? — io'e ip.

— Deus ekawēn muwēnuwēn'ukat xeku — io'e ita'ūm tūibit.

¹⁸ Judeuyū kukuk'ukayū ibu'u ip o'e jetabut am ita'ūm tūibit a'ō kay. — Ita'ūm ġu teku osunuy — io'e ip itabut'ūm puye.

Imēnpuye ita'ūm tūibit ebay o'ġudot ip, ixi dak. O'jekawēn ip ceweju ip yajēm puje.

¹⁹ - ²⁰ — Ekpot tu iġo? — io'e ip cebay be.

— Hm hm. Okpot iġo — io'e cebay.

— Ita'ūm tu o'kap? — io'e ip.

— Hm hm, ita'ūm ġoku o'kap.

— Apēn tak o'jewetada ġasū? — io'e ip cebayū be.

²¹ — Wetaybit ġu bit apēn xe'e o'jewetada iam — cebay o'e. — Wetaybit ġu abu ixē o'ġu'ada iam — io'e. — Iġo eju ma juy epeyekawēn — io'e ip Ju-

deuyū kukukayū be. — Ite ma jewetadaap ġuwēn eywebe. Bekit ġu ġoku — io'e ip.

²² Imēn o'jede ip, Judeuyū kukukayū buxim iparara buye. Judeuyū kukukayū juk o'e jebekitkit pe:

— “Jesus Deus emunaē,” i eyju e'em pima, ey-muōmat ġu kuka oce'e Deus eju kawēnwēnap'a be — i.

²³ Imēnpuye iparara o'e ip Judeuyū kukukayū buxim. Imēnpuye ixeyū o'e:

— Bekit ġu ġoku — i. — Je'adaap ġuwēn eywebe — i. — “Apēn ece'ada?” i juy epe'e cebe — io'e ip.

²⁴ Fariseuyū waram ita'ūm tūibit o'tojocat jewekay.

— Deus etabutpe wuyju nuynuy — io'e ip. — Imēnpuye icēmān ma juy ece — io'e ip Fariseuyū. — Etadaat ikērēat mujurūġrūġ'ukat — io'e ip napa ma. — Ocetaybit iboam — io'e ip.

²⁶ — Wetaybit ġu ikērēat kuġ xe'e ixe iam — io'e ita'ūm tūibit. — Wetaybit wetate ġu ojop iam. Ġasū bit wetate ma oce — io'e.

²⁶ — Apēn sute o'e ewebe? — io'e ip. — Apēn etada? — i waram o'e ip.

²⁷ — Kuy juk iboap oġuwēnuwēn eywebe — io'e. — Eyju bit eyetabut ġu wa'ō kay. Apēn eyju dak waram wa'ijo pin eyxe? — io'e ita'ūm tūibit. — Ixe ebekitkiyūm pin paxi eyju dak? — io'e cebe ip.

²⁸ — Ap! Ixe ebekitkiyūm pin ġu oceju! — io'e ip. — Ekawēnkērē jījā ocexe! — io'e ip.

Oitakomān ip ita'ūm tūibit kay. O'ġukorēm cīcā ip.

— Ēn ma ite ebekit — io'e ip. — Oceju bit Moisés ebekitkit — io'e ip. ²⁹ — Ocetaybit Deus a'ō-bi Moisés e'e'uk osunuy iam. Ocetaybit ġu abu a'ōbi sute e'em iam — io'e ip.

³⁰ — “Abu-a'ōbi sute e'em?” i eyju e'em — io'e. — “Deus a'ōbi ite wetada,” i ōn pit e'em — io'e. — Iboap iwaru jījā oxe — io'e. ³¹ — Wuyetaybit Deus ikērēat mujurūġrūġ'ukat ekawēn a'ijojom ġu ibuywat am iam. Jebikuyap taġ jekuku'ukat ekawēn a'ijojom pit ibuywat am. Jebuyxim jekukat ekawēn a'ijojom

Deus. ³² Ka'ūma ma teku ita'ūm o'kap'iat o'sutada iap awēg o'yawēgtobuxik. Kuyje dak iboap awēg o'yawēgtobuxik ġu — io'e. — Ġasū bit Jesus wetada — io'e. ³³ — Deus a'ōbi'ūm pima, iba'ore kajuk o'e cebe wetada am. Deus a'ōbi ma ite wetada — io'e ita'ūm tūibit.

³⁴ — Warara'acat podi ma ikērēat kuġ ēn! Eta'ūm ekap ikērēat kuġ cīcā buye! — io'e ip napa ma. — Ēn tu ocemutaybin pin? Ejēm cuy ocexewi! — io'e ip. — Ejēm cuy Deus eju kawēnwēnap'a bewi! — io'e ip. — Waram cuy eōm ġu ijop'a be — io'e ip.

O'ġujēm ip itakoma ita'ūm tūibit kay buye.

³⁵ Ġebuġe Jesus ita'ūm tūibit o'tobuxik. O'tobuxik Fariseuyū be ixē mujēm iap awēg tobuxik puġe. O'jekawēn ceweju.

— Tapu, ēn pit tu etabut Deus ipot kay? — io'e Jesus.

³⁶ — Abu sute, Kariwa? — io'e ita'ūm tūibit. — Ixe juy eġubapuk omutabut am — io'e.

³⁷ — Ixe jojom ēn ġasū-eweju kawēnwēnat com — io'e. — Ōn ma ixē — io'e Jesus.

³⁸ O'jēġ'aecōġcōġ Jesus wap Jesus ya'ōbuyxi cexe buye.

— Kariwa, wetabut oce ekay ġasū bit — io'e.

³⁹ — Pūġpūġ ipi daġayū'in cūġ ma Deus xe wēdot puġe. Okay itabucayū cūġ ma cexe. Itateayū buxim ip — io'e Jesus. — Warara'acayū bit ikērē cexe. Itabut'ūmayū ikērē cexe — io'e. — “Wetaybitsū mabuk Deus ekawēn. Imēnpit wetaybin pin cīcā,” i'e'em warara'acayū. Ġuyjom ixeyū itabut je'e okay — io'e Jesus. — Warara'acayū bit te'e ma e'em “Wetaybit Deus ekawēn,” i. Itabut ġu je'e ip okay. Ita'ūmayū buxim ip — io'e.

⁴⁰ — Te'e ma du oceju e'em “Ocetaybit Deus ekawēn,” i? — io'e ip Jesus pe, pūġpūġ Fariseuyū'in.

⁴¹ — “Ocetaybitsū ma Deus ekawēn. Imēnpit ocetaybin pin cīcā,” i ey'e buġe, ikērēat kuġ ġu kajuk epe'e Deus xe. Imēnpit te'e ma eyju e'em “Ocetaybit cīcā Deus ekawēn,” i. Imēnpuyē ikērēat kuġ eyju cexe — io'e Jesus.

10 Gebuje Jesus wuymutaybitbinap ekawēn o'ḡuwēn adeayū be. Ovelha ekawēn o'ḡuwēn cebe ip.

— Icēmān ōn e'em eywebe — io'e. — Ovelha ekorara be iōm pinat, xīntabi be ḡu ōmōm pima, "Teku ovelha bu pin," i wuyju e'em. "Teku ovelha dujupa'ūm'ūm'ukat," i wuyju e'em — io'e Jesus. ² — Ovelha kukuk'ukat pit korara exīntabi be ōmōm — io'e. ³ — Korara exīntabi wiwi'ukat xīntabi muywekweḡ ovelha kukat ōm ām. Ovelhayū jekukat a'ijo-jom. Ikukat jeōhō nomuwāwām ibuten e'em. Jeōhō mujēmjēm akiju korara exīntabi be jekorara bewi — io'e. ⁴ — Imujēm puje cucum jeōhōyū wap. Ovelha jekukat nomuju cucum jekukat a'ōm itaybit ip puye. ⁵ Wara'acat nomuju bit taobu'u ip cum. Itaybit ḡu ip wara'acat a'ōm. Jekukat a'ōm acā itaybit ip. Wara'acat puxim pit jenapōnpōn ip itaybit'ūm ya'ōm puye — io'e Jesus.

⁶ Ovelha ekawēn o'ḡuwēn Jesus. Xepxep pe o'jekawēn. Ovelha muwēnuwēn pima, jekay itabucayū dak o'ḡuwēn. Imēnpit cekawēn pa'arēm o'e cexe ip-adeayū xe.

⁷ Waram Jesus o'jekawēn cebe ip.

— Icēmān ōn e'em eywebe — io'e. — Xīntabi daḡ ovelha ōmōm korara be. Korara be bima abu-be ixeyū muy'ū but? Ka'ūma be ma. Imēnpuxim soat em aḡ ōn okay itabucayū kay — io'e Jesus. ⁸ — Ovelha itaybit ḡu dujupa'um'um'ukat a'ōm. Imēnpuxim okay itabucayū itabut ḡu icēm'ūma wuymutaybitbin'ukayū ekawēn kay. Wajēm awap osodot'iaiyū icēm ḡu wuyjuyū o'ḡutaybitbin — Jesus o'e. ⁹ — Xīntabi daḡ ovelha ōmōm korara be. Cēm cēm ip jexat kudadam. Korara be bima abu-be ixeyū muy'ū but? Ka'ūma be ma! Imēnpuxim wuyjuyū okay itabun puje soat em aḡ ōn ixeyū kay. Abu-be ixeyū muy'ū but? Ka'ūma be ma! — io'e Jesus. ¹⁰ — Tujupa'um'um'ukat ma ajēmjēm ovelha dujupa'um ām, ixeyū aoka am tak. Ōn pit ojot ijodiat aḡuymuisun am. Okay itabucayū yaḡuyisum jekukum. Ojot ixeyū mucokcok am — io'e. — Okay itabucayū icok-

cok cîcâ — io'e. ¹¹ — Okay itabucayū kuḡ òn xipan ikukat jeõhõ kuḡ xipan iap puxim — io'e. — Ovelha kukat puxim òn. Obu'u ḡu we'ũ ãm warara'acat pe okay itabucayū aokaap puxim — io'e. ¹² — Ovelha kukukat a'õbuywatwat'ukat ikukukat ḡu. Dinheiro bu am acâ kapikpiḡ. Ovelha iwat ḡu-ibuywatwat'ukat acâ. Ovelha iwatiwan kak ajêm puje. Jena-põnpõn kak puxim iparara buye. Kak ovelha bubum. Ovelha muwatwan soat taḡ. ¹³ — Ibuywatwat'ukat jena-põnpõn dinheiro bum acâ kapikpiḡ puye. Ibu'u ovelha kuḡ, cexe ikukpin'ũm puye. ¹⁴ · ¹⁵ Ovelha kukukat puxim òn- xipacat puxim — Jesus o'e. — Wetaybit webay. Webay dak itaybit òn. Imênpuxim òn tak wetaybit okay itabucayũm. Ixeyũ dak itaybit òn — io'e. — Obu'u ḡu we'ũ ãm okay itabucayū e'ũap puxim — io'e Jesus. ¹⁶ — Soat ḡu ovelha pũḡ ekorara be. Imênpuxim soat ka daḡacat itabut je'e okay — io'e Jesus. — Wa'õ kay je'e ip kũyjobit. Pũḡ taḡ ma ip jeku — io'e. — Soat ixeyũ kukan oḡuy — io'e Jesus. ¹⁷ Oje'ũ okay itabucayū e'ũap puxim. Waram ḡuto òn pit ocetait we'ũ buje. Imêneju webay xe okukpin cîcâ obu'u'ũm puye we'ũ ãm — io'e. ¹⁸ — Obu'u we'ũ ãm pima, iba'ore kajuk o'e warara'acat pe bit oaoka am. “Ece'ũ” i juk o'e webay owebe. “Waram ḡuto etait ece'e,” i dak. Wukpiwatpi ma oje'ũ, webay ukpiwatpi dak. Wukpiwatpi ma waram ḡuto wetait oce'e, webay ukpiwatpi dak — io'e Jesus.

¹⁹ Imêneju pũḡ taḡ ḡu ip Jesus ekawên o'ḡuwên- - wara'at taḡtaḡtaḡ ma Judeuyũ kukukayũ.

²⁰ — Ibiõḡbuk kērēat kuḡ teku — io'e ip napa ma ade ixeyũ'in. — Imênpuye yukpidapi — io'e ip napa ma. — Apênpuye dak eyju ixē a'ĩjom? — io'e ip.

²¹ — Ibiõḡbuk kērēat kukat pit imên cekawên pa'ore! — io'e warara'acayũ bit. — Apên kuka ibiõḡbuk kērēat kukat ita'ũmat o'sutada? — io'e ip Jesus pe jededem. — Iba'ore itada am ibiõḡbuk kērēat kukat pe — io'e ip.

²²⁻²⁴ Waram pima Judeuyū kukukayū o'ju Jesus kay. Jerusalém ka beayū peta muḡēḡēm ip osodop Judeuyū. Peta muḡēḡēm ip osodop apēn kuyjeayū Deus eju kawēnwēnap'a o'yamudim iap kay ḡebum am. Ihi bima peta mujurūḡrūḡ'uk osodop ip. Jesus Deus eju kawēnwēnap'a etaybu daḡ cūḡcūḡ o'e- -Salomão emuamuy'a etaybu daḡ. Oajēm ip Jesus kay Judeuyū kukukayū. O'jekawēn ip Jesus eju.

— Ēn tu Cristo- -Deus emunaē? — io'e ip. — Ibapuḡ cuy eḡuwēn ocewebe — io'e ip. — Ade kabia emuwēnap wiwim ocesop — io'e ip. — Iba'arēm acā ēn kawēnwēn ocewebe. Ēn Deus emunaē bima, Cristo bima, ibapuḡ cuy eḡuwēn ocewebe — io'e ip.

²⁵ — Kuy juk adi ocewemuwēnuwēn eywebe- -ade em ma — io'e Jesus. — Imēnpit eyetabut ḡu wa'ō kay — io'e. — Webay a'ōbi wa'ōbacaap ojomōḡmōḡ eyetabutpe — io'e. — Teku Deus emunaē iap mubapukpuḡ oḡuy eywebe — io'e. ²⁶ — Imēnpit eyetabut ḡu wa'ō kay, okay eyetabut'ūm puye — io'e. ²⁷ — Okay itabucayū kūyjobit wa'ō kay ovelha jekukat a'ō kayap puxim — io'e Jesus. — Wetaybit ixeyū e'eam. Wekawēn taḡ jekukum ip ovelha jekukukat a'ōm itaybicap puxim — io'e. ²⁸ — Ixeyū aḡuymuisusun ōn. Warara'acayū bit ixeyū ju'uk ḡu obui bewi- -pūḡ tak ka'ūma. Soat em itait jeedop ip Deus xe je'ū buje — io'e. ²⁹ — Webay ixeyū o'ḡutabun okay weōhōyū buximayūm. Warara'acat podi ma ja'ōbacaap kuḡ webay. Abu-be ixeyū uk put webay bui bewi- -weōhōyū uk put? Ka'ūma be ma! — io'e. ³⁰ — Jawa'ōca jojo'i oceju webay eju — io'e Jesus.

³¹ Iboap co buje, waram wita'a o'yabu ip Jesus abuḡ ojuy am Judeuyū kukukayū.

³² — Webay a'ōbi juk adi wa'ōbacaap ojomōḡmōḡ eyetabutpe- -ade ma — io'e Jesus. — Apēnpuye dak eyju wabuḡ ojuy wita'am? — io'e Jesus.

³³ — “Ekērē Deus xe, juk adi a'ōbacaap ejomōḡmōḡ puye,” i'ūmḡu oceju e'em ewebe — io'e ip. — “Ekawēnkērē Deus xe,” i acā oceju e'em ewebe — io'e ip. — Ēn ijodiat acā. Imēnpit “Oceju jewa'ōca jojo'i ma webay eju,” i napa ma ēn e'em — io'e ip

jetakoma pibun. — Imēneju abug̃ ojuy oceju — io'e ip Jesus pe.

³⁴ — Imēn e'em Deus ekawēntup:

Eyju dak Deus a'ōbiayū — io'e Deus kuyje, i.

Deus kuyje o'e "Deus a'ōbiayū eyju" i jekawēn muwēn ām taēhē'ibiyū be — io'e. ³⁵ — Deus ekawēntup napa ġu e'em- -pūġ em tak ka'ūma. Icēmān e'em. Wuyetaybit iboam — io'e Jesus Judeuyū kukukayū be. ³⁶ — Ōn ma Deus cuk onaē ijodiat taxijo am. Ōn ma ixē omudot — io'e Jesus. — Apēnpuye eyju napa ma e'em "Ekawēnkērē Deus xe," i, "Jewa'ōca jojo'i oceju webay eju," i ōn e'em puye? — io'e Jesus.

³⁷ — Webay a'ōbi'ūm pima, eyetabun ġu juy epesop okay — io'e. ³⁸ — Wekawēn coco am eyetabut'ūm pima, eyetabun cuy epesop wa'ōbacaap mōġmōġap coco am — io'e. — Eyetabun puje "Jesus ya'ōbaca cebay a'ōbacaap co'i," i epe'e — io'e.

³⁹ Imēneju Jesus daomūn ojuy ma'ġuto ip Judeuyū kukukayū. Jesus pit o'jenapōn jenaomūnap puxim.

⁴⁰ Wara'at ka kay o'ju Jesus. Toktek. Jordāodi waram o'timudek. Jay. Oajēm João Batista be adeayū mubatisasan osunuy iatka kay. Wīnābu osunuy.

⁴¹ - ⁴² Ġebuġe ade ibo ka watwat oitabun Jesus kay- -Jordāodi wīnābuayū.

— João Batista ma wuywebe i'e ba'oreat o'ġubapukpuk ġu — io'e ip adeayū jewewebe. — Imēnpit ixē aġokatkat muwēnuwēn'uk osunuy ocewebe. Icēmān João ixē o'ġuwēnuwēn — io'e ip.

Imēnpuye Jesus kay itabut o'e ip adeayū.

11 Lázaro iwātaxipi o'e. Maria kipit iwātaxipi o'e- -Betânia ka beat. Imēnpuye lixīyū Lázaro wātaxiapi awēġ o'yawēġmuju Jesus kay. Betânia ka watwat osodop ip- -Maria, Marta dak, Lázaro dak.

² Ġuyjom ixē Maria wuykukukat i o'suimude'on

tide'oatim. Ixe o'suimupuruk jadam. Imên o'e jexe Jesus ikukpin cîcâ buye.

Yawêgtujowacat oajêm Jesus kay. Jay.

³⁻⁴ — Kariwa — io'e Jesus pe. — Lázaro iwâtaxipi jîjâ — io'e. — Exe ikukpinat iwâtaxipi o'e — io'e.

— Kuy wetaybit — io'e Jesus. — Iwâtaxipi jîjâ opop — io'e. — Ce'û buje dak jeedop ãu ce'û'ûayû xe. Guyjom adeayû je'e "Deus soat podi ma ya'ôbaca; soat podi ma idip," i — io'e. — "Deus ipot tak ya'ôbaca- -soat podi ma ya'ôbaca," i je'e ip — io'e Jesus.

⁵ Jesus xe Marta ikukpin cîcâ osunuy. Maria dak ikukpin cîcâ osunuy, Lázaro dak. ⁶ Inaka Jesus xep-xep xet osunuy jenuyap ka be iwâtaxipiat awêg tobu-xik puje. O'ju ãu buk Lázaro kay. Xet. Xet.

⁷ Gebuje Jesus o'jekawên doze beayû eju- -jeweju etaybitbinayû eju.

— Ga'a bukto accepit Judéia eipi kay waram — io'e.

⁸ — Ocemutaybitbin'ukat — io'e ip. — Iboceat abuã ojuy ãaxîn ma wita'am- -Judeuyû kukukayû. Waram tak tu iboce eju pin? — io'e ip Jesus pe.

⁹⁻¹⁰ — Hm hm — io'e. — Wekapik put mabuk owebe. Pûg kabia be doze hora kabiaham wuyju — io'e. — Ixima be cûgcûgat kuka o'at kabiok puye. Kabia daã cûgcûgat pit kuka o'at ãu kaxi imukabiahham puye. Imênpuxim Deus bikuyap taã jeku-ku'ukat je'û ãu jekapikap mu'ûm'ûm pima. Ga'a aju. Oaokam ãu buk ip, we'ûap kabia oajêm ãu buk puye — io'e.

¹¹ Waram Jesus o'jekawên ceweju ip- -doze beayû eju.

— Wuybure, Lázaro opop ixet — io'e- -Jesus o'e. — Ôn pit cum ixé muwurûg âm — io'e.

¹² — Kariwa — io'e ip. — Ixet pima, kuka o'je'ada — io'e ip.

¹³ Jesus itaybit o'e Lázaro'ûm oe'û iam. Imên-pit — Lázaro ixet — io'e cebe ip.

Imenpuye túybe Lázaro ixet iân o'e ip doze beayû.

¹⁴ Imênpuye Jesus ibapuã o'jekawên cebe ip.

— Lázaro'üm oe'ü — io'e.

Imên o'e ixeyü mutaybit am.

¹⁵ — Oju ġu cekay ce'ü awap — io'e. — Ğasü bit wa'öbacaap oġubapuk eywebe eymutabun am okay. Wa'öbacaap kay eyetabut cîcâ bima, ocokcok oġuy. Ğa'a aju ix'e'üm kay ġasü bit — io'e doze beayü be.

¹⁶ — Ğa'a wuyju dak aju ceweju. Äġ itakomaayü wuyju dak wuyaoka Jesus aoka buje — io'e Tomé - jebureyü be o'e, xepxem ikap'ibit.

O'ju ip Lázaro'üm com.

¹⁷ - ¹⁸ Jesusyü oajëm Betânia ka xe. Betânia ka Jerusalém ka etako o'sukadop. Ebapüġ kilometro o'-sukadop Jerusalém ka bewi. Lázaro'üm kay yajëm awap oe'üiap awëġ o'yawëġtobuxik Jesus.

— Lázaro'üm o'ġuöm ip witabiküy be — io'e ip Jesus pe. — Ebadipdip xet omuy iküy be — io'e.

¹⁹ Lázaro'üm ixityü mudiu ip o'e -Marta, Maria dak. Ade ibureyü ixeyü muġuycūġap mu'üm ojuy ip o'e. ²⁰ Jesus omuyku iap awëġ Marta o'yawëġtobuxik.

Ğejuje Marta o'ju Jesus dopabe. Jesus e daġ mabuk oeku. Maria bit jeduk'a be osunuy. ²¹ Jay. Oajëm Jesus kay.

— Kariwa — io'e Marta. — Ēn ijoce bima, okipit'üm kajuk oe'ü ġu — io'e. ²² — Imēnpit Deus emujoojuyjuy je'ġüm ewebe. Wetaybit iboam. Deus eju okipit'üm peam ekawēn puje, Deus jekawēn a'ijojjo — io'e.

²³ — Ekipit'üm waram jeu ce'ü'üayü xewi — io'e Jesus Marta be.

²⁴ — Wetaybit ix'e'üm waram jeu iam — io'e Marta. — Waram wuyeu buje, ix'e'üm tak jeu - wuyebay soat ce'ü'üayü muyuap kabia be — io'e Marta.

²⁵ — Ōn ma ce'ü'üayü mutaicit'ukat — io'e Jesus. — Wa'öbi ce'ü'üayü waram ġuto jetai — io'e. — Okay itabucat e'ü buje, waram ġuto jetai. Soat em jeedop ip itait Deus xe — io'e Jesus. ²⁶ — Okay itabucat ce'ü'üayü xe ġu jeenuy -Deus xe acâ. Eta-but tu iboap kay? — io'e Jesus Marta be.

²⁷ — Hm hm, wetabut, Kariwa — io'e. — En Deus emunaē oxe — io'e. — Deus ipot ēn — io'e. — Ocemumuwiwi ēn. Wetabut iboap kay — io'e Marta.

²⁸ Jesus eju jekawēn epere buje, Marta o'jepit jekibit tomuwā ām. Ya'ōapīn ma Maria o'tomuwā uk'a beacat pe ja'ījojoap puxim.

— Tū'ū — io'e. — Ejot puk — io'e. — Wuyekariwa omuyku jexem — io'e. — E dağ omuyku — io'e. — Enomuwāwām — io'e jekibit pe, Maria be. — Ejot puk — io'e.

²⁹ Maria o'ju Jesus dopabe e dağat topabe. ³⁰ Jesus ağoka be oexe ġu mabuk. Wūy mabuk oeku. E dağ mabuk oeku. Marta be jedopabijukap pe mabuk osunuy. ³¹ Judeuyū o'ju Maria nomuju- -Lázaro'ūm duk'a beacat -iixīt muğuycūğap mu'ūm ojuyayū. Ixeyū etabixewi Maria o'jēm jeduk'a bewi. Imēnpuye o'jēm ip ixē nomuju. Tūybe ite witabikūy be cum wa am iān o'e ip. ³² Jay. Maria oajēm Jesus kay. O'jēğ'aecōğcōğ cewap.

— Kariwa — io'e. — En ijoce bima, okipit'ūm kajuk oe'ū ġu — io'e Maria.

³³ Maria o'tōn. Maria eju yajēm'ibiyū dak wawa osodop ip Lázaro'ūm cocom. Jesus iğuycūğ cīcā o'e wawaayū jojom. Tadaybotbot cīcā ip cexe o'e wawaayū.

³⁴ — Poce ixē'ūm epeğūōm? — io'e Jesus.

— Kariwa, ejot puk — io'e ip. — Ejojo buk — io'e ip.

³⁵ Jesus o'tōn ġebu je bit. Ah. Wa. Imēnpuye:

³⁶ — Ak'i cekay — io'e ip Judeuyū. — Lázaro'ūm ikukpin cīcā osunuy cexe — io'e ip.

³⁷ — Ita'ūm tūibit o'sutadada teku — io'e warara'acayū ixeyū'in. — Iba'ore ġu du juk o'e cebe Lázaro mu'ada am ce'ūap puxim? — io'e ip jewewebe.

³⁸ Gebuje Jesus o'ju witabikūy kay- -Lázaro'ūm muōmapkūy kay. Iğuycūğ cīcā o'e. O'ju Marta eju, Maria eju, Lázaro'ūm cocoyū eju dak. Yaboğat'a

o'yanuy wita'a ikūy nomudip'am. Ikūynomudip cem osunuy.

³⁹ — Ikūynomudip'a juy epeyamuwede — io'e Jesus.

— Kariwa, eyamuwedeat ġu juy — io'e Marta. — Iġēm xeku opop. Ebadipdip xet opop witabikūy be — io'e.

⁴⁰ — “Okay etabut pima, Deus ja'ōbacaap kuka o'jomōġ etabutpe,” i kuy oce ewebe — Jesus o'e. — Etabun cuy eġuy — io'e.

⁴¹ Ikūynomudip'a o'yamuwede ip ikūy etako bewi. Jesus o'jekawēn Deus eju.

— Bay — io'e. — Soat em ēn wa'ijojom — io'e. — Imēnpuye “Ēn xipat cīcā,” i ōn e'em ewebe — io'e Jesus jebay be. ⁴² — Bay, soat em wekawēn com em — io'e. — Eweju ōn kawēnwēn ijoceayū be wa'ijo am-ixeyū mutabut am tekū Deus emumudot iap kay — io'e Jesus Deus pe, jebay be.

⁴³ Jebay eju jekawēn epere buje, Jesus ya'ōberen o'jewāwā Lázaro'ūm kay.

— Lázaro, ejēm cuy! — io'e.

⁴⁴ Ce'ū topibit o'jetait waram. O'jēm witabikūy bewi. Soat taġ ijebit taġ imūnmūn mabuk oeku paġōm. Yamūnmūn mabuk oeku.

— Eju'uk cuy paġo cebewi — io'e Jesus. O'ju'uk ip paġo.

⁴⁵ Imēneju oitabun ip Jesus kay Judeuyū ma- - Maria ejuacayū ma- -adeayū- -Jesus Lázaro'ūm o'ġutait iap o'jojojo'iaiyū ma. ⁴⁶ Warara'acayū bit o'ju Fariseuyū kay.

— Jesus Lázaro'ūm o'ġutait waram — io'e ip Fariseuyū be.

⁴⁷ Ġebuje paīyū kukukayū o'je'awero ip Fariseuyū eju, jewāwēwē'ukayū eju dak. O'jewāwē ip jeweweju.

— Apēn kuka dak ace Jesus pe? — io'e ip jewewebe. — Wuywebe i'e ba'oreat mubapukpuġ adeayū etabutpe. Imēnpuye ade itabut cekay — io'e ip. ⁴⁸ — Apēn kuka dak ace cebe ja'ōbacaap mōġap puxim? — io'e ip jewewebe. — Apēn kuka dak ace adeayū

be jetabucap puxim? — io'e ip. — Itabut puje ip Jesus pe jekukukan je'e ip. Jesus pe jekukukan pima, Roma ka kukat jebekitkit kuka o'gudot wuykay — io'e ip. — Wuyka kuka ip o'sukamu'üm. Deus eju kawēnwēnap'a dak kuka ip o'yamu'üm. Soat ka dağ kuka ip wuymuypōğpōğpōğ. Wuydobuyü'üm'üm eka-wēn tağ ğu kuka ajeku — io'e ip jewewebe.

⁴⁹ Caifás o'jekawēn warara'acat eju- jawēwē- 'ukayü eju. Ixe Caifás païyü kukukat osunuy ixe koato be.

— Eyetaybit'ümān! — io'e Caifás jewēju jewawēwē'ukayü be. ⁵⁰ — Cūğ ma ixe ağokatkat e'ü ām. Xipat kuka o'e pūğ pe ağokatkat pe je'ü ām soat e'üap tieğ- -wuye'üap tieğ — io'e- -Caifás o'e.

⁵¹ Deus ibikuy osunuy Jesus e'ü ām soat e'ü'üap puxim. Caifás pit itaybit ğu osunuy imēn Deus ibikuy iam.

— Xipat kuka o'e pūğ pe ağokatkat pe je'ü ām soat e'üap puxim- -wuye'üap tieğ — i juk o'e itaybit ğu ma'ğ.

Caifás jağuy dağ ğu imēn o'e- -Deus ağuy dağ acā. ⁵² Ixe je'ü Judeuyü e'ü'üap tieğ. Warara'acayü e'ü'üap tieğ tak je'ü. Je'ü Deus ebekitkiyü be pūğ tağ ma jeku am. ⁵³ Imēneju apēn paxi Jesus aceyaoka iam jekawēnwēn oekuku ip jeweweju Judeuyü kukayü.

⁵⁴ Imēnpuye Jesus ibapuğ ğu oeku Judeuyü kukayü etabun Judéia eipi dağ. O'jēm ibocewi. Wara'atka be o'ju- -Efraim ka be. Ibo ka uk'a'ümat xe o'sukadop. Iboka be osunuy doze beayü eju- -jeweju etaybitbinayü eju.

⁵⁵ Ade Judeuyü o'ju Jerusalém ka kay. Peta muğēm ip o'ju. Iğo epeta bima apēn Deus wuydobuyü'üm'üm o'tujujēm Egito eipi bewi iap kay ğebüm ip osodop. Soat ka dağwi o'ju ip Jerusalém ka kay. Peta muğē awap o'ju ip jewemuisun am jebabi dağ.

— Jewemuisun puje, xipat acesop Deus xe — io'e ip jewewebe.

⁵⁶ - ⁵⁷ Païyü kukukayü o'jekawēn peta muğēğēayü eju- -Fariseuyü dak.

— Poce Jesus nuyām eyetaybit pima, epeḡuwēn cuy ocewebe — io'e ip.

Iboam o'e ip Jesus daomūn ojuy buye. Imēnpuye Jesus ajēmap wiwim cīcā osodop ip adeayū.

— Jesus omuyku du peta kay? — io'e ip jewebe. — Omuyku ḡu xe'e? — io'e ip.

Deus eju kawēnwēnap'a be o'jekawēn ip jewebe adeayū- -yaboḡat'a be.

12 Jesus waram o'ju Lázaro kay- -waram ḡuto o'jetait'iat kay. Betânia ka be osunuy Lázaro. O'ju peta muḡē awap. Seis kabia kuka Páscoa epeta ip o'ḡuy'at. Oajēm doze beayū eju. ²Marta puybit mōḡmōḡ o'e Jesus pe i'o am, doze beayū be dak. Lázaro jekōnkōn o'e Jesusyū eju.

³Ḡebuḡe Maria tide'oati o'tibu. Ti'ade o'tibu. Nardo i tibutet osunuy. Tiwekoykeyati ḡu o'tinuy- -nardodi acā. Tideiboḡ cīcāati o'tinuy. Puy. O'suiabi Jesus i. O'suisup jadam. Tide'okuati o'tinuy. Soat taḡ o'e uk'a yabi de'o. De'oooh. Imēn o'e Maria ma. ⁴Judas Iscariotes pit Maria o'ḡukorēm- -Simão ipot. Ixe Judas doze beayū'in osunuy. Ixe Judas Jesus o'ḡūm cekay itakomaayū be ḡuyjom Jesus aoka am cebe ip. Ixe bit Maria o'ḡukorēm.

⁵— Apēnpuye iḡodi o'tideida ḡu dinheiro bu am? — io'e- -Judas o'e jebureyū be. — 300 dinheiro isurūḡat kuka tidei o'e! — io'e. — Tidei kajuk aḡūm ibubut'ūmayū be — io'e Judas Iscariotes. (Pūḡ dinheiro isurūḡat pūḡ kabia be wuyekapikaptei osodop.)

⁶Judas Iscariotes doze beayū edinheiro mūn kuḡ oeku. Imūn pewi i'uk'uk'uk osunuy jewebe ma.

— Apēnpuye dak o'tideida ḡu? — io'e dinheiro kay pin puye.

Itabotaidabotbot ḡu osunuy ibubut'ūmat kay.

⁷— Āḡ cuy Maria jeenuy kaba'ūm — io'e Jesus Judas pe. — Ijudi o'timuxipan we'ū awap ojebit mu- de'onaptim — io'e. ⁸— Soat em eybubut'in iūm put epesop ibubut'ūmayū be — io'e. — Owebe bit ka'ū- ma. Darem ma eyxe oḡuy — io'e.

⁹ Gebuje ade Judeuyū o'ju Jesus kay. Jesus Betânia ka be omuy iap awêg o'yawêgcoco ip. Imên-puye ip o'ju Jesus com. O'ju ip Lázaro jom tak- - Jesus o'gūtait'iat com- -waram o'jetait'iat com.

¹⁰ - ¹¹ Ade Judeuyū oibu'un paüyü kukukayü a'õ kay kũyjobit am. Jesus a'õ kay acã kũyjobit o'e ip Lázaro'üm waram o'gūtait puye. Imên-puye o'jewawõ ip paüyü kukukayü.

— Ga'a Lázaro ayaoka! — io'e ip.

¹² - ¹⁹ O'jojojo'ibiyü Jesus e'eap o'gũwēnuwēn warara'acayü be- -Jerusalém ka beayü be.

— Icēmān Jesus Lázaro'üm o'tomuwā wítábiküy bewi — io'e'e ip adeayü be. — Icēmān Jesus waram Lázaro'üm o'gūtait — io'e'e ip. — Jesus ma ja'õba-caap mōgmōg — io'e'e ip.

Jerusalém ka be òm pasuğ pima Jesus jumento'it'it o'tobuxik. Deus ekawēn tağ e ojuy- -kuyjeatup ekawēn tağ. Xik. Oabik jumento'it'it akpi jeje. Imēn e'em Deus ekawēntup- -kuyjeatup:

Jerusalém ka watwat, eyguycũgũg gũ
juy epesop, i. Eykukukat omuyku je-
xem eykay, i. Jumento'it'it akpi jeje
omuyku jexem, i.

Imēn e'em Deus ekawēntup. Imēnpuye Jerusalém ka be Jesus oajēm jumento'it'it akpi jeje Deus ekawēn tağ.

Gebuje Jesus kay o'ju Jerusalém ka beayü. Ade ma ip o'ju, Jesus omuyku iap awêg o'yawêgtobuxik puye. Kuy ip oajēm Páscoa epeta muğē ām. O'ju ip Jesus dopabijuğ, Jesus wuywebe i'e ba'oreat mubapukpuğ iap awêg o'yawêgtobuxik puye. Namusudup o'tupupu ip. Jesus kay o'ju ip tup kukuğ. Imēn Judeuyü ya'õbuyxiat tobedede'uk ip osodop kuyje.

— Deus xipat cĩcã! — io'e ip Jesus pe. — Ēn ma omuyku ya'õbi! — io'e ip. — Ēn ma oceukukat- -Israel naxeğebitbit kukukat! Deus cuy xipacat je'gũm ewebe! — io'e ip Jesus pe.

Jumento'it'it akpi jeje Jesus oajēm Jerusalém ka be Deus ekawēntup pe ibararak iap puxim- -kuyjeatup puxim. Iboap iba'arēm osunuy doze beayü

xe Jesus òm puje. Waram kabi be Jesus eu buje bit o'jegebu ip iğodup peap ekawēn kay.

— Iğodup peap ekawēn puxim Jesus jumento'it'it akpi jeje oajēm Jerusalēm ka be — io'e ip jewewebe. — Ixe juk ocemuju jumento'it'it tobuxik — io'e ip jewewebe.

Fariseuyū bit o'e jewewebe:

— Ak'i juy epe'e! — io'e ip. — Soat ma cekay itabut — io'e ip. — Te'e ma wuyju e'em adeayū be “Ixe kay eyetabun ġu juy epesop,” i — io'e ip jewewebe.

²⁰ Ġebuje Gregoyū Jesus co pin o'e-Grécia eipi watwat. Adeayū eju kuy oajēm ip Jerusalēm ka be peta muğē ām. ²¹ O'ju ip Filipe eju kawēn ām. Ixe Filipe Betsaida ka bewiat osunuy. Galiléia eipi bewiat osunuy. O'ju ip Filipe be.

— Tapu — io'e ip Filipe be. — Jesus co pin oceju — io'e ip.

²² Filipe o'ju André mukūyjo am.

— Gregoyū Jesus co pin — io'e Filipe André be. Xepxem ip o'ju Jesus mukūyjo am. Oajēm ip cekay.

— Gregoyū ejo pin — io'e ip Jesus pe.

²³ Ġebuje Jesus o'jekawēn xepxepayū be. Adeayū etabutpe o'jekawēn ceweju ip.

— Soat wağo òn — io'e Jesus. — Ġaxīn ma oje'ū. Ġuyjom pit waram ġuto ocetait. “Soat podi ma a'òbuyxi!” i je'e adeayū we'ūap puye, waram ġuto wetaicap puye dak — io'e Jesus. ²⁴ — Kadaida taida buje, ipi be atamōğ — io'e. — Tamōğ puje, tae'ūata jo'i tadop ipi be ma. Pūğta ma tadop ipi be. Kadai aypan puje bit, ta'ade tadop kadai dağ — io'e.

Imēn Jesus o'jekawēn je'ūām, waram jetaicam tak, ġuyjom ade tiwatwat itabut je'e okay iam tak.

²⁵ — “Ocebu'u jījā ipiat'ajom,” i wuyju e'em pima, “Ocebu'u jījā oce'ū ām,” i dak, “Imēnpuye ocecupinap tağ acā oceju,” i dak, ace'ū. “Ocebu'u ġu ipiat'ajom,” i wuyju e'em pima bit, “Ocebu'u ġu oce'ū ām,” i dak, “Deus bikuyap tağ acā oceku,” i

dak, wuyağuyisum aceku ijodi. Soat em Deus xe ace-sop wuye'ũ buje dak — io'e Jesus. ²⁶ — Obikuyap tağ jeku ojuyat kũyjobin cuy wa'ô kay. Obikuyap tağ jekuku'ukat oxe ma jeenuy. Webay dak je'e cebe “En xipat oxe,” i — io'e Jesus.

²⁷ — Wağuybabi'ũm cĩcã oce — Jesus o'e jewebe ma. — “Bay, obuywan ece we'ũap puxim,” i du oce webay be? — io'e jewebe ma. — Ka'ũma! Imên ġu juy oce cebe. We'ũ âm ma ojot ijodi — io'e jewebe ma. ²⁸ — Bay — io'e Deus pe. — Edipap cuy eğubapuk soat pe ijodiat pe “Deus idip cĩcã” i'e am ip — io'e jebay be.

Deus o'jekawên kabi kadiwi ġebu je bit.

— Odipap kuy oğubapuk cebe ip — io'e jekpot pe -Jesus pe. — Gasũ adeayũ e'em owebe “Soat podi ma edip,” i. Waram tak oğubapuk warara'acayũ be “Soat podi ma edip” i'e am owebe — io'e Deus.

²⁹ Adeayũ kacũğcũğ'i osodop iboce. Tũybe o'jexirikxirik iãn o'e ip pũğpũğ ixeyũ'in. Tũybe Deus ekawên tojtot'ukat o'jekawên cebe iãn o'e ip warara'acat ixeyũ'in.

³⁰ Ğebu je Jesus o'jekawên ijoceat eju.

— Ixe o'jekawên kabi kadiwi omukũyjo am ġu-eymukũyjo am acã — io'e Jesus. ³¹ — Ğaxĩn ma Deus je'e soat pe okay itabut'ũmayũ be: “Eyju ikẽrẽat kuğ oxe,” i. Ğaxĩn ma itabut'ũmayũ kukukat a'ôbacaap o'gu'ũm. Abu-kukukan je'e? Ka'ũma ma! — io'e. ³² — Okay itakomaayũ omuyu korosa eju oaoka am — io'e. — Omuyu buje adeayũ itabut je'e okay — io'e Jesus ijoceat pe.

³³ Jesus iboam o'e imutaybin am ip osubamupaya ip korosa eju we'ũ âm iam.

³⁴ — Moisés ekawëntup e'em:

Cristo je'ũ ġu-Deus emunaẽ, i.

Soat em itabẽğ e'em, i.

Imên Moisés ekawëntup e'em — io'e ip ya'ĩjojo'ibiyũ. — En pit e'em “Soat wağo õn,” i, “Soat wağo subamuyu ip ce'ũ âm,” i dak. Deus emunaẽ du soat wağo? — io'e ip Jesus pe.

³⁵ — On kabiaap puxim — io'e. — Ojot ijodiat

mutaybin am Deus ekawên — io'e. — Darem ma ijo-di oğuy eymutaybinbin. Okay eyetabun cuy epesop eyetabun put pima. Eyetabun cuy epesop ipiatpi'ajojoap pe eyjuap puxim. Kabiok tağ jekuku'ukayū itaybit ġu poma oceju iam. Imēnpuxim itabut'ūmayū itaybit ġu ipiatpi'ajojoap kay oceju iam — Jesus o'e.

³⁶ — Ōn eyxe bima, eyetabun cuy epesop okay — io'e. — Eyetabun puje webekitkiyūm epesop. Kabia dağ jekuku'ukayū buximayūm epesop. Ikērēat mujurūğrūğ'ug ġu epesop. Eyağuyisum epeku — io'e.

Jesus o'jēm adeayū xewi iboam e buje.

³⁷ Soat em ma Jesus wuywebe i'e ba'oreat mubapukpuk'uk osunuy adeayū etabun. Inaka ibu'u jījā ip osodop jetabut am cekay. ³⁸ Imēn cuk adi o'tupmubararak Isaiás'ūm kuyje-Deus ekawên muwēnuwēn'ukat'ūm:

Kariwa, kawēn icēmat muwēnuwēn ocekukuku adeayū be, i. Imēnpit itabut ġu ip o'e ocekawēn kay, i. Soat podi ma a'ōbaca ēn iap iba'arēm o'e cexe ip, i.

Imēn ibararak opop tup pe. Itabut ġu ip o'e Jesus kay apēn kuyjeayū Isaiás'ūm ekawēn kay itabut'ūmap puxim.

³⁹ Judeuyū kukukayū ibu'u o'e jetabut am Jesus kay, Isaiás'ūm emudupmubararaktup e'eap puxim o'jebapuk cebe ip puye. ⁴⁰ Imēn Isaiás'ūm ekawēn:

Deus iteyū adeayū o'yağuymubabi'ūm, i. Imēnpuye itabut ġu osodop ip, Deus a'ōbacaap co ma'ğū ip, i. Itabut ġu osodop ip Deus ekawēn co ma'ğū ip, i. Ikērēat mujurūğrūğap o'jepere ġu ip, i. Itabut ġu osodop ip Deus kay ixē be ikērēat uk am cebewi ip, i.

Imēn Isaiás'ūm ekawēn. ⁴¹ Isaiás'ūm iboam o'e kuyje Jesus soat podi ma idip iam itaybit puye. Imēnpuye Jesus o'ğuwēnuwēn.

⁴² Ade Judeuyū kukukayū oitabun ip Jesus kay. "Jesus kay ocetabut," i'ūmğū bit e'em oekuku ip

Fariseuyū buxim jeparara pibun. Jetabucap muwēnuwēn ġu ip oekuku Fariseuyū be ixeyū mujēmap puxim Deus eju kawēnwēnap'a bewi. ⁴³ Deus mucokcok pin ġu ip osodop-ijodiat mucokcok pin acā. Fariseuyū mucokcok pin ip osodop.

⁴⁴ Ġebuġe Jesus o'jekawēn adeayū be.

— Okay itabucayū omudocat kay dak itabut ip — io'e. ⁴⁵ — “Deus ipot teku” i'e'e'ukat “Deus o'ġudot ijodi,” i'e'em tak. ⁴⁶ Ijodi juk ojot Deus ekawēn eymutaybin am. Okay itabucayū ikērēat mujurūġrūġ ġu. Yaġuyisum jeku ip — io'e. — Kabiok taġ jekuku'ukayū buxim ġu ip -kabia daġ jekuku'ukayū buxim acā — io'e. ⁴⁷ — Wa'ījo buġe, kūyjobit'ūm wa'ō kay bima, “Ikērēat kuġ eyju Deus xe” i'ūmġu ōn pit e'em eywebe. Ijodi ojot “Ikērēat kuġ eyju Deus xe” i'e am ġu adeayū be. Adeayū daxijo am acā ojot — io'e. ⁴⁸ — “Ikērēat kuġ eyju Deus xe,” i ōn ġu e'em okay'ūmayū be, wa'ō kay'ūmayū be dak. Warara'acat pit imēn je'e ixeyū be webay soat ce'ū'ūayū muyuap kabia be — io'e. — Deus acā “Ikērēat kuġ eyju oxe,” i je'e ixeyū be. Imēn Deus je'e cebe ip wekawēn taġ ġu ip puye — io'e Jesus. ⁴⁹ — Wa'ōbi ġu juk adi ojekukuku — io'e. — Owebe webay e'eap acā juk adi oġuwēnuwēn eywebe. Wara'acat ġu oġuwēnuwēn eywebe. Iboap acā oġuwēnuwēn — io'e. ⁵⁰ — Deus ekawēn taġ eyeku buġe, eyaġuyisum epeku ijodi. Deus xe epesop eye'ū buġe dak. Wetaybit iboam — io'e. — Owebe webay o'e'e iap acā ōn e'em — io'e Jesus.

13 Jesus jebekitkiyū kay jījā osunuy soat kabia ipi daġ pima. Jesus itaybit o'e ġaxīn ma oje'ū iam, ġaxīn ma oceu webay kay iam tak. Eykukpin cīcā oxe iap o'ġubapuk cīcā jebekitkit pe je'ū awap.

Páscoa epeta ajēm pima, ² Jesus jekōnkōn o'e doze beayū eju. Judas Iscariotes Jesus ūm ojuy o'e

cekay itakomaayū be. Ixe Judas Simão Iscariotes ipot osunuy. Ibiōgbuk kērēayū kukukat a'ōbi Jesus ūm ojuy yaoka am. ³ Soat em Jesus itaybit osunuy webay soat ja'ōbacaap o'jomōg owebe iam. Deus xewi ojut iam tak itaybit osunuy. Gaxīn ma ocepit Deus kay iam tak itaybit osunuy.

⁴ Je'ūap muwēnuwēn pima, kirik'āy, o'āy. Jesus o'āy mesa xewi. Jeekabek o'ju'uk. Kuruk. Toaya o'jat. Mūn. O'jomūn jekpu daḡ. ⁵ Jeweju etaybitbinayū i wuy am o'ju. Wa'e co'iat'a be idibi o'timōg. O'suiwuy koapat i. O'suisup toayam. Perek. Wara'acat o'suiwuy. O'suisup. Perek.

⁶ Oajēm Simão Pedro kay. Simão ibu'u o'e Jesus pe jeiwuy an.

— Kariwa — io'e Simão. — Ēn tu wuiwuy? — io'e.

⁷ — Hm hm. Etaybit ḡu buk apēnpuye paxi ite wuiwuywuy iam — io'e Jesus Simão be. — Guyjom pit etaybit ece'e — io'e.

⁸ — Ap! Wuiwuy ḡu juy ece- -pūḡ em tak ka'ūma! — io'e Simão bit.

— Eiwuy'ūm pima, obuerm ḡu eḡuy — io'e Jesus.

⁹ — Kariwa — io'e. — Wuiat ḡu esuiwuy — io'e. — Wa'a dak eyawuy — io'e. — Oba dak — io'e Simão Pedro Jesus pe.

¹⁰ — Oajok'iat iokok ḡu-iisu ma! — io'e. — Dao ḡu jajok waram. Jeiwuy acā — io'e. — Wuyjuyū bewi Deus pe ikērēat'uk puje, iisuat puxim ip. Deus kuy ikērēat o'ju'uk eywebewi. Pūḡ pewi bit ka'ūma. Ite ikērēat kuḡ mabuk jewebe. Ixe iokokat puxim — io'e.

¹¹ Jesus kuy itaybit o'e abu oūm ixeyū'in okay itakomaayū be iam. Imēnpuye:

— Pūḡ pit ey'in ikērēat kuḡ mabuk jewebe — io'e.

¹² Ixeyū i wuy buje, Jesus jeekabek o'ḡuōm waram. O'jepit ip mesa kay. Oabik ma'ḡuto jeweju etaybitbinayū eju.

— Eyetaybit ḡu du apēnpuye ōn eyeiwuywuy iam? — io'e Jesus. ¹³ — “Ēn ocekkukat,” i eyju

e'em owebe, "Ēn ocemutaybitbin'ukat," i dak. Cūg ma eywebe iboam e'em — io'e. ¹⁴ — Ōn eykukukat. Eymutaybitbin'ukat tak ōn — Jesus o'e. — Inaka eyeiwuywuy oce warara'acat puywatwat'ukat co'i — io'e. ¹⁵ — Ōn eyeiwuywuy, eykukukat ma'gū ōn. Eyju dak obuxim eybu'um gū juy epesop warara'acat puywatwat am. ¹⁶ Eykukukat warara'acat puywatwan pima, eyju dak eybu'um gū juy epesop warara'acat puywatwat am. Eymujuat warara'acat puywatwan pima, eyju dak eybu'um gū juy epesop warara'acat puywatwat am — io'e. ¹⁷ — Ōn eykukukat. Inaka juk eyeiwuywuy oce. Jewebuywatwan cuy epesop obuxim. Jewebuywatwan pima, eycokcoğ epesop. ¹⁸ Soat pe gū eywebe iboap muwēnuwēn ōn. Wetaybit cīcā wemu-naēyū ekukuam. Pūg ey'in oūm okay itakomaayū be waoka am. Imēn e'em Deus ekawēntup:

Obiwağodada'ukat ma ikērēm cīcā
okuk, i.

Imēn ibararak opop Deus ekawēntup pe. Ġaxīn ma je'babuk owebe iğodup ekawēn puxim — io'e.

¹⁹ — Iboap muwēnuwēn ōn eywebe waoka awap — io'e. — Imēğap ebapuk puje ibodi ma eyetabun epesop soat em wa'ō dağ ōn e'em iap kay — io'e.

²⁰ — Icēmān ōn e'em eywebe — io'e. — Wemumu-juyū kay itabucat okay dak itabut. Okay itabucat omudocat kay dak itabut — io'e Jesus doze beayū be.

²¹ Iboam e buje, Jesus iğuycūğ cīcā o'e.

— Icēmān ōn e'em eywebe — io'e jewēju etay-bitbinayū be. — Ey'inat oūm okay itakomaayū be — io'e ibapuğ ma.

²² O'jeakakak ip jewewekay.

— Abu paxi kuka o'gūm cekay itakomaayū be? — i'e'em ip jewewebe ma.

²³ Doze beayū'inat xik'i osunuy Jesus tēg ma -Jesus emumukukpinput. ²⁴ Simão Pedro jebum o'jewēg wēg Jesus tēgat pe.

— "Abu eūm ekay itakomaayū be?" i juy ece cebe — io'e.

²⁵ Jesus tēgat wūrūg'i o'ju Jesus kay iboap muwēn ām cebe.

— Kariwa, abu sute? — io'e Jesus pe.

²⁶ — Minka'o be pāo'a oyamuakōm — io'e Jesus. — Pūg pe oyaūm. Ixe ma oūm okay itakomaayū be — io'e.

Kuruko. O'yabu. O'yamuakōm. Wūntok. Yadi-rem pima, o'yaūm Judas pe- -Simāo Iscariotes ipot pe.

²⁷ Pāo'a bu buje, Judas Jesus kay oibu'un. Sata-nás a'ōkayan o'e.

— Dao ma juy ece e'e pinap taḡ — Jesus o'e Judas pe.

²⁸ - ²⁹ Tūybe Judas o'ju Jesus a'ōbi wuyxat pum peta be wuyemumu'om iān o'e ip pūgpūg mesa watwatyū'in. Tūybe Judas o'ju wuyedinheiro'in iūm ām ibubut'ūmayū be iān o'e ip warara'acayū ixeyū'in. Jesus ekawēn pa'arēm o'e mesa watwat pe.

³⁰ Pāo'a o'yabu Judas. Kurukoh. O'jēm ḡebuḡe bit. Warara'acat xewi o'jēm. Xerewun. Cūh. Kabiok taḡ o'jēm.

³¹ Judas cēm puḡe, Jesus o'jekawēn onze beayū eju.

— Soat waḡo ōn — io'e. — Ġaxīn ma oje'ū. Odipap ḡasū webay ḡubapuk. Soat je'e "Jesus idip cīcā," i. "Deus idip cīcā," i we'ūap puye — io'e.

³² — Owebe "Deus idip cīcā" i'e buḡe, Deus tak e'em "Okpot idip cīcā," i. Ġaxīn ma imēn je'e — io'e.

³³ — Bekitkit — io'e. — Ibun ḡu oḡuy eyxe. Okudadam epeku. "Ojuap kay eyju ba'ore epesop," i kuy oce Judeuyū kukukayū be — io'e. — Imēn eywebe dak ōn e'em — io'e. ³⁴ — Wara'an ma ōn jeymutaybin ḡasū bit — io'e Jesus. — Eykukpin cīcā juk adi epesop oxe. Imēnpuxim cuy eyju dak eykukpin ma epewekuk — io'e Jesus. ³⁵ — Eykukpin jewewekuḡ pima, "Teyūku Jesus ebekitkiyū," i je'e soat ijodiayū — io'e.

³⁶ — Kariwa — io'e Simão Pedro. — Poma ên cum? — io'e.

— Gasû eyju ba'ore ojuap kay — io'e Jesus. — Guyjom pit epesot okay — io'e.

³⁷ — Kariwa — io'e ma'ğuto Simão. — Apên-puye oju ba'ore ejuap kay ġasû? Ekay jġjâ ôn. Obu'u ġu we'û âm owebe epereap puxim. Warara'acayû "Jesus eju ejeku bima, jaokam oce'e," i'e'em pima dak, jeiwat ġu ôn — io'e.

³⁸ — Ebu'u ġu du e'û âm ewebe opereap puxim? — io'e Jesus. — Icêmân ôn e'em ewebe. Ebaġûġ em "Jesus ejuat ġu ôn pit," i napa ma ece'e. Sapokay ede awap imên ece'e — io'e. — Ġaxîn ma napa ma imên ece'e — io'e.

14 — Eyaġuykorereren ġu juy epesop — Jesus o'e onze beayû be. — Eyġuycûġcûġ ġu juy epesop — io'e. — Kuy eyetabut Deus kay. Okay dak cuy eyetabun epesop — io'e. ² — Ya'ade opop webay ka be uk'a- -ijodiacat dopdop'am — io'e. — Cum ôn eydopdopap'a muxipan am. Icêmân ôn e'em eywebe. Icêm'ûm pima, iboam kajuk oce ġu eywebe — io'e. ³ — Cum ôn. Eydopdopap'a oyamuxipan eyajêm-jêmap'am — io'e. — Eydakoy ocepit eydopdopap'a muxipan puje — io'e. — Onuyapka kay ôn jeyduju-xe. Onuyapka be epesop soat em — io'e. ⁴ — Eyetaybit poma ôn cum iam — io'e Jesus. — Eyetaybit tak apên iboce epeju iam — io'e.

⁵ — Kariwa — io'e Tomé. — Poma eju? Ocetaybit ġu. Apên tak ocetaybit oce'e enuyap ka kay oceju am? — io'e Tomé.

⁶ — Okay itabucat mujujum ôn webay nuyap ka be — io'e. — Okay itabucat mutaybitbin ôn kawên icêmân- -Deus ekawên. Okay itabucat yaġuyisum jekukum wa'ôbi — io'e. — Abuyû je'ju webay kay? Okay itabucayû acâ! Ôn ma okay itabucat oġuju webay kay- -warara'acat pit ka'ûma — io'e. ⁷ — Eyetaybit abu ôn iam pima, eyetaybit kuka juk epesop

abu webay iam — io'e. — Gasū bit kuy eyetaybit webay e'eam, apēn cuk adi ocece iap epejojojo buye — io'e Jesus.

⁸ — Kariwa — io'e Filipe. — Ebay juy eḡubapuk ocewebe. Wuyebay juy ejojoat ocewebe. O'e kuka ocewebe ixē jo am — io'e Filipe.

⁹ — Pūḡ xet ḡu oḡuy eyxe — io'e Jesus. — Eye-taybit ḡu buk tu abu ōn iam, Filipe? — io'e. — Abu ōn iam itaybicat itaybit abu webay iam tak — io'e. — Apēnpuye ēn pit e'em "Ebay juy ejojoat ocewebe," i? — io'e. ¹⁰ — Pūḡ taḡ ma oceju jekukum-ōn, webay dak — io'e. — Filipe, eyetabut ḡu du iboap kay? — io'e Jesus. — Wekawēn muwēnuwēn'uk ḡu oḡuy eywebe- -webay ekawēn muwēnuwēn acā — io'e. — Pūḡ taḡ ma kawēnwēn oceju-ōn, webay dak. Wa'ōbi ḡu ōn jekukum- -webay a'ōbi acā — io'e. ¹¹ — "Pūḡ taḡ ma oceju jekukum-ōn, webay dak," i ōn e'em eywebe. Eyetabun cuy epesop wekawēn kay. Wekawēn kay eyetabut'ūm pima, eyetabun cuy epesop okay wa'ōbacaap coco am — io'e. ¹² — Icēmān ōn e'em eywebe. Okay itabucayū wekukuap puxim jeku. Owebe ja'ōbacaap mōḡmōḡap podi ma wa'ōbacaap jomōḡ ip, webay kay oju buje — io'e. ¹³ — Eyju e'em owebe "Ebikuyap taḡ cuy ece owebe," i bima, eyemuojuyjuy oḡūm eywebe- -soat oḡūm eywebe — io'e. — Imēnpuye "Ka'ūmḡu Deus coliat xipacat," i je'e soat ijodiacat. ¹⁴ Eyju e'em owebe "Ebikuyap taḡ cuy ece owebe," i bima, soat eyemuojuyjuy oḡūm eywebe — io'e Jesus.

¹⁵ — Eyxe okukpin pima, kūyjobin cuy epesop wa'ō kay — io'e. ¹⁶ — Ōn kawēnwēn webay eju. "I-buywatwat'ukan cuy eḡuju okay itabucayū kay," i oce webay be — io'e. — Ixe jebiōḡbuk ḡudot eykay eybuywatwat'ukan. Soat em ixē jeenuy eyxe. Icēmān eymutaybitbin jeenuy. ¹⁷ Itabut'ūmayū be iba'ore ixē ekawēn kay kūyjobit am. Ixe e'eap iba'arēm cexe ip. Itaybit ḡu ip ixē e'eam. Eywebe bit ixē nuynuy. Imēnpuye eyxe ixē e'eap ibapuk — io'e. ¹⁸ — Jeypere ḡu ōn. Ocepit eykay — io'e. — Eyaḡuyaḡepūḡ ḡu epesop — io'e. ¹⁹ — Gaxīn ma Deus kay'ūmayū ojo

ġu. Eyju bit waram ojo. Eyaġuyisum epeku, waram ġuto wetait puye — io'e. ²⁰ — Pūġ taġ ma òn jekukum webay eju. Eyju dak pūġ taġ ma jekukum oceweju. Ocejju dak pūġ taġ ma jekukum eyweju. Eykay eybuywatwat'ukat ajēm puje, iboap iba'arēm ġu je'e eyxe — io'e. ²¹ — Wa'ò kay jījāayū xe okukpin-wa'ò kay kūyjobicayū xe. Webay xe dak ixeyū ikukpin je'e. Oxe dak ikukpin cīcā oce'e. Abu òn iam ixeyū oġutaybin. Itaybit cīcā je'e ip abu òn iam — io'e Jesus.

²² — Kariwa — io'e Judas. — Apēn tak ēn iboam ocetaybin itabut'ūmayū mutaybin'ūm pima? — io'e. (Iscariotes ġu osunuy ixē Judas-wara'at Judas acā.)

²³ — Wa'ò kay jeedop ip kūyjobin okayayū — io'e. — Webay xe ixeyū ikukpin je'e. Ojot ixeyū kay webay eju. Soat em ixeyū xe ocesop-òn, webay dak — io'e. ²⁴ — Okay'ūmayū bit kūyjobit ġu wa'ò kay. Wa'òbi ġu òn iboap muwēnuwēn eywebe-webay a'òbi acā. Ixe juk omudot ijodi — io'e. ²⁵ — Iboap muwēnuwēn òn eywebe eyxe bima. ²⁶ Webay jebiōġbuk ġudot eykay. Obikuyap taġ ġudot. Ixe eybuywatwat'ukat. Ixe xipat cīcāat. Soan ma eymutaybin jeenuy. Ade ma òn cuk adi eymutaybinbin oġuy. Ixe eybuywatwan jeenuy wekawēn kay eyaġuyba'ūmap puxim — io'e. ²⁷ — Itabut'ūmayū be eyaġuymukorerenapmu'ūm pa'ore. Òn pit waġuykorereren ġu. Imēnpuye eyaġuykorerenap oġu'ūm. Eyaġuykorereren ġu juy epesop ojuap kay. Eyġuycūġcūġ ġu juy epesop — io'e. — Eypararam ġu juy epesop — io'e. ²⁸ — “Cum òn,” i juk oce eywebe — io'e. — “Waram tak eykay ocepit,” i juk oce. Iboap kuy epeya'ijjojo. Webay kay òn cum. Wa'òbuyxi. Webay bit obodi ma ya'òbuyxi. Imēnpuye eycokcoġ cuy epesop cekay ojuap kay. Eyxe okukpin pima, eycokcoġ kuka epesop ojuap kay — io'e. ²⁹ — Oju awap iboap muwēnuwēn òn eywebe. “Icēmān adi xeku o'e ocewebe,” i epe'e oju buje — io'e. ³⁰ — Ġaxīn ma Deus kay'ūmayū kukukat omuyku — io'e. — Imēneju buk eyweju òn kawēnwēn darem. Ixe wa'òbacaap mu'ūm pin. Imēnpit itaybit ġu — io'e. ³¹ — Ġa'aaju. Apēn webay o'e owebe iap

tağ òn jekukum, oxe ikukpin cîcâ buye. Itabut'ûm-ayû oğutaybin webay a'ô dağ òn jekukum iam — io'e.

15 — Òn uvabune buxim — io'e Jesus. — Webay uvadip kukat puxim. ² Okay itabucayû ibune'îcat puxim. Webay bikuyap tağ jekum ibu'u'uayû ya'ûmatpune buxim. Ya'a'e'ûm pima ibune'îcat uk'uğ tip kukat. Imēnpuxim webay jebikuyap tağ jekum ibu'u'uayû mujēmjēm itabucayû xewi. Kadaidip kukat iokokatpune xikxiğ ya'ade i'e am. Imēnpuxim webay itabucayû mukūyjojom ixeyû be ikērēat mujurūğap puxim. Ixeyû mukūyjojom biğ ma jebikuyap tağ jeku am — io'e. ³ — Webay kuy ikērēat o'ju'uk eybewi, wekawēn kay kūyjobit puye — io'e. ⁴ — Mūğ'i juy epeku oweju — io'e. — Oweju jekukum pima, òn tak eyweju mūğ'i ojeku. Ibune'îcatpune uvabune be'ûm pima, kuka o'yajēm ġu uva'a. Imēnpuxim mūğ'i oweju eyeku'ûm pima, webay bikuyap tağ ġu epeku — io'e. ⁵ — Uvabune buxim òn — i waram o'e Jesus. — Eyju ibune'îcatpune buxim. Obikuyap tağ jekukum pima, xipan ma epeku Deus xe. Mūğ'i eyweju òn tak jekukum. Obikuyap tağ jekukum'ûm pima bit, ajo eye'e'eap xipat je'e Deus xe? Ka'ûma ma! — io'e. ⁶ — Mūğ'i oweju jekum eybu'u bima, apēn uvadip iwat ya'ûmatpune kukap puxim Deus tak jeykuk-ya'ûmatpune xikap puxim. Wûn. Ibune xik puje ibunekaraw e'em. Ibune e'ûatpune mu'awerorom uvadip kukat. Aweroh. Ibumemupikupiğ daxa be. Wûn. Pik. Hoğ. ⁷ Mūğ'i juy epeku oweju! Wa'ô dak cuy kūyjobin epesop! Oweju eyeku buje, Deus soat epejoojuyiat je'ğûm eywebe — io'e. ⁸ — Deus bikuyap tağ eyju jekukum pima, soat ijodiat je'e webay be: "Ka'ûmğû ejo'iat xipacat," i — io'e. — Itaybit je'e ip eyju webekitkiyû iam — io'e. ⁹ — Eyju eykukpin cîcâ oxe webay xe okukpinap co'i. Eycokçoğ cuy epesop Jesus xe oceukpin iap kay ġebum. ¹⁰ Webay a'ô kay òn kūyjobit. Imēnpuye

ocokcok soat em webay xe okukpin iap kay ġebum. Imēnpuxim wa'ō kay kūyjobit pima, eycokcoğ epesop Jesus xe ocekukpin iap kay ġebum — io'e.

¹¹ — Iboap oğuwēn eywebe eymucokcok am. Wa'ōcokcok cīcā. Obu'u eywebe eycokcoksū ām. Obikuy eywebe eycokcok cīcā ām wa'ōcokcokap puxim — io'e. ¹² — “Oxe xipan eykukap puxim cuy xipan epeyewekuk,” i ōn e'em eywebe — io'e. ¹³ — Wuybu-reyū e'ūap puxim wuye'ū ām wuybu'u'ūm pima, soat ijodiat je'e “Ak'i juy epe'e! Teyūxeku ibureyū ikukpin cīcā,” i. “Warara'acat podi ma ikukpin cexe ip,” i je'e ip — io'e. ¹⁴ — Wa'ō kay kūyjobit pima, obureyūm epesop — io'e. ¹⁵ — “Eyju oweju kapik-pik'ukayū ā,” i'ūmġu ōn e'em ġasū eywebe. Kapik-pik'ukat itaybit ġu jekariwa e'eam. Webay owebe ie'eap pit oğuwēn eywebe soat. Iboap oğuwēn eywebe eyju obureyū buye — io'e. ¹⁶ — Eyju ma onaē ġu eykukan. Ōn pit eynaē obureyūm. Ōn cuk eymuju omuwēn ām warara'acayū be imutabun am ip okay. Okay jetabucap jepere ġu ip. Ibu'u ġu ip je'e itabut am okay. Obikuyap tağ webay eju kawēnwēn pima, soat epejoojuyiat je'ġūm eywebe — io'e. ¹⁷ — Imēnpuye “Xipan cuy epeyewekuk,” i ōn e'em eywebe — io'e.

¹⁸ — Deus kay'ūmayū itakoma eykay. Koap pit okay itakoma ip osodop. Iboap kay ġebum cuy epesop — io'e. ¹⁹ — Eyju Deus kay'ūmayū kadi bima, eykay kuka ip o'e. “Teyūdaku wuykadiacat,” i kuka ip o'e. Imēnpit ōn eymuwe'uk Deus kay'ūmayū xewi. Deus kay'ūmayū kadi ġu eyju. Imēnpuye itakoma jījā ip eykay — io'e. ²⁰ — Kuy juk ocece eywebe iap kay ġebum cuy epesop. “Ikērēm cīcā ip wuyekariwa o'jukuk. Wuyju bit ikērēm ġu wuykuk ip,” i'ūmġu juy epe'e eyewewebe. Deus kay'ūmayū ipiat o'supi'ajoat owebe. Imēnpuye eywebe dak ip jopi'ajoat. Yopīt ma wa'ō kay ip osodop. Imēnpuye dak eya'ō kay je'e ip yopīt ma — io'e. ²¹ — Eywebe ipiat supi'ajoat ip, eyju webekitkit puye. Eywebe ipiat supi'ajoat ip, omudocat kay itabut'ūm puye — io'e.

²² — Ijodi oajēm. Deus ekawēn cuk adi oḡuwēnuwēn ixeyū be. Wekawēn kay ḡu bit ip o'e. Odot'ūm pima, "Ikērēat kuḡ eyju oxe, wekawēn kay'ūm puye ya'ijojom ma'ḡu," i'ūmḡu kajuk o'e Deus ixeyū be. Ḡasū bit "Ikērēat kuḡ ḡu oceju" i'e ba'ore cebe ip Deus pe. ²³ Okay itakomaat webay kay dak itakoma — io'e. ²⁴ — Wa'ōbacaap mōḡmōḡ cuk adi ojekuku soat etabutpe. Soat a'ōbacaap podi ma wa'ōbacaap mōḡmōḡ ojekuku. Okay ḡu bit ip o'e. Imōḡmōḡ'ūm pima, "Ikērēat kuḡ eyju oxe, okay eyetabut'ūm puye, wa'ōbacaap mōḡap cocom ma'ḡu eyju," i'ūmḡu kajuk o'e Deus ixeyū be. Ḡasū bit ikērēat kuḡ ip cexe. Inaka itakoma jījā ip okay, webay kay dak — io'e. ²⁵ — Ixeyū muwēnuwēn Deus jekawēntup pe- -kuyatup pe:

Ikērēm'ūm a'ḡu ip ojukuk, i.

Inaka ip oitakomān okay, i.

Itakoma ip okay iḡodup ekawēn puxim — Jesus o'e.

²⁶ — "Ebiōḡbuk cuy eḡuju okay itabucayū kay," i oce'e cebe- -webay be — io'e Jesus. — Ixe ḡudot eybuywatwat'ukan. Ixe icēmān e'e'ukat. Ixe ma omuwēn eywebe — io'e. ²⁷ — Eyju dak cuy epesop omuwēnuwēn ijodiayū be. Ōn ijodiat mutaybitbin pima, oweju juk adi epekuku. Imēnpuye juy epesop omuwēnuwēn ḡasū bit — io'e.

16 ¹ — Imēn ōn e'em eywebe okay eyetabucap epereap puxim — io'e. ² — Eykay itakomaayū jeymuōmat ḡu Deus eju kawēnwēnap'a be. Jeyaoka ip. Eyaoka buje, tūybe Deus bikuyap taḡ wuyju jekukum iān je'e ip — io'e. ³ — Ikērēm jeykuk ip abu ōn iam itaybit'ūm puye, abu webay iam tak. 'Ḡasū iboap muwēnuwēn ōn ḡuyjom eyeḡebu am apēn ōn eymukūyjojo iap kay — io'e. — Warēmtaḡ eykuk puje, "Imēn kuka ip wuykuk," i juy epe'e eye-wewebe — io'e Jesus jeweju etaybitbinayū be.

— Kuy bima a'ḡu eyxe ma oḡuy — io'e. — Imēnpuye juk iboam ḡu ōn eymukūyjo. ⁵ Ḡasū bit ocepit omudocat kay. Ka'ūma ma ey'in pit e'em owebe "Poma ēn cum?" i. ⁶ Eyḡuycūḡcūḡ cīcā imēn

õn e'em puye. ⁷ Wepit'ùm pima, xipat ãu kuka o'e eywebe. Wepit pima bit, xipat je'e eywebe. Wepit'ùm pima kuka eybuywatwat'ukat osodot ãu. Oju buje bit ixè oãdot eykay. Imênpuye eycokcoã cuy epesop ojuap kay — io'e. ⁸ — Ixe dot puje, "Soat eyju ikêrêat kuã Deus xe," i je'e soat pe ipi daãayũ be. "Deus acã itaybit eymucũã ãm," i dak je'e. "Ipiat supi'ajoat Deus ikêrêat mujurũãrũã'ukayũ be," i dak je'e — io'e. ⁹ — "Soat eyju ikêrêat kuã Deus xe," i je'e, okay itabut'ùm ip puye — io'e Jesus. ¹⁰ — Eyju ojo ãu waram, Deus jewekay odujuu buye — io'e. — Imênpuye "Deus acã itaybit eymucũã ãm," i je'e Deus biõãbuk — io'e. ¹¹ — Deus kuy o'e "Deus kay'ũmayũ kukukat soat em jeenuy ipiatpi'ajoap pe- -Satanás," i. Imênpuye "Ipiat supi'ajoat ikêrêat mujurũãrũã'ukayũ be Deus," i je'e Deus biõãbuk — io'e Jesus.

¹² — Ade mabuk õn imuwên pin eywebe. Gasũ bit iba'ore eywebe eyetaybin am wekawên, eyãuycũãcũã cĩcã buye — io'e. ¹³ — Ibiõãbuk xipacat icêmãn e'e'ukat. Ixe ajêm puje soan kawên icêmãn eymutaybin jeenuy. Ja'õbi ãu ixè ãuwên. Kuy o'ya'ijojoiap acã ãuwên. Guyjom acejebapukiap tak ãuwên eywebe — io'e. ¹⁴ — Ixe obuyxim okuk. Itaybit wekawên je'e. Icêmãn soat wekawên ãuwên eywebe — io'e. ¹⁵ — Webay e'eap taã õn tak e'em. Imênpuye cuk adi ocece eywebe "Deus biõãbuk wekawên ãuwên eywebe," i — io'e.

¹⁶ — Gaxĩn ma eyju ojo ãu. Guyjom pitapit waram eyju ojo — io'e Jesus.

¹⁷ — Apên ite e'em wuywebe? — io'e ip jewewebe jewēju etaybitbinayũ. — Ite e'em "Gaxĩn ma eyju ojo ãu," i. "Guyjom pitapit eyju waram ojo," i — io'e ip. — "Imên je'bapuk webay kay oju buye," i teku e'em wuywebe — io'e ip jewewebe. ¹⁸ — Apênpuye ite e'em "Guyjom pitapit waram eyju ojo," i? — io'e ip. — Cekawên pa'arêm cĩcã wuyxe — io'e ip jewewebe.

¹⁹ Jesus itaybit o'e teyūku "Apēn tak ēn e'em ocewebe?" i'e ojuy owebe iam. Imēnpuye waram o'jekawēn ceweju ip.

— "Apēn ēn ocemutaybin pin?" i du eyju e pin owebe? — io'e Jesus. — "Gaxīn ma eyju ojo ġu," i juk oce eywebe — io'e. — "Guyjom pitapit waram eyju ojo," i dak cuk oce — io'e. — Wekawēn pa'arēm tu eyxe? — io'e Jesus. ²⁰ — Icēmān ōn e'em eywebe. Wawa jījā juy epesop we'ū buje — io'e. — Itabut'ūmayū bit wa ġu je'e. Darem ma eyġuycūġcūġ epesop. Guyjom pit eyġuycūġcūġ ġu epesop-eycokcok ā — io'e. — Eyġuycūġap i'ūm — io'e. ²¹ — I'it kam pima, ayacat iġuycūġ e'em je'it pibun. Je'it kap puje bit, ipiat kay ġebum ġu e'em. Icocok e'em je'it kuġ puye. ²² Imēnpuxim eyju dak. Ġasū eyġuycūġcūġ oju buye. Guyjom pit waram eyjom oce. Eycokcok cīcā ma epe'e ġebuje bit. Abu-be eycokcokap mu'ūm put ixe kabia be? Ka'ūma be ma! — io'e. ²³ — Eybuywatwat'ukat ajēm puje bit, ixe ma jeymutaybin — io'e. — Imēnpuye "Ocemutaybin cuy ece," i'ūmġu epe'e owebe ma — io'e. — "Ekawēn pa'arēm oce," i'ūmġu dak epe'e owebe — io'e Jesus. — Icēmān ōn e'em eywebe. Obikuyap taġ cexewi iojuyjuy bima, webay soat eyemuojuyjuy je'ġūm eywebe — io'e. ²⁴ — Obikuyap taġ epejoojuy ġu buk. Pūġ em tak ka'ūma — io'e. — Ġasū bit cuy epejoojuy cexewi! — io'e. — Eyemuojuyjuy epejat. Ibu buje, eycokcoksū ġu epesop-eycokcok cīcā ma — io'e.

²⁵ — Koap puk cuk adi ibapuġ ġu ocekawēn eywebe — io'e. — Ijodiat mutaybitbinap ekawēn acā oġuwēnuwēn eywebe. Guyjom pit ibapuġ ma webay ekawēn oġuwēn eywebe — io'e. ²⁶ — Ibapuġ owebe imuwēn puje, obikuyap taġ cuy epejoojuy webay xewi. Ōn acā ġu webay xewi ojoojuy eywebeam — io'e. ²⁷ — Eyju dak cuy epejoojuy. Webay eyekawēn ya'ijo, ixe xe eykukpin cīcā buye. Webay xe eykukpin cīcā, eyxe okukpin puye; "Icēmān Jesus osodot Deus xewi," i eyju e'em puye dak — io'e. ²⁸ — Icēmān webay xewi juk ojut. Ipi kay juk ojut-ijodi. Oje'ū. Ipi

daḡwi ojēm ḡasū. Webay kay juy ocepit — io'e Jesus.

²⁹ — Gasū bit ēn iba'arēm ḡu kawēnwēn ocewebe — io'e onze beayū Jesus pe. — Ibaḡuḡ ma ēn kawēnwēn ḡasū bit — io'e ip. ³⁰ — Eḡaybit soan ma. Eḡaybit apēn oceju jewaḡuyḡuy iam. Ēn ocemukūyjom, “Apēn ēn e'em ocewebe,” i'ūmḡu ma'ḡu oceju e'em — io'e ip. — Imēnpuye “Deus xewi teku oso-dot,” i oceju e'em ḡasū — io'e ip.

³¹ — Eḡetabut tu epe'e okay? — io'e Jesus. ³² — Ḡaxīn ma bit epewatwatwat eydukā daḡ. Opere eyju eyaokaap puxim. Waḡepūḡ ma oḡuy opere buje. Imēnpit odadaybot ḡu oḡuy, webay soat em oxe buye — io'e. ³³ — Itabut'ūmayū ma ipiat supi'ajoat eywebe. Ōn pit kuy Deus kay'ūmayū kukat a'ōbacaap oḡu'ūm. Imēnpuye eya'ōcam cuy epesop! Imēn ōn e'em eywebe eypararaap puxim. Eyaḡuykorereren ḡu, mūḡ'i oweju buye — io'e.

17 Iboam e buje, Jesus o'je'apūn kabi beat kay- jebay kay. O'jekawēn jebay eju.

— Bay — io'e. — Ḡaxīn ma oje'ū. Ōn ma ekpot. Odipap cuy eḡubapuk adeayū be. Ōn tak edipap cuy oḡubapuk cebe ip — io'e. ² — Pūḡpūḡpūḡayū juk eḡutabun okay ipi daḡayū'in. A'ōbacaap cuk eḡūm owebe. Imēnpuye okay itabucayū yaḡuyisum jekukum wa'ōbi — io'e jebay be. ³ — Ēn acā Deusat. Ka'ūmḡu wara'at. Ōn ma emumudot- -Jesus Cristo. Ijodiat yaḡuyisum jeku okay itabun puje, ekay itabun puje dak — io'e. — Soat em exe ma jeedop ip ce'ū buje — io'e. ⁴ — Wekapikap cuk adi eḡūm owebe. Ipi daḡ pima abu ēn iap cuk adi oḡuwēnuwēn edipap mubapukpuḡ. Ḡasū wekapikap oḡu'ūm — io'e Jesus.

⁵ — Bay — io'e Jesus. — Exe bima soat kabi beacat odipap mubapukpuk'uk ip osodop- ekawēn tojtjt'ukayū. Ipi mujurūḡ awap odipap mubapukpuk'uk ip osodop. Waram cuy odipap mubapukpuḡ ip jeenuy, exe wajēm puje — io'e.

⁶ Jesus jekay itabucayū o'ḡuwēn jebay be ḡebuḡe bit.

— Pūḡpūḡayū juk eḡutabun okay ipi daḡayū'in — io'e. — Ebekitkiyūm osodop ip. Ixeyū eḡutabun okay. Ixeyū itabucayū be emuwēnuwēn ojekuku. Kūyjobit o'e ip a'ō kay — io'e Jesus jebay be. ⁷ — Itaybit ip ḡasū a'ōbi acā ōn emuwēnuwēn iam — io'e. ⁸ — Apēn cuk adi ecece iap ma oḡuwēnuwēn soat pe okay itabucayū be. Wa'ō kay ip osodop. Itaybit o'e ip icēmān Deus xewi Jesus osodot iam. Itabut o'e ip Deus ma Jesus o'ḡudot iap kay — io'e Jesus.

⁹ — Bay, ixeyū beam ma ōn kawēnwēn eweju-onze beayū beam — io'e. — Itabut'ūmayū beam ḡu ōn kawēnwēn-okay emumutabunyū beam acā — io'e. — Ebekitkiyū ixeyū. ¹⁰ Soat okay itabucayū ebekitkiyū. Imēnpuye webekitkiyū dak ip. Adeayū o-dipap cocom webekitkiyū cūḡ ma jekukum puye — io'e.

¹¹ — Bay, soat podi ma a'ōbaca. A'ōbacaap cuk adi eḡūm owebe. A'ōbacaap co'i wa'ōbaca. Ḡaxīn ma oajēm ma'ḡuto ekay. Ōn ma ipi daḡ ḡu ojeku. Okay itabucayū bit ipi daḡ ip jeku.

— Bay — io'e. — Pūḡ em ikērēat ejukuk ḡu. Imēnpuxim aḡ cuy eḡuy ixeyū kay cūḡ ma ip ceku am wekuap co'i, ekuap co'i dak — io'e. ¹² — A'ōbacaap cuk adi eḡūm owebe. Ōn ixeyū xe bima, a'ōbi ma juk adi aḡ oḡuy cekay ip itabucap epereap puxim. Ka'ūma ma ixeyū'in oibu'un okay. Pūḡ acā oibu'un-jetabucap epereperemxi acā. Apēn ixē jeta-bucap o'jepere iap ibararak opop Deus ekawēntup pe. Iḡodup ekawēn taḡ jeta-bucap jepere ḡasū — io'e.

¹³ — Bay, ḡaxīn ma'ḡuto ocepit ekay — io'e Jesus. — Ijoce bima bit ōn kawēnwēn ewebe onze beayū beam ixeyū mucokcok am ocokcokap co'i. Obu'u icokcoksū ām ip. Obikuy icokcok cīcā ām ip ocokcokap co'i — io'e. ¹⁴ — Ekawēn cuk adi oḡuwēnuwēn cebe ip. Ekay'ūmat ekukuap puxim ḡu ōn jekukum. Ixeyū dak ekay'ūmat ekukuap puxim ḡu jekukum. Imēnpuye ixeyū kay itakoma o'e ip itabut-ūmayū, ekay'ūmayū — io'e. ¹⁵ — Bay, “Okay ita-

bucayū juy etujujēm ipi daḡwi,” i'ūmḡu ōn pit e'em ewebe. “Ixeḡyū juy eḡuxipan ikērēat mujurūḡrūḡ'uk-ayū kukukat xewi,” i ōn pit e'em ewebe — io'e. ¹⁶ — Itabut'ūmat ekukuap puxim ḡu ōn jekukum. Imēnpuxim itabut'ūmat ekukuap puxim ḡu jekukum ip okay itabucayū — io'e. ¹⁷ — Bay, ixeyū juy eḡuwexat soat em ebikuyap taḡ jekuku'ukayūm. Ekawēn cocoam cuy ip eḡuwexat. Ekawēn acā kawēn icēmat — io'e. ¹⁸ — Ēn cuk omudot ijodiat mutaybin am kawēn icēmān. Imēnpuxim ixeyū oḡuju ijodiat mutaybin am kawēn icēmān — io'e. ¹⁹ — Oḡe'ūn'ūn ḡa-sū, oxe ixeyū ikukpin puye. Ebikuyap taḡ oje'ū ixeyū dak ebikuyap taḡ ceku am — io'e. ²⁰ — Onze beayū beam acā ḡu ōn kawēnwēn eweju, Bay. Warara'acayū itabut je'e okay, ixeyū omuwēnuwēn puye. Ixeyū beam tak ōn kawēnwēn eweju-ḡuyjom itabunayū beam — io'e. ²¹ — Bay, “Ixeḡyū juy esubuywan pūḡ taḡ ma ip ceku am,” i ōn e'em ewebe. Bay, pūḡ taḡ ma ēn jekukum oweju. Ōn tak pūḡ taḡ ma eweju jekukum.

— Bay — io'e. — Obikuy wuyekukuap co'i ceku am ip. Wuyekukuap taḡ jekukum pima, itabut'ūmayū je'e “Deus Jesus emumudot,” i — io'e. ²² — Bay, a'ōbacaap cuk adi ejomōḡ owebe. “Ojo'i ēn tak a'ōbaca,” i juk adi ece owebe, Bay. Imēnpuxim “Ojo'i eyju dak eya'ōbaca,” i ōn e'em okay itabucayū be. Imēn ōn e'em cebe ip pūḡ taḡ ma ceku am ip wuyekukuap co'i — io'e Jesus. ²³ — Pūḡ taḡ ma ōn jekukum ixeyū eju. Ēn tak oweju pūḡ taḡ ma jekukum. Imēneju pūḡ taḡ ma jekukum ip wuyekukuap co'i. Wuyekukuap co'i jekukum pima, itabut'ūmayū itabut je'e ēn ma omudocat iap kay. Deus xe wuykukpin apēn jekpot ikukpin ceze iap co'i iap kay dak itabut je'e ip — io'e. ²⁴ — Exe okukpin cuk adi oḡuy ipi mujurūḡ puje. “Wa'ōbacaap co'i ēn tak a'ōbaca,” i juk adi ecece owebe.

— Bay — io'e. — Onze beayū juk adi eḡutabun okay. Obikuy wuydopap pe ixeyū dop am okpot wa'ōbacaap co'i ya'ōbaca iap co am — io'e. ²⁵ — Bay — io'e. — Soat em ēn cūḡ ma e'em. Ikērēat ejukuk ḡu-pūḡ em tak ka'ūma. Itabut'ūmayū itay-

bit ġu abu ěn iam. Ōn pit wetaybit cĭcā abu ěn iam. Onze beayū itabut cebay teku o'ġudot ijodi iap kay — io'e. ²⁶ — “Webay xe eykukpin cĭcā,” i juk adi ocece cebe ip. Iboap oġuwěn cebe ip cewemukukpin am ip exe okukpinap co'i. Iboap oġuwěn cebe ip pūġ taġ ma weku am ceweju ip — io'e Jesus. Iměn Jesus o'jekawěn cĭcā jebay eju.

18 Jebay eju jekawěn epere buje, Jesus o'jěm Jerusalěm ka bewi. Jeweju etaybitbinayū eju o'jěm. Kadidi daġwi o'ju ip- -Cedromti daġwi. Kadaidip o'tiptop kadidi wĭnābu. Jesus o'ju ibodip pe onze beayū eju. Oajěm ip kadaidip kay. ² Ade em Jesus cuk adi oekukuku ibodip taġ doze beayū eju. Iměnpuye Judas itaybit osunuy ibodim Cedromtim. Judas Jesus ūm ojuy cekay itakomaayū be.

³ Judas o'ju Jesus kay. O'ju kadaidip pe. O'ju sorarayū eju, Deus eju kawěnwěnap'a wiwi'ukayū eju dak. O'ju ip paĭyū kukukayū a'ōbi, Fariseuyū a'ōbi dak. O'ju ip lamparina'a kukuġ jebui be, jeba'ip kukuġ tak, wexiktak kukuġ tak. Oajěm ip cekay- -Jesus kay. ⁴ Jesus kuy itaybit o'e soan- -apěn owebe je'bakuk iam. O'ju ajěmayū dopabe- -Judasyū dopabe. O'jekawěn ceweju ip.

— Abu-kudadam epesot? — io'e- -Jesus o'e.

⁵ — Jesus kudadam oceju — io'e ip. — Nazaré ka bewiat kudadam oceju — io'e ip.

— Ġebujeat ma'ġu ōn — io'e Jesus.

⁶ “Ġebujeat ma'ġu ōn” i'e buje, soat ip o'jewede cexewi ajěm ojuyayū. O'at ip ipi ju Jesus ekawěn co buje. Waram Jesus o'e:

— Abu-kudadam eyju? — i cebe ip.

⁷ Waram ip o'e:

— Jesus kudadam oceju — i. — Nazaré ka bewiat kudadam — i.

⁸ — “Ġebujeat ma'ġu ōn,” i kuy oce eywebe — Jesus o'e. — Ōn ma eyju okudadam. Owejuayū bit cuy epejat ġu. Āġ cuy je'jěm ip — io'e.

(⁹ — Bay, juk eġutabun'iaiyū jetabucap jepere ġu- -

pūg tak ka'ūma — i juk Jesus o'e. Imēnpuye — Āg cuy je'jēm ip — io'e Judasyū be jewēju etaybitbina-yū daomūnap puxim, ixeyū be ipiat supi'ajoacap puxim.)

¹⁰ Iboap co buje, Simão Pedro jepaja o'ju'uk iyuk pewi. Kiririk. Paīyū kukukat puywatwat'ukat ġuybu o'suğuybu'uk iğuybuikibi dağ pajam. Tēğwūn. Iba'at kadiat ġuybu o'suğuybu'uk. Ibuywatwat'ukat putet Malco i osunuy.

¹¹ — Odaxijom ġu juy paja kuğ! Ipiat osupi'ajo webay bikuyap tağ- -kuyjeat ekawēn tağ — io'e Simão Pedro be.

¹² Jesus o'jat ip Judasyū, sorarayū dak, sorarayū kukukayū dak, Deus eju kawēnwēnap'a wiwi'ukayū dak. O'subamukirik ip.

¹³ Koam Jesus o'tujowat ip Anás kay. Ixe Anás Caifás tadop osunuy. Caifás paīyū kukukat osunuy ixe koato.

¹⁴ — Xipat wuywebe ite ağokatkat aoka am wuy-muy'ū'ūap puxim — i juk o'e ixe Caifás Judeuyū kukukayū be.

(²⁴) Anás Jesus o'ğjuat Caifás kay- -paīyū kukukat kay. Ibōğbikiriğ o'ğjuat.

¹⁵ Simão Pedro o'ju Jesus nomuju. Warara'acat tak o'ju cewēju. Ixe dak onze beayū'in osunuy. Ixe wara'acat ma Jesus eju oōm paīyū kukukat tuk'a ekorara be. Oōm paīyū kukukat itaybit cīcā ixem puye. ¹⁶ Pedro bit uk'a ekorara exīntabi xe osunuy. Oōm ġu buk uk'a ekorara be. Warara'acat o'jepit korara exīntabi be. O'jekawēn xīntabi wiwi'ukat pe- -ayacat pe.

— Āg jeōm obure — io'e ayacat pe.

— Xipat — io'e cebe.

— Eōm cuy — iwiwi'ukat o'e Pedro be.

Oōm uk'a ekorara be.

¹⁷ — Jesus eju etaybitbinat ġu du ēn? — ayacat o'e Simão Pedro be- -xīntabi wiwi'ukat o'e.

— Ka'ūma — i napa ma o'e Simão Pedro. — Cewēju etaybitbinat ġu ōn — io'e napa ma jebuap puxim.

¹⁸ Kajuk kuḡ osunuy. Paīyū kukukat puywatwat'ukayū daxanabōē o'tabōēmusop jeweweam. Daxa etako be kacūḡcūḡ'i ip osodop daxae o'om jewewewem ibuywatwat'ukayū, sorarayū dak. Pedro dak o'ju daxa etako be. Jewewewem ip osodop.

¹⁹ Ḡebuje paīyū kukukat o'jekawēn Jesus eju.

— Eweju etaybitbinat e'eap cuy eḡuwēn owebe — io'e Jesus pe. — Apēḡap ekawēn ixeyū eḡutaybitbitbin? — io'e cebe.

²⁰ - ²¹ — Apēnpuye ēn e'em owebe ma “Apēḡap ekawēn ixeyū eḡutaybitbitbin?” i? Soat em ibapuḡ ma ijoceat oḡutaybitbitbin — io'e Jesus. — Adeayū etabutpe oḡutaybitbitbin Deus eju kawēnwēnap'a be, yaboḡat'a be dak — io'e. — Iba'arēm ḡu oḡutaybitbitbin -pūḡ em tak ka'ūma — io'e. — Wemumutaybitbinyū be juy ecekawēn. “Apēn eymutaybin Jesus?” i juy epe'e cebe ip — io'e. — Itaybit ip — io'e Jesus.

²² Deus eju kawēnwēnap'a wiwi'ukat Jesus dopa o'topaokaka jebum cekawēn co buje.

— Imēn tu ēn kawēnwēn paīyū kukukat eju? — io'e. — Cedaḡ ḡu ēn kawēnwēn! — io'e.

²³ — Wekawēn cūḡ'ūm pima, iboap cuy eḡuwēn soat pe, ijoceacat pe — io'e Jesus. — Wekawēn cūḡ ma bima bit, apēnpuye dak ēn odopaokaka? — io'e.

Mūḡ ma o'e. Jededem ḡu.

²⁵ Pedro jewewewem mabuk o'e daxa etakobe. Cūḡ'i osunuy warara'acayū parakpe.

— Ibakirikat eju etaybitbinat ḡu du ēn? — io'e ip Pedro be.

— Ōn ḡu — io'e Pedro napa ma. — Iḡo ejuat ḡu ōn — i napa ma o'e.

²⁶ Warara'acat o'jekawēn Pedro be ḡebuje bit. Ixe wara'acat paīyū kukukat puywatwat'ukat osunuy. Pedro emuḡuybu'uk badip osunuy.

— Ōn ma ejojo iḡo eju kadaidip pe! — io'e wara'acat.

²⁷ — Õn ġu- -warara'acat acā — io'e Pedro napa ma.

Ġebuġe isum ma sapokay o'jede.

²⁸ Jesus o'tujujēm ip Caifás tuk'a bewi ceweġu jekawēn eperē buġe.

Ġebuġe Caifás Jesus o'tujowacat iecuġap tuk'a kay- -Pilatos tuk'a kay. O'tujowat ip kabia isum. Judeuyū oōm ġu iecuġap tuk'a be Pilatos Judeu'ūm puye. Tuk'a akiju ma ip osodop. Cedaġ ġu kuka o'e oōm ām Judeu'ūmat tuk'a be Páscoa epeta muy'an pima. Ōm pima:

— Wuyisu ġu Deus xe — i kajuk o'e ip. — Peta xat o ba'ore wuywebe — i kajuk o'e ip.

Imēneġu oōm ġu ip iecuġap tuk'a be- -Pilatos tuk'a be.

²⁹ Imēnpuye Pilatos o'jēm jeduk'a bewi. O'ju Judeuyū kukukayū eġu jekawēn ām.

— Jesus ikērēat kuġ tu eyxe? — io'e Pilatos Judeuyū kukukayū be.

³⁰ — Hm hm — io'e ip. — Ocexe ma ite ikērēat cuk adi o'jukuk. Ocedobuyū'ūm'ūm ekawēn taġ ġu teku jekukum. Ēn cuy ite eyaokaat — io'e ip.

³¹ — Eyju ma juy epetujujēm oxewi — io'e Pilatos. — Eyju ma juy ipiat epesupi'ajoat cebe eydobuyū'ūm'ūm ekawēn taġ — io'e.

— Ap! — io'e ip. — Oca'ōbi ġu oceġu ibamupaya ojuy ce'ū ām- -a'ōbi acā — io'e ip Pilatos pe- -iecuġap pe.

³² (Jesus cuk adi o'e — Obamupaya ip we'ū ām — i. Itaybit'ūm pima Judeuyū kukukayū o'jekawēn Pilatos pe kuy o'e'e iap co'i- -Jesus pe o'e'e iap co'i.)

³³ Pilatos oōm ma'ġuto jeduk'a be. Jesus o'ġudocat jewekay.

— Judeuyū kukukat tu ēn? — io'e Jesus pe.

³⁴ — Aġuy daġ tu iboam ēn e'em owebe? — io'e. — Warara'acat aġuy daġ ġu xe'e? — io'e Jesus.

³⁵ — Waġuy daġ ġu! — io'e- -Pilatos o'e. — Judeu ġu òn pit — io'e Pilatos. — Judeuyū ma edojot okay. Apēn ēn tak ece ikērēan? — io'e Jesus pe. —

“Judeuyū kukukat òn,” i du ên e'em? — io'e Jesus pe.

³⁶ — Eybuxim ġu òn ijodiacat kukukat — io'e. — Òn ijodiat puximan pima kuka adi webekitkit o'jewaokaka okay itakomaayū eju. O'jewaokaka kuka adi ip Judeuyū be obuap puxim. Imēnpuye ijodiat a'òbi ġu òn warara'acayū kukukat — io'e Jesus.

³⁷ — Ijodiat kukukat tu ên? — io'e Pilatos.

— Hm hm. Ikukukat òn — io'e. — Kawēn icēmat muwēn âm okop ijodi. Kawēn icēmat muwēn âm okap. Kawēn icēmat kay kūyjobicayū wekawēn kay dak kūyjobit — io'e Jesus.

³⁸ — Ka'ūmġu kawēn icēmat! — io'e Pilatos.

Gebuje Pilatos Jesus eju jekawēn o'jepere. O'jēm ma'ġuto jeduk'a bewi. O'jēm jekawēn âm ma'ġuto Judeuyū kukukayū eju. Akiju ip osodop.

— Oxe ma ite aġokatkat ikērēat o'jukuk ġu. Pūġ em tak o'jukuk ġu ma — Pilatos o'e cebe ip. — Cūġ ġu kuka o'e wuywebe yaoka am — io'e. ³⁹ — Páscoa epeta bima pūġ ma òn imujēmjēm'uk daomūnmūnap'a bewi jekpiwan ma ceku am. Eybikuy du owebe eykukukat mujēm âm jekpiwan ma ceku am. — Jesus mujēm âm? — io'e Pilatos.

⁴⁰ — Ap! — io'e ip. — Ixe ġu juy eġujēmat — io'e ip ya'òberen. — Barrabás pit eġujēmat — io'e ip. — Barrabás kay oceju! — io'e ip ya'òberen. (Ixe Barrabás jebureyū aokakaxi osunuy.)

19 — Jesus cuy epeyukxabimupokupok wuyukxabimupokupokapxeem — io'e Pilatos sorarayū be.

O'yukxabimupokupok ip sorarayū. ²Jesus waywayway pin ip osodop. Jesus ijodiat kukat iap waywayway pin osodop ip. Imēnpuye widaohobune o'subunemuwakēn ip yabeam. O'jomōġ ip ya be ijodiat kukat a beat mōġap co'i. Iekabek o'ġuôm ip Jesus pe ijodiat kukat ekabek co'iat. O'ġuôm ip iberenat-iremrumġūġūnat. O'ġuôm ip iwaywayway am.

³ — Ak'i! Teku Judeuyū kukukat! — io'e ip Jesus waywayway am.

Warara'acat ma ip o'topaokaka jebum.

⁴ Pilatos waram o'ju jeduk'a ekorara be. Judeuyū kukukayū kay o'ju.

— Ak'i! — io'e. — Waram ixe otojocat eyetabi-xe am — io'e. — “Oxe bit ite ikērēat o'jukuk ġu-pūġ em tak ka'ūma,” i ōn e'em eywebe — io'e Pilatos.

⁵ Imēnpuye ixe Jesus o'jēm uk'a bewi. Xerwun. O'ju Pilatos xe. Oajēm adeayū wap. Yabeat kuġ mabuk osunuy- -widaohobune kuġ. Iekabek kuġ mabuk osunuy- -iremrumġūġūnat kuġ.

— Ak'i juy epe'e — io'e Pilatos adeayū be. — Ijoce ma aġokatkat — io'e cebe ip.

⁶ — Ite ba juy esubamupayaat korosa be ce'ū ām — io'e ip ya'ōberen paīyū kukukayū, Deus eju kawēnwēnap'a wiwi'ukayū dak.

O'jewāwā ip. Imēn o'e ip Jesus co buje.

— Ite ba juy esubamupayaat korosa be ce'ū ām — io'e ip ya'ōberen.

— Eyju ma juy epejat — io'e Pilatos cebe ip. — Eyju ma juy epesubamupaya korosa be — io'e. — Oxe bit cūġ ġu wuywebe yaoka am. Oxe ikērēat o'jukuk ġu- -pūġ em tak ka'ūma — io'e.

⁷ — Cūġ ma ocexe bit yaoka am cekawēnkērē buye — io'e Judeuyū kukukayū. — “Deus ipot ōn,” i juk adi o'e teku — io'e ip. — Imēnpuye ocedobuyū'ūm'ūm ekawēn taġ oceju yaokam — io'e ip.

⁸ Pilatos iparara jījā ma o'e “Deus ipot ōn,” i teku e'em iap tobuxik puje. ⁹ Waram oōm jeduk'a be Jesus eju kawēn ām.

— Apomawi ejot? — io'e Pilatos Jesus pe. Imēnpit Jesus jededem ġu.

¹⁰ — Ede pin ġu du owebe? — io'e Pilatos. — Wa'ōbuyxi ōn. “Iteba juy epesubamuwekap,” i ōn e'em pima, jebamuwekap ip. Ekupinap taġ eceku — io'e Pilatos. — “Epesubamupaya korosa be ce'ū ām,” i ōn e'em pima bit, jebamupaya ip e'ū ām — io'e- -Jesus pe o'e.

¹¹ — A'ōbuyxi ēn Deus cuk a'ōbuyxian emuy

buye — io'e Jesus. — Emuy'üm pima, apên kuka ece owebe? Ka'üma ma! — io'e- -Jesus o'e. — Ewebe oaokaan puje, ikêrêat kuğ ece'e Deus xe. Ebodi ma bit ekay odojocat pit ikêrêat kuğ je'e cexe — io'e.

¹² Iboap co buje, Pilatos Jesus pa muwekap ojuy jijã o'e.

— Jesus pa muwekap ojuy oce — io'e Pilatos je-webe ma.

— Roma ka kukat itakoma soat kay- -“On ma ijodiat kukat,” i'e'e'ukayū kay — io'e Judeuyū kukayū Pilatos pe. — César itakoma cekay ip — io'e ip. — Ewebe ibamuwekap puje, César kuka itakoma o'e ekay dak — io'e ip Pilatos pe.

¹³ Pilatos waram Jesus o'tujowat jeduk'a eakiju. O'tujowat adeayū wap iboap co buje. Pilatos oabik ibimãmãmãat ekawên coco'ukap pe. Gabatá i uk'a eakijuat putet osunuy. (Gabatá wita'a muğêgê iape wuya'ôm.) ¹⁴ Sexta-feira kaxicuğ osunuy. Sábado emap kabia Judeuyū jekaxipanpan ip o'e peta muy'an- -Páscoa epeta muy'an.

— Ak'i juy epe'e — io'e. — Teku eykukukat — io'e Pilatos Judeuyū kukukayū be.

¹⁵ — Ite ġu ocekukukat! i o'jede païyū kukukayū. — Ite juy eyaokaat! — io'e ip ya'öberen. — Ite juy eyaokaat — io'e ip. — Esubamupayaat korosa be ce'ü âm — io'e ip jetakoma pibun.

— Eykukukatpa du osubamupayaat korosa be? — io'e Pilatos.

— Pūğ ma wuykukukat — io'e ip. — César acā wuykukukat — io'e ip païyū kukukayū.

¹⁶ Imêneju Pilatos jesorarayū o'tomuwā.

— Ite juy epejat — io'e cebe ip. — Epeubamupaya korosa be — io'e cebe ip.

¹⁷ Jesus o'jat ip. Ibocewi o'jêm ip Pilatos duk'a bewi.

Ġebuje Jesus o'tujowat ip co'a kay. Wuyjuyū'a-ririt'a i co'a butet osunuy. (Gólgota i co'a butet osunuy Judeuyū a'ôm.) Korosa kuğ o'ju Jesus. Jay. Oajêm ip. ¹⁸ Iğo'a be sorarayū Jesus pa o'subamupaya

ip korosa jeje ipiju. Tağtağtağ'i tapoam o'e ip. Ibubida be tapoa o'jomuy ip. Cêh. Korosa o'ğu'ağobucêğ ip ipikÿkÿy be. Bêğ. Warara'acayû be dak o'subamupaya ip korosa eju xepxepayûba. Wara'acat ceje o'subamupaya ip korosa jeje. Pûğ korosa o'jomuy ip ipikÿkÿy be Jesus ba'at kadi. Wara'at o'jomuy ip iba'ûğat kadi. Jesus ixeyû parakpe osunuy korosa eju. Toro'ih.

¹⁹ Pilatos tak taperadup o'tupmubararakat. O'tupmôğat korosa eju. Tupararakatup o'tupcoco ip kapkamayû. "Jesus teku," io'e taperadup pe. "Nazaré ka bewiat- -Judeuyû kukukat" io'e taperadup pe. ²⁰ Iboaptup o'tupmubararak ip Judeuyû a'ôm, Romanoyû a'ôm tak, Gregoyû a'ôm tak. Jesus o'subamupayaiat ka Jerusalém ka têğ ma o'sukadop. Imêneju iboaptup o'tupcoco Jerusalém ka be powatwatyû. ²¹ Imêneju paÿyû kukukayû o'jekawên Pilatos eju.

— "Teku Judeuyû kukukat osunuy" iaptup ğu juy etupmubararak, " 'Ôn Judeuyû kukukat,' i juk adi o'e teku" iaptup acâ — io'e ip paÿyû kukukayû.

²² — Ap! — io'e Pilatos. — Otupmuwarurun ğu juy wemudupmubarraktup — io'e.

²³ Korosa eju Jesus pa mupaya buje sorarayû cesay mu'ê'ê ojuy ip jewewebe. Cesay osodop ebadipdip. Sorarayû dak ebadipdip osodop. Ibinünpeat pit pûğ ma imuğêğê osunuy pağôm. Iinümnüm ğu ikuğ osunuy. Soat iinümnüm'ûmat kay o'e ip sorarayû.

²⁴ — Ibinünpeat ağuwek ğu juy — io'e ip jewewebe. — Ğa'a karatûğ'a jo'iat'a ayaxik ipi ju. Ya'at puje pûğ ma je'jat. Ya'at puje wuyetaybit ace'e abu je'jat iam — io'e ip jewewebe.

O'yaxik ip ipi ju. Deus ekawëntup e'em- -kuyjeatup:

Wesay o'ğu'ê'ê ip jewewebe, i. Karatûğ'a jo'iat'a o'yaxik ip obinünpeat pu am, i.

Imên e'em Deus ekawëntup. Sorarayû be yaxik puje Jesus ekabek pu am, iboaptup ekawên tağ ip o'e.

²⁵ Ğejuje Jesus jexi o'jojajo. Jesus xi korosa xe osunuy. Ixi kubit tak iboce osunuy. Maria Madalena

dak iboce osunuy korosa xe. Wara'at Maria dak iboce osunuy- -Clopas tayxi.

²⁶ Jesus jexi o'jojoko. Doze beayū'inat ixi xe osunuy. Ixe Jesus emumukukpinput osunuy. Ixe dak Jesus cocom o'e.

— Tū'ū — io'e. — Teku jekuk ġasū jexi kukap co'i — io'e. ²⁷ — Tapu — io'e jemumukukpinput pe. — Oxi juy ejukuk ġasū exi kukap co'i — io'e Jesus.

Ixe aġokatkat Jesus xi o'ġuōm jeduk'a be ġebuġe bit. Jesus e'ū buġe jexi kukap co'i ma xipan o'jukuk.

²⁸ Jesus itaybit o'e soat wekapikap oġu'ūm iam.

— Obipuruk — io'e Jesus.

Iboam o'e Deus ekawēntup ekawēn taġ.

²⁹ Uva'abidi o'tinuy iboce wa'e jo'iat'a be-tideiboġ'ūmati. Iboceat tibubuap o'ġuakōm iġodi be. O'jomuy ip ip'abi be hissopo'ip abi be. Bēġ'i. O'yopmuyu Jesus pe tikōn ām. ³⁰ O'tikōn tibubuap pewi. Korotkorot'i.

— Soat wekapikap oġu'ūm — io'e Jesus.

O'je'aetore. Jekpiwan ma oe'ū.

³¹ Ġebuġe Judeuyū kukukayū ibamupaya'ibit mukop ojuy korosa ejuwi. O'ju ip kawēn ām Pilatos eju- -iecuġap eju.

— Ocebu'u jījā jebodoydoyap kabia be korosa eju ce'ū'ūayū nuy ām — io'e ip. — Ibamupaya'ibit tao juy etaodakacat dao ma ce'ū ām — io'e ip Pilatos pe. — Ixeyū'ūm'ūm cuy eġukopat Sábado ajēm awap — io'e ip Pilatos pe.

Imēn o'e ip sexta-feira buye. Kuyaje Sábado- -jebodoydoyap kabia. Judeuyū xe petaboġ cīcā osunuy. Imēneju ibu'u jījā ip osodop ixeyū'ūm'ūm nuy ām korosa eju Sábado bima- -jebodoydoyap kabia bima.

³² Imēneju sorarayū o'ju korosa ejuayū kay. Wēġ. Pa. Koapatao o'taodakat ip korosa ejuatao. Wēġ. Pa. Wara'acatao dak o'taodakat ip- -Jesus eju ibamupaya'ibitao. ³³ Sorarayū oajēm Jesus'ūm kay.

— Kuy oe'ū — io'e ip jewewebe.

Imēnpuye Jesus'ūmtao o'taodakat ġu ip. Imēn e'em Deus ekawēntup:

Ixe dao taodakat ġu ip- -pūġtao dak ka'ūma, i.

³⁴ · ³⁷ Tik. O'ya'ōxamutik. Sorara Jesus'ūm o'ya'ōxamutik obukaka'uk co'ian. O'jedoyekereren ya'ōxamutik puje. Idibi dak o'jediekereren. Wara'atup imēn e'em- -Deus ekawēntup:

Ya'ōxamutik'ibit kay jeakak ip wuyjuyū, i.

Kuyjeatup ekawēn taġ o'jebapuk Jesus e'ū buje- -Deus ekawēntup ekawēn taġ. Jesus'ūm oe'ūiap o'jojoiat ce'ūap o'ġuwēn ocewebe. Ocetaybit ixe icēmān e'em iam. Oceju dak Jesus'ūm e'ūap muwēnuwēn eywebe dak eyetabun cekay am.

³⁸ José o'ju Pilatos kay Jesus'ūm jebit mukopap ojuy korosa ejuwi. Arimatéia ka bewiat osunuy ixe. Jesus kay itabut osunuy. Ibapuġ ġu bit Jesus kay wetabut i'e'e'uk osunuy warara'acayū be- -iba'arēm mabuk. Ibapuġ ġu i'e'e'uk osunuy Judeuyū kukukayū buxim jeparara buye.

— Jesus'ūm jebit mukop ojuy ōn pit korosa ejuwi — io'e José Pilatos pe.

— Ha'a — io'e Pilatos. — Esujebitmukop — io'e.

José o'ju Jesus'ūm kay- -korosa ejuat'ūm kay. Ijebit o'ġukop korosa ejuwi.

O'tujowat witabikūy kay. ³⁹ Nicodemos o'ju José eju. Imude'o'onap kuġ o'ju. Ade ikuġ o'ju- -45 kilo ikuġ. Iwekoykeyap osunuy imude'o'onap. Mirra'ip peati tiwekoykey o'e aloé'ip peati eju. Jesus'ūm jebit mude'o'on ojuy iġēmap puxim. Ixe Nicodemos kuy bima Jesus eju o'jekawēn ixima be. ⁴⁰ Xepxepayū Jesus'ūm jebit o'jat- -José, Nicodemos tak. Imude'o'onap o'ġuwedi ip paġo daġ- -xipacat taġ. Ijebit o'jojomūnmūn ip ixem paġōm. Perek. Imēn ma Judeuyū wuyjuyū'ūm'ūm muxipanpan'uk ip osodop witabikūy be imuōm ām. ⁴¹ Kadaidip o'tiptop Jesus pamupayaap pe. Iġodip pe witabikūy o'sukūynuy- -wuyjuyū'ūm'ūm muōmuōmapkūy. Ikūyisuatkūy o'su-

kūynuy. Ikūyisuatkūy be ce'uat o'jomōg̃ ġu buk ip.
⁴² Sexta-feira osunuy. Sexta-feira bima jexat muxi-
 panpan'uk ip osodop Judeuyū Sábado bima i'o'ibin.
 Sábado bima jebodoydoy'uk ip osodop. Witabikūy
 ibamupayaap tēg̃ ma o'sukūynuy. Imēneju Jesus'ūm
 o'jomōg̃ ip iġokūy be.

20 Domingo bima Maria Madalena o'ju witabi-
 kūy kay. Kabiakabia'i bima o'ju. Kabiok
 ma bima buk o'ju. Ikūynomudip'a o'yajojo wita'a.
 Yaboġat'a o'yajojo. Tūybe wuyjuyū o'tujupa'um ije-
 bit iān o'e Maria. Yawede o'yadobuxik tomudip'a.
² O'jedau Pedroyū kay. Oajēm cekay ip. Pūg̃ ixeyū'in
 Simão Pedro osunuy. Wara'acat Jesus emumukukpin-
 put osunuy. Ixe dak Jesus eju etaybitbinat osunuy.

— Wuykukukat'ūm o'tujupa'um ip witabikūy
 bewi — io'e Maria xepxepayū be. — Poce xe'e ip
 ixē'ūm o'jomōg̃? Ocetaybit ġu — io'e.

³ O'jēm Pedroyū jeduk'a bewi. O'ju ip witabikūy
 kay. ⁴ Xepxem ma o'ju ip daudaum. Warara'acat pit
 dao ma o'jedau. Koap oajēm witabikūy be. Jay. ⁵ A-
 toroh. O'je'atoro ikūy kay. Etaburut. O'jetaburut.
 Paġo o'jojjojo irucat. Ijebit mūnmūn o'jojjojo. Imēnpit
 oōm ġu ikūy be. ⁶ Kanomūm Simão Pedro oajēm.
 Jay. Oōm witabikūy be Simão Pedro. Cereġ. Bodiku
 paġo osodop irucat xipacat. Ibo o'jojjojo. ⁷ Wara'at
 paġo o'tobuxik- -Jesus'ūm a daġ osodopiat. Yadaġ
 osodopiat ijebit mūnmūnap epaġo xe ġu osodop. Wa-
 ra'at pe ma osodop. Iekabek acā osodop ya'a o'ya-
 dopiat pe. Ka'ūmġu ijebit pit. ⁸ Wara'acat tak oōm
 ġasū- -Jesus eju etaybitbinat- -Jesus emumukukpin-
 put. Badi o'jeak.

— Ak'i ece! Ka'ūmġu ijebit! — io'e jewebe ma.
 — Waram Jesus o'jetait! — io'e jewebe ma.

⁹ Deus ekawēntup imēn e'em:

Deus ixē ġuyu ce'ū'ūayū xewi, i.

Kuy bima ibodup ekawēn cekawēn pa'arēm osodop

cexe ip. Gasū bit ibapuk o'e Jesus eju etaybitbinayū xe.

¹⁰ Xepxepayū ma o'jepit jeduk'a be.

¹¹ Maria Madalena bit waram o'ju witabikūy jom. Jay. Oajēm. Ikūy jojom osunuy itabēg ikūy etakobe. Wa osunuy. O'je'atoro. Atoroh. Axih. Wa o'e. O'jetaburut ikūy be.

¹² Deus ekawēn tojtjt'ukayū o'jojojo xepxepayū -kabi kadiwiayū. Cesay irucat kuḡ ip osodop. Kaxixik'i osodop ip Jesus'ūm osodopiap pe. Pūḡ ixeyū'in ya'a o'yadopiap pe osunuy. Wara'acat ixeyū'in sui o'suidopiap pe osunuy.

¹³ — Tū'ū — io'e ip Maria be. — Abu-kay ēn wa? — io'e ip.

— Okukukat'ūm kay — io'e. — Okukukat'ūm o'tujupa'um ip — io'e. — Imēnpuye ōn wa. Wetaybit ḡu poce ip o'jomōḡ iam — io'e.

¹⁴ O'jekorepēn imēḡap e buje. Jesus cūḡ'i osunuy tōḡpikadi. Jesus o'jojojo. Imēnpit itaybit ḡu o'e ixem. O'jetabieba'arēm ixem. Tūybe ija ḡu iān o'e.

¹⁵ — Tū'ū — io'e Jesus. — Abu-kay ēn wa? — io'e cebe. — Abu-kudadam ēn? — io'e.

Tūybe sute kadaidip wiwi'ukat iān o'e Maria cebe.

— Okukukat'ūm kudadam ōn — io'e. — Ēn tu ixē'ūm etujujēm? Poce ejomōḡiap cuy eḡuwēn owebe! — io'e. — Ōn ma oju ixē'ūm tujupit am — io'e.

¹⁶ — Maria! — io'e.

O'jekorepēn Jesus kay.

— Raboni — io'e ja'ōm- -Judeuyū a'ōm.

(Raboni wekariwa iape.)

¹⁷ — Obaixiḡ ḡu ece — io'e. — Webay kay buk oceu ḡu — io'e Jesus. — Eju juy okitpiyū kay - oweju etaybitbinayū kay — io'e. — “Webay kay waram oceu- -eyebay kay,” i juy ece cebe ip — io'e. — “Wuyebay Deus oxe, eyxe dak,” i juy ece cebe ip — io'e Jesus Maria be.

— Hm hm — io'e- -Maria o'e.

¹⁸ Maria Madalena o'ju Jesus eju etaybitbinayū kay.

— Wuykukukat ojojojo! — io'e cebe ip. — Waram o'jetait! — io'e.
 Jewebe Jesus o'e'e iap o'ġuwēn cebe ip.

¹⁹ Kabioġ pima Jesus o'jebapuk jewēju etaybitbinayū kay. Ixe Domingo bima o'jebapuk cekay ip. Awerom ip osodop uk'a be. Cem ma'ġu tomudipdip osunuy xīntabi, Judeuyū kukukayū buxim iparara buye. Inaka Jesus o'jebapuk cekay ip.

— Kaba'ūm cuy epeyewekuk — io'e cebe ip.

²⁰ O'jewebumupaya cekay ip. O'jewa'ōxamubapuk cekay ip. Icokcok cīcā ma ip o'e jekukukat tobu-xik puje.

²¹ — Kaba'ūm cuy epeyewekuk — io'e waram Jesus. — Webay juk omudot ijodi. Imēnpuxim ōn tak jeymuju omuwēn ām ijodiat pe — io'e.

²² Jebido o'subidomuju cekay ip. Puw io'e.

— Obiōġbuk oġuōm eywebe — io'e. — Xipacat oġuōm eywebe — io'e cebe ip. ²³ — “Deus ikērēat ju'uk eywebewi” i ey'e buje, ikērēat ju'uk ixeyū bewi — io'e. — “Deus ikērēat ju'uk ġu eywebewi” i ey'e buje bit, ju'uk ġu ikērēat ixeyū bewi — io'e Jesus.

²⁴ Ġejuje Jesus o'ju Tomé kay -jeweju etaybitbinat kay. Ixe Tomé doze beayū'in osunuy. Xepxem ikap'ibit i ixē butet osunuy wara'at ibutet. Warara'acayū eju ġu ixē Tomé osunuy ixeyū kay Jesus ebapuk puje. Jesus o'jojojo ġu buk waram cetait puje. ²⁵ Imēnpuye warara'acayū o'jekawēn Tomé eju-ceweju etaybitbinayū.

— Tapu, wuykukukat ma ocejojojo! — io'e ip. — Waram ġuto o'jetait! — io'e ip.

— Dapxi eyju! — io'e. — Wetabut ġu oce waram ixē'ūm o'jetait iap kay — io'e. — Tapoa kūybut cocom'ūm pima, wetabut ġu oce — io'e. — Tapoa kūybut pe osubumōġ'ūm pima dak, wetabut ġu oce — io'e. — Ya'ōxatikat pe osubumōġ'ūm pima, wetabut ġu oce — io'e Tomé.

²⁶ 7 xet kap puje Jesus eju etaybitbinayū waram awerom osodop ip uk'a be. Tomé dak cexe ip o'e. Uk'a exīntabi tomudipcēm cīcā osunuy. Jesus pit

oõm iõo'a be. Onze beayũ kay waram o'jebapuk.

— Kaba'ũm cuy epeyewekuk — io'e Jesus cebe ip.

²⁷ Jesus dao ma o'jeak Tomé kay. Ak'i o'e. O'jekawēn ceweju -Tomé eju.

— Ak ece obubida kay — io'e Tomé be. — Tapoa kũybut cuy ejojojo obubida be — io'e. — Tapoa kũybut pe juy ebu esubumuõm — io'e. — Wa'õxatikat pe juy ebu esubumuõm itikatkũybut pe icēmān poro iam — io'e Jesus. — “Ixe'ũm waram o'jetait ġu,” i'ũmġu juy ece — io'e. — Etabun cuy eġuy! — io'e.

²⁸ — Kariwa, wetabut ekay — io'e Tomé. — “Ēn ma Deusat,” i õn e'em — io'e -Tomé o'e.

²⁹ — Etabut ojojom ěn puye — io'e Jesus. — Warara'acayũ bit ojojo ġu. Inaka itabut je'e ip okay. Icocok cĩcā ma ip je'e — io'e.

³⁰ Jesus ja'õbacaap o'jomõġmõġ jewēju etaybitbinayũ etabixe. Soat ġu ya'õbacaap mõġmõġap mubarararaġ õn ijudup pe. ³¹ Pũġpũġ ā õn imubarararaġ ijudup pe Jesus pe o'ġubapukpukiap. Iboap oġubararak eymutabut am Jesus Deus emunaē iap kay, Jesus Deus ipot iap kay dak. Iboap kay eyetabun pima, ixe a'õbi eyaġuyisum epeku ijodi; eyetait epesop cexe eye'ũ buje dak.

21 ^{1, 14} Guyjom Jesus waram o'jebapuk jewēju etaybitbinayũ kay. Iodi xe o'jebapuk cekay ip. Iodi butet Tiberiades i osunuy. O'je'awero ip 7 beayũ ceweju etaybitbinayũ. Iodi xe o'je'awero ip. Pũġ em ġu o'jebapuk ce'ũ'ũ'ibiyũ xewi jeu buje. ² Ibũrũ ma ibutet osodop ip: Simāo Pedro i, Tomé i, Natanael i, Zebedeu ipotpoyũ xepxep, warara'acayũ dak xepxep. Xepxem ikap'ibit i Tomé butet osunuy wara'at ibutet. Natanael Caná ka bewiat osunuy - Galiléia eipi bewiat. Ibũrũ ma o'je'awero ip.

³ — Cum puk òn axima bum — io'e Simão Pedro jebureyū be.

— Ha'a — io'e ip. — Ocejū dak cum eweju ocejat pum — io'e ip.

Ixima daḡ axima bubum ojuy ip. Kobe be ip oòm axima bu pinayū. Haham oeku ip. Imēnpit o'jat ḡu ip. Te'e ma ip oeku.

⁴ Jesus o'jebapuk iodi wābu be kabia buje. Imēnpit teku wuyekariwa iap iba'arēm o'e 7 beayū xe. Itaybit ḡu o'e ip teku wuyekariwa iam. Wīnābu wi o'jewāwā cebe ip.

⁵ — Tapupuyū — io'e Jesus cebe ip. — Pebūrū axima epejat?

— Ka'ūma ma — io'e ip. — Ocejat ḡu! Te'e ma oeku — io'e ip.

— Eyba'at kadi ma ūrū epeḡuakōm — io'e Jesus. — Ḡejuje bit ade ma epejat — io'e.

— Hm hm — io'e ip.

⁶ Tok. Ūrū o'ḡuakōm ip jeba'at kadi. Ade o'jat ip axima. Ūrū mupuxik pa'ore o'e cebe ip axima poxi pibun.

⁷ — Ak'i juy ḡokayku! Wuykukukat ma ḡoku! — io'e Jesus emumukukpinput Simão Pedro be.

Simão Pedro jeekabek o'ḡuōm jekukukat topabe jejuam. Jeekabek kuḡ ḡu kapikpik'uk osodop ip. Tip. O'jetip iodi be dao ma Jesus kay jajēm ām. ⁸ Warara'acayū Jesus kay oajēm kobe daḡwi. Oajēm ip ūrū mupuxikpuxiḡ kobe ukpu bewi. Ade jījā osodop axima ūrū be. Wūy ḡu ip osodop kapurūḡ pewi-100 metros acā. ⁹ Jay. Muḡ. Jesus o'jojōjo ip. Axima yoyoy o'e daxa be. Pāo'a kuḡ tak osunuy.

¹⁰ — Axima'in epetojot-ḡasū epejat'iat'in — io'e Jesus cebe ip.

— Hm hm — Pedro o'e.

¹¹ Oòm kobe be axima bum. Ūrū o'ḡuwekap. O'tujuu kapurūḡ kay. Jay. Axima o'tojot. Ade osodop ūrū be axima yoboḡat. 153 osodop ip. Inaka ūrū o'jeweḡ ḡu.

¹² — Ga'a acekōn — io'e jeweju etaybitbinayū be.

— Ga'a — io'e ip.

— Abu ên? — io'e ġu ma cebe.

Itaybit o'e ip wuykukukat teku iam- -waram o'jetait-iat teku iam.

¹³ Jesus pão'a o'yabu. Axima dak o'jat. O'ġm cebe ip ixan.

¹⁵ Ġebuġe Jesus o'jekawën Simão Pedro eju- -João ipot eju. O'jekawën ceweju jekõn epere buje.

— Simão — io'e Jesus. — Warara'acat kukpinap podi ma du okukpin exe? — io'e.

— Hm hm, Kariwa — io'e Simão. — Etaybit ebure õn iam — io'e.

— Wekawën cuy eġutaybin itabun'isuayū — io'e Jesus. — Xipan cuy ixeyū ejukuk apën ovelha kukat xipan jeõhõ'it'it kukap puxim — io'e.

¹⁶ — Simão — io'e Jesus waram. — Okukpin tu exe?

— Hm hm, wekariwa — io'e. — Etaybit ebure õn iam.

— Wekawën cuy okay itabucayū eġutaybin — io'e. — Xipan cuy ixeyū ejukuk apën ovelha kukat jeõhõyū kukap puxim — io'e.

¹⁷ — Simão — io'e Jesus waram. — Ebure du õn? — io'e.

Ebapūġ em imën o'jekawën Simão eju. Imënpuye Simão iġuycūġ o'e Jesus e'eap kay.

— Kariwa — io'e. — Etaybit soan. Etaybit õn ebure iam.

— Wekawën cuy itabucayū eġutaybin — io'e Jesus. — Xipan cuy ixeyū ejukuk apën ovelha kukat jeõhõyū kukap puxim — io'e. ¹⁸ — Simão, icēmān õn e'em ewebe. Jaypan'isum ekpiwat ma jekuku'uk eġuy. Esay muõm puġe, ekupinap taġ acā jekuku'uk eġuy. Aypa bima bit ecejebaepacūġ warara'acat pe ebamūn ām correntebum. Warara'acat jedujowat edaobu'unap taġ — io'e Jesus.

¹⁹ - ²⁴ Imën Jesus apën Pedro je'ū iam o'ġukūyjo. Apën Pedro Deus dipap ġubapukpuk iam tak o'ġukūyjo.

— Obikuyap taġ cuy ejeku — io'e Jesus Pedro be.

Jekorepên puje Pedro Jesus emumukukpinut o'jojojo. Cemumukukpinut doze beayū'in osunuy. Pedro nomuju o'e.

— Kariwa — io'e. — Apên je'bapuk ġuyjom ġobeku? — io'e Simão Pedro Jesus emumukupinat co buje.

— “Apên je'bapuk ġobeku ġuyjom,” i'ümġu juy ece owebe — io'e. — “Ōn tu wekariwa bikuyap taġ jekukum?” i acā ece ewebe ma — io'e Jesus. — Obikuy bima bit kuka adi teku oe'ū ġu — io'e. — Obikuy bima, ijoce mabuk teku kuka adi osunuy waram wajēmap com — io'e. — Imēn obikuy bima, ak'adit ma'ġu kuka eġuy iboap kay — io'e Jesus.

Imēneju itabucayū o'jekawēn cīcā jeweweju. Tūy-be je'ū ġu iān o'e ip. Imēnpit:

— Teku je'ū ġu — i'ümġu o'e Jesus. — Obikuy bima kuka adi teku ijoce mabuk jeenuy waram wajēmap com — i juk o'e Jesus.

Jesus eju oekukuiat ma apên Jesus cuk adi o'e'e iap o'ġuwēn ocewebe- -Jesus xe ikukpinat. Jesus tēġ ma osunuy doze beayū eju jekōnkōn pima Jesus e'ū awap.

— Kariwa, abu oce'in jeūm ekay itakomaayū be? — i juk o'e ce'ū awap.

Ixe ma Jesus o'e'eiap o'ġuwēn ocewebe. Wuyetaybit ixe icēmān e'em iam. Ixe ekawēn mubarararaġ ōn ijudup pe- -cartadup pe.

²⁶ Ade jījā ma osunuy Jesus e'eap. Soat ġu ixe e'eap o'ġubararak cemudupmubararaktup pe- -ijudup pe. Soat pit ixe o'e'e iap mubarararaġ pima, apoce dak kuka atupmōġ? Tup ade jījā ma kuka o'e ibi-atup. O'e ġu kuka ipi daġ wuywebe ibiatup mōġ ām. Imēn kuka o'e wuyxe.

Ibūrū ma.

JESUS CRISTO EMUMUJUYŪ E'EAP EKAWĒN

1 Teófilo, kuy bima livrodup otupmubararak ewebeaptum. Apĕn ijodi bima Jesus cuk adi o'ġutaybitbiniaptup otupmubararak, apĕn ixe juk adi o'e'eiaptup tak. Soat iboap oġubararak kuyatup pe ewebeaptup pe.

² Kabi kay jeu awap Jesus doze be o'taē aġokat-kayū. O'taē jewēju itaybin'ibiyūm. Taē'ibiyū o'ġutaybin Deus biōġbuk a'ōbi jeu awap. ³ 40 kabia ijodi oeku waram jetait puje. Ade em o'jebapukpuk jewēju etaybitbinayū kay. Itaybit cīcā ip o'e Jesus waram o'jetait iam, ade em ixe o'jojojo buye.

— Deus soat kukukan je'e — io'e ixe cebe ip.
⁴ Awerom pima Jesus o'jekawĕn ġuto ceweju ip.

— Epewatwat ġu juy Jerusalém ka bewi — Jesus o'e. — Ijop ka ma epesop. Ibiōġbuk xipacat ajĕmap pit cuy epejowiwi. Webay ixe ġudot eykay apĕn eywebe juk adi ocece iap taġ — io'e. ⁵ — Kuy bima João ijodiat mubatisasan osunuy idibi be — io'e cebe ip.

— Ġaxīn ma bit Deus biōġbuk jajĕm eykay. Ibiōġbuk xipacat jeōm eywebe — io'e Jesus. Jesus imĕn o'jekawĕn jewēju etaybitbinayū eju.

⁶ Waram Jesus emumujuyū o'je'awero ip. O'jekawĕn ip Jesus eju.

— Kariwa — io'e ip. — Ġasū du ocebadipyū'in ecejomuy ocekkukan- -Judeuyū kukukan? — io'e ip.

⁷ — Eyetaybicap ġu iboam — io'e Jesus. — Webay acā itaybit. Ixe ja'ōbi ixeyū'in eykukukan iap kabia o'ġuweġūn. ⁸ Imĕnpit eywebe Ibiōġbuk Xipacat ōm puje, Deus a'ōbacaap kuġ epekuku. Eya'ōcam omuwĕnuwĕn epekuku soat kaka daġ. Omuwĕnuwĕn epekuku Jerusalém ka watwat pe, Judéia eipi watwat pe dak, Samaria eipi watwat pe dak, wūyatka watwat pe dak — io'e.

⁹ Iboap muwĕn puje, Deus Jesus o'tujowat jewekay. Ceweju etaybitbinayū etabutpe o'tujowat. Aġ ip

o'e cekay. Ceuap o'jojoho ip. Pa'üm. O'jepa'üm kabikerereat pe Jesus. Iba'arēm o'e.

¹⁰ Kabi kay apūn pima aḡokatkayū oajēm Jesus eju oekuku'iaiyū kay- -xepxepayū- -cesayrucayū.

¹¹ — Tapupuyū — io'e ip. — Apēnpuye dak eyju jeapūnapūn kabi kay? — io'e ip Jesus emumujuyū be- -Galiléia eipi bewiaiyū be. — Deus Jesus o'tujowat eyxewi. O'ḡuyu kabi kay. Ceuap epejojoho. Jeup puxim waram je'pit — io'e aḡokatkayū.

¹² Jesus emumujuyū o'jepit Jerusalém ka kay. O'jēm ip co'a bewi- -Oliveira dip'a bewi. Oliveira dip'a Jerusalém ka tēḡ ma o'yanuy- -pūḡ kilometro ma. ¹³ O'jeawero ip uk'a be- -umat'abi be- -Jerusalém ka be- -kuy bima osodop ip iat'a be. Ibūrū ma ibutet osodop ip; Pedro i, João i, Tiago i, André i, Filipe i, Tomé i, Bartolomeu i, Mateus i, wara'at Tiago i, Simão i, Judas i. Tiago Alfeu ipot osunuy. Judas Tiago ipot osunuy. Simão jeipi kay jījāat osunuy. Ibūrū ma awerom ip osodop umat'abi be. ¹⁴ Pūḡ taḡ ma ip je-waḡuyḡuy osodop. Soat em je'aweroro'uk osodop ip Deus eju kawēn ām. Aoyū dak je'aweroro'uk ip osodop ceweju ip. Maria cexe ip osunuy- -Jesus xi. Jesus kitpitpiyū dak je'aweroro'uk ip osodop ceweju ip.

¹⁵ Awerom pima, Pedro o'āy itabucayū xewi. Ade jījā ip osodop Jesus kay itabucayū. 120 osodop ip. Pedro o'jekawēn ceweju ip.

¹⁶ — Okitpitpiyū, eya'ōpicūḡcūḡ cuy epesop wa'ō kay — io'e. — Kuyje Davi apēn Judas kuka o'e iap o'ḡuwēn Deus biōḡbuk a'ōbi. Ixe Davi ekawēn ibararak opop Deus ekawēn tup pe. Ixe Judas Jesus pu ojuyayū o'tujowat cekay. Ḡasū o'jebapuk ibiat tup ekawēn taḡ- -kuyatup ekawēn taḡ — Pedro o'e. ¹⁷ — Jesus ixé Judas o'taē kapik am oceweju — io'e. — Oceweju juk adi oekuku. ¹⁸ Imēnpit ixé Judas Jesus o'ḡūm itakomaayū be. Dinheiro o'jat Jesus ūmap teim — io'e Pedro. — Ipi o'jat ixem dinheiro. Iḡo eipi be o'jewaḡobua. Yabitorom o'at. O'je'ukedeḡ. O'tūnpujēm ijebit pewi. Oe'ū — io'e Pedro cebe ip. ¹⁹ — Soat Jerusalém ka watwat ce'ūap awēḡ o'yawēḡ-

tobuxik ip. Imēnpuye ibo eipi butet Aceldama i o'su-buteta ip ja'ôm.

(Aceldama aḡokatkat toy o'toyjēmiap ka iape wuya'ôm). ²⁰ Imēn e'em Salmo dup:

Tuk'a juy yabibuḡ, i. Ka'ūma ma juy je'e ya be, i.

Wara'at tup imēn e'em:

Wara'at cuy jeenuy tūyap pe kapik am ixē dieḡ, i — io'e Pedro.

^{21 - 22} — Imēnpuye wara'at'in cuy ataē oceweju ceku am ixē'ūm tieḡ. Wara'at'in cuy ataē wuykukukat Jesus waram o'jetait iap muwēn ām soat pe — io'e. — Jesus ocexe bima oceweju juk adi oekuku'iaiyū'in cuy ataē — io'e. — João'ūm imubatisasan pima oceweju juk adi oekuku'iaiyū'in cuy ataē -Deus Jesus muyu buje kabi kay oceweju cekuku'iaiyū'in — io'e.

— Ibiat cuy ataē — io'e ip.

²³ — José juy ataē — io'e pūḡpūḡayū.

— Barsabás cuy ataē -cūḡ cīcāat — io'e warara'acayū Pedro be.

— Matias cuy ataē — io'e ip warara'acayū bit.

²⁴ Ḡebuje o'jekawēn ip Deus eju.

— Bay — io'e ip. — Etaybit apēn oceju je-waḡuyḡuy iam. ²⁵ Judas'ūm oibu'un oceweju jeku am — io'e ip. — Oibu'un ekpot eju am. Jekapikap o'suiwat jejuap ka kay jeju am — io'e ip. — Abu ḡu xe'e ocetaē oceweju jeku am Judas'ūm tieḡ? Barsabás tu ocetaē? Matias ḡu xe'e? — io'e ip Deus pe. Imēn o'jekawēn ip Deus eju.

²⁶ Ḡebuje yabararukat'a o'yaxik ip pūḡ'in ip taē ām. Imēn itaybit ip o'e abu Deus o'taē iam. Imēn Matias o'taē ip jeweju ip jeku am Judas'ūm tieḡ. Ixe Matias onze beayū eju oekuku ḡebuje bit.

2 Deus biōḡbuk o'kop Jesus eju etaybitbinayū kay. Pentecostes pima o'kop. Pentecostes i kabia butet osodop. Pentecostes ajēm puje pūḡ pe ma ip osodop awerom itabucayū -Jesus eju etaybitbinayū dak -doze beayū. Judeuyū petata'uk osodop

ip Pentecostes kabia be. ²Deus biōḡbuk imēn o'kop cekay ip. Kabi bewiat a'ō o'ya'ījojo ip. Kabidoxixi a'ō buxim o'e kabi bewiat a'ō. Kaxikxik'i osodop ip uk'a be. Soat ip o'ya'ījojo. ³Daxae jo'iat o'jebapuk cekay ip. Daxae jo'iat o'kop ceparakpe ip- -soat parakpe. Soat pe o'sueabik cebe ip. ⁴Deus biōḡbuk imēn oōm soat pe cebe ip.

Ḡebuḡe itabucayū warara'acat a'ōm ma o'jeka-wēn. Deus biōḡbuk a'ōbi o'jekawēn ip warara'acat a'ōm. ⁵Ade powatwat Jerusalēm ka be osodop ip- -soat kaka daḡwiayū. Judeuyū etabucap puxim itabut ip osodop Deus kay.

⁶Ixeyū a'ōm ekawēn co buḡe, soat ip o'ju cekay ip ya'ījom powatwat. Yaḡuy'ūm ip o'e itabucayū soat a'ōm kawēnwēn puye. Soat ip ja'ō ma o'ya'ījojo. ⁷Imēnpuye yaḡuy'ūm ip o'e.

— Eya'ōpicūḡcūḡ cuy epesop — io'e ip. — Soat ijoyū Galilēia eipi watwat ma — io'e ip. — Imēnpit ja'ōm ḡu kawēnwēn ip- -wuya'ōm acā — io'e ip jewewebe. ⁸— Apēntak soat wuyju wuya'ījojom- -bekin pima wuyju kawēnwēnap a'ījojom? — io'e ip. — Wuya'ōm ma ip kawēnwēn! — io'e ip jewewebe. ⁹— Pártia eipi bewi ajot peta be, Média eipi bewi dak, Elāo eipi bewi dak — io'e ip. — Mesopotámia eipi bewi dak ajot, Judēia eipi bewi dak, Capadócia eipi bewi dak, Ponto eipi bewi dak, Ásia eipi bewi dak, ¹⁰Frīgia eipi bewi dak, Panfília eipi bewi dak, Egito eipi bewi dak, Líbia eipi bewi dak, Cirene ka bewi dak, Roma ka bewi dak — io'e ip. ¹¹— Pūḡpūḡ wuy'in Judeuyū ma. Warara'acayū ka'ūma. Ixeyū etabucap co'i wuyju dak wuyetabut Deus kay — io'e ip. — Creta eipi bewi dak ajot, Arábia eipi bewi dak. “Deus soat podi ma ya'ōbaca,” i'e'em ip itabucayū wuywebe. “Soat podi ma xipat ixē,” i'e'em ip wuywebe. Wuya'ōm ma kawēnwēn ip — io'e ip jewewebe.

¹²Imēn o'e ip yaḡuy'ūm puye. Yaḡuybabi'ūm'ūm o'e ip.

— Apēnpuye wuya'ōm ip kawēnwēn? Ajom Deus wuy mukūyo ojuy? — io'e pūḡpūḡ ce'in ip.

¹³ — Ika'o'o ip — io'e ip napa ma warara'acayū bit Jesus eju etaybitbinayū waywayway am.

¹⁴ Kirik'ây. Pedro o'ây jekawën âm je'awero'i-biyū be. O'ây onze beayū eju. O'jekawën ya'öberen adeayū be.

— Tapupuyū Judeuyū, Jerusalém ka wat, eya'ö-picügcügcü cuy epesop wa'ö kay — io'e Pedro. ¹⁵ — Oceka'o'o ġu. Tūybe ip ika'o'o iân eyju e'em. Kaxi-cuġ mabuk 9 horas acā. Kabiam pit oceju uva'abidi kōnkōn ġu. Ōn jeymukūyjo apēnpuye oceju eya'ōm ma kawēnwēn iam — io'e.

¹⁶ — Apēn Joel juk adi o'e'e iap taġ oceju eya'ōm kawēnwēn ġasū. Soat a'ōm kawēnwēn. Imēn e'em Joel emudupmubararaktup--Deus ekawēn mu-wēnuwēn'ukat emudupmubararaktup:

¹⁷ "Ipi'ūm awap obiōġbuk oġuju eykay," i'e'em Deus, io'e Joel. "Soat pe oġuōm," i'e'em, io'e. "Enaxeġebitbit wekawēn ġuwēn," i'e'em, io'e. "Aġo-katkayū oġuyxeyxey wekawēn," i'e'em, io'e. "Aypapayū dak oġuyxeyxey," i'e'em, io'e. ¹⁸ "Obiōġbuk oġuju obuywatwat'ukayū kay--aġo-katkayū kay, aoyū kay dak," i'e'em Deus, io'e Joel. "Imēnpuye wekawēn ġuwēn ip," i'e'em, io'e. ¹⁹ "I'e ba'o-reat oġubapuk kabi be. Oġubapuk ipi juayū aġuy mubabi'ūm âm," i'e'em, io'e. "Soat podi ma wa'öbaca iap oġubapuk adeayū be," i'e'em, io'e. "Doy jedoyebapuk. Daxa dak je'bapuk. Daxidiġ tak jediġebapuk," i'e'em, io'e. ²⁰ Kaxiepiat kabiok je'e. Kaxi ipakpuk je'e doy buxim. Imēn je'bapuk wuykukukat ajēm awap, io'e Joel. Ixe ajēmap kabia idip cīcā je'e. Yajēm puje ixe soat kukukan je'e- -ipi juacayū kukukan, io'e Joel. ²¹ "Kari-wa, odaxijom cuy ece" i'e'e'ukat ma Deus idaxijo, io'e Joel — io'e Pedro.

— Imēn Joel o'e Deus a'öbi — Pedro o'e.

²² — Israel naxegebitbit — io'e. — Eya'opicūg-cūg cuy wekawēn kay — io'e. — Jesus cuy oḡuwēn eywebe- -Nazaré ka bewiat. Ixe Jesus Deus a'ōbi wuywebe i'e ba'oreat mubapukpuḡ oeku. Wuymu-coatcoanap mubapukpuḡ oeku. Deus a'ōbacaap mubapukpuḡ oeku. Eyetaybit iboam etetabutpe ixe oeku buye — io'e Pedro adeayū be.

²³ — Ikērēat mujurūgrūḡ'ukayū Jesus o'jat. O'jat ip apēn Deus ibikuy osunuy iap taḡ. Eyju ma ikērēat mujurūgrūḡ'ukayū be Jesus epesubamupayaat korosa be ce'ū ām- -Judeuyū kukukayū be. ²⁴ Deus pit Jesus o'ḡutait waram. Ce'ū buje Jesus o'ḡuyu ce'ūap pawi ibun topap puxim — io'e.

²⁵ — Deus a'ōbi Davi Jesus o'ḡuwēn wuydo-buyū'ūm'ūm pe kuyje — io'e.

— Imēn Davi o'e:

Okukukat, oparara ḡu, soat em ēn aḡ okay ibuye, soat em ēn obuywatwan ibuye dak, i. ²⁶ Ocokcok cīcā ma ōn e'em, io'e. Soat em “Deus, ēn xipat cīcā oxe,” i ōn e'em, i. Wetaybit soat em exe oḡuy iam, i. We'ū buje dak a'ḡu oḡuy ewiwim, i. ²⁷ Okukukat, obiōḡbuk esuiwat ḡu ce'ū'ūayū dopap pe, i. Wetabut cīcā iboap kay, i. Ēn ojebit iwan ḡu ierepap puxim, ōn xipat exe buye- -ōn ekpot puye dak, i. ²⁸ Okukukat, waram adi ēn omutait, i. Ēn ma'ḡu omukūyjo soat em wetabēḡ oḡuy exe iam, i. Omucokcokcoḡ ece'e soat em exe oḡuy buye, io'e- -o'e Davi Deus a'ōbi — io'e Pedro.

²⁹ — Tapupuyū, ibapuḡ ma juy Davi oḡuwēn eywebe — io'e Pedro jeadipyū be. — Kuyje ma wuy'ajore'ūm oe'ū- -ya'ōbuyxiat'ūm oe'ū. O'jomōḡ ip witabikūy be. Ḡasū dak puk ixe'ūm mōḡapkūy omuy ma. ³⁰ Ixe Deus ekawēn muwēnuwēn'ukat osunuy. “Enaxegebit wemunaēm je'e,” io'e Deus cebe. “Wemunaē soat kukukan je'e- -Israel eipi watwat kukukan,” io'e Deus cebe. Soat em Davi iboap ekawēn kay ḡebum osunuy. ³¹ Itaybit osunuy Deus jemunaē

ġutait ce'ūap tomukadi iam. Imēn Cristo mutaicap o'ġuwēn imutait awap. Imēn o'e:

Deus jemunaē biōġbuk o'suiwat ġu
ce'ū'ūayū dopap pe, i. Ijebit oierap
ġu, i — io'e Pedro.

³² — Deus ixē Jesus waram o'ġutait ce'ūap tomukadi — io'e Pedro. — Waram cetait puje ocejojojo. Imēnpuye oceju iboap muwēnuwēn eywebe — io'e Pedro. ³³ — Deus Jesus o'ġuyu kabi kay- -jenuyap kay. Deus xe Jesus omuy ġasū. Soat kukukan Deus eju. Deus co'i ya'ōbaca. "Obiōġbuk oġuōm itabucayū be," io'e Deus Jesus pe. Ġasū Jesus Ibiōġbuk Xipacat o'ġudot ijodi apēn Deus cuk adi o'e'e iap taġ — io'e Pedro. — Ixē a'ōbi oceju eya'ōm ma kawēnwēn. Imēnpuye eyju eya'ījomom ġasū — io'e Pedro.

³⁴ — Davi'ūm jebit ġu o'jeu kabi kay ce'ū buje. Imēnpuye Davi o'e:

"Oxe juy eġuy," io'e Deus wuykukukat pe, i. ³⁵ "Ġasū bit ekay itakomaayū a'ōbacaap oġu'ūm," io'e, i. "Kūyjobin jedop ip a'ō kay," io'e Deus, io'e Davi ajore wuydobuyū'ūm'ūm pe — io'e Pedro.

— Davi o'jewemuwēn ġu- -Jesus acā o'ġuwēnuwēn — io'e Pedro.

³⁶ — Wa'ō kay bit cuy eya'ōpicūġcūġ epesop — io'e. — Eyju ma ocekkukat Jesus epesubamupayaat korosa be ce'ū ām, Israel naxeġebitbit ma'ġu eyju. Deus pit ixē o'jomuy wuykukukan. Deus ixē o'taē soat taxijo am- -wuydaxijo am. Icēmān ōn e'em eywebe — io'e Pedro.

³⁷ Iboap co buje iġuycūġcūġ cīcā ip o'e.

— Tapupuyū, apēn oce'e ġasū? — io'e ip Pedroyū be- -Jesus emumujuyū be.

³⁸ — Eyġuycūġcūġ cuy epe'e ikērēat kuġ puye — io'e. — Ikērēat mujurūġrūġap cuy epeyepere — io'e Pedro. — Jewemubatisasaan cuy epesop "Ġasu bit Jesus Cristo ebekitkiyū oceju" i'e am soat pe — io'e. — Imēn cuy epe'e Deus pe ikērēat'uk am eywebewi. Imēn ey'e buje Ibiōġbuk Xipacat jeōm eywebe- -Deus emumudot — io'e. ³⁹ — "Obiōġbuk muōm pin ōn ey-

webe," io'e wuykukukat Deus kuy bima — io'e. — "Obiōgbuk oḡuōm eywebe, eyebekitkiyū be dak, eybadip'ūmayū be dak- -soat wemunomuwayū be," io'e Deus — io'e Pedro.

⁴⁰ Pedro imēn ip o'yawēwē.

— Gasūacat ikērēat mujurūḡrūḡ cīcā — io'e. — Imēnpuye Deus xe ḡu ip jeedop ce'ū buje. Eyju bit ixeyū ekukuap puxim ḡu juy epeku — io'e. — Wūy ḡu juy epesop Deus wi eye'ū buje — io'e Pedro. Imēn Pedro ip o'yawēwē.

⁴¹ Imēneju adeayū itabut o'e Jesus kay Pedro Jesus o'ḡuwēn puye. Tak ḡu ip oitabun- -3000 beayū. O'jewemubatisasan ip. Jesus a'ōkayayū eju ip oekuku ḡebuje bit. ⁴² Itabun'isuayū mutaybitbin'uk ip osodop Jesus a'ōkayayū. Jewemukūyjojo'uk ip osodop. Jeburerexi osodop ip itabucayū. Jeweweju ip jekōnkōn'uk osodop. Jekawēnwēn'uk ip osodop Deus eju. Pāo'a o'o'uk osodop ip Jesus e'ūap kay ḡebum am.

⁴³ Jesus emumujuyū Deus a'ōbacaap mubapukpuḡ oekukuku soat etabut pe. Wuymucoatcoanap mubapukpuḡ ip oekukuku. Imēnpuye adeayū itabēḡbēḡ o'e ip ijojom, — Deus acā ya'ōbaca — i'e'em.

⁴⁴ Soat jeburerexi ip osodop Jesus kay itabucayū. Jebubut mu'ē'ē'uk osodop ip jewewebe. ⁴⁵ Ka'ūma ma tacup o'e jebure be. Jebubut taidada'uk ip osodop dinheiro bu am, jeipi dak. Ixe dinheiro ūm-ūm'uk ip osodop tadaybocayū be- -ibubut'ūmayū be. ⁴⁶ Soat kabia Deus eju kawēnwēnap'a be je'aweroro'uk ip osodop- -yaboḡat'a be. Jeweweju ip jekōnkōn'uk osodop jeduk'a be. Awerom jekōnkōn'uk ip osodop jebureyū eju. Imēneju icokcok cīcā ip osodop. Ka'ūma ma jewexe ya'ōca osunuy. Jewekay ḡu ḡebum osodop ip- -jebure kay acā.

⁴⁷ — Ēn xipat cīcā ocewebe — i'e'e'uk ip osodop Deus pe.

Soat itabut'ūmayū xe cūḡ ma ip oekukuku.

Soat kabia Deus warara'acayū o'ḡutabun Jesus kay. Ixeyū dak wara'acayū itabucayū burem o'e.

3 Pedro o'ju Deus eju kawênwênap'a be-
yaboğat'a be. João eju o'ju. Katpujesu ip
o'ju. Ixe ehora bima Judeuyū kawênwên'uk ip oso-
dop Deus eju iğo'a be. ² Ağokatkat iboce osunuy-
taojereat. Jekap'isum piap ma taojere osunuy. Soat
kabia ibureyū tujowatwat'uk ip osodop iğo'a exıntabi
be. Xıntabi butet Idipat i osunuy. Xıntabi be taoje-
reat dinheiro ojuyjuy'uk osunuy iğo'a be ômômayū
be. ³ Ixe taojereat Pedroyū o'jojojo. Iğo'a be ôm pima
o'jojojo ip.

— Dinheiro'in — io'e cebe ip.

⁴ Pedroyū o'jeak cîcā cekay.

— Ak'i juy ece ocekey — Pedro o'e.

⁵ Taojereat o'jeak cîcā cekay ip. Tūybe dinheiro ūm
ip owebe iân o'e.

⁶ Pedro o'jekawên cebe.

— Dinheiro kuğ ğu ôn — io'e. — Okukukat pit
ja'ôbacaap ūmūm owebe. Ixe a'ôbi jemu'ada ôn.
Edaodip ece'e Jesus a'ôbi- -Nazaré ka bewiat a'ôbi.
E'ây — io'e Pedro.

⁷ Ğebye Pedro taojereat pu o'subuijik iba'at ka-
di. O'ğu'ây. Dao ma ikağobidip o'e. Sui dak suidip
o'e. ⁸ Ixe taojere osunuy'ibit o'jejoro. Iccokcok o'e je-
daodip puye. O'jexiğxiğ. Oôm Deus eju kawênwên-
ap'a be Pedroyū eju. O'jecūğcūğ iğo'a be. Jejorojo-
rom o'e jecokcokap pibun.

— Ğn xipat cîcā — i'e'em Deus pe o'jejoro. —
Odaomudim Ğn — i'e'em.

⁹ Soat iğo'a beayū taojere tūibit o'jojojo ip cūğ-
cūğ pima. Deus pe "Ğn xipat cîcā" i'e'em pima, o'-
jojojo ip. O'jekawên ip jewewebe.

¹⁰ — Ixe bit mo a'ğu taojere osunuy — io'e ip.
— Ixe bit xik'i mo a'ğu nuynuy ijop'a exıntabi be-
Idipat pe. Ixe bit mo a'ğu dinheiro ojuyjuy'uk osu-
nuy — io'e ip. — Apēnpuye dak ixe xipat o'jexiğxiğ?
— io'e ip.

Taojere tūibit mu'adaap tobuxik puje itabēğbēğ
o'e ip ijojom. Taojere tūibit ibu'u jîjâ o'e Pedroyū
nomu eperem.

¹¹ Soat iġo'a beayū dak o'jedau ebapūġayū kay- - Pedroyū kay, taojere tūibit kay dak.

— Ak'i! — io'e ip. — Pedroyū taojereat o'taomudim — io'e ip jewewebe.

Pedroyū Deus eju kawēnwēnap'a ekorara be osodop ip- -yaboġat'a ekorara be. Ixe korara butet Salomāo ekorara i osunuy.

¹² Adeayū jo buje, Pedro o'jekawēn cebe ip, Israel naxeġebitbiyū be.

— Tapupuyū, wekawēn kay eya'ōpicūġcūġ cuy epesop — io'e. — Apēnpuye eyju dak eyetabēġbēġ ocejojom? “Ite aġokatkat taojereat o'taomudim ya'ō-baca jījā buye, cūġ ma Deus xe buye,” i te'e ma eyju e'em. Oca'ōbi ġu o'je'ada- -Jesus a'ōbi acā — io'e. ¹³ — Ixe Jesus soat em ma kūyjobit Deus a'ō kay. “Ka'ūmġu ixe jo'iat xipacat” i'e'em Deus Jesus muwēnuwēn. Wuyetabut ixe Deus kay. Wuy'ajojoyū'ūm'ūm tak itabut osodop ip cekay- -Abraão'ūm, Isaque'ūm tak, Jacó'ūm tak. Eyju ma a'ġu ixe Jesus epeġūm cekay itakomaayū be yaoka am. Pilatos ma o'e “Jesus oyaoka ġu ōn pit,” i. “Imujēm ōn eywebe yaokaap puxim,” io'e. Eyju bit “Ixe juy eġujēm ġu,” i mo a'ġu epe'e iecuġap pe- -Pilatos pe. “Xipat ġu teku,” i mo a'ġu epe'e cebe. Jesus mo a'ġu epejo-muymuy jījā. ¹⁴ Ixe Jesus Deus bikuyap taġ acā oekukuku. Ikērēat kuġ ġu osunuy Deus xe. Eyxe bit ikērēat kuġ. “Ixe juy eyaokaat,” i mo a'ġu epe'e Pilatos pe. Wara'acat o'yaoka'iat mujēm ojuy epesop daomūnmūnap'a bewi. ¹⁵ Wuymutaicit'ukat pit mo a'ġu epeyaokaat- -wuymuisusun'ukat. Deus pit ixe o'ġutait waram. Jesus ocejojojo waram cetaiit puje. Imēnpuye oceju waram cetaicap muwēnuwēn eywebe. ¹⁶ Ite taojere osunuyiat cocom eyju. Eyetaybit cīcā ixem. Jesus a'ōbi oceju ocetaomudim. Soat etabutpe ocetaomudim Jesus kay ocetabut puye — io'e.

¹⁷ — Obadipyū, wa'ō kay eya'ōpicūġcūġ cuy epesop — io'e. — Eyju mo a'ġu Jesus epeyaokaat eyetaybit'ūm puye. Wuyeipi kukukayū dak itaybit ġu osodop ip. Eyju mo a'ġu eyetaybit ġu ikērē jījā Jesus aokaam iam. Wetaybit iboam. ¹⁸ Imēnpit kuyje “Deus emunaē juy ipiat supi'ajo,” io'e'e'e Deus ekawēn

muwēnuwēn'ukayū. Imēn cuk adi o'e ip Deus a'ōbi itaybit ġu ma'ġu ip — io'e. — Gasu bit kuy Jesus ipiat o'supi'ajo apēn cuk adi o'e'e ip iap taġ. ¹⁹ Gasū bit eyġuycūġcūġ cuy epesop ikērēat kuġ puye. Ikērēat mujurūġrūġap cuy epeyepere Deus pe ikērēat uk am eywebewi — Pedro o'e. — Eywebe ikērēat mujurūġrūġap epere buje, Deus ikērēat ju'uk eywebewi. Ixe jeydaxijo. ²⁰ Wuybipuruk'ūmap puxim eycokcoġ epesop Deus pe eydaxijo buje. Guyjom Deus waram Jesus ġudot ijodi- -jemunaē ġudot- -wuydaxijojok'ukat ġudot. ²¹ “Deus soat ġuisun,” i juk adi o'e'e Deus ekawēn muwēnuwēn'ukayū kuyje- -ikērēat kuġ'ūmayū. Deus soat ġuisun. Imuisun'ūm pima Jesus kabi be mabuk jeenuy — io'e. ²² — Kuyje Moisés imēn o'e:

Deus wuybadipyū'in ġuju eykay, i. Ixe Deus ekawēn ġuwēn eywebe, i. Omudocap puxim ixe aġokatkat ġudot, i. Eya'ōpicūġcūġ cuy epesop soat ceka-wēn kay, i. Ixe a'ō daġ cuy epeku, i. ²³ Deus ipiat supi'ajoat ixe a'ōkay'ūmayū be, i. Deus ebekitkiyū wi wūy ma jeedop ip ce'ū buje, i.

Imēn Moisés o'jekawēn kuyje — Pedro o'e. ²⁴ — “Deus emunaē omuyku- -ocebodi ma ya'ōbuyxiat,” i juk adi o'e'e ip soat Deus ekawēn muwēnuwēn'ukayū. Samuel imēn o'e'e tomujuayū dak. ²⁵ Deus o'e Abraão be “Xipacat oġūm soat ipi juacat pe, enaxeġebitbit cūġ ma oxe buye,” i. Deus imēn jekawēn o'ġuwēn eydobuyū'ūm'ūm pe ā ġu- -eywebe dak. Deus je'e eywebe apēn cuk adi o'e'e jekawēn muwēnuwēn'ukayū be iap taġ — io'e. ²⁶ — Ġebuje Deus jekpot o'ġudot eykay- -ja'ō kay kūyjobicat o'ġudot. Ibikuy osunuy eywebe ikērēat mujurūġrūġap epere am. Ibikuy osunuy xipacat ūm ām eywebe. Imēneju jekpot o'ġudot eykay — io'e.

Pedro imēn Israel naxeġebitbit o'ġukūyjo.

4 Deus eju kawēnwēnap'a beayū mukūyjojom pima, Judeuyū epaiyū oajēm Pedroyū kay. Igo'a wiwi'ukayū kukat tak oajēm cekay ip, Saduceuyū dak. ² Pedroyū kawēnwēn mabuk o'e igo'a beayū be.

— Wuye'ū buje waram acejetait Jesus waram o'jetait je'ūap tomukadi buye — io'e ip cebe ip.

Itakoma ip o'e Pedroyū kay iboam igo'a beayū mukūyjojom puye. ³ Imēnpuye o'jat ip. Daomūnmūnap'a be ip o'guōm. Ixe exima be jeperem ojuy ip daomūnmūnap'a be, kuy katpuje jījā buye. ⁴ Ceka-wēn cocoayū dak itabut o'e ip Jesus kay. Ade jījā ip itabut o'e. 5000 be aḡokatkayū oitabun.

⁵ Kuyaje o'je'awero ip Jerusalēm ka be ya'ōbuy-xiayū, Judeuyū kukukayū, Moisés ekawēn imutaybitbin'ukayū dak. Jewawēwē'ukayū yoboḡayū ip osodop. ⁶ Ana dak oajēm. Ixe Judeuyū epaiyū kukukat osunuy. Caifás tak oajēm, Alexandre dak, João dak. Warara'acayū dak oajēm paīyū kukukat badipyū. Soat ip o'je'awero. ⁷ Pedroyū o'tojocat ip jewekay.

— Abu-a'ōbi taojere tūibit epeḡu'ada? — io'e ip Pedroyū be. — Abu-a'ōbacaam epeḡu'ada? — io'e ip cebe ip.

⁸ Ḡebuje Pedro o'jede jewawēwē'ukayū yoboḡayū be. Deus biōḡbuk cebe jījā osunuy. Imēnpuye ya'ōbacaam o'jede cebe ip -Judeuyū kukukayū be.

⁹ — Tapupuyū — io'e. — “Abu-a'ōbi taojere tūibit epeḡu'ada?” i eyju e'em ocewebe, “Apēntak ixe epeḡu'ada?” i dak — io'e. ¹⁰ — Eyetaybin cuy epe-sop Jesus Cristo a'ōbi o'je'ada iam -Nazaré ka bewiat o'je'ada iam. Ixe xipat omuy eyetabutpe ḡasū, Jesus Cristo a'ōbi o'je'ada buye. Eyju ma juk ixe Jesus epesubamupayaat korosa be ce'ū ām. Deus pit ixe o'ḡutait waram. O'ḡuyu ce'ū'ūayū dopap pewi. Jesus a'ōbi ma ite taojere tūibit xipat cūḡ'i ijoce ḡasū. ¹¹ Imēn e'em Deus ekawēntup pe:

Uk'a muymuy'ukayū ite'a kay ḡu
osodop ip -wita'a kay ḡu, i. Ite'a bit
uk'a muycemap'am o'e, i.

Jesus muwēnuwēn iḡodup — io'e Pedro. — Uk'a

muymuy'ukayū ite'a kay'ūmap puxim eyju dak Jesus kay ġu — io'e. ¹² — Deus Jesus acā o'ġudot wuydaxijo am. Ka'ūmġu wara'at wuydaxijojo'ukat soat kaka daġ- -Jesus acā — Pedro o'e.

Pedro imēn Judeuyū kukukayū o'ġukūyjojo- -jewawēwē'ukayū yoboġayū. ¹³ Ja'ōca o'jede ip Pedroyū. Iparara ġu ip o'e Judeuyū kukukayū buxim. Ya'ōca o'e ip. Imēnpuye Judeuyū kukayū itabēġbēġ o'e ip ijojom.

— Apēn tak iteyū oitaybitbin? — io'e ip. — Itaybit ġu ip apēn Deus ekawēntup e'em iam. Ya'ōbuyxi ġu ip. Apēnpuye dak iteyū xepxepayū iparara ġu wuybuxim? — io'e ip.

Itaybit o'e ip Jesus eju oekuku ip iam.

¹⁴ Imēntak taojere tūibit ceparakpe ip cūġ'i osunuy. Imēnpuye Pedroyū imuymuy ba'ore o'e ip cebe.

¹⁵ Pedroyū o'ġujēm ip jexewi.

— Epejēm cuy ijocewi ġasū bit — io'e ip Pedroyū be.

Imujēm puje ip o'jewawē ip jeweweju.

¹⁶ — Apēntak ace'e iteyū aġokatkayū be? — io'e ip jewewebe. — Icēmān wuywebe i'e ba'oreat o'ġubapuk ip — io'e ip. — Soat Jerusalēm ka watwat itaybit taojere tūibit o'ġu'ada ip iam. “O'ġu'ada ġu ip” i'e ba'ore wuywebe. ¹⁷ Jesus awēġ jawēġepōġpōġpōġ je'e soat ka daġ — io'e ip. — Apēntak ace'e yawēġmupōġpōġ'ūm ām? — io'e ip jewewebe. — “Jesus cuy epeġuwēn ġu warara'acat pe,” i juy ace cebe ip wuya'ōpuruġ — io'e ip. — “Waram warara'acayū be Jesus muwēn puje, ipiat cuy ocesupi'ajoat eywebe,” i juy ace cebe ip — io'e ip jewewebe.

¹⁸ Ġebuje waram Pedroyū o'tojocat ip jewekay. Ya'ōpuruġ o'jekawēn ip ceweju ip.

— Jesus cuy epeġuwēn ġu warara'acat pe — io'e ip. — Waram cuy epeġuwēn ġu cekawēn — io'e ip Pedroyū be.

¹⁹ — Apēntak cedaġ eyxe? — io'e Pedroyū bit cebe ip. — Eya'ō kay du oce'e? Deus a'ō kay ġu xe'e? Apēn ġu cedaġ eyxe? — io'e ip. ²⁰ — Mūġ ġu juy ocesop. Jesus cuy oceġuwēn. Jesus ocejojojo ce'ūap tomukadi — io'e. — Jesus emumutaybitbin-

am cuk adi ocejekūyjojo — io'e. — Imēnpuye cedaḡ ḡu ocewebe imuwēn'ūm ām warara'acat pe. Mūḡ ḡu ocesop. Ixe juy aḡuwēn — io'e Pedroyū.

²¹ - ²² Taojere tūibit ade koato osunuy-40 koato. Imēnpuye jewawēwē'ukayū yoboḡayū ipiat o'supi'ajoat ḡu Pedroyū be.

— Ēn xipat cīcā — i'e'em o'e ip Deus pe adeayū, taojere tūibit o'je'ada buye. Imēnpuye:

— Pedroyū be ipiat'ajoan pima, kuka oitakomān ocekey adeayū — io'e ip jewewebe jewawēwē'ukayū yoboḡayū.

Pedroyū bit waram o'ḡujēm jexewi ip.

— Jesus cuy epeḡuwēn ḡu warara'acat pe — io'e ip Pedroyū be. — Jesus muwēn puje, ipiat cuy oce-supi'ajoat eywebe — io'e ip waram Pedroyū be.

²³ Pedroyū o'ju jebureyū kay-itabucayū kay. Apēn cuk ya'ōpuruḡ paīyū kukukayū o'jekawēn cebe ip iap o'ḡuwēn cebe ip, apēn Judeuyū kukukayū o'jekawēn cebe ip iap tak.

²⁴ Iboap co buje soat Jesus a'ōkayayū o'jekawēn ip Deus eju.

— Ocekukukat — io'e ip. — Soat muḡēat ēn. Kabi eḡuḡē, ipi dak, idibi dak, tiboḡ cīcāati dak — io'e ip. — Soat kaka daḡat tak eḡuḡē — io'e ip. ²⁶ — A'ōkay osunuy kuyje Davi ajore — io'e ip Deus pe. — A'ōmuwēnuwēn'uk osunuy. Jekawēnwēn'uk osunuy Ibiōḡbuk Xipacat a'ōbi. Ixe imēn o'e kuyje:

Apēnpuye dak Judeu'ūmayū itakoma jījā o'e ip? i. Apēnpuye dak te'e ma ixe aoka ojuy ip osodop? i. ²⁶ Ipi kukukayū o'je'awero ip soat ka kukukayū eju -ya'ōbuyxiayū eju, i. O'je'awero ip wuykukukat Cristo aoka am-emunaē aoka am, i.

Imēn Davi o'e kuyje — io'e ip Deus pe. ²⁷ — Ibo dup ekawēn taḡ ḡasū dak o'je'awero ip ijopka be — io'e ip. — Herodes o'je'awero Pōncio Pilatos eju, Judeu'ūmayū dak, Judeuyū dak — io'e ip Deus pe. — O'je'awero ip ekpot aoka am-Jesus aoka am-soat taḡ iisuat aoka am-a'ō kay kūyjobicat aoka am-

wuydaxijo am emunaē aoka am — io'e ip. ²⁸ — Ixeyū Judeu'ūmayū itaybit ġu Moisés ekawēn. Imēnpit apēn kuyje juk adi ecece iap taġ e'em ip — io'e ip Deus pe.

²⁹ — Bay, aġ cuy eġuy ocekey — io'e ip Deus pe. — Jewawēwē'ukayū yoboġayū itakoma jġjā ocekey — io'e ip. — Ipiatpi'ajoat pin ip ocewebe — io'e ip. — Oceju ebekitkiyū. Imēnpuye ocebuywan cuy eġuy — io'e ip. — Oca'ōmucanucan cuy eġuy ocepara-ra'ūm ma kawēn idipat muwēn ām soat ka daġ — io'e ip Deus pe. ³⁰ — A'ōbacaap cuy eġūm ocewebe a'ōbi iwātaxipiyayū mu'ada am — io'e ip. — A'ōbacaap cuy eġūm ocewebe i'e ba'oreat mubapuk am soat etabutpe Jesus a'ōbi-ekpot a'ōbi-soat taġ iisuat a'ōbi- -a'ō kay kūyjobicat a'ōbi — io'e ip Deus pe.

Imēn o'jekawēn ip Deus eju. ³¹ Je'aweroroap'a o'jeaxixi ceweju cekawēn epere buje. Ibiōġbuk Xipacat osodot soat kay ip. Ixe Ibiōġbuk Xipacat oōm soat pe ixeyū be. Imēnpuye ip iparara'ūm cġcā oekuku Deus ekawēn muwēnuwēn soat itaybit'ūmayū be.

³² Soat Jesus kay itabucayū xipan ip o'e jewewe-kuġ. Ade jġjā ip osodop. Pūġ taġ ma ip jewaġuyġuy osodop.

— Ijop owebeam acā — i'ūmġu o'e ip. Tacup ġu ip osodop jewewebe. Soat ip jebubut mu'ē'ē'ē'uk osodop. ³³ Soat Jesus emumujuyū “Ocekukukat Jesus waram o'jetait je'ūap tomukadi,” i'e'e'uk osodop soat pe. Deus xipacat o'ġūmġūm soat pe ixeyū be. ³⁴ Ka'ūmġu tadaybocat o'e ceparakpe ip ka'ūmān ma tacup puye. Ipi kukayū jeipi o'teida dinheiro bu am. Jeduk'a dak o'teida ip dinheiro bu am. Teiūmūm'uk ip osodop Jesus emumujuyū be- -doze beayū be. ³⁵ Ixe dinheiro mu'ē'ē'ē'uk ip osodop tadaybotbocayū be.

³⁶ Ġejuje José dinheiro o'ġūm Jesus emumujuyū be. José jeipi kuġ osunuy. Jesus emumujuyū wara'at o'jomōġ ibuten. Wara'at ibutet Barnabé i osunuy. Barnabé wuya'ōmucanucan'ukat iape. Ixe Levi badip osunuy. Tip'aroro bewiat osunuy- -Chipre eipi bewiat.

Ixe jeipi kuḡ osunuy. ³⁷ Jeipi o'teida dinheiro bu am. José ma soat ixē edinheiro o'ḡũm Jesus emumujuyũ be- -Pedroyũ be.

5 Ananias pit te'e ma Deus muḡuykuku ojuy o'e. Ixe Jesus kay itabut osunuy. Itayxi bu-tet Safira i osunuy. Dinheiro o'jat. Ananias jeipi o'teida ixē dinheiro bu am. ² I'in o'ḡuxipan jewebeam. Itayxi itaybit o'e i'in o'ḡuxipan jewebeam iam. Soat ḡu jedinheiro o'tujowat Pedroyũ be iũm âm. I'in â o'tujowat.

— Juku — io'e Pedroyũ be. — Weipi dei. Soat tei — i napa ma o'e cebe ip.

³ Gebuje Pedro ya'õpuruḡ o'jede cebe.

— Ananias — io'e. — Satanás a'õ kay ên ḡasũ — io'e. — Apênpuye Deus biõḡbuk muḡuykuku ojuy ên? — io'e. — Apênpuye eipi dei'in eḡuxipan ewe-beam? — io'e. ⁴ — Koap pit a'ḡu eipin ma osodop. Eipi dei ũmũm pima, xipat kuka o'e. Iũmũm'ũm pima dak xipat kuka o'e — io'e. — Ka'ũma ma o'e ewebe "Eipi juy eteida dinheiro bu am," i — io'e. — Apênpuye dak ikêrêat eḡujurũḡ? Ocemuḡuykuku ojuy ḡu ên. Deus muḡuykuku ojuy acâ ên — io'e Pedro. — Ocewebe ḡu ên napa e'em- -Deus pe acâ — io'e Pedro.

⁵ Ananias dao ma oe'ũ iboap co buje. Poḡ. Imên-puye ce'ũap awêḡ tobuxikayũ iparara jĩjã ip o'e Deus muḡuykukuap puxim.

⁶ Aḡokatkayũ oajêm yaypan'isuayũ. Ananias'ũm o'ḡuekabek ip paḡõm. O'tujowat ip ibocewi. O'jomõḡ ip witabikũy be jebabim.

⁷ Ananias'ũm kot isum Safira oajêm Pedro kay- -ebapũḡ ehora kap puje- -Ananias'ũm tayxibuk. Itay-bit ḡu mabuk osunuy jektop'ũm oe'ũ iam.

⁸ — Bũrũnmaku du eipi dei osodop? — Pedro o'e Safira be. — Ektop o'e iat tei jo'i ma du ijop? — io'e.

— Hm hm. Ibo jo'in ma ipi dei — io'e napa ma Safira.

⁹ — Apēnpuye dak mo a'ḡu ikērēat epeḡujurūḡ?
— Pedro o'e. — Apēnpuye dak eyju te'e ma mo
a'ḡu Deus biōḡbuk muḡuykuku ojuy? Imēn mo a'ḡu
epeyewawē eyeweweju. Ak'i juy ece — io'e. — Wita-
bikūy be ektop'ūm o'jomōḡ'iaiyū omuyku ijoce —
io'e. — Omuyku ip uk'a exīntabi be — io'e. — Ḡasū
ip jedujowat tak — io'e.

¹⁰ Ḡebuje'isum ma Safira dak oe'ū. Poḡ. Ce'ū
o'at Pedro i xe.

Ḡebuje yaypan'isuayū oajēm waram. Ce'ūat o'jo-
jojo ip. O'tujujēm ip. O'jomōḡ ip witabikūy be
itop'ūm xe. ¹¹ Soat Jesus kay itabucayū o'jekūyjo
Ananias'ūm e'ūām, Safira'ūm e'ūām tak. Warara'a-
cayū dak ixeyū'ūm'ūm e'ūām o'jekūyjo ip. Imēnpuye
iparara jījā ip o'e Deus xe ikērēat mujurūḡap puxim.
Ibu'u o'e ip ikērēat mujurūḡ ām.

¹²⁻¹⁴ Soat Jesus emumujuyū je'aweroro'uk ip oso-
dop Deus eju kawēnwēnap'a ekorara be -yaboḡat'a
ekorara be. Ijop ekorara butet Salomāo ekorara i osu-
nuy. Jesus ebekitkit cūḡ ma oekuku ip soat xe. Ade
jījā itabut o'e ip wuykukukat Jesus kay- -aḡokatkayū,
aoyū dak. Warara'acayū iparara o'e ip Jesus kay je-
tabut am. Imēnpuye o'je'awero ḡu ip Jesus ebekitkit
eju. Wuywebe i'e ba'oreat mubapukpuḡ ip oekuku
Jesus emumujuyū. Ajojojo ḡu buk iap mubapukpuḡ
oekuku ip Deus a'ōbi. Adeayū etabutpe Deus a'ōba-
caap mubapukpuḡ ip oekuku.

¹⁵ Ḡebuje ade iwātaxipipiyū o'tujowat ip uk'a
ukpibubu daḡ. Iboce iwātaxipipiyū o'jomōḡ ip jexe-
xecap pe, jedipidup ceje dak. Jebureyū iwātaxipi-
piayū o'jomōḡ ip Pedro kapap pe. Iwātaxipipiyū o'-
jomōḡ ip Pedro ekabicuk pe imu'ada am. ¹⁶ Ade o'-
jēm ip Jerusalēm ka tēḡatka bewi. Iwātaxipipiyū o'-
tujowat ip Pedro kapap pe. Soat ip o'ḡu'ada'ada.
Ibiōḡbuk kērēat kukayū dak o'tujowat ip. Ibiōḡbuk
kērēat o'ḡujēmjēm. Xipat o'e ip -soat.

¹⁷ Judeuyū epaiyū kukukat pit itabutkarey o'e
Jesus emumujuyū kay. Paiyū kukukat ejuayū dak
itabutkarey o'e ip cekay ip -Saduceuyū. Jesus emu-

mujuyū o'taomūnat ip. ¹⁸ Daomūnmūnap'a be ip o'ḡuōmat. O'ḡuōmat ip ikērēat mujurūḡrūḡ'ukayū eju ikērēat mujurūḡrūḡ ḡu ma'ḡu ip.

¹⁹ Ibocewi Deus ekawēn tojtjt'ukat oajēm daomūnmūnap'a be Jesus emumujuyū kay. Ixima be oajēm. Xīntabi o'tomudip'uk- -yoboḡat- -ipoxiat. Jesus emumujuyū o'tujujēm iḡo'a bewi.

Tujujēm puje o'jekawēn ceweju ip.

²⁰ — Deus eju kawēnwēnap'a be juy epeju- -yaboḡat'a be — io'e Jesus emumujuyū be. — Jesus kayayū yaḡuyisum jekukum iam cuy iḡo'a beayū epeḡukūyjo. Soat em Deus xe jeedop ip je'ū buje iam cuy ip epeḡukūyjo. Soan cuy ip epeḡukūyjo — io'e cebe ip.

— Imēn cuy oce'e — io'e ip.

²¹ Deus tojtjt'ukat ekawēn co buje Jesus emumujuyū kawēn idipat o'ḡuwēn yaboḡat'a beayū be.

— Jesus kayayū yaḡuyisum jekukum — io'e ip imukūyjojom.

O'ju ip Deus eju kawēnwēnap'a be- -yaboḡat'a be. Kabia'isum ip o'ju. Kawēn idipan ip iḡo'a beayū o'ḡukūyjojo.

Iboam e'em pima jewawēwē'ukayū yoboḡayū te'e ma Jesus emumujuyū o'ḡudocat jewekay daomūnmūnap'a bewi. Tūybe daomūnmūnap'a be ma ip o-pop iān o'e ip. Paīyū kukukat o'je'awero jebureyū eju. Judeuyū kukukayū o'tomuwā je'awero am- -Israel naxeḡebitbit kukukayū, aypapayū dak. Ixeyū aḡokatkayū jewawēwē'ukayū yoboḡayū ip osodop.

— Jesus emumujuyū juy epeḡujēm daomūnmūnap'a bewi — io'e ip te'e ma Deus eju kawēnwēnap'a wiwi'ukayū be. — Epetojot ip oce kay — io'e ip te'e ma.

²² Deus eju kawēnwēnap'a wiwi'ukayū o'ju daomūnmūnap'a be. Jesus emumujuyū o'tobuxik ḡu ip. O'jepit ip paīyū kukukat pe. Te'e ma o'ju ip Deus eju kawēnwēnap'a wiwi'ukayū.

²³ — Daomūnmūnap'a be ḡu ip Jesus emumujuyū — io'e ip. — Daomūnmūnap'a exīntabi cem cīcā ocetobuxik — io'e ip. — Yawiwim mabuk ip osodop yawiwi'ukayū. Kacūḡcūḡ'i osodop ip xīntabi-

xixi weḡūn. Ocetomudip'uk. Ka'ūma ma ocetobuxik badi. Jesus emumujuyū ocetobuxik ḡu — io'e ip ika kukukayū be- -jewawēwē'ukayū yoboḡayū be.

²⁴ Iboap co buje yaḡuy'ūm o'e ip jewawēwē'ukayū yoboḡayū, paīyū kukukayū dak, Deus eju kawēnwēnap'a wiwi'ukayū kukukat tak, warara'acayū dak paīyū yoboḡayū.

— Apēn o'jebapuk cebe ip? — io'e ip jewewebe. — Apēntak ace'e ḡasū? — io'e ip. — O'jēm ip iap awēḡ jeawēḡepōḡpōḡ soat ka daḡ — io'e ip.

²⁵ Aḡokatkat tak oajēm.

— Eya'ōpicūḡcūḡ cuy epesop wa'ō kay — io'e. — Epetaomūnmūn'iaiyū Deus eju kawēnwēnap'a be- -yaboḡat'a be opop ip. Iḡo'a beayū mutaybitbin ip — io'e jewawēwē'ukayū yoboḡayū be.

²⁶ Deus eju kawēnwēnap'a wiwi'ukayū kukukat o'ju Deus eju kawēnwēnap'a be Jesus emumujuyū kay. O'ju jebekitkit eju- -yawiwī'ukayū eju. Waram ḡuto Jesus emumujuyū o'taomūn ip. Imēnpit iparara ip o'e adeayū be jaokaap puxim.

— Ocejū warēmtaḡ iteyū kuḡ pima, adeayū kuka ocabuḡbuḡ iteyū kay jijā ip puye — io'e ip jewewebe. Imēnpuye xipan ip o'jukuk taomūnmūn pima. ²⁷ Waram Jesus emumujuyū o'tujowat ip jewawēwē'ukayū yoboḡayū be.

Gebuje paīyū kukukat o'jekawēn Jesus emumujuyū eju.

²⁸ — Kuy mo a'ḡu oca'ōpuruḡ oce'e eywebe “Jesus cuy epeḡuwēn ḡu warara'acat pe,” i — io'e. — Eyju bit kūyjobit ḡu oca'ō kay — io'e. — Soat Jerusalém ka watwat mutaybitbin eyju. “Jewawēwē'ukayū yoboḡayū Jesus o'yaokaat,” i'e'em eyju napa ma — io'e.

²⁹ Gebuje Pedroyū o'jede cebe ip.

— Deus a'ō kay juy oceju kūyjobit — io'e. — Ocewebe iwarum ey'e buje eya'ō kay ḡu oce'e Deus a'ō kay acā — io'e. ³⁰ — Eyju ma Jesus epesubamupayaat korosa be. Eyju ma epeyaokaat — io'e. — Deus pit waram ixē o'ḡutait ce'ūap tomukadi. Wuydobuyū'ūm'ūm tak itabut osodop ip Deus kay — io'e. ³¹ — Deus a'ōbi ixē ya'ōbuyxian o'e ḡasū. Imēn-

puye Deus xe omuy ġasū. Wuykukukan o'e Deus a'ō-bi. Wuydaxijojo'ukan o'e Deus a'ōbi. Deus ibikuy osunuy Israel naxeġebitbit pe iġuycūġ i'e am ikērēat kuġ puye. Ibikuy osunuy ikērēat mujurūgrūġap epere am cebe ip. Ibikuy osunuy ikērēat uk am cebewi ip. Imēnpuye Jesus wuydaxijojo'ukan o'e Deus a'ōbi. Oceju dak ocetaybit apēn Deus cuk adi o'e'e iam — io'e. ³² — Imēnpuye oceju ixē e'eap muwēnuwēn eywebe. Ibiōġbuk Xipacat tak iboap muwēnuwēn. Deus jebiōġbuk muōmōm ja'ōkayayū be — Pedro o'e.

³³ Iboap co buje jewawēwē'ukayū yoboġayū itakoma jījā o'e ip Jesus emumujuyū kay. Yaokaat ojuy ip.

³⁴ Ġebuje aġokatkat o'āy- jewawēwē'ukat yoboġat. O'jekawēn jebureyū eju. Ixe Fariseu osunuy. Moisés ekawēn imutaybitbin'uk ip osodop Fariseuyū. Ixe butet Gamaliel i osunuy. Ya'ōbuyxi jījā osunuy soat xe jeka watwat xe. Imēn o'jekawēn jebureyū be.

— Tapupuyū — io'e. — Koam puk ip aġujēm — io'e. — Ga'a acewawē — io'e.

Jesus emumujuyū o'ġujēm ip jewawēwēap'a bewi. ³⁵ Gamaliel jebureyū o'yawē.

— Israel naxeġebitbiyū — io'e. — Eya'ōpicūġcūġ cuy epesop wa'ō kay — io'e. — Eyday'em'um cuy epesop! Xipan cuy iteyū aġokatkayū epejukuk. Eyaġuysan cuy epesop — io'e. ³⁶ — Kuy'ūm'ūm ma wara'at aġokatkat osunuy. Ibutet Teudas i osunuy. "Soat podi ma wa'ōbuyxi," i napa ma o'e'e warara'acat pe. Adeayū ceweju oekuku ip-400 beayū. Imēnpit wara'acat ixē Teudas o'yaoka. O'jepōġpōġpōġ ixē a'ō kayayū. Soat oi'ūm ixē ekapikap — io'e.

³⁷ — Ġebuje wara'at aġokatkat tak osunuy. Ibutet Judas i osunuy. Galiléia eipi bewiat osunuy. Wuyeipi kukayū jebekitkiyū o'ġuweġūn ixeyū kabia daġ. Ade oeku ip ixē Judas eju. Ixe Judas'ūm tak oe'ū. O'jepōġpōġpōġ ip ixē a'ō kayayū. Soat oi'ūm ixē ekapikap — io'e.

³⁸ — Ġasū dak imēn ma. Ka'ūmā ma juy ace'e iteyū aġokatkayū be. Ijodiat a'ōbi jekukum pima, soat iteyū e'eap tak i'ūm. ³⁹ Deus a'ōbi jekukum pima bit, iteyū e'eap mu'ūm pa'ore wuywebe —

io'e. — Iteyū e'eap mu'ūm pin pima, Deus eju kuka jewaokakam ace — io'e Gamaliel.

Gamaliel ekawēn kay o'e ip jewawēwē'ukayū yoboğayū. ⁴⁰ Waram Jesus emumujuyū o'ğudocat ip. Sorarayū be ip o'yukxabiokakaat ixee muğēğēm.

— Jesus cuy epeğuwēn ğu warara'acat pe — io'e ip cebe ip.

Waram o'ğujēm ip jexewi.

⁴¹ Ibocewi Jesus emumujuyū o'jēm jewawēwē'ukayū yoboğayū xewi. Icockok cīcā o'jēm ip.

— Deus xe oceukupin cīcā — io'e ip jewewebe. — Cedağ Deus xe ixeyū ağokatkayū be oce'ukxabiokakaan. Ipiat ocesupi'ajo Jesus kay ocetabut puye — io'e ip.

⁴² Jesus o'ğuwēnuwēn ip adeayū be. “Jesus wuydaxijo am Deus emunaē,” i'e'e'uk osodop ip. Soat kabia Deus eju kawēnwēnap'a be imutaybitbin'uk osodop ip, jeduk'a be dak.

6 Pūğpūğ itabucayū'in o'jemāmāmā ip jebureyū kay. Jesus kayayū biğ ma oiacoğ. Soat ip Judeuyū osodop. Grego a'ōm kawēnwēn'uk osodop ip pūğpūğ ixeyū'in. Hebraico a'ōm kawēnwēn'uk osodop ip warara'acayū. Ixeyū parakpe osodop ip itop'ūm e'ū'ibiyū tadaybotbocayū. Imēnpuye pūğpūğ itabucayū'in o'jemāmāmā ip jebureyū kay.

— Ocexat ūmūm ğu ip ocewebe — io'e ip aoyū itop'ūm e'ū'ibiyū. — Jewewebe acā ip imu'ē'ē'ēm — io'e ip.

— Dapxi eyju! Eywebe dak oceju iūmūm! — io'e ip warara'acayū bit.

² Imēnpuye Jesus emumujuyū soat itabucayū o'tomuwā je'awero am. O'je'awero ip. Doze beayū o'jekawēn warara'acayū eju- -Jesus kay itabucayū eju.

— Oceju Deus ekawēn muwēnuwēn — io'e ip. — Ibo ma ocekapikap — io'e ip. — Xipat ğu ocewebe Deus ekawēn muwēnap epere am itop'ūm e'ū'ibiyū xat mu'ē'ē ām — io'e ip. ³ — Imēnpuye, tapupuyū,

7 be aḡokatkayū'in ataē ixat mu'ē'ē ām itop e'ū'i-biyū be — io'e ip. — Wuybadipyū'in cuy ataē-itabut cīcāayū- -itaybit cīcāayū- -Deus biōḡbuk a'ōkay jījāayū — io'e. — Ibiayū ma ataē — io'e. — Ijop ocekapikap oceḡūm taē'ibiyū be. Ixeyū ma itop e'ū'i-biyū xat ḡu'ē'ē'ē — io'e ip. ⁴ — Ocejū bit soat em Deus eju kawēnwēn'uk ocesop — io'e. — Soat em ixē ekawēn imutaybitbin oceku — io'e ip.

⁵ Doze beayū ekawēn kay o'e ip soat itabucayū. Cekawēn taḡ e ojuy ip.

Ḡebuḡe Jesus kay itabucayū 7 beayū o'taē. Ibūrū ma ibutet osodop ip- -taē'ibiyū butet: Estēvão i, Filipe i, Prócoro i, Nicanor i, Timom i, Pármenas i, Nicolau i. Estēvão Deus kay itabut cīcāat osunuy. Deus biōḡbuk a'ō daḡ jekuku'uk osunuy. Nicolau Antioquia ka bewiat osunuy. Judeu ḡu osunuy. Deus kay Judeuyū etabucap puxim pit itabut osunuy. Ibūrū ma ip osodop taē'ibiyū.

⁶ Jesus kay itabucayū ixeyū 7 beayū o'tujowat Jesus emumujuyū kay- -doze beayū kay. Jesus emumujuyū o'jekawēn Deus eju ixeyū beam- -7 beayū beam. O'jewebumōḡ ip yabi jeje.

— Iteyū juy ixat ḡu'ē'ē'ē itop e'ū'ibiyū be — io'e ip soat a'ōpiju.

⁷ Imēneju adeayū oitabun ip Jesus kay. Deus a'ō kay oitabun ip. Deus ekawēn taḡ oekuku ip. Ade jījā Jerusalém ka beayū itabut o'e ip Jesus kay, ade Judeuyū epaīyū dak.

⁸ Estēvão wuywebe i'e ba'oreat mubapukpuḡ oeku Deus a'ōbi. Adeayū o'ḡucoatcoan Deus a'ōba-caap kuḡ puye. Deus Estēvão buywatwan osunuy. ⁹ Pūḡpūḡayū bit Estēvão o'jomuymuy jījā Judeuyū'in. Ixeyū Judeuyū je'aweroro'uk ip osodop je'awero-roap'a be- -Deus eju kawēnwēnap'a be. Ce'awero-roap'a butet jekupinap taḡ jekuku'ukayū e'aweroro-ap'a i osunuy. Cirene ka bewi osodop ip ixeyū Judeuyū, Alexandria ka bewi dak. Cilícia eipi bewi ip osodop, Ásia eipi bewi dak. Estēvão a'ōxik o'e ip iḡo'a be. ¹⁰ Deus biōḡbuk pit Estēvão mukūyjojom osunuy. Imēnpuye ya'ōxik pa'ore ip osodop. ¹¹ Imēn-

puye ya'ōxik ojuyayū dinheiro o'ḡūm warara'acat pe napaap muwēḡapteim- -Estêvão awēḡ mukêrêrēnap-teim.

— “Estêvão cūḡ'ūma wuybadipyū mutaybitbin,” i juy epe'e napa ma — io'e. — “Estêvão Deus muymuy,” i juy epe'e napa ma — io'e ip cebe ip.

¹² Imēnpuye ixeyū napapa'ukayū Estêvão awēḡ o'yawēḡmukêrêrēn soat a'ōpiju. Ya'ōxik ojuyayū adeayū o'ḡutakomān Estêvão kay. Judeuyū kukukayū o'ḡutakomān ip, Moisés ekawēn imutaybitbin'ukayū dak.

Soat ixeyū o'ju Estêvão kay. Estêvão o'jat ip. O'tujowat ip jewawēwē'ukayū yoboḡayū etabutpe. ¹³ Napapa'ukayū dak o'tujowat ip. Estêvão a'ō o'ya'ōdada jījā ip.

— Soat em teku Deus eju kawēnwēnap'a muymuy- -ikêrēat kuḡ ḡu iat'a muymuy — io'e ip napa ma. — Soat em teku Moisés ekawēn mupubutbun — io'e ip napa ma. ¹⁴ — Cekawēn cuk adi oceya'ījojo! “Jesus Deus eju kawēnwēnap'a ḡu'ūm yaboḡat'a. Nazaré ka bewiat iḡo'a ḡu'ūm,” io'e ite napa ma — io'e ip napa ma. — “Moisés wuyawēwēap ekawēn ḡuwarurun,” i juk adi o'e'e — io'e ip napa ma.

Estêvão a'ō o'ya'ōdada jījā ip.

¹⁵ Jewawēwē'ukayū yoboḡayū o'jeak Estêvão kay ḡebuḡe bit. Estêvão dopa Deus ekawēn tojotjot'ukat topa jo'i o'e. Imēn o'jojojo ip jewawēwēap'a beayū.

7 — Icēm tu ixeyū e'em? — io'e paīyū kukukat Estêvão be.

² Estêvão o'jekawēn iboceayū be. Apēn Deus xipan je'ajojoyū'ūm'ūm kukuḡ osunuy iap o'ḡuwēn cebe ip.

— Okotkotyū, owaḡoḡoyū, baybayū, wa'ō kay juy epesop — io'e. — Deus soat podi ma ya'ōbuyxi — io'e. — Soat podi ma idip — io'e. — Ixe o'jebapuk wuydobu'ūm kay- -Abraão'ūm kay kuyje. O'jebapuk

cekay Mesopotâmia eipi be bima. O'jebapuk cekay Harâ ka be ajêm awap. ³“Ejêm cuy eka bewi, ebadipyū xewi,” i mo a'ġu o'e Abraão be Deus. “Ekam osukamubapuk'iat ka be juy eju,” i mo a'ġu o'e. ⁴Imēnpuye Abraão o'jêm jeipi bewi- -Mesopotâmia eipi bewi- -Caldéia eipi bewi. Hará ka kay o'ju jenuy âm — Estêvão o'e.

— Guyjom Abraão ebay'ūm oe'ū. Ce'ū buje Deus Abraão o'ġudot ijop ipi kay- -wuyeipi kay. ⁵Deus ipi o'ġūm ġu Abraão be. Yopīt tak o'ġūm ġu ipi. Imēnpit “Soat ijop ipi eipim je'e,” i mo a'ġu o'e Deus Abraão be. “E'ū buje enaxeġebitbit eipim je'e,” io'e. Deus iboam o'e Abraão be ipotpet'ūm pima — io'e.

⁶— Deus imēn o'jekawēn Abraão eju. Deus o'e cebe:

Obure, warara'acat eipi be jeedop ip enaxeġebitbit, i. 400 koato jeedop ip iboce, i. Iboceayū warēmtaġ cīcā enaxeġebitbit jukuk, i. Enaxeġebitbit ġudadaybotbon ip, i. ⁷Enaxeġebitbit ġupokupok ip yaoka am, i. Imēnpit ipiat osupi'ajoat warēmtaġ ixeyū kukayū be, i. Guyjom ibo eipi bewi je'jēm ip enaxeġebitbit, i. Ġebuje ijoce ma “Ēn xipāt cīcā,” i je'e ip owebe, i mo a'ġu o'e Deus Abraão be — io'e Estêvão.

⁸— Deus waram o'jekawēn Abraão eju. Aġokatkat'it'it epetaypu'aġobixeedakacat ikap'isum, i. Epetaypu'aġobixeedakacat “Oceju Deus ebekitkit” i'e am soat pe warara'acat pe, i mo a'ġu o'e Deus Abraão be — io'e Estêvão.

— Guyjom Isaque o'kap- -Abraão ipot. 8 kabia bima ikap'isuat o'taypu'aġobixeedakat Deus a'ōbi. Isaque yaypan puje o'jewebumūn. Guyjom ixē ipot o'kap. Ibutet Jacó i osunuy — io'e Estêvão adeayū be.

— Jacó ipotpoyū ade osunuy. Doze be osodop ip ipotpoyū. Ixeyū doze beayū Judeuyū dobyū'ūm'ūm

osodop ip. Wuyeipi kukukayū osodop ip — io'e Estêvão.

⁹ — José Jacó ipotpoyū'in osunuy. Iwağoyū itabutkarey jījā o'e ip jekitpit kay- -José kay. José o'teida ip Egito eipi kay cuayū be dinheiro bu am — io'e.

— Ibocewi José o'tujowat ip Egito eipi be teihem ġu kapik am — io'e. — Teihem ġu kapik-pik'uk osunuy Egito eipi kukukat peam- -Faraó beam.

— Soat em Deus osunuy ağ José kay. ¹⁰ Deus José buywatwat'uk osunuy ipiatpi'ajojom ma a'ġu. José itaybit cīcāan o'e Faraó xe, Deus ixē o'ġutaybitbin puye. Imēnpuye Faraó José kay jījā o'e. “Ġasū ēn tak Egito eipi kukukan ecesūy oweju,” io'e Faraó José be. “Oduk'a kukukan tak ecesūy,” io'e cebe — io'e Estêvão.

¹¹ — Ġuyjom Egito eipi dağayū jexat o'jokudada jījā, Canaā eipi dağayū dak. Ka'ūmġu ixat osodop Egito eipi dağ, Canaā eipi dağ tak. Soat kaka dağ ire oekuku ip. Ixat tobuxik pa'ore o'e ip wuydobuyū'ūm'ūm, oi'ūm puye — io'e.

¹² — Jacó o'jekūyjo tūmūntata kake Egito eipi be iam. Iboam jekūyjo buje jekpotpoyū o'ġuju iboce- -wuydobuyū'ūm'ūm o'ġuju. Trigoda bu am ip o'ġuju Egito eipi kay. Xepxep ekum o'ju ip trigoda bum. ¹³ José o'jebapuk jewağoyū kay xepxep em oeku ibima. “Ōn eykitpit José,” io'e cebe ip. Faraó itaybit o'e ixeyūm- -José wağoyūm — Estêvão o'e.

¹⁴ — Imēneju José o'jewa'ōmuju jebay be soat jewağoyū badipyū be dak. Ade osodop ip José badipyū- -75 be osodop ip. “Epesot cuy Egito eipi be soat eyju,” io'e José cebe ip — io'e Estêvão.

¹⁵ — Soat ip o'ju Egito eipi kay. José ebay o'ju, soat iwağoyū dak. O'ju ip jebadipyū eju. Iboce osodop ip. Jacó'ūm oe'ū iboce. Soat Jacó'ūm ipotpoyū'ūm'ūm tak oe'ū'ū iboce. Oe'ū'ū ip wuydobuyū'ūm'ūm. ¹⁶ Ibocewi jebayū'ūm'ūm tao o'taodujowat ip jeka be taokot am ade koato kap puje. Wuydobubuyū'ūm'ūm tao o'taodujowat ip Jacó ka be- -Siquém ka be Canaā eipi be. Kuy bima Abraão ibo

eipi o'jat. Emor ipotpoyū xewi. Dinheiro o'gūm isu-rūgat cebe ip ipi deim. Ibo ka be wuydobubuyū'ūm'ūm tao o'taomōg ip witabikūy be — io'e Estêvão.

¹⁷ — Egito eipi be bima wuydobubuyū'ūm'ūm ade jījā ip osodop- -Judeuyū. Pūg koato gū ip osodop Egito eipi be -ade koato. Gaxīn ma je'jēm ip Egito eipi bewi apēn Deus o'e Abraão be iap taḡ. ¹⁸ Wara'acat Egito eipi kukukan o'e. Ixe ipi kukukat itaybit gū o'e José'ūm, kuy ma ixe'ūm oe'ū buye. Kuyjeayū mudadaybotbon cīcā o'e ip. ¹⁹ Kuyjeayū o'gūguykukuku ip. Ipiat o'supi'ajojoat cīcā cebe ip. "Soat ikap'isusuayū epejomōg akiju ce'ū ām eyipot-poyū," io'e kuyjeayū be Egito eipi kukukat. Imēn o'e wuydobuyū acoḡap puxim — io'e Estêvão.

²⁰ Moisés o'kap ḡebuje. Idip cīcā osunuy. Ebaḡūg kaxi acā Moisés jexi xe osunuy. ²¹ Bekicat o'gūjēm ip jeduk'a bewi. Imēnpit oe'ū gū — io'e.

— Imujēm puje Faraó daxit Moisés o'tobuxik- -Egito eipi kukukat taxit. O'tujoōm jeduk'a be. Moisés o'gūaypan je'it muaypanap puxim. ²² Imēnpuye Moisés itaybit o'e soan. Egito eipi watwat o'gūtaybitbitbin. Ya'ōbacaan o'e. Itaybit cīcāan o'e kawēn ām, soat muḡē ām tak — io'e Estêvão.

²³ — Moisés oajēm jebadipyū kay. Oajēm jebadipyū jo pin cīcā buye- -Israel eipi watwat co pin cīcā buye. 40 koato osunuy.

²⁴ — Egito eipi wat warēmtaksuḡ Israel eipi bewiat o'jukuk yukpiwat gū ma'gū. Moisés o'jojojo ip. Jeadip kay itabotaidabotbot o'e. Egito eipi wat'ūm o'yaoka jeadip kay jeweik pin puye. ²⁵ "Obadipyū itaybit Deus omudot tujujēm ām ip Egito eipi bewi iam," io'e Moisés jewebe ma. Imēnpit ibadipyū itaybit gū o'e iboam — Estêvão o'e.

²⁶ — Kuyaje Moisés o'ju waram jebadipyū jom. Xepxepayū o'tobuxik jebadipyū. Jawaokakam o'e ip. O'ju jewaokakaayū mubu'un am. "Tapupuyū, apēnpuye dak eyju jewaokakam- -ibadipyū eyju!" io'e cebe ip. ²⁷ Jeadip aokakaat pit Moisés o'gūwun. Ixe dak o'e Moisés pe: "Abu dak emudot ocekukukan?" i. "Abu dak emudot 'Cūg gū eyju jekukum' i'e am

ocewebe?" io'e Moisés pe. ²⁸ "Kapusu Egito eipi wat eyaoka iat puxim tu ēn oaoka ojuy?" io'e Moisés pe. ²⁹ Imēnpuye Moisés o'jenapōn Egito eipi bewi jaokaap puxim — io'e.

— Midiā eipi kay o'ju. Osunuy. O'jewebumūn iboceat eju. Koapat o'kap ipot. Guyjom wara'at o'kap ipot. Moisés 40 koato osunuy Midiā eipi be — Estêvão o'e.

³⁰ — Gebuje Deus ekawēn tojtjt'ukat o'jebapuk Moisés kay. Uk'a'ūmat pe osunuy co'a xe. Co'a butet Sinai'a i osunuy. Moisés tip'aroro'it'it o'jojjo. Tipsop o'e. O'tipik ġu bit. ³¹ Imēnpuye Moisés itabēġ o'e ijojom. "Ajo xe'e ijop?" io'e jewebe ma. O'ju cetēġ ma xipan tip co am. Deus o'jekawēn ceweju tip'aroro'it'it pewi. ³² "Ōn Deus," io'e Moisés pe. "Edobuyū'ūm'ūm itabut osodop ip okay-Abraão, Isaque dak, Jacó dak," io'e Deus cebe. Moisés ikarabakbak o'e jeparara pibun. Ibu'u o'e ijom iparara buye. ³³ Deus waram o'jekawēn ceweju. "Eyuk eju'uk ei bewi wa'ōbuyxi exe iap mubapuk am," io'e Deus cebe. "Xipat cīcāatka mucakucaġ ēn, ōn ijoce buye," io'e. ³⁴ "Egito eipi watwat ikērēm cīcā webekitkit kuġ," io'e. "Ipiatpi'ajojom cīcā ip. Imēnpuye je'ūhū'ūm cīcā ip. Wetaybit iboam," io'e Deus. "Ōn ma okop Egito eipi watwat xewi ixeyū dujūjēm ām," io'e. "Ga'a aju," io'e. "Ōn jemuju webekitkit tujūjēm ām Egito eipi watwat xewi," io'e Deus Moisés pe. Imēn Deus o'jekawēn Moisés eju — Estêvão o'e.

³⁵ — Deus Moisés o'ġuyypit Egito eipi be. Moisés o'ġuyypit ixē be jebekitkit tujūjēm ām Egito eipi bewi- Judeuyū dujūjēm ām. Deus ixē o'ġuyypit jekawēn tojtjt'ukat ebapuk puje cekay tip'aroro'it'it pewi. Deus ma ixē o'ġuyypit. Judeuyū bit ixē a'ō kay ġu ip osodop. Judeuyū ma o'e Moisés pe: "Abu-dak emudot ocekekukan?" i. "Abu-dak emudot 'Cūġ ġu eyju jekukum' i'e am ocewebe?" io'e ip Moisés pe. Deus pit ixē o'jomuy Judeuyū kukukan, Egito eipi bewi Judeuyū dujūjēmjēm'ukan tak — io'e Estêvão.

³⁶ — Guyjom ixē Moisés wuywebe i'e ba'oreat o'ġubapukpuk Egito eipi be bima, tibog cīcāati mudēġ pima dak. Tibog cīcāati butet Tipakpekati i osu-

nuy. Ixe Moisés Judeuyū o'tujujēm Egito eipi bewi. Ade koato uk'a'ūmat taḡ oekuku ip- -40 koato. Wuywebe i'e ba'oreat o'ḡubapukpuk iboce dak.

³⁷ — Ixe Moisés o'e Israel naxeḡebitbiyū be: “Deus jekawēn muwēnuwēn'ukat ḡudot eykay,” i. “Omudocap puxim ixē ḡudot,” i. “Eybadipyū'in ḡudot,” i.

³⁸ — Ixe Moisés Israel naxeḡebitbiyū xe osunuy uk'a'ūmat pe. Israel naxeḡebitbiyū o'je'awero ip Sinaia'etakobe. Deus ekawēn tojtjot'ukat o'jekawēn Moisés eju iḡo'a jeje — io'e.

— Iḡo'a be Moisés o'jekawēn wuydobuyū'ūm'ūm eju -Israel naxeḡebitbit'ūm'ūm eju. Deus ekawēn o'ḡuwēn cebe ip- -wuyawēwēap ekawēn. Moisés iboap ekawēn o'ḡubararak witadopa be topa'erūnat topa be ḡuyjom ocetaybit am iboam — Estévāo o'e.

³⁹ — Guyjom wuydobuyū'ūm'ūm oibu'un Moisés a'ō kay. Moisés kay'ūm cīcā ip o'e. Egito eipi kay jepit ojuy o'e ip. ⁴⁰ Imēnpuye o'jekawēn ip Arāo eju. O'jekawēn ip Moisés co'a jejeibun pima.

— “Wuyedeusyūm cuy eḡuḡē,” io'e ip Arāo be. “Ixeyū je'ju wuywap Egito eipi kayat e mubapuk am wuywebe,” io'e ip. “Poce paxi omuy Moisés -Egito eipi bewi wuydujūjēmat?” io'e ip. “Ocetaybit ḡu poma paxi o'ju iam,” io'e ip Arāo be napa ma.

⁴¹ — Imēnpuye biopak'it'it co'iat o'ḡuḡē ip ourom. Ovelha o'yaoka ip imōḡ ām biopak'it'it co'iat wap “Teku Deus” i'e am. Petatam o'e ip jedeusbaro kuḡ puye, jemumuḡē kuḡ puye. Icokcok ip o'e. ⁴² Imēnpuye Deus ibu'u o'e cekay ip itabut ip biopak'it'it co'iat kay buye. Tūybe biopak'it'it co'iat Deus iān o'e ip. Tūybe kaxiepiat Deus iān o'e ip, kaxiamat tak, kasoptayū dak iān o'e ip. Deus kay wuyetabucap puxim itabut o'e ip ixeyū kay. Imēn cedaḡ'ūm cīcā o'e Deus xe. Imēn e'em Deus ekawēn muwēnuwēn'ukayū emudupmubararaktup:

“Bekitkit, owebe ḡu ovelha ūmūm'uk epesop uk'a'ūmat pe bima- -40 koato bima,” i'e'em Deus Israel naxeḡebitbit pe, i. “Eyedeusbaroyū be acā iūm'ūm'uk epesop -eyemumuḡē be acā,”

i'e'em, i. ⁴³ "Ibiōgbuk epeḡuḡēḡē,"
 i'e'em, i. " 'Ocexe eyju acā deus,' i
 epe'e napa ma cebe ip," i'e'em Deus,
 i. " 'Ocetabut eykay,' i epe'e'e,"
 i'e'em Deus, i. "Tūybe Moloque eye-
 deus iān epesop, Renfā dak," i'e'em,
 i. "Moloque duk'a dujowatwan
 epekuku- -torojo'a dujuwatwan- -
 ya'icat'a dujowatwan," i'e'em, i.
 "Moloque biōgbuk iḡo'a be osunuy,"
 i. "Tūybe kasopta jo'iat tak deus iān
 epesop," i'e'em, i. "Renfā i kasopta
 jo'iat putet osunuy," i'e'em, i. "I-
 mēnpuye ipiat osupi'ajoat eywebe,"
 i'e'em, i. "Wūyat eipi kay jeymuju
 ōn," i. "Ōn jeymuju Babilōnia eipi
 weḡūnat ka kay," i.

Imēn e'em Deus ekawēn muwēnuwēn'ukayū emudup-
 mubararakup — Estévāo o'e.

⁴⁴ — Uk'a'ūmat taḡ jekukum pima wuydo-
 buyū'ūm'ūm Deus eju kawēnwēnap'a dujowatwan oe-
 kuku ip- -ixee'a'a dujowatwan. Witadopa o'topadop
 iḡo'a be- -xepxepatopa- -topaerūnatopa. Deus ekawēn
 ibararak osodop ixee dopa be. Iḡo'a o'yamuḡē ip apēn
 Deus o'e Moisés pe iap taḡ — Estévāo o'e.

⁴⁵ — Moisés'ūm e'ū buje Josué wuydobu-
 yū'ūm'ūm kukukan o'e. Josuéyū Deus eju kawēn-
 wēnap'a o'yadujujēm uk'a'ūmat pewi torojo'a- -ixee
 muḡēḡē'a. O'yadujuajēm ip Canaā eipi be. Judeu-
 'ūmayū osodop ip iboce yajēm puje ip. Deus ixeyū
 Judeu'ūmayū o'ḡujēm ibo ipi bewi wuydo-
 buyū'ūm'ūm top am. Deus eju kawēnwēnap'a o'ya-
 dujuajēm ip jeweju Canaā eipi be — io'e adeayū be.

⁴⁶ — Guyjom Davi o'e Deus pe: "Uk'a muy ojuy
 a'ḡu ōn eweju kawēnwēnap'am," i — io'e. — Canaā
 eipi be bima Davi wuydobuyū'ūm'ūm kukukan o'e.
 Davi ikukpin cīcā osunuy Deus xe. Deus soat em i-
 dipat o'ḡudotdot cekay. Davi o'e: "Deus, uk'a muy
 ojuy a'ḡu ōn eweju kawēnwēnap'am," i. "Jacó itabut
 osunuy ekay," i. "Ōn tak wetabut ekay," i. "Imēn-
 puye uk'a muy ojuy a'ḡu ōn- -ewebeap'am," i. Imēn

Davi o'e Deus pe. ⁴⁷ Imēnpit Deus o'yamuyat Davi be ġu. Davi ġu Deus eju kawēnwēnap'a o'yamuy-
ipot acā. Salomāo o'yamuy. ⁴⁸ Deus pit uk'a be ġu
nuynuy- -ijodiat emuamuy'a be ġu. Ixe Deusat. Soat
podi ma ya'ōbacaat. Kabi be bit nuynuy. Deus imēn
o'e jekawēn muwēnuwēn'ukayū ekawēn taġ:

⁴⁹ Kabi wabikkikap puxim, i'e'em De-
us. Ipi wuimōgmōġap puxim, i'e'em.
Soat kuġ ōn kabi beacat kuġ- -ipi
daġacat kuġ tak, io'e. Apēntak ijodi-
at emuamuy'a be oġuy? i. ⁵⁰ Ōn ma
soat oġuġē. Ipi oġuġē, ipi daġacat tak,
kabi dak, kabi beacat tak, i.

Imēn Deus o'e ixeyū ekawēn taġ — Estêvão o'e.

⁵¹ — Tapupuyū, eya'ōpicūġcūġ cuy epesop wa'ō
kay — Estêvão o'e jebadipyū be. — Kūyjobit'ūm
cīcā eyju! — io'e. — Eybu'u jījā Deus ekawēn com.
Deus kay itabut'ūm co'i eyju. Eybu'u jījā Deus a'ō
daġ eyeku am. Eyebayū ekukuap puxim eyju dak je-
kukum. ⁵² Warēmtaġ cīcā Deus ekawēn muwēnu-
wēn'ukayū o'jukukuk ip eyebayū. Ka'ūma ma
ixeyū'in xipan ip o'jukuk!. Pūġ tak ka'ūma. “Cūġ
cīcāat omuyku,” io'e'e ip Deus ekawēn muwēnu-
wēn'ukayū. Imēn o'e'e ip yajēm awap. Imēn e'e'uk-
ayū o'yaoka ip eyebayū — io'e Estêvão.

— Ġasū ma ixē cūġ cīcāat epeġūm cekay itako-
maayū be. Jesus i ixē butet. Ixe epesubamupaya ko-
rosa eju. ⁵³ Kuy juk Deus ekawēn epeya'ijojo Deus
ekawēn muwēnuwēn'ukat pi bewi. Imēnpit ya'ō-
kay'ūm cīcā eyju — Estêvão o'e adeayū be, jeba-
dipyū be.

⁵⁴ Ya'ijo'ibiyū oitakomān Estêvão kay. Cekawēn
co buje ip oitakomān. Yaoka pin o'e ip jetakoma pi-
bun. ⁵⁵ Estêvão bit Deus biōġbuk kuġ cīcā osunuy.
O'jeapūn kabi kay. Deus dipap o'jojojo. Jesus tak o'-
jojojo. Cūġ'i osunuy kabi be Deus xe soat kukukan.
Estêvão o'jekawēn ixē jojom pima.

⁵⁶ — Ak'i juy epe'e — io'e. — Kabi ikoce ōn ijo-
jom — io'e. — Soat waġo jojom ōn. Cūġ'i Deus xe
soat kukukan — io'e.

⁵⁷ Iboap co buje, ya'ijo'ibiyū biḡ ma oitakomān cekay. O'jewāwā ip ya'ōberen.

— Ga'a ayaoka — io'e ip ya'ōberen.

O'jewa'ōpinomudipdip ip waram ya'ijoap puxim. Adedem ip o'jedau cekay. ⁵⁸ Kururuḡ o'tujowat ip ikaboḡatka eakiju. Jeekabek ip o'ju'uk'uk. O'jomōḡ ip Saulo be imuxipan am. Ixe Saulo yaypan'isuat osunuy. Estêvão o'yabuḡ ip wita'am.

⁵⁹ Yabuḡbuḡ pima Estêvão o'jekawēn Jesus eju.

— Okukukat Jesus, oje'ū — io'e. — Ekay ojut — io'e.

⁶⁰ O'jēḡ'aecōḡcōḡ. Waram o'jewāwā ya'ōberen.

— Okukukat Jesus — io'e. — Ipiat cuy ecesu-pi'ajoat ḡu teyūbeku wabuḡbuḡapteim — io'e Deus pe.

8

Oe'ū. Saulo dak Estêvão aokaap ojuy.

² Xipat cīcāayū Estêvão'ūm jebit o'jomōḡ witabikūy be -Jesus kay itabucayū. I'ūmcocom cīcā o'e ip.

O'jepōḡpōḡpōḡ ip soat ka daḡ Jesus kay itabucayū. Pūḡpūḡ ixeyū'in o'jepōḡpōḡpōḡ ip Judéia eipi daḡ. Warara'acayū ixeyū'in o'jepōḡpōḡpōḡ ip Samaria eipi daḡ. Jesus emumujuyū bit o'jepōḡpōḡpōḡ ḡu--doze beayū. Jerusalém ka be ip osodop.

³ Saulo dak Jesus kay itabucayū mu'ūm ojuy oekuku. Taomūn ām ōmōm'uk osunuy ixeyū duk'a be. Aḡokatkayū o'taomūnmūn, aoyū dak. Daomūnmūn-ap'a be ip o'ḡuōmōm. Saulo ipiat o'supi'ajoat cīcā cebe ip. 'Imēnpit Deus ekawēn muwēnuwēn oekuku ip o'jepōḡpōḡ'iyū -Jerusalém ka bewiyū. Soat ka daḡ ip oekuku Deus ekawēn muwēnuwēn.

⁵ Jesus kay itabucayū Deus ekawēn o'ḡuwēnuwēn Samaria eipi watwat pe. Filipe o'ju ikaboḡatka be Samaria eipi beatka be. Ixe o'jepōḡpōḡpōḡ'iyū'in osunuy. Ibo ka be Deus ekawēn o'ḡuwēnuwēn.

— Deus Jesus o'taē soat taxiyo am — io'e ibo ka watwat pe.

⁶ Ibo ka watwat itabut cīcā o'e ip Filipe a'ō kay -Deus a'ōbacaan wuywebe i'e ba'oreat o'ḡubapukpuk puye.

⁷ Ibiōgbuk kērēat o'ğujēmjēm adeayū bewi. Ya'ō-beren jewāwāwām o'jēm ip cebewi. Ade ijebit e'ū topibiyū dak o'ğū'ada'ada. Ade taojere topibiyū dak o'ğū'ada'ada. "Imēneju icokcok cīcā ip o'e ibo ka watwat. Itabut o'e ip Jesus kay.

⁹ Kuy bima Simão kay itabut cīcā ip osodop ibo ka watwat. Ixe Simão ya'ōbuyxiat osunuy adeayū xe, wuywebe i'e ba'oreat mubapukpuğ wamoat puxim puye.

— Soat podi ma wa'ōbacaap kuğ òn — io'e soat pe napa ma.

¹⁰ Imēnpuye tūybe teku ya'ōbaca jījā iān o'e ip. Soat Samaria eipi watwat itabut cīcā o'e Simão kay-ya'ōbuyxiayū, tadaybotbocayū dak.

— Teku ya'ōbaca jījā, Deus ja'ōbacaap o'ğūm cebe buye — io'e ip napa ma. — Teku Deus a'ōbi jekukum — io'e ip napa ma.

¹¹ Ade koato Simão wuywebe i'e ba'oreat mubapukpuğ oekukuku ibo ka beayū etabutpe. Imēnpuye adeayū itabut o'e ip cekay.

¹² Ğe buje Filipe Deus ekawēn o'ğuwēnuwēn ibo ka watwat pe-Simão nuyapka watwat pe.

— Deus soat kukukan je'e — io'e cebe ip. Jesus Cristo o'ğuwēnuwēn cebe ip. Kawēn idipat o'ğuwēnuwēn. Imēnpuye itabut o'e ip Jesus kay. O'jewemubatisanat ip- ağokat kayū, aoyū dak. ¹³ Simão dak itabut o'e Jesus kay- wamo tūibit. O'jewemubatisanat. Filipe eju oeku. Filipe Deus a'ōbacaan wuywebe i'e ba'oreat o'ğubapukpuk adeayū etabutpe. Deus a'ōbacaap o'ğubapukpuk cebe ip. Simão iboap o'jojajo. Itabēğ cīcā o'e Filipe jojom.

¹⁴ Jesus emumujuyū Jerusalēm ka be osodop ip. Samaria eipi watwat awēğ o'yawēğtobuxik ip.

— Samaria eipi watwat itabut o'e Deus ekawēn kay — io'e ip.

Imēnpuye ixeyū Pedro o'ğuju Samaria eipi kay. João dak ip o'ğuju.

¹⁵ Pedroyū oajēm Samaria eipi watwat kay- Jesus kay itabucayū kay. O'jekawēn ip Deus eju.

— Ebiōgbuk cuy eğuōm cebe ip — io'e Deus pe, ¹⁶ ibiōgbuk oōm ğu buk cebe ip puye.

“Wuykukukat Jesus ebekit òn ġasū” i'e am o'jewemubatisasaan ip. Imēnpit Deus biōġbuk oòm ġu buk cebe ip.

¹⁷ Ġebuġe jebu o'subumōġ ip itabucayū abi jeje. Deus biōġbuk oòm cebe ip ġebuġe bit. ¹⁸ Pedroyū ixe yū abi jeje jebu mōġ puġe Deus biōġbuk oòm cebe ip iap o'joġoġo Simāo. Imēnpuye ixe Simāo dinheiro ūm ojuy o'e Pedro be ibubabi bu ojuy.

¹⁹ — Eububabi bu pin òn — Simāo o'e Pedro be. — Juku. Edinheirom — io'e cebe ip. — A'òbacaap cuy eġūm owebe dak imēn e'e am — io'e. — Wetaybit pin Deus biōġbuk muòm ām wara'acat pe — io'e Pedro be.

²⁰ Pedro itakoma o'e Simāo kay. Ya'òpuruġ o'jede cebe.

— Tūybe Deus emumuūm oġat wedinheirom iān ēn e'em — io'e Simāo be. — Deus cuy jemuġu ipiat'ajoġoap kay edinheiro kuġ! — io'e ya'òpuruġ. ²¹ — Iba'ore ewebe kapik am Deus beam oceweġu. Ikērēat kuġ ēn Deus xe. ²² Eġuycūġ cuy eġuy, ikērēat kuġ puġe — io'e cebe. — Ikērēat mujurūġrūġap cuy ecepere — io'e cebe. — “Ikērēat mujurūġ ojuy òn,” i juy ece Deus pe. “Ikērēat cuy eġu'uk owebewi,” i juy ece cebe. Imēn e'e buġe Deus ġebum ġu je'e apēn cuk adi ikērēat eġujurūġrūġ iap kay. ²³ Ēn pit etabutkarey jījā warara'acat kay. Ikērēat kay acā ēn — io'e Pedro ya'òpuruġ Simāo be.

²⁴ Simāo iparara o'e Pedro ekawēn co buġe.

— Owebeam cuy ecekawēn Deus eġu — Simāo o'e. — Ecekawēn cuy ceweġu owebe apēn cuk ece iap ebapukap puxim — io'e Pedroyū be.

— Ha'a. Ocekawēn cuy — io'e.

²⁵ Pedroyū o'jepit Jerusalēm ka kay. Deus ekawēn muwēnuwēn oekuku ip Samaria eipi watwat pe jeka kay jexexem pima- -Jerusalēm ka kay. Wuykukukat o'e'e iap muwēnuwēn oekuku ip, apēn cuk adi o'jebapuk cebe ip iap muwēnuwēn tak. Ade ka daġ ip oekuku Samaria eipi daġ. Ade ka watwat pe Deus ekawēn muwēnuwēn oekuku ip jexexem pima.

²⁶ Deus ekawēn toġotġot'ukat o'jekawēn Filipe eju- -kabi kadi wiat.

— Ecewemuxipan cuy — io'e. — Kaxietajoregāt ka kayat e dağ cuy eju- -Jerusalém ka bewiat e dağ, Gaza ka kayat e dağ. Ixe e uk'a'ūmat tağ opop — io'e Filipe be.

— Hm hm — io'e. — Cum puk òn — io'e.

²⁷ Dao ma o'ju. Ixe e dağ o'ju.

Etiópia eipi bewiat Deus ekawēntup cocom oeku ixē e dağ. Jepitpin o'e jeipi kay- -Etiópia eipi kay. Ya'òbuyxi jījāat osunuy. Etiópia eipi kukukat buy-watwat'ukat osunuy. Etiópia eipi kukukat ayacat osunuy. Ipi kukukat putet Candace i osunuy. Etiópia eipi kukukat edinheiro kukukat osunuy. Kuy bima o'ju Jerusalém ka be “Ēn xipat cīcā oxē” i'e am Deus pe. ²⁸ Jepitpin o'e Jerusalém ka bewi. Jeipi kay jepitpin o'e- -Etiópia eipi kay. Cavalo emumupuxik-puxik tağ oeku. Xik'i osunuy jabikbikap pe Deus ekawēntup cocom ya'òberen. Kuyjeatup cocom oeku Deus ekawēn muwēnuwēn'ukat emudupmubararaktup cocom- -Isaias emudupmubararaktup cocom.

²⁹ — Ixe ecarro juy etomuixik — Deus biōğbuk o'e Filipe be.

³⁰ Filipe o'jedau carro nomuju. Ağokatkat a'ò o'ya'ī-jojo ya'òberen tupcocom puye. Isaias emudupmubararaktup cocom oeku.

— Ibpuk tu exe iğodup ekawēn? — io'e Filipe Etiópia eipi bewiat pe.

³¹ — Ka'ūma. Cekawēn pa'arēm oxē — io'e. — Apēntak kuka cekawēn pabuk o'e oxē? — io'e. — Kaka ġu omutaybinat ijoce — io'e. — Ejot cuy ijo-ma — io'e. — Eōm cuy wecarro be — io'e. — Xik'i abik oxē — io'e Filipe be.

³² Jesus muwēgaptup cocom oeku. Imēn e'em iğo dup:

Yaoka am tujowan pima, ovelha wa ġu, i. Imēnpuxim ixē dak o'tōn ġu, i. Mūğ ma e'em cordeiro jexeedap'uk'uğ pima, i. Imēnpuxim ixē dak mūğ ma osunuy ikērēm cīcā ip o'jukuk pima, i. ³³ Warēmtağ cīcā ip o'jukuk, i. “Ikērēat kuğ tekū” io'e ip napa ma, i. Ka'ūma ma o'e “Ikērēat kuğ ġu” i.

O'jomuymuy jījā ip, i. Ipotpet ġu jee-
nuy, o'yaoka ip puye, i.

Imēn e'em iġo dup. Iġo dup cocom oeku ixē Etiópia eipi bewiat.

³⁴ — Apēġape ijop ibararakat ijudup pe? — io'e. — Abu-muwēnuwēn Deus ekawēn muwēnuwēn'ukat ijudup pe? — io'e. — Jewemuwēnuwēn tu? Wara'acat muwēnuwēn ġu xe'e? — io'e Filipe be.

³⁵ Filipe o'ġukūyjo mēġapeku tedupeku ibararak opop iam. Kawēn idipat o'ġuwēn cebe. Jesus o'ġuwēn cebe.

³⁶ Ġebuje idibi o'tidobuxik ip e daġ cucum pima. — Ak'i juy ece — io'e Etiópia eipi bewiat Filipe be. — Jodiku idibi! — io'e. — Cedaġ tu ewebe omubatisaan? — io'e.

³⁷ — Jesus kay etabut pima, cedaġ kuka o'e — io'e.

— Wetabut Jesus Cristo Deus ipot iap kay — io'e.

³⁸ Etiópia eipi bewiat jecarro o'ġuycū. O'kop Filipe eju. O'kop ip idibi be. Filipe Etiópia eipi bewiat o'ġubatisaan.

³⁹ Idibi bewi ceu buje ip Deus biōġbuk Filipe o'tujujēm ibocewi. Imēnpuye Etiópia eipi bewiat waram ġu Filipe o'jojojo. Inaka o'ju ma'ġuto e daġ jeka kay. Icokcok cīcā osunuy. ⁴⁰ Filipe o'jebapuk Azotoka be. Ibocewi puġ ka daġ ġu oeku-ade ka daġ. Kawēn idipat muwēnuwēn oekuku soat kaka daġ. Cesa-réia ka be o'ju ibocewi.

9 Saulo o'ju Judeuyū epaīyū kukukat kay, itakoma jījā wuykukukat Jesus a'ōkayayū kay buye. Warēmtaġ wuykukukat Jesus a'ōkayayū kuġ oekukuku. Taomūn ojuy ip oekukuku. Soat aokaka ojuy oekukuku. Imēnpuye o'ju Judeuyū epaīyū kukukat kay. O'jekawēn ceweju.

² — Cum ōn Damasco ka kay — io'e cebe. — Cartadup cuy etupūm owebe — io'e. — Damasco ka

be bima otuptujowat Judeuyū e'aweroroap'a kukayū be -Deus eju kawēnwēnap'a kukayū be. Ixeyū aco'i Jesus a'ōkayayū ġubapuk owebe carta dup ūm puje — io'e. — Tobuxik puje otujupit ip ijoce Jerusalēm ka be — io'e. — Ekay ip otujupit. Taomūnmūn ip otujupit- aġokatkayū, aoyū dak — Saulo o'e.

— Ha'a — io'e. — Eyju juy — io'e. — Imēn cuy ece — io'e.

³ Damasco ka kay Saulo o'ju. E daġ pima Damasco ka tēġ pima, dao ma kabi bewiat ekabia oikabia. Yakokoreren kabia jījā o'e. ⁴ Akoh! O'jeako. O'at ipi ju jeakoat pibun.

Ġebuje wuykukukat o'jekawēn Saulo eju. Saulo kabi kadiwiat a'ō o'ya'ijojo.

— Saulo — io'e. — Apēnpuye ēn warēmtaġ okuġ? — io'e- kabi beat o'e.

⁵ — Abu ēn tak, Kariwa? — io'e.

— Ekukukat Jesus ōn — io'e. — Warēmtaġ ma ēn okuġ — io'e. — Ēn ma juk adi ipiat esupi'ajojoat owebe — io'e. ⁶ — E'āy — io'e Saulo be. — Ika-boġatka be juy eōm. Iboka be bima, aġokatkat oġudot ekay. Apēn ēn em iam cuy jemukūyjo — io'e wuykukukat.

Imēn kabi beat o'jekawēn Saulo eju. ⁷ Imēnpuye ce-wejuayū o'jecūcū jījā ip. O'jekōbidaekuġ ip jeparara pibun. Mūġ ma ip o'e. Kabi kadiwiat a'ō o'ya'ijojo ip. Imēnpit o'jojjo ġu ma ip. ⁸ Saulo o'āy ipi juwi. Wedak. O'jetaewedakwedak. Imēnpit ijojom ġu. Imēnpuye cewejuayū iba com ma o'tujowat Damasco ka be. ⁹ Ebapūġ kabia ibo ka be osunuy ijojom ġu. Jekōnkōn ġu osunuy, tikōnkōn ġu dak.

¹⁰ Wuykukukat o'jebapuk Ananias kay cexeybi. Ananias Damasco ka be osunuy. Jesus kay itabut osunuy. Wuykukukat o'jekawēn cebe cexeybi.

— Ananias — io'e.

— Ajo, okukukat? — io'e.

¹¹ — Uk'a ukpibubu daġ cuy eju- -cūġat ka ukpibubu daġ — io'e. — Aġokatkat cuy ejokudada iboce- -Tarso ka bewiat — io'e. — Ibutet Saulo i — io'e. — Judas duk'a kay juy eju — io'e. — Saulo omuy ixē duk'a be. Kawēnwēn oweju. ¹² Ixe juk aġo-

katkat o'jojojo jexeybi. Ixe aḡokatkat putet Ananias i osunuy cexeybi — io'e. — Ananias o'jewebumōḡ ya-jeje itada am iap o'jojojo jexeybi — io'e. — Soat iboap o'jojojo jexeybi — wuykukukat o'e Ananias pe.

¹³ — Okukukat, odaobu'u — io'e. — Oparara oce. Obureyū kuy omukūyjo apēn ixe aḡokatkat e'em iam — io'e. — “Saulo juk adi ipiat o'supi'ajojoat Jesus a'ōkayayū be- -Jerusalém ka watwat pe,” i juk o'e ip owebe — io'e. ¹⁴ — “Ixe Paulo oajēm ijoce paīyū kukukayū a'ōbi,” i'e'em ip owebe — io'e Ananias. — “Ixe oajēm wuydaomūn ām- -Jesus eju kawēnwēn'ukayū daomūn ām,” i'e'em ip owebe — io'e Ananias.

¹⁵ — Epararam ḡu juy eḡuy — io'e. — Eju juy cekay — wuykukukat o'e. — Ōn ma ixe Saulo otaē kapik am owebeam. Ğaxīn ma ixe omuwēn adeayū be- -Judeu'ūmayū be, ipi kukukayū be dak, Judeuyū be dak — io'e. ¹⁶ — “Ēn cuy ipiat ecesupi'ajo jījā ēn wekawēn muwēnuwēn puye,” i oce kuy cebe — wuykukukat o'e Ananias pe.

¹⁷ Ananias o'ju Saulo kay. Judas duk'a be o'ju. Jay. Oajēm. Cereḡ. Oōm. Jebu o'jebumōḡ Saulo abi jeje.

— Tapu — io'e. — Ēn okitpit — io'e. — Wuykukukat a'ōbi ojot ekay — io'e. — Jesus o'jebapuk ekay ijop ka kay ajēm pima — io'e. — Ixe ma omudot ekay — io'e. — Waram etada am omudot. Deus biōḡbuk muōm ām ewebe omudot — io'e Saulo be.

¹⁸ Axima xee jo'iat dao ma o'jedu Saulo eta be-wi. Cecoat put o'e. O'āy Saulo. O'jewemubatisaat “Jesus ebekit ōn ḡasū” i'e am soat pe. ¹⁹ Jexat o'om o'e waram. Oibacan waram.

Saulo Jesus o'ḡuwēnuwēn Damasco ka watwat pe. Ade kabia osunuy Damasco ka be. Warara'acayū xe osunuy Jesus a'ōkayayū xe. ²⁰ Itabun'isum Jesus o'ḡuwēnuwēn soat pe ibo ka watwat pe. Jesus o'ḡuwēnuwēn Judeuyū e'aweroroap'a be- -Deus eju kawēnwēnap'a be.

²¹ — Jesus Deus ipot — io'e'e'e'e soat pe. O'ya'ijojo'iaiyū yaḡuy'ūm o'e.

— Ite aḡokatkat ḡu xe'e juk adi Jesus a'ōkayayū taomūnmūn oekukuku? — io'e ip jewewebe. — Ite aḡokatkat ḡu xe'e juk adi ixeyū aoka ojuy oekukuku? — io'e ip jewewebe. — Itabucayū daomūn ām ḡu xe'e osodot ijoce? Paīyū kukukayū kay wuydaomūnmūn wuydujupit am ḡu xe'e osodot? — io'e ip.

— Ite ma burut — io'e ip.

²² Imēnpit Saulo Jesus o'ḡuwēnuwēn cīcā Judeuyū be- -Damasco ka watwat pe Deus biōḡbuk a'ō-bacaap kuḡ puye.

— Icēmān Deus Jesus o'taē wuydaxijojo'ukan — io'e'e'e cebe ip.

Ibapuḡ ip o'ḡutaybitbin. Imēnpuye cede ba'ore o'e ip Judeuyū.

²³ Ade xet kap puje Judeuyū Saulo aoka ojuy o'e ip. O'je'awero ip.

— Apēn xe'e Saulo ayaoka? — io'e ip jewewebe.

²⁴ Saulo bit jaoka ojuy ip iap awēḡ o'yawēḡtobuxik. Judeuyū soat em aḡ ma osodop ip ikaboḡatka exīntabi be Saulo aokaap wiwim. Kabiam ip aḡ ma osodop. Ixima be dak ip aḡ ma. ²⁵ Imēnpuye Jesus a'ōkayayū Saulo o'ḡukop aḡoka ekorara bodi yaokaap puxim. Ixima be o'ḡukop ip. Paḡeiro'a boḡ pe o'ḡukop ip. Saulo imēn o'jenapōn Damasco ka bewi.

²⁶ Saulo o'ju Jerusalēm ka be warara'acayū kay- -Jesus a'ōkayayū kay. Jay. Oajēm. Jesus a'ōkayayū eju ceku pin o'e. Inaka soat ip iparara o'e Saulo buxim. Tūybe warēmtaḡ ḡasū dak wuykuk iān o'e ip. Tūybe Saulo itabut ḡu Jesus kay iān o'e ip. ²⁷ Barnabé bit Saulo o'tujowat Jesus emumujuyū jom- -doze beayū jom. Barnabé o'jekawēn Jesus emumujuyū eju.

— Saulo wuykukukat o'jojojo Damasco ka kayat e daḡ — io'e cebe ip. — Wuykukukat o'jekawēn ce-weju. Saulo ya'ōcam Jesus o'ḡuwēnuwēn Damasco ka watwat pe — io'e.

²⁸ Imēneju Jesus a'ōkayayū iparara ḡu o'e ip Saulo buxim.

Gebuje Saulo ya'ōcam wuykukukat o'ḡuwēnuwēn Jerusalēm ka watwat pe. Jesus a'ōkayayū eju oeku-

kuku. ²⁹ O'ḡuwēnuwēn Grego a'ōm kawēnwēn'ukayū be. Ixeyū Grego a'ōm kawēnwēn'ukayū Saulo a'ō o'ya'ōdada. Te'e ma ip Saulo aoka ojuy o'e. ³⁰ Jesus a'ōkayayū bit itaybit o'e Saulo aoka ojuy ip iam. Imēnpuye ip Saulo o'tujowat Cesaréia ka kay yao-kaap puxim.

— Xipat eju am Tarso ka kay- -aypanap ka kay — io'e ip Saulo be.

³¹ O'ju. Imēneju itabucayū kaykay am ip oibu'un itabut'ūmayū. Ipiat o'supi'ajoat ḡu cebe ip. Kabā'ūm ip osodop Judéia eipi watwat, Galiléia eipi watwat tak, Samaria eipi watwat tak. Warēmtag itabucayū kukap o'jepere ip. Imēnpuye ip biḡ ma oitabun Jesus kay. Deus a'ō daḡ ip o'e jekukum. Deus biōḡbuk ixeyū buywatwan osunuy. Imēnpuye tak ḡu ip oitabun wuykukukat Jesus kay. Ade jījā ip oitabun.

³² Pedro oajēm Enéias kay. Soat ka daḡ oekukuku. Jesus a'ōkayayū jojom oekukuku. Lida ka be dak o'ju Jesus a'ōkayayū jom. ³³ Enéias o'tobuxik iḡo ka be. Enéias ibun po'i osodop jexexecap pe- -oito koato bun, ijebit e'ū buye. Pedro o'ju cekay.

³⁴ — Enéias — io'e. — Jesus Cristo jemu'ada — io'e. — E'āy — io'e. — Exexecap cuy eḡuxipan eduk'a be eju am — Pedro o'e cebe.

O'je'ada ḡebuje bit Enéias. Xipat o'e. ³⁵ O'āy. Adeayū ijebit e'ū topibit o'jojojo- -iboceayū- -Sarena ka watwat, Lida ka watwat tak. Imēnpuye kuyap jeta- bucap o'jepere ip. Wuykukukat Jesus kay acā oitabun ip.

³⁶ Jope ka be osunuy Jesus kay itabucat- -ayacat. Ibutet Tabita i osunuy. (Tabita Dorcas iape Grego a'ōm.) Ixe soat em xipan warara'acat kukuk'uk osunuy. Xipat cīcā osunuy. Tadaybocayū buywatwat'uk osunuy soat em. ³⁷ Ixe ayacat oiwātaxipin. Oe'ū. Imēnpuye itabucayū ixe'ūm jebit o'jowuy jebabin. Dorcas'ūm o'tujowat ip umat'abi be.

³⁸ Ḡebuje o'jekūyjo ip Pedro omuy Lida ka be iam. Lida ka Jope ka tēḡ ma o'sukadop. Xepxep

aḡokatkat o'ḡuju ip Lida ka be Pedro dakoy am. O'ju ip. Jay. Itabucayū oajēm Pedro kay.

— Ejot cuy oceweju — io'e ip Pedro be. — Oceka be juy aju- -Jope ka be — io'e ip.

— Ga'a — io'e.

³⁹ Pedro o'ju ceweju ip. Oajēm Dorcas'ūm kay. Jesus kay itabucayū Pedro o'tujuu umat'abi be ce'ūat kay. Itop'ūm e'ū'ibiyū osodop ip iḡo'abi be ade- -Dorcas'ūm pureyū. Wawa ip osodop i'ūmccocom. Jesay ip o'ḡubapuk Pedro be.

— Dorcas'ūm ijop o'joinūm owebe — io'e ip Pedro be.

⁴⁰ Pedro soat ip o'ḡujēm umat'abi bewi. O'jēm ip. O'jēḡ'aecōḡcōḡ kawēn ām Deus eju. O'jekoreren ce'ūat kay.

— Tabita — io'e. — Aḡobucēḡ ece — io'e ce'ūat pe.

Ce'ū topibit o'jetaeweak. Ak. O'jeak Pedro kay. O'je'aḡobucēḡ. Oabik. Xik'i o'e. ⁴¹ Pedro ce'ū topibit o'subaixik.

— Kirik'āy'i — io'e.

O'ḡu'āy.

Gebuje Pedro warara'acayū o'tomuwā- -Jesus kay itabucayū, itop'ūm e'ū'ibiyū dak.

— Epesot cuy ce'ū topibit com — io'e. — Waram o'jetait — io'e cebe ip.

⁴² Waram o'jetait iap awēḡ o'jeawēḡepōḡpōḡ soat taḡ Jope ka watwat taḡ. Imēnpuye adeayū itabut o'e ip wuykukukat Jesus kay. ⁴³ Pedro Jope ka be osunuy ade kabia. Simão duk'a be osunuy. Simão ixee-muḡēḡē'ukat osunuy.

10 Deus ekawēn tojtjot'ukat o'jebapuk Cornélio kay. Cornélio Cesaréia ka be osunuy. 100 be sorarayū kukukat osunuy. Itália eipi bewiayū osodop ip cesorarayū. ² Cornélio xipat cīcā osunuy Deus xe. Itabut osunuy Deus kay Judeu ḡūn ma'ḡu. Ibadipyū dak itabut osodop ip Deus kay, soat tuk'a

beayū. Ade dinheiro ūmūm'uk osunuy tadaybotbo-cayū be. Deus eju kawēnwēn'uk osunuy. ³Deus eka-wēn tojtjt'ukat o'jebapuk Cornélio kay.

Katpuje o'jekawēn Cornélio eju -15 hora bima. Deus ekawēn tojtjt'ukat o'jojojo. Cetēg ma oajēm.

— Cornélio — io'e.

⁴ — Ajo, Kariwa? — io'e.

Ipararam o'jeak cekay.

— Ekawēn cocom Deus jekawēnwēn ēn ceweju bima — io'e Cornélio be. — Deus itaybit ebubut'in iūmūm'uk eḡuy tadabotbocayū be iam — io'e. — Imēnpuye Deus ḡebum ekay — io'e.

⁵ — Ḡasū juy ebuywatwat'ukayū'in eḡuju Jope ka be — io'e. — Ibo ka wat cuy etomuwā — io'e. — Pedro i ibutet. Ixe juy etomuwā — io'e. ⁶ — Simāo duk'a be omuy -ixee muḡēḡē'ukat tuk'a be -tiboḡ cīcāati wābu beat'a be — io'e. — Ixe juy etomuwā eduk'a be tot am — io'e.

⁷ Kabi kay Deus ekawēn tojtjt'ukat epit puje, Cornélio ebapūḡayū o'tomuwā jebuywatwat'ukayū. Xepxep ixeyū'in jeduk'a be kapikpik'ukayū osodop. Wara'at ixeyū'in sorara osunuy. Sorara Deus kay ita-bucat osunuy. ⁸ Cornélio Deus ekawēn tojtjt'ukat o'jebapuk cebe iap o'ḡuwēn cebe ip.

Iboap muwēn puje ip o'ḡuju Jope ka be Pedro dakoy am. Xerewun. Ebapūḡayū o'ju -Cornélio emu-mujuyū. E bidase o'xet ip. Kuyaje o'ju ip. ⁹ Jope ka tēg o'e ip. Ijasūn ip pima Pedro jexey jo'iat o'jojojo kaxicuḡ.

Pedro o'jekawēn Deus eju. O'jeu uk'a abi jeje kawēn ām ceweju. Uk'a abi yabicuḡ ḡu o'yanuy -yapo ma. ¹⁰ Ire jījā o'e iboce. Cekōn pin o'e. Uk'a beayū Pedro xat tatam pima, Pedro jexey jo'iat o'jo-jojo. ¹¹ Paḡo boḡ kopkom o'e kabi kadiwi. Paḡo boḡ o'jojojo Pedro jexey jo'iat pe. Paḡo kabi kadiwi kop-kom cekay iap o'jojojo jexey jo'iat pe. Paḡo ierunboḡ cīcā o'e. Ebadīpdip abi eju yabikiririk o'e. Ixe pa-ḡo o'kop cexe. ¹² Warēmtaksuḡ osodop paḡo be-cūḡcūḡayū, wurūrūḡayū dak, pupumayū dak.

¹³ Ḡe buje Deus o'jekawēn Pedro eju jexeybi.

— Pedro — io'e. — Ixeyū juy eyaoka exan — io'e. — Yaoka buje juy ejo'o — io'e.

¹⁴ — Ap! — io'e. — Ojo'o ġu, Kariwa — io'e. — Oxat ġu bit tekul — io'e. — I'o pi beku ocexe- - Judeuyū xe — io'e. — Ōn pit beku ojo'o ġu- -pūġ em tak ka'ūma! — io'e. — Ğasū dak ojo'o ġu — Pedro o'e.

¹⁵ Deus waram o'jekawēn ceweju.

— Exan ma teyūku! — io'e. — Ōn ma exan oġūm. Imēnpuye “Oxat ġu bit tekul,” i'ūmġu juy ece owebe — io'e. — “I'o pi beku ocexe,” i'ūmġu juy ece owebe — io'e Pedro be. — Ōn ma exan oġūm — io'e. — Imēnpuye i'o pi ġu exe — Deus o'e.

¹⁶ Ebapūġ em Deus imēn o'jekawēn Pedro eju. Paġo o'jepa'ūm ibocewi. Waram o'jeu kabi kay.

¹⁷ Pedro o'jewāġuyda jexey jo'iat kay.

— Apēn omutaybin ojuy o'e Deus? — io'e jewebe ma. — Apēġām iboap o'ġubapuk owebe? — io'e jewebe ma.

Ebapūġayū oajēm Pedro nuyap'a kay Pedro ġebum pima jexey jo'iat kay. Cornélio emumujuyū oajēm.

¹⁸ — Pu'a be Simão Pedro omuy? — io'e ip.

Oajēm ip Simão nuyap'a exīntabi be.

— Ijoce du Simão Pedro omuy? — io'e ip uk'a beayū be.

¹⁹ Pedro uk'a abi jeje mabuk osunuy. Ğebum mabuk osunuy jexey jo'iat kay.

Ğebuje Deus biōġbuk o'jekawēn Pedro be.

— Ebapūġ aġokatkayū ekudadam- -Judeu'ūmayū — io'e. — Oajēm ip enuyap'a be. ²⁰ Ekop cuy ixeyū dopabe — io'e Pedro be. — Ceweju juy ip eju — io'e. — “Oju ġu xe'e ceweju ip?” i'ūmġu juy ece ewebe ma — io'e. — Ōn ma ip oġuju edakoy am — io'e Pedro be.

²¹ O'kop. Ebapūġayū dobedem o'ju.

— Okudadam eyju — io'e. — Apēġām epesot ijoce? — io'e cebe ip.

²² — Cornélio ocemudot — io'e ip. — 100 be so- rarayū kukukat ixē. Ixe cūġ cīcā Deus xe — io'e ip. — Itabut cīcā Deus kay. Ya'ōbuyxi soat xe Judeuyū

xe. Deus ekawēn tojtjt'ukat mo a'ḡu o'jekawēn Cornélio be- -ocekukukat pe — io'e ip. — “Pedro juy etomuwā,” i mo a'ḡu o'e cebe — io'e ip. “Pedro juy jeedot eduk'a be,” i mo a'ḡu oe cebe — io'e ip. “Cekawēn kay juy eya'ōpicūḡ eḡuy,” i mo a'ḡu o'e cebe — io'e ip Pedro be.

²³ — Ha'a — io'e. — Epeōm cuy oceduk'a be — io'e. — Ijoce juy epexet — io'e.

— Ma — io'e ip.

O'xet ip iḡo'a be.

²⁴ Kuyaje Pedro o'kop. O'jewemuxipan. O'ju Cornélio emumujuyū eju. Cornélio kay ip o'ju Cesaréia ka be. Wara'acayū itabucayū dak o'ju Pedro eju- -Jope ka watwat. Xet. E bidase ip o'xet. Kuyaje o'ju ip. Jay. Oajēm ip Cesaréia ka be. Cornélio kuy jebadipyū o'tomuwā jeduc'a be, jebureyū dak. Pedro ajēmap wiwim ip osodop. Pedroyū oajēm tuk'a be. Cornélio kay oajēm.

²⁵ Pedro ōm pima, Cornélio o'ju cekay tobedeam. O'jēḡ'aecōḡcōḡ Pedro wap. Tūybe Pedro Deus iān o'e. ²⁶ Dao ma Pedro Cornélio o'ḡu'āy.

— Owap ḡu juy ecēḡ'aecōḡcōḡ — io'e. — E'āy — io'e. — Deus ḡu ōn- -aḡokatkat acā — io'e.

²⁷ Gebuje oōm ip tuk'a be kawēnwēn. Tuk'a beayū adeayū o'je'aweroro'iaiyū Pedro o'jojojo. Pedro o'jekawēn ceweju ip.

²⁸ — Ocejū Judeuyū — io'e. — Eyetaybit ocexe oce'aweropi Judeu'ūmat eju iam. Imēnpit kapusu Deus mo a'ḡu wara'an ma omukūyjojo. “Cedaḡ ḡu ewebe 'Judeu'ūmat xipat ḡu' i'e am,” i mo a'ḡu Deus o'e owebe — io'e. ²⁹ — Imēnpuye ojut eykay, Judeuyū ḡu ma'ḡu eyju. Eywebe onomuwā buje dao ma ojut — io'e. — Odaobu'u ḡu wedot am eykay — io'e. — Apēḡām eyju onomuwā? — Pedro o'e.

³⁰ Cornélio o'jekawēn Pedro eju.

— Tapu, kapusukuruy ijoce ma mo a'ḡu oḡuy ija'a be — io'e. — Katpujesū mo adi kawēnwēn oḡuy Deus eju. Dao ma Deus ekawēn tojtjt'ukat o'jebapuk okay- -doti isopsepat kukat — io'e. ³¹ — O'jekawēn oweju. “Cornélio,” i mo a'ḡu o'e owebe. “Ekawēn cocom Deus, jekawēnwēn ēn ceweju bima,”

i mo a'ġu o'e owebe — io'e. — “Deus itaybit ebut'in'in iūmūm'uk eġuy tadaybotbocayū be iam,” i mo a'ġu o'e owebe — io'e. ³² — “Ebuywatwat'uk-ayū'in cuy eġuju Jope ka be,” i mo a'ġu o'e owebe — io'e. — “Aġokatkat cuy etomuwā. Pedro i ibutet. Simāo duk'a be ixē omuy-ixēē muġēġē'ukat tuk'a be- -tiboġ cīcāati wābu beat'a be,” i mo a'ġu owebe — io'e. ³³ — Imēneju dao ma obuywatwat'ukat oġuju edakoy am — io'e. — Xipat cīcā ajēm okay — io'e. — Ġasū soat wuyju ijoce Deus etabixe. Apēn Deus o'e ewebe iap cuy eġuwēn ocewebe. Soat cuy eġuwēn ocewebe — io'e Pedro be.

³⁴ Pedro o'jekawēn ceweju ip- -Judeu'ūmayū eju.

— “Judeuyū kay acā ōn,” i'e'em ġu Deus. “Judeu'ūmayū kay ġu ōn,” i'e'em ġu Deus. Ġasū bit wetaybit iboam — io'e. — Deus xipan soat kuġ ijo-diat kuġ. Pūg taġ ma ip ikuġ — io'e. ³⁵ — Soat Deus a'ō daġ jekuku'ukayū cūg ma cexe- -Judeuyū, Judeu'ūmayū dak. Deus bikuyap taġ jekuku'ukayū cūg ma cexe- -soat ip — io'e.

³⁶ — Ġasū Deus kawēn idipat o'ġudot ocewebe- -Judeuyū be — io'e. — “Jesus Cristo kay eyetabut puje wetakoma ġu oce eykay,” i'e'em Deus wuywebe. Ixe Jesus soat kukukat. ³⁷ “Ġasū bit epeyewemubatisasaan cuy ‘Waram ġu ikērēat oceġujurūġ’ i'e am eybureyū be,” io'e'e João Batista. Imēn o'e'e soat pe Judéia eipi watwat pe. Eyetaybit iboam — io'e.

³⁸ — Deus Jesus o'taē. Nazaré ka be osunuyiat o'taē. Deus jebiōġbuk o'ġuōm cebe- -Jesus pe. Ja'ō-bacaap o'ġuōm cebe. Jesus soat ka daġ oekukuku xipacat muġēġēm wara'acat peam. Ibiōġbuk kērēat o'ġujēmjēm Satanás a'ō kayayū bewi. Jesus imēn oekukuku soat em Deus a'ōbi jekukum puye — io'e. ³⁹ — Apēn cuk adi Jesus o'e'e iap ocejojojo Judéia eipi daġ jekukum pima, Jerusalém ka be bima dak — Pedro o'e.

— Judeuyū kukukayū ma Jesus o'subamupaya korosa be yaoka am. ⁴⁰ Deus pit waram Jesus o'ġutait — io'e. — Ebapūġ kabia ce'ūap. Xepxep xet kap puje, Deus Jesus o'ġutait waram — io'e.

— Jesus waram o'jebapuk jewekay itabucayū kay. Deus a'ōbi o'jebapuk. ⁴¹ Waram itait puje Jesus o'jebapuk soat kay ġu- -ocekay acā. Ocekay o'jebapuk kuy bima Deus ocenaē buye — io'e. — Deus cuk ocenaē ocewebe Jesus muwēn ām itaybit'ūmayū be — io'e.

— Deus pe waram imutait puje, oceweju Jesus o'jekōn, o'tikōn tak. ⁴² “Kawēn idipat cuy epeġuwēn-uwēn soat pe,” i mo a'ġu o'e Jesus ocewebe — io'e Pedro. — “ ‘Deus Jesus o'taē ixe be “Teyūku ikērēat kuġ Deus xe” i'e am kūyjobit'ūmayū be. “Teyūku xipat Deus xe” i'e am kūyjobicayū be,’ i juy epe'e soat pe,” i mo aġu o'e Deus ocewebe. “ ‘Imēn ixe je'e soat pe- -itabēġayū be, ce'ū'ūayū be dak,’ i juy epe'e soat pe,” i mo aġu o'e ocewebe — io'e Pedro.

⁴³ — Kuyje dak Deus ekawēn muwēnuwēn'ukayū Jesus o'ġuwēnuwēn. “Aġokatkat omuyku,” io'e ip kuyje. “Cekay eyetabut pima, ja'ōbi Deus ikērēat ju'uk eywebewi,” io'e'e'e ip. Kuyje Deus ekawēn muwēnuwēn'ukayū imēn o'e'e'e Jesus muwēnuwēn — Pedro o'e.

⁴⁴ Pedro kawēnwēn pima Deus biōġbuk o'kop Judeu'ūmayū kay.

Soat pe oōm- -o'ya'i'jojo'iyū be- -Judeu'ūmayū be. ⁴⁵ Yaġuy'ūm cīcā ip o'e Judeuyū- -Jesus kay itabucayū- -Pedro ejuayū. Yaġuy'ūm ip o'e Deus jebiōġbuk o'ġuōm Judeu'ūmayū be buye. Tūybe wuywebe acā Deus jebiōġbuk ġuōm iān o'e ip. ⁴⁶ Ya'ōba'arēmat'a'ōm kawēnwēn ip o'e Judeu'ūmayū.

— Deus, ēn xipat cīcā — io'e ip ya'ōba'a-rēmat'a'ōm.

Judeuyū iboap o'ya'i'jojo. Imēneju Pedro o'jekawēn jebureyū eju- -Judeuyū eju.

⁴⁷ — Deus jebiōġbuk o'ġuōm cebe ip — io'e. — O'ġuōm cebe ip apēn cuk o'ġuōm wuywebe iap co'i — io'e. — Imēnpuye cedaġ ġu du ocewebe ixeyū mubatisaan? — io'e. — Abu dak kuka o'e ocewebe “Cedaġ ġu,” i? — Pedro o'e.

⁴⁸ O'jekawēn Judeu'ūmayū eju dak.

— Epeyewemubatisasaan cuy “Wuykukukat Je-

sus ebekitkit oceju ġasū bit" i'e am soat pe eybureyū be — io'e cebe ip.

O'jewemubatisaan ip.

— Ibun ma juy eġuy ocexe — io'e ip Pedroyū be.

Imēnpuye Pedroyū ibun osodop ip cebe ip.

11 Judéia eipi watwat o'yawēġcoco ip- Jesus emumujuyū. Warara'acayū dak o'yawēġcoco ip Jesus kay itabucayū. Judeu'ūmayū dak Deus eka-wēn kay o'e iap awēġ o'yawēġcoco ip. ² Pūġpūġ Jesus a'ōkayayū'in iboap awēġ kay ġu o'e ip- Judeuyū. Tūybe soat Jesus kay itabucayū juy jeday-pu'aġobixeedakatkan iān o'e ip.

Jerusalém ka be Pedro ajēm puje ixeyū Judeuyū Pedro o'ġukorēm.

³ — Pedro, apēn mo ēn tak ece? — io'e ip. — Apēnpuye mo ēn tak eōm Judeu'ūmat tuk'a be? — io'e ip. — Apēnpuye ēn tak mo ecekōn taypu'aġobixeedakat'ūmayū eju? — io'e ip Pedro be.

⁴ Gebuje Pedro apēn o'jebapuk cebe ip iap o'ġuwēn cebe ip.

— Mēnpuk, obureyū! — io'e. — Eya'ōpicūġcūġpuk! — io'e. ⁵ — Jope ka be bima kawēnwēn mo oce Deus eju. Wexey jo'iat ojojoho. Kabi kadi wi paġo boġ kopkom iap mo ojojoho wexey jo'iat pe — io'e. — Okay kopkom o'e. Yabikirikirik o'e ebadipdip abi eju. ⁶ Xipan mo oceak cekay. Puca mo ojojoho-cūġcūġayū, wurūrūġayū dak, pupumayū dak, widayū dak. Soat ip i'opi wuyxe — Pedro o'e.

⁷ — Deus mo o'jekawēn oweju. "Pedro," i mo o'e owebe. "Ixeyū juy eyaoka exan," i mo o'e — io'e. ⁸ — "Ka'ūma, okukukat," i mo oce cebe. "I'opi beku ocexe Judeuyū xe. Ojo'o ġu buk," i mo oce cebe — io'e Pedro. ⁹ — Imēnpuye Deus waram o'jekawēn oweju. "Exat ma ijop," i mo o'e. " 'I'opiat beku,' i'ūmġu juy owebe," i mo o'e owebe. "Ōn ma exan oġūm. Imēnpuye i'opi ġu ewebe," i mo o'e owebe.

¹⁰ Ebapūg em Deus imēn o'jekawēn oweju. Paḡo boḡ waram o'jepa'ūm kabi kay — io'e.

¹¹ — Ġebuje ebapūg aḡokatkayū oajēm oce-sopiat'a kay. Cesaréia ka wat cuk ip o'ḡujuat oda-koy am. Cornélio i ibutet — io'e.

¹² — Ġebuje Deus biōḡbuk o'jekawēn oweju — io'e. — “ ‘Oju xe'e Judeu'ūmat eju?’ i'ūmḡu juy ece owebe,” i mo o'e owebe — io'e. — Imēnpuye oju ce-weju ip — io'e.

— Cornélio duk'a kay oju-Judeu'ūmat tuk'a kay — io'e. — Iboceayū dak o'ju ip oweju- -6 beayū- -Jope ka watwat — io'e. — Soat mo ocajēm Ju-deu'ūmat tuk'a be- -Cornélio duk'a be- -omudocat tuk'a be — io'e.

¹³ — Cornélio mo apēn Deus ekawēn tojtjtjot'ukat o'jebapuk jekay iap o'ḡuwēn ocewebe: “Deus ekawēn tojtjtjot'ukat mo ojojoko,” i. “Cūḡ'i mo oḡuy oduk'a be,” i. “Ixe mo o'e owebe: ‘Ebuywatwat'ukayū'in cuy eḡuju Jope ka be,’ i,” i. “ ‘Simão Pedro juy eto-muwā,’ i,” i. ¹⁴ “ ‘Ixe kawēn idipat ḡuwēn eywebe,’ i,” i. “ ‘Kawēn idipat co buje, Deus jedaxijo- -ebadipyū dak taxijo’ i,” i. Imēn Cornélio mo o'e oce-webe — Pedro o'e.

¹⁵ — Iboam Cornélio e buje, Jesus mo oḡuwēn cebe ip- -Judeu'ūmayū be — io'e.

— Ōn kawēnwēn pima Deus biōḡbuk o'kop ce-kay ip- -Judeu'ūmayū kay. Cebe ip oōm. Apēn wuy-webe oōm koap iap puxim oōm cebe ip. ¹⁶ Imēneju wuykukukat ekawēn kay mo oceḡebu. Wuykukukat mo o'e wuywebe: “João idibi be imubatisasan oeku,” i. “Eywebe bit Deus biōḡbuk jeōm,” i mo o'e wuywe-be — io'e Pedro. ¹⁷ — Deus ma jebiōḡbuk o'ḡuōm wuywebe wuykukukat Jesus Cristo kay wuyetabut puye. Apēn kuy bima mo o'ḡuōm wuywebe iap co'i jebiōḡbuk o'ḡuōm cebe ip ḡasū. Cedaḡ osunuy Deus pe jebiōḡbuk muōm ām cebe ip. Imēnpuye “Cedaḡ ḡu Deus pe jebiōḡbuk muōm ām cebe,” i'ūmḡu oce ōn pit — Pedro o'e cebe ip.

¹⁸ Pedro a'ijo buje Jerusalém ka watwat o'jede ḡu Judeuyū. Pedro mukorēmap o'jepere ip.

— Ka'ūmḡu Deus co'iat xipacat! — io'e ip cebe.

— Judeu'ūmayū dak ikērēat mujurūgrūgāp epereap ojuy aco'i Deus — io'e ip. — Ibikuy aco'i ikērēat uk am cebewi ip. Soat em Deus xe jeedop ip je'ū buje — io'e ip. — Deus xipat cīcā! — io'e ip.

¹⁹ Estêvão e'ū buje o'jepōgṗōgṗōg ip itabucayū. O'jepōgṗōgṗōg ip warara'acayū ixeyū be ipiat o'su-pi'ajoat cīcā buye. Pūgpūg ixeyū'in wūy ma o'ju. Fenícia eipi be o'ju ip. Chipre eipi be dak, Antioquia ka be dak. Ade kaka daḡ jekukum pima Jesus o'ḡu-wēnuwēn ip jajēmapka watwat pe. Jesus o'ḡuwēnu-wēn ip Judeu'ūmayū be ḡu- -Judeuyū be acā.

²⁰ Pūgpūg ixeyū'in o'ju Antioquia ka kay. Chipre eipi be osodopiyū o'ju ip Antioquia ka kay, Cirene eipi be osodopiyū dak.

Ḡebuje kawēn idipat o'ḡuwēnuwēn ip Judeu-ūmayū be- -Grego a'ōm kawēnwēn'ukayū be.

— Jesus acā ocekukukat — io'e ip cebe ip.

²¹ Deus ip o'subuywatwan cīcā wuykukukat Jesus muwēnuwēnayū. Imēneju adeayū oibu'un ip jetabut am jedobuyū'ūm'ūm ekawēn kay. Kuyap jetabucap o'jepere ip. Wuykukukat Jesus kay ip oitabun.

²² Ḡebuje Jesus kay itabucayū apēn Antioquia ka watwat itabut o'e iap awēḡ o'yawēḡtobuxik ip- -Jerusalém ka watwat.

— Ade Judeu'ūmayū itabut o'e Jesus kay- -Antioquia ka watwat — io'e itaybicayū.

Imēnpuye itabucayū kukukayū Barnabé o'ḡuju Antioquia ka be. ²³ · ²⁴ Xipat cīcāat osunuy Barnabé. Soat em Deus biōḡbuk a'ō daḡ oekukuku. Wuykukukat Jesus kay itabut cīcā osunuy.

Barnabé oajēm Antioquia ka be itabucayū kay- -Jesus kayayū kay. Apēn cuk adi Deus xipacat o'ḡūm iboceayū be iap awēḡ tobuxik puje icokcok cīcā o'e. Soat ip o'ḡutaybitbin Deus ekawēn.

— Eyetabun cīcā juy epesop wuykukukat Jesus kay! — io'e cebe ip. — Ya'ō daḡ cuy epeku! Kūyjo-bin cuy epesop cekawēn kay — io'e cebe ip.

Imēnpuye ade jījā oitabun wuykukukat Jesus kay.

²⁵ Ḡebuje Barnabé Saulo o'takoy. Tarso ka be

o'ju Saulo dakoy am. O'takoy. O'tobuxik. O'jekawën ceweju.

— Ga'a accepit Antioquia ka be — io'e.

— Ga'a — io'e.

²⁶ O'jepit ip- -Barnabé, Saulo dak. Pūḡ koato ibo ka be osodop ip. Je'aweroro'uk ip osodop itabucayū eju. Ade itabucayū mutaybitbin'uk ip osodop. Antioquia ka be bima soat em warara'acayū o'e: — Cristo ebe-kitkit — i Jesus kay itabucayū be.

²⁷ Pūḡpūḡ Deus ekawën muwënuwën'ukayū oajëm itabucayū kay- -Antioquia ka beayū kay. Oajëm ip Barnabé Antioquia ka be bima, Saulo dak. Jerusalém ka bewi ip oajëm. O'je'awero ip itabucayū eju. ²⁸ Pūḡ ixeyū'in o'jekawën itabucayū eju. Ibutet Ágabo i osunuy. Deus biōḡbuk ixé Ágabo o'ḡukūyjo apën ḡuyjom je'bapuk iam. Imënpuye o'jekawën ceweju ip.

— Wuyrere jījā acesop! Wuyxat i'ūm soat ka daḡ — io'e cebe ip.

Cláudio ipi kukukan pima oireren ip apën kuy bima Ágabo o'e iap taḡ. ²⁹ O'je'awero ip Jesus kay itabucayū.

— Ga'a dinheiro aḡuju warara'acayū be- - itabucayū be- -Judéia eipi watwat pe — io'e ip jewewebe. — Irere ip jekukum — io'e ip.

³⁰ Imën soat ip jedinheiro muxipanpan'uk osodop ikuḡ pima. Imënpuye Barnabé o'ḡuju ip Saulo dak. O'ḡuju ip dinheiro ūm âm itabucayū kukukayū be- - irereayū kukukayū be.

12 Ixeyū ekabia be Herodes Judeuyū kukukat osunuy. Ixe ipiat o'supi'ajoat Jesus kay itabucayū be. ² Koap Tiago o'yaokaat pajam. Tiago'ūm oe'ū- -João waḡo'ūm. ³ Icokcok o'e ip Judeuyū o'yaokaat puye- -itabut'ūmayū. Imënpuye Herodes Pedro o'taomūnat. O'taomūnat Judeuyū petatam pima. Ixe epeta bima pāo'a o'o'uk ip osodop- -yamuyuhuhu- -aptōmtēm'ūmat'a.

⁴ Taomūn puje Pedro o'ḡuōmat daomūnmūnap'a be.

— Peta kap puje Pedro oḡujēm ḡuto daomūnmūnap'a bewi — Herodes o'e jewebe ma. — Ixe ekawēn cuy oya'ījo soat etabut pe — io'e jewebe ma.

Sorarayū o'ḡuju Pedro wiwi am. 16 be sorarayū o'ḡuju. Ebadipdipayū iwiwim o'e kabia buje. Ebadipdipayū ḡuto iwiwim o'e ip kaxicuḡ. Ebadipdipayū ḡuto iwiwim o'e ip katpuje. Ebadipdipayū ḡuto iwiwim o'e ip ixima be. ⁵ Sorarayū ma xipan cīcā Pedro wiwim ip o'e cenapōnap puxim. Itabucayū bit kawēnwēn cīcā o'e ip Deus eju Pedro mujēm ām.

⁶ Herodes ma kajuk Pedro o'ḡujēm daomūnmūnap'a bewi kabia buje. Deus ekawēn tojtjt'ukat pit o'ḡujēm ixima be. Deus ekawēn tojtjt'ukat oajēm Pedro kay ixexima be. Pedro ixet osunuy daomūnmūnap'a be. Ixet osunuy xepxep sorarayū pidase. Cem ibakirik osunuy correntebum. Sorara aḡ osunuy daomūnmūnap'a exīntabi be -badiat exīntabi be. Wara'at tak kacūḡ kadiat exīntabi be osunuy aḡ. ⁷ Deus ekawēn tojtjt'ukat o'jebapuk daomūnmūnap'a be. Dao ma oikabia. Jok. Pedro o'ḡujok jebum. O'ḡuwurūḡ.

⁸ — Daosuw! E'āy! — io'e cebe. — Ekop cuy okay! — io'e.

O'jebuedu ipi ju Pedro bakirikpu -correntebu. Waram o'jekawēn Pedro eju Deus ekawēn tojtjt'ukat.

— Ekamixa juy eḡuōm — io'e. — Eyuk cuy eḡuōm — io'e cebe.

Pedro o'ḡuōm.

— Eekabek cuy eḡuōm — io'e. — Ejot cuy onomuju — io'e cebe.

⁹ Ḣe buje o'jēm ip -Pedro, Deus ekawēn tojtjt'ukat tak. O'jēm ip ya bewi. Pedro o'jēm Deus ekawēn tojtjt'ukat nomuju. Kacūḡ kay ip o'ju. Pedro itaybit ḡu o'e apēn o'jebapuk okay iam. Tūybe wexeybi Deus ekawēn tojtjt'ukat cocom ōn iān o'e.

¹⁰ O'kap ip koapayū deḡ sorarayū deḡ. Waram o'ju ip. Āmap sorarayū deḡ ip o'kap. Oajēm ip kacūḡ kadiat exīntabi be. Yoboḡ cīcā osunuy. Cem cīcā osu-

nuy. Icaat muḡēḡē osunuy. Ixe exīntabi kacūḡ kay wuyjēmjēmap exīntabi osunuy. Ixe exīntabi jekpiwa ma o'jewenomudip'uk. O'kap ip cedaḡ. Kacūḡ pe ip o'jēm. Uk'a ukpibubu daḡ ip o'kap. Deus ekawēn tojotjot'ukat Pedro o'suiwat. ¹¹ Pedro apēn o'jebapuk cekay iam o'yaḡuysan ḡebye bit.

— Wetaybit ḡasū apēn o'jebapuk okay iam — io'e jewebe ma. — Deus jekawēn tojotjot'ukat o'ḡudot omujēm ām daomūnmūnap'a bewi — io'e jewebe ma. — Ixe omujēm Herodes pe waokaap puxim — io'e. — Judeuyū ma waoka ojuy. Deus pit odaxijo ixeyū be waokaap puxim — io'e jewebe ma.

¹² Pedro o'ju Maria duk'a kay. Ixe Maria João Marcos xi osunuy. Ade Jesus kay itabucayū awerom osodop ip ixē duk'a be. Deus eju kawēnwēn o'e ip.

— Daomūnmūnap'a bewi Pedro juy eḡujēm — i'o'e'e ip Deus pe.

¹³ Pedro o'ju xīntabi be. Taḡtaḡtaḡ io'e xīntabi be. O'tomuwā tomudip'ukan. Ayacat oajēm xīntabi beyaypan'isuat. Rode i ibutet osunuy. Oajēm abu taḡtaḡtaḡ io'e iap co am. ¹⁴ Ixe yaypan'isuat itaybit o'e Pedro a'ōm. Icokcok cīcā o'e. Xīntabi o'tomudip'uk ḡu. Badi oōm jebureyū mukūyjom-itabucayū mukūyjom.

— Pedro omuy xīntabi be — io'e cebe ip.

¹⁵ — Ḡujeat ḡu eku! — io'e ip. — Pedro ḡu eku. Adaodao ma ece — io'e ip.

— Pedro ma eku — io'e. — Wadaodao ḡu. Pedro ma.

— Pedro ḡu eku — io'e ip. — Pedro eju jeku'ukat acā eku-Deus ekawēn tojotjot'ukat acā — io'e ip.

¹⁶ Pedro taḡtaḡtaḡ'i mabuk osunuy. Iōm pin o'e. Ibun pima acā xīntabi o'tomudip'uk ip. Pedro o'jojajo ip. Itabēḡbēḡ ip ijojom o'e.

— Pedro ma! — io'e ip.

Yaḡuybabi'ūm ip o'e. ¹⁷ Imēnpit Pedro jebum o'e wēḡwēḡ'i ya'ōkareyap puxim.

Apēn Deus o'ḡujēmat daomūnmūnap'a bewi iap o'ḡuwēn cebe ip Pedro.

— Deus omujēmap cuy epeḡuwēn Tiago be, wa-

rara'acayū be dak wuykitpitpiyū be- -itabucayū be — io'e.

O'jēm ibocewi. Wara'at ka kay o'ju.

¹⁸ Kabia buje Pedro o'tobuxik ġu taomūnmūnyū wiwi'ukayū. Yağuybabi'ūm'ūm ip o'e Pedro ip o'tobuxik ġu ya be buye.

— Poma xe'e o'ju Pedro? — io'e ip. — O'jena-pōn xe'e? — io'e ip jewewebe.

¹⁹ Herodes Pedro o'ğudocat jewekay. Te'e ma jebuywatwat'ukayū o'ğuju Pedro kudadam. Tobuxik pa'ore o'e ip.

Ibocewi Herodes o'jekawēn Pedro wiwim osodop'iaiyū be.

— Apēn Pedro o'jēm daomūnmūnap'a bewi? — io'e.

Cede ba'ore o'e ip. Imēnpuye Herodes jebuywatwat'ukayū o'ğuju Pedro wiwim osodop'iaiyū aokaan.

Herodes o'jēm Judéia eipi bewi. Cesaréia ka kay o'ju. Ibo ka be osunuy.

²⁰ Herodes itakoma o'e Tiro ka watwat kay, Sidom ka watwat kay dak. Kuy bima Herodes ebekitkiyū ixat tujowatwat'uk ip osodop Tiro ka watwat xan, Sidom ka watwat xan tak, ixat'ūm ip ika be buye. Ġasū bit oibu'un ip ixat tujowat am, Herodes itakoma buye. Imēneju Tiro ka watwat o'je'awero ip Sidom ka watwat eju. Ixeyū Herodes buywatwat'ukat purem o'e. Ibuywatwat'ukat putet Blasto i osunuy. Ya'ōbuyxiat osunuy. O'ju ip Blasto kay. O'jekawēn ip Blasto eju.

— Ocebuywan cuy ece — io'e ip cebe. — Eceka-wēn cuy Herodes eju ocewebeam — io'e ip. — Ocebikuy ixē be waram oceburem i'e am — io'e ip. O'jekawēn ceweju Herodes mudinap ojuy. Herodes tak kabia o'ğuweğūn jekawēn ām jebekitkiyū eju.

²¹ Ixe ekabia bima ade jījā iboceayū o'je'awero ip cekay. O'je'awero ip Herodes a'ījo am. Herodes jesay o'ğūōm- -idip cīcāat. Oabik ipi kukukat abikbikap pe. Idip cīcāat pe oabik. O'jekawēn cīcā aweromayū be. Kawēnwēn pima aweromayū o'jewāwā ip ya'ōberen.

²² — Aḡokatkat ḡu tekun-ocewaju kawēnwēnat-Deus acā! — i napa ma o'e ip.

Ixe Herodes jewexe ya'ōbuyxi jījā.

— Deus ḡu ōn. Deus kukap puxim ḡu juy epe'e okuḡ — i'ūmḡu o'e. — Deus acā ya'ōbuyxi-ōn pit ka'ūma — i'ūmḡu o'e cebe ip.

²³ Imēnpuye Deus ekawēn tojtjt'ukat Herodes o'ḡu-wātaxipin. Nasēḡpu o'tūnpu'o'o. Oe'ū.

²⁴ Imēneju adeayū Deus ekawēn o'ya'ījojo ip. Soat kaka daḡayū o'ya'ījojo ip.

²⁵ Barnabé, Saulo dak dinheiro o'tujowat Jesus ebekitkiyū be- -Jerusalém ka beayū be.

13 Dinheiro ūm puje ip o'jepit Antioquia ka kay. João Marcos o'ju cewaju ip. Deus ekawēn muwēnuwēn'ukayū osodop ip Antioquia ka be, Deus ekawēn imutaybitbin'ukayū dak. Ibūrū ma ibutet osodop ip: Barnabé, i. Simão i, Lúcio i, Manaém i, Saulo i. Ibūrū ma ibutet osodop ip. Simão xepxep putet osunuy. Wara'at ibutet Topayōn i osunuy. Lúcio Cirene ka bewiat osunuy. Manaém o'yaypan Herodes eju, Galiléia eipi kukukat eju.

² Deus biōḡbuk o'jekawēn ixeyū aḡokatkayū eju. Awerom ip osodop. Deus eju kawēnwēn pima, jekpiwan ma jewemurenuren pima dak, Deus biōḡbuk o'jekawēn cewaju ip.

— Ōn ma kuy Barnabé otaē kapik am owebeam, Saulo dak — io'e. — Imēnpuye ixeyū juy epeḡujēm kapik am owebeam — io'e cebe ip.

³ Deus eju kawēnwēn pima, jewemurenuren pima dak, Deus ekawēn muwēnuwēn'ukayū Barnabé o'ḡujēm ibocewi, Saulo dak. O'jewebumōḡ ip Saulo abi jeje, Barnabé abi jeje dak. Imēn o'ḡujēm ip Deus a'ōbi.

⁴ - ⁵ Imuju'ibiyū o'ju Chipre eipi kay- -tip'aweroroboḡ kay. Tip'aweroroboḡ putet Chipre i osunuy. Saulo o'ju Barnabé eju. João Marcos o'ju ixeyū

buywatwat'ukan. O'ju ip apēn Deus biōḡbuk o'e ce-be ip iap taḡ. O'ju ip Seléucia ka daḡ Chipre eipi kay cum pima. Seléucia ka tiboḡcīcāati wābū osunuy. Oajēm ip. Jay. Oōm ip kobexixi be Seléucia ka be bima. O'timudek ip kobexixi daḡ. Oajēm ip Salamina ka be -tip'aweroroḡ pe.

Iboce yajēm puje Deus ekawēn o'ḡuwēnuwēn ip. Oōm ip Judeuyū e'aweroroap'a be -Deus eju kawēnwēnap'a be. Deus ekawēn muwēn ām ip oōm. ^{6 - 8} Soat tip'aweroro daḡ oekuku ip Deus ekawēn muwēnuwēn. Pafos ka be ip oajēm. Wamoat o'tobuxik ip ibo ka be. Wamoat putet Barjesus i osunuy. Barjesus xepxep ibutet osunuy. Wara'at ibutet Elimas i osunuy. Judeu osunuy wamoat. Ibukaypat osunuy. Ixe Barjesus tip'aweroroḡ watwat muḡuykuku'uk osunuy.

— Deus ekawēn muwēnuwēn'ukat ōn — io'e'e cebe ip napa ma.

Ixe wamoat Sérgio Paulo eju osunuy -iecuḡap eju. Sérgio Paulo itaybit cīcāat osunuy.

Ḡebuje Sérgio Paulo Barnabéyū o'tomuwā. Deus ekawēn co am o'tomuwā ip.

— Deus ekawēn cuy eḡuwēn owebe — Sérgio Paulo o'e cebe ip.

Sérgio Paulo ma Deus ekawēn co pin cīcā osunuy. Barjesus pit ibu'u o'e Sérgio Paulo be Deus ekawēn coan. Imēnpuye Barjesus Barnabéyū awēḡ o'yawēḡmukērērērēn. O'yawēḡmukērērērēn ibu'u jījā buye Sérgio Paulo be Jesus kay itabut am. Barjesus Sérgio Paulo mubu'un ojuy osunuy Jesus kay itabucap puxim.

^{9 - 12} Ḡebuje Saulo o'jeak cīcā wamoat kay - Barjesus kay. Kūyjobit cīcā o'e Deus biōḡbuk a'ō kay. Ya'ōpuruḡ o'jekawēn Barjesus pe -wamoat pe.

— Satanás ebekit ēn — io'e. — Xipacat kay ḡu ēn -pūḡ em tak ka'ūma — io'e. — Wuymuḡuykukukum ēn — io'e. — Soat em ēn ikērēat mujurūḡrūḡ — io'e. — Deus e ie cūḡ. Ēn pit wara'acayū mubu'u'un Deus e daḡ cekup puxim ip. Ēn ikērēat mujurūḡrūḡap epererem ḡu. Imēnpuye Deus ipiat sup'ajoat ewebe ḡasū — io'e. — Deus jetamu'ūm

cuk adi ikērēat eġjurūrūġ iap teim. Ade kabia ġu eta'ūm ecesūy pūġpūġ ā — io'e wamoat pe- -Barjesus pe.

Wamoat dao ma o'suta'ūm. Wuyjojom ġu o'e. Warara'acat kudadam o'e jeba co am- -jedujowat am. Imēneju iecuġap Sérgio Paulo oitabun Deus ekawēn kay.

Deus ekawēn imutaybitbin osodop ip Barnabéyū. Paulo xepxep ibutet osunuy- -Saulo i, Paulo i dak. Paulo i ibutet osunuy Grego a'ōm. Saulo i ibutet osunuy Hebreu a'ōm. Sérgio Paulo wuykukukat ekawēn kay jījā osunuy.

¹³ Ġebuje Paulo o'jēm Pafos ka bewi, cewejuayū dak. O'ju ip Perge ka kay Panfília eipi beatka kay. Kobexixi daġ ip o'ju.

Ġebuje João Marcos o'jepit Jerusalém ka kay. Oibu'un Paulo eju, Barnabé eju dak. O'jeok ceweju-wi ip.

¹⁴ Ġebuje Paulo oajēm Antioquia ka kay, Barnabé dak. Ijop Antioquia ka Síria eipi be ġu osunuy- -Pisídia eipi be osunuy.

Sábado bima o'ju ip Judeuyū e'aweroroap'a kay- -Deus eju kawēnwēnap'a kay. Oabik ip. ¹⁵ Moisés ekawēntup o'tupcoco ip, Deus ekawēn muwēnuwēn-'ukayū ekawēntup tak. Uk'a kukukayū o'jekawēn Pauloyū eju.

— Ocebureyū — io'e. — Wuymucokcok am Deus ekawēn muwēn pin pima juy epeyekawēn — io'e ip.

¹⁶ Ġebuje Paulo o'āy jekawēn ām. Wēġwēġ'i o'e jebum iġo'a beayū muymūġ ām. O'jekawēn cebe ip.

— Tapupuyū — io'e. — Pūġpūġ ey'in Israel naxeġebitbit- -Judeuyū. Warara'acayū Deus kay eye-tabut Judeuyū etabucap puxim — io'e. — Eya'ōpi-cūġcūġ cuy wa'ō kay — io'e. ¹⁷ — Deus kuyjeayū o'taē wuy'in. Judeuyū ma o'taē jebekitkiyūm. Wuyeta-but ixé Deus kay — io'e. — Deus ip o'ġu'acoġ cīcā Egito eipi be bima — io'e. — Xipan cīcā ip o'jukuk. Egito eipi bewi ip o'tujujēm, ya'ōbaca jījā buye.

¹⁸ Uk'a'ūmat taġ oekuku ip pūġ koato ġu- -40 koato bun. Deus yukpiceġe ġu bit ikuġ ip osunuy kūyjobit

ġu ma'ġu ip. ¹⁹ Deus 7 be ipi watwat o'ġu'ūmu'ūm Canaā eipi watwat. Imu'ūm puje cebekitkit Canaā eipi o'jat jeipim — io'e.

²⁰ — Gebuje Deus ibimāmāmāayū ekawēn coco-'ukayū o'jomuy kuyayū kukukan. Canaā eipi be osodop ip ade jġā koato-450 koato. Jekawēn muwēnuwēn'ukayū o'jomuy ġuyjom ixeyū mukūyjojo'ukayūm.

²¹ Samuel koap osunuy Deus ekawēn muwēnuwēn'ukan. Guyjom kuyjeayū o'e Deus pe: "Aġokatkat cuy ejomuy ocekkukan," i — io'e Paulo.

— Imēnpuye Deus Saulo o'jomuy Canaā eipi watwat kukukan kuyayū kukukan. Saulo Quis ipot osunuy. Ixe Benjamim diwat osunuy. Ixe Canaā eipi watwat kukukat osunuy 40 koato. ²² Deus oibu'un Saulo be jebekitkiyū kukukan. Ixe o'ju'uk jebekitkit kukap puxim — io'e.

— Gebuje Deus Davi o'jomuy jebekitkit kukukan Saulo dieġ. Davi Deus ebekitkit kukukat osunuy Deus bikuyap taġ. Deus imēn Davi o'ġuwēn:

Wetaybit Davi soat em obikuyap taġ
jekukum iam, i. Ixe Jessé ipot wa'ō
kay jekukum soat em ma, i.

²³ Deus imēn Davi o'ġuwēn. Deus o'e kuyje:

Davi naxeġebitbit oġuju eydaxijo am,
i — io'e Paulo.

— Gebuje Deus Jesus o'ġuju Judeuyū daxijo am apēn cuk adi o'e'e'e iap taġ — io'e. — Jesus Davi naxeġebit osunuy. ²⁴ João Batista oajēm Jesus adeayū mutaybitbin awap. Imubatisasan oeku. Ixe João Batista o'e Judeuyū be: "Eyġuycūġcūġ cuy epesop ikērēat kuġ puye," i. "Ikērēat mujurūġrūġap cuy epeyepere," i. "Epeyewemubatisasaan cuy," i.

²⁵ — João jekapikap eperem pima, imēn o'e Judeuyū be: "Tūybe ēn Deus emunaē iān eyju e'em owebe," i. "Eyxe ōn Deus emunaē," i. "Eyemuwiwi ġu ōn pit," i. "Ya'ōbuyxi jġāat omuyku onomuju," i. "Ōn pit wa'ōbuyxi ġu," i. "Cedaġ ġu owebe we'atoro am suiuk muwekap am wa'ōbuyxi'ūm puye," i. João imēn o'e — io'e Paulo.

²⁶ — Obureyū — io'e. — Pūġpūġ ey'in Abraão naxeġebitbit. Warara'acat ey'in Judeuyū ġu. Inaka

eyetabut Deus kay Judeuyū etabucap co'i — io'e. — Deus wuydaxijoap awēg o'yawēgmuwēn wuywebe — io'e. ²⁷ — Imēnpit Jerusalém ka watwat itaybit ġu o'e Jesus wuydaxijojo'ukat iam. Ika kukukayū dak itaybit ġu o'e ip iboam. Soat jebodoydoyap kabia be Judeuyū ya'ōberen tupcoco'uk ip osodop je'awero-roap'a be -Deus ekawēn muwēnuwēn'ukat emudup-mubararaktup. Soat Sábado bima ip tupcoco'uk osodop. Imēnpit itaybit ġu ip apēgape xe'e ijoptup ekawēn iam. "Jesus cuy je'ū ikērēat kuḡ puye," io'e ip napa ma. Kuyje Deus ekawēn muwēnuwēn'ukayū o'e'e'e iap taḡ Jesus o'yaoka ip — io'e Paulo.

²⁸ — Ixeyū mo o'jekawēn Pilatos eju-iecugāp eju. Jesus ikērēat o'jukuk ġu- -pūḡ em tak ka'ūma. Inaka "Jesus cuy eyaokaat," i mo o'e ip Pilatos pe. ²⁹ Imēn ibararak opop Deus ekawēn tup pe. Soan o'e'e'e ip Jesus pe apēn Deus emunaē jukuk ip iaptup ekawēn taḡ. Apēn ip o'tupmubarararak iap ekawēn taḡ o'jebapuk ḡasū — io'e.

— Iḡodup ekawēn taḡ soat ebapuk puje wara-ra'acayū ma Jesus'ūm jebit mo o'ḡukop korosa eju-wi. Witabikūy be adi o'jomōḡ ip. ³⁰ Deus pit waram Jesus o'ḡutait. O'ḡuyu ce'ū'ūayū dopap pewi — io'e.

³¹ — Ġebuje waram o'jetait'iat o'jojojo ip Jesus eju oekukuiayū. Ibun oeku ip ceweju- -Galiléia eipi bewi ceweju o'jēm'iaiyū- -Jerusalém ka kay ceweju o'ju'iaiyū. Ade kabia ceweju oeku ip waram o'jetait'iat eju — io'e.

— Ġasū ixeyū ma icēmān Jesus muwēnuwēn Judeuyū be. O'jojojo ip iap muwēnuwēn ip ḡasū. ^{32 - 33} Ocejū dak kawēn idipat muwēnuwēn eywebe. "Waram wemunaē oḡutait waram ce'ūap puxim," io'e Deus kuyje wuydobuyū'ūm'ūm pe. Ġasū Jesus o'ḡutait apēn cuk adi o'e'e'e iap taḡ. Imēn e'em Deus ekawēntup- -Salmodup- -jebidododonaptup- -xepxeptup- atup:

"Ēn okpot," i'e'em Deus, i. "Ġasū ōn ebay oce," i'e'em Deus, i.

Imēn e'em Salmodup.

³⁴ — Kuyje Deus o'e: "Waram wemunaē oḡutait

waram ce'ūap puxim," i. Imēn e'em Deus ekawēn tup:

"Xipacat oġūm ewebe," i juk adi oce Davi be, i. "Obu'u ġu xipacat ūm ām ewebe," i juk adi oce Davi be, i. Xipacat oġūm ewebe apēn cuk adi ocecece Davi be iap puxim, i.

³⁵ — Imēn e'em wara'atup pe jebibododonaptup- - Salmodup:

Wetaybit ekpot'ūm iwan ġu ēn ierep ap puxim iam, i. A'ō kay kūyjobit cīcāat iwan ġu ēn, i.

Ixe imēn Jesus o'ġuwēn. Imēn e'em Salmodup — io'e. ³⁶ — Icēmān Davi'ūm oe'ū. Itabēġ puje Deus ekawēn taġ oekukuku — io'e. — Icēmān Davi'ūm o'jomōġ ip witabikūy be jedobuyū'ūm'ūm etaypi tēġ. Davi'ūm ma oierrep. ³⁷ Jesus'ūm pit oierrep ġu Deus waram o'ġutait puye — io'e.

³⁸ — Obureyū — io'e. — Eyetaybin cuy epesop Deus ikērēat uk'uġ wuywebewi Jesus oe'ū buye iam. Ixe Jesus muwēnuwēn ōn eywebe. ³⁹ Moisés ekawēn taġ jekukum pima wuya'ōbaca ġu juk adi ajop waram ikērēat kukap puxim. Jesus kay wuyetabut pima bit Deus ja'ōbacaap ūmūm wuywebe waram ikērēat kukap puxim — io'e.

⁴⁰ · ⁴¹ Imēn e'em Deus ekawēn muwēnuwēn'ukayū emudupmubararaktup- -kuyayū emudupmubararaktup:

Eyetabut'ūm cīcā eyju! i. Eybu'u jījā eyetabut am okay, i. Eyetabēġbēġ cuy epesop! Epeap eyetabut'ūm puye, i. Ōn Deus. Eywebe i'e ba'oreap oġubapuk eyetabutpe, i. Imēnpit eyetabut'ūm okay epe'e, i. Warara'acat pe eymukūyjo buje dak, eyetabut'ūm okay epe'e, i.

Imēn e'em Deus ekawēn muwēnuwēn'ukayū emudupmubararaktup — Paulo o'e.

— Eyday'em'um cuy epesop Deus ekawēn muwēnuwēn'ukayū o'e'e iap taġ je'babupukap puxim eywebe — io'e cebe ip- -Judeuyū be.

⁴² Je'aweroroap'a bewi Pauloyū jēm puje, Judeuyū o'jekawēn ceweju ip.

— Waram cuy epe'e ocemukūyjom iboam — io'e ip. — Wara'at Sábado juy ejot ġuto — io'e ip Judeuyū.

⁴³ Ce'awero epere buje, tak ġu ip o'ju Pauloyū kay- -Judeuyū, Judeu'ūmayū dak- -Judeuyū etabucap co'i Deus kayayū. Pauloyū o'jekawēn ceweju ip.

— Soat em ma Deus xipan wuykuġ — io'e ip. — Soat em cuy ġebum epesop iboap kay — io'e ip Pauloyū.

⁴⁴ Waram pimaat esábado, tak ġu o'je'awero Deus ekawēn com iġo ka beayū.

⁴⁵ Adeayū e'aweroap tobuxik puje Judeuyū oita-butkarey Pauloyū kay. Paulo ip o'ya'ōmuwarururun-- Jesus kay itabut'ūmayū. O'jomuymuy jijā ip.

⁴⁶ Ġebuje Pauloyū iparara'ūm cīcā o'jekawēn ceweju ip- -Judeuyū eju.

— Cedaġ osunuy ocewebe koam Deus ekawēn muwēn ām eywebe, eyju Judeuyū buye — io'e. — Cekawēn kay ġu eyju bit — io'e. — Eybu'u Jesus pe eydaxijoan, eywebe ipiat'ajoap puxim — io'e. — Eybu'u eyaġuyisum eyekuam — io'e. — Imēnpuye warara'acat pe juy oceġuwēn Deus ekawēn- -Judeu'ūmayū be — io'e. ⁴⁷ — Imēġām Deus cuk ocemuju. Kuyje Isaias Cristo o'ġuwēn. Imēn o'e:

On cuk enaē wekawēn muwēn ām Judeu'ūmayū be, i. Kabia buje wuyetaybit wuyeku am, i. Imēnpuxim wekawēn co buje Judeu'ūmayū itaybit je'e apēn Deus soat taxijojom iam, i.

Soat wekawēn kayayū otaxijo, i.

Imēn Deus o'e kuyje — io'e Paulo. — Imēnpuye Judeu'ūmayū be juy oceġuwēn Deus ekawēn — Paulo o'e.

⁴⁸ Judeu'ūmayū icokcok cīcā ip o'e iboap co buje.

— Ka'ūmġu Deus ekawēn co'i xipat — io'e ip. Soat itabut o'e Jesus kay, jexe jenuy am Deus emunaēyū.

⁴⁹ Ġebuje Jesus kay itabucayū wuykukukat eka-

wên o'ḡuwēnuwēn soat pe itaybit'ūmayū be. Soat ibo eipi daḡ oekuku ip wuykukukat ekawēn muwēnuwēn.

⁵⁰ Judeuyū oitakomān Pauloyū kay. O'jewāwē ip aḡokatkayū eju-ibo ka kukukayū eju. Aoyū eju dak o'jewāwē ip-ya'ōbuyxiayū eju. Ixeyū aoyū Deus a'ō kay ip osodop. Imēnpit itakoma ip o'e Pauloyū kay.

Pauloyū ip o'yawēḡmukērērērēn. Imēnpuye soat ip itakoma jījā o'e Pauloyū kay. Jeipi bewi ip o'ḡujēm. ⁵¹ O'jēm Pauloyū. Jesandália ip o'ḡupoyoy ibo ka bewi jejēm puje "Eyukpiwat Deus xe ocekawēn co pin'ūm puye" i'e am ibo ka watwat pe. ⁵² Itabucayū bit icokcok cīcā o'e- -Antioquia ka beayū. Ibiōḡbuk xipacat cebe ip osunuy.

14 Icônio ka kay ip o'ju Pauloyū. Oōm ip Judeuyū e'aweroroap'a be- -Deus eju kawēnwēnap'a be. Kawēn idipat o'ḡuwēn ip iḡo'a be. Imēnpuye tak ḡu ip oitabun Jesus kay- -Judeuyū, Judeu'ūmayū dak. ² Judeuyū kukukayū bit Pauloyū o'yawēḡmukērērērēn- -itabut'ūmayū. O'yawēḡmukērērērēn ip Judeu'ūmayū be cekayap puxim. Imēnpuye itakoma o'e ip Pauloyū kay Judeu'ūmayū.

³ Gebuje Pauloyū wuykukukat o'ḡuwēnuwēn soat pe- -Icônio ka watwat pe. Ibun cīcā ip osodop ibo ka be. Pūḡ kabia ḡu ip osodop Icônio ka be, ade oitabun Jesus kay buye. Iparara'ūma wuykukukat o'ḡuwēnuwēn ip.

— Deus xipan soat kuḡ wuykuḡ — io'e'e ip. Wuywebe i'e ba'oreap o'ḡubapukpuk ip Deus a'ōbi. Deus a'ōbacaap o'ḡubapukpuk ip soat etabutpe. Deus ibo ka watwat o'ḡutabun Pauloyū ekawēn kay.

— Paulo icēmān e'em — io'e ip.

⁴ Imēneju pūḡ taḡ ḡu o'e ip Icônio ka watwat- -wara'at taḡtaḡtaḡ ma. Pūḡpūḡ ixeyū'in Judeuyū kay ip o'e. Warara'acayū bit Jesus emumujuyū kay o'e.

⁵ Gebuje pūḡpūḡ Icônio ka watwat o'jekawēn jeka kukukayū eju- -Judeuyū, Judeu'ūmayū dak.

— Ikērēm cuy ip ajuḡuk. Ayabuḡbuḡ cuy ip wita'am — io'e ip.

⁶ Pauloyū jaoka ojuyap o'yawēgtobuxik. Imēnpuye dao ma o'jēm ip Icônio ka bewi. Wara'at ka kay ip o'ju. Listra ka kay ip o'ju Derbe ka kay dak, iğo ka korerenatka kay dak. Ixeyū ka Licaônia eipi be opop.

⁷ Kawēn idipat muwēnuwēn oekuku ip soat kaka dağ soat pe ya'ijo am.

⁸ Taokērēat kay Pauloyū oajēm. Taokērēat Listra ka be osunuy. Ikap'isum pin ma taokērē osunuy. Cexiğxiğ pa'ore osunuy. ⁹ Soat Paulo o'e'eiap o'ya'i-jojo. Paulo o'jeak cīcā cekay.

— Deus kay tekū itabut jemu'adaam — Paulo o'e jewebe ma.

¹⁰ O'jekawēn taokērēat pe.

— E'āy — io'e. — Cūğ'i ece — io'e ya'öberen cebe.

Taokērē tūibit o'āy. Xipan o'jexiğxiğ. ¹¹ Paulo be imu'ada buje, o'jewāwā ip ya'öberen Listra ka watwat.

— Deusyū o'kop wuykay! — io'e ip ja'öm. — Ağokatkayū jojo'i ip! — io'e ip jewebe.

Tūybe Pauloyū deusyū iān o'e ip. O'jewāwā ip Paulo a'öm ġu- -ja'öm ma.

¹² — Wuyedeus tekū! — io'e ip napa ma. — Júpiter tekū! — io'e ip Barnabé muwēnuwēn.

— Wuyedeus tedaku! — io'e ip napa ma. — Mercúrio tekū! — io'e ip Paulo muwēnuwēn.

Imēn o'e ip Paulo cekawēnxi buye. Listra ka watwat edeusbaro butet Júpiter i osunuy, Mercúrio i dak.

¹³ Ixeyū edeusbaro duk'a kukukat oajēm Pauloyū kay- -Júpiter tuk'a kukukat. Biopak o'tujuajēm. Yao-ka ojuy ip imupik am Pauloyū wap. Tūybe deus iān o'e ip. Tumūntitit o'titujuajēm biopak akārāsū eju titmukirik am Pauloyū ya'öbuyxi cekay ip puye. O'tujuajēm ip ağoka ekorara exıntabi be. Júpiter tuk'a iboce o'yanuy. Tūybe teyūku wuyedeusyū iān o'e ip. ¹⁴ Apēn e ojuy ip ocewebe iam jetaybin puje, yağuybabi'üm cīcā Pauloyū o'e.

— Tūybe oceju deusyū iān o'e ip — io'e Paulo jebure be- -Barnabé be.

Jesay o'ğuwek ip jağuybabi'ümap mubapuk am ibo ka watwat pe.

Pauloyū o'jedau ajëmayū kay. O'jekawën ceweju ip.

¹⁵ — Tapupuyū — io'e. — Imën ġu juy epe'e ocewebe! — io'e. — Deus ġu oceju -aġokatkayū acā! — io'e. — Oceju dak eyjo'i ma — io'e. — Ocajëm ijoce kawën idipat muwën âm eywebe. Eymubu'un am eyedeusbaroyū kay ocajëm ijoce. Te'e ma eyeta-but ixeyū kay — io'e ip Listra ka watwat pe. — Deusbaroyū kay eyetabucap cuy epeyepere! — io'e. — Deusat kay juy eyetabun epesop. Deusat soat em itait omuy. Ixe kay acā eyetabun cuy epesop — io'e. — Ixe kabi o'ġuġē, ipi dak. Tiboġ cīcāati dak o'ti-muġē. Ixe soat o'ġuġē -kabi daġat, ipi daġat tak, ti-boġ cīcāat daġat tak — i'e'em ip. ¹⁶ — Deus kuy-jeayū o'jepere jekpiwan ma ip jeku am -Judeuyū, Judeu'ūmayū dak — io'e. ¹⁷ — Imënpit Deus xipacan e'e'uk osunuy soat peam ijodiat peam. Imën ôn soat podi ma xipat iam wuymutaybitbin. Ixe muba'at muajëmjëm kabi bewi wuywebe. Ixe kadai mu'aypan wuywebe i'o am. Deus soat em wuyemukaypin-put ūmūm wuywebe wuymucokcok am. Deus imën xipan wuykuġ ibikuy wuywebe wuyetabut am cekay buye — io'e ip.

Imën Paulo Listra ka watwat o'ġutaybin Deus eka-wën.

¹⁸ Listra ka watwat biopak aoka ojuy jījā tūybe Pauloyū deusyū iān o'e ip puye. Pauloyū bit o'ġu-bu'un ip biopak aoka am.

¹⁹ Judeuyū oajëm Pauloyū kay -itabut'ūmayū. Oajëm ip Antioquia ka bewi, Icônio ka bewi dak. Listra ka be ip oajëm. Ade o'ġubu'un ip Pauloyū kay. O'ġutakomān ip cekay ip.

Imënpuye Paulo o'yabuġbuġ ip yaokaap ojuy. Kururuġ Paulo o'tujujëm ip jeka bewi -Listra ka bewi. Kacūġpe o'jepere ip. Tūybe oe'ū iān o'e ip.

²⁰ Paulo bit o'āy Jesus kay itabucayū cekay ce'awero buje. Waram oōm Listra ka be.

Kuyaje Paulo o'kop Derbe ka be Barnabé eju.

²¹ Kawën idipat o'ġuwēnuwën ip Derbe ka watwat pe. Imënpuye tak ġu oitabun ip Jesus kay.

Gebuje o'jepit ip jedocap e dağ ma. Liatra ka dağ ip o'jepit Icônio ka dağ tak, Antioquia ka dağ tak. ²² Jesus a'òkayayū jojom ip o'jepit. Ixeyū a'òmucanucan oekuku ip. Yawēwēm ip oekuku. Paulo o'jekawēn ceweju ip.

— Jesus kay eyetabucap cuy epeyepere ġu — io'e. — Jesus kay wuyetabut pima, warara'acat ipiat supi'ajoat wuywebe — io'e.

— Guyjom pit Deus xe acesop. Ixe soat kukukan pima, cexe ma acesop soat ya'ō kay kūyjobit pima — io'e cebe ip.

Paulo soat kaka dağ oeku Barnabé eju.

²³ Ixeyū dak ağokatkayū o'taē Jesus kay itabucayū kukukayūm. Soat kaka dağwi o'taē ip. Jekpiwa ma o'jewemurun ip jekawēn ām Deus eju. Deus eju o'jekawēn ip o'taē'ibiyū beam. Imēn o'jekawēn ip Deus eju:

— Ocekukukat — io'e ip Jesus pe. — Iteyū ağokatkayū juy ejukuk xipan, ekay itabut ip puye — io'e ip Deus pe.

²⁴ O'kop ip Panfflia eipi dağ, Pisídia eipi dağ tak.

²⁵ Gebuje waram Deus ekawēn o'ğuwēnuwēn ip Perge ka be. Atália ka dağ ip o'kop.

²⁶ Antioquia ka kay ip o'ju waram. Kobexixi dağ ip o'ju. Koap jejēmap ka be ip-oajēm- -Antioquia ka be.

— Xipan cuy ixeyū ejukuk kapikpiğ pima- -ekawēn muwēnuwēn pima — i mo o'e itabucayū Deus pe ibo ka be koap cēm pima.

²⁷ Oajēm ip ma'ğuto Antioquia ka be jekapikap o'jepere ip puye. Paulo ekawēn co am o'je'awero ip soat Jesus a'òkayayū.

Gebuje Paulo apēn Deus ixeyū buywatwanap o'ğuwēn cebe ip. Apēn soat kaka dağ oekuku ip iap o'ğuwēn.

— Deus juk adi oca'òmucanucan osunuy Jesus muwēnuwēn pima — io'e. — Judeu'ūmayū be oemuju jekawēn muwēn ām — io'e. — Tak ġu ip oita-bun Jesus kay — io'e cebe ip.

²⁸ Ibo ka be osodop ip ūm kaxi. Jesus a'ōkayayū xe osodop ip ibun ma.

15 Judeuyū o'ju Antioquia ka kay- -Judéia eipi bewiyū. Oajēm ip.

Gebuje cedaḡ ḡu Jesus kay itabucayū o'ḡutaybin ip- -Judeu'ūmayū o'ḡutaybin ip.

— Moisés ekawēn taḡ eyedaypu'aḡobixeedakat'ūm pima, Deus jeydaxijo ḡu — io'e ip napa ma itabucayū be.

² Imēneju Pauloyū o'jewa'ōxikxik cīcā ceweju ip Judéia eipi bewiacat eju. Imēnpuye Jesus a'ōkayayū itaybin pin o'e ip apēn ḡu paxi cūḡ ma wuyxe iam.

— Acesuxeedakat tu Moisés ekawēn taḡ? Acesuxeedakat ḡu xe'e? — io'e ip jewewebe.

Imēnpuye ip Paulo o'ḡuju Jerusalém ka be, Barnabé dak, jebureyū dak.

— Jerusalém ka be juy epeju — io'e ip. — Epeju juy jekawēn ām Jesus emumujuyū eju- -itabucayū kukukayū eju dak — io'e ip. — Epeyewawē juy ceweju ip. “Acesuxeedakat tu Moisés ekawēn taḡ? Acesuxeedakat ḡu xe'e?” i juy epe'e cebe ip — io'e ip.

³ Pauloyū o'jewemuwēn cebe ip. O'jēm ip Antioquia ka bewi.

O'ju ip itabucayū kukukayū kay. Cucum pima Fenícia eipi daḡ o'kop ip, Samaria eipi daḡ tak. Soat ka daḡ o'je'awero ip itabucayū eju cucum pima.

— Ade jījā Judeu'ūmayū kuyap jetabucap o'jepere ip — io'e ip. — Jesus kay ip oitabun — Pauloyū o'e cebe ip.

Icokcok cīcā ip o'e itabucayū iboap awēḡ tobuxik puje- -Fenícia eipi watwat, Samaria eipi watwat tak.

⁴ Oajēm ip Jerusalém ka be. O'ju ip itabucayū kukukayū kay. Itabucayū kukukayū ip o'tobede, Jesus emumujuyū dak, wara'acayū itabucayū dak. Itabucayū kukukayū o'je'awero ip cexe.

Gebuje Paulo o'jekawēn cebe ip.

— Deus cuk adi ocebuywatwan kawēn idipat

muwēn ām — io'e. — Pūḡ ḡu Judeu'ūmat oitabun Jesus kay- -ade jījā ma! — io'e Paulo.

⁵ Pūḡpūḡ pit Fariseuyū o'āy Paulo mukorēm ām--Jesus kay itabucayū.

— Ixeyū dak cuy Moisés ekawēn taḡ jeku, itabut ma'ḡu ip Jesus kay — io'e ip. — Jedaypu'aḡobixee-dakat cuy ip cekawēn taḡ — io'e ip te'e ma.

Imēnpuye Pauloyū o'jewa'ōxikxik cīcā Fariseuyū eju.

⁶ Gebuje Jesus emumujuyū o'je'awero ip Jesus kay itabucayū kukukayū eju. O'jewawēwē jījā ip.

— Apēntak cedaḡ wuywebe Judeu'ūmayū mutay-bit am Jesus kay itabun ip puje? — io'e ip jewewe-be. — “Moisés ekawēn taḡ cuy epeku,” i du ace'e cebe ip? Imēn ḡu xe'e ace'e cebe ip? — io'e ip jewewe-be.

⁷ O'jekawēn cīcā ip jeweweju jewemudin ām. Ibun cīcā ip o'jewa'ōxikxik wara'at taḡtaḡtaḡ i'eap puxim.

Pedro o'jekawēn soat pe aweromayū be.

— Okitpitpityū — io'e. — Eya'ōpicūḡcūḡ cuy epesop wekawēn kay — io'e. — Kuy bima Deus onaē kawēn idipat muwēn ām Judeu'ūmayū be. Eyetaybit iboam — io'e. — Ixe mo omuju ibikuy osunuy ixeyū mutabut am jekay buye. ⁸ Deus itaybit apēn wuyju jewaḡuyḡuy iam — io'e.

— Ixe mo jebiōḡbuk o'ḡudot Judeu'ūmayū kay apēn wuykay o'ḡudot iap co'i. Imēn Judeu'ūmayū kay dak ōn iam wuymutaybitbin o'e Deus. ⁹ Soat ipi daḡayū ibit ma Deus xe. Soat jewejojo'i ma ip cexe. Imēnpuye Deus ikērēat o'ju'uk Judeu'ūmayū bewi Jesus kay ip itabut puye. O'ju'uk apēn wuywebewi ikērēat o'ju'uk iap co'i — io'e. ¹⁰ — “Cedaḡ ḡu Deus pe jebiōḡbuk muōm ām cebe ip, Moisés ekawēn taḡ ḡu ip puye,” i du eyju e'em? — Pedro o'e. — Iba'ore osunuy wuydobuyū'ūm'ūm pe ixe ekawēn taḡ jeku am. Wuywebe dak iba'ore. Iba'ore kuka o'e Judeu'ūmayū be dak. Imēnpuye “Moisés ekawēn taḡ cuy epeku,” i'ūmḡu juy ace cebe ip--Jesus kay itabun'isuayū be. ¹¹ Wuykukukat Jesus wuydaxijojom cekay wuyetabut puye. Wuydaxijojom xipan wuykuḡ puye. Imēnpuxim Judeu'ūmayū dak idaxijo itabun puje ip — Pedro o'e.

¹² Guyjom Pauloyū o'jekawēn aweromayū be.

— Deus mo ocemuju kawēn idipat muwēn ām Judeu'ūmayū be — io'e. — Deus a'ōbi juk adi wuywebe i'e ba'oreat oceḡubapukpuk soat etabutpe — io'e. — Deus soat podi ma ya'ōbaca iap juk adi oceḡubapukpuk itabutpe ip — io'e ip aweromayū be. Soat ip mūḡ osodop ya'ijojom.

¹³ Guyjom Tiago o'jekawēn aweromayū be.

— Okitpitpityū — io'e. — Eya'ōpicūḡcūḡ cuy epesop wekawēn kay. ¹⁴ Simāo Pedro ekawēn epeya'i-jojo kuy — io'e. — Deus xipan Judeu'ūmayū kuḡ iam wuymukūyjojo — io'e. — Deus Judeu'ūmayū o'taē itabut am jekay. Ixeyū dak o'taē jebekitkiyūm — io'e. ¹⁵ — Iboap o'jebapuk kuyayū ekawēn taḡ-Deus ekawēn muwēnuwēn'ukayū emudupmubararaktup ekawēn taḡ — io'e. — Imēn e'em iboaptup:

¹⁶ “Ōn Deus,” i. “Waram ocepit ya'at'ibit'a mudim am- -Davi duk'a mudim am,” i. “Yadipat'am je'e ma'ḡuto,” i. “Soat xe ijodiat xe wa'ō-buyxian oḡuy apēn Davi ya'ōbuyxi osunuy iap co'i,” i. “Obikuyap taḡ jeku ip waram,” i. ¹⁷ “Soat kaka daḡacat itabut je'e okay Judeu'ūmayū,” i. “Webekitkiyūm je'e ip,” i. ¹⁸ Imēn wuykukukat e'em, i. Kuyje ma iboap o'ḡuwēn, i.

Imēn e'em iboaptup — io'e Tiago. — Imēn cuk adi Deus ekawēn muwēnuwēn'ukayū o'e'e'e Deus a'ōbi — Tiago o'e.

¹⁹ — “Imēnpuye Judeu'ūmayū kaykay ḡu juy ajop,” i. ōn e'em — io'e Tiago. — “Jesus kay itabun'isuayū kaykay ḡu juy ajop,” i. ōn e'em — Tiago o'e. — Iboam acā juy ace Judeu'ūmayū be- itabun'isuayū be:

²⁰ Deusbaroyū wap iēnmōḡ'ibitēn cuy epesuēn'o ḡu, i. Wara'acat tayxi kaykay ḡu juy epesop, wara'at itop kaykay ḡu dak, i. Iēntoyteyatēn cuy epesuēn'o ḡu, i. Puca doy juy epetoykōn-kōn ḡu, i.

Iboam acā juy ace Judeu'ūmayū be -itabun'isuayū be — Tiago o'e.

²¹ — Kuy bin ma opop Moisés ekawēn wuy-mu-taybitbin'ukayū soat kaka dağ — io'e. — Gasū dak soat kaka dağ opop ip. Soat Sábado cekawēntup co-com ip wuy'eaweroroap'a be -Deus eju kawēnwēn-ap'a be. Iboam acā juy ace cebe ip — Tiago o'e.

— Imēn cuy ace! — io'e ip aweromayū.

²² - ²³ Soat ce'awero'ibiyū Tiago be jawēwēap kay ip o'e -soat Jesus emumujuyū, soat itabucayū kukukayū dak, soat itabucayū dak.

Gebuje Jesus emumujuyū cartadup o'tupmubarak itabucayū kukukayū. O'tupmubararak ip tup muju am warara'acayū awēwēaptum- itabucayū awēwēaptum- -Antioquia ka watwat awēwēaptum. Xepxep ağokatkayū o'ğuju ip cartadup tujowat am Antioquia ka watwat pe. Judas o'ğuju ip, Silas tak. Judas xepxep ibutet osunuy. Wara'at ibutet Barsabás i osunuy. Ixeyū xepxepayū ya'ōbuyxi ip osodop soat xe. Ixeyū xepxepayū cartadup o'tuptujowat Antioquia ka watwat pe. O'ju ip Paulo eju, Barnabé eju dak.

Cartadup imēn o'e:

Oceju Jesus emumujuyū, itabucayū kukukayū dak, wara'acat itabucayū dak, i. Eykitpitpiyū oceju, i. Kato mujujum oceju soat pe eywebe Judeu'ūmayū be, i. Kato mujujum oceju soat kaka dağacat pe - Antioquia ka watwat pe, Síría eipi watwat pe dak, i. ²⁴ Kuy bima ağokatkayū mo a'ğu eyağuyumba-bi'ūm'ūm oce'in, i. Gasū eyetaybit ğu apēn oceku cedağ iam, i. "Moisés ekawēn tağ eyedaypu'ağobixee-dakat'ūm pima, Deus jeydaxijo ğu," io'e ip napa ma eywebe, i. Oceju ğu mo a'ğu ixeyū oceğuju eykay, i. Ja'ōbi ma mo a'ğu ip o'ju eykay, i. ²⁵ Imēnpuye juk a'ğu oceje'awero pūğ tağ ma eyawē ām, i. Gasū xep-xep ağokatkayū ocetaē imuju am eyjom, i. Ixeyū cum Barnabé eju, Paulo eju dak, i. ²⁶ Pauloyū o'yaoka pin kuy bima, i. Inaka iparara'ūm ma wuykukukat Jesus Cristo muwēnuwēn oekuku ip, i. Imēnpuye ikukpin cīcā ip ocexe, i. ²⁷ Xepxepayū oceğuju eykay- -Judas, Silas tak, i. Ixeyū soat ğuwēn eywebe ğasū ocekawēn,

i. ²⁸ · ²⁹ Iboam acā oceju e'em eywebe: Deusbaroyū wap iēnmōg'ibitēn cuy epesuēn'o ġu, i. Puca doy juy epetoykōnkōn ġu, i. Iēntoyteyatēn cuy epesuēn'o ġu, i. Wara'at tayxi kaykay ġu juy epesop, wara'at itop kaykay ġu dak, i. Iboam acā juy oceju e'em eywebe, i. Iboap tağ jekukum pima, cedağ epeku. Eywātaxipi-pem ġu juy epesop. Ibūrū ma oceju e'em eywebe eyawēwēm, Deus biōğbuk tak eyawēwēm, i.

Imēn o'tupmubararak ip Judeu'ūmayū awēwēaptup itabucayū kukukayū Jerusalém ka be awerom pima.

³⁰ Gebuje taē'ibiyū cartadup o'tuptujowat ip Antioquia ka watwat kay- itabucayū kay. Judas o'tuptujowat, Silas eju. O'ju ip Barnabé eju, Paulo eju dak.

Yajēm puje soat itabucayū o'tomuwā ip je'awero am.

³¹ Gebuje ip o'tupūm cebe ip. Itabucayū kukukayū ya'ōberen o'tupcoco soat pe ya'ījo am. Soat ip icokcok o'e ibodup ekawēn co buje.

³² Judas, Silas tak itabucayū o'yawēwē. Antioquia ka watwat o'yawēwē ip. Deus ekawēn muwēnuwēn'ukayū osodop ip. Deus ekawēn ip o'ğutaybitbin. Imēnpuye biğ ma ip itabut o'e Jesus kay. Icocok ip o'e jetabucap kuğ. Pūğ kabia ġu osodop ip Antioquia ka be.

³³ Ibocewi o'jewemuwēn ip itabucayū be.

— Deus cuy xipan jeydujupit — itabucayū o'e cebe ip.

O'jepit ip Jerusalém ka be. Kuy bima o'ğuju'iyū kay ip o'jepit. ³⁴ Imēnpit Silas o'jepit ġu.

— Ijoce ma oğuy — io'e. — Ocepit ġu juy — io'e.

³⁵ Paulo dak Antioquia ka be osunuy, Barnabé dak. Wuykukukat ekawēn o'ğuwēnuwēn ip adeayū be. Jebureyū eju wuykukukat ekawēn o'ğuwēnuwēn ip.

³⁶ Ibun'ūm pima Paulo o'jekawēn Barnabé eju.

— Ga'a juy accepit — io'e. — Soat kaka dağ cuy aju- kuy bima Deus ekawēn ağuwēnuwēn iap kaka dağ — io'e. — Wuynomukay juy accepit waram Jesus

a'ōkayayū jom — io'e. — Ga'a accepit xipat paxi opop ip iam — io'e Barnabé be.

— Ga'a — io'e Barnabé.

³⁷ Barnabé ma João Marcos dujowat ojuy ceweju ip. ³⁸ Paulo bit ibu'u o'e tujowan.

— Oxe ma xipat ġu João Marcos ju am wuyweju — Paulo o'e. — Koap pima mo wuyiwat — io'e. — Panfília eipi be bima, o'jepit — io'e. — Wuyweju bit mo oibu'un Deus ekawēn muwēn ām — io'e. — Obu'u oce ikuġ — Paulo o'e.

³⁹ O'jewa'ōxixik cīcā ip. Imēnpuye o'jeok ip jewewewuwi oibu'un ikuġ puye.

Gebuje Barnabé João Marcos o'tujowat jewewu. Kobexixi be ip oōm. Tiboġ cīcāati o'timudek ip. Chi-pre eipi be ip o'ju- -tip'aweroroboġ pe.

⁴⁰ Gebuje Paulo wara'at ma o'taē jewewu am. Silas o'taē jewewu am. Soat ikitpitpiyū o'jekawēn Deus eju cebeam ip- -Antioquia ka watwat.

— Bay, xipan soat kuġ ēn — io'e ip. — Iteyū xepxepayū juy ejukuk xipan — io'e ip Deus pe.

⁴¹ Paulo o'ju Silas eju. Síria eipi daġ oekuku ip, Cilícia eipi daġ tak. Deus ekawēn itabucayū mutay-bitbin oekuku ip.

16 Pauloyū o'ju Derbe ka be, Listra ka be dak. Listra ka be aġokatkat osunuy. Jesus a'ōkayat osunuy. Ibutet Timóteo i osunuy. Paulo o'ju Timóteo kay. Timóteo xi Judeu osunuy. Ixe ayacat Deus ekawēn kay itabut osunuy. Cebay Judeu ġu osunuy- -Grego acā. ² Jesus a'ōkayayū Timóteo o'ġuwēn Paulo be- -Listra ka watwat, Icônio ka watwat tak.

— Timóteo xipat cīcā — io'e ip Paulo be.

³ Timóteo dujowat ojuy o'e jewewu jebuywat-wat'ukan Paulo. Koap Paulo Timóteo o'taypu'aġobi- xeedakat Judeuyū babi daġ, ade Judeuyū osodop ika kay ip cumiat ka be buye. Itaybit cīcā osodop ip Timóteo Judeu'ūmat ipot iam, taypu'aġobixeedakat'ūm iam tak ixeyū Judeuyū.

⁴ Gebuje Paulo o'ju Silas eju, Timóteo eju dak. Soat kaka dağ ip oekuku Jesus kay itabucayū jojom. Jerusalém ka watwat pe jawēwēap muwēnuwēn oekuku ip. Jesus emumujuyū be jawēwēap muwēnuwēn oekuku ip- itabucayū kukukayū be jawēwēap muwēnuwēn. Mēnku Judeu'ūmayū jekuku iap muwēnuwēn oekuku ip.

— Kūyjobin cuy epesop eyawēwēap ekawēn kay — io'e ip itabucayū be soat kaka watwat pe.

Soat kaka dağ oekuku ip imukūyjojom.

⁵ Imēneju biğ ma itabut o'e Jesus kay. Soat kabia warara'acayū oitabun Jesus kay.

⁶ Deus biōğbuk Pauloyū o'ğjuuat ġu Ásia eipi be. O'ğjuuat ġu ip iboce Deus ekawēn muwēn ām. Imēnpuye Frígia eipi dağ ip oekuku Galácia eipi dağ tak. Kapurūğ tağ ip oekuku.

⁷ Ibocewi oajēm ip Mísia eipi tēğ ma. Bitínia eipi be cu ojuy ip. Deus biōğbuk pit o'ğjuuat ġu ip. ⁸ Imēnpuye Mísia eipi dağ o'timudek ip. Trôade ebikopap pe oajēm ip. Ibo ka tiboğ cīcāati xe osunuy.

⁹ Gebuje Paulo jexey jo'iat o'jojoho ixe exima. Trôade ka be bima o'jojoho. Ağokatkat o'jojoho jexey jo'iat pe. Macedônia eipi bewiat o'jojoho. Cūğ'i osunuy.

— Macedônia eipi kay juy ejot — io'e Paulo be jexey jo'iat pe. — Ocebuyan cuy ece — io'e Paulo be.

¹⁰ Paulo imēn jexey jo'iat o'jojoho. Ōn tak cuk Paulo xe oğuy Trôade ka be bima. Ōn Lucas- ijudup mubarararağat. Macedônia eipi kay a'ğū cu ojuy ocejewağuy Paulo exey jo'iat puye. Ocetaybit cīcā Deus cuk ocemuju Macedônia eipi kay kawēn idipat muwēn ām iam.

¹¹ Gebuje kobexixi be oceōm. Ocejēm Trôade ka bewi. Tiboğ cīcāati oacetimudek. Cūğ ma oceju tip'aweroro kay Samotrácia eipi kay. Kuyaje oceju Neápolis ebikopap kay.

¹² — Gebuje Filipos ka kay oceju. Filipos ka Macedônia eipi be opop. Ikaboğ cīcā ma o'sukadop. Wa-

ra'atka bodi ma ikaboğ o'sukadop- -Macedônia eipi beatka bodi ma. César ebekitkit ibo ka o'sukada Roma ka kukat ebekitkit. ¹³ Ağoka bewi ocejēm Sábado kabia.

Idibi wābu kay oceju.

— Judeuyū aco'i kawēnwēn Deus eju ijoce — i juk a'ğū oce'e.

Aoyū awerom osodop ip iboce. Ocabik ma a'ğū ceparakpe ip- -aweromayū parakpe.

¹⁴ Ğebu je Deus ekawēn oceğuwēn cebe ip. Ayacat iboce osunuy. Ibutet Lídia i osunuy. Tiatira ka bewiat osunuy. Pağo idipat teidada'ukat osunuy. Deus kay itabucat osunuy. Deus Paulo ekawēn o'ğubapuk Lídia be itabut cīcā i'e am. Imēnpuye itabut cīcā o'e Jesus kay. ¹⁵ O'jewemubatisanat "Jesus ebekit ōn ġasū bit" i'e am soat pe. Lídia duk'a watwat tak o'jewemubatisanat ip, itabut puye. Lídia o'jekawēn ocewebe.

— Eyxe wuykukukat Jesus kay wetabut pima, oduk'a be juy epesop ġasū bit — io'e ocewebe. Imēnpuye Lídia duk'a be ocesop Filipos ka be bima.

¹⁶ Ğebu je ayacat ocedopabijuk- -yaypan'isuat- -cekariwa be imudadaybotbot'ibit. Deus eju Judeuyū kawēnwēn'uk osodop iap kay cum pima, ocedopabijuk. Ibiōğbuk kērēat kuğ osunuy jewebe. Ibiōğbuk kērēat a'ōbi yaypan'isuat apēn ġuyjom je'bapuk iap muwēnuwēn'uk osunuy adeayū be. Ağokat kayū yaypan'isuat kukayū osodop ip. Ade dinheiro bubum ip osodop apēn ġuyjom je'bapuk eykay iap muwēğap teim. Ixe yaypan'isuat ocedopabijuk. ¹⁷ Jewāwāwām oekuku ocenomuju soat kabia. O'jekawēn ocekawēn coco'ukayū be.

— Teyūku Deus a'ō kay kūyjobicayū — io'e'e'e. — Ixe Deus soat podi ma ya'ōbuyxiat — io'e'e'e. — Apēn wuywedaxijo but iap muwēnuwēn wuywebe — io'e'e'e ya'ōberen ocekawēn coco'ukayū be.

¹⁸ Iboap muwēnuwēn oekuku ocedobatban yaypan'isuat. Wara'at kabia dak. Wara'at kabia dak. Ade kabia iboap muwēnuwēn oekuku ocenomuju.

Imēnpuye Paulo yukpicegēn o'e cekay. O'jekorepēn yaypan'isuat kay.

Ġebuje Paulo o'jekawēn ibiōgbuk kērēat pe-
yaypan'isuat peat pe.

— Ejēm cuy yaypan'isuat pewi — io'e. — “E-
jēm cuy,” i ōn e'em ewebe Jesus a'ōbi — Paulo o'e.

Ġebuje'isum ma o'jēm cebewi. Xipat o'e.

¹⁹ Cebewi ibiōgbuk kērēat cēmap co buje, yay-
pan'isuat kukayū oitakomān ip Paulo kay.

— Ġasū bit ixē ibiōgbuk kērēat a'ōbi ġuwēn ġu
— io'e ip. — Abu dinheiro je'ġūm ocewebe ġasū bit?
— io'e ip.

Pauloyū o'jat ip. Akiju ip o'tujowat. Jeka ku-
kukat topabe o'tujowat ip imuymuy am.

²⁰ Ġebuje o'jekawēn ip jeka kukukayū eju.

— Teyūku Judeuyū — io'e ip. — Wuyka watwat
kaykay ip — io'e ip napa ma. — Iwaru ma ocemu-
taybitbin ip. Jebabim ip ocemutaybitbin — io'e ip.

²¹ — Cedaġ ġu iteyū e'eap taġ wuyeku am, wuyju
Roma ka kukukat ebekitkit puye — io'e ip napa ma.

²² Ġebuje ibo ka watwat oitakomān ip Pauloyū
kay, imuymuy buje. Ika kukukayū Pauloyū eekabek
o'ġuwekuwek ip.

— Epeyukxabimupokupoġ cuy daxadaypam —
io'e ip.

²³ O'yukxabimupokupok cīcā ip. Daomūnmūnap'a be
ip o'ġuōm.

— Aġ cuy epesop cekay — io'e ip daomūnmūn-
ap'a kukukat pe. — Epejowiwi juy ip ijēmap puxim
— io'e ip.

²⁴ Iboap co buje āmap'abi be Pauloyū o'ġuōm
iġo'a kukukat. Badiat'abi be ip o'ġuōm, “Xipan cīcā
juy iteyū epejowiwi,” i juk o'e buye. Sui o'suimuōm
ip iptok pe. O'jekaġobiece ip parakpe. Cem cīcā o'e
ip. Ceok pa'ore ip o'e.

²⁶ Iximadakpe Pauloyū o'jebibododon Deus kay.
O'jekawēn ip Deus eju. Ibibodo a'iġojom o'e ip soat
daomūnmūnap'a beayū. ²⁶ Ipi o'jexixi ġebuje bit.
Imēnpuye daomūnmūnap'abi'ip o'je'abi'ipekutu.
Soat xīntabi dak jekpiwa ma o'jeorek. O'tomudip'uk.
Ikaġobimuparakap'ip tak o'jeipeorek jekpiwan ma.

²⁷ Imēn cebapuk puje daomūnmūnap'a kukukat o'jewūrūg. Xīntabi tomudip'uk'uk o'jojoho. Tūybe taomūnmūnayū kuy o'jēm iān o'e. Imēnpuye jepaja o'ju'uk iyuk pewi jewaoka ojuy. ²⁸ Imēnpuye Paulo ya'ōberen o'jewāwā.

— Ecewaoka gū juy — io'e ya'ōberen. — Ocejēm gū buk — io'e. — Soat oceju ijoce mabuk — io'e yakukukat pe.

²⁹ — Wexiktak cuy eḡūm owebe — io'e jebure be ya kukukat. — Etojot cuy kabia iam. O'ḡūm cebe. Badi o'ju.

Pauloyū kay o'ju. Ikarabakbak o'e jeparara pi-bun. O'jēg'aecōḡcōḡ Pauloyū dopabe. ³⁰ O'tujujēm ip yabewi.

— Obureyū — io'e. — Apēntak wewedaxijo but? — io'e.

³¹ — Etabun cuy eḡuy Jesus kay -wuykukukat kay — io'e. — Etabut pima Deus jedaxijo. Eduk'a watwat tak idaxijo — io'e ip.

³² Gebuje Paulo Deus ekawēn o'ḡuwēn yakukukat pe, soat tuk'a watwat pe dak. ³³ Soat ip oitabun wuykukukat Jesus kay. Daomūnmūnap'a kukukat Pauloyū o'yukxabiwuy iximadakpe ma.

Gebuje daomūnmūnap'a kukukat o'jewemubatisanat "Ḡasū bit Jesus ebekitkit oceju" i'e am jebureyū be. Soat tuk'a watwat tak o'jewemubatisanat. ³⁴ Pauloyū o'tujowat ip jeduk'a be. Puybit o'ḡūm cebe ip.

— Juku eyxan — io'e. — Epejo'o — io'e. Soat ip icokcok cīcā o'e Jesus kay itabut puye.

³⁵ Kabia buje Filipos ka kukukayū te'e ma sorarayū o'ḡuju daomūnmūnap'a beayū dakoy am - Pauloyū dakoy am.

— Pauloyū juy epeḡujēm daomūnmūnap'a bewi — io'e ip sorarayū be.

³⁶ O'ju ip daomūnmūnap'a be. Ika kukukayū ekawēn o'ḡuwēn ip iḡo'a kukukat pe.

Ixe o'ju Pauloyū kay.

— "Pauloyū juy epeḡujēm daomūnmūnap'a bewi," i juk o'e ip oceka kukukayū — io'e yakukukat

Pauloyū be. — Epejēm cuy — io'e ip. — Eyekupin-
ap tağ cuy epeju — io'e Pauloyū be.

³⁷ Imēnpit Paulo ika kukukayū a'ō kay ġu o'e.

O'jekawēn sorarayū be Paulo.

— Ocejū soat eipi kukukat ebekitkit- -César ebe-
kitkit Roma ka kukat ebekitkit — io'e. — Soat eta-
butpe ip ocukxabiaokaka — io'e. — Ocedujowat ġu
ip ibimāmāmāmāyū ekawēn coco'ukat kay ocekawēn
co am — io'e. — Itaybit ġu mo a'ġu ip Pauloyū ikē-
rēat o'ġujurūġ iam, o'ġujurūġ ġu iam tak, ocekawēn
co'ūm puye. Jetaybitpun'ūma ip ocemuōm daomūn-
mūnap'a be — io'e. — Iba'arēm ma ip ocemujēm
ojuy! — io'e. — Iba'arēm ġu juy ip ocemujēm —
io'e. — Soat etabutpe juy ip ocemujēm — Paulo o'e.

³⁸ Imēneju sorarayū o'jepit ika kukukayū kay.
Paulo ekawēn o'ġuwēn ip cebe ip.

— César ebekitkit teyūbitku — io'e ip.

Imēnpuye ika kukukayū iparara jījā ip o'e César ebe-
kitkit ukxabi mupok pi osodop puye.

³⁹ O'ju ip Pauloyū kay. Daomūnmūnap'a be ip
o'ju.

— Ocejū juk a'ġu xipan ġu eykuk kapusu — io'e
ip. — Imēnpit eyağuyba'ūm cuy iboap kay — io'e.
— “Filipos ka kukukayū juk a'ġu ikērēm cīcā oce-
kuk,” i'ūmġu juy epe'e — io'e ip. — Epejēm oceka
bewi — io'e ip Pauloyū be.

⁴⁰ O'jēm ip daomūnmūnap'a bewi. O'ju ip Lída
duk'a be. Ixe duk'a be osodop ip kawēnwēn Jesus
a'ōkayayū eju. O'yawēwē ip. O'jēm ip ibocewi.

17 Pauloyū o'ju Tessalōnica ka kay. Cucum
pima o'kap ip Anfípolis ka dağ, Apolōnia ka
dağ tak. Oajēm ip Tessalōnica ka be. Ebapūğ esema-
na ibo ka be ip osodop. Judeuyū e'aweroroap'a ibo
ka be o'yanuy- -Deus eju kawēnwēnap'a. ² Ebapūğ
Sábado bima iğo'a be o'jujuju ip. Oōm ip iğo'a be.

Ġebuġe Paulo Deus ekawēn o'ġuwēnuwēn iğo'a
beacat pe. Imutaybitbin o'e ip.

³ — Deus ekawên muwênuwên'ukayû juk adi Jesus Cristo o'ğuwênuwên — io'e. — Imên e'em ip:

Deus emunaê juy ipiat supi'ajo, i.

Je'û juy, i. Waram imênpit jetait, i.

Imên e'em Deus ekawên tup — io'e. — Ibodup ekawên tağ o'jebapuk Jesus pe — io'e. — Ön ixé Jesus muwênuwên eywebe. Deus ixé Jesus o'taê wuydaxijo-jo'ukan — Paulo o'e.

⁴ Iboap co buje ade Judeuyû oitabun Jesus kay. Pauloyû eju oekuku ip. Ade Grego a'ôm kawênwên'ukayû dak oitabun Jesus kay- -Deus kay itabut osodop'iyû. Ade aoyû dak oitabun Jesus kay- -Grego a'ôm kawênwên'ukayû- -soat xe ibuyxiayû.

⁵ Warara'acayû bit oitabutkarey Pauloyû kay Judeuyû- -itabut'ûmayû. Itabutkarey o'e ip ibadipdipyû oitabun Jesus kay buye. Itabutkareyayû ikêrêat mujurûğrûğ'ukayû o'tomuwâ je'awero am. Ibukapik'ûmayû o'tomuwâ ip- -kaycôm'ûmayû. O'je'awero ip itabutkareyayû Pauloyû o'jomuymuy buye. Itabutkareyayû warara'acayû o'ğutakomân ip Pauloyû kay. Puyxibut'ûm ip oôm Jasão duk'a be Pauloyû bu ojuy. Pauloyû dujowat ojuy ip aweromayû kay. ⁶ Pauloyû bit o'tobuxik ġu ip Jasão duk'a be. Imênpuye Jasão o'jat ip Pauloyû nuyap pe, Pauloyû ka'ûm puje. Wara'acat itabucayû dak o'jat ip.

Ibocewi o'tujowat ip ika kukukayû kay. Pauloyû o'jomuymuy ip ika kukukayû be.

— Soat kaykay teyûku osodop! — io'e ip napa ma. — Soat kaka dağ ip oekuku wuybadipyû kaykay — io'e ip napa ma. — Wuyka be ġasû ip oajêm — io'e ip. ⁷ — Jasão ixeyû o'tujuôm jeduk'a be tûy âm — io'e ip jeka kukukayû be. — Wuyeipi kukukat a'ôdadam ip- -César a'ôdadam — io'e ip napa ma. — “César ġu soat kukukat- -Jesus acâ,” i napa ma e'em ip ocewebe — io'e ip napa ma.

⁸ Iboap co buje ika kukukayû oitakomân Pauloyû kay Pauloyû wuyeipi kukukat a'ôdadam tûybe iân o'e buye. Adeayû dak oitakomân cekay ip. ⁹ Imênpuye ika kukukayû dinheiro o'jat Jasãoyû xewi Pauloyû mujêmap teida am.

— Pauloyû juy epeğujêm wuyka bewi — io'e ip

Jasāoyū be. — Ixeyū jēm puje waram eyedinheiro ocegūm eywebe — io'e ip.

Jasāoyū o'guypicat ip waram tuk'a be. ¹⁰ Imēnpuye Jasāoyū Pauloyū o'gūjēm jeka bewi. O'gūjēm ip ixima be. O'gūju ip Beréia ka kay.

Pauloyū o'ju Beréia ka kay. Oajēm. Judeuyū e'aweroroap'a be ip oōm Deus eju kawēnwēnap'a be.

¹¹ Ġebuje Pauloyū Deus ekawēn Beréia ka watwat o'gūtaybitbin. Beréia ka watwat Tessalōnica ka watwat puxim ġu ip osodop. Itabut pin ip osodop icēmat a'ō kay. Paulo ekawēn coco'uk ip osodop. Soat kabia Deus ekawēn tup coco'uk ip osodop jetaybit am Paulo icēmān paxi e'em iam, icēmān ġu paxi iam tak.

¹² Imēneju ade ma oitabun Jesus kay. Ade Judeuyū itabut o'e ip cekay. Ade aoyū dak itabut o'e ip Jesus kay. -Grego a'ōm kawēnwēn'ukayū. -soat xe ya'ō-buyxiayū. Ade aḡokatkayū dak itabut o'e Jesus kay. -Grego a'ōm kawēnwēn'ukayū.

¹³ Ġebuje Judeuyū o'yawēḡtobuxik Paulo Deus ekawēn muwēnuwēn Beréia ka be iap awēḡ. -Tessalōnica ka watwat. Imēnpuye Paulo kay ip o'ju. Oajēm ip. Paulo awēḡ o'yawēḡmukērērēn ip Beréia ka watwat pe. O'jomuymuy jījā ip. O'ḡubu'un ip Paulo a'ijo am.

¹⁴ Ġebuje itabucayū Paulo o'tujowat tiboḡ cīcāati be. Silas pit Beréia ka be o'jecū, Timóteo dak. ¹⁵ Ibocewi Paulo o'tujowat ip Atenas ka be. Paulo dujowacayū o'jepit jeka be. -Beréia ka be. Jepitpin pima, Paulo o'jekawēn ceweju ip.

— “Ġaxīn ma juy epesot okay,” i juy epe'e Silasyū be — io'e cebe ip. — “Ibun ġu juy epesop Beréia ka be,” i juy epe'e cebe ip. -Silas pe, Timóteo be dak — io'e Paulo cebe ip.

¹⁶ Paulo yaḡuybabi'ūm'ūm o'e Atenas ka watwat kuḡ. Silasyū ajēmap wiwim osunuy ibo ka be. Ade deusbaroyū kay itabut cīcā ip osodop Atenas ka watwat. Tūybe ade deusyū iān o'e ip Atenas ka watwat. Paulo o'yukpiceḡēn deusbaroyū biōḡbuk cocom puye. Atenas ka watwat kuḡ yaḡuybabi'ūm'ūm o'e.

¹⁷ Gebuje Paulo o'jekawēn Atenas ka watwat eju. O'jekawēn Judeuyū e'aweroroap'a be -Deus eju kawēnwēnap'a be. Judeuyū eju o'jekawēn Judeu'ūmayū eju dak -Deus kayayū eju. Wuyjuyū e'aweroroap pe dak o'jekawēnwēn soat kabia aweromayū eju. ¹⁸ Itaybit cīcāyū dak o'jekawēnwēn Paulo eju - Estóicoyū, Epicureuyū dak. Ixeyū aḡokatkayū itaybit cīcā osodop ip. Paulo o'ḡuwēnuwēn ip jeweweju.

— Apēntak sute e ojuy itaybit'ūmat? — io'e ip.

— Deus muwēnuwēn teku oxe bit — io'e wara-ra'acayū. — Wuyju bit wuyetaybit ḡu i'em — io'e ip.

Imēn o'e ip, Paulo soat em Jesus muwēnuwēn oekukuku buye, wuye'ū buje waram acejetait iap muwēnuwēn oekukuku buye dak. Jesus buten itaybit ḡu ip osodop.

¹⁹ Gebuje itaybit cīcāyū Paulo o'tujowat je'aweroroap pe jeweweju kawēn ām. Je'aweroroap putet Areópago i osunuy.

^{20 - 21} — Ekawēn iisuat cuy epeḡuwēn ocewebe — i'e'e'uk osodop ip jewewebe Atenas ka watwat soat em.

Soat em iisuat muwēnuwēn oekuku ip iisuat cocom tak. Paulo o'ju je'aweroroap pe Atenas ka beayū eju.

— Ejot cuy oceweju ekawēn iisuat muwēn — io'e ip Paulo be. — Apēn etaybit iap cuy eḡuwēn ocewebe — io'e ip. — Ekawēn iisuat cuy ocemutaybin ece. Wara'an ma ēn ocemutaybitbin — io'e ip. — Oceya'ijojo ḡu buk iboap. Ocetaybin pin iboam — io'e ip Paulo be.

²² Gebuje Paulo o'jekawēn cīcā ceweju ip iboce Areópago be.

— Atenas ka watwat — io'e Paulo. — Eyetabut cīcā deusbaroyū kay. ²³ Deusbaroyū biōḡbuk cocom ocekukuku ijocce. Pūḡ'a oyajojo wita'a muḡēḡē-eyedeusbaroyū kay eyeḡebubuap'a. Ibararak opop iḡo'a eju. Imēn e'em: "Wara'at paxi omuy deus, i. Ocetaybit ḡu buk ixem, i. Ijop'a oceyamugē cekay oceḡebubuap'am," i. Imēn ibararak opop iḡo'a eju — Paulo o'e. — Ōn pit wetabut ixem kay. Ixe Deusat. Ka'ūmḡu wara'at. Ōn wetaybit ixem, eyju bit ka'ū-

ma. Te'e ma iġo'a mo a'ġu epeyamugē, eyetaybit ġu ixem puye. Ixe ekawēn muwēnuwēn ōn eywebe. ²⁴ Kuyje ixe ipi o'ġugē, soat ipi daġacat tak. Ixe kabi beacat kukukat, ipi daġacat kukukat tak. Ixe bit wuyemu'amuy'a be ġu nuynuy. ²⁵ Ixe buywat pa'ore wuywebe. Ixe soat kuġ. Ka'ūma kay ixe. Ixe wuymu-taicin, wuymu'ada'adam tak. Ixe wuyxat ūmūm wuywebe. Wuydoti dak iūmūm. ²⁶ Soat ka daġacat o'ġu'acoġ pūġ aġokatkat pewi. Jebikuyap taġ ip o'ġu-juju soat kaka daġ. Poce ixeyū jeedop iap o'ġuwēnuwēn, poce ixeyū cum iap tak — io'e Paulo. ²⁷ — Deus imēn o'ġuwēn ixeyū etaybit am ixem, jekay jeta-but am tak. Wūy ġu wuywi nuynuy- wuytēġ ma. Deus dobuxik pin pima, iba'ore ġu wuywebe tobuxik am. ²⁸ Wuyetait ixe itait puye. Soat taġ wuyju cūġ-cūġ cucum ixe aġ wuykay buye. Wuyju kake, ixe kake buye — Paulo o'e. — Eybadipyū dak imēn o'e- -tupmubararak'ukayū: “Deus ebekitkit wuyju dak,” i mo o'e ip. ²⁹ Deus ebekitkit wuyju. Imēnpit xipāt ġu wuywebe i'e am: “Deus wita'a muġēġē buxim” i, “Deus ouro muġēġē buxim” i dak, “Deus prata muġēġē buxim” i dak, “Wuyemu'amuġēġē'a buxim” i dak — Paulo o'e.

³⁰ — Kuyje ma Deus ġebum ġu osunuy apēn ipi daġacat ikērēat o'ġujurūġrūġ iap kay, kawēn icēmān itaybit'ūm ip puye. Ġasū bit “Ikērēat mujurūġrūġap cuy epeyepere,” i'e'em Deus soat pe wuywebe — Paulo o'e.

³¹ — Deus aġokatkat o'taē- -Jesus o'taē — io'e. — Kabia o'ġuweġūn. Soat ijodiat je'bapuk Deus wap ixe kabia be. Abuyū ikērēat kuġ Deus xe iap Jesus ġuwēn. Abuyū ikērēat kuġ ġu iap tak ġuwēn. Cūġ ma ġuwēn itaybit puye. Deus pe waram Jesus mutait puje soat iboap o'ġubapuk soat pe wuywebe — Paulo o'e Atenas ka watwat pe.

³² “Deus ce'ūat o'ġutait waram” i'e buje Paulo ekawēn o'jowaywayway ip Atenas ka watwat'in. Waram'acat pit Paulo ekawēn kay o'e ixeyū'in.

— Waram pima juy ġuto ejot iboam ocemutaybin am — io'e ip Paulo be.

³³ Paulo o'jēm cexewi ip.

³⁴ Pūḡpūḡ aḡokatkayū oitabun ip Jesus kay. Paulo eju oekuku ip oitabun'iaiyū. Pūḡ ma itabucat putet Dionísio i osunuy. Ixe Areópago be je'aweroro'ukat osunuy. Ayacat tak itabut o'e Jesus kay. Damáris i ibutet osunuy. Pūḡpūḡ ā oitabun Jesus kay.

18 Guyjom Paulo o'jēm Atenas ka bewi. Wara'at ka kay o'ju- -Corinto ka kay.

² Paulo oajēm aḡokatkat kay- -Áquila kay. Áquila Roma ka bewiat osunuy. Kuy mo o'jēm Roma ka bewi jetayxi eju. Itayxi butet Priscila i osunuy. Áquila Judeu osunuy. Bekin pi ma Ponto eipi be osunuy. Kuy ma mo o'jēm ip Roma ka bewi Itália eipi bewi. Soat kukukat putet Cláudio i osunuy. O'jēm ip ixe Cláudio jeipi bewi Judeuyū o'ḡujēmat puye. Oajēm Áquila kay Paulo. ³ Áquila torojo'a muḡēḡē'ukat osunuy- -ixee'a'a muḡēḡē'ukat. Paulo dak ixee'a'a muḡēḡē'ukat osunuy. Ixee'a'a deidada'uk ip osodop- -Paulo, Áquila dak. Xepxem ip o'jekapikpik. Imēnpuye Paulo Áquila duk'a be osunuy Corinto ka be bima.

⁴ Gebuje soat Sábado cucu'uk osunuy Judeuyū e'aweroroap'a be- -Deus eju kawēnwēnap'a be. Ixe dak Jesus o'ḡuwēnuwēn iḡo'a be Judeuyū aḡuymuwarururun ojuy, Judeu'ūmayū aḡuymuwarururun ojuy dak.

— Icēmān Jesus acā Deus emunaē — i'e'e'uk osunuy cebe ip.

⁶ Silas tak oajēm Paulo kay, Timóteo dak. Macedônia eipi bewi ip oajēm. Jesus o'ḡuwēnuwēn cīcā ip Judeuyū e'aweroroap'a be.

— Deus Jesus acā o'taē wuydaxijojo'ukan — io'e'e'e' cebe ip.

⁸ Pūḡpūḡ Judeuyū'in Paulo ekawēn kay'ūm cīcā o'e. Paulo o'jomuymuy jījā ip. O'ya'ōdada jījā ip. Imēneju Paulo oibu'un ceweju ip je'awero am.

— Jesus ekawēn oḡuwēn eywebe — io'e. — Inaka eyetabut ḡu wekawēn kay — io'e. — Ipiat'ajojoap

pe eyju buje, òn ma okpiwat ġu Deus xe. Eyju bit eyukpiwat, cekay eyetabut'ùm puye — io'e Paulo. Paulo jesay o'ğuxikxik ixeyū xewi ijēm puje okpiwat ġu iap mubapuk am cebe ip.

⁷ Ibocewi o'jēm, Judeuyū cekawēn kay'ùm puye.

Tício Justo duk'a kay o'ju. Ixe duk'a Judeuyū e'aweroroap'a tēg ma o'yanuy- -Deus eju kawēnwēn-ap'a tēg ma. Itabut osunuy Deus kay. Ixe duk'a be o'ju Paulo. Judeu'ūmayū be o'ju Jesus ekawēn muwēn âm.

Gebuje Paulo Jesus o'ğuwēnuwēn Tício Justo duk'a be. ⁸ Crispo itabut o'e wuykukukat Jesus kay- -ixe duk'a watwat tak. Ixe Crispo Judeuyū e'aweroroap'a kukukat osunuy. Itabut o'e Jesus kay ġasū bit. Warara'acayū dak oitabun Jesus kay. Tak ġu Corinto ka wat oitabun. Deus ekawēn co buje ip oitabun. O'jemubatisasanat ip “Jesus ebekitkiyū oceju ġasū bit” i'e am jebureyū be.

⁹ Gebuje jexey jo'iat o'jojjo Paulo. Wuykukukat o'jebapuk Paulo kay jexey jo'iat pe. Ixima be o'jekawēn Paulo eju.

— Epararam ġu juy eğuy — io'e Paulo be. — Mūg ġu juy eğuy — io'e. — Ebibu'um ġu juy eğuy wekawēn muwēn âm — io'e. ¹⁰ — Òn ma exe oğuy — io'e. — Imēnpuye aoka ba'ore cebe ip — io'e. — Ade mabuk itabut je'e okay ijop ka watwat — wuykukukat o'e Paulo be jexey jo'iat pe.

¹¹ Imēnpuye Paulo ibun cîcâ osunuy Corinto ka be. Pūg koato osunuy ibo ka be, koato ipidase dak. Soat em Deus ekawēn muwēnuwēn'uk osunuy ibo ka watwat pe.

¹² Gebuje Judeuyū Paulo kay ġu o'e ip. Paulo o'jat ip taomūn ojuy. O'tujowat ip Gálio be ya'ijo am. Gálio Grécia eipi kukukat osunuy. Iecuğap osunuy. Oòm ip ibimāmāyū ekawēn cocoap'a be. Paulo o'jomuymuy ip.

¹³ — Teku ocemubu'u'un kuyat ekawēn tağ wuyeku am — io'e ip Gálio be. — “Xipat ma epesop Deus xe eydobyū'ùm'ùm ekawēn tağ jekukum ġu ma'ğū eyju,” i napa ma teku e'em wuywebe — io'e ip. — Egukorēm cuy! — io'e ip.

¹⁴ Paulo jede ojuy o'e jemuymuyayū be. Gálio bit:

— Ecede ġu juy — io'e Paulo be.

Gálio bit o'jede Judeuyū be.

— Judeuyū — io'e. — On pit ite aġokatkat oġukorēm ġu — io'e. — Wuykukukat mupubutbun puye, ōn kajuk oġukorēm, ikērēat kuġ wuykukukat xe buje dak — io'e. ¹⁵ — Jewa'ōxixixi eyju. “Teku wuybadij ekawēn mukērērērēn,” i'e'em eyju — io'e. — “Teku wuydobuyū'ūm'ūm ekawēn taġ ġu jekukum,” i'e'em eyju. Imēnpuye ōn pit oġukorēm ġu. Eyju ma juy epeġukorēm — io'e Judeuyū be. — Eyxe ma ikērēat kuġ. Oxe bit ikērēat kuġ ġu — io'e.

¹⁶ O'ġujēm ip ibimāmāayū ekawēn cocoap'a bewi.

¹⁷ Imēneju Judeu'ūmayū itakoma o'e ip Judeuyū kay, Paulo o'tujujēm puye. Imēnpuye Sóstenes o'jat ip Judeu'ūmayū. O'jat ip ixē Judeuyū e'aweroroap'a kukukat puye. O'ġupokupok cīcā ip ibimāmāayū ekawēn cocoap'a exīntabi weġūn. Gálio bit ak'adit'ūma osunuy ixeyū kay.

— Āġ ġupokupok ip — io'e jewebe ma. — On ġu wukpiwat. Wa'ōbi ġu ip imupokupoġ — io'e.

¹⁸ Pūġ kabia ġu Paulo Corinto ka be osunuy. Ibun ma osunuy Jesus a'ōkayayū eju. Ġuyjom o'jewewuwēn cebe ip. Corinto ka bewi o'jēm. Síria eipi daġ cu ojuy.

¹⁹ Ēfeso ka kay o'ju. Priscila o'ju ceweju, Áquila dak. Cencreía ka daġ ip o'kap. Cencreía ka be bima Paulo o'jakoeat apēn kuy bima Deus pe o'e iap taġ. Waram ip o'ju kobexixi daġ. O'timudek ip. Oajēm ip Ēfeso ka be. Paulo oibu'un cewejuwi ip-Áquila ejuwi, Priscila ejuwi dak.

Ġebuje Paulo Judeuyū o'tobuxik. Oōm je'aweroroap'a be-Deus eju kawēnwēnap'a be. Jesus o'ġuwēnuwēn cebe ip. O'jewaw'ōxixixi Judeuyū eju.

²⁰ — Ibunbun ma juy eġuy ocexe — Judeuyū o'e cebe.

Paulo bit ibu'u o'e cexe ip.

²¹ — Ka'ūma — io'e. — Deus ibikuy bima bit ocepit eykay — io'e cebe ip.

O'jewemuwēn cebe ip. Êfeso ka bewi o'jēm. Kobexixi dağ o'ju.

²² Cesaréia ka ebikopap pe cemūğ puje o'ju Jerusalém ka be. Itabucayū kay o'ju. O'tobede ip.

Ġebu je kapurūğ tağ o'ju Antioquia ka kay Síria eipi beat ka kay. ²³ Jay. Oajēm. Ibun ma osunuy ibo ka be.

Ġebu je itabucayū o'ğutaybinbin. Soat kaka dağ imutaybitbin ip oekukuku. O'jēm Antioquia ka bewi. Kapurūğ tağ o'ju. Galácia eipi dağ oekukuku, Frígia eipi dağ tak. Jesus a'òkayayū mutaybinbin oekukuku. Itabut cīcā ip o'e cūğ ma o'ğutaybinbin puye.

²⁴ Apolo oajēm Êfeso ka be. Apolo ağokatkat osunuy. Judeu osunuy. Alexandria ka bewiat osunuy. Idim cīcā o'jekawēnwēnwēn. Itaybit cīcā Deus eka-wēn. ²⁵ Kuy bima wara'acat ixe o'ğutaybitbin wuykukukat e dağ wuyeku am iam. Jedokdokap kuğ o'ğutaybitbin ip. Cūğ ma o'ğutaybitbin apēn wuykukukat cuk adi oekuku iam. Itaybit osunuy apēn João Batis-ta adeayū o'ğubatisasan ikērēat mujurūğrūğap o'jepe-re ip iap mubapuk am iam. Itaybit ġu bit osunuy apēn ġasū wuyju jewemubatisasanan "Jesus ebekitkit oceju" i'e am wuybureyū be iam. ²⁶ Jecokcokap kuğ osunuy imutaybitbin Judeuyū e'aweroroap'a be- -Deus eju kawēnwēnap'a be. Áquila, Priscila dak Apo-lo o'tujowat jeduk'a be cekawēn co epere buje. Apēn wuykukukat e dağ ajeku iam o'ğutaybin ip. Itay-bit'ūmapi o'ğutaybin ip- -ixē o'ya'ijojo ġu buk iam. Cūğ cīcā ma o'ğutaybin ip.

²⁷ Ibocewi Jesus kay itabucayū Apolo o'tomuwā ixe cu ojuy Grécia eipi kay buye.

— Cum puk ōn Grécia eipi kay — Apolo o'e.

— Ha'a — io'e ip.

Cartadup o'tupmubararak ip tupmuju am Apolo eju. O'tupmubararak ip Grécia eipi watwat peap-tum- -itabucayū beaptum. O'tupmubararak ip xipan cuy Apolo epejukuk iaptum.

Ġebu je Apolo itabucayū o'ğutaybitbin cīcā Deus ekawēn Grécia eipi be jajēm puje. Oitabun ip Jesus

kay, Deus xe ikukpin ip puye. ²⁸ Apolo Judeuyū a'ō-xikxiḡ o'e soat etabutpe.

— Jesus acā Deus emunaē. Jesus acā o'taē wuy-daxijo'ukan — io'e cebe ip. — Imēn ibararak opop Deus ekawēn tup pe — io'e cebe ip.

Mūḡ ma ip osodop. Ya'ōmuypit pa'ore cebe ip.

19 Apolo Corinto ka be bima Paulo o'kap soat kaka daḡ. Êfeso ka kay o'ju. Jay. Oajēm Êfeso ka be.

Gebuje Jesus a'ōkayayū o'tobuxik. Doze be ip osodop. João Batista imubatisasan oeku ikērēat mujurūḡrūḡap epereap mubapuk am warara'acayū be. Itaybit o'e ip João emumutaybinbinam. ² Paulo o'jekawēn ceweju ip.

— Ibiōḡbuk xipacat oōm tu eywebe, Jesus kay eyetabun puje? — io'e.

— Ka'ūma. Oōm ḡu — io'e ip. — Ajo xe'e Ibiōḡbuk xipacat? Ocejekūyjo ḡu buk ixem — io'e ip.

³ — Abu-a'ōbi juk eymubatisasaan? — Paulo o'e.

— João Batista a'ōbi juk ocemubatisasaan — io'e ip.

⁴ — João ikērēat mujurūḡrūḡ o'jepere'iyū mubatisasan oeku — io'e. — Imubatisasan pima, “Warara'acat omuyku kanomūm. Ibutet Jesus i. Ixe kay juy eyetabun epesop,” i'e'e'uk osunuy João — io'e Paulo.

⁵ Iboap co buje o'jewemubatisasaan ip “Oceju Jesus ebekitkiyū ḡasū bit- -ixe acā ocekekukat” i'e am jebureyū be. ⁶ Paulo jebu o'subumōḡ yabi jeje ip. Ibiōḡbuk xipacat oōm cebe ip. Ya'ōba'arēmat a'ōm o'jekawēnwēn ip. Deus ekawēn o'ḡuwēnuwēn ip. ⁷ Doze be osodop ip- -Jesus kay itabucayū.

⁸ Gebuje Paulo Deus ekawēn o'ḡuwēnuwēn Judeuyū e'aweroroap'a be- -Deus eju kawēnwēnap'a be- -Êfeso ka beat'a be. Ja'ōcam Deus ekawēn muwēnuwēn'uk osunuy ibo ka watwat pe.

— Ḡaxīn ma Deus soat kukukan je'e — io'e ibo ka watwat pe.

Ibun osunuy ibo ka be imutaybitbin- -ebapūg ka-xi. ⁹ Pūg-pūgāyū bit Paulo be jemutaybitbinap kay gū o'e ip. Ibu'u ip o'e jetabut am Jesus kay. Jesus o'jomuymuy ip adeayū be. Imēnpuye Paulo o'jeok cexewi ip- -Jesus kay jetabut am ibu'u'uayū xewi.

Wara'at'a kay o'ju Jesus a'ōkayayū eju. Igo'a wuymutaybitbinap'a o'yanuy. Soat kabia Paulo imutaybitbin osunuy igo'a be. Igo'a be Tirano imutaybitbin'uk osunuy pūg-pūg ehora daḡ. Ixe imutaybitbin'ūm pima Paulo Jesus ekawēn imutaybitbin'uk osunuy. ¹⁰ Imēn imutaybitbin'uk osunuy xepxep koato bun. Imēneju ade jījā wuykukukat Jesus ekawēn o'ya'ījojo- -Judeuyū, Judeu'ūmayū dak. Soat Āsia eipi watwat o'ya'ījojo.

¹¹ Gebuje Deus ja'ōbacaap o'gūm Paulo be wuwebe i'e ba'oreat mubapuk am adeayū etabutpe- -o'jojojo gū buk ip iap mubapuk am. ¹² Imēnpuye adeayū Paulo epaḡo o'jat cexewi- -paḡonōmnōm, ikūmpi ekabek tak. Ixe paḡo o'jomōg ip iwātaxipi-piayū be. O'je'ada'ada ip ixe paḡo mōg puje. Xipat o'e ip. Ibiōgbuk kērēat tak o'jēmjēm adeayū bewi ixe paḡo mōg puje.

¹³ Gebuje pūg-pūg Judeuyū ibiōgbuk kērēat o'gū-jēmjēm warara'acat pewi. Pūg ka be gū ip osodop. Soat kaka daḡ oekukuku ip. Ibiōgbuk kērēat mujēm-jēm'uk oekukuku ip.

Paulo babim imujēm ojuy ip.

— Ocekukukat Jesus a'ōbi oceju e'em ewebe “E-jēm cuy cebewi,” i — io'e ip ibiōgbuk kērēat pe.

¹⁴ Imēn imujēmjēm ip osodop 7 be aḡokatayū. Ikitpitpityū osodop ip. Cebay butet Ceva i osunuy. Ceva Judeu osunuy. Judeuyū epaiyū kukukat osunuy. Jesus a'ōbi ibiōgbuk kērēat mujēmjēm'uk osodop ip adeayū bewi ikitpitpiyū.

¹⁵ Jesus a'ōbi imujēm ojuy bima bit, ibiōgbuk kērēat o'jede cebe ip.

— Wetaybit Jesus — io'e. — Wetaybit Paulom tak — io'e. — Pām eyju? Abuyū eyju? Jesus a'ōkayayū gū eyju oxe bit — ibiōgbuk kērēat o'e cebe ip.

¹⁶ Ibiōgbuk kērēat kukat o'jejorojoro cekay ip- -7 beayū kay. Toti ip o'ḡuwekuwek. O'watwat ip iḡo'a bewi 7 beayū. O'jenapōn ip soat iwekwek. Soat ip yaokaka o'jēm. Ibo o'jebapak Êfeso ka be.

¹⁷ Iboap awēḡ o'yawēḡtobuxik ip- -Êfeso ka watwat, Judeuyū, Judeu'ūmayū dak. Iparara o'e ip te'e ma "Jesus a'ōbi ōn" i'eap puxim.

— Wuykukukat Jesus ya'ōbuyxi jījā — io'e'e ip. Ade ixeyū'in oitabun wuykukukat Jesus kay.

¹⁸ Ade wamomoyū dak oitabun Jesus kay. Apēn cuk adi ikērēat o'ḡujurūḡrūḡ ip iap o'ḡuwēn ip Paulo be. Itabut cīcā o'e ip Jesus kay. Jebukaypacap o'jepere ip.

¹⁹ Ḡebuḡe ibukaypacap ibararak osodop taperadup pe ibibodo. Oibu'un ip jebibododon. Warara'acat muy'ū ām ip oibu'un. Jebukaypacaptup o'tupmu'a-wero ip tupmupik am soatup. O'tupmupik ip soat etabutpe. Teiboḡ cīcā osodop tuptei. Tuptei 50,000 dinheiro osodop isurūḡat prata muḡēḡē.

²⁰ Imēneju warara'acayū oitabun Jesus kay. Tak ḡu ip oitabun. Deus ekawēn kay jījā ip o'e, cūḡ cīcā cexe ip puye.

²¹ Ḡebuḡe Paulo co ojuy Jerusalém ka kay. Deus a'ōbi cu ojuy o'e Macedōnia eipi daḡ cu ojuy, Acaia eipi daḡ tak.

— Jerusalém ka kay oju pin — io'e jewebe ma. — Ibo ka be oju buḡe Roma ka kay dak oju pin — io'e jewebe ma.

²² Xepxep jewejuayū'in o'ḡuju jewap Macedōnia eipi be. Timóteo o'ḡuju, Erasto dak. Ixe bit Ásia eipi be ibunbun mabuk osunuy.

²³ Ḡebuḡe Demétrio adeayū o'ḡutakomān Jesus a'ōkayayū kay. O'ḡutakomān ip, soat kaka daḡayū oitabun Jesus kay buye. ²⁴ · ²⁵ Demétrio pratam ya-muḡēḡē'ukat osunuy. Diana kay je'e'eap'a'it'it'a muḡēḡē'ukat osunuy. Ade Êfeso ka watwat kapik-pik'uk ip osodop Demétrio eju ibiat'a muḡēḡēm. Ade dinheiro bubu'uk ip osodop ibiat'a muḡēḡēapteim. Tūybe Diana Deus iān o'e ip Êfeso ka watwat. Imēnpuye te'e ma Diana kay jījā ip osodop. Demétrio

ibiat'a muḡēḡē'ukayū o'tomuwā je'awero am soat je-weju kapikpik'ukayū dak.

Ibocewi o'jekawēn cebe ip.

— Oburereyū — io'e. — Eyetaybit ade dinheiro bubum wuyju wuyekapikapteim iam. ²⁶ Paulo bit adeayū mubu'u'un jetabut am Diana kay. "Ijodiat emumuḡē Deus ḡu," i'e'em ixe soat pe. Imēnpuye adeayū pu'u'un ip jetabut am Diana kay. Jetabucap epereperem ip — io'e.

— Itabut o'e ip Paulo ekawēn kay-Ēfeso ka watwat, soat Ásia eipi watwat tak — io'e. — Imēn xipat ḡu jījā wuywebe! ²⁷ Imēnibun pima, ajo-be acejekapik? Wuyekapikap ka'ūmḡu o'e. "Ibuyxim ḡu oce'e Diana duk'a!" i je'e ip adeayū-Ásia eipi watwat, soat ka daḡayū dak — io'e. — "Diana Deus ḡu," i je'e ip — io'e.

²⁸ Imēneju Demétrio ekawēn cocoayū isapka'ore o'e Paulo kay.

Gebuje o'jewāwā ip ya'ōberen-Diana kay je'e'ap'a'it'it'a muḡēḡē'ukayū.

— Diana ya'ōbuyxi jījā! — io'e ip ya'ōberen. — Soat ka watwat itabut cekay! — io'e ip. — Diana kay acā wuyetabut! Diana acā Deus! — i te'e ma o'e ip ya'ōberen.

²⁹ Tūybe Diana Deus iān o'e ip. Imēnpuye soat'a'a daḡ ip ya'ōberen o'jewāwā.

Ade ip dao ma o'ju je'aweroroap'a kay-yaboḡat'a kay. Cum pima ip xepxepayū o'jat Paulo eju jekuku'ukayū-Macedônia eipi bewiyū. Gaio o'jat ip, Aristarco dak. O'tujowat ip je'aweroroap'a be-yaboḡat'a be. Tak ḡu ip o'je'awero iḡo'a be. ³⁰ Paulo ōm ojuy o'e iḡo'a be. Imēnpit itabucayū o'ḡuōmat ḡu. ³¹ Warara'acayū dak o'jewa'ōmuju Paulo be-Ásia eipi kukukayū-ibureyū.

— Eōm ḡu juy je'aweroroap'a be — io'e ip. — Aokam cuy ip — io'e ip Paulo be.

— Oōm ḡu — io'e.

³² Gebuje aweromayū warēmtaḡ ma o'jewāwā. Wara'at taḡtaḡtaḡ ma ip jewāwāwām. Apēḡām ijoce awerom wuyju iam itaybit ḡu o'e ip. Inaka ya'ōberen

ma jewāwāwām ip. Itakoma jījā ip o'e Paulo ejuayū kay, Judeuyū kay dak.

³³ Ġebuĵe Judeuyū itakomaayū mudin ojuy o'e. Imēnpuye Alexandre o'ġuju ip jewāwāyū dopabe. Alexandre itakomaayū mudin ojuy o'e. O'jebaeuru mūġ ma epesop i'e am aweromayū be.

³⁴ Teku Judeu iam itaybit puĵe, biġ ma ip o'jewāwā.

— Diana ya'ōbuyxi jījā! — io'e ip ya'ōberen. — Ixe Diana deus wuyxe soat xe, Ēfeso ka watwat xe! — io'e ip ya'ōberen.

Ibun cīcā ip o'jewāwā. Xepxep hora ya'ōberen o'jewāwā ip. O'jewāwā ip tūybe Diana Deus iān o'e ip puye.

³⁵ Ġebuĵe aġokatkat jewāwāwāyū o'ġuymūġ. Ixe aġokatkat Ēfeso ka kukukayū'in osunuy. Pa'orem cīcā jewāwāwāyū o'ġuymūġ. O'jekawēn cebe ip.

— Ēfeso ka watwat, eya'ōpicūġcūġ cuy epesop wekawēn kay! — io'e. — Soat kaka daġayū itaybit ip Ēfeso ka watwat Diana kay je'e'eap'a kukan iam-deus tuk'a kukan iam- -kuy bima kabi bewi o'kopiat'a kukan iam. ³⁶ Abu kuka o'e: "Ēfeso ka watwat itabut ġu Diana kay," i? Ka'ūma ma! — io'e. — Imēnpuye juy epeyewāwā ġu — io'e. — Mūġ ma epesop! — io'e. — Warēmtaġ ġu juy epe'e'e! — io'e cebe ip. ³⁷ — Te'e ma juk iteyū aġokatkayū epetojot ijoce — io'e. — Diana kay je'e'eap'a beat o'tuju-pa'um ġu ip — io'e. — Diana nuyap'a o'jomuymuy ġu ip — io'e.

³⁸ — Demétrio, ceweju kapikpik'ukayū dak warara'acat muy pin pima, cum ip ibimāmāat ekawēn coco'ukat topabe- -wuyka kukat topabe — io'e. — Ade ip wuyka be. Ijoce ġu bit ip warara'acat jomuymuy- -ibimāmāat ekawēn coco'ukat topabe acā — io'e. — Soat em ip je'awerorom. ³⁹ Ce'awero buĵe ip ceweju juy ip epeyekawēn — io'e. — Wuydobuyū'ūm'ūm ekawēn taġ cuy ajeku — io'e. — Cedaġ'ūm cīcā wuyju e'em ġasū bit — io'e. — Warēmtaġ wuyju e'em ġasū bit — io'e.

⁴⁰ — César ebekitkit kuka o'e wuywebe: "Cedaġ ġu juk adi epe'e'e," i. "César a'ō daġ ġu juk

epeye'awero," i kuka o'e ip wuywebe — io'e. — Ipiat kuka o'supi'ajoat ip wuywebe — io'e. — "Cedağ ma mo a'ğū oceju e'em" i'e ba'ore wuywebe — io'e cebe ip.

⁴ Soat aweromayū o'ğuy pit iboap epere buje. O'jepit ip jeduk'a be.

20 Ce'aweroap epere buje Paulo Jesus kay itabucayū o'tomuwā je'awero am. O'jekawēn ceweju ip ya'ōmucan am. Guyjom:

— Cum puk ōn — io'e cebe ip. — Macedōnia eipi kay ōn cum. Eybu'um ġū juy epesop Jesus kay — io'e cebe ip.

O'jēm Ēfeso ka bewi. O'ju.

² Ġebu je Macedōnia eipi dağ oeku. Soat kaka dağ oekuku itabucayū jojom. O'ğubikuy ip biğ ma itabut am Jesus kay.

³ Grécia eipi kay oajēm. Eba pūğ kaxi ibo eipi be osunuy. Paulo ma tiboğ cīcāat mudek ojuy o'e Síría eipi kay jeju am. Judeuyū bit Paulo aoka ojuy ip. O'jewawē ip Paulo aoka am.

— Ga'a juy ayaoka — io'e ip. — Kobexixi be iōm puje juy ayaoka — io'e ip.

Paulo o'jekūyjo jaoka ojuy ip iam. Imēnpuye oibu'un tiboğ cīcāati mudek am.

Filipos ka kay Paulo o'ju. Kapurūğ tağ o'ju. Macedōnia eipi dağwi o'ju. Warara'acayū o'ju ceweju itabucayū. ⁴ Ibūrū ma ip o'ju Paulo eju: Sópattro, Aristarco, Segundo, Gaio, Timóteo, Tíquico, Trófimo. Sópattro Beréia ka bewiat osunuy. Pirro ipot osunuy. Aristarco Tessalōnica ka bewiat osunuy, Segundo dak. Gaio Derbe ka bewiat osunuy. Tíquico Ásia eipi bewiat osunuy, Trófimo dak. Ibūrū ma ip o'ju Paulo eju -7 beayū. ⁵ Jay. Oajēm ip. Ōn tak cuk adi oğuy Filipos ka be. Ōn Lucas. Ijudup mubarararağ ōn.

Ibocewi 7 beayū o'ju ocewap Trōade ka be ocewiwi am. Paulo odopabijuk Filipos ka be. ⁶ Judeuyū peta muğēğēm osodop ixeyū kabia dağ. Imuğēğēm

pima pāo'a o'o'uk osodop ip- -yamuyuhuhuptōm-tēm'ūmat'a.

Ixe epeta kap puje Trôade ka kay oceju. Ocejēm Filipos ka bewi. Kobexixi be oceōm. Xet. Xet. Xet. Xet. Xet. Pūḡpōḡbi xet tiboḡ cīcāati daḡ oceku. Warara'acayū ocenomuixik pūḡpōḡbi xet kap puje- -itabucayū- -7 beayū. Ocenomuixik ip Trôade ka be. Xet. Xet. Xet. Xet. Xet. Xet. Xet. 7 xet ibo ka be ocesop.

⁷ Katpuje oceje'awero soat itabucayū eju Sábado bima. Pāo'a o am oceje'awero Jesus e'ūap kay oceḡebu am. Yaboḡat'abi be oceje'awero- -umat'abi be. Paulo ocemutaybitbin o'e umat'abi be, kuyaje wara'at ka kay cum puye. Ibun osunuy ocemutaybitbin. Iximadakpe mabuk ocemutaybitbin osunuy. ⁸ Torotoro'i oeku lamparina'a umat'abi daḡ yabimukabia am.

⁹ Aḡokatkat tak Paulo ekawēn o'jekūyjo iboce- -yaypan'isuat. Ibutet Ēutico i osunuy. Xik'i osunuy uk'aba'etatok pe. Xiiih. Oixet pin cīcā ibun osunuy kawēnwēn puye. Xet. O'xet. Wūn. Bakū. Umwi o'at. O'ḡu'āy ip. Kuy ce'ū. ¹⁰ Paulo o'kop umat'abi bewi.

O'kop ce'ūat kay. Erot io'e. O'jeerot. Ce'ūat o'yakobut. O'jekawēn itabucayū eju.

— Epeyekuy ḡu juy — io'e. — Ce'ū ḡu tekul Itait ma — io'e.

¹¹ Ḡebu je umat'abi be ḡuto ocejeu. Pāo'a oceyadakat iḡo'abi be Jesus e'ūap kay oceḡebu am. Ocejekōn. Paulo kabiam oibu'un kawēnwēnapi. Oikabia kawēnwēn. O'jēm kabia buje.

¹² Yaypan'isuat o'tujowat ip tuk'a be. Soat ip icokcok o'e i'at'ibit o'jetait puye.

¹³ — Cum ōn Assôs ka kay — Paulo juk o'e ocewebe. — Kapurūḡ taḡwi ma ōn cum — io'e. — Iboce ōn jeydopabijuk. Kobexixi daḡwi juy eyju bit epeju — io'e ocewebe.

¹⁴ Oceju Paulo wap. Kobexixi be oceōm. Oceju Assôs ka be. Paulo dak o'ju kapurūḡ taḡwi Assôs ka be. Ibo ka bewi ixe dak oōm kobexixi be oceweju.

Gebuje oceju Mileto ka kay. Mitilene ka dağ oceku. ¹⁵ Ocejēm Mitilene ka bewi. Kuyaje ocajēm tip'aweroro weğün. Tip'aweroro butet Quios i osunuy. Kuyaje ocejemüğ wara'at tip'aweroro be. Ixe tip'aweroro butet Samos i osunuy. Kuyaje ocajēm Mileto ka be. ¹⁶ Paulo ibu'u osunuy ibun jenuy am Ásia eipi be. Imēnpuye ocejecū ġu Êfeso ka be. Ocekap ma. Jerusalém ka be yajēm pin o'e peta muğē awap- -Pentecostes ekabia awap.

¹⁷ Gebuje Paulo Êfeso ka watwat o'tomuwā Mileto ka be bima- -Jesus kay itabucayū kukukayū. Mileto ka Êfeso ka tēğ ma o'sukadop. O'tomuwā ip tot am jekay.

¹⁸ Yajēm puje Paulo o'jekawēn ceweju ip.

— Oburereyū — io'e. — Ibun cuk oğuy eyxe. Wuykukukat peam kapikpiğ pima cedağ ma juk adi ojekukuku. Ásia eipi bewi wajēm pujeap ojekukuku cedağ. Eyetaybit wekukuam. ¹⁹ “Soat podi ma wa'ō-buyxi òn,” i'ümğū juk adi ocece eywebe. Oğuycūğ cuk adi ojekukuku warara'acayū ikērēat muğēğēm pima. Ipiat cuk adi osupi'ajojo Judeuyū oaoka ojuy bima. Kawēn idipat muwēnuwēn cuk adi ojekukuku soat pe. ²⁰ Obu'un ġu ađi kawēn idipat muwēn ām eywebe. Soan òn eymukūyojo. Eymutaybitbin cuk adi je'aweroroap'a be, eyduk'a be dak.

²¹ — Jesus muwēnuwēn cuk adi ojekukuku soat pe eywebe- -Judeuyū be, Judeu'ūmayū be dak. “Eyğuycūğcūğ cuy epesop ikērēat kuğ puye,” i juk adi ocece eywebe. “Ikērēat mujurūğrūğap cuy epeyepere,” i juk adi ocece eywebe. “Deus ekawēn tağ cuy epeku-ku,” i juk adi ocece eywebe. “Jesus Cristo kay eyetabun cuy epesop- -wuykukukat kay,” i juk adi ocece eywebe. Imēn cuk adi eymutaybitbin ojekukuku. Eyetaybit soat iboam — io'e.

²² — Ğasū bit Jerusalém ka kay òn cum. Deus biōğbuk a'ōbi òn cum. Wetaybit ġu apēn je'bapuk owebe Jerusalém ka be iam. ²³ Ipiat cuy osupi'ajo ibo ka be. Obu ip ibo ka be. Omuôm ip daomūnmūnap'a be. Wetaybit iboam. Soat ka dağ òn cucum pima, Deus biōğbuk kuy juk omukūyojo iboam.

²⁴ Imēnpit omuparararan ġu iboap. Waokapi ġu. Obikuy jġā bit soat wekapikap mu'ūm ām- -Jesus Cristo o'ġūm owebe iap mu'ūm ām. Ixe juk o'e owebe " 'Ikērēat mujurūġrūġap cuy epeyepere,' i juy ece soat pe," i. " 'Eyepere buje Deus ikērēat ju'uk eywebewi,' i juy ece soat pe," io'e owebe. " 'Wuykukukat Jesus kay eyetabun puje, Deus ikērēat ju'uk eywebewi,' i juy ece cebe ip," io'e. "Deus soat em xipan jeykuk," i juy ece cebe ip," io'e. "Obikuy jġā wekapikap mu'ūm ām," io'e.

²⁵ — "Soat ipi daġacat je'e 'Deus acā wuykukukat,' " i juk adi ocece eywebe kuy bima. ²⁶ - ²⁷ Ġasū bit wetaybit waram eyju ojo ġu ijodi iam. Imēnpit Deus ekawēn cuk adi oġuwēnuwēn eywebe. Deus pe eymukūyjojoap ekawēn tak oġuwēnuwēn soat pe eywebe. Abu be oġuwēn'ūm? Soat pe ma oġuwēn. Imēnpuye pūġ ey'in Jesus kay itabut'ūm pima, ōn ġu okpiwat. ²⁸ Deus ekawēn taġ cuy epeku — io'e cebe ip. — Deus biōġbuk cuk eynaē Jesus kay itabucayū kukukayūm. Jesus ebekitkiyū ip, ixē o'jedoyekereren cebeam ip puye — io'e. — Xipan cuy ip epejukuk ovelha kukuk'ukat puxim — io'e.

²⁹ — Wetaybit ōn ijoce'ūm pima aġokatkiyū jajēm eykay iam- -ikērēat mujurūġrūġ'ukayū- -ika'uat puximayū. Napaap ip ġuwēn eywebe Jesus kay eyetabucap epereap ojuy. Ovelha kay wida ajēmap puxim jajēm ip eykay. Adeayū ġuġuykukuku ip. Icēmān ġu ip ġutaybin- -napaam acā. ³⁰ - ³¹ Warara'acayū ġuġuykukuku ip jetabucap epereap ojuy. Imēneju aġ cuy epesop ixeyū be eymuġuykukuap puxim. Pūġpūġ ey'in tak warara'acayū ġuġuykukuku jetabucap epereap ojuy — io'e cebe ip.

— Eba pūġ koato ma juk adi eymutaybinbin oġuyġuyġuy. Kawēn idipat muwēnuwēn cuk adi oġuyġuyġuy eywebe kabiam, ixima daġ tak — io'e. — Ekay wetabotaidabotbon kapiki pūġ cuk adi oġuyġuyġuy. Ġebum cuy epesop iboap kay — io'e cebe ip.

³² — Deus pit xipan cīcā jeykuk — io'e cebe ip. — Deus ekawēn kay juy epesop — io'e. — Ixe ekawēn kay bima, eypararam ġu epesop. Deus ekawēn

kay bima, jeybu'un ġu Jesus kay eyetabut am. Deus xipacat ūmūm jebekitkiyū be. Eywebe dak xipacat je'ġūmgūm — io'e. ³³ — Eyxe bima wetabikuku ġu juk oġuy eybubut kay eyxe bima, eyeprata kay dak, eyeouro kay dak, eydoti kay dak. ³⁴ On ma kapik-pik'uk oġuy obubut pu am, odoti bu am tak, owejuayū bubut pu am tak, owejuayū doti bu am tak. Eyju dak eyetaybit iboam. Imēn cuk adi ojekuku eyxe bima. ³⁵ Eyju dak wekukuap puxim cuy epeku ġasū — io'e. — Acejekapik cīcā juy tadaybotbocayū buywat am. Kuy imēn adi eymutaybitbin oġuy — io'e. — Wuykukukat Jesus imēn o'e:

Ibubu'ukat cokcokap podi ma iūm-
ūm'ukat pit e'em, i.

Imēn o'e wuykukukat Jesus Cristo — io'e. — Ceka-wēn kay ġebum cuy epesop — io'e cebe ip.

³⁶ Paulo imēn o'jekawēn Jesus a'ōkayayū kukukayū eju- -Ēfeso ka bewiayū eju.

Iboap e buje Paulo o'jēg'aecōġcōġ. O'jekawēn Deus eju. Soat Ēfeso ka bewiayū dak o'jekawēn Deus eju. ³⁷ Soat ip wawa o'e Paulo cēm puye.

Ġebuje Paulo ip o'yakobutbut. O'yaġobukōnkōn ip cēm puye. ³⁸ Iġuycūġcūġ ip o'e Paulo ekawēn kay, "Waram eyju ojo ġu ijodi," io'e buye.

21 O'ju ip Paulo eju kobexixi kay. Ocejewemu-wēn cebe ip. Ocejēm cexewi ip. Oceōm kobexixi be.

Tiro ka kay oceju. Cucum pima oceju tip'aweroro be. Ocajēm tip'aweroro be. Tip'aweroro butet Cós i osunuy. Kuyaje ocajēm Rodes ka ebikopap pe. Ibocewi ocajēm Pátara ka be.

² Wara'at kobexixi oacetobuxik. Oceōm cebe- -Fenícia eipi kay cu ojuyat pe. Ocejek ebikopap pe-wi. ³ Wara'at tip'aweroro oceptipoco ġebuje. Ibutet Chipre i osunuy. Ocekap wuyba'ūġat kadi. Oceju Síria eipi be. Ocejemūġ Tiro ka ebikopap pe. Tiro ka Síria eipi be opop. Kobexixi be kapik-pik'ukayū ta-

rekrek tujujēm ojuy kobexixi bewi iboce. Imēn ocajēm Tiro ka kay.

⁴ Jesus kay itabucayū oacetobuxik ibo ka be. Ibun ma ocesop cexe ip. ⁷ xet ocesop cexe ip. Ixeyū o'jekawēn Paulo eju Deus biōgbuk a'ōbi.

— Eju ġu juy Jerusalēm ka be — io'e ip Paulo be. — Jaoka ip itakomaayū — io'e ip.

⁵ Ocejēm puje, itabucayū o'je'awero ocewebe jewemuwēn ām-ağokatkayū, aoyū dak, bekitkit tak. Oceweju o'ju ip ebikopap pe. Ocejēğ'aecōğcōğ ka'oririt pe. Deus eju ocejekawēn.

— Cum puk oceju — i oce Tiro ka bewiyū be.

— Ha'a — io'e ip. — Deus cuy je'ju eyweju — io'e ip ocewebe.

⁶ Oceōm kobexixi be. Ixeyū bit o'jepit jeduk'a be. Imēn ocejēm Tiro ka bewi. ⁷ Kobexixi dağ oceju.

Ocejēm Ptolemaida ka kay. Itabucayū oacetobuxik. Pūğ kabia ocesop cexe ip.

⁸ Kuyaje ocajēm Cesaréia ka be. Filipe oacetobuxik. Filipe kawēn idipat muwēnuwēn'ukat osunuy. Kuy bima Jerusalēm ka watwat Filipe o'jomuy itabucayū buywatwat'ukan 6 beayū eju. Ixe duk'a be ocesop. ⁹ Ixe ebadipdip taxit osunuy. Itoptep ġu ixeyū bit osodop. Deus ekawēn muwēnuwēn'ukayū osodop ip. Pūğ kabia ġu ixede duk'a be ocesop.

¹⁰ Ağokatkat tak oajēm ocejay. Oajēm Judéia eipi bewi. Deus ekawēn muwēnuwēn'ukat osunuy. Ağabo i ibutet osunuy. Apēn ġuyjom je'bapuk iam Deus ocemutaybitbin'uk osunuy. ¹¹ Ixe Paulo ukpumūnpu o'subu'uk. Jebōğbi o'jomūnmūn Paulo ukpumūnpum. Jekağobi dak o'jomūnmūn yukpumūnpum.

Imūnmūn epere buje, o'jekawēn Paulo eju.

— Deus biōgbuk omukūyjom — io'e. — Jerusalēm ka watwat jedaomūn — io'e. — Jedaomūn ip apēn obōğbi mūnmūn iap puxim — io'e. — Jeūm ip Judeu'ūmayū be-itakomaayū be — io'e.

Āgabo imēn o'e Paulo be.

¹² Gebuje oceju ocejekawēn Paulo eju.

— “Eju ġu juy Jerusalēm ka kay,” — i juk ocece ewebe — ioce cebe. — Jedaomūn ip — ioce.

— Eju ġu juy — io'e warara'acayū dak yaokaap puxim.

Itabucayū o'tōtōn Paulo iju pin puye- -Cesaréia ka watwat.

¹³ — Apēnpuye eyju wawa? — io'e Paulo. — Cum cuy ōn Jerusalém ka kay — io'e. — Omuġuy-cūġcūġ eyju? Apēnpuye eyju omudaobu'un ojuy? Wuykukukat Jesus ibikuy bima, obu'u ġu oce ixeyū be odaomūn ām. Obu'u ġu dak we'ū ām. Wuykukukat Jesus a'ōbi acā ojeku — io'e.

¹⁴ Paulo aġuymuwarurun pa'ore o'e ocewebe. Imēnpuye ocebu'un yaġuymuwarurun.

— Wuykukukat bikuyap taġ cuy ejeku — ioce cebe.

¹⁵ Imēneju ocejewemuxipan Jerusalém ka kay oceju am. Oceju.

¹⁶ Jay. Ocajēm Jerusalém ka kay. Jesus kay itabucayū o'ju oceweju. Ocedujowat ip Menasom kay Cesaréia ka watwat. Menasom Chipre eipi bewiat osunuy. Kuyje ma itabucat osunuy Jesus kay. Ixe duk'a be ocesop.

¹⁷ Jerusalém ka be ocajēm puje itabucayū jom oceku. Icocok o'e ip ocajēm puje.

¹⁸ Kuyaje Paulo o'ju Tiago kay oceweju. Tiago xe awerom osodop ip itabucayū kukukayū- -Jerusalém ka watwat. ¹⁹ Paulo ixeyū o'tobede.

Gebuje:

— Deus ja'ōbacaap o'ġubapukpukpuk Judeu'ūmayū be ōn ixeyū xe bima — io'e Paulo. — Tak ġu ip oitabun Jesus kay Judeu'ūmayū. Ade jījā ip oitabun — io'e Paulo cebe ip.

²⁰ — Ka'ūmġu Deus co'iat xipacat! — io'e ip, iboap co buje.

Gebuje itabucayū kukukayū o'jekawēn Paulo eju.

— Xipat ma, ocekitpit — io'e ip. — Imēnpit etaybit ade Judeuyū itabut o'e Jesus kay iam — io'e ip. — “Jesus kay wuyetabut puje dak Moisés ekawēn taġ cuy ajeku,” i'e'em pit ip — io'e ip. ²¹ — “Paulo bit warēmtaġ ma Judeuyū mutaybitbin Judeu'ūmayū ka be bima,” i'e'em ip napa ma — io'e ip

Paulo be. — “ ‘Moisés ekawën tağ ġu juy epeku,’ i'e'em Paulo,” i'e'em ip — io'e ip. — “ ‘Eyipotpoyū juy epetaypu'ağobixeedakat ġu,’ i'e'em Paulo,” i'e'em ip — io'e ip. — “ ‘Aypapayū'ūm'ūm ekawën tağ ġu juy epeku ġasū bit,’ i'e'em Paulo,” i'e'em ip napa ma — io'e ip Paulo be. — Imën emuymuy Judeuyū, itabut ma'ġu ip Jesus kay — io'e ip. ²² — Kuy ip o'jekūyjo ijoce ajēmap awēğ — io'e ip Paulo be.

²³ — Oce'e'eap tağ cuy ece — io'e ip Paulo be. — Ebadipdip ağokatkayū jewemuisusun Deus xe, itabucayū — io'e ip. — “Ocewemuisun cuy,” i juk o'e ip Deus pe. ²⁴ Ixeyū ebadipdipayū juy etujowat eweju. Wuybabi dağ cuy ecewemuisun ceweju ip — io'e ip Paulo be. — Dinheiro juy eğūm ebadipdipayū be yakoeapteim, iōhō buap teim tak. Iōhō juy ip je'ġūm paīyū be imupik am Deus etabixe. Imën e'e buje, soat itaybit je'e icēm ġu e'em ip Paulo muymuy iam — io'e ip. — Itaybit je'e ip ēn tak Moisés ekawën tağ jekukum iam — io'e ip Paulo be.

²⁵ — Kuy oceje'awero Judeu'ūmayū awē ām — io'e ip. — Cartadup ocetupmuju cebe ip -itabucayū be. Imën e'em iğodup: “Deusbaroyū wap iēnmōğ'ibit-ēn cuy epesuēn'o ġu,” i. “Puca doy juy epetoykōn ġu,” i. “Iēntoyteyatēn cuy epesuēn'o ġu,” i. “Wara'at tayxi eju ġu juy epeyepo, wara'at itop eju ġu dak,” i. Ibiatup ocetupmubararak ixeyū awēaptum — io'e ip. — Ocewebe yawēwēap tağ cuy jeku ip — io'e ip Paulo be.

— Ma — Paulo o'e. — Eyekawën tağ cuy oce — io'e.

²⁶ Paulo ixeyū be jawēap tağ o'e. Ebadipdipayū o'tujowat jewēju. Kuyaje o'ju jewemuisun am Deus xe ceweju ip. Oōm Deus eju kawēnwēnap'a be-yaboğat'a be.

— Ğaxīn ma oceisu oce'e — io'e ip paīyū be. — Oceisu bima, iōhō oceğūm eywebe imupik am Deus etabixe — io'e ip paīyū be.

Paulo iōhō kuka o'ġūm ebadipdipayū muisunapteim 7 xet kap puje. Iboap tak o'ğuwēn paīyū be.

²⁷ 7 xet kapap wi ijasūn pima Judeuyū Paulo o'jojojo Deus eju kawēnwēnap'a be -Asia eipi bewiayū. Ixeyū Judeuyū adeayū o'gutakomān Pauloyū kay. Ixeyū Paulo o'jat. ²⁸ O'jewāwā ip ya'oberen adeayū be.

— Israel naxegebitbit! — io'e ip. — Ocebuiwan cuy epe'e! — io'e ip. — Daosuw! — io'e ip. — Aḡo-katkat cuy ajat — io'e ip. — Ixe warēmtaḡ wuymutaybitbin jekukum soat kaka daḡ — io'e ip napa ma.

— Ixe e'em adeayū be: “Judeuyū ikērēat kuḡ Deus xe,” i; “Moisés ekawēn taḡ ḡu juy epeku,” i dak — io'e ip napa ma. — Ixe Deus eju kawēnwēnap'a muymuy — io'e ip napa ma. — Judeu'ūmayū o'tujuōm ija'a be — io'e ip. — Ija'a mubuyxi'ūm'ūm cīcā ip — Judeuyū napa ma o'e -Asia eipi bewiayū.

²⁹ Tūybe Paulo Judeu'ūmat o'tujuōm Deus eju kawēnwēnap'a be iān o'e ip. Imēnpuye oitakomān ip Paulo kay. Ixe Judeu'ūmat putet Trófimo i osunuy. Ēfeso ka bewiat osunuy. Koap pima Judeuyū Paulo o'jojojo Trófimo eju. Xepxem oekuku ip Jerusalém ka be -Paulo Trófimo eju. ³⁰ Imēneju ade Jerusalém ka watwat o'jedau Paulo kay. Soat taḡwi o'jedau ip. Paulo o'jat ip. Kururuḡ o'tujujēm ip ija'a bewi. Aki-kay o'tujowat ip. Dao ma ija'a exīntabi o'tomudip ip. ³¹ Paulo aoka ojuy ip.

Adeayū dak o'jedau 1000 be sorarayū kukukat kay imukūyjom -Jerusalém ka wiwi'ukayū kukukat kay.

— Soat Jerusalém ka watwat jewaokakam! — io'e ip cebe. — Kawēn ikērē jījā — io'e ip. — Jawaoka ojuy ip — io'e ip cebe.

³² Imēnpuye sorarayū kukukat dao ma o'jedau iḡo'a be. Ade jījā jesorarayū o'tujowat jeweju. 100 be sorarayū kukukayū dak o'tujowat jeweju.

O'jedau ip Paulo kay. Itakomaayū Paulo mupokupoḡ o'e. Oibu'un ip yaoka am sorarayū dobuxik puje. 1000 be sorarayū kukukat oajēm. Jesorarayū o'ḡuju Paulo bum iḡo'a beayū be yaokaap puxim.

³³ — Epesubumukirik cuy correntebum -xepxepum — io'e sorarayū be.

— Abu ite aḡokatkan? — io'e yaoka ojuyayū be.
— Apēn ite o'e eywebe? — io'e.

³⁴ Ġebuḡe yaoka ojuyayū o'jewāwā ya'ōberen. Wara'at taḡtaḡtaḡ ma ip o'jewāwā. Imēnpuye 1000 be sorarayū kukukat pe itaybit pa'ore o'e apēnpuye Paulo aoka ojuy ip iam.

— Epetujowat cuy wuydopdopap'a be — io'e je-sorarayū be.

³⁵ Sorarayū Paulo o'tujowat jedopdopap'a kay. Toptopap'a ewadaḡḡūn xe bima sorarayū ja'ōpi'a jeje Paulo o'tujuu itakomaayū be yaokaap puxim. ³⁶ Itakomaayū nomuju o'jedau ip Paulo bu ojuy.

— Epeyaoka juy! — io'e ip ya'ōberen.

³⁷ Ġebuḡe Paulo o'jekawēn 1000 be sorarayū kukukat pe.

— Wekawēn put tu eweju? — io'e Grego a'ōm 1000 be sorarayū kukukat pe.

³⁸ — Etaybit tu Grego a'ōm? — io'e. — Egito eipi bewiat ḡu du ēn? — io'e. — Kuy bima ixē Egito eipi bewiat adeayū o'ḡu'awero jenopaḡoḡo ām Roma ka kukukat esorarayū eju. 4000 aḡokatkayū oekuku ip ceweju. 4000 beayū o'tujowat uk'a'ūmat pe. Warara'acat aoka ojuy ip o'e. Ēn ixē aḡokatkat ḡu du? — 1000 be sorarayū kukukat o'e Paulo be.

³⁹ — Ka'ūma — io'e. — Ġujuat ḡu ōn — io'e. — Wara'at ma ōn pit. Judeu ōn. Tarso ka be okap-Cilicia eipi be — io'e. — Tarso ka waypanap ka-ikaboḡatka — io'e. — Wekawēn pin cīcā waoka ojuyayū be. Āḡ puk ocekawēn ceweju ip — Paulo o'e.

⁴⁰ — Ha'a. Ecekawēn puk — io'e.

Paulo cūḡ'i osunuy sorarayū dopdopap'a ewadaḡḡūn ceje. Wēḡwēḡ'i o'e jebum itakomaayū muy-mūḡ ām.

Ġebuḡe Paulo o'jekawēn itakomaayū be. Ya'ōm ma ip o'jekawēn ceweju ip-Judeuyū a'ōm-Hebreu a'ōm.

22 — Tapupuyū okitpitpiyū, baybayū — io'e.
— Eya'ōpicūḡcūḡ cuy epešop wa'ō kay. Ocedayo juy eywebe wa'ījoam — io'e.

² — Wuya'ōm ma teku kawēnwēn! — io'e ip Judeuyū.

Mūg o'e ip ya'ījo am. Paulo o'jekawēn ceweju ip.

³ — Ocededayo juy — io'e. — Judeu ōn. Tarso ka be okap Cilícia eipi be — io'e. — Ijop ka be ma bit owaypan- -Jerusalém ka be Gamaliel be omutaybit am. Moisés ekawēn omutaybitbin osunuy. Ocedobuyū'ūm'ūm ekawēn omutaybitbin osunuy — io'e. — Kaypatpan ġu ōn pit wetaybin. Soat eyju Deus bikuyap taġ jeku ojuy. Ōn tak eybuxim cuk adi ibikuyap taġ jeku ojuy oġuy — io'e.

⁴ — Wetakoma jījā juk adi oġuy Jesus a'ōkayayū kay- -ieisuat e daġ jekuku'ukayū kay. Ixeyū kaykay jījā ma juk adi oġuy. Ade ip otaomūnmūn. Daomūnmūnap'a be ip oġuōmōm- -aġokatkayū, aoyū dak. Ade ip oyaokaat ixeyū'in. ⁵ Paīyū kukukayū itaybit imēn cuk adi ojekuku iam, Judeuyū kukukayū dak — io'e. — Ixeyū juk cartadup o'tupūm owebe- -Judeuyū beaptum- -Damasco ka watwat beaptum — io'e.

— Damasco ka kay juk oju. Jesus kay itabucayū daomūn ām oju. Ijoce taomūnmūn ip tujupit ojuy oju Jerusalém ka be. Ipiat pi'ajoat ojuy cebe ip oju.

⁶ E daġ cucum pima juk oajēm Damasco ka tēg ma. Kaxicuġ oajēm. Dao ma oikabia jījā ma wakokoreren. ⁷ O'at ipiju wekuyap pibun.

— Gebuje kabi beat oya'ījojo. O'jekawēn oweju.

— “Saulo,” io'e. “Apēnpuye warēmtaġ ma ēn okuġ?” io'e owebe.

⁸ — “Abu ēn tak, Kariwa?” i oce cebe.

— “Jesus ōn,” io'e. “Nazaré ka be tūibit ōn. Ēn ma ipiat esupi'ajojoat owebe,” io'e.

⁹ Oweju oekukuiayū o'jekuy jījā. Kabiaat o'jojojo ip. Oweju kawēnwēnat a'ō bit o'jojojo ġu ip.

¹⁰ — “Apēntak oce, Kariwa?” i oce.

— “E'āy,” io'e. “Damasco ka be juy eju,” io'e. “Ibo ka be aġokatkat apēn Deus ibikuy ewebe eku am iap ġuwēn ewebe,” io'e — Paulo o'e.

¹¹ — Gebuje wekabiokok ojekuku ixē kabiaat ie-

pokat wetabimu'ūm'ūm puye. Owejuayū obacom okuḡ. Imēn ocajēm Damasco ka be — io'e.

¹²Ibo ka be bima, aḡokatkat oajēm okay. Ibutet Ananias i osunuy. Moisés ekawēn taḡ jekuku'ukat osunuy. Xipat cīcā osunuy soat Damasco ka watwat xe- -Judeuyū xe. ¹³O'jekawēn oweju.

— “Obure Saulo, ececoan waram,” i adi o'e owebe.

— Gebuje'isum ma ocecoan. Oceak cekay — io'e Paulo. — Waram wetate buje Ananias o'jekawēn oweju.

¹⁴— “Saulo,” io'e. “Kuyje Deus enaē,” i adi o'e Ananias. “Ocedobuyū'ūm'ūm itabut osodop ip ixe kay. Ixe juk enaē ixe bikuyam etaybit am. Ixe juk enaē ewebe ixe buywatwat'ukat co am- -cūḡ cīcāat co am. Ixe juk enaē ibuywatwat'ukat pe emukūyjo am,” i adi o'e owebe. ¹⁵“Ixe ekawēn muwēnuwēn'ukan cuy eḡuy,” i adi o'e. “Apēn ejojojoiap cuy eḡuwēnuwēn, apēn eya'ījojoiap tak,” i adi o'e Ananias owebe — io'e Paulo.

¹⁶— “Ajo-wiwim tak ēn? E'āy!” i adi o'e owebe. “Ecewemubatisaan cuy!” i adi o'e. “'Ikērēat cuy eju'uk owebewi,” i juy ece wuykukukat pe,” i adi o'e. “Imēn e'e buje, Deus ikērēat ju'uk owebewi,” i adi o'e owebe.

Imēn Ananias o'jekawēn owebe — Paulo o'e.

¹⁷— Jerusalēm ka kay juk ocepit — io'e. — Deus eju kawēnwēnap'a be oju jekawēn ām Deus eju. ¹⁸Deus ekawēn kay ḡebum pima wuykukukat ojojowo wexey jo'iat pe — Paulo o'e.

— Gebuje wuykukukat o'jekawēn oweju.

— “Daosuw!” i adi o'e owebe. “Ejēm cuy Jerusalēm ka bewi. Ijopka beayū itabut ḡu je'e ip ekawēn kay cedaḡ ma'ḡu ēn omuwēnuwēn,” i adi o'e owebe wexey jo'iat pe.

¹⁹— “Ka'ūma, Kariwa,” i adi oce. “Wekawēn kay itabut je'e ip,” i adi oce. “Soat ip itaybit apēn cuk adi ojekuku iam,” i adi oce cebe. “Itaybit ip apēn soat kaka daḡ ojekuku iam, apēn Judeuyū e'aweroroap'a be juk adi oōmōm itabucayū bu ojuj iam

tak, apên taomûnmûn ip cuk adi otujupitpit ijop ka be iam tak, apên cuk adi ip oyaokaka iam tak, apên cuk adi daomûnmûnap'a be ip oġuômôm iam tak," i adi oce cebe. ²⁰ "Estêvão aokam pima, ôn tak cuk ojojojo ip-ekawên muwênuwên'ukat aokam pima," i adi oce cebe. "Tÿybe xipat yaoka am iân mo oce. Estêvão'ûm o'yaoka'iaiyû eekabek kuġ oġuy," i adi oce. "Ġasû bit waġuyisun ma ôn jekukum. Soat ijocayû itaybit iboam. Imênpuye wekawên kay je'e ip," i adi oce wuykukukat pe.

²¹ — "Ka'ûma," i adi o'e. "Ejêm cuy ijocewi," io'e. "Ewebe omuwên puje, itabut ġu je'e ip ekawên kay," i adi o'e. "Ôn ma wÿy ma jemuju. Judeu'ûmayû kay ôn jemuju," i adi wuykukukat o'e owebe — Paulo o'e adeayû be.

²² Paulo ekawên cocom cîcâ ip osodop. "Judeu'ûmayû kay ôn jemuju" i'e buje bit, oibu'un ip ya'î-jo am. O'jewâwâ ip ya'ôberen.

— Epeyaoka juy! — io'e ip ya'ôberen. — Epeyaoka juy! — io'e ip. — Epejoxik akikay — io'e ip.

²³ Ya'ôberen jewâwâwâ ip o'e. Jesay wêġwêġân ip jetakoma jîjâ buye. Ka'wi o'joxikxik ip jetakomaap pibun. ²⁴ 1000 be sorarayû kukukat tak Paulo o'ġu-ômat sorarayû dopdopap'a be- -yaboġat'a be. Itaybin pin o'e apênpuye adeayû ya'ôberen o'jewâwâ iam. Imênpuye o'jekawên sorarayû be.

— Epeġupokupok cuy ixee muġêġêġbum — io'e. — Ġuwên paxi jekpiwacap jemupikupikap? Apênpuye o'jewâwâ ip ya'ôberen cekay iap ġuwên paxi? — io'e sorarayû be.

²⁵ Sorarayû Paulo o'subôġbimukirik imupokupok am.

Ġebuje Paulo o'jekawên 100 be sorarayû kukukat eju.

— César ebekit ôn- -Roma ka kukukat ebekit ôn — io'e. — Cedaġ tu eywebe César ebekit mupokupok am? — io'e. — Eyju odujowat ġu buk ibimâmâmâ- 'ukat ekawên coco'ukayû dopabe — io'e. — Eyetaybit ġu ma buk ôn ma xe'e okpiwat iam, pâm ġuto ka'ûma iam — io'e.

²⁶ Imēneju 100 be sorarayū kukukat o'jekawēn 1000 be sorarayū kukukat eju. Apēn Paulo o'e cebe iap ekawēn o'ḡuwēn cebe.

— Apēntak ēn em cebe? — io'e. — Ixe aḡokatkat César ebekit — io'e.

²⁷ 1000 be sorarayū kukukat oajēm Paulo kay.

— Cēm tu ēn César ebekit? — io'e Paulo be.

— Hm hm — io'e.

²⁸ — Ōn tak cebekit ma — io'e. — Ade wedi-nheiro oḡu'ūm cebekin em pima — io'e.

— Ōn pit cebekit okapap ma — Paulo o'e.

²⁹ Dao ma o'jewede ip cexewi sorarayū -Paulo mupokupok ojuayū. 1000 be sorarayū kukukat tak yaḡuybabi'ūm o'e. Yaḡuybabi'ūm o'e Paulo César ebekit iam itaybit puye, o'subōḡbimukirikat puye dak. Soat ip oibu'un Paulo kaykay am.

³⁰ 1000 be sorarayū kukukat itaybin pin o'e apēn-puye Judeuyū Paulo o'jomuymuy iam. Paulo bōḡbiki-rikpu o'subumuwekap kuyaje. Judeuyū ya'ōbuyxiayū o'tomuwā je'awero am. Paīyū kukukayū dak o'tomuwā ibimāmāmāat ekawēn coco'ukayū dak. Soat ip o'je'awero. 1000 be sorarayū kukat Paulo o'tujowat aweromayū dopabe- -jewawēwē'ukayū yoboḡayū dopabe.

23 Paulo o'jeak jewawēwē'ukayū yoboḡayū kay. — Oburereyū — io'e. — Apēn cedaḡ ma oxe iap taḡ cuk adi ojekuku. Cedaḡ ma ḡasū dak ōn jekukum Deus etabutpe — io'e.

² Iboap co buje paīyū kukukat oitakomān Paulo kay. Paīyū kukukat putet Ananias i osunuy. Tūybe Paulo Deus muymuy iān o'e.

— Esubioka juy — io'e Paulo xeayū be. ³ — Deus cuy ipiat supi'ajoat ewebe ma — Paulo o'e paīyū kukukat pe. — Ocemuḡuykukuku'ukat ēn! — Paulo o'e. — Ēn xik'i ijoce wa'ījo am etaybit am wuydobuyū'ūm'ūm ekawēn taḡ ocece iam pām ḡuto ka'ūma iam. Imēn pit wuydobuyū'ūm'ūm ekawēn taḡ ḡu juk ēn tak obiokaat! — io'e Paulo.

⁴ — En Deus epaiyū kukukat muymuy — cexeat o'e Paulo be.

⁵ — Obadipdipyū — io'e. — Wetaybit ġu juk ixepaiyū kukukat iam. Wetaybit pima bit imēn ġu kajuk oce cebe. Imēn e'em Deus ekawēn tup:

Eybadipyū kukukat cuy epejomuymuy
ġu, i.

Imēn Deus ekawēn tup e'em — Paulo o'e.

⁶ Paulo o'jeak Fariseuyū kay. O'jewāwā ya'ōberen.

— Obadipdipyū — io'e. — Fariseu ōn! Webaydak Fariseu osunuy. Wetabut wuye'ū buje waram ġuto acejetait iap kay. Imēnpuye eyju wa'ijojom ġasū eyetaybit am okpiwat paxi iam — io'e cebe ip.

Pūġpūġ jewawēwē'ukayū yoboġayū'in Fariseuyū ip osodop. Warara'acayū ixeyū'in Saduceuyū ip osodop. Paulo itaybit o'e iboam. ⁷Imēneju o'jewāwā ya'ōberen — Fariseu ōn — i. Ade osodop ip jewawēwē'ukayū yoboġayū. ⁸Fariseuyū ma e'em — Wuye'ū buje waram ġuto acejetait — i. Itabut ip wuybiōġbuk kake iap kay, Deus ekawēn tojtjt'ukayū kake iap kay dak. Saduceuyū bit napa ma e'em: — Wuye'ū buje waram acejetait ġu — i. Itabut ġu ip wuybiōġbuk kake iap kay, Deus ekawēn tojtjt'ukayū kake iap kay dak. Paulo itaybit o'e pūġ taġ ġu ip itabut iam. Imēnpuye — Fariseu ōn — io'e cebe ip.

⁹Iboap co buje o'jewa'ōxikxik cīcā ip jeweweju jewawēwē'ukayū yoboġayū. Wara'at taġtaġtaġ ma o'e ip. Biġ ma ip o'jewāwā ya'ōberen. Fariseuyū Paulo dayoyom o'e- -Moisés ekawēn imutaybitbit'ukayū.

— Ite aġokatkat ikērēat mujurūġrūġ ġu ocexe — io'e ip. — Warēmtaġ ġu juy ajukuk! Ibiōġbuk xipacat aco'i o'jekawēn ceweju. Deus ekawēn tojtjt'ukat aco'i o'jekawēn ceweju — io'e ip.

¹⁰Jewawēwē'ukayū yoboġayū o'jewa'ōxikxik cīcā. Imēnpuye jewaokaka ojuy ip.

— Paulo ġuwekap aco'i teyūku — io'e 1000 be sorarayū kukukat jewa'ōxikxikayū jojom.

— Paulo juy epejat — io'e jesorarayū be. — Epetojot cuy wuydopdap'a be jewa'ōxikxik'ukayū be yaokaap puxim — io'e cebe ip.

Ya'ō dağ o'e ip sorarayū. O'tujowat ip jedopdopap'a be. Iğo'a be osunuy Paulo.

¹¹ Waram pimaat exima be wuykukukat o'jebapuk Paulo kay ya'ōmucan am. O'jekawēn ceweju.

— Paulo, a'ōcam cuy eğuy — wuykukukat o'e cebe- Paulo be. — Apēn cuk adi Jerusalēm ka watwat pe ēn omuwēnuwēn iap puxim Roma ka watwat pe dak omuwēnuwēn cuy eğuy — Jesus o'e Paulo be.

¹² Kabia buje Judeuyū'in o'je'awero jewawē ām apēn Paulo aceyaoka iam.

— Ga'a Paulo ayaoka — io'e ip. — Paulo aoka'ūm pima juy acejekōn ġu, acetikōn ġu dak — io'e ip. — Yaoka'ūm pima juy Deus ipiat supi'ajoat wuywebe — io'e ip jewewebe.

— Ga'a — io'e ip.

¹³ Imēn o'jekawēn ip jewewebe Deus etabutpe. 40 be osodop ip imēn o'e'e'iaiyū ağokatkayū- Paulo aoka ojuyayū.

¹⁴ Imēn jewawē buje ip o'ju paīyū kukukayū kay, Judeuyū kukukayū kay dak.

— Deus etabutpe juk ocejekawēn — io'e ip. — Pūğ tağ ma ocağuy — io'e ip. — “Paulo aoka'ūm pima juy acejekōn ġu, acetikōn ġu dak,” i juk oce — io'e ip. — Imēnpuye Paulo juy epetomuwā ocewebe jekawēn ām ceweju — io'e ip. ¹⁵ — “Paulo juy eğudot ocekay- jewawēwē'ukayū yoboğayū kay,” i juy epe'e 1000 be sorarayū kukukat pe — io'e ip. — “Iwiwim oceju waram cekawēn co am,” i juy epe'e cebe — io'e ip. — “Cedağ ocewebe waram cekawēn co am,” i juy epe'e cebe — io'e ip. — Imēnpit Paulo jajēm ġu jījā. E dağ iwiwim oce'e yaoka am — io'e ip Paulo aoka ojuyayū paīyū kukukayū be- 40 beayū o'e.

¹⁶ Imēnpit ağokatkat iboce osunuy- yaypan'isuat- Paulo ixīt'it. Apēn Paulo aoka ojuy ip iam o'jekūyjo.

Gebuje ixē yaypan'isuat o'ju Paulo kay imukūyjo am. Oōm sorarayū dopdopap'a be. Apēn cuk o'ya'i-joioiap o'ğuwēn Paulo be. ¹⁷ Paulo 100 be sorarayū kukukat o'tomuwā.

— Ite yaypan'isuat cuy etujowat 1000 be sorarayū kukukat kay, yawēg muwēn pin cebe — io'e 100 be sorarayū kukukat pe.

¹⁸ Yaypan'isuat o'tujowat.

— Taomūnmūnat Paulo juk onomuwā ite yaypan'isuat tojon ekay — io'e. — Yawēg muwēn pin ewebe — io'e 1000 be sorarayū kukukat pe. — Cláudio Lísias pe.

¹⁹ Cláudio Lísias yaypan'isuat pu o'subuijik. Iba com o'tujowat jewēju. O'tujowat wara'acat xewi ixeyū be ya'ijoap puxim.

— Ajo-muwēn pin ēn owebe? — io'e.

²⁰ — Judeuyū o'jewawē — io'e. — Kuyaje je'e ewebe ip: “Paulo juy eḡudot ocekey,” i — io'e. — “Kuyaje juy eḡudot ocewebe waram cekawēn co am,” i je'e ip ewebe — io'e. ²¹ — Imēnpit emuḡuykuku ojuy ip. Etabun ḡu juy eḡuy apēn je'e ip ewebe iap kay — io'e. — 40 aḡokatkayū ebitako be Paulo kapap wiwim. “Paulo aoka'ūm pima juy acejekōn ḡu, acetikōn ḡu dak,” i juk o'e ip jewewebe — io'e. — “Paulo aoka'ūm pima wuyekōn puje, Deus cuy ipiat supi'ajoat wuyewebe,” i juk o'e ip jewewebe — io'e. — Ḡasū ma edeap wiwim ip — yaypan'isuat o'e Cláudio Lísias pe.

²² — Owebe eḡuwēn iap cuy eḡuwēn ḡu wara'acat pe — io'e yaypan'isuat pe.

Yaypan'isuat o'ḡuypit tuk'a be.

²³ Gebuje Cláudio Lísias xepxep 100 be sorarayū kukukayū o'tomuwā.

— 200 sorarayū juy epeḡuxipanat iju am Cesa-réia ka kay — io'e cebe. — Iximadakpe juy epeju — io'e. — 70 cavalo akpi jejeayū juy je'ju. 200 wara-ra'acayū dak je'ju sorarayū- -obukaka'uk co'iat kukayū. ²⁴ Cavalo dak epeḡuxipan Paulo beam. Xipan cuy Paulo epetujowat Félix dopabe- -wuyecuḡap dopabe — io'e 100 be sorarayū kukukayū be.

²⁵ Gebuje cartadup o'tupmubararak tupmuju am Félix mukūyjoaptum. Imēn e'em ibo dup:

²⁶ Félix, ocecuḡap ēn, i. Obutet Cláudio Lísias, i. A'ōbuyxiat oxe, i. Kato mujujum ōn ewebe ijjudup

pe, i. ²⁷ Taomūnmūn aḡokatkat mujujum ōn ewebe, i. Judeuyū ixe o'jat, i. Yaoka ojuy ip, i. Ixe César ebe-
kit iam omutaybin puje wesorarayū eju oju cekay, i. Otujupa'um yaoka ojuy'iyū xewi, i. ²⁸ Wetaybin pin
oḡuy apēntak ite ikērēān o'e cebe ip iam, i. Imēnpuye ixe otujowat Judeuyū kukukayū dopabe-
jewawēwē'ukayū yoboḡayū dopabe, i. ²⁹ "Ite aḡokat-
kat wuydobuyū'ūm'ūm ekawēn taḡ ḡu jekukum," i
juk o'e ip owebe, i. Imēnpit wuyeipi kukukat o'jo-
muymuy ḡu. Cedaḡ ḡu wuywebe imuōm ām daomūn-
mūnap'a be, yaoka am tak, i. ³⁰ Ibocewi ip omukūyjo
Judeuyū Paulo aoka ojuy iam, i. Imēnpuye ekay ōn
Paulo mujujum, i. "Félix kay juy epeju Paulo awēḡ
mukērērēn ām," i juk oce yawēḡ mukērērēn ojuyayū
be, i. Bay'a, ewātaxipipem ḡu juy eḡuy, i.
Imēn o'tupmubararak. O'tupūm sorarayū be tup tu-
jowat am Félix pe.

³¹ Ḡejuje sorarayū Paulo o'tujowat Cesaréia ka
be. O'tujowat ip apēn 1000 be sorarayū kukukat o'e
cebe ip iap taḡ. O'ju ip cavalo akpi jeje. Ixima be ip
o'ju. Ixima bun oeku ip cūḡcūḡ. Kuyaje dak cūḡcūḡ
ma. Jay. Oajēm ip Antipátride ka be. ³² Ibocewi sora-
rayū o'jepit Jerusalém ka kay- -cavalo akpi jeje'ūm-
ayū.

Ibocewi cavalo akpi jejeayū Paulo o'tujowat ka-
bia buje. ³³ Jay. Oajēm ip Cesaréia ka be. Iecuḡap
tuk'a kay o'ju ip- -Félix duk'a kay. O'tupūm ip Fé-
lix pe- -Cláudio Lísias emudupmubararaktup. Paulo
dak o'ḡūm cebe. ³⁴ Félix o'tupcoco.

Tupco buje Félix o'jekawēn Paulo eju.

— Ajo-eipi wat ēn? — io'e.

— Cilícia eipi wat ōn — io'e.

³⁵ — Awēḡmukērērēnayū ajēm puje jenomuwā ōn
a'ījo am — io'e Paulo be.

— Paulo epeḡuōm Herodes tūyap'a be- -ika ku-
kukat tūyap'a be- -yaboḡat'a be — Félix o'e jesora-
rayū be.

O'tujuōm ip.

24 Judeuyū Paulo awēg o'yawēgmukērērēn Félix pe. 5 xet kap puje paīyū kukukat oajēm iecuḡap kay- -Félix kay. Cesaréia ka be oajēm. Ibutet Ananias i osunuy. Xepxep Judeuyū kukukayū dak oajēm ceweju. Ibimāmāat a'ōbuywatwat'ukat tak oajēm ceweju ip. Ibutet Tértulo i osunuy. Oajēm ip cekay. Paulo awēgmukērērēn ām ip oajēm. ² Félix Paulo o'tojocat.

Paulo ajēm puje Tértulo Paulo awēg o'yawēgmukērērērēn Félix pe.

— Félix — io'e. — Oecuḡap ēn. A'ōbuyxi jījā ēn — io'e. — Soat em ēn xipacan e'em ocewebeam. Etaybit cīcā wuyeipi kukan. Imēnpuye oecokcok cīcā ekay. Ade kabia ka'ūmḡu nopaḡo soat wuyeipi daḡ ēn xipan ocekuḡ puye. Ēn idipan e'em ocewebeam. ³ A'ōbuyxi jījā ēn ocexe. Oecokcok ēn soan e'em ocewebeam puye. ⁴ Imēnpitibun ḡu ocekawēn eweju. Imēnpuye eya'ōpicūḡ cīcā buk — io'e.

⁵ — Ocetaybit soat em ite aḡokatkat ocebadipyū kaykayxi iam. Ite aḡokatkat soat kaka daḡ jekukum--jewaoka ojuyap mubapukpuḡ. Iwarum ma Judeuyū mutaybitbin. Ite Nazaré ka be tūibit kay itabucayū kukukat--Jesus kay itabucayū kukukat — io'e.

⁶ — Deus eju kawēnwēnap'a mubuyxi'ūm ojuy--yaboḡat'a mubuyxi'ūm ojuy — io'e napa ma. — Judeu'ūmat tujowat ojuy iḡo'a be — io'e napa ma. — Imēnpuye ocejat — io'e. — Oceya'ījo kajuk ocetaybit am ocedobuyū'ūm'ūm ekawēn taḡ yukpiwat paxi iam, pām ḡuto ka'ūma ma iam — io'e.

⁷ — 1000 be sorarayū kukukat pit oajēm Paulo kay. Cláudio Lísias oajēm — io'e. — Puyxibut ḡu o'tujupa'um ocexewi — io'e. — "Félix kay juy epeju yawēg mukērērēn ām," io'e Cláudio Lísias ocewebe. Imēnpuye ocajēm ekay — io'e Tértulo.

⁸ — Ēn tak cuy ecekawēn Paulo eju — io'e Félix pe. — Etaybit ece'e cedaḡ ma oceju Paulo awēg mukērērērēn iam — Tértulo o'e Félix pe.

⁹ — Tértulo icēmān e'em ewebe — soat warara'acayū Judeuyū dak o'e napa ma Félix pe. Soat ma ip imēn o'e.

¹⁰ Félix o'jepacūg Paulo kay ēn pukto ecede iape. Paulo o'jewedayo Félix pe.

— Ocokcok cīcā wewedayo am ewebe, ade koato ēn ocekawēn coco'ukat puye- -Judeuyū ekawēn co-co'ukat puye ibimāmāat ekawēn coco'ukat puye — io'e.

¹¹ — Kuy jījā gū oajēm Jerusalēm ka kay- -doze kabia bima ma — io'e. — Wajēm “Ēn xipat cīcā oxe” i'e am Deus pe. Ēn tak etaybit icēmān ōn e'em iam. ¹² Abu-a'ōxixxiḡ a'ḡu oḡuy? Ka'ūma ma! Ka'ūma kaykay ma'ḡu oḡuy Deus eju kawēnwēnap'a be, Judeuyū e'aweroroap'a be — io'e. — Aḡoka daḡ tak ka'ūma kaykay ma'ḡu oḡuy — io'e. ¹³ — Imēneju wa'ōmukorēnrēnap mubapuk pa'ore cebe ip wukpi-wat gū buye — io'e.

¹⁴ — Icēmān ōn e'em ewebe — io'e. — Wetabut Deus kay. Ixe kay dak ocedobuyū'ūm'ūm itabut osodop. Wetabut cekay apēn ḡasū o'e'e wuywebe iap taḡ. Judeuyū ḡaxīat ekawēn kay gū ip ḡebum. Kuy-jeap ekawēn kay ma ip ḡebum. Ḡaxīat ekawēn cedaḡ gū cexe ip. Wetabut Deus ekawēn muwēnuwēn'ukayū emudupmubararaktup peat ekawēn kay. Wetabut soat Moisés pe wuyawēwēap ekawēn kay dak. ¹⁵ Wetabut wuye'ū buje waram ḡuto acejetait- -xipacat mujurūḡrūḡ'ukayū, ikērēat mujurūḡrūḡ'ukayū dak iap kay. Obuxim iteyū Judeuyū dak itabut iboap kay — io'e.

¹⁶ — Apēn cedaḡ oxe iap taḡ ōn jekukum. Soan ōn e'em ikērēat kukap puxim Deus xe, ijodiacat xe dak. Deus itaybit wekuam, ijodiacat tak — io'e.

¹⁷ — Ade koato wūyat eipi daḡ ojekukuku. Ḡebu-je ocepit oka kay. Kuy'ūm'ūm ma ocepit. Dinheiro ūm ām tadaybotbocayū be ocepit- -Jerusalēm ka wat-wat pe. Kuy bima Jesus kay itabucayū ixe dinheiro o'ḡūm owebe iūm ām cebe ip. Obubut'in kuka ōn tak oḡūm Deus pe — io'e.

¹⁸ — Ḡebuje xepxep Judeuyū odobuxik Deus eju kawēnwēnap'a be- -yaboḡat'a be. Āsia eipi bewiayū odobuxik. Ocebabi daḡ jewemuisusun oḡuy Deus xe. Adeayū eju gū ip odobuxik. Iḡo'a beayū kaykay gū ip odobuxik. Deus eju kawēnwēnap'a be ip odobuxik

Deus pe wedinheiro ūmūm pima. ¹⁹ - ²⁰ Odobuxikayū oajēm ġu ijoce. Wawēġ mukērērēn pin pima juy ja-jēm ip ijoce wawēġ mukērērē ām ewebe — io'e. — Ajo oġuġē ikērēān cexe ip jewawēwē'ukayū yoboġayū dopabe bima? — io'e Félix pe.

— Jajēm cuy ip ijoce iboap muwēn ām ewebe. ²¹ "Ġasū eyju wa'ijojom wuye'ū buje waram ġuto acejetait iap kay wetabut puye," i ōn pit mo oce cebe ip ya'ōberen. Iboap xe'e cedaġ ġu exe? — io'e Félix pe. — Wuye'ū buje waram acejetait iap kay wetabut. Imēnpuye Judeuyū wawēġ mukērērērēm ojuy — Paulo o'e.

Imēn Paulo o'jewedayo Félix pe.

²² Félix itaybit cīcā kuy apēn Jesus a'ōkayayū itabut iam. Waram Paulo jo ojuy o'e. Wara'at kabia o'ġuweġūn waram Paulo a'ijjo am.

— 1000 be sorarayū kukukat ajēm puje juy waram a'ijjom oce -Cláudio Lísias ajēm puje — io'e Paulo be.

²³ — Xipan teku ejukuk — io'e 100 be sorarayū kukukat pe. — Xipan cuy ejowiwi uk'a be — io'e. — Ibureyū juy tot pi ġu ijo am. Cemukaypinput cuy tojot pi ġu cebe — io'e 100 be sorarayū kukukat pe.

²⁴ Pūġpūġ xet kap puje Félix oajēm jetayxi eju. Itayxi butet Drusila i osunuy. Itayxi Judeu osunuy. Ixe dak Paulo o'tojocat. Jekūyjo pin o'e apēn wuyetabut Jesus Cristo kay iam. Paulo o'jekawēn ceweju ip.

²⁵ — "Xipan cuy epeku wetabutpe," i'e'em Deus wuywebe — io'e Paulo. — "Jewawēwēm cuy epesop ikērēat mujurūġap puxim," i'e'em — io'e. — Soat acejebapuk Deus xe — io'e. — Ixe kabia be abuyū ikērēat kuġ jexe iap ġuwēn, abuyū ikērēat kuġ ġu iap tak — Paulo o'e cebe ip. Félix tak iparara o'e ikērēat mujurūġrūġ'uk osunuy buye.

— Ġasū bit cuy ejēm oxewi — io'e Paulo be. — Oba'orere'ūm pima waram ōn jedojocat — io'e.

Ibocewi Félix Paulo o'ġujuat ġu jeju pinap taġ iju am. Ade kaxi sorarayū Paulo wiwim osodop.

²⁶ Tūybe Paulo dinheiro je'gūm owebe jemujēmapteim iān o'e Félix. Imēnpuye ade em Paulo o'tojotjocat je-kay. Ade em o'jekawēnwēn ceweju. ²⁷ Imēn osunuy xepxep koato. Pórcio Félix jebureyūm Judeuyū mu-wexat ojuy. Imēnpuye Paulo o'jepere daomūnmūn-ap'a be jejēm puje.

Wara'at aḡokatkat oajēm Cesaréia ka kay Félix dieḡ. Ibutet Pórcio Festo i osunuy. Judéia eipi kukukan o'e Félix dieḡ.

25 Ebaḡūḡ xet kap puje Festo o'jēm Cesaréia ka bewi. Jerusalém ka be o'ju Judeuyū kay. ² O'jekawēn paīyū kukukayū eju, Judeuyū kukukayū eju dak. Ixeyū waram Paulo o'jomuymuy cebe- -Festo be.

³ — Paulo juy eḡudot ijoce Jerusalém ka be — io'e ip cebe. — Eḡudot cuy ocewebe waram ya'ījo am — io'e ip.

Paulo aoka am ip o'jewawē. E daḡ iju buje yaoka ojuy ip. Imēnpit Festo o'jede cebe ip.

⁴ — Paulo taomūnmūn Cesaréia ka be — io'e. — Gaḡin ma ocepit iboce — io'e. ⁵ — Ey'in pit cuy je'-ju oweju- -iju pinayū- -eykukukayū'in — io'e. — Paulo ikērēat o'ḡujurūḡ pima, iboam cuy ip omukūyjo Cesaréia ka be — io'e.

⁶ Xet. Xet. Xet. Xet. Xet. Xet. Xet. Xet. Xet. Xet. Dez kabia Jerusalém ka be osunuy.

Ḡebuje Festo o'jepit Cesaréia ka kay. Pūḡpūḡ Judeuyū kukukayū o'ju ceweju. Jay. Oajēm ip Cesaréia ka be.

Kuyaje Festo Paulo o'tojocat. O'ju ibimāmāat ekawēn cocoap'a be. Oabik ipi kukukat abikbikap pe. Judeuyū kukukayū o'je'awero cexe- -Jerusalém ka bewi oajēm'iaiyū.

⁷ Yajēm puje Paulo awēḡ o'yawēḡmukērērēn ip Jerusalém ka bewiaiyū.

— Paulo ikērē jījāān o'e — io'e ip napa ma. — Soat em ikērēat mujurūḡrūḡ'uk osunuy — io'e ip napa ma.

Imēnpit icēmān oceju e'em iap mubapuk pa'ore o'e cebe ip.

⁸ Gebuje Paulo o'jewedayo.

— Ikērēān oce ġu — io'e. — Deus pe Judeuyū awēwēap ekawēn taġ acā ōn jekukum. Deus eju kawēnwēnap'a ojomuymuy ġu. Wuyeipi kukukat César dak ojomuymuy ġu — io'e Paulo.

⁹ Festo bit Judeuyū mucokcoġ ojuy. Imēnpuye:

— Jerusalém ka be du eju pin? — io'e. — Jerusalém ka be du ixeyū be awēġ mukērērēnap co pin oxe? — io'e Paulo be.

¹⁰ — Ap! — io'e. — Odaobu'u. Cūġ'i oce ġasū eyxe- -César beam kapikpik'ukayū xe- -Roma ka kukat ebekitkiyū xe — io'e. — Jerusalém ka be ġu juy wawēġ mukērērēnayū epeya'ijo- -ijoce acā — io'e. — Ajom ġu ikērēān oce Judeuyū be? Ka'ūma ma! Eytaybit iboam. ¹¹ Pūġ em ma ikērēat oġuġē ibima acā kuka epe'e waokam. Eyxe cedaġ waokam ip ibima, "Omujēm cuy ece," i'ūmġu kuka oce. Iteyū be wawēġ mukērērēnap icēm'ūm pima bit, cedaġ ġu waram oūm ām cebe ip. César kay bit oju pin ixē be wawēġ mukērērēnayū a'ijo am. Soat eipi kukukat kay bit oju pin — Paulo o'e Festo be.

¹² O'jekawēn jeweweju jewawēwē'ukayū eju Festo. O'jekawēn Paulo eju.

— "César kay bit oju pin ixē be wawēġ mukērērēnayū a'ijo am," i ēn e'em owebe. Imēnpuye César kay ōn jemuju — io'e Festo.

¹³ · ¹⁴ Ibun'ūm pima wara'at eipi kukukat oajēm Cesaréia ka be. Ibutet Agripa i osunuy. Jetayxi eju oajēm. Itayxi butet Berenice i osunuy. Oajēm ip Festo jom. Ade kabia osodop ip iboce.

Gebuje Festo Paulo o'ġuwēn Agripa be.

— Félix aġokatkat taomūnmūn o'jepere ijoce- -Paulo i ibutet — io'e. — O'jepere iecuġam oōm puje — io'e.

¹⁵ — Ōn Jerusalém ka be bima paīyū kukukayū Paulo o'ġuwēn owebe Judeuyū kukukayū dak. Paulo kay ġu jījā ip. "Teku ikērē jījāat o'ġujurūġrūġ ocewebe," i adi o'e ip owebe napa ma. "Paulo cuy eyao-

kaat," i adi o'e ip owebe — io'e. ¹⁶ — Ōn cuk oce cebe ip "Cedaḡ ḡu wuywebe imēn e am Roma ka be," i, "Wara'acat awēḡ mukērērēn puje, ikērēat o'ḡujurūḡ'iat ekawēn cocom wuyju," i. "Cekawēn cocom wuyju ixē aḡokatkat etabutpe, yawēḡmukērērēnayū etabutpe dak," i adi oce cebe ip. "Soat ip jekawēnwēn jeweweju bima, cekawēn cocom wuyju," i adi oce cebe ip. "Yawēḡmukērērēn'ibitpe jewedayo but," i adi oce cebe ip — io'e Festo.

¹⁷ Ḡebuje Judeuyū oajēm ijoce okay. Obu'u ḡu oḡuy ya'ijo am ip — io'e. — Kuyaje oju ibimāmāat ekawēn cocoap'a be. Paulo otojocat — io'e.

¹⁸ — Ḡebuje Paulo awēḡ o'yawēḡmukērērēn ip. Tūybe "Paulo ikērēat o'ḡujurūḡ César be," i je'e ip owebe iān oce. ¹⁹ Imēnpit "Ocedobuyū'ūm'ūm ekawēn taḡ ḡu Paulo jekukum," i adi o'e ip owebe — io'e.

— Ḡebuje Jesus o'ḡuwēn ip owebe — io'e. — "Jesus'ūm oe'ū," i adi o'e ip owebe — io'e Festo. — "Inaka waram o'jetait," i adi o'e ip — io'e. — Judeuyū Paulo o'yawēḡmukērērērēn iboap o'ḡuwēnuwēn puye. ²⁰ Imēneju "Apēn xe'e kuka oce icēmān omukūyjo am," i adi oce owebe ma. Paulo eju adi ocekawēn. "Jerusalēm ka be du eju pin?" i adi oce cebe. "Ibo ka be du awēḡmukērērēnayū oya'ijo?" i adi oce cebe — io'e. — "Ibo ka be du ocejekawēn eweju icēmān wetaybit am?" i adi oce cebe. ²¹ — Imēnpit Paulo adi o'e owebe: "Odaobu'u. César kay bit oju pin ixē be wawēḡ mukērērēnayū a'ijo am," i. Imēnpuye ōn adi oce sorarayū be: "Taomūnmūnat cuy epejowiwi uk'a be," i. "Ḡuyjom oḡuju César kay ya'ijo am," i adi oce — Festo o'e Agripa be.

²² Agripa o'jede Festo be.

— Ōn tak ixē aḡokatkat ekawēn co pin — Agripa o'e.

— Ha'a. Kuyaje juy eya'ijo — Festo o'e.

²³ Kuyaje Agripa oajēm ibimāmāat ekawēn cocoap'a kay Berenice eju. Oajēm ip jedoti dip cīcāat kuḡ- -ipi kukukat toti kuḡ. Oajēm ip 1000 be sorarayū kukukayū eju. Warara'acayū eju dak ip oajēm-

ya'öbuyxiayū eju- -Cesaréia ka watwat eju. Festo Paulo o'tojocat.

²⁴ Gebuje Festo o'jekawēn Agripa eju aweromayū etabutpe.

— Agripa — io'e. — Soat ocewejuayū dak — io'e. — Ak epe'e ite aḡokatkat kay — io'e. — Ōn Jerusalém ka be bima ade Judeuyū oajēm okay ite aḡokatkat muymuy am — io'e. — Oajēm ip ijoce dak imuymuy am. Soat em e'em ip: "Ite aḡokatkat cuy eyaokaat," i. ²⁶ Oxe bit ka'ūma ma ikērēān o'e yaoka am — io'e.

— Gebuje Paulo adi o'e owebe: "César juy wawēḡ mukērērēnayū ya'ijo- -wuyeipi kukukat," i. Imēnpuye imuju pin ōn César kay. ²⁶ Imēnpit apēn otupmubararak iam wetaybit ḡu César mukūyjoaptum. Wetaybit ḡu apēn ite o'e ikērēān iam tak — io'e.

— Paulo otojocat ewebe, Agripa — io'e. — Cūḡ'i ijoce exe. Ēn tak a'ōpicūḡ cuy eḡuy ya'ō kay. Ewebe cekawēn co buje, wetaybit oce tupmubararak am César mukūyjoaptum — io'e. ²⁷ — Apēnpuye Judeuyū ixe o'jomuymuy iap muwēn pa'ore owebe. Imēnpuye cedaḡ ḡu taomūnmūn imuju am César kay. Cedaḡ'ūm cīcā oxe — Festo o'e cebe ip.

26 Gebuje Paulo o'jewedayo Agripa dopabe. Agripa koam o'jekawēn Paulo be.

— Ecededayo juy — io'e Paulo be.

Paulo o'jebueuru. O'jewedayo.

² — Agripa — io'e. — Ocededayo edopabe — io'e. — Wuyeipi kukukat ēn — io'e. — Judeuyū omuymuy jījā. Napa ma e'em ip. "Ikērēān cīcā o'e'e teku," i. Ocokcok cīcā wawēḡmukērērēnayū a'ōmuy-pit am edopabe ³ etaybit cīcā Judeuyū babim puye, Judeuyū be jewa'ōxikxikap ekawēn tak. Imēnpuye ekspiceḡēm ḡu juy wa'ijo am — io'e.

⁴⁻⁵ Bekin pi ma ōn adi ojekuku Fariseuyū etabucap kuḡ — io'e. — Fariseuyū jekukum Moisés pe wuyawēwēap ekawēn taḡ cīcā ma. Soat Judeuyū itaybit apēn ojekuku bekin pi ma iam, okapap ka be bima iam tak, Jerusalém ka be bima iam tak. Imu-

wēn pin pima iboap muwēn put ip ewebe, ade koato itaybit ip iboam puye — io'e.

⁶ — Gasū ēn wa'ijojom ijoce Deus waram ce'ū'ūayū ġutait iap kay wetabut puye — io'e. — “Waram ce'ū'ūayū oġutait,” io'e Deus kuyjeayū be. ⁷ Soat Judeuyū itabut Deus waram ce'ū'ūayū ġutait iap kay- -doze be tiwatwat — io'e. — Imēnpuye “Ka'ūma ma ejo'iat xipacat,” i'e'em ip Deus pe. Imēn e'em ip kabiam, ixima be dak. Agripa, Judeuyū ma wawēġmukērērēn Deus waram ce'ū'ūayū ġutait iap kay wetabut puye — io'e. ⁸ — Apēnpuye eyetabut ġu Deus waram ce'ū'ūayū ġutait iap kay? — io'e ja'ijojomayū be.

⁹ — Kuy bima ikērēm cīcā Jesus kay itabucayū ojukukuk. Tūybe xipacat cīcā owebe imēn ikuk am ip iān oce- -Nazaré ka be tūibit ebekitkit kuk am. ¹⁰ Xi-pan'ūm cīcā ip ojukukuk Jerusalém ka be bima. Ade itabucayū oġuōmōm daomūnmūnap'a be. Paīyū kukukayū a'ōbi ocece iboam. “Ayaoka juy ip,” i'e'em pima ip, ōn tak “Epeyaoka juy,” i oce. Ade em ipiat osupi'ajojoat cebe ip itabucap epereap ojuy. “Jesus Deus emunaē ġu,” i'e'e an ip cebe oġuy. ¹¹ Imēn cuk adi ojekuku soat kaka daġ, soat Judeuyū e'awero-roap'a daġ tak- -Deus eju kawēnwēnap'a daġ. Weta-koma jījā juk adi oġuy cekay ip. Imēnpuye tobatban ip oju wara'at ka kay. Ipiatpi'ajoan cebe ip oju tao-mūn ām tak — io'e.

¹² — Imēnpuye Damasco ka kay oju. Paīyū kukukayū a'ōbi oju. Ade itabucayū daomūnap ojuy oju. Apēn o'jebapuk owebe iap cuy oġuwēn ewebe, Agripa — Paulo o'e.

¹³ — Kabia yoboġat ojojoho kaxicuġ. Kabi kadiwi ojojoho. Kabiam cīcā o'e. Kaxie bodi ma isopsep o'e. Wakokoreren o'e kabia, owejuayū akokoreren tak. ¹⁴ O'at ipi ju. Owejuayū dak o'at ipi ju — io'e.

— Gebuje kabi kadiwiat o'jekawēn oweju wa'ōm- -Judeuyū a'ōm. “Saulo,” io'e. “Apēnpuye ēn ipiatpi'ajojoan owebe?” io'e. “Imēn e'em pima jumento buxim ēn. Jumento jejorojorom jeiwat jemuju am jekpiokakam pima,” kabi kadiwiat adi o'e owebe.

¹⁵ — “Abu ên, Kariwa?” i adi oce cebe.

— “Jesus ôn,” i adi o'e owebe. “Ên ipiatpi'ajojoan owebe,” i adi o'e owebe. ¹⁶ “E'ây,” i adi o'e owebe. “Cûg'i eġuy edaocam,” io'e. “Ôn ma ocebapuk ekay enaë âm wekawên muwênuwên'ukan,” i adi o'e owebe. “Ôn enaë ewebe apên ġasû ejojojo iap muwên âm wara'acat pe. Wara'at tak oġubapuk ewebe ġuyjom. Iboap tak cuy eġuwênuwên wara'acat pe,” i adi o'e owebe. “Omuwênuwên'ukan eġuy adeayû be. ¹⁷ Ôn jekuk Judeuyû be aokaap puxim, Judeu'ûmayû be aokaap puxim tak,” i adi o'e owebe. “Ġasû ôn jemuju Judeu'ûmayû be. Ôn jemuju ewebe cûg ma ixeyû mutaybit am. ¹⁸ Ôn jemuju cebe ip kabiok taġ cekup puxixim ip- kabia daġ ceku am acâ ip- Deus bikuyap taġ acâ. Ôn jemuju Satanás a'ô daġ cekup puxixim- Deus kay itabut am acâ ip. Imên e'e buje Deus ikêrêat ju'uk cebewi ip. Deus pe o'taxijojo'iaiyû eju jeedop ip okay itabut ip puye,” Jesus adi o'e owebe — Paulo o'e.

¹⁹ — Imênpuye, Agripa — io'e. — Apên kabi kadiwiat o'jekawên owebe wexey jo'iat pe iap taġ ojekuku — io'e.

²⁰ — Gebuje kawên idipat oġuwênuwên. Koam oġuwênuwên Damasco ka watwat pe. Jerusalém ka watwat pe dak oġuwênuwên, Judéia eipi watwat pe dak- soat pe. Judeuyû be oġuwênuwên, Judeu'ûmayû be dak. “Eyġuycûg'cûg cuy epesop ikêrêat kuġ puye,” i adi ocece cebe ip. “Ikêrêat mujurûġrûġap cuy epeyepere,” i. “Eyetabun cuy epesop Deus kay,” i. “Cedaġ cuy epekuku warara'acat pe itaybit am kuy ikêrêat mujurûġrûġap o'jepere ip iam,” i adi ocece cebe ip. ²¹ Imênpuye Judeuyû obu Deus eju kawênwênap'a be. Waoka ojuy ip o'e. Deus pit obuywatan osunuy — io'e.

²² — Jesus muwênuwên ôn ġasû soat pe ijodiacat pe-ya'ôbuyxiayû be, ka'ûmaayû be dak. Imuwênuwên ôn cebe ip Deus ekawên muwênuwên'ukayû emudupmubararaktup ekawên taġ. Imuwênuwên ôn Moisés ekawêntup ekawên taġ tak. Iwarum ġu imu-

wēnuwēn ōn. Cūḡ ma imuwēnuwēn ōn. ²³ Imēn e'em kuyatup:

Cristo juy ipiat supi'ajo wuydaxijo-
jo'ukan Deus emunaē, i. Je'ū juy, i.
Ce'ū buje juy waram itait je'e, i. Ixe
koapat je'e wuy'in waram itait, i.
Wuyju waram acejetait Cristo o'jetait
waram puye, i. Iboap icēmān, i. Cris-
to iboap o'ḡuwēn Judeuyū be, Ju-
deu'ūmayū be dak, i.

Imēn e'em kuyatup — Paulo o'e Festo be.

²⁴ Paulo imēn jewedayo buje, Festo o'jewāwā:

— Paulo, adaodao! — io'e napa ma. — Adaodao
ēn tupcocom cīcā buye — io'e napa ma.

²⁵ — Ka'ūma! Wadaodao ḡu, Festo — io'e. —
Waḡuysat ma ōn. Icēmān ōn e'em ewebe — io'e.

²⁶ Ḡebuje Paulo o'jekawēn ipi kukukat eju-
Agripa eju.

— Agripa, wa'ōcam ōn jewejom exe — io'e. —
Etaybit icēmān ōn e'em iam. Soat oḡuwēn Festo be
iam kuy etaybit. Soat iboap o'jebapuk adeayū eta-
butpe — io'e. — Iba'arēm ḡu o'jebapuk — io'e. ²⁷ —
Agripa — io'e. — Etabut tu Deus a'ōbi cekawēn
muwēnuwēn'ukayū ekawēn kay? Wetaybit kuy etabut
iam — io'e.

²⁸ — Tūybe dao ma Cristo kay oḡutabun iān pu-
rut ēn — Agripa o'e Paulo be.

²⁹ — Xipat kuka o'e dao ma etabut am, dao'ūm
pima dak — io'e. — Xipat cīcā kuka o'e soat eyju
Cristo kay eyetabut am- -ēn, soat wekawēn cocomayū
dak — io'e. — Xipat kuka o'e eyju obuxim an. Xi-
pat kuka o'e obuxim eyetabut pima. Obamūnmūnap
puxim eybamūnmūn pima bit xipat ḡu kuka o'e —
Paulo o'e.

³⁰ Iecuḡap Agripa o'jēm ibocewi. Festo dak o'jēm,
Berenice dak, soat cewējuayū dak. ³¹ Kawēnwēn ma
o'jēm ip.

— Ite aḡokatkat xipat — io'e ip jewewebe. —
Wuyxe bit ka'ūma ma o'e ikērēān. Cūḡ ḡu wuyxe
taomūn ām, yaoka am tak — io'e ip.

³² — “César juy wawêgmukêrêrênayū ya'ijo,” i juk o'e'ūm pima, kajuk oğujêmat daomūnmūnap'a bewi — Agripa o'e Festo be.

27 Paulo mujuap ojuy ip Roma ka kay Festo, Agripa dak. Kobexixi dağ ip o'ğuju Roma ka kay-Itália eipi beatka kay.

Ġebuĵe Paulo o'ğūm ip 100 be sorarayū kukukat pe, wara'acayū taomūnmūnayū dak. 100 be sorarayū kukukat putet Júlio i osunuy. Cesorarayū ijop eipi kukukat esorarayū osodop-César esorarayū. Ōn tak oju Paulo eju.

Imēn oceju Roma ka kay. Aristarco eju oceju-Macedônia eipi bewiat eju-Tessalônica ka bewiat eju. ² Kobexixi be oceōm. Ixe kobexixi Adramítio ka ebikopap pewiat osunuy. Soat Ásia eipi ebikopap tağ cum. Purewuh. Ocejēm Cesaréia ka bewi. Tiboğ cīcāati očetimudek.

³ Kuyaje ocajēm Sidom ka be. Jay. Júlio xipan cīcā Paulo o'jukuk. Paulo iju pi ġu o'e jebureyū jom. Paulo bureyū iju pi ġu o'e Paulo buywat am.

⁴ Ibocewi waram oceju. Purewuh. Tiboğ cīcāati mudekdeğ oceku. Kabido o'subidoajēm ocedopa bewi. Imēnpuye tip'aweroroboğ kay oceju wuyba'ūğat kadi. Tip'aweroro butet Chipre i osunuy. ⁵ Totek. Tiboğ cīcāati očetimudek. Cilícia eipi weğūn ocekap, Panfília eipi weğūn tak. Jay. Mirra ka be ocajēm Lícia eipi beatka be. Ibo ka be bima ocekap koapat pewi kobexixi bewi. ⁶ 100 be sorarayū kukukat wara'at o'tobuxik kobexixi. Ixe kobexixi Alexandria ka ebikopap pewiat osunuy. Cum Itália eipi kay. Poroğ. Oceōm ixe kobexixi be waram oceju am. ⁷ Pūğ kabia ġu daodaodao ġu oceju. Pa'orem cīcā Cnido ebikopap pe ocejemūğ. Mūğ.

Oooh. Kabidoxixi o'subido'at ocedopa bewi. Iba'ore o'e ocewebe oceju pinap tağ kabidoxixi ocewap puye. Imēnpuye oceju tip'aweroro tēğ ma. Tip'aweroro butet Creta i osunuy.

Iboce kabidoxixi'ūmḡu o'e- -kabido'īt ma o'e. Purewuh. Salmona eipi tēḡ ma oceju. ⁸ Pa'orem cīcā oceju Creta eipi tēḡ ma.

Ibocewi ocejemūḡ ebikopap pe- -Creta eipi be. Jay. Ebikopap putet Bons Portos i osunuy. Ikaboḡat-ka tēḡ ma osunuy- -Laséia ka tēḡ ma. ⁹ Ibun cīcā ocesop ibo ka be. Judeuyū epeta kuy o'kap Deus xe jemuisusunap epeta. Imēnpuye oceku pi oce'e kobexixi daḡ. Kabidoxixi oeku kabiam, muba'atxiri dak.

Gebuje Paulo o'jekawēn kobexixi beayū eju.

¹⁰ — Obureyū — io'e. — Tiboḡ cīcāati daḡ wuyju buje iba'ore jījā kuka o'e wuywebe. Wuyju buje bit soat wuybubut kuka oakōm, soat kobexixi beat tak — io'e. — Kobexixi dak kuka o'jepiriḡ. Wuyju dak kuka aje'ū — io'e.

¹¹ Imēnpit 100 be sorarayū kukukat Paulo a'ō kay ḡu o'e- -kobexixi iwat a'ō kay acā, kobexixi mujuju'ukat a'ō kay dak.

Kobexixi iwat a'ō kay o'e kobexixi mujuju'ukat a'ō kay dak. ¹² Ocesopiat ebikopap xipat ḡu osunuy ihi bun ocedop am kabidoxixi buye, muba'atxiri buye dak. Soat warara'acayū iju pin ibocewi. Wara'at ebikopap pe ajēm ojuy warara'acayū- -Fenice ka ebikopap pe. Ibo ka dak Creta eipi be osunuy. Kabidoxixi ḡu ajēmjēm'uk Fenice ebikopap pe- -kaxie tajoreḡatpido acā. Imēneju iboce ihi mukap ojuy ip.

— Fenice ebikopap pe juyaju — io'e ip. — Kabido'ūm puje juyaju — io'e ip.

¹³ Kaxietajoreḡatpido o'subidoajēm- -ibidodipat. Kabido ibidoboḡ ḡu o'e- -ibido'īt ma. O'subidoajēm oenomujuwi. Imēnpuye o'jekawēn ip jeweweju.

— Kabido ibidodip ḡasū — io'e ip. — Ga'aaju — io'e ip. — Kabido juy wuydujowat wuyjupinap taḡ — io'e ip.

Kobexixi muycūcūap o'ḡuyu ip- -ipoxiat, icaat muḡēḡē. Kabido xipan ocedujowatwan o'e. Oceju tiwābu etako daḡ- -Creta eipi etako daḡ.

¹⁴ Guyjomsūm kabidoxixi o'subidoajēm ocekap. Oooxxx'i. O'subidoajēm ocedopa bewi jījā. O'subidoajēm kapurūḡ kadiwi- -Creta eipi kadiwi. ¹⁵ O'subidoajēm kobexixi kay. Ixe kabido butet Nordeste i

osunuy. O'subidoajēm ocedopa bewi jījā. Iba'ore o'e kobexixi mukorērēn ām kabidoxixi dopabe. Imēnpuye ocebu'un kobexixi mukorērēn ām. Kabido kobexixi o'tujowat. ¹⁶ Ocejū wara'at tip'aweroro biōg kay. Tip'aweroro butet Cauda i osunuy. Kabidoxixi'ūmgu o'e iboce- -kabido'it ma. ¹⁷ Kobe yopīcat kuḡ tak ocesop. Kururuḡ oeku kobexixi nomuju. Pa'orem kobe yopīcat oceḡuyū idibi bewi. Oceḡuyū kobexixi be.

Ibocewi kobexixi be kapikpik'ukayū correntebu o'subumukirik kobexixi koreren- -ibuboḡatpu. O'subumukirik ip kobexixi ewekaap puxim.

— Ka'oririt ijoce ma opop Líbia eipi — io'e ip. — Pipim kobexixi kakam iboce! — io'e ip. Iparara o'e ip ka'oririt pe kobexixi kakaap puxim. Imēnpuye kobexixi mujuuap epaḡo o'ḡukop ip kapurūḡ kay, kabidoxixi be kobexixi mujuap puxim. Kabidoxixi kobexixi o'ḡuju ijuap taḡ. Ocekat. Xet. Oceset iboce.

¹⁸ Kuyaje tarekrek o'joxikxik ip idibi be- -kobexixi be tujowat ojuyap. O'joxikxik ip kobexixi poxi mu'ūm ām. O'joxikxik ip tipodoyat ocemudekudekun cīcā buye. Ocekat. Xet. Oceset iboce.

¹⁹ Kuyajebusu kobexixi be kapikpik'ukayū kobexixi beat o'joxik ipoxiat. Jebum ip o'joxik. Xet. Xet. Xet. Xet.

²⁰ Ade kabia ocejū kaxi jojom ḡu, kasopta dak, kabidoxixi buye. Ocedaxijo ba'ore. ²¹ Ade kabia ocejekōnkōn ḡu.

Ḡebuje Paulo o'jekawēn kobexixi beayū eju.

— Oburereyū — io'e. — Eyju juk adi wa'ō kay ḡu epesop. Creta ka be bima juk wa'ō kay ḡu epesop. Creta ka bewi wuyjuap ḡu.

— Wuyjēm'ūm pima kajuk te'e ma soat tarekrek aḡupa'ūm ḡu, xipat kajuk wuywebe dak — io'e.

²² — Ḡasū bit eya'ōcam cuy epesop — io'e. — Kobexixi juy jepiriḡ. Ka'ūma ma wuy'in pit jeap — io'e.

²³ — Koapat exima Deus ekawēn tojtjt'ukat o'jebapuk okay — io'e. — Deus ixe o'ḡudot okay. Ixe Deus okukukat. Ixe Deus ebekit ōn. Cekawēn tojtjt'ukat o'jekawēn oweju.

²⁴ — “Paulo, epararam ġu juy eġuy,” io'e owebe — io'e Paulo. — “Ajēm cuy César kay- -Roma ka kukukat kay,” io'e. “Ōn aġ ekay, ewejuacat kay dak eye'ūap puxim, ēn cuk imēn ejoojuy oxewi buye,” io'e. “Deus je'e ewebeam apēn cuk ejoojuy cexewi iap taġ,” Deus ekawēn tojtjot'ukat o'e owebe — io'e Paulo.

²⁵ — Imēnpuye, eya'ōcam cuy epesop, oburereyū — io'e. — Deus kay wetabut. Apeñ je'bapuk wuywebe iap o'ġuwēn owebe Deus imēn ebapuk awap. Imēn je'bapuk. ²⁶ Imēnpit pipim cuy acejemūġ tip'aweroro be — Paulo o'e kobexixi beayū be.

²⁷ Xepxep semana kap puje:

— Kapurūġ kay aco'i ajēmjēm oceju — io'e kobexixi be kapikpik'ukayū.

Uhum oceju jekukum iximadakpe tiboġ cīcāati daġ. Tiboġ cīcāati butet Mediterrāneodi i osunuy.

²⁸ Imēnpuye o'tibimuweġūn ip tibimuweġūnām. Tibiraat 36 metros o'e. Bosusu oceju. Waram o'tibimuweġūn ip. Tibiraat 27 metros o'e- -tibira ġūn ma.

²⁹ Iparara o'e ip wita'a be kobexixi kakaap puxim. Imēnpuye ebadipdip kobexixi muycūcūap o'ġuakōm ip. O'ġuakōm ip kobexixi ukpu bewi kobexixi muycū ām. O'jecū. Cucum ġu o'e ġasū- -iwiwim acā. Kabia pin cīcā o'e ip.

³⁰ Ġejuje kobexixi be kapikpik'ukayū kobexixi bewi jenapōn ojuy. Kobe'it'it o'ġukop ip tiboġ cīcāati be jewexe kobexixi muycūcūap muakōmkōm pima.

— Kobexixi muycūcūap muakōmkōm oceju — io'e ip napa ma ocewebe.

³¹ Imēnpit kobexixi bewi jenapōn ojuy ip. Paulo o'jekawēn 100 be sorarayū kukukat pe- -wara'acat sorarayū be dak.

— Ixeyū kobexixi be kapikpik'ukayū watwat puje wuyewedaxijo ba'ore ace'e — io'e.

³² Imēnpuye sorarayū kobe'it'it ekabobu o'subudakat. Kobe'it'it o'at idibi be. Uhum o'jewede kobexixi xewi.

³³ Kabia'isum Paulo o'jekawēn kobexixi beayū eju.

— Epeyekōn ġasū bit — io'e. — 14 kabia

eyağuybabi'üm'üm epeku. Jekōnkōn ġu epeku — io'e. ³⁴ Epeyekōn cuy eybaca am — io'e. — Eyağuybabi'üm'üm ġu juy epesop — io'e. — Ka'ūma ma wuy'in je'ū — io'e.

³⁶ Paulo pāo'a o'yabu. O'jekawēn Deus eju pāo'a kuğ puye. Soat etabun o'jekawēn ceweju.

— Bay xipat cīcā ēn — io'e cebe.

O'yadakat. O'ya'o. ³⁸ Imēneju soat ip waram o'ya'ōcan- -kobexixi beayū. ³⁷ Soat ip o'jekōn. Ade jījā ocesop kobexixi be. 276 be ocesop.

³⁸ Ibeğbeğ puje kobexixi be kapikpik'ukayū ta-rekrekata o'taxixik ip idibi be- -badi o'tadop'iata- -trigoda. O'taxixik ip kobexixi poxi mu'üm ām. Jepiriğap puxim ip o'taxixik.

³⁹ Kabia buje tinebabaat o'tobuxik ip kobexixi be kapikpik'ukayū. Tinebabaat kay oceju. Itaybit ġu o'e ip apoceat ipi iam. Ka'oririt ixē tinebabaat pe osodop. Ade ġu wita'a o'yadop iboce. Kobexixi muymūğ ojuy ip iboce. ⁴⁰ Imēnpuye kobexixi muycūcūapu o'-subudakat ip. O'subudakat ip tinebabaat xe bima. Pilatokukatpu o'subumurore ip. Kobexixi mujujuap epağo o'ğupaya ip kabido at am. Kobexixi o'ju ka'oririt kay.

⁴¹ Imēnpit kabido kobexixi o'ğuyjayjay tibacaat ewebotbocap kay. Iboce kobexixi'a o'jeaece. O'jecuğ. Iju ba'ore o'e. Kobexixi ukpu o'jekpuewekap. Tipodoyat paca ma o'yukpumuweka. Imēn kobexixi o'jepiriğ.

⁴² Sorarayū taomūnmūnayū aoka ojuy dokdoğ jēnapōnap puxim kapurūğ kay. ⁴³ Imēnpit 100 be sorarayū kukukat ibu'u o'e Paulo e'ū ām. Taomūnmūnayū oyaokaat ġu sorarayū be.

— Kapurūğ kay epeyedok! — io'e taomūnmūnayū be. — Epakōm! — io'e 100 be sorarayū kukukat itaybit jēdoğayū be.

⁴⁴ — Kobexixi bağbağ epejat! — io'e. — Kapurūğ kay juy epeju ip com! — io'e itaybit'üm jēdoğayū be.

Imēneju soat ocejeu kapurūğ pe.

28 Tip'aweroro kay ocajēm. Iboce bima ocetay-bit ocesop tip puten. Tip putet Malta i osunuy.

² Tip'aweroro watwat oajēm ocekey. Ocedobede ip. Xipan cīcā ip ocekek. Daxa o'ḡusop ip ocewewe am kajuk kukuḡ puye, muba'at oeku buye dak.

³ Paulo daxadaypa o'taypabu. O'jomōḡ daxa be.

Gebuje puybu o'jēm daxadaypa diotpewi. Paulo o'subua. Tore iān oeku Paulo bu eju. ⁴ Iboceayū puybu o'subujojo tore iān Paulo bu eju. Imēnpuye o'jekawēn ip jeweweju.

— Wuyjuyū aokaka'ukat aco'i teku — io'e ip te'e ma. — Tiboḡ cīcāati be oe'ū ḡu. Puybu nuy pi-bun pit je'ū ikērēat o'ḡujurūḡ puye — io'e ip te'e ma jewewebe.

⁵ Imēnpit buḡ'i o'subuxik. Paulo o'subumuy'at daxa be. Iboceayū itabēḡbēḡ o'e ip Paulo jojom. ⁶ Ibu ehuap wiwim o'e ip, ce'ūap wiwim tak. Ibut ma iwiwim osodop ip Paulo jojom. Imēnpit Paulo bu o'jebuehu ḡu. Oe'ū ḡu dak. Xipat ma osunuy. Imēnpuye o'jeaḡuymuwarurun ip Paulo kay.

— Wuyjuyū ḡu teku-deus ma! — io'e ip napa ma jewewebe.

⁷ Gebuje Públio ocenomuwā jeduk'a kay. Públio Malta eipi kukukat osunuy. Ixe ka ocewewewear tēḡ o'sukadop. Ocejū cekay. Iboce ocesop ebapūḡ kabia. Xipan cīcā ocekek. Ocexan o'ḡūm ocewebe, soat ocmukuyinput tak.

⁸ Paulo o'ju Públio ebay kay. Iwātaxipi osunuy. Ipa'i osunuy, yukpidi dak. Paulo o'jekawēn Deus eju Públio ebay beam. Jebu o'subumōḡ cebe. O'ḡu'ada. Xipat o'e.

⁹ Ce'adaap awēḡ tobuxik puje, ade iwātaxipi-piyū o'ju ip Paulo kay. Jay. Oajēm ip. Ixeyū dak o'ḡu'ada'ada Paulo. Xipat ip o'e. ¹⁰ Imēnpuye ade ip jebubut o'ḡūm ocewebe "Eyju xipat ocexe" i'e am ocewebe. Kobexixi be om ojuy bima ocmukuyinput o'jomōḡ ip kobexixi be. Purewuh. Ocejēm tip'aweroro bewi.

¹¹ Ebapūg kaxi kap puje oceju Roma ka kay. Ocejēm Malta eipi bewi. Wara'at tağ ocejēm kobexixi dağ. Ixe kobexixi Malta ebikopap pe osodop ihi bun. Ixe kobexixi Alexandria ebikopap pewiat osunuy. Kobexixi butet deusyū xepxem ikap'ibiyū i osunuy. ¹² Muğ. Ocejemūg Siracusa ebikopap pe. Iboce ocesop ebapūg kabia.

¹³ Ibocewi tiwābu dağ oceju. Muğ. Ocejemūg Régio ebikopap pe. Kabido o'subidoajēm kaxietajoreğat kadiwi kuyaje. Purewuh. Waram ocejēm ibocewi. Pozuoli ebikopap pe ocejemūg xepxep kabia kap puje. Jay. Kapurūg pe oceju ibocewi. ¹⁴ Jesus ebikitkit ocetobuxik. 7 xet ocesop ixeyū xe.

Purewuh. Ibocewi kapurūg tağ oceju. Roma ka kay oceju e dağ. ¹⁵ Jesus ebikitkit Pauloyū e dağ ajēmap awēg o'yawēgtobuxik Roma ka watwat. Imēnpuye o'jēm ip ebidase ocedopabijuk am. Ocedopabijuk ip oceju Roma ka wuy'ūm'ūm pima. Ocedopabijuk ip Praça de Ápio ka be, Três Tavernas ka be dak. Paulo icokcok cīcā o'e ixeyū jo buje.

— Bay, xipan cīcā ēn ocekuğ — io'e Deus pe. ¹⁶ Imēn ocajēm Roma ka be.

Ğe buje 100 be sorarayū kukukat Paulo o'ğūm 1000 be sorarayū kukukat pe. Ixe Paulo o'ğūju daomūnmūnap'a be ğu- -uk'a be acā. Jağepūg ma osunuy uk'a be. Imēnpit pūg sorara ceweju osunuy soat em. Xet. Xet. Xet. Ebapūg xet o'kap.

¹⁷ Ğe buje Paulo Judeuyū kukukayū o'tojocat jekawey Roma ka beayū.

Ce'awero buje Paulo o'jekawēn ceweju ip.

— Oburereyū — io'e. — Cedağ cuk adi ojekukuku. Deus pe ocemukūyjojoap ekawēn tağ cuk adi ojekukuku, aypapayū'ūm'ūm ekawēn tağ tak. Ixeyū ekawēn ojomuymuy ğu- -pūğ em tak ka'ūma — io'e. — Imēnpit Judeuyū obu Jerusalēm ka be. Oūm ip César ebikitkit pe. César ebikitkit o'jekawēn oweju. Ixeyū xe ikêrêat oğujurūg ğu- -pūğ em tak ka'ūma. Cūğ ğu ixeyū xe odaomūn âm, waoka am tak — io'e cebe ip.

¹⁸ — César ebikitkit ma omujēm ojuy daomūn-

mūnap'a bewi. ¹⁹ Judeuyū bit ibu'u jījā osodop omujēm ām yabewi. Imēnpit "Judeuyū yukpiwat," i'ūmgu adi oce. "César juy wawēgmukērērēnayū ya'ī-jo," i acā adi oce. ²⁰ Imēnpuye ōn eymudocat ijoce owebe eyjo am, eyweju jekawēn ām tak — io'e.

— Kuy bi ma wuydaxijo am Deus emunaē ajēmap wiwim Judeuyū. Ixe kay wetabut- -Jesus kay. Imēnpuye obamūnmūn oce correntebum — Paulo o'e Judeuyū kukukayū be.

²¹ — Judéia eipi watwat cartadup o'tupmudot gu oce kay- -apēn Paulo e'em iaptup — io'e ip Paulo be.

²² — Ijoce oajēmjēm'iaiyū dak "Paulo ikērēat o'gujurūg," i juk o'e gu ip oce webe- -Judeuyū — io'e ip. — Imēnpit ekawēn co pin cīcā oceju. Soat ka dağayū Jesus kay itabucayū muymuy. Imēnpuye etabucam cuy ocemukūyjo — io'e ip Paulo be.

²³ Imēnpuye kabia o'guwēgūn ip waram Paulo ekawēn co am.

Gebu je ade Judeuyū o'je'awero ip Paulo nuyap'a be ixe kabia. Kabia'isum Paulo apēn Deus soat kukukan o'e iap o'guwēnuwēn cebe ip. Kabi'isum piap imuwēnuwēn osunuy. Oikat imuwēnwēn.

— Jesus ma Deus emunaē — io'e cebe ip. — Deus Jesus ma o'taē soat ipi dağat taxijo am — io'e. — Ixe muwēgaptup Moisés emudupmubararaktup, soat Deus ekawēn muwēnuwēn'ukat emudupmubararaktup tak — io'e. — Jesus ma Deus emunaē — io'e.

²⁴ Xepxep ixeyū'in Paulo a'ō kay o'e. Itabut ip o'e Jesus kay. Warara'acayū bit itabut gu o'e. ²⁵ Wara'at tağtağtağ ma jewağuyğuy o'e ip.

Ade ixeyū'in Paulo a'ō kay gu ip o'e. O'āy ip jeduk'a be jepit ojuy. Paulo o'jekawēn cebe ip.

— Kuyje Isaias icēmān o'e wuydobuyū'ūm'ūm pe — io'e. — Iboam Isaias o'e Deus biōğbuk a'ōbi. Imēn e'em ixe emudupmubararaktup:

²⁶ "Eju juy ixeyū wuyjuyū kay," io'e Deus owebe, i. Imēn ece cebe ip: "Deus e'em: 'Jekūyjom cīcā eyju. Imēnpit eyetaybit gu. Jeakağ cīcā eyju. Ijom eyju. Imēnpit iba'arēm cīcā

eyxe, i. ²⁷ Imên ece cebe ip," io'e Deus owebe, i. "Ixeyū wuyjuyū itabut ġu, ibu'u ip jetabut am puye. Ya'ōpicūġcūġ ġu ip wa'ō kay jekūyjopin'ūm puye," io'e. "Ibu'u ip kawēn icēmat co am ibu'u ip jetabut am puye," io'e. "Ibu'u ip ikērēat mujurūġrūġap eperē am Deus pe ikērēat uk am cebewi," io'e, i.

Imên e'em Isaiás emudupmubararaktup-Deus ekawēntup — Paulo o'e.

²⁸ — Oburereyū — io'e Paulo Judeuyū be. — Eyetaybin cuy epe'e iboap ekawēn! Ġasū bit Judeu'ūmayū be juy kawēn idipat oceġuwēn. "Deus jeydaxijo," i oce'e cebe ip. Ixeyū bit xipan ya'ijo. Deus ixeyū acā idaxijo — io'e Judeuyū be.

²⁹ Imēneju Judeuyū o'jēm Paulo xewi. Jawa'ōxikxiġ cīcā jeweweju ip o'jēm.

³⁰ Paulo kawēn idipat o'ġuwēnuwēn Roma ka watwat pe. Xepxep koato Roma ka be osunuy. Ixe ma jedinheiro o'ġūmgūm uk'a be jenuyapteim. Ico-cok o'e warara'acayū ajēm puje jejo am.

³¹ — Deus soat tiwatwat kukukan je'e — io'e cebe ip.

Cūġ ma ip o'ġutaybitbin. Wuykukukat Jesus Cristo o'ġuwēnuwēn cebe ip. Ka'ūma ma ixē o'ġuymūġ kawēn idipat muwēnap puxim. Soat pe wuykukukat Jesus Cristo ekawēn o'ġuwēnuwēn.

PAULO EMUDUPMUBARARAKTUP ROMA KA WATWAT PEAPTUP

1 Cartadup mubarararağ òn eywebeaptum - - Roma ka watwat peaptum. Òn Paulo. Jesus Cristo beam kapikpik'ukat òn. Jesus Cristo emumuju òn. Deus cuk onaē.

— Wa'òbi omuwēnuwēn cuy eğuy soat ka watwat pe — i juk o'e owebe. — Kawēn idipat acā juy eğuwēnuwēn — i juk o'e owebe.

² — Kawēn idipat oğuwēğat soat pe ipi dağacat pe — io'e Deus kuyje.

Kawēn idipat muwēnuwēn osodop ip cekawēn muwēnuwēn'ukayū. Iboap ekawēn tak ibararak opop Deus ekawēntup pe. Wara'at ekawēn podi ma iboap ekawēn kawēn idip. Ka'ümğū xipat'ūmat iboap ekawēn'in. ³Iboap ekawēn co buje wuyetaybit abu Deus ipot iam. Ixe ipot wuykukukat- -Jesus Cristo. Deus ipot ijodian o'e. Davi naxeğebit osunuy- -Judeuyū kukukat naxeğebit. ⁴Ixe Jesus Deus co'i osunuy. Imēn ikērēat o'jukuk ġū ipi ju bima- -pūğ em tak ka'ūma. Deus ja'òbacaan jekpot o'ğutait ce'ūap tomukadi. O'ğutait teku okpot iam wuymutaybit am, teku soat podi ma ya'òbaca iam wuymutaybit am tak. Ixe Jesus Cristo wuykukukat. ⁵Ixe xipan okuğ. Ixe dak cuk onaē kawēn idipat muwēn âm soat kaka dağ. Ixe emumuju òn. Imēn-puye soat ka dağayū'in itabut je'e Cristo kay- -pūğpūğpūğ. Cristo ekawēn kay kūyjobit je'e ip. Ibuyxin ip Cristo jukuk. ⁶Eyju dak Deus cuk ey-naē, Roma ka watwat. Jesus Cristo kadiayūm cuk eynaē. Ġasū bit ixe kadiayūm epesop.

⁷Imēneju cartadup mubarararağ òn soat peaptum eywebeaptum, Roma ka watwat. Deus xe eykukpin cīcā. Ixe juk eynaē jebekitkiyūm.

— Bay, xipan cuy Roma ka watwat ejukuk — i òn e'em Deus pe- -wuyebay be, Jesus Cristo be dak- -wuykukukat pe. — Ixeyū ağuy mubabibin cuy eğuy — i òn e'em cebe ip.

⁸ Roma ka watwat itabut cīcā Jesus Cristo kay iap awēg o'yawēgtobuxik ip soat ka watwat. Imēnpuye ocokcok cīcā eykay. Imēnpuye:

— Bay, ēn xipat cīcā — i ōn e'em Deus pe.

⁹ Deus itaybit soat kabia ōn gēbum eykay iam. Kapikpiḡ cīcā ōn Deus peam ocokcok cekay buye. Kawēn idipat muwēnuwēn ōn soat kaka daḡ. Ixe ipot ekawēn muwēnuwēn ōn. ¹⁰⁻¹¹ Eyjo pin cīcā oce. Deus biōḡbuk omutaybitbin iam eymukūyjo pin cīcā ōn. Ibiōḡbuk a'ōbi eya'ōmucan ojuy ōn biḡ ma eyetabut am Jesus kay. Imēneju:

— Roma ka watwat com cuy omujum ece — i ōn e'em cebe. — Ebikuy bima juy omujum ece — i ōn e'em cebe.

Soat em imēn ōn e'em Deus eju kawēnwēn pima. ¹² Ōn acā ḡu jeya'ōmucan eywebe biḡ ma eyetabut am. Jewewa'ōmucanucan pit acesop biḡ ma wuyetabut am cekay. Biḡ ma eyetabut epe'e wetabucap co buje. Ōn tak biḡ ma wetabut oce eyetabucap co buje.

¹³ Okitpitpiyū, soat em cuk adi cu ojuy oḡuy eykay. Iboam eymukūyjo pin ōn. Imēnpit soat em omuju'ūm'ūm osunuy. Eywebe Deus ekawēn muwēn pin cuk adi oḡuy biḡ ma eyetabut am Jesus kay apēn eybadipyū oitabun iap co'i- -Judeu'ūmayū oitabun iap co'i.

¹⁴ — Omuwēnuwēn cuy eḡuy soat kaka daḡayū be — i juk o'e Jesus Cristo owebe.

Imēnpuye Cristo juy oḡuwēnuwēn soat pe- -cewaḡōnayū be, cewaḡōn'ūmayū be dak. Deus ekawēn cuy oḡuwēnuwēn itaybicayū be, itaybit'ūmayū be dak. ¹⁵ Imēnpuye obicokcok cīcā kawēn idipat muwēn ām eywebe, Roma ka watwat.

¹⁶ Deus ja'ōbacaan kawēn idipat kay itabucayū daxijojom. Koap Judeuyū daxijojom itabut puje ip. Judeu'ūmayū dak taxijojom itabut puje ip. Imēneju obisūsūn ḡu kawēn idipat muwēn ām soat ka watwat pe- -obicokcok cīcā ma. ¹⁷ Kawēn idipat co buje, wuyetaybit apēn Deus wuymucūḡucūḡ iam.

— Jesus Cristo kay itabucayū acā cūḡ ma oxe —

i'e'em Deus. Soat kabia: — Biğ ma itabut ip cekay — i'e'em Deus.

Imên e'em Deus ekawêntup: — Deus emumucûgyû soat em itait jeedop ip Deus xe itabut ip puye — i.

¹⁸ Deus kabi be omuy. Ixe itakoma jîjâ jekay-
'ûmayû kay, ikêrêat mujurûgrûğ'ukayû kay. Ibu'u
jîjâ ip Deus ekawên co am- -kawên icêmat co am,
ikêrêat mujurûgrûğ ojuy jîjâ ip puye. Ikêrêat
mujurûgrûğ'ukayû kawên idipat muwênap muba'ore-
ren tak ip ibu'u warara'acayû dak itabut am
ibuye. ¹⁹ Deus kuy apên ixe e'em iam o'ğutaybin
ijodiacat. Imên apên Deus e'em iam itaybit put
cebe ip. Inaka cekay ğu jîjâ ip. Imên puye Deus
ipiatpi'ajojoan cebe ip. ²⁰ Deus ma ijo ba'ore wuy-
webe. Ixe bit soat o'ğugê ipi dağacat. Ixe emumuğê
jo buje, wuyetaybit soat podi ma Deus ya'ôbaca
iam- -ya'ôbacaap i'ûm ğu iam. Wuyetaybit tak ixe
acâ Deusat iam. Kuyje itaybit osodop ip iboam ipi
dağacayû. Imên puye "Deus kake iap iba'arêm wuy-
xe" i'e ba'ore cebe ip. ²¹ Itaybit ma'ğû ip Deus
kake iam. Imên pit ibuyxim ğu ip ikuğ.

— Ên acâ Deusat — i'e'em ğu ip. — Ên xipat
cîcâ — i'e'em ğu ip Deus pe.

Cûğ'ûma jewağuyğuy ip. Kabiok tağ jekuku'ukat
itaybit ğu poma oju iam. Imên puxim itaybit'ûma je-
wağuyğuy ip. Yağuy'ûm ip.

²² — Ocetaybit cîcâ ma oceju bit — i te'e ma
e'em ip.

Deus xe bit itaybit ğu jîjâ ip. ²³ Imên pit Deus acâ
je'û ğu. Soat em itait nuynuy. Ixeyû bit ibu'u jîjâ
ibuyxim Deus kuk am, ijo ba'ore buye. Imêneju ijo-
diat co'iat muğêğêm ip wita'am, im tak, ourom tak.
Soat ijodiacat pit je'û. Soat em ğu itait nuynuy ip.
Wasû jo'iat tak imuğêğêm ip, puca jo'iat tak, jewu-
ruruğat co'iat tak. Jemumuğê wap jêğ'aecôğcôğ ip
"Eyju acâ Deusyû ocexe" i'e am cebe.

²⁴ Ikêrêat mujurûğ pin acâ ip. Imên puye
jekupinap tağ ceku am ip Deus o'jepere. Imên puye
yukpiwatpi ma ip jekukum ikêrêat mujurûgrûğ. Isû-
sûn'ûma ip jekukum jeweweju ikêrêat muğêğêm.

²⁵ Imēnpuye kawēn icēmat ip ibu'u napaap ekawēn kay am.

— En acā a'ōbuyxi — i'e'em ip soat muḡēḡē'ukat pe ḡu- -cemumuḡē be acā.

Deus pe acā wuye'e but:

— Soat podi ma ēn a'ōbaca — i.

Soat em ma juy imēn acece cebe.

²⁶ Soat muḡēḡē'ukat kuḡ ḡu ip ibuyxim- -jemumuḡē kuḡ acā. Imēnpuye Deus o'jepere ip ikērēat muḡē ān. Imēnpuye aḡokatkat kay oibu'un ip aoyū. Jewenuy'ūnakēkēm ā ip o'e jeweweju. ²⁷ Imēnpuxim aḡokatkayū aoyū kay oibu'un. Aḡokatkayū acā o'e ip cekay jījā. Jewenūn'o'om ā o'e ip. Imēḡap pit ikērē jījā Deus xe. Imēneju jeweweju ma ip ipiat'ajojom xipat'ūm cīcā ip puye.

²⁸ Deus ekawēn kay pin ḡu ip. Itaybin pin ḡu ip kawēn icēmān. Imēnpuye Deus ip o'jepere ikērēat kay ḡebum am, warēmtaḡ ceku am tak. ²⁹ Imēnpuye ka'ūma ma ixeyū'in cūḡ ma jekukum. Soat kabia warēmtaḡ cīcā ip jekukum Deus etabutpe, jebureyū etabutpe dak. Ikērēat mujurūḡrūḡxi ip. Itabikuku ip soat kay jebubun. Ikērēm warara'acat kuḡ ip. Itabutkarey ip warara'acat kay. Warara'acat aokakaxi ip. Dapxixi'uk cīcā ip. Warara'acat muḡuykukukuxi ip. Soat em itakoma ip warara'acat kay. Warara'acat ekawēn mukērērērēnxi ip. ³⁰ Warara'acat muymuyxi ip. Itakoma jījā ip Deus kay. Ibuyxim ḡu warara'acat kuḡ ip. Jewexe ip ya'ōbuyxi.

— Ocejū acā oca'ōbaca — i napa ma e'em ip jewawēḡmuboḡ am jewexe. Soat em: — Apēn ḡuto ace'e ikērēān? — i'e'em ip jewewebe.

Kūyjobit'ūm cīcā ip jebay a'ō kay. ³¹ Itaybit'ūm cīcā ip apēn cūḡ ma iam, apēn cūḡ ḡu iam tak. Ja'ō daḡ ḡu ip jekukum. Ka'ūma ma ikukpin cexe ip. Itabotaidabotbot ḡu ip warara'acat kay.

³² — Ikērēat mujurūḡrūḡ'ukayū je'ju ipiat'ajojoap kay — i'e'em Deus. — Soat em jeedop ip ipiat'ajojom — i'e'em.

Itaybit ip iboap ekawēn. Inaka ip biḡ ma buk ikērēat kay. Icokcok ip e'em warara'acat pe ikērēat mujurūḡ ām, jebuxim i'eat pin ip puye.

2 Eyju bit aco'i e'em eyewewebe: — Ocebu-xim'ūma ixeyū ikērēat kuḡ Deus xe — i. Imēnpit ixeyū ekukuap co'i eyju dak jekukum. Imēnpuye eyju dak ikērēat kuḡ cexe. “Ikērēat kuḡ ḡu oceju bit” i'e ba'ore eywebe.

² — Ipiat osupi'ajoat eywebe, ikērēat kuḡ eyju buye — i'e'em Deus pit ikērēat mujurūḡrūḡ'ukayū be.

Deus soat em cūḡ ma e'em. Imēnpuye wuyetaybit cūḡ ma ixē ipiatpi'ajoan ikērēat mujurūḡrūḡ'ukayū be iam. ³ Oburereyū, tūybe Deus ocewebe ḡu ipiat supi'ajoat warara'acat pe acā iān eyju e'em. Inaka ixeyū ekukuap co'i eyju dak jekukum. Imēneju Deus ipiat supi'ajoat eywebe ixeyū beap co'i. Tūybe oenapōn ipiatpi'ajoap puxim iān eyju e'em.

⁴ — Gaxin ma aco'i ikērēat muḡḡḡap jepere ip — i'e'em Deus jewebe ma.

Imēnpuye soat em xipan eykuḡ. Yukpiceḡe ḡu eykuḡ.

— Ipiat osupi'ajoat ḡu buk cebe ip — i'e'em jewebe ma.

Ixe xipan eykuḡ ibikuy eywebe ikērēat mujurūḡrūḡap epere am puye. Eyju bit e'em:

— Ga'a ikērēat aḡujurūḡrūḡ — i. — Deus ipiat supi'ajoat ḡu wuywebe — i napa ma eyju e'em.

⁵ Guyjom Deus jetakomaap ḡubapuk ikērēat mujurūḡrūḡ'ukayū be. Ibo kabia be ipiat supi'ajoat ixeyū be. Cūḡ ma ipiat supi'ajoat cebe ip. Eyju bit eybu'u jījā ikērēat mujurūḡrūḡap epere am. Eybu'u jījā kūyjobit am ixē a'ō kay. Imēneju ikērēat mujurūḡrūḡ'ukayū be ipiatpi'ajoat puje, warara'acat podi ma eywebe ipiat supi'ajoat. ⁶ Guyjom Deus apēn cuk adi oekuku ip iaptei ideida soat pe ijodiacat pe. ⁷ Pūḡpūḡ ijodiacayū'in xipacat mujurūḡrūḡxi. Deus bikuyap taḡ ceku pin cīcā ip. Deus co'ian jedipap kudadam tak ip. Deus e'em cebe ip: “Eyju xipat oxe” iap kudadam tak ip. Deus xe jeedop ip iap kudadam tak ip. Soat em itait jeedop ip cexe je'ū buje ixeyū ma. ⁸ Warara'acayū bit jewekay acā ḡebum jewemucokcokap ojuy. Cūḡat o'jepere ip xipat'ūmat kay je'e am. Deus itakoma jījā jeenuy ixeyū kay. Ipiat supi'ajoat cebe ip. ⁹ Deus ipiat supi'ajoat soat pe ikērēat mujurūḡ-

rūg'ukayū be. Warara'acat podi ma ipiat supi'ajoat Judeuyū be. Judeu'ūmayū be dak ipiat supi'ajoat. Ipiatpi'ajojom cīcā jeedop ip. Imēn Deus warēmtağ ip cuk adi oekuku iaptei ideida cebe ip. ¹⁰Deus xipacat mujurūgrūg'ukayū ġuwarurun. Jesus Cristo jo'iyūm jeedop ip jedipap kuğ, ja'ōbuyxiap kuğ tak. Yağuybabibi jeedop ip soat em. Deus ixeyū ağuybabibin jeenuy. Imēn Deus apēn cūğ ma ip cuk adi oekuku iaptei ideida cebe ip. Koap Judeuyū be ideida. Kanomūm Judeu'ūmayū be ideida. ¹¹Imēn Deus cūğ ma soat kuğ- -Judeuyū kuğ, Judeu'ūmayū kuğ tak.

¹²⁻¹⁵ Judeu'ūmayū ma Deus pe wuyawēwēap ekawēn tup kuğ ġu ip, Deus Moisés pe o'ğuwēn iap ekawēn tup kuğ ġu. Imēnpuye itaybit ġu ip ixekawēn. Ikērēat mujurūgrūg' ip. Inaka Deus ixeyū ġuju ipiat'ajojoap kay ikērēat mujurūgrūg'apteim. Imēnpit:

— Wekawēn tağ ġu juk adi epekuku — i'ūmğū je'e cebe ip, ixekawēn tup kuğ'ūm puye. — Cūğ ma eyju oxekawēn — i je'e Deus jekawēn cocokawēn be ġu- -jekawēn tağ jekuku'ukayū be acā.

Imēn je'e. Judeu'ūmayū Moisés ekawēn tup kuğ ġu. Jekpiwatpin ma aco'i cekawēn tağ jekukum ip itaybit ġu ma'ğū ip cekawēn. Cekawēn tağ jekuku'ukat co'i ip ġebuje bit. Ixeyū ekukuap co buje, warara'acayū e'em:

— Jebinūn pewi ma teyūku Deus pe wuyawēwēap ekawēn tağ jekukum cekawēn tup kuğ ġu ma'ğū — i.

Jebinūn pewi ma ip itaybit apēn cedağ iam, apēn cedağ ġu iam tak. Ikērēat mujurūğ' puje, "Ikērēat oğujurūğ'," i'e'em ip jewebe ma. Cūğ ma jeku buje dak, "Cūğ ma ōn jekukum," i'e'em ip jewebe ma. Judeuyū bit Deus pe wuyawēwēap ekawēn tup kuğ. Itaybit ip ixekawēn. Inaka ikērēat mujurūgrūg' ip. Imēnpuye Deus ixeyū ġuju ipiat'ajojoap kay.

— Wekawēn tağ ġu juk adi epekuku — i je'e cebe ip.

¹⁶ Ğujjom Deus Jesus Cristo jomuy apēn cuk adi oekuku ip iaptei teida am soat pe. Xipacat je'ğūm xi-

pacayū be xipacat muḡēḡēapteim. Kūyjobit'ūmayū bit ḡuju ipiat'ajojoap kay kūyjobit'ūmapteim.

¹⁷ Pām eyju? Ajo-kay eyju jeḡebubum?

— Ocejū bit Judeuyū — i eyju e'em. — Ocejū acā cūḡ ma Deus xe ixe be wuyawēwēap ekawēn tup kuḡ puye — i eyju e'em.

Jewexe eya'ōbuyxi.

— Ocejū acā Deus ocenaē jebekitkiyūm — i'e'em eyju te'e ma. ¹⁸ — Ocejū acā ocetaybit apēn Deus ibikuy iam — i te'e ma eyju dak e'em. — Ocejū acā ocetaybit apēn cūḡ ma iam, apēn cūḡ ḡu iam tak, Deus pe wuyawēwēap ekawēn coco'uk puye — i te'e ma eyju e'em. ¹⁹ — Warara'acayū itaybit ḡu apēn cūḡ ma iam, apēn cūḡ ḡu iam tak — i eyju e'em. — Ocejū acā ocetaybit — i te'e ma eyju e'em. — Warara'acayū itaybit ḡu Deus ekawēn — i dak eyju e'em. — Soat podi ma ocejū bit ocetaybit — i te'e ma eyju e'em. — Ocejū acā warara'acayū oceḡu-taybitbin — i te'e ma eyju e'em. ²⁰ — Ocejū acā itaybit'ūmayū mutaybitbin kawēn icēmān — i te'e ma eyju e'em. — Kawēn icēmān yaypan'isuayū mutaybitbin tak ocejū bit — i te'e ma eyju e'em. — Ocejū acā ocetaybit kawēn icēmān, kawēn cūḡan, Deus pe wuyawēwēap ekawēn tup kuḡ puye — i te'e ma eyju e'em.

²¹ Warara'acayū mutaybitbin acā eyju jekukum. Jewemutaybitbin'ūma eyju bit jekukum.

— Warara'acat pubut epetujupa'um ḡu juy — i eyju e'em warara'acat pe ma. Eyju dak tujupa'um'um ma.

²² — Warara'acat tayxi kaykay ḡu juy epesop — i eyju e'em warara'acayū be.

Eyju dak warara'acat tayxi kaykay ma.

— Deusbaroyū kay ḡu juy epeku — i eyju e'em warara'acayū be.

Eyju bit ijodiat kay jījā Jesus Cristo kayap podi ma.

²³ — Deus pe wuyawēwēap ekawēn tup kuḡ ocejū bit — i eyju e'em soat pe te'e ma.

Cekawēn taḡ ḡu eyju bit jekukum. Imēnpuye Judeu'ūmayū cekawēn tup kuḡ'ūmayū Deus mubuy-

xi'üm'üm cūg'ūma eyju jekukum puye. ²⁴ Imēn e'em Deus ekawēn tup: Judeuyū, Judeu'ūmayū Deus muy-muy eyju cūg'ūma jekukum puye, i.

²⁵ Imēntak Deus pe wuyawēwēap ekawēn kay kūyjobit pima, cūg ma eywebe ikap'isuat taypu'ağobixeedakat am tekū Deus ebekit iap mubapuk am soat pe -Judeu'ūmayū be. Eyju ixeedakatkan oceju Deus ebekitkiyū iap mubapukpuḡ soat pe. Deus ekawēn kay kūyjobit'üm pima bit, te'e ma ixeedakatkan eyju, Deus ebekit'ūmat co'i eyju jekukum puye. ²⁶ Judeu'ūmayū bit jedaypu'ağobixeedakatkan ḡu. Deus pe wuyawēwēap ekawēn kay kūyjobit pima bit, Judeuyū jo'i e'em ip Deus xe -jebekitkiyū jo'i -kūyjobicayū jo'i.

— Eyju webekitkit — i'e'em Deus cebe ip ixeedakat ḡu ma'ḡu ip.

²⁷ Eyju ma eyxeadakatkanat. Deus pe wuyawēwēap ekawēn tup kuḡ eyju. Imēnpuye eyetaybit cūg ma jeku am Deus xe iam. Inaka eyju kūyjobit'üm cekawēn kay. Judeu'ūmayū bit ixeedakacap ḡu ip. Deus pe wuyawēwēap ekawēn tup kuḡ ḡu ip. Inaka cekawēn kay kūyjobit pima, ikērēat kuḡ ḡu ip Deus xe -kūyjobicayū -Judeu'ūmayū. Eyju bit ikērēat kuḡ cexe kūyjobit'üm puye, Judeuyū. ²⁸ Wuyju Deus ebekitkit wuyxeadakacap tomuju ḡu -ixe ekawēn kay kūyjobicap tomuju acā. Pūḡpūḡayū te'e ma e'em:

— Deus ebekitkit oceju — i.

Te'e ma ip jexeedakatkacan. Te'e ma ip Deus ekawēn tup kuḡ, kūyjobit'üm ip puye.

— Webekitkiyū ḡu eyju — i'e'em Deus ixeyū be, kūyjobit'üm puye.

²⁹ Warara'acayū cūg ma e'em:

— Judeuat oceju bit — i. — Deus ebekitkiyū oceju — i dak.

Jebikuyap taḡ ḡu ip jekukum -Deus bikuyap taḡ acā. Deus biōḡbuk nuynuy cebe ip.

— Eyju ma webekitkiyū — i'e'em Deus ixeyū be, jexeedakatkanat ḡu ma'ḡu ip. — Xipat cīcā eyju — i'e'em Deus cebe ip.

“Eyju xipat oxe” i'eap kudadam ḡu ip ijodiat pe.

Deus pe acā “Eyju xipat oxe” i'eap wiwim ip. Soat Deus ekawēn kay kūyjobicayū cebekitkiyū- -Judeuyū, Judeu'ūmayū dak.

3 — Jewewejo'i kūyjobicayū Deus ebekitkiyū bima, apeḡām paxi wuyju Judeuyū? — i du eyju e'em owebe? — Apēḡām paxi wuyju wuyday-pu'aḡobixeedakatkan? — i du eyju e'em owebe? — Xipat ḡu aco'i wuyju Judeuyū iap — i du eyju e'em owebe?

² — Xipat cīcā ma wuyju Judeuyū iap — i ōn pit e'em eywebe.

Deus jekawēn o'ḡuwēn Judeu'ūmayū be ḡu- -wuy'ajojoyū'ūm'ūm pe acā. Imēnpuye wuyju Judeuyū iap xipat cīcā. Jekawēn o'ḡuwēn cebe ip ixeyū be imuwēn ām warara'acayū be.

³ — Imēnpit pūḡpūḡ wuy'ajojoyū'ūm'ūm'in oibu'un ip ixē ekawēn taḡ jeku am — i du eyju e'em owebe? — Ḡasū aco'i Deus je'e ḡu wuywebeam apēn cuk adi o'e'e iap taḡ, cekawēn taḡ oibu'un ip puye — i du eyju e'em owebe?

⁴ — Ja'ō daḡ ma Deus je'e wuywebeam tak — i ōn pit e'em eywebe.

Soat ma napapa'uk. Deus pit napapa'uk ḡu. Imēn e'em Deus ekawēn tup:

Deus, ēn acā icēmān e'em, i. “Cūḡ'ūma ēn ocekuḡ,” i napa ma e'em emuymuy'ukayū, i. Inaka ēn acā cūḡ ma soat kuḡ, i.

Imēn e'em Deus ekawēn tup.

⁵ — Cūḡ'ūma wuyeku buje bit, Deus acā cūḡ ma jekukum iap ibapuk e'em wuyekukuap cocoayū xe — i aco'i eyju e'em owebe.

Eyxe xipat wuywebe cūḡ'ūma jeku am warara'acayū mutaybit am Deus acā cūḡ ma iam. Imēnpuye:

— Cūḡ ḡu Deus pe ipiatpi'ajoan wuywebe warēmtaḡ wuyekukuapteim — i te'e ma eyju e'em owebe.

Ijodiat puxim ōn kawēnwēn ḡasū, adeayū icēm ḡu e'em puye.

⁶ — Deus soat em cūḡ ma wuykuḡ — i ōn pit

e'em. — Deus cūg'ūma ibima, iba'ore kuka o'e ixē be cūg' ma apēn cuk adi ajekuku iap teida am soat pe wuywebe. Imēnpit ixē cūg' ma iboap ideida — i ōn pit e'em.

⁷ — Cūg'ūma weku buje, “Deus acā cūg' ma jekukum,” i je'e ip ocekukuap cocoayū — i du eyju e'em owebe? — “Soat podi ma Deus cūg' ma,” i je'e ip — i du eyju e'em owebe? — Imēnpuyē warēmtaḡ cuy ajeku warara'acayū be “Deus acā cūg' ma” i'e am — i te'e ma eyju e'em. — Imēnpuyē cūg' ḡu Deus pe ipiatpi'ajoan ocewebe warēmtaḡ ocekukuapteim — i te'e ma eyju e'em owebe. ⁸ Imēneju:

— Ga'a ikērēat aḡujurūḡ — i'ūmḡu juy ace. — Wuywebe ikērēat mujurūḡ puje, adeayū itabut je'e Deus acā xipāt iap kay — i'ūmḡu juy ace. — Ga'a ikērēat aḡujurūḡ Deus acā xipāt iam itabut'ūmayū mutaybit am — i'ūmḡu juy ace.

— Imēn e'em Paulo dak — i napa ma e'em omuymuy'ukayū dak.

Deus cūg' ma ipiat supi'ajoat omuymuy'ukayū be.

⁹ Deus xe Judeu'ūmayū podi ma xipāt tu wuyju Judeuyū buye? Ka'ūma! Jewewe jo'i ma wuyju ikērēat kuḡ Deus xe- -Judeuyū, Judeu'ūmayū dak. Wuywebe dak ikērēat mujurūḡrūḡap epere ba'ore. Kuy iboap oḡuwēn eywebe. ¹⁰ Imēn e'em Deus ekawēn tup:

Ka'ūmḡu cedaḡ ma jekuku'ukat- -pūḡ tak ka'ūma ma, i. ¹¹ Soat ip itaybit ḡu apēn cūg' ma Deus xe iam, apēn cūg' ḡu iam tak, i. Ka'ūmḡu Deus a'ō daḡ cekupinat, i. ¹² Wūy ma o'e ip Deus wi oitabidaoat puxim, i. Ka'ūmḡu xipacat mujurūḡrūḡ'ukat- -pūḡ tak ka'ūma, i. ¹³ Cekawēnkērē jijā ip itaypi koceat puxim, i. Napapa'uk cīcā ip, i. Warara'acat muymuyap cēm cēm ikōmbie daḡwi ip puybu tūy-piat puxim, i. ¹⁴ Warēmtaksuḡ e'em ip warara'acat pe, i. ¹⁵ Itadaodao ip warara'acat ekawēn mukērērēnap kay,

yaokaap kay dak, i. ¹⁶ Soat em jexeat cokcokap mu'üm ojuy ip, i. Warara'acat mutabibin ip soat em, i. ¹⁷ Itaybit ġu ip kaba'üm jedop am warara'acat eju, i. ¹⁸ Itaybit ġu ip Deus kuk am ibuyxim, i.

Imēn e'em Deus ekawēn tup.

¹⁹ Ibo dup ekawēn icēmān! Imēn Deus Judeuyū awēwēm jekawēn. Wuyetaybit iboam. Imēnpuye te'e ma e'em ip Deus pe: — Ocejū acā ekawēn taġ jekukum — i. Judeu'ūmayū dak ixē ekawēn taġ ġu jekukum. Imēneju mūġ ma ip Deus etabutpe soat ip ikērēat kuġ puye -Judeuyū, Judeu'ūmayū dak. ²⁰ Ka'ūma ma soat ekawēn taġ jekukum -Deus ekawēn taġ. Imēnpuye abu-be Deus e'em “Cūġ ma juy epesop oxe wekawēn taġ eyekuap tomuju” i? Ka'ūma be ma! Deus ekawēn wuyetaybit puje, wuyetaybit soat wuyju ikērēat kuġ Deus xe iam.

²¹ Ġasū bit apēn ōn ipi watwat mucūġcūġ iap Deus o'ġuwēn wuywebe.

— Eyju cūġ ma e'em oxe eyawēwēap ekawēn taġ eyekukuap tomuju ġu — io'e Deus wuywebe. Imēn Moisés wuymutaybitbin tak. Deus ekawēn muwēnuwēn'ukayū dak iboam wuymutaybitbin.

²² — Eyju bit cūġ ma oxe — i'e'em Deus ipi watwat pe Jesus Cristo kay itabut puje acā. Soat pe itabucat pe: — Ēn cūġ ma oxe — i'e'em Deus -Judeu be -Judeu'ūmat pe dak.

²³ Soat ipi watwat ikērēat o'ġuġē. Ka'ūma ma ikērēat kuġ ġu. Wūy ma o'e ip Deus wi -warara'acat podi ma idipat wi, ikērēat kuġ puye. ²⁴ Deus pit ikērēat uk'uġ wuywebewi Jesus Cristo oe'ū wuywebeam puye. Ikērēat muġēġēaptei o'teida je'ū ām. Imēnpuye wuyju cūġ ma Deus xe ixē oe'ū buye. Deus tei'ūma wuy mucūġcūġ, ixē soat em xipan wuykuġ puye. Cristo Jesus kay wuyetabun puje acā, wuy mucūġcūġ. ²⁵ Deus Jesus Cristo o'ġudot ijodi ce'ū ām wuywebeam. Ixē oe'ū ikērēat mujurūġrūġapteida am. Ixē kay wuyetabut puje, Deus ikērēat uk'uġ wuywebewi. Jesus Cristo o'ġudot ce'ū ām ōn cūġ ma eykuġ iam

wuymutaybit am. Kuyje Deus ikērēat mujurūgrūg-'ukayū o'gūju ḡu ipiat'ajojoap kay. Yukpiceḡe ḡu osunuynuynuy ixeyū kuḡ.

— Guyjom okpot je'ū soat peam — io'e jewebe ma. — Ixe kay itabucayū oḡuju ḡu ipiatpi'ajojoap kay — io'e jewebe ma. ²⁶ Gasū bit: — Gebum ōn ipi watwat ikērēat mujurūgrūg iap kay — i'e'em Deus. — Cūḡ ma kuka o'e owebe ipiatpi'ajoan cebe ip, ikērēat ip o'ḡujurūgrūg iaptem — i'e'em ixē. — Gasū bit cūḡ ma kuka o'e owebe ikērēat uk am eywebewi, Cristo oe'ū buye — i'e'em Deus Jesus Cristo kay itabucayū be. — Eyju cūḡ ma oxe Jesus oe'ū buye — i'e'em itabucayū be.

²⁷ Imēneju "Warara'acat podi ma cūḡ ma oceju bit," i'e but tu wuywebe? Ka'ūma. I'e but ḡu wuywebe. Ka'ūma ma cūḡ ma Deus xe xipacat mujurūgrūgāp tomuju. Cūḡ ma wuyju cexe Jesus Cristo kay wuyetabut puye acā. Imēnpuye "Warara'acat podi ma cūḡ ma oceju bit" i'e ba'ore wuywebe. ²⁸ Wuyju cūḡ ma Deus xe xipacat mujurūgrūgāp tomuju ḡu - Jesus Cristo kay wuyetabucap tomuju acā. Iboam wuyetaybit kuy. ²⁹ Deus Judeuyū mucūḡ ojuy acā du? Ibu'u du Judeu'ūmayū mucūḡ ām? Ka'ūma! Ibikuy ma. Soat itabucayū mucūḡucūḡ ixē - Judeuyū mucūḡucūḡ, Judeu'ūmayū mucūḡucūḡ tak. ³⁰ Imēnpuye pūḡ taḡ ma Deus soat kuḡ ipi watwat kuḡ. Jesus Cristo kay itabun puje acā Judeuyū mucūḡucūḡ. Cekay itabun puje acā Judeu'ūmayū mucūḡucūḡ tak.

³¹ Imēneju:

— Moisés ekawēn taḡ ḡu ajeku - Deus o'ḡuwēn cebe iap ekawēn taḡ ḡu - Jesus Cristo kay wuyetabut puye — i'ūmḡu juy ace.

Cekay wuyetabut pima dak, kuyjeat ekawēn cuy ibuyxim ajukuk.

4 — Ajoap tomuju Abraão cūḡ ma osunuy Deus xe? — i du eyju e'em owebe?

Wuydobu'ūm Abraão'ūm Judeuyū dobu'ūm. Apēn-

puye "Ēn cūg ma oxe" io'e Deus cebe iam ōn jey-mutaybin.

² — Ēn cūg ma oxe — io'e Deus Abraão be. Imēn Deus e'em xipacat muḡēḡēap tomuju ibima: "Warara'acat podi ma ōn cūg ma Deus xe" i kuka juk o'e Abraão. Imēnpit xipacat muḡēḡēap tomuju ḡu "Cūg ma ēn oxe" io'e Deus cebe.

³ Imēn e'em Deus ekawēn tup:

Abraão bit itabut cīcā osunuy Deus kay, i. Deus tak o'e cebe "Cūg ma ēn oxe" i, cekay itabut puye, i.

Imēn e'em Deus ekawēn tup. ⁴ Wuyekapik puje wuyekapikaptei bubum wuyju. Tei'ūm iūm'ibit pupum ḡu wuyju. Wuyekariwa ceweroap wuyweju iap pupum acā wuyju. ⁵ Imēn ḡu bit Deus wuykuḡ. Deus e'em:

— Ēn cūg ma oxe — i xipacat muḡēḡē'ukat pe ḡu- -jekpot kay itabucat pe acā.

Itabun puje acā:

— Ēn cūg ma oxe — i'e'em Deus ikērēat mujurūḡrūḡ'uk osunuyiat pe.

Ikērēat mujurūḡrūḡ'uk osunuyiat cūg ma Deus xe xipacat muḡēḡēap tomuju ḡu- -Jesus kay itabucap tomuju acā.

⁶ — Ēn cūg ma oxe, xipacat muḡēḡēap tomuju ḡu, etabucap tomuju acā — i'e'em Deus.

Imēnpuye cūḡat icokcok cīcā e'em. Davi dak iboap cuk adi o'ḡuwēnuwēn. Imēn Davi o'e:

⁷ Kuy bima kūyjobit'ūm osunuyiat icokcok e'em Deus pe cebewi ikērēat uk puje, i.

Ikērēat mujurūḡrūḡ'uk osunuyiat icokcok e'em Deus pe ikērēat mu'ūm puje, i.

⁸ Cūḡat kay ibu'u tūibit icokcok e'em, i.

Deus apēn ixe juk adi ikērēat o'ḡujurūḡrūḡ iap kay ḡebum'ūm pima, icokcok e'em, i.

Imēn Davi o'e kuyje.

⁹ — Icokcok ip e'em — i mo adi a'ḡu o'e Davi.

Abuyū icokcok soat em? Taypu'ağobixeedakat'ibiyū acā du? Judeuyū acā du? Ka'ūma! Ixeedakat'ūm'ibiyū dak icokcok ma--Judeu'ūmayū. Imēn e'em Deus ekawēn tup:

Abraão itabut o'e Deus kay, i. Deus o'e cebe "Ēn cūg ma oxē" i, cekay itabut puye, i.

¹⁰ Puje "Cūg ma ēn oxē" io'e Deus Abraão be? Abraão jedaypu'ağobixeedakacat puje du? Ka'ūma!

— Cūg ma ēn oxē — io'e ixeedakat'ūm pima.

¹¹ Guyjom acā o'jedaypu'ağobixeedakacat Abraão.

— Ēn cūg ma oxē — io'e Deus Abraão be ixeedakacat awap ma. — Ēn cūg ma oxē — io'e Abraão be, jekay itabut puye.

Guyjom o'jedaypu'ağobixeedakacat "Ōn cūg ma Deus xe wetabucap tomuju" i'e am soat pe warara'acat pe. Abraão cūg ma osunuy Deus xe itabut puye. Cūg ma osunuy ixeedakacat'ūm awap ma. Imēnpuxim Judeu'ūmayū dak cūg ma Deus xe itabun puje. Cūg ma ip cexe ixeedakacat ġu ma'ġu ip. Imēneju Abraão ixeyū ebay jo'i Abraão etabucap co'i ip itabut Deus kay buye. ¹² Judeuyū etabun puje, cūg ma ip Deus xe. Cūg ma cexe jexeecukap tomuju ġu, jetabucap tomuju acā. Abraão etabucap co'i ma ip itabut. Imēneju Abraão ixeyū ebay buxim Deus xe ixē buxim ixeedakacap tomuju ġu- -ixē buxim itabucap tomuju acā.

¹³ — Wa'ōbi soat ka dağacat kukan ecesūy — i juk o'e Deus Abraão be. — Enaxeğebitbit tak soat kukan — i juk o'e. — Soat eipi oğūm eywebe — i dak o'e Deus. Iba'ore soat pe wuywebe soat ekawēn tağ jeku am- wuyawēwēap ekawēn tağ. Imēnpuye Deus o'e: "Xipacat oğūm ewebe," i Abraão be wuyawēwēap ekawēn tağ cekuap tomuju ġu- -itabucap tomuju acā; cūg ma Deus xe iap tomuju dak. ¹⁴ Imēnpuye Deus xipacat ūmūm wuyawēwēap ekawēn tağ jekuku'ukayū be acā ġu. Ixeyū be acā iūmūm pima, te'e ma kuka juk ace wuyetabut Jesus Cristo kay; te'e ma dak kuka juk Deus o'e wuywebe "Xipacat

ogūm eywebe" i. ¹⁵ Imēn Deus ipiatpi'ajojoan jekawēn kay kūyjobit'ūmayū be.

— Kūyjobit ġu eyju wekawēn kay — i ġu bit e'em cekawēn co'ūmayū be, itaybit ġu ip cekawēn puye.

¹⁶ Imēneju Deus tacup ġu.

— Xipacat ogūm ewebe, okay etabut puye — i juk o'e wuydobu'ūm pe- -Abraão'ūm pe.

Deus soat em ja'ō daġ e'em wuywebe. Imēnpuye soat itabucayū xipacat je'jat Deus xewi Abraão buxim.

— Soat em wekawēn kay kūyjobicayū be acā xipacat ogūm — i'ūmġu o'e Deus. — Soat pe okay itabucayū be xipacat ogūm — i acā o'e.

Imēneju Abraão wuyebay buxim Deus xe, ixe etabucap co'i wuyetabut puye. ¹⁷ Imēn e'em Deus ekawēn tup:

Wa'ōbi ade ka watwat je'e "Abraão wuyebay jo'i Deus xe, ixe etabucap co'i wuyetabut puye," i, io'e Deus Abraão be, i.

Abraão itabut osunuy Deus kay. Ixe Deus waram ce'ū'ūayū mutaicin. Ka'ūmġu osodop iat mubapuk-puġ ixe. Ixe Deus ja'ō daġ ma juk adi Abraão kuġ osunuy.

¹⁸ — Enaxeġebitbit ma jeedop ade jījā — i juk o'e Deus Abraão be. — Wa'ōbi ade ka watwat kukukan ecesūy — io'e.

Iboap kay itabut osunuy Abraão.

— Deus ja'ō daġ je'e owebe — i juk adi o'e Abraão jewebe ma.

Itabut cīcā osunuy imujurūġ pa'oren ma'ġu ipot aypa buye. Owebe jekpot ūmap wiwim osunuy Deus cebe. ¹⁹ Ixe aypa jījā osunuy. Ijasūn 100 koatoap wi osunuy.

— Okpotpet put ġu ma oce aypa oce buye — io'e jewebe ma. — Otayxi Sara dak i'it'et put ġu o'e yabut puye — io'e jewebe ma.

Inaka itabutbūt ġu osunuy Deus ekawēn kay- -itabut cīcā ma.

²⁰ — Deus okpon je'ġūm ġu — i'ūmġu o'e Abraão. — Je'ġūm paxi? — i'ūmġu dak o'e.

Ixe bit itabut cīcā osunuy Deus okpon je'gūm iap kay aypa ma'ḡu. Jawa'ōmucanucan osunuy, itabut Deus kay buye. Imēnpuye:

— Ēn soat podi ma xipan okuḡ — i'e'e'uk osunuy Deus pe. ²¹ — Soat iba'ore ḡu Deus pe — i'e'e'uk osunuy Abraão. — Ja'ō daḡ em owebe — i'e'e'uk osunuy. — Okpon je'gūm ja'ōbacaan — i'e'e'uk osunuy jewebe ma. ²² Imēneju:

— Ēn cūḡ ma oxe — i juk o'e Deus cebe. Imēn Deus o'e Abraão itabut osunuy buye. ²³ Ixe cūḡ ma osunuy Deus xe iap ibararak opop Deus ekawēn tup pe. Abraão cūḡ ma osunuy jetabucap tomuju iaptup o'tupmubararak kuyjeayū. Kuyjeayū mutaybit am acā ḡu ibodup o'tupmubararak ip. ²⁴ Wuymutaybit am tak ibodup o'tupmubararak ip.

— Eyju cūḡ ma oxe — i je'e Deus wuywebe, ixe kay wuyetabun puje.

Ixe Deus Jesus o'ḡutait ce'ūap tomukadi. Wuykukukat o'ḡutait waram. ²⁵ Deus Jesus o'ḡudot ijodi ce'ū am. Oe'ū ikērēat uk am wuywebewi. Jesus o'ḡutait ce'ūap tomukadi Deus pe “Cūḡ ma eyju oxe” i'e am wuywebe- -o'ḡutait'iat kay itabucayū be.

5 Imēneju Deus e'em wuywebe: — Cūḡ ma eyju oxe — i, Jesus Cristo kay wuyetabut puye. Kuy bima kaba'ūm ajop Deus eju wuyetabut'ūm pima. Gasū bit kaba'ūm ace Deus eju wuykukukat Jesus Cristo kay wuyetabut puye. ² Jesus Cristo kay juk o'e jebay be:

— Teyūku itabut okay — i.

Imēnpuye Deus xipan wuykuḡ. Wuycokcok cīcā ixe xipat wuykay buye. Guyjom Deus dipap co'i acesop. Wuycokcok cīcā iboap wiwim. ³ Iboap wiwim pima wuyju ipiatpi'ajojom ijodi. Wuyetaybit wuyetaxi acesop ipiatpi'ajojom puye iam. Imēnpuye ipiatpi'ajojom pima dak wuycokcok wuyju e'em. ⁴ Ipiat'ajoam wuyetaxi bima, Deus e'em wuywebe:

— Xipat cīcā eyju oxe — i.

Deus "Eyju xipat cîcâ oxé" i'e'em pima, wuycokcog acesop Deus xe acesop soat em iap wiwi am. ⁵ Jewemuğuykukukum ġu wuyju Deus co'i acesop iap wiwi am. Ixe jebiöğbuk o'ğūōm wuywebe- -xipacat o'ğūōm. O'ğūōm wuymukūyjo am eykukpin cîcâ oxé iam.

⁶ Wuywebe xipacat muğē ba'ore bima Cristo oe'ū wuydaxijo am. Wuywebeam ixe oe'ū xipat'ūmayū beam. Deus "Eje'ū juy" i'e buje, oe'ū. ⁷⁻⁸ Deus xe wuykukpin cîcâ. Imēnpuye ixe jekpot o'ğudot ce'ū âm wuywebeam. Wuyju ma wuybu'u je'ū âm warara'acat e'ūap puxim, cūğ ma'ğū ip jekukum, xipacat muğēğēm ma'ğū ip. Cristo bit ibu'u ġu osunuy je'ū âm wuywebeam ikērēat mujurūğrūğ ma'ğū wuyju. ⁹ Ġasū wuyju cūğ ma Deus xe wuywebeam Cristo oe'ū buye- -o'jedoyekereren puye. Cristo bureyū ma wuyju bit ġasū. Imēnpuye Deus wuymuju ġu ipiat'ajojoap kay. ¹⁰ Wuyetakoma juk adi ajop Deus kay. Deus pit wuymuwexat jebureyūm wuywebeam ipot oe'ū buye. Ġasū bit Cristo waram itait o'e. Deus wuydaxijo Cristo itait puye, wuyju ibureyū buye dak. ¹¹ Wuykukukat Jesus Cristo juk wuymuwexat Deus bureyūm, ixe xe wuykukpin puye, wuywebeam oe'ū buye dak. Imēnpuye:

— Obureyū eyju — i'e'em Deus wuywebe.
Imēnpuye soat podi ma wuycokcok, wuyju Deus bureyū buye.

¹²⁻¹⁹ Imēnpit ipi watwat ikērēat mujurūğrūğ'uk osodop ip Deus jekawēn muwēn awap Moisés pe. Deus pit ipiat o'supi'ajoat ġu cebe ip jekawēn tağ ġu juk adi oekuku ip iap teim, Moisés pe wuyawēwēap ekawēn muwēn awap. Adão koap ikērēat o'ğujurūğ. Soat ipi watwat o'jebapuk ixe Adão bewi. Soat ixe ebekitkiyū ikērēat mujurūğrūğ'ukayūm o'e Deus xe ixe ikērēat o'ğujurūğ puye.

— Ikērēat mujurūğrūğ'ukayū je'ū — i juk o'e Deus Adão be.

Imēnpuye soat ipi watwat je'ū'ūm ġasū dak. Soat wuye'ū'ē ace Adão buxim wuyju dak ikērēat mujurūğrūğ puye. Soat cebekitkiyū ikērēat o'ğurūğrūğ Adão juk ikērēat o'ğujurūğ iap co'i'ūmğū. Inaka

oe'ū'ū ip soat- -Adão badipyū, Moisés badipyū dak. Oe'ū'ū ip Adão koap ikērēat o'gūjurūg̃ puye. Soat Adão ebekitkiyū ikērēat mujurūgrūg̃'ukayūm o'e Deus a'ō kay kūyjobit'ūm ip puye. Adão kūyjobit'ūm pima, soat ixe ebekitkiyū dak kūyjobit'ūmayūm o'e Deus xe. Imēneju soat ipi watwat ikērēat kuḡ o'e Deus xe pūḡ aḡokatkat ikērēat o'gūjurūg̃ puye.

Soat Adão ebekitkiyū ixe buxim o'e- -ikērēat kuḡ. Imēnpuxim Jesus Cristo kay itabucayū ixe buxim e'em- -ikērēat kuḡ ḡu. Ixe Jesus Cristo oe'ū ikērēat uk am ipi watwat pewi- -soat uk am. Imēnpuye soat em itait jeedop ip Deus xe cekay itabucayū. Adão kūyjobit'ūm o'e Deus a'ō kay. Imēnpuye soat ixe naxeḡebitbit je'ū'ūm. Jesus Cristo bit kūyjobit osunuy Deus a'ō kay. Imēnpuye soat em Deus xe itait jeedop ip cekay itabucayū. Pūḡ aḡokatkat kūyjobit'ūm osunuy Deus a'ō kay. Imēnpuye adeayū ikērēat mujurūgrūg̃'ukayūm o'e Deus xe. Kūyjobit'ūm cīcā ip osodop Adão buxim. Wara'at pit kūyjobit cīcā osunuy Deus a'ō kay. Imēnpuye Deus je'e adeayū be:

— Eyju cūḡ ma oxe — i.

Ixeyū adeayū kūyjobit Jesus Cristo buxim. Jewejojo'i ḡu bit osodop ip Adão Cristo eju. Jesus xipan wuykuḡ warara'acat podi ma. Ade Adão ebekitkiyū bit o'ju ipiat'ajojoap pe ixe pūḡ em ma ikērēat o'gūjurūg̃ puye. Deus pit soat podi ma xipan wuykuḡ. Imēnpuye Cristo o'ḡudot ikērēat uk am soat pewi- -ijodiacat pewi. Deus tei'ūma adeayū daxijojom ijodiacayū daxijojom, pūḡ em ma Cristo oe'ū buye. Adão pūḡ ma osunuy. Soat ixe ebekitkiyū ikērēat mujurūgrūg̃'ukayūm o'e Deus xe, Adão ikērēat o'gūjurūg̃ puye.

— Ikērēat kuḡ eyju oxe — i'e'em Deus soat pe Adão ebekitkiyū be Adão pūḡ em ikērēat o'gūjurūg̃ puye. Deus e'em taxijo'ibiyū be bit:

— Ikērēat kuḡ ḡu eyju oxe — i, ade em ma'ḡu ip ikērēat o'gūjurūg̃rūg̃. — Webekitkiyū eyju — i'e'em cebe ip, ixe xipat wuykay buye. Pūḡ aḡokatkat imēn ikērēat o'gūjurūg̃- -Adão. Imēnpuye soat wuye'ū'ē ace. Wara'acat pit ikērēat kuḡ

ġu oe'ū- -Jesus Cristo. Imēnpuye soat podi ma Deus xipan wuykuġ.

— Cūġ ma eyju oxe — i'e'em wuywebe- -Jesus Cristo kay itabucayū be.

Imēneju soat em wuyetait acesop Deus xe. Soat kukukan acesop Cristo eju. Jesus e'eap Adão e'eap podi ma xipacat kuġ.

²⁰ · ²¹ Imēntak Deus jekawēn o'ġuwēn Adão ebe-kitkiyū mukūyjo am eyju ikērēat mujurūġrūġ cīcā iam. Ipi watwat pit biġ ma ikērēat o'ġujurūġrūġ. Soat ipi watwat je'ū'ūm ikērēat mujurūġrūġ puye. Je'ū buje ip wūy ma dopdom Deus wi. Deus pit warara'acat podi ma xipan wuykuġ. Ixe Cristo o'ġudot ce'ū ām ikērēat uk am wuywebewi. Imēnpuye wuye'ū buje soat wuyju Deus xe wuyetait acesop, wuykukukat Jesus Cristo kay wuyetabun puje. Wuykukukat Jesus Cristo xe ma acesop soat em wuyetait.

6 — Deus pit biġ ma xipan wuykuġ biġ ma'ġu wuyju ikērēat mujurūġrūġ — i ōn e'em eywebe.

Imēnpuye:

— Biġ ma juy ikērēat aġujurūġrūġ, biġ ma Deus xipan wuykuk am — i du eyju e'em owebe?

² Imēn ġu juy e'em! Ce'ūat jepidowatwan ġu o'e. Imēnpuxim wuyju dak ikērēat mujurūġ pin ġu ace'e Cristo kay wuyetabut puye. ³ Wuymubatisan puje, ġasū bit Jesus Cristo eju mūġ'i ojeku iap mubapukpuġ wuyju soat pe wuyjojoayū be. Ikērēat muġēġēap acepere kuy apēn ce'ūat jepidowatwanap epererem. Kuy eyetaybit iboam. ⁴ Jesus eju kuy ip wuykot iap puxim ikērēat muġē pin ġu ace'e, ceweju kuy aje'ū iap puxim tak. Iboap mubapukpuġ wuyju wuymubatisan puje. Cristo oe'ū jebay bikuyap taġ. Wuyju dak Jesus Cristo bikuyap taġ ajeku ġasū bit. Ja'ōbacaan Deus ixe waram o'ġutait. Soat podi ma Deus ya'ōbaca, idip tak. Jesus puxim wuyju dak acejetait waram. Imēneju ġasū dak wuyaġuy'isum ajeku.

⁵ Imëntak Cristo jekpiwatpin ma oe'û korosa be. Imēnpuxim wuyju dak wuyukpiwatpin ma ikērēat aḡujurūḡ ḡu. Deus ja'ōbacaap o'jomōḡ Cristo be waram imutait puje. Imēnpuxim wuyju dak Cristo a'ōbacaap kuḡ ḡasū. Ikērēm cuk adi ajekuku iap kuy juk acepere. Wuyaḡuy'isum wuyju jekukum ḡasū bit ixē a'ōbacaap kuḡ puye. ⁶ Kuy bima juk adi ikērēat aḡujurūḡrūḡ. Soat em ikērēat mujurūḡrūḡ'uk cuk adi ajop. Imēn jewemudadaybotbon cuk adi ajekuku. Cekariwa be imudadaybotbot'ibit enapōn pa'oreap puxim ikērēat mujurūḡrūḡap epereap pa'ore osunuy wuywebe. ḡasū bit ikērēm cuk adi ajekuku iap acepere Jesus a'ōbacaap kuḡ puye. Korosa be Jesus oe'û ja'ōbacaap muōm ām wuywebe ikērēat mujurūḡap puxim. Imēnpuye ikērēat aḡujurūḡ ḡu ḡasū bit. ⁷ Ikērēat mujurūḡrūḡap epere but wuywebe. Ce'uat jepidowatwanap epereperem. Imēnpuxim wuyju dak ikērēat mujurūḡrūḡap acepere kuy. Cekariwa be imudadaybotbot'ibiyū buximayū ḡu wuyju ḡasū bit. ⁸ Cristo jekpiwatpin ma oe'û. Wuyju dak wuyukpiwatpin ma ikērēm cuk adi ajekukuiap acepere. Imēneju wuyeta-but soat em wuyetaait acesop Cristo xe iap kay. ⁹ Deus Cristo waram o'ḡutait ce'ūap tomukadi. Waram pit je'û ḡu. Abu-be ixē imuy'û but? Ka'ūma be ma! Kuy wuyetaybit iboam. ¹⁰ Pūḡ em ma ixē oe'û. Oe'û ikērēat uk am soat pewi wuywebewi. Waram pit je'û ḡu. ḡasū bit itabēḡ omuy soat em Deus bikuyap taḡ jeku am.

¹¹ — Ikērēm cuk adi ajekukuiap kuy acepere — i juy epe'e'e eyewewebe. — Ikērēat aḡujurūḡ ḡu ḡasū bit — i juy epe'e'e. — Ce'uat ḡebum ḡu o'e ikērēat muḡēap kay — i. — Wuyju dak cuy ḡebum ḡu ace ikērēat muḡēap kay — i juy epe'e'e eyewewebe. — Deus bikuyap taḡ acā ajeku ḡasū bit — i juy epe'e'e eyewewebe. — Mūḡ'i wuykukukat Jesus Cristo eju ajeku ḡasū bit — i juy epe'e'e eyewewebe.

¹² Imēneju ḡebum ḡu juy epesop ikērēat mujurūḡrūḡap kay. Ikērēat epeḡuḡē ḡu eyjebit taḡ. Ikērēat epeḡuḡē ḡu eybinūnpe. Eybikuyap taḡ ḡu juy epeku- -Deus bikuyap taḡ acā. ¹³ Ikērēat mujurūḡrūḡ'ukayū cucum ipiat'ajojoap kay. Yaḡuy'isum jekuku'ukayū

bit kabi kay cucum. Kuy bima ikērēat mujurūg-rūg'uk cuk adi epesop. Gasū bit eyağuy'isum eyju jekukum. Imēnpuye:

— Ēn ocejukan — i'ūmğu juy epe'e Satanás pe. — Ikērēat oceğujurūg a'ōbi — i'ūmğu juy epe'e Satanás pe ma. Deus pe bit:

— Ēn acā ocejukan soat em — i juy epe'e. — A'ōbacaap cuy eğuōm ocewebe cūg ma oceku am — i juy epe'e cebe.

¹⁴ Gasū bit cūg ma wuyju Deus xe kuyat ekawēn tağ wuyju jekukum puye ğu- -Deus xipan wuykuğ puye acā. Imēnpuye ikērēat ağujurūg ğu.

— Ēn ma ocejukan — i'ūmğu ace'e Satanás pe.

¹⁵ Gasū bit cūg ma wuyju Deus xe kawēn kuyat tağ wuyju jekukum puye ğu- -wuyawēwēap ekawēn tağ wuyju jekukum puye ğu dak. Deus xipan wuykuğ puye acā wuyju cūg ma Deus xe. Imēnpuye:

— Ağūgē juy waram ikērēat! — i du eyju e'em? Imēn ğu juy e'em! ¹⁶ "Ocekariwam cuy ece" i ey'e buje ağokatkat pe, eyekariwam je'e. Kūyjobin epesop ya'ō kay. Eyekariwa epeyepere ğu ikukpin cīcā eyxe buye. Imēnpuxim ikērēat mujurūg-rūg'ukayū ikērēat muğēap epereperem ğu, ikērēat kay jījā ip puye. Imēnpuye soat em Deus wi wūy jeedop ip je'ū buje. Deus a'ō kay kūyjobicayū bit cūgat ekawēn epereperem ğu Deus a'ō kay jījā ip puye. Imēnpuye cūg ma ip Deus xe. Deus xe itait jeedop ip je'ū buje. Kuy eyetaybit cīcā iboam. ¹⁷ Kuy bima juk adi Satanás a'ō kay kūyjobit epesop. Kawēn idipat co buje bit, eyetabun epesop iboap ekawēn kay. Iboap ekawēn icēmān. Eycokcoğ epesop iboap ekawēn kay am. Eybikuy jījā iboap ekawēn tağ jeku am. Imēneju:

— Bay, ēn xipat cīcā — i oceju e'em Deus pe.

¹⁸ Deus kuy ja'ōbacaap o'ğuōm eywebe waram Satanás a'ō kay kūyjobicap puxim. Gasū bit Deus a'ō kayayūm epesop. Eybikuy epesop ikērēat muğē ām ğu- -xipacat muğē ām acā. ¹⁹ Kawēn ibapukan ōn kawēnwēn eywebe, apēn ikērēat acepere wuyağuy'isum wuyeku am iap iba'arēm eyxe buye. Kuy bima juk adi ikērēat kay ğebum epesop. Ikērēat mujurūg-rūg

cuk adi epekuku. Xipat'ūmayū kukukat a'ō kay kūyjobin epesop. Ġasū bit cūġ ma juy epeku. Xipacat kay juy ġebum epesop. Deus a'ō kay juy kūyjobin epesop.

²⁰ Ikērēat mujurūġrūġ'uk pima, Deus bikuyap taġ ġu epeku. ²¹ Xipacat tu epejat ikērēat mujurūġrūġap-teim? Ka'ūma! Eyetaybit ikērēat mujurūġrūġ'ukayū soat em Deus wi wūy ma jeedop ip iam. Ġasū bit eysūsūn epe'e ikērēat mujurūġrūġ'uk puye. ²² Deus a'ō kay kūyjobicayūm epesop ġasū bit. Deus kuy ja'ōbacaap o'ġuōm eywebe waram ikērēat muġēap puxim. Soat em eyju ixē mucokcokcoġ ġasū bit. Eye'ū buje soat em Deus xe eyetai epesop. ²³ Kapik-pik'ukat jekapikapteim bubum. Imēnpuxim ikērēat mujurūġrūġ'ukat Deus wi wūy ma jeenuy je'ū buje. Ixē wi wūy ma jeenuy ikērēat o'ġujurūġrūġiap teim.

— Soat em oxe eyetai epesop — i'e'em Deus wuywebe bit, wuykukukat Jesus Cristo eju mūġ'i wuyju jekukum puye.

Soat em ixē xe wuydopap tei'ūmat co'i. Kapikpiġ ġu wuyju iboap pu am. Tei'ūma Deus iūmūm wuywebe.

7 Okitpitpiyū, eyetaybin put apēn ōn em iam eyetaybit wuyawēwēap ekawēn puye. Wuyetabēġ pima acā wuyawēwēap ekawēn taġ wuyju jekukum. Wuye'ū buje bit iba'ore e'em. ² Imēnpuxim “Ayacat itoptep pima, jektop xe ma juy jeenuy itop itait pima” i'e'em iboap ekawēn. “Ektop eperem ġu juy wara'at pu am” i'e'em iboap ekawēn. Itop e'ū buje bit, ite ayacat itoptep'ūmat co'i e'em. Wuyawēwēap ekawēn mupubutbun ġu wara'at pu buje itop'ūm kuy oe'ū buye. ³ Wara'at pu buje jektom koapat itop itait pima bit, ikērēat muġēġēm koapat pe jektop pe. Itop'ūm e'ū buje bit, ayacat ikērēat muġēġēm ġu wara'at pu buje. Wuyawēwēap ekawēn kuka o'ġupubun ġu wara'at pu buje. ⁴ Okitpitpiyū, ixē ayacat puxim eyju. Wuyawēwēap ekawēn koapat'ūm itop'ūm puxim -kawēn kuyat. Jektop'ūm e'ū

buje jektop eju ġu e'em ayacat. Imēnpuxim wuyju dak kawēn kuyat taġ ġu wuyju jekukum ġasū bit, Jesus Cristo ekawēn taġ acā. Ixe ekawēn taġ wuyju jekukum wuyju Cristo jebit'in puye. Ixe ebekitkiyūm acesop ġasū. Deus waram ixē o'ġutait. ⁵ Kuy bima wuyekpiwatpin ma juk adi ajekuku. Imēnpit wuyawēwēap ekawēn co buje, wuybikuy juk adi ajop- ikērēat mujurūġ ām acā. Wuybu'u juk adi ajop kūyjobit am iboap ekawēn kay. Ikērēm wuyekuap epere'ūm pima, wūy ma kuka juk ajop Deus wi. ⁶ Kuy bima wuyawēwēap ekawēn taġ cuk adi jeku ojuy ajop correntebum taomūnmūnat puxim. Ġasū bit Jesus oe'ū wuywebeam. Imēnpuye ġasū bit Deus bikuyap taġ wuyeku but. Ixe bikuyap taġ wuyju jekukum ġasū, "Obikuyap taġ cuy epeku" iap ibararak **opop** kawēn kuyatup pe buye ġu- -ixē biōġbuk wuymuisusun puye acā.

⁷ — Kawēn kuyat pit ikērē — i du ace'e? — Wuyawēwēap ekawēn pit ikērē — i du ace'e? Imēn ġu juy ace- -pūġ em tak ka'ūma. Wuyawēwēap ekawēn cuk adi omutaybitbin apēn ikērē Deus xe iam. Wuyawēwēap ekawēn wuymutaybitbin eyetabikukum ġu juy epesop warara'acat pubut kay iam. Iboap ekawēn co'ūm pima, kuka juk wuyetaybit ġu ikērē Deus xe wuyetabikukuap iam. ⁸ Iboap ekawēn co buje bit, wuyetaybit cuk ace ikērē Deus xe wuyetabikukuap iam. Imēnpit biġ ma juk adi wuyetabikukum ace warara'acat pubut kay iboap ekawēn cocom ma'ġu wuyju. Iboap ekawēn wuyetaybit'ūm pima, wuyetaybit ġu kuka ace apēn ikērē Deus xe iam. ⁹ Kuy bima ōn tak wetaybit ġu juk adi oġuy wuyawēwēap ekawēn. Tūybe xipat cīcā ōn Deus xe iān cuk adi oce. Iboap ekawēn wetaybin puje bit, ikērēat kuġ ōn Deus xe iam tak wetaybit oce. ¹⁰ Deus ibikuy osunuy soat ipi watwat pe top am ip soat em jexe itait. Imēnpuye jekawēn o'ġuwēn wuyawē ām. Imēnpit ikērēat kuġ ōn iam wetaybin puje:

— Iba'ore owebe Deus xe onuy ām ikērēat kuġ puye — i juk oce owebe ma. — Wūy ma oġuy Deus wi soat em, ikērēat kuġ puye — i juk oce owebe ma.

¹¹ Tūybe xipat ōn Deus xe iān cuk adi oce kuy bima. Imēnpit ikērēat mujurūgrūg'uk cuk adi oğuy. Imēn cuk adi ocevemuğuykuku, ikērēat mujurūg ojuy buye. Wuyawēwēap ekawēn wetaybin puje bit, "Ikērēat kuğ ōn Deus xe" i juk oce owebe ma.

— Wūy ma oğuy cewi — i juk oce owebe ma.

¹² Inaka iboap ekawēn xipat- wuyawēwēap ekawēn. Ikērēat kuğ ğu. Soat ekawēn tağ xipat. Cūğ cīcā iboap ekawēn. Cekawēntip cīcā dak. ¹³ Wuyawēwēap ekawēn wetaybicap tomuju ğu Deus wi wūy ma oğuy. Soat em ōn ikērēat kuğ iap tomuju acā cewi wūy ma oğuy. Iboap ekawēn xipat cīcā. Imēnpit iboap ekawēn wuymutaybitbin soat ipi dağacat ikērēat mujurūgrūg iam. Iboap ekawēn wetaybit'ūm pima, tūybe xipat ōn Deus xe iān cuk adi oce. Iboap ekawēn wetaybin puje bit, "Ikērēat kuğ ōn Deus xe," i juk oce owebe ma.

¹⁴ Wuyetaybit Deus jebiōğbuk a'ōbi wuyawēwēap ekawēn o'ğuwēn wuywebe iam. Ōn pit ijodiat ma. Obuyxi ğu ōn pit. Ikērēat mujurūgrūg'ukat ōn pit. ¹⁵ Xipacat mujurūg pin ma'ğū oxē. Ōn pit xipacat mujurūgrūg ğu. Ikērēat mujurūg pin ğu ma'ğū oxē. Ōn pit ikērēat mujurūgrūg. Wetaybit ğu apēnpuye imēn ōn jekukum iam. ¹⁶ E bu'uap tağ ōn jekukum obu'u ma'ğū jekum. Imēnpuye wetaybit wuyawēwēap ekawēn cūğ ma iam. Cūğ ğu ma'ğū ōn pit iam tak wetaybit. ¹⁷ Imēneju okpiwatpi ğu ōn ikērēat mujurūgrūg. Imēnpit ikērēat opop obinūnpe. Imēnpuye obinūn pewi ma ōn ikērēat mujurūgrūg. ¹⁸ Wetaybit ka'ūmğū xipacat opop owebe iam. Obikuy jījā xipacat mujurūg ām. Inaka xipacat mujurūg pa'ore owebe. ¹⁹ Imēn obikuy jījā xipacat mujurūg ām. Inaka imujurūgrūg ğu ōn. Obu'u jījā ikērēat mujurūg ām. Inaka soat em ma imujurūgrūg ōn. ²⁰ E bu'uap tağ acā ōn jekukum. Okpiwatpi ğu ōn ikērēat mujurūgrūg. Ikērēat mujurūgrūg ōn ikērēat opop obinūnpe buye.

²¹ Xipacat mujurūg ojuy bima, imujurūg pa'ore owebe xipat'ūmat opop obinūn pe buye. Imēğap ibapuk cīcā oxē. ²² Deus ekawēn kay jījā ōn- soat eka-

wën kay jĳā- -wuyawēwēap ekawën kay jĳā. ²³ Obikuy jĳā ma xipacat mujurūg ām. Imēnpit:

— Ikērēat oġujurūg ojebin — i ōn e'em owebe ma, ikērēat opop obinūnpe buye.

Taomūnmūnat puxim ōn. Taomūnmūnat pe iba'ore ijēm ām daomūnmūnap'a bewi taomūnmūn puye. Imēnpuxim xipacat mujurūgrūg pa'ore owebe obaca'ūm puye. ²⁴ Imēnpuye oġuycūg cĳā. Abu kuka omubacan owebe ikērēat mujurūgāp puxim- -soat em ipiat'ajojoap pe onuyap puxim? ²⁵ Wuykukukat Jesus Cristo soat podi ma ya'ōbacaat. Ixe ma juy omubacan. Imēnpuye:

— Ēn xipat cĳā — i ōn e'em Deus pe.

Kūyjobit cĳā ōn e ojuy Deus a'ō kay. Ōn acā bima bit, kuka juk ikērēat acā oġujurūg- -Jesus Cristo a'ōbacaap kuġ'ūm pima.

8 Imēneju Deus Jesus Cristo eju mūg'i jeku-ku'ukayū ġuju ġu ipiat'ajojoap kay. ² Deus cuk ja'ōbacaap o'ġuōm wuywebe waram ikērēat muġēap puxim. Imēn Ibiōgbuk Xipacat wuymuisusun, wuyju Jesus Cristo eju mūg'i jekukum pima. Imēneju aceju ġu ipiat'ajojoap kay. ³ Iba'ore wuyeku am wuyawēwēap ekawën taġ, wuya'ōbaca'ūm puye. Imēnpuye ka'ūma ma cūg ma Deus xe iboap ekawën taġ jekuap tomuju. Deus pit jekpot o'ġudot ijodi. Ijodian o'e. Ikērēat mujurūgrūg'ukat co'ian o'e, ikērēat kuġ ġu ma'ġu. Imēn ixē wuywebewi ikērēat ukaptei o'teida je'ū buje. O'teida ja'ōbacaap ūm ām wuywebe ikērēat muġēap puxim. ⁴ Imēn o'teida wuywebe wuyawēwēap ekawën taġ wuyeku am. Ġasū wuya'ōbacaap kuġ ġu wuyju jekukum- -Deus a'ōbacaap kuġ acā. Ibiōgbuk Xipacat a'ō daġ tak wuyju jekukum. Imēnpuye wuyeku but wuyawēwēap ekawën taġ. ⁵ Jebikuyap taġ jekuku'ukayū ma soat em ġebum jemukaypinut kay acā. Deus biōgbuk bikuyap taġ jekuku'ukayū bit Ibiōgbuk yaġuydadam ip. ⁶ Imēn soat em jemukaypinut kay ġebumayū soat em ipiat supi'ajojo. Wūy jeedop ip Deus wi je'ū buje. Ibiōgbuk

yağuydada'ukayū bit yağuy'isum jeku ijodi. Yağuy-babi ip jeku ijodi- -yağuykorereren ġu. Soat em Deus xe jeedop ip je'ū buje. ⁷ Jemukaypinput kay ġe-bumayū bit itakoma e'em Deus kay. Kūyjobit ġu ip Deus ekawēn kay- -wuyawēwēap ekawēn kay. Iba'ore ma dak ixeyū be kūyjobit am iboap ekawēn kay. ⁸ I-ba'ore jebikuyap tağ jekuku'ukayū be Deus mucok-cok am.

⁹ Eyju bit eybikuyap tağ ġu jekukum. Deus biōğ-buk bikuyap tağ eyju bit jekukum ġasū ixē biōğbuk eywebe bima. Cristo biōğbuk kuğ'ūmayū cebekitkiyū ġu. ¹⁰ Cristo biōğbuk kuğ pima, Cristo omuy eywebe iap puxim. Inaka eyjebit je'ū'ūm cuk adi ikērēat epeğujurūğrūğ puye. Deus biōğbuk pit waram jeymutait soat em Deus xe eyetait eydop am eyjebit e'ū ma'ġu. Ixe waram jeymutait "Eyju cūğ ma oxe," i juk o'e Deus eywebe buye. ¹¹ Deus ma waram Jesus Cristo o'ğutait. Eyju dak Deus biōğbuk kuğ pima, Cristo mutaicap puxim waram jeymutait eye'ūap to-mukadi. Eyjebit ġuyu ce'ū'ūayū dopdopap pewi. Ii-suat je'ğūm eyjebin. Deus jebiōğbuk a'ōbacaan iboap je'ğūm eywebe- -xipacat a'ōbacaan.

¹² Okitpitpiyū, imēn Deus xipan wuykuğ. Imēn-puye wuybikuyap tağ ġu juy ajeku. Wuyemukaypin-put kay ġu juy ġebum ajop. ¹³ Wuybikuyap tağ jeku-kum pima, wuyemukaypinput kay ġebum pima dak, wūy ma acesop Deus wi. Ipiat'ajojoap kay aceju. Deus biōğbuk a'ōbacaan ikērēat mujurūğrūğ'ūm pima bit soat em cexe acesop wuyetait. ¹⁴ Soat Deus biōğ-buk a'ō kay kūyjobicayū Deus ebekitkiyū. ¹⁶ Deus je-biōğbuk o'ğūōm wuywebe. Ixe biōğbuk wuymudaday-botbon ġu, wuymuparararan ġu dak. Ixe wuymuy Deus ipotpoyūm. Imēnpuye:

— Bay — i wuycokcoğ wuyju e'em Deus pe, ixē biōğbuk a'ōbi. ¹⁶ — Bay — i wuyju e'em cebe, wuyetaybit puye Deus ebekitkiyū wuyju iam.

Ixe biōğbuk tak:

— Eyju Deus ebekitkiyū — i'e'em wuywebe.

¹⁷ Imēn Deus ebekitkiyū wuyju. Imēnpuye wuyju dak jebekitkiyū be o'ğuxipaniat'in ajat. Jekpot pe o'ğuxi-paniat'in wuyju dak ajat Cristo eju. Deus kay'ūmayū

bit ipiat supi'ajojoat wuywebe Cristo a'ō kay wuyju buye. Guyjom pit Cristo dipap kuḡ acesop. Cristo soat kukan pima bit wuyju dak soat kukukayūm acesop ixe eju, ipiatpi'ajojom ma'ḡu wuyju ijodi.

¹⁸ Ipiat'ajojom ma'ḡu wuyju ijodi bima. Guyjom pit xipat cīcā acesop. Ka'ūma ma ibo jo'iat xipacat. Imēnpuye wuyaḡuykorereren ḡu juy ajop ipiat'ajoap puxim. ¹⁹ "Teyūku webekitkiyū" i Deus eap wiwim cīcā soat cemumuḡēyū. "Okpot co'i ip ḡasū bit" i'eap wiwim cīcā ip. ²⁰ - ²¹ Soat Deus emumuḡē je'ū'ūm. Imēn ixe emumuḡēyū te'e am ma o'e. Jekpi-watpi ḡu ip te'e am o'e kuy bima. Te'e ma o'e ip Adāo ikērēat o'ḡujurūḡ puye.

— Te'e am jeedop ip ḡasū wemumuḡēyū — i mo o'e Deus.

Inaka Deus soat ḡuisun iap wiwim cīcā ip. Ixe ebekitkiyū Jesus Cristo jo'i bima, Deus soat jemu-muḡēyū ḡuisun. Imuisun puje, je'ū ḡu ip. ²² ḡasū mabuk soat ma ipi daḡayū ipiat'ajojom imuisun'ūm puye. Ipiat'ajojom ip ayacat je'it piap o'supi'ajo'iat co'i. ²³ Wuyrem. Wuybipuruḡ. Wuyewātaxipim. Xipat'ūmat jebapukpuḡ wuywebe. Imēneju je'ūhu'ūm wuyju dak. Imēnpit Deus jebiōḡbuk o'ḡuōm wuywebe wuymutaybit am Jesus Cristo jo'iyūm epesop iam. "Teyūku okpot co'iyū" i Deus eap wiwim cīcā wuyju. Wuyjebit ḡuisuniap wiwim cīcā dak wuyju. ²⁴ Wuymuisunap wiwim mabuk wuyju. Wuydaxijo buje, wuyetaybit ajop Deus ḡuyjom wuymuisun iam. Wuyemumuwiwi bu buje kuka juk iboap ajowiwi ḡu. Abu kuy o'jatiat wiwim? Ka'ūma ma! ²⁵ Imēnpit ijo'ibit'ūmat wiwim wuyju. Imēnpuye wuyukpiceḡēm ḡu wuymuisunap wiwim.

²⁶ Imēnpuxim Deus biōḡbuk kawēnwēn Deus eju wuywebeam. Wuybikuyap muwēnuwēn cebe.

— Apēn xe'e acejekawēn Deus eju? — i wuyju e'em. — Apēn xe'e acejoojuy cexewi? — i dak wuyju e'em.

Ceweju jekawēn ām wuyetaybit'ūm pima, je'ūhu'ūm acā wuyju. Deus biōḡbuk pit wuybuywatwan wuywebe jekawēn ām ceweju. Ixe wuya'ōmucanucan

wuya'òbaca'ùm puye. ²⁷ Deus bikuyap tağ ixe biög-buk kawênwên Deus eju cebekitkiyû beam. Deus itaybit wuyağuyda am. Itaybit ajo-kuğ ġu wuyju iam. Itaybit tak ajo-ùm ojuy jebiög-buk wuywebe iam. ²⁸ Deus xe wuykukpin cîcâ. Jebikuyap tağ cuk wuy-naê jebekitkiyûm. Imênpuye soat wuywebe je'ba-pukiap xipat je'e wuywebe ixe a'òbi. ²⁹ Deus itaybit osunuy abuyû webekitkiyûm je'e iam ipi mujurûğ awap.

— Okpot ixeyû wağôm je'e — io'e kuyje. — Ade okpot kitpitpiyûm je'e — io'e.

Ixeyû ma o'tomuwâ jekpot co'iaiyûm. ³⁰ Imên tomu-wâ'ibiyû o'taê jebekitkiyûm.

— Eyju cûğ ma oxe — i'e'em taê'ibiyû be. — Okpot co'iaiyûm epesop — io'e imucûğ'ibiyû be. Deus dipap kuğ acesop. Imêneju soat wuywebe jeba-pukiat xipat je'e wuywebe Deus a'òbi, Deus ikukpin wuyxe buye.

³¹ Soat xipat je'e wuywebe iap kay ġebum pima apên xe'e ace'e? Deus wuywebe ja'òbacaap ùm puje, te'e ma je'e wuykaykay kûyjobit'ûmayû. ³² Deus jekpot o'taxijo ġu yaokaap puxim. O'ğudot ma ijodi ce'û âm soat peam wuywebeam. Ixe dak tacup xe'e je'e ġasû soat ùm âm wuywebe- -xipacat ùm âm? Tacup ġu je'e! ³³ Deus ma e'em wuywebe:

— Ikêrêat kuğ ġu eyju oxe — i.

Imênpuye abu kuka o'e wuywebe: — Ikêrêat kuğ eyju Deus xe — i- -Deus emunaëyû be? Ka'ûma ma! ³⁴ Jesus Cristo kuy oe'û ikêrêat mujurûğrûğap teida am. Imênpuye ka'ûma be ma "Ikêrêat cuk adi epeğujurûğrûğiaptai juy epeteida," i'e but wuywebe. Ixe dak waram ġuto o'jetait. Deus xe ġasû omuy. Deus a'òbacaap co'i ixe ya'òbaca. Ixe dak kawênwên Deus eju wuywebeam. ³⁵ Ijodiat pe Cristo mubu'un pa'ore ikukpin wuykuk am. Itabut'ûmayû aco'i ikê-rêm wuykuk. Ipiat aco'i ip supi'ajoat wuywebe. Wuymunapôn aco'i ip wuyka bewi. Wuyrem aco'i aceku. Wuydadaybot aco'i aceku. Wuyaoka pinap co-com aco'i aceku. Wuyaoka ip aco'i pajam. Ka'ûma

be bit Cristo mubu'un put ikukpin wuykuk am. ³⁶ Imên e'em Deus ekawên tup:

Ocaoka pinap cocom oceju soat kabia, ebekitkit oceju buye, i.

Ovelha kukap puxim ip ocekuğ-yaokam pimaap puxim, i.

Ibo dup ekawên puxim xipat'umat jebapukpuğ wuywebe. ³⁷ Inaka wuya'øbacaap mu'um pa'ore ip. Soat em wuycokcoğ acesop ipiat'ajojom ma'ğu wuyju, Cristo xe wuykukpin puye; ixé wuya'ômucanucan puye dak. ³⁸ Imên wuyetaybit cîcâ ka'uma be ma Deus mubu'un put ikukpin wuykuk am. Wuye'û buje, ixé xe wuykukpin acesop, wuyetait pima dak. Deus ekawên tojotjot'ukayû be ixé mubu'un pa'ore xipan wuykuk am- -kûyjobit'ûmayû be. Iecuçcuğapap pe dak ixé mubu'un pa'ore xipan wuykuk am- -ijodiacayû- -kûyjobit'ûmayû. Kabi watwat pe dak ixé mubu'un pa'ore xipan wuykuk am- -kûyjobit'ûmayû. Ka'uma ma ixé mubu'un ġasû. Guyjom tak ibu'u ġu je'e xipan wuykuk am. ³⁹ Ixe ibu'u ġu xipan wuykuk am wuyju um pima, badi bima dak. Deus xe wuykukpin cîcâ, wuykukukat Jesus Cristo kay wuyetabut puye. Imênpuye ka'uma be ma, Deus emumuğê be ma ixé mubu'un put xipan wuykuk am.

9 ¹⁻² — Oğuycûğ cîcâ obadipyû kay- -Judeuyû kay — i òn e'em.

Imu'um pa'ore ma oğuycûğap. Icêmân òn e'em eywebe. Cristo kay wetabut. Imênpuye napapa'uk ġu òn. Ibiòğbuk xipacat omuy owebe wağuy mucûğucûğ. Imênpuye napa ġu òn e'em:

— Oğuycûğ cîcâ obadipyû kay- -Judeuyû kay — i.

³ Obikuy jîjâ Deus pe okitpitpiyû mutabun am Jesus kay. Obadipyû ip. Pûğ ma ocedobu bit.

— Bay, wûy ma oğuy Cristo wi soat em ipiat'ajojom ewebe obadipyû daxijoap teim — i òn e ojuy aco'i Deus pe.

⁴ Obadipyū Israel naxeḡebitbit. Kuyje:

— Eyju webekitkiyū — io'e Deus cebe ip. Deus ixeyū o'jomuy jebekitkiyūm. Deus jedipap o'ḡūm cebe ip jewejo'i i'e am.

— Xipan ōn jeykuk — i juk adi o'e'e Deus cebe ip. — Ade jījā je'e ip enaxeḡebitbiyū — i juk adi o'e'e cebe ip. — Ipi oḡūm eyipim — i juk adi o'e'e. Jekawēn o'ḡuwēn Moisés pe ixeyū awē ām. Icēmān ip Deus mubuyxixin.

— Eynaxeḡebit ma otaē ipi daḡayū daxijojo'ukan — i juk adi o'e'e Deus cebe ip.

⁵ Israel ipotpot naxeḡebitbiyū ip- -doze beayū naxeḡebitbiyū. Ijodi ikap puje Cristo dak ixeyū badim o'e. Ixe Cristo soat podi ma ya'ōbacaat.

— Soat podi ma ēn a'ōbuyxi — i juy acece cebe.

Soat em ma juy imēn acece.

⁶ Deus ja'ō daḡ ḡu e'em, xepxep ā Judeuyū itabut ḡasū Deus kay buye — i'ūmḡu juy ace.

Soat ḡu Israel naxeḡebitbit Deus emunaēyū- -pūḡpūḡ ā. ⁷ Soat ḡu Abraão naxeḡebitbit tak taxeḡebitbicat Deus xe- -pūḡpūḡ ā.

— Pūḡat taxeḡebitbit acā enaxeḡebitbicat oxe- -Isaque naxeḡebitbit acā — i juk o'e Deus Abraão be.

⁸ Imēneju wuyetaybit soat ḡu Abraão naxeḡebitbit Deus o'taē jebekitkiyūm iam. Deus a'ō daḡ o'kapiat taxeḡebitbit acā Deus ebekitkiyū. Wara'at taxeḡebitbit pit ka'ūma.

⁹ — Wara'at koato dak oajēm ekay ija ekaxi ma — i mo a'ḡu o'e Deus. — Ija ekaxi ma Sara i'it'et je'e — i juk o'e Deus Abraão be.

Imēn Deus o'jekawēn Abraão be.

¹⁰ Wara'at ekawēn tak oḡuwēn eymutaybit am soat ḡu Deus o'taē- -pūḡpūḡ ā iam. Deus o'jekawēn Rebeca eju xepxepayū yuk pe bima- -wuydobu Isaque ipotpoyū yuk pe bima.

^{11 - 12} — Iwaḡo kūyjobit jeenuy jekitpit a'ō kay — io'e Deus Rebeca be xepxepayū yuk pe bima.

Xipat'ūmat o'ḡuḡē ḡu buk ip- -xipacat tak ka'ūma. Deus pūḡ ma jebekin o'taē. Wara'at pit ka'ūma. Apēn kuy bima jewaḡuyḡuy osunuy iap taḡ o'taē.

Apên ixeyū juk adi oekuku iap tomuju ġu o'taē. Jebikuyap taġ acā o'taē. ¹³ Imēn e'em Deus ekawēn tup: Jacó ikukpin o'e oxe, Esaú bit ikukpin ġu oxe o'e, i.

Imēn o'tupmubararak ip Rebeca iyū muwēnuwēn.

¹⁴ Pūġ ma o'taē, wara'at pit ka'ūma. Imēnpuye:

— Deus cūġ ġu — i du ace'e?

Imēn ġu juy ace! ¹⁵ Imēnpuye:

— Wetabotaidabotbot pin pima, wetabotaidabotbon oce — io'e Deus Moisés pe. — Obu'u bima bit, wetabotaidabotbon ġu oce — io'e cebe. Imēnpuye:

— Wemukaypinpucayū kay acā wetabotaidabotbon oce — io'e Deus Moisés pe.

¹⁶ Imēn Deus itabotaidabotbot wuykay “Etabotaidabotbon cuy eġuy oce kay,” i wuyju e'eap tomuju ġu, wuyju xipacat mujurūġrūġap tomuju ġu dak. Ixe itabotaidabotbon wuykay, itabotaidabotbot pin puye acā. ¹⁷ Imēn e'em Deus ekawēn tup- -Faraó be kuyje o'jekawēn iaptup- -Egito eipi kukukat pe o'jekawēn iaptup:

“Ōn ma juk emuy adeayū kukan,”

io'e Deus, i. “Ade em wa'ōbacaap

oġubapukpuk etabutpe,” io'e Deus, i.

“Imēnpuye soat kaka watwat itaybit

je'e obuten. Itaybit ip je'e Deus soat

podì ma ya'ōbacaat iam,” i'e'em

Deus, i.

Imēn e'em Deus ekawēn tup. ¹⁸ Imēneju Deus itabotaidabotbot jemukaypinpucayū kay. Kūyjobit'ūm-ayū mukūyjobit'ūm'ūm tak biġ ma.

¹⁹ — Deus ma “Āġ jeenuy itabut'ūmān” i'e'em Judeuyū be bima, cūġ ġu Deus pe i'e am cebe ip “Ipiat osupi'ajoat eywebe eyetabut'ūm puye,” i — i kuka ece te'e ma owebe. — Deus ibu'u bima, itabut pa'ore ip — i te'e ma kuka ece owebe.

²⁰ — Tapu, imēn ġu juy ece — i ōn pit e'em.

Ecede ġu juy Deus pe.

— Apēnpuye dak ēn imēn omuġē? — i'ūmġu e'em itīġ'a bit jamuġēat pe.

²¹ Wuynōm muġēġē'ukat jebikuyap taġ yamuġēġēm.

Pūgtōm pewi ma xepxep'a yamuḡēḡēm. Pūḡ'a yadei-boḡat'a yamuḡēḡēm. Wara'at'a bit yadei'icat'a yamuḡēḡēm. Jebikuyap taḡ ma yamuḡēḡēm.

²² · ²⁴ Wuynōm muḡēḡē'ukat puxim Deus Judeuyū kuḡ. Jebikuyap taḡ ma ip ikuḡ. Jetakomaap mubapuk ojuy osunuy kūyjobit'ūmayū be. Ja'ōba-caap mubapuk ojuy dak osunuy. Ġuyjom pit ipiat supi'ajoat cebe ip, kūyjobit'ūm puye. Inaka toḡa osunuy jetakomaap kuḡ-ade koato. Ipiat o'supi'ajoat ḡu cebe ip. Warara'acayū nomuwāwām jebekitkiyūm pīma, ipiat o'supi'ajoat ḡu Judeuyū be-kūyjobit'ūmayū be. Imēn Deus cuk wuynaē jebekitkiyūm. Pūḡpūḡ wuy'in Judeuyū. Warara'acayū Judeu'ūmayū. Deus pit soat wuynaē jebekitkiyūm.

— Ġasū bit okpot kay itabucayū acā webekitkiyūm je'e — i juk adi o'e'e Deus jewebe ma. Imēnpuye ixe juk wuynaē wuyetabut am Jesus kay.

— Wetabotaidabotbot eykay — i juk adi o'e'e jekpot kay itabucayū be. — Ojo'i je'e ip jedipap kuḡ okpot kay itabucayū — i juk adi o'e'e Deus jewebe ma.

Imēḡap soat podi ma odip iam jekayayū mutaybitbin. ²⁵ Imēn Deus e'em Oséias emudupmubararaktup pe:

“Webekitkin'ūm topibiyū webekitkiyūm je'e,” io'e Deus, i. “Ikukpin ḡu ip osodop oxe iayū ikukpin je'e oxe,” io'e, i.

²⁶ “Eyju dak webekitkit ḡu,” i mo a'ḡu o'e Deus cebe ip pūḡ ka be ma, i. Ġuyjom pit: “Webekitkit eyju-soat em itaicat ebekitkit,” i je'e Deus ibo ka be ma, i.

Imēn Deus e'em Oséias emudupmubararaktup pe, apēn Judeu'ūmayū dak Deus ebekitkin je'e iap tup pe.

²⁷ Isaiás tak Israel naxeḡebitbit muḡēaptup o'tupmubararak:

Israel naxeḡebitbit ade jījā-ka'oririt puxim, i. Xepxep ā bit Deus idaxijo, i. ²⁸ Deus ipiat supi'ajoat soat kūyjo-

bit'ūmayū be, i. Apēn kuy o'e'e iap taḡ ipiat supi'ajoat cebe ip, i. Gaxīn ma ipiat supi'ajoat cebe ip, i. Pūḡ em ma ipiat supi'ajoat cebe ip, i.

Imēn Isaías e'em jemudupmubararaktup pe. ²⁹ Wara'atup pe imēn ibararak-Isaías emudupmubararaktup pe -kuy bima o'tupmubararakiatup pe:

Wuykukukat soat podi ma ya'ōbacaat, i. Ixe pūḡ wuy'inat taxiḡo'ūm pima, soat kuka juk oap -apēn Sodoma ka watwat'ūm'ūm oap iap puxim -apēn Gomorra ka watwat'ūm'ūm oap iap puxim, i.

Imēn ibararak opop Isaías emudupmubararaktup pe -apēn Deus pūḡpūḡ ā Judeuyū idaxijo iap tup pe.

³⁰ — Apēnpuye ade Judeu'ūmayū itabut Jesus kay xepxep ā Judeuyū itabut pima? — i du eyju e'em owebe?

Apēn cūḡ ma ajeku Deus xe iap o'jokudada ḡu Judeu'ūmayū. Inaka:

— Eyju cūḡ ma oxe — io'e Deus cebe ip, Jesus Cristo kay itabut ip puye.

³¹ Tūybe cūḡ ma acesop Deus xe wuyawēwēap ekawēn taḡ wuyekuap tomuju iān o'e ip Judeuyū bit-Deus emunaēyū.

— Cūḡ ma eyju oxe — i'ūmḡu o'e Deus pit cebe ip, iboap ekawēn taḡ ceku ba'ore cebe ip puye.

³² - ³³ Itabut ḡu ip osodop cūḡ ma wuyju Deus xe wuyetabucap tomuju iap kay. Imēnpuye:

— Cūḡ ma eyju oxe — i'ūmḡu o'e Deus cebe ip. Tūybe cūḡ ma acesop Deus xe wuyawēwēap ekawēn taḡ wuyekuap tomuju iān o'e ip. Ibu'u ip o'e jetabut am Jesus Cristo kay. Imēn e'em Deus ekawēn tup:

Pūḡ'a oyamuy Siāo ka be wita'a, i.

Iḡo'a be Siāo ka watwat jeweikaka, i.

Je'at'at ip ya be, i. Cekay itabucayū

bit soat em icokcok jeedop ip jetabucap kuḡ, i.

Iboap tup ekawēn pe Cristo wita'a buxim e'em - Judeuyū jeweikaka'ibiyū buxim.

10 Okitpitpiyū, obikuy jījā Deus pe obadipyū daxijo am.

— Bay, obadipyū juy etaxijo — i ōn e'em Deus pe. — Israel naxegebitbit cuy etaxijo — i ōn e'em cebe.

²Ixeyū dak ibikuy jījā Deus bikuyap tağ jeku am. Kawēn icēmān pit itaybit ġu ip. Apēn cūğ ma aceku Deus xe iam itaybit ġu ip. ³Imēn itaybit ġu ip osodop Deus acā wuymucūğucūğ iam. Imēnpuye jağuy dağ ma ip jewemucūğ ojuy osodop. Deus wuymucūğucūğ Jesus Cristo kay wuyetabut pima. Imēnpit ip ibu'u osodop jetabut am cekay. ⁴Cristo oajēm ijodi wuymucūğ ām. Wuymucūğaptei o'teida je'ūām. Cekay wuyetabut pima acā, cūğ ma acesop Deus xe. Imēnpit:

— Wuyawēwēap ekawēn tağ wuyeku buje cūğ ma acesop Deus xe — i'e'em ip te'e ma.

⁵Imēntak: “Cūğ ma acesop Deus xe wuyawēwēap ekawēn tağ wuyeku buje” i te'e ma e'e'ukayū o'ya-wē Moisés kuyje.

— Soat tağ cekawēn tağ ceku buje, kuka juk cūğ ma o'e ip Deus xe — io'e Moisés cebe ip.

⁶— Cristo kay eyetabut puje acā cūğ ma eyju oxe — i'e'em Deus pit. — Ixe eymucūğucūğaptei kuy o'teida — i'e'em Deus.

Pūğpūğayū bit te'e ma e'em:

— Cristo o'teida ġu buk — i.

Imēnpuye te'e ma e'em ip:

— Abu paxi jeu kabi kay Cristo mukop am wuymucūğ ām? — i.

Imēn ip te'e ma e'em itabut'ūm puye ixē kuy o'kop ijodi wuymucūğ ām iap kay.

⁷— Abu paxi je'kop ce'ū'ūayū dopdopap pe Cristo muyu am wuymucūğ ām? — i te'e ma e'em ip.

Imēn te'e ma e'em ip itabut'ūm puye Cristo waram ġuto o'jetait wuymucūğ ām iap kay. ⁸Imēn e'em Deus ekawēn tup pit:

Eyetaybin put cūğ ma wuyju Deus xe wuyetabun puje iam, i. Iboap ekawēn

kuy epejojo, i. Kuy iboap ekawēn
epeḡuwēn, i. Kuy ḡebum epesop iboap
ekawēn kay, i.

— Cristo kay eyetabun cuy epesop — i ōn e'em pi-
ma, iboap ekawēn imuwēnuwēn ōn. ⁹ Imēneju Deus
jeydaxijo. “Jesus ocekekukat,” i ey'e buje, Deus jey-
daxijo. Deus waram Jesus o'ḡutait ce'ūap tomukadi
iap kay eyetabut pima, ixē jeydaxijo. ¹⁰ Jesus kay
wuyetabun puje, Deus e'em wuywebe: — Cūḡ ma
eyju oxē — i. “Jesus ocekekukat,” i wuy'e buje dak,
Deus wuydaxijo. ¹¹ Imēn e'em Deus ekawēn tup: “Ce-
kay itabucat soat em icokcok jeenuy jetabucap kuḡ,”
i. ¹² Imēn Judeu Judeu'ūmat co'i Deus xē. Jesus
Cristo soat kukukat--Judeu kukukat, Judeu'ūmat
kukukat tak. Imēntak ixē soat em xipan soat kuḡ--
“Obuywatwan cuy eḡuy” i'e'em cebe iayū kuḡ--
Judeuyū kuḡ, Judeu'ūmayū kuḡ tak. ¹³ Imēn e'em
Deus ekawēn tup:

“Obuywatwan cuy eḡuy, ocekekukat,”
i'e'e'ukayū idaxijo--soat ip idaxijo, i.

¹⁴ Ixē kay itabut'ūm pima bit, “Obuywatwan cuy
eḡuy” i'e ba'ore je'e cebe ip. Ixē ekawēn co'ūm pi-
ma, iba'ore je'e cebe ip jetabut am cekay. Warara'a-
cat ixē ekawēn muwēn'ūm pima, ya'ījo ba'ore je'e
cebe ip. ¹⁵ Deus pe warara'acat muju'ūm soat ka be
bima, ixē ekawēn muwēn pa'ore je'e cebe ip. Imēn
e'em Deus ekawēn tup:

Yawēḡtipat muwēnuwēn'ukat ajēmap
xipat cīcā ocexe, i.

Imēn e'em kuyatup.

¹⁶ Soat ḡu bit kawēn idipat kay o'e--xepxep ā.
Imēn Isaiās o'e Deus pe kuyje:

— Okukukat, abu xē'e itabut o'e we-
kawēn kay? Xepxep ā — i.

¹⁷ Imēneju wuyetabut Cristo kay ixē awēḡ tobuxik
puje acā. Ayawēḡtobuxik tak wara'acat yawēḡ muwēn
puje acā.

¹⁸ — Judeuyū bit kawēn idipat o'ya'ījojo — i ōn
e'em eywebe.
O'ya'ījojo ip. Imēn e'em Deus ekawēn tup--Isaiās
emudupmubararaktup:

Ixeyū ekawēn o'ya'ijojo ip soat kaka dağayū, i. Ağoka'abi dağ o'yawēgmu-pōgṗōgṗōg, i.

Imēn e'em Deus ekawēn tup.

¹⁹ Cristo ekawēn iba'arēm tu osodop Judeuyū xe? Iba'arēm ḡu. Imēn e'em Moisés emudupmubararak-tup:

Eyju Judeuyū, i. Deus kuka Judeu-
'ūmayū ḡu o'taē jebekitkiyūm, i te'e
ma eyju e'em, i. Itaybit'ūmayū ḡu
kuka o'taē jebekitkiyūm i tūybe e'em
iān eyju, i. Eyetabutkarey epesop ce-
kay ip, owebe webekitkiyū ixeyū naē
buje, i. Eyetakoma epesop cekay ip,
owebe webekitkiyū ixeyū naē buje, i.

Imēn e'em kuyatup.

²⁰ Isaiás iparara ḡu osunuy icēmān i'e am. Imēn e'em cemudupmubararak-tup:

Ikudadam'ūmayū Deus o'tobuxik, i.
Tomuwāwā'ūmayū kay o'jebapuk, i.

Imēn e'em Isaiás emudupmubararak-tup.

²¹ Imēntak Judeuyū o'ḡuwēn Isaiás.

"Kabia bun 'Eyetabun cuy epesop
okay,' i juk adi o'e'e Deus kūyjobit-
'ūmayū be- -jekawēn kay'ūmayū be,"
io'e Isaiás.

11 — Deus jebekitkit o'jepere- -Judeuyū o'jepe-
re — i du eyju e'em owebe?

— Ka'ūma! O'jepere ḡu — i ōn pit e'em.

Ōn tak Israel naxeḡebit. Abraão naxeḡebit ōn. Benja-
min diwat ōn. ²Deus Judeuyū o'taē jebekitkiyūm
kuyje ma- -ipi mujurūḡ puje. Gasū dak ixeyū o'jepere
ḡu. Elias Israel naxeḡebitbit o'ḡuwēnuwēn Deus pe.
Eyetaybit ḡu du iboap ekawētum? Imēn e'em iju-
dup:

³ "Kariwa, ekawēn muwēnuwēn'ukayū
o'yaoka ip," i. "Etabutpe tōmte'o-

kuatōm mupikupikap'a o'yamukêrê-rên ip," i. "Ōn acā ocepoyat ekay itabucayū'in," i. "Gasū okudadam ip oaoka am," io'e Elias Deus pe kuyje.

⁴ Imēn Deus o'jede Elias pe:

"Ēn ā ġu etabucat okay," io'e Deus Elias be, i. "Ade ma osubuywan ixeyū be okay jetabucap epereap puxim- -7,000 beayū," io'e ixē bit, i. "Imēnpuye o'jēġ'aecōġcōġ ġu ip Baal wap- -deusbaro wap 'Ēn acā deus,' i'e am cebe," io'e Deus, i.

⁵ Elias itabēġ osunuy bimaayū etabucap puxim ġasū dak pūġpūġ ā itabut Judeuyū. Kuyje 7000 be osodop iayū buxim, ġasū dak Deus pūġpūġ o'taē Israel naxeġebitbiyū'in. Ixeyū o'taē, xipan ip ikuġ puye. ⁶ Idipat o'ġujurūġrūġ ip ibuye ġu o'taē- -jexe ikukpin ip puye acā. Idipat mujurūġrūġap tomuju wuynaē bima, jexe ikukpinap tomuju ġu kuka juk wuynaē.

⁷ Eya'ōpicūġcūġ cuy epesop wa'ō kay! Israel naxeġebitbit ibikuy osodop Deus pe jemucūġ ām. Imēnpit cūġ ġu o'e ip cexe. Xepxep ā ixeyū'in cūġ ma o'e cexe- -kuy o'taē'iayū acā. Apēn cūġ ma acesop Deus xe iap iba'arēm osodop warara'acayū xe. Ya'ō-pi'ūmayū buxim ip osodop Deus a'ō kay. ⁸ Imēn e'em Deus ekawēntup:

Deus ixeyū o'ġubu'un jekay itabucan, i. Deus ekawēn iba'arēm cexe ip cekawēn cocom ma'ġu ip, i. Ixeyū dak itabut ġu cekay kawēn icēmat a'ījojom ma'ġu ip, i.

Ibodup ekawēn puxim ġasū dak itabut ġu ip Israel naxeġebitbiyū. ⁹ Imēn Davi dak o'e:

Jewemuġuykukukum ip jekukum, i. Cedaġ'ūm cīcā ip jewaġuyġuy, i. Imēnpuye cūġ ma Deus pe ipiatpi'a-joan cebe ip, i. Ixeyū juy jewemuġuykuku wuyju wasū muġuykukukum ibu am iap puxim, wuyju puca muġuykukukum ibu am iap puxim

tak, i. ¹⁰Ita'ūmat puxim cuy jeku
ip, i. Ipoxiat kukat puxim cuy ip
ipiat supi'ajo, i.

Imēn Davi o'e kūyjobit'ūmayū be.

¹¹Soat em ġu bit jeedop ip cedaġ'ūma je-
waġuyġuy Judeuyū -darem ma. Soat kabia ġu Deus
ipiat supi'ajoat ixeyū be -darem ma. Judeuyū ma
kūyjobit'ūm osodop. Deus pit Judeu'ūmayū daxijo-
jom Judeuyū etabtkarey am. Deus ibikuy Judeuyū
etabtkarey am Judeu'ūmayū kay taxijo ip puye.

— “Wuyju dak cuy acetabun Deus kay ixē be
wuydaxijo am,” i xe'e je'e Judeuyū — io'e Deus je-
webe ma.

¹²Judeuyū kūyjobit'ūm osodop. Imēnpuye Deus Ju-
deu'ūmayū daxijojom o'e ġasū. Itabut ġu ip osodop
Judeuyū. Imēnpuye Judeu'ūmayū itabut e'em ġasū.
Ġasū Deus xipacat ūmūm Judeu'ūmayū be Judeuyū
kūyjobit'ūm puye. Ġuyjom pit būrūmaku ip je'e ita-
but Judeuyū. Deus itaybit būrūku iam. Ixeyū itabun
puje, ibodi ma xipacat je'ġūm cebe ip.

¹³Judeu'ūmayū, eywebe ma ōn kawēnwēn ġasū.
Deus cuk omuju ja'ōbi jekawēn muwēn ām eywebe.
Ocokcok cīcā cekawēn muwēnuwēn. ¹⁴Obadipyū ita-
butkarey je'e xe'e eykay, ade Judeu'ūmayū itabun
puje. Obadipyū dak xe'e itabut je'e Jesus kay-
Judeuyū. Imēn Jesus ixeyū'in idaxijo. ¹⁵Deus Ju-
deuyū kay'ūm pima, xipat o'e Judeu'ūmayū be.
Deus bureyūm o'e ip. Deus pe waram Judeuyū kay
buje bit, ibodi ma xipat je'e soat peam ijodiat peam.
Waram ce'ūat mutaicap puxim xipat je'e.

¹⁶Pāo'a ya'in ma xipat pima, soat'a daġ xipat.
Imēnpuxim tūmūn'ip'ip tābu xipat pima, soat'ip taġ
xipat. Imēnpuxim Deus kuy bima itabucayū kay bi-
ma, ġasūayū kay dak je'e itabucayū kay. Abraão kuy
bima itabucat osunuy. Deus ebekit osunuy. Imēnpuye
ixē naxeġebitbiyū dak Deus ebekitkiyū. ¹⁷Wuyju oli-
veira'ip takū dakatkan tiptaġat takū muy am ixē na-
kū dieġ. Idibi mujujum wuyju iġo dakū kay takū no-
jēm ām. Imēnpuxim pūġpūġ Judeuyū'in kuy o'takū-
dakata'iatakū buxim. Ixeyū oibu'un Deus ebekitkiyūm

itabut'ūm puye. Eyju bit Deus ebekitkiyūm epesop eyetabut puye. Eyju Judeu'ūmayū. Imēnpuye eyju o'takūmuyiatakū buxim- -tiptağatakū buxim. ¹⁸ Tābu tābuetait takūkē buye ġu. Takū bit takūetait tābube buye. Imēnpuye:

— Deus Judeuyū kay ġu- -ocekay acā — i'ūmġu juy epe'e. — Ocejū acā ixe juk ocenaē jebekitkiyūm — i'ūmġu juy epe'e.

¹⁹ — Tiptağatakū muyap co'i Deus ocemuy jebekitkiyūm Judeuyū dieġ — i eyju aco'i e'em.

²⁰ Icēmān eyju e'em. Imēnpit takū dakacap puxim darem Deus Judeuyū kay ġu osunuy Cristo kay itabut'ūm puye. Jebekitkiyūm cuk eymuy ixeyū dieġ Cristo kay eyetabut puye. Imēneju:

— Ocejū acā Deus ebekitkiyū — i'ūmġu juy epe'e.

Eyday'em'um ma juy epesop eyetabucap epereap puxim! ²¹ Takūdakacap co'i Deus ipiat o'supi'ajoat Judeuyū be itabut'ūm puye. Ipiat o'supi'ajoat cebe ip takūat puxim ma'ġu ip. Eyetabut'ūm pima, eywebe dak ipiat supi'ajoat. ²² Cristo kay itabut'ūm puye Deus ipiatpi'ajoan Judeuyū be ibima, “Cūġ ma Deus,” i wuyju e'em. Cristo kay ip puye, Judeu'ūmayū kay jījā ibima dak, “Xipat cīcā Deus” i wuyju e'em. Eyju bit eyday'em'um cuy epesop Cristo kay eyetabucap epereap puxim. Eyetabucap epere buje, eyju dak takūdakacatakū buxim epesop. ²³ Judeuyū oibu'un Deus ebekitkiyūm. Itabut ġu o'e ip cekay. Imēnpuye Deus tak oibu'un cekay ip takū dakat'ibit puxim. Waram ibikuy buje bit, waram Deus ebekitkiyūm jeedop ip waram o'takūdakat'iatakū muyap co'i. Iba'ore ġu Deus pe imēġap. ²⁴ Eyju Judeu'ūmayū. Tiptağatakū buxim eyju. Tiptağatakū imēn atakūmuy oliveira'ip pe. Imēnpuxim kuy bima Deus ebekitkiyūm ġu epesop. Ġasū bit ixe ebekitkiyūm epe'e. Imēnpit Deus pe iba'ore ġu waram Judeuyū muy am jebekitkiyūm o'takūdakat'iatakū muyap puxim oliveira'ip pe. Itabun puje, waram ixeyū jomuy jebekitkiyūm.

²⁵ Soat em ġu Judeuyū ibu'u jeedop jetabut am Cristo kay. Deus Judeu'ūmayū mutabutbun pima acā, ibu'u ip jeedop- -Deus jemunaē'ibiyū mutabutbun pima. Deus iboam ibikuy osunuy kuy bima ma. Būrūmaku itabut je'e ip. Wuyxe bit iba'arēm osodop iboap. Ġasū acā ōn iboap muwēnuwēn eywebe ibapuk o'e owebe ġasū bit puye. Okitpitpiyū, ġebum cuy epesop iboap kay "Deus oceju acā juk ocenaē jebekitkiyūm" i ey'eap puxim. ²⁶ Deus soat Judeuyū idaxijo. Imēn e'em Deus ekawēntup:

Ipi watwat taxijojo'ukat jajēm Siāo ka watwat xewi, i. Soat ikērēat ju'uk Jacó naxeġebitbit pewi- -Judeuyū bewi, i. ²⁷ Ixeyū bewi ikērēat uk puje, apēn kuyje juk adi ocece cebe ip iap taġ oce, i.

²⁸ Pūġpūġ Judeuyū Jesus ekawēn kay ġu o'e ip. Imēnpuye ip Deus kay itakomaat co'i o'e. Iboap puye eyetabut put Jesus Cristo kay, Judeuyū ġu ma'ġu eyju. Kuyje bit Deus Judeuyū o'taē jebekitkiyūm. Kuyje:

— Webekitkiyū eyju — io'e ixeyū ebika be- -Abraão be, Isaque be dak, Jacó be dak.

Imēnpuye ikukpin cīcā ip cexe. ²⁹ Deus pit jewaġuy-muwarururun ġu- -pūġ taġ ma yaġuy. "Xipan ixeyū ojukung" i'e buje, xipan ma ixeyū jukung. "Xeyūku otaē webekitkiyūm" i'e buje, ixeyū inaē jebekitkiyūm. ³⁰ Imēneju Deus itabotaidabotbot ġasū eykay, Judeuyū kūyjobit'ūm pima. Kuy bima juk adi epesop kūyjobit'ūm ixē a'ō kay. Ġasū bit itabotaidabotbot eykay. ³¹ Judeuyū kūyjobit ġu Deus a'ō kay ġasū, Deus itabotaidabotbot eykay buye. Guyjom pit itabotaidabotbon je'e ixeyū kay eykay itabotaidabotbocap co'i. ³² Jewejojo'i ma ip kūyjobit'ūmap kuġ Deus xe- -Judeuyū, Judeu'ūmayū dak. Imēnpuxim ma jewejojo'i ma itabotaidabotbon je'e cekay ip.

³³ Soat podi ma Deus xipat wuykay! Ka'ūma ma iba'arēm cexe. Soat podi ma itaybitbit tak. Iba'ore wuywebe bit wuyetaybitbit am apēn ixē jewaġuyġuy

iam. Iba'arēm wuyxe bit ixe jewaḡuymuḡēḡēmap. ³⁴ Imēn e'em Deus ekawēntup:

Ka'ūma ma itaybit apēn Deus jewaḡuyḡuy iam, i. Ka'ūma ma ixe awēwēm, i. ³⁵ Ka'ūma xe ma ixe eweroap opop, i.

Imēn e'em Deus ekawēntup.

³⁶ Soat Deus emumuḡē. Ya'ōbi soat kake. Cebeam tak kake soat. Soat kake "Soat podi ma ēn xipat ocexe" i'e am cebe.

— Soat podi ma Deus ya'ōbuyxi, idip tak — i juy ace cebe dak.

Soat em ma juy imēn acece.

12 — Okitpitpiyū, epeyeweūm Deus pe soat em kūyjobit am ya'ō kay — i ōn e'em eywebe.

Apēn kuyje wūnca ūmap puxim cuy epeyeweūm cebe. Deus itabotaidabotbot wuykay iap ibapuk cīcā wuyxe. Imēneju kūyjobin cuy epesop ya'ō kay. Ey-cokcoḡ cuy epeyekapik cebeam. Ibikuyap taḡ cuy epeku imucokcok am. Ixe a'ō kay kūyjobit pima, te'e ḡu kuka epe'e cebe "Ēn xipat ocexe" i. Icēmān imēn kuka epe'e. ² Deus kay'ūmat ekukuap puxim ḡu juy epeku. Deus pe juy epeyewaḡuymuisunat. Ixe be eyaḡuymuisun puje, eyetaybit epe'e apēn Deus ibikuy wuyeku am iam. Iboam eyetaybit pima xipan epeku itabutpe. Ikērēat kuḡ ḡu epesop cexe. Soat em Deus mucokcokcoḡ epeku.

³ Deus kuy ja'ōbacaap o'ḡuōm owebe jekawēn muwēn ām soat pe. Imēnpuye ōn jeymukūyjo Deus bikuyap taḡ eyeku am. Eyaḡuytoḡ cuy epesop jewewekay. Ajo i'e but eywebe iap pe ma juy epeyekapik -wara'at pe bit ka'ūma. Deus ma o'ḡūm eyekapik am. Ajo eyxe ibapuk imuḡē ām iat Deus ma o'ḡūm eywebe. ⁴ Ade opop wuyjebit pe -wuyeta, wuyba dak, wuyi dak. Imēnpit pūḡpūḡpūḡ soat muḡēḡēm ip. Soat cewedapdepdapdep. Onejujusun ma. Soat wuyju ikuḡiat wara'at puxim ḡu -jexeat

puxim ġu. Wara'at tak imēnpuxim ma ikuġ.
⁵ Imēnpuxim tak wuyju- -Jesus Cristo kay itabucayū.
 Ade wuyju. Pūġat puxim pit wuyju Cristo eju
 mūġ'i wuyju jekukum puye. Jewebuywatwan wuyju
 wuyekapikap kuġ wuyjebit puxim. ⁶ Deus xipan
 wuykuġ. Imēnpuye ixē ja'ōbacaap ūmūm soat pe
 wuywebe wara'at pe jekapik am jebeam. Pūġpūġayū
 wuy'in ya'ōbacaap kuġ ixē ekawēn muwēn ām.
 Ixeyū juy jeedop imuwēnuwēn. ⁷ Warara'acayū
 wuy'in pit ya'ōbacaap kuġ warara'acat peam kapik
 am. Ixeyū juy jeedop warara'acat puywatwan. Wa-
 rara'acayū wuy'in pit ya'ōbacaap kuġ warara'acat
 mutaybit am. Ixeyū juy jeedop warara'acat mutay-
 bitbin. ⁸ Warara'acayū wuy'in ya'ōbacaap kuġ wara-
 ra'acat a'ōmucan am. Ixeyū juy jeedop warara'acat
 a'ōmucanucan. Warara'acayū bit ade kuġ jebubut
 kuġ. Tacum ġu juy jeedop ip. Ade ma juy
 jeġūmġūm ip ikuġ'ūmat pe. Warara'acayū bit ya'ō-
 bacaap kuġ warara'acat kukan. Ya'ōpuruġ ġu juy
 jeedop ip ikuġ- -ya'ōdidin ma. Warara'acayū bit
 ya'ōbacaap kuġ tadaybocayū buywat am. Icoccoġ
 cuy jeedop ip ixeyū buywatwan.

⁹ Jewexe ġu ikukpin eyxeat epejukuk- -icēmān.
 Ikērēat kay ġu juy epesop. Xipacat acā epeġujurūġ.
¹⁰ Ikitpitpiyū eyju, Cristo kay eyetabut puye. Imēn-
 puye xipan cuy epeyewekuk eyduk'a beat kukpinap
 co'i. Ibuyxim cuy epeyewekuk. ¹¹ Eybu'u'um ġu juy
 epesop kapik am. Kapikpik'ukayūm cuy epesop.
 Wuykukukat peam cuy epesop kapikpiġ. Eycokcokap
 kuġ cuy epesop kapikpiġ cebeam. ¹² Soat em Deus xe
 wuyetai acesop iap wiwim wuyju. Imēnpuye eycok-
 coġ cuy epesop. Eyukpiceġēm ġu juy epesop xipat-
 'ūmat jebapukpuġ eykay bima dak. Deus eju ka-
 wēnwēġap cuy epeyepere ġu. ¹³ Eybubut'in cuy
 epeġūm ikuġ'ūmat pe- -itabucayū be. Xipan cuy po-
 watwat epeġuōm eyduk'a be.

¹⁴ Itabut'ūmayū eykaykay bima:

— Bay, ipiat cuy esupi'ajoat cebe ip — i'ūmġu
 juy epe'e Deus pe. — Xipan cuy ejukuk ip — i acā.

¹⁵ Icoccokayū xe bima, eyju dak eycokcoġ epesop.

Waayū xe bima, eyju dak epetōtōn. ¹⁶ Pūg tağ ma juy epeyewağuyğuy.

— Soat podi ma oceju xipat — i'ümğū juy epe'e.

Ibuyxi'ūmat ekapikap cuy epejoixik ġū.

— Soat podi ma ocetaybit cīcā — i'ümğū juy epe'e.

¹⁷ Warara'acat pe ikērēm eykuk puje, ikērēm ġū juy epejukuk ikērēm eykukapteim. Xipan cuy epeku soat etabutpe warara'acat pe eymuymuyap puxim.

¹⁸ Eywebe iba'ore'ūm pima, kaba'ūm cuy epesop soat eju eyxeat eju. ¹⁹ Okitpitpiyū, Deus acā juy ipiat supi'ajoat ikērēat kukayū be. Imēnpuye epeyeweik ġū juy- -pūğ em tak ka'ūma. Imēn e'em Deus ekawēntup:

“Ōn ma oceweik,” i'e'em wuykukuk-at, i. “Ōn ma ipiat osupi'ajoat cebe ip ikērēm eykukapteim,” i.

²⁰ Imēn e'em Deus ekawēntup:

Ekay itakomaat ire bima, eğuykōn cuy, i. Puybit cuy eğūm cebe, i. Ibi-puruk pima, idibi juy etiūm cebe, i. Imēn isūsūn cīcā je'e, i. Iğuycūğ je'e xipan'ūm ekuğ pima, i.

²¹ Ikērēat muğēğē'ukayū be juy ikērēat muğēan ġū eywebe. Xipacat'in cuy epeğūğē ixeyū beam imubu'un am ip ikērēat kay.

13 Kūyjobin cuy ajop iecuğap ebekitkit a'ō kay. Deus ma ixeyū o'jomuyat ipi watwat kukan. Imēnpuye soat ixeyū opop Deus a'ōbi. ² Imēnpuye iecuğap ebekitkit a'ō kay'ūmat Deus o'jomuyat a'ō kay ġū. Ipiat supi'ajoat ip jeweju ma. ³ Xipacat mujurūğrūğ'ukayū ġū iparara iecuğap ebekitkit puxim- -ikērēat mujurūğrūğ'ukayū acā. Ya'ōbuyxiayū buxim eyparara pin'ūm pima, xipacat cuy epeğuju-rūğ. Xipacat mujurūğ puje:

— Xipat ma eyju ocexe — i je'e ip eywebe.

⁴ Deus ma ixeyū o'jomuyat eykukan. Xipan eykuk ojuy ip. Eywebe ikêrêat mujurûg puje bit, eypararam cuy epesop cebuxim ip. Deus ixeyū o'jomuyat ipiat-pi'ajoan ikêrêat mujurûgrûg'ukayū be. Imênpuye cûg ma cebe ip ipiatpi'ajoan wuywebe. ⁵ Imêneju kûyjobin cuy epesop iecuğap ebekitkit a'ô kay. "Deus aco'i ipiat supi'ajoat ocewebe kûyjobit'ûm pima," i wuyju e'em puye ġu kûyjobin cuy ajop ixeyū a'ô kay. Cedağ ma wuywebe kûyjobit am ixeyū a'ô kay buye juy kûyjobin ajop ya'ô kay ip.

⁶ Xipan kapikpiğ pima, Deus a'ôbi ip kapikpiğ eykukayū. Deus ma dinheiro bubu'ukayū dak o'jomuyat wuykukan. Imêneju wuyedinheirom wuyju dak imposto deidadam cebe ip. ⁷ Eyeweroap cuy epeteida cebe ip. Eipi etaxa dak cuy epeteida. Ibuyxim cuy iecuğap ebekitkit epejukuk. Ixeyū a'ô mupubutbun ġu juy epesop.

⁸ Eyeweroap kuğ ġu juy epesop. Eyeweroap cuy epeğū'ûm. Ikukpin warara'acat kuğ pima, wuyeweroap ateida iap puxim. Xipan warara'acat kuğ pima, Deus pe wuyawêwêap ekawên tağ wuyju jekukum. ⁹ Imên Deus wuyawêwêm:

— Warara'acat tayxi eju epeyepo ġu juy — i. — Warara'acat epeyaoka ġu juy — i. — Warara'acat pubut epetujupa'um ġu juy — i. — Eyetabikukum ġu juy warara'acat pubut kay — i.

Kanomûm tak imên wuyawêwêm:

— Xipan cuy eyxeat epejukuk apên xipan eyju jewekuğ iap puxim — i.

Kanomûm eyawêwêap tağ eyeku buje, koap eyawêwêap tağ tak epeku. ¹⁰ Ikukpin wuyxeat kuğ pima, ikêrêm ġu ixé ajukuk. Imênpuye ikukpin wuyxeat kuğ pima, soat ekawên tağ wuyju jekukum- -Deus ekawên tağ- -wuyawêwêap ekawên tağ.

¹¹ Waram Jesus ajêmap kabia wûy ma osunuy wuyetabun puje. Gasû bit wûy ġu o'e. Gaxîn ma wuydaxijojoap kabia jajêm. Imênpuye xetxiat puxim ġu juy ajop. Wuyawêwêap ekawên tağ cuy ajeku.

¹² Wuykukukat ajêmap kabia kabiam wuyju bimân co'i. Kabiok ajêm pasuğ pimân co'i. Kuy kabia ija-

sūn, ḡaxīn ma ixē jajēm puyē. Imēnpuyē acepere juy ikērēat mujurūḡap! Ikērēat mujurūḡrūḡ'ukayū kabioḡ taḡ jekuku'ukayū buxim. Ḡa'a ajeku Deus bikuyap taḡ acā! Sorara icaat kuḡ jekukum jaokaap puxim. Cristo a'ōbacaap kuḡ cuy ajeku waram wuywebe ikērēat kukap puxim. ¹³ Cūḡ ma juy ajeku wuysūsūnap puxim. Cūḡ ma juy ajeku kabiam soat etabutpe jekukum iat puxim. Wuybaboroḡ ḡu juy ajeku. Wuyka'okērēm ḡu juy ajeku. Warara'acat tayxi kaykay ḡu juy ajeku, warara'acat itop kaykay ḡu dak. Wuysūsūḡap ḡu juy ajeku. Warara'acat a'ōdawutwun ḡu juy ajeku. Wuyetabutkarey ḡu juy ajop. ¹⁴ Wuyaguy daḡ jekukum pima, ikērēat mujurūḡrūḡ wuyju. Eyaḡuy daḡ ḡu juy epeku! Wuykukukat ja'ōbacaap ūmūm wuywebe sorarayū kukat jesorarayū be icaat ūmap co'i itakomaat yaokaap puxim.

— A'ōbacaap cuy eḡūm ocewebe — i juy epe'e Jesus Cristo be.

14 Eyukpiceḡēm ḡu juy epesop “Apēn ḡu xe'e kuka cūḡ Deus xe?” i'e'e'ukayū kay-itabucayū kay. Jawa'ōxixxiḡ ḡu juy epesop ceweju ip vaḡuymuwarurun am. ² Pūḡpūḡ itabucayū'in e'em:

— Cūḡ ma wuywebe deusbaroyū wap iēnmōḡ'ibitēn o am — i.

Imēnpuyē soat ēn o'om ip. Warara'acayū bit e'em:

— Cūḡ ḡu wuywebe ibiat ēn o am — i.

Imēnpuyē iēn o'om ḡu ip-kadai o'om acā ip. ³ Iēn o'o'ukat — Etaybit'ūm cīcā — i je'e ḡu kadai o'o'ukat pe. Kadai o'o'ukat tak: — Cedaḡ ḡu ēn jekukum iēn o'o'uk puyē — i je'e ḡu iēn o'o'ukat pe, Deus ixē kay buye. ⁴ Cūḡ ḡu wuywebe “Cedaḡ ḡu ēn jekukum” i'e am warara'acat a'ōkayat pe. Deus a'ōkayat ixē. Cūḡ pima, Deus acā je'e cebe “Cūḡ ma ēn jekukum” i. Cūḡ'ūm pima dak, “Cūḡ ḡu ēn jekukum” i je'e cebe. Wuykukukat ja'ōbacaap jeḡūm cebe cūḡ ma jeku am. Imēnpuyē cūḡ ma jeku.

⁵ Pūgpūg xe ma pūgpūg kabia kabia'ipi. Wara-ra'acayū xe bit ka'ūmgu kabia'ipiat. Soat kabia ma ipi gu. Jewejojo'i ma soat kabia ma cexe ip. ⁶ Pūgpūgayū xe pūgpūg kabia kabia'ipiat wuykukukat a'ōmubuyxin ojuy ip. Iēn o'o'ukat tak soat ēn o'om wuykukukat a'ōmubuyxin ojuy. Jekōn pima:

— Bay, ēn xipan ocekuḡ. Iēn ūmūm ocoxatēn — i'e'em Deus pe.

Iēn om ibu'uat tak iēn o'om gu wuykukukat a'ōmubuyxin ojuy. Jekōn pima:

— Bay, ēn xipan ocekuḡ. Soat em kadai ūmūm ocewebe ocxan — i'e'em Deus pe.

⁷ Deus wuyekukuap cocom wuyetabēg pima, wuye'ū buje dak, wuyju Cristo a'ō kayayū buye. ⁸ Wuyetabēg pima wuykukukat bikuyap taḡ wuyju jekukum. Wuye'ū buje dak cexe acesop- wuykukukat xe. Imēneju wuykukukat a'ōkayayū wuyju wuyetabēg pima, wuye'ū buje dak. ⁹ Imēneju Cristo oe'ū. Waram ḡuto o'jetait je'ūap tomukadi. Waram o'jetait soat itabucayū kukukan- itabēgayū kukukan, ce'ū'ūayū kukukan tak. ¹⁰ Pām eyju? Apēnpuye dak eyju eykitpitpiyū muymuy? Cūḡ gu eywebe imuy-muy am. Guyjom soat wuyju acejebapuk Deus wap. Ixe apēn ijodi bima juk adi ajekuku iaptei ideida wuywebe. Xipacat je'ḡūm xipacayū be xipacat mujurūgrūḡapteim. Kūyjobit'ūmayū bit ḡuju ipiat'ajojoap pe kūyjobit'ūmapteim. Imēnpuye cūḡ gu eywebe dak "Ikērēat kuḡ eyju Deus xe" i'e am eykitpitpiyū be. ¹¹ Imēn e'em Deus ekawēntup:

"Soat ipi watwat jēḡ'aecōḡcōḡ owap kūyjobit wa'ō kay am, soat em wetait puye," i'e'em Deus, i. "Soat ip 'Ēn acā Deusat,' i je'e owebe," i'e'em, i.

¹² Imēneju soat wuyju apēn ijodi bima juk adi ajekuku iap aḡuwēn Deus pe.

¹³ Imēnpuye wuykitpitpiyū muymuyap cuy acepere. Cūḡ ma juy ajeku wuykitpitpiyū etabutpe ixeyū be "Teku cedaḡ'ūma jekukum" i'eap puxim. Cedaḡ'ūm ixeyū xe bima juy ayaḡuymuwarurun gu. Aḡ

ip jeedop. ¹⁴ Wuykukukat Jesus eju mūg'i ōn jekukum. Imēnpuye wetaybit soat i'opi ġu owebe iam. Warara'acat pe bit "Ibo i'opi owebe" i'e buje, i'opi ma o'e cebe. Ixe be i'o buje, cedaġ ġu jekukum, cedaġ ġu cexe buye. ¹⁵ Eykitpitpiyū juy epeġuġuycūġ ġu soat o'o am. Soat o'oap tomuju eykitpitpiyū muġuycūġ pima, ikukpin ġu ip eyxe. Cristo oe'ū eykitpitpiyū beam. Epeġubu'un ġu juy ip Jesus kay am soat o'o am. Ibu'u ip pima, soat em Deus wi wūy ma jeedop ip, ixeyū etabutpe ikukpin ġu ip epejukuk puye. ¹⁶ Imēnpuye eykitpitpiyū xe xipat'ūm pima:

— Eyetaybit ġu eyju bit — i'ūmġu juy epe'e cebe ip. — Xipat ma iēn o am ocewebe bit — i'ūmġu juy epe'e cebe ip.

Ikukpin ġu ip ikuġ pima ip jeymuymuy.

— "Soat ēn xipat i'o am," i te'e ma teyūku e'em — i je'e ip.

¹⁷ Deus ma wuykukukat. Ixe ebekitkiyūm acesop wuyxat o'omap tomuju ġu, wuyxati kōnkōnap tomuju ġu ma dak. Cūġ ma wuyju jekukum pima bit, ixe ebekitkiyūm acesop, kaba'ūm warara'acat kuġ pima dak, wuycokcoġ jekukum pima dak. Deus biōġbuk wuymucokcokcoġat. ¹⁸ Imēn Cristo a'ō daġ jekukum pima, Deus mucokcokcoġ acesop. Ijodiacat tak e'em: — Teyūku cūġ ma jekukum — i.

¹⁹ Imēneju xipan cuy acewewekuk wuyweweju kaba'ūm wuydop am. Jewewa'ōmucanucan cuy ajop biġ ma wuyetabut am Jesus kay. ²⁰ Deus kuy juk eykitpitpiyū mutabun Jesus kay. Epeġubu'un ġu juy ip soat ēn o'o am. Soat i'opi ġu wuywebe. Inaka wuykitpit pe ikērēat mujurūġat puje, wuyju dak ikērēat mujurūġrūġ soat o'om pima. ²¹ Wuykitpit pe ikērēat aġujurūġat ġu juy! Wuyxe ma xipat soat ēn o'oap, uva'abidi kōnkōġap tak. Wuykitpit xe cedaġ'ūm pima bit asuēn'o ġu, atikōn ġu dak. ²² Soat o'oap eyxe xipat pima:

— Soat i'opi ġu ocewebe — i juy epe'e warara'acayū be ġu -Deus pe acā.

Cūġ ma juy ajeku wuyaġuy daġ. Apēn xipat wuyxe iap taġ wuyju jekukum pima, wuycokcok ace'e. ²³ Ita-

butbūt xipat ġu xe'e owebe ibiat o am iap kay bima bit, iġuycūġ je'e i'o buje.

— Ikērēat ġu xe'e o'ġujurūġ? — i je'e jewebe ma. — Deus xe'e ipiat supi'ajoat owebe? — i je'e jewebe ma.

Itabutbūt pima o'jo'o. Imēnpuye xipat ġu tūybe osunuy cexe. Iboap xipat Deus xe iap kay wuyetabut'ūm pima, wuyju dak ikērēat mujurūġrūġ, iboap mujurūġ puje.

15 Pūġpūġ wuy'in e'em: — Ocetaybit cedaġ ma jeku am Deus xe iam — i.

Wuyukpiceġēm ġu juy ajop “Apēn ġu xe'e kuka cedaġ ajeku Deus xe?” i'e'e'ukayū kay. Itaybitbūcayū buywatwan cuy ajop. Jewekay acā ġu juy ajop ġebum. ² Wuykitpitpiyū kay dak cuy ajop ġebum. Wuykitpitpiyū kay ġebum cuy ajop xipan ip ikuk am, Jesus kay itabut cīcā ip jedop am tak. ³ Cristo dak jewekay ġu ġebum osunuy- -warara'acayū kay acā. Cristo juk o'e Deus pe:

— Ikērēm ip cuk adi okuk apēn ip ikērēm ekuk iap co'i — i.

Imēn Cristo o'e Deus pe kuyje. ⁴ Kuyjeayū Deus eka-wēntup o'tupmubararak wuymutaybit am- -soatup. Ibiatup ekawēn wuymutaybitbin wuyetaxi'ūmap puxim ipiat kay. Wuya'ōmucanucan tak ibiatup eka-wēn. Ibiatup ekawēn kay wuyetabut pima, Deus xe acesop iap acejowiwi jijā. ⁵ Deus ma wuybuywatwan wuyetaxi am ipiat'ajo am. Wuya'ōmucanucan tak. Ixe eju ōn kawēnwēn eywebeam.

— Bay, Roma ka watwat a'ōmucanucan cuy eġuy — i ōn e'em cebe. — Esubuywan cuy ip ixeyū be warara'acat kay ġebum am Jesus Cristo warara'acat kay ġebum osunuy iap co'i — i ōn e'em cebe.

⁶ Imēn ōn kawēnwēn eywebeam Deus eju, pūġ taġ ma eyeku am. Ceweju ōn kawēnwēn “Ka'ūmġu ejo'iat xipacat” i'e am Deus pe- -wuykukukat ebay be- -Jesus Cristo ebay be.

⁷ Imēneju xipan cuy epeyewekuk apēn Cristo xipan eykuk iap co'i. Xipan eyju jewekuḡ pima: — Deus xipat cīcā aco'i, cebekitkiyū xipan jewekuḡ puye — i je'e eyjoayū.

⁸ Imēn Cristo oajēm ijodi. Judeuyū daxijojo'ukan o'e. Deus soat em ja'ō daḡ e'em iam ixeyū mutaybit am oajēm. Oajēm ijodi apēn Deus o'e kuyjeayū be iap taḡ. — Judeuyū dobyū'ūm'ūm pe iap taḡ. ⁹ Judeuyū daxijojo'ukan o'e, Judeu'ūmayū be “Ēn xipan cīcā ocekuḡ, oce kay etabotaidabotbot puye” i'e am Deus pe. Imēn e'em Deus ekawēn tup. — Davi emudupmubararaktup:

Imēneju “Soat podi ma ēn xipat cīcā,” i oce Deus pe Judeu'ūmayū a'ōpiju, i. Jebibododon oce ēn xipat cīcā i'e'em ewebe ya'ōpiju ip, i.

¹⁰ Wara'atup tak imēn e'em. — Moisés emudupmubararaktup:

Judeuyū ḡu eyju, i. Inaka eycokcoḡ cuy epesop soat Deus emunaēyū eju, i.

Imēn e'em iḡodup. ¹¹ Wara'atup tak imēn e'em. — Davi emudupmubararaktup:

— “Ēn acā a'ōbacaat,” i juy epe'e Deus pe — i ōn e'em Judeu'ūmayū be, i. — Soat eyju “Ēn soat podi ma xipan ocekuḡ,” i juy epe'e cebe — i ōn e'em soat taḡacat pe, i.

¹² Wara'atup tak imēn e'em. — Isaías emudupmubararaktup:

Bekicat je'kap. — Jessé naxeḡebit, i. Ixe bekicat Judeu'ūmayū kukukan je'e, i. Judeu'ūmayū dak ixey jowiwi jedaxijo am, i.

Imēn Isaías o'tupmubararakat Cristo ekawēntup. — Jessé naxeḡebit ekawēntup.

¹³ Imēn Deus soat em jexe wuyetait acesop iap wiwian wuywebe. Ixe eju ōn kawēnwēn eywebeam:

— Bay, Roma ka watwat itabut ekay — i ōn e'em cebe. — Imucokcokcoḡ cuy ip eḡuy — i ōn

e'em cebe. — Yağuy mubabibin cuy ip eğuy — i òn e'em cebe.

Imèn òn kawēnwēn Deus eju eywebe biğ ma iboap wiwian jebiōğbuk a'òbacaan- -Xipacat piōğbuk a'òbacaan.

¹⁴ Okitpitpiyū, òn ma wetaybit eyjum. Soat em eyju xipan warara'acat kuğ. Soan eyetaybit. Eyetaybit tak Jesus Cristo ekawēn. Jewawēwē but eyewewēju. ¹⁵ Inaka ijudup pe osūsūn ġu wa'òbapuğ eyawē ām eyağuyba'ūmap puxim icēmat ekawēn kay. Osūsūn ġu Deus a'òbiat òn puye. ¹⁶ Ixe Deus cuk onaē Jesus Cristo ekawēn muwēn ām Judeu'ūmayū be. Paī buxim Deus ekawēn muwēnuwēn òn cebe ip-kawēn idipat muwēnuwēn. “Èn soat podi ma a'òbuyxi” i ixeyū e buje, Deus icokcok e'em. Xipacayūm ip je'e Deus xe, Ibiōğbuk Xipacat ixeyū muisun puje. ¹⁷ Imèn kapikpiğ òn Deus peam Jesus Cristo eju mūğ'i òn jekukum puye. Imēnpuye:

— Ocokcok wekapikap kuğ — i òn e'em Deus pe.

¹⁸ Cristo ma wa'òmucanucan osunuy owebe Judeu'ūmayū mutabun am jekay. Cūğ ma juk adi oceka-wēnuwēn ceweju ip. Cūğ ma juk adi ojekukuku ce-tabutpe ip. Imēnpuye itabut ip o'e Jesus kay. Deus a'ò kay ip o'jekūyjobin, Cristo bikuyap tağ òn jekukum puye. Obisūsūn ġu “Obuye adeayū itabut o'e” i'e am eywebe. ¹⁹ Deus biōğbuk cuk adi ja'òbacaap o'jomōğmōğ owebe. Imēnpuye wuywebe i'e ba'oreat oğubapukpuk Judeu'ūmayū be. Itabēğbēğ o'e ip Deus a'òbacaap cocom. Imēnpuye soat ka dağ cuk adi ojekukuku.

— Cristo kay eyetabun puje, Deus jeydaxijo — i'e'em cuk adi ojekukuku.

Koap Jerusalém ka watwat oğukūyjojo. Ibo ka bewi juk ojēm. Soat kaka dağ cuk adi ojekukuku adeayū mukūyjom, kawēn idipat muwēnuwēn. Wūyat eipi be oajēm ġebu-Iliria eipi be. ²⁰ Kawēn idipat muwēn ojuy oğuy Jesus Cristo awēğ tobuxikayū be ġu-yawēğ tobuxik'ūmayū be acā, itaybit'ūm ip puye.

²¹ Imèn e'em Deus ekawētup:

Yawēg tobuxik'ūmayū yawēgtobuxik,

i. Yawēgpa'arēm ġu je'e cexe ip, i.

Imēnpuye ibo dup ekawēn taġ òn kawēn idipat muwēnuwēn yawēgtobuxik'ūmayū be acā.

²² Eyjo am omuju'ūm'ūm osunuy soat em ma'ġu oju pin, yawēgtobuxik'ūmayū be òn kawēn idipat muwēnuwēn puye. ²³ Ade koato eyjo pin cuk adi oġuy. Imēnpit ġasū acā ijop kaka daġ kawēn idipat muwēgāp oġu'ūm. ²⁴ Imēnpuye ġaxīn ma aco'i oju eyjom. Espanha eipi kay cum pima eyjo pin oce. Eyxe dak ibun onuy buje, obuywan cuy epe'e Espanha eipi kay oju am. ²⁵ - ²⁶ Ġasū bit òn cum Jerusalém ka kay. Judeu'ūmayū jedinhoiro mu'awero ojuy ip osodop- -Macedônia eipi beayū- -Grécia eipi beayū dak. Iboap edinheiro ūm ojuy ip Jerusalém ka beayū be- -Judeuyū be- -itabucayū be- -tadaybotbocayū be. Imēneju iboap edinheiro dujowan òn iūm ām cebe ip. ²⁷ Ixeyū Macedônia eipi beayū Judeuyū ġu- -Grécia eipi beayū dak. Imēnpit itabut ip o'e Jesus kay, Judeuyū kawēn idipat o'ġuwēn cebe ip puye- -Jerusalém ka beayū. Imēnpuye ip jedinhoiro ūm ojuy cebe ip. Xipat imēn Judeu'ūmayū be Judeuyū buywat am- -jekitpitpiyū buywat am- -tadaybotbocayū buywat am. ²⁸ Imēneju ibiat dinheiro oġūm cebe ip. Soat o'ġuxipan'iat oġūm cebe ip. Iūm puje Espanha eipi kay oju. Espanha eipi kay cucum pima eyjom oju. ²⁹ Eyxe wajēm puje, apēn Cristo xipan okuġ iap oġuwēn eywebe. Soat podi ma Cristo xipan okuġ iap oġuwēn eymucokcok am.

³⁰ Okitpitpiyū, eyju dak eyetabut wuykukukat Jesus Cristo kay. Eyju xipan jewewekuġ Deus biōġbuk a'ō kay kūyjobit puye. Imēnpuye epeyekawēn cuy Deus eju owebeam. Owebeam Deus eju eyekawēnap ojuyjuy jījā òn.

³¹ — Paulo kay juy aġ eġuy Judéia eipi watwat pe yaokaap puxim- -itabut'ūmayū be yaokaap puxim — i juy epe'e Deus pe. — Jerusalém ka watwat cuy eġubikuy- -itabucayū juy eġubikuy Paulo xewi ibo edinheiro bu am — i juy epe'e Deus pe.

³² Imēn cuy epeyekawēn owebeam Deus eju. Imēn ka-

wēnwēn pima, ocokcok cīcā oajēm eykay. Deus ibi-
kuy bima ocokcok cīcā oajēm eykay. Eyju dak omu-
cokcokcoğ epesop. ³³ Okitpitpiyū, Deus wuyağuy-
babibin'ukat.

— Roma ka watwat kay juy ağ eğuy — i òn
e'em cebe.

Imēn ma ağ jeenuy eykay.

16 Wuyixīg Febe oğuju eykay. Ixe Febe Jesus
kay itabucayū buywatwat'ukat- -Cencreia ka
watwat puywatwat'ukat. ² Imēnpuye ixē juy epeğūōm
eyduk'a be tūy ām. Wuykukukat kay itabucayū juy
ağūōm wuyduk'a be pūğ kay ma wuyetabut puye.
Ixe Febe juk adi adeayū buywatwat'uk osunuy. Òn
tak cuk adi xeku obuywatwat'uk osunuy. Imēnpuye
eywebe ibuywan put pima, eyju dak cuy epesubuy-
wan!

³ "Kato" i juy epe'e Priscila be, Áquila be dak. Ixeyū
juk adi o'jekapikpik oweju Jesus Cristo beam. ⁴ Oe'ū
pin ip Áquilyū we'ūap puxim.

— Xipat cīcā eyju — i òn e'em cebe ip.
Imēn tak e'em soat Judeu'ūmayū- -Jesus kay itabu-
cayū. ⁵ "Kato," i juy epe'e Áquilyū duk'a be je'a-
weroro'ukayū be dak- -Jesus kay itabucayū be.

Obure Epēneto be dak, "Kato," i juy epe'e.
Koap ixē oitabun Jesus kay Ásia eipi watwat'in.
⁶ Maria be dak, "Kato," i juy epe'e. Ixe juk adi o'je-
kapikpik cīcā eywebeam. ⁷ Obadipyū be dak, "Kato,"
i juy epe'e- -Andrónico be, Júnias pe dak. Daomūn-
mūnap'a be osodop ip oweju. Doze beayū Jesus emu-
mujuyū itaybit cīcā ixeyūm xepxepayūm. Ixeyū oita-
bun Cristo kay wetabut awap.

⁸ Ampliato be dak, "Kato," i juy epe'e. Ixe obu-
re ikukpin cīcā oxē wuykukukat kay ixē dak itabut
puye. ⁹ Urbano be dak, "Kato," i juy epe'e. Ixe dak
oceweju juk adi Cristo muwēnuwēn oeku. Estáquis pe

dak, "Kato," i juy epe'e. Ixe obure ikukpin cīcā oxe. ¹⁰ Apeles pe dak, "Kato," i juy epe'e. Cristo kay jeta-
tabucap kuḡ jekukum ixe soat etabutpe. Aristóbolo
badipyū be dak, "Kato," i juy epe'e- -soat pe. ¹¹ O-
badip Herodião be dak, "Kato," i. Soat wuykukukat
kay itabucayū be dak, "Kato," i juy epe'e- -Narcisco
badipyū be.

¹² Wuyixīt Trifena be dak, "Kato," i juy epe'e,
wuyixīt Trifosa be dak. Kapikpiḡ cīcā ip wuykukukat
peam. Wuyixīt Pérside be dak, "Kato," i. Wuyxe ixe
ikukpin cīcā. Ixe juk adi o'jekapikpik cīcā
wuykukukat peam. ¹³ Rufo be dak, "Kato," i. Ixe
dak kapikpiḡ cīcā wuykukukat peam. Ixe xi be
dak, "Kato," i juy epe'e. Ixe juk adi xipan okuk
je'it kukap co'i. ¹⁴ Asíncrito be dak, "Kato," i, Fle-
gonte be dak, Hermes pe dak, Pátrobas pe dak,
Hermas pe dak, ixeyū xeyū be dak- -wuykitpitpiyū
be. ¹⁵ "Kato," i juy epe'e Filólogo be dak, Júlia be
dak, Nereu be dak, ixe ixīt pe dak, Olimpás pe
dak, ixeyū xeyū be dak- -Deus ebekitkiyū be.

¹⁶ Epeyewakobotbot cuy wuykukpin wuyewewēju
iap mubapuk am soat pe. Soat Cristo ebekitkiyū
kato mujujum eywebe- -soat ka watwat.

¹⁷ Okitpitpiyū, jeyawē òn. Eyday'em'um cuy epe-
sop cewejak'ùm jewewekayayū kay- -eymutaybitbinap
muwarururun ojuyayū kay- -Cristo ekawèn muwaruru-
run ojuyayū kay. Ixeyū burem ḡu juy epesop. ¹⁸ Wuy-
kukukat Cristo mucokcokcoḡ ḡu ip jekukukum- -
jemucokcokcoḡ acā. Idim cīcā ip kawēnwēn. "Eyju
xipāt cīcā" i'e'em ip warara'acat pe jekay am. Imēn
ip itaybit'ùm'ūmayū muḡuykukukum. ¹⁹ Soat kaka
daḡayū kuy itaybit eyetabut cīcā Jesus kay iam.
Imēnpuye ocokcok eykay. Obikuy jījā eyetaybit cīcā
ām xipacat mujurūḡ ām. Ikērērēat mujurūḡ ām pit
cuy òn eykay ḡu. ²⁰ Deus ma Satanás a'òbacaap
ḡu'ùm ḡaxīn ma ixe be waram wuymuḡuykukuap pu-
xim. Ixe Deus wuyaḡuymubabibin'ukat. Wuykukukat
Jesus Cristo xipan cuy jeykuk.

²¹ Wuykitpit Timóteo kato mujujum eywebe. Ixe
kapikpiḡ oweju. Wuykitpit Lúcio dak kato mujujum

eywebe, Jasão dak, Sosípatro dak. Obadipyū ip.

²² - ²³ Gaio dak kato mujujum eywebe. Ixe duk'a be òn ġasū. Ixe duk'a be Jesus kay itabucayū je'awerorom. Erasto dak kato mujujum eywebe. Ixe Corinto ka kukat edinheiro muxipanpan'ukat. Wuykitpit Quarto kato mujujum eywebe.

Òn tak- -Tércio òn. Òn tak kato mujujum eywebe, pūġ kay ma wuyetabut puye wuykukukat kay. Òn ijudup mubarararaġ eywebeaptum Paulo a'òbi. ²⁴ Wuykukukat Jesus Cristo juy xipan jeykuk- -soat jukuk. Imèn cuy jeykuk.

²⁵ — Èn soat podi ma a'òbuyxi — i juy ace Deus pe.

Ixe be wuya'òmubacan put wuybu'uap puxim Jesus kay. Jesus Cristo ekawèn muwènuwèn cuk adi oġuy- -kawèn idipat muwènuwèn. Kuyje Deus iboap ekawèn o'ġuwèn ġu ipi watwat pe. Kawèn iba'arèm osunuy soat xe ipi watwat xe. Ibun iba'arèm osunuy. ²⁶ Iba'arèm ma juk adi iboap ekawèn muwènuwèn'uk ip osodop Deus ekawèn muwènuwèn'ukayū kuyjeayū be. Ġasū bit ibapuġ ma Deus a'òbiayū iboap ekawèn muwènuwèn soat ka watwat pe. Ixe Deus soat em itait. Ibapuġ ma o'ġuwèn at adeayū be itabut am Cristo kay, kūyjobit am tak ip ya'ò kay.

²⁷ — Soat podi ma edip — i juy acece soat em Deus pe. — Soat podi ma a'òbuyxi — i dak. Imèn cuy ace cebe itaybit soan puye; ixe Jesus Cristo o'ġudot wuykay buye dak. Imèn cuy acece cebe. Ixe acā Deusat.

CORINTO KA WATWAT PEAPTUP PAULO EMUDUPMUBARARAKTUP KOAPATUP

1 Corinto ka watwat, cartadup mubararağ òn eywebeaptum. Òn Paulo. Tupmubararağ òn wuykitpit Sóstenes eju. Jesus Cristo emumuju òn Deus bikuyap tağ. ²Tupmubararağ oceju soat pe Deus ebekitkiyū be- wuykukukat Jesus Cristo kay itabucayū be. Deus cuk eynaē jebekitkiyūm Cristo eju mūğ'i eyju jekukum puye. Soat ixē ebekitkiyū e'em:

— Ocebuywatwan cuy eğuy — i soat ka watwat. Ixē Jesus Cristo wuykukukat-ixeyū kukukat tak.

³— Bay, xipan cuy Corinto ka watwat ejukuk — i òn e'em Deus pe- wuyebay be, Jesus Cristo be dak- wuykukukat pe. — Ixeyū ağuy mubabibin cuy eğuy — i òn e'em cebe ip.

⁴Deus soat em xipan eykuğ, Jesus Cristo eju mūğ'i eyju buye. Imēnpuye:

— Bay, ēn xipat cīcā — i òn e'em Deus pe soat em ma.

⁵·⁶ Cristo juk adi oceğuwēnuwēn eywebe. Imēnpuye ixē a'ò dağ eyju jekukum ġasū. Soat kuğ eyju, Cristo eju mūğ'i eyju jekukum puye. Imēnpuye eyetaybit kawēn icēmat muwēn ām. Ka'ūma ma iba'arēm eyxe, eyetaybit cīcā buye. ⁷Imēnpuye soat kuğ eyju- Deus biōğbuk emumuūm kuğ. Deus waram wuykukukat Jesus Cristo ġubapuk soat ijodiacat etabutpe. Ixē mubapukap wiwim eyju. Iwiwim pima soat kuğ eyju. Deus biōğbuk emumuūm kuğ. ⁸Soat em Deus eya'òmucanucan jeenuy eywebe eyetabucap epereap puxim. Imēnpuye ikērēat kuğ ġu epesop Deus xe wuykukukat Jesus Cristo ajēmap kabia be. Ixē kabia be abuyū xipat iap ġuwēn. Abuyū xipat ġu iap tak ġuwēn. ⁹Deus soat em e'em ja'ò dağ. Ixē juk eynaē eywebe jekpot eju jeburere am- Jesus Cristo eju jeburere am. Ixē Jesus Cristo wuykukukat.

¹⁰ - ¹¹ Okitpitpiyū, Cloe badipyū bit cuk o'e owebe:

— Corinto ka watwat jewa'ōdawutwun cīcā jewewaju, Jesus Cristo kay itabut ma'ḡu ip — i. Imēnpuye jeymukūyjo ōn, okitpitpiyū. Wuykukukat a'ōbi ōn jeymukūyjo Jesus Cristo a'ōbi. Jewa'ōxikxiḡ ḡu juy epesop. Wara'at taḡtaḡtaḡ ḡu dak cuy epeyewaḡuy- -pūḡ taḡ ma. Pūḡ taḡ ma dak cuy epeyekawēn soat em. Pūḡ taḡ ma dak cuy eybikuy eyeku am. ¹² Pūḡpūḡ ey'in e'em: — Paulo kadiayū oceju bit — i. Warara'acayū e'em: — Apolo kadiayū oceju bit — i. Warara'acayū e'em: — Pedro kadiayū oceju bit — i. Warara'acayū e'em: — Cristo kadiayū oceju bit — i.

Iwarururum ma eyju e'em. ¹³ Wara'at taḡtaḡtaḡ ma eyju e'em pima, eyju Cristo muweutun iap puxim. Ōn ḡu obamupaya ip korosa be we'ū ām eywebeam- -Cristo acā. “Paulo ebekin ōn ḡasū bit” i'e am ḡu jeywemubatisasan epesop- -“Cristo ebekin ōn ḡasū bit” i'e am acā. Imēnpuye jewa'ōdawutwun ḡu juy epesop.

¹⁴ - ¹⁵ Imēnpuye te'e ma eyju e'em:

— Paulo juk omubatisasan jekadian — i.

Ōn pit cuk imubatisasan teku okadiat iam ḡu- -pūḡ em tak ka'ūma. Imēnpuye ocokcok oce ade ḡu ey'in oḡubatisasan puye- -pūḡpūḡ ā. Crispo oḡubatisasan, Gaio dak. Warara'acayū bit aco'i ka'ūma. ¹⁶ Icēmān. Wara'at kay oceḡebu ḡasū bit. Estéfnas tak cuk oḡubatisasan. Ibadipyū dak cuk oḡubatisasan. Waḡuyba'ūm warara'acat tak paxi juk oḡubatisasan iap kay. ¹⁷ Ijodiat mubatisasan am ḡu Cristo juk omuju- -kawēn idipat muwēn ām acā.

— Kawēn idipat muwēn puje, itaybit cīcāat ekawēn ḡu juy eḡuwēn- -Jesus Cristo juk oe'ūiap ekawēn acā — i juk o'e owebe.

Itaybit cīcāat ekawēn imuwēn puje:

— Teku itaybit cīcā — i kuka o'e ip wa'ījo-joayū.

— Jesus oe'ū korosa be wuywebeam — i'ūmḡu bit kuka o'e ip.

¹⁸ Korosa be Jesus oe'ū wuywebeam iap ekawēn co buje, Deus pe taxijo'ibiyū ma e'em:

— Deus ja'ōbacaam wuydaxijom jekpot oce'ū buye — i.

Ipiat'ajojoap kay cumayū bit e'em:

— Apēnpuye dak oe'ū? — i. — Te'e ma oe'ū — i napa ma e'em ip.

¹⁹ Imēn e'em Deus ekawēntup:

Itaybit cīcāyū jewexe ip itaybit iap oğubapuk soat pe, i. Itaybit cīcā ip ipi juacat xe, i. Oxe bit itaybit ġu, i.

²⁰ Ya'ōbuyxi ġu ip Deus xe itaybit cīcāat, ibabi jījāat tak, xipan cekawēnat tak.

— Ipi juayū xe teyūku itaybit cīcā, itabut'ūmayū xe-oxe bit ka'ūma — i'e'em Deus.

— Ocejū cūġ ma Deus xe ocetaybit cīcā buye — i te'e ma ip e'em.

²¹ — Ocetaybit Deus, soat podi ma ocetaybit puye — i'e'em te'e ma itabut'ūmayū.

Deus pit soat podi ma itaybit.

— Eyetaybicap taġ ġu eyetaybit ōn-eyetabucap taġ acā — i'e'em Deus.

“Jesus oe'ū wuywebeam,” i'e'em pima:

— Eybidaodao — i'e'em itabut'ūmayū wuywebe. Deus pit wuydaxijom wuyetaybit soan puye ġu-jekpot oe'ū iap kay wuyetabut puye acā.

²² — Wuywebe i'e ba'oreat cuy epeğubapuk ocetabun — i'e'em Judeuyū wuywebe. — Wuywebe i'e ba'oreat mubapuk puje acā kuka ocetabut oce'e — i'e'em Judeuyū ma. — Eywebe itaybit cīcāat ekawēn imuwēn puje acā kuka ocetabut oce'e — i'e'em Judeu'ūmayū.

²³ Wuyju bit imēn ġu e'em.

— Cristo o'subamupaya ip korosa be ce'ū ām soat peam wuywebeam — i wuyju bit e'em.

Imēn e'em pima:

— Eybidaodao ocexe — i'e'em Judeu'ūmayū wuywebe. — Eyekawēnkērē jījā ocexe — i'e'em Judeuyū wuywebe.

²⁴ Deus emunaēyū xe bit Cristo oe'ū korosa be, soat peam wuywebeam iap awēġ yawēġtip cīcā-Judeuyū

xe, Judeu'ūmayū xe dak. Deus ja'ōbacaap mubapukpuḡ wuydaxijo am Cristo oe'ū buye. Jetaybicap mubapukpuḡ tak wuydaxijo am.

²⁵ — Deus pit itaybit ḡu — i te'e ma e'em itabut'ūmayū.

Ixeyū xe itaybit'ūmat pit, soat ijodiacat etaybitbicap podi ma itaybit.

— Deus pit ya'ōbaca ḡu — i te'e ma e'em ip.

Ixeyū xe ya'ōbaca'ūmat pit soat ijodiacat a'ōbacaap podi ma ya'ōbaca.

²⁶ Okitpitpiyū, ḡebum cuy epesop apên kuy bima epesop iap kay, Deus pe eynaē awap iap kay. Ade ḡu epesop itaybit cīcāayūm ipi watwat xe. Ya'ōbuyxiayūm tak ka'ūma. Kariwayayūm tak ka'ūma.

²⁷ Deus pit abuyū ipi watwat xe itaybit'ūmayū o'taē jebekitkiyūm itaybit cīcāayū musūsūn ām. Abuyū ijodiacat xe ya'ōbuyxi'ūmayū o'taē jebekitkiyūm ya'ōbuyxiayū musūsūn ām. ²⁸ Deus ijodiat emumuymuyū o'taē jebekitkiyūm. Ijodiat emumupubutbunyū o'taē. Ijodiat xe ka'ūm cīcāayū o'taē. Ixeyū ma o'taē ipi watwat xe yoboḡat a'ōbacaap mu'ūm ām. ²⁹ Imēneju abu be xipan jewemuwēn put? Ka'ūma be ma! Xipan wuyewemuwēn pa'ore ḡasū dak Deus pe. ³⁰ Deus pit cuk eymuwedayo Jesus Cristo kay. Imēnpuye jetaybicap mōḡmōḡ wuywebe. Imēnpuye Jesus Cristo eju mūḡ'i wuyju jekukum ḡasū. Imēnpuye:

— Cūḡ ma eyju oxe — i'e'em Deus wuywebe. Deus ebekitkiyūm acesop. Ixe dak wuydaxijojom. Wuya'ōmucanucan wuywebe ikērēat kukap puxim.

³¹ Imēnpuye xipan ḡu acewemuwēn. Imēn e'em Deus ekawēntup:

“Xipat cīcā oceju bit,” i'ūmḡu juy ace, i. “Wuykukukat soat em xipat cīcā e'em wuykay,” i acā juy ace, i.

2 ¹⁻² — Wara'at ḡu oḡuwēnuwēn cebe ip. Jesus Cristo acā — i juk adi oce owebe ma eyxe bima. — Korosa be oe'ūiat acā oḡuwēnuwēn

cebe ip — i juk adi oce owebe ma. — Itaybit cīcāat puxim ġu juy iboap ekawēn oġuwēnuwēn cebe ip — i juk adi oce owebe ma. — Adem ġu oġuwēn cebe ip — i juk adi oce owebe ma.

Imēneju ōn adi oajēm eykay, okitpitpiyū. Oajēm Deus ekawēn muwēn ām eywebe- -kawēn icēmat muwēn ām. Iboap ekawēn iba'arēm osodop kuy bima soat xe wuyxe. Ġasū bit ibapuk o'e. ³ Eyxe bima ōn pit waġuy'ūm cuk adi oġuy. Ōn cuk adi oparara oġuy Deus bikuyap taġ ġu paxi a'ġu oġuwēn iap puxim. ⁴ Kawēn icēmat cuk adi oġuwēnuwēn eywebe. Itaybit cīcāat emumutaybitbinap taġ ġu juk adi oġuwēnuwēn- -Deus a'ōbacaam acā.

— Wetaybit cīcāap tomuju ġu ixeyū oġutabun Jesus kay — i juk adi oce owebe ma.

Owebe imuwēn puje, Deus biōġbuk Deus a'ōbacaap o'ġubapukpuk eywebe. Imēnpuye Jesus kay juk eyetabut epe'e. ⁵ Jesus Cristo kay juk eyetabut epesop itaybit cīcāat ekawēn co buje ġu- -Deus a'ōbacaap co buje acā.

⁶ Deus biōġbuk a'ō kay kūyjobicayū be bit itaybit cīcāat ekawēn muwēnuwēn ōn. Itabut'ūmayū ekawēn muwēnuwēn ġu bit ōn cebe ip. Ya'ōcam warara'acat kukukayū ekawēn muwēnuwēn ġu dak ōn. Ġasū acā ya'ōbuyxi jījā ip. Ġuyjom pit ya'ōbuyxian ġu ip je'e. Abuyū kukukan je'e ip ġuyjom? Ka'ūma kukukan ma ip je'e. Deus ixeyū a'ōbacaap ġu'ūm. ⁷ Soat podi ma Deus itaybit. Ixe Deus ekawēn muwēnuwēn acā ōn eywebe eyetaybit am.

— Cekay itabucayū otaxijo korosa be okpot oe'ū buye. Okpot co'iaiyūm je'e ip — io'e Deus jewebe ma ipi mujurūġ'ūm awap.

Kuy bima iba'arēm osodop iboap ekawēn. Ġasū bit ibapuk o'e wuyxe. ⁸ Ijodiat kukukayū itaybit ġu osodop iboap ekawēn. Itaybit pima ip kuka juk wuykukukat o'subamupaya ġu korosa be ce'ū ām. Ixe Jesus soat podi ma jedipap kuġ, ja'ōbuyxiap kuġ tak. ⁹ Imēn e'em Deus ekawēntup:

Deus idip cīcāat o'ġuxipan i'ūm ām
jekayayū be, i. Ajojojoiat podi ma

idip, aya'íjoiat podi ma dak, i.

Wuyağuy bodi ma dak idip, i.

¹⁰ Ibiat pit Deus o'ğubapuk wuywebe. Kuy bima iba'arēm osodop soat xe wuyxe. Ğasū bit o'ğubapuk wuywebe. Jebiōğbuk o'ğūōm wuywebe iboap mubapuk am wuywebe. Ibiōğbuk xipacat soat coco'ukat. Imēnpuye itaybit soan. Itaybit apēn Deus ibikuy wuydaxijo am iam, iba'arēm ma'ğū wuyxe. ¹¹ Warara'acat ğū itaybit apēn wuyju jewağuyğuy iam- -wuyju acā. Imēnpuxim warara'acat ğū itaybit apēn Deus jewağuyğuy iam- -ixe biōğbuk acā. ¹² Wuyju itabut'ūmayū ğū- -itabucayū ma. Itabut'ūmat biōğbuk ğū juk ajat- -Deus biōğbuk acā. Deus ma jebiōğbuk muōmōm wuywebe wuymutaybit am ajo kuy o'ğuxipān iūm ām wuywebe iam.

¹³ Ijodiat ğū juk wuymutaybitbin osunuy- -Deus biōğbuk acā. Imēnpuye ijodiat ekawēn muwēnuwēn ğū wuyju warara'acayū be- -Deus ekawēn acā. Deus biōğbuk pe wuymutaybitbinap ekawēn muwēnuwēn wuyju ixe biōğbuk kukayū be. ¹⁴ Ibiōğbuk kuğ'ūmat pe bit Deus biōğbuk ūmap ibu ba'ore. Itaybit pa'ore dak ip cebe apēnpuye iūmūm wuywebe iam. Iba'arēm cebe ip.

— Apēğām tak kuka iboap ojat? — i te'e ma e'em ip jewebe ma, Deus biōğbuk kuğ'ūm puye. Wuyetaybit Deus biōğbuk emumuūm xipat cīcā iam Ibiōğbuk wuywebe bima acā. ¹⁵ Ibiōğbuk Xipacat kukat ma soat em itaybit ajo xipat cīcā iam, ajo xipatpūt iam tak, ajo xipat ğū iam tak. Ibiōğbuk kuğ'ūmat pe bit iboap iba'arēm. Imēnpuye Ibiōğbuk kuğ'ūmayū te'e ma Ibiōğbuk kukat a'ō waywayway ip. ¹⁶ Imēn e'em Deus ekawēntup:

Abu xe'e itaybit apēn Deus jewağuyğuy iam? Ka'ūma ma, i. Abu be ixe awē but? Ka'ūma be ma, i.

Cristo ağuy dağ wuyju bit jewağuyğuy, ixe biōğbuk omuy wuywebe buye. Imēneju te'e ma Ibiōğbuk kuğ'ūmat wuya'ōxikxiğ.

3 Okitpitpiyū, bekicat ikap'isuat puxim epe-
sop Deus biōḡbuk a'ō kay kūyjobitbūt puye.
Imēnpuye Deus biōḡbuk kukat eju wekawēnap puxim
ḡu juk adi ocekawēn eyweju- -kūyjobit'ūmat eju we-
kawēnap puxim acā. ² Apēn wuyju kūmti ūmūm be-
kicat pe iap puxim kawēn iba'arēmān ḡu oḡuwēnu-
wēn eywebe kawēn ibapukan acā Deus ekawēn'in.
Kawēn iba'arēmān pit eyetaybit pa'ore epesop. Ḡasū
dak eyetaybit pa'ore ma, ³ itabut'ūmayū buxim eyju
jekukum puye.

Eyetabutkarey eyewewekay. Jewa'ōxikxiḡ eyju
eyewewēju. Imēn eyeku buje, itabut'ūmayū jo'i eyju
jekukum, Deus biōḡbuk a'ō kay'ūmayū jo'i- -Ibiōḡbuk
kuḡ'ūmayū jo'i. Imēneju iba'ore owebe eymutaybit
am yaypanat mukūyjoap puxim.

⁴ — Paulo kadiayū oceju bit — i'e'em ey'in.

Warara'acayū bit e'em:

— Apolo kadiayū oceju bit — i.

Imēnpuye eyju itabut'ūmayū jo'i jekukum.

⁵ Apolo bit yoboḡat ḡu. Ōn tak yoboḡat ḡu. Ōn
Deus peam kapikpik'ukat acā. Apolo dak ibicat ma.
Jesus Cristo muwēnuwēn'ukayū acā oceju. Eyetabut
cekay ḡasū, juk adi ixe oceḡuwēn eywebe buye. Wuy-
kukukat kapikap ūmūm soat pe wuywebe. Imēḡap pe
acā kapikpiḡ wuyju. ⁶⁻⁹ Eyju Deus kat puxim. Kat
iwat puxim Deus eykuḡ xipan. Apolo, ōn tak Deus
kat pe kapikpik'ukayū buxim. Oceju eymutaybitbin.
Cristo muwēnuwēnap iḡo kat pe kadai daidadamap
puxim. Koap ōn cuk adi Cristo oḡuwēnuwēn eywebe.
Imēnpuye eyetabut cekay. Cristo ekawēn imutaybit-
binap kadai abibimap puxim. Ḡuyjom Apolo juk
adi Cristo ekawēn eymutaybitbin osunuy. Deus pit
cuk eymubikay jebiōḡbuk a'ō kay am. Deus pe acā
kadai muaypan put. Imēnpuxim Deus acā wuy-
mubikuy jebiōḡbuk a'ō kay am. Imēnpuye yoboḡ ḡu
Cristo muwēnuwēn'ukat, cekawēn imutaybitbin'ukat
tak. Deus acā yoboḡ, ixe wuy-
mubikuy jebiōḡbuk a'ō kay am puye. Cristo muwēnuwēn'ukat
cekawēn imutaybitbin'ukat co'i Deus xe. Jewejojoi ma ip.
Deus kapikapteideida soat pe kapikpik'ukat pe.
Apēn cuk adi o'jekapikpik ip iap taḡ ideida ip ce-

be. Ade xipacat je'gūm cedaḡ ma o'jekapikpik'iat pe. Warēmtaḡ ma o'jekapikpik'iat pe bit yopit ma je'gūm.

Deus emuamuy'a buxim eyju. Uk'a iwat puxim Deus eykuḡ xipan. ¹⁰ Cristo uk'a muycemucem'iat puxim. Wuyju uk'a muycemucemap mōḡmōḡ uk'a'a-bi daḡ ya'acap puxim. Imēnpuxim cuk adi Cristo oḡuwēnuwēn eywebe eyetabut am cekay, ipiat'ajojoap pe eyjuap puxim. Deus ja'ōbacaap o'jomōḡ owebe Cristo muwēn ām itabut'ūmayū be. Cristo muwēnuwēnap uk'a muycemucemap mōḡmōḡap puxim. Warara'acat cekawēn eymutaybitbin ḡasū odieḡ. Ixe uk'a muymuy'ukat puxim. Ixe cūḡ ma juy jeymutaybin. ¹¹ Deus kuy Jesus Cristo o'ḡudot ijodi.

— Warara'acat kay ḡu juy epesop eyetabun-okpot kay acā — i'e'em Deus ijodiacat pe.

Wuyju uk'a muycemucemap mōḡmōḡ yamuycem am. Imēnpuxim Deus jekpot o'ḡudot ijodi wuywebe wuyetabut am cekay ipiat'ajojoap pe wuyjuap puxim. ¹² Eymutaybitbin'ukayū uk'a muymuy'ukayū buxim. Pūḡpūḡ uk'a muymuy'ukayū yakoroat'a muymuy. Ourom yamuymuy ixeyū, pratam tak, wita'am tak-yasopsepat'am- -yadeiboḡat'am. Cūḡ ma eymutaybitbin'ukayū buxim ixeyū ma. Warara'acayū bit yakoro'ūmat'a muymuy. Im yamuymuy ip, kapi'idim tak, uktum tak. Cūḡ'ūma eymutaybitbin'ukayū buxim ip. ¹³ Daxam yamupik puje abuyū yacemat'a o'yamuy iap ibapuk e'em soat xe, abuyū yacem'ūmat'a o'yamuy iap tak, yakoro'ūmat'a yamupik puye. Imēn tak je'e Cristo ajēmap kabia, kūyjobit'ūmayū be ipiat-pi'ajoan iap kabia. Iwapuk je'e abuyū juk adi cūḡ ma eymutaybitbin iap, abuyū cūḡ'ūma juk adi eymutaybitbin iap tak. Cūḡ ma eymutaybitbin pima, eyetabut cīcā epesop yajēm puje. Cūḡ'ūma eymutaybitbin pima bit, kuy juk adi eyetabucap epeyepere yajēm puje. ¹⁴ Yapikpek'ūmat'a duk'a iwat tuk'a'e mabuk daxa epirēm puje. Imēnpuxim cūḡ ma eymutaybitbin'ukayū xipacat je'jat Deus xewi jekapikapteim. ¹⁵ Yapikpekat'a duk'a iwat pit tuk'a'e ḡu e'em, soat o'yapik puye. Imēnpuxim cūḡ'ūma eymutaybitbin'ukayū xipacat je'jat ḡu jekapikapteim. Imēnpit

idaxijo ma ip daxa bewi o'jenapōniat puxim. ¹⁶ Eyju ġebum ġu aco'i Deus biōġbuk nuynuy wuywebe iap kay. Eywebe dak ixe nuynuy ma. Imēnpuye Deus nuynuyap co'i wuyju. ¹⁷ Deus nuynuyap ikērēat kuġ ġu. Idip cīcā soat taġ. Wuyju ma ixe nuynuyap co'i. Imēneju Deus ipiat supi'ajoat cūġ'ūma eymutaybit-bin'ukayū be jenuynuyap mukērērēn'iyū buxim ip puye.

¹⁸ Jewemuġuykukum ġu bit cuy epesop.

— Itabut'ūmayū xe ocetaybit cīcā — i te'e ma pūġpūġ ey'in e'em.

Jewexe eyetaybicap cuy epeyepere icēmān eyetaybit am Deus xe. ¹⁹ Itabut'ūmayū xe itaybit cīcāyū ibidaodao ip Deus xe. Imēn e'em Deus ekawēntup:

Deus a'ōbi jewexe itaybicat jewemuġuykuku jetacokcokap kuġ, i.

²⁰ Wara'atup e'em:

Deus itaybit jewexe itaybicat te'e ma jewaġuyġuy iam, i.

²¹ Imēneju:

— Wuyetaybit soan ma — i'ūmġu juy ace.

Soat kukat puxim eyju Cristo eykukat puye. ²² Ōn eybuywatwat'ukat Cristo a'ōbi, Apolo dak, Pedro dak. Deus soat ipi daġacat o'ġuġē xipan eykuk am. Eyetabēġ pima, xipan eykuġ. Eye'ū buje dak, xipan jeykuk. Xipan eykuġ ġasū. Ġuyjom tak xipan jeykuk.

²³ Deus Cristo kukat. Cristo dak eykukat. Imēneju soat kukat puxim eyju.

4 Cristo buywatwat'ukayū kukap puxim cuy ocekuġ epesop, oceju Deus ekawēn muwēnuwēn puye- -kuyje iba'arēm osunuy iap ekawēn muwēnuwēn puye- -ġasū ibapuk o'e iap ekawēn muwēnuwēn puye. ² Kariwa e'em jebekitkit pe:

— Wara'acat a'ō kay ġu bit cuy ece- -wa'ō kay acā — i.

Wara'an ġu e'em cebe ip- -jebekitkit pe. Imēnpuxim Deus e'em jebuywatwat'ukat pe:

— Wara'acat a'ō kay ġu bit cuy ece- -wa'ō kay acā — i.

Wara'an ġu e'em cebe. ³ Ak'arit'ūma oce eyekawēn kay “Paulo jekariwa a'ō daġ jekukum” i'e buje. Warara'acat pe “Paulo jekariwa a'ō daġ jekukum” i'e buje dak, ak'arit'ūma oce cekawēn kay. Owebe “Wekariwa a'ō daġ ōn jekukum” i'e buje dak, ak'arit'ūma oce wekawēn kay. ⁴ Oweweju bit a'ġu wekariwa a'ō daġ ōn jekukum. Imēnpit wekariwa a'ō daġ ōn jekukum iap ibapuk ġu soat xe ijodiat xe, “Wekariwa a'ō daġ ōn jekukum” i ma'ġu ōn e'em. Wuykukukat Jesus pe “Paulo wa'ō daġ jekukum” i'e buje bit, ibapuk e'em ya'ō daġ ōn jekukum iap. ⁵ Imēnpuye waram wuykukukat ajēm'ūm pima:

— Ikērēat kuġ ēn Deus xe — i'ūmġu juy epe'e warara'acat pe.

Wuykukukat ma apēn cuk adi iba'arēm ma'ġu aġu-jurūrūġ iap ġubapuk soat pe. Jajēm puje iboap ġubapuk. Apēn cuk adi wuybikuy i'e am ajop iap tak ġubapuk soat pe. Ixe je'e: — Xipat eyju oxe — i wuywebe, cedaġ ma ajekuku bima.

⁶ — Eybureyū ejomuymuy ġu juy wara'at muwēnuwēn xipan pima — i'e'em Deus ekawēntup. Imēnpuye:

— “Paulo ya'ōbuyxi ġu ocexe- -Apolo acā,” i'ūmġu juy epe'e — i ōn e'em eywebe, okitpitpiyū. Eyju pūġ taġ ma ocekuġ pima, kuka ibo dup ekawēn taġ epeku.

— Pūġ taġ ma juy soat epejukuk — i ōn e'em waram eywebe.

⁷ Ibit wedep ma soat wuyju Deus xe. Ka'ūmġu iwaruat cexe. Imēnpuye pūġ taġ ma juy soat epeyewekuk. Ajo-kuġ eyju Deus o'ġūm ġu eywebe iat? Ka'ūma kuġ ma! Apēnpuye dak eyju napa ma e'em: — Deus soat ġu o'ġūm ocewebe — i?

⁸ Tūybe oceju soat kuġ iān eyju e'em. Tūybe oceju ibubut adeayū iān eyju e'em.

— Deus eju warara'acat kukukayū oceju, Paulo bit ka'ūma, Apolo dak ka'ūma — i eyju e'em te'e ma.

Eyju warara'acat kukukan pima bit, kuka juk ocok-

cok oce. Eyju warara'acat kukukan pima, wuyju dak kuka juk ixeyū kukukan acesop eyweju. ⁹ Deus aco'i juk ocemuy ka'ūmaayūm ma soat xe, ixē emumujuyū ma'ḡu oceju. "Ixeyū juy ayaoka soat etabutpe xipat'ūm cīcā ip puye" i'e'em ip iat puxim aco'i oceju. Soat aco'i ocejōm- -kabi beacat, ipi juacat tak. ¹⁰ Itabut'ūmat xe ocadaodao, Cristo kay ocetabut puye. Eyju bit eyetaybit cīcā ceweju mūḡ'i eyju jekukum puye. Itabut'ūmat xe oca'ōca ḡu. Eyju bit eya'ōca cexe ip. Ocemuybuyxi'ūm'ūm ip. Eybuyxim pit ip eykuḡ. ¹¹ Ocereren ma juk adi ocekuu, ocebi-purukruk tak. Iokokat kuḡ ma dak cuk adi ocekuu ocedotim. Warara'acat tak cuk adi ocemupokupok. Pūḡ ka be ḡu dak cuk adi ocekuu- -soat kaka daḡ. Imēn ma oceju jekukum ḡasū dak. ¹² Kapikpiḡ cīcā ocexat pu am, ocedoti bu am tak. Warara'acat pe ocemuy muy buje, ocejede ḡu cebe ip.

— Deus cuy xipacat je'ḡūm eywebe — i bit oceju e'em cebe ip.

Ipiat'ajōm pima dak ocetaxi jījā. ¹³ Warara'acat pe ocemuy muy buje, ikērēm ḡu bit ocejede- -xipan ma. Kaokok co'i oceju itabut'ūmat xe.

¹⁴ Imēḡaptup mubararaḡ ōn eymusūsūn ām ḡu- -eymukūyjo am acā. Eykukpin cīcā oxe. Webekitkiyū jo'i eyju oxe. Imēnpuye ōn eymukūyjo ojuy. ¹⁵ Adeayū kuka eymutaybin Cristo ekawēn- -10,000 beayū ma. Pūḡ ma eyebay bit. Kuy juk eyetabut epesop Jesus Cristo kay kawēn idipat oḡuwēn eywebe buye. Ceweju mūḡ'i eyju jekukum ḡasū. Imēnpuye ōn eyebay jo'i. Imēnpuye ōn eymukūyjo ojuy. ¹⁶ Imēnpuye:

— Obuxim cuy epesop yoboḡan pin ḡu — i ōn e'em eywebe.

¹⁷ Imēnpuye Timóteo juy oḡuju eykay. Ixe Timóteo okpot co'i. Ixe cūḡ ma kapikpiḡ wuykukukat peam. Ikukpin cīcā oxe.

— Paulo yaḡuyisu jekukum Jesus Cristo a'ō daḡ jekukum puye — i je'e eywebe ixē Timóteo ma. — Imēn Paulo itabun'isuayū mutaybitbin tak soat ka watwat mutaybitbin — i je'e eywebe eyaḡuyba'ūmap puxim.

¹⁸ Pūḡpūḡ ey'in pit jewexe itaybicayūm o'e. Tūy-

be Paulo omuyku ġu ocejo am iān o'e ip. ¹⁹ Deus ibi-kuy bima bit, ġaxīn ma oju eyjo am. Wetarybit ma'ġu ġasū jewexe itaybicayū ekawēn. Eyjo buje bit, wetarybit oce Deus a'ōbacaap kuġ ip iam, ikuġ ġu ip iam tak. ²⁰ Deus wuykukukat e'em "Ēn ma ocekkukat" i wuyju e'em pima ġu-ya'ōbacaap kuġ wuyju jekukum pima acā. ²¹ Eybu'u du omudon wa'ōpuruġ eymukorēm ām? Eybu'u ġu xe'e owebe eykuk am xipan? Eybikuy owebe eykuk am xipan pima, ikērēat muġēġēap cuy epeyepere.

5 — Corinto ka beat jexidaap eju o'jepo itabut ma'ġu Jesus kay — i'e'em owebe yajēm'isuat.

Imēġap ikērē jījā Deus xe. Itabut'ūmayū bit isūsūn kuka o'e imēn i'e am. ² Te'e ma eyju bit e'em:

— Xipat cīcā oceju — i.

Imēn ġu juy epe'e! Eyġuycūġcūġ cuy epesop ixē aġokatkat ikērēat mujurūġrūġ puye. Ixē aġokatkat ikērēat kay iġuycūġ'ūm pima, epeġuōm ġu juy Deus eju kawēnwēnap'a be je'awero am eyweju. ³ Wūy ma ōn pit eywi. Inaka ġebum cīcā ma ōn eykay soat em.

— Ixē aġokatkat ikērē jījā, Deus xe ikērēat mujurūġrūġ puye — i ōn e'em eywebe Jesus Cristo a'ōbi.

Eyxe bima dak imēn ma kuka oce eywebe. Imēneju awerom ġu juy epesop ixē eju. ⁴ Eye'awero buje wuykukukat Jesus jeenuy eyxe. Soat em ma wuykukukat Jesus jekukum wuyweju wuya'ōmucanucan. Eye'awero buje dak jeenuy eyxe. Ōn tak eyxe bimaap co'i ma oġuy, soat em ōn ġebum eykay buye. ⁵ Eye'awero buje juy epe'e ixē aġokatkat pe:

— Satanás acā juy ekukan — i.

Imēn cuy epe'e ixē mubu'un am ikērēat mujurūġap puxim. Je'ū aco'i xeku. Ikērēat mujurūġap o'jepere bima bit Deus ixē aġokatkat biōġbuk idaxijo. Ibiōġbuk idaxijo wuykukukat ajēm puje, kūyjobit'ūmayū be ipiatpi'ajoan iap kabia be.

⁶ Te'e ma eyju e'em: — Warara'acat podi ma

oceju xipat — i, cūg ġu eyju jekukum puye. Pāo'a muyuhaptōm ikērēat mujurūgrūgāp puxim.

— Tōm'icatōm pāo'a muyuhum- -yaboğat'a muyuhum — i wuyju e'em.

Imēnpuxim pūg ma wuy'inat ikērēat kuğ pima, warara'acayū dak ikērēat mujurūg ojuy ma e'em ixe buxim. ⁷Ikērēat mujurūgrūgāp cuy epeyepere- -soat eyju! Ikērēat mujurūg'ūm pima, ikērēat kuğ ġu epesop. Pāo'a buxim epesop- -yamuyuhuhaptōmtēm'ūmat'a buxim. Kuyje Judeuyū ovelha o'yaoka ip Egito eipi bewi cēm pima. Ovelha oe'ū uk'a beat e'ūap puxim. Imēnpuxim Cristo oe'ū wuye'ū'ūap puxim. Páscoa epeta bima Judeuyū ġebum wuydobuyū'ūm'ūm e'ūap puxim ovelha'ūm oe'ūiap kay. Wuyju dak cuy aceğebu wuye'ū'ūap puxim Cristo oe'ūiap kay. ⁸Jesus oe'ū wuye'ū'ūap puxim. Imēnpuye ikērēat mujurūgrūgāp cuy acepere. Ikērēat ağujurūg ġu juy ġasū bit. Cūg ma juy aceku. Icēmān cuy acekawēn. Imēn jekukum pima, Jesus e'ūap kay juy aceğebu apēn Judeuyū ovelha e'ūap kay ġebum iap puxim.

⁹Wara'atup kuy otupmubararak eywebeaptum cartadup. Ixedup pe juk oce eywebe:

— Aoyū kaykayat purem ġu juy epeku, warara'acat itop kaykayat purem ġu dak, jewekpidao-dao'ukat purem ġu dak, jenuy'ūnakēkē'ukat purem ġu dak — i.

¹⁰Itabut'ūmayū warara'acat tayxi kaykay ip, warara'acat itop kaykay dak. Itabikuku jijā dak ip warara'acat pubut kay. Kūyjobit ġu dak ip jeka kukat a'ō kay. Te'e ma dak itabut ip jewexe deus'iaiyū kay- -wita'a muğēgē kay. Itabut'ūmayū xe eydop pin'ūm pima bit, kuka epejēm ipi dağwi. "Ixeyū xe epesop ġu" i'ūmġu juk oce eywebe, "Ixeyū burem ġu juy epeku" acā. ¹¹Warara'acat pit jewexe itabut Jesus kay. Te'e ma wuyju e'em "Ocekitpit" i ixeyū be. Warara'acat tayxi eju jepopo'uk ip. Warara'acat itop eju dak jepopo'uk ip. Itabikuku dak ip warara'acat pubut kay. Te'e ma dak itabut ip jewexe deus'iaiyū kay- -wita'a muğēgē kay. Jebureyū muymuy'uk tak ip. Ika'o'om tak ip jekukum. Ka'ūma am ma ip xipat.

— Jewexe itabucayū burem ġu juy epesop — i
 òn e'em eywebe.

Epeyekòn ġu dak cuy ceweju ip- -pūġ em tak ka'ū-
 ma.

^{12 · 13} — Ikērēat kuġ eyju Deus xe — i'ūmġu òn
 pit e'em itabut'ūmayū be.

Deus pit imēn je'e cebe ip. Òn pit, ka'ūma. Cūġ ma
 eywebe bit "Ikērēat kuġ ēn Deus xe" i'e am eyxeat
 pe- -Jesus kay itabucat pe- -eyweju je'aweroro'ukat
 pe. Imēn e'em Deus ekawēntup:

Ikērēat mujurūġrūġ'ukat cuy epeġujēm
 eyxewi, i.

6 Eyju ikitpitpiyū Jesus Cristo kay eyetabut
 puye. Eyeweweju jewa'òmukorēmrem pima,
 itabut'ūmat kay bit cuy epeju ġu ibimāmāat ekawēn
 coco'ukat kay ixē be eymudin am. Eykitpit kay acā
 juy epeju- -itabucat kay acā. Ixē kay juy epeju ixē be
 eymudin am. ² Wuyju Deus ebekitkit. Ipi'ūm puje
 abuyū ipi daġayū'in ikērē Deus xe iap aceġuwēn.
 Abuyū ikērē ġu cexe iap tak aceġuwēn. Eyetaybit ġu
 du iboam? Iba'ore xe'e eywebe eykitpitpiyū mudin
 am? ³ Abuyū Deus ekawēn tojtjot'ukayū'in ikērē
 Deus xe iap aceġuwēn. Abuyū ixeyū'in ikērē ġu cexe
 iap tak aceġuwēn. Eyetaybit ġu du iboam? Imēnpuye
 eybu'um ġu juy epesop eykitpitpiyū mudin am. ⁴ I-
 mēnpuye eyju jewa'òxikxiġ pima, itabut'ūmat kay ġu
 juy epeju ixē be eymudin am- -ya'òbuyxi ġu ip Jesus
 kay itabucayū xe buye. ⁵ Eysūsūn cuy epesop ita-
 but'ūmat kay eyju cucum pima. Ka'ūmġu du eypa-
 rakpeat itaybicat? Kake ma! Iba'ore du eywebe jewe-
 mudin am? Iba'ore ġu ma! ⁶ Inaka eyju eykitpit tujo-
 watwan itabut'ūmat kay imuymuy am. Imēġap pit
 cūġ ġu!

⁷ Eykitpit tujowatwan itabut'ūmat kay imuymuy
 am pima, itabut'ūmat ekukuap co'i ma eyju dak je-
 kukum. Deus ekawēn taġ'ūma. Epetujowat ġu juy.
 Āġ jeenuy ikērēm eykuġ. Ak'arit'ma juy eybubut tu-

jupa'um puje dak. ⁸ Eyju ma warēmtaḡ warara'acat kuḡ jeweik am. Warara'acat pubut tujupa'um'um tak eyju jeweik am. Warēmtaḡ eykitpit kuḡ tak eyju jeweik am. Eykitpit pubut tujupa'um'um tak eyju jeweik am. Imēnpuye cūḡ ḡu eyju jekukum. ⁹ Deus soat kukukan pima, cūḡ'ūma jekuku'ukayū ḡu bit jeedop cexe. Gebum cuy epesop iboap kay. Jewemuḡuykukukum ḡu juy epesop iboap kay. Ikērēat mujurūḡrūḡ'ukayū ḡu bit jeedop cexe Deus soat kukukan pima; warara'acat tayxi eju jepopo'ukayū ḡu dak; warara'acat itop eju jepopo'ukayū ḡu dak, jewexe deus'iat kayayū ḡu dak; jewekpidaodao'ukayū ḡu dak; jenuy'ūnakēkē'ukayū ḡu dak; ¹⁰ warara'acat pubut tujupa'um'um'ukayū ḡu dak; warara'acat pubut kay itabikukuayū ḡu dak; ika'o'on'ukayū ḡu dak; jebureyū muymuy'ukayū ḡu dak; jeka kukat a'ō kay'ūmayū ḡu dak. Ixeyū ḡu bit jeedop Deus xe ixē soat kukukan pima. ¹¹ Pūḡpūḡ ey'in tak imēn cuk adi epekuku kuy bima--eyetabut'ūm pima. Gasū bit Deus ikērēat o'ju'uk eywebewi. Ixe kuy juk eynaē jebekitkin soat em ja'ō daḡ eyeku am. Ixe e'em eywebe:

— Cūḡ ma eyju oxe — i.

Imēn Deus e'em wuywebe, wuyetabut wuykukukat Jesus Cristo kay buye. Imēn ixē e'em wuywebe, Deus biōḡbuk omuy wuywebe buye dak.

¹² Ey'inat pit aco'i je'e owebe: — Ōn pit Cristo ebekit. Imēnpuye soat i'epi ḡu owebe — i. Icēmān ixē e'em. Soat i'epi ḡu wuywebe. Imēnpit soat ḡu xipat wuywebe i'e am. "Soat i'epi ḡu ocewebe" i'e but wuywebe. Inaka soat ḡu ojoixik cepere ba'oreap puxim. ¹³ Warara'acat pit aco'i je'e owebe:

— Wuyxaxet wuydadade buye--wuydadade wuyxaxet puje dak — i.

Icēmān ixē e'em. Guyjom pit Deus xepxem ma ḡu'ūm--wuyxat, wuydada dak. Deus cuk wuymuḡē warara'acat tayxi eju wuyepo am ḡu, warara'acat itop eju wuyepo am ḡu dak; wuyekpidaodao am ḡu dak; wuyenuy'ūnakēkē ām ḡu dak. Deus cuk wuymuḡē ja'ō kay am acā. Jewebe am kapik am tak cuk

wuymuḡē. Ya'ō kay'ūm pima, te'e ma kuka ajeku. ¹⁴Deus pit wuykukukat o'ḡutait ce'ūap tomukadi. Imēnpuxim wuyju dak wuymutait wuye'ūap tomukadi. Ja'ōbacaan ma wuymutait.

¹⁵Jesus kay wuyetabun puje wuyjebit Cristo jebit'inat e'em. Imēnpuye ikērē jījā wuyewedaodao am yapoat eju. Ikērē jījā Deus xe wuyjebit Cristo jebit'inat puye. Imēnpuye yapoat eju epeyepo ḡu juy-pūḡ em tak ka'ūma. ¹⁶Yapoat eju jewedaodao bima pūḡat puxim wuyju e'em ceweju. Eyetaybit iboam. Imēn e'em Deus ekawēntup: Xepxepayū pūḡat puxim e'em, i. ¹⁷Wuykukukat eju mūḡ'i jekukum pima bit, pūḡat puxim wuyju dak e'em ceweju ibiōḡbuk a'ōbi.

¹⁸Tapupuyū, warara'acat tayxi eju juy epeyepo ḡu. Tū'ū'ūyū, warara'acat itop eju juy epeyepo ḡu. Wara'at mujurūḡrūḡ pima ikērēat kuka wuyjebit aḡukērērēn ḡu. Yapoat eju jepopom pima bit, kuka wuyjebit aḡukērērēn. ¹⁹Eyaḡuyba'ūm ḡu juy iboap kay. Wuyjebit Deus biōḡbuk tūytūyap- Ibiōḡbuk Xipacat tūytūyap. Ixe biōḡbuk omuy wuyjebit pe-Deus wuwebe o'ḡuōmiat. Wuyju ḡu jewekukat. Deus acā wuykukat. ²⁰Deus ma juk ikērēat o'ju'uk eywebewi. Cristo e'ūap eywebe ikērēat muḡēḡēaptei o'teida. Imēnpuye idipat acā juy aḡuḡē ijodi. Idipat muḡēḡēm pima bit, "Ka'ūmḡu Deus co'i idipat" i je'e itabut'ūmayū eyekukuap co buje.

7 Kuy juk eyemudupmubararaktup otupu car-tadup. Ibodup pe juk epe'e owebe "Xipat tu ocewebe jewebumūn ām? Xipat ḡu xe'e?" i. Iboam ōn jeymukūyjo ḡasū. Aḡokatkat ewebumūn'ūm pima, xipat ma jeku. ²Imēnpit adeayū ikērēat mujurūḡrūḡ cewebumūn'ūm pima. Cewebumūn'ūm pima warara'acat tayxi eju jepopom aḡokatkat. Ayacat tak jepopom warara'acat itop eju. Imēnpuye juy epeyewebumūn. Xipat soat pe aḡokatkat pe cewetayxida am. Xipat soat pe ayacat pe dak ceweitopta am. ³Tapu-

puyū, etayxi eju juy ecepo, cepo pin pima. Aoyū, ektop eju juy ecepo, cepo pin pima. Eybu'um ġu juy epesop jepo am eytayxi eju eytop eju dak. ⁴Aoyū, eybikuy bima acā ġu juy epeyepo eyitop eju, ixē ibikuy bima dak. Tapupyū, eybikuy bima acā ġu juy epeyepo eytayxi eju- -ixē ibikuy bima dak. ⁵Pūġ em ġu aco'i epe'e eyewewebe:

— Ġasū bit acejewedaodao ġu dak — i. — Deus eju acā acejekawēn ġasū bit — i aco'i epe'e eyewewebe.

Ade kabia ġu bit epe'e:

— Ġasū bit ocepo ġu eweju — i eytayxi be, eyitop pe dak.

Deus eju eyekawēnap kabia kap puje juy waram ġuto epeyepo eyitop eju, eytayxi eju dak. Ade kabia “Acepo ġu ġasū bit” i eyju e'em pima, Satanás “Warara'acat eju juy epeyepo” i je'e eywebe. Ade kabia jepopom'ūm pima, kuka Satanás a'ō kayan epeku.

⁶— Imēn cuy epeku — i'ūmġu ōn pit e'em eywebe. — Oxe bit xipat kuka o'e imēn eyeku am — i acā ōn e'em.

⁷Otayxixē ġu ōn pit. Soat eytayxixē'ūm pima, xipat kuka o'e. Deus pūġpūġayū buywatwan ixeyū be ikērēat kukap puxim itayxixē ġu ma'ġu ip. Warara'acat pe bit iba'ore cūġ ma jeku am itayxixē'ūm pima. Ikērēat mujurūġrūġ ip itayxixē'ūm pima. Imēnpuye Deus ibikuy ixeyū ewebumūn ām ikērēat kukap puxim.

⁸— Epeyewebumūn ġu juy — i ōn e'em tak o'jewebumūn ġu buk ip iayū be. — Obuxim cuy epesop — i ōn e'em cebe ip. — Waram ġu juy epeyewebumūn — i ōn e'em itop'ūm e'ū'ibiyū be, itayxi e'ū'ibiyū be dak.

⁹Soat em ġebum ayacat kay bima juy epeyewebumūn. Aoyū kay eyetabikukuap xipat ġu. Jewebumūn ām acā kuka o'e xipat eywebe.

¹⁰⁻¹¹Cewebumūn'ibiyū oġukūyjo ġasū bit. Wa'ōbi ġu ōn jeymukūyjo- -wuykukukat a'ōbi acā. Tapupyū, eytayxi juy epeyepere ġu. Aoyū, eyitop cuy epeyepere ġu. Eyitop epere buje bit cuy waram

epeyewetopta ġu. Eyepit put koap epesop ikuġ iat kay eyitop kay.

¹² Warara'acayū oġukūyjo ġasū bit. Itabut'ūmat eju cewebumūn'ibiyū oġukūyjo ġasū- -itabucayū oġukūyjo. Deus a'ōbi ġu ōn jeymukūyjo. Okpiwatpi ma ōn e'em eywebe. Okitpitpiyū, pūġpūġ ey'in cuk epeyewebumūn itabut'ūmat eju. Eytayxi itabut ġu Jesus kay. Eyxe tūy pin cīcā bima bit cuy epeyepere ġu. ¹³ Wuyīxīyū, pūġpūġ ey'in cuk epeyewebumūn itabut'ūmat eju. Eyitop itabut ġu Jesus kay. Eyxe tūy pin pima bit cuy epeyepere ġu. ¹⁴ Ixeyū epere'ūm pima, Deus xipacat je'ġūm eyitop pe, itabut ġu ma'ġu ip, itabucacat xe nuynuy'uk puye- -jetayxi xe nuynuy'uk puye. Imēnpuxim Deus xipacat je'ġūm eytayxi be, itabut ġu ma'ġu ip, itabucacat xe nuynuy'uk puye- -jektop xe nuynuy'uk puye. Imēn'ūm pima, itabut'ūmayū ebekitkiyū jo'i ma kuka o'e eyebekitkiyū. Deus pit xipacat ūmūm eywebe, eyebekitkiyū be dak itabucacat xe nuynuy'uk puye. ¹⁵ Deus cuk wuynaē kaba'ūma wuydop am wuyitop eju, wuytayxi eju dak. Imēnpuye itabut'ūmat jetayxi epere pin pima, itabucacat epere pin pima, xipacat kuka o'e jetayxi epere am.

— Operem ġu juy ece — i'ūmġu juy je'e itabucacat itabut'ūmat pe.

Āġ je'ju ip. ¹⁶ Imēnpuye eyitop xe juy epesop, wuyīxīt! Ixeyū xe eynuy buje, kuka itabut o'e ip Jesus kay. Imēnpuye, eytayxi xe juy epesop, okitpitpiyū. Ixeyū xe eynuy buje, kuka itabut o'e ip Jesus kay.

¹⁷ Deus ja'ōbacaap ūmūm wuywebe soat taġ wuyekapik am cebeam. Imēnpuye ibikuyap taġ cuy epekuku. Deus pe eynaē buje eyekapikap kuġ cuk adi epesop. Ibeat kuġ cuy epeyekapik ġasū dak. Imēn soat ka watwat mukūyjojom ōn- -itabucayū mukūyjojom. ¹⁸ Deus e'em taypu'aġobixeedakat'ibit pe:

— Webekin cuy ece — i.

“Ebekin oce ġasū” i'e'em pima, waram pit suxeemōġ ġu juy. Imēnpuxim Deus e'em taypu'aġobixeedakat'ūmat pe:

— Webekin cuy ece — i.

“Ebekin oce ġasū” i'e'em pima, jedaypu'aġobidakacat ġu juy.

¹⁹ — Ecewedaypu'aġobixeedakat tu? — i'ūmġu Deus e'em wuywebe. — Ecewedaypu'aġobixeedakat ġu du? — i'ūmġu dak. — Wekawën taġ tu eyju jekukum? — i acā Deus e'em wuywebe.

²⁰ Deus pe eynaē buje eyekapikap kuġ epesop. Ibeat kuġ cuy epeyekapik ġasū dak. ²¹ Pūġpūġ ey'in tei'ūma kapikpik'ukayūm cuk adi epesop Deus pe eynaē buje. Eyaġuybabi'ūm ġu bit cuy iboap kay. Kapikpiġ cuy epesop eyekariwa beam. Eyekariwa xewi eyjēm put pima bit, epejēm cuy teihem kapik am warara'acat peam. ²² Inaka tei'ūma kapikpik'ukayū jekpiwatpin ġu jekukum- -jekariwa ukpiwatpi acā. Wuykukukat pe ixeyū naē buje bit, wuykukukat ukpiwatpi jeku ip. Teihem kapikpik'ukat pit jekpiwatpi jekukum. Wuykukukat pe ixeyū naē buje bit, jekpiwatpin ġu jeku ip- -wuykukukat ukpiwatpi acā. ²³ Deus cuk teihem wuydaxijo. Imēnpuye ijodiat ukpiwatpin ġu juy epesop. Cristo ukpiwatpi acā epeku. ²⁴ Okitpitpiyū, Deus pe eynaē buje, eyekapikap kuġ epesop. Ibeat kuġ cuy epeyekapik ġasū dak. Deus tak eybuywatwan jeenuy.

²⁵ Kuyatup pe owebeaptup pe “Apën xe'e kuka cewebumün'ūmayū oceġukuyjo?” i juk epe'e owebe. Wuykukukat pit cuk omukūyjo ġu iboam. Jeymukūyjo òn wuykukukat a'òbi ġu- -waġuybin ma. Imēnpit wuykukukat Jesus itabotaidabotbot cīcā osunuy okay. Imēnpuye ya'ò daġ òn jekukum. Imēnpuye eyetabun cuy epesop wekawën kay.

²⁶ Wuykay itakomaayū ipiat'ajojoan cīcā wuywebe- -itabut'ūmayū. Imēnpuye:

— Xipat kuka wuywebe wuywebumün'ūm ām — i òn e'em.

²⁷ Eytayxixe bima bit cuy epeyepere ġu. Eytayxi-xe'ūm pima bit cuy epeyewetayxida ġu. ²⁸ Eyewebumün puje bit, ikērēat epeġuġē ġu. Imēnpit eyewebumün puje, ġebum cīcā epesop eyzat puap kay, eytay-

xi esay buap kay dak. Ōn pit obu'u eywebe eyeḡebu am ijodiap kay.

^{29 - 31} Okitpitpiyū, ḡaxīn ma aco'i Cristo jajēm waram. Ijop eipi dao ma je'kop. Apēn ḡasū dopdom iap i'ūm. Imēnpuye itayxixeat cuy itayxixe'ūmat co'i jeku. Waat tak cuy icokcokat puxim jeku. Jewaywaywayat tak cuy iḡuycūḡat puxim jeku. Tarekrek pu-pu'ukat tak cuy o'jat ḡu buk'iat puxim jeku. Tarekrek kukuk'ukat tak cuy ikukuk'ūmat puxim jeku.

³² Ōn pit obu'u eywebe soat em ḡebum am ijodiap kay-eybubut puap kay. Itayxixe'ūmat soat em ḡebum Deus kay. Soat em Deus mucokcok pin.

— Apēn xe'e oce Deus mucokcok am? — i'e'em soat em jewebe ma.

³³ Itayxixeat pit soat em ḡebum ijodiap puap kay tarekrek puap kay, jetayxi mucokcok pin puye. Soat em ixe e'em jewebe ma:

— Apēn xe'e oce otayxi mucokcok am? — i.

³⁴ Xepxep a'ō kay pin ma-Deus a'ō kay- -jetayxi a'ō kay dak. Itoptep'ūmat pe soat em cekapik put wuykukukat peam. Ixe soat em jekukukat mucokcok pin. Soat em jekukukat kay ḡebum. Itoptepat pit soat em ḡebum jebubut puap kay. Jektop mucokcok pin soat em.

³⁵ Imēḡap pit imuwēnuwēn ōn eywebe eybuywat pin puye. Eywebumūnap muba'oren pin ḡu bit ōn.

— Epeywebumūn ḡu juy iba'ore jījā ma'ḡu eywebe — i'ūmḡu ōn e'em eywebe. — Cūḡ ma epeku Deus xe — i acā ōn e'em eywebe. — Ixe ekawēn taḡ cuy epeku — i dak ōn e'em eywebe. — Soat em ḡebum cuy epesop wara'at kay ḡu- -wuykukukat kay acā — i dak ōn e'em eywebe.

³⁶ ḡasū iwadipyū oḡukūyjo. “ḡasū bit puk wewebumūn pin ḡu oce” i kuy juk o'e'e'iaiyū oḡukūyjo.

— Wewebumūn'ūm pima bit cedaḡ ḡu kuka owadip kuḡ oce — i'e'em aḡokatkat jewebe bima, juy jewebumūn ip.

Cewēju jewedaodao pin cīcā bima dak, cuy jewebumūn ip. “Ocewebumūn cuy ḡasū bit” i'e buje dak cuy jewebumūn ip. Cewebumūn puje ikērēat o'ḡuḡē ḡu ip. ³⁷ Imēnpit aḡokatkat jekpiwatpin ma “ḡasū bit

wewebumün pin ġu oce" i'e buje, xipat kuka o'e ce-
wewebumün'üm âm. Ibu' u jewebumün âm pima dak,
xipat kuka o'e cewebumün'üm âm. Jewedaodao pin
cicā'üm pima dak, xipat kuka o'e cewebumün'üm
âm. ³⁸ Imēneju xipacan e'em ip jewadip eju cewebu-
mün puje. Jewebumün'üm pima bit, ibodi ma xipa-
can e'em ip.

³⁹ Itop e'ū'ibiyū oġukūyjo ġasū. Itop itait pima,
ayacat jektop xe ma jeenuy. Cūġ ġu jektop epere am.
Itop e'ū buje bit, cūġ ma warara'acat eju jewebumün
âm- jemukaypinput eju. Imēnpit cūġ ġu itabut'ūmat
eju jewebumün âm- itabucat eju acā. ⁴⁰ Imēnpit itop
e'ū'ibit ibodi ma icokcok kuka o'e waram jewebu-
mün'üm pima. Waram pit cewebumünap ġu oxe ma
ibodi ma kuka o'e icokcok. Deus biōġbuk omuy owe-
be. Imēnpuye eya'ōpicūġcūġ cuy epesop wa'ō kay.

8 Kuyatup pe juk epe'e owebe: "Xipat tu oce-
webe deusbaro wap iēnmōġ'ibitēn o am?
Ocesuēn'o ġu xe'e?" i. Iboam ōn jeymukūyjo ġasū.

— Icēmān ocetaybit Deusan — i wuyju e'em.
"Soat podi ma ocetaybit" i'e'em pima bit, xipat ġu
kuka o'e. Warara'acat kuġ xipan pima bit, xipat
kuka o'e soat peam. ² Soan ġu wuyetaybit- pūġpūġ
ā. Imēnpuye wuyju te'e ma e'em:

— Ocetaybit cīcā — i.

³ Wuyxe Deus ikukpin cīcā bima bit, Deus itaybit
wuyjum. Deus burem tak cuy ajop.

⁴ Deusbaroyū wap iēnmōġ'ibitēn jeymukūyjo ōn
ġasū. Deusbaro ka'ūmaap ma ibiōġbuk. Ade ġu
Deus- pūġ ma. Wuyetaybit iboam. ⁵ Ade ipi watwat
xe bit ade ma deusyū. Tūybe ade deusyū iān e'em
ip. Tūybe ade wuykukuk'ukayū iān e'em ip. Tūybe
ipi daġ, kabi be dak omuy ip iān e'em ip. ⁶ Wuyxe
bit pūġ ma Deusat. Ixe Deus wuyebay. Soat ixe
emumuġē. Ixe beam ma soat wuyju dopdom. Pūġ ma
wuykukukat- -Jesus Cristo acā. Ixe a'ōbi Deus soat
o'ġuġē kuyje- -Jesus Cristo a'ōbi. Ixe a'ōbi ma wuyju
dak dopdom.

⁷ Soat ġu bit itabucayū iboam itaybit. Ikabap cīcā ip deusbaroyū kuġ. Kuy ade kabia ma te'e ma itabut osodop ip ixeyū kay- -deusbaroyū kay. Imēnpuye tūybe ijopēn deusbaroyū xatēn iān e'em ip. Ġasū dak imēn e'em ip. Itaybit ġu ip deusbaroyū ka'ūma am ma ibiōġbuk ip iam. Tūybe iġo ēn o buje, ikērēat kuġ kuka oce Deus xe iān e'em ip. ⁸ Wuyju bit cūġ ma Deus xe iēn o'oap tomuju ġu. Iwaru ġu Deus xe. Ibit wedep ma- -iēn o'oap, iēn o'o'ūmap tak.

⁹ Xipat eyxe iġo ēn o buje, iēn o'ūm pima dak. Eykitpit xe bit, itabutbūcat xe, cūġ ġu iġo ēn o am. Eykitpit pe ikērēat epeġjurūġat ġu juy- -itabutbūcat pe. Ixe xe cūġ'ūm pima, iġo ēn o am, epesuēn'o ġu juy. ¹⁰ Eyetaybit deusbaroyū kake ġu iam. Imēnpuye:

— Cūġ ma wuywebe iġo ēn o am — i'e'em eyju. Imēnpuye deusbaroyū duk'a be eyju ōmōm, ixe xatēn o am. Itabutbūcat eyjojom iġo ēn o'om pima bit:

— Cūġ ma owebe dak iġo ēn o am — i acoli je'e jewebe ma.

Imēnpit cūġ ġu buk ixe xe bit iġo ēn o am, tūybe deusbaroyū kake iān e'em puye. ¹¹ Ixe dak acoli, iēn o, eyjojom iēn o'om puye. Iēn o buje bit iġuy- cūġ cīcā je'e itabutbūcat.

— Oje'ū acoli ikērēat oġjurūġ puye — i te'e ma je'e jewebe ma.

Cristo oe'ū ixe e'ūap puxim. Ixe ekitpit. Imēnpit iġuycūġ ma jeku, ēn ma ikērēat eġjurūġat cebe buye. ¹² Cūġ ġu cexe i'o am pima:

— Ēn tak esuēn'o — i'ūmġu juy epe'e cebe. Imēn i'e buje, warēmtaġ ma eykitpit kuġ tak eyju. Warēmtaġ eykitpit kuġ pima, eyju dak ikērēat kuġ epesop Cristo xe. ¹³ Imēneju okitpit pe ikērēat oġjurūġat ġu. Okitpit xe iġo ēn o'oap cūġ ġu bima, ōn tak kuka osuēn'o ġu- -pūġ em tak ka'ūma. Osuēn'o ġu okitpit pe ikērēat mujurūġap puxim. Imēnpuxim eyju dak cuy eykitpitpiyū be ikērēat epeġjurūġat ġu.

9 Cūḡ ma owebe wekupinap taḡ weku am. Cristo emumuju ōn. Wuykukukat Jesus cuk ojojojo. Kuy bima juk eyetabut wuykukukat Jesus Cristo kay ōn ma juk ixē ekawēn oḡuwēn eywebe buye. ² Warara'acayū xe ma Cristo emumuju ḡu ōn. Eyxe bit cemumuju ōn.

— Corinto ka watwat Cristo eju mūḡ'i jekukum o'e ḡasū bit, Paulo cekawēn o'ḡuwēn cebe ip puye. Imēnpuye ocetaybit Paulo Cristo emumuju iam — i'e'em adeayū.

³ Wara'acat omuymuy bima, jewedayoyom ōn.

— Ōn tak Cristo emumuju ma — i ōn e'em cebe ip.

⁴ Cūḡ ma owebe oxat pu am, oxati bu am tak kawēn idipat muwēnuwēnapteim. ⁵ Warara'acayū Cristo emumujuyū jetayxi eju jekukum- -itabucat eju. Imēn cūḡ ma Deus xe. Wuykukukat kitpitpiyū dak jetayxi eju jekukum ip, Pedro dak. Cūḡ ma kuka o'e owebe dak. ⁶ Warara'acayū Cristo emumujuyū wara'at pe ḡu kapikpiḡ ip- -kawēn idipat muwēnuwēn acā. Cūḡ tu eyxe owebe wara'at pe kapik am, Barnabé be dak?

— Cūḡ ḡu — i ōn pit e'em.

⁷ Sorarayū teihem jenopaḡōḡōm. Jenopaḡōḡōaptei bum ip. Wara'at pe ḡu ip kapikpiḡ jemukaypinut pu am. Kadaidip iwat tak teihem jekat pe kapikpiḡ. Jekat peat'a o'om ip jekapikapteim. Wara'at pe ḡu ip kapikpiḡ jemukaypinut pu am. Ovelha kukuk- 'ukat tak teihem ovelha kuḡ. Jeōhō kūmti kōnkōn ip ikukāpteim.

⁸ Ixeyū buxim wuyju dak cūḡ ma wuyekapikaptei bu am- -Deus ekawēn muwēnuwēnapteim. Moisés tak imēn cuk adi wuymutaybitbin osunuy. ⁹ Moisés eka- wēntup imēn e'em:

Taixee'uk am kadaida mucakucan pi- ma, juy biopakpi esubimukirik ḡu, i.

Āḡ cuy jekōn kapikpiḡ puye, i.

Iboaptup mubarararaḡ pima biopak kay acā du ḡe- bum osunuy Deus? ¹⁰ Ka'ūma! Wuykay dak ḡebum ma osunuy. Ōn tak oxat'am cuy oyabu iap kay ḡe- bum taidada'ukat, ku beat'a bubu'ukat tak. ¹¹ Ka-

wên idipat muwēnuwēn eywebe juk adi ocekuu apēn ayacat ku beat taidadam iap puxim. Cūg ma gāsū ocewebe dak ocekapikaptei bu am eyxewi. ¹² Cedağ ma warara'acat pe dinheiro ojuyjuy am eyxewi, kawēn idipat o'ğuwēn ip eywebe buye. Ixeyū bodi ma oceju bit cuy iojuy eyxewi.

Oceju bit cuk ocejoojuy ġu eyxewi. Teihem kawēn idipat muwēnuwēn pima:

— Kawēn idipat a'ījo pin ġu ōn pit, Paulo dinheiro kay jījā imuwēnuwēnapteim puye — i kuka o'e itabut'ūmayū.

Imēnpuye tei'ūma juk adi kawēn idipat oceğuwēnuwēn. Wara'at pe ocesop kapik'uk ocemukaypinput pu am. ¹³ Deus eju kawēnwēnap'a be kapik'ukayū jexat pupum tuk'a be ōmōm'ukayū xewi. Deus etabixewi wūnca mupik'ukayū ipik'ūmat pupum ip jexan. Kuy eyetaybit iboam. ¹⁴ Imēnpuxim:

— Kawēn idipat muwēnuwēn'ukayū dak cuy imuwēnuwēnaptei je'jat ip jemukaypinput pu am — i juk o'e wuykukukat.

¹⁵ Ōn pit obu'u dinheiro bu am wa'ījojo'ukayū xewi kawēn idipat muwēnuwēnapteim. Ijudup mubarararağ ōn imuwēnuwēnaptei juy epeğūm owebe iaptum ġu bit. We'ū ām obu'uap podi ma obu'u imuwēnuwēnaptei bum. Ka'ūma ma juy je'e:

— Paulo kawēn idipat muwēnuwēnaptei kay jījā — i.

¹⁶ — Ēn pit cuy kawēn idipat eğuwēnuwēn — i juk o'e Deus owebe.

Imēnpuye “Wa'ōbuyxi jījāat ōn kawēn idipat muwēnuwēn puye” i'e ba'ore owebe. Ōn kawēn idipat muwēn'ūm pima bit kuka Deus ipiat o'supi'ajoat owebe. ¹⁷ Okpiwatpin ma kawēn idipat muwēnuwēn pima, cūg ma kuka o'e owebe wekapikaptei bu am. Okpiwatpi ġu bit ōn imuwēnuwēn.

— Ēn pit cuy kawēn idipat eğuwēnuwēn — i juk o'e Deus owebe.

Deus ma juk o'ğūm wekapikam iboap. ¹⁸ Apēğām kuka wekapikaptei ojat? Dinheiro kay ġu ōn wekapikapteim.

— Dinheiro'in cuy epeğūm owebe imuwēnuwēn-

apteim — i'ümġu dak òn pit e'em wa'ijojomayū be.

Ocokcok cīcā tei'ūma kawēn idipat muwēn ām. Ocokcokap tak wekapikaptei jo'i ma.

¹⁹ Imēneju ijodiat ġu bit omujujum kapik am. Wukpiwatpin ma òn kapikpiġ. Imēnpit wukpiwat pin ma dak òn soat peam kapikpiġ kawēn idipat muwēnuwēn adeayū mutabut am Jesus Cristo kay. ²⁰ Imēnpuye Moisés ekawēn taġ acā ġu òn jekukum Jesus Cristo ekawēn taġ tak òn jekukum. Judeuyū parakpe kawēn idipat muwēnuwēn pima bit, ixeyū buxim òn tak Moisés ekawēn taġ jekukum ixeyū mubu'unap puxim Jesus ekawēn kay. Judeuyū parakpe òn imuwēnuwēn pima, ixeyū ekukuap puxim òn tak jekukum ixeyū mutabut am Jesus Cristo kay. ²¹ Imēnpuxim òn Judeu'ūmayū parakpe bima, ixeyū buxim òn tak Moisés ekawēn taġ ġu jekukum ixeyū mutabut am Jesus Cristo kay. Cristo ekawēn taġ òn jekukum. Imēnpuye Deus ekawēn kay dak kūyjobit òn. ²² Itabutbūcayū parakpe bima, ixeyū ekukuap puxim òn tak jekukum ixeyū buywat am biġ ma itabut am Jesus kay. Soat em oxeacat eku kuap puxim òn tak jekukum ixeyū mutabut am Jesus Cristo kay. Soan òn e'em warara'acat mutabut am cekay.

²³ Imēn ma òn jekukum kawēn idipat muwēn ām soat pe ijodiat pe. On kawēn idipat muwēnuwēn pima, Deus xipacan e'em wa'ijojomayū beam, owe-beam tak. ²⁴ Adeayū jedaudauap taġ daudaum cīcā. Pūġ ma bit jabeatup pupum- -koam yajēm'ibit acā- -jeburewūn podi ma iwūncaat acā. Wuyedauap puxim wuyju dak jekukum Jesus Cristo ekawēn taġ jekukum pima. Cekawēn taġ cuy epeku ixē be "Cūġ ma juk adi epekuku" i'e am eywebe. Ixē be eywebe imēn i'e buje, jabeatup o'tupu'iat cōcokap podi ma eycōcok epesop. ²⁵ Jedaudau'ukat soat kabia ma jewemuwūncacan iwūnca jedau am i'e am. Soat em jewemuwūncacan ip jabeatup pu pin cīcā buye. Iġodup ade kabia ġu tuptip e'em- -pūġ kabia ma. Dao ma dupkarawraw. Jesus Cristo ekawēn taġ jekukum pima bit, pūġ kabia ġu acesop Deus xe- -soat kabia ma. ²⁶ Cūġ

ma jedaudaum jedaudauapu'abi kay ma jedaudau-
'ukat. Cûg ma jedaudaum warêmtağ ma jedauap
puxim. Ixe buxim ôn tak cûg ma weku pin. Jesus
Cristo ekawên tağ weku pin warêmtağ ma wekuap
puxim. Warara'acat mureure'ukat puxim tak ôn.
Warara'acat muy'at ojuy bima te'e ġu ip jewemu-
reurem ip- -pipim ma. Imênpuxim owebe dak te'e
ġu Jesus Cristo ekawên tağ wekuap.

²⁷ — Jesus Cristo ekawên tağ cuy epeku — i juk
adi ocece warara'acat pe.

Imênpuye owebe ikêrêat muğê buje, kuka osûsûn oce
soat xe, wekawên o'jojajo'iaiyû xe. Imênpuye ôn ikê-
rêat muğê pin pima, wağuydağ ġu oce. Wağuy-
mu-
bu'u'un cîcâ ôn ikêrêat muğêap puxim, Jesus owebe
“Ekêrê oxé” i'eap puxim.

10 Imênpuye ġebum cuy epesop wuydobuyû-
'ûm'ûm kay, okitpitpiyû- -Moisés ebekit-
kiyû'ûm'ûm kay. Uk'a'ûmat tağ jekukum pima ka-
bikerereat soat pe ixeyû be e mubapukpuğ oeku.
Soat ixeyû iodi o'timudek tiboğati. Tipakpukati i
iğodi butet osunuy. ²Kabikerereat cocom pima, ti-
mudekdeğ pima dak, soat ip kûyjobit osodop Moi-
sés a'ô kay.

— Kûyjobin acesop a'ô kay — io'e ip Moisés pe.
Imênpuxim:

— Kûyjobin acesop a'ô kay — i wuyju e'em Je-
sus pe wuywubatisasan pima.

³Soat ip kabi bewiat o'om osodopdop jexan uk'a-
'ûmat pe. Maná o'om osodopdop ip. ⁴Soat ip kabi
bewiat kônkôn osodopdop. Tikônkôn osodopdop ip
Cristo idibi o'timujêm puye. Cristo a'ôbi wita'a
bewi Moisés o'timujêm ixeyû eim. Imênpuye:

— Wita'a jekukum wuyweju — io'e ip Cristo
muwênuwên, Cristo ixeyû eju oeku buye.

⁵Deus mucokcoğ ġu ip osodop ade ixeyû'in. Imên-
puye Deus itakoma o'e cekay ip. Deus a'ôbi ip
oe'û'û uk'a'ûmat tağ. O'jokotkot ip uk'a'ûmat pe.

⁶ Deus pit imên ixeyū o'jukukuk wuymukūyjo am wuywebe ikērēat mujurūgāp puxim. Ixeyū ma itabikuku osodop ikērēat kay. Wuyju bit cuy wuyetabikum gū ajop. ⁷ Oibu'un ip Deus kay. Deusbaroyū kay o'e ip- jemumuḡē kay. O'jekōnkōn ip deusbaroyū wap peta muḡēḡēm "Ocetabut eykay" i'e am cebe ip. Imên e'em Deus ekawēntup:

O'jekōnkōn ip deusbaroyū wap, o'ti-kōnkōn tak ip, i. O'jeda'i'i'in tak ip cewap, i.

Wuyju bit cuy wuyetabun gū ajop jewexe deus'iaiyū kay. ⁸ Ixeyū ma o'jepopo warara'acat tayxi eju, warara'acat itop eju dak. Imēnpuye pūḡ kabia be ade oap ip ixeyū'in. 23,000 ma oap ip pūḡ kabia be. Wuyju bit cuy acepo gū warara'acat tayxi eju, warara'acat itop eju dak- -pūḡ em tak ka'ūma. ⁹ Ixeyū ma jema-mama'uk cīcā oekuku Deus pe. Deus o'jobuyxijo ip itabotaidabotbot paxi wuykay iam.

— Deus ipiat supi'ajoat gū aco'i wuywebe ikērēat mujurūḡrūḡ ma'ḡu wuyju — io'e ip te'e ma. Ikērēat o'ḡujurūḡrūḡ ip. Imēnpuye Deus puybu o'subumudot ixeyū kay tūypiatpu. Ade o'joa ixeyū'in. Ade oap ip puybu nuy pibun. Wuyju bit cuy wuykukukat ajobuyxijo gū. ¹⁰ O'jemāmā ip Deus pe. Imēnpuye Deus jekawēn tojtjt'ukat o'ḡudot adeayū aoka am ixeyū'in. Deus xewiat ixeyū o'yaoka. Oe'ū'ū ip. Wuyju bit cuy acemāmā gū Deus pe.

¹¹ Soat iboam pit o'jebapuk wuydobuyū'ūm'ūm pe wuymukūyjo am. Apēn Deus ipiat o'supi'ajojoat cebe ip kūyjobit'ūm pima iap ibararak opop Deus ekawēntup pe. Iboaptup co buje, ixeyū'ūm'ūm eku-kuap puxim gū juy ajeku. Gaxīn ma soat i'ūm. Imēnpuye ixeyū'ūm'ūm ekukuap puxim gū juy ajeku.

¹² Imēnpuye:

— Ocejū bit ikērēat oceḡujurūḡ gū ocebaca buye — i'ūmḡu juy ace. — Ocebuywan cuy eḡuy ocewebe ikērēat mujurūgāp puxim — i acā juy ace Deus pe.

¹³ Warara'acat ikērēat muḡēat ojuy du eywebe? Soat ijodiat pe ikērēat muḡēat ojuy ip. Deus pit soat em ja'ō daḡ e'em. Wuybaca'ūm pima, Deus wuybuywan-

wan. Wuybuywatwan jeenuy wuywebe ikêrêat muju-rûgâp puxim.

¹⁴ Imêneju, okitpitpiyû, deusbaroyû buxixim cuy epewatwat. ¹⁵ Eyağusyat kuy oxe. Wekawên puyxijom cuy epe'e cedağ paxi Paulo e'em iam. ¹⁶ Ğebum cuy epesop Jesus Cristo e'ûap kay wuyeğebuapti kôn puje. Cristo e'ûap kay wuyeğebuapti kôn puje: — Bay, ên xipat cîcâ — i juy ace.

Wuyju ğebum Cristo'ûm toy kay, apên Cristo wuy-muisusunap kay dak. Pão'a o buje, Cristo'ûm jebit kay wuyju ğebum, apên Cristo wuy-muisusun oe'û wuywebeam puye iap kay dak. ¹⁷ Pûğ'a bewi ma wuyju ya'o'om Cristo e'ûap kay ğebum am, ade ma'ğû wuyju. Pûğat jebit puxim wuyju, pûğat kay wuyju ğebum puye.

¹⁸ Ğebum cuy epesop Judeuyû kay. Ixeyû epaiyû Deus wap o'ğupik ip iat epoyat o'om. Ibiat o'om pima ğebum ip wuyju Deus ebekitkiyû iap kay.

¹⁹ Deusbaroyû bit kake ğû. Eyetaybit iboam. On tak wetaybit iboam. Ka'ûmaap ma deusbaroyû bit.

— Ixeyû wap oceju puybit ên mōğmōğ ixeyû xatên — i'e'em te'e ma deusbaroyû kayayû bit.

²⁰ Deusbaroyû wap iên mōğ puje Deus pe ğû ma ip iûmûm- ibiōğbuk kêrêat pe acâ, ibiōğbuk kêrêayû kukat ebekitkiyû ip puye. Obu'u jîjâ eywebe ibiōğbuk kêrêayû babim eyeku am. ²¹ Jesus e'ûap kay wuyeğebuapti kôn puje, wuyju Deus ebekitkiyû iap kay wuyju ğebum. Imênpuye iba'ore wuywebe deusbaroyû wap timōğ'ibiti kôn âm ibiōğbuk kêrêayû kukat a'ôbi. Wuykukukat Jesus e'ûap kay wuyeğebuap'a o buje, wuyju Deus ebekitkiyû iap kay wuyju ğebum. Imênpuye iba'ore wuywebe deusbaroyû wap iênmōğ'ibitên o am ibiōğbuk kêrêayû kukat a'ôbi. ²² Wuybu'u wuykukukat mutaek am. Cêm ğû du? Wuykukukat podi ma wuya'ôbaca i'e'em pima, kuka ibiōğbuk kêrêayû kukat kadiayûm ace'e. Ibiōğbuk kêrêayû kukat kadiayû bima bit, kuka itaek o'e wuykukukat. Itaek pima, xipat ğû kuka o'e wuywebeam.

²³ — Cristo ebekitkit oceju. Imēnpuye soan oce'e but — i napa ma e'em pūgpūgayū.

— Soat ġu bit xipat wuywebeam — i òn pit e'em.

— Soan oce'e but — i napa ma e'em ip.

— Te'e ma kuka pūgpūġ pit ajukuk — i òn pit e'em.

²⁴ Cūġ ġu wuywebe xipan jewewekuk am warara'acat kay ak'arit'i'ūm pima. Warara'acat tak cuy xipan ajukuk. ²⁵ · ²⁶ Imēn e'em Deus ekawēntup: Deus ipi kukukat ipi daġacat kukukat tak, i.

Imēneju ka'ūma ma i'opiat eywebe. Soatēn cuy epejat eyxatēn teidada'ukat xewi.

— Ite ēn tu deusbaroyū wap iēnmōġ'ibitēn? — i'ūmġu juy epe'e iēn pum pima.

²⁷ Jeweju jekōn ām Jesus kay itabut'ūmat pe eynomuwā buje, epeju juy eyju pin pima. Ajo o'ġūm ip iat ēn cuy epesuēn'o.

— Ite ēn tu deusbaroyū wap iēnmōġ'ibitēn? — i'ūmġu juy epe'e eynomuwāat pe.

²⁸ · ²⁹ Itabutbūcat pe "ite ēn deusbaroyū wap iēnmōġ'ibitēn" i'e buje bit cuy epesuēn'o ġu ixē muġuy-cūġap puxim. Xipat eywebe ma ite ēn o am. Itabutbūcat xe bit xipat ġu ite ēn o am. Ite ēn o'ūm pima bit, xipat je'e ixē xe, exe dak. Ka'ūma ma iġuycūġ je'e. Soat eycokcok werep ma epe'e.

Warara'acat pit aco'i je'e:

— Apēnpuye dak ite ēn osuēn'o ġu warara'acat xe cūġ'ūm puye? Cūġ ma oxe bit iboap — i. ³⁰ — Iēn om pima òn e'em Deus pe "Bay, ēn xipat," i — i aco'i je'e owebe. — Apēnpuye dak warara'acat kuka o'e owebe, "Cūġ ġu ewebe ite ēn o am," i? — i aco'i je'e owebe.

³¹ Cūġ ma juy epeku soat em warara'acat pe "Deus idip cīcā, ya'ōbaca jījā" i'e am. Cūġ ma juy epeku jekōnkōn pima, tikōnkōn pima dak, soan e'em pima dak. ³² Cūġ ma juy epeku Judeuyū etabutpe, Judeu'ūmayū etabutpe dak, Deus kay itabucayū etabutpe dak. Cūġ ma juy epeku warara'acat mubunap puxim Jesus Cristo kay. ³³ Wekukuap puxim cuy epeku. Warara'acat mucokcok pinap kuġ òn je-

kukum soat em. Ajo xipat kuka o'e owebeam iap kay ġu òn ġebum- -ajo xipat kuka o'e warara'acat peam iap kay acā. Imēn òn jekukum Deus pe warara'acat taxijoap ojuy.

11 Cristo ekukuap puxim òn tak jekukum. Imēnpuye wekukuap puxim cuy epeku.

² Soat kabia eyju ġebum okay. Apēn cuk adi òn eymutaybitbinap taġ tak eyju jekukum- -soat taġ.

— Xipat cīcā eyju oxe — i òn e'em eywebe.

³ Imēnpit waram jeymukūyjo òn. Aġokatkat jetayxi kukat. Cristo soat aġokatkayū kukat. Deus Cristo kukat. ⁴ Imēneju aġokatkat cuy jewajuy ġu paġòm jebureyū parakpe Deus eju kawēnwēn pima, Deus ekawēn muwēnuwēn warara'acat pe bima dak. Jewajuy buje bit ibuyxim ġu kuka Cristo kuġ o'e. ⁵ Ayacat pit cuy jewajuy jeenuy jebureyū parakpe Deus eju kawēnwēn pima, Deus ekawēn muwēnuwēn warara'acat pe bima dak. Jewajuy'ūm pima bit, ibuyxim ġu kuka jektop kuġ o'e. Ayacat yajuy'ūmat pit yakoekoeat puxim yasūsūn. ⁶ Imēnpuye ayacat jewajuy'ūm pima, epeyadaptakat cuy. Wuywebe ayacat isūsūn jakoean, jadaptakacan tak. Imēnpuye juy yajuyjuy jeedop ip paġòm jesūsūnap puxim. ⁷ Imēntak aġokatkat pit cuy jewajuyjuy ġu, Deus jejo'ian o'ġuġē buye jedipap kuġ o'ġuġē buye. Deus aġokatkat o'ġuġē ja'ò daġ ceku am. Ayacat pit o'ġuġē jektop a'ò daġ ceku am. ⁸ Deus aġokatkat muġēm pima ayacat pewi ġu o'ju'uk. Ayacat muġēm pima bit, aġokatkat pewi o'ju'uk. ⁹ Aġokatkat o'ġuġē ayacat puye ġu. Ayacat pit o'ġuġē aġokatkat puye. ¹⁰ Imēneju itabucayū awerom pima, aoyū juy jaekabek kuġ jeedop ip Deus ekawēn tojotjot'ukayū wuyjojom puye. Jaekabek kuġ cuy jeedop ip jektop a'ò kay kūyjobicap mubapuk am soat pe. ¹¹ Wuykukukat Jesus kay wuyetabut puje bit, wuyagepūġ ġu wuyju jekukum- -ayacat, aġokat-

kat tak. Jewemukūyjojom tak wuyju, jewebuywatwan tak. ¹² Aḡokatkat a'ōxa bewi Deus ayacat o'ju'uk. Ayacat uk pewi ḡasū bit aḡokatkat kapkam. Deus xewiat pit soat kake.

¹³ Cedaḡ tu eyxe ayacat pe jaekabek kuḡ'ūma kawēn ām Deus eju warara'acat parakpe? Cedaḡ ḡu! ¹⁴ Wuyukpiwatpin ma wuyetaybit xipat ḡu aḡokatkat pe yadaperean am iam. Aḡokatkat yadaperen pima bit, jewemubuyxi'ūm'ūm. ¹⁵ Ayacat pit idip cīcā wuyxe soat xe yadaperen pima. Yadaperenat yaekabekat co'i.

¹⁶ — Cedaḡ ḡu ayacat peam pit kawēn ām Deus eju yajuy'ūm pima — i ōn e'em. Imēn e'em soat itabucayū dak- -soat kaka daḡayū. Imēn tak cuy oce'e soat pe oca'ōxik pinat pe.

¹⁷ — Cūḡ ma eyju je'awerorom — i'ūmḡu ōn pit e'em eywebe.

Awerom pima eyju jewebuywatwan ḡu biḡ ma eyeta-but am Jesus kay- -jewemubu'u'un acā. Imēḡap xipat ḡu! Jeymukūyjo ōn cūḡ ma eye'awero am.

¹⁸ — Awerom pima jewa'ōxikxiḡ ip Corinto ka watwat, Jesus kay itabucayū, pūḡ kadi ḡu ip puye — i'e'em owebe pūḡpūḡayū. Icēm xe'e ixeyū e'em?

¹⁹ — Wuyju pūḡpūḡ kadiayū bima, ibapuk e'em soat xe abuyū wuy'in cūḡ ma jekukum iap, abuyū cūḡ ḡu iap tak — i te'e ma eyju e'em.

Xipat ḡu wuyju Deus xe pūḡpūḡ kadiayū bima. ²⁰ Eyju je'awerorom wuykukukat e'ūap kay jeḡebu am ḡu- -jekōn ām acā. ²¹ Jekōn pima, soat eyju eyukpiwatpin ma jekōnkōn cīcā. Imēnpuye koap ajēm'ibit jekōnkōn cīcā jebureyū wiwim'ūma. Kanomūm yajēm'ibit pit jekōnkōn ḡu. Ire mabuk ip e'em wara'acat ibeḡbeḡ pima, wara'acat ika'o bima dak. ²² Apēntak oce eywebe imēn eyju je'awerorom pima?

— Cūḡ ma eyju je'awerorom — i du oce eywebe? Ka'ūma! — Cūḡ'ūma — i acā oce.

Eyre bima, eyduk'a be ma juy epeyekōn. Deus eju kawēnwēnap'a be bit warēmtaḡ ḡu juy epeyekōn.

Ibubut'umat musūsūm ġu juy epesop iġo'a be. Cūġ ġu oxe eyju je'awerorom.

²³ — We'ūap kay eyeġebu am cuy epeyekōn eye-weweju — i juk o'e wuykukukat Jesus owebe.

Apēn ixē o'e owebe iam cuk ōn eymutaybitbin. Je-kay itakomaayū be jeūm pimaap exima be pāo'a o'yabu.

²⁴ — Bay, ēn xipāt cīcā — io'e Deus pe. Pāo'a o'yadakat. Gebuje:

— Korosa be obamupaya ip iap kay juy epeġebu ibeat'a o buje — io'e jebekitkiyū be. — Oje'ū eywe-beam — io'e cebe ip. — Pāo'a juy epeya'o we'ūap kay eyeġebu am — io'e.

²⁵ Imēnpuxim kopo dak o'jat jekōn epere buje ip.

— Deus kawēn iisuāt ġuwēn ipi juayū be oje'ū buye, odoymukerereren puye — io'e wuykukukat. — Odoymukererēnap kay juy epeyeġebu uva'abidi kōn puje — io'e. — Tikōn puje, we'ūap kay juy epeyeġebu — io'e.

Imēn wuykukukat o'e owebe kuy bima. ²⁶ Imēneju ibeat'a o'om wuyju. Ibeat'a o buje, wuykukukat oe'ū wuywebeam iap muwēnuwēn wuyju soat pe, ibeati kōn puje dak. Imēn cuy epeyekōnkōn waram wuykukukat ajēmap wiwim pima.

²⁷ Imēneju Deus ipiat supi'ajoat wuywebe warēm-taġ ma i'o buje. Warēm-taġ ma wuykukukat e'ūap kay wuyeġebuap'a o buje kuka ce'ūap ajomuymuy, warēm-taġ ma ce'ūap kay wuyeġebuapti kōn puje dak. ²⁸ Imēnpuye:

— Cedaġ tu ōn jekukum Deus xe? — i juy ace wuywebe ma pāo'a o awap, uva'abidi kōn awap tak.

Cedaġ ma jekukum pima acā kuka aya'o. Atikōn tak kuka. Warēm-taġ jekukum pima bit, kuka aya'o ġu, atikōn ġu dak kuka. ²⁹ Apēġām korosa be wuykukukat oe'ū iam eyetaybit'ūm pima juy epeya'o ġu wuyeġebuap'a.

Epetikōn ġu dak cuy wuyeġebuapti. Eyetaybit'ūma ya'o buje, eyukpiwat epe'e Deus xe. Imēnpuye ipiat supi'ajoat eywebe. ³⁰ Ade ey'in warēm-taġ ma o'ya'o'o. Imēnpuye ip iwātaxipipe o'e.

Ibaca ġu ip o'e. Pūġpūġ oe'ū'ū kuy. ³¹ Ya'om pima:

— Ikērēat kuḡ tu ōn exe? — i juy ace Deus pe. Ikērēat kuḡ pima, iboap cuy aḡuwēn ixe be i'uk am wuywebewi. I'uk puje:

— Ikērēat kuḡ eyju oxe — i'ūmḡu je'e wuywebe.

Ipiat tak supi'ajoat ḡu wuywebe.

³² — Ikērēat kuḡ eyju oxe — i'e'em Deus wuywebe ikērēat epereap ojuy.

Ipiatpi'ajojoan tak wuywebe wuymukūyjo am waram wuywebe ikērēat kukap puxim. Ixe imēn wuymukūyjojom ipiat'ajojoap kay wuymujuap puxim kūyjobit'ūmayū eju.

³³ Imēneju, okitpitpiyū, eybureyū ajēmap puk cuy epejowiwi. Wuykukukat e'ūap kay wuyeḡebuap'a o am awerom pima, soat ajēm puje juy epeya'o. ³⁴ Abu ire mabuk iat cuy jeduk'a be ma jekōn. Imēn'ūm pima Deus ipiat supi'ajoat eywebe awerom pima. Wara'an cuk adi epeyekawēn owebeaptup pekuyatup pe. Eykay oajēm puje bit iboam ōn jeymukūyjo.

12 Okitpitpiyū, “Ajo-ūmūm wuywebe Deus biōḡbuk?” i juk epe'e owebe kuyatup pe. Iboam ōn jeymutaybin. ² Jesus kay eyetabut'ūm pima wara'at kaykaykay ma eyetabut epesop-jewexe deusyū kay-adeayū kay. Pūḡ tak ixeyū'in cede ba'ore ma deusparoyū. Soat em eymuḡuykukuku'uk ip osodop. ³ Ḡasū bit “Deus a'ōbi oceju e'em” i'e'e'ukayū jojom eyju. Deus biōḡbuk a'ōbi e'e'ukat e'em ḡu:

— Jesus wūy ma jeenuy Deus wi ipiat'ajojom — i.

Iba'ore cebe Jesus muymuy am. Deus biōḡbuk kukat acā icēmān e'em:

— Jesus acā ocekkukat — i.

Warara'acat pe bit iba'ore imēn i'e am. Iboam eyetaybit pima eyetaybit tak abuyū Deus a'ōbi e'em iam, abuyū napa ma e'em iam tak.

⁴ Ade ma Deus biōgbuk emumuūm omuy. Pūg pit iūmūm wuywebe- -Deus biōgbuk acā. ⁵ Deus peam kapik put wuywebe wara'at taḡtaḡtaḡ ma'ḡu wuyju kapikpiḡ. Pūg peam pit wuyju kapikpiḡ- -wuykukukat peam acā. ⁶ Soat wuyju wuyetaybit kapik am warēm-taksuḡ taḡ ma Deus peam. Pūg pit wuymutaybitbin wuyekapik am- -Deus acā. Ixe be wuymutaybin'ūm pima bit kuka wuyetaybit ḡu. ⁷ Deus ma ja'ōbacaap ūmūm soat pe wuywebe wuymutaybit am obiōgbuk omuy eywebe iam. Soat wuykitpitpiyū buywat am iūmūm wuywebe- -warara'acat itabucat puywat am. ⁸ Imēn Deus biōgbuk ja'ōbacaap ūmūm pūḡpūḡayū be kawēn icēmat muwēn ām. Deus ekawēn warara'acat mutaybit am ja'ōbacaap ūmūm warara'acat pe. ⁹ Jesus kay itabut cīcāam ja'ōbacaap ūmūm warara'acat pe. Iwātaxipipiyū mu'ada'ada am ja'ōbacaap ūmūm warara'acat pe. ¹⁰ Wuywebe i'e ba'oreat mubapukpuk am ja'ōbacaap ūmūm warara'acat pe. Deus ekawēn muwēnuwēn ām ja'ōbacaap ūmūm warara'acat pe. Warara'acat pe ja'ōbacaap ūmūm ixeyū be itaybit am abuyū jekukum Deus biōgbuk a'ōbi iam, abuyū ja'ōbi ma jekukum iam tak. Warara'acat pe ja'ōbacaap ūmūm ixeyū be ya'ōba'arēmat'a'ōm kawēnwēn ām. Warara'acat pe ja'ōbacaap ūmūm ixeyū be ya'ōba'arēmat'a'ōm kawēnwēn'ukat ekawēn muwēn ām wuya'ōm ma. ¹¹ Ade ma ibiōgbuk xipacat emumuūm. Pūg ma bit ibiōgbuk xipacat iūmūmat. Jekpiwatpin ma ja'ōbacaap ūmūm wuywebe.

¹² Pūg ma wuyjebit. Ade bit opop wuyjebit pe. Wuyjebit puxim Cristo kay itabucayū dak ade. Pūḡat puxim pit wuyju. ¹³ Adeayū itabut Jesus Cristo kay. Judeuyū itabut cekay, Judeu'ūmayū dak. Tei'ūm kapik'ukayū itabut cekay, teihem kapik'ukayū dak. Soat ip itabut cekay. Deus biōgbuk kuy juk wuymuwexat Cristo jebit puximayūm pūḡan. Deus a'ōbacaap kuḡ wuyju ibiōgbuk nuynuy wuywebe buye.

¹⁴ Soat wuyjebit taḡat pit jekapikap kuḡ. Pūg ḡu opop wuyjebit pe- -ade ma- -wuyeta, wuyei, wuyba,

wuybu. Pūg ma wuyjebit pit. Imēnpuxim soat itabu-
cayū jekapikap kuḡ. Pūgāt a'ōbi bit wuyju kapikpiḡ.
¹⁶ Wuyjebit taḡāt pit jemāmāmām ḡu Deus pe.
“Wuyjuyū jebit taḡāt ḡu ōn ibu ḡu buye” i'e but
ma'ḡu wuyei be. Wuyjebit taḡ ma'ḡu nuynuy.
¹⁶ “Wuyjuyū jebit taḡāt ḡu ōn, ita ḡu buye” i'e but
ma'ḡu wuyḡuybu be. Wuyjebit taḡ ma'ḡu nuynuy.
Jemāmāmām ḡu Deus pe wuyjebit taḡāt. Icokcok je-
kapikap kuḡ. ¹⁷ Wuyjebit wuyeta acā bima, kuka ace-
kūyjo ḡu. Wuyjebit wuyḡuybu acā bima, kuka ajoyōn
ḡu. ¹⁸ Imēnpit Deus pūḡ ḡu o'jomuy wuyjebit pe. Ade
ma o'jomuy. Wuybu o'subumuy. Wuyeta o'sutamuy.
Wuyba o'subamuy. Wuydao o'taomuy. Jekpiwatpi
ma o'jomuy soat. ¹⁹ Pūḡ ma o'jomuy bima bit, wuy-
jebitbet ḡu kuka adi ace. ²⁰ Imēneju ade ma opop
wuyjebit pe. Pūḡ ma wuyjebit pit. Wuyjebit taḡāt
pūḡ taḡ ma e'em, ade ma'ḡu cebe. Imēnpuxim wuyju
dak pūḡ taḡ cuy ajeku pūḡāt kay wuyetabut puye-
Jesus Cristo kay. Pūḡ taḡ cuy ajeku Deus biōḡbuk
omuy soat pe wuywebe buye.

²¹ Ajo omuy te'e ma wuyjebit pe? Ka'ūma ma.
Soat jekapikap kuḡ wuyjebit taḡāt. Jecoatcoan wuyju
wuyetam. Cūḡcūḡ wuyju wuyeim. Kapikpiḡ wuyju
wuybum. Jewebuywatwan soat wuyjebit taḡāt. Imēn-
puxim wuyju dak cuy acejewebuywan, Jesus Cristo
kay wuyetabut puye. ²² Imēn ma Deus wuyjebit
o'ḡuḡē. Pūḡpūḡ wuyjebit taḡāt ibaca ḡu wuyxe. Imēn-
pit ixeyū dak ka'ūmḡu bima bit, kuka adi aje'ū. ²³ I-
mēntak pūḡpūḡ wuyjebit taḡāt idip ḡu wuyxe. Imēn-
pit xipan wuyju ikuḡ. Wuysūsūn pūḡpūḡ wuyjebit
taḡāt ajuy'ūmām. Imēnpit xipan wuyju ikuḡ. ²⁴ Xi-
pan'ūm'ūm ma wuyju idipat kuḡ. -wuyjebit taḡāt
kuḡ. Wuysūsūn wuyju e'em pūḡpūḡ wuyjebit taḡāt
kuḡ. Deus pit isūsūn ḡu wuykuḡ. Soat ma o'ḡuḡē
wuyjebit taḡan. Imēnpuye juy soat ajukuk xipan
wuyjebit taḡāt wuysūsūn ma'ḡu ikuḡ. ²⁵ Wara'at taḡ-
taḡtaḡ ḡu wuyjebit e'em- -pūḡ taḡ ma. Soat wuyjebit
taḡāt pūḡ taḡ ma e'em. Imēnpuxim wuyju dak wa-
ra'at taḡtaḡtaḡ ḡu juy ajeku- -pūḡ taḡ ma. ²⁶ Pūḡ pe
ma'ḡu ipiat pima, soat wuyjebit taḡāt itaybit jopku
ipi iam. Pūḡ ma wuyjebit taḡāt xipat pima dak, soat

wuyjebit tağat itaybit jopku xipat iam. Cristo kay itabucayū wuyjebit puxim. Wuybure ipiat'ajojom pima, soat kuka wuyğuyçūğ ace cekay. Warara'acat wuybure awēğmudim pima dak, soat kuka wuyçokçok ace cekay, wuybure kay.

²⁷ Imēneju Deus ade ma o'jomuy wuyjebit pe. Jekpiwatpi ma o'jomuy. Imēntak wuyju Jesus Cristo jebit puxim. Soat wuyju ijebit tağat puxim. ²⁸ Imēnpuye Deus soat jekpot kay itabucayū o'jomuy jekitpitpiyū buywat am. Koap pima:

— Wemumujuyūm epesop — i juk adi o'e pūğ-pūğayū be.

Gebuje:

— Soat kaka dağ cuy epeju wekawēn muwēnuwēn ām — i juk adi o'e warara'acayū be.

Gebuje:

— Jesus kay itabucayū juy epeğutaybitbin — i juk adi o'e warara'acayū be.

— Eywebe i'e ba'oreat cuy epeğubapukpukpuk wa'ōbi — i'e'em warara'acayū be. — Iwātaxipipiyū juy epeğū'ada'ada — i'e'em warara'acayū be. — Eykkitpitpiyū buywatwan cuy epesop Jesus kay ibu'uap puxim — i'e'em warara'acayū be. — Eybureyū kukayūm cuy epesop — i'e'em warara'acayū be. — Ya'ōba'arēmat'a'ōm cuy epeyekawēnwēn — i'e'em warara'acayū be.

²⁹ Soat ğu ip Deus emumujuyū- -pūğpūğ ā. Soat ğu ip Deus ekawēn muwēnuwēn'ukayū- -pūğpūğ ā. Soat ğu ip itabucat mutaybitbin'ukayū- -pūğpūğ ā. Soat pe ğu Deus ja'ōbacaap ūmūm wuywebe i'e ba'oreat mubapuk am- -pūğpūğ pe acā. ³⁰ Soat pe ğu ja'ōbacaap o'ğūm iwātaxipipiyū mu'ada am- -pūğpūğ pe ma. Soat pe ğu ja'ōbacaap o'ğūm ya'ōba'arēmat'a'ōm kawēn ām- -pūğpūğ pe ma. Soat pe ğu ja'ōbacaap o'ğūm ya'ōba'arēmat'a'ōm kawēnuwēn'ukat ekawēn muwēn ām wuya'ōm- -pūğpūğ pe ma.

³¹ Eyju bit eyetabikukum cuy epesop Deus emumuūm kay- -xipat cīcāat kay.

Ajo soat podi ma xipat iam pit ōn jeymutaybin.

13 Wuyetaybit kuka ajop kawēn ām warara'acat'a'ōm, Deus ekawēn tojotjot'ukat a'ōm tak. Wuyxe warara'acat ikukpin'ūm pima bit, te'e ma kuka wuyetaybit ajop warara'acat a'ōm, Deus ekawēn tojotjot'ukat a'ōm tak. Wuyxe ikukpin'ūm pima, wuya'ōkarey acā kuka ace Deus xe- -tamara-ka'a muydedeap puxim. ²Ixe a'ōbi Deus ekawēn kuka aḡuwēn. Wuyetaybit kuka ajop ajom soat ijodiat itaybit iam. Wuyetaybit kuka ajop ajo iba'a-rēm warara'acat xe iam tak. Co'a yamuwede but kuka o'e wuywebe wuyetabut cīcā buye. Imēnpit wuyxe warara'acat ikukpin'ūm pima, ka'ūma ma kuka ace Deus xe. ³Soat kuka ace itabut'ūmayū be wuympikan wuyetabucap mubapuk am soat pe. Imēnpit wuyxe warara'acat ikukpin'ūm pima, te'e ma kuka acemupikat, te'e ma dak kuka aḡūm wuybubut ikuḡ'ūmayū be.

⁴Wuyxe warara'acat ikukpin pima bit, wuyukpi-ceḡēm ḡu kuka ajop cekay ip; xipacat tak kuka aḡūmḡūm cebe ip; wuyetabutkarey ḡu dak kuka ajop cekay ip; yoboḡan pin ḡu dak kuka ajop; — Warara'acat podi ma oca'ōbuyxi — i'ūmḡu dak kuka ace; ⁵⁻⁶warēmtaḡ ḡu dak kuka ajeku- -cedaḡ ma; jewekay acā ḡu dak kuka ajop ḡebum- -warara'acat kay dak; dao ḡu dak kuka wuyetakomām ajop; warēmtaḡ ḡu dak kuka warara'acat ajukuk- -cedaḡ ma; ḡebum ḡu dak kuka ajop apēn warara'acat cuk adi ikērēm wuykukiap kay; wuyḡuycūḡcūḡ tak kuka ajop ikērēat mujurūrūḡ ip iap kay; wuycokcoḡ tak kuka ajop cūḡ ma jekukum ip iap kay.

⁷Wuyxe warara'acat ikukpin pima, wuybu'um ḡu dak kuka ajop warara'acat kay; — Soat ma i'e but Deus xe — i dak kuka acece soat em; warara'acat idipan e'eap wiwim tak kuka ajop; wuyukpi-ceḡēm ḡu dak kuka warara'acat ajukuk. ⁸Wuyxe warara'acat ikukpin ijodi bima, soat em ma dak ikukpin jeedop ip wuyxe. Wuyxe ikukpin ip iap i'ūm'ēm ḡu. Darem ma bit ip kawēnwēn Deus a'ōbi kawēnwēn'ukayū. Ijodi bima acā. Darem ma dak ip kawēnwēn ya'ōba'arēmat'a'ōm kawēnwēn'ukayū. Ijodi bima acā. Itaybitbūcayū dak omuy ijodi bima acā.

⁹ Soan ġu wuyetaybit ġasū- -yopīt ma. Soat ġu dak wuyju imuwēnuwēn Deus biōġbuk a'ōbi- -yopīt ma.

¹⁰ Deus xe bima bit, ka'ūmġu je'e itaybitbūcayū. Soan ma wuyetaybit acesop. Yopīt ma imuwēnuwēn'ukayū dak ka'ūmġu je'e. Soat ma aceġuwēnuwēn.

¹¹ Bekin pima bekitkit ekawēnap puxim cuk adi oġuy; bekitkit aġuy buxim tak; bekitkit ekukuap puxim tak. Aġokatkan ġasū bit oce. Bekitkit puxim wekukuap pit cuk ocepere. ¹² Ġasū wuyetaybitbūt ma Deus e'eam. Waroa itabidiġ peat cocoap puxim wuyetaybitbūt ā ixem. Ixe xe bima bit, jewejojom ace'e. Ġasū wuyetaybitbūt ma ixem. Ixe bit itaybit cīcā wuyjum. Ġuyjom pit wuyetaybit ace'e ixem apēn ixe itaybit wuyjum iap co'i.

¹³ Wuyetabut Deus kay. Ixe xe wuydopap wiwim tak wuyju. Warara'acat tak ikukpin cīcā wuyxe. Deus xe xipat cīcā wuyetabut pima, ixe xe wuydopap wiwim pima dak. Wuyxe warara'acat ikukpin pima bit, ibodi ma xipat cexe.

14 Xipan warara'acat kukam cuy epejokuda. Soan cuy epe'e Deus biōġbuk emumuūm pu am. Cekawēn muwēnap pit warara'acat podi ma xipat. Imēnpuye:

— A'ōbacaap cuy eġūm owebe ekawēn muwēn ām — i juy epe'e cebe- -Deus pe. ² Ya'ōba'arēmat a'ōm kawēnuwēn'ukat ma wuywebe ġu kawēnwēn- -Deus pe acā, cekawēn pa'arēm wuyxe buye. Ibiōġbuk xipacat a'ōbi ixe ya'ōba'arēmat a'ōm kawēnwēn. I-cēmān ixe e'em. Warara'acat xe bit cekawēn pa'arēm. ³ Deus ekawēn muwēnuwēn'ukat pit kawēnwēn soat peam wuywebeam. Ixe wuybuywatwan biġ ma wuyetabut am. Wuypararaap mu'ūmu'ūm tak ixe. Wuyġuycūġap mukapkam tak ixe. ⁴ Ya'ōba'arēmat a'ōm kawēnwēn'ukat ma jewebuywatwan acā biġ ma jetabut am Jesus kay. Deus ekawēn muwēnuwēn'uk-

at pit soat itabucayū buywatwan biğ ma itabut am ip.

⁵ Ocokcoksū ma kuka oce Deus pe ja'ōbacaap ūm puje eywebe ya'ōba'arēmat'a'ōm kawēn ām. Ocokcok cīcā ma bit kuka oce ixē be ja'ōbacaap ūm puje eywebe Deus ekawēn muwēn ām. Ya'ōba'arēmat'a'ōm kawēnwēn'ukat xipan kapikpiğ Deus peam. Deus ekawēn muwēnuwēn'ukat pit ixē bodi ma xipan kapikpiğ cebeam. Te'e ma kuka o'jekawēn ya'ōba'arēmat'a'ōm wara'acat ceweju'ūm pima wuya'ōm cekawēn muwēn ām ce'awero'ibiyū be. Te'e ma kuka o'jekawēn ya'ōba'arēmat'a'ōm Jesus kay itabucat buywatwan'ūm puye. ⁶ Okitpit-piyū, eykay juy oajēm. Ya'ōba'arēmat'a'ōm kawēnwēn pima bit, eybuywan ġu kuka ōn, wekawēn pa'arēm eyxe buye. Apēn Deus cuk adi o'ğuwēnuwēn owebe iap muwēn puje bit, kuka ōn eybuywan, apēn cuk adi ixē omutaybitbiniap muwēn puje dak. Deus biōğbuk a'ōbi imuwēn puje dak, kuka ōn eybuywan, Deus ekawēn muwēn puje dak.

⁷ Wuya'ō'ē. Yamuydedeap tak ya'ō'ē ma. Tarerekrek'uk'uk tak ya'ō'ē ma- -flauta'uk tak ya'ō'ē ma, harpa'uk tak. Itaybit'ūmat cedağ'ūm yamuydedem pima bit, ajom i'eyū imuydedem i kuka o'e ip, warēmtağ ma yamuydedem puye. ⁸ Kededeğ'uk kukat warēmtağ ma yukmuydedem pima bit, kuka o'jemuxipan ġu ip sorarayū jeju am nopağōğō ām. ⁹ Imēnpuxim ēn ya'ōba'arēmat'a'ōm kawēnwēn pima, ekawēn cocoayū dak itaybit ġu kuka o'e ip ekawēn, ya'ijojom ma'ğū ip. Kawēnwēn'ūma ēn ceweju ip iat puxim kuka o'e ip. ¹⁰ Pūğ'ā'ō ġu wuyju. Warēmtak-suğ ma wuya'ō. Wuya'ōwarururu. Ibeat'a'ōm kawēnwēn'ukat xe bit ya'ōbapuk. ¹¹ Ya'ōba'arēmat'a'ōm kawēnwēn'ukat pit wūyatka bewiat puxim oxe; ōn tak cexe wūyatka bewiat puxim ma. ¹² Deus biōğbuk emumuūm kay jījā eyju kuy. Imēnpuye soat podi ma xipat cīcāt cuy epejoojuy cexewi. Ya'ōbacaap cuy epejoojuy warara'acat puywat am- -Jesus kay itabucayū buywat am.

¹³ Imēnpuye ya'ōba'arēmat'a'ōm kawēnuwēn'ukat cuy jekawēn Deus eju.

— A'ōbacaap cuy eḡūm owebe apēn cuk adi oce-
ceiap muwēn ām wa'ījojo'ukat a'ōm tak — i juy je'e
ip Deus pe.

¹⁴ Ōn ya'ōba'arēmat'a'ōm kawēnwēn Deus eju bima,
waḡuybi ḡu ōn kawēnwēn. Obiōḡbuk pe acā ōn ka-
wēnwēn. ¹⁵ Imēnpuye apēn paxi oce? Obiōḡbuk pe juy
ocekawēn Deus eju, waḡuybi dak. Obiōḡbuk pe juy
ocebibododon tak, waḡuybi dak. ¹⁶ “Bay, ēn xipat
cīcā” i'e'em eyju eybiōḡbuk pe acā bima, “Xipat
cīcā ma” i'e ba'ore kuka o'e eyweju je'aweroromayū
be, eyekawēn cekawēnpa'arēm cexe ip puye.

— Apēn xe'e ite e'em? — i acā kuka o'e ip.

¹⁷ Eya'ōdip cīcā ma aco'i eybiōḡbuk pe eyju kawēn-
wēn Deus eju. Imēnpit eyweju je'aweroromayū buy-
watwan ḡu eyju. ¹⁸ Eyekawēnap podi ma ōn pit ka-
wēnwēn ya'ōba'arēmat'a'ōm. Imēnpuye:

— Ēn xipat cīcā oxe — i ōn e'em Deus pe.

¹⁹ Warara'acat eju awerom pima bit cuy ya'ōba'a-
rēmat'a'ōm ḡu ocekawēn. Soat ip wa'ījojom iat-
'a'ōm acā ocekawēn ixeyū mutaybit am. 10.000 pa-
lavra ya'ōba'arēmat'a'ōm wekawēn puje, ka'ūma
ma kuka itaybit o'e ip. 5 palavra ixeyū a'ōm we-
kawēn puje bit, kuka itaybit o'e ip. Imēn kuka ip
osubuywan.

²⁰ Okitpitpiyū, yopīt ma juy eyetaybin ikērēat
muḡē ām bekitkit puxim. Bekitkit aḡuy buxim ḡu bit
cuy epeyewaḡuyḡuy- -yaypanayū aḡuy buxim acā. ²¹ I-
mēn e'em Deus wuyawēwēap ekawēntup pe:

“Ocekawēn puk ijodiat eju,” i'e'em
wuykukukat, i. “Ya'ōba'arēmat'a'ōm
puk ocekawēn ceweju ip- -wūyatka
watwat a'ōm,” i. “Imēnpit wa'ījo pin
ḡu juy je'e ip,” i.

Imēn e'em iḡodup.

²² Imēn wuyju ya'ōba'arēmat'a'ōm kawēnwēn
Deus soat podi ma ya'ōbaca i'e am itabucayū be
ḡu- -itabut'ūmayū be acā. Deus ekawēn muwēnuwēn
piti wuyju Deus soat podi ma ya'ōbaca i'e am ita-
but'ūmayū be ḡu- -itabucayū be acā. ²³ Jesus kay
itabucayū e'awero buje, soat eyju aco'i ya'ōba'arēm-

at'a'ôm kawênwên, Gebuje itabut'ûmat aco'i jajêm eykay- -o'ya'íjojo ġu bukiat tak.

— Teyûku yadaodaoayû — i aco'i je'e ip eyekawên cekawên pa'arêm cexe ip puye.

²⁴ Deus ekawên muwênuwên pima bit, itaybit je'e ip ikêrêat kuġ oceju iam- -eyekawên co buje. Ya'ôba'arêmat'a'ô o'ya'íjojo ġu'ibit tak itaybit je'e iboam.

— Deus omuju juy ipiat'ajojoap kay ikêrêat kuġ ôñ cexe buye — i je'e eyekawên co buje. ²⁵ — Ikêrêat kay ôñ ġebum soat em — i dak je'e ixe soat pe eywebe- -awerom'ayû be.

Jêġ'aecôġcôġ Deus wap:

— Bay, êñ xipat cîcâ — i dak je'e Deus pe. — Icêmân Deus omuy eyxe — i dak je'e eywebe.

²⁶ Imêneju, okitpitpiyû, jeymukûyjo ôñ cedaġ ma eye'awero am. Epeye'awero juy eywebuywat am biġ ma eyetabut am. Eye'awero buje, pûġ'in cuy ey'in jebibododon Deus kay; wara'at cuy jebureyû ma ġu-taybin; wara'at cuy apên Deus o'e cebe iap ġuwên; wara'at cuy jekawên ya'ôba'arêmat'a'ôm; wara'at cuy wuya'ôm ma ġuwên apên ya'ôba'arêmat'a'ôm kawênwên'ukat o'e iap. Soan cuy epe'e eywebuywat am biġ ma eyetabut am Jesus kay. ²⁷ Pûġ ġu ey'in kawênwên ya'ôba'arêmat'a'ôm. Adedem ġu bit cuy jekawên pûġ e'awero buje- -xepxep â. Ebapûġ tak xipat ma. Xepxem ġu dak cuy jekawên ip. Pûġ ma koap jede. Ixe emûġ puje wara'at jede kanomûm. Wara'at tak cuy wuya'ôm ma apên ite o'e iap ġuwên. ²⁸ Ka'ûma ma aco'i itaybit apên ite o'e iap muwên âm wuya'ôm. Itaybit'ûm pima, mûġ ma juy ip jeedop. Ya'ôberen ġu juy jede ip- -jewebe acâ- -Deus pe dak. ²⁹ Xepxep â juy apên Deus o'ġuwên cebe ip iap ġuwên pûġ e'awero buje. Ebapûġ tak xipat ma. Ixeyû ekawên cocom cîcâ juy jeedop ip warara'acat.

— Cedaġ xe'e ixeyû e'em? — i juy je'e ip jewewebe.

³⁰ Wara'acat pe Deus jekawên mubapuk puje bit, kawênwênat cuy jemûġ wara'acat ekawên âm. ³¹ Deus jekawên ġubapuk pûġ pe ġu- -soat pe ma. Soat ip i'e

but ajo Deus o'e cebe iap. Pūg ma juy ġuwēn. Ixe emūg puje juy wara'at ġuwēn. Imēn bodinmaku ġuwēn ip. Imēn e'em pima, soat cuy eyetaybin. Soat tak eycokcok epesop. Jewebuywatwan tak cuy epesop. ³² Jekpiwatpin ma jede Deus ekawēn muwēnuwēn'ukat. Jekpiwatpin ma dak jemūg. ³³ Deus icokcok ġu warēmtaġ wuye'aweroap kay bit. Cedaġ ma wuye'awero buje bit, icokcok e'em.

³⁴ Itabucayū e'awero buje juy mūg ma jeedop ip aoyū. Imēn je'awerorom soat ka daġ itabucayū. Abu ayacat o'ġuydeat ce'awero buje ip? Ka'ūma ma. Aġokatkayū kukukan ġu juy jeedop ip aoyū. Judeuyū awēwēap ekawēn tak imēn wuymutaybitbin. ³⁵ Wuy-sūsūn kuka ace ayacat ekawēn puje aweromayū be. "Apēn ite o'e?" i'e pin pima, jektop eju ma juy jekawēn jeduk'a be ma -awerom pima bit ka'ūma.

³⁶ Eyxewi ġu Deus ekawēn o'jebapuk-cexewi ma -Deus xewi. Eywebe ā ġu Deus jekawēn o'ġuwēn -soat pe ma. Imēneju:

— Ocejū acā cedaġ ma je'awerorom Deus eju kawēnwēnap'a be — i'ūmgū juy epe'e.

³⁷ Pūgpūg ey'in Deus ekawēn muwēnuwēn'ukayū. Warara'acat ey'in Deus biōġbuk emumuūm kuġayū -ya'ōbacaap kuġayū.

— Wuykukukat a'ōbi Paulo ijudup mubarararaġ wuy mukūyjoaptum — i juy je'e ixeyū ma.

³⁸ Pūġat pit wemudupmubararaktup peat ekawēn kay'ūm pima, ixē e'eap kay ġu juy epesop.

³⁹ Imēneju, okitpitpiyū: — A'ōbacaap cuy eġūm owebe ekawēn muwēn ām — i juy epe'e Deus pe. — Ya'ōba'arēmat'a'ōm ġu juy ecekawēn — i'ūmgū bit cuy epe'e wara'acat pe.

⁴⁰ Awerom pima bit, warēmtaġsuġ ġu juy epesop. Cedaġ ma juy epeye'awero.

15 Okitpitpiyū, ġebum cuy epesop kawēn idipat kay. Kuy bima juk adi iboap ekawēn oġuwēnuwēn eywebe. Iboap ekawēn kay eyetabut epesop. Iboap ekawēn taġ eyju jekukum ġasū dak. ²I-

boap ekawên cekawêntip. Iboap ekawên cuk adi oğuwênuwên eywebe. Deus eydaxijojom iboap ekawên kay eyetabut puye. Eybu'u'um pima, jeydaxijo. Eybu'u bima bit, te'e ma juk eyetabut epesop.

³ Apên cuk adi oya'ijojoiap cuk oğuwên eywebe. Iboap ekawên pit soat ekawên podi ma xipat. Cristo oe'ü ikêrêat uk am wuywebe. Oe'ü apên ibararak opop Deus ekawêntup pe iap tağ. ⁴ Ixe'üm o'jomôğ ip witabikūy be. Xepxep xet kap puje dak, Deus ixex o'ğuyu ce'ü'üayū dopap pewi. Waram ġuto o'jetait apên ibararak opop Deus ekawêntup pe iap tağ. ⁵ Pedro kay o'jebapuk je'üap tomukadi. Ğasū doze beayū kay o'jebapuk- jemumujuyū kay. ⁶ Ğasū jewēju juk adi oekuku'iyū kay o'jebapuk adeayū kay- -500 beayū kay. Ade ma buk ixeyū'in pit itabêğ ma. Warara'acat kuy oe'ü'ü ixeyū'in. ⁷ Tiago kay o'jebapuk ġuyjom. Soat jemumujuyū kay o'jebapuk ġuyjom.

⁸ Ixeyū kay jebapukap tomukadi okay o'jebapuk. It kapat wa'umat puxim ôn, kanomūm okay o'jebapuk puye. ⁹ Imênpuye obodi ma ip ya'ôbuyxi warara'acayū Jesus emumujuyū. Kuy bima Jesus kay itabucayū be ipiatpi'ajojoan cuk adi ojekukuku. Imênpuye osūsūn "Jesus emumuju ôn" i'e am. ¹⁰ Deus pit soat podi ma xipan okuğ, xipat ġu ma'ğū ôn. Imênpuye juk omuy Jesus emumujum. Te'e ġu juk omuy. Warara'acat ekapikap podi ma juk adi ocekapikpik Jesus emumujuyū ekapikap podi ma. Wa'ôbacaam ġu bit cuk adi ocekapikpik- -Deus a'ôbacaam acā. Ixe wa'ômucanucan'uk osunuy soat em. ¹¹ Kawên idipat acā oğuwên eywebe. Warara'acayū dak ibeat acā o'ğuwên eywebe- -Jesus emumujuyū. Abu imuwênuwên iat pit yoboğ ġu. Cekawên pit yoboğ. Iboap ekawên kay juk eyetabut epesop.

¹² — Deus waram ġuto Cristo o'ğutait ce'üap tomukadi — i wuyju e'em.

Imênpuye:

— Deus waram pit ce'ü'ü'ibiyū ġutait ġu — i'e'em te'e ma pūğpūğ ey'in.

¹³ Ixeyū e'eap icēm pima bit: — Deus waram ġuto Cristo o'ğutait ġu — i dak e'em ip.

¹⁴ Deus pe waram ġuto Cristo mutait'ūm pima bit, te'e ma kuka kawēn idipat wara'acat pe- -te'e ma dak kuka adi eyetabut iboap ekawēn kay.

¹⁵ — Deus waram Cristo o'ġutait — i wuyju e'em.

Ixeyū e'eap icēm pima bit, napa ma wuyju e'em:

— Deus Cristo o'ġutait — i.

Deus waram ġuto ce'ū'ūayū mutaicin ġu iap ekawēn icēm pima, Cristo dak waram ġuto o'ġutait ġu.

¹⁶ Waram ġuto ce'ū'ū'ibiyū mutaicit'uk'ūm pima, Cristo dak waram ġuto o'ġutait ġu. ¹⁷ Ixe be waram ġuto Cristo mutait'ūm pima, te'e ma juk eyetabut cekay. Ikērēat kuġ mabuk eyju. Ixe be imutait'ūm pima, ipiat'ajojoap kay epeju eye'ū buje. ¹⁸ Ixe be imutait'ūm pima, Cristo kay itabucayū'ūm'ūm wūy ma opop ip Deus wi. Ipiat'ajojoap pe ma ip opop. ¹⁹ Ijodi bima acā du Cristo xipan wuykuġ? Wuye'ū buje bit wuykay ġu xe'e? Imēn pima, warara'acat podi ma kuka wuyġuycūġ ace.

²⁰ Imēnpit ixeyū e'eap icēm ġu. Deus waram ġuto Cristo o'ġutait. O'ġutait waram ġuto soat webekit-kiyū'ūm'ūm oġutait iam wuymutaybit am. ²¹ Soat je'ū'ūm ace'e pūġ ma aġokatkat ikērēat o'ġuġē buye. Imēnpuxim soat acejetait waram wara'at pit idipat o'ġuġē buye. ²² Soat je'ū'ūm ace'e wuyju Adāo naxeġebitbit puye. Imēnpuxim waram acejetait Cristo eju mūġ'i wuyju buye. ²³ Cristo koap o'jetait waram. Guyjom pit Cristo a'ōkayayū waram ġuto jetait. Waram acejetait ixē ajēm puje. ²⁴ Cristo Deus kay'ūm-ayū a'ōbacaap ġu'ūm. Soat ġu'ūm. Soat xipat'ūmayū kukukat a'ōbacaap ġu'ūm. Soat ya'ōbuyxiat a'ōbacaap tak ġu'ūm. Soat ya'ōcaat a'ōbacaap tak ġu'ūm. Ka'ūma ma kūyjobit jeenuy ixeyū a'ō kay. Deus a'ō kay acā jeedop ip kūyjobit.

— Ēn acā soat kukukat. Soat kūyjobit a'ō kay acā — i soat je'e ip Deus pe.

²⁵ Cristo soat kukukan je'e Deus pe cekay itakomaayū a'ōbacaap mu'ūm puje. Soat jeedop ip kūyjobit Cristo a'ō kay. ²⁶ Wuye'ūap wuykay itakomaat puxim. Wuyparara wuykay itakomaat puxim. Wuypa-

rara dak je'úm. Deus soat kukukan pima bit ace'ũ ġu. ²⁷ Imên e'em Deus ekawêntup:

Deus soat a'ôbacaap o'ġu'úm, i. Soat
jeedop ip kũyjobit ixé a'ô kay, i.

Deus soat a'ôbacaap ġu'úm. Soat jeedop ip kũyjobit Cristo a'ô kay. Ja'ôbacaap pit ġu'úm ġu. ²⁸ Cristo a'ô kay am Deus pe soat mukũyjo buje, Cristo jee-nuy kũyjobit Deus a'ô kay- -jebay a'ô kay. Koap cebay soat ġukũyjo ja'ô kay am. Ġasũ:

— Õn tak kũyjobin oce a'ô kay — i je'e ipot jebay be.

Deus soat ipi daġacat kukukan jeenuy kabi beacat kukukan tak. Soat em jeenuy ixeyũ kukukan. Ixeyũ kukukap i'úm'êm ġu.

²⁹ Deus pe ce'ũ'ũ'ibiyũ mutaicit'uk'úm pima, te'e ma pũġpũġ ey'in jemubatisasanan ce'ũ'ibit tieġ.

— Deus waram ġuto ce'ũ'ũ'ibiyũ mutaicin ġu — i napa ma e'em ixeyũ.

Ixeyũ e'eap icêm pima bit, te'e ma jemubatisasanan ip ce'ũ'ibit tieġ. ³⁰ Ixe be ce'ũ'ũ'ibiyũ mutaicit'uk'úm pima, te'e ma soat kabia oaoka ojuyap cocom õn. Imênpit waram ġuto ip imutaicit'uk. Imên-puye te'e ġu wuyaoka ojuyap cocom wuyju. ³¹ Ocok-cok eykay, wuykukukat Jesus Cristo eju mũġ'i eyju jekukum puye. Imênpuye:

— Soat kabia oaoka ojuyap cocom õn, okitpit-piyũ — i õn e'em eywebe.

³² Ijopka be dak cuk adi we'ũpinpinap ojojoho wida ika'uat eju ocebacacanap puxim. Deus ekawên mu-wênuwên pima, we'ũpinpinap ojojoho ijopka be- -Êfeso ka be. Omucokcok am imuwên puje, te'e ma kajuk we'ũpinpinap ojojoho.

— Kuyaje ace'ũ. Imênpuye juy jekõnkõn acã ajop, tikõnkõn tak — i te'e ma e'em itabut'ũmayũ. Deus pe ce'ũ'ũayũ mutaicit'uk'úm pima, ixeyũ e'eap taġ cuy ajeku.

³³ Eyday'em'um cuy epesop wara'acat pe ey-muġuykukuap puxim. Ikêrêat mujurũġrũġxiat purem pima, wuyju dak kuka cũġ ma wuyekukuap acepere ma ixeyũ buxim ikêrêat mujurũġ âm. ³⁴ Pũġpũġ ey'in pit eyetaybit ġu Deus e'e am. Imêġãm õn e'em ey-

musûsûn âm. Waram pit cuy eyağuyusan epesop. Ikê-rêat mujurûgrûğap cuy epeyepere!

³⁶ Imênpit:

— Apêntak Deus waram ce'û'û'ibiyû ġutait? — i je'e aco'i pûğ ey'in owebe. — Apebitak ixeyû jebin je'e iisuat? — i je'e aco'i owebe.

³⁶ Eyetaybit ġu eyju. Kadaida daidadam wuyju ipi be. Tamuwexat puje acâ kadaim e'em. ³⁷ Kadai ġu wuyju taidadam- -warêmtaksuğta ma. Trigoda aco'i taidadam wuyju- -warêmtaksuğta ma. ³⁸ Deus jekpiwatpin ma tamuwexaxan kadaim. Kadaida taida'ibita buxim ma jedaewexaxan yaypan puje- -wara'atam ġu.

³⁹ Soat itabêğayû ên pûğên ġu. Wuyên pûğên. Pucaên pit wara'atên ma. Wasûên tak wara'atên ma. Aximaên tak wara'atên ma.

⁴⁰ Imên ma opop kabi be dak warêmtaksuğat ma. Ipi dağ tak imên ma- -warêmtaksuğat ma. Kabi beacat idip. Ipi dağacat tak idip. Jewejojo'i ġu bit ip idip. ⁴¹ Imêntak kaxie iesop. Kaxiamat pit ġuto iesop warun ma. Kasopta bit ġuto taesop warun ma. Jewejojo'i ġu ip isop. Imêntak pûğpûğta bit ġuto kasopta wara'atasop co'i ġu- -tasop warun ma.

⁴² Imênpuxim Deus waram ġuto wuymutaicin. Wuykot puje wuyjebit ierep e'em. Waram ġuto imutait puje bit, ierep pa'ore je'e. ⁴³ Wuykot puje ikêrê e'em wuyjebit ibaca ġu dak. Waram ġuto imutait puje bit, idip cîcâ je'e. Ibaca jîjâ dak je'e. ⁴⁴ Wuykot puje, ijodiat'ûm jebit ma wuyjebit. Waram ġuto wuymutait puje bit, wara'an je'e. Deus biôğbuk emumuğê jebin je'e wuyjebit. Ijodi bima wuyjebit ijodiat jebit ma. Waram wuymutait puje bit Deus biôğbuk emumuğê jebit wuyjebin je'e. ⁴⁵ Imên e'em Deus eka-wêntup:

Deus koapat ağokatkat o'ğugê- -Adão
o'ğugê, i. Ijebin o'ğugê cebeam ijodiat
jebin ma, i.

Kanomūmat Adão bit ijodiat jebit podi ma. Ixe biôğbuk pit wuymutaicit'ukat. Kanomūmat Adão i wara'at putet Jesus Cristo butet. ⁴⁶ Koapat pit wuyjebit

ijodiat jebit ma. Guyjom pit Deus wara'at jebit je'gūm wuyjebin. Jebiōgbuk muḡēḡē je'gūm-kabi beat jebit. ⁴⁷ Koapat Adão ka'wi muḡēḡē osunuy. Kanomūmat pit o'kop kabi bewi- wuykukukat Jesus. ⁴⁸ Ijodiat jebit ka'wi muḡēḡē Adão jebit puxim. Kabi kay cumayū bit wara'at je'jat jejebin je'ū buje- -Cristo jebit puxim- -kabi beat jebit puxim. ⁴⁹ Ġasū ka'wi muḡēḡē buxim wuyju. Guyjom pit kabi beat puxim acesop.

⁵⁰ Okitpitpiyū, imēn ōn eymutaybin pin. Deus soat kukukan pima ka'ūma ma je'ū. Imēnpuye ijodiat jebit kuḡ pima aceōm ḡu cexe ixe soat kukukan pima- -ierep em iat kuḡ pima. Ierep em iat ḡu jeenuy cexe.

⁵¹ Eya'ōpicūḡcūḡ cuy epesop wa'ō kay. Soat ḡu ace'ū. Dao ma bit Deus soat wuyju wuyмуwexat. Kuy bima iboap iba'arēm osodop soat xe wuyxe. Ġasū bit ibapuk o'e. ⁵² Dao ma wuyмуwexat wuyeta-pokap co'i. Ixe wuyмуwexat amām parasuy jo'iat muyde buje. Parasuy jo'iat ḡuyde kabi be. Imuyde buje, Deus waram ḡuto itabucayū'ūm'ūm jebit ḡuyu ipi bewi. Iisuat je'gūm ijebin. Waram ḡuto itait je'e ip. Waram pit je'ū ḡu ip. Soat em itait ip jeedop. Wuyju wuyetait pima parasuy jo'iat muyde buje, iisuat je'gūm wuywebe dak wuyjebin. ⁵³ Ijodiat jebit je'ū'ūm. Ierep e'em. Deus pit ibeat jebit ḡuwexat kabi beat jebin- -ierep ḡuian, je'ū ḡuian. ⁵⁴ Imēn e'em Deus ekawēntup:

Ka'ūmḡu je'e je'ūap Deus soat kukukan pima, i. Soat kūyjobit jeedop ip Deus a'ō kay, i. Deus je'ūiat ḡuwexat je'ū ḡuian, i.

Imuwexat puje ibodup peat ekawēn co'i je'e.

⁵⁵ Wuye'ūap dat pe wuyeiduap co'i. Deus pit ce'ūat mutaicin dat tōḡta-'ukap puxim. Je'ūaptip'ūm pima, ka'ūma buxim ace'e wuyparara. Acesupi'ajo ḡu dak ipiat. Pūḡ em tak ka'ūma.

⁵⁶ Soat ace'ū ikērēat kuḡ puye. Ikereat mujurūḡ-rūḡap dat tōḡta buxim. Wuyetaybit wuyju ikērēat

kuḡ iam Deus ekawēn cocom puye. ⁵⁷ Deus pit wuya'ōmucanucan wuywebe ikērēat mujurūḡap puxim, wuykukukat Jesus Cristo a'ō daḡ wuyju jekukum puye. Imēnpuye:

— Soat podi ma ēn xipan ocekuḡ — i juy ace cebe.

⁵⁸ Imēneju, okitpitpiyū, oxe ikukpinayū, eyaḡuywarururun ḡu juy epesop! Eybu'um ḡu dak cuy epesop eyetabut am Cristo kay. Soat em cuy kapikpiḡ epesop wuykukukat peam. Ixe a'ōbacaam kapikpiḡ pima, te'e ḡu kuka acekapik.

16 — Ocedinheiro juy oceḡuxipan imuju am Deus ebekitkit pe- -Judéia eipi watwat pe — i juk epe'e owebe eyemudupmubararaktup pe kuyatup pe.

Epeḡuxipanpan cuy! Apēn cuk Galácia eipi watwat pe oceceiap taḡ cuy eyju dak epeḡuxipan- -apēn cuk itabucayū be oceceiap taḡ. ² Soat edomingo be eyedinheiro'in cuy epeḡuxipan. Ade ma ikuḡayū adem ma juy ḡuxipan. Ade'ūm ikuḡat pit adem ḡu juy ḡuxipan. Imēn eyju ḡasū imuxipanpan pima:

— Eyedinheiro'in cuy epejat — i ḡu kuka oce eywebe eykay oajēm puje.

Oajēm puje at ḡu juy epeḡuxipanpan. ḡasū dak cuy epeḡuxipanpan. Soat cuy je'e ixipan oajēm puje. ³ Oajēm puje aḡokat kayū oḡuju Jerusalém ka kay- -eyemunaēyū. Cartadup tak otupmubararak eyedinheiro eju tupmujuaptum. Eyedinheiro tujowat ip cartadup tak. ⁴ Oju ba'ore'ūm pima bit ōn tak oju ceweju ip.

⁵ Macedônia eipi daḡ cuy ojeku. Macedônia eipi daḡ weku epere buje bit, eykay juy oajēm. ⁶ Ibum ma aco'i oḡuy eyxe. Ihi bun aco'i oḡuy. Guyjom cuy obuywan epe'e ojuap taḡ weku am. ⁷ Darem ḡu onuy pin eyxe- -ibun ma. Wuykukukat ibikuy bima, ibun ma oḡuy eyxe.

⁸ Ijocce bit oğuy Pentecostes epeta ajēmap wiwim- -Ēfeso ka be. ⁹ Adeayū mutaybin put owebe ijocce. Jesus ekawēn muwēnuwēn ōn adeayū be. Warara'acayū bit itakoma okay, Jesus muwēnuwēn ōn puye.

¹⁰ Obuxim Timóteo dak kapikpiğ wuykukukat peam kawēn idipat muwēnuwēn. Imēnpuye eykay yajēm pujē juy xipan epejukuk ikabap i'e am eyxe. ¹¹ Ixe juy epeğupubun ġu yaypan'isu ma'ğū. Ixe epicap wiwim ōn wuykitpitpiyū eju. Imēnpuye juy ixe epesubuywan icokcoğ cepit am okay.

¹² — Ēn tak cuy eju Corinto ka watwat jom wuykitpitpiyū eju — i juk adi oce wuykitpit Apolo be. Ade em ma imēn cuk adi ocece cebe.

— Gasū ġu aco'i oju — io'e owebe. Iju ba'ore'ūm pima bit, je'ju eykay.

¹³ Eyday'em'um cuy epesop warara'acat pe ey-mubu'unap puxim Cristo kay. Eyetabun cīcā juy epesop cekay. Eya'ōcam cuy epesop. Wara'at kaykay ġu juy etetabucap epejukuk. ¹⁴ Warara'acat ikukpinap tomuju juy epeyekapikpik.

¹⁵ Kuy eyetaybit Estéfnas-ibadipyūm tak. Ixeyū koap ma itabut o'e Jesus kay Grécia eipi watwat'in. Soat em Deus ebekitkit puywatwan ip Estéfnasyū. Okitpitpiyū, ¹⁶ ixeyū a'ō dağ cuy epekuku-ixeyū eju kapikpik'ukayū a'ō dak.

¹⁷ Ocokcok cīcā Estéfnas ajēmap kay, Fortunato ajēmap kay dak, Acaico ajēmap kay dak. Eywebe obuywan pa'ore bima, ixeyū ma obuywatwan. ¹⁸ Ixeyū omucokcokcoğ cīcā. Eymucokcokcoğ tak cuk adi ip osodop. Xipat cīcā ip oxe. Eyxe dak aco'i xipat ma ip.

¹⁹ Ásia eipi watwat kato mujujum eywebe-itabucayū. Áquila, Priscila dak kato mujujum eywebe, soat ixeyū duk'a be je'aweroro'ukayū dak, wuykukukat kay itabucayū. ²⁰ Soat wuykitpitpiyū dak kato mujujum eywebe-oxeayū.

Epeyewakobotbot cuy wuykukpin wuyeweweju iap mubapuk am soat pe. ²¹ Obubin ma Paulo dak kato mujujum eywebeiaptup mubarararağ ōn.

²² — Wūy ma jeedop ip Deus wi ipiat'ajojom wuykukukat kay'ūmayū — i òn e'em. — Ocekukukat, ajēm cuy! — i dak òn e'em.

²³ — Ocekukukat, xipan cuy Corinto ka watwat ejukuk-ekayayū ejukuk — i òn e'em Jesus Cristo be.

²⁴ Eykukpin cīcā oxe-soat wuyju Jesus Cristo eju mūḡ'i jekukum puye.

Ibūrū ma.

CORINTO KA WATWAT PEAPTUP PAULO EMUDUPMUBARARAKTUP XEPXEPATUP

1 Corinto ka watwat, cartadup mubarararağ òn eywebeaptum- -Deus ebekitkiyũ adeayũ beaptum, Grécia eipi watwat beaptum. Òn Paulo. Jesus Cristo emumuju òn Deus bikuyap tağ. Tupmubarararağ òn wuykitpit Timóteo eju- -wuyxe ikukpinat eju.

² — Bay, xipan cuy Corinto ka watwat ejukuk — i òn e'em Deus pe- -wuyebay be, Jesus Cristo be dak- -wuykukukat pe. — Ixeyũ ağyumubabibin cuy eğuy — i òn e'em cebe ip.

³ — Soat podi ma ên xipat — i juy acece Deus pe.

Ixe ma wuykukukat Jesus Cristo ebay. Ixe ma wuyebayat tak. Soat em xipan wuykuğ. Soat em wuybuywatwan. ⁴ Xipat'umat jebapukpuğ ocewebe bima, ixe ma ocebuywatwan. Imênpuye warara'acayũ be xipat'umat ebapuk puje, ocetaybit ibuywat am ip, ipiatpi'ajojom ip pima dak. Ocetaybit ixeyũ buywat am, Deus soat em kuy ocebuywatwan puye. ⁵ Apên Cristo juk adi ipiat o'supi'ajojo iap puxim oceju dak ipiatpi'ajojom ocetabut Cristo kay buye. Imênpit biğ ma oceju ipiatpi'ajojom pima, biğ ma ixe dak ocebuywatwan oca'ômucanucan.

⁶⁻⁷ — Deus ocebuywatwan e'em — i juk adi oce eywebe kuy bima. — Deus ocedaxijojom ipiat'ajojoap kay ocejuap puxim — i dak cuk adi oce eywebe.

Imênpuye Deus kay'ũmayũ oce kay kay jījā. Ipiatpi'ajojoan ip ocewebe. Wuyju ipiatpi'ajojom pima bit, Deus wuybuywatwan cīcā. Kuy eyetaybit iboam. Imênpuye:

— Wuyju dak ipiatpi'ajojom pima, Deus wuybuywatwan jeenuy — i juy epe'e'e eyewewebe a'ômucan am. — Wuykay'ũmayũ wuykaykay bima dak,

ixe wuybuywatwan ma jeenuy — i juy epe'e'e eyewe-webe.

Ixe ma eya'ômucanucan jeenuy eywebe eyetabucap epereap puxim.

⁸ Okitpitpiyū, ade jījā xipat'ūmat o'jebapukpuk ocewebe Ásia eipi be bima. Iboap cuy oġuwēn eywebe eyetaybit'ūmap puxim. Ipiat ocesupi'ajo jījā. Ipxoi jījāat kuġ oceweju iap co'i ma juk adi ocekukuku. Tūybe aceap iān cuk adi oce'e. ⁹ Tūybe warara'acat wuyaoka iān cuk adi oce'e. Imēnpuye juk adi ocetaybit ocesop iba'ore ocewebe jewedaxijoam iam, Deus pe acā iba'ore ġu ocedaxijoam iam tak. Ixe be acā imutait put ce'ūat tak. ¹⁰ Ixe juk adi ocedaxijojo warara'acat pe ocaokaap puxim. Ixe ma ocedaxijom jeenuy soat em. Ocedaxijom jeenuy xipat'ūmat ebapukpuġ ma'ġu ocewebe. Imēnpuye ocetabut cīcā cekay. ¹¹ Eyju dak cuy ocebuywatwan epesop kawēnwēn pima Deus eju ocewebeam. Deus tak ocebuywatwan jeenuy, ocewebeam eyju kawēnwēn puye. Xipat cīcāat je'ġūm ocewebe. Xipan jeenuy ocekuġ. Imēnpuye adeayū je'e cebe:

— Bay, soat podi ma ēn xipat, xipan Pauloyū ejukuk puye — i. — Ēn xipat cīcāat ūmūm cebe — i dak je'e ip cebe.

¹² Abu buk oceġuġuykuku? Ka'ūma ma. Cedaġ ma juk adi ocekukuku. Xipan ma juk adi ocesop warara'acat kuġ. Eykuġ pit ibodi ma ocesop xipan eykuġ. Icēmān oceju iboam e'em. Apēn cedaġ ocexe iap taġ oceju jekukum, ocetaybit cīcā buye ġu. -Deus ocebuywatwan puye acā; ixe soat em xipat cīcāat ūmūm ocewebe buye dak. Imēnpuye ocecokcok ocekukuap kay cedaġ ma ocekuku buye. ¹³ Kawēn iba'arēmatup mubararaġ ġu ōn eywebe. -kawēn ibapukatup acā. Obu'u ma juk adi oġuy eymuġuykuku cartadup pe. Eyetaybitbūt ā ōn. Imēnpuye juy omuymuy ġu bit epesop! ¹⁴ Ġuyjom pit aco'i eyetaybit cīcā epe'e ōn. Eycokcoġ epesop okay ġebuje bit. Ōn tak ocokcoġ oce eykay waram wuykukukat Jesus ajēmap kabia be.

¹⁵ - ¹⁶ Koap pima bit cuk adi a'ġu wa'ō kay jījā

epesop. Imēnpuye eyjo pin cuk adi oğuy Macedônia eipi kay cum pima, ibocewi jepin pima dak. Imēn eyjojo buje kuka juk xepxep em oğuy eymucokcoğ Deus ekawēn eymutaybitbin. Eyju dak kuka juk obuywan epe'e Judéia eipi kay oju am. ¹⁷ Wetaybit'üm tu oğuy eyxe eykay iju pin pima?

— Ewekay acā ēn ġebum — i du eyju e'em owebe? — “Cum ōn eykay,” i ēn e'em ocewebe cum'üm pima — i du eyju e'em owebe?

Imēn ġu ōn e'em! ¹⁸ Deus pit napa ġu e'em. Soat em ja'ō dağ e'em. Ōn tak inapa bit oce ġu. Deus itaybit iboam.

— Hm hm. Cum ōn eykay — i'ümġu ōn e'em, cum'üm pima bit.

¹⁹ Ōn ma Jesus Cristo juk adi oğuwēnuwēn eywebe. Timóteo dak cuk adi ixe ma o'ğuwēnuwēn eywebe, Silas tak. Ixe Jesus Cristo Deus ipocat.

— Em ōn — i'ümġu ixe e'em em'üm pima. Ja'ō dağ pit soat em ma e'em.

²⁰ — Xipacat oğüm eywebe — i'e'em Deus wuywebe.

Ibo bubum ma wuyju xipacat pupum, Jesus Cristo Deus a'ō dağ iümüm wuywebe buye. Imēnpuye:

— Imēn cuy je'e, soat em Deus ja'ō dağ e'em puye — i wuyju e'em soat pe. Imēnpuye:

— Warara'acat podi ma Deus idip — i'e'em adeayū dak.

²¹ Deus ma ja'ōbacaap ümüm wuywebe Cristo eku-kuap puxim wuyeku am. Ixe ma juk wuynaē jebekitkin. ²² Wuybutet mubarararağ wuybubut pe teku juy obubut iap mubapuk am soat pe. Imēnpuxim Deus tak jebiōğbuk o'ğuođm wuywebe teyūku webekitkit iap mubapuk am soat pe. Ixe biōğbuk wuywebe bima, wuyetaybit soat wuywebe iüm piniat acejat iam.

²³ Deus itaybit icēmān ōn e'em eywebe iam. Eykay oju buje bit, kuka mo ōn eymukorēm. Imēnpuye oju ġu eykay eymukorēmap puxim. Obu'u eymuğuy-cūğ. ²⁴ Jeymukūyjo ġu bit oceju eyetabut am, kuy eyetabut cīcā buye. Imēnpit eycokcok cīcā ġu buk-eycokcoksū ma. Imēnpuye ocexe eymucokcok pin.

2 Imēnpuye:

— Odaobu'u'u Corinto ka beayū kay imukorēmap puxim ip- -imuḡuycūḡap puxim tak ip — i juk oce owebe ma.

O mucokcokcoḡ cuk adi epesop kuy bima. ² Owebe eymuḡuycūḡ puje bit, abu kuka omucokcoḡ? Ka'ūma ma! Soat kuka eyḡuycūḡ epesop. Imēnpuye oju ḡu eykay obu'u eymukorēm puye. ³ Imēnpuye koapatup cuk otupmubararak cartadup eymukorēmap-tup. Ikērēat muḡēḡēap cuy epeyepere oajēm awap. Eywebe omuḡuycūḡap kay ḡu juy ōn oajēm puje. Eywebe omucokcoḡap kay acā juy ōn. Ōn ocokcok pima, eyju dak eycokcok ma epesop. ⁴ Oḡuycūḡ cīcā eykay bima ibodup cuk otupmubararak eywebeaptup- -waḡuybabi'ūm eykuḡ pima. Wetadidetoḡ ma juk adi otupmubararak. Eymuḡuycūḡap ojuy ḡu bit cuk otupmubararak- -eymukūyjoap ojuy acā. Eymukūyjo pin cuk adi oḡuy eykukpin cīcā oxe iam.

⁵ Iḡo bit cuk adi omuḡuycūḡ cīcā aḡokatkat, eyxeat, ikērēat muḡēḡē'ukat. Iḡo juy epeḡukorēm iapatup cuk adi otupmubararak eywebeaptup koapatup. Omuḡuycūḡap podi ma bit iḡo juk adi eymuḡuycūḡcūḡ osunuy pūḡpūḡpūḡ ey'in. Eya'ōpuruḡ ḡu bit cuy epeḡukorēm- -eya'ōdidim ma. ⁶ Ade ey'in cuk kuy iḡo o'ḡukorēm rēm waram ḡuto cedaḡ ma ceku am. Kuy juy o'e. Waram pit epeḡukorēm ḡu. ⁷ Ḡebum ḡu juy epesop ḡasū bit apēn ixe ikērēat o'ḡuḡē iap kay. Epesubuywan ḡasū bit. Iburem cuy epesop biḡ ma iḡuycūḡap puxim- -Deus ikērēat ju'uk ḡu owebewi i'eap puxim. ⁸ Xipan cuy ixe epejukuk ḡasū bit imutaybin am ocexe ekukpin cīcā iam. ⁹ Kūyjobit paxi adi ip wa'ō kay iam cuk adi oḡuy wetaybin pin. Imēnpuye juk ibodup otupmubararak eywebeaptup koapatup. ¹⁰ Iḡo aḡokatkat cuk adi omuḡuycūḡ ikērēat muḡēḡē'ukat. Imēnpit eyju ḡebum'ūm pima apēn ikērēat o'ḡuḡē iap kay, ōn tak ḡebum ḡu oce iboap kay. Waḡuyba'ūm iboap kay Cristo etabutpe. Waḡuyba'ūm puje, xipat ma je'e eywebeam tak. ¹¹ Ḡebum ḡu oce iboap kay Satanás pe wuyaḡuyba'a-

rēmap puxim. Wuyetaybit apēn Satanás jewaḡuy-muḡēḡēm. Ibikuy jījā wuywebe ikērēat muḡēḡēan.

¹² Kuy ma juk oju Tróade ka be kawēn idipat muwēn ām iboka watwat pe- -Cristo muwēn ām cebe ip. Iba'ore jījā osunuy iju am. Emukacūḡap puxim wuykukukat pit omuju kawēn idipat muwēn ām cebe ip. ¹³ Waḡuybabi'ūm cīcā juk a'ḡu oḡuy, wuykitpit Tito dobuxik'ūm puye. Imēnpuye ocewemuwēn ibo ka watwat pe. Macedônia eipi kay juk oju ikudadam.

¹⁴ Kuyje ya'ōcaat oexe nopāḡōḡōap taḡwi taomūn-mūn'ibiyū kuḡ. Soat etabutpe oexe- -jebekitkit etabutpe. Imēnpuxim Deus tak soat em wuya'ōmucanucan Cristo eju mūḡ'i wuyeku am soat etabutpe jebekitkit etabutpe. Apēn soat taḡ te'okuat jepōḡpōḡpōḡ iap puxim Deus tak wuyumujum soat kaka daḡ. Wuyumujum Cristo ekawēn muwēn ām soat ka watwat itaybit am ixem. Imēneju:

— Warara'acat podi ma ēn xipat! — i juy ace cebe- -Deus pe.

¹⁵ Kuyje paīyū te'okuatōm mupikupik'uk osodop ip tiḡmuju am Deus kay. Wuyekukuap te'okuatiḡ puxim, wuyju Cristo bikuyap taḡ jekukum puye. Cristo ijoptiḡ tiḡmuyuhum Deus kay. Te'okuatiḡ jediḡepōḡpōḡpōḡ Deus taxijom'iaiyū be te'oyōn ām, ipiat'ajojoap kay cumayū be dak te'oyōn ām. ¹⁶ Ipiat'ajojoap kay cumayū xe wuyju Cristo bikuyap taḡ jekukum iap te'okōōmat puxim e'em- -wuye'ū'ēmate'o buxim. Deus taxijom'iaiyū xe bit te'okuat puxim e'em wuyekukuap- -wuymu'ada'adaapte'o buxim. Abu-be Cristo imuwēn put wara'at ka watwat pe? ¹⁷ Deus a'ōbiat pe acā! Deus pe wuyumuju buje, cedaḡ ma Cristo aḡuwēnuwēn. Warara'acat muḡuykukuku'uk- 'ūmayū wuyju. Deus etabutpe wuyju imuwēnuwēn. Warara'acat pit warēmtaḡ ma Cristo muwēnuwēn. Imuwēnuwēnaptei kay jījā dak e'em ip. Tūybe Cristo muwēnuwēn pima wuybuyxi jījāan ace'e iān e'em ip. Ixeyū buxim ḡu oceju bit.

3 Warēmtaḡ ma eymutaybitbin'ukayū buxim ḡu oceju bit.

— Xipat cīcā oceju — i'ūmḡu oceju bit e'em warara'acayū be.

Ijoptup kukat xipat iaptup kay xe'e oceju eyxewi cartadup? Ka'ūma. Kuy ocetaybit eyju xipat iam. Iboaptup kay xe'e eyju ocexewi dak? Ka'ūma. Kuy eyetaybit oceju xipat iam. ²Oceju bit cartadup kay ḡu eyxewi Pauloyū xipat iaptup. Eyju ma ocemudup-mubararaktup puxim cartadup puxim. Apēn eyju cedaḡ ma jekukum iap co buje soat je'e:

— Paulo xipat. Cedaḡ ma Corinto ka watwat o'ḡutaybitbin — i.

Imēn je'e ip apēn cuk ikērēat muḡēḡēap epeyepere iap co buje dak. ³Eyju cartadup puxim- -Cristo emudupmubararaktup puxim. Tintadim ḡu o'tupmubararak. Wita'a erūn'a be ḡu dak opop ibararak. Deus biōḡbuk pit cuk eyaḡuydadam o'e- -soat em itabēḡat biōḡbuk ma. Eyaḡuydadam o'e ocewebe kawēn idipat muwēn puje eywebe. Imēnpuye eyekukuap cartadup puxim.

⁴— Oceju xipat — i oceju e'em eywebe, ocetabut cīcā Deus kay buye, Cristo kay dak.

⁵Deus ocebuywan'ūm pima, iba'ore kuka o'e ocewebe Cristo muwēn ām warara'acat pe. Imuwēn put ocewebe ixē ocebuywatwan pima acā. ⁶Ixē ma ocebuywatwan kawēn iisuat muwēn ām soat ka watwat pe- -apēn ixē soat ijodiacat taxijo pin iap ekawēn muwēn ām.

— Soat ekawēn taḡ eyeku'ūm pima Deus pe wuyawēwēap ekawēn taḡ, ixē wi wūy ma epesop eye'ū buje — i'ūmḡu oceju e'em warara'acayū be. — Ibiōḡbuk Xipacat eyaḡuydadam pima, Deus xe ma epesop eye'ū buje — i acā oceju e'em.

Wuyawēwēap ekawēn taḡ jeku ojuy e'em ip adeayū. Jewedaxijo ojuy dak e'em ip. Iba'ore imēnpit cewedaxijo am ip. Imēnpuye wūy ma ip dopdom Deus wi. Ibiōḡbuk Xipacat wuyaḡuydadam pima bit, Deus xe acesop soat em.

⁷Kawēn kuyat pit ibararak osodop witadopa be- -topaerūnatopa be. Deus dipap o'jebapuk iboap eka-

wên muwên puje Moisés pe. Idip cîcâat o'jebapuk. Imênpuye Moisés osunuy topa jo ba'ore soat pe jebekitkit pe -Israel naxegebitbit pe. Topa jo ba'ore osunuy topasopsup puye Deus dipap kuḡ. Guyjom pit topasopsup ḡūḡūn ā o'e. Imēnpit iba'ore soat pe wuyawewēap ekawên taḡ jeku am soat ekawên taḡ. Imênpuye iboap ekawên taḡ jeku ojuyat wūy ma jee-nuy Deus wi je'ū buje. ⁸ Ḡasū bit Deus jebiōḡbuk muōmōm wuywebe soat em wuynuy âm jexe. Iboap idip cîcā wuyxe. Wuyawewēap ekawên taḡ wuyekuap idip cîcā. Deus jebiōḡbuk muōmōm wuywebe iap pit ibodi ma idip wuyxe. ⁹ Iba'ore soat pe wuyawewēap ekawên taḡ jeku am kawên kuyat taḡ. Imênpuye:

— Ikērēat kuḡ eyju oxo — i'e'em Deus soat pe wuywebe.

Wuyawewēap ekawên pit cekawēntip. Ibodi ma kawên iisuat pit cekawēntip. Kawên iisuat taḡ jekukum pima, cūḡ ma acesop Deus xe. ¹⁰ Moisés Deus dipap o'jojojo kawên kuyat muwên puje. Cekawēntip osunuy. Ḡasū bit cūḡ ma acesop Deus xe kawên iisuat taḡ jekukum pima. Kawên kuyat podi ma cekawēntip osunuy kawên iisuat. ¹¹ Kawên kuyat cekawēntip osodop. Ibun am ḡu bit Deus o'e "Iboap ekawên taḡ cuy epeku," i. Daream ma. Kawên iisuat pit kawên kuyat podi ma cekawēntip. Soat em ma juy iboap ekawên taḡ ajeku.

¹² Soat em Deus xe acesop iap wiwim cîcā wuyju. Imênpuye wuybisūsūn ḡu kawên iisuat muwên âm soat pe. ¹³ Moisés buxim ḡu wuyju. Ixe Moisés paḡo ierūnat kuḡ osunuy jedopa ajuy am. Ibu'u osunuy jebekitkiyū be jedopasopsep ḡūšūnap coan. ¹⁴ Topa jom ip osodop iḡūḡūn ā Moisés ebekitkit -Israel naxegebitbit. Itaybit ḡūḡūn ma dak osodop ip Deus ekawên jedopa eju paḡo kuḡap co'i ma. Ḡasū dak iba'ore jîjā ixeyū etaybin am apēnape Deus e'em iam cekawēntup cocom ma'ḡu ip. Cekawên pa'arēm cexe ip kawên kuyat. Cristo eju jemūḡ puje acā itaybit je'e ip cekawên. ¹⁵ Wuyawewēap ekawēntup co buje, ḡasū dak itaybit ḡūḡūn ma ip -Moisés pe o'ḡuwēn iap ekawēntup co buje. Itaybit ip yopīt ma. Je-

dopa eju paḡo kuḡat co'i ma ip itaybit. ¹⁶ Imēn e'em Deus ekawēntup:

Deus paḡo o'ju'uk Moisés dopa ejuwi
cepit puje wuykukukat kay, i.

Imēnpuxim ḡasū dak wuywebe ikērēat muḡēḡēap epere buje Deus ikērēat ju'uk wuywebewi paḡo o'ju'ukiap puxim. Ikērēat ju'uk wuywebewi wuyetabun puje wuykukukat Jesus kay. ¹⁷ Ibodup pe wuykukukat Deus biōḡbuk iape. Ixe wuymuisusun soat em Deus xe wuynūy ām wuye'ū buje. Ixe biōḡbuk wuywebe bima, wuyetaybit wuyju cūḡ ma Deus xe Jesus kay wuyetabut pima acā iam, wuyawēwēap ekawēn taḡ jekukum pima ḡu iam. ¹⁸ Wuyju bit kuy wuyetabut wuykukukat Jesus kay. Jedopa eju paḡo kukat puxim ḡu wuyju. Wuykukukat biōḡbuk wuymuwexaxan wuydip am jejo'i i'eap ojuy. Ixe wuymuwexaxan waroa jo'ian. Wuykukukat dipap ip o'jojojo wuyjojo'ukayū waroa jo'i buye. Imēnpuye biḡ ma wuykukukat co'iyūm acesop. Imēn ace'e biḡ ma wuydip.

4 Deus ma ocekapikam o'ḡūm ocewebe, ita-
botaidabotbot ocekapikap buye.

— Kawēn idipat cuy epeḡuwēnuwēn soat kaka daḡ — i juk adi o'e ocewebe.

Imēnpuye ocebu'u ḡu ocesop ocekapikap kuḡ. ² Iba'arēm ikērēat muḡēḡēap pit kuy ocepere. Warēmtaḡ ma ocekuuap tak kuy ocepere. Warara'acat muḡuyku-ku'uk ḡu oceju bit imutabun am ip Jesus kay. Deus ekawēn muwarururun'uk ḡu dak oceju. Soat em ma kawēn icēmat taḡ oceju jekukum Deus etabutpe. Imēnpuye:

— Pauloyū cedaḡ ma jekukum — i'e'em ip soat pe ocekuuap cocoayū.

³ Oceju kawēn idipat muwēnuwēn. Ixe ekawēn pit iba'arēm ipiat'ajojoap kay cumayū xe. 'Kawēn idipat kabia buxim. Wuyetaybit Cristo idip cīcā

iam kawên idipat cocom puye. Icēmān Cristo Deus co'i iam tak wuyetaybit ma. Satanás pit ipiat kay cumayū mubu'u'un Jesus kay itabucap puxixim. Ixeyū aḡuymubarēm rēm kabiok pe imunēm unēmap puxim. Imēnpuye itabut ḡu ip kawên idipat kay. Ita'ūmat puxim ip e'em.

⁵ — Ocekay juy eyetabun epesop — i'ūmḡu oceju e'em warara'acat pe. — Jesus Cristo kay juy eyetabun epesop — i acā oceju e'em. — Āḡ cuy ixeykukan je'e — i oceju e'em.

Jesus Cristo xipat cīcā ocekay. Imēnpuye oceju eybuywatwan. ⁶ Kuyje:

— Kabiokat taḡwi juy kabiaat je'bapuk — io'e Deus.

Ibo kabiaat wuymukabiahāma iap co'i ixey wuymukūyjojom. Ixey wuymutaybitbin soat podi ma odip iam. Cristo dak ixey jo'i ma jedipap kuḡ-Deus co'i ma.

⁷ Deus a'ōbacaap kuḡ oceju cekawên muwên ām. Imuwēnuwên oceju ocebaca ḡu ma'ḡu. Ka'wi muḡēḡē'a buxim oceju-yaca'ūmat'a buxim. Deus acā ya'ōbaca. Ixey bit oca'ōmucanucan jekawên muwên ā. Imēnpuye cekawên coco'ukayū itaybit ja'ōbi ḡu teyūku imuwēnuwēn-Deus a'ōbi acā ip imuwēnuwên iam. ⁸ Soat em xipat'ūmat jebapukpuḡ ocewebe. Ocebu'u ḡu ma'ḡu ocetabut am Jesus kay. Soat em ocaḡuybabi'ūm'ūm oceju e'em. Ocetabucap pit ocepere ḡu imēnpit. ⁹ Ade ocekay itakomaayū. Ocebu-reyū dak ade ma. Soat em ocekay itakomaayū ocemupokupoḡ. Ocemuy'ū ḡu bit ip imēnpit. ¹⁰ Soat em ocaoka ojuyap cocom oceju jekukum wuykukukat Jesus puxim. Ixey a'ōbacaap kuḡ pit oceju soat em ma. Iboap ijo but soat pe ocejojo'ukayū be. ¹¹ Soat em ip ocaoka ojuy jekukum itabut'ūmayū Jesus kay ocetabut puye. Ocejebit ma i'ūm. Oceju bit soat em ma Jesus a'ōbacaap kuḡ ocesop. Iboap ibapuk cīcā e'em soat xey ocejojo'ukayū xey. ¹² Ocaoka ojuyap cocom oceju jekukum, Jesus Cristo muwēnuwēn puye. Eyju bit soat em eyetabēḡ epesop Deus xey eye'ū buje, cekawên kay eyetabut puye.

¹³ Imên ibararak opop Deus ekawëntup pe:

Kuy juk wetabut oce. Imênpuye juk
ocekawên, i'e'em Deus ekawëntup.

Oceju dak kuy juk ocetabut ajop. Imênpuye oceju kawên idipat muwënuwën jekukum warara'acayû bit a'ġu ocaoka pin ma. ¹⁴ Deus cuk wuykukukat Jesus o'ġutait ce'ûap tomukadi. Ixe buxim oceju dak ocmutait oce'ûap tomukadi Jesus o'ġutait puje. Ocedujowat jewekay. Eyju dak jeydujowat jewekay. Ixe xe ma acesop soat em. ¹⁵ Oceju juk adi ipiat ocesupi'ajojo Deus ekawên muwën âm eywebe. Imênpuye biġ ma Deus xipat cîcâat ûmûm soat pe eywebe. Imênpuye biġ ma eyju e'em cebe:

— Xipat cîcâ ên ocekay — i.

Imênpuye Deus dipap ibapuk e'em adeayû xe.

¹⁶ Apênpuje kuka wuyġuycûġ ace'e? Ibaca'ûm e'em wuyjebit. Wuybinûn pit iisu e'em, Deus wuya'ômucanucan puje. Wuya'ômucanucan biġ ma wuyetabut am Jesus kay. ¹⁷ Wuykay'ûmayû wuykaykay jîjâ. Ipiatpi'ajojoan cîcâ dak ip wuywebe. Imên-pitibun ġu iboap acejukuk-darem ma. Guyjom pit Deus jedipap je'ġûm wuywebe. Idipap kuġ acesop. Darem ġu iboap kuġ acesop-soat em ma. Acejepere ġu. ¹⁸ Imêneju wuyju soat em ġebum wuywebe ijo bucat kay ġu-wuywebe ijo ba'oreat kay acâ. Wuywebe ijo bucat darem ma dopdom. Wuywebe ijo ba'oreat pit soat em ma dopdom.

5 Wuyjebit xijap'a'a buxim. Wuye'ûap xijap'a'a muy'acap puxim. Wuye'û buje wuyjebit acejepere ijodi ipi be. Wara'at pit acejat wuyjebin iisuat. Kabi be bima bit wara'at ma je'e wuyjebin. Iisuat ijodiat emumuġê ġu-Deus emumuġê acâ. Ibiat kuġ acesop soat em ma. ² Wuyetabikuku jîjâ wuyjebit iisuat kay, kabi be wuynuy pin cîcâ buye. Kabi be bima iisuat acejat wuyjebin. ³ Wara'at acejat wuyjebin iisuat. Wuyjebitbet acesop kabi be bima. ⁴ Ijodi bima, xijap'a'a be iap puxim wuyju e'em.

Soat em wuyju ipiat kuḡ e'em. Soat em wuywātaxipi wuyju e'em. Imēnpit wuybu'u je'ū ām. Iisuat pu pin pit wuyxe wuyjebin. Iisuat kuḡ pima wuyjebit kuḡ, soat em ma wuyetabēḡ acesop. Ace'ū ḡu. ⁶ Deus ma iisuat o'ḡuḡē wuyjebin. Ixe juk jebiōḡbuk o'ḡuōm wuywebe wuymutaybit am wara'at oḡūm eyjebit iisuat iam.

⁶ Ijodi bima bit puk wuykukukat wi wūy ma wuyju nuynuy- wuyjebit kuyat kuḡ pima. Imēnpuye wuycokcok cīcā soat em ixe xe acesop iap wiwi am. ⁷ Iboap wiwim wuyju ijojomap tomuju ḡu- wuyetabucap tomuju acā. ⁸ Wuycokcok cīcā wuyetabut am ixe xe acesop iap kay. Kuyat iwat pin wuyju- wuyjebit iwat pin- wuyju am wuykukukat kay. ⁹ Wuykukukat mucokcok pin cīcā wuyju warara'acat mucokcokap podi ma. Imucokcok pin cīcā wuyju ijoce wuyjebit kuyat kuḡ pima, iboma cexe bima dak. ¹⁰ Soat cuy wuyju acejewemubapuk Cristo wap. Acejewemubapuk ixe be "Xipat eyju oxe" i'e am xipacayū be, "Ikērēat kuḡ eyju oxe" i'e am ikērēat kukayū be dak. Cedaḡ ma ixe ideida soat pe wuywebe apēn cuk adi ijodi bima ajekukuku iaptei. Xipacat je'ḡūm xipacat muḡēḡē'ukayū be xipan cekukuaptei. Ipiat pit supi'ajojoat ikērēat muḡēḡē'ukayū be ikērēm cekukuaptei.

¹¹ Wuyparara wuykukukat puxim ixe soat podi ma ya'ōbaca buye. Imēnpuye oceju kapikipiḡ cīcā warara'acayū mutabut am cekay. Imuḡuykukukum ḡu bit oceju imutabucap ojuy ip. Cedaḡ ma oceju imutaybitbin ā ip. Deus itaybit iboam. Eyju dak xe'e eyetaybit iboam?

¹² — Eyetabun cuy epesop okay, xipat ōn eykay buye — waram pit i'e pin ḡu oxe. Eyju eycokcok ocekey iap kay oceju. Warara'acayū bit ocemuymuy acā eywebe. Jewexe ip yoboḡān kacūḡtaḡ idip puye. Badi bit a'ḡu idip'ūma ip. Oceju bit cedaḡ ma jekukum ixeyū a'ōmuypit am eymucokcok am tak ocekey. ¹³ Ocadaodao du eyxe "Cedaḡ ma oceju jekukum" i'e'em puye? Ocadaodao bima, imēn ma buk oce'e warara'acayū be "Deus soat podi ma

xipat" i'e am. Ocağusyat tu eyxe iboam e'em puye? Ocağusyat pima dak, xipat ma kuka o'e eywebeam. ¹⁴ Soan oceju e'em Cristo xe ocekukpin cîcâ buye. Kuy juk ocetaybit ocesop pûğ ağokatkat oe'û soat peam ijodiacat peam iam. Imēnpuye soat ipi juacat yukpiwat ce'û âm. ¹⁵ Ixe oe'û soat peam wuywebeam. Oe'û wuywebeam wuybikayap tağ wuyeku am ġu. Jebikayap tağ jeku am acâ oe'û. Waram ġuto o'jetait xipat wuykay i'e am.

¹⁶ Kacûğ kay acâ wuyju ağ. Imēnpuye wuy'a bewi wuyju e'em:

— Teku xipat i. — Goku xipat ġu — i dak. Guyjom pit imēn ġu ace'e. Wuy'a bewi dak cuk adi ġebum ma ajop Cristo kay kuy bima. Imēnpuye ijodiat co'i osunuy wuyxe. Ġasû bit imēn ġu wuyju ġebum cekay. ¹⁷ Cristo ejo mûğ'li bima wuyisun ma acesop. Apēn cuk adi warēmtağ ma ajekukuku iap kuy oi'ûm. Iisuat acâ o'jepoyat. Kuyat pit ka'ûmġu o'e. ¹⁸ Wuymuisusunap Deus pabi. Ixe wuymuisusun soat tağ Cristo oe'û wuywebeam puye. Kuy bima bit cuk adi a'ġu wuyetakoma ajop Deus kay. Ġasû bit ixē wuymuwexaxan o'e jebureyûm.

— "Deus pe juy epeyewemuxat jebureyûm," i juy epe'e'e warara'acayû be — i'e'em Deus wuywebe ġasû bit.

¹⁹ — Deus pit o'jeğebu ġu apēn cuk adi ikērēat epeğûğēğē iap kay. Cristo oe'û ikērēat muğēğēap teida am puye — i wuyju e'em soat pe. — Jesus kay eyetabun puje Deus jeymuwexat jebureyûm Cristo oe'û wuywebeam puye — i wuyju e'em soat pe ijodiacat pe.

Deus ma juk wuymuju iboam i'e am.

²⁰ Imēneju oceju kawēnwēn eyweju Cristo a'ôbi. Deus ma juk ocemuju jekawēn muwēn âm eywebe.

— Deus ibu'u eywebe jekay'ûmām — i oceju e'em eywebe. — Eymuwexat pin jebureyûm — i oceju e'em eywebe. — Ağ cuy jeymuwexat jebureyûm — i oceju e'em eywebe.

Deus tak ijoce bima, imēn ma kuka o'e eywebe. Ixe a'ôbi ma iboam oceju e'em eywebe. ²¹ Cristo bit ikē-

rēat o'jukuk ġu. Pūġ em tak ka'ūma ma. Deus pit soat wuyju juk adi ikērēat aġuġēġēġē iap o'jomōġ Cristo be. O'jomōġ cebe ikērēat kuġ ġu wuydop am. Imēnpuye wuyju Cristo eju mūġ'i jekukum pima, ikērēat kuġ ġu acesop Deus xe Soat taġ wuyisu acesop cexe. Imēn ibikuy e'em wuywebe i'e am.

6 Ocebuxim ma eyju dak kapikpiġ Deus peam. Imēnpuye oceju jeyawē. Kuy juk adi a'ġu xipat cīcāat epejajat Deus xewi. Waram pit cuy epeyepere ġu xipacap. ²Eya'ōpicūġcūġ cuy epesop Deus ekawēn kay. Imēn Deus e'em:

“Ocedaxijom cuy ece” i eyju e'em owebe bima, kuy juk oya'ijojo ey'eap, i. Eydaxijojoap kabia be ma juk ōn eydaxijo, i'e'em Deus.

Eya'ōpicūġcūġ cuy epesop. Gasū juy Deus eydaxijo pin. Aġ cuy ixē ġasū bit jeydaxijo.

³Cūġ ma oceku pin warara'acat mubu'unap puxim itabucap kay. Ocebu'u jījā warara'acayū be “O-cetabut ġu juy Jesus kay, ixē a'ōkayayū warēmtaġ ma jekukum puye” i'e am ocekukuap cocom puye. ⁴Cedaġ ma oceku pin warara'acat itaybit am teyūku Deus buywatwat'ukayū iam. Ocekpiceġe ġu oceju jekukum, itabut'ūmayū bit adi a'ġu ocekkay jījā ma, ipiatpi'ajojoan ma dak adi a'ġu ip ocewebe, ka'ūma kuġ ma dak adi a'ġu oceju. ⁵Kuy juk adi a'ġu ip ocemupokupok itabut'ūmayū. Te'e ma ip cuk adi a'ġu ocemuōm daomūnmūnap'a be. Ikērēm cīcā juk adi ip ocekuk adeayū e'awero buje ocekūyjoap mubarēm rēm ma ip. Kuy juk adi a'ġu ocejekapikpik cīcā ma. Ocexexet'ūma juk adi a'ġu, ocejekōnkōn'ūma dak. ⁶Warara'acayū itaybit osodop teyūku Deus peam kapikpik'ukayū iam, cedaġ ma oceju jekukum puye. Soat taġ oceisu. Ocekawēnkērē ġu -ocekawēntip ma. Ocetaybit cīcā dak kawēn idipat muwēn ām. Ocekpiceġe ġu dak warara'acat kuġ. Warara'acat kuġ tak xipan oceju. Imēn oceju bit jekukum xipat cīcāat biōġbuk ocekukat puye. Warara'acat kuġ tak oceju ikukpin. ⁷Kawēn icēmat

muwēnuwēn acā oceju warara'acat pe. Deus a'ōba-caap kuḡ oceju jekukum. Cedaḡ ma oceju jekukum. Imēnpuye:

— Cūḡ ma juy epeku, Deus cūḡ ma wuykuḡ puye — i oceju e'em itaybit'ūmayū be. — Ocemuy-muy ḡu juy epesop, Deus cūḡ ma wuykuḡ puye — i oceju e'em ocemuy-muy ojuyayū be dak.

⁸ Pūḡpūḡ ocebuyxim ocekuḡ. Warara'acat ocebuyxim ḡu ocekuḡ. Pūḡpūḡ ocemuy-muy. Warara'acat xipan ocekuḡ. Pūḡpūḡ te'e ma e'em:

— Pauloyū napa ma e'em — i.

Icēmān pit oceju e'em. ⁹ Pūḡpūḡ itaybit ḡu ocejum. Adeayū bit itaybit cīcā ocejum. Ocetabēḡ mabuk a'ḡu eyju ocejom.

— Pauloyū o'yaoka ip — i'e'em ip te'e ma owe-be pūḡpūḡ.

Ade em ipiat'ajojom oceju. Ocaoka ḡu ma bit ip.

¹⁰ Pūḡ em ocemuḡuy-cūḡcūḡ warara'acat. Soat em pit ocecokcok oceju e'em. Pūḡpūḡayū xe ocedadaibot. Adeayū muwexaxan pit oceju ibubut adeat puxim-ayūm, kawēn idipat kay itabut ip puye. Adeayū xe oceju ka'ūma kuḡ. Deus xe bit soat kuḡ oceju.

¹¹ Oceburereyū, Corinto ka beayū, eykukpin cīcā ocexe. Iba'arēm ḡu juk adi ocejekawēn eyweju- -ocekawēn ojuy iap taḡ acā. Eykukpin cīcā ocexe iap kuy oceḡuwēn eywebe. Eykay jījā oceju. ¹² Ocebu'u ḡu juk adi ocesop eykay. Eyju bit cuk adi eybu'u epesop ocekey. ¹³ Okpot eju kawēnwēn pimān puxim ōn kawēnwēn eyweju. Eybu'um ḡu juy epesop ocekey. Apēn oceju eykay jījā iap puxim cuy eyju dak ocekey epesop.

¹⁴ Jesus kay'ūmayū eju cīcā ḡu juy epeku. Iba'ore cūḡ ma jekuku'ukat pe jeburere am warēm-taḡ ma jekuku'ukat eju. Iba'ore kabia daḡ jekuku'ukat pe jeburere am kabiok taḡ jekuku'ukat eju. ¹⁵ Iba'ore Cristo ebekit pe pūḡ taḡ ma jewaḡuy am Satanás ebekit eju. Iba'ore itabucat pe itabut'ūmat aḡuy daḡ jewaḡuy am. ¹⁶ Iba'ore Deus tuk'a be cucu'ukat pe jeweburedam deusbaro duk'a be cucu'ukat eju. Deus nuynuyap'a buxim wuyju, ibiōḡbuk omuy wuywebe

buye. Itabêgat omuy wuywebe. Imên Deus cuk adi o'e:

Ixeyū eju juy oğuy, i. Ixeyū binūnpe juy oğuy, i. "Èn acā Deusat ocexe," i je'e ip owebe, i. "Webekitkiyū eyju," i dak oce cebe ip, i juk adi o'e Deus. ¹⁷ Imênpuye wuykukukat cuk adi o'e: Ixeyū juy epeyepere, i. Ixeyū xewi juy epeyewede, i. Ikêrêat mujurūgrūg'ukat ekukuap puxim ġu juy epekuku, i. Ixeyū buxim ġu jekukum pima bit, òn jeymudot okay, i. ¹⁸ Òn oce eyebay, i. Okpotpoyūm epesop. Odaxiyūm tak epesop, i.

Imên cuk adi wuykukukat o'e kuyje- -soat podi ma ya'òbacaat o'e.

7 Imên Deus e'em wuywebe, oburereyū, oxe ikukpinayū. Xipat cīcāat ūm pin wuywebe. Imênpuye ikêrêat mujurūgrūg'ap cuy acepere! Ikêrêat kay ġu juy ġebum ajop! Ibuyxim cuy Deus ajukuk. Ixe be juy acemuisunat soat em ikêrêat kukap puxim.

² Ocekukpin cuy epesop ocekuġ. Ikêrēm ġu bit oceju soat kuġ- -xipan acā. Warara'acat muymuy ġu oceju. Warara'acat muġuykukukum ġu dak oceju xipacat puap ojuy ocewebeam. ³ Iboam òn e'em "Xipat ġu eyju ocexe" i'e am ġu. Imên ma juk adi ocecece eywebe kuy bima. Soat em eykukpin cīcā ocexe. Eyxe bimaap co'in ma òn wetabēg pima, we'ū buje dak, soat em ma òn ġebum eykay buye. ⁴ Wetabut cīcā eykay. Xipan òn eyawēgmuwēnuwēn soat em warara'acat pe. Oğuykuku jījā ade xipat'ūmat jebapukpuġ ma'ġu ocewebe. Yoboġ cīcā òn ocokcokap kuġ.

⁵ Macedônia eipi be ocajēm puje, ocejebodoy'ūma. Xipat'ūmat o'jebapukpukpuk ocewebe soat kaka daġ pima. Oca'òxikxiġ cīcā juk adi osodop ip oce-kay'ūmayū. Ocepararan ma juk adi a'ġu ocekukuku. ⁶ Deus pit iğuycūġat mucokcokcok'uk. Ixe juk adi

oca'ômucan Tito ajēm puje. ⁷ Oca'ôca juk adi oce'e yajēm puje. Yajēm puje:

— Xipan ma juk Corinto ka wat okuk — i juk o'e ocewebe. — Ğebum cîcā ip eykay — i dak cuk o'e ocewebe. — Iğuycûğ cîcā o'e ip jebure kay-ikêrêat o'ğugê'iat kay — i dak cuk o'e ocewebe. — “Paulo cedağ ma juk adi ocawêwêm” i'e'em ip — i dak cuk o'e ocewebe.

Iboap awêğ co buje biğ ma ocekokok cîcā oce'e.

⁸ Darem ma juk adi eyğuycûğ epesop cartadup co buje, wemudupmubararaktup co buje, eymukorêmap-tup co buje.

— Xipat ğu o'e owebe iboaptup mubararak am imukorêmap-tup — i'ûmğū òn pit e'em owebe ma. Tupco buje juk eyğuycûğ epesop iam wetaybit pima kuka juk òn tak oğuycûğ oce. ⁹ Oğuycûğ ğu òn pit. Eyğuycûğ cuk adi epesop wemudupmubararaktup co buje. Iboap kay ğu bit ocokkok. Imênpit eybu'u juk adi a'ğū epesop ikêrêat muğê âm òn eymuğuycûğ puye. Ibo buye ocokkok. Deus ma juk eymuğuycûğ-cûğ eymubu'unap ojuy ikêrêat kay. Imênpuye cûğ ma osodop owebe iboaptup mubararak am. ¹⁰ Deus wuymuğuycûğcûğ wuyubu'unap ojuy ikêrêat kay wuy'eap puxim. Ikêrêat kuk am wuybu'un puje ixe wuydaxijojom. Ixe be wuydaxijo buje wuyğuycûğap acepere. Wuykokkok ma acesop. Deus kay'ûmat iğuy-cûğ puje bit, ibu'u ğu ikêrêat kuk am. Jepereap kay ğu. Biğ ma cekay. Deus tak ixe idaxijo ğu ma. Soat em Deus wi wūy ma jeenuy je'û buje. ¹¹ Deus pit eyğuycûğap o'ğuwexat xipacap eywebeam. Ğebum cuy epesop iboap kay. Itapuruğayûm cuk eymuwexat. Omutaybin pin cuk adi epesop ocekiwatpi ğu iam. Eyetakoma jîjâ juk adi epesop ixe kay-ikêrêat muğêğê'ukat kay. Eyparara dak cuk epesop ikêrêat muğêap puxixim. Ğebum cîcā juk epesop wa'ô kay.

— Ipiat cuy asupi'ajoat ikêrêat o'ğugê'iat pe — i juk epe'e eyewewebe.

Imêneju ibapuk e'em soat xe eyukpiwatpi ğu iap.

¹² Ibodup cuk otupmubararak ixe ağokatkat awêaptup ojuy ixe be ikêrêat muğêap epereap ojuy. Tupmubarararağ pima cebay kay dak ğebum oğuy,

jebay mubuyxi'üm'üm o'e buye. Cebay kay ġebumap podin ma bit cuk otupmubararak, Deus pe eymuġē-buap ojuy Pauloyū ikukpin cīcā ocexe iap kay. ¹³ O-cecokcok cīcā juk adi ocekukpin eyxe iam ocetaybin puje.

Tito dak icokcok cīcā osunuy xipan cīcā juk adi ixē epejukuk puye. Icokcok cuk adi osunuy eyxe bi-ma. Ocekay yajēm puje, ocemucokcokcoġ cuk adi osunuy eyawēġmuwēnuwēn ocewebe. Imēnpuye juk adi biġ ma ocecokcok oce'e. ¹⁴ Eykay cum pima:

— Xipan cuk jukuk ip Corinto ka watwat, xipat cīcā ip puye — i juk oce cebe.

Wa'ō daġ ma xipan cuk adi ixē epejukuk. Omudap-xin ġu eyju. Soat em icēmān ōn e'em eywebe:

— Corinto ka watwat xipat cīcā — i juk adi oce-ce cebe.

Wa'ō daġ ma juk adi xipan ixē epejukuk.

¹⁵ — Wa'ō kay kūyjobit osodop ip — i juk adi o'e Tito ocewebe. — Obuyxim cīcā juk adi okuk ip — i dak o'e. — Yoboġan pin ġu osodop ip -obuywan pin acā ip osodop — i dak o'e ocewebe.

Ixe Tito ġebum cīcā xipan cīcā juk adi okuk ip iap kay. Imēnpuye biġ ma eykukpin cexe. ¹⁶ Ocokcok cīcā eykay, soat em eya'ō daġ eyju e'em puye.

8 Okitpitpiyū, Deus cuk adi xipacat o'ġūm-ġūm Jesus kay itabucayū be -Macedônia eipi watwat pe. Ocejū a'ġu eymutaybin ojuy iboam. ² Ipiat o'supi'ajojo jījā ip jetabucap puyxijom. Icok-cokap ip yoboġ cīcā ip o'e imēnpit. Ade jījā o'ġūmġūm ip tadaybotbocayū be, tadaybot cīcā ġu ma'ġu ixeyū dak. ³ Iūm pucacat ip o'ġūm. Ibodi ma dak ip o'ġūm. Oca'ōbi ġu ip o'ġūm- -jekpiwatpin ma.

⁴ — Ocejū dak cuy oceġūm ocedinheiro eywebe tujowat am Judéia eipi watwat peam- -itabucayū beam- -tadabotbocayū beam — i juk adi o'e ip oce-webe. Biġ ma — Ocejū dak cuy oceġūm — io'e ip.

⁵ Tūybe yopīt ma je'gūm ip iān oce'e. Yoboḡ ma ip o'gūm. Koap ip o'jeweūm wuykukukat pe. Wuykukukat a'ō kay kūyjobit pin cīcā osodop ip. Oca'ō kay dak kūyjobit pin cīcā ip osodop. ⁶ Dinheiro ūm pin cīcā ip osodop ocewebe iap awēḡ cocom pima, eykay juk ocesop ḡebum. Imēnpuye juk ocejekawēn Tito eju. Kuy bima:

— Eyledinheiro juy epeḡuxipan imuju am tadaybotbocayū be — i juk adi o'e ixe Tito eywebe. Imēnpuye: — Corinto ka kay juy eju — i juk oce Tito be. — “Eyledinheiro juy epeḡuxipan apēn cuk adi epe'e iap taḡ eykukpin ocexe i'e am tadaybotbocayū be,” i juy ece cebe ip — i juk oce Tito be.

⁷ Warara'acat podi ma eyju ade ikuḡ. Warara'acat podi ma eyetabut Jesus kay. Warara'acat podi ma dak eyetaybit Deus ekawēn muwēn ām. Ade ey'in tak itaybit cīcāayū. Warara'acat podi ma dak eyju warara'acat puywatwan. Warara'acat podi ma dak ocekukpin eyxe. Imēneju:

— Warara'acat podi ma dak eycokcoḡ cuy epe-sop eyedinheiro ūm ām tadaybotbocayū be — i oceju e'em eywebe.

⁸ — Eyledinheiro juy epeḡūm tadaybotbocayū be — i'ūmḡu ōn pit e'em eywebe.

Wa'ōbi ḡu juy epeḡūm. Warara'acat pit icokcok cīcā iūm ām cebe ip. Eywebe iūm puje, itaybit je'e ip icēmān Corinto ka beayū xe ocekuk pin cīcā iam tadaybotbocayū. ⁹ Kuy eyetaybit wuykukukat Jesus soat em xipan wuykuḡ iam. Kuyje soat kuḡ osunuy, kabi be bima. Ijodi ikop puje bit tadaybocan o'e. Tadaybocan o'e eywebe eycokcoḡ eydop am teiboḡat kuḡiat puxim.

¹⁰ Ḡasū ōn jeyawē eyedinheiro epeḡuxipan iam. Koapat koato bima:

— Ocedinheiro juy oceḡuxipan imuju am tadaybotbocayū be — i juk adi epe'e'e eyewewebe.

Eybu'um ḡu juy epesop ḡasū bit imuxipan am. Warara'acayū iūm ojuy awap, eyju bit cuk adi iūm ojuy epesop. Tadaybotbocayū buywan ojuy juk adi epesop.

¹¹ — Ḡa'a aḡuxipan wuyedinheiro — i juk adi epe'e'e eyewewebe.

Eycokcok cuk adi epesop eyedinheiro ùm âm. Gasû bit eybu'um ãu juy epesop imuju am. Eycokcoğ cuy epesop imuxipan am. Ade ikuğ iap wiwim ãu juy epesop. Epeğuxipan cuy ajo eyju ikuğ iat. ¹² Eycokcokap tomuju iùm puje xipat Deus xe- -yoboğ pima, yopît pima dak xipat ma. Ajo wuyju ikuğ ãu iat ojuyjuy ãu Deus wuyxewi.

¹³ - ¹⁴ Obu'u eymudadaybotbocan warara'acayû ibubut ade i'e am. Gasû eyju ade ikuğ. Ixeyû bit ikuğ ãu. Imênpuye cedağ ma eywebe eyedinheiro'in iùm âm cebe ip- -eybubut mu'ê'ê âm cebe ip. Eyju ãu kuka yopît ikuğ pima, ixeyû ãu kuka o'ğ'u'ê'ê eywebe. Imên imu'ê'ê'êm pima, jewejojo'in ma kuka epe'e ikuğ. Ka'ûma ma kuka tadaybocat o'e. Ka'ûma ma dak kuka ade ikuğiat o'e. ¹⁵ Imên e'em Deus ekawëntup:

Ade o'jatiat cepoyat kuğ ãu dak o'e,
i. Yopît ma o'jatiat tak ikuğ ma o'e,
i.

Imên e'em tup imu'ê'ê'ê'ukayû muwënuwën.

¹⁶ Ocebuxim Tito dak eybuywan pin cîcâ. Imênpuye:

— Bay, ên xipat — i ôn e'em Deus pe. ¹⁷ “Edaobu'u du Corinto ka watwat com?” io'e buje, — Hm hm. Oju juy ãaxîn ma — io'e. Iju pin o'e. — Ixeyû juy oyawê cedinheiro ùm âm — i juk o'e. Taobikuy jijâ osunuy eyjom. ¹⁸ Wara'at tak wuykitpit oceğuju eykay. Ixe ibuyxiat soat xe itabucayû xe, itaybit cîcâ kawën idipat muwën âm puye. ¹⁹ Jesus kay itabucayû ixe o'taê oceweju iju am dinheiro dujowat am Jerusalm ka be. Dinheiro juy ocetujowat eykukpin cîcâ ocexe iap mubapuk am tadaybotbocayû be. Ocetujowat cuy jewebuywatwan cîcâ ip wuykukukat kay itabucayû iap mubapuk am soat pe. Imênpuye:

— Ka'ûmğ'u ejo'iat xipacat — i je'e ip Deus pe dinheiro je'jat'iaiyû.

²⁰ Ade dinheiro juy ocetujowat. Ocebu'un ma'ğ'u warara'acat pe “Pauloyû dinheiro'in ma o'ju'uk je-webeam” i'e an. Imênpuye warara'acayû ocetujowat oceweju ocemuymuyap puxim. ²¹ Cũğ ma oceku pin

wuykukukat etabutpe acā ġu. Soat etabutpe ma oceku pin cūġ ma.

²² Imēnpuye wara'at wuykitpit cuy oceġuju eykay. Kuy juk adi ixē ocesubuyxijojo ade em. Imēnpuye ocetaybit cīcā ixē soat em warara'acat puywat pin iam. Itabut cīcā eykay. Imēnpuye:

— Corinto ka watwat tak jedinheiro je'ġūm ma tadaybotbocayū be — i'e'em ixē.

Imēnpuye ixē eyjo pin cīcā eybuywat am imuju am. Ibūrū ma oceġuju eykay wuykitpitpiyū. ²³ Tito obure jījā. Ixē kapikpiġ oweju eybuywatwan. Ixeyū wuykitpitpiyū cum ceweju eykay. Itabucayū a'ōbi cum ip. Ibuyxim ip Cristo kuġ. ²⁴ Eykay yajēm puje juy ikukpin epejukuk ip. Imēnpuye soat itabucayū itaybit je'e Corinto ka watwat xe ixeyū ikukpin cīcā iam.

— Corinto ka watwat xipat cīcā iap ocetobuxik apēn soat em Pauloyū e'em iap taġ — i je'e ip.

9 Obu'u oce warara'acayū bit jedinheiro mujum itabucayū be Judéia eipi beayū be iaptup mubararak am eywebe, ² kuy eyju dak ixeyū buywan pin puye.

— Tadaybotbocayū buywan pin ip wuykitpitpiyū Grécia eipi beayū — i kuy juk oce Macedônia eipi beayū be. — Kuy bima ma juk adi ip osodop ibuywan pin-koapat koato bima ma — i juk adi oce cebe ip.

Ade ixeyū'in ibuywan pin o'e eyju ibuywan pin ip iam itaybin puje.

³ — Corinto ka beayū kuy juk jedinheiro o'ġuxipanpan ocewebe tujowat am iūm ām tadaybotbocayū be — i juk adi ocece cebe ip.

Eyedinheiro muxipan'ūm pima bit, kuka juk eyju wawēġ mukērērēn. Imuxipan'ūm pima:

— Napa ma juk Corinto ka beayū eġuwēn ocewebe — i kuka o'e ip owebe.

Obu'u wekawēn mukērērēn ān eywebe. Imēnpuye

wuykitpitpiyū juy oġuju eykay eywebe imuxipan-
 'ūmap puxim. ⁴Oweju Macedônia eipi beayū ajēm
 puje, ocesūsūn kuka oce'e eykay, eyedinheiro muxi-
 pan'ūm pima. Ocebodi ma eyju dak kuka eysūsūn
 ma epe'e te'e ma ocetabut eykay buye. On tak kuka
 osūsūn ma oce "Corinto ka beayū jedinheiro muxi-
 panpan je'ġūm" i, te'e ma ocece buye. ⁵Imēnpuye
 ixeyū wuykitpitpiyū oġuju eykay. Oajēm awap ma
 oġuju ip eybuywat am soat muxipan am. Epeġuxipan
 cuy apēn cuk adi epe'e'e iap taġ. Oajēm puje, kuy
 ixipan je'e. Ixipan pima, warara'acat itaybit je'e Co-
 rinto ka beayū jedinheiro o'ġūm iūm pin puye iam.
 Warara'acat a'ōbi ġu o'ġūm ip iam itaybit je'e ip-
 jekpiwatpin ma ip o'ġūm iam.

⁶Ade ġu taidada'ukat yopīt ma ibubum. Ade
 taidada'ukat pit ade ibubum. Ġebum cuy epesop
 iboap kay. ⁷Eybu'u iūm pima bit cuy epeġūm ġu.
 "Eġūm cuy" i'e'em pima dak, epeġūm ġu. Eyukpi-
 watpin ma juy epeġūm. Būrū poro iūm pin cuy
 epeġūm. Jecokcoġ iūmūm'ukat kay jġā Deus. ⁸Deus
 pe bit iūm put eywebe eyemukaypinput. Soat je'ġūm
 eywebe. Soat em epesop eyemukaypinput kuġ. Ajo
 eyju cekayiat podi ma dak je'ġūm eywebe. Cepoyat
 kuġ tak epesop iūm ām warara'acat pe-xipan i'e
 am ip cebe. ⁹Imēn e'em Deus ekawēntup:

Deus yopīt ġu iūmūm tadaybotbocayū
 be yoboġ ma, i. Soat em xipan ip
 ikuġ, i.

Imēn e'em Deus ekawēntup.

¹⁰Deus tarekrektata ūmūm wuywebe taida am.
 Kadai muaypapan tak wuywebe i'o am. Imēnpuxim
 eywebe dak ade ma je'ġūm eyemukaypinput. Soat
 em epesop cepoyat kuġ tak. Ixe buxim eyju dak
 yopīt ġu epeġūm tadaybotbocayū be-yoboġ ma.
¹¹Cepoyat kuġ ma epesop soat em ixe xipan eykuġ
 puye. Ibutut adeayū buxim epesop warara'acat pe
 iūm ām. Imēnpuye:

— Bay, xipat cīcā ēn! Corinto ka beayū ade juk
 o'ġūm Pauloyū be tojot am ocewebe — i je'e ip
 Deus pe tadaybotbocayū-Judéia eipi beayū.

¹² Eywebe iúm puje, tadaybotbocayū buywatwan epeseop-Deus ebekitkit puywatwan.

— Bay, soat podi ma ên xipat — i je'e ip Deus pe, epeğūm puye.

¹³ Icokcok cīcā je'e ip.

— Bay, ka'ümğū ejo'iat xipacat — i je'e ip Deus pe. — Bay, tacup ġū iūmūm ip Corinto ka beayū — i je'e ip cebe. — Soat em tadaybotbocayū buywatwan ip — i je'e ip. — Cristo kay jetabucap mubapukpuğ cīcā ip ocebuywatwan pima, warara'acat puywatwan pima dak — i je'e ip Deus pe. — Cristo ekawēn tağ cīcā ip jekukum — i je'e ip Deus pe.

¹⁴ Imēneju soat em jekawēnwēn jeedop ip Deus eju eywebeam, eykukpin cexe ip puye.

— Bay, ên xipan cīcā ocekuğ — i je'e ip Deus pe. — Tacum ġū juk ocekuğ ip Corinto ka beayū dak. Ocekuğpin cīcā juk ip ocekuğ, kuy bima ên ixeyū ikukpin ejukuk puye — i je'e ip Deus pe.

¹⁵ Icēmān Deus warara'acat podi ma wuykukpin wuykuğ. Teimuweğūn pa'oreatei iūmat puxim jekpot o'ğudot wuykay. Imēnpuye:

— Warara'acat podi ma ên xipan ocekuğ — i juy ace cebe.

10 Ōn Paulo. Deus omudot eymutaybin am. Deus a'ōbi ōn jeyawē. Apēn Cristo wuyawēwēm iap puxim ma ōn tak wa'ōkadidim ma jeyawē. Ixe Cristo ya'ōkadidim ma wuykuğ. Xipan ma wuykuğ. Eyju bit:

— Paulo ya'ōpuruğ ocemukorēm rēm wūy ocewi bima. Ijasūn ocexe bima bit iparara ocebuxim — i te'e ma e'em.

² Obu'u wa'ōpuruğ eybukorēm ām. Warēm tağ ma buk eyju jekukum pima bit, wa'ōpuruğ ma ōn jeybukorēm.

— Paulo Deus a'ōbi ġū jekukum-ja'ōbi acā-jewekay acā ġebum itabut'ūmat puxim — i napa ma eyju e'em eyewewebe pūğpūğ ey'in.

Wa'ôpuruğ ma omuymuy'ukayū oğukorēm eykay wajēm puje. ³ Ijodi wuyju dopdom itabut'ūmayū parakpe. Wuya'ôbacaam ġu bit wuyju jekukum imutabunap ojuy ip. ⁴ Ijodiat a'ôbacaap kuğ ġu wuyju bit jekukum, Deus a'ôbacaap kuğ acā. Ixe a'ôbacaam acā Satanás a'ôkayayū a'ôbacaap aceğū'ūm. Wuyju ya'ôbacaap kuğ pima, wuya'ômuy pit pa'ore cebe ip Deus kay'ūmayū be. ⁵ Yoboğan pin ip. Wuymubu'u'un ojuy ip jekukum Deus kay wuyetabucap puxixim. Jağuybi ma jewa'ôxixiğ ip ceweju imubu'unap ojuy Deus kay. Wuyju Deus a'ôbacaap kuğ pima bit, ixeyū a'ôxikap aceğū'ūm. Aceğuy mūğ ip. Mūğ ma jeedop ip. Imuymūğ puje adeayū itabut je'e Deus kay. Cristo a'ô kay dak kūyjobin jeedop ip. ⁶ Koap ixē a'ôbacaam ōn jeymubikuy kūyjobit am Cristo a'ô kay. Eyekūyjobin puje, ipiat acesupi'ajoat soat pe kūyjobit'ūmayū be.

⁷ Kacūğ tağ acā eyju pūğpūğpūğ ağ. Eyxeat te'e ma e'em eywebe:

— Ōn acā Cristo a'ôbi jekukum - Pauloyū bit ka'ūma — i.

Ixe juy jeenuy jewağuyğuy Cristo a'ô dağ paxi ōn jekukum iap kay. Ixe jo'i oceju dak Cristo a'ôbi jekukum.

⁸ — Wuykukukat cuk onaē eymutaybitbin am — i juk adi ocece eywebe.

Obisūsūn ġu oce iboap muwēn ām ġuto eywebe. I-cēmān ōn cemunaē. Ya'ôbiat ōn. Ixe juk onaē ey-mukorēmrēm'ukan ġu -eybuywatwat'ukan acā. Ey-buywat am cuk onaē biğ ma eyju kūyjobit am Deus biôğbuk a'ô kay. ⁹ Eymupararan pin ġu ōn wemudupmubararaktum cartadum. ¹⁰ Okay'ūmat pit aco'i je'e:

— Paulo ya'ôpuruğ ocemukorēmrēm jemudupmubararaktum — i. — Ocexe bima bit, ya'ôkadidim ocekuğ — i dak aco'i je'e. — Ya'ījo pin'ūma dak ocexe warēmtağ kawēnwēn puye — i dak aco'i je'e napa ma.

¹¹ Wūy ōn eywi bima wemudupmubarararaktup eyweju ōn kawēnwēn iap co'i ma je'e. Itaybit je'e ip iboam okay'ūmayū -ocemuymuy'ukayū.

¹² Pūḡpūḡ ey'in te'e ma e'em:

— Warara'acat podi ma oceju xipacap kuḡ — i.
— Ixeyū bodi ma oceju bit xipacap kuḡ — i'ūmḡu
ōn pit e'em eywebe.

Ajom itaybit ip? Ka'ūma ma. Jaḡuybin ma ip e'em:
— Cedaḡ cīcā oceju jekukum — i.

Deus aḡuy daḡ ḡu ip jewaḡuyḡuy- -jaḡuy daḡ acā.
¹³ Deus ocemujum'ūm pima:

— Deus a'ōbi oceju jekukum — i'ūmḡu bit kuka
oce'e.

Poma Deus ocemujum iap taḡ acā oceju cucum.
Ey kay bit cuk ocemuju kapik am eyweju- -ey-
mutaybit am Deus ekawēn. ¹⁴ Deus cuk ocemuju
eyka kay. Imēnpuye juk adi Deus a'ō kay kūyjobin
ocesop, ey kay ocajēm puje. Ey kay juk ocajēm ka-
wēn idipat muwēn ām eywebe- -Cristo muwēn ām
eywebe. ¹⁵ Warara'acayū dak cuk adi eymutaybitbin
osodop ip Cristo ekawēn. Imēnpuye:

— Oceju acā juk adi ocesop Corinto ka watwat
mutaybitbin — i'ūmḡu oceju e'em.

Biḡ ma jeuru'urum eyetabucap kay oceju. Ḡasū ma
oceju kapiḡ eyweju biḡ ma Cristo ekawēn muwēn ām
soat pe. Ḡasū ma oceju eymutaybin ojuy. Imēnpit
poma Deus ocemujumatka kay acā oceju. ¹⁶ Eyka
be imuwēn epere buje, eyka bodiatka kay oceju imu-
wēn ām. Ka'ūma ma buk kawēn idipat o'ḡuwēn iat-
ka be oceju. Imēnpuye “Paulo bit kawēn idipat mu-
wēnuwēn kuy o'ya'i'jojo'iyū be acā” i'e ba'ore je'e
soat pe.

¹⁷ Imēn e'em Deus ekawēntup:

“Xipat cīcā oceju bit,” i'ūmḡu juy
ace, i. “Ocekukukat acā xipat cīcā,” i
acā juy ace, i.

¹⁸ “Xipat ma oceju” i wuyju e'em pima, abu xe xe'e
wuyju xipat? Ka'ūma xe ma. “Xipat ma eyju”
i'e'em Deus wuywebe bima bit, wuyju xipat ma.

11 Yadaodaot puxim ōn kawēnwēn eyweju.
Imēnpit cuy eyukpiceḡēm ḡu epesop okay.
Āḡ puk cuy ocekawēn eyweju. ² Apēn Deus yaḡuyba-

bi'üm eykuḡ iap puxim òn tak waḡuybabi'üm eykuḡ. Eybay buxim òn tak waḡuybabi'üm eykuḡ. Aḡokatkat eju o'jepo ḡu bukiat puxim eyju. Cebay bit kuy ibumūḡām o'tobuxik iwadim iap puxim eyju. Ibumūnmēn'ūmat soat kay ḡu- -jewadip kay acā. Imēnpuxim obikuy eywebe Cristo kay jījā ām warara'acat kayap podi ma. Obikuy eywebe soat taḡ eyisu eydop am. ³ Waḡuybabi'üm eykuḡ. Warara'acat kayap podi ma eyju Cristo kay ḡasū. Jewexe ḡu eyju cekay. Warara'acayū bit eyaḡuymuwarururunap ojuy. Eymuḡuykuku ojuy ip. Cristo kay ey'eap epereap ojuy ip. Imēnpuxim Satanás Eva o'ḡuḡuykuku kuyje. ⁴ Ocejū juk adi Jesusat oceḡuwēnuwēn eywebe. Eymuḡuykuku ojuyayū bit Jesus iwaruat muwēnuwēn eywebe. Te'e ma eycokcok ixeyū ekawēn kay. Ocejū juk adi Deus biōḡbuk oceḡuwēnuwēn eywebe. Eymuḡuykuku ojuyayū bit ibiōḡbuk iwaruat muwēnuwēn eywebe. Inaka te'e ma eycokcok ixeyū ekawēn kay. Ocejū juk adi kawēn idipat acā oceḡuwēnuwēn eywebe. Eymuḡuykuku ojuyayū bit kawēn iwaruat muwēnuwēn eywebe.

— Ijop ma kawēn idipat — i napa ma e'em ip eywebe.

Inaka te'e ma eyetabut ixeyū ekawēn kay.

⁵ Eyxe bit ixeyū warara'acat podi ma ya'ōbuyxi jewexe ma'ḡu ip Deus emumujuyū. Ōn pit ixeyū jo'i ma wa'ōbuyxiap kuḡ. ⁶ Ōn pit wetaybit cīcā ḡu imēnpit kawēn ām. Wetaybit cīcā bit apēn òn e'em iam. Soat em cuk adi wetaybicap osodop ibapuk eyxe.

⁷ Ōn kawēn idipat muwēnuwēn eywebe bima ka'ūma ma ojat eyxewi imuwēnuwēnapteim. Imēnpit:

— Paulo ya'ōbuyxiat ḡu aco'i teihem'ūma kapikpiḡ puye — i'ūmḡu juy epe'e'e owebe.

Cedaḡ ma osodop teihem ḡu imuwēn ām eywebe.

⁸ Ōn kawēn idipat muwēnuwēn eywebe bima, dinheiro mudodot'uk osodop ip wara'at ka beayū itabucayū. Jewexe ma òn cuk adi tujupa'um'um oḡuy ixeyū xewi teihem'ūma imuwēn ām eywebe. ⁹ Wuykitpitpiyū juk adi oajēm Macedônia eipi bewi. Soat cuk adi o'tojot ip owebeam wemukaypinput. Imēnpuye ka'ūma ma juk adi ojoojuy eyxewi. Ikuḡ'ūm pima

dak "Dinheiro'in puk" i ġu oce eywebe. Pūġ em tak ka'ūma ma. Kuy bima dak juk adi ojoojuy ġu ma dinheiro eyxewi. Guyjom tak ojoojuy ġu ma. Puju dinheiro ojoojuy eyxewi? Ka'ūma em ma. ¹⁰ Abu ideidaat owebe? Ka'ūma ma. Teihem ġu òn pit kawèn idipat muwēnuwēn soat pe Grécia eipi watwat pe. Icēmān òn e'em. Napapa'ukat ġu òn, Cristo a'òkayat puye.

¹¹ — Ēn iojuyjuy'uk ġu ocexewi oceukupin ġu exe buye — i te'e ma eyju e'em owebe. Eykupin cīcā oxe. Deus itaybit iboam.

¹² "Pauloyū jo'i oceju dak kapikpiġ" i'e ojuy ip jewexe Deus ekawèn muwēnuwēn'ukayū. Òn pit teihem ġu kawèn idipat muwēnuwēn. Imēnpuye ibo i'e ba'ore cebe ip, imuwēnuwēnapteri bubum ip puye. Guyjom tak teihem ġu oġuwēnuwēn. ¹³ Ixeyū bit icēmān ġu Deus emumujuyū. Jewexe ip Deus emumujuyū.

— Ya'òbi oceju dak Deus ekawèn muwēnuwēn — i e'em ip napa ma.

Warara'acayū muġyukukukum ip oceju dak Cristo emumujuyū iam.

¹⁴ — Apèn kuka itabut o'e ip imuġyukuku'ukayū a'ò kay Corinto kay beayū? — i'ūmġu òn pit e'em owebe ma.

Satanás pit cewemuwexat put Deus ekawèn tojot-jot'ukat co'ian. Deus ekabia daġwiat co'ian cewemuwexat put wuymuġyukuku ojuy. ¹⁵ Imēnpuxim cebekitkit tak cewemuwexat put xipacat muġġġ'ukat co'iyāum wuymuġyukuku ojuy. Ipi'ūm puje bit, xipat'ūm cīcāat je'jat ip wuymuġyukukuapterim. Cedaġ ma Deus ideida cebe ip.

¹⁶ — "Paulo yadaodao," i'ūmġu juy epe'e — i òn e'em waram eywebe.

Wadaodao eyxe bima dak cuy wa'ijom ma epe'e. Jewexe Deus ekawèn muwēnuwēn'ukayū buxim òn tak e'em eywebe "Xipat cīcā òn" i. ¹⁷ Wuykukukat a'òbi ġu òn kawēnwēn eywebe ġasū bit-wukpiwatpi ma. "Xipat cīcā òn" i'e'em pima yadaodaoat puxim ma òn tak kawēnwēn. ¹⁸ Warara'acayū e'em — Xipat

cicā òn — i eywebe, ya'òbuyxian pin ip eyxe buye. Imēnpuxim òn tak: — Xipat cicā òn — i oce eywebe. ¹⁹ Jewexe ma eyetaybit cicā. Yadaodaoayū jo'iaiyū kay jījā bit eyju! ²⁰ Eyağuy'ūm cicā. Ixeyū kay jījā eyju, ya'òpuruğ cicā ma'ğū eymujum ip; eymudadaybotbon ma a'ğū ip; eymuğuykukukum ma a'ğū ip; warēmtağ ma a'ğū ip eykuğ; eyukpiokakakam ma a'ğū ip eykuğ. ²¹ Oceju bit cuk a'ğū ocesūsūn ocesop eykuk am imēn.

Warara'acayū e'em: — Xipat cicā òn — i eywebe.

Ixeyū buxim òn tak jeymukūyjo òn ġasu òn xipat cicā iam. Eyetaybit òn yadaodaoat puxim kawēnwēn iam.

²² — Hebreuyū bit oceju icēmān — i'e'em ip eywebe jewexe Deus emumujuyū.

Òn tak ibiat ma.

— Israel naxeğebitbit pit oceju — i'e'em ip eywebe.

Òn tak ibiat ma.

— Abraão naxeğebitbit pit oceju — i'e'em ip eywebe.

Òn tak ibiat ma.

²³ — Cristo buywatwat'ukayū bit oceju — i'e'em ip eywebe.

Ixeyū bodi ma òn pit Cristo buywatwat'ukat xipacat. Ixeyū bodi ma juk adi ocekapikpik cicā Cristo beam, yadaodaoat puxim ma'ğū òn kawēnwēn ġasū eywebe. Ixeyū muōmōmap podi ma juk adi omuōmōmōm ip daomūnmūnap'a be. Ade em juk adi ip wukxabiokakaka ixee muğēğēbum. Ade em ma oje'ū pinpin. ²⁴ Cinco em Judeuyū kukuk'ukayū wukxabiokakaka ixee muğēğēbum - icaat yabi beatpum. Ade em wukxabiokakaka ip -39 em ma. Soat em ip ibūrū em ma wukxabiokakaka. ²⁵ Ebapūğ em cuk adi wukxabiokakaka im Roma ka kukat ebekitkit. Pūğ em cuk adi wabuğbuğ ip wita'am okay itakomaayū. Ebapūğ em cuk adi oakōmkōm tiboğati be kobexixi epiriğ puje -odujowat ojuyat epiriğ puje. Pūğ em pit tibi'adopa dağ ojeku - kabiabun, iximabun tak. ²⁶ Soat kaka dağ cucum pima ade em cuk adi waoka ojuyap cocom ojekuku.

Idibi adi o'tiôm uk'a be bima adi oje'u pin tiboğ puje. Ibukurukayū dak cuk adi oaoka pin osodopdopdop. Obadipyū dak cuk adi oaoka pin osodopdopdop- -Judeuyū kukuk'ukayū. Judeu'ūmayū dak cuk adi oaoka pin osodopdopdop ade em ma. We'u pinap cocom cuk adi ojekukuku ikaboğatka dağ, uk'a'ūmat tağ tak, tiboğcîcâati dağ tak. Jewexe obureyū dak cuk adi oaoka pin osodopdopdop.²⁷ Soat em cuk adi ocekapikpik cîcâ. Soat em odaobire juk adi ojekukuku wekapikap tağ. Xexen'ūma juk adi ojekukuku. Ade em cuk adi ojekukuku oxat'ūmğu, odoti'ūmğu dak, oxexecap'a'ūmğu dak.²⁸ Imên ma òn jekukum ipiatpi'ajojom. Wağuybabi'ūm tak itabucayū kuğ- -soat ka beacat kuğ- -Jesus ekawên kayayū kuğ cedağ ma paxi a'ğu ip jekukum iam.²⁹ Itabucat warêmtağ ma oeku bima, òn tak ixe buxim ma oğuycūğ kuka oce. Ikêrêat muğê buje dak, òn tak wağuybabi'ūm cîcâ oce ip ikuğ.

³⁰ Ade em wa'òbaca'ūmap ibapuk e'em soat pe. "Xipat cîcâ òn" i'e ojuy bima, wa'òbaca'ūmap kuka oğuwên.³¹ Deus itaybit òn napa ġu e'em eywebe iam. Ixe ma wuykukukat Jesus Cristo ebay.

— Soat podi ma ên xipat — i wuyju e'em cebe- -Deus pe.

³² · ³³ Òn Damasco ka be bima ibo ka kukukat oaoka ojuy o'e. Imênpuye jeka wiwi'ukayū o'ğuju jeka ekorara exîntabi wiwi am odaomûnap ojuy. Obureyū bit cuk adi odaxijo. Pağeiro'aboğ pe ip omukop ika ekorara tok tağwi. Imên ocenapôn waoka ojuyacat xewi- -Aretas a'òbi ika kukukat xewi.

12 Te'e ma wuyju e'em:

— Xipat cîcâ òn — i warara'acat pe. Imênpit puk jeymukūyjo òn xipat cîcâ òn iam. Ade ma juk adi ojojoho wexey jo'iat pe idip cîcâat. Wuykukukat tak cuk adi soat ma o'ğubapukpuk owebe omutaybit am. Iboap cuy oğuwên xipat cîcâ òn iam eymukūyjo am.² Kuy bima Deus cuk odujuu jewekay

kabi kay- -bodiat ka kay. Kuy catorze koato o'kap pima juk adi odujuu. Ōn xe'e odujuu? Wexeybi ġu xe'e odujuu? Wetaybit ġu toto. Deus acā itaybit. ³ Dao ma juk adi odujuu ikadip cīcāatka kay- -Deus tūytūyapka kay.

— Ōn xe'e odujuu? Wexeybi ġu xe'e odujuu? Wetaybit ġu toto. Deus acā itaybit — i ōn e'em waram.

⁴ Kawēn idip cīcāat cuk adi oya'ījojo ibodi. Imuwēn pa'ore eywebe iboap. Ka'ūmgū wuya'ō eymukūyjo am ibo ekewēn.

⁵ — Xipat cīcā ōn — i kuka oce warara'acat pe, iboap ojojojo buye.

Imēnpit obu'u imēn i'e am. Soat xe e'em ibapuk wa'ōbaca ġu iap.

— Xipat cīcā ōn — i'ūmgū oce warara'acat pe. — Wa'ōbuyxi ġu ōn — i acā oce cebe ip.

⁶ “Xipat cīcā ōn” i'e pin pima bit wadaodao ġu kuka oce. Napa ġu kuka oce eywebe. Icēmān kuka oce. Kuy juk wekukuap epejojojo. Wekawēn tak cuk kuy epeye'ījojojo. Ōn xipat ġu ma'ġu eyxe bima bit, “Xipat cīcā ōn” i ġu oce eyaḡuymuwarurun am okay i'e am.

⁷ Idip cīcāat cuk adi ojojojo wexey jo'iat pe. Imēnpuye:

— Jeweweju yoboḡan pin cīcā aco'i je'e Paulo — i juk o'e Deus jewebe ma.

Imēnpuye soat em ōn jekukum owātaxipi jewexe oboḡan o'eap puxim. Ipiatpi'ajojom ōn jekukum. Deus a'ōbi acā Satanás cuk omuwātaxipin. Deus a'ōbi ma owātaxipi ōn jekukum jewexe oboḡan o'eap puxim.

⁸ — Owātaxipiat eju'uk owebewi — i juk adi ocece wuykukukat pe.

Ebapūḡ em cuk a'ḡu oce cebe imēn.

⁹ — Oju'uk ġu ewātaxipiat — io'e owebe. — Soat em pit ōn xipan jekuk — io'e. — Wa'ōbacaap oḡūm ewebe — io'e. — Wara'at kay ġu bit eḡuy — io'e. — A'ōbaca'ūm pima, biḡ ma wa'ōbacaap ejat — i juk o'e owebe.

Imēnpuye wa'ōbaca'ūmap kuḡ ma ocokcok.

— Wa'òbaca òn pit — i'ùmġu òn e'em wara-ra'acat pe.

Cristo soat kabia ja'òbacaap ùmùm owebe wa'òbaca'ùm puye. Imēnpuye ocokcok cīcā wa'òbaca ġu ma'ġu. ¹⁰ Soat em ocokcok òn e'em wa'òbaca ġu ma'ġu; okay'ùmayū dak a'ġu omuymuy ma; yopīt ma dak a'ġu òn jekukum ikuġ; itabut'ùmayū dak a'ġu ipiatpi'ajojoan owebe; xipat'ùmat tak a'ġu jebapukpuġ owebe. Imēn ma ipiatpi'ajojom òn jekukum Cristo a'ò daġ òn jekukum puye. Inaka soat em ocokcok òn e'em. Wa'òbaca'ùm pima, wuykukukat ja'òbacaap ùmùm owebe buye.

¹¹ Xipan kuka a'ġu eyju bit omuwēnuwēn. Imēnpit xipan ġu eyju omuwēnuwēn. Imēnpuye yadao-daoat puxim òn ma xipan jewemuwēnuwēn eywebe. Ka'ūma jo'i ma òn eyxe. Jewexe Deus emumujuyū bit ijo'i ip eyxe. Ajo muġēġēm ip imuġē ba'ore owebe iat? Ka'ūma ma. ¹² Òn eyxe bima juk adi Deus a'òbacaap oġubapukpukpuk eywebe. Ixe a'òbacaam wuywebe imubapuk pa'oreat tak cuk adi oġubapukpukpuk soat etabutpe eyetabutpe. Iboap mubapuk puje eyetabēġbēġ epesop ijojom idip cīcā eyxe buye. Wukpiceġe ġu juk adi oġuy iboap mubapuk am eywebe. Iboap coco buje juk eyetaybit epesop òn Deus emumuju iam Deus emumuju acā iboap mubapukpuġ puye. ¹³ Wara'atka be bima juk adi wemumukaypinput ùmùm'uk osodop ip owebe ibo ka watwat-itabucayū. Eyxe bima bit cuk iojuyjuy'uk ġu oġuy eyxewi. Apēnpuye “Paulo jemumukaypinput ojujuy'uk ġu wuyxewi,” i eyju e'em eyewewebe?

— Wuykay ġu xe'e? — i te'e ma eyju e'em. Imēn ġu bit cuy epe'e. Eykay ma'ġu òn.

¹⁴ Xepxep em cuk ojeku eyjom. Ġasū dak waram oju pin eyjom. Eyju bit cuy ojuapte i epeteida ġu. Eyledinheiro kay ġu òn. Eykay acā òn okay am. Webekitkit puxim eyju. Bekitkiyū ma jedinheiro muxipanpan ġu jebay beam, jexi beam tak. Aġokat kayū bit jedinheiro muxipanpan jekpotpoyū beam, jedaxiyū beam tak. ¹⁵ Ocokcok cīcā soat obubut ùm ām eywebe eybuywat am. Obu'u ġu we'ū ām tak eybuywacap

ojuy. Biğ ma òn eykay e'em. Eyju ġu xe'e biğ ma okay ġu e'em?

¹⁶ Soat ma aco'i eyju e'em eyewewebe: — Icēmān wuyedinheiro aġu'ūm ġu Paulo beam — i. Pūğ pit aco'i je'e napa ma:

— Ixe bit cuk adi ocemuğuykukuku — i. — Ixe juk adi ade aco'i o'tujupa'um ocexewi napaap tomuju ma — i dak aco'i je'e napa ma.

¹⁷ Eymuğuykukuap ojuy ġu dak obureyū juk oġuju eykay. ¹⁸ Tito juk oġuju eykay. Wara'at tak wuykitpit cuk oġuju eykay. Ajo dak ip o'tujupa'um eyxewi jebubun? Ka'ūma ma! Ōn, Tito dak jewejojo'i ma oceju. Cedağ ma oceju jekukum. Warara'acat muğuykukuku'uk ġu oceju.

¹⁹ — Pauloyū jewedayoyom ocewebe, yoboğan pin puye — i te'e ma eyju e'em.

Jewedayoyom ġu oceju bit. Cristo a'ōbi oceju kawēnwēn eywebe Deus etabutpe. Oburereyū, eykukpin ocexe. Soan ma oceju e'em eybuywat am acā. ²⁰ Eykay wajēm puje iwarum ma aco'i òn jeydobuxik. Apēn òn cekay iap co'i ġu aco'i òn jeydobuxik. Eyju dak imēn ma odobuxik. Apēn eyju cekay iap co'i ġu aco'i eyju odobuxik. Jawa'ōxikxiğ aco'i òn jeydobuxik, eyetabutkarey dak eyewewekay, eyetakomāmā dak eyewewekay. Warara'acat kay dak eyju ġebum ġu-eyewewekay acā. Jewemuymuy aco'i òn jeydobuxik, eyekawēnkērē dak, yoboğan pin tak. Pūğ tağ ġu dak aco'i eyju jekukum- -wara'at tağtağtağ ma. Imēn òn eydobuxik puje oġuycūğ cīcā oce eykay. Jeymukorēm tak òn. Owebe eymukorēm puje eyju dak eyġuycūğcūğ epe'e. ²¹ Waram eykay wajēm puje oġuycūğ cīcā oce eykay. Pūğ ġu ey'in cuk adi ikērēat o'ġuğē kuy bima. Warara'acat tayxi eju jepopo'uk osodop ip, warara'acat itop eju dak. Ibu'un pa'ore ma e'em ip ikērēat muğēğēap kuğ. Cepere ba'ore ma cebe ip. Imēnpit iġuycūğ'ūma e'em ip ikērēat muğēğēap kay. Ibu'u ġu o'e ip ikērēat muğē ām. Imēnpuye oġuycūğ cīcā oce Deus etabutpe ikērēat kay acā eyju ġebum puye, ade em ma'ġu òn eyawēwēm. Deus omuğebu ajo ġu òn iap kay.

13 Kuy xepxep em cuk adi eyjom ojeku. Waram ġuto òn eyjo ojuy. Imèn e'em Deus ekawèntup:

Pūġ pe warara'acat muwara buje wuyetabut ġu cekay, i. Xepxepayū be, ebapūġayū be dak imuwara buje bit, wuyetabut cuy ace'e cekay, i.

Imènpuye koap cuy bit òn jeymukorēm. Xepxepayū, ebapūġayū a'įjo'üm pima bit, òn jeymukorēm ġu. ² Xepxep em kuy ojeku eyjom. Waram wajēm puje wa'òdim ġu òn jeymukorēm- -wa'òpuruġ ma. Abu itabotaidabotbon je'e eykay? Ka'ūma ma. Kuy bima ade em cuk adi ocece eywebe imèn. Ġasū dak ġuto imèn ma oce. Imèn ma òn e'em soat kuy bima ikèrèat o'ġuġē'iyū be. Soat pe dak ey'in imèn ma òn e'em ikèrèat muġēġē'ukayū be. ³ Eyetaybit epe'e òn Cristo a'òbi e'em iam. Eyetaybit ġuġūn ġu epe'e iboam. Eyetaybit cīcā ma. Cristo ya'òbaca'üm ġu eykuġ- -ya'òbacam ma. Soat em ja'òbacaap mubapukpuġ eywebe. ⁴ Korosa be je'ū buje ya'òbaca'üm osunuy. Ġasū bit itait ma'ġuto o'e. Deus ixè'üm o'ġutait ja'òbacaam soat podi ma ixè ya'òbaca buye. Ipi daġ pima oceju dak ixè buxim oca'òbaca ġu. Ce-weju mūġ'i bima bit, ya'òbacaap kuġ oceju e'em. Eybuywat am tak ya'òbacaap kuġ oceju.

⁵ Eyekukuap kay juy ġebum epesop Cristo ekawèn taġ paxi oceju jekukum iap kay.

— Wuyetabucap taġ paxi wuyju jekukum? — i juy epe'e'e eyewewebe.

Cristo a'òbacaap kuġ tu eyju jekukum? Jewexe du eyju Cristo ebekitkiyū? Eyetabucap epere'üm pima, eyetaybit cīcā Jesus Cristo wuywebe nuynuy iam.

⁶ Eyetaybit aco'i ocetabucap ocejepere ġu iam. Icēmān Cristo ekawèn taġ oceju jekukum.

⁷ — Bay, soat em cuy Corinto ka beayū buywatwan eġuy ixeyū be ikèrèat muġēap puxim — i òn e'em Deus pe.

Imèn òn e'em cebe warara'acayū be “Pauloyū cedaġ ma Corinto ka beayū o'ġutaybitbin” i'e'eap ojuy ġu-eywebe cedaġ ma jekukuap ojuy acā. “Pauloyū warēmtaġ ma Corinto ka beayū o'ġutaybitbin” i

warara'acat e'em pima bit, ak'arit ma oce cekawên kay. ⁸ Abu kuka kawên icēmat tak o'ḡu'ūm? Ka'ū-ma ma. Imu'ūm pa'ore. Iba'ore ḡu bit ocewebe kawên icēmat taḡ oceku am. ⁹ Eyju eyetabut cīcā bima, ocecokcok oce'e oca'ōbaca ḡu ma'ḡu warara'acayū xe. Imēnpuye:

— Bay, a'ōbacaap cuy eḡūm Corinto ka watwat pe ikērēat kay'ūmayūm je'e am — i oceju e'em Deus pe.

¹⁰ Wajēm awap eymukorēmaptup mubarararaḡ ōn wajēm puje dak eymukorēmap puxim. Obu'u wa'ōpuruḡ eymukorēm ām wuykukukat a'ōbi. Ixe juk ja'ōbacaap o'ḡūm owebe eymukorēm ām ḡu-eybuywat am acā. Owebe o'ḡūm eybuywat am biḡ ma kūyjobit am je-biōḡbuk a'ō kay am.

¹¹ Ibūrū ma buk, okitpitpiyū. Soat em cuy epe-sop ḡebum ikērēat muḡēap puxixim. Eya'ōpicūḡcūḡ wa'ō kay. Jawaḡuycom cuy epesop eyeweweju. Kabā'ūm cuy epesop eyewekuḡ. Deus ma wuymutaybit-bin warara'acat kuḡ xipan am. Ixe dak wuyaḡuymubabibin soat em. Ixe juy soat em je'ku eyweju.

¹² Epeyewakobotbot cuy wuykukpin wuyeweweju iap mubapuk am soat pe.

— Kato'i juy cebe ip — i'e'em eywebe soat oxeayū itabucayū.

¹³ — Xipan cuy Corinto ka watwat ejukuk — i ōn e'em wuykukukat Jesus Cristo be. — Eykukpin cuy ixeyū ejukuk — i ōn e'em Deus pe. — Ixeyū bu-rerem cuy eḡuy soat em — i ōn e'em Deus biōḡbuk pe.

Ibūrū ma.

GALÁCIA EIPI WATWAT PEAPTUP PAULO EMUMUDUPMUBARARAKTUP

1 ¹⁻² Galácia eipi watwat, cartadup mubararağ òn eywebeaptum- -Jesus Cristo kayayũ beaptum. Òn Paulo. Ijodiat ġu juk onomuwã Jesus Cristo emumujum. Deus warara'acat pe ġu onomuwãat Jesus Cristo emumujum.

Jesus Cristo ma juk o'e owebe: — Wekawên muwênuwên'ukan cuy ece — i.

Ixe ebay dak imên o'e owebe- -Deus ma. Ixe Deus waram Jesus Cristo o'ğutait ce'ũap tomukadi. Kato mujum òn eywebe ijudup pe. Soat e'em kato'i eywebe oxeacat tak- -Jesus kayacat- -wuykitpitpiyũ.

³ — Bay, xipan cuy Galácia eipi watwat ejukuk — i òn e'em Deus pe- -wuyebay be, Jesus Cristo be dak- -wuykukukat pe. — Ixeyũ ağyumubabibin cuy eğuy — i òn e'em cebe ip.

⁴ Cristo oe'ũ ikêreat uk am soat pewi wuywebewi. Oe'ũ wuywebe Deus kay'ũmat ekukuap tağ wuyekuap puxim. Jeweweju ma oe'ũ. Oe'ũ Deus bikuyap tağ- -wuyebay bikuyap tağ. ⁵ Imêneju:

— Bay, soat podi ma ên edipap kuğ — i juy ace Deus pe. — Bay, soat podi ma a'òbaca — i dak cuy ace cebe.

Soat em ma juy imên acece cebe.

⁶ Wağuybabi'ũm'ũm cîcã eykuğ! Ibum ġu eyetabut Deus kay. Ġaxîn ma jeyağuyba'ũm cekay. Kuy ġu juk eyetabut epesop cekay. Ixe juk eynaê jebekitkiyũm. Jekpot kukap co'i xipan eykuğ- -Cristo kukap co'i. Eyju bit eybu'u ġuto epesop cekay. Warara'acat ekawên kay dak eyju ġasũ bit.

— Ijop ekawên kawên idipat ocece — i eyju e'em te'e ma.

⁷ Warara'acat ekawên pit kawên idipat ġu- -Jesus ekawên acã. Warara'acayũ bit eymu'ukpiceğên ojuy. Eymubu'un ojuy ip Jesus ekawên kay. Cristo ekawên muwarururun ojuy ip. Imênpuye wağuybabi'ũm'ũm

cîcâ eykuḡ. ⁸ Kuy juk adi kawēn idipat oceḡuwēnuwēn eywebe- -Jesus ekawēn. Ḡasū bit kuka wara'at ekawēn ma oceḡuwēn eywebe.

— Ijop ekawēn ma kawēn idipat — i kuka oce'e eywebe napa ma.

Imēn oce'e buje, Deus kuka ocemuju ipiat'ajojoap kay. Ḡasū bit kabi bewiat kuka wara'at ekawēn o'ḡuwēn eywebe.

— Ijop ekawēn ma kawēn idipat — i kuka o'e eywebe napa ma. Imēn i'e buje, wūy ma jeenuy Deus wi ipiat'ajojom. ⁹ Kuy juk iboap oceḡuwēn eywebe. Imēnpit ḡuto waram oceḡuwēn eywebe. Kuy bima juk adi eyetabut epesop kawēn idipat kay. "Ijop ekawēn ma kawēn idipat" i'e'em napa ma wara'at ekawēn ma imuwēn puje, wūy ma jeenuy Deus wi ipiat'ajojom. ¹⁰ Ōn pit ijodiat mucokcok pin ḡu oce. Deus mucokcok pin acā ōn pit. Warara'acayū be "Paulo xipat cîcâ" i'e'eap kudadam ḡu ōn. Ijodiacat mucokcok pin pima, kuka Cristo a'ō kay kūyjobican ḡu oce!

¹¹ Okitpitpiyū, ijodiat ekawēn muwēnuwēn ḡu bit ōn. Ijodiat ekawēn ḡu ma i ḡuto ōn e'em eywebe.

¹² Ijodiat ḡu juk kawēn idipat o'ḡuwēn owebe. Ka'ūma ma juk omutaybitbin ijodiat pit. Jesus Cristo acā juk adi omutaybitbin.

¹³ Judeuyū etabucap co'i wetabun puje, juk adi ipiat osupi'ajojoat Jesus kay itabucayū be. Kuy eyetaybit apēn cuk adi ojekukuku iam. Wetakoma jījā juk adi oḡuy ixeyū kay. Yaoka ojuyjuy ip cuk adi oḡuy. Imēn cuk adi ojekukuku Jesus Cristo odopabijuk'ūm pima. ¹⁴ Waḡuywaḡoyū bodi ma juk adi wetabut oḡuy Deus kay. Judeuyū babim cuk adi wetabut oḡuy. Cebodi ma ip we'ajojoyū'ūm'ūm ekawēn taḡ cuk adi jeku ojuyjuy oḡuy.

¹⁵ Deus pit cuk onaē jekawēn muwēn ām, warara'acat podi ma ixexipan okuḡ puye. Okap awap ma juk onaē. ¹⁶ Ixe juk jekpot o'ḡubapuk owebe.

— Okpot cuy eḡuwēnuwēn Judeu'ūmayū be — i juk adi o'e owebe. — Kawēn idipat cuy eḡuwēnuwēn cebe ip — i juk adi o'e owebe.

Imên i'e buje, ka'ûma kay ma juk oju wawê âm.

¹⁷ Jerusalém ka be dak cuk oju ġu Jesus emumujuyū eju kawên âm- -kuy bima Deus o'taē'iyū eju kawên âm. Ixeyū be wawê âm ġu juk oju. Arábia eipi kay bit cuk oju. Guyjom acā juk ocepit Damasco ka kay.

¹⁸ Ebaþūġ koato kap puje juk oju Jerusalém ka kay Pedro jom. Xepxep esemana ma juk adi oġuy cexe.

¹⁹ Warara'acayū bit cuk ojojojo ġu Jesus emumujuyū. Tiago acā ġuto ojojojo- -wuykukukat Jesus kitpit acā.

²⁰ Napa ġu òn e'em eywebe. Deus ojojom ijudup mubarararaġ pima.

²¹ Pedro eju wekawên epere buje, Síria eipi daġ cuk adi ojekukuku, Cilícia eipi daġ tak. ²² Imēnpuye Cristo kay itabucayū ojojojo ġu ip- -Judéia eipi watwat- -wara'at ka daġ òn jekukum puye. ²³ Warara'acat ekawên pit cuk ip o'jojojo kuy.

— Paulo juk adi ipiat o'supi'ajojoat wuywebe — i'e'em warara'acayū itabucayū jewewebe. — Jesus kay wuyetabucap mu'ûm ojuy osunuy — i'e'em ip. — Ġasū bit ixé dak Jesus muwēnuwēn o'e! — i'e'em ip. — “Jesus kay juy eyetabun epesop!” i'e'em ixé ma — i'e'em ip.

²⁴ Wawēġ co buje:

— Bay, ên soat podi ma a'òbaca — io'e ip Deus pe. — A'òbacaam cuk Paulo eġutabun ekpot kay — io'e ip cebe.

2 Catorze koato kap puje, ocepit Jerusalém ka kay. Barnabé eju oju. Tito dak otujowat oweju. ² Ibo ka kay oju “Jerusalém ka kay juy eju” i juk adi Deus o'e owebe buye. Jesus kayayū kukuk'ukayū o'je'awero wa'ijo am. Warara'acayū eju ġu juk ocekawên- -ixeyū eju acā. Apên cuk adi kawên idipat oġuwēnuwēn Judeu'ûmayū be iap oġuwēn cebe ip. Apên cuk adi ixeyū oġutaybitbin iap tak oġuwēn ma. Obu'u juk adi oġuy ixeyū be “Te'e ma juk adi eġutaybitbin ip cedaġ'ûma ên

imutaybitbin puye" i'e am owebe. ³ Wuykitpit Tito juk otujowat owebe. Judeu ġu ixe.

— Teku juy ataypu'aġobixeedakacat wuydo-buyū'ūm'ūm pabi daġ -Deus ekawēn taġ — i'ūmġu o'e ip itabucayū kukuk'ukayū ma -Judeuyū ma.

⁴ Warara'acayū bit oōm oce'aweroroap'a be, o'ġukūy-jo ġu ma'ġu ip. "Oceju dak ocetabut Jesus kay" i napa ma e'e'ukayū oōm ip ocekawēn co am oca'ō-xikap ojuy. Jewemukorēm ojuy ip.

— Teku juy ataypu'aġobixeedakacat wuydo-buyū'ūm'ūm ekawēn taġ — io'e ixeyū ma. — Apēn-puye dak eybu'u wuydobuyū'ūm'ūm pabi daġ jekum Jesus eju mūġ'i eyeku buje? — io'e ip ocewebe. — Imēn cūġ ġu Deus xe — io'e ip ocewebe. — Wuydo-buyū'ūm'ūm pabi daġ cuy epeku, Jesus kay a'ġu eyetabut ma — io'e ip ocewebe.

⁵ Ixeyū ekawēn kay ġu bit oceju- -pūġ em tak ka'ū-ma.

— Ha'a. Wuydobuyū'ūm'ūm pabi daġ cuy ajeku cūġ ma wuy'e am Deus xe — i'ūmġu juk adi oce'e oceju bit.

Imēn oce'e buje, kuka juk kawēn idipat oceġuwaru-run. Ijo'i ġu kuka juk o'e. Imēn oce'e buje, ey-muġuykuku kuka juk oceju.

⁶ Iġo'a be o'je'awero ip itabucayū kukuk'ukayū. Soat xe ya'ōbuyxi ip osodop. Yoboġ ġu ip oxe bit ijo-diat pit. Deus kacūġ kay ġu aġ- -badi acā. Iisuan ġu ixeyū bit omutaybin.

— Wara'an pit cuy eġutaybin Judeu'ūmayū — i'ūmġu o'e ip owebe. ⁷ — Deus cuk Paulo o'jomuy kawēn idipat muwēn ām Judeu'ūmayū be. Judeuyū be bit Pedro o'jomuy kawēn idipat muwēn ām — io'e ip jewewebe.

⁸ Deus ja'ōbacaap o'ġūm owebe jekawēn muwēn ām Judeu'ūmayū be. Ixe emumuju ōn. Judeuyū be bit jekawēn muwēn ām ja'ōbacaap o'ġūm Pedro be.

⁹ — Deus Paulo mujujum jekawēn muwēn ām Judeu'ūmayū be — io'e ip itabucayū kukuk'ukayū- -Tiago, Pedro dak, João dak.

Imēnpuye juk ip obumukuġ. Barnabé bumukuġ tak ip jeburerexi ip puye.

— Judeu'ūmayū be eyju ma juy Jesus ekawēn epeḡuwēnuwēn. Ocejū bit cuy Judeuyū be oceḡu-wēnuwēn — io'e ip. ¹⁰ Pūḡ ma ip ocemuḡēbu. — Gebum cuy epesop tadaybotbocayū kay- -itabucayū kay- -ocexeayū kay — i juk o'e ip ocewebe. — Dinheiro'in cuy epeḡudot cekay ip, ka'ūma kuḡ puye — i juk o'e ip ocewebe.

Ōn tak ocokcok cīcā oce imudot am.

¹¹ Ḡuyjom ma Pedro oajēm ocekey, oceju Antioquia ka be bima. Ōn pit xeku oḡukorēm warara'acayū etabun ma, warēmtaḡ ma jekukum puye. ¹² Tiago jebureyū o'ḡudot ocekey. Antioquia ka be ip oajēm. Ixeyū ajēm'ūm pīma, Pedro jekōnkōn'uk osunuy itabucayū eju- -Judeu'ūmayū eju- -Judeuyū babi daḡ jekuku'uk'ūmayū eju- -taypu'aḡobixeedakatkat'ūmayū eju. Tiago bureyū ajēm puje bit, ibu'u o'e jekōn ām ceweju ip- -Judeu'ūmayū eju. Iparara osunuy Judeuyū buxim- -"Judeu'ūmat jedaypu'aḡobixeedakacan cuy cūḡ ma i'e am Deus xe, itabut ma'ḡu ip Jesus kay" i'e'e'ukayū buxim. ¹³ Imēnpuye Pedro buxim o'e ip warara'acayū Judeuyū. Pūḡ taḡ ma oeku ip jewewaju Judeuyū. Jeparara pibun ibu'u o'e ip Judeu'ūmayū eju jekum. Barnabé dak ixeyū buxim iparara o'e. Pūḡ taḡ ma oeku Judeuyū eju. Judeu'ūmayū eju bit ibu'u o'e jekum jeparara pibun. ¹⁴ Cūḡ ḡu o'e ip jekukum. Kawēn idipat taḡ ḡu ip jekukum o'e. Iboap co buje juk ocekawēn Pedro eju warara'acayū etabutpe.

— Ēn Judeu — i juk oce cebe. — Inaka Judeu'ūmat co'i ēn jekukum — i juk oce cebe. — Judeu ekukuap puxim ḡu ēn jekukum — i juk oce cebe. — Apēnpuye dak ēn e'em Judeu'ūmayū be "Judeuyū babi daḡ cuy epeku!" i? — i juk oce cebe.

¹⁵ Ocejū bit Judeuyū ocekapap pin ma.

— Ikērēat mujurūḡrūḡ'ukayū Judeu'ūmayū — i oceju e'em, ocedobuyū'ūm'ūm ekawēn taḡ ḡu ip jekukum puye.

¹⁶ Wuyju bit kuy wuyetabut Jesus Cristo kay. Deus xe wuyju cūḡ ma wuydobuyū'ūm'ūm ekawēn taḡ

wuyekuap tomuju ġu- -wuyetabucap tomuju acā. Deus xe wuyju cūġ ma wuydobuyū'ūm'ūm ekawēn taġ jekukum puye ġu- -wuyetabut puye acā. Ka'ūma ma cūġ ma Deus xe jedobuyū'ūm'ūm ekawēn taġ jekuap tomuju.

¹⁷ — Cristo kay wuyetabun puje acā cūġ ma ace-sop Deus xe, wuydobuyū'ūm'ūm ekawēn taġ jekukum ġu ma'ġu wuyju — i wuyju e'em.

Imēn i'e buje, ibapuk e'em soat pe Judeu'ūmayū joi ma wuyju dak ikērēat muġēġē'ukayū iap. Ibu'u ġu paxi Cristo je'e wuywebe ikērēat muġē ām? Ibu'u ma! Cedaġ ġu cexe. Ijo'i ġu cexe.

¹⁸ — Wuydobuyū'ūm'ūm ekawēn taġ wuyekuap tomuju ġu wuyju cūġ ma Deus xe- -wuyetabucap tomuju acā — i'e'e'uk cuk adi oġuy. Imēnpuye “Wuydobuyū'ūm'ūm ekawēn taġ cuy aje-ku cūġ ma wuy'e am Deus xe” o'e buje, kuyat wekawēn kuka ocepere, wuydobuyū'ūm'ūm pabi dak kuka oġupubutbun. ¹⁹ Iba'ore owebe cūġ ma i'e am Deus xe wuydobuyū'ūm'ūm ekawēn taġ wekuap tomuju. Deus ekawēn tup cocom cuk wetaybin iboam. Iba'ore soat pe wuywebe soat iboap ekawēn taġ jeku am. Wuydobuyū'ūm'ūm pabi daġ wuyekuap tomuju wuyju cūġ ma Deus xe ibima, apēġām Cristo oe'ū korosa be? Ka'ūma ām ma! ²⁰ Jekpiwan ma Jesus oe'ū korosa be owebeam iap kay wetabut pima, obikuyap taġ ġu ōn jekukum. Cristo biōġbuk omuy owebe. Kuyje wekukukuap kuy ocepere. Deus ipot kay wetabucap eju ōn jekukum ġasū bit. Ixe ipot jekpiwan ma oe'ū we'ūap puxim, okukpin cīcā cexe buye. ²¹ Deus ibikuy soat kuk am xipan.

— Okuġ ġu juy! — i'ūmġu ōn pit e'em cebe. Ōn pit imēn ġu e'em. Wuydobuyū'ūm'ūm pabi daġ wuyekuap tomuju wuyju cūġ ma Deus xe ibima, apēġām Cristo oe'ū korosa be? Ka'ūma ām ma!

3 Galácia eipi watwat, eyaġuyba'arēm cīcā! Abu dak cuk eymuġuykuku? Abu dak cuk eymubu'un kawēn icēmat taġ eyekuap puxim?

Apên Jesus Cristo oe'û korosa be iap cuk adi oceğuwên eywebe. Iba puğ ma juk adi oceğuwên eywebe. Imên puye juk adi eyetabut cîcâ epesop cekay. ² Pûğ ğu buk oğuwên eywebe. Deus jebiöğbuk o'ğuōm eywebe wuydobuyû'ûm'ûm ekawên tağ eyekuap puye ğu! Ibiöğbuk ōm eywebe apên Cristo oe'û iap ekawên eyetaybit puye; iboap ekawên kay eyetabut puye dak. ³ Eya'öbacaam ğu juk epesop Deus ebekitkiyûm-Deus biöğbuk a'öbacaam acâ. Ğasû bit:

— Wuya'öbacaam ma ix e a'ö dağ ajeku — i eyju e'em te'e ma.

Eyağuyba'arêm cîcâ dak epesop. ⁴ Kuy bima juk adi eyetabut cîcâ epesop Jesus kay, ipiatpi'ajojoan ma'ğ u ip eywebe itabut'ûmayû. Ğasû bit xe'e jeybu'un cekay? Te'e ma du juk adi ipiat epesupi'ajojo? Iba'ore! ⁵ Deus cuk adi jebiöğbuk a'öbacaap o'ğûm eywebe. Ixe a'öbacaam wuywebe i'e ba'oreat cuk adi epeğubapukpukpuk soat etabutpe. Ja'öbacaap o'ğûm eywebe wuyawewêap ekawên tağ eyju jekukum puye ğu. O'ğûm eywebe eyju Deus ekawên kay jîjâ buye, cekawên kay eyetabut puye dak.

⁶ Abraão etabucap puxim eyju dak cuk adi eyetabut epesop Deus kay. Imên Deus Abraão o'ğuwên: — Ixe juk adi itabut cîcâ osunuy okay — i. — Imên puye cûğ ma osunuy ox e — i.

⁷ Ixe-buxim itabucayû Abraão naxeğebitbicayû Deus xe, Judeuyû ğu ma'ğ u ip. Iboam cuy eyetaybin.

⁸ Deus cuk adi o'e jewebe ma:

— Guyjom cûğ ma jeedop ip ox e warara'acayû dak- Judeu'ûmayû — i. — Itabun puje ip cûğ ma jeedop ip ox e Judeuyû jo'i ma — i juk adi o'e jewebe ma.

Imên puye imên e'em Deus ekawên tup:

“On ma xipacat oğûm soat ka watwat pe, ên etabut okay buye,” i'e'em Deus Abraão be, i.

Imên Deus kawên idipat o'ğuwên Abraão be xipacat ûm awap soat ka watwat pe. ⁹ Abraão itabut cîcâ osunuy Deus kay. Imên puye Deus xipacat

o'gūm cebe. Ixe-buxim soat itabucayū dak xipacat je'jat Deus xewi.

¹⁰ Imēn e'em Deus ekawēn tup:

Wūy ma jeedop ip Deus wi ipiat'ajom wuyawēwēap ekawēn taḡ jekukum'ūm pima, soat ekawēn taḡ jekukum'ūm pima, i.

Imēnpit iba'ore soat pe wuywebe soat ekawēn taḡ wuyeku am wuyawēwēap ekawēn taḡ. Imēnpuye:

— Xipat ḡu eyju oxo — i'e'em Deus soat pe - - "Wuyawēwēap ekawēn taḡ wuyeku buje acā cūḡ ma acesop Deus xe" i'e'e'ukayū be.

¹¹ Deus cuk adi o'e:

— Eyetabut okay bima acā, cūḡ ma epesop oxo — i.

Imēnpuye wuyawēwēap ekawēn taḡ wuyekuap puye ḡu cūḡ ma acesop Deus xe. Imēntak e'em Habakuque ekawēn tup- -kuyjeat ekawēn tup- -Deus ekawēn muwēnuwēn'ukat ekawēn tup:

Itabucat ma cūḡ ma Deus xe, i. Soat em itait jeenuy Deus xe, i.

¹² Imēnpit itabut'ūmat tak wuyawēwēap ekawēn taḡ jeku ojuy. Imēntak e'em Deus ekawēn tup:

Wuyawēwēap ekawēn taḡ jekuku'ukat acā cūḡ ma jeenuy Deus xe- -soat ekawēn taḡ jekuku'ukat, i. Soat em itait jeenuy Deus xe, i.

¹³ — Xipat ḡu ēn oxo — i'e'em Deus soat pe - - ikērēat mujurūḡrūḡ'ukayū be.

Cristo bit oe'ū apēn cuk adi ikērēat aḡujurūḡrūḡiap teida am. Imēn e'em Deus ekawēn tup:

Korosa eju ibamupayaat wūy ma jeenuy Deus wi ipiat'ajom ikērēat kuḡ puye, i.

Korosa eju bima: — Wūy ma juy eḡuy owi ipiat'ajom ikērēat kuḡ ēn puye — io'e Deus Jesus pe. Wuywebe ḡu imēn o'e. Jesus pe acā imēn o'e, apēn cuk adi ikērēat aḡujurūḡrūḡ iap kuḡ puye. ¹⁴ Deus o'e Abraão be: — Xipacat oḡūm soat ka watwat pe, ēn etabut okay buye — i.

Jesus Cristo kay Judeu'ūmayū itabun puje, Deus xi-

pacat je'gūm cebe ip. Xipacat je'gūm cebe ip korosa eju Cristo apèn cuk adi ikêrêat aḡujurūḡrūḡ iap o'tu-jowat jewebe buye. Imēnpuye Deus jebiōḡbuk mu-ōmōm wuywebe wuyetabut puye. Imuōmōm wuywe-be apèn cuk adi o'e Abraão be iap taḡ.

¹⁵ Okitpitpiyū, apèn jebapukpuḡ soat kabia wuy-webe iap taḡ òn jeymutaybin. Abu wuybubut je'jat wuye'ū buje iaptup mubararak pin pima, wuyju wuy-butet mubarararaḡ ixedup pe. Wuybure dak jebutet mubarararaḡ ixedup pe. Xepxep putet mubararak pu-je, iba'ore warara'acat pe iboaptup ekawēn mupubut am. Iboaptup ekawēn muwarurun am tak iba'ore ma cebe ip.

¹⁶ — Xipacat oḡūm ewebe, enaxeḡebit pe dak — i juk adi o'e Deus Abraão be.

“Enaxeḡebitbiyū be” i'ūmḡu e'em ibodup. “Enaxeḡe-bit pe” i acā e'em. Adeayū be ḡu kuka xipacat o'ḡūm. Pūḡ pe ma kuka o'ḡūm--Cristo be ma. ¹⁷ Imēn òn e ojuy eywebe. Deus cuk kuy o'e Abraão be:

— Xipacat oḡūm soat ka watwat pe, ēn etabut okay buye — i. — Soat em wa'ō daḡ òn e'em — i juk o'e.

Ḡuyjom acā wuyawēwēap ekawēn o'ḡuwēn Moisés pe ixe be imuwēn ām jebekitkit pe-430 koato kap puje ma. Wuyawēwēap ekawēn muwēn puje bit:

— Obu'u oce xipacat ūm ām Abraão be ḡasū bit — i'ūmḡu o'e Deus. — Apèn cuk oce cebe iap taḡ ḡu oce ḡasū bit — i'ūmḡu o'e.

¹⁸ Wuyawēwēap ekawēn taḡ wuyekuap puye Deus xipacat ūmūm wuywebe bima, apèn cuk adi o'e Abraão be iap taḡ ḡu kuka o'ḡūm wuywebe. Imēnpit Deus xipacat o'ḡūm Abraão be “Xipacat oḡūm ewebe ēn etabut okay buye” io'e buye. Deus ja'ō daḡ e'em soat em.

¹⁹ — Apēnpuye dak Deus wuyawēwēap ekawēn o'ḡuwēn Moisés pe? — i du eyju e'em owebe?

Òn jeymutaybin. Wuyawēwēap ekawēn o'ḡuwēn wuy-mutaybit am ajo Deus bikuyap taḡ ḡu iam. Ḡuyjom kuka Abraão naxeḡebit o'kap--Jesus Cristo. Deus xipacat kuka o'ḡūm cebe ja'ō daḡ. Ikap'ūm pima bit,

kuy juk adi wuyetaybit ajop soat ipi juacat kūyjo-bit'ūm ip Deus a'ō kay iam. Deus ma o'jekawēn Abraão be.

— Xipacat oḡūm ewebe — i juk o'e cebe.
Wuyawēwēap ekawēn muwēn pin pima bit, ijodiacat eju ḡu o'jekawēn. Koap jekawēn tojtjt'ukayū be o'ḡuwēn. Ixeyū o'ḡudot jekawēn muwēn ām ijodiacat pe. Ijodiat ma ḡuwēn iboap wuywebe. ²⁰ Wuyju warara'acat mujum wuybure kay imukūyjo pin pima. Imēnpuxim Deus ixeyū o'ḡudot ijodiacat mukūyjo am, ixeyū be “Ha'a, ijop ekawēn taḡ cuy ajeku” i'e am. Deus pit pūḡ ma. Wuyju imujuap wiwim ḡu Deus, ja'ōbi ma e'em puye. Wuywebe bit iba'ore imuju am. Iba'ore wuywebe “Ēn imēn ece'e. Ōn tak wara'at taḡ oce” i'e am Deus pe, ixē mujum ḡu wuyju buye. Ja'ōbi ma: — Xipacat oḡūm ewebe — i juk o'e Abraão be.

²¹ — Eyetabun puje acā cūḡ ma epesop oxe — i'e'em Deus.

— Cūḡ ma epesop oxe eyawēwēap ekawēn taḡ eyeku buje acā — i dak tu e'em wuywebe?
Xepxep ekawēn taḡ tu Deus e'em wuywebe? Ka'ūma! Deus pe wuymucūḡ put wuyawēwēap ekawēn muwēn ām ibima, “Eyawēwēap ekawēn taḡ eyeku buje acā cūḡ ma epesop oxe” i kuka juk o'e Deus wuywebe. ²² Imēn e'em Deus ekawēn tup:

Soat ipi watwat ikērēat kuḡ, i.

Iba'ore soat pe wuywebe wuyawēwēap ekawēn taḡ wuyeku am- -soat ekawēn taḡ. Imēnpuye pūḡat kay wuyetabun puje acā cūḡ ma acesop Deus xe- Jesus Cristo kay wuyetabun puje acā. Soat ixē kay itabucayū xipacat je'jat Deus xewi “Xipacat oḡūm soat pe itabucat pe” io'e Deus puye.

²³ Kuy bima juk adi wuyetaybit ḡu ajop wuyetabut am. Warara'acat pe wuymutaybicat wiwim cuk adi ajop wuyetabut am Jesus kay. Taomūnmūnat puxim cuk adi ajop wuyawēwēap ekawēn taḡ jeku ojuy. ²⁴ Bekitkit puxim cuk adi ajop. Bekicat kukat puxim wuyawēwēap ekawēn wuykuḡ osunuy. Ikukat bekicat mukūyjom ixē be warēmtaḡ ma jekuap puxim.

Imēnpuxim wuyju dak wuyawēwēap ekawēn taḡ cuk adi ajekuku warēmtaḡ ma wuyekuap puxim. Cristo ajēmap wiwim cuk adi ajop. Yajēm'isum cūḡ ma acesop Deus xe Cristo kay wuyetabucam acā.

²⁵ - ²⁶ Gasū bit wuyetabut Cristo kay. Mūḡ'i wuyju ceweju. Ixe kay wuyetabun puje bekkit puxim ḡu ajop. Deus ipotpoyū ma ajop yaypanayū buxim. Imēnpuye wuyawēwēap ekawēn taḡ ḡu ajeku ḡasū bit. Bekicat ikukacecat puxim ḡu wuyju. ²⁷ Eyetabun puje, kuy juk eymubatisasanat "Jesus eju mūḡ'i ojeku ḡasū bit" i'e am soat pe. Gasū bit Cristo eju mūḡ'i eyju jekukum. Cristo buxim epeku. ²⁸ Cristo eju mūḡ'i jekukum pima, Judeu, Judeu'ūmat tak weḡūḡūn ma ip jekukum. Tei'ūma kapikpik'ukat, teibubum kapikpik'ukat tak weḡūḡūn ma ip jekukum. Ayacat, aḡokatkat tak weḡūḡūn ma ip jekukum, Jesus Cristo eju mūḡ'i jekukum pima.

²⁹ — Xipacat oḡūm enaxeḡebit pe — i juk adi o'e Deus Abraão be.

Cristo eykukat. Imēnpuye Abraão naxeḡebitbicat eyju Deus xe. Imēnpuye xipacat epejat Deus xewi apēn ixe juk adi o'e cebe iap taḡ.

4 Gebum cuy ajop apēn ipotpoyū jebay bubut pum iap kay.

— Yaypan pima acā okpot soat obubut je'jat jebubun — i'e'em cebay.

Yaypan'ūm pima bit, jebay eju kapikpik'ukat co'i ma ipot. Yaypan pima acā soat kuḡ jeenuy- jebay bubut kuḡ. ² Yaypan'ūm pima, warara'acayū bekicat kuḡ imukūyjom. Warara'acayū cebay bubut kuḡ, cebay ekawēn taḡ ma. ³ Bekicat yaḡuy'ūm bekin pima. Bekkit puxim wuyju dak ajop wuyetabun'isum Jesus kay. Tūybe wuyawēwēap ekawēn taḡ wuyekuap tomuju cūḡ ma acesop Deus xe iān cuk adi ajop. ⁴ Imudocap kabia ajēm puje, Deus jekpot o'ḡudot ijodi. Wuyjo'i o'kap ayacat'uk pewi. Wuyawēwēap ekawēn taḡ cuk adi oekukuku Judeu buye.

⁵ — Iba'ore ocewebe soat ekawên tağ jeku am ocawêwêap ekawên tağ — i'e'e'uk ajop Deus pe. — Apêntak cūğ ma acesop ceze? — i'e'e'uk ajop wuyewebe.

Jesus pit e'em wuywebe:

— Wa'ôbacaap oğüm eywebe-eyawêwêap ekawên tağ eyku am ġu-Deus ebekitkiyüm eye'e am acâ! — i.

⁶ Ixe Deus cuk jekpot biôğbuk o'ğüöm wuywebe “Eyju dak okpotpoyü” i'e am wuywebe. Imênpuye:

— Bay! — i wuyju dak e'em cebe Jesus a'ô nomuju. — Bay — i'e'em wuyju ibiôğbuk a'ôbi.

⁷ Deus eju kapikpik'ukayü ġu a'ğü eyju. Ipotpoyü ma eyju. Imênpuye soat je'ğüm eywebe jekpotpoyü be iümümap.

⁸ Kuy bima juk adi eyetaybit ġu epesop Deusan. Warara'acayü kay juk adi eyetabut epesop. Tüybe iteyü ma deusyü iân cuk adi epesop. ⁹ Ğasü bit eyetaybit Deusan. Ixe dak o'e itaybit eyjum. Apênpuye dak waram eyetabut pin ma'ğuto deusbaroyü kay? Te'e ma kuka eyetabut epesop cekay ip. Wuybuywan pa'ore ip cebe itaybit'üm puye. Te'e ma du ixeyü a'ô kay epe'e ġuto? Eyağuyba'arêm! ¹⁰ Tüybe cūğ ma acesop Deus xe kabia muxipanpan pima iân eyju e'em, kaxi muxipanpan pima dak iân, koato muxipanpan pima dak iân eyju e'em. ¹¹ Wağuybabi'üm'üm cîcâ eykuğ. Te'e ma du juk adi ocekapik kawên idipat muwênuwên eywebe? Wağuybabi'üm'üm cîcâ eykuğ.

¹² Okitpitpiyü, Cristo a'ô kay küyjobin cuy epesop obuxim. Őn tak eybuxim ya'ô kay. Őn cuk adi eyburem oğuy. Eyju dak cuk adi warêmtağ ġu epesop okuğ. ¹³ Koap weku buje, kawên idipat epeya'îjojo ġu buk. Őn pit cuk oju imuwên âm eywebe owâtaxipi buye. Oju ġu wara'at ka kay. ¹⁴ Eyağuybabi'üm'üm cuk adi epesop okuğ owâtaxipi buye. Owâtaxiapi waywayway ġu juk adi epesop.

— Paulo kay ġu oceju soat em iwâtaxipi buye — i'ümğü juk adi epe'e'e.

Eyduk'a be juk adi eyju okuk. Xipan cuk adi eyju

okuk kabi bewiat kukap puxim- -Deus ekawên tojot-jot'ukat kukap puxim- -Jesus Cristo kukap puxim.

¹⁵ Eycokcoğ cuk adi epesop okuğ. Okay jījā juk adi epesop. Apēnpuye dak epe'e okay ġu ġasū bit? Iba'o-re'ūm pima eyeta kuka juk epesutaūm owebe wetam. ¹⁶ Icēmān acā juk adi ocekawēnwēn eywebe. Apēnpuye eyju ġasū okay ġu?

¹⁷ Jewexe ma ip eykay ixeyū warēmtağ ma eymutaybitbin'ukayū. Eymu'ağuyba'arēm ojuy ip okay'ūm ām. Ibu'u ip eywebe okay am. Ibikuy ip jewekay i'e am apēn kuy bima okay jījā epesop iap puxim. ¹⁸ Xipat wuywebe warara'acat kay am xipat i'e ojuy bima. Ixeyū mu'ağuyba'arēm ojuy bima bit, xipat ġu kuka o'e cekay am. Iboap icēmān soat em. Eykukpin cīcā oxe, eyxe ġu ma'ġu ōn. ¹⁹ Bekitkit, eykukpin cīcā oxe. Ayacat i'itpiat puxim ōn. Wağuybabi'ūm'ūm cīcā eykuğ. Cristo ekukuap puxim eyju dak jekukum iap wiwim ōn ayacat je'it kapap wiwim iap puxim. ²⁰ Wağuybabi'ūm'ūm cīcā eykuğ. Eyxe pin cīcā oxe. Apēntak ōn jeyawē?

²¹ — Moisés ekawên tağ cuy ajeku- -wuyawēwēap ekawên tağ — i te'e ma eyju e'em.

Eyetaybit tu apēn wuyawēwēap ekawên e'em iam?

²² Gebum cuy epesop Abraão ipotpoyū kay- -xep-xepayū kay. Xepxep osodop ip Abraão ipotpoyū. Pūğ ma ixi tei'ūma kapikpik'ukat osunuy Abraão duk'a be. Wara'at xi bit Abraão tayxiat osunuy.

²³ Kapikpik'ukat it o'kap wuykapap puxim. Itayxiat it pit Deus a'ōbi o'kap. O'kap "Ekpon oğūm ewebe" io'e buye. ²⁴ Xepxep aoyū xepxep em Deus jekawēn o'ğuwēn jebekitkit pe iap puxim. Jekawēn o'ğuwēn jebekitkit awēwē ām. Co'a bicūğpe bima o'ğuwēn Moisés pe, Sinai'a bicūğpe bima. Wuyawēwēap ekawên tağ jeku ojuyayū tei'ūma kapikpik'ukat it puxim- -Agar it puxim. ²⁵ Agar co'a buxim- -Sinai'a buxim- -Arábia eipi beat'a buxim.

— Wuyawēwēap ekawên tağ wuyekuap tomuju acā cūğ ma acesop Deus xe — i te'e ma e'em pūğ-pūğayū. Agar it puxim ixeyū- -Ismael buxim- -tei'ūma kapikpik'ukat it puxim. Jerusalém ka ixeyū

Judeuyū ka. Ixeyū a'ō kayayū dak wuyawēwēap ekawēn tağ jeku ojuy cūğ ma i'e am Deus xe. ²⁶ Wara'at ka bit opop. Jerusalém ka buxim ibo ka. Kabi be-wiatka bit ibo ka. Wuyju ma ibo ka watwat. Itayxiat it puxim wuyju-Isaque buxim.

— Cūğ ma wuyju Deus xe wuyetabut puye — i wuyju e'em.

²⁷ Imēn e'em Deus ekawēn tup:

Tū'ū, ecokcoğ cuy eğuy e'it'et ġu ma'ġu ēn, i. Ecokcoğ cuy eğuy e'it esupi'ajo ġu ma'ġu ēn, i. Ayacat o'-jepere iat iyū ade je'e- -jektóp eju nuyat iyū bodi ma, i.

Imēn e'em Isaías emudupmubararaktup.

²⁸ Okitpitpiyū, Deus a'ōbi Isaque o'kap. Ixe buxim eyju dak ya'ōbi Deus ipotpoyūm epesop. ²⁹ Wuykapap puxim o'kapiat Deus biōğbuk a'ōbi o'kapiat kaykay jijā osunuynuy. Ibiwarere osunuynuy cekay. Iwaywayway acā osunuynuy. Gasū dak imēn ma jebapukpuğ iboap. Wuykapap puxim o'kap'iaiyū Deus biōğbuk a'ōbiayū kaykay jijā. Iwaywayway jijā ip. Warēmtağ ip ikuğ. ³⁰ Imēnpit, imēn e'em Deus ekawēn tup:

"Tei'ūma kapikpik'ukat cuy eğujēm eduk'a bewi," i juk o'e Deus Abraão be, i. "Eğujēm cuy i'it eju ma," i. "Etayxiat it puxim ġu ixe it," i. "Jebay bubut je'jat ġu," i. "Etayxiat it acā je'jat," i.

³¹ Imēneju, okitpitpiyū, ġebum cuy epesop iboap ekawēn kay. Tei'ūma kapikpik'ukat it puxim ġu wuyju- -itayxiat it puxim acā.

5 Cristo juk ja'ōbacaap o'ġūm wuywebe wuyjupinap tağ wuyeku am. Ixe a'ōbacaap kuğ cuy epesop soat em.

— Wuyawēwēap ekawēn tağ cuy ajeku cūğ ma wuydop am Deus xe — i waram pit cuy epe'e ġu.

Tei'ūma kapikpik'ukat puxim ġu juy epesop waram.

² Eya'ōpicūġcūġ cuy epesop wekawēn kay! Ōn Paulo. Judeu ōn. Jesus kay bit wetabut. Ōn ma jey-mukūyjo. Warara'acat pe eydaypu'aġobixeedakacan pima, te'e ma kuka juk Cristo oe'ū eywebeam. ³ I-mēn ma ōn eymukūyjom.

— Soat ekawēn taġ cuy epeku wuyawēwēap ekawēn taġ- -Moisés ekawēn taġ — i ōn e'em soat pe o'-jewedaypu'aġobixeedakacat'iaiyū be.

⁴ “Cūġ ma acesop Deus xe wuyawēwēap ekawēn taġ wuyju jekukum puye” i'e'e'ukayū wūy ma ip Cristo wi. Jetabucap kuy o'jepere ip. Ibu'u ip Deus pe xipan jekukan. ⁵ Wuyju bit wuyetaybit cūġ ma acesop Deus xe wuyetabut Jesus Cristo kay buye iam. Cūġ ma acesop cexe iap wiwim cīcā wuyju. Iboap wiwim cīcā wuyju soat em Deus biōġbuk wuya'ō-mucanucan puye. ⁶ Jesus Cristo eju mūġ'i wuyju jekukum pima, yoboġ ġu Deus xe wuydaypu'aġobixeedakatkan pima, ixeedakatkan'ūm pima dak. Yoboġ pit cexe wuyetabucap acā. Wuyetabut pima xipan tak acejewekuk.

⁷ Kuy juk adi eyetabut cīcā epesop Jesus Cristo kay. Abu juk kawēn icēmat kay eymubu'un? Apēn cuk eymubu'un? ⁸ Apēn xe'e ixē eyaġuymuwarurun? Deus ġu eyaġuymuwarurun. Deus ġu eymubu'un. Ixe juk eynaē cūġ ma eyeku am jexe.

⁹ — Tōm'it ma soat'a muyuhuhum- -pāo'a muyuhuhuptōm. Yaboġ e'em — i wuyju e'em. Imēnpuxim pūġ ma warēmtaġ ma eymutaybitbin pima, soat kuka warēmtaġ ma epeku.

— Wuyawēwēap ekawēn taġ wuyekuap tomuju cūġ ma acesop Deus xe — i kuka o'e soat te'e ma.

¹⁰ Ōn pit wetabut mabuk eykay. Wetaybit waram ġuto eyaġuysat epe'e iam. Waram ġuto kawēn icēmat kay epesop. Wetaybit iboam mūġ'i wuyju wuykukukat eju buye. Warēmtaġ ma eymutaybitbin'ukat pe bit Deus ipiat supi'ajoat- -ya'ōbuyxi'ūmat pe, ya'ōbuyxiat pe dak.

¹¹ Okitpitpiyū, okay'ūmayū te'e ma wawēġmukē-rērērēn.

— Paulo e'em wuywebe “Jewedaypu'aġobixeeda-

katkacan cuy epesop," i — i napa ma e'em ip soat pe.

Kuy bima juk adi ocece iboam soat pe. Gasû bit oce ġu imên. Imên òn e'em pima, itakoma ġu kuka adi Judeuyû okay. Ixeyû ma e'em imên soat pe. Òn pit e'em:

— Cûġ ma epesop Deus xe eyetabut pima Jesus oe'û korosa be wuywebeam iap kay — i.

Imênpuye buk ip itakoma ma okay. ¹² "Jeweday-pu'aġobixeedakatkacan cuy epesop Moisés ekawên taġ" i'e'e'ukayû be bit:

— Epeyewedaxibada'uk cuy pûġ em ma — i òn e'em.

¹³ Okitpitpiyû, Deus cuk wuynaë wuyjupinap taġ wuyeku am. Imênpit:

— Obikuyap taġ cuy ojeku jewemucokcokcoġ, Deus onaë ojupinap taġ weku am puye — i'ûmġu juy epe'e.

Eybikuyap taġ ġu juy epeku jewemucokcokcoġ. Xipan cuy epeyewekuk. Jewebuywatwan tak cuy epesop! ¹⁴ Imên e'em wuyawêwêap ekawên tup: Xipan cuy warara'acat ejukuk ewekukap puxim, i. Eywebe xipan warara'acat kuġ pima, wuyawêwêap ekawên taġ eyju jekukum soat ekawên taġ. ¹⁵ Ika'uat puxim jewewekuġ pima bit, kuka xipan jewewekuap epeyepere, jewemuymuy bima dak, jewawêġmukêrêrêrên pima dak.

¹⁶ Òn mabuk jeyawê. Eybikuyap taġ ġu juy epeku jewemucokcokcoġ. Āġ cuy Deus biôġbuk jeyaġuydada. Ixe eyaġuydadam pima warêmtaġ ġu kuka epekuku ikêrêat muġêġêm. ¹⁷ Ajo Deus biôġbuk cekay iap ajo wuyju cekay iap ġu. Apên Deus biôġbuk ibikuy iap puxim ġu wuyju bit wuybikuy. Apên wuybikuy iap puxim ġu dak Deus biôġbuk pit ibikuy. Deus biôġbuk bikuyap taġ jekuku'ukat jebikuyap taġ ġu jekukum jewemucokcokcoġ. Imênpuye ixê biôġbuk bikuyap taġ jeku pin pima, wuybikuyap taġ ġu kuka ajekuku-ixê bikuyap taġ acâ. ¹⁸ Deus biôġbuk wuy-aġuydadam pima, wuyawêwêap ekawên taġ ġu kuka

ajeku cūg̃ ma wuydop am Deus xe-kawēn kuyat taḡ ḡu.

¹⁹ Wuybikuyap taḡ jekukum pima, ikērēat acā kuka aḡuḡē. Soat wuyetaybit iboam. Wuybikuyap taḡ jekukum pima, warara'acat itop kaykay kuka ajop, warara'acat tayxi dak; ikērēat kay acā dak kuka ajop ḡebum; wuyekawēnkērēm tak kuka ajop; ²⁰ deusbaroyū kay dak kuka ajop wuyetabun; wuybukaypan tak kuka ajop; warara'acat aoka pin tak kuka ajop; jewa'ōxixiḡ tak kuka ajop; wuyetakomāmām tak kuka ajop warara'acat kay; wuyetabikukum tak kuka ajop soat kay; wuya'ōbuyxian pin tak kuka ajop; wuyewejak'ūm tak kuka ajop wuybureyū kay; ²¹ wuyetabutkarey dak kuka ajop; wuyka'o'om tak kuka ajop; jewetabutpe ma kuka ajop aoyū dabi'o'om peta muḡēḡēm pima. Wuybikuyap taḡ jekukum pima, warēmtaḡ ma kuka ajop. Deus soat kukukan pima, jeōm ḡu ip kabi be imēn jekuku'ukayū. Imēn cuk oce eywebe. Ḡasū dak imēn ma ōn e'em eywebe.

²² Deus biōḡbuk wuyaḡuydadam pima bit, ikuk-pin kuka warara'acat ajukukuk; wuycokcoḡ tak kuka ajop soat em; wuyaḡuybabibim tak kuka ajop; wuyukpiceḡēm ḡu dak kuka ajop; wuya'ōdidim tak kuka warara'acat ajukukuk; xipan tak kuka warara'acat ajukukuk; wuya'ō daḡ tak kuka ajekuku soat em; ²³ wuya'ōbuyxian pin ḡu dak kuka ajop; jewawēwēm tak kuka ajop ikērēat muḡēap puxim. Imēn wuyju jekukum pima, wuyawēwēap ekawēn taḡ kuka ajeku-kawēn kuyat taḡ. ²⁴ Jesus Cristo ebekitkiyū wuyju. Imēn wuyju jewawēwēm.

— Cristo oe'ū korosa be owebeam — i'e'em wuyju jewebe ma. — Ixe buxim oe'ūiat puxim cuy ojeku. Jewemucokcokcoḡ obikuyap taḡ ḡu juy ojeku — i'e'em wuyju jewebe ma.

Imēn wuyju jewawēwēm. ²⁵ Kuy bima Deus biōḡbuk wuymutabun Jesus Cristo kay. Aḡ cuy ḡasū bit ixe wuyaḡuydada. ²⁶ Wuya'ōbuyxian pin ḡu juy ajop. Warara'acat aḡutakomān ḡu dak cuy. Wuyetabutkarey ḡu dak cuy ajop warara'acat kay.

6 Okitpitpiyū, wuybure be ikērēat muḡē buje, ixē juy epeyawē. Deus biōḡbuk a'ō kay kūy-jobicat cuy ixē yawē. Eywebe dak xipāt'ūmat imuḡē ḡūḡūn ixē buxim. Imēnpuye eyday'em'um cuy epesop eywebe ikērēat kukap puxim. ²Jewebuywatwan cuy epesop. Jewebuywatwan pima, kūyjobit epesop Cristo a'ō kay. ³Ya'ōbuyxi'ūmat “Ōn pit wa'ōbuyxi. Osu-buywan ḡu warara'acat” i'e'em pima, jewēḡuykukukum. Te'e ma e'em — Cristo ebekit ōn — i. ⁴Ge-bum cuy ajop wuyekukuap kay wuyetaybit am cūḡ ma oceju jekukum iam, cūḡ ḡu iam tak. Cūḡ ma jekukum pima, wuycokcok ace'e wuyekukuap kay.

— Ibo ekukuap co'i du wekukuap xipāt Deus xe? — i ḡu kuka ace'e.

⁵Soat ma juy wuyekapikap ajukuk.

⁶Warara'acat pe Cristo ekawēn wuymutaybitbin pima, wuybubut'in cuy aḡu'ē'ē cebe wuymutaybitbinapteim. ⁷Jewemuḡuykukukum ḡu juy epesop. Deus a'ōmupubutpun pa'ore soat pe wuywebe. Ajo ataida iat tak kuka ajat ma. ⁸Imēnpuxim jewemucokcokcoḡ wuybikuyap taḡ jekukum pima, ikērēat kuka aḡujurūḡ. Wuye'ū buje Deus wi wūy ma ace-sop. Deus biōḡbuk mucokcokcoḡ ixē bikuyap taḡ jekukum pima bit, idipāt kuka aḡujurūḡ ixē a'ōba-caan, ibiōḡbuk wuyaguydadam pima dak. Wuye'ū buje, waram acejetait. Deus xe acesop soat em. ⁹Wuybu'u'um ḡu juy ajop xipacat muḡē ām. Xipacat puap kabia be xipacat acejat wuybu'u'u'ūm pima. ¹⁰Imēnpuye xipan warara'acat kukap cuy acejepere ḡu. Warara'acat podi ma itabucayū ajukuk xipan.

¹¹Obum ma ijudup mubarararaḡ ōn. Yoboḡ cīcā wemumubararak. ¹²Xipan jewemuwēnuwēnayū ma e'em eywebe:

— Jewedaypu'aḡobixeedakat kacān cuy epesop cūḡ ma Deus xe eydop am — i.

Yoboḡan pin ip. Jesus Cristo oe'ū korosa be iap muwēn pu'u jījā ip. Iparara ip Jesus Cristo kay'ūmayū ipiat supi'ajoat cebe ip iap puxim. ¹³Jedaypu'aḡobixeedakat kacat ip. Soat taḡ ḡu bit ip jekukum wuya-

wēwēap ekawēn taḡ ḡu. Eywebe jewedaypu'aḡobixeedakatkacat ojuy ip, "Ade ma oca'ō kay kūyjobit" i'e ojuy ip puye.

¹⁴ — Mēnku xipat wuywebe cūḡ ma wuydop am Deus xe, ḡoku ḡuto — i'ūmḡu ōn pit e'em. — Wuykukukat Jesus Cristo oe'ū korosa be wuywebe cūḡ ma wuydop am Deus xe — i acā ōn e'em.

Jesus kay'ūmat ekukuap puxim ḡu weku pin ḡasū bit. Idip ḡu o'e oxe iboap pit. Jesus kay'ūmayū dak jeku pin ḡu wekukuap puxim. Idip ḡu cexe ip iboap.

¹⁵ Wuyaḡuy'isu bima, yoboḡ ḡu Deus xe wuydaypu'aḡobixeedakatkacat pima, ixeedakatkacat'ūm pima dak. Ibitbit ma. Yoboḡ pit cexe wuy'isum wuyeku am. ¹⁶ Ōn kawēnwēn Deus eju yaḡuy'isum jekuku'ukayū beam- -Deus ebekitkit peam.

— Bay, ebekitkit aḡuymubabibin cuy eḡuy — i ōn e'em cebe. — Etabotaidabotbon cuy eḡuy cekay ip — i ōn e'em cebe.

¹⁷ Okaykay ḡu juy ip jeedop. Wa'ōmukorēm ḡu juy jeedop ip jewedaypu'aḡobixeedakatkacan iam. Kuy werowero opop wukxabi daḡ ade. Iboap coco buje, itaybit je'e ip Paulo kapikpiḡ cīcā wuykukukat Jesus peam iam.

¹⁸ Okitpitpiyū, "Xipan cuy Galácia eipi watwat ejukuk" i ōn e'em wuykukukat Jesus Cristo be. Xipan cuy jeykuk.

Ibūrūn ma.

ÉFESO KA WATWAT PEAPTUP PAULO EMUDUPMUBARARAKTUP

1 Éfeso ka watwat, cartadup mubararaḡ òn eywebeaptum. Deus ebekitkiyū eyju. Soat em eyju kūyjobit Jesus Cristo a'ò kay, ceweju eyju mūḡ'i buye. Òn Paulo. Jesus Cristo emumuju òn Deus a'òbi.

² Deus wuyebay. Jesus Cristo wuykukukat.

— Bay, Éfeso ka watwat cuy ejukuk xipan — i òn e'em Deus pe. — Ixeyū aḡuymubabibin cuy eḡuy — i òn e'em cebe.

³ Kabi beacat pe xipacat ūmūmap co'i ma soat em Deus xipacat ūmūm wuywebe dak. Kabi beayū buxim wuyju, Cristo eju mūḡ'i wuyju buye. Imēnpuye:

— Èn xipat cīcā — i juy ace Deus pe soat em ma- wuykukukat Jesus Cristo eбай be.

⁴ Ipi muḡē'ūm pima ma, Deus kuy wuynaē jebekitkiyūm. Cebekitkiyū wuyju Cristo eju mūḡ'i wuyju buye.

— Soat taḡ iisu jeedop ip oxe webekitkiyū — i juk o'e jewebe ma Deus. — Ikērēat kuḡ ḡu ip jeedop oxe — i juk o'e jewebe ma.

Imēn cuk wuynaē ixē xe wuykukpin puye.

⁵ — Jesus Cristo kay itabun puje, webekitkiyūm ip je'e — io'e Deus jewebe ma.

Imēn Deus o'e, jexe wuykukpin puye. Ibikuy osunuy wuynaē ām. Jemucokcok am cuk wuynaē. ⁶ Ipot ikukpin cīcā osunuy cexe. Imēnpit jekpot o'ḡudot wuykay wuydaxijo am tei'ūmat ūmūmap puxim. Imēneju:

— Ka'ūma ma ejo'iat xipacat — i juy ace cebe soat em. — Soat podi ma ēn xipacat ūmūm ocewebe — i dak cuy ace cebe.

⁷ Deus ikērēat o'ju'uk wuywebewi Cristo oe'ū wuywebeam puye. Gasū bit ixē ḡebum ḡu apēn cuk adi ikērēat aḡuḡēḡē iap kay. Soat podi ma ixē xipan wuykuḡ. ⁸ Ibu'u ḡu xipan wuykuk am. Soat em wuy-

kuḡ xipan. Soat podi ma itaybitbit ixe. Soan ma itaybit.

⁹ - ¹⁰ — Imu'awero pin pima, soat webekitkiyū oḡu'awero- -soat ipi juacat, soat kabi beacat tak — i juk o'e Deus jewebe ma. — Cristo soat kukan je'e ḡebuḡe bit — i juk o'e jewebe ma. — Kūyjobit jeedop ip ya'ō kay — io'e.

Kuy bima apēn imu'awero ojuy ip osunuy iap iba'a-rēm osodop soat xe wuyxe. Ḡasū bit iboap o'ḡuwēn wuywebe.

— Cristo soat kukan je'e — i juk o'e wuywebe. — Soat ma kūyjobin jeedop ip ya'ō kay — i juk o'e wuywebe.

¹¹ Soat ma jebapukpuḡ wuywebe Deus bikuyap taḡ- -apēn ixe juk adi o'e'eiap taḡ. Ixe juk wuynaē jebekitkiyūm Cristo eju wuyju mūḡ'i buye. Jebikuyap taḡ wuynaē.

— Teyūku otaē webekitkiyūm — io'e ipi muḡē awap.

Imēnpuye juk wuynaē. ¹² Ocejū juk koam ocetabut oce'e Cristo kay. Imēnpuye:

— Ka'ūma ma ejo'iat ya'ōbacaat — i oceju e'em Deus pe.

¹³ Eyju dak cuk eyetabut Cristo kay. Kawēn i-cēmat co buje Cristo kay juk eyetabut epesop- -kawēn idipat co buje, Deus wuydaxijojomap ekawēn co buje. Wuyju ma wuybutet mubarararaḡ wuybut pe ijop cuy obubut i'e am soat pe. Imēnpuxim Deus tak jebiōḡbuk muōmōm wuywebe "Teyūku webekitkiyū" i'e am soat pe. Jebiōḡbuk muōmōm wuywebe apēn cuk adi o'e'e iap taḡ. ¹⁴ Wuyetaybit ajo Deus je'ḡūm jebekitkiyū be iap acejat iam ibiōḡbuk kuḡ puye. Ixe ja'ōbacaap ūmūm wuywebe ikērēat muḡēap puxim. Imēnpuye wuyetaybit ixe xe acesop ikērēat kuḡ ḡu iam. Imēneju:

— Ka'ūma ma ejo'iat xipacat — i juy ace ce-be- -Deus pe.

¹⁵ — Efeso ka watwat itabut cīcā wuykukukat kay- -Jesus kay — i juk o'e warara'acayū ocewebe.

— Ikukpin warara'acayū kuḡ ip- itabucayū kuḡ — i juk o'e ip ocewebe.

¹⁶ Iboap awēḡ tobuxik puje:

— Bay, ēn xipat cīcā. Êfeso ka watwat buywatwan ēn ixeyū be warara'acayū kuk am xipan — i ōn e'em Deus pe.

Obu'un pa'ore ma imēn i'e'e am cebe. Soat em eywebeam ōn kawēnwēn Deus eju. ¹⁷ Kawēnwēn ōn Deus eju- wuykukukat Jesus Cristo ebay eju. Ka'ūma ma ixē jo'iat idipat.

— Ebiōḡbuk cuy eḡuōm Êfeso ka watwat pe — i ōn e'em cebe.

Ibiōḡbuk jeymutaybin cūḡ ma eyeku am Deus etabutpe iam. Deus tak ḡubapuk eywebe ibiōḡbuk. Eytaybit epesop ixem apēn ixē ibikuy eywebe eyetaybit am ixem.

¹⁸ — Bay, ixeyū juy eḡutaybin soat em exe jee-dop ip iam — i ōn e'em Deus pe.

Ixe juk eynaē soat em jexe eydop am. Cexe eydopap wiwim eyju ḡasū dak.

— Ixeyū juy eḡutaybin xipat cīcāat eḡuxipan iūm ām ebekitkiyū be iam — i ōn e'em Deus pe.

¹⁹ — Soat podi ma a'ōbaca iam cuy dak ixeyū eḡutaybin — i ōn e'em. — A'ōbacaap ūmūm soat pe ebekitkiyū be- itabucayū be iam tak cuy ixeyū eḡutaybin — i ōn e'em.

²⁰ Iboap a'ōbacaan ma Deus Cristo o'ḡutait ce'ūap tomukadi. Waram o'ḡutait. O'ḡuyu kabi kay.

— Soat kukan cuy eḡuy oweju — io'e cebe- -Cristo be. — Waḡuywaḡōm cuy eḡuy — io'e cebe.

²¹ Kabi be omuy ḡasū Cristo. Soat podi ma ya'ōbaca ixē. Soat kabi beayū kukayū kūyjobit ixē a'ō kay acā- ya'ōbuyxiyū, ya'ōcaayū dak, kariwaayū dak. Soat ip kūyjobit Cristo a'ō kay. ḡasū ka'ūma ma ixē jo'iat ya'ōbuyxi. Guyjom tak ka'ūma ma je'e ixē jo'ian. ²² Deus soat a'ōbacaap o'ḡu'ūm ixeyū be kūyjobit am Cristo a'ō kay.

— Soat kukat okpot — i juk o'e Jesus kay itabucayū be. — Ka'ūma ma ixē jo'iat — i juk o'e cebe ip.

²³ Wuya'a wuyjebit kukat. Wuya'a buxim Cristo dak

itabucayū kukat. Imēnpuye itabucayū Cristo jebit puxim. Ixe Cristo soat em jebekitkiyū kuḡ xipan-jekay itabucayū kuḡ. Ixe buxim wuyju dak soat kuḡ xipan itabucayū kuḡ soat kaka beayū kuḡ, ixe wuykukat puye.

2 Kuy bima bit juk adi eybu'u epesop Deus bikuyap taḡ jeku am Deus a'ō kay kūyjobit'ūm puye, ikērēat mujurūḡrūḡ puye dak. ²Itabut'ūmat ekukuap puxim cuk adi epekukuku ikērēat muḡēḡēm acā. Deus a'ō kay kūyjobit'ūmayū kukat a'ō kay epesop kūyjobit kabido daḡayū kukat a'ō kay, ya'ōbacaayū kukat a'ō kay. ³Soat wuyju dak itabut'ūmayū ekukuap co'i ma juk adi ajekukuku. Wuyukpiwatpin ma juk adi ajekukuku ikērēat mujurūḡrūḡ. Ajo-muḡē pin wuyxe iat muḡēḡēm cuk adi ajekukuku. Ajo-kay wuyju jewaḡuy pin iap kay dak cuk adi aceḡebububu. Wuykap isu ma wuycokcok ikērēat mujurūḡrūḡ ām ijodiat puye. Imēneju Deus itakoma osunuy wuykay ikērēat mujurūḡrūḡ puye. Ipiat kuka o'supi'ajoat soat pe wuywebe. ⁴Deus pit soat podi ma itabotaidabotbot wuykay. Imēnpuye ipiat o'supi'ajoat ḡu wuywebe. Soat podi ma wuykukpin cexe. ⁵Imēnpuye ixe juk adi wuymuisun. Ce'ūat puxim cuk adi acesop. Ikērēat mujurūḡrūḡ cuk adi ajekukuku. Ixe bit cuk wuymuisun. Kuy bima Deus waram ḡuto Jesus o'ḡutait ce'ūap tomukadi. Ja'ōbacaam o'ḡutait. Iboap a'ōbacaam wuymuisusun tak Cristo eju wuyju mūḡ'i buje. Deus kuy juk wuydaxijo warara'acat podi ma xipan wuykuḡ puye. ⁶Ixe juk wuymuisun ce'ūat mutaicap puxim. Wuymuyu jexe wuydop am Jesus Cristo eju mūḡ'i wuyju jekukum puye.

— Kabi be soat kukayūm je'e ip webekitkiyū Cristo eju — i juk o'e Deus jewebe ma.

⁷Ixe juk wuymuyu jexe wuydop am. Imēnpuye ḡuyjomayū je'e:

— Deus soat podi ma xipan wuykuḡ, ikērēat

ağujurūgrūg ma'ģu wuyju — i. — İxeyū o'ģuyu jexe je'dop am Jesus Cristo oe'ū cebeam ip puye — i je'e ip.

⁸ Deus wuydaxijom xipan wuykuğ puye. İxe wuydaxijom Jesus Cristo kay wuyetabun puje. Tei'ūma wuydaxijoap. Deus emumuım puxim wuydaxijoap teihe ğu buye. ⁹ Deus wuydaxijom cūğ ma wuyeku-kuap tomuju ğu. İmēnpuye:

— Deus cuk ocedaxijo cūğ ma oceju jekukum puye — i'e ba'ore wuywebe. ¹⁰ Deus cuk wuymuğē. Ğasū bit cuk wuymuwexat xipacat mujurūgrūg-'ukayūm Jesus Cristo eju mūğ'i wuyju buye.

— Xipacat mujurūgrūg-'ukayūm ip jeedop Cristo eju mūğ'iayū — i juk o'e Deus jewebe ma kuyje.

¹¹ Ğebum cuy epesop apēn cuk adi warēmtağ ma epekukuku iap kay. Judeuyū ğu eyju.

— Eyju jewedaypu'ağobixeedakatkacan ğu- -oceju acā — i'e'em ip Judeuyū eywebe.

Jejebit pe ip takatkacap kuğ oceju, Judeuyū iap mu-bapuk am soat pe. Judeuyū xe eyokok epesop. ¹² Wūy ma juk adi epekukuku Cristo wi kuy bima. Powatwat puxim cuk adi epesop, Judeuyū'ūm puye- -Deus emunaē'ūm puye dak.

— Őn xipan jeykuk — i juk o'e Deus jebekitkiyū be- -Judeuyū be.

Eywebe bit imēn ğu o'e. Deus xe soat em wuyetait acesop iap wiwim ğu juk adi epesop. Eyetabut ğu juk adi epesop Deus kay. ¹³ Kuy bima Deus wi wūy jījā juk adi epesop eyetaybit'ūm ixem puye. Ğasū bit cuk eydojot jetēğ, Cristo oe'ū korosa be eywebeam puye. İxe xe ma eyju dopdom ğasū Jesus Cristo eju mūğ'i eyju buye. ¹⁴ Cristo wuymudinudin. Judeuyū itakoma osodop Judeu'ūmayū kay. Wuyparakpe korara opop iap puxim cewağōn'ūm ip osodop jewewekay. Cristo bit itakomaap o'ģu'ūm korara muduap puxim. O'ģu'ūm je'ū buje. Ğasū bit pūğ kadian ma o'e ip Judeuyū, Judeu'ūmayū dak. Pūğ pe ma ip jewewekuğ o'e itakomaap oi'ūm puye. ¹⁵ Judeuyū itakoma osodop ip Judeu'ūmayū kay Moisés ekawēn tağ ğu ip oekuku buye- -wuyawēwēap ekawēn tağ ğu.

— Moisés ekawên tağ eyekukuap tomuju ġu eyju cūğ ma oxe — i juk o'e Cristo bit soat pe wuywebe. Imên cuk o'e je'û buje. Kuy bima Judeuyū pūğ kadi ġu osodop ip Judeu'ūmayū eju- -xepxep kadi. Cristo eju mūğ'i jeku buje bit, pūğ kadian ma ip o'e. Yağuyisu ip o'e Cristo ip o'ğudin puye. Itakoma ip jewewekay iap o'ğū'ūm. ¹⁶ Wuyewewekay wuyetako- maap o'ğū'ūm, korosa be oe'ū buye. Pūğ kadian ma ixē juk wuyuwexat korosa be je'ūap tomuju- -Judeuyū, Judeu'ūmayū dak. Ixē juk wuywubikuy Deus a'ō kay kūyjobit am. ¹⁷ Ipi ju jekop puje:

— Deus itakoma ġu eykay! Eykukpin cīcā cexe — i juk o'e Cristo.

Imên ixē juk o'e eywebe- -Judeu'ūmayū be- -Deus wi wūyayū be. Ocewebe dak imên cuk o'e Judeuyū be- -Deus xēyū be. ¹⁸ Soat wuyajēm put wuyebay xe- -Deus xe- -Judeuyū, Judeu'ūmayū dak, Cristo kay wuyetabun puje. Wuyajēm put cexe pūğat a'ōbi- -Deus biōğbuk a'ōbi, Deus biōğbuk wuywebe buye.

¹⁹ Eyju Judeu'ūmayū. Ġasū bit eyju wūyatka watwat puxim ġu- -powatwat puxim ġu dak. Ocebu- xim eyju dak Deus ebekitkiyūm epesop ġasū- -Deus badipyūm, Deus ka watwan. ²⁰ Deus nuynuyap'a bu- xim wuyju. Uk'a muy pin pima, tuk'a diotpeat muy- muy wuyju koap. Imēnpuxim Jesus Cristo emumu- juyū cekawên o'ğuwēnuwēn koap, Deus ekawên mu- wēnuwēn'ukayū dak. Uk'a muy bima, wita'a muy- muy wuyju wara'at'a muycemucemap'a. Jesus Cristo iğo'a buxim. ²¹ Iğo'a wara'at'a muycemucem uk'a yacem i'e am. Imēnpuxim wuykukukat Jesus itabu- cayū a'ōmucanucan. Imēnpuye biğ ma wuyetabut ce- kay. Biğ ma wuyju xipan jewewekuğ. Biğ ma wuyju kūyjobit ya'ō kay. Uk'a buxim wuyju yadipat'a bu- xim. ²² Eyju dak Cristo eju mūğ'i jekukum, Judeuyū ġu ma'ğū eyju. Imēnpuye ocebuxim eyju dak Deus nuynuyap'a buxim epesop. Deus nuynuy eywebe, Ibiōğbuk nuynuy eywebe buye.

3 Paulo òn- -Jesus Cristo emunaē.

— Deus Judeuyū daxijojom acā ġu. Judeu'ūmayū daxijojom tak — i òn e'em.

Iboap puye òn daomūnmūnap'a be. ² Deus soat podi ma xipan okuġ. Imēnpuye juk omuju jekawēn muwēn ām eywebe- -Deus xe soat ikukpin cīcā iap ekawēn muwēn ām eywebe. Kuy eyetaybit apēn cuk ixe omuju eykay iam. ³ ⁶ Kuyje Deus o'jekawēn jewebe ma.

— Kawēn idipat oġuju Judeu'ūmayū be dak — i juk o'e jewebe ma. — Jesus Cristo kay ixeyū etabun puje, ajo-ūmūm òn webekitkiyū be iap je'jat ip — i juk o'e jewebe ma. — Pūġ pe ma ip jewebot. Judeuyū eju jewebot ip — i juk o'e. — Wa'ō daġ oce Judeu'ūmayū be dak apēn cuk adi ocece Judeuyū be iap taġ — i juk o'e jewebe ma.

Kuyje apēn pūġ kadian je'e ip iap ekawēn o'ġuwēn ġu warara'acat pe. Iba'arēm osodop soat xe iboap ekawēn. Ġasū bit jemumujuyū o'ġutaybin iboap ekawēn- -soat taġ iisuayū. Jemunaēyū o'ġutaybin jekawēn muwēnuwēn'ukayū dak. Jebiōġbuġ ip o'ġutaybin. Owebe dak Deus kuy bima iba'arēm osodop iap ekawēn o'ġuwēn. Kuy iboap ekawētup o'tupmubarakrak yopītpīt. Wemudupmubararaktup co buje, eyetaybit epe'e Paulo itaybit kuy bima iba'arēm osodop iap ekawēn Cristo ekawēn iam.

⁷ — Kawēn idipat cuy eġuwēnuwēn itaybit-ūmayū be — i juk o'e Deus owebe.

Tei'ūmat puxim ja'ōbacaap o'ġūm owebe kawēn idipat muwēn ām. Ja'ōbacaap o'ġūm owebe imuwēn ām. O'ġūm owebe yoboġat ġu ma'ġu òn. Ixe xipan okuġ puye acā o'ġūm owebe. ⁸ Soat podi ma òn yopīt ma Deus kayayū bodi ma. Owebe bit Deus o'e:

— Kawēn idipat cuy eġuwēnuwēn Judeu'ūmayū be — i. Imēnpuye:

— Soat podi ma Cristo xipan wuykuġ — i òn e'em cebe ip. — Soat podi ma xipacat ūmūm wuywebe — i dak. ⁹ — “Kuyje Deus ibikuy osunuy soat kay jebekitkin- -Judeuyū kay, Judeu'ūmayū kay dak,” i juy ece soat pe — i juk o'e Deus owebe, soat

muḡēḡē'ukat cuk o'e. — "Jebikuyap taḡ Judeuyū daxijom ḡasū, Judeu'ūmayū daxijom tak," i juy ece soat pe — i juk o'e Deus owebe.

Apēn Deus ibikuy osunuy iap iba'arēm osodop soat xe kuy bima. ḡasū acā ibapuk o'e. ¹⁰ Iba'arēm osodop kuy bima. ḡasū bit ade taxijojo'ibiyū- -Judeuyū, Judeu'ūmayū dak- -soat kaka daḡayū. Ixeyū jojom pima, kabi beayū itaybit je'e soat podi ma Deus itaybit iam.

— Deus acā itaybit soat kaka daḡayū daxijo am — i je'e ip kabi beayū- -ya'ōbuyxiayū, Deus ekawēn tojtjot'ukayū kukukayū dak.

¹¹ Ipi muḡē awap Deus ḡebum osunuy jebekitkiyū kay. Soat ka watwat mutabun ojuy osunuy. Deus ebekitkiyūm o'e ip wuykukukat Jesus Cristo kay itabut ip o'e buye. ¹² Ixe Jesus Cristo eju mūḡ'i wuyju, cekay wuyetabut puye. Imēnpuye wuyekawēnpi ḡu Deus eju. Wuybisūsūn ḡu kawēn ām ceweju. ¹³ Imēnpuye eyḡuycūḡ ḡu epesop ipiat'ajojom ma'ḡu ōn daomūnmūnap'a be. Ōn ipiat'ajojom cuk adi kawēn idipat oḡuwēnuwēn eywebe buye. Ōn kawēn idipat muwēnuwēnap xipat osodop eywebeam. Ōn daomūnmūnap'a be iap tak xipat eywebeam.

¹⁴ Apēn Deus soat kaka watwat o'taxijo jebekitkiyūm iap kay ōn ḡebum pima, ocēḡ'aecōḡcōḡ wuyebay wap "Ēn soat podi ma xipat oce kay" i'e am cebe. ¹⁵ Deus xipan wuykuḡ iap puxim soat wuyebayū jebekitkiyū kuḡ xipan- -kabi beayū, ipi daḡayū dak. ¹⁶ Eywebeam ōn kawēnwēn Deus eju. Ixe soat podi ma idip, ya'ōbaca dak. Imēnpuye:

— Bay, a'ōbacaap cuy eḡūm Ēfeso ka watwat pe — i ōn e'em cebe. — Ebiōḡbuk cuy ip eya'ōmucan kūyjobit am ip a'ō kay — i ōn e'em cebe. ¹⁷ — Cristo juy jeeku ceweju ip itabut puye ip cekay — i ōn e'em cebe.

Kanabū badi nabū ōmōmat puxim cuy epesop. Darēm ḡu warara'acat kuḡ epesop xipan- -soat em ma.

— Bay, ibuywatwan cuy ip eḡuy xipan ip jewekuk am, ya'ōbacaam tak ip — i ōn e'em Deus pe.

¹⁸ — Ixeyū juy eḡutaybin apēn Cristo xe oce kuy pin

iam — i òn e'em cebe. — Soat ebekitkit cuy eġutaybin iboam — i òn e'em cebe. — Soat podi ma oce-kukpin exe — i òn e'em.

Apèn Cristo xe ocekkupin iap imuwegūn pa'ore oce-webe, yoboġ cīcā buye.

— Apèn ocekkupin cexe iam cuy eġutaybin ip — i òn e'em Deus pe. ¹⁹ — Itaybit ġu ip ikukpin cīcā ip exe iam — i òn e'em cebe. — Apèn ocekkupin exe iam ocetaybitbūt ā — i òn e'em cebe. — Iboam cuy ip eġutaybin — i òn e'em cebe. — Iboam ip itaybin puje, ka'ūma kay je'e ip. Icockok cīcā je'e ip soat kukat puxim — i òn e'em Deus pe.

²⁰ Deus pe soat i'e but. Wuyemuojuy bodi ma ixe iūmūm wuywebe. Wuyaġuyġēbuap podi ma dak i-ūmūm wuywebe. Ixe a'òbacaap kuġ wuyju. Ixe ja'òbacaam soan e'em wuywebeam. Imēnpuye:

— Ka'ūma ma ejo'iat xipacat, idipat tak — i juy ace cebe.

²¹ Soat em ma: — Ka'ūma ma ejo'iat xipacat — i'e'em jeedop ip Deus pe Jesus kay itabucayū.

Imēn i'e'em jeedop ip, soat em Jesus Cristo a'ò kay ip jekuku'ukayū. Ibu'u ġu ma ip je'e imēn je'e am.

4

Deus warara'acat podi ma xipan wuykuġ. Imēnpuye òn jeyawē. Daomūnmūnap'a be òn, wuykukukat Jesus Cristo beam kapikpiġ puye. Deus kuy juk eynaē jebekitkiyūm cedaġ ma eyeku am. Ixe bikuyap taġ cuy epeku. ² Yoboġan pin ġu juy epesop warara'acat muġuykukuap ojuy. Eya'òtareġ ġu juy warara'acat epejukuk. Eyukpiceġēm ġu juy epesop warara'acat kuġ. Jewebuywatwan cuy epesop. Ikukpin cuy warara'acat epejukuk. ³ Deus biōġbuk bikuyap taġ jekukum pima, pūġ taġ ma kuka ace-waġuyġuy. Kaba'ūm cuy epeyewekuk pūġ taġ ma eyewaġuy am. ⁴ Jesus kay itabucayū pūġ tiwatwat ma. Pūġ ma omuy wuywebe ibiōġbuk. -Deus biōġbuk. Pūġat wiwim soat wuyju. -Deus xe acesop iap wiwim. Deus kuy juk wuynaē iboap wiwi am. ⁵ Pūġ ma wuykukukat. Pūġat kay wuyetabut. Pūġat ebekitkiyū oce-

ju iap mubapuk am wuymubatisasanan. ⁶ Pūḡ ma Deus. Pūḡ ma soat ebay. Ixe soat kukat. Soat kake ixe a'ōbi. Soat taḡ ixe kake.

⁷ Jekpiwatpin ma Cristo ja'ōbacaap ūmūm soat pe wuywebe. Iūmūm wuywebe wara'at taḡtaḡtaḡ ma kapik am cebeam. ⁸ Imēn e'em Deus ekawēntup:

Jekay itakomaayū o'ḡu'ūmiat puxim
o'jeu kabi kay, i. Ya'ōbaca topibiyū
o'tujuu jewēju taomūnmūnayū buxim,
i. Ja'ōbacaap o'ḡūm ijodiacat pe, i.

⁹⁻¹⁰ Koap ixe o'kop. Ijodi ma o'kop. Ipi tēḡat pe o'kop. O'kop'iat ma waram ḡuto o'jeu. O'jeu kabi kay soat kukan- -ipi watwat kukan, kabi beacat kukan tak. Deus iboam wuymutaybin pin osunuy "Ixe o'jeu" i'e buje. ¹¹ Ixe ma ja'ōbacaap o'ḡūm soat ijodiat pe. Pūḡpūḡ o'taē jemumujuyūm. Warara'acayū o'taē jekawēn muwēnuwēn'ukayūm. Warara'acayū o'taē itabut'ūmayū mutabun am. Warara'acayū o'taē itabucayū kukayūm. Warara'acayū o'taē itabucayū mutaybitbit'ukayūm. ¹² Deus ja'ōbacaap ūmūm soat pe jebekitkiyū be jewebeam ip kapik am. Ja'ōbacaap ūmūm cebe ip warara'acayū mutabut am Cristo kay. ¹³ Ixe a'ōbacaap kuḡ pima, wara'at kaykaykay ḡu acesop wuyetabun- -Cristo kay acā. Jewewejo'i ma acesop wuyetabut cekay. Jewewejo'i ma acesop wuyetaybit Deus ipon. Itabun'isuat ekukuap puxim ḡu ajeku- -Cristo ekukuap puxim acā. ¹⁴ Bekitkit dao ma yaḡuymuwarururun. Wara'at kaykaykay ma ip itabut. Kabidoxixi bima kobe soat taḡ jedekudekum tipodoyat taḡ puye. Bekitkit puxim ḡu juy ajop- -kobe edekudekuap puxim ḡu dak. Jawaḡuy- muwarururun ḡu juy ajop. Wuyetabun ḡu juy ajop wuymuḡuykukuku'ukayū a'ō kay. Cedaḡ ḡu wuymutaybin ojuy ip. Wuymutabun ojuy ip napaap kay. Wuymuḡuykukuku ojuy ip kawēn cūḡ'ūmat kay. ¹⁵ I-cēmān cuy ace. Wuyewekukpin cuy acewewekuk. Cristo bikuyap taḡ tak cuy ajeku soat em. Ixe wuya'a buxim. ¹⁶ Wuya'a wuyaḡuymucūḡucūḡ. Wuyewedap wuyjebit mucanucan. Wuyjebit taḡ soat xipat pima, xipat ma acesop. Xipan tak wuyju aypapan. Imēnpuxim Cristo wuykukukat. Wuyju ixe jebit taḡat

puxim. Cristo a'ôbacaap kuḡ pima, ikukpin jewewe-kuḡ pima dak, biḡ ma acesop wuyetabun Jesus kay; biḡ ma ixē ekukuap puxim tak ajeku.

¹⁷ Imēnpuye ôñ jeyawē wuykukukat a'ôbi. Deus itaybit'ūmat ekukuap puxim ḡu juy epeku ḡasū bit. Te'e ma ip jewaḡuyḡuy itabut'ūmayū. ¹⁸ Itaybit ḡu ip Deus ekawēn. Kabiok taḡtaḡ'ukayū buxim ip. Itaybit'ūm cīcā ip. Kūyjobit'ūm cīcā dak ip. Imēnpuye ibu'u ip Deus pe jaḡuymuisunan. ¹⁹ Isūsūn ḡu ip e'em. Icocok cīcā ip ikērēat mujurūḡrūḡap kay. Ibi-kuy jījā ip ikērēat mujurūḡ ām. Wuysūsūnap mujurūḡrūḡxi jījā ip.

²⁰ Eyju bit imēn ḡu jekukum, Cristo ekukuam eyetaybit puye. ²¹ Cedaḡ ma ixē juk adi oekuku iam kuy epeyekūyjo. Ixē eju mūḡ'i wuyju jekukum. Soat em Jesus icēmān e'em iam kuy eyetaybit. ²² Kuy bima eymucokcok am acā soat pupum cuk adi epekukuku eyemumukaypinput pupum. Jewemuḡuykukukum cuk adi epekukuku ikērēat mujurūḡrūḡ. Imēn jekuku'ukayū ikērē jījā Deus xe. Isuat pu buje wuyju iokokat xixxiḡ. Imēnpuxim ikērēm eyekukuap cuy epeyepere. ²³ Eyaḡuyisum cuy epeku ḡasū bit. Āḡ cuy Deus jeyaḡuymuisun. Āḡ cuy ixē jeyaḡuyda.

²⁴ — Ocaḡuymuisun cuy ece — i juy epe'e Deus pe.

Eyaḡuyisum jekukum pima Deus ekukuap puxim epeku. Kawēn icēmat taḡ epeku. Cūḡ ma dak epeku. Ikērēat tak epeḡuḡē ḡu.

²⁵ Imēnpuye napa ḡu juy epe'e'e. Soat wuyju ikitpitpiyū Cristo jebit'in wuyju buye. Imēnpuye icēm acā epe'e'e eyewewebe. ²⁶ Ikērēat epeḡujurūḡ ḡu juy eyetakomaap pibun. Kabiabun ḡu juy eyetakomaap epejukuk. Dao ma juy epedidin. ²⁷ Ibiōḡbuk kērēayū kukukat pe juy jeymuḡuykukuan ḡu ikērēat mujurūḡ ām. ²⁸ Ibukuruk tūibit ibukurūḡ ḡu juy jeenuy ḡasū bit. Jekapik cuy ḡasū bit jebubut pu am, cedaḡ ma jeku am. Ibukapiḡ cuy jeenuy ikuḡ'ūmat puywat am tak. ²⁹ Eyekawēnkērēm ḡu juy epesop-eyekawēntim acā. Eyekawēntim pima xipat je'e eyekawēn coco'ukayū be. Biḡ ma ip jeedop itabut Cristo

kay. Jemumukaypinput ip je'jat Deus xewi. ³⁰ Deus biōgbuk ikērēat kuḡ ḡu. Soat taḡ iisu. Ixe juy epeḡuḡuycūḡ ḡu. Soat eyju eyetaybit oceju Deus ebekitkiyū iam, Deus biōgbuk omuy eywebe buye. Ixe wuywebe buye, wuyetaybit ḡuyjom ikērēat kuḡ ḡu acesop iam, Deus co'iyūm acesop iam. ³¹ Eya'ōpu-rūḡ warara'acat kuḡap cuy epeyepere. Eysapka'orem ḡu dak cuy epesop. Eyetakomām ḡu dak cuy epesop. Eya'ōberen ḡu dak cuy epeyekawēnwēn warara'acat kay. Warara'acat epejomuymuy ḡu dak cuy. Ikērēm ḡu dak cuy warara'acat epejukuk. ³² Xipan cuy warara'acat epejukuk. Eya'ōdidin cuy warara'acat epejukuk. Deus ḡebum ḡu apēn cuk adi ikērēat aḡujurūḡ-rūḡ iap kay, Cristo wuywebewi ikērēat uk am oe'ū buye. Ixe buxim cuy epeyeḡebu ḡu apēn wara'acat cuk adi ikērēm eykuk iap kay.

5 Deus ebekitkiyū eyju. Eykukpin cīcā cexe. Imēnpuye ixe ekukuap co'i juy epeku. Xipan cuy epeyewekuk. ² Wūnca ūmūm'uk osodop ip kuyjeayū paī be Deus mucokcok am; Deus pe ikērēat uk'ukapteim tak. Imēnpuxim Cristo jekpiwatpin ma oe'ū ikērēat uk am wuywebewi. Deus icokcok osunuy ixe e'ūap kay. Ixe e'ūap te'okuap puxim osunuy Deus xe. Apēn ixe wuykuḡ iap puxim cuy epeyewekuk xipan.

³ Deus ebekitkiyū eyju. Imēnpuye warara'acat tayxi kaykay ḡu juy epesop-pūḡ em tak ka'ūma, warara'acat itop kaykay ḡu dak. Wuysūsūnap cuy epeḡuḡē ḡu-pūḡ em tak ka'ūma. Eyetabikukum ḡu juy epesop warara'acat pubut kay. Iboam tak cuy epeyekawēn ḡu. ⁴ Eyekawēnkērēm ḡu juy epesop. Te'em ḡu dak cuy epeyekawēnwēn. Eyekawēnwēn. Eyekawēnxim ḡu dak cuy epesop.

— Bay, soat podi ma ēn xipat — i bit cuy epe'e Deus pe soat em.

⁵ Cristo ebekitkiyūm ḡu bit je'e ip aoyū xiayū, aḡo-katkayū xiayū dak; wuysūsūnap muḡēḡē'ukayū dak;

itabikukuayū dak. Deus ka be ip jeōm ġu. Wuyetabikukuap deusbaroyū kay wuyetabucap co'i ikērē Deus xe.

⁶ Deus jetakomaap ġubapuk ja'ō kay kūyjobit'ūmayū be. Ipiat supi'ajoat cebe ip kūyjobit'ūm puye. Imēneju eyday'em'um cuy epesop te'e ma kawēnwēn'ukayū be eymuġuykukuap puxim.

— Deus ipiat supi'ajoat ġu wuywebe ikērēat muġēġēm ma'ġu wuyju — i te'e ma e'em ip.

⁷ Ixeyū kay ġu juy eybureyūm. ⁸ Ikērēat mujurūġrūġ cuk adi epekuku kuy bima kabiok taġtaġ'ukat puxim. Ġasū bit wuykukukat ebekitkiyūm epesop. Kabia daġ jekuku'ukat puxim eyju ġasū bit. Kabia daġ jekuku'ukat ekukuap taġ cuy epeku. ⁹ Kabia daġ jekuku'ukat xipacat mujurūġrūġ. Cūġ ma ip jekukum. Icēmān ip kawēnwēn. ¹⁰ Eyetaybin cuy epesop wuykukukat mucokcok am. ¹¹ Warēmtaġ jekuku'ukayū burem ġu juy epesop -kabiok taġtaġxiayū burem ġu. Ixeyū juy epeyawē cedaġ ma jeku am kabia daġ jekuku'ukat puxim. ¹² Wuybisūsūn cīcā apēn ip iba'rēm ikērēat mujurūġrūġ iap muwēn ām. ¹³ Kabia kay warēmtaksuġat tojot puje wuyetaybit ajo ijop iam. Imēnpuxim Cristo kay ixeyū dojot puje wuyetaybit ikērēat kuġ joyūku iam. ¹⁴ Cristo kay wuyetabut pima kabia daġ jekuku'ukayū puximayūm acesop. Imēnpuye kuyjeayū e'em:

Ixecat, ecewurūġ cuy, i. Ce'ū'ūayū
dopdopap pewi juy eceu, i. Cristo jey-
mukabia, i.

Cristo wuymukabiahām Cristo wuymuisusun iape.

¹⁵ Imēneju ġebum cuy epesop eyekukuap kay warēmtaġ eyekuap puxim. Eyaġuy'ūm ġu juy epesop. Eyaġuybabim ma juy epesop. ¹⁶ Kabia mupa'ūm'ūm ġu juy epesop, ġasūacat ikērēat mujurūġrūġ cīcā buye. ¹⁷ Eybidaodao ġu juy epesop. Eyetaybin pit cuy epesop apēn wuykukukat ibikuy eyekuam iam.

¹⁸ Jewemuka'o'on ġu juy epesop. Eyka'o'o bima itabidaoayū buxim eyju. Āġ cuy Deus biōġbuk pit jeyaġuydada. ¹⁹ Davi pibodo juy jebibododon epesop awerom pima. Jebibododon tak cuy epesop "Cristo soat podi ma xipat" i'e pin pima wuykukukat pe;

“Ocecokcok cîcâ oceju ebekitkit puye” i'e pin pima dak cebe; “Cristo acâ ocekukukat” i'e pin pima dak; eycokcok pima dak Cristo kay eyetabut puye; “Ën xipat cîcâ” i'e pin pima dak cebe. Jebibododon cuy epesop eycokcokap mubapuk am wuykukat pe.

²⁰ — Soat em ên xipan ocekuḡ, ocekukukat Jesus Cristo xe ocekukpin puye — i juy epe'e Deus pe- wuyebay be.

Imên cuy epe'e cebe, xipacat jebapukpuḡ eywebe bima, xipat'ûmat jebapukpuḡ pima dak. ²¹ Soat eyju ibuyxim Cristo kuḡ. Imênpuye kūyjobin cuy epesop eyewa'ô kay.

²² Tû'û'ûyû, kūyjobin cuy epesop eyitopyû a'ô kay wuykukukat a'ô kayap puxim. ²³ Apên Cristo itabucayû kukat iap puxim aḡokatkat tak jetayxi kuḡ. Cristo itabucayû daxijojo'ukat. Itabucayû ixé jebit puxim. ²⁴ Imêneju juy itabucayû kūyjobit Cristo a'ô kay. Imênpuxim aoyû dak cuy jeedop jektóp a'ô kay.

²⁵ Tapupuyû, xipan cuy eytayxiyû epejukuk apên Cristo xipan itabucayû kuḡ iap puxim. Jekpiwatpin ma oe'û cebeam ip. ²⁶ Oe'û itabucayû be Deus bikuyap taḡ jeku am. Itabucayû o'ḡuisun jekawên kay kūyjobit am. O'ḡuisun ip apên wuyju idibim jewebu- wuywuy iap puxim. ²⁷ O'ḡuisun ip “Eyju eydip cîcâ oxe” i'e am cebe ip. Cristo imên je'e cebe ip jexe yajêm puje. Soat taḡ iisu je'e ip ixé xe yajêm puje. Ikêrêat kuḡ ḡu ip je'e. Iokokat kuḡ ḡu dak je'e ip- idipat kuḡ acâ. Soat taḡ xipat je'e ip. Xipat'ûmat kuḡ ḡu dak je'e ip- pūḡ tak ka'ûma. ²⁸ Aḡokatkat cuy xipan jetayxi jukuk xipan jewekukap puxim. Xipan jetayxi kuḡat xipan tak jewekuḡ. ²⁹ Ka'ûma ma xipan'ûm jejebit kuḡ. Jewemuykônkon wuyju. Xipan wuyju wuyjebit kuḡ. Imênpuxim Cristo xipan itabucayû kuḡ. ³⁰ Wuyju Cristo jebit puxim. Apên xipan wuyjebit kuḡ iap puxim xipan cuy acewewekuk. ³¹ Imên e'em Deus ekawêntup:

Imêneju aḡokatkat jebay iwaciwan,
jexi iwaciwan tak jetayxi xe jeenuy
am, i. Pūḡ taḡ ma ip o'e xepxepayû,
i.

³² Iboaptup ekawēn icēmān wuymutaybitbin. Wuymutaybitbin apēn Cristo xipan itabucayū kuḡ iam. Iboap iba'arēm osodop wuyxe kuyje. Gasū bit iba-puk o'e wuywebe. Imēnpuye juy iboap ekawēn taḡ cuy aceku. ³³ Iboaptup ekawēn wuymutaybitbin apēn cuy ajeku iam tak. Aḡokatkat cuy xipan jetayxi jukuk xipan jewekukap puxim. Ayacat tak cuy ibuy-xim jektop jukuk.

6 Bekitkit, kūyjobin cuy epesop eyebay a'ō kay, eyxi a'ō kay dak. Cedaḡ ma eywebe ixeyū a'ō kay am, wuykukukat Jesus ikukpin eyxe buye. ² “Ibuyxim cuy eyebay epejukuk, eyxi dak” i'e buje, “Xipan ōn tak jeykuk apēn cuk adi oceceiap taḡ” i dak o'e Deus. Wara'an yawēwēm pima:

— Xipan ōn tak jeykuk — i'ūmḡu o'e. ³ — Ibuyxim cuy eyebay epejukuk, eyxi dak xipan eydop am,ibun eydop am ipi ju — io'e Deus wuyawēwēm.

⁴ Cebayū, eya'ōpuruḡ ḡu juy eyekpotpoyū epejukuk ixeyū mubu'unap puxim eya'ō kay. Ixeyū bit cuy epeḡutaybitbin wuykukukat Jesus bikuyap taḡ ceku am iam. Warēmtaḡ ip ceku buje juy epeḡukorēm.

⁵ Tei'ūm kapikpik'ukayū, kūyjobin cuy epesop eyekariwa a'ō kay-ijodiat a'ō kay. Eypararam cuy epesop “Ap” i'e am cebe ip. Eyekariwa a'ōmupubutbun ḡu juy epesop. Jewexe ḡu juy kūyjobin epesop ya'ō kay ip-icēmān. Ixeyū a'ō kay kūyjobin pima, Cristo a'ō kay dak eyju kūyjobit. ⁶ Eyekariwa eyjojom pima acā ḡu juy xipan epeyekapik-eyjojom'ūm pima dak. Eyekariwa be “Ēn xipat” i'eap kudadam ḡu juy xipan epeyekapik. Eycokcokap kuḡ cuy epeyekapik cebeam ip. Deus bikuyap taḡ cuy epeku wuykukukat Jesus peam kapikpik'ukat puxim. ⁷ Eycokcoḡ cuy epeyekapik.

— Ijodiat peam acā ḡu ōn kapikpiḡ-okukukat

peam tak- -kabi beat peam tak — i juy epe'e'e eywebe ma.

⁸ Wuykukukat xipacat je'gūm soat pe xipan kapikpik'ukayū be xipan kapikpikapteim- -kariwayū be, tei'ūm kapikpik'ukayū be dak. Warēmtaḡ kapikpik'ukayū bit warēmtaḡ ma je'jat. Gebum cuy epe-sop iboap kay.

⁹ Kariwayayū, xipan cuy eywebeam kapikpik'ukayū epejukuk. Imuparararan ḡu juy ip epejukuk. Eyju, eywebeam kapikpik'ukayū dak wuykukukat ebekitkiyū- -kabi beat ebekitkiyū. Wuykukukat pūḡ pe ma soat kuḡ xipan. Eyaḡuyba'ūm ḡu juy iboap kay.

¹⁰ Wuykukukat soat podi ma ya'ōbaca. Ka'ūma ma ixē jo'iat ya'ōbacaat. Ixē a'ōbacaap cuy epejat. Ikuḡ pima ceweju mūḡ'i epeku. ¹¹ Sorarayū kukat icaat ūmūm jebekitkiyū be yaokaap puxim. Cesay icaat ūmūm cebe ip. Payao buximat ūmūm tak. Imēnpuxim Deus ja'ōbacaap ūmūm wuywebe xipan wuyeku am. Imēnpuye: — A'ōbacaap cuy eḡūm owebe — i juy epe'e Deus pe.

Ixē a'ōbacaap kuḡ cuy epeku ibiōḡbuk kērēayū kukukat a'ō kayap puxim. ¹² Sorarayū ma jēnopaḡōḡōm ijodiat eju ya'ōbacaap mu'ūm ojuy. Wuyju bit Deus kay'ūmayū a'ōbacaap mu'ūm ojuy jekukum. Kabiokboḡ taḡ jekuku'ukayū a'ōbacaap mu'ūmap ojuy wuyju jekukum. Ipi daḡ ḡu ip jekukum- -kabi be ma. Ade jījā ip. Itakoma jījā ip wuykay. Wuymuy'ū pin ip. Ixeyū a'ōbacaap mu'ūmap ojuy wuyju jekukum. ¹³ Imēneju, Deus a'ōbacaap cuy epejat sorarayū be icaat puap puxim. Deus a'ōbacaap kuḡ pima, ikērēat muḡēḡē'ukayū je'e ḡu wuywebe. Wuykay itakomaayū dak kuka wuyaoka ḡu. Wuypararam ḡu dak kuka ace cebuxim ip. Wuyetabucap kuka acepere ḡu dak.

¹⁴ Sorara buxim cuy epeku soat icaat kukat puxim. Icaat muōm pin pima, sorara jesay mukirikiriḡ jekpumūnpum. Imukirik'ūm pima, iba'ore kuka o'e icaat muōm ām. Icēmān cuy epeyekawēn. Icēmān kawēnwēn pima, jekpumūnpu kukat puxim kuka ajop.

Icēmān cuy acekawēn warara'acat pe wuymuymuyap puxim. Cedaḡ ma juy epeku. Cedaḡ ma jekukum pima, jekūm'a eju icaat kukat puxim kuka ajop. Cedaḡ ma juy ajeku warara'acat pe wuykukukat Jesus muymuyap puxim. ¹⁵ Eycokcoḡ cuy epesop kawēn idipat muwēn ām warara'acat pe. Imuwēn pu'u'ūm pima, jei be icaat kukat puxim kuka ajop. ¹⁶ Eyetabun cuy epesop Jesus kay. Cekay wuyetabut pima, jewap icaat kukat puxim kuka ajop. Sorarayū isopat kuḡ osodop jedop'abi be wara'at kadiacat wūywūy ām. Imēnpuxim ikērēat mujurūḡrūḡ'ukayū kukukat wuykaykay jījā wuymubu'unap ojuy Jesus kay. Jesus kay wuyetabut pima bit, wuymubu'un pa'ore kuka o'e cebe. ¹⁷ Guyjom Jesus o'iaiyūm acesop Deus wuydaxijojom puye. Iboap cuy epejowiwi jījā. Iboap wiwim pima, jabe icaat kukat puxim kuka ajop. Sorara jepayao kuḡ osunuy jaokaap puxim. Deus ekawēn payao buxim. Deus biōḡbuk jekawēn ūmūm wuywebe ikērēat kukap puxim. Cekawēn kay ḡebum pima, payao kukat puxim kuka ajop. ¹⁸ Kawēnwēn'uḡ cuy epesop Deus eju. Wuybuywatwacap cuy epejoojuy cexewi. Soat em cuy epeyekawēnwēn ceweju. Kawēnwēn pima, āḡ cuy Deus biōḡbuk jeyaḡuydada. Ceweju kawēnwēn pima, xexen ḡu juy epesop, eyetabēḡ ma. Eybu'um ḡu juy epesop kawēn ām ceweju. Soat em cuy epeyekawēnwēn Deus eju. Soat peam cuy epeyekawēn cebekitkiyū beam. ¹⁹ Owebeam tak cuy epeyekawēn ceweju.

— Bay, Paulo juy eḡtaybin kawēn muwēn ām — i juy epe'e'e Deus pe. — Ixe juy eya'ōmucanucan iparara'ūma kawēn idipat muwēn ām — i dak cuy epe'e'e cebe.

Iboap ekawēn iba'arēm osodop kuy bima. Gasū bit ibapuk o'e. ²⁰ Wuykukukat Jesus a'ōbuywatwat'ukat ōn. Gasū bit ōn daomūnmūnap'a be, kawēn idipat muwēnuwēn ojekuku buye. Imēnpuye owebeam cuy epeyekawēnwēn Deus eju.

— Bay, a'ōbacaap cuy eḡm Paulo be ya'ōcam ekawēn muwēn ām — i juy epe'e cebe.

²¹ Wuykitpit Tíquico wawēg ġuwēn eywebe. Eye-taybin cuy epesop apēn òn e'em iam. Ixe Tíquico ikukpin cīcā wuyxe. Soat em kapikpiġ wuykukukat peam. Wara'at kaykaykay ġu itabut- -wuykukukat kay acā. ²² Imēnpuye ixe oġuju eykay. Ixe apēn oceju iap ġuwēn eywebe. Ocawēg tobuxik puje eycokcok epesop.

²³ Deus eju òn kawēnwēn eywebeam- -wuyebayat eju.

— Ēfeso ka watwat aġuymubabibin cuy eġuy — i òn e'em cebe. — Esubuywan cuy ip xipan jewekuk am — i òn e'em cebe. — Esubuywan cuy ip biġ ma itabut am Jesus kay — i òn e'em cebe.

Imēn òn e'em Deus pe, wuykukukat Jesus Cristo be dak.

²⁴ — Bay, xipan cuy soat epejukuk wuykukukat kayayū, Jesus Cristo kayayū- -soat em Jesus kay ġe-bumayū — i òn e'em Deus pe.

Ibūrū ma.

FILIPOS KA WATWAT PEAPTUP PAULO EMUDUPMUBARARAKTUP

1 Filipos ka watwat, cartadup mubarararaġ òn eywebeaptum- -Jesus kayayū beaptum. Òn Paulo. Tupmubarararaġ òn Timóteo eju. Jesus peam kapikpik'ukayū oceju. Eyju Deus ebekitkiyū, Jesus Cristo eju mūġ'i eyju jekukum puye. Cartadup mubarararaġ òn eywebeaptum, eykukuk'ukayū beaptum tak, eybuywatwat'ukayū beaptum tak.

² — Bay, xipan cuy Filipos ka watwat ejukuk — i òn e'em Deus pe- -wuyebay be, Jesus Cristo be dak- -wuykukukat pe. — Ixeyū aġuymubabibin cuy eġuy — i òn e'em cebe ip.

³ Òn ġebum eykay bima soat em:

— Bay, èn xipat cîcâ, soat em èn xipan Filipos ka watwat kuġ puye — i òn e'em Deus pe.

⁴⁻⁵ Òn kawênwên Deus eju eywebeam- -soat peam. Òn eyka be bima juk adi obuywatwan cîcâ epesop owebe kawên idipat muwên âm. Imênpuye ocokcok cîcâ kawên âm Deus eju eywebeam. Koap pima juk adi obuywatwan epesop- -òn kawên idipan eymukûy-jojom pima. Soat em cuk adi obuywatwan epesop owebe kawên idipat muwên âm. ⁶ Jesus kay eyetabut pima Deus adi eydaxijojom o'e. Ġasū dak soat kabia ma eydaxijojom. Waram Jesus Cristo ajêmap kabia be bit eydaxijoap jepere. Wetaybit cîcâ iboam. ⁷ Apên ixé xipan okuġ iap co'i ma eyju dak Deus xipan eykuġ. Eyju juk adi obuywatwan epesop “Kawên idipat icêmân” i òn e'em pima itabut pin'ūmayū be, “Kawên idipat kay eyetabun cuy epesop” i òn e'em pima dak itaybit'ūmayū be. Ġasū dak eyju obuywatwat daomûnmûnap'a be ma'ġu òn. Imêneju soat em òn ġebum eykay. Eykukpin cîcâ dak oxe. ⁸ Apên Jesus Cristo xe eykukpin iap co'i oxe dak eykukpin cîcâ. Eykukpin cîcâ oxe Jesus Cristo juk omutaybitbitbin owebe eykukpin am puye. Deus itaybit icêmân òn e'em iam.

⁹ Òn kawênwên Deus eju eywebeam biġ ma xipan

eyewekuk am, biğ ma eyetaybit am tak apên Deus e'em wuywebe iam, biğ ma eyetaybit am tak apên xipat Deus xe iam, apên xipat ġu cexe iam tak. ¹⁰ Deus pe imên eymukûyjo buje, soat podi ma xipacap ibapuk je'e eyxe. Iboap acâ epejukuk. Imênpuye waram Cristo ajêm puje ikêrêat kuğ ġu epesop. Soat tağ eyisu epesop. Eysûsûn ġu epe'e Deus kay eyebapuk am. ¹¹ Idipat acâ epejukuk eyweju, Jesus Cristo ja'ôbacaap ûmûm eywebe buye. Ixe a'ôbi acâ eyju xipacat mujurûgrûğ. Imên eyeku buje:

— Ên xipat cîcâ ocexe, ebekitkit cûğ ma jekukum puye — i je'e ip Deus pe eyjojo'ukayû.

— Ka'ûma ma ejo'iat xipacat — i je'e ip cebe.

¹² Okitpitpiyû, warêmtağ ma juk adi ip okuk itabut'ûmayû. Inaka oparara ġu ma juk adi oce kawên idipat muwên âm. Biğ ma ôn imuwênuwên soat pe. Imênpuye warara'acayû itabucayû dak biğ ma imuwênuwên o'e. Imênpuye adeayû dak oitaybitbitbin kawên idipan. Gasû ôn iboam jeymukûyjo. ¹³ Te'e ma juk ip omuôm daomûnmûnap'a be Cristo eju kapikip'ukat ôn puye. Soat ma juk a'ġu ip itaybit osodop iboam iecuğap tuk'a wiwi'ukayû. Warara'acayû dak cuk a'ġu itaybit osodop iboam ijopka beayû. ¹⁴ Obisûsûn ġu kawên idipat muwênuwên daomûnmûnap'a be ma'ġu ôn. Imênpuye ade wuykitpitpiyû biğ ma itabut o'e wuykukukat kay. Iparara ġu o'e ip kawên idipat muwên âm. Ibisûsûn ġu o'e ip Jesus ekawên muwên âm. Biğ ma ip imuwênuwên o'e. ¹⁵ · ¹⁶ Pûğpûğ ixeyû'in Cristo muwênuwên itabutkarey ip okay buye; wa'ôxik ojuy ip puye dak. Cristo muwênuwên ip xipacap kayap tomuju ġu. Warara'acat kay ġu ip ġebum. Jewekay acâ ip ġebum. Imuwênuwên ip wa'ôbacaap podi ma e ojuy.

— Cristo muwênuwên pima, kuka Paulo bodi ma oca'ôbacaap kuğ oce'e — i te'e ma e'em ip. Tûybe Paulo iğuycûğ je'e daomûnmûnap'a be ocawêğ cocom pima iân o'e ip. Imênpit omuğuycûğ pa'ore cebe ip imên e'em pima.

Warara'acayû bit Cristo muwênuwên xipacap to-

muju. Ixeyū xe okukpin. Itaybit ip Deus a'ōbi ōn kawēn idipat muwēnuwēn iam. Ōn pit ocokcok soat ip Cristo muwēnuwēn puye- -xipat'ūmap kayap tomuju ma, xipacap kayap tomuju dak. Biḡ ma je'e ocokcokap tak. ¹⁹ Jesus Cristo biōḡbuk nuynuy owebe obuywatwan. Eyju dak kawēnwēn Deus eju owebeam. Imēneju wetaybit daomūnmūnap'a bewi omujēm ip iam. Imēnpuye ocokcokap i'ūm ḡu. Bodinmaku ocokcokap jeku yoboḡ ma. ²⁰ Obikuy jījā Cristo bikuyap taḡ weku am. Weku pin ixē bikuyap taḡ acā soat em. Gasū bit a'ḡu oce wa'ōca pin ixē ekawēn taḡ weku am soat em. Soat taḡ i'e pin ōn ibuyxim Cristo kuk am wetabēḡ pima, we'ū buje dak. ²¹ Ajo xipat ijodi bima oxe? Cristo acā xipat oxe. We'ū buje dak soat podi ma xipacap ojukuk ixē xe acā soat em ma oḡuy buye. ²² Wetabēḡ pima bit kuka wekapik put oce Cristo beam. Wetait pima kuka o'e itabut warara'acayū Cristo kay wekawēn co buje. Apēḡap xe'e xipat oxe? Wetabēḡap? Pām ḡuto we'ūap ḡu xe'e? Wetaybit ḡu oweweju bit. ²³ Wetaybit ḡu buk apēḡap ḡu paxi xipat iam. We'ū buje dak xipat ma owebe soat em Cristo xe oḡuy buye. Ixē xe bima soat podi ma idipat kuḡ oḡuy. ²⁴ Wetait pima bit xipat kuka o'e eywebeam. Wetait pima eybuywan mabuk kuka ōn. ²⁵ Wetaybit eyxe oḡuy eybuywat am biḡ ma eyetabut am Jesus kay iam. Ōn eyxe bima, biḡ ma eycokcok epe'e kūyjobit am ixē a'ō kay. ²⁶ Waram eykay oajēm puje, eycokcok epe'e okay xipat cīcā ōn eywebeam puye. Eycokcok cīcā epe'e okay, Jesus Cristo eju mūḡ'i eyju jekukum puye. ²⁷ Cristo ekawēn taḡ cuy epeku- -kawēn idipat taḡ. Ixē ekawēn taḡ eyeku buje, wetaybit oce eyetabut cīcā pūḡat kay- -Jesus kay iam. Wetaybit oce iboam waram eyjom oajēm puje, oajēm'ūm pima dak. Wetaybit oce soat eyju pūḡ taḡ ma soat kay jewaḡuyap muwebotbon iam, soat eyju jwebuywatwan kawēn idipat muwēn pin cīcā buye itaybit'ūmayū be iam tak. Kawēn idipat co buje acā kuka wuyetabut ajop Jesus kay. ²⁸ Eyparam ḡu juy epesop eykay itakomaayū buxim. Deus ixeyū bodi ma ya'ōbaca. Imēnpuye eya'ōcam cuy

epesop soat em. Eyparara'ūm pima bit itaybit je'e ip itabut'ūmayū Deus ocemuju ipiat'ajojoap kay iam. Ya'ōkayayū bit taxijo iam tak itaybit je'e ip. Deus acā eydaxijojom soat em tūy ām cexe. ²⁹ Deus cuk eynaē Cristo be kapikpik'ukayūm. Ixe beam kapikpiḡ eyju ixe kay eyetabut puye. Inaka ixe beam kapikpiḡ pima dak ipiat cuy epesupi'ajo ma Deus a'ōbi. ³⁰ Kuy bima itabut'ūmayū juk adi ipiat o'supi'ajojoat owebe, ōn Cristo muwēnuwēn puye. Kuy eyetaybit iboam. Gasū dak ipiatpi'ajojoan ip owebe. Apēn owebe juk adi ipiat o'supi'ajoat ip iap puxim eywebe dak ipiat supi'ajoat ip eyju Cristo muwēnuwēn pima.

2 Eyju eya'ōca Cristo eju mūḡ'i eyju jekukum puye. Eycokcok eyju e'em ixe xe eykukpin puye. Deus biōḡbuk nuynuy soat pe eywebe eymukūyjojom. Xipan ma eyju e'em eyewewekuḡ. Eyeta-
botaidabotbot eyewewekay. ² Imēneju jewaḡuyccocom cuy epesop eyewewēju. Ikkupin tak cuy epeyewekuk. Pūḡ kay dak cuy epesop ḡebum. Imēn ma juy ōn eyawēwēm. Imēn eyeku buje ocokcok cīcā oce eykay. ³ Jewewekay at ḡu juy epesop ḡebum--warara'acat kay dak. Warara'acayū be "Xipat cīcā eyju" i'e'eap epejokudada ḡu dak cuy. Yoboḡan pin ḡu dak cuy epesop.

— Warara'acat obodi ma xipat — i dak cuy epe'e'e eywebe ma.

⁴ Ajo kuka o'e xipat ocewebeam iap kay at ḡu juy epesop ḡebum. Ajo kuka o'e xipat warara'acat peam iap kay dak cuy epesop ḡebum.

⁵ Jesus Cristo ekukuap puxim cuy epekuku.

⁶ Ixe Jesus Cristo soat em Deus co'ian osunuynuy. Inaka "Soat em cuy ejo'ian oḡuy. Ipi juan ḡu juy oce," i'ūmḡu o'e jebay be.

⁷ Jekpiwatpin ma bit ixe soat o'sui-wat ikuḡ osunuyiat ipi juan am. Warara'acat puywatwat'ukan o'jewexat.

Aḡokatkat puximan o'jewexat. Ipi juan o'jewexat.

⁸ Ya'ōca pin ḡu oekukuku. Soat em Deus a'ō kay kūyjobit osunuy nuynuy. Kūyjobit osunuy je'ū ām tak. Korosa be ma oe'ū ikērēat muḡēḡē'ukat puxim.

⁹ Imēneju Deus ixē o'ḡuyu jewekay. O'ḡuyu jaḡuywaḡōm soat kukuk'ukan. Ixē o'jomuy warara'acat podi ma ya'ōbacaan.

¹⁰ Imēnpuye soat ma jēḡ'aecōḡcōḡ ip Jesus wap- -kabi beacayū, ipi juacayū dak, ce'ū'ū'ibiyū dak. Jēḡ'aecōḡcōḡ ip kūyjobit am ya'ō kay.

¹¹ "Jesus Cristo acā ocekukukat" i je'e ip soat pe. Imēnpuye Deus soat podi ma ya'ōbaca iap ibapuk cīcā je'e soat xe- -wuyebayat soat podi ma ya'ōbaca iap.

¹² - ¹³ Oburereyū, eykukpin cīcā oxe. Ōn eyxe bima soat em cuk adi kūyjobit epesop wa'ō kay. Wūy ōn pima dak cuy wa'ō kay epesop kūyjobin. Deus soat em ja'ōbacaap ūmūm wuywebe wuymubikuy am ixē bikuyap taḡ wuyeku am. Ja'ōbacaap ūmūm wuywebe ixē aḡuy daḡ wuyaguy am. Imēnpuye ya'ōbacaap cuy epejoojuy cexewi ixē be eydaxijoap epere am. Kūyjobin cuy epesop ya'ō kay. Eypararam cuy epesop "Ap" i'e am cebe.

¹⁴ Māmāmām ḡu juy epesop Deus kay. Jawa'ō-xixxiḡ ḡu dak cuy epesop. ¹⁵ Ikērēat muḡēḡē'ukayū parakpe eyju nuynuy- -warēmtaḡ ma jekuku'ukayū parakpe- -Deus a'ōmupubutbun'ukayū parakpe. Eyju bit Deus ebekitkit. Ikērēat kuḡ ḡu eyju. Imēnpuye Deus ebekitkit ekukuap puxim cuy epekuku. Soat etabutpe cedaḡ cuy epekuku ixeyū be eymuymuyap puxim. Kasopta tabapuk cīcā kabiok pima. Imēnpuxim eyju dak Jesus Cristo bikuyap taḡ jekukum pima, cūḡ ma eyju jekukumap ibapuk cīcā je'e itabut'ūmayū xe. ¹⁶ Wuymutaicinap ekawēn cuy epeḡu-

wēnuwēn ixeyū be. Cedaḡ eyju jekukum pima, ocokcok cīcā oce eykay waram Cristo ajēmap kabia be. Wetaybit tak oce te'e ḡu juk adi ōn oḡuy eymutaybitbitbin iam.

¹⁷ Gaxīn ma aco'i itabut'ūmayū oaoka. Odoymukereren ip. Deus pit icokcok je'e we'ūap kay apēn kuyjeayū wūnca o'ḡūmḡūm cebe iap kay icokcok osunuy iap puxim. We'ū buje ōn tak ocokcok oce.

— Ōn tak ocokcok oce — i ōn waram e'em eywebe.

¹⁸ We'ū buje eyju dak eycokcoḡ cuy epesop we'ū ma'ḡu. Eyaḡuy'ūm ḡu juy epesop we'ūap kay. Eycokcoḡ tak cuy epe'e we'ū buje.

¹⁹ Wuykukukat Jesus ibikuy bima, Timóteo oḡuju eykay. Ixe muju ojuy ōn ixe be eyawēḡ tojot am okay. Eyawēḡ tobuxik puje, ocokcok oce. ²⁰ Ixe Timóteo acā obuxim soat em ma ḡebum eykay. Eykukpin cīcā ocexe. ²¹ Soat warara'acayū bit ḡebum Jesus Cristo kay ḡu- -jewekay acā. Ibu'u ip jekapik am Jesus Cristo beam. Jewebeam acā ip kapikpiḡ. ²² Ixe Timóteo bit soat em ja'ō daḡ e'em. Xipat cīcā ixe. Jebay eju kapikpik'ukat puxim oweju ixe juk adi o'-jekapikpikpik kawēn idipat muwēnuwēn. Eyju dak kuy eyetaybit iboam. ²³ Gaxīn ma ōn ixe muju ojuy eykay. Wetaybit apēn je'e ip owebe iam pima, ixe oḡuju eyka. ²⁴ Wetabut wuykukukat kay. Gaxīn ma aco'i ixe omuju eykay.

²⁵ Wuykitpit Epafrodito muypit ojuy dak ōn eykay. Ixe juk epeḡudot kuy okay obuywatwat'ukan. Oweju juk adi o'jekapikpikpik kawēn idipat muwēnuwēn. Oburem cuk adi osunuy. ²⁶ Ixe eyjo pin cīcā. Yaḡuybabi'ūm o'e iwātaxipi opop iap awēḡ epejojojo buye. ²⁷ Iwātaxipi jījā osunuy. Oe'ū pin. Deus pit itabotaidabotbot osunuy cekay. Okay dak itabotaidabotbot ma osunuy. Ce'ū buje bit kuka adi oḡuycūḡ cīcā oce. ²⁸ Imēnpuye ixe muypit pin cīcā ōn eykay waram eywebe ijo am eycokcok ey'e am. Oḡuycūḡap tak kuka o'jepa'ūm ma. ²⁹ Eycokcoḡ cuy ixe epeḡuōm eyduk'a be wuykitpit muōmap puxim, pūḡ ma wuykukukat puye. Ibuyxim cuy epejukuk. ³⁰ Ixe Epafrodito

iparara ġu osunuy je'ū ām. Eywebe obuywat pa'ore bima ixe juk adi obuywatwan osunuy. Ce'ū ġūġūn cīcā osodop Cristo beam kapikpiġ oweju buye.

3 Obureyū, būrūdupaku o'e tupmubararak am eywebeaptum. Wuykukukat cuy jeymucocog. Obu'u ġu waram apēn kuy bima otupmubararakiatup peap ekawēn muwēn ām eywebe eyaġuyba'ūmap puxim. Owebe eyawēap taġ eyeku buje, soat em ma xipat je'e eywebeam. ²Eyday'em'um cuy epesop ikērēat mujurūrūġ'ukayū be eymuġuyku kuap puxim-akurice buximayū be- "Epedaypu'aġobixeedakacat cuy" i'e'e'ukayū be.

³ — Ocejū acā Deus ebekitkit ocedaypu'aġobixeedakatkak puye — i napa ma e'em ixeyū ma. Wuyju bit icēmān Deus ebekitkit. Soat em wuyju ġebum cekay ixe biōġbuk pe wuymutaybitbinap taġ. Wuyju ma wuycocok cīcā Jesus Cristo aġuy daġ wuyju jewaġuyġuy buye. Kacūġkadiwi jewewuywuy bima bit wuy mucūġ pa'ore Deus xe. Wuyetaybit cīcā iboam. ⁴Te'e ma wuyetabut put kacūġkadiwi jewewuywuy bima, cūġ ma acesop Deus xe iap kay. Adeayū ma te'e ma e'em:

— Wuymucūġ put Deus xe kacūġkadiwi jewewuywuy bima — i.

Ōn tak i'e but imēn owebe, bekin pin ma kacūġkadiwi oisu buye. ⁵Oito kabia bima wuybabim ma odaypu'aġobixeedakacat ip "Deus ebekit teku" iap mubapuk am soat pe. Judeu dak ōn, Israel naxeġebit puye. Benjamim diwat tak ōn. Hebreu a'ōm kawēnwēn'uk tak oġuy bekin pima. Judeuyū awēwēap ekawēn taġ cīcā dak cuk adi ojekukuku Fariseu adi ōn ġebuje. ⁶Judeuyū awēwēap ekawēn taġ cīcā juk adi ojekukuku-soat ekawēn taġ ma. Iboap ekawēn oġupubutbun ġu- -pūġ em tak ka'ūma. Tūybe cūġ ma ōn Deus xe Judeuyū awēwēap taġ jekukum puye iān cuk adi oce. Jesus kay itabucayū be juk adi ipiat osupi'ajojoat, Judeuyū awēwēap ekawēn taġ ġu ip jeku-

kum puye. Tūybe xipat ġu ip iān cuk adi oce. ⁷ Ġasū bit Cristo ikukpin cīcā oxe o'e. Imēnpuye ajo kuy bima juk adi xipat oxe iap xipat ġu oxe o'e ġasū bit. ⁸ Ġasū bit wara'at ma otobuxik. Oceweūm Jesus Cristo be. Okukukan o'e. Ixe a'ō daġ weku pin cīcā oce. Soat podi ma xipacap kuġ ōn ixe obure buye. Wara'at pit kaokokap co'i o'e oxe. Soat ma ocepere ixe a'ō daġ weku am. Ka'ūma kuġ tak weku but ma. ⁹ Cristo eju ōn mūġ'i. Kuy bima tūybe ōn cūġ ma Deus xe wuyawēwēap ekawēn taġ jekukum puye iān cuk adi oce. Ġasū bit wetaybit oce cūġ ma ōn cexe Cristo kay wetabut puye iam.

— Ēn cūġ ma oxe okpot kay etabut puye — i'e'em Deus owebe.

¹⁰ Obikuy jījā soat em weku am Cristo a'ō daġ acā. Ixe ya'ōbaca jījā, waram ġuto o'jetait je'ūap tomukadi buye. Obikuy jījā iġo a'ōbacaap kuk am. Obu'ū ġu ōn tak ipiat'ajo am apēn ixe juk adi o'supi'ajojo iap puxim. Ixe oe'ū jebay a'ō kay kūyjobit puye. Ōn tak cebuxim ya'ō kay we'ū ma'ġu. ¹¹ Ōn tak Deus waram omu'ada we'ūap tomukadi. Soat em ma wetabēġ oġuy ixe xe. Iboap wiwim cīcā ōn.

¹² — Soat em ma ōn pit ixe a'ō kay kūyjobit — i'ūmġu ōn pit e'em warara'acat pe. — Ikērēat kuġ ġu ōn pit- -pūġ em tak ka'ūma — i'ūmġu dak ōn pit e'em.

Imēnpit Cristo kuy juk omuwedayo jewekay. Imēnpuye kūyjobit pin cīcā ōn soat em ya'ō kay. ¹³ Obureyū, "Soat em ma ōn pit ixe a'ō daġ jekukum, ixe ebekit puye" i'ūmġu ōn pit e'em eywebe. Ġebum ġu ōn pit e'em kuyap kay ikērēat kukukap kay. Waġuyba'ūm ōn pit iboap kay. Ġebuje bit idipat ojukuk. Idipat kukap kay acā ōn ġebum. Imēnpuye soan ma ōn e'em soat em weku am ixe bikuyap taġ. ¹⁴ Jedaudau'ukat cūġ ma jedaudaum tupteiboġatup pu am- -jadaġaptup pu am. Ixe buxim ōn tak soan ma e'em Deus emumuūm pu am. Deus kuy juk onaē soat em jexe onuy am, Jesus Cristo kay wetabut puye.

— Soat em cuy eġuy oxe kabi be — i mo adi a'ġu o'e owebe.

¹⁵ Kuy wuyetaybit Cristo bikuyap taḡ wuyeku am. Imēnpuye juy soat em ixē bikuyap taḡ ajeku! Pūḡpūḡ ey'in ibu'u bima bit, Deus cuy ixē ḡutaybin xipāt cīcā ewebe wa'ō daḡ eku am iam. ¹⁶ Ixē a'ō daḡ cuy ajeku! Apēn kuy bima ya'ō daḡ ajekukuku iap co'i ma juy ajeku ḡasū dak. ¹⁷ Obureyū, kuy bima cūḡ ma juk adi ojekukuku eyetabutpe. ḡasū bit eyju dak wekukuap puxim cuy epeku. Aḡ cuy epesop obuxim jekuku'ukayū kay ixeyū ekukuap puxim eyeku am. ¹⁸ Cristo korosa be oe'ū iap kay'ūm cīcā adeayū. Kuy soat em iboap o'guwēnuwēn eywebe. ḡasū dak iboap muwēn ōn eywebe wetadidim. ¹⁹ Wuyju ma soat em ḡebum Deus kay. Ixeyū bit soat em ḡebum apēn ace'e iap kay acā. Soat em ip ḡebum jecokcokap kay acā. Isūsūn kuka a'ḡu o'e ip warēmtaḡ jekukuap kay. Inaka isūsūn ḡu ip. Xipāt-ūmat muḡḡēm ip warara'acayū etabun ma. Jeweweju bit ip xipāt. ḡebum ḡu ip kabi kay. Soat em ḡebum ip ijodiap kay acā. Imēneju wūy ma jeedop ip Deus wi je'ū buje. Soat em ipiat supi'ajojo ixeyū ma. ²⁰ Wuyju bit kabi watwan acesop. Wuydaxijojo'ukat kabi kadiwi jeekop- wuykukukat Jesus Cristo. Waram jajēm ijodi. Ixē ajēmap wiwim cīcā wuyju. ²¹ Ixē Jesus Cristo warara'acat a'ōbacaap ḡu'ūm ixē soat podi ma ya'ōbaca buye. Soat ip jeedop kūyjobin ixē a'ō kay. Ixē ja'ōbacaan wuyjebit ḡuwexat. Ijodi bima wuybaca ḡu wuyju e'em. Ixē bit wuyjebit ḡuwexat jejebit co'ian idipan. Imēneju waram ace'ū ḡu ḡebuḡe bit.

4 Okitpitpiyū, eykukpin cīcā oxe. Oḡuykit eykay. Omucokcoḡ cīcā eyju. Xipāt eyju oxe. Imēneju eybu'um ḡu juy epesop wuykukukat bikuyap taḡ eyeku am, okitpitpiyū.

² Evódia, jemukūyjo ōn ḡasū. Síntique, ēn tak jemukūyjo ōn. Tū'ū'ūyū, eyju ikibiyū, xepxem ma wuykukukat kay eyetabut puye. Imēnpuye eyetakomām ḡu juy epesop eyewewekay. Eyetakomaap cuy

epeyepere. ³ Ēn pit, obure, ixeyū aoyū juy eġudin-xepxepayū. Xipan cīcā kapikpik'uk eġuy oweju, obure. Ixeyū aoyū dak cuk adi obuywatwan oekuku ip ōn soat kaka daġ kawēn idipat muwēnuwēn pima. Clemente dak cuk adi o'jekapikpik oweju. Warara'acayū dak cuk adi o'jekapikpik oweju. Iboyū butet ibararak opop Deus pubutup pe-obuywatwat'ukayū butet. Ibararak opop abuyū soat em itait jeedop ip Deus xe iaptup pe.

⁴ Wuykukukat kuy wuymuwedayo jewekay. Imēnpuye eycokcoġ cuy epesop.

— Soat em cuy eycokcoġ epesop — i waram ōn e'em eywebe.

⁵ Ġaxīn ma xeku omuyku wuykukukat! Imēnpuye soat cuy xipan epejukuk ijodiayū. ⁶ Ka'ūma kay ma juy epeyaġuyġebu. Soat pit cuy epeġuwēnuwēn Deus pe. Ajo ka'ūmġu eyxe iat cuy epejoojuyjuy cexewi. Iojuy buje, ajo Deus kuy juk o'ġūmġūm eywebe iap kay juy ġebum epesop. ⁷ Wuyetaybit ġu apēn Deus wuyaġuymubabibin iam. Inaka ixē itaybit cīcā wuyaġuymubabin am. Jesus Cristo eju mūġ'i bima, ixē wuyaġuymubabibin jeenuy. Imēnpuye warara'acat a'ō kay ġu ace'e-ixē a'ō kay acā. Warara'acat kay ġu dak acesop ġebum-ixē kay acā.

⁸ Oburereyū, ġasū mabuk ōn jeyawē. Soat em ma juy epesop ġebum ajo xipat iap kay, ajo ibuyxi iap kay dak, ajo icēmat iap kay dak, ajo warēmtaġ ġu iap kay dak, ajo cedaġ iap kay dak, ajo iisu iap kay dak, ajo Deus xe ikukpin iap kay dak, ajo inapa ġu iap kay dak. Iboap kay juy epesop ġebum soat em.

⁹ Apēn cuk adi ōn eymutaybitbitbin iap taġ cuy epekuku, apēn cuk adi ōn eymukūyjojojo iap taġ tak. Wekukuap puxim cuy epekuku. Wekawēn puxim tak cuy epeyekawēnwēn. Obuxim eyju jekukum pima, Deus soat em eybuywatwan jeenuy. Ixe ma wuyaġuy-mubabibin'ukat.

¹⁰ Ocokcokap yoboġ cīcā wuykukukat eju mūġ'i ōn puye. Ade kaxi kap puje waram ġuto iba'ore ġu o'e eywebe obuywat am oceju ġebum cīcā ekay iap mubapuk am owebe.

— Kuy juk adi eybu'u epesop xipan okuk am —
i'ümġu òn pit e'em eywebe.

Imēnpit iba'ore osunuy eywebe obuywat am, ěn
ekukpin cĭcā ocexe iap mubapuk am owebe. ¹¹ Imēn
òn e'em eywebe. Inaka:

— Eyju juk opere — i'ümġu òn pit e'em eywe-
be.

Kuy wetaybit oce ocokcok am ajo-kuġ òn iap kay.
¹² Kuy juk adi ojeku yopĭt ma ikuġ. Ade dak ikuġ
kuy juk adi ojeku. Ocokcok ma òn e'em obeġbeġ pi-
ma, ore bima dak; odadaybot pima, soat-kuġ pima
dak. Warara'acayū be iba'ore jewemucokcok am soat
taġ. Òn pit cuk wetaybit oce jewemucokcok am soat
em. Soat kaka daġ ma ojekukuku ocokcok. ¹³ Soat
em Cristo ja'òbacaap ūmūm owebe. Imēnpuye ixe
a'òbacaap kuġ òn xipacat jebapukpuġ owebe bima,
xipat'ūmat ebapuk puje dak.

¹⁴ Filipos ka watwat, eyju ma juk adi obuywat-
wan epesop òn ipiatpi'ajojom pima. Iboap xipat cĭcā
osodop. ¹⁵ Macedōnia eipi bewi ojēm puje, eyju acā
juk adi obuywatwan epesop. Obuywatwan cuk adi
epesop koapat kabia òn kawēn idipat muwēnuwēn pi-
ma. Eyju ma juk adi eyemumuūm epeġudot okay.
Eyju ma juk adi ġebum epesop okay òn ade ikuġ pi-
ma, yopĭt ma ikuġ pima dak. Warara'acayū bit ġe-
bum ġu osodop ip okay Jesus kay itabucayū. ¹⁶ Pūġ
em ġu juk adi eyemumuūm epeġudodot okay òn Tes-
salōnica ka be bima, yopĭt ma ikuġ pima. ¹⁷ Waram
paxi ip je'ġūm owebe iap wiwim ġu cuk oġuy. Deus
xipacat je'ġūm eywebe eydacup ġu epesop okuġ iap-
teim. ¹⁸ Kuy Epafrodito eyemumuūm o'tojot okay.
Soat ma o'tojot. Cartadup mubarararaġ òn eywe-
beaptum- -kuy soat ojat eyemumudodot iaptum- -
eyju xipan cĭcā okuġ iaptum. O'e jĭjā ma kuy.
Kuy òn ade ikuġ. Kuyjeayū be wūnca mupik puje,
Deus icokcok osunuy cekay ip. Te'oku osunuy ce-
kay. O'ġupik ip iap xipat osodop cexe. Imēnpuxim
ma okay eyemumudodot tak te'okuat puxim okay.
Deus tak icokcok eyemumudodot cocom pima, eyda-
cup ġu epeġūm owebe buye. ¹⁹ Wetabut cĭcā ixe
kay- -Deus kay. Soat kuġ ma Deus- -idipat kuġ.

Soat je'gūm eywebe dak, eyju Jesus Cristo a'ō daḡ jekukum puye. Tacup ḡu Deus. Imūmūm pin cīcā cexe wuywebe. Ajo ka'ūmḡu eyxe iat je'gūm eywebe. Soat je'gūm eywebe. ²⁰ Ixe Deus wuyetayat. Soat kabia ma:

— Soat podi ma ēn a'ōbuyxi — i juy acece cebe.

Imēn cuy acece cebe soat em ma. Imēn cuy je'e'e.

²¹ Oceju kato mujujum cebe ip soat pe- -Deus ebekitkit pe- -Jesus Cristo kayayū be. Wuykitpitpiyū dak kato mujujum eywebe- -ocexeayū- -ijocayū.

²² Soat Deus ebekitkit kato mujujum eywebe. Wuyei-pi kukat peam kapikpik'ukayū dak kato mujujum eywebe.

²³ — Soat cuy ip xipan ejukuk Filipos ka watwat — i ōn e'em wuykukukat Jesus Cristo be.

Būrūdupku otupmuju eywebe. Kuy cartadup mu-bararakapi ocepere.

COLOSSOS KA WATWAT PEAPTUP PAULO EMUDUPMUBARARAKTUP

1 ¹⁻² Colossos ka watwat, cartadup mubararara-
rağ òn eywebeaptum. Òn Paulo. Ijudup mu-
barararağ òn wuykitpit Timóteo eju. Eyju wuykit-
pitpiyū Colossos ka be. Cristo a'ō dağ eyju jeku-
kum soat em. Jesus Cristo emumuju òn Deus bi-
kuyap tağ.

— Bay, xipan cuy Colossos ka watwat ejukuk —
i òn e'em Deus pe- wuyebay be, Jesus Cristo be
dak- wuykukukat pe. — Ixeyū ağuy mubabibin cuy
eğuy — i òn e'em cebe ip.

³⁻⁴ — Itabut cîcā ip Jesus Cristo kay Colossos
ka watwat — i juk o'e Epafro ocewebe. — Xipan
Deus ebekitkiyū kuğ ip — i juk o'e. — Xipan soat
kuğ ip, Deus xe acesop iap wiwim puye — i juk
o'e ocewebe. Imēnpuye:

— Bay, ēn xipat cîcā — i oceju e'em soat em
Deus eju eywebeam kawēnwēn pima- -Jesus Cristo
ebay eju.

⁵ Soat em Deus xe acesop iap ekawēn kuy epejojojo
kawēn icēmat co buje- -kawēn idipat co buje. Iboap
wiwim eyju ġasū. Icēmān epesop ixe xe, "Oxe ma
epesop" io'e Deus puye- -kabi beat o'e buye. Imēn-
puye Jesus kay eyetabut cîcā. Xipan soat kuğ tak
eyju. ⁶ Deus xipan wuykuğ- -soat kuğ iap ekawēn kuy
epeya'ijojo. Eyetaybit epesop iboap ekawēn icēmān
iam koap em cekawēn co'isum. Soat eipi dağacat ka-
wēn idipat cocom ġasū. Ixeyū dak itabut Jesus kay.
Xipan soat kuğ tak ip itabucayū kuğ. Wuye'ū buje
soat em Deus xe acesop iap wiwim tak ip. ⁷ Epafras
kawēn idipat o'ğuwēn eywebe. Ixe Epafras wuybure
ikukpin cîcāat wuyxe. Cūğ ma ixe kapikpiğ Cristo
muwēnuwēn warara'acat pe. Ixe eybuywatwan oce-
dieğ ġasū bit.

⁸ — Colossos ka watwat jewewekuğ ip cewekuk-
pin cîcā, Deus jebiōğbuk o'ğūom cebe ip puye — i
juk o'e ixe Epafras ocewebe.

⁹ Imēneju soat em oceju kawēn Deus eju eywebeam. Eyawēg̃ tobuxik puje ocebu'u g̃u ocesop jekawēn ām eywebeam. Imēn oceju e'em Deus pe:

— Bay, ocekitpitpiyū juy eḡutaybin apēn ebikuy ixeyū be jeku am iam — i. — Ixeyū juy eḡutaybin apēn xipat exe iam, apēn ikērē exe iam tak — i oceju e'em. — Iboam itaybit cīcā je'e ip ebiōḡbuk ixeyū mutaybitbin puye — i oceju e'em cebe.

¹⁰ Iboam eyetaybit pima, cūg̃ ma epeku; soat em wuykukukat bikuyap taḡ epeku; soat em ixē mucokcokcoḡ epesop; xipacat epeḡujurūḡrūḡ soat em; biḡ ma eyetaybit epesop Deus e'e iam.

¹¹ — Bay, ēn soat podi ma a'ōbaca — i ōn e'em Deus pe. — Soat podi ma ēn edipap kuḡ — i ōn e'em. — A'ōbacaap cuy eḡūm Colossos ka watwat pe Jesus kay ip jebu'uap puxim ipiatpi'ajojom ma'ḡu ip — i ōn e'em Deus pe.

¹² Deus kabiaat kukat. Ixe ebekitkit xipacat mujurūḡrūḡ'ukayū. Ixe xipacat muxipanpan iūm ām jebekitkit pe.

— Cūḡ ma eyju oxe webekitkiyūm — i juk o'e Deus wuywebe.

Imēnpuye wuyju dak xipacat acejat. Iboap wiwim cīcā wuyju. Imēnpuye eyju dak eycokcoḡ cuy epesop.

— Xipat cīcā ēn — i juy epe'e'e wuyebay be.

¹³ Satanás kabiokat kukat. Ixe ebekitkit ikērēat mujurūḡrūḡ'ukayū. Deus pit wuy'uk kabiokat kukat pui bewi. Imēnpuye Satanás g̃u wuykukukat ḡasū-Deus ipot acā. Deus ipot ikukpin cīcā cexe. ¹⁴ Ixe ipot wuy'uk kabiokat kukat pui bewi. Ikērēat muḡēaptei o'teida, oe'ū buye. Imēnpuye ikērēat kuḡ g̃u wuyju ixē xe.

¹⁶ Deus ijo ba'ore wuywebe. Wuyetaybit bitku poro omuyku Cristo jojom, Cristo dak ijo'i buye. Ixe Cristo Deus ipot koapat. Soat Deus emumuḡē bodi ma ya'ōbuyxi ixē. Deus pe ipi mujurūḡ'ūm pima ipot itait osunuy. ¹⁶ Deus soat o'ḡubapukpukpuk Cristo eju. Kabi beacat o'ḡubapukpukpuk soat ceweju, ipi daḡacat tak. Wuywebe ijobucat o'ḡubapuk soat, wuywebe ijo ba'oreat tak. Ya'ōbuyxiayū kabi wat-

wat o'ğubapuk Cristo eju, ya'òbacaayū dak, warara'acayū mujuju'ukayū dak, warara'acat kukukayū dak. Deus ixe eju soat o'ğubapuk. Soat o'ğubapuk cebeam. Soat o'ğubapuk ijodiacat pe Cristo kuk am ibuyxi am. ¹⁷ Kabi, ipi ka'ūm pima, Cristo kuy osunuy itabēg. Ipi dağacat jedopap pe ma dopdom Cristo a'òbi. Kabi beacat tak dopdom jedopap pe ixe a'òbi. ¹⁸ Wuya'a wuyjebit kukat iap puxim Cristo jekay itabucayū kukat. Apēn wuya'a wuyağuydam iap puxim Cristo dak itabut jekayayū ağuydam. Ixe Deus ipot koapat. Ce'ūap tomukadi Deus ixe Cristo waram o'ğutait. Soat podi ma ya'òbuyxian o'ğutait. Wuyju dak waram acejetait wuye'ū buje Deus ixe o'ğutait puye. ¹⁹ Deus o'e jewebe ma:

— Okpot ojo'ian je'e — i.

Imēnpuye jewa'òbaca jojo'i ma ip. ²⁰ Ipi watwat itakoma osodop Deus kay, kabi beacat tak. Deus o'e jewebe ma:

— Soat ip o'ğudin obureyūm- -ipi dağacat, kabi beacat tak — i. — Kūyjobin jeedop ip wa'ò kay korosa be okpot e'ū buje — io'e jewebe ma.

Imēn Deus ip o'ğudin jewekay. Itakomaap ip o'ğu'ūm korosa be jekpot oe'ū ibuye.

²¹ Eyju dak Deus bureyūm ġu epesop kuy bima. Cekay'ūm cīcā juk adi epesop. Imēnpuye ikērēat kay acā juk adi ġebum epesop. Ikērēat mujurūğrūğ'uk tak adi epesop. ²² Ġasū bit Deus eymuwexat jebureyūm ipot oe'ū buye. Kuy eymuwexat ey mudot am jewekay. Imēnpuye cūğ ma epesop ixe wap eyajēm puje. Ikērēat kuğ ġu epesop. Abu je'e eywebe:

— Xipat ġu eyju! — i?

Ka'ūma ma! ²³ Imēneju eyetabun cīcā juy epesop Jesus kay. Eybu'um ġu juy epesop cekay! Koap em kawēn idipat co ebikam Deus xe acesop wuye'ū buje iap wiwim cuk epesop. Eyday'em'um cuy epesop warara'acat pe eymubu'unap puxim iboap wiwi am. Ibo muwēnuwēn'ukat ōn- -kawēn idipat muwēnuwēn'ukat. Kawēn idipat muwēnuwēn ōn soat kaka dağ.

²⁴ Ocokcok cīcā, ōn ipiat osupi'ajo eywebeam puye. Cristo ipiatpi'ajom mabuk jekay itabucayū

beam- -jejebit puximayū beam. Imēnpuxim ōn tak ipiatpi'ajojom Cristo be o'supi'ajojo iap mu'ūm ām.

²⁵ Deus o'e owebe:

— Itabucayū buywatwan cuy eḡuy — i. — Imēn ma kapikpiḡ cuy eḡuy wa'ōbi — io'e owebe.

Ijop ekapikap o'ḡūm owebe eybuywat am.

— Wekawēn muwēnuwēn cuy eḡuy soat ka watwat pe — io'e owebe.

²⁶ Kuyje Deus soat ka watwat pe ḡu jekawēn o'ḡu-wēnuwēn. Gasū bit o'ḡuwēn jekay itabucayū be. Ibo ekawēn muwēnuwēn'ukat ōn. ²⁷ Cristo omuy eywebe Judeuyū ḡu ma'ḡu eyju. Imēnpuye Deus jedipap mubapuk puje, eyju dak idipap kuḡ epesop. Iboap wiwim cīcā eyju. Kuy bima iboap iba'arēm osodop soat xe ijodiacat xe. Gasū bit Deus soat jebekitkit mutaybit pin iboam. Iboap idip cīcā. Xipat cīcā dak. ²⁸ Imēneju Cristo muwēnuwēn oceju soat ka watwat pe.

— Teyūku soat em Jesus kay e'em — i oceju e ojuy Deus pe ixē dopabe ixeyū dojot puje. — Soat em teyūku Cristo eju mūḡ'i jekukum — i oceju e ojuy cebe.

Imēneju Cristo muwēnuwēn oceju soat pe ijodiacat pe. Soat awēwēm oceju. Soat jetaybitbicap eju oceju ip imutaybitbin. ²⁹ Imēneju kapikpiḡ cīcā ōn. Cristo ja'ōbacaap ūmūm owebe cebe wekapik am. Ixe Cristo soat podi ma ya'ōbaca. Ixe Cristo ja'ōbacaap ūmūm owebe. Imēnpuye ijodiacat mutaybin put owebe.

2 Kapikpiḡ cīcā juk adi oḡuy eywebeam- -ojojo'uk'ūmayū beam, Laodicéia ka watwat peam tak. Ōn jeymukūyjo iboam. ² Cebeam ip cuk adi kapikpiḡ cīcā oḡuy ixeyū be biḡ ma jewewa'ōmucan am Jesus ekawēn taḡ jeku am; biḡ ma jewewekukpin am tak; warara'acat podi ma itaybit am tak kawēn icēmān. Iboam itaybit pima, soat em Cristo kay jeedop ip. Jewaḡyumuwarururun ḡu jeedop ip Je-

sus ekawēn taḡ xe'e oceku iam. Kuy bima itaybit ḡu ip osodop Cristom. Ḡasū bit ip oitaybit ixem. ³ Soat ḡu wuyetaybit Deus emumutaybitbin iam. Wuyetaybit ḡūḡūn ā. Cristo bit xīntabi o'tomudip'uk iap puxim. Cristo eju mūḡ'i wuyju jekukum pima, wuyetaybit put Deus emumutaybitbin iam, apēn cūḡ ma Deus xe iam tak, apēn cūḡ ḡu cexe iam tak.

⁴ Imēneju jeymukūyjo ōn. Eyday'em'um cuy epe-sop warara'acat pe eymuḡuykukuap puxim. Adeayū xe cekawēntip ip. Imēnpit cūḡ ḡu ip. Napa ma ip kawēnwēn eyweju eymutabucap ojuy napaap kay. ⁵ Imēneju soat em ḡebum ōn eykay, eyxe ḡu ma'ḡu ōn. Pūḡ taḡ ma eyju e'em. Soat em eyetabut Jesus kay. Ocokcok cīcā ma iboap cocom puye.

⁶ — Ocekukukan cuy ece — i juk adi epe'e Jesus Cristo be, eyetabut puye cekay.

Ḡasū bit mūḡ'i juy epeku ixē eju. ⁷ Kadai nābu muy-cemap puxim Cristo wuya'ōmucanucan wuyetabucap epereap puxim. Imēnpuye biḡ ma juy eyetabun epe-sop cekay. Ḡebum cekayap tomuju juy soan e'em epesop. Kuy juk adi ocewebe eymutaybitbinap taḡ cuy epeku. Soat em cuy epe'e'e Deus pe:

— Bay, ēn xipat cīcā — i. — Soat em ēn xipan ocekuḡ — i juy epe'e'e cebe.

⁸ Eyday'em'um cuy epesop warara'acat pe eymubu'unap puxim Jesus kay apēn wuyju taomūn ām ibubum iap puxim. Ixeyū Cristo ekawēn ḡu eymutaybitbin. Ijodiacat ekawēn acā eymutaybitbin ip -Deus kay'ūmayū ekawēn -ipi juacat aḡuymubarēm'rēm'ukayū ekawēn. Eymuḡuykuku ojuy ip. Te'e ma eymutaybitbin ip. Eyetabun ḡu juy epesop ixeyū a'ō kay. ⁹ Cristo jewa'ōbaca jojo'i ma ip Deus eju. Cristo ijodiat co'ian o'jewexat wuymutaybit am Deus e'e am. Wuyetaybit Deus e'e am Cristo e'eap co buje. Imēneju eyday'em'um cuy epesop warara'acat pe eymubu'unap puxim eyetabut am Jesus kay. ¹⁰ Cristo eju mūḡ'i jekukum pima, wuyju dak Deus a'ōbacaap kuḡ acesop. Ixe Cristo soat podi ma ya'ōbuyxiat -Deus ekawēn tojotjot'ukayū kukuk-

ayū bodi ma, ibiōḡbuk itabidaoiayū kukukayū bodi ma dak.

¹¹ Imēntak Cristo ja'ōbacaap o'ḡūm eywebe ikērēat kukap puxim ixe eju eyju mūḡ'i buye. Aḡokatkat'it'it taypu'aḡobixeedakatkat'uk osodop ip kuyjeayū teku iisu Deus xe i'eap ojuy. Deus pit soat taḡ wuymuisusun wuyxeadakatkat puye ḡu--Cristo eju wuyju mūḡ'i buye acā. ¹² Wuymubatisasan puje Cristo a'ōbi wuyaḡuyokokat oi'ūm wuye'ūap puxim. Ixe a'ōbi oi'ūm wuykocap puxim. Kuy bima Deus waram ḡuto Jesus o'ḡutait ce'ūap tomukadi. Imēnpuxim ijo-di bima dak wuyaḡuy'isum wuyju jekukum waram ḡuto wuyetaicap puxim wuye'ūap tomukadi. Wuy-aḡuy'isum wuyju jekukum ḡasū Deus soat podi ma ya'ōbaca iap kay wuyetabut puye. ¹³ Imēnpuxim eyju ma ikērēat mujurūḡrūḡ cīcā juk adi epekukuku eyaḡuyokok puye. Ce'ūat puxim cuk adi epesop Deus xe ikērēat kay acā ḡebum puye. Judeu'ūmat puxim tak cuk adi epesop--Deus pe wuyawēwēap ekawēn taḡ jekukum'ūmat puxim. Deus pit kuy eyaḡuymuisun eywebe Cristo aḡuy daḡ jewaḡuy am. Wuyaḡuymuisun puje, ixe ikērēat o'ju'uk wuywebewi. Soat o'ju'uk. ¹⁴ Iba'ore wuywebe Deus pe wuyawēwēap ekawēn taḡ jeku am--soat ekawēn taḡ. Deus itaybit soat em teyūku wekawēn mupubutbun iam. Korosa be ixe e'ū buje bit, Cristo apēn cuk adi iboap ekawēn aḡupubutbuniaptei o'teida. O'teida wuyekariwa be wuyeweroap teidaap puxim. Imēnpuye Deus ikērēat o'ju'uk wuywebewi. ¹⁵ Imēnpit Cristo Satanás a'ōbacaap o'ḡu'ūm korosa be je'ū buje. Deus kay'ūmayū kukukayū a'ōbacaap o'ḡu'ūm. Soat etabun ya'ōbacaap o'ḡu'ūmiayū mubapukpuḡ oeku imusūsūn ām. Imubapukpuḡ oeku kuyjeayū be o'yaokaiat aririt'a mubapukap puxim.

¹⁶ Imēneju warara'acat a'ō kay ḡu juy epesop eywebe te'e ma ixeyū e'em pima "Beku i'opi eywebe" i, "Ibiati tikōnpi eywebe" i dak, "Ibeat kabia be epeyekapikpik ḡu juy" i dak, "Kaxiaat ijēm'isu bima, peta juy epeḡuḡē" i dak, "Sábado bima epeyekapikpik ḡu juy" i dak. Ya'ō kay ḡu juy epesop. ¹⁷ Ixeyū ekawēn taḡ cuk adi jekuku'uk ajop Cristo

ajēm'ūm pima. Kabicuk jewurūḡwurūḡ iap puxim jekawēn muwarururun ip soat em. Gasū bit Cristo oa-jēm. Ixe ekawēn soat em ma ibit. Imēnpuye ixeyū ekawēn taḡ ḡu wuyju jekukum ḡasū- -Cristo ekawēn taḡ acā. ¹⁸ Warēmtaḡ eymutaybitbin'ukayū:

— Deus ipiat supi'ajoat eywebe, cūḡ ḡu eyju cexe buye — i napa ma e'em ip eywebe.

Ixeyū ekawēn kay bit eyetabun ḡu juy epesop. Jewexe ya'ōbuyxi ip.

— Warara'acat podi ma oceju xipat Deus xe, soat em Deus ocemuyxeyxey buye — i'e'em ip te'e ma. — Ka'ūma ma oceju bit — i'e'em ip warara'acayū be, “Warara'acat podi ma xipat oceju” i'e'em pima jewebe ma. — Deus kukap co'i juy cekawēn to-jotjot'ukayū ajukuk — i'e'em ip ocewebe te'e ma. — Warara'acat podi ma oceju xipat Deus xe — i'e'em ip te'e ma.

Warēmtaḡ ma ip jewaḡuydadam. Deus aḡuy daḡ ḡu ip jewaḡuyḡuy- -jaḡuy daḡ acā. ¹⁹ Cristo eju mūḡ'i ḡu ip warēmtaḡ jewaḡuyḡuy buye. Cristo wuya'a buxim. Cekay itabucayū ijebit puxim. Deus bikuyap taḡ wuyju aypapan. Wuyekururukpu ibuboḡatpu wuykukatpu wuyewedap taḡatpu wuyewedap mucūḡucūḡatpu. Ibobu buxim Deus wuya'ōmucanucan Cristo eju mūḡ'i wuyeku am. Jewexe ya'ōbuyxiayū bit mūḡ'i ḡu ceweju.

²⁰ Cristo a'ōbi eyaḡuyokokat oi'ūm eye'ūap puxim. Deus ja'ōbacaap o'ḡūm eywebe ibiōḡbuk kērēat kukukayū a'ō kayap puxim- -Deus kay'ūmayū kukukayū a'ō kayap puxim. Imēneju Deus kay'ūmat ekukuap cuy epeyepere. Warēmtaḡ eymutaybitbin'ukayū a'ō kay ḡu juy epesop.

²¹ — Boku juy epejukuk ḡu — i'e'em ip te'e ma. — Beku juy epejo'o ḡu — i dak. — Imēnmēn ḡu bit epeku — i dak e'em ip te'e ma.

²² Soat ixeyū xe ikukpiat, i'opiat, tikōnpiati darem ma kuy kapkam. Ijodiacat ekawēn acā imuwēnuwēn ip- -Deus ekawēn ḡu bit. Ijodiacat aḡuy daḡ acā ip kawēnwēn- -Deus aḡuy daḡ ḡu bit. ²³ Jewexe ip itay-bitbit.

— Deus kukap co'a juy cekawën tojtjot'ukayū ajukuk — i'e'em ip te'e ma. — Ka'ūma ma oceju bit — i'e'em ip warara'acat pe, “Warara'acat podi ma xipat oceju Deus xe” i'e'em pima jewebe ma. Ade cexe ip ikukpiat, i'opiat tak, tikōnpiati dak. Xi-pan ġu ip jejebit kuġ. Tūybe ikērēat acejukuk'ūma iān e'em ip. Ibo bit ka'ūma jo'i ma. Wuybuywat pa'ore ikērēat kukap puxim.

3 Waram o'jetaitiat puxim eyju Cristo eju mūġ'i jekukum puye. Imēnpuye eyetabikum cuy epesop kabi beat kay. Iboce Cristo omuy Deus xe xik'i ya'ōbuyxiat tūyap pe, Deus co'i ya'ōbuyxi buye. ² ³ Ijodiacat eju ġu mūġ'i eyju jekukum--Cristo eju acā mūġ'i eyju jekukum. Imēnpuye ijoceap kay ġu juy epeyewaġuyġuy- -kabi beat kay acā. Pūġ taġ ma jewaġuyġuy ip Deus, Cristo dak. Ixeyū aġuy daġ eyju dak jewaġuyġuy ġasū bit, Cristo eju mūġ'i eyju jekukum puye. Iboap ibapuk ġu itabut'ūmayū xe. Iba'arēm iboap cexe ip. ⁴ Eyaġuy'isum eyju jekukum Cristo eju mūġ'i buye. Waram yajēm puje, wuyju dak acejewemubapuk ceweju. Ixe dipap acejat. Wuydip ace'e ixe jo'i.

⁵ Imēneju ikērēat epeġuġē ġu juy. Ikērēat muġēġē pin eyju Deus kay'ūmat puxim. Epeġuġē ġu bit. Warara'acat tayxi eju epeyepo ġu juy. Warara'acat itop eju epeyepo ġu juy. Ikērēān cuy epeyekaypatpan ġu. Ikērēat epeġujurūġ ġu juy eyemumukaypin pu am. Aoyū kaykay ġu juy epesop. Eyetabikukum ġu juy epesop warara'acat pubut kay. Wuyetabikukuap ikērēat Deus xe deusbaroyū kay wuyetabucap puxim. ⁶ Deus ipiat supi'ajojoat imēn jekuku'ukayū be- -kūyjobit'ūmayū be- -ja'ō kay'ūmayū be. ⁷ Eyju dak cuk adi kuy bima warēmtaġ ma epekukuku. Eycok-cok epesop ikērēat muġēġē'ukap kuġ.

⁸ Ġasū bit ijop epeyepere. Eyetakomām ġu juy epesop warara'acat kay. Aoyū kaykay ġu juy. Eysapka'orerem ġu juy epesop. Warara'acat epejomuymuy ġu juy. Eyekawēnkērēm ġu juy epesop- -pūġ em tak ka'ūma. ⁹ ¹⁰ Cristo kay eyetabut puje, yaġuy'isuayūm

epesop. Kuy bima eyağuyokok cuk adi epekuku. Eyağuyokok ġu juy epekuku ġasū bit. Deus soat em wuyağuymuisusun wuywebe jejo'i i'e am. Ğuyjom Deus ağuy dağ acā ġebum acesop. Biğ ma wuyetay-bit ace'e Deus e'e am. Napa ġu juy epe'e'e eyewe-webe. ¹¹ Wuyağuy'isu bima, ġebum ġu acesop tekū Judeu iap kay, tekū Judeu ġu iap kay dak. Ğebum ġu acesop tekū taypu'ağobixecukat iap kay dak, tekū taypu'ağobixecuk'ūmat iap kay dak. Ğebum ġu acesop tekū pariwat iap kay, tekū wuyjuyū iap kay dak. Ğebum ġu acesop tekū tei'ūma kapikpik-'ukat iap kay, tekū teibubum kapikpik-'ukat iap kay dak. Cristo kay acā ġebum acesop. Iteyū be soat pe Cristo muymuy iap kay ġebum acesop.

¹² Deus ebekitkit eyju. Deus xe eykukpin cīcā epesop. Ixe juk eynaē jewekay am. Imēneju eyeta-botaidabotbon cuy epesop eyewewekay. Xipan cuy epewewekuk. Yoboğan pin ġu juy epesop. Eyekawēnkērēm ġu juy epesop-eyekawēntim ma. Eyukpi-ceğēm ġu juy epesop eyewewekay. ¹³ Epewewebuywat-wan cuy soat em. Eyxeat warēmtağ eykuğ pima, ixe epejomuymuy ġu juy. Ğebum ġu juy epesop apēn cuk adi warēmtağ eykuk iap kay. Wuykukukat Jesus ġebum ġu apēn cuk adi ikērēat ağujurūğrūğ iap kay. Ixe buxim cuy eyju dak ġebum ġu epesop apēn cuk adi warēmtağ eykuk iap kay. ¹⁴ Xipan eyekukuap xipat Deus xe. Ibodi ma bit xipat eywebe xipan eyewewekuk am. Xipan jewewekuğ pima, wara'at tağtağtağ ġu epekuku- -pūğ tağ ma. ¹⁵ Cristo juk wuymuwexat jebekitkiyūm pūğ tağ ma wuyeku am. Ixe wuyağuy-mubabibin wuyağuybabi'ūmap puxim. Āğ cuy ixe jeyağuy-mubabin. Ixe be eyağuy-mubabin puje xipan epewewekuk. Pūğ tak ma dak epewewağuy. Soat em:

— Bay, ēn xipan cīcā ocekuğ — i juy epe'e'e Deus pe.

¹⁶ Soat em Cristo ekawēn tağ cuy epekuku. Xipat cekawēn tağ wuyeku am wuyju idip cīcāat kuğat puxim. Soan cuy jewemutaybitbin epesop. Soan cuy jewemukūyjobitbin tak epesop. Soat em cuy pibododon epesop Deus kay. "Cristo soat podi ma ya'ōbuyxi" i'e pin pima, epewebibododon cuy, "Cristo acā wuy-

kukukat" i'e pin pima dak, eycokcok pima dak Cristo kay eyetabut puye, "Ēn xipat cīcā" i'e pin pima dak Deus pe. Deus biōgbuk a'ōbi juy pibododon epe-sop. ¹⁷ Imēneju soat em cuy epekuku wuykukukat Jesus a'ō daḡ. Soat em cuy epeyekawēnwēn ixe a'ō daḡ. Soat em:

— Ēn xipat cīcā — i juy epe'e'e wuyebay be-
Deus pe, wuykukukat Jesus oe'ū buye.

¹⁸ Tū'ū'ūyū, kūyjobin cuy epesop eyitopyū a'ō kay. Kūyjobin cuy epesop ya'ō kay ip wuykukukat Jesus kay eyetabut puye.

¹⁹ Tapupuyū, ikukpin cuy eytayxiyū epejukuk. Xipan cuy ip epejukuk.

²⁰ Bekitkit, kūyjobin cuy epesop eyebay a'ō kay soat em, eyxi a'ō kay dak. Wuykukukat icokcok e'em eyebay a'ō kay bima.

²¹ Cebayū, imuparararan ḡu juy eyebekitkiyū epejukuk ixeyū mubu'unap puxim kūyjobit am eya'ō kay.

²² Tei'ūma kapikpik'ukayū, soat em cuy kūyjobin epesop eyekariwa a'ō kay ixeyū eyjom pima, eyjom'ūm pima dak. Ixeyū a'ō kay kūyjobin cuy epesop ixeyū be "Ēn xipat" i'eap ojuy ḡu. Kūyjobin cuy epesop kūyjobit pin puye. Kūyjobin cuy epesop wuykukukat Jesus ya'ōbuyxi eyxe buye. ²³ Eycokcoḡ cuy eyekapikap epejukuk. Gebum cuy epesop ijodiacat peam acā ḡu ōn kapikpiḡ iap kay. Wuykukukat peam tak ōn kapikpiḡ iap kay ḡebum cuy epesop. ²⁴ Cristo ma wuykukukat. Ixe beam ma wuyju kapikpiḡ. Wuykukukat jebekitkit peam xipacat o'ḡuxipan. Ibo juy epejat. Gebum cuy epesop iboap kay. Cūḡ ma wuyeku buje, cūḡ ma jekuaptei je'ḡūm wuywebe. ²⁵ Warēmtaḡ wuyeku buje bit, warēmtaḡ jekuaptei dak je'ḡūm wuywebe. Ipiat supi'ajoat wuywebe. Ixe Deus cūḡ ma wuykuḡ. Cedaḡ ma wuyekapikaptei je'ḡūm wuywebe. Weḡūḡūn ma wuykuḡ.

4 Kariwayū, cūḡ ma juy eywebeam tei'ūma kapikpik'ukayū epejukuk. Imuḡuykukukum ḡu ip epejukuk. Eyju dak kapikpiḡ eyekariwa beam-kabi beat peam. Gebum cuy epesop iboap kay.

² Eybu'um ġu juy epesop Deus eju kawēn ām. Xexen ġu juy epesop kawēnwēn pima ceweju-eyetabēġbēġ ma.

— Ēn xipāt cīcā — i juy epe'e'e cebe.

³ Ocewebeam tak cuy epeyekawēn Deus eju.

— Pauloyū buywatwan cuy eġuy ixeyū be eka-wēn muwēn ām soat ka watwat pe — i juy epe'e'e cebe. — Ixeyū buywatwan cuy eġuy Cristo muwēn ām soat pe-kuy bima o'ġuwēn ġu iat ekawēn muwēn ām — i juy epe'e'e cebe.

Daomūnmūnap'a be ōn ġasū iboap ekawēn muwēnuwēn cuk adi ojekuku buye. ⁴ Ibapuġ ma juy iboap ekawēn oġuwēn. Imēnpuye:

— Pauloyū juy esubuywatwan ixeyū be ibapuġ ma kawēn idipāt muwēn ām adeayū be — i juy epe'e'e cebe.

⁵ Eysūsūn ġu juy epesop Jesus muwēn ām itabut'ūmayū be imuwēn put pima. Eyaġuysan cuy epeku ixeyū mu'ukpiceġġēnap puxim Cristo kay.

⁶ Te'e ġu juy epeyekawēn itabut'ūmayū eju. Eyekawēnkum cuy epeyekawēn ceweju ip eyekawēn kay ip ibu'unap puxim. Eyetaybin cuy epesop cedaġ ma ya'ōbu am ip.

⁷ Wuykitpit Tīquico wawēġ ġuwēn eywebe-soat awēġ ġuwēn. Ixe Tīquico ikukpin cīcā wuyxe. Ixe cūġ ma kapikpiġ warara'acayū beam-itabucayū beam. Wuyweju ixē dak kapikpiġ wuykukukat peam. ⁸ Ixe oġuju eykay eymucokcok am, oceju xipāt iap muwēn ām eywebe. ⁹ Wuykitpit Onésimo oġuju eykay Tīcico eju. Ixe Onésimo cūġ ma jekukum. Ikukpin cīcā wuyxe. Eyka bewiat ixē. Apēnpēn ijopka watwat iap ġuwēn ip eywebe.

¹⁰ Aristarco kato mujujum eywebe. Oweju ixē dak omuy daomūnmūnap'a be. Marcos tak kato mujujum eywebe-Barnabé kipitaap. Ixe Marcos eykay jajēm iap awēġ kuy epeyawēġtobuxik. Ixe ajēm puje xipan cuy epeġuajēm eyduk'a be. ¹¹ Josué Justo kato mujujum eywebe. Ixeyū acā Judeuyū kapikpiġ oweju-ebapūġayū: Aristarco, Marcos, Josué Justo. Ibūrū ma. Kapikpiġ ip oweju warara'acayū mutabut

am Jesus kay, Deus pe jekuk am. Obuywatwan cīcā osodop ip omucokcokcoḡ.

¹² Epafras tak kato mujujum eywebe-eyka bewiat- -Jesus Cristo beam kapikpik'ukat. Soat em ixe kawēnwēn Deus eju eywebeam.

— Colossos ka watwat a'ōmucanucan cuy eḡuy ixeyū be jetabucap epereap puxim — i'e'em ixe Deus pe eyuwēnuwēn. — Ixeyū a'ōmucanucan cuy eḡuy ixeyū be Jesus eju mūḡ'i jeku am — i'e'em ixe cebe. — Ixeyū a'ōmucanucan cuy eḡuy ixeyū be soat em ma ebikuyap taḡ jeku am — i'e'em ixe Deus pe eyuwēnuwēn.

¹³ Kapikap iba'ore jījāat kukap puxim ixe Epafras kawēnwēn cīcā Deus eju eywebeam, Laodicéia ka watwat peam tak, Hieríapolis ka watwat peam tak. Ōn ma iboap muwēnuwēn eyrukūyjojom. ¹⁴ Lucas kato mujujum eywebe-ocexe ikukpin cīcāat- wuyanūḡtata'ukat. Demas tak kato mujujum eywebe.

¹⁵ Oceju kato mujujum warara'acayū be Jesus kay itabucayū be- -Laodicéia ka watwat pe. Ninfa be dak kato mujujum oceju, ixe duk'a be je'aweroro- 'ukayū be dak- -itabucayū be. ¹⁶ Eywebe ijudup co buje juy epetupmuju Laodicéia ka watwat pe ixeyū be tup co am. Kuy juk wara'atup otupmuju ixeyū beaptum. Ixedup ixeyū tupmuju eywebe tupco buje. Ixedup tak epetupcoat.

¹⁷ — Wuykukukat ewebe o'ḡūmiap ekapikap kuḡ cuy ejeku — i juy epe'e Arquipo be. — Ekapikap cuy eḡu'ūm — i juy epe'e cebe.

¹⁸ Ōn ma obubin ma Paulo kato mujujum eywebe iaptup mubarararaḡ. Eyaḡuyba'ūm ḡu juy epesop kawēn ām Deus eju owebeam, ōn daomūnmūnap'a be bima.

— Bay, xipan cuy Colossos ka watwat ejukuk — i ōn e'em Deus pe.

Wemudupmubararaktup pe bit kuy oi'ūm.

TESSALÔNICA KA WATWAT PEAPTUP PAULO EMUDUPMUBARARAKTUP KOAPATUP

1 Tessalônica ka watwat, cartadup mubarararağ òn soat peaptum eywebeaptum- -Jesus kay itabucayū beaptum. Òn Paulo. Ijudup mubarararağ òn Timóteo eju, Silas eju dak. Eyju Deus ebekitkiyū- -wuyebay ebekitkiyū. Wuykukukat ebekitkiyū eyju- -Jesus Cristo ebekitkiyū.

— Bay, xipan cuy Tessalônica ka watwat ejukuk — i òn e'em Deus pe. — Ixeyū ağymubabibin cuy eğuy — i òn e'em cebe.

² Eywebeam oceju kawēnwēn Deus eju soat em ma.

— Bay, ēn xipat — i oceju e'em cebe, eyetabut cekay buye.

³ Deus wuyebayat. Ocetabut ixē kay. Eyju dak eyetabut ixē kay. Imēnpuye soat em eyju warara'acat puywatwan ixē a'ōbi. Deus ikukpin eyxe. Ijodiacat tak ikukpin. Imēnpuye eyju kapikpiğ cīcā ixē ekawēn muwēnuwēn itabut'ūmayū be. Eyetaybit wuykukukat Jesus Cristo jajēm waram iam. Imēnpuye eybu'u ġu ixē ajēmap wiwi am. Imēn eyju jekukum, eyju wuykukukat a'ō kay buye- -Jesus Cristo a'ō kay. Cūğ ma eyekukuap kay oceju ġebum Deus eju kawēnwēn pima. ⁴ Ocekpitpiyū, Deus xe eykukpin cīcā. Ixe juk eynaē jebekitkiyūm. Ocetaybit iboam. ⁵ Kawēn idipat cuk adi oceğuwēnuwēn eywebe- -ijodiat ekawēn ġu- -Deus ekawēn acā. Deus a'ōbacaan ma juk adi oceğuwēnuwēn eywebe. Ibiōğbuk xipacat a'ōbi oceğuwēnuwēn. Wuyetaybit kawēn idipat icēmān iam. Eyetabutpe cūğ ma juk adi ocekukuku eywebe dak cūğ ma eyeku am. Eyetaybit iboam. ⁶ Imēneju ocekukuap co'i juk adi epekuku. Wuykukukat ekukuap co'i dak epekuku. Kawēn idipat kay juk adi eyetabun cīcā epe-sop. Eyetabut pima, ipiatpi'ajojom cuk adi epe-sop. Inaka Deus biōğbuk cuk adi eymucokcokcoğ osunuy- -Ibiōğbuk xipacat. ⁷ Cūğ ma Tessalônica ka watwat je-

kukum iap awēg o'yawēgcoco ip soat itabucayū-
Macedônia eipi watwat, Grécia eipi watwat tak.
Imēnpuye eyekukuap co'i juk ip oekuku. ⁸Wuyku-
kukat ekawēn cuk adi epeḡuwēnuwēn Macedônia
eipi watwat pe, Grécia eipi watwat pe dak. Tessa-
lônica ka watwat itabut cīcā Deus kay iap awēg
o'yawēgtobuxik ip soat kaka daḡayū. Ocejū bit eye-
tabucap muwēnuwēn ḡu ḡasū bit kuy ip itaybit
puye. ⁹Soat em eyetabucap muwēnuwēn ip jewewe-
be.

— Tessalônica ka watwat te'e ma itabut osodop
ip deusbaroyū kay — i'e'em ip jewewebe. — Pauloyū
bit cuk Deus ekawēn o'ḡuwēn cebe ip — i'e'em ip.
— Imēnpuye oibu'un ip deusbaroyū kay — i'e'em
ip. — Deusat a'ō kay acā ḡasū ip -soat em itaicat
a'ō kay — i'e'em ip jewewebe. — Deus peam ip ka-
pikpiḡ ḡasū bit — i'e'em ip jewewebe. ¹⁰— Kabi ka-
diwi waram Deus ipot je'kop iap wiwim ip — i'e'em
ip. — Jesus jajēm iap wiwim ip — i.

Deus jekpot o'ḡutait ce'ūap tomukadi. Ixe Jesus
wuydaxijom Deus pe wuykay itakomaap puxim.
Imēnpuye Deus wuymuju ḡu ipiat'ajojoap kay.

2 Ocekpitpiyū, eyetaybit te'e ḡu juk adi ey-
jom oceku iam. ²Eykay ocajēm awap Filipos
ka be juk adi oekuku. Ibo ka watwat cuk adi xipan
ḡu ocekuk. Warēmtaḡ cuk adi ip ocekuk. Ocekay'ūm
cīcā ip osodop. Ocekawēn kay'ūm cīcā dak ip oso-
dop. Eyetaybit iboam. Inaka Deus cuk adi oca'ōmu-
canucan osunuy. Imēnpuye ocebu'u ḡu ocesop kawēn
idipat muwēn ām eywebe. ³Kawēn cūḡat cuk adi
oceḡuwēnuwēn. Ikērēat kayap tomuju ḡu juk adi
oceḡuwēnuwēn eywebe. Eymuḡyukuku ojuy ḡu dak
juk adi ocesop.

⁴— Oxe cūḡ ma eywebe kawēn idipat muwēn
ām itabut'ūmayū be — i juk adi o'e'e Deus ocewe-
be.

Imēnpuye kawēn idipat muwēnuwēn cuk adi oceku-
kuku. Imuwēnuwēn oceju ijodiat mucokcokap ojuy

ġu- -Deus mucokcokap ojuy acā. Deus wuybuyxijojom wa'ō daġ paxi je'e ip iam.

⁵ — Eyju xipat cīcā — i'ūmġu juk adi oce'e'e eywebe eybikuy oce kay am. — Ocejū eykay jījā — i'ūmġu juk adi oce'e'e eywebe eyedinheiro ūmap ojuy.

Deus itaybit iboam. ⁶ Eywebe xipan ocemuwēnuwēnap kudadam ġu oceju- -warara'acat pe xipan ocemuwēnuwēnap kudadam ġu dak. ⁷ Cūġ ma kuka o'e ocewebe "Kūyjobin cuy epesop oca'ō kay, oceju Cristo emumujuyū buye" i'e am eywebe. Imēn ġu bit oceju e'em warara'acayū be. Eywebe dak ka'ūma. Imēnpit eyxe bima oca'ōtareġ ġu juk adi eykuk. Xipan cuk adi oceju eykuk ayacat xipan jē'it kuġat puxim. ⁸ Eykukpin cīcā ocexe. Imēnpuyē kawēn idipat cuk adi oceġuwēnuwēn eywebe Deus ekawēn. Oceparara ġu juk adi ocesop warara'acat pe ocaokaap puxim, Jesus kay eyetabucap ojuy jījā buye, eykukpin cīcā ocexe buye dak. ⁹ Ocekitpit-piyū, ġebum cuy epesop apēn cedaġ ma juk adi ocekuku iap kay. Apēn cuk adi ocejekapikpik eywebeam iap kay dak cuy ġebum epesop. Kabiam cuk adi kapikpiġ cīcā ocesop. Ixima be dak kapikpiġ ma ocesop. Eyxewi ocemukaypinput ojuyap puxim cuk adi kapikpiġ cīcā ocesop. Kapikpiġ cīcā juk adi ocesop eywebe Deus ekawēn muwēnuwēn pima- -kawēn idipat muwēnuwēn pima.

¹⁰ Eyxe bima warēmtaġ ġu juk adi ocekukuku. Cūġ ma juk adi ocekukuku eyetabutpe. Ocekawēnkērē ġu juk adi ocesop eyweju. Eyetaybit cūġ ma juk adi ocekukuku iam. Deus tak itaybit iboam.

¹¹ Xipan cuk adi oceju eykuk aġokatkat xipan jekpot kukap puxim. Eyetaybit iboam. ¹² Ocejū juk adi eymucokcokcoġ Jesus kay eye'e am. Eyġuyucūġap mu'ūmu'ūm cuk adi ocesop. Eyawēwēm cuk adi ocesop eywebe Deus mucokcok am. Deus cuk eynaē soat em ja'ō daġ eyeku am. Ixe soat kukukan je'e. Soat kukukan i'e buje, eyju dak warara'acat kukuk'ukayūm epesop ceweju. Ixe soat podi ma jedipap kuġ. Eyju dak ixe dipap kuġ epesop.

¹³ Ocewebe Deus ekawën muwën puje, cuk adi kÿyjobit epesop cekawën kay.

— Iboap ekawën ijodiat ekawën ġu-Deus ekawën acā — i juk adi epe'e'e.

Imēneju soat em oceju e'em:

— Ēn xipat cīcā — i Deus pe.

Kawën idipat Deus ekawën ma. Ixe dak ja'ōbacaap ūmūm soat pe ja'ō kay itabucayū be. ¹⁴ Ocekitpitpiyū, eybadipyū ma juk adi ipiat o'supijajoat eywebe-eyka watwat ma. Apēn Judéia eipi watwat ipiat'ajojom iap puxim eyju dak ipiat'ajojom. Deus kayayū ixeyū Judéia eipi watwat. Jesus Cristo ebekitkiyū ixeyū. Judeuyū kukuk'ukayū ixeyū be juk adi ipiat o'supijajoat. ¹⁵ Judeuyū kukukayū wuykukukat Jesus o'yaokaat. Deus ekawën muwēnuwēn'ukayū'ūm'ūm aokaka'uk tak ip osodop ibadipyū ma'ġu ip. Ocekaykay dak cuk adi ip osodop. Xipat ġu ip Deus xe. Ijodiat kay dak ip itakoma. ¹⁶ Ibu'u'u jījā ip Deus pe Judeu'ūmayū daxijo am. Deus wuydaxijo pinap ekawën muwën pin oceju Judeu'ūmayū be. Imuwēġap muba'orerem pit ip. Kuy bima ikērēat muġēġē'uk ip osodop. Biġ ma ikērēat muġēġēm ip ġasū dak. Imēnpit Deus itakoma jījā o'e cekay ip.

— Ikērēat kuġ cīcā oxe — io'e Deus cebe ip. Ipiat o'supijajoat cebe ip-ikērēat muġēġēxiayū be.

¹⁷ Ocekitpitpiyū, eyxewi ocejēm'isum ma ocepit pin cīcā ocesop waram eyjom. Soat em oceġuykitkit cuk adi ocesop eykay. Eykay ocepicap kudadam cuk adi ocesop ġebum cīcā eykay buye. ¹⁸ Waram eyjo pin ma'ġu ocesop. Pūġ em ġu wepit pin ma'ġu oġuy eykay-soat em. Soat em ma:

— Ġa'a acepit — i juk adi ocece obureyū be. Satanás pit ocemuypit'ūm'ūm cuk adi osunuy. Imēnpuye ocepit pa'ore juk adi ocesop. ¹⁹ Waram wuykukukat Jesus ajēm puje soat wuyju acejewemubapuk cewap. Wuycokcoġ acesop cewap pima. Warara'acat kayap podi ma ocecokcok oce'e eykay cewap pima. Xipan oceju jeymuwën Jesus pe.

— Teyūku juk adi ipiat o'supijajo jījā. Inaka

oibu'un ġu ip ekay — i oce'e cebe eyмуwēnuwēn.

Ocekawēn coco buje, Jesus je'e ocewebe: — Eyju xipat cīcā oxe — i.

Iboap wiwim cīcā oceju. ²⁰ Xipan oceju eyмуwēnuwēn warara'acayū be. Eyju ocemucokcokcoġ eyetabut cīcā buye.

3 Imēneju oceġuykitkit cīcā juk adi ocesop eyawēġ tobuxik'ūm puye.

— Xipat ma waġepūġ ma onuy am ijopka be-- Atenas ka be — i juk oce obureyū be.

— Ha'a — i juk o'e ip owebe. — Ijopka be ma eġuy — i.

² Wuykitpit Timóteo bit cuk oceġuju eykay. Deus cuk ixе o'taē kawēn idipat muwēn ām oceweju. Ixe Cristo ekawēn muwēnuwēn soat ka daġ. Ixe juk oceġuju eykay eyмucokcok am. Eya'ōmucan am tak oceġuju biġ ma Cristo kay eyetabut am. ³ Ixe juk oceġuju eykay eywebe eyetabucap epereap puxim ipiat'ajojomap tomuju. Deus kay'ūmayū ipiatpi'ajojoan wuywebe. Inaka iboap cūġ ma Deus xe. Deus ibikuy jebekitkit pe ipiat'ajo am ixeyū etabucap puyxijo am. Eyju dak eyetaybit iboam. ⁴ Eyxe bi-ma:

— Itabut'ūmayū ipiat supi'ajojoat wuywebe Jesus Cristo kay wuyetabut puye — i juk adi oce'e'e eywebe.

Ġasū dak ipiat o'supi'ajojoat ip soat pe ocewebe apēn cuk adi ocece eywebe iap taġ. ⁵ Oceġuykitkit cuk adi ocesop eyawēġ tobuxik'ūm pima.

— Ibiōġbuk kērēayū kukukat paxi ikērēat o'ġuġēat cebe ip? — i juk adi oce owebe ma. — Wuyмуġuykukuku'ukat ekawēn kay paxi ip o'e? — i juk adi oce owebe ma. — Te'e ma paxi juk kawēn idipat oġuwēn cebe ip? — i juk adi oce. — Oibu'un paxi ip Jesus Cristo kay jetabut am? — i juk adi oce owebe ma.

Imēneju Timóteo juk oġuju eykay ġasū dak paxi Jesus Cristo kay itabut ip iam wetaybit am.

⁶ Ġasū bit Timóteo oajēm eyxewi. Eyawēġ o'ya-wēġtojot oceka-yawēġtipatawēġ.

— Deus kay itabut cīcā ip — i juk o'e ocewebe.
 — Soat ikukpin cīcā cexe ip — i juk o'e ocewebe. —
 Soat em ġebum ip wuykay, wuykukpin cexe ip puye
 — i juk o'e ocewebe. — Ixeyū wuyjo pin cīcā wuywe-
 be ixeyū jo pinap co'i — i juk o'e ocewebe.

⁷ Ocekpitpiyū, ocaġuybabi'ūm cīcā juk adi oce-
 sop eykuġ. Jesus Cristo kay eyetabut cīcā mabuk iap
 awēġ tobuxik puje bit, ocaġuykuku oce'e eykay,
 ipiat'ajojom ma'ġu oceju. ⁸ Wuykukukat Jesus kay
 eyetabut cīcā bima, ocecokcok cīcā oce'e-ixe kay ey-
 bu'u'ūm pima. ⁹ Deus eju kawēnwēn pima, ocecokcok
 cīcā Cristo kay eyetabut puye. Imēnpuye soat em
 oceju e'em Deus pe: — Bay, ēn xipat cīcā — i. —
 Tessalōnia ka watwat itabut cīcā ekay — i oceju
 e'em cebe.

¹⁰ Kabia bun oceju kawēnwēn Deus eju eywebeam,
 ixima bun tak.

— Bay, āġ ocejepit Tessalōnica ka watwat com
 — i oceju e'em cebe. — Āġ ocejepit ixeyū mutaybit
 am ajom itaybit ġu ip iam, biġ ma itabut am ip
 ekay — i oceju e'em cebe.

¹¹ — Bay, ocedujupin cuy ece ixeyū jom — i oce-
 ju e'em Deus pe.
 Imēn oceju e'em Deus pe wuyebayat pe, wuykukukat
 Jesus pe dak.

¹² — Bay, kuy xipan jewewekuġ ip soat — i oce-
 ju e'em. — Xipan tak ip warara'acat kuġ — i oceju
 e'em. — Ixeyū juy esubuywan biġ ma ip xipan jewe-
 wekuk am, biġ ma warara'acat kuk am tak ocexe
 ikukpin ip iap puxim — i oceju e'em Deus pe.

¹³ Imēn Deus pe eybuywan pima, ka'ūma ma kuka
 o'e eywebe:

— Ikērēat kuġ eyju Deus xe — i.

Ikērēat kuġ ġu epesop cexe wuykukukat Jesus ajēm
 puje. Ixe jajēm soat jebekitkit eju-ja'ōkayayū eju.

4 Ocekpitpiyū, eymukūyjojom cuk adi oceku-
 kuku.

— Kūyjobin cuy epesop Deus a'ō kay — i juk
 adi oce'e'e eywebe.

Eyju kūyjobit ġasū ya'ō kay. Imēnpit:

— Biġ ma juy kūyjobin epesop ya'ō kay ixē mu-
cokcok am — i ōn e'em eywebe wuykukukat Jesus
a'ōbi.

² Deus pe ocawēwē ām eymutaybitbin cuk adi oceku
wuykukukat Jesus a'ōbi. Eyetaybit iboam. ³ Deus ibi-
kuy wuyekawēntim wuyeku am soat em. Ibu'u jījā
wuywebe ikērēat kukan. Imēneju eytayxi'ūmat eju ġu
juy epeyepo- -eytayxi eju acā. Eyektop'ūmat eju ġu
juy epeyepo- -yektop eju acā. ⁴ ⁵ Itabut'ūmayū ma
jewebumūnmūn ayacat tabi o pin cīcā buye- -Deus
itaybit'ūmayū. Eyju bit epeyewebumūn cuy ayacat
ikukpin cīcā buye acā. Ibuyxim cuy eytayxi epejukuk
cūġ ma jeku am Deus etabutpe, ijodiat etabutpe dak.
⁶ ⁷ Deus cuk wuynaē ikērēm wuyeku am ġu- -cūġ ma
wuyeku am acā. Soat taġ wuyisum wuydop am cuk
wuynaē. Eyetabut Jesus kay. Imēneju warara'acat
tayxi kaykay ġu juy epesop, warara'acat itop kaykay
ġu dak. Ixeyū kaykay bima bit, wuykukukat ipiat su-
pi'ajoat eywebe. Kuy bima oca'ōpuruġ cuk adi iboap
oceġuwēnuwēn eywebe. ⁸ Deus jebiōġbuk muōmōm
wuywebe- -xipacat muōmōm. Ijudup mubarararaġ ōn
ijodiat a'ōbi ġu- -Deus a'ōbi acā. Imēnpuye wekawēn
kay'ūmat Deus ekawēn kay ġu dak.

⁹ Deus ma juk adi eymutaybitbin osunuy xipan
cuy epeyewekuk eyju ikitpitpiyū buye iam. On pit
iboam ġu jeymutaybin ijudup pe. ¹⁰ Macedōnia eipi
watwat kuġ cuk adi epesop xipan. Ocekpitpiyū:

— Biġ ma juy xipan ip epejukuk — i oceju e'em
eywebe.

¹¹ — Kaba'ūm cuy epesop eyeweweju — i oceju
e'em eywebe.

Warara'acat ekapikap kay ġu juy epesop aġ-
eyekapikap kay acā. Eyekapikap kuġ ma juy epesop
eyemukaypinput pu am. Imēn ma juk adi eyawēwēm
ocesop kuy bima dak. ¹² Imēn eyju kapikpiġ pima,
ibuyxim jeykuk itabut'ūmayū. Warara'acat xewi epe-
joojuy ġu dak eyemukaypinput.

¹³ Ocekpitpiyū, oceju jeymukūyjo apēn je'bapuk
Jesus kay itabucat pe ce'ū buje iam. Iboam eyetay-

bit pima, eyğuyçũsũ ma epesop itabucat e'ũ buje. Itabut'ũmat e'ũ buje bit ibureyũ iğuyçũğ cĩcã e'em, soat em Deus xe acesop wuye'ũ buje iap wiwim'ũm puye. ¹⁴ Wuyetabut Jesus oe'ũ iap kay, waram ġuto o'jetait iap kay dak. Imēnpuye icēmān Deus itabucayũ'ũm'ũm ġutait ġuto. Jesus o'ğutait'iyũ idojot ceweju waram jedot puje. Wuyetabut iboap kay dak.

¹⁵ Ijodi wuyetait pima, acejeu wuykukukat topabe waram ixē ajēm puje. Acejeu itabucayũ'ũm'ũm eu awap ġu. Ixeyũ eju ma acejeu- -waram cemumutaityũ eju. Iboap muwēnuwēn oceju eywebe wuykukukat a'ōbi. ¹⁶ Wuykukukat Jesus je'kop kabi kadiwi. Deus ekawēn tojotjot'ukayũ kukukat ewāwā buje je'kop- -ya'ōbuyxiat ewāwā buje. Deus eparasuy jo'iat ede buje je'kop. Deus koam Cristo kay itabucayũ'ũm'ũm jebit ġuyu. Soat em itait jeedop ip cexe. ¹⁷ Wuymuyu ġebuje. Itabēğayũ ġuyu. Ijodiat ġuyu. Wuymuyu koam o'ğuyu'iyũ nomuxik am kabikerereat pe. Ixeyũ eju acejeu wuykukukat topabe. Imēn soat em acesop cexe- -wuykukukat Jesus xe. ¹⁸ Imēneju jewemucokcokcoğ cuy epesop ġebum ibo ekawēn kay- -apēn je'wapuk itabucayũ'ũm'ũm pe iap ekawēn kay.

5 Kuy eyetaybit wuykukukat jajēm iam. Apēn je'wapuk ixē ajēm awap iam tak eyetaybit.

Imēnpuye iboaptup otupmubararak ġu eywebeaptum.

² Eyetaybit apēn wuykukukat waram jajēm iam. Ixi- ma be ibukurukat ajēmjēmap puxim jajēm uk'a iwat ağ'ũma pima iap puxim. Adeayũ ağ'ũm pima jajēm.

³ Yukreğat te'e ma e'em:

— Obu'u o'it pi'ajom — i.

Je'itpi bima, cenapōn pa'ore e'em je'it pibun. Jo- pi'ajo ma. Imēnpuxim adeayũ te'e ma e'em:

— Kaba'ũm wuyju wuyeweweju — i. — Ka'ũma ma ipiat supi'ajoat wuywebe — i'e'em ip te'e ma. Jesus ajēm puje bit, Deus dao ma ipiat supi'ajoat cebe ip- -kũyjobit'ũmayũ be. Cenapōn pa'ore je'e ip ipiat puxixim. ⁴ Kabiok tağ ibukurukat ajēmjēm wuy-

mukuy am. Ocekitpitpiyū, kabiok tağ jekuku'ukat puxim ġu wuyju bit. Imēneju wuykukukat ajēmap cuy ajowiwi yajēm puje wuyekuyap puxim. Ibu-kurukat pe wuymukuyap puxim ġu juy ace.

⁵ — Kabiaat ebekitkit oceju — i wuyju e'em, Je-sus ekawēn tağ wuyju jekukum puye. — Kabiokat ebekitkit ġu oceju — i wuyju e'em, ikērēat muğēğēm ġu wuyju e'em puye.

Imēnpuye wuykukukat ajēm puje acejekuy ġu. ⁶ Jesus kay itabut'ūmat ixecat puxim- -ağ'ūmat puxim. Ixe-cat puxim ġu juy ajekuku. Ağ cuy ajekuku. Wuyku-kukat ajēmap cuy ajowiwi. ⁷ Kabiokat ebekitkiyū yağuyba'arēm jekukum soat em ika'oat puxim. Ikērēat muğēğēm ip soat em. ⁸ Wuyju bit kabiaat ebe-kitkiyū. Ikērēat muğēğēm ġu wuyju e'em. Imēnpuye wuyağuyba'arēm ġu juy ajeku- -wuyağuyusan acā. Je-sus Cristo kay wuyetabun cīcā juy ajop wuyjuap pu-xim ipiat'ajojoap kay. Xipan cuy soat ajukuk. Imēn jekukum pima sorara buxim acesop, xipan warara'a-cat kuğ pima dak. Sorara ja'ōxa dağ icaat kuğ jao-kaap puxim. Soat em Deus xe acesop iap wiwim cuy acesop. Iboap wiwim pima ja be icaat kukat puxim ace'e. ⁹ Ipiat'ajojoap kay wuymuju am ġu Deus cuk wuynaē- -wuydaxijo am acā. Ixe wuydaxijojom wuy-kukukat Jesus Cristo oe'ū wuywebeam puye. ¹⁰ Ixe Cristo oe'ū wuywebeam. Oe'ū wuywebe soat em jexe wuydop am. Ixe ajēm puje aceju cekay wuyetai-t pima, wuye'ū bima dak. ¹¹ Imēneju juy epeyewemukok-coğ. Jewebuywatwan tak cuy epesop biğ ma eyetabut am Jesus kay. Ġasū dak eyju jewemukokcokcoğ, je-webuywatwan tak. Imēnpit biğ ma juy: — Imēn epe-sop — i ōn e'em eywebe.

¹² Ocekitpitpiyū: — Ibuyxim cuy eymutaybit-bin'ukayū epejukuk — i oceju e'em eywebe. Wuyku-kukat cuk ixeyū o'taē jekawēn eymutaybitbin am, eymukūyjojo am tak. ¹³ Kapikpiğ ip eywebeam. Imēn-puye xipan cuy ixeyū epejukuk. Ibuyxim cuy epeju-kuk ip.

¹⁴ Imēn cuy jeyawē oceju. Eya'ōpuruğ cuy ibuka-pik'ūmat epeyawē. İğuycūğcūğayū juy epeğucokcoğ.

Itabutbūcayū juy epesubuywan biḡ ma itabut am ip Jesus kay. Eyukpiceḡēm ḡu juy epejukuk warara'acat- -eya'ōdim ma. ¹⁶ Ikērēm ḡu juy warara'acat epejukuk, ikērēm ma'ḡu ip eykuḡ. Soat em xipan cuy epeyewekuk. Warara'acayū dak cuy epejukuk xipan.

¹⁶ Soat em cuy eycokcoḡ epesop. ¹⁷ Soat em cuy kawēnwēn epesop Deus eju. ¹⁸ Soat em cuy epe'e'e Deus pe:

— Bay, ēn xipat cīcā — i.

Imēn cuy epe'e'e cebe xipacat jebapukpuḡ eywebe bima, xipat'ūmat jebapukpuḡ pima dak. Deus ibikuy eywebe imēn eyeku am Jesus Cristo ejo mūḡ'i jekukum pima. ¹⁹ Ibiōḡbuk xipacat e ojuyap muba'arēm-rēm ḡu juy epesop. ²⁰ Deus biōḡbuk a'ōbi warara'acat ekawēn puje juy epejowayway ḡu. ²¹ Ijodiat ekawēn co buje juy epe'e'e eyewewebe:

— Icēm tu ite e'em? — i.

Warara'acat ekawēn kay ḡu juy epesop eyetabun- -xipacat ekawēn kay ā. ²² Ade opop iwarururuat xipat'ūmat. Epejukuk ḡu- -pūḡ tak ka'ūma.

²³ Deus eju ōn kawēnwēn eywebeam. Ixe Deus wuyaḡuymubabibin'ukat.

— Bay, Tessalōnica ka watwat cuy eḡuisun soat taḡ ikērēat kukap puxim ip — i ōn e'em Deus pe. — Ixeyū juy eya'ōmucanucan ikērēat muḡēap puxim — i ōn e'em cebe. — Ixeyū jebit cuy eḡuisun — i ōn e'em cebe. — Eyaḡuymuisun tak cuy ip — i dak. — Esubiōḡbukmuisun tak cuy ip — i dak ōn e'em cebe. — Ixeyū a'ōmucanucan pima, ikērēat kuḡ ḡu je'e ip exe, ocekekukat Jesus Cristo ajēm puje — i ōn e'em Deus pe. — Soat taḡ idip je'e ip exe — i ōn e'em cebe.

²⁴ Deus wuynaēhēm ikērēat kuḡ'ūmayūm. Ixe ma wuymuisun soat taḡ, soat em ja'ō daḡ e'em puye.

²⁵ Ocekpitpiyū, ocewebeam tak cuy epeyekawēnwēn Deus eju.

²⁶ Epeyewakobotbot cuy wuykukpin wuyeweweju iap mubapuk am soat pe.

²⁷ — Ijudup cuy epetupcoat soat pe- -wuykit-pitpiyū be — i ōn e'em eywebe.

Imēn ōn e'em wuykukukat a'ōbi.

²⁸ — Xipan cuy Tessalōnica ka watwat ejukuk —
i ōn e'em wuykukukat Jesus Cristo be.

Ibūrū ma.

TESSALÔNICA KA WATWAT PEAPTUP PAULO EMUDUPMUBARARAKTUP XEPXEPATUP

1 Tessalônica ka watwat, cartadup mubarararağ òn Silas eju. Timóteo eju dak. Ijudup mubarararağ òn eywebeaptum- -Jesus kay itabucayū beaptum. Òn Paulo. Eyju Deus ebekitkit- -wuyebay ebekitkit. Wuykukukat ebekitkit eyju- -Jesus Cristo ebekitkit.

² — Bay, xipan cuy Tessalônica ka watwat eju-kuk — i òn e'em Deus pe- -wuyebay be, wuykukukat Jesus Cristo be dak. — Ixeyū ağuy mubabibin cuy eğuy — i òn e'em cebe.

³ Ocekpitpiyū, oceju e'em Deus pe:

— Bay, ên xipat cîcâ — i.

Soat em biğ ma eyetabut Jesus Cristo kay. Soat em eyju biğ ma xipan jewewekuğ. Imênpuye cedağ oce-webe “Ên xipat cîcâ” i'e am Deus pe. ⁴ Itabut- 'ūmayū juk adi ipiat o'supi'ajojoat eywebe. Inaka eybu'u ġu epesop eyetabut am Jesus kay ipiatpi'ajojom ma'ğū eyju. Eyetabut cîcâ Jesus kay. Eyetaxi jîjâ ipiatpi'ajo am. Imênpuye:

— Tessalônica ka watwat xipat cîcâ. Ibu'u ġu ip jetabut am Jesus kay ipiat'ajojom ma'ğū ip — i oceju e'em wara'at ka watwat pe- -Jesus kay itabucayū be. — Itaxi jîjâ ip ipiatpi'ajo am — i oceju e'em cebe ip.

⁵ Ipiatpi'ajojom eyju Deus ebekitkit puye. Imênpuye Deus je'e eywebe:

— Cedağ ma eywebe soat em oxe eydop am — i.

— Òn soat kukukan pima, oxe ma epesop, cuk adi eyetaxi epesop ipiatpi'ajo am puye — i je'e Deus eywebe.

Ixe cūğ ma e'em soat em ma. ⁶ Deus soat em cūğ ma e'em. Imênpuye ixē ipiat supi'ajojoat eykay'ūmayū be- -ipiatpi'ajojoan eywebe'iyū be. ⁷ Deus jeybuywan ipiat'ajojom pima. Ocebuywan tak ipiatpi'ajojom pima. Imên ixē wuybuywan waram ġuto wuykukukat

Jesus ajēm puje dak. Kabi kadiwi ixe jajēm. Jekawēn tojotjot'ukayū eju jajēm- -ya'ōbacaayū eju. ⁸ Daxa kuḡ jajēm. Ixe jajēm ipiatpi'ajoan Deus itaybit- 'ūmayū be. Ipiat supi'ajojoat wuykukukat Jesus a'ō kay'ūmayū be- -kawēn idipat kay'ūmayū be.

⁹⁻¹⁰ — Jesus soat podi ma ya'ōbaca — i je'e ip ixe ebekitkit wuykukukat ajēm puje.

Eyju dak imēn ma epe'e.

— Soat podi ma a'ōbuyxi ēn — i je'e ip soat itabucayū.

Eyju dak ixeyū eju epesop ocewebe eymukūyjojoap kay juk eyetabut puye. Cekay itabut'ūmayū bit ipiat'ajojom jeedop ip soat em. Soat em wūy ma jeedop ip wuykukukat wi.

— Soat podi ma Jesus idip- -ya'ōbaca dak — i je'e ip adeayū.

Itabut'ūmayū bit ixe a'ōbacaap jojo ḡu ip wūy buye. Idipap coco ḡu ip wūy buye.

¹¹ Imēneju soat em oceju kawēnwēn Deus eju eywebeam.

— Bay, Tessalōnica ka watwat puywatwan cuy eḡuy cūḡ ma ceku am ip — i oceju e'em cebe. — Bay, ēn cuk ixeyū etaē cūḡ ma ceku am ip — i oceju e'em. — Bay, kūyjobit pin ip a'ō kay — i oceju e'em. — A'ōbacaap cuy eḡūm cebe ip warara'acat kuk am ip xipan — i oceju e'em. — Bay, Jesus kay itabut ip — i oceju e'em. — Imēnpuye ixeyū buywatwan cuy eḡuy ebikuyap taḡ ceku am ip — i oceju e'em Deus pe.

¹² Imēn oceju kawēnwēn Deus eju eywebeam.

— Soat podi ma Jesus Cristo xipat — i je'e ip adeayū, wuyju Deus bikuyap taḡ jekukum puye.

— Tessalōnica ka watwat xipat cīcā oxe — i je'e Deus.

Ixe imēn je'e soat em xipacat ūmūm wuywebe buye. Wuykukukat Jesus Cristo dak soat em xipacat ūmūm wuywebe.

2 — Wuykukukat Jesus Cristo waram jajēm — i juk adi oce'e'e eywebe, ocekitpitpiyū. — Ixe dopabe juy aceje'awero — i dak cuk adi oce'e'e eywebe. — Ixe xe acesop soat em — i dak cuk adi oce'e'e.

Iboam eymukūyjom cuk adi ocekuku. ² Pūḡpūḡayū bit napa ma e'em eywebe:

— Wuykukukat Jesus Cristo kuy oajēm waram — i. — Paulo iboap cuk adi o'ḡuwēnuwēn wuywebe Deus biōḡbuk a'ōbi — i napa ma e'em ip. — Paulo wuykukukat kuy oajēm waram iaptup cuk o'tupmubararak wuywebeaptum — i napa ma e'em ip eywebe.

Ocekitpitpiyū, wekawēn co'isum ma eyaḡuybabi'ūma epesop! Eyaḡuybabi'ūm ḡu juy epesop ixeyū ekawēn kay- -napaap ekawēn kay. ³ Eyday'em'um cuy epesop warara'acat pe eymuḡuykukuap puxim. Wara'at cuy koap je'bapuk wuykukukat ajēm awap. Koap cuy Deus kay'ūmayū je'bapuk wuyparakpe. Deus a'ō kay kūyjobit'ūm cīcā jeku ip. Ikērēat mujurūḡrūḡxiat tak cuy je'bapuk. Kuyje:

— Ōn ma ikērēat mujurūḡrūḡxiat cuy oḡuju ipiat'ajojoap kay — io'e Deus. — Wūy ma jeenuy oxewi soat em ipiat'ajojom — io'e Deus.

Imēnpuye iba'ore warara'acat pe ixē muju'ūm ām. Je'ju ma Deus a'ōbi ipiat'ajojoap kay. ⁴ Ixe ikērēat mujurūḡrūḡxiat itakoma jījā je'e jewexe deusyū kay- -deusbaroyū kay. Ijodiat ibuyxim ikuḡ iayū kay itakoma jījā je'e.

— Iteyū bodi ma wa'ōbuyxi — i napa ma je'e ixē. — Ixeyū a'ō kay ḡu juy epesop- -wa'ō kay acā — i je'e ixē soat pe ijodiat pe.

Ixe jabik Deus eju kawēnwēnap'a be- -yaboḡat'a be. Deus jomuymuy soat pe ijodiat pe.

— Ōn acā Deus — i napa ma je'e.

Imēḡap ebapuk puje, Jesus Cristo jajēm.

⁵ Ade em iboap cuk adi oḡuwēnuwēn eywebe eyxe bima. Ḡebum ḡu du eyju wekawēn kay? ⁶ Ḡasū ma warara'acat ikērēat mujurūḡrūḡxiat ajēmap muba'oreren. Eyetaybit iboam. Ixe ajēmap ekabia be bit jajēm. ⁷ Iba'arēm ma ikērēat mujurūḡrūḡ ḡasū ikērēat

mujurūgrūgxiat. Guyjom pit Deus ixe ajēmap mu-
ba'oreren'ukat ju'uk. I'uk puje, ibapuḡ ma ikērēat
ḡujurūgrūg soat etabutpe. ⁸I'uk puje, ikērēat muju-
rūgrūgxiat je'bpuk. Wuykukukat Jesus ajēm puje
bit, ixe ḡu'ūm. Puw! Jebidom ixe ḡu'ūm. 'ūm. Ixe
a'ōbacaap ḡu'ūm. 'ūm. Ixe a'ōbacaap ḡu'ūm jajēm
ām idipan. ⁹Ikērēat mujurūgrūgxiat jajēm. Satanás
a'ōbacaap kuḡ. Napa ma ja'ōbacaap ḡubapuk adeayū
etabutpe. Wuywebe i'e ba'oreat ḡubapuk adeayū
muḡuykuku ojuy. Itabēḡbēḡ jeedop ip ixe a'ōbacaap
cocom, jewemuḡuykukukum ip puye. ¹⁰Ipiat'ajojoap
kay cumayū ḡuḡuykuku. Ipiat'ajojoap kay je'ju ip
kawēn icēmat kay kūyjobit'ūm puye. Ibu'u jījā ip
osodop jetabut am kawēn icēmat kay. Deus pe jeda-
xijo an ibu'u ip osodop. ¹¹Imēneju Deus wuymuḡuy-
kukuku'ukat ḡuju ixeyū kay ixeyū mutabut am na-
paap kay. ¹²Imēnpuye soat ip yukpiwat jeedop Deus
xe. Wūy ma jeedop ip Deus wī kawēn icēmat kay
kūyjobit'ūm puye -napa ma i'e am icokcok puye
dak.

¹³Ocekitpitpiyū, eykukpin cīcā wuykukukat xe.
Ipi mujurūg'isum Deus cuk eynaē eydaxijo am. Ibiōḡ-
buk xipacat ja'ōbacaap ūmūm eywebe xipacat muju-
rūgrūg'ukayūm. Kawēn icēmat kay eyetabut. Imēneju
Deus ebekitkiyū eyju. Imēnpuye soat em:

— Bay, ēn xipat cīcā, Tessalōnica ka watwat
etaxijo buye — i oceju e'em Deus pe.

¹⁴Ixe juk eynaē wuykukukat Jesus Cristo dipap co'i
ey'e am. Ixe ekawēn kay eyetabut, kawēn idipat
oceḡuwēn eywebe buye.

— Ka'ūma ma wuykukukat Jesus Cristo jo'iat
idipat — i je'e adeayū.

Deus cuk wuynaē Jesus Cristo jo'iaiyūm wuy'e am.

¹⁵Imēneju, ocekitpitpiyū, kawēn icēmat kay jījā juy
epesop. Eybu'um ḡu juy epesop kawēn icēmat taḡ
eyeku am -pūḡ em tak ka'ūma. Kawēn icēmat cuk
adi oceḡuwēnuwēn eywebe ocekawēn taḡ, ocemudup-
mubararaktup pe dak -eywebeaptup pe.

¹⁶Jesus Cristo wuykukukat. Deus wuyebay. Ixeyū
xe juk adi wuykukpin cīcā ajop. Wuya'ōmucanu-

can'uk ip osodop. Wuybuywatwat'uk ip osodop wuywebe soat em Jesus xe acesop iap wiwi am. Warara'acat podi ma xipan wuykuḡ ip, xipat ḡu ma'ḡu wuyju. ¹⁷Imēneju Deus eju ṅn kawēnwēn eywebeam.

— Tessalōnica ka watwat a'ōmucanucan cuy eḡuy — i ṅn e'em cebe. — Ixeyū buywatwan cuy eḡuy ixeyū be soat em xipacat mujurūḡrūḡ ām; soat em cekawēntip i'e am tak — i ṅn e'em Deus pe.

3 Ocekpitpiyū, ḡasū ṅn wara'at ekawēn jeymukūyjo. Ocewebeam cuy epeyekawēn Deus eju.

— Pauloyū juy esubuywan ixeyū be dao ma ekawēn muwēn ām soat ka watwat pe — i juy epe'e cebe. — Ya'ijojo'ibiyū juy eḡutabun ekawēn kay apēn cuk adi ēn ocemutabun iap puxim — i juy epe'e cebe.

²Soat ḡu itabut Jesus ekawēn kay. Ixeyū itabut-ūmayū ikērēat mujurūḡrūḡ soat ka daḡ. Warēmtaḡ ip jekukum. Imēnpuye:

— Pauloyū juy etaxijo ikērēat mujurūḡrūḡ'ukayū be yaokaap puxim — i juy epe'e Deus pe.

³Imēnpit soat em wuykukukat e'em apēn cuk adi o'e'e iap taḡ. Ixe jeya'ōmucan. Ixe jeydaxijo ikērēat mujurūḡrūḡ'ukayū kukukat pui bewi--Satanás pui bewi. ⁴Apēn cuk adi oce eywebe iap taḡ eyju jekukum. Ġuyjom tak iboap taḡ epeku soat em. Ocutaybit iboam. Imēnpuye wuykukukat ocemucokcokcoḡ eykay.

⁵Eywebeam ṅn kawēnwēn Deus eju.

— Bay, exe ocekukpin cīcā juk adi ocesop — i ṅn e'em cebe. — Tessalōnica ka watwat cuy esubuywan ixeyū be xipan warara'acat kuk am — i ṅn e'em. — Bay, Cristo juk adi itaxi jijā osunuy ipiat'ajo am — i ṅn e'em. — Tessalōnica ka watwat cuy esubuywan itaxi am ip ipiat'ajo am — i ṅn e'em.

⁶ Ocekitpitpiyū, pūḡpūḡ wuykitpitpiyū'in ibu'u jījā kapiḡ. Apēn cuk adi oceju eymutaybitbinap taḡ ḡu ip jekukum. Ixeyū burem cīcā ḡu juy epeku. Iboam oceju e'em eywebe wuykukukat Jesus Cristo a'ōbi. ⁷ Eyju eyetaybit apēn cuk adi ocekukuku iam. Imēnpuye ocekukuap puxim cuy epekuku. Eyxe bima juk adi ocebu'u'u ḡu ocesop kapiḡ. ⁸ Tei'ūm ḡu juk adi ocejajat ocexan eyxewi- -teihem acā. Kabiam cuk adi ocejekapikpik, ixima daḡ tak eyxewi ocexat ojuyap puxim, ocemukaypinput ojuyap puxim tak. ⁹ Cedaḡ kuka o'e ocewebe ocexat ojuy am eyxewi, Deus ekawēn eymutaybitbin puye. Imēnpit eyxewi juk adi ocejoojuyjuy ḡu. Ocebu'u'u ḡu juk adi ocesop kapiḡ eyju dak eybu'uap puxim.

¹⁰ — Ibukapik'ūmat jekōn ḡu juy — i juk adi oce'e'e eywebe eyxe bima.

¹¹ Ijudup mubarararaḡ oceju kuy juk eyawēḡ oceyawēḡtobuxik puye.

— Ibu'u'u ip kapiḡ pūḡpūḡ Tessalōnica ka watwat — i juk adi o'e'e ip ocewebe. — Jebureyū muy-muy acā ip e'em — i juk adi o'e'e ip ocewebe.

¹² — Eybu'um ḡu juy epesop kapiḡ eyxat pu am, eydoti bu am tak — i oceju e'em ibukapik'ūmayū be. — Eybureyū epejomuymuy ḡu juy — i oceju e'em cebe ip. — Eyekawēntim cuy epesop — i oceju e'em cebe ip wuykukukat a'ōbi- -Jesus Cristo a'ōbi.

¹³ Ocekitpitpiyū, eyju bit xipacat mujurūḡrūḡap epeyepere ḡu juy. ¹⁴ Ijudup ekawēn kay kūyjobit'ūmat eju ḡu juy epekuku ixē musūsūn ām. Waram aco'i kūyjobin je'e isūsūn puye. ¹⁵ Eykay itakomaat kukap puxim cuy ixē epejukuk. Ixē bit cuy epeyawē eykitpit puye.

¹⁶ Wuykukukat wuyaḡuymucūḡucūḡ.

— Okukukat, Tessalōnica ka watwat aḡuymubabibin cuy eḡuy soat em- -xipacat cebe ip jebapukpuḡ pima, xipat'ūmat jebapukpuḡ pima dak — i ōn e'em cebe. — Soat em cuy aḡ eḡuy ixeyū kay — i ōn e'em cebe.

¹⁷ Paulo kato mujujum eywebe iaptup mubarararaḡ ōn obubin ma. Imēn cuk adi otupmubararak

soatup- -wemudupmubararaktup. Imēn ma ijudup tak otupmuju eykay.

¹⁸— Xipan cuy Tessalōnica ka watwat ejukuk — i ōn e'em wuykukukat pe- -Jesus Cristo be. Ibūrūdup ma.

TIMÓTEO BEAPTUP PAULO EMUDUPMUBARARAKTUP KOAPATUP

1 Timóteo, ijudup mubarararağ òn ewebeap-
tum kato muju am ewebeiaptup. Paulo òn.
Deus wuydaxijoyo'ukat. Soat em Deus xe acesop
wuyetait Jesus Cristo kay wuyetabut puye. Iboap wi-
wim cîcâ wuyju. Ixe Jesus Cristo emumuju òn. Ixe
a'òbi òn jekukum kawèn idipat muwènuwèn, Deus
a'òbi dak. ² Èn okpot co'i jewağuyoyo'i ma wuyeta-
but Jesus Cristo kay buye.

— Bay, xipan cuy Timóteo ejukuk — i òn e'em
Deus pe- wuyebay be. — Etabotaidabotbon cuy eğuy
Timóteo kay — i òn e'em Deus pe, Jesus Cristo be
dak- wuykukukat pe. — Yağuy mubabibin cuy eğuy
— i òn e'em cebe.

³ — Éfeso ka be juy eğuy ibo ka watwat mutay-
bit am — i juk oce ewebe Macedônia eipi kay oju
pin pima.

Gasû dak obikuy ewebe Éfeso ka be enuy am. Püğ-
püğayû warèmtağ ibo ka watwat mutaybitbin. Deus
ekawèn ġu ip imutaybitbin- jekawèn acâ.

— Warèmtağ ġu juy epeğutaybin — i juy ece
ixeyû ağokat kayû be. — Epeyepere juy warèmtağ ma
imutaybitbinap — i. ⁴ — Epeyekawènwèn ġu juy
apèn wuydobyû'ûm'ûm cuk adi o'e'e iam — i juy
ece cebe ip. — Epeğuwènuwèn ġu juy wuydo-
buyû'ûm'ûm putet — i juy ece cebe ip. — Jawa'ò-
xixiğ acâ epesop iboap muwènuwèn pima — i juy
ece cebe ip. — Iboam eyju kawènwèn pima, wara-
ra'acat epeğubikuy ġu Deus ekawèn tağ jeku am — i
juy ece.

Wuyetabut pima acâ wuyetaybit Deusan.

⁵ — “Wuydobyû'ûm'ûm ekawèn ġu juy
epeyekawèn- Deus ekawèn acâ,” i juy ece cebe ip —
i òn e'em ewebe.

Imèn òn eyawèwèm eywebe biğ ma xipan eyewewe-
kuk am. Apèn cedağ wuyxe iap tağ jekukum pima,

xipan wuyju jewewekuḡ, wuyaḡuyisu bima dak; i-cēmān wuyetabut Jesus Cristo kay bima dak. ⁶ Pūḡpūḡayū bit cūḡ ma jekukuap o'jepere. Cūḡat e daḡwi oitabidao'iaiyū buxim ip. Warēmtaḡ ma ip jemāmāmān o'e. ⁷ Deus ekawēn imutaybitbin'ukayūm pin ip- Moisés pe o'ḡuwēn'iat ekawēn imutaybitbin'ukayūm pin. Imēnpit itaybitbūt ā ip ixekawēn. Iboap ekawēn iba'arēm cexe ip. Imēnpuye te'e ma e'em ip:

— Ocejū ma juy Deus ekawēn jeymutaybin — i.

⁸ Wuyetaybit Deus ekawēn kawēntip cīcā iam- Moisés pe o'ḡuwēn iap ekawēn- wuyawēwēap ekawēn. Ixe ekawēn taḡ jekukum pima xipat cīcā kuka o'e wuyxe. ⁹ Deus jekawēn o'ḡuwēn cūḡ ma jekuku'ukayū awē ām ḡu- warēmtaḡ jekuku'ukayū awē ām acā. Wuyetaybit iboam. Ibūrū ma juk jekawēn o'ḡuwēn: ika'ūmayū be, iecuḡap a'ō kay kūyjobit'ūmayū be dak, jekay itabut'ūmayū be dak, ikērēat mujurūḡrūḡ'ukayū be dak, jekay'ūmayū be dak, jebiōḡbuk a'ō kay'ūmayū be dak, cebay o'yaoka'iaiyū be dak, warara'acat o'yaoka'iaiyū be dak, ¹⁰ warara'acat tayxi kaykay'ukayū be dak, warara'acat itop kaykay'ukayū be dak, jewekpidaodao'ukayū be dak, jenuy'ūnakeke'ukayū be dak, dinheiro bu am warara'acayū dujupa'um'um'ukayū be dak, napa'ukayū be dak, warara'acat awēḡ mukērērērēn'ukayū be dak, jemumutaybitbinap muwarururun'ukayū be dak. Ibūrū be ma jekawēn o'ḡuwēn. Ixeyū awē ām Deus jekawēn o'ḡuwēn.

¹¹ — Wekawēn acā juy eḡuwēnuwēn soat kaka watwat pe — i juk o'e owebe Deus. Ibiat ekawēn acā ōn imuwēnuwēn. Iboap acā icēmat. Ixe Deus soat podi ma xipat. Ka'ūma ma omuy ixekawēn jo'iat ya'ōbuyxiat, idipat tak.

¹² — Ēn xipat cīcā oxe — i juk o'e owebe wuykukukat Jesus Cristo. — Owebeam cuy kapikipiḡ eḡuy kawēn idipat muwēn ām soat ka daḡacat pe — i juk o'e owebe.

Ixe soat em wa'ōmucanucan owebe kawēn idipat mu-

wèn ãm soat ka dağacat pe. Imēnpuye soat em òn e'em cebe:

En xipan cīcā okuğ — i.

¹³ Jesus cuk adi ojomuymuy. Ixe butet cuk osu-butetmukērērēn kuy bima. Warēmtağ ma juk adi Jesus kayayū ojukukuk. Imēnpit Deus itabotaidabotbot cīcā osunuy okay, Jesus kay wetabut ġu oğuy buye. Wetaybit'ūma ojekukuku wetabut'ūm puye. ¹⁴ Wuykukukat warara'acayū bodi ma xipan cuk adi okuk. Ixe juk omutabun jewekay. Ixe juk omutaybin ikukpin warara'acayū kuk am. Imēn wuyju jekukum Jesus Cristo eju mūğ'i bima.

¹⁵ — Jesus Cristo osodot ipi kay ikērēat mujurūğ-rūğ'ukayū daxijo am — i wuyju e'em.

İcēmān wuyju iboam e'em. Cedağ cīcā wuywebe wuyetabut am iboap ekawēn kay. Warara'acat ikērēat mujurūğrūğ'ukat podi ma òn ikērēat mujurūğ-rūğ'ukat. ¹⁶ Imēnpit Deus itabotaidabotbot cīcā osunuy okay. Jesus Cristo yukpiceğēm ġu o'e okay. Ğasū ixe e'em warara'acayū be:

— Eya'òpicūğcūğ cuy epesop — i. — Paulo ma ikērēat mujurūğrūğxi osunuy. Òn pit ikērēm ġu ixe ojukuk- -xipan acā ixe ojukuk — i'e'em Deus warara'acayū be.

İtabut je'e ip cekay itabut'ūmayū, xipan okuğ puye, yukpiceğēm ġu o'e okay buye dak. Soat em Deus xe jeedop ip itait.

¹⁷ — Ēn pit soat podi ma xipat — i juy ace ixe Deus pe.

Ibuyxim cuy ixe ajukuk. Kuyje ixe Deus soat kukukat osunuy. Ğasū dak e'em ijodiacat kukukat. Ğuyjom tak soat kukukan jeenuy. Ixe acā je'ū ġu. Soat em itait jeenuy. Ixe ijo ba'ore wuywebe. Ixe acā Deusat. Ka'ūmğū wara'at- -ixē acā. Imēneju:

— Soat podi ma ėn edip — i juy ace cebe soat em.

İmēn cuy ace!

¹⁸ Timóteo, ėn okpot co'i. Imēnpuye jawēwē juy òn. Kuy bima Deus ekawēn muwēnuwēn'ukayū o'e ewebe:

— Deus cuk enaê jekawên muwên âm soat ka watwat pe — i.

Gebum cuy eḡuy ixeyū ekawên kay! Sorarayū icaat kuḡ jaokaap puxim. Imēnpuxim ḡebum cuy eḡuy apēn cuk o'e'e ip ewebe iap kay a'ōbaca'ūmap puxim. ¹⁹ Jesus Cristo kay etabucap ecepere ḡu juy. Apēn cūḡ ma exe iap taḡ cuy ejeku, Timóteo. Pūḡ-pūḡayū bit apēn cūḡ ma jexe iap taḡ ḡu ip jekukum. Jesus Cristo kay jetabucap o'jepere ip ixeyū aḡokat-kayū. Itabucap ip oi'ūm apēn kobexixi epiriḡ puje soat i'ūmap puxim. ²⁰ Himeneu ixeyū'in, Alexandre dak. Imēnpuye ixeyū xepxepayū oḡukorēm.

— Satanás eykukan cuy je'e — i juk oce cebe ip ixeyū mukūyjo am.

Ixeyū oḡukorēm itaybit am Deus muymuy'ūm âm.

2 Koap ōn jawē Deus eju kawên âm. Acekawên cuy Deus eju soat peam ijodiat peam.

— Bay, xipan cuy ixeyū ejukuk — i dak cuy ace cebe. — Ixeyū juy esubuywan — i juy ace cebe.

Ajoojuy Deus xewi soat peam. Wuyetaybit ixe soat em xipan wuykuḡ iam. Imēnpuye soat em:

— Bay, ēn xipat cīcā — i juy ace cebe.

² Deus eju juy acekawên soat eipi kukukayū beam, soat ka watwat kukukayū beam tak. Deus eju juy acekawên ixeyū be xipan wuykuk am, wuywebe kaba'ūm wuydop am tak, wuywebe Deus bikuyap taḡ wuyeku am tak, cedaḡ ma wuyeku am tak. ³ Xipan wuyekukuap xipat Deus xe- wuydaxijojo'ukat xe. Xipan wuyju jekukum pima, Deus mucokcokcoḡ acesop. ⁴ Ixe Deus ibikuy soat taxijo am ipiat'ajojoap kay ijuap puxim. Ibikuy ijodiacayū be itaybit am kawên icēmān. ⁵ ⁶ Pūḡ ma Deusat omuy. Ixe itakoma jījā ikērēat mujurūḡrūḡap kay. Ijodi bima Jesus Cristo aḡokatkan o'e. Jekpiwan ma oe'ū soat pewi ikērēat uk am. Imēneju Jesus Deus etakomaap o'ḡu'ūm. Ixe Jesus jebay o'ḡudin ijodiat kay. Yawēḡ muwên pin

pima, Deus Jesus e'ūap awēg o'yawēgmuwēn ijodia-cayū be. Yawēgtobuxik puje itaybit ip o'e Deus ibi-kuy soat taxijo am wuydaxijo am iam. ⁷ Imēneju Deus cuk onaē jekawēn muwēnuwēn'ukan. Ixe juk onaē Judeu'ūmayū mutaybitbin'ukan. Napa ġu ōn e'em. Icēmān ōn e'em ewebe.

— “Eyetabun cuy epesop Jesus Cristo kay” i juy ece cebe ip — io'e owebe.

⁸ Jawē ōn ġasū apēn cūg ma wuyeku am Deus eju kawēnwēnap'a be iam. Soat ka be bima juy ace-jekawēn Deus eju. Deus ekawēn tağ wuyeku pin pima juy acejekawēn ceweju, warara'acat kay wuyetakoma'ūm pima dak, jewa'ōxikxiğ'ūm pima dak.

⁹ Cūg ma juy jeedop ip aoyū Deus eju kawēnwēnap'a be. Cūg ma juy jeedop ip jesay kuğ. Warara'acat pe jejojoan ġu juy ip jeedop. Yağuyusan cuy ip jeedop. Iwarum ġu jadapmuğēğēm cuy jeedop ip warara'acat pe jejojoan. Ouro muğēğēbu kuğ ġu juy jeedop ip, pérola'a muğēğē'a kuğ ġu dak. Ibusopsupatpu kuğ ġu dak jeedop ip, teiboğat kuğ ġu dak jesay kuğ. Warara'acat pe jejojoan ġu juy jeedop ip aoyū. ¹⁰ Xipacat mujurūğrūğ cuy ip jeedop aoyū- -“Jesus ebekitkit oceju” i'e'e'ukayū. ¹¹ Deus eju kawēnwēnap'a be jemutaybitbin pima, mūğ cuy jeedop ip aoyū.

— Kuy wetaybit soan iboam — i'ūmğū juy je'e ip jewebe ma.

¹² Obu'u ayacat pe ağokatkat mutaybit am. Cūg ġu ayacat pe warara'acat kukan- -ağokatkat pe acā. Mūğ cuy jeedop ip aoyū. ¹³ Koap Adāo o'ğūğē Deus- -ağokatkat o'ğūğē. Kanomūm Eva o'ğūğē- -ayacat o'ğūğē. ¹⁴ Adāo ġu o'ğūğuykuku Satanás- -Eva acā. Eva koap Deus ekawēn mubuyxi'ūm'ūm o'e. ¹⁵ Imēneju aoyū je'itpi'ajojom o'e. Imēnpit Jesus kay ip itabut pima Deus ixeyū idaxijo, xipan warara'acat kuğ pima dak, warara'acat pe jejojoan'ūm jekukum pima dak, ikērēat mujurūğrūğ'ūm pima dak.

3 Timóteo, ġasū ōn jawē itabucayū kukukayū naē ām.

— Aġokatkat itabucayū kukukat ojuy bima, xipacan e ojuy — i wuyju e'em.

Iboap e'eap icēmān. ² Imēn cuy ip jeku Jesus kay itabucayū kukukayū. Cūġ ma juy jeku ip. Pūġ ma dak cuy jetayxim jukuk ip. Yaġuysan tak cuy jeedop ip. Jewawē juy ip ikērēat kukap puxim. Warēmtaġ ġu ma dak cuy jeku ip. Powatwat tujuōmōm'uġ tak cuy jeku ip jeduk'a be. Deus ekawēn warara'acat mutaybitbin'uġ tak cuy jeedop ip. ³ Ika'om ġu dak cuy jeedop ip. Warara'acat aokakam ġu dak cuy jeedop ip. Ya'ōtareġ ġu dak cuy jeedop ip. Itabotaidabotbon tak cuy jeedop ip warara'acat kay. Itabikukum ġu dak cuy jeedop ip warara'acat edinheiro kay. ⁴ Jeduk'a beayū kuġ tak cuy jeedop ip xipan. Jebekitkiyū mukūyjobitbin tak cuy jeedop ip. Jebekitkiyū be jemubuyxinam tak cuy jeedop ip. ⁵ Itaybit'ūm xipan jeduk'a beacat kuġ iam pima, kuka Deus kay itabucayū ikuk pa'ore o'e cebe ip. ⁶ Jesus kay itabun'isuat ġu juy epejomuy warara'acayū kukukan-itabucayū kukukan. Itabun'isuat muy buje:

— Warara'acat podi ma wa'ōbuyxi — i kuka o'e te'e ma.

Kuyje Satanás:

— Warara'acat podi ma wa'ōbuyxi — io'e te'e ma-ibiōġbuk kērēayū kukukat.

Tūybe Deus podi ma wa'ōbuyxi iān kuka o'e. Imēnpuye dak Deus ipiat o'supi'ajoat cebe-Satanás pe kuyje. Imēnpuxim itabun'isuat jewexe ya'ōbuyxi bima, Deus ipiat kuka o'supi'ajoat cebe. ⁷ Itabut'ūmayū emumubuyxin cuy epejomuy itabucayū kukukan ikukukat pe jemuġuycūġap puxim. Ixeyū xe ya'ōbuyxi'ūm pima, kuka o'jewemuġuycūġ ikukukat ip.

— Warēmtaġ ma cuk ip emuy itabucayū kukukan — i kuka o'e ip cebe.

Satanás enobano'abibubu be kuka o'at. Satanás kuka o'ġuġuykuku ikērēat mujurūġ ām.

⁸ Gasû ôn jawē itabucayū buywatwat'ukayū naē ām. Imēn cuy jeku ip ibuywatwat'ukayū. Ya'ōbuyxim cuy jeedop ip. Wara'at taḡtaḡtaḡ ḡu dak cuy jekawēn ip- -pūḡ taḡ ma. Kawēdi kōnkōnxi ḡu dak cuy jeedop ip. Itabikukum ḡu dak cuy jeedop ip soat kay jebubun. ⁹ Kawēn icēmān osodop ip itaybit ḡu kuyje- -pūḡpūḡ ā. Gasû bit ade itaybicayū o'e. Itabut cīcā jeedop ip kawēn icēmat kay. Apēn cedaḡ ma jexe ip iap taḡ tak cuy jeku ip. ¹⁰ Koam puk itabucayū buywatwat'ukat ojuyat cuy esubuyxijo. Epeye'awero juy tekū xe'e xipāt kuka o'e iam. Ibuyxijoap tomukadi soat xe xipāt pima juy epejomuy ibuywatwat'ukan. ¹¹ Ixeyū tayxi dak cuy xipāt ip jeedop. Cekawēnxim ḡu juy jeedop ip. Warara'acat muymuy ḡu dak cuy jeku ip. Yaḡuysan tak cuy ip jeedop. Soat em ip jeedop icēmat e'em. Imēn cuy jeedop ip itayxiyū. ¹² Itabucayū buywatwat'ukayū jetayxim pūḡ ma ip jukuk. Jekpotpoyū mukūyjobitbin tak cuy jeedop ip, jedaxiyū dak, jeduk'a beayū dak soat. ¹³ Xipan itabucayū buywatwan pima, soat ip ibuyxim jukuk. Ya'ōcam ip jeta- -bucap ḡuwēn warara'acat pe.

— Jesus Cristo kay wuyetabut pima, mūḡ'i aceku ceweju — i je'e ip soat pe.

¹⁴ Timóteo, ijudup mubararaḡ ôn eywebeaptum. Gaxīn ma'ḡu ôn cu ojuy ejom. ¹⁵ Ojuapibun pima bit, etaybit ece cūḡ ma jeku am warara'acayū eju- -Deus ebekitkit eju iam ijudup cocom pima. Wuyju Deus kay itabucayū- -soat em itaicat kay itabucayū. Wuyetaybit kawēn icēmān.

— Uk'a muycemucemap'ip puxim wuyju — i'e'em itabut'ūmayū cūḡ ma wuyekukuap cocom pima, kawēn icēmat taḡ wuyju jekukum puye.

¹⁶ Iba'arēm itabut'ūmayū xe apēn wuyetabut Deus kay iap, itaybit'ūm ip puye. Gasû bit iba'arēm ḡu o'e cebe ip, Jesus Cristo ixeyū mukūyjojom puye.

Ixe Jesus Cristo ijodian o'jebapuk. Deus biōḡbuk cuk adi o'e ixe be: "Ēn cūḡ cīcā oxe," i. Ixe o'jojoho Deus ekawēn tojtjot'ukayū. Itabucayū ixe

o'ḡuwēnuwēn ijodi. Ade ijodiat itabut
o'e ixē kay. Deus waram ixē o'ḡuyū
kabi kay.

4 Gasū ōn jawē ibiōḡbuk kērēat a'ō kay kūyjo-
bicayū be eymuḡuykukuap puxim. Amap ka-
bia be Jesus kay jetabucap jepere ip pūḡpūḡpūḡ.
Ibiōḡbuk kērēat ekawēn kay ma itabut jeedop ip-
wuymuḡuykukuku'ukayū a'ō kay dak. ² Soat em
napa ma e'em ip. Wuymuḡuykukukuxi ip. Itaybit ḡu
ip ajo xipat iam ajo xipat ḡu iam tak. Cewawē ba'o-
re ip. Ipikat puxim ip xidiḡ mupikupikap puxim.

³ — Cūḡ ḡu wuywebe jewebumūn ām — i'e'em
ip wuywebe napa ma. — Ibiat i'opi wuywebe — i
dak e'em ip napa ma.

Deus pit soat xat o'ḡubapuk itabucayū xan-
-kawēn icēmān itaybicayū xan. ⁴ Soat Deus emumuḡē xipat.
Imēnpuye ka'ūmḡu i'opiat wuywebe.

Imēnpuye jekōn pima:

— Bay, xipat cīcā ēn, soat em ēn ocexan iūmūm
ocewebe — i wuyju e'em Deus pe.

⁵ — Soat wemumuḡē xipat ipi watwat xan — i
juk o'e Deus.

Jekōn pima wuyju dak kawēnwēn Deus eju.

— Ēn xipat cīcā — i'e'em wuyju cebe.
Imēneju ka'ūmḡu i'opiat wuywebe.

⁶ Timóteo, owebe awēap cuy eḡuwēn wuykitpit-
piyū be itabucayū be. Iboam ixeyū mukūyjojom pi-
ma, xipacan ecesūy Jesus Cristo be kapikpik'ukan.
Kuy bima etabun cuy eḡuy Jesus Cristo kay iap eka-
wēn cuk adi ejojojo. Iboap ekawēn icēmān. Kūyjobin
cuy eḡuy iboap ekawēn kay bekicat jetitinap puxim.
Iboap ekawēn taḡ cuk adi ejekuku.

— Gasū dak imēn cuy ejeku — i ōn e'em ewebe.
⁷ Itabut'ūmayū dobuyū'ūm'ūm ekawēn kay ḡu juy
eḡuy. Te'e ma kuka eḡuy ixeyū ekawēn kay etabut.
Ixeyū'ūm'ūm ekawēn kay bima, wuybu'u kuka ace
wuyetabut am Jesus kay. Ēn pit soat em kūyjobin

cuy eḡuy Deus biōḡbuk a'ō kay biḡ ma etabut cīcā am Cristo kay. ⁸ Xipat wuywebe wuyjebit mubacacan am. Ibodi ma bit xipat wuywebe soat em kūyjobit am Deus biōḡbuk a'ō kay. Ixe a'ō daḡ jekukum pima, wuyaḡuy'isum kuka ajeku ijodi bima. Wuye'ū buje dak soat em Deus xe acesop waram wuyetai puje. ⁹ Icēmān ōn emutaybitbin iboam. Wuyetabun cuy ajop iboap ekawēn kay. ¹⁰ Wuyetabut cīcā Deus kay- -soat em itaicat kay. Imēnpuye wuyju kapikipiḡ cīcā warara'acat mutabut am cekay. Ixe soat taxijo ojuy. Ixe soat jekay itabucayū daxijojom.

¹¹ Timóteo, wawēwēap cuy eḡuwēn wuykitpitpiyū be.

— Paulo ekawēn taḡ cuy epekuku — i juy ece cebe ip.

¹² — Aypa ḡu buk ēn. Ocetabut ḡu ekawēn kay — i'ūmḡu juy je'e ewebe warara'acayū.

Cūḡ cīcā juy ejeku. Ekawēntim cuy eḡuy. Xipan tak cuy itabucayū ejukuk, itabut'ūmayū dak. Etahun cīcā dak cuy eḡuy Deus kay. Aḡuy'isum tak cuy eḡuy. Cūḡ ma juy ejeku warara'acayū be ekuap co'i jeku am. ¹³ Wajēmap wiwim pima Deus ekawēntup cocom cuy eḡuy je'awerorom'ukayū be ya'iḡo am. Deus ekawēn muwēnuwēn cuy eḡuy cebe ip. Ixeyū mutaybitbin cuy eḡuy Cristo ekawēn. ¹⁴ Deus cuk ja'ōbacaap o'ḡūm ewebe kapik am cebeam. Ixe juk ja'ōbacaap o'ḡūm ewebe jekawēn muwēnuwēn'ukayū eweju kawēn puje- -itabucayū kukukayū eweju kawēn puje. O'jewebumōḡ ip abi jeje Deus ekapikap pe emuy ām. Imēn cuk o'e ip Deus biōḡbuk a'ōbi. Ixe a'ōbacaap taḡ cuy ejeku. ¹⁵ Gebum cuy eḡuy owebe awēwēap kay. Iboap taḡ cuy ejeku. Imēn eku buje, "Big ma Jesus Cristo ekawēn taḡ ēn jekukum" i je'e ip ewebe ejojoayū. ¹⁶ Eday'em'um cuy eḡuy warēmtaḡ ekuap puxim, warēmtaḡ ma warara'acat mutaybinap puxim tak. Cūḡ ma eku buje, aḡuy'isum ejeku ijodi. Deus xe eḡuy e'ū buje dak. Ekawēn cocoayū dak ixexeedop ip soat em.

5 Ikērēat mujurūg puje, aypaat eḡukorēm ḡu juy. Eyawē acā juy. Ixe juy eyawē ebure awēap puxim. Aypapat eyawē juy ekitpit awēap puxim. ² Yabubut cuy eyawē eixīt awēap puxim. Warara'acayū aoyū dak cuy eyawē eixīt awēap puxim. Aoyū eju kawēnwēn pima jaejubuku ocepo iap kay juy ḡebum ḡu eḡuy.

³ Gasū ōn jemukūyjo apēn itop'e'ū'ibiyū buywan- -ibadip'ūmayū iam. 'Itop'e'ū'ibit i'it'et pima, i'iyū juy xipan jexi jukuk. Yuktaxitxet pima, yuktaxit cuy xipan jeawa jukuk. Deus xe cūḡ ma warara'acayū be ḡu ixeyū xi kuk am, ixeyū eawa kuk am tak- -ibadipyū be acā. Ixeyū itaybit cuy cūḡ ma Deus xe wuybadip kuk am iam kuy bima xipan ip jekukap teim. Irem ḡu juy jexi jukuk ip. Ixeyū juy ixat je'ḡūmgūm cebe ip, cesay dak. Imēn xipat Deus xe. ⁶ Pūḡpūḡ itop'e'ū'ibiyū tadaybot ma. I'it'et ḡu ip. Yuktaxitxet ḡu dak. Ixeyū itabut warara'acat kay ḡu- -Deus kay acā. Kabiam, ixima daḡ tak ka'ūmat ojuyjuy ip Deus xewi acā- -warara'acat xewi ḡu- -ixeyū itop'e'ū'ibiyū. Deus eju kawēnwēn ip warara'acat peam, warara'acat kay ḡebum puye. Ixeyū be acā itabucayū juy ixat je'ḡūm, cesay dak, ibadipyū'ūm puye. ⁶ Warara'acayū bit imēn ḡu jekukum itop'e'ū'ibiyū. Jewemucokcokcoḡ ā jekukum ip. Itabēḡ ip. Inaka Deus xe ce'ūat co'i ip warēmtaḡ ma jekukum puye. Ixeyū juy esubuywan ḡu. ⁷ Owebe awēwēap cuy eḡuwēn wuykitpitpiyū be warara'acayū be ixeyū ekukuap muymuyap puxim. ⁸ Xipan wuybadip kuḡ'ūm pima, wuyetabucap epereap co'i aceku. Itabut'ūmat eku- kuap podi ma ikērēm aceku.

⁹ Soat ḡu juy esubutetmōḡ ip itop'e'ū'ibiyū butet itabucayū e'awerorop'a beatup pe. Itop'e'ū'ibit yabut pima- -60 koato kuḡ pima; ceweitopta ebikamat itom pima dak; ¹⁰ warara'acayū "Teku xipacan e'em soat em" i'e'em pima dak; xipan je'iyū o'ḡuaypan pima dak; jeduk'a be powatwat tujuōmōm pima dak, soat em Deus ebekitkiyū buywatwan pima dak; iba'oreat kukayū buywatwan pima dak; warara'acat pe idipat mujurūḡrūḡ pima dak- -ixeyū butet acā esu-

butetmubararak taperadup pe- -teyūku kapikpiḡ Deus peam iaptup pe.

¹¹ Yaypan'isuat putet pit esubutetmōḡ ḡu juy iḡodup pe- -itop'e'ū'ibit putetup pe. Waram jewebumūn pin je'e ip. Ibu'u je'e ip kapik am Cristo beam.

¹² Koap pima:

— Waram pit ocewebumūn ḡu. Cristo beam acā kapiḡ ōn — i juk o'e ip. Ibu'u ip pima bit:

— Te'e ma “Cristo beam acā kapiḡ ōn,” i juk ece — i je'e warara'acayū cebe ip.

¹³ Ixeyū itop'e'ū'ibiyū te'e ma ip kabiabun kapkam uk'a kapkam. Ibukapik'ūmayū ip. Cekawēnxi ip. Kawēn mukērērēn tak ip. Imuwēnpiat muwēnuwēn ip.

¹⁴ Imēneju:

— Waram jewebumūn cuy ip itop'e'ū'ibiyū yaypan'isuayū — i ōn e'em. — Waram jewe'ita juy ip — i ōn e'em. — Xipan cuy ip jeedop je'iyū kuḡ — i ōn e'em.

Waram ip jewebumūn puje, wuymuy ba'ore je'e wuykay'ūmayū be. ¹⁵ Pūḡpūḡ itop'e'ū'ibiyū'in o'jēm Deus e daḡwi. Satanás a'ō kay kūyjobit am ip o'jēm.

¹⁶ Itabucat padip itop e'ū buje, ibadipyū juy ixē su-buywan.

— Ocebadip cuy epesubuywan — i'ūmḡu juy je'e warara'acayū be, itabucayū be.

Ibadip'ūmayū buywatwan pit ip jeedop itabucayū.

¹⁷ Xipan cuy itabucayū kukukayū ajukuk. Eykukayū xipan itabucayū kuḡ pima, xepxem cuy cekapikaptei epeteida cebe ip. Kapikpiḡ cīcā bima, xepxem cuy cekapikaptei epeteida cebe ip Jesus ekawēn muwēnuwēn'ukayū be- -Deus ekawēn eymutaybitbin'ukayū be dak. ¹⁸ Imēn e'em Deus ekawēn

tup- -Moisés emudupmubararaktup: Imukapikpiḡ pima, eōhōbi epesubimukirik ḡu juy jexat'oap puxim- -āḡ jekōn, i. Imēn e'em Lucas emudupmubararaktup: Cekapikaptei juy epeḡūm kapikpik'ukat pe, i. Imēneju cekapikaptei juy epeteida itabucayū kukukayū be. ¹⁹ Pūḡ pe itabucayū kukukat muymuy buje, eyetabun ḡu juy epesop ixē ekawēn kay. Xepxepayū bit, ebapūḡayū dak pūḡ taḡ ma ixē muymuy buje, eyetabun cuy epesop ixeyū ekawēn kay.

Wara'at taḡtaḡtaḡ pima bit, eyetabun ḡu juy epe-sop ixeyū ekawēn kay. ²⁰ Itabucayū kukukat ikērēat mujurūḡrūḡap epere am ibu'u bima juy epeḡukorēm soat etabutpe. Epeḡukorēm cuy warara'acat pe ipa-rara am ikērēat mujurūḡap puxim.

²¹ Timóteo, owebe awēwēap taḡ cuy ejeku. Pūḡ taḡ ma juy ejukuk soat itabucayū. Ebu'um ḡu juy eḡuy imukorēm ām ip ebureyū ma'ḡu ip. Iboap mu-wēnuwēn ōn ewebe Deus a'ōpiju, Jesus Cristo a'ōpiju dak, Deus ekawēn tojtjtot'ukayū a'ōpiju dak - ikērēat kuḡ'ūmayū a'ōpiju. ²² Dao ḡu juy ecewebumōḡ aḡo-katkat abi jeje imuy ām itabucayū kukukan. Wara-ra'acayū ikērēat mujurūḡrūḡ pima, eju ḡu juy ceweju ip. Aḡuy'isum cuy eḡuy. Ikērēat cuy eḡuḡē ḡu - pūḡ em tak ka'ūma.

²³ Idibi at ḡu juy etikōnkōn. Uva'abidi dak eti-kōnkōn, edada muxere am.

²⁴ Pūḡpūḡayū soat etabutpe ikērēat mujurūḡrūḡ. Soat itaybit ikērēat mujurūḡrūḡ ip iam. Itaybit ip ḡaxīn ma Deus ipiat supi'ajoat cebe ip iam. Wara-ra'acayū bit iba'arēm ma ikērēat mujurūḡrūḡ. Guy-jom pit soat itaybit je'e ikērēat o'ḡujurūḡrūḡ ip iam. ²⁵ Imēnpuxim pūḡpūḡayū ma soat etabutpe ma xipacat mujurūḡrūḡ. Soat itaybit xipacat mujurūḡrūḡ ip iam. Warara'acayū bit iba'arēm ma xipacat mujurūḡrūḡ. Gasū ka'ūma ma itaybit apēn ixeyū e'em iam. Guyjom pit itaybit je'e ip.

6 Tei'ūm kapikpik'ukayū be ecekawēn cuy - Jesus kay itabucayū be.

— Ibuyxim cuy eyekariwa epejukuk — i juy ece cebe ip. — Ibuyxim ip ikuḡ pima kuka Deus o'jomuyḡu ḡu ip itabut'ūmayū — i juy ece cebe ip. — “Pauloyū warēmtaḡ ma itabucayū mutaybitbin,” i'ūmḡu kuka dak o'e ip — i juy ece cebe ip.

² Pūḡpūḡ ixeyū'in kapikpiḡ itabucayū beam, je-kitpitpiyū beam.

— “Kūyjobin ḡu oce wekariwa a'ō kay, ixē dak

itabut Jesus kay buye," i'ümġu juy epe'e — i juy ece cebe ip. — Xipan cîcâ juy epeyekapik cebeam ixeyû dak itabut puye, Jesus xe ikukpin ip puye dak — i juy ece cebe ip.

Timóteo, iboam cuy itabucayû eġutaybin.

— Xipan cuy epeku — i juy ece cebe ip- -tei'üm kapikpik'ukayû be.

³Wuykukukat ekawên icēmân- -Jesus Cristo ekawên. Ixe ekawên taġ jekuku'ukat Deus bikuyap taġ tak jekukum. Ade'ümayû bit cekawên kay ġu. Cekawên ġu imutaybitbin ip. Warêmtaġ ma imutaybitbin ip.

⁴ — Warara'acat podi ma ocetaybit — i'e'em ip te'e ma.

Imēnpit itaybit ġu ma ip. Soat em jewa'õxixiġ ip. Jawa'õdawutwutxi ip. Itabikuku e'em ip jewewekay, imēn jekukum puye. Wara'at taġtaġtaġ ma ip kawēnwēn. Itabutkarey ip jewewekay. ⁵Soat em ip jewa'õxixiġ jeweweju. Yaġuyba'arēm ip o'e. Oibu'un ip kawēn icēmat kay. Tūybe Deus kay wuyetabut pima acejekariwan iân e'em ip. ⁶Deus kay itabucat ibubut adeat puxim e'em icokcok, Deus kay wuyetabucap wuybubut kuġ iap podi ma xipat puye. ⁷Ajo-kuġ wuybui be wuykap'isum? Ka'üma kuġ! Imēnpuxim ajo'in acetujowat ijodiwi wuye'ü buje? Ka'üma ma! ⁸Wara'at kuġ'üm pima, wuycokcoġ mabuk acesop wuydotite bima, wuyxaxet pima dak. ⁹Ibubut ade pinayû ikêrêat mujurûġrûġ dinheiro buap ojuy. Warêmtaġ e'em ip itabikuku soat kay jebubun puye. Xipat ġu ip soat xe ijodiat xe. Soat em ipiat supi'ajojo ip. Deus wi wūy ma jeedop ip. ¹⁰Ikêrêat mujurûġrûġ ip soan dinheiro kay itabikukuap tomuju. Pūġpūġayû oibu'un ip Jesus kay. Jetabucap o'jepere ip dinheiro kay jġjâ buye. Ade o'jat ip dinheiro. Inaka iġuycūġ cîcâ ip jekukum jetabucap o'jepere buye.

¹¹Ēn pit, Timóteo, Deus a'õbuywatwat'ukat ěn. Imēnpuye ikêrêat pewi juy ecenapõn. Cūġ ma juy ejeku. Ikukpin cîcâ juy Deus ejukuk. Etaban cîcâ juy eġuy cekay. Ikukpin cuy warara'acat tak ejukuk.

Etaxim cuy ipiat esupi'ajo. Yoboğan pin ġu juy eġuy.
¹² Jedaudau'ukat soan jewūncaan jedaudaum koap jedauap epere am jabeatup pu ojuy adeayū etabutpe. Ixe buxim ēn tak soan a'ōbacaan cuy etabut eġuy Jesus kay. Ebu'u'ūm pima, soat em Deus xe eġuy e'ū buje. Adeayū etabutpe:

— Wetabun oġuy Jesus kay ġebu je bit — i juk ece kuy bima.

Imēn i'e buje, Deus cuk enaē soat em enuy am jexe.
¹³ ¹⁴ Jesus ekawēn taġ cuy ejeku ewebe ikērēat muġēap puxim; Jesus pe "Ikērēat kuġ ēn" i'eap puxim ewebe. Wara'at taġ ġu juy ejeku- -Jesus ekawēn taġ acā- -soat ekawēnwēnap taġ acā. Ixe ekawēn taġ cuy ejeku wuykukukat ajēmap wiwim pima- -Jesus Cristo ajēmap wiwim pima. Iboam ōn awēwēm Deus etabutpe, Jesus Cristo etabutpe dak. Ixe Deus soat mutaicin. Ixe Jesus Cristo iparara'ūma kawēn icēmat o'ġuwēn iecuġap pe- -Pōncio Pilatos pe. ¹⁵ Imudot pin pima, Deus waram ixe Jesus Cristo ġudot wuykay. Ixe Deus xipat cīcā. Wara'at ġu omuy ijodiat kukukat- -Deus acā. Ixe ijodiat kukukayū kukukat. Ixe ijodiat ekariwawayū ekariwa. ¹⁶ Soat pit ace'ū. Ixe bit je'ū ġu. Ka'ūmġu xipat'ūmat cebe. Daxadiae beat co'i. Wuyajēm pa'ore cetēġ. Abu ixe o'jojojo? Ka'ūma ma. Iba'ore wuywebe ijo am.

— Kūyjobin ocesop a'ō kay acā — i juy ace cebe. — Soat podi ma ēn a'ōbaca — i juy ace cebe. Imēn cuy ace.

¹⁷ Timóteo, ibubut adeayū juy eyawēwē.

— Eya'ōbuyxian pin ġu juy epesop — i juy ece cebe ip. — Dao ma kuka eybubut oi'ūm — i juy ece cebe ip. — Imēnpuye eyetabun ġu juy epesop eybubut kay- -Deus kay acā eyetabun — i juy ece cebe ip. — Deus ade iūmūm wuywebe wuymucokcok am — i juy ece cebe ip. — Soat wuyemumukaypinpūt iūmūm wuywebe — i juy ece cebe ip. ¹⁸ — Xipan cuy warara'acat epejukuk — i juy ece cebe ip. — Xipacat cuy epeġujurūġrūġ — i juy ece cebe ip. — Eydacum ġu juy epesop warara'acat pe — i juy ece cebe ip. — Ibut'ūmat pe juy eybubut'in epeġūm — i juy ece cebe ip. ¹⁹ — Eybubut'in iūm-

ũm pima ade epejukuk eybubun kabi be — i juy ece cebe ip. — I'ũm ġu eybubut — i juy ece cebe ip. — Icēmān Deus xe epesop eyetait — i juy ece cebe ip.

²⁰ Timóteo, apēn Deus o'e ewebe iap taġ cuy eju-ku. Ade'ũmayũ warēmtaġ ma kawēnwēn ip. Jewa'õ-xixxiġ ip. Deus muymuy ip. Cekawēnxiayũ ip.

— Warara'acat podi ma ocetaybit — i'e'em ip napa ma.

Ecekawēn ġu juy ceweju ip.

²¹ — Warara'acat podi ma ocetaybit — i'e'em ip napa ma.

Jetabucap ip o'jepere e bewi oitabidao'ibit puxim.

— Bay, xipan cuy Timóteo ejujuk — i õn e'em Deus pe. — Xipan cuy soat Jesus kay itabucayũ ejujuk — i õn e'em cebe.

Ibũrũ ma.

TIMÓTEO BEAPTUP PAULO EMUDUPMUBARARAKTUP XEPXEPATUP

1 Timóteo, cartadup mubarararağ òn ewebe kato mujuaptum. Òn Paulo. Jesus Cristo e-mumuju òn Deus a'òbi. — “Jesus Cristo eju mūğ'i eyju jekukum pima, soat em Deus xe epesop eye-tait,” i juy ece ijodiacat pe — i juk o'e Jesus Cristo owebe.

² Timóteo, ên okpot co'i. Ekukpin cîcâ oxo. Deus wuyebayat. Jesus Cristo wuykukukat. Deus eju òn kawênwên ewebeam.

— Xipan cuy Timóteo ejukuk — i òn e'em cebe. — Etabotaidabotbon cuy eğuy cekay — i òn e'em cebe. — Ixe ağyumubabibin cuy eğuy — i òn e'em cebe.

³ — Bay, ên xipat cîcâ — i òn e'em Deus pe. Warara'acat a'ò dağ ġu òn jekukum-ixe a'ò dağ acâ. Wedobuyū'ūm'ūm tak ixe a'ò dağ jekuku'uk ip osodop. Ococok ixe kay soat apên cedağ oxo iap tağ òn jekukum puye. Ixe eju òn kawênwên ewebeam soat em. Kabiam òn kawênwên ceweju, ixima dağ tak. ⁴ Ğebum cîcâ òn ekay. Exewi ojêm puje etôn iap kay ġebum òn. Ejo pin cîcâ òn waram ococok am. ⁵ Ğebum òn apên etabut Jesus Cristo kay iap kay. Jewexe ġu etabut cekay-icēmân. Koap pima eawa Lóide itabut osunuy cekay. Exi Eunice dak itabut osunuy cekay. Ixeyū buxim ên tak etabut cekay. We-taybit cîcâ iboam. ⁶ Imēnpuye òn jeāwē. Itbucayū kukukan emuy buje, juk ocwebumōğ abi jeje. Deus cuk ja'òbacaap o'jomōğ ewebe. Ğebum cuy eğuy iboap kay. Ixe a'òbacaam cuy ejeku. ⁷ Deus jebiōğ-buk muômôm wuywebe. Ixe biōğbuk wuymuparararan ġu- wuya'òmucanucan acâ. Deus ja'òbacaap ūmūm wuywebe. Ya'òbacaap kuğ pima xipan kuka wara-ra'acayū ajukuk. Jewawēwēm tak ajop ikērēat muğēap puxim.

⁸ Itabut'ūmayū odaomūn wuykukukat ekawên

oġuwēnuwēn puye. Inaka esūsūn ġu juy eġuy obuxim, daomūnmūnap'a be ma'ġu ōn. Ebiūsūsūn ġu dak cuy eġuy wuykukukat ekawēn muwēn ām warara'acayū be. Owebe ipiat'ajojoap puxim ipiat supi'ajo an ip ewebe ēn ixe ekawēn muwēnuwēn puye. Ebu'um ġu juy eġuy imuwēn ām ipiatpi'ajojom ma'ġu. Deus ja'ōbacaap je'ġūm ewebe. ⁹Ixe Deus kuy wuydaxijo. Ixe kuy wuynaē jebekitkiyūm. Ixe kuy wuynaē xipacat aġuġēġē buye ġu- -ixē wuynaē pin puye acā, ixe xe wuykukpin puye dak.

— Xipacat oġūm soat pe Jesus Cristo kay itabucayū be — i juk o'e Deus jewebe ma.

Imēn cuk o'e jewebe ma ka'ūmġu ipi bimān ma. ¹⁰Ixe xipacat ūm pin osunuy soat pe iam wuyetaybit ġu juk adi ajop. Ġasū bit wuyetaybit ace. Wuyetaybit ace wuydaxijojok'ukat oajēm puye. Jesus Cristo kuy oajēm. Ixe Jesus Cristo xipacat ūmūm wuywebe. Ixe ce'ū osunuy. Inaka waram ġuto o'jetait. Ixe wuye'ū'ūap a'ōbacaap o'ġu'ūm. Kawēn idipat muwēnuwēn cuk adi oekuku.

— Soat em eyetait epesop Deus xe eye'ūap tomukadi — i juk adi o'e'e wuywebe.

Imēnpuye Jesus Cristo kay wuyetabut pima, wuypararam ġu wuye'ūap puxim.

¹¹Deus cuk onaē jemumujum.

— Wa'ōbi juy kawēn idipat muwēnuwēn eġuy — i juk o'e owebe. — Itabucayū mutaybitbin cuy eġuy — i juk o'e owebe.

¹²Itabut'ūmayū ipiatpi'ajojoan owebe, ōn kawēn idipat muwēnuwēn puye. Obu'u ġu ma'ġu oġuy wetabut am Jesus kay. Wetabut cuk adi oġuy cekay. Ġasū dak wetabut ma cekay, wetaybit cīcā ixem puye. Wetaybit soat podi ma ixe ya'ōbaca iam. Soat oġūm cebe iap muxipanpan jeenuy jajēmap kabia wiwim pima. ¹³Kawēn icēmān cuk adi ōn emutaybitbin. Iboap ekawēn taġ cuy ejeku. Weku-kuap puxim cuy ejeku. Etahun cīcā juy eġuy Jesus Cristo kay. Xipan cuy warara'acayū ejukuk. Imēn cuy ajeku Jesus Cristo eju mūġ'i wuyju jekukum pima. ¹⁴Kawēn idipat o'ġuwēn ip ewebe kuy bima. Ġebum cuy eġuy iboap ekawēn kay. Ibiōġbuk xipa-

cat omuy wuywebe- -Deus biōgbuk. Ixe biōgbuk wuybuywatwan ixe ekawēn kay ġebum am.

¹⁵ Ade Ásia eipi watwat'in cuk opere iap awēg kuy eyawēgtobuxik. Fígelo ma ixeyū'in osunuy, Her-
mógenes tak. ¹⁶ Onesíforo bit obuywatwat'uk osunuy.

— Xipan cīcā juy Onesíforo ejukuk, ibadipyū dak — i ōn e'em wuykukukat pe.

Ixe isūsūn ġu osunuy jajēm ām daomūnmūnap'a be ojo am. Pūg em ġu ixe Onesíforo omucokcokcoġ- -ade em ma. ¹⁷ Roma ka be jajēm'isum okudadam oeku. Odobuxik puje acā oibu'un okudadam. ¹⁸ Etaybit Ê-
feso ka be bima soat em ixe obuywatwat'uk osunuy iam. Imēneju:

— Wetabotaidabotbon cuy oġuy ekay kūyjobit-
'ūmayū be ipiat'ajoap kabia be iam cuy Onesíforo eġutaybin — i ōn e'em wuykukukat pe.

2 Timóteo, ěn okpot co'i. Deus soat em xipan wuykuġ Jesus Cristo eju mūg'i wuyju jekukum puye. Imēnpuye a'ōbacaam cuy eġuy! ² Adeayū mutaybitbin cuk adi oġuy- -emutaybitbin tak. ěn pukto iboam cuy cūg ma jekuku'ukayū mutaybitbin eġuy ixeyū be warara'acayū mutaybin am.

³ Ade itabucayū ipiatpi'ajojom. ěn tak sorara bu-
xim ebu'um ġu juy eġuy ipiatpi'ajo am. Jesus Cristo esoraram cuy eġuy. Sorara buxim ixe a'ō kay acā juy kūyjobin eġuy. ⁴ Nopaġōġōm pima jeduk'a beat co'i'ūmġu jekukum sorarayū. Ja'ōbi ġu ip jekukum-
jekukukat a'ōbi acā. Imēnpuxim Jesus Cristo a'ōbi acā ejeku. ⁵ Cedaġ ma o'jedau bima acā kuka o'jat jedauaptei warara'acat podi ma iwūncaat. Cedaġ'ūm o'jedau bima bit, kuka o'jat ġu. Imēnpuxim ěn tak cuy cedaġ ma ejeku. ⁶ Ku be ibukapik cīcāat cuy koam jexat'am yabu. Imēnpuxim ěn tak cuy eceka-
pik cīcā Jesus Cristo beam. ⁷ Timóteo, ġebum cuy eġuy wekawēn kay. Wuykukukat cuy jemutaybin apēgape wekawēn iam.

⁸ Gebum cuy eḡuy Jesus Cristo kay. Deus ixē Jesus Cristo o'ḡutait ce'ūap tomukadi. O'ḡuyu kabi kay. Davi naxeḡebit o'ḡuyu. Iboap cuk adi oḡuwēnuwēn kawēn idipat muwēnuwēn pima. ⁹ Itabut'ūmayū juk adi ipiat o'supi'ajojoat owebe, kawēn idipat oḡuwēnuwēn puye. Ikērēat mujurūḡrūḡ'ukat puxim ip odaomūn owebe kawēn idipat muwēḡap puxim. Imēnpit iba'ore cebe ip kawēn idipat muwēḡap mu'ūm ām. Kawēn idipat muwēnuwēnap i'ūm ḡu. ¹⁰ Imēneju wetaxi jījā ipiatpi'ajo am Deus emunaēhēyū be kawēn idipat a'ijo am. Wetaxi jījā ixeyū mutabut am Jesus Cristo kay. Deus ixeyū dak idaxijo wuydaxijoap co'i. Deus dipap kuḡ jeedop ip. Ixeyū dak Deus xe jeedop wuyweju. Soat em wuyetait acesop cexe. ¹¹ Apēn cuk adi oḡuwēnuwēn ewebe iap waram ḡuto oḡuwēn ewebe ḡasū dak. Iboap ekawēn icēmān.

Wuybu'u'ūm pima wuye'ū ām Cristo bikuyap taḡ wuyekuap ojuy, ixē xe acesop wuyetait, i.

¹² Ipiatpi'ajo am wuyetaxi bima, ijo-diacat kukukayūm acesop Cristo eju, i.

"Ōn pit Cristo ebekit ḡu," i wuyju e'em pima, "Eyju dak webekitkiyū ḡu," i je'e wuywebe ixē dak, i.

¹³ Wuyju ixē ḡkawēn epereperem. Cristo bit ja'ōmuwarururun ḡu. Ixe soat em e'em apēn cuk adi o'e'e iap taḡ, i.

¹⁴ Owebe awēwēap cuy eḡuwēn ebekitkiyū be ḡebum ip top am. Eḡutaybitbin cuy ip.

— "Epeyewa'ōxikxik ḡu juy," i ōn e'em eywebe Deus topabe — i juy ece cebe ip.

Jewa'ōxikxiḡ pima ip ya'ijojomayū buywatwan ḡu ip-ixeyū mubu'u'un acā jetabut am Jesus Cristo kay. ¹⁵ Soan ma ece Deus pe "Cūḡ ma ēn jekukum oxe" i'e am ewebe. Cūḡ ma juy kapikpiḡ eḡuy esū-sūnap puxim Deus pe ekapikap coan. Kawēn icēmat cuy eḡutaybitbin-Deus ekawēn. ¹⁶ Te'e ma jewa'ōxikxiḡ ip adeayū. Deus pit cekawēn kay ḡu ip.

Ixeyū ekawēn coco'ukayū biḡ ma Deus kay ḡu e'em. Jawa'ōxikxiḡ ḡu juy eḡuy ixeyū eju. ¹⁷ Ot'ū'ū wuyēn mu'ūmu'ūm. Imēnpuxim ixeyū wuymutaybitbin pima wuyetabucap kuka o'ḡu'ūm ip. Wuyumbu'un kuka ip Cristo kay wuyetabut am. Himeneu ixeyū'in Fileto dak. ¹⁸ Pūḡpūḡ itabucayū'in ixeyū ekawēn kay itabut o'e. Imēnpuye oibu'un ip Jesus kay. Jetabucap o'jepere ip e bewi itabidaoat puxim.

— Deus kuy itabucayū'ūm'ūm o'ḡuyu kabi kay — i napa ma e'em ip itabucayū be. — Wuyiwat xeku — i napa ma e'em ip.

Imēn ip itabucayū mu'ukpiceḡḡḡn Jesus kay. ¹⁹ Wuyju bit acejepere ḡu wuyetabucap, kawēn cūḡat kay wuyetabut puye. Cem ma uk'a muy buje, ya'at'et ḡu. Imēnpuxim kawēn cūḡat kay wuyetabun puje, acejere ḡu dak. Deus ebekitkiyū wuyju. Imēn e'em Deus ekawēntup:

Wuykukukat itaybit abuyū webekitkiyū iam, i.

Wara'atup e'em:

“Deus ebekit ōn” i'e'e'ukat ikērēat mujurūḡrūḡap cuy jepere, i dak e'em Deus ekawēntup.

²⁰ Ya'ade opop ibubut mūn'a'a yaboḡat'a be, ibubut adeat tuk'a be. Ouro muḡḡḡḡ'a opop, prata muḡḡḡḡ'a dak, ip muḡḡḡḡ'a dak, wuynōm muḡḡḡḡ'a dak. Pūḡpūḡ'a kuḡ ip soat kabia. Wara'at'a kuḡ pit ip xipacat ebapuk puje acā, ya'ōbuyxiat ajēm puje acā. ²¹ Ikērēat mujurūḡrūḡap epere buje wuyju dak xipat acesop wuykukukat Jesus xe.

— Obuywatwan cuy eḡuy, xipat ēn oxe buye — i je'e wuywebe. — Ocokcok cīcā ekay — i je'e wuywebe, wuyaḡuyisu buye, ikērēat mujurūḡrūḡap kuy acepere buye dak.

²² Yaypan'isuayū etabikukuap kay ḡu juy eḡuy. Cūḡ ma juy ejeku Deus etabutpe. Etahun cuy eḡuy Jesus Cristo kay. Ikukpin cuy soat ejukuk. Kaba'ūm cuy eḡuy warara'acat eju. Imēn ma jekukum ip - - “Ocekukukat, ocebuywatwan cuy eḡuy” i'e'e'ukayū - - Deus emumuisunayū. ²³ Ecekawēn ḡu juy jewa'ōda-

wutwut'ukayū eju, warēmtaḡ ma kawēnwēn'ukayū eju dak. Jawa'ōxikxiḡ acā ip. ²⁴ Wuykukukat buy-watwat'ukat pit jewa'ōxikxiḡ ḡu juy. Xipan cuy soat jukuk. Xipan ma juy soat mutaybitbin jeenuy. Yukpiceḡēm ḡu juy warara'acat jukuk. ²⁵ Wuy-muymuy'ukayū mukūyjobitbin pima, wuya'ōpuruḡ ḡu juy acekawēn ceweju ip. Ibuyxim cuy ip ajukuk. Guyjom paxi Deus ixeyū ḡubu'un ikērēat kay am. Ixeyū aco'i ḡutabun kawēn icēmat kay. ²⁶ Kuy bima ibiōḡbuk kērēayū kukukat ixeyū o'jat puca buap puxim. Ibiōḡbuk kērēayū kukukat bikuyap taḡ ip jekukum ḡasū. Gaxīn ma aco'i ḡuto ip yaḡuysan. Ibu'un aco'i kuka ip ibiōḡbuk kērēayū kukukat a'ō kay nobano'abibubu bewi puca o'kap iat puxim.

3 Amap kabia iba'ore jijā je'e itabucayū be Deus ekawēn taḡ jeku am adeayū ikērēat ḡujurūḡrūḡ puye. Gebum cuy eḡuy iboap kay. ² Jewekay acā ḡebum jeedop ip ijodiacat. Itabikuku jijā jeedop ip dinheiro kay.

— Soat podi ma oca'ōbuyxi — i je'e ip napa ma. — Ka'ūmḡu ocejo'iat ya'ōbuyxiat — i napa ma je'e ip.

Warara'acat ekawēn mukērērērēn jeedop ip.

— Ēn xipat cīcā — i'ūmḡu je'e ip, warara'acat xipacat ūmūm ma'ḡu cebe ip.

Kūyjobit ḡu jeedop ip jebay a'ō kay, jexi a'ō kay dak. Ibuyxim ḡu ip Deus jukuk. Ixe kay itabucayū dak jukuk ip ibuyxim ḡu. ³ Abu jukuk ikukpin? Ka'ūma ma. Ya'ōpuruḡ ip soat jukuk. Warara'acat muymuyxi jeedop ip. Jewawēwēm ḡu jeedop ip ikērēat kukap puxim. Dao ma ip etakomamān. Xipacat kay ḡu jijā jeedop ip. ⁴ Jebureyū tujowat ip cekay itakomaayū be yaoka am. Warēmtaḡ ma jeku ip. Jewexe yoboḡ cīcāayūm jeedop ip. Deus mucokcok pin ḡu jeedop ip- -jewemucokcok pin acā.

⁵ — Ocejū dak Deus ebekitkiyū — i napa ma je'e ip warara'acat pe.

Inaka itaybit ġu jeedop ip Deus a'ōbacaap kuk am. Deus bikuyap taġ ġu jeku ip- -jebikuyap taġ acā. Ixeyū burem ġu juy eġuy, ēn pit. ⁶⁻⁷ Ixeyū'in aoyū muġuykukukum- -yaġuy'ūmayū muġuykukukum. Ixeyū aoyū ikērēat mujurūġrūġ soat em.

— Ikērēat kuġ oceju — i'e'em ip ixeyū aoyū. Inaka ikērēat mujurūġrūġap epereperem ġu ip. Iparara ip Deus ipiat supi'ajoat ocewebe iap puxim. Inaka kūyjobit pin ġu ip Deus pe jedaxijoan. Jewexe ip kawēn icēmat kudadam. Jewexe jewemutaybitbin ip. Inaka itaybit pa'ore cebe ip kawēn icēmān. Imēnpuye imuġuykuku'ukayū ōmōm ixeyū aoyū duk'a be. Warēmtaġ imutaybitbin ip.

— Ocekawēn taġ cuy epeku eyejuap puxim ipiat'ajojoap kay — i'e'em ip cebe ip napa ma. Imēn aoyū muġuykukukum ip kawēn icēmat tobu-xikap puxim. ⁸ Moisés kawēn icēmat muwēnuwēn'uk osunuy Deus a'ōbi kuyje. Janes Moisés a'ō kayġu jījā osunuy, Jambres tak. Kawēn icēmat kay ġu jījā osodop ip. Imēnpuxim ixeyū aġokatkayū warara'acayū muġuykukukum ixeyū be kawēn icēmat kayap puxim. Yaġuy'ūm ip. Jesus kay jetabucap ip o'jepere. Itabut'ūmat co'i ip Deus xe. ⁹ Soat em ġu bit ijodiacat ġuġuykuku ip- -xepxep kabia ā. Ġuyjom soat ijodiacat je'e cebe ip:

— Ajo am eyetaybit? Ka'ūma am ma! — i. Imēnpuxim kuyjeayū'ūm'ūm o'e Janes pe, Jambres pe dak.

¹⁰ Bekit, etaybit cīcā apēn ōn jekukum iam, apēn ōn warara'acat mutaybitbin iam tak, apēn obikuy Deus bikuyap taġ weku am iam tak. Etaybit apēn wetabut Jesus Cristo kay iam, apēn wuypiceġēm ġu ōn warara'acat kuġ iam tak, apēn ikukpin warara'acat kuġ ōn iam tak, apēn wetaxi ipiat'ajo am iam tak. ¹¹ Itabut'ūmayū juk adi ikērēm okuk. Ipiat cuk adi o'supi'ajoat ip owebe. Ikērēm cīcā juk adi ip okuk Antioquia ka be bima, Icônio ka be bima dak, Listra ka be bima dak. Ade em cuk adi ipiat osu-

pi'ajojojo. Wuykukukat Jesus pit odaxijo ixeyū bui bewi. Etaybit iboam. ¹² Jesus Cristo eju mūg'i wuyeku am wuybikuy bima, itabut'ūmayū ipiat supi'ajoat wuywebe, Deus ekawēn taḡ wuyeku am wuybikuy bima. ¹³ Biḡ ma ip ikērēat ḡjurūḡ xipat'ūmayū-warēm̄taḡ ijodiacat mutaybitbin'ukayū. Warara'acat muḡuykukukukum ip jeku. Jewemuḡuykuku dak ip. ¹⁴ Ēn pit apēn ōn cuk adi emutaybitbin iap taḡ cuy ejeku-apēn wuybadipyū juk adi emutaybitbin iap taḡ tak. Etaybit cīcā icēmān oceju juk adi emutaybitbin iam. Imēnpuye ocekawēn kay etabun cīcā juy eḡuy. ¹⁵ Bekin pin ma Deus ekawēntup coco'uk eḡuy. Etaybit ixe ekawēn. Ibodup cocom pima wuyetaybit acesop apēn Deus wuydaxijom Jesus Cristo kay wuyetabun puje iam. ¹⁶ Deus a'ōbi kuyjeayū'ūm'ūm ixe ekawēntup o'tupmubararak-soatup. Iboaptup ekawēn xipat cīcā kawēn icēmān wuymutaybit am. Xipat cīcā ikērēat mujurūḡrūḡ'ukayū muḡuycūḡ ām ikērēat kay. Xipat cīcā ikērēat mujurūḡrūḡ'ukayū mubikuy am ikērēat mujurūḡrūḡap epere am. Xipat cīcā itabucayū mukūyjo am Deus bikuyap taḡ jeku am. ¹⁷ Ibodup kuḡ pima wara'at kay ḡu je'e ip itabikuku Deus buywatwat'ukayū. Soat kuḡ kuy ip. Ibodup kuḡ pima, iba'ore ḡu je'e ixeyū be xipacat muḡē ām-iwarururuat muḡē ām.

4 Deus etabun ḡasū ōn awēm, Timóteo, Jesus Cristo etabun tak. Ixe Jesus Cristo apēn cuk adi oekuku ip iaptei ideida soat pe-itabēḡayū be, ce'ū'ūayū be dak. Ixe Cristo waram jajēm. Ipiat supi'ajoat ikērēat mujurūḡrūḡ'ukayū be ikērēat ip o'ḡjurūḡrūḡ iapteim. Xipacat pit je'ḡūm jebekitkiyū be-xipacat mujurūḡrūḡ'ukayū be xipacat ip o'ḡjurūḡrūḡ iapteim. ² Soat kukukan je'e ixeyū eju-jebekitkiyū eju. Imēneju Deus ekawēn cuy eḡuwēnuwēn soat pe. Cekawēn cuy eḡuwēnuwēn imuwēn pa'ore ewebe bima, imuwēn pa'ore'ūm pima dak. Warēm̄taḡ ma ceku'ibiyū juy eḡukorēm̄rēm.

— Ikērēat mujurūgrūgāp cuy epeyepere — i juy ece cebe ip. — Eyetabun cuy Jesus kay — i juy ece cebe ip.

Eya'ōmucanucan cuy ip ixeyū be cūg ma jeku am. Ekpīcēgē gū juy ixeyū eḡutaybitbin. ³ Guyjom kawēn icēmat com ip ibu'un adeayū. Jekpiwan ma ip jewemucocog. Warēmtaḡ ma imutaybitbin'ukayū tomuwā ip jemutaybit am. Ya'ījo pinap acā ip ḡuwēn cebe ip. ⁴ Kawēn icēmat a'ījojoap jepere ip. Warēmtaḡ e'e'ukayū ekawēn kay acā je'e ip -aypayū'ūm'ūm ekawēn kay acā. ⁵ Ēn pit, Timóteo, aḡuysan cuy eḡuy warēmtaḡ ekuap puxim. Etaxim cuy eḡuy ipiatpi'ajojom pima. Kawēn idipat cuy eḡuwēnuwēn soat pe. Deus cuk enaē kapik am cebeam. Imēnpuye soat em cuy ixē beam kapikpiḡ eḡuy.

⁶ Ōn pit ḡaxīn ma oaoka ip. Apēn kuyje Deus etabutpe wūnca aokakakaap puxim ip oaoka. Ḡaxīn ma ojēm ijodiwi kobe o'jenapōn iap puxim. ⁷ Sorara xipacat puxim ōn kapikpiḡ Jesus Cristo beam. Pūḡpūḡ daudau'ukayū'in cedaḡ gū jedaudaum ip. Ixeyū buxim gū ōn pit. Cedaḡ ma ojekuku-Deus ekawēn taḡ. Pūḡpūḡ ixeyū'in taobu'u e'em ip jedau am. Ixeyū buxim gū ōn pit. Obu'u gū oḡuy Jesus kay wetabut am. ⁸ Daudauat iwat tumūntuptup mōgmōḡ iwūncaat a be soat etabutpe. Soat etabutpe dak wuykukukat Jesus je'e owebe:

— Ēn xipat Deus xe ixē emucūḡ kuy buye — i. Imēn ixē je'e waram jajēm puje-kūyjobit'ūmayū be ipiat'ajoap kabia be. Wuykukukat cūḡ cīcā. Ixē wuyekukuap cocom- -soat cocom.

— Eyju xipat Deus xe ixē eymucūḡ kuy buye — i je'e warara'acayū be dak- -ixē ajēmap wiwi'ukayū be- -jekayayū be.

⁹ Bekit, ḡaxīn ma juy ejot ojom. ¹⁰ Kuy ip o'jēm oxewi oxē osodop'īayū. Demas itabiku o'e ijodiat kay jebubun. Imēnpuye opere. O'ju Tessalōnica ka kay. Crescente o'ju Galácia eipi kay. Tito o'ju Dalmácia eipi kay. ¹¹ Lucas acā oxē jeenuy. Marcos cuy etakoy. Ixē juy etojot eweju okay don pima. Ixē xipat cīcā

je'e obuywat am Deus ekapikap pe. ¹² Kuy Tíquico oġuju Éfeso ka kay. ¹³ Weekabek cuk osuiwat Tróade ka be. Carpo duk'a be juk osuiwat. Ibo juy etojot don pima. Obubutup tak cuy etuptojot okay ixee-muġēġēdup.

¹⁴ Alexandre juk adi ikērēm cīcā okuk-icaat muġēġē'ukat-ferro muġēġē'ukat. Wuykukukat cuy ideida cebe warēmtaġ okukapteim. ¹⁵ Ixe wuya'ōxixixixi jījā osunuy. Imēnpuyē eday'em'um cuy eġuy cekay ixē be ikērēm ekukap puxim.

¹⁶ César ebekitkit wap ōn jewedayoyom pima, ka'ūma ma o'e:

— Teku xipat cīcā-ikērēat o'ġuġē ġu — i.

Soat ma ip oiwat. Ōn pit obu'u Deus pe "Ikērēat kuġ cīcā eyju oxe, Paulo epesuiwat puyē" i'e am cebe ip. Imēnpuyē:

— Bay, etakomām ġu juy cekay oiwat ma'ġu ip — i ōn e'em Deus pe.

¹⁷ Ixeyū ma juk opere. Wuykukukat pit oiwat ġu. Oxe ma osunuy. Ixe obuywatwat'uk osunuy owebe Judeu'ūmayū mukūyjo am kawēn idipan-soat em imukūyjo am. Ixe juk odaxijo leāo buximayū bui bewi-ika'uat puximayū bui bewi. ¹⁸ Wuykukukat odaxijo ikērēat mujurūġrūġ'ukayū bui bewi-soat pui bewi waokaap puxim. Ġuyjom odujuu soat em jexe onuy am kabi be. Ixe soat ka watwat kukukan je'e.

— Ēn soat podi ma edipap kuġ — i juy ace cebe-wuykukukat pe. Imēn cuy ace cebe.

¹⁹ Kato'i juy ece soat pe-Priscila be, Áquila be dak, Onesíforo badipyū be dak. ²⁰ Erasto Corinto ka be omuy. Trófimo juk osuiwat Mileto ka be iwātaxipi buye. ²¹ Ejot cuy okay ihi wap. Ēbulo e'em: — Kato — i juy ewebe, Prudente dak, Lino dak, Cláudia dak, soat warara'acayū dak-wuykitpitpiyū.

²² Ōn kawēnwēn wuykukukat eju ewebeam.

— Bay, Timóteo a'ōmucanucan cuy eġuy soat em — i ōn e'em cebe. — Bay, xipan cuy soat itabucayū ejukuk — i ōn e'em Deus pe. Ibūrū ma.

TITO BEAPTUP PAULO EMUDUPMUBARARAKTUP

1 Tito, ijudup mubararaġ òn ewebeaptum. Òn Paulo. Deus buywatwat'ukat òn. Jesus Cristo emumuju òn. Ixe omujujum Deus emunaëyū mutaybitbit am biġ ma ip itabut am Jesus kay. Biġ ma itaybit je'e ip kawēn icēmān. Biġ ma Deus bikuyap taġ jeku ip. ²Ixe bikuyap taġ wuyju jekukum, soat em acesop wuyetait cexe iap wiwim puye.

— Soat em ma ip jeedop oxe itait — io'e Deus ipi muġē'ūm awap.

Deus napapa'uk ġu. ³Imuwēġat pin pima Deus kawēn idipat o'ġuwēġat soat pe ijodiat pe. Okpot kayayū soat em itait ip jeedop oxe iap ekawēn o'ġuwēġat. Òn tak ixe juk omuju iboap ekawēn muwēn ām ijodiat pe. Iboap ekawēn muwēnuwēn òn Deus a'ōbi. Ixe Deus wuydaxiġo'ukat.

⁴Tito, ijudup mubararaġ òn ewebeaptum. Ēn okpot co'i Jesus Cristo kay wuyetabut puye.

— Bay, xipan cuy Tito ejukuk — i òn e'em Deus pe -wuyebay be, Jesus Cristo be dak-wuykukukat pe.

— Yaġuymubabibin cuy eġuy — i òn e'em cebe ip.

⁵Òn exe bima wuyekapikap cuk aġu'ūm ġu. Imēnpuye juk òn eiwat Creta be -tip'aweroro be wuyekapikap mu'ūm ām. Itabucayū kukukayū juy etaē soat ka be aġokaka be. Ixeyū juy etaē apēn cuk ocece ewebe iap taġ. ⁶Itabucayū kukukat cūġ ma juy jeku soat etabutpe. Pūġ kuġ ma jetayxi kuġ jeenuy. Ixe ipotpoyū dak cuy Jesus kay itabun jeedop ip. “Teipotpoyūku warēmtaġ acā jekukum soat em” i wuyjuyū e'em pima, ixe juy etaē ġu itabucayū kukukan. “Teipotpoyūku kūyjobit ġu jebay a'ō kay” i'e'em pima juy ixe etaē ġu. Imēn cuy itabucayū kukukat jeenuy. ⁷Itabucayū kukukat Deus ekapikap kuġ. Imēnpuye cūġ ma juy jeku ip soat etabutpe jemuyumuyap puxim.

— Warara'acat podi ma wa'öbuyxi — i'üm'gu juy je'e.

Soat em gu juy itapuruḡ jeku. Ika'o'on gu juy jee-nuy. Dao gu juy itakomā je'e. Warara'acat muḡuyku-kukum gu juy jeenuy dinheiro bu am. ⁸ Powatwat cuy tujuômôm jeduk'a be. Xipacat kay juy jeenuy. Jewawēwēm cuy jeenuy soat em cūḡ ma jeku am. Cūḡ ma juy warara'acayū jukuk. Deus ekawēn taḡ cuy jeku- -soat ekawēn taḡ. Warēmtaḡ gu juy ip je-wekuk. ⁹ Kawēn icēmat kay jijā juy jeenuy. Cūḡ cīcā ma wuywebe iboap ekawēn taḡ wuyeku am. Iboap ekawēn taḡ jekukum pima, Jesus emumutaybitbinap taḡ tak wuyju jekukum. Iboap ekawēn taḡ jekukum pima kawēn icēmān warara'acat mutaybitbin jeenuy. Ixeyū mucokcokcoḡ jeenuy jetabucap epereap puxim cebe ip. Kawēn icēmat kay'ūmayū dak imukūyjobit-bin jeenuy ixeyū aḡuymuwarurun am.

¹⁰ Cūḡ ma juy jeku ip itabucayū kukukayū, ade opop puye Jesus ekawēn kay ibu'u'uayū. Pūḡpūḡ Ju-deuyū'in itabut o'e Jesus kay. Imēnpit:

— Wuyajojoyū'üm'üm ekawēn taḡ cuy ajeku — i te'e ma e'em ip.

Warara'acat muḡuykukukum ip ibiwarēmtaḡ ma ip kawēnwēn puye. ¹¹ Ade jebadipyū mubu'u'un ip Je-sus kay am, warēmtaḡ ma ip imutaybitbin puye. Ibi-sūsūn gu ip warēmtaḡ ma imutaybit am. Dinheiro bu ojuy am acā ip imutaybitbin. Imēnpuye juy ip eḡuy-mūḡ.

¹² — Creta eipi watwat dapxiyū — i juk o'e Cre-ta eipi wat ma- -Deus ekawēn muwēnuwēn'ukat. — Wuyjuyūm gu ip o'e- -ika'ūayūm acā Creta eipi wat-wat — i juk o'e warara'acayū a'ījo. — Ibukapik'üm ip — i juk o'e. — Jexat o am acā ip itaybit — i juk o'e.

Imēn Creta eipi wat jebadipyū o'ḡuwēn. ¹³ Icēmān ixē juk o'e. Napa gu juk o'e. Imēneju a'öpuruḡ cuy ip eḡukorēm- -imuḡuykuku'ukayū ekawēn kayayū. Jeta-bucap epereap puxim ip eḡukorēm. Ewebe ip imuko-rēm puje, biḡ ma ip je'e itabut Jesus kay. ¹⁴ Ibu'u je'e ip jetabut am wuydobuyū'üm'üm ekawēn kay- -ijodiat ekawēn kay- -kawēn icēmat kay'ūmayū eka-

wën kay. ¹⁵ Xipacat mujurūrūg'ukayū be xipacat tobuxik put soat pe. Ikērēat mujurūrūg'ukat pe bit xipacat tobuxik pa'ore soat pe -itabut'ūmayū. Itaybit ġu ip apēn cedaġ Deus xe iam, apēn cedaġ ġu iam tak. Ikērēat kay acā ip ġebum.

¹⁶ — Ocetaybit Deus — i'e'em ip napa ma. Imēnpit Deus ebekitkit ekukuap taġ ġu ip jekukum. Soat kay ip itakoma. Kūyjobit'ūm cīcā ip Deus ekawēn kay. Iba'ore cebe ip xipacat mujurūg ām- -pūġ em tak ka'ūma.

2 En pit, bekit, ixeyū ekukuap taġ ġu juy ejeku. Kawēn cūġān cuy Jesus ebekitkiyū eġutaybitbin. Deus ekawēn cuy ixeyū eġutaybitbin. ² Ay-papayū juy eġukūyjo.

— Eyetabikukum ġu juy epesop — i juy ece cebe ip. — Eyetapuruġ cuy epesop — i juy ece cebe ip. — Jewawēwēm cuy epesop cūġ ma eyeku am soat em — i juy ece cebe ip. — Eyetabun cīcā juy epesop Jesus kay — i juy ece cebe ip. — Ikukpin cuy warara'acat epejukuk — i juy ece cebe ip. — Eybu'um ġu juy epesop Jesus ekawēn taġ eyeku am — i juy ece cebe ip.

³ Imēntak yabutbucayū juy eġukūyjo, bekit.

— Deus kay jījāyū ekukuap taġ cuy epeku — i juy ece cebe ip. — Eybureyū muymuy ġu juy — i juy ece cebe ip. — Kawēdi kay ġu juy epesop eyka'o'onap puxim — i juy ece cebe ip. — Yaypan'isuayū juy epeġutaybin ixeyū be cūġ ma jeku am — i juy ece yabutbucayū be. ⁴ — Xipan cuy eyitop epejukuk — i juy je'e ip. — Xipan cuy ey'iyū epejukuk — i dak.

Imēn yaypan'isuayū awēwēm cuy jeedop ip yabutbucayū.

⁵ — Jewawēwēm cuy epesop cūġ ma eyeku am — i juy je'e ip yaypan'isuayū be. — Xipacat mujurūrūg'ukayūm cuy epesop — i juy je'e ip. — Xipan cuy eyduk'a beayū epejukuk — i juy je'e ip. — Kūyjobin cuy epesop eyitop a'ō kay — i dak je'e ip.

Imên cuy yaypan'isuayū ġukūyjo ip yabutbucayū. Imên ip imukūyjo buje, warara'acayū je'e ġu:

— Deus ekawên xipat ġu aco'i, cekawên kayayū cūġ ġu jekukum puye — i.

⁶ Imëntak tapupuyū juy eġukūyjo- -yaypan'isuayū.

— Jewawēwēm cuy epesop cūġ ma eyeku am — i juy ece cebe ip.

⁷ Ēn tak, bekit, xipacat mujurūġrūġ'ukan cuy eġuy warara'acat pe ekukuap co'i jeku am. Warara'acat mutaybitbin pima juy aġuysan eġuy. Kaypatpan ġu juy eġuy. Deus ekawên eġuwarururun ġu juy. Cūġ ma juy cekawên eġutaybitbin. ⁸ Cūġ ma juy kawēnwēn'uk eġuy ekay'ūmayū be ekawên mukērērēnap puxim. Cūġ ma ěn kawēnwēn pima, isūsūn jeedop ip wuymuymuy ām, ekawēnkērē'um puye.

⁹ Tei'ūma kapikpik'ukayū dak cuy eġukūyjo, bekit.

— Kūyjobin cuy epesop eyekariwa a'ō kay — i juy ece cebe ip. — Eyekariwa bikuyap taġ cuy epeku soat em — i juy ece cebe ip. — Jedede'ukayūm ġu juy epesop eyekariwa kay — i juy ece cebe ip. ¹⁰ — Eyekariwa bubut cuy epetujupa'um ġu- -pūġ em tak ka'ūma — i juy ece cebe ip. — Xipan cuy eyekapikap kuġ epesop — i juy ece cebe ip. — Xipan cuy epeyekapik eyekariwa beam — i juy ece cebe ip. — “Deus ekawên xipat cīcā ixeyū daxijojo'ukat ekawēn,” i je'e warara'acayū xipan eyekapikap co buje — i juy ece cebe ip.

¹¹ Ġasū bit: — Soat kuġ ōn xipan soat taxijo am- -eydaxijo am — io'e Deus wuywebe.

Imēnpuye, Tito, imên cuy Jesus ebekitkit eyawēwē.

¹² — Okpot oe'ū ipiat'ajojoap kay eyejuap puxim — i'e'em Deus wuywebe. — Imēnpuye eyetabut'ūmap cuy epeyepere — i'e'em. — Deus kay'ūmayū emumutabikukunap cuy epeyepere — i'e'em. — Jewawēwēm cuy epesop soat em cūġ ma eyeku am — i dak. — Cedaġ cuy epesop ijodiat etabixe — i dak. — Wekawēn taġ cuy epeku soat em — i dak.

¹³ Imên cuy ajeku Jesus Cristo ajēmap wiwim pima- -

wuydaxijojo'ukat ajêmap wiwim pima. Wuycokcok cîcâ yajêmap wiwi am. Ixe ajêm puje soat ijodiacat je'e:

— Soat podi ma Deus ya'ôbuyxi — i. — Ka'ûmġu ixe jo'iat idipat — i je'e ip.

Ka'ûmġu yajêmap kabia jo'iat idipat. Idip cîcâ je'e.

¹⁴ Ixe Jesus Cristo jekpiwatpin ma oe'û wuywebeam.

Wuya'ômucan am oe'û wuywebe ikêrêat muġêap puxim. Wuymuisun am soat taġ oe'û. Jebekitkin wuy'e am oe'û. Wuywebe xipacat mujurûġrûġ'ukayûm oe'û.

¹⁵ Bekit, iboam cuy itabucayû eġutaybin. Yawêwêm cuy ip eġuy. Ikêrêat mujurûġrûġ pima juy ip eġukorêm. Jemupubutbunat ġu juy cebe ip.

— Wa'ôbi ġu ôn eyawêwêm- -Jesus Cristo a'ôbi acâ — i juy ece cebe ip.

3 Tito, Jesus ebekitkiyû juy eġukûyjo- -exeayû.

— Kûyjobin cuy epesop wuyajecuġap a'ô kay- -ixe beam kapikpik'ukayû a'ô kay dak — i juy ece cebe ip. — Xipacat muġê âm ixeyû be eydakoy buje, epeyekapik cuy cebeam ip — i juy ece cebe ip. ² — Warara'acat epejomuymuy ġu juy — i juy ece cebe ip. — Kaba'ûm cuy epesop eyeweweju — i dak. — Xipan cuy soat epejukuk — i dak. — Eya'ôpuruġ ġu juy epesop- -eya'ôdidim ma — i dak.

³ — Warara'acat podi ma oceju bit xipat — i'ûm'ġu juy ace'e, kuy bima wuyju dak cuk adi wuyaġuy'ûm ajop puye.

Kûyjobit'ûm cuk adi ajop warara'acayû a'ô kay- -Deus a'ô kay dak. Ikêrêat cuk adi aġujurûġrûġ. Ajo wuyju imuġê pin cîcâ iat muġêġêm cuk adi ajop. Wuymucokcok am acâ juk adi ajekuku. Ikêrêm cuk adi warara'acat ajukuk. Warara'acat ekawên mukêrêrênxi ajop. Wuyetabikuku ajop warara'acat kay. Wuykay itakomama juk adi osodop ip warara'acayû. Wuyju dak ixeyû kay wuyetakomama juk adi ajop. ⁴ Deus pit wuydaxijojo'ukat. Apên wuykukpin

cexe iap o'ğubapuk wuywebe. Apên xipan wuykukpin iap tak o'ğubapuk wuywebe. ⁶Iboap mubapuk puje juk wuydaxijo. Ixe juk wuydaxijo xipacat ağurürüğü puye ğu, cüğ ma ajekuku buye ğu dak. Ixe juk wuydaxijo, wuykay itabotaidobotbot puye acâ. Ibiöğbuk cuk wuymuisun soat tağ. Kuy bima wuyebay ebekitkin ajop. Gasû bit waram wuykapap puxim Deus ebekitkin acesop. Kuy bima ikêreat kuğ ajekuku. Gasû bit Deus biöğbuk wuymuisusun. Wuybinûnisu ğasû. ⁶Deus jebiöğbuk o'ğûôm wuywebe. Tacup ğu osunuy iûm âm wuywebe. O'ğûôm wuywebe Jesus Cristo oe'û wuywebeam puyewuydaxijojo'ukat oe'û buye. ⁷Ixe jebiöğbuk o'ğûôm wuywebe cüğ ma jexe wuyeku am. Deus soat podi ma wuykuğ xipan. Ixe wuymucüğucüğ.

— Cüğ ma eyju oxo — i'e'em ixe wuywebe. — Soat em epesop oxo eyetait — i'e'em wuywebe. Iboap wiwim cîcâ wuyju. ⁸Icēmân ôn eymutaybitbin.

Kuy ôn awewê iap cuy eğuwênuwên wuykitpitpiyû be-Deus kay itabun'ibiyû be. Xipacat mujurürüğü cuy jeedop ip soat em. Xipacat mujurürüğü pima, warara'acayû buywatwan jeedop ip. Xipat tak je'e Deus xe. ⁹Warara'acayû te'e ma jewa'öxikxiğ. Te'e ma ip wuydobuyû'ûm'ûm putet muwênuwên. Jawa'ödawutwun e'em ip. Moisés ekawên a'öxikxiğ e'em ip. Te'e ma wuyju ixeyû ekawên cocom. Te'e ma ip kawênwên. Ecekawên ğu juy ixeyû eju. ¹⁰Warara'acayû warêmtağ itabucayû mutaybitbin. Itabucayû mubu'u'un ojuy ip ixeyû be wara'at tağtağtağ ma jekawên âm. Ixeyû juy eğukorêm.

— Warêmtağ imutaybitbinap cuy epeyepere — i juy ece cebe ip.

Warêmtağ imutaybitbinap epere'ûm pima, waram cuy ixeyû eğukorêm. Xepxep em ixeyû eğukorêm. Warêmtağ imutaybitbinap epere'ûm pima, cewaju ğu juy ip ejeku. ¹¹Etaybit ikêreat mujurürüğüxi ip iam. Deus ekawên kay ğu jîjâ ip. Ikêreat mujurürüğü acâ ip. Ixeyû dak itaybit iboam.

¹²Artemas cuy oğuju ekay. Ixe mujum'ûm pima, Tíquico juy oğuju. Ekay yajêm puje, dao juy eju Ni-

cópolis ka kay odopabijuk am. Ibo ka be ihi oġukap.
¹³ Warara'acat a'öbuywatwat'ukat Zenas je'jēm exewi
 ġuyjom, Apolo dak. Ibuipuġ ġu juy ixeyū eġujēm.
 Iūm pucat cuy eġūm cebe ip cum pima. ¹⁴ Itabucayū
 mukūyjom cuy eġuy.

— Xipacat mujurūġrūġ cuy epesop — i juy ece
 cebe ip. — Eybubut'in cuy epeġūm ikuġ'ūmayū be
 — i dak. — Warēmtaġ ġu juy epeku — i dak. —
 Eybu'um ġu juy epeyekapik — i juy ece cebe ip.

¹⁵ Soat oxeyū kato mujujum ekay. Ōn tak kato
 mujujum soat pe itabucayū be- wuybureyū be.

— Bay, xipan cuy Titoyū ejukuk — i ōn e'em
 Deus pe.

Ibūrū ma.

FILEMOM BEAPTUP PAULO EMUDUPMUBARARAKTUP

¹⁻² Filemom, ijudup mubarararaġ òn ewe-beaptum. Òn Paulo. Daomünmünap'a be òn, Jesus Cristo muwēnuwēn cuk adi ojekuku buye. Wuykitpit Timóteo omuy oxe. Otopmuju ewebeaptum, Filemom, eduk'a be je'aweroro'ukayū beaptum tak- itabucayū beaptum. Otopmuju wuyixīt Áfia beaptum tak. Arquipo beaptum tak otopmuju- oweju Jesus Cristo beam kapikpik'ukat peaptum. Ekukpin cīcā ocexe. Ēn kapikpiġ oceweju kawēn idipat muwēnuwēn.

³ Deus wuyebayat. Jesus Cristo wuykukukat. Ixeyū eju òn kawēnwēn ewebeam.

— Bay, xipan cuy Filemom ejukuk — i òn e'em cebe. — Yaġuy mubabibin cuy eġuy yaġuybabi'ūmap puxim — i òn e'em cebe.

⁴⁻⁵ Filemom, soat em warara'acayū e'em owebe:

— Ixe Filemom itabut cīcā wuykukukat Jesus kay — i. — Ixe xipan Jesus ebekitkit kuġ — i dak.

Imēnpuye òn kawēnwēn Deus eju ewebeam.

— Bay, ēn xipat cīcā — i òn e'em. — Filemom buywatwan cuy eġuy — i òn e'em. — Ibadipyū buywatwan tak cuy eġuy — i òn e'em cebe.

⁶ Wuyaġuywaġōm wuyju e'em, pūġ kay wuyetabut puye- Jesus Cristo kay. Imēnpuye:

— Bay, ocemutaybin cuy ece ade jījā xipacat pupum eyju Cristo eju mūġ'i eyju buye iam — i òn e'em Deus pe.

Biġ ma juy iboam wuyetaybin ace'e. ⁷ Okitpit, ocok-cok cīcā. Wa'ōca jījā dak oce, Deus ebekitkit ikukpin exe buye, ēn xipat oxeyū kuġ puye dak. Ēn soat Deus ebekitkit mucokcokcoġ.

⁸ Obure, cūġ ma kuka o'e owebe “Kūyjobin cuy eġuy wa'ō kay” i'e am ewebe, Cristo kay wuyetabut puye.

— Kūyjobin cuy eḡuy wa'ō kay — i'ūmḡu ōn pit e'em ewebe, ⁹ wuyewewekuḡ wuykukpin puye. — Ekpiwan ma ecekūyjobin wa'ō kay, kūyjobit pin pima acā — i ōn pit e'em ewebe.

Imēn ōn e'em ewebe Cristo a'ōbi ma'ḡu ōn. Daomūnmūnap'a be ōn ḡasū, Jesus Cristo muwēnuwēn cuk adi ojekuku buye. ¹⁰ Onésimo awēḡ muwēn ōn ḡasū ewebe. On daomūnmūnap'a be bima, ixē Onésimo itabut o'e Jesus kay, Jesus oḡuwēn cebe buye. Imēnpuye ixē okpot co'i. ¹¹ Kuy bima ixē Onésimo xipāt ḡu osunuy exe. Kūyjobit'ūm osunuy a'ō kay. Ḡasū bit xipacan o'e wuyxe.

¹² Ixē ikukpin cīcā oxe. Inaka oḡuypit ekay. ¹³ Obikuy oce oxe ma jeenuy am obuywacan edieḡ, ōn daomūnmūnap'a be bima.

¹⁴ — “Āḡ jeenuy exe ebuywatwat'ukan,” i juy ece owebe — i'ūmḡu ōn pit e'em ewebe.

Obu'u ewebe ixē be obuywacan ebu'u bima. Ebikuy bima acā ixē be obuywacan ece. Ebikuy bima acā oxe jeenuy.

¹⁵ Ixē Onésimo ade kabia ḡu osunuy wūy ma ewi. Ḡasū bit aco'i soat em jeenuy exe ekay cepit puje.

¹⁶ Ewebe tei'ūma kapikpik'ukat osunuy kuy bima. Ḡasū bit ekipit ma ixē, Cristo kay itabut puye. Ikukpin oxe ma. Exe bit ibodi ma ikukpin je'e ewebe kapikpiḡ puye, wuykukukat kay itabut puye dak.

¹⁷ — Paulo obure jījā — i ēn e'em pima, ixē Onésimo juy etujuōm eduk'a be ewebe odujuōmap puxim. ¹⁸ Ixē juk adi ebubut'in o'tujupa'um pima, exe cewero bima dak, iboap cuy eḡubararak tapera-dup pe. Ceweroam ḡu je'e-weweroam acā. ¹⁹ Ḡuyjom ōn ma ixē eweroap oteida ewebe. Paulo ōn. Ōn ma oteida iaptup mubarararaḡ ōn ewebeaptum. Jesus Cristo kay mo etabut eḡuy kawēn idipāt oḡuwēn ewebe buye. Imuwēn'ūn pima kajuk etabut ḡu eḡuy. Soat em etabēḡ eḡuy Deus xe iap oweju eweroap co'i. Ḡebum cuy eḡuy iboap kay. ²⁰ Imēnpuye, okitpit, xipan cuy Onésimo ejukuk wuyetabut wuykukukat kay buye. Xipan cuy etujuōm eduk'a be omucokcok am.

²¹ — Xipan cuy Onésimo ejukuk — i juk oce

ewebe, Filemom. — Imēnpit wekawēn podi ma xipan ixe jukuk — i ōn e'em owebe ma ijudup mubarararaḡ pima.

²² Gaxīn ma aco'i Deus omudot eykay, "Paulo juy eḡudot ocekey," i'e'em eyju cebe buye. Imēneju:

— Eduk'a juy eyamuxipan owebeap'am oxe-cap'am — i ōn e'em owebe.

²³ Epafraſ kato mujujum ewebe. Ixe Epafraſ tak taomūnmūn, oweju Jesus Cristo muwēnuwēn cuk adi oeku buye. ²⁴ Obureyū kato io'e ip eywebe soat pe- - Marcos, Aristarco dak, Demas tak, Lucas tak.

²⁵ — Ocekukukat, xipan cuy Filemom ejukuk — i ōn e'em Jesus Cristo be.

Ibūrū ma.

JUDEUYŪ BEAPTUP CARTADUP

1 Kuy bima juk adi Deus jekawēn muwēnuwēn'ukayū o'ḡudodot ipi kay jekawēn muwēn ām wuydobuyū'ūm'ūm pe- -Judeuyū be- -kuyje itabucayū be. Soat pucet ḡu o'ḡuwēn jekawēn- -i'in ā. Ade em ma juk adi o'ḡuwēnuwēn cebe ip. Wara'at taḡtaḡtaḡ ma o'ḡuwēnuwēn cebe ip. ² Ḡasū bit jekpot ma o'ḡudot wuykay jekawēn muwēn ām wuywebe. Jekpot eju Deus soat o'ḡuḡē- -ipi, kabi dak. Jekpot eju dak koato o'ḡuweḡūn, ihi dak. Ixe juk jekpot o'-taē soat kukukan- -ipi juayū kukukan, kabi beayū kukukan tak. ³ Deus idipap co'i ipot tak idip. Deus a'ōbuyxi jo'i ma ixe dak ya'ōbuyxi. Deus co'i ma ipot tak. Ixe a'ōbi soat opop jemuymuyap pe- -kabi daḡat, ipi daḡat tak, ixe ya'ōbaca buye. Ikērēat o'-ju'uk soat pewi ipi juayū bewi. Soat taḡ ip o'ḡuisun. Imuisun ip puje, oabik Deus xe kabi be. Oabik Deus aḡuywaḡōm soat kukukan. Ixe Deus soat podi ma ja'ōbacaap kuḡ.

⁴ Deus jekpot o'jomuy jekawēn tojtjtjot'ukayū bodiam ya'ōbacaam. O'jomuy ya'ōbuyxiam kabi bewi ajēmjēmayū bodi ma. Jesus Deus ipot. Imēnpuye:

— Jesus putet soat putet podi ma ibutetpuyxi — i'e'em Deus soat pe wuywebe.

⁵ — Ēn okpot. Ōn ma ebay oce ḡasū

— i juk o'e Deus jekawēn tojtjtjot'ukayū be ḡu- -jekpot pe acā.

Waram pima:

— Ōn ma ebay oce, okpot ece'e — i juk o'e Deus jekawēn tojtjtjot'ukayū be ḡu- -jekpot pe acā.

⁶ Deus jekpot mudon pima ipi kay, koapat osunuyiat mudon pima:

— Soat wekawēn tojtjtjot'ukayū juy je'e okpot pe “Ēn xipat cīcā ocewebe,” i — io'e Deus soat pe.

⁷ Jekawēn tojtjtjot'ukayū muwēnuwēn pima:

— Wekawēn tojtjtjot'ukayū mujujum

ōn kabido jo'i. Wa'ōbuywatwat'uk-
ayū mujujum ōn daxae jo'i — i'e'em
Deus.

* Imēnpit:

— Deus, ēn ma soat taḡacat ku-
kukan ecesūy — i'e'em Deus jekpot
pe. — Ēn soat kukukat iap i'ūm ḡu.
Cūḡ ma ixeyū kukukan ecesūy —
i'e'em cebe- -jekpot pe. ⁹ Ajo cūḡ ma
iap kay jījā ēn, i. Ajo ikērēat iap kay
bit etakoma, i. Imēneju kuy juk ōn
enaē soat taḡacayū kukukan, i. Deus
ōn, i. Ebay ōn, i. Kuy juk ōn emuy
ehureyū bodi ma a'ō-buyxian, i.
Imēnpuye ecokcok cīcā, i.

Imēn Deus jekpot muwēnuwēn o'e.

¹⁰ Imēntak jekpot o'ḡuwēn: Kariwa,
ka'ūmḡu bima ēn cuk adi ipi eḡuḡē,
i. Ebum ma juk adi kabi eḡuḡē, i.

¹¹ Ipi i'ūm, kabi dak i'ūm ma, i. Ēn
pit ece'ūm ḡu, i. Soat em ma ēn pit
etabēḡ ecesūy, io'e Deus jekpot pe, i.
Ipi iokok je'e, kabi dak. Wuydoti io-
kokat puxim je'e ip, i. ¹² Wuydoti
mu'adabocap puxim ipi eceḡu'adabot,
kabi dak, i. Wuyju wuydoti iokokat
xikxiḡ iisuat pu am, i. Imēnpuxim
wara'at eipi eceḡuḡē ijop eipi dieḡ, i.
Kabi dak wara'at ma eceḡuḡē ijop
tieḡ kabi dieḡ, i. Jajoren ḡu ēn pit.
Ibit ma ecesūy soat em ma, i.

Imēn Deus o'e jekpot muwēnuwēn.

¹³ Ekay itakomaayū a'ōbacaap oḡu-
'ūm, i. Kūyjobin jeedop ip a'ō kay,
i. Ēn ixeyū kukukan e'emap wiwim
pima oxe mabuk ecesūy, i. Xik'i juy
eḡuy oxe, i.

Imēn Deus o'e jekawēn tojtjt'ukayū be ḡu-
jekpot pe acā. Pūḡ em tak o'e ḡu ma jekawēn tojtjt'uk-
ayū be. ¹⁴ Cekawēn tojtjt'ukayū ibiōḡbuk acā-
kabi bewi ajēmjemayū. Soat ip kapikpiḡ Deus

peam. Deus ixeyū mujujum ġuyjom taxijo'iaiyū buy-wacam.

2 Imēneju wuyetabun cīcā juy ajop iboap ekawēn kay wuyetabucap epereap puxim. Kuy bima juk adi kawēn icēmat aya'ijojo. Iboap ekawēn kay wuyetabucap epere buje bit, warēmtaġ ma kuka ajeku kobe o'jenapōniat puxim- -uhuiat puxim. ² Deus ekawēn tojtjot'ukayū juk adi cekawēn o'ġuwēnuwēn kuyje- -kabi bewi ajēmjēmayū. Ixeyū ekawēn icēmat.

— Kūyjobin cuy epesop ixeyū ekawēn kay — i juk o'e Deus kuyjeayū be.

Imēnpuye Deus ipiat o'supi'ajojoat jekawēn kay kūyjobit'ūmayū be kūyjobit'ūmapteim. Ipiat o'supi'ajojoat jekawēn mupubutbut'ukayū be dak jekawēn mupubutbucapteim. ³ Apēn Deus wuydaxijojom iap soat podi ma idip. Wuybu'u ixē be wuydaxijoan pima bit, wuyenapōn pa'ore ace'e ipiatpi'ajoap puxim. Wuykukukat Jesus koap ma o'e:

— Eyetabun pima, Deus jeydaxijo — i.

Ġuyjom ixē ekawēn coco'ukayū kuy juk cekawēn o'ġuwēn wuywebe.

— Icēmān xeku e'em eywebe — i juk o'e ip wuywebe. ⁴ Deus tak o'e wuywebe:

— Icēmān ip wekawēn muwēnuwēn eywebe — i. Ixē ja'ōbacaap o'jomōġmōġ cebe ip- jekawēn coco'ukayū be. Imēnpuye Deus a'ōbacaap o'ġubapukpuk ip adeayū etabun. Wuywebe i'e ba'oreat o'ġubapukpuk ip adeayū etabun. Ka'ūma ma buk ajojojoiat tak o'ġubapukpuk ip Deus a'ōbi. Deus jekpiwatpi ma jebiōġbuk emumuūm o'ġu'ē'ē'ē cebe ip. Ibiōġbuk xipacat emumuūm o'ġu'ē'ē'ē.

⁵ Ġuyjom Deus wara'at ma ipi ġuġē iisuat. Ibo eipim omuyku iap muwēnuwēn oceju eywebe.

— Eyju ma ipi iisuat kukayūm epesop — io'e Deus jekawēn tojtjot'ukayū be ġu- jebekitkit pe acā.

⁶ Imēn e'em Deus ekawēntup:

Deus, soat em ēn ġebum ijodiat

kay, yopît ma'ġu ip, i. Ya'ôbuyxi ġu ip, i. Inaka ên cekay ip aġ, i. ⁷Deus, kuy juk ipi juacayû ejomuy ekawên tojtjot'ukayû josû'iaiyûm, i. Darem ma ip jeedop ixeyû josû'iaiyûm, i. Kuy juk ixeyû ejomuy idipap kukayûm ipi kukukat puxim, ya'ôbuyxiayûm tak, i. ⁸Ixeyû be juk a'ôba-caap eġûm soat taġacat kukayûm, i.

Imên e'em Deus ekawêntup.

— Soat taġacat kukayûm jeedop ip webekitkit — io'e Deus ibodup pe.

Gasû bit ijodiat soat ġu ikukukan-Deus emumuġê kukukan. Ixeyû soat kukukan iap ma ajojojo ġu buk. ⁹Jesus pit kuy ajojojo. Deus xe ikukpin cîcâ osodop ip ipi juacayû. Imênpuye Deus Jesus o'jomuy jekawên tojtjot'ukayû josû'ian. Darem ma osunuy ixeyû josû'ian ġuyjom je'û âm soat peam ipi juayû beam. Gasû bit ka'ûmġu Jesus co'iat ya'ôbuyxiat. Ka'ûmġu ixex jo'iat idipat. Ka'ûmġu ixex jo'iat, ixex oe'û soat peam puje. ¹⁰Deus a'ôbi soat kake ipi daġacat, kabi daġacat tak. Soat kake ixex dipap mubapuk am soat pe. Ixex ibikuy jîjâ soat jebekitkit pe jedipap kuk am.

— Okpot pe ipiat'ajo buje acâ ipi juacat taxijo but je'e — io'e Deus jewebe ma.

Imênpuje ibikuy osunuy ipiatpi'ajoan jekpot pe. E mukacûġcûġat puxim Jesus cucum koap kabi kay jemudaxijojoyû wap. Ipi juacayû kukukayûm jeedop ip Jesus eju ixex emudaxijojoyû.

¹¹Ixex Jesus ikêrêat uk'uġ ijodiacat pewi. Imuisusun ip. Ixex ebay cemumuisunyû ebay dak. Pûġ ma ixeyû ebayat. Imênpuje Jesus isûsûn ġu "Eyju okitpitpiyû" i'e am ijodiacayû be, jemumuisunyû be. ¹²Imên e'em Deus ekawêntup:

Bay, jemuwên ôn okitpitpiyû be, i'e'em Deus pe. Ên soat podi ma a'ôbaca iam jebibododon oce a'ôkayayû be wa'îjo am, i.

¹³Wara'atup e'em:

On pit wetabut oce cekay, i'e'em ixex. Ijoce ma ôn webekitkit kuġ-ên ma

juk eḡm owebeiayū kuḡ, i dak e'em
ixe Deus pe.

¹⁴ Deus ebekitkiyū ijodiacayū ijebit taḡ toyteyayū. Imēnpuye Jesus tak ijodian o'e cebuxim ip. Ipi juan o'e ḡuyjom je'ū ām. Oe'ū ibiōḡbuk kērēayū kukukat a'ōbacaap mu'ūm ām. Ibiōḡbuk kērēayū kukukat wuy'ūap mupararurun. ¹⁵ Tei'ūma kapikpik'ukat iparara jījā jekariwa buxim iap puxim wuyju dak wuyparara wuye'ūap puxim. Jesus pit oe'ū wuypararap mu'ūm ām. ¹⁶ Jesus ipi juan o'e Deus ekawēn tojot-jot'ukat taxijo am ḡu- -Abraão naxeḡebitbit taxijo am acā. Imēntak e'em Deus ekawēntup. ¹⁷ Jesus kuy juk jekitpitpiyū buximan o'e Deus bikuyap taḡ. Ixeyū buximan o'e cekay ip aḡ am paī yoboḡat puxim. Ixeyū buximan o'e xipan ixeyū kuk am, cedaḡ ma kapik am Deus peam tak. Ixeyū buximan o'e Deus pe ikērēat'ukan ixeyū bewi. ¹⁸ Jesus ipiat o'supi'ajojo wuybuxim. Satanás te'e ma ikērēat muḡēap ojuy osunuy Jesus pe, wuywebe ikērēat muḡēap ojuy buxim. Imēnpuye ixe itaybit wuybuywat am Satanás ikērēat muḡēap ojuy wuywebe bima.

3 Okitpitpiyū, ḡebum cuy epesop Jesus kay. Eyju okitpitpiyū wuyetabut Jesus kay buye. Wuyetabucap muwēnuwēn wuyju warara'acayū be. Deus cuk wuynaē jebekitkiyūm. Deus Jesus cuk o'taē wuyepaī yoboḡan. Imēneju Jesus kay juy ḡebum epe-sop. ² Deus cuk ixe o'taē jebekitkiyū kay aḡ am. O'taē jebekitkiyū epaīm yoboḡan. Jesus cedaḡ ma jekapikap kuḡ osunuy ixeyū kay aḡ. Ixe buxim Moisés tak cedaḡ ma jekapikap kuḡ osunuy Deus ebekitkiyū kay aḡ. ³ Uk'a muymuyat uk'a beayū bodi ma ya'ōbuyxi. Imēnpuxim Jesus ya'ōbuyxi Moisés podi ma. Imēnpuye cedaḡ cīcā wuywebe kūyjobit am Jesus a'ō kay Moisés a'ō kayap podi ma. ⁴ Soat uk'a ijodiat emuamuy'a. Soat pit Deus emumuḡē. ⁵ Moisés cedaḡ ma osunuy jekapikap kuḡ. Cedaḡ ma osunuy Deus ebekitkiyū kuḡ. Jekpiwan ma kapikpik'uk osunuy. Apēn Deus je'e ḡuyjom iap muwēnuwēn'uk osunuy cebe ip Moisés ma. ⁶ Cristo bit Deus ipot. Deus ebe-

kitkit kukukat ixē -wuykukukat. Ixe cedaḡ ma wuykuḡ. Wuya'ōca e'em pima, cebekitkiyūm acesop. Wuyckoḡ ma soat em Deus xe acesop iap wiwim pima dak.

⁷ Imēn kuyjeat e'em Deus biōḡbuk a'ōbi: Gasū eywebe Deus a'ijo buje, ⁸ Kūyjobin cuy epesop ixē a'ō kay, i. Kūyjobit'ūm cīcā osodop ip Deus a'ō kay eydobyū'ūm'ūm, i. Ya'ō kay ḡu ip o'e, i. Uk'a'ūmat taḡ jekukum pima, "Wuyju ikērēat muḡēḡēm pima dak, Deus ideida ḡu wuywebe," i te'e ma o'e ip Deus puyxijojom, i.

⁹ "Quarenta koato bun wa'ōbacaap mubapukpuk'uk oḡuy itabutpe ip," i'e'em Deus, i.

Imēnpit: "Xipan ḡu ēn ocekuḡ," i napa ma e'e'uk osodop ip owebe eydobyū'ūm'ūm, i.

"Oceju ikērēat muḡēḡēm pima dak ēn ideida ḡu ocewebe," i napa ma e'e'uk osodop ip owebe obuyxijojom, i'e'em Deus, i. ¹⁰ Imēneju wetakoma jījā juk adi oce cekay ip, io'e Deus, i. Ikērēat kay acā ip osodop jewaḡuyḡuy, i'e'em Deus, i. Itaybit ḡu ip osodop oem, i.

¹¹ Imēneju wetakoma jījā juk adi oce cekay ip, i. "Jeōm ḡu ip okay jebodoy am- -pūḡ tak ka'ūma ma," i juk oce owebe ma wetakomaap pibun, i.

Imēn Deus e'em.

¹² Okitpitpiyū, eyday'em'um cuy epesop eyewe-
wekay eywebe eyetabucap epereap puxim! Deus kay eybu'u bima soat em itaicat kay, ikērēat kay acā juy epesop ḡebum. Eyetabut ḡu epesop cekay. Warara'acat a'ō kay acā epesop kūyjobit. Ixe a'ō kay bit kūyjobit ḡu epesop. ¹³ Soat kabia jewa'ōmucanucan cuy epesop eyewemuḡuykukuap puxim ikērēat muḡēap puxim tak; eyetabut'ūmap puxim tak; eybu'uap puxim tak Deus kay.

— Gasū ma kūyjobin cuy epesop — i juk o'e Deus wuydobuyū'ūm'ūm pe.

— Gasū — i'e'em Deus wuywebe dak. Wuywebe “gāsū” i'e'em pima, jewa'ōmucanucan cuy epesop eywebe eyetabucap epereap puxim. ¹⁴ Wuyetabun'isum cuk adi wuyetabut cīcā ajop Cristo kay. Ixe kay wuyetabucap epere'ūm pima ixe bureyūm acesop.

¹⁵ Imēn e'em Deus ekawēntup: Gasū eywebe Deus a'ījo buje, kūyjobin cuy epesop ixe a'ō kay, i. Eydobuyū'ūm'ūm puxim ġu juy epesop kūyjobit'ūmap kuġ, i.

¹⁶ Deus a'ō o'ya'ījojo ip Egito eipi bewi Moisés emumujēmyū. Inaka kūyjobit'ūm cīcā osodop ip ya'ō kay. Oibu'un ip cekay. ¹⁷ Ibun cīcā Deus itakoma osunuy cekay ip -40 koato bun. Itakoma osunuy ikērēat mujurūgrūġ'ukayū kay, uk'a'ūmat taġ oe'ū'ū'iyū kay.

¹⁸ — Ka'ūma'in ma ey'in jeōm okay jebodoy am — i juk o'e Deus cebe ip -kūyjobit'ūmayū be.

¹⁹ Imēneju wuyetaybit iōm pa'ore o'e cebe ip Deus o'ġuwēn ipi iat eipi be, itabut'ūm ip puye iam.

4

Deus kuy juk o'jewa'ōmudot wuykay.

— Epeōm cuy okay jebodoy am — i juk o'e wuywebe.

Wuyday'em'um cuy ajop wuyewewekay kūyjobit'ūmap puxim -wuyōm'ūmap puxim cekay. ² Wuyju dak kuy kawēn idipat aya'ījojojo apēn wuydobuyū'ūm'ūm o'ya'ījojo iap puxim. Deus ekawēn o'ya'ījojo ip. Imēnpit te'e ma o'ya'ījojo ip itabut'ūm puye. ³ Wuyju bit wuyetabut. Imēnpuye aceōm Deus kay jebodoy am. Imēn cuk Deus o'e:

Wetakoma juk adi oġuy cekay ip, i.

“Jeōm ġu ip jebodoy am oxe,” i juk oce owebe ma wetakomaap pibun, i.

Ipi muġē buje, Deus jekapikap o'jepere. Inaka:

— Jeōm ġu ip jebodoy am oxe — i juk o'e ixeyū muwēnuwēn -kūyjobit'ūmayū muwēnuwēn.

⁴ Imēn e'em Deus ekawēntup:

Seis kabia kap puje, Deus o'jebodoy
jekapikap epere buje, i.

⁵ Waram pima dak imēn ma o'e: — Jeōm ġu ip jebodoy am oxe- -pūġ tak jeōm ġu — i.

⁶ Koap kawēn idipat o'ya'ījojo'iaiyū oōm ġu jebodoy am Deus xe itabut'ūm ip puye. Imēnpuye warara'acayū jeōm jebodoy am cexe.

⁷ — Gasū ma kūyjobin cuy epesop — i juk o'e Deus Moisés ebekitkiyū be- -uk'a'ūmat taġ jekuku- 'ukayū be.

Imēnpit kūyjobit'ūm osodop ip. Imēnpuye ade koato kap puje Deus wara'at kabia o'ġuweġūn warara'acat mukūyjobinap ojuy.

— Gasū bit cuy kūyjobin epesop — i ġuto o'e waram warara'acayū be- -Davi ebekitkiyū be.

Davi dak iboap ma o'ġuwēn Deus a'ōbi jebekitkit pe. Imēn e'em Davi emudupmubararakatup:

Deus a'ījo buje, kūyjobin cuy epesop
ya'ō kay, i.

⁸ Josué Deus ebekitkit o'tujuōm ġu jebodoy am Deus xe. Josué be ixeyū dujuōm puje, Deus kuka juk wara'at kabia o'ġuweġūn ġu ixeyū ōmap kabiam.

⁹ Imēneju:

— Epeōm cuy jebodoy am oxe — i mabuk e'em Deus jebekitkit pe.

Cebodoy but cebe ip apēn seis kabia kap puje Deus o'jebodoy iap puxim. ¹⁰ Jebodoy am Deus xe wuyōm puje, wuyju dak wuyekapikap acejepere apēn Deus jekapikap o'jepere iap puxim.

¹¹ · ¹³ Ga'a juy aōm cekay. Soan cuy ace wuyebodoy am Deus xe! Deus ekawēn itaicat puxim, ya'ō-bacaat puxim tak. Pajam soat takatkan wuyju- -xepxep kadi tūybibian. Pajam wuyju iēn'uk'uġ tao bewi. Taobapuk e'em wuyxe iēn'uk puje. Deus ekawēn paja buxim- -xepxep kadi tūybibiat puxim. Deus ekawēn co buje, apēn wuyju jewaġuyġuy iap ibapuk e'em wuyxe, apēn wuybikuy iap tak. Soat imunēm pa'ore bit Deus pe ijo'ūmap puxim. Soat ibapuk cīcā cexe cemumuġēġēyū. Ixe soat cocom. Ixe wuyekukuap cocom, wuyaġuy jojom tak. Ixe be acā apēn cuk adi ajekukukuiap aceġuwēn. Imēneju wuydobuyū'ūm'ūm

puxim ġu juy ajop! Kūyjobin cuy ajop Deus xe wuyōm'ūmap puxim.

¹⁴ Imēneju wuybu'um ġu juy ajop wuyetabut am Jesus kay. Wuyetabucap muwēnuwēn wuyju warara'acayū be. Jesus ma aġ wuykay paī yoboġat puxim. Ixe wuyepaī paīyū kukukat puxim- -Judeuyū epaīyū kukukat puxim. Ixe Deus ipot. Warara'acayū paīyū bodi ma ixē ya'ōbuyxi. Ixe kuy oajēm Deus topabe kabi be. Ixe kawēnwēn Deus eju wuywebeam. Imēneju wuybu'um ġu juy ajop wuyetabut am ixē kay. Wuyetabun cīcā ma juy ajop! ¹⁵ Wuyepaī ya'ōpuruġ ġu wuykuġ, wuya'ōbaca ġu ma'ġu wuyju. Ya'ōdidin ma wuykuġ. Itabotaidabotbot wuykay, wuya'ōbaca ġu ma'ġu. Satanás wuywebe ikērēat muġēat ojuy soat em. Te'e ma Jesus pe dak ikērēat muġēat ojuy osunuy. Ixe bit ikērēat o'ġuġē ġu- -pūġ em tak ka'ūma ma. ¹⁶ Imēnpuye wuysūsūn ġu juy ajop kawēn ām Jesus eju. Soat cuy aġuwēn cebe. Ixe wuykay jījā. Ixe soat em wuykuġ xipan. Itabotaidabotbot wuykay. Wuya'ōbaca'ūm pima, ixē soat em ma wuybuywatwan jeenuy.

5 Wuyju paī yoboġat taēhēm ijodiacat parakpewi. Deus a'ōbi kapikpiġ ip jebekitkiyū buywatwan. Ijodiacat emumuūm ūmūm ip Deus pe. Deus etabutpe wūnca ēn mupikupiġ tak ip Deus pe ikērēat uk am wūnca iwat pewi. ² Ya'ōbaca ġu paīyū dak. Imēnpuye ya'ōpuruġ ġu ip jebekitkiyū kuġ- -jetaybit'ūmap tomuju ikērēat mujurūġrūġ'ukayū kuġ- -warēmtaġ jekuku'ukayū kuġ. Yukpiceġē ġu ip ikuġ. Ya'ōdidin ma ip ikuġ. ³ Ya'ōbaca ġu paīyū dak. Imēnpuye Deus etabutpe ip wūnca mupikupiġ Deus pe ikērēat uk am jebekitkiyū bewi ā ġu- -jewebewi dak. ⁴ Ijodiat jewenaēhēm ġu paī yoboġan e'em ip. Imēn kuyje Deus Arāo o'taē paī yoboġan.

⁵ Imēnpuxim Cristo dak jekpiwatpi ġu o'jewenaē paī yoboġan je'e am. Deus ma ixē o'taē.

— Ēn okpot. Ōn ma ebay oce ġasū — i juk o'e Deus cebe.

⁶ Imēnpuxim wara'atup e'em Deus ekawēntup:

En cuy soat em paīm eḡuy apēn Melquisedeque paī osunuy iap puxim, i.

⁷ Ipi ju bima Jesus kawēnwēn'uk osunuynuy Deus eju.

— Odaxijom cuy ece — i juk o'e cebe.

Ya'ōberen o'jewāwā cekay jetadi eju. Ibikuy bima iba'ore ḡu kuka juk o'e Deus pe Jesus daxijo am ce'ūap puxim. Jesus yoboḡan pin ḡu osunuy. Jemucokcok pin ḡu osunuynuy- -jebay mucokcok pin acā. Kūyjobit osunuynuy Deus a'ō kay. Imēneju soat em Deus ixekawēn o'jojojo. ⁸ Jesus Deus ipot osunuy. Inaka ipiat'ajojoap taḡ ma oitaybitbin kūyjobit am Deus a'ō kay iam. ⁹ Jesus ikērēat kuḡ ḡu. Iisu soat taḡ. Imēnpuye:

— Ewebe acā ipi watwat daxijo but — i juk o'e Deus cebe.

Imēnpuye Jesus acā kūyjobicayū daxijojom- -ipi juacat taxijojom. Soat em Deus xe jeedop ip itait cemu-daxijojoyū.

¹⁰ — Ēn acā paī yoboḡan eḡuy- -ipi juacat kay aḡ am — i juk o'e Deus Jesus pe. — Apēn Melquisedeque paī osunuy iap puxim ēn tak eḡuy paī yoboḡan — io'e Deus cebe.

¹¹ Soat ma'ḡu oceju eymutaybin ojuy apēn Jesus Cristo wuyepaī e'em iam. Imēnpit iba'ore ocewebe soan eymutaybit am eyetaybin wa'ūm cīcā buye kawēn iba'arēmān. ¹² Kuy bima ma juk eyetabut epe-sop Cristo kay. Imēnpuye cūḡ ma kuka o'e eywebe ma itabun'isuayū mutaybin am Deus ekawēn. Imēnpit warara'acayū ma eymutaybitbin Deus ekawēn- -kawēn ibapukan. Eyetaybit ḡu buk cekawēn pa'arēmān. Itabun'isuayū itaybit kawēn ibapukan acā, ikap'isuat kūmti kōnkōnap puxim. Kūmti kōnkōn acā iat puxim eyju dak. Iēn o ba'oreat puxim eyju, kawēn ibapukan acā eyetaybit puye. ¹³ Ikap'isuayū itaybit ḡu apēn cedaḡ Deus xe iam, apēn cedaḡ ḡu iam tak. Ikap'isuayū buxim eyju dak. ¹⁴ Deus bikuyap taḡ jekuku'ukayū bit itaybit Deus ekawēn- -kawēn iba'arēmān. Iēn o'o'ukat puxim ip. Itaybit ip ajo xipat Deus xe iam, ajo xipat ḡu iam tak, jewemukūyjobitbin ip puye, jewawēwēm puye dak.

6 ¹⁻² Cristo ekawën'in pit cuy acepere- -kawën ibapukat'in. Kawën iba'arêmân pit cuy acejekawën wuyewemutaybit am. Kuy bima juk adi kawën ibapukan kawënwën'uk ajop. Warëmtağ wuyeku-kuap cuy acepere iam kuy juk adi kawënwën ajop. Wuyetabun cuy ajop Deus kay iam tak cuk adi kawënwën ajop. Acewemubatisasaan cuy iam tak cuk adi kawënwën ajop. Warara'acayü jwebumôgmôğ wuy'abi jeje Deus pe jebiôğbuk muôm âm wuywebe iam tak cuk adi kawënwën ajop. Deus ce'ü'üayü ğutait iam tak cuk adi kawënwën'uk ajop. Soat em Deus ipiat supi'ajojoat küyjobit'ümayü be iam tak cuk adi kawënwën ajop. Imën ma juk adi kawënwën'uk ajop kawën ibapukan. Kawën iba'arêmân cuy acejekawën ğasü bit wuyewemutaybit am. ³ Acekawën cuy kawën iba'arêmân wuywewebe- -Cristo ekawën'in. Deus pe wuyemutaybin puje iboam ma acejekawën.

⁴ Jetabucap o'jepere ip püğpüğayü. Iba'ore wuywebe waram ixeyü mutabut am Cristo kay. Kuy juk kawën icëmat o'ya'ijojo ip. Kabi beat emumuüm kuy ip o'jat xipacat. Kuy juk Deus biôğbuk kuğ o'e ip jewebe. ⁵ Itaybit o'e ip Deus ekawën xipat cîcâ iam, Deus cuk adi xipan ixeyü o'jukuk puye. Deus ja'ôba-caap o'ğubapukpukpuk ixeyü etabun. Imënpuxim ja'ôbacaap ğubapuk ipi iisuat muğëm pima. ⁶ Ğuyjom pit jetabucap ip o'jepere. Korosa eju waram ğuto Deus ipot pamupaya ojuyayü buxim ip. Ixe ipot waywayway ip soat a'ôpiju. Iba'ore wuywebe waram imutabun ip Jesus kay.

⁷ Deus xipan wuykuğ. Soat em muba'at muajëmjëm kadai mu'aypapan am ku iwat xan. Itabut pinayü iğo ku buxim- -kadai ya'a'e iap puxim. ⁸ Wara'at ku be bit kadai ğu aypapan- -widaoho'ip acâ. Wao'ip tak aypapan. Xipat ğu kadaim. Wuyxan ğu aypapan. Imënpuye:

— Ojokot ğu oku xipat'üm puye — i'e'em ku iwat.

Jeku epererem, xipat'üm puye. Jetabucap o'jepere'iyayü iğo ku buxim- -wao'ip'epat puxim. Xipat ğu ip Deus xe. Imënpuye ipiat supi'ajojoat cebe ip. Wüy ma jeedop ip Deus wi ipiat'ajojom.

⁹ Oburereyū, wa'ōpuruḡsū ma ōn kawēnwēn eywebe, eykay jījā ōn puye. Eybu'u ḡu juk adi epesop eyetabut am Jesus kay. Ḡasū dak biḡ ma juy epesop eyetabun cekay. Ocetaybit Deus xipacat ūmūm eywebe warara'acat pe iūmūmap podi ma, kuy juk ixe eydaxijo buye iam. ¹⁰ Ade em cuk adi eykitpitpiyū buywatwat'uk epesop- itabucayū buywatwat'uk epesop, eyxe ip ikukpin puye. Ḡasū dak ixeyū buywatwan eyju. Deus yaḡuyba'ūm ḡu je'e eyju ip ibuywatwan iap kay, ixe cūḡ ma buye. Biḡ ma xipacat je'ḡūm eywebe ixeyū buywatwacapteim.

¹¹ — Waram Jesus ajēmap wiwim pima, biḡ ma juy xipan epeyewewekuk — i oceju e'em eywebe. — Biḡ ma juy jewebuywatwan epesop — i oceju e'em eywebe.

Imēn cuy epeku eyemumuwiwi bu am.

¹² — Soat em oxe epesop — i juk o'e Deus wuywebe.

Iboap cuy epejowiwi. Itabucayū buxim cuy eyju dak eyetabun epesop. Eyukpiceḡēm ḡu juy epesop. Xipacat epejat Deus xewi apēn ixe juk o'e iap taḡ.

¹³ - ¹⁴ — Icēmān ōn e'em ewebe — i juk o'e Deus Abraão be. — Xipacat oḡūm ewebe — i juk o'e cebe. — Ekpon oḡūm ewebe — i. — Enaxeḡebitbit ade jījā ecesūy — i juk o'e.

Imēn i'e buje: — Ja'ōmuwarurun ḡu ōn — i dak o'e Abraão be. — Wa'ō daḡ ma oce ewebe — i juk o'e. Ka'ūmḡu Deus podi ya'ōbacaat. Imēnpuye:

— Apēn kuy juk oce iap taḡ oce wara'acat a'ōbi ḡu- wa'ōbi ma — io'e Deus.

¹⁵ Abraão yukpiceḡē ḡu osunuy jetabucap kuḡ.

— Deus okpon je'ḡūm owebe — i juk adi o'e'e jewebe ma.

Imēnpuye ipot o'kap Deus ekawēn taḡ. Deus ja'ō daḡ o'ḡūm cebe. ¹⁶ Ijodiat “Ja'ōmuwarurun ḡu ōn” i'e ojuy bima, jebodi ma ya'ōbuyxiat nomuwāwām ibutet mubararak am taperadup pe.

— Ja'ōmuwarurun ḡu ōn Deus aḡ wuykay buye — i'e'em ijodiat.

Imēn i'e buje, ya'ōxik pa'ore ya'ījojmayū be.

¹⁷ — Soat em oxe epesop — i juk o'e Deus jebekitkiyū be.

Ixeyū be ma “Ja'ōmuwarurun ġu ōn” i'e ojuy osunuy Deus- ġuyjom jexe dopayū be. Imēnpuye o'jekawēn cebe ip.

— Wa'ō daġ ma oce eywebeam, ōn soat em wetait puye — io'e cebe ip. ¹⁸ — Wa'ō daġ ma oce eywebeam — i'e'em Deus.

Ja'ō daġ ma e'em soat em. “Apēn cuk adi kuy ma ocece iap taġ oce, ōn soat em aġ puye” i'e buje, ja'ō daġ ma je'e. Deus ja'ōmu'ipi'ūm ġu. Napapa'uk ġu. Wuymuġuykukukum ġu- -pūġ em tak ka'ūma. Cepiriġ puje, oakōm'iaiyū jedokdoġ kobexixi baġbaġ kay je'ūap puxim. Ixeyū buxim wuyju dak wuyetabut Jesus kay wuye'ūap puxim. Soat em ixē wuya'ōmucanucan. Imēnpuye soat em Deus xe wuyetait acesop iap ajowiwī jījā. ¹⁹ Soat em Deus xe acesop iap wiwim cīcā wuyju. Imēnpuye wuyetabucap kobexixi muycūcūap puxim. Imuycūcūap muakōm puje, wara'at taġtaġtaġ ġu cucum. Jecūap pe ma dopdom. Imēnpuxim wuyju dak wara'at kaykaykay ġu wuyetabut- -pūġ kay acā- -Jesus Cristo kay acā. Soat em wuyju ġebum cekay. Paī yoboġat ōmōm'uk osunuy Deus eju kawēnwēnap'a beat epaġo daġwi badiat'a be. Ōmōm'uk osunuy kawēn ām Deus eju jebekitkiyū beam. Kabi be bit Jesus oōm. Deus xe nuynuy ġasū kawēnwēn wuywebeam. ²⁰ Jesus o'jeu kabi kay wuye'ūm awap. Koap o'jeu. Kaomūm acejeu cekay. Wuyepaīm o'e yoboġan. Soat em wuyepaīm jeenuy apēn Melquisedeque paī osunuy iap puxim.

7 Ixe Melquisedeque Salēm ka kukukat osunuy. Deus epaī osunuy- -soat podi ma ya'ō-bacaat epaī. Abraão jepitpin osunuy nopāġōġōap taġwi- -warara'acat ka kukukayū aokakaap taġwi. Melquisedeque Abraão o'topabijuk e daġ jepin pima.

— Deus cuy xipacat je'gūm ewebe — io'e Melquisedeque Abraão be.

²Abraão jebubut'in o'gūm Melquisedeque be. Ade ma o'gūm cebe. Pūg ma o'gūm cebe 10 beat'in. Nopağōğōap pewiat pupu o'gūm cebe-yaokaka'ibiyū bubutpupu. Ibutet Melquisedeque cedağ ma jebekitkit kuğ iape. Ixe Salém ka kukukat osunuy. Ika butet Salém kaba'ūm jebekitkit kuğ iape. ³Wuyetaybit ġu Melquisedeque ebay buten, ixi buten tak, idobuyū'ūm'ūm puten tak. Puju ixē o'kap iam tak wuyetaybit ġu, puju oe'ū iam tak.

— Soat em cuy paīm eğuy — i juk o'e Deus cebe-Melquisedeque be.

Imēn o'e jekpot pe dak.

⁴Gebum cuy epesop Melquisedeque ya'ōbuyxi jījā osunuy iap kay. Abraão Judeuyū ebapuk ebika osunuy. Imēnpit jebubut'in o'gūm cebe. Nopağōğōap tağwiat pupu o'gūm cebe-idip cīcāat. ⁵Kuyje Moisés o'e Levi ipotpot pe:

— Judeuyū juy jebubut'in je'gūm eywebe, eyju ixeyū epaiyū buye — i. — Pūg ma juy je'gūm ip eywebe 10 beat'in — i.

Imēntak ibararak opop wuyawēwēap ekawēntup pe. Jeadipyū xewi ibubu'uk osodop ip jebubun, ixeyū dak Abraão naxeğebitbit ma'ġu osodop. ⁶Melquisedeque bit Levi diwat ġu osunuy. Abraão bit jebubut'in o'gūm cebe. Pūg ma o'gūm cebe 10 beat'in. Nopağōğōap tağwiat pupu o'gūm cebe. Kuyje:

— Ijop eipi oğūm eipim — i juk o'e Deus Abraão be. — Enaxeğebitbit ade jījā ecesūy — i juk o'e cebe. Melquisedeque bit:

— Deus cuy xipan jekuk — io'e cebe-Abraão be.

⁷Ya'ōbuyxiat jēğ'aecōğcōğ ġu ya'ōbuyxi'ūmat topabe "Deus cuy xipan jekuk" i'e am cebe. Ya'ōbuyxi'ūmat pit jēğ'aecōğcōğ ya'ōbuyxiat pe "Deus cuy xipan jekuk" i'e am cebe. ⁸Ijodiyū jebubut'in iūmūm paīyū be-je'ū'iyū be. Imēnpit Deus ekawēntup e'em: "Melquisedeque je'ū ġu-itabēğ ma jeenuy," i. Imēnpuye jebubut'in o'gūm

cebe. ⁹⁻¹⁰ Melquisedeque be Abraão dopabijuk puje, Levi o'kap ġu buk. Inaka:

— Kuy Abraão jebit pe bit osodop kake — i wuyju e'em.

Melquisedeque be Abraão be jebubut'in iūm puje, “Levi dak jebubut'in o'ġūm,” i wuyje e'em, ixe Levi Abraão jebit pe buye. Ġasū dak Levi naxeġebitbit ibubut pupum jebadipyū xewi Moisés a'ōbi. ¹⁰ beat pewi pūġ ma ibubum ip.

¹¹ Paīyū kake wuyawēwē ām cedaġ ma wuyeku am Deus bikuyap taġ. Levi ipotpoyū be bit ya'ōmucan pa'ore osodop ip Deus bikuyap taġ ceku am ip. Imēnpuye Deus wara'acat o'jomuy wuyepaīm ixeyū dieġ. Cristo ma o'jomuy. Ixe Cristo paīm o'e apēn Arāo paī osunuy iap puxim ġu- -apēn Melquisedeque paī osunuy iap puxim acā. Cristo ja'ōbacaap mōġmōġ wuywebe Deus bikuyap taġ wuyeku am. ¹² Moisés ekawēn taġ paīyūm osodop ip Levi ipotpoyū. Ġasū bit wara'at Deus ebekitkit epaīm o'e Arāo naxeġebitbit tieġ. Imēnpuye kawēn kuyat taġ ġu wuyju jekukum ġasū- -Moisés ekawēn taġ ġu. Kawēn iisuat taġ acā wuyju jekukum ġasū- -Jesus ekawēn taġ.

¹³⁻¹⁴ — Ēn ġasū webekitkiyū epaīm ecesūy yo-boġan — i juk o'e Deus wuykukukat Jesus pe. Ixe Jesus Levi naxeġebit ġu. Wara'at tiwat ma wuykukukat. Judá naxeġebit ixe. Paīyūm ġu osodop ip Judá naxeġebitbit. Judá naxeġebitbit ġu wūnca mukupik'uk osodop ip Deus etabutpeap ceje- -mesa jeje- -Levi naxeġebitbit acā. Moisés Judá naxeġebitbit ġu o'taē paīyūm. Levi naxeġebitbit acā o'taē paīyūm.

¹⁵ Apēn cuk adi ocece iap biġ ma ibapuk e'em ġasū. Wara'at o'jebapuk paīm- -Melquisedeque buximat. ¹⁶ Ijodiat a'ōbi ġu ixe Jesus paīm o'e ijodiat pabi daġ ġu dak. Ixe Deus ebekitkit epaīm o'e ġasū soat podi ma ya'ōbaca buye; soat em itait jee-nuy buye dak. ¹⁷ Imēn e'em Deus ekawēntup:

Soat em webekitkit epaīm cuy eġuy
apēn Melquisedeque paī osunuy iap

puxim, i. Ēn ixeyū epaīm iap i'ūm
 ġu, i.

¹⁸ Ibacā'ūm osodop ip kawēn kuyat taġ jekuku'uk-
 ayū- -wuyawēwēap ekawēn taġ jekuku'ukayū. Ixeyū
 be iba'ore osodop cedaġ ma jeku am Deus etabutpe
 ibacā'ūm puye. Imēnpuye “Kawēn kuyat taġ cuy
 epeku” i'ūmġu e'em Deus ġasū bit- -“Kawēn iisuat
 taġ cuy epeku” i acā. ¹⁹ Ka'ūma ma soat taġ iisuan
 o'e Moisés ekawēn taġ jekukuap tomuju. Imēnpuye
 soat em Deus xe acesop iap wiwimsū ma osodop ip
 Moisés ekawēn taġ jeku ojuyayū. Deus pit wara'at
 o'jomuy wuyepaīm. Warara'acat emumuwiwi bodi
 ma wuyemumuwiwi xipat. Imēnpuye soat em ixē xe
 acesop iap wiwimsū ġu wuyju. Iwiwim cīcā ma. Wuy-
 parara ġu kawēn ām Deus eju, Jesus wuyepaī buye.

²⁰ - ²¹ Jebekitkit epaīm Cristo muy buje:

— Apēn cuk adi ocece iap taġ cuy oce, soat em
 wetait puye — io'e Deus.

Jebekitkit epaīm Levi naxeġebitbit mōġ puje bit,
 imēn ġu o'e cebe ip. Jesus muy buje acā “Wa'ō daġ
 cuy oce, soat em wetait puye” io'e Deus. Imēn e'em
 Deus ekawēntup:

“Webekitkit epaīm cuy eġuy soat
 em,” io'e Deus, i. “Ēn ixeyū epaīm
 iap i'ūmġu,” io'e, i. Deus ja'ō o'je-
 wa'ōepere cexe ip, i. Ja'ōmuwarurun
 ġu Deus pit, i.

Imēn Deus o'e Jesus muwēnuwēn.

²² — Apēn cuk oce iap taġ cuy oce — io'e
 Deus warara'acayū be ġu- -Jesus pe acā.

Imēnpuye wuyetaybit kawēn iisuat kawēn kuyat podi
 ma xipat iam. Deus jekawēn o'ġuwēn Moisés pe. Xi-
 pat osunuy ibo ekawēn- -kawēn kuyat. Kawēn iisuat
 pit kawēn kuyat podi ma xipat.

²³ Ade ip osodop Levi naxeġebitbit. Oe'ū'ū ip.
 Ixeyū'inat e'ū buje wara'at ma paīm o'e oe'ūiat tieġ.

²⁴ Jesus pit soat em itait nuynuy. Warara'acat ġu
 wuyepaīm je'e ixē dieġ. Jesus acā soat em jeenuy
 wuyepaīm. ²⁵ Ixe Jesus soat em itait. Soat em ixē ka-
 wēnwēn Deus eju jekay itabucayū beam.

— Okayayū buywatwan cuy eḡuy — i'e'em Deus pe.

Wuywebe cekawēn put Deus eju Jesus kay wuyetabut puye. Imēnpuye Jesus pe wuydaxijo but- -itabucayū taxijo but. Gasū ja'ōkayayū taxijo but cebe. Guyjom tak taxijo but cebe. Soat em ma ja'ōkayayū taxijo but je'e cebe.

²⁶ Jesus ma wuyepaī yoboḡat. Soat i'e ba'ore wuywebe wuya'ōca'ūm puye. Ajo wuywebe i'e ba'ore iap Jesus pe bit i'e but. Ixe be wuya'ōmucan put soat em. Ixe soat taḡ iisu. Ka'ūmḡu xipat'ūmat cebe. Ikērēat kuḡ ḡu ixe. Ikērēat o'ḡuḡē ḡu- -pūḡ em tak ka'ūma ma. Ikērēat mujurūḡrūḡ'ukat puxim ḡu ixe. Deus ixe o'ḡuyuy kabi be soat em tūy ām jexe. ²⁷ Warrara'acayū paī yoboḡayū soat kabia wūnca ēn mupikupik'uk osodop ip Deus etabutpe. Iēn mupiḡ pi-ma:

— Ikērēat cuy eju'uk owebewi — io'e ip Deus pe.

Jewebewi i'ukap ojuy bima acā “Ikērēat cuy eju'uk ebekitkiyū bewi” io'e ip Deus pe ixeyū ma. Jesus pit ixeyū buxim ḡu. Pūḡ em ma o'jeweūm Deus pe. Pūḡ em ma ixe oe'ū ikērēat uk am soat pewi wuywebewi. Jekpiwan ma o'jaokaat. Waram pit je'ū ḡu. ²⁸ Moisés ekawēn taḡ jeku ojuyayū ijodiacat muymuy'uk osodop jepaīm yoboḡan. Arāo naxeḡebitbit muymuy'uk osodop ip jepaīm yoboḡan. Soat taḡ osodop icēmayū ḡu ixeyū dak. Deus pit o'jekawēn jekpot pe Moisés pe jekawēḡap tomukadi.

— Ēn acā icēmat soat taḡ — io'e jekpot pe. — Imēnpuye ēn acā eḡuy webekitkit epaīm yoboḡan — io'e Jesus pe. — Ēn ixeyū epaīm iap i'ūm ḡu — io'e cebe.

8 Jesus wuyepaī yoboḡat. Ixe Jesus xik'i omuy Deus ba'at kadi kabi be- -soat podi ma ya'ōbacaat xe. Deus co'i ixe ya'ōbaca. Ibom acā oceju eymutaybin ojuy. ² Kuyje badiat'a be Deus nūy-nūyap'a ibuyxi jījāat'a be ōmōm'uk osunuy torojo'a

be paī yoboġat. Jekawēn ām Deus eju jebekitkit peam ōmōm'uk osunuy. Ijodiat emuamuy'a be ōm-ōm'uk osunuy Deus eju kawēnwēnap'a be. Jesus pit ijodiat emuamuy'a be ġu omuy- -Deus tūytūyap pe acā. Iboce ma ixē kawēnwēn Deus eju wuywe-beam.

³ Kuyjeayū ijodiat muymuy'uk osodop jemu-muūm ūm ām Deus pe wūnca ēn mupik am tak ce-tabixe. Imēnpuxim cuy wuyepaī dak je'ġūm Deus pe. ⁴ Jesus ġasū dak ijodi bima, paīdip ġu kuka adi o'e warara'acat kuy paīyūm o'e buye. Levi naxeġebitbit kuy paīyūm o'e. Jedobuyū'ūm'ūm ekawēn taġ ip jebekitkiyū emumuūm ūmūm Deus pe- -Judeuyū-ūm'ūm ekawēn taġ- -kawēn kuyat taġ. ⁵ Co'a bi-cūġpe bima Deus Moisés o'ġukūyjo torojo'a muy ām. Torojo'a muġēap piōġbuk o'ġuġē imubapuk am cebe mēnku juy eyamuy iam.

— Cedaġ cuy eġuġē apēn cuk oce ewebe iap taġ — io'e Deus cebe.

Jesus jebekitkiyū buywatwan kabi kadiwi. Ijodi dak paīyū ixē buxim jebekitkiyū buywatwan e'em. Jesus pit ixeyū bodi ma wuybuywatwan. ⁶ Jekpot pe bit Deus kapikap o'ġūm xipat cīcāap Levi naxeġebitbit pe iūm'ibit podi ma. Kuyje Deus jekawēn o'ġuwēn Moisés pe. Ibo ekawēn kawēn idip osodop. Ġuyjom pit jekawēn o'ġuwēn jekpot pe. Ibo ekawēn kawēn kuyat podi ma kawēn idip osodop. Ibo ekawēn kay wuyetabun puje, Deus wuymuisusun soat taġ. Wuyetaybit soat em Deus xe acesop iam ibo ekawēn kay wuyetabut puye. Imēneju kuyjeayū bodi ma wuycok-cok.

⁷ Deus koap jekawēn o'ġuwēn Moisés pe. Kawēn kuyat soat ekawēn podi ma idip pima, kuka juk wara'at ġu o'ġuwēn kawēn iisuat. ⁸ Deus pit jebekitkit o'tobuxik jekawēn mupubutbun. Imēn ma ixē e'em cebe ip:

Ġaxīn ma juy kawēn iisuat oġuwen Is-rael naxeġebitbit pe- -Judá naxeġebitbit pe, i. ⁹ Kuyje juk adi wekawēn oġuwēnuwēn eydobuyū'ūm'ūm pe, i. Iboap ekawēn co'i ġu ġasū bit oġuwēn

webekitkit pe- -wara'at ekawên acā, i. Egito eipi bewi eydobuyū'ūm'ūm mujēm puje, wekawên oğuwên cebe ip imukūyjoap ojuy, i. Imēnpit ip oibu'un wekawên kay, i. Imēnpuye ōn tak obu'un ma oce cekay ip ağ am, i. Imēn Deus e'em, i. ¹⁰ Ğaxīn ma juy wara'at kawên oğuwên Israel naxeğebitbit pe- -kawên iisuat, i. Oğugebu ip wekawên kay, i. Soat em ġebum jeedop ip wekawên kay, i. Icokcok jeedop ip wekawên tağ jeku am, i. "Deus acā ocekekukat," i je'e ip soat pe, i. "Teyūku webekitkiyū" i ōn tak oce soat pe, i. ¹¹ Soat je'e itaybit ōn-ya'ōbuyxiayū, ya'ōbuyxi'ūmayū dak-yoboğayū, yopīcayū dak, i'e'em Deus, i. Jewemutaybitbin ġu jeedop ip Deus e'e am, kuy itaybit ip puye, i. "Ocemutaybin cuy epe'e Deus ekawên," i'ūmğū je'e ip jebureyū be, soat itaybit je'e buye, i. ¹² Ğebum ġu oce apēn cuk adi warēmtağ oekukuku ip iap kay, i. "Ikērēat kuğ eyju oxe," i'ūmğū oce cebe ip- -pūğ em tak ka'ūma, ġebum ġu oce iboap kay buye, i. Deus imēn e'em jebekitkit pe- -kuy o'ğuisun'iaiyū be.

¹³ Iokokat dao ma i'ūm. Iisuat pu buje, iokokat kuğ ġu ace'e. Imēnpuxim:

— Kawên kuyat cuy epeyepere i'e'em Deus ġasū bit. — Kawên iisuat tağ cuy epeku ġasū bit — i'e'em wuywebe.

9 Kawên kuyat tağ jeku ojuyayū "En xipat cīcā" i'e'e'uk osodop ip Deus pe ceweju kawēnwēnap'a be- -ijodiat emuamuy'a be. ² Torojo'a

o'yanuy ip wuydobuyū'ūm'ūm- -koapat'a. Kacūḡkadiat'a be lāmpada'a o'yanuy jemūn ceje-ouro muḡēḡē'a. Mesa dak osunuy iḡo'abi be ourom yajuyjuyat. Iḡo emesa jeje pāo'a mōḡmōḡ'uk osodop ip Deus etabixe yamōḡmōḡ'ibit'a. Kacūḡkadiat'a be "Deus tūytūyap'a" io'e wuydobuyū'ūm'ūm. ³·⁴ Paḡo toro'i oeku badiat'a exīntabi nomudim- -idip cīcāat- -iarixiḡat. Tōmte'okuatōm mupikupikap osunuy ixē paḡo xe- -toro'iat xe. Badiat'a be "Deus tūytūyap'a ibuyxiat'a" io'e ip wuydobuyū'ūm'ūm. Caixa'a o'yanuy badiat'a be. Iḡo'a ourom yajuyjuyat'a o'yanuy. Deus ekawēn kukatopa mūn'a o'yanuy iḡo'a be- -witadopa be ibararak iat mūn'a. Iḡo'a be itīḡ'a- 'it'it'a buximat'a dak o'yanuy- -ouro muḡēḡē'a'a. Manada dak o'tanuy iḡo'a be- -pāo'anōmnōm puximata. Arāo ba'ip tak o'yoptyū iḡo'a be caixa'a be- -kuyje o'yopkobinōjēm'iat'ip. Witadopa dak o'topadop iḡo'a be caixa'a be xepxētopa- -yaerūnatopa. Deus ekawēn ibararak osodop iḡodopa be- -kawēn kuyat. ⁵ Caixa'a jeje xepxep idip cīcāat piōḡbuk osodop. Ceḡeba abiwebotbot osodop ip caixa'a ase. Deus nuy- nuy jebekitkit parakpe iap kay ḡebumiap'a o'yanuy. Iḡo caixa'a jo buje wuyju ḡebum Deus ikērēat uk'uḡ wuywebewi iap kay. Ḡasū bit o'e ḡu ocewebe soan eymutaybin am apēḡape soat iboap osodop torojo'a be iam.

⁶ Soat ixipan pima, paīyū ōmōm'uk osodop ip kacūḡkadiat'a be. Soat kabia ōmōm'uk ip osodop jekapik am Deus etabutpe. ⁷ Badiat'a be bit paī yoboḡat acā ōmōm. Pūḡ kabia ma ōmōm pūḡ koato dujukap puje jeje ma. Wūnca doy dujuōmōm'uk osunuy badi toymubapuk am Deus pe.

— Ikērēat cuy eju'uk owebewi ite'ūm oe'ū buye ikērēat muḡēḡēap teida am — i'e'em Deus pe. — Ebekitkit pewi dak ikērēat cuy eju'uk ite'ūm oe'ū buye ikērēat muḡēḡēap teida am — i'e'em Deus pe. — Itaybit'ūm pima ip ikērēat o'ḡuḡēḡē — i'e'em cebe.

⁸ Badiat'a be paī yoboḡat acā oōm iap kay wuyju ḡebum pima, xipat cīcāat piōḡbuk wuymutaybitbin koapat'a torojo'a kake bima iōmpi osodop ip ijodiat

badiat'a be- -Deus tūytūyap'a ibuyxi jījāap'a be iam. ⁹ Iōmpi osodop ip iap kay ġebum pima, wuyetaybit tak apēn ġasū bit wuyōmpi ġu o'e iam. Kuyje ade wūnca mupikupik'uk osodop ip Deus etabutpe. Ade ma ip iūmūm'uk osodop cebe. Imēnpit soat taġ ġu iisu o'e ip, ade ma'ġu ip iūmūm. Wuyetaybit iboam. ¹⁰ Pūġpūġ xat i'opi osodop kuyjeayū be. Pūġpūġ xati dak tikōmpi osodop cebe ip. Jewewuywuy'uk osodop ip jebabim- -Deus ekawēn taġ- -kawēn kuyat taġ. Jebacia'abi wuywuy'uk tak osodop ip jebabim. Imēnpit kacūġkadiwi acā ip jewesupsup'uk osodop. Deus badiat muisusun'ūm pima jewewuju acā ip iisu. Deus pe jemuisunap wiwim ip osodop.

¹¹ Gasū bit Cristo kuy osodot. Wuyepaīm o'e yoboġan. Gasū:

— Xipacat oġūm eywebe — i'e'em ixē wuywebe. Ijodiat emuamuy'a be ġu ixē kawēnwēn Deus eju wuywebeam- -ipi juat'a be ġu. Kuyat'a bodi ma ixē nuynuyap'a xipat. Kuyat'a bodi ma ixē nuynuyap'a yadip. ¹² Cristo bode doy ġu o'toydujuōm toymubapuk am Deus etabutpe, biopak toy dak ka'ūma. Ixē o'jedoyekereren korosa be apēn cuk adi ikērēat aġuġēġē iap teida am. Ixē oōm Deus tūytūyap pe apēn kuyje paī yoboġat oōm badiat'a be iap puxim. Deus xe soat em acesop iaptei o'teida o'jedoyekereren puye. ¹³ Bode doy mubapukpuk'uk osodop ip Deus etabutpe, biopak toy dak kuyjeayū paīyū. Jebabi daġ ip toymubapukpuk'uk osodop Deus ekawēn taġ- -kawēn kuyat taġ. Jebabi daġ tak ip biopak'it'it ēn pik muwēkoykoy'uk osodop ip idibi be. Ibiati sūġsūġsūġ'i o'e ip jebekitkit'abi daġ. Iġo ekawēn taġ iisuan o'e ip ibiati sūġsūġ'i buje. Inaka kacūġkadiwi acā ip iisu o'e. Badi bit ka'ūma. ¹⁴ Bode doy, biopak toy dak kacūġkadiwi acā wuymuisusun. Cristo doy bit bode doy bodi ma xipat. Biopak toy bodi ma xipat. Ixē doy badi dak wuymuisusun. Cristo o'jedoyekereren wuywebeam iap kay wuyetabun puje, kacūġkadiwi ā ġu wuyisu ace'e. Badi dak wuyisu ace'e. Ixē Cristo ikērēat kuġ ġu osunuy. Pūġ em tak ikērēat o'ġuġē ġu. Deus biōġbuk a'ōbacaap kuġ osunuy- -soat em itaicat biōġbuk a'ōbacaap kuġ. O'jewēum Deus

pe je'û âm wuywebeam. Deus bikuyap tağ oe'û.

— Bay — io'e Deus pe. — Apên kuyjeayû muisusun'uk eğuy wûnca e'ûap tomuju iap podi ma ipi juayû eğuisun we'û buje — io'e Deus pe -jebay be. Ixe o'jedoyekereren wuywebeam oe'û iap kay wuyetabun puje. Deus wuymuisusun waram warêmtağ ma wuyekuap puxim. Soat tağ wuymuisusun wuywebe kapik am Deus peam- -soat em itaicat peam.

¹⁵ Ikêrêat mujurûgrûğ'uk ip osodop kawên kuyat tağ jeku ojuyayû. Cristo bit oe'û ikêrêat uk am ixeyû bewi. Ikêrêat muğêğēapteı o'teıda je'û âm. Imên-puye:

— Waram ġuto Deus jekawên o'ğuwên eywebe- -kawên iisuat — i'e'em Cristo ijodiacat pe.

— Soat em epesop oxe xipacap kuğ eye'û buje — io'e Deus kuyje.

Soat em jeedop ip cexe Deus emunaëyû, Cristo oe'û buye. Soat em jeedop ip cexe apên ixex juk adi o'e'e iap tağ.

¹⁶ "Obubut'in epejat we'û buje" i'e buje ijodiacat, ce'û buje acâ ibubum ip. Ce'û'ûm pıma bit ibubum ġu ip. ¹⁷ Itabêğ pıma ibubum ġu ip. Ce'û buje acâ ip ibubum. ¹⁸ Imênpuxim wuydobuyû'ûm'ûm pe wûnca aoka buje acâ, kawên kuyat tağ jekuku'uk ip osodop wuyawêwêap ekawên tağ. ¹⁹ Koap Moısés Deus pe jawêwêap ekawên o'ğuwên jebekıkiyû be. Biopak'it'it o'yaoka. Bode dak o'yaoka. O'toymuwekoy idibi be. Kadaidup o'tupu hissopodup. O'tupmukirik lâbum- -bôröbu buximatpum- -ibupakpukatpum. O'toymusûğsûğsûğ tupararakatup tağ- -Deus ekawên-tup tağ. Jebekıkiyû abi dağ tak o'toymusûğsûğsûğ Deus ekawên tağ- -kawên kuyat tağ.

²⁰ — Deus jekawên o'ğuwên wuywebe — io'e Moısés jebekıkiyû be. — "Wekawên tağ cuy epeku," i juk o'e wuywebe — io'e Moısés. — İte doy musûğsûğsûğ ön ey'abi dağ eywebe küyjobit am Deus a'ö kay — io'e Moısés jebekıkiyû be.

²¹ Imênpuxim torojo'a jeje dak o'toymusûğsûğsûğ Moısés. İğö'a beat tağ tak o'toymusûğsûğsûğ soat tağ. "Ën xıpat cıca ocewebe" i'e'em pıma jebui be ikuğ iat tağ o'toymusûğsûğsûğ. ²² Wuyawêwêap eka-

wēn taḡ jeku ojuyayū wūnca doy mukereren'uk ip osodop Deus pe jemuisun am. Toymukereren'ūm pima kuka juk Deus ikērēat o'ju'uk ḡu cebewi ip. Deus ekawēn taḡ toymukereren ip osodop soat muisun am kawēn kuyat taḡ.

²³ Imēn jebekitkiyū muisusun'uk osodop ip paīyū apēn kabi beacat jewemuisusunap puxim. Wūnca aokaka'uk ip osodop ijodiacat muisun am. Kabi kay cumayū muisusunap pit wūnca bodi ma xipat. ²⁴ Imēnpuye torojo'a be ḡu Cristo oōm-ijodiat emuamuy'a be ḡu-kabi beat'a buximat'a be ḡu. Kabi be ma oōm-Deus tūytūyap pe ma. Ibocewi ma ḡasū ixekawēnwēn Deus eju wuywebeam. ²⁵ Judeuyū epaī yoboḡat ma soat koato oōm'uk osunuy badiat'abi be, Deus tūytūyap'a ibuyxiap'a be. Oōm'uk osunuy wara'at toy kuḡ-wūnca doy kuḡ. Deus tūytūyap'a be oōm'uk osunuy Deus pe ikērēat ukap ojuy. ²⁶ Cristo bit soat em ḡu oōm jeweūm ām Deus pe je'ū ām. Soat koato ḡu oe'ū-pūḡ em ma. Pūḡ em ma o'jedoyekereren ikērēat mujurūḡrūḡap teida am. Jesus e'ūap wūnca e'ūap co'i bima, ipi muḡē ebika ma kuka juk adi je'ū'ū'uk o'e. Ade em kuka adi oe'ū'ū. Poḡ. Poḡ. Poḡ. Poḡ. Bodimaku kuka adi je'ū'ū'uk o'e. Pūḡ em pit o'jebapuk ipi oi'ūm pin pima. Waram tak ḡu je'bapuk ikērēat uk am ipi jua-cat pewi. ²⁷ Soat ace'ū pūḡ em ma. Wuye'ū buje Deus apēn ijodi bima juk adi ajekukuku iaptei ideida wuywebe soat pe. Ipiat supi'ajoat kūyjobit'ūm topibiyū be kūyjobit'ūmapteim. Xipacat pit je'ḡūm kūyjobicayū be. ²⁸ Imēnpuxim Cristo jekpiwan ma oe'ū apēn paī wūnca o'yaoka iap puxim. Oe'ū soat pewi ipi watwat pewi ikērēat uk am. Pūḡ em ma oe'ū. Waram pit jajēm ijodi. Ikērēat uk am ḡu jajēm. Jajēmap wiwimayū daxijo am acā jajēm.

10 Judeuyū awēwēap ekawēn taḡ jeku ojuyayū itaybitbūt ā ip osodop kawēn icēmān. Itaybitbūt ā ip osodop xipacat ajat iam. Soat taḡ ḡu iisu ip osodop iboap ekawēn taḡ jeku ojuyayū. Soat koato paīyū wūnca aokaka'uk ip osodop Deus pe ikērēat uk

ojuy jebekitkiyū bewi. Deus pit soat tağ ġu ixeyū ja'ōkayayū o'ğuisun. ² Soat tağ iisu bima waram kuka adi o'e ip iğuycūğ ġu oceju ikērēat kuğ iap kay. Soat tağ iisu bima, kuka adi wūnca aokakaap ip o'-jepere. ³ Imēnpit soat koato wūnca aokaka'uk ip osodop ikērēat eju'uk ebekitkiyū bewi i'e ojuy Deus pe. Yaoka buje:

— Oceisu Deus xe ġasū bit; ikērēat kuğ ġu oce'e — i'ūmġu o'e ip. — Ģasū bit ġuto oceju ikērēat kuğ — i acā ip o'e.

⁴ Biopak toy bit ikērēat uk'uğ ġu wuywebewi, bode doy dak.

⁵ Imēnpuye Cristo osodot ijodi. Ixe don pima, o'-jekawēn jebay eju- -Deus eju.

Ijodiat pe wūnca aokaat pin ġu ēn, io'e Deus pe. Cebe ip wūnca ūmat pin ġu dak ēn, io'e. Ojebin pit eğūğē owebe ipi juan, io'e Deus pe. ⁶ Etabun wūnca mupik ip puje, ecokcoğ ġu eğuy, io'e. Ijodiat pe wūnca aoka buje ikērēat uk am, ecokcoğ ġu eğuy, io'e. ⁷ Imēnpuye, "Bay, ijoce ōn oajēm ebikuyap tağ weku am- -emucokcok am," i juk oce ewebe. "Apēn Judeuyū awēwēap ekawēntup omuwēnuwēn iap tağ weku pin," i juk oce ewebe.

Imēn Cristo o'e jebay be- -Deus pe.

⁸ — Ijodiat pe wūnca aokaat pin ġu ēn, wūnca ūmat pin ġu dak — i juk o'e Jesus Deus pe. — Wūnca aoka buje ikērēat uk am, ecokcoğ ġu eğuy, etabun wūnca mupik ip puje dak — i juk o'e. Imēn Jesus o'e kawēn kuyat tağ ma'ġu ip imupikupiğ- -Judeuyū awēwēap ekawēn tağ.

⁹ — Bay, ijoce ōn oajēm ebikuyap tağ weku am- -emucokcok am — i juk o'e ġebuje bit.

— Kuyjeat puxim wūnca juy epeyaoka owebe ikērēat uk am eywebewi — i'ūmġu e'em Deus ġasū bit. — Ikērēat oju'uk eywebewi Cristo oe'ū buye — i acā e'em Deus wuywebe.

Kuyat pit wūnca aokakaap Deus o'ġu'ūm, ikērēat uk'uğ wuywebewi Cristo oe'ū buye. ¹⁰ Deus bikuyap

tağ jekuku'uk osunuy Jesus Cristo. O'jeweüm Deus pe je'ü âm. Jekpiwatpin ma oe'ü. Püğ em ma oe'ü ikêrêat uk am soat pewi wuywebewi. Imênpuye Deus wuymuisusun soat tağ.

¹¹ Judeuyü epai ma soat kabia cüğ'i osunuy jekapikap kuğ. Soat kabia wünca mupikupik'uk ip osodop. Iboap kuğ osunuynuynuy soat em. Imênpit wünca mupikupikap ikêrêat uk ojuy ğu. Imênpuye Deus ikêrêat o'ju'uk ğu wünca mupik puje dak. ¹² Jesus Cristo bit püğ em ma oe'ü wünca e'üap puxim ğu. Oe'ü ikêrêat uk am soat pewi wuywebewi. Waram pit je'ü ğu. O'jeu Deus kay. Oabik jebay xe -Deus xe. Iba'at kadi oabik. Soat kukukan o'e ixe eju. ¹³ Deus jekpot kay itakomaayü a'öbacaap ğu'üm. Küyjobin jeedop ip Deus a'ö kay. Cristo omuy jebay xe iboap wiwim. ¹⁴ Püğ em ma oe'ü ikêrêat uk am soat pewi wuywebewi. Soat ikêrêat kuğ'ümayü o'ğuisun soat tağ. Soat tağ iisu jeedop ip soat em ma.

¹⁵ Imên Deus biöğbuk tak wuymutaybitbin. Imên koap o'e:

¹⁶ "Ixe'yü kabia kap puje wara'at ekawên oğuwên webekitkiyü be kawên iisuat," i'e'em Deus, i. Soat em ğebum jeedop ip wekawên kay, i. Icokcok jeedop ip wekawên tağ jeku am, i.

¹⁷ Guyjom imên o'e:

"Ğebum ğu oce apên cuk adi ikêrêat o'ğugêgê ip iap kay, apên cuk adi warêmtağ ma oekuku ip iap kay dak," i'e'em, i.

¹⁸ Deus pe wuywebewi ikêrêat uk puje, waram pit wünca aceyaoka ğu ikêrêat uk an. Jesus e'üap kuy o'e ikêrêat ukap teida am.

¹⁹ Imênpuye, okitpitpiyü, wuyparara ğu jekawên âm Deus eju, korosa be Jesus oe'ü wuywebeam puje. Apên kuyjeayü Deus tütüyap'a ibuyxi jijâap'a be ömömap puxim wuyekawên put ceweju. ²⁰ Paï yoboğat acâ pağo dağwi ömöm'uk osunuy badiat'abi be kawên âm Deus eju. Wuyju bit kawênwên Deus eju Jesus e'üap puje. Ixe Jesus soat em

itait. Jesus e isuat e buxim -Deus kayat e buxim. Imēnpuye soat em wuyekawēn put ceweju. ²¹ Jesus wuyepaī yoboğat. Ixe soat itabucayū kukukat. ²² Imēnpuye juy acekawēn ceweju. Jewexe ġu juy acekawēn ceweju. Wuyetabun cīcā ma juy acekawēn ceweju.

— Ikērēat kuğ mabuk òn — i'ümġu juy ace wuywebe ma.

Ixe wuymuisusun soat tağ idibim jewewuywuyap puxim. Imēnpuye juy acekawēn ceweju. ²³ Deus ja'ò dağ e'em soat em. Te'e ġu wuyetabut cekay. Wuyetabucap muwēnuwēn warara'acayū be. Imēnpuye Deus xe acesop soat em iap cuy ajowiwi jījā. ²⁴ Ğebum cuy ajop wuyewewekay wuyewebuywat am, wuykukpin wuyewewekuk am tak, xipan wuyewewekuk am tak. ²⁵ Pūğpūğpūğ oibu'un je'awerom aweromayū xe Deus eju kawēnwēnap'a be. Ixeyū buxim ġu juy wuyju bit wuybu'un ġu ajop je'awerom. Jewemucokcokçoğ pit cuy ajop. Ğaxīn ma wuykukukat jajēm. Ipiat supi'ajoat kūyjobit'ūmayū be. Xipacat pit je'ğūm ja'ò kayayū be. Imēnpuye biğ ma juy jewemucokcokçoğ ajop.

²⁶ Kawēn icēmān wuyetaybit tomukadi wuyukpiwatpin ma wuyju ikērēat muğēğēm. Imēn ibima, apēn kuka ace ikērēat muğēap teida am? Ka'ūma ma. Wuywebewi ikērēat uk pa'ore soat pe wuywebe.

²⁷ Imēnpuye wuypararam cuy ajop apēn paxi Deus je'e wuywebe iap puxim. Deus ipiat supi'ajoat kūyjobit'ūmayū be. Ipiat'ajojom ip jeedop daxa isopat pe- ipararuat pe Deus kay itakomaayū. ²⁸ Moisés a'ò kay kūyjobit'ūmayū o'yaoka ip kuyjeayū. Xepxepayū be, ebağayū be dak "Teku ikērēat muğēğēm" i'e buje, pūğ tağ ma ip i'e buje, o'yaoka ip. Itabotaidabotbot ġu o'e ip ixeyū kay, Moisés a'ò kay'üm puye. ²⁹ Ixeyū buxim ġasū dak pūğpūğpūğ Deus ipot muymuy. Deus kuy juk jekawēn o'ğuwēn cebe ip.

— Okpot o'jedoyekereren eywebeam. Oe'ü eymuisun ojuy — i juk o'e cebe ip.

İnaka cekawēn wayway ip.

— Apēğām oe'ü? Ekpot tak ikērēat mujurūğ.

rūg'ukayū jo'i osunuy — i napa ma e'em ip Deus pe.

Deus biōgbuk xe ikukpin ip. Inaka ibiōgbuk muymuy ip. Moisés muymuy'ukat podi ma Deus muymuy'ukat ipiat supi'ajojo, ixeyū bodi ma ikērēat mujurūrūg puye. Karēm ip ipiat supi'ajojo.

³⁰ — Ōn ma oceweik — i juk o'e Deus. — Ōn ma apēn cuk adi oekuku ip iaptei oteida webekitkiyū be — i juk o'e. — Xipacat oḡūm xipacat mujurūrūg'ukayū be — io'e. — Kūyjobit'ūm ip pima, ipiat osupi'ajoat cebe ip imukūyjo am — io'e Deus. — Kūyjobit pima bit ip, ōn ma ipiat osupi'ajoat cekay itakomaayū be — io'e.

Wuyetaybit imēn Deus cuk o'e iam. ³¹ Deus soat em itait. Ixe be ipiat'ajoat puje, iparara jījā je'e ip cekay ixe muymuy'ukayū.

³² Ġebum pit cuy epesop apēn cuk adi kuy bima epekukuku iap kay. Kuy bima juk Deus ekawēn epeya'ījojo. Ixe biōgbuk kuy oōm eywebe. Ade em itabut'ūmayū juk adi ipiat o'supi'ajojoat eywebe. Inaka eybu'u ḡu epesop Jesus kay ipiat'ajojom ma'ḡu eyju. ³³ Pūḡpūḡpūḡ eyju'in eymuymuy'uk ip osodop. Adeayū etabun cuk adi ikērēm eykuk ip. Ade em cuk adi ipiat o'supi'ajojoat ip eywebe. Eybu'u ḡu a'ḡu epesop eybureyū badipta am. Eyparara ḡu juk adi epesop eyaokaap puxim. ³⁴ Daomūnmūnap'a beayū jom tak cuk adi epeku ibuywat am ip. Itabut'ūmayū be eybubut tujupa'um puje, eybu'u ḡu a'ḡu epesop eyetabut am Cristo kay. Eycokcok acā a'ḡu epesop.

— Ijodiap podi ma xipacap opop ocewebeam — i a'ḡu epe'e. — Ibo ikoro jeedop soat em — i a'ḡu epe'e. — Soat em ibo kuḡ ajop — i a'ḡu epe'e.

³⁵ Ġasū dak cuy eya'ōcam epesop. Eya'ōca bima, xipacat cuy epejat. ³⁶ Eyukpiceḡēm ḡu juy epesop Deus bikuyap taḡ eyeku am. Ixe bikuyap taḡ eyeku buje, xipacat epejat apēn ixe juk adi o'e'e iap taḡ. ³⁷ Imēn e'em Deus ekawēntup:

Ġaxīn ma omuykuiat jajēm, i. Ibun ḡu jajēm, i. ³⁸ Webekitkiyū bit itabut jeedop cūḡayū, i. Imēnpuye soat em

itait jeedop ip oxe, i. Jetabucap epere
 buje bit, ocokcok ġu oce cekay, i.

Imēn e'em Deus ekawēntup. ³⁹ Wuyju bit wuyetabucap acepere ġu. Ipiat'ajojoap kay ġu wuyju bit cum. Oitabidaoiat puxim ġu wuyju-*-jetabun* o'jepereiat puxim ġu. Wuyetabut ma. Deus tak wuydaxijojom.

11 Deus kay wuyetabut pima wuyetaybit cīcā wuyemumuwiwi acejat iam. Deus kay wuyetabut pima: — Ġasū wuyju ijojom ġu iap ġuyjom acejojo — i wuyju e'em wuyewewebe.

² — Xipat cīcā eyju oxe — io'e Deus kuyjeayū be, itabut ip cekay buye.

³ Wuyetabut cekay bima wuyetaybit Deus ja'ōbi ipi o'ġujurūġ iam. Wuywebe ijo but iap o'ġuġē Deus. Wuywebe ijo ba'orean soat o'ġuġē.

⁴ Deus kay itabut osunuy Abel. Imēnpuye ixē emumuūm Caim emumuūm podi ma xipat osunuy Deus xe.

— Cūġ ma ēn oxe — i juk o'e Deus cebe, itabut jekay buye. — Emumuūm xipat oxe — i juk o'e. Wuyju ġebum pima apēn Abel itabut osunuy iap kay, "Itabucat cūġ ma Deus xe" i wuyju e'em. Imēnpuye Abel e'ū buje dak puk wuymutaybitbin ma itabucat cūġ ma Deus xe iam.

⁵ Deus kay itabut osunuy Enoque. Imēnpuye oe'ū ġu. Deus ixē ita'in ma o'tujuu jewekay. Ibureyū ixē o'tobuxik ġu, Deus kuy o'tujuu buye. Deus icokcok osunuy ixē ekukuap kay i'e'em Deus ekawēntup.

⁶ Wuyetabut'ūm pima, Deus imucokcok pa'ore wuywebe. Wuyju Deus kay bima, wuyetabun cuy ajop Deus kake iap kay; Deus xipacat ūmūm jebikuyap taġ jeku pin cīcāayū be iap kay dak.

⁷ Deus kay itabut osunuy Noé. "Ipi juayū oġu'ūm idibim soat" i'e buje, Deus ekawēn kay itabut osunuy. Muba'at puk o'jojomo ġu. Inaka itabut osunuy Deus ekawēn kay. Kobexixi o'ġuġē jebekitkiyū daxijo am. Kūyjobit ġu osodop ip warara'acayū

ipi juacayū Deus a'ō kay iap ibapuk cīcā o'e, Noé kūyjobit puye. Imēneju:

— Cūg ma ēn oxe, etabut okay buye — io'e Deus cebe.

⁸ Deus kay itabut osunuy Abraão. Deus pe jenaē buje, kūyjobit osunuy ya'ō kay. Deus a'ōbi jeka bewi o'jēm itaybit ġu ma'ġu apoma oju iam.

— Ijop eipi oceipiūm ewebe — i juk o'e Deus cebe.

Ibo eipi kay o'ju. Ġuyjom je'ġūm cebe iap eipi kay o'ju.

⁹ — Ijop eipi oġūm eipim — io'e Deus cebe.

Ibo eipi daġ oeku powatwat puxim. Paġo muġēġē'a be osunuy tūyap ġu buk puye. Torojo'a be osunuy jekpot eju- -Isaque eju. Jenaxeġebit eju dak osunuy- -Jacó eju.

— Ijop eipi oġūm eyipim — io'e Deus cebe ip- -Abraão be, Isaque be dak, Jacó be dak. ¹⁰ Deus emu- -kamuweġūnka wiwim osunuy Abraão- -Deus emuka- -muġēka wiwim- -ika'ūm'ēm'ūmatka wiwim.

¹¹ · ¹² Itabut osunuy Abraão Deus kay. Aypa o'e. Ce'ūat puxim jetayxi mu'ukreġ pa'ore osunuy. Je'ū ojuy kuy osunuy. Sara dak yabut o'e- -Abraão tayxi. I'ita ba'oreat osunuy. Inaka Abraão itabut osunuy Deus a'ō kay.

— Soat em Deus ja'ō daġ e'em — io'e jewebe ma.

Imēnpuye itayxi o'ġu'ukreġ yabut ma'ġu. Ipotpet o'e Abraão. Ade jījā ip osodop ixē naxeġebitbit. Imu- -weġūn pa'ore osodop ip kasopta buxim, ka'oririt pu- -xim tak.

¹³ Jetabut cīcāap kuġ ma ip oe'ū'ū- -Abraão, Isa- -que dak, Jacó dak.

— Ijop eipi oġūm eyipim — i mo a'ġu o'e Deus cebe ip.

Inaka ibo eipi o'jat ġu ip. Imēnpit:

— Ijop eipi Deus je'ġūm ocenaxeġebitbit pe apēn ixē o'e iap taġ — io'e ip jewebe ma.

Ipi o'jat ġu ip. Inaka icokcok ip osodop jetabucap kuġ.

— Powatwat acā oceju — io'e ip ibo eipi watwat pe.

Wara'at ka kaykaykay ma ip osodop.

— Eykadujukapkam acā oceju — io'e ip cebe ip. Ibo eipi bit o'jat ġu ip. ¹⁴ “Eykadujukapkam acā oceju” i'e'e'ukayū jeka kudadam mabuk ip. ¹⁵ Yağuyepit ġu osodop ip kuy bima o'jēm ip iatka kay. Yağuyepit pima kuka juk iba'ore ġu o'e cepit am ip. ¹⁶ Wara'atka kay bit ip osodop yağuyġebu. Kuy o'jēm ip iatka bodi ma xipat iboka. Kabi beatka kay ip osodop yağuyġebu. Imēneju Deus isūsūn ġu o'e cebuxim ip, “Deus ebekitkiyū oceju cekay ocetabut puye” io'e ip cebe buye. Deus o'sukamubapuk ikam ip.

¹⁷ - ¹⁸ Deus kay itabut osunuy Abraão.

— Ekpon oġūm ewebe — i mo a'ġu o'e Deus cebe. O'kap Abraão ipot. Isaque i ipot putet osunuy.

— Isaque ipotpoyū acā enaxeġebitbiyū oxewarararacayū bit ka'ūma — i mo adi a'ġu o'e Deus Abraão be. Inaka:

— Ekpot cuy eyaoka imupik am wetabun — i mo adi a'ġu o'e Deus Abraão be okukpin cīcā paxi iap co am.

“Ekpot cuy eyaoka” i'e buje, Abraão kūyjobit o'e Deus a'ō kay. Isaque aoka ojuy o'e.

¹⁹ — Iba'ore ġu Deus pe waram Isaque'ūm mutait am — io'e jewebe ma Abraão.

Inaka Isaque o'tujupit jeduk'a be, “Eyaoka ġu juy” io'e Deus puye. O'tujupit jeduk'a be ce'ūap tomukadi waram o'jetait'iat puxim.

²⁰ Deus kay itabut osunuy Isaque. Imēnpuye:

— Ğuyjom Deus xipacat je'ġūm eywebe — io'e Jacó be, Esaú be dak.

²¹ Itabut osunuy Jacó dak Deus kay. Je'ū pinpin puje: — Deus cuy xipacat je'ġūm eywebe — io'e José ipotpoyū be.

— Soat podi ma ēn xipat — io'e Deus pe jektokta'ip kuġ.

²² Itabut osunuy José dak Deus kay. Je'ū pinpin puje: — Israel naxeġebitbit jeejēm Egito eipi bewi — i mo adi a'ġu o'e. — We'ūap tomukadi ojebit cuy

epetujowat oka be imōg̃ ām witabikūy be — i mo adi a'g̃u o'e jekpotpoyū be.

²³ Itabut osodop ip Deus kay Moisés ebay, ixi dak.

— Judeuyū ipotpoyū juy epeyaoka ikap'isum ma — i juk o'e Egito eipi kukukat- -Faraó o'e.

Imēnpit iparara g̃u osodop ip ipi kukukat puxim- -Faraó buxim. Kūyjobit'ūm osodop ip ixe a'ō kay Moisés ebayū. Ebpūg̃ kaxi ikap'isuat munēmnm̃'uk ip osodop yaokaap puxim. O'g̃unēm ip idip cīcā cexe ip puye.

²⁴ Itabut osunuy Deus kay Moisés tak. Yaypan puje ibu'u o'e Faraó daxit'in. Jeadipyū kay pin o'e.

— “Faraó daxit'it ēn,” i'ūm̃g̃u juy epe'e owebe — i juk adi o'e Egito eipi watwat pe.

²⁵ Ibu'u osunuy ikērēat muḡē ām jemucokcok am- -pūg̃ kabia dak ka'ūma. Ibu'u g̃u bit osunuy ipiatpi'ajo am jeadipyū eju- -Deus ebekitkiyū eju. Ibu'u g̃u osunuy ipiatpi'ajo am Deus mucokcok am.

²⁶ — Soat tarekrek kuḡ pima kuka ocokcok oce- -Egito eipi beat kuḡ pima — i juk o'e jeweweju ma. — Deus emunaē mucokcokap ojuy owebe ipiatpi'ajoat puje bit, ibodi ma kuka ocokcok oce — i mo adi a'g̃u o'e jewebe ma. — Guyjom Deus kūyjobicaptei je'g̃ūm owebe — i juk o'e jewebe ma.

Ibodei buap wiwim cīcā osunuy soat em ma.

²⁷ Itabut osunuy Moisés Deus kay. Imēnpuye o'jēm Egito eipi bewi. Ipi kukukat etakomaap puxim jeparara pibun g̃u o'jēm Egito eipi bewi. O'jēm Deus kay itabut cīcā buye. Deus cocomap puxim oekukuku ijojom g̃u ma'g̃u. ²⁸ Itabut osunuy Moisés. Imēnpuye apēn kūyjobit'ūmayū muy'ū'ū'ukat o'kap iap epeta o'g̃ubapuk Deus a'ōbi. Páscoa i peta butet.

— Ovelha doy juy epetoymōg̃ eyduk'a esūḡtabi daḡ kūyjobit'ūmayū muy'ū'ū'ukat pe eyekpot muy'ūap puxim- -koapat muy'ūap puxim — i juk o'e Israel naxeḡebitbit pe.

²⁹ Itabut ip osodop Deus kay Israel naxeḡebitbit Moisés ixeyū kukukan pima. Imēnpuye iodi o'timudek ip ipipurukat taḡ. Ixe di butet “Tipakpakati” i

osunuy. Egito eipi watwat pit timudek ojuy bima, soat ip oap. Oakôm ip. Ka'ûma ma o'jepoyat.

³⁰ Itabut osodop ip Deus kay Israel naxegebitbit Josué ixeyû kukukan pima. Imênpuye Jericó ka ekorara o'jedu. Duuuuo. O'jedu 7 kabia ika koreren ceku buje ip. ³¹ Itabut osunuy Deus kay Raabe dak yapoan ma'ġu osunuy. Josué ebekitkit o'ġuôm jeduk'a be imunêm ân yaokaap puxim. Jericó ka jom oajêm'iaiyû o'ġunêm. Imênpuye Deus pe ja'ô kay kÿyjobit'ûmayû aokaat puje, Raabe o'yaoka ġu ip Josué ebekitkiyû.

³² Deus kay itabut ip osodop warara'acayû dak. Inaka o'e ġu owebe itabucayû muwên âm eywebe: Gideão muwên âm eywebe, Baraque dak, Sansão dak, Jefté dak, Davi dak, Samuel dak, Deus ekawên muwenuwên'ukayû dak. ³³ Itabut cîcâ osodop ip Deus kay. Imênpuye wara'at tiwatwat eju nopagôgôm ip o'e. Ade jîjâ o'yaoka ip. Cûġ ma oekuku ip Deus etabutpe. Imênpuye Deus cebe iûm ojuy iap o'jat ip. Deus leão o'tÿmuyumġ jekay itabucat oap puxim. ³⁴ Waram pima Deus daxa yoboġat o'ġupirêm jekay itabucayû aokaap puxim. O'jenapôn ip pajam jaokaap puxim. Ya'ôbaca'ûm ip osodop. Ya'ôbacaan pit o'e ip Deus a'ôbi. Ade jîjâ o'yaoka ip itakomaayû nopagôgôm pima. Ade ma dak o'ġuypôġpôġpôġ ip powatwat esorarayû. Soat kaka daġ owatwatwat ip. ³⁵ Itabut Deus kay osodop ip aoyû. Imênpuye Deus wararam ixeyû ipotpoyû'ûm'ûm o'ġutait.

Warara'acayû be itakomaayû ipiat o'supi'ajojoat. Oe'û'û'û ip ipiat pibun. Inaka Deus o'jomuymuy ġu ip jaokaap puxim.

— Oce'ûpi ġu — io'e ip. — Oceparara ġu oce'ûap puxim — io'e ip.

Waram acejetait iap wiwim osodop ip. Soat em wuyetait acesop Deus xe iap wiwim osodop ip. ³⁶ Warara'acayû itabucayû o'jowaywayway ip adedeayû etabutpe. Warara'acayû o'yukxabiokaka ip ixee-muġeġebum yabi be icaat pum. Warêmtaġ ma o'ġuômôm ip daomûnmûnap'a be. ³⁷ - ³⁸ O'yabuġbuġ ip wita'am. Ipidase o'ġuweka ip kede'am. Pajam tak o'yaoka ip. Tadaybot ma oekuku ip. Mêmê xee kuġ

oekuku ip jedotim, cabra xee kuḡ tak. Itabut'ūmayū juk adi ipiat o'supi'ajojoat ixeyū be. Warēmtaḡ cīcā juk adi ixeyū o'jukukuk ip. Kaokokat puxim osodop ip itabut'ūmayū xe. Deus xe bit soat podi ma xipat osodop ip itabucayū.

— Teyūku ikērē jījā — io'e ip itabut'ūmayū ma.

— Eyju soat podi ma xipat oxe — io'e Deus pit cebe ip.

Cenapōnat puxim uk'a'ūmat taḡ oekuku ip, co'a daḡ tak. Jeduk'a be ḡu osodopdop ip- -witabikūy be acā.

³⁹ — Xipat eyju oxe eyetabut cīcā okay buye — io'e Deus soat pe ixeyū be.

Inaka ijodi bima Deus cebe ip iūm ojuy iap o'jat ḡu ip. ⁴⁰ Deus kuyayū kay ā ḡu osunuy ḡebum. Wuykay dak osunuy ḡebum- -ixeyū'ūm'ūm nomujuacayū kay dak. Soat ḡu o'ḡūm ja'ō daḡ kuyayū be. Soat pit je'ḡūm ja'ō daḡ jekay itabucayū be- -kuyje itabucayū be- -ḡasū itabucayū be dak, ḡuyjom itabut je'e iayū be dak. Soat je'ḡūm pūḡpūḡ pepepe ma. Soat taḡ wuymuisun je'e kuyjeayū muisunap puxim.

12 — Ocejū ma juk adi ocetabut cīcā ocesop Deus kay — i'e'em wuywebe soat ixeyū kuyjeayū. — Eyju dak eyetabun cīcā juy epesop cekay — i'e'em ip wuywebe.

Daudau'ukayū buxim wuyju. Daudau'ukat ipoxiat epereperem jewūnca i'e am. Imēnpuxim ikērēat mujurūḡrūḡap cuy acepere Jesus a'ō kay am. Pa'orem ḡu wuyju ikērēat mujurūḡrūḡ. Ikērēat mujurūḡrūḡ pima wuybu'u wuyetabut am Jesus a'ō kay. Daudau'ukat taobu'u ḡu jedaudauap epere am. Ixe buxim wuyju dak wuybu'um ḡu juy ajop Jesus a'ō kay am. ² Ḡebum cuy ajop Jesus kay! Ixe ma juk adi wuymutabun. Ixe dak wuybuywatwan jeenuy wuyetabucap epereap puxim.

— Korosa be ḡu juy oje'ū — i'ūmḡu juk o'e. — Warēmtaḡ cīcā ip okuk — i juk o'e jewebe ma. —

Inaka korosa be dak obu'u ġu we'ū ām — i juk o'e. — Ġuyjom ocokcok oġuy webay xe bima, ixe bikuyap taġ cuk adi ojekuku buye — i juk o'e jewebe ma. Oibu'un ġu je'ū ām korosa be warēmtaksuġ ma'ġu ip o'jukuk. Imēneju ġasū xik'i omuy Deus xe. Deus eju nuynuy soat kukukan.

³ Ġebum cuy epesop apēn cuk adi ixe Jesus ipiat o'supi'ajojo iap kay. Itakoma jijā ip osodop cekay ikērēat mujurūġrūġ'ukayū. Iboap kay juy ġebum epesop eyetabut am eybu'u'uap puxim, eyetabucap epe-reap puxim tak. ⁴ Ikērēat muġēġē'ukayū mukorēmrēm cīcā juk adi epesop. Imēnpuye juk adi ipiat o'supi'ajoat ip eywebe. Inaka eyaoka ġu buk ip. ⁵ Deus kawēnwēn eywebe apēn cebayū kawēnwēn jekpotpoyū eju iap puxim. Kawēnwēn eywebe eya'ōmucan am. Imēn ixe e'em:

Okpot, emukūyjobit am wuykukukat ipiatpi'ajoan ewebe bima, eya'ōpicūġ cuy eġuy ya'ō kay, i. Emukūyjo am ixe be emukorēm puje dak, eġuycūġ ġu juy eġuy, i. ⁶ Wuykukukat ipiatpi'ajoan jexe ikukpinayū be cūġ ma jekuap ojuy, i. Jekpotpoyū mukorēmrēm imukūyjo am ip, i.

Eyaġuyba'ūm tu iboap ekawēn kay? ⁷ Eyetaxim cuy epesop ipiat'ajojom pima. Ipiatpi'ajojom pima:

— Wuyebayat ipiatpi'ajojoan ocewebe ocemukūyjo am cūġ ma wuyekuap ojuy — i juy epe'e eyewe-webe.

Deus wuymukorēmrēm pima, wuyetaybit Deus wuykuġ jekpotpoyū kukap puxim iam. Soat wuyju ipiatpi'ajojoan wuy'ipotpoyū be cūġ ma ip cekuap ojuy. ⁸ Imukorēmrēm'ūm pima wuyetabi kuka ace ite ipocat iap kay.

— Ekpocat tu ite? — i kuka ace cebay be.

Deus tak ipiatpi'ajojoan soat pe jebekitkiyū be imukūyjobit am ip. Imēneju eyemukūyjo am eywebe ipiatpi'ajojoan'ūm pima, Deus ipotpocayū ġu eyju. ⁹ Ijodi ixeyū be wuymukorēm puje dak, ibuyxim ma wuyebayū ajukuk. Ixeyū a'ō kayap podi ma juy kūyjobin ajop wuyebayat a'ō kay- -kabi beat a'ō kay, wuykay

aġat a'ō kay. Ixe a'ō kay kūyjobit pima, soat em acesop cexe wuyetai. ¹⁰ Wuyebayū ma ipiatpi'ajojoan wuywebe wuymukūyjobit am. Ipiatpi'ajojoan ip wuywebe ipiatpi'ajoat pin osodop ip puye. Darem ma ip wuymukorēm'rēm. Deus pit ipiatpi'ajojoan wuywebe xipan wuykuġap tomuju. Ixe ipiatpi'ajojoan wuywebe soat taġ wuymuisun am. Ipiatpi'ajojoan wuywebe soat taġ wuyisu jejo'i am. ¹¹ Wuywebe ipiatpi'ajojoan pima, wuycokcok ġu wuyju- wuyġuycūġ acā. Guyjom pit cebay be imukorēm'ibiyū cedaġ ma jekukum, kaba'ūm tak ip warara'acayū eju.

¹² Imēneju iġuycūġayū juy epesubuywan. Jetabucap kay ibu'u'uayū juy epeya'ōmucan waram icokcok i'e am ip. ¹³ Cūġat e daġ cuy epeku warēm'taġ ma eyekup puxim.

¹⁴ Kaba'ūm cuy epesop soat eyxeayū kuġ. Soat taġ eyisum cuy epesop. Soat taġ wuyisu'ūm pima, wuykukukat acejojo ġu. ¹⁵ Deus ibikuy xipan wuykuk am. Imēnpuye jewebuywatwan cuy epesop eybu'uap puxim Deus pe emumuūm pu am. Kadai icupat jexeat muy'ū'ūm. Imēnpuxim pūġ ma ey'inat jetabut am ibu'u bima, jebureyū dak kuka o'ġubu'un. Imēnpuye jewebuywatwan cuy epesop eybu'uap puxim, eyetabucap epereap puxim. ¹⁶ Jewebuywatwan cuy epesop Deus a'ō kay kūyjobit'ūmap puxim, aoyū kaykayap puxim tak. Esaū ekuap puxim ġu juy epeku. Esaū kūyjobit'ūm o'e Deus a'ō kay. Jecokcokap kay acā o'e ġebum. Koapat osunuy cebay ipot. Cebay e'ū buje, soat ma kajuk o'jat jebay'ūm pubut, ixe koapat puye. Inaka:

— Pūġ pratom exat'in eġūm owebe — io'e jekitpit pe. — Ēn ma juy soat ejat wuyebay e'ū buje oxat teim — io'e jekitpit pe. — Odieġ Deus xipan jekuk koapat kukap puxim oxat teim — io'e cebe.

¹⁷ Koapat peam tak cebayū kawēnwēn'uk osodop Deus eju kuyjeayū.

— Xipan cuy okpot ejukuk — i'e'e'uk osodop ip Deus pe.

— Owebeam tak cuy ecekawēn Deus eju — io'e

Esau jebay be. — “Xipan cuy okpot ejukuk- -koapat ejukuk,” i juy ece cebe — io'e Esau.

— Iba'ore owebe gasu bit — io'e cebay bit. — Ekitpit peam kuy juk iboam oce Deus pe — io'e. Jawa'omuwarurun pa'ore o'e Esau be cedaḡ ma jeku am. Cūḡat e daḡ jepit ojuy jija o'e. O'ton iguycūḡ puye. Inaka cepit pa'ore o'e cebe cūḡat e kay, kuy kūyjobit'ūm o'e buye.

¹⁸ Co'a jeje Deus jekawēn muwēnuwēn pima, iparara jija osodop ip Judeuyū- -kuyjeayū. Oajēm ip co'a ikibi be. Sinai'a ikibi be oajēm ip- -wuyeco- anpuat'a ikibi be. Daxa isop iḡo'a akokoreren. Kabidaudau dak oeku. Kabiok tak oeku diḡ. Kabi- doxixi dak oeku iḡo'a daḡ. ¹⁹ Parasuy jo'iat a'ō o'ya'i'jojo ip. Deus a'ō dak o'ya'i'jojo ip. Ixe a'i'jojo buye, “Ecekawēn ḡu juy ocewebe” io'e kuyjeayū je- parara pibun.

²⁰ — Epeyeu ḡu juy co'a kay — io'e. — Eyōhōyū dak cuy epeḡyuat ḡu — io'e. — Ceu pinat cuy epeyabuḡbuḡ wita'am — io'e. — Ojopi eywebe soat pe — io'e cebe ip.

Imēnpuye iparara jija ip o'e Deus a'i'jojoayū. ²¹ Ipara- ruat o'jojojo Moisés.

— Ōn ma okarabakbak oce oparara pibun — io'e co'a daḡ pima.

²² Eywebe Deus jekawēn muwēn puje bit, eypara- ram ḡu epesop. Kuy epesot wara'at'a kay co'a kay. Siāo'a kay epesot Jerusalēm ka beat'a kay. Kuy epe- sot Deus ka be- -soat em itaicat ka be- -Jerusalēm ka be- -kabi beatka be. Tak ḡu ip Deus ekawēn tojot- jot'ukayū dopdom iḡo ka be- -ade jija ip. Imuweḡūn pa'ore wuywebe ade jija ip puye. ²³ Kuy epesot Deus ebekitkiyū kay- -koap itabucayū kay. Awerom ip dop- dom Deus ka be. Icokcok cīcā ip ibutet ibararak opop kabi beatup pe buye. Kuy epesot Deus kay. Ixe apēn cuk adi oekuku ip ipi ju bima iap ideida soat pe ipi juacayū be. Xipacat je'ḡūm cūḡayū be. Ipiat supi'ajoat kūyjobit'ūmayū be. Kuy epesot cedaḡ ma jekuku'ukayū'ūm'ūm piōḡbuk kay- -soat taḡ o'ḡui- sun'iyū'ūm'ūm piōḡbuk kay. ²⁴ Kuy epesot Jesus kay. Ixe juk kawēn iisuat o'ḡuwēn wuywebe. Ixe o'je-

doyekereren wuywebeam. Apên Abel o'jedoyekerereniap kay ġebum pima "Eġuweik cuy iwaġo be yaokaap tei" i wuyju e'em Deus pe. Apên Jesus o'jedoyekerereniap kay ġebum pima bit, "Ġasū bit ên ikêrêat uk'uġ ocewebewi soat pewi" i wuyju e'em Deus pe.

²⁵ Imêneju:

— Kūyjobin ġu ace Deus a'ō kay — i'ūmġu juy epe'e.

Ijodi Moisés Deus ekawên o'ġuwēnuwēn kuyjeayū be. Kūyjobit'ūm ip osodop. Imēnpuye Deus ipiat o'supi'ajojoat cebe ip. Ġasū bit kabi bewi ma Deus jekawên muwēnuwēn wuywebe. Kūyjobit'ūm pima kuyjeayū bodi ma kuka ipiat acesupi'ajo. ²⁶ Sinai'a jejewi cekawên puje, ixe ja'ōbi ipi o'ġuyxixixi. Ġasū bit waram o'jekawên wuywebe.

— Waram pukto ipi oġuyxixixi — i'e'em wuywebe. — Kabi dak oġuyxixixi — i'e'em. ²⁷ — Waram pukto — i juk adi o'e.

Imēnpuye wuyetaybit jemumuġē ma ġuyxixixi iam. I'uk'uk je'e ip Deus emumuġē soat. Imuyxixixi'ūmayū acā jeedop ip jenuyap pe ma.

²⁸ Deus soat kukukan pima, wuykukukan tak jenuy. Ixe a'ōbacaap mu'ūm pa'ore soat pe. Imêneju:

— Soat podi ma ên xipat — i juy ace Deus pe. — Soat podi ma ên a'ōbaca — i juy ace cebe.

Ixe bikuyap taġ cuy ajeku. Ibuyxim cuy ajukuk. Wuypararam cuy ajop ixe buxim. ²⁹ Ixe kay acā wuyetabut-Deus kay acā. Daxa soat mu'ūmap puxim ixe dak ja'ō kay kūyjobit'ūmayū ġu'ūm.

13 Eybu'um ġu juy epesop ikukpin eykitpitpiyū kuk am- -Cristo ebekitkiyū. ² Powatwat cuy epeġuōm eyduk'a be. Xipan cuy ip epejukuk. Pūġpūġpūġ kuy juk powatwat o'ġuōm jeduk'a be. Tūybe teyūku powatwat iān o'e ip. Imēnpit Deus ekawên tojtjot'ukayū ma juk o'ġuōm ip- -kabi watwat. ³ Ġebum cuy epesop daomūnmūnap'a beayū kay eyju

dak cexe epesop iap puxim. Gebum cuy epesop ipiat'ajojomayū kay eyju dak cexe ip epesop iap puxim.

⁴ Ibuyxim cuy ibumūnmēnat ajukuk. Warara'acat ewebumūn puje juy ibuyxim cuy ip epejukuk. Eytayxi'ūmat eju ġu juy epeyepo- -eytayxi eju acā. Eyektop'ūmat eju ġu juy epeyepo- -eyektop eju acā. Deus ipiat supi'ajoat warara'acat itop eju jepopo'ukat pe warara'acat tayxi eju jepopo'ukat pe dak.

⁵ Dinheiro kay jījā ġu juy epesop.

— On pit jeyiwat ġu- -pūġ em tak ka'ūma — i'e'em Deus wuywebe. — On pit jeyepere ġu- -pūġ em tak ka'ūma — i'e'em wuywebe.

Imēnpuye eycokcoġ cuy epesop ajo eyju ikuġiat kay.

⁶ Imēnpuye wuya'ōcam cuy ajop.

— Wuykukukat wuybuywatwan soat em — i juy ace warara'acat pe ipararaayū be. — Wuypararam ġu juy ajeku — i juy ace cebe ip. — Ijodiat o'e ġu kuka wuywebe — i juy ace cebe ip.

⁷ Gebum cuy epesop kuy bima eykukukayū'ūm-ūm kay. Deus ekawēn cuk adi o'ġuwēnuwēn ip eywebe. Gebum cuy epesop apēn cūġ ma ip oekuku iap kay, apēn ip jetabucap kuġ oe'ū'ū iap kay dak. Ixeyū'ūm'ūm puxim eyetabun cīcā juy epesop. ⁸ Soat em Jesus Cristo iwaruru ġu e'em. Ibit ma. Kuy bi- maap co'i ma ġasū dak omuy. Guyjom tak imēn ma je'e. ⁹ Eybu'um ġu juy epesop kawēn icēmat taġ jeku am. Iwarum eymutaybitbin'ukayū a'ō kay ġu juy epesop cūġat e daġwi eyjēmap puxim. Pūġpūġ je- waġuyġuy ip i'opi paxi sujop owebe iap kay. Ibuy- watwan ġu ibo bit biġ ma itabut am ip Jesus kay. Wuyju bit cuy ġebum ajop Deus soat em xipan wuy- kuġ wuya'ōmucanucan iap kay. Iboap kay ġebum pi- ma, biġ ma wuyetabut acesop Jesus kay.

¹⁰ - ¹¹ Paīyū wūnca ēn'in i'o'o'uk osodop ip o'su- ēnmupikupik ip ien'in torojo'a be kapikpik'uk- ayū. Ġasū bit i'opi o'e cebe ip wuyju Deus pe iūm- ūmat'in. Pūġ kabia be bit paī yoboġat ōmōm ba- diat'abi be- -Deus tūytūyap ibuyxi jījāat'abi be. Wūnca doy dujuōmōm toy mubapuk am Deus etabun Deus pe ikērēat ukap ojuy. Ibiat ēn pit i'opi paī yo-

boğat pe. Ibiat ên tujowatwan ip jedopdopap etakobe imupik am. ¹² Imênpuxim Jesus o'jedoyekereren wuywebewi ikêrêat uk am. O'jedoyekereren jekay itabucayû muisun am soat tağ. Itabut'ûmayû juk adi warêmtağ ma ixé o'jukuk. Ixe oe'û ikaboğatka etakobe. ¹³ Ixe oibu'un ġu je'û âm korosa be warêmtağ ma'ġu ip o'jukuk. Ixe buxim wuyju dak wuybu'um ġu juy ajop ixé bikuyap tağ jeku am warêmtağ ma'ġu ip wuykuğ itabut'ûmayû. ¹⁴ Wuydopdopapka ijodi ġu. Ikakoro ġu ijodiatka. Guyjom jeedotka wiwim wuyju. ¹⁵ Imênpuye:

— Ên soat podi ma xipat cîcâat — i wuyju e'em soat em Deus pe.

Wûnca mupikupik'uk'ûm ma'ġu wuyju Deus etabun. Jesus tak kawênwên Deus eju wuywebeam.

— Ên ma soat podi ma xipat cîcâ — i wuyju e'em soat em cebe. — Ên acâ ocekekukat — i dak wuyju e'em cebe soat em.

¹⁶ Xipacat muğêğêap cuy epeyepere ġu. Jewebuywatwacap tak cuy epeyepere ġu. Imên Deus epeğucokcoğ wûnca ûmûm cebe iap puxim.

¹⁷ Kûyjobin cuy epesop eykukukayû a'ô kay. Ixeyû a'ô epeya'ôxik ġu juy. Apên cuk adi eykuk ip iap cuy ġuwên ip Deus pe. Imênpuye ibu'u ġu ip eybuywat am. Ağ ip eykay eyetabucap epereap puxim. Eyju ixeyû a'ô kay bima, icokcok ip jeybuywatwan. Eyju kûyjobit'ûm pima bit, iğuycûğcûğ je'e ip. Ibo bit jeybuywan ġu.

¹⁸ Epeyepere ġu kawêğap Deus eju ocewebeam. Soat em oceju cedağ ma oceku pin Deus etabun. Imênpuye:

— Xipat paxi oceju Deus xe? — i'ûmġu oceju e'em.

Ocetaibit ocebinûnpe ma oceju cûğ ma cexe iam.

¹⁹ Biğ ma juy epeyekawên Deus eju ġaxîn ma ixé be waram omuypit am eyjo am.

²⁰ Wuykukukat Jesus itabucayû kukukat yoboğat ovelha kukuk'ukat puxim. Deus ixé Jesus o'ğutait ce'ûap tomukadi. Waram ġuto o'jetait. Imutait puje:

— Kawên iisuat tağ cuy epeku ġasû bit, okpot

o'jedoyekereren eywebeam puye — i juk o'e wuywebe. — Kawēn iisuat taḡ eyeku buje, soat em oxe epesop eyetai — i juk o'e Deus wuywebe.

²¹ Deus wuyaḡuymubabibin'ukat. Ya'ōbacaap kuḡ'ūm pima, ibikuyap taḡ wuyeku ba'ore wuywebe. Imēnpuye ixē soat xipacat cuy je'ḡūm wuywebe. Ja'ōbacaap cuy je'ḡūm wuywebe ibikuyap taḡ wuyeku am soat em. Jesus Cristo a'ōbi soan cuy je'e wuywebeam jebikuyap taḡ.

— Ēn ma soat podi ma edipap kuḡ — i juy acece soat em Jesus Cristo be.
Imēn cuy acece cebe.

²² Okitpitpiyū, itedup otupmubararak eymucok-coḡaptum. Tup ade ḡu otupmubararak. Imēnpuye eyukpiceḡēm ḡu juy epetupco. ²³ Wuykitpit Timóteo o'ḡujēm ip daomūnmūnap'a bewi iam eyetaybit pin ōn. Gaxīn ma okay yajēm puje, otujowat cuy oweju, eyjom oju buje.

²⁴ Ocejū kato mujujum eykukukayū be -soat pe - Jesus a'ōkayayū be. Eykitpitpiyū dak kato mujujum eywebe -Itália eipi watwat.

²⁵ — Bay, xipan cuy ebekitkiyū ejukuk — i ōn e'em Deus pe.

Ibūrū ma.

TIAGO EMUDUPMUBARARAKTUP CARTADUP

1 Bekitkit, cartadup mubarararağ òn kato i'e am eywebe- -Deus ebekitkiyū be- -soat ka dağacat pe. Òn Tiago. Deus peam kapikpiğ òn. Wuykukukat peam tak òn kapikpiğ- -Jesus Cristo beam.

² Okitpitpiyū, eycokcoğ cuy epesop ipiatpi'ajojom ma'gū eyju. ³ Deus eybuyxijojom biğ ma eyetabut am cekay. Gebum cuy epesop iboap kay. Ixe kay eyetabut cīcā bima, eyetaxim epesop ipiatpi'ajo am. ⁴ I-bun ipiatpi'ajom pima dak cuy eyetaxim epesop. Eyetaxi bima cūğ ma epesop Deus xe. Ikērēat kuğ gū dak epesop cexe. Soat kukat puxim epesop cexe. ⁵ Cūğ ma eyeku am cexe iam eyetaybit'ūm pima, ey-mutaybinap cuy epejoojuy Deus xewi. Ixe jeymutaybin. Ixe ibu'u gū wuymutaybit am. Tacup gū ixe. Soat em wuyemumuojuy ūmūm wuywebe. ⁶ "Omutaybin cuy ece" i'e buje, eyetabun cuy epesop Deus kay.

— Wemumuojuy je'gūm xe'e owebe? — i'ūm gū juy epe'e cebe.

"Wemumuojuy je'gūm xe'e owebe?" i'e'e'ukat tipodoyat puxim- -soat tağ kabido timupodoypodoyiap puxim, itabutbūt puye. ⁷ ⁸ Wara'at tağtağtağ ma tipodoyat e'em. Imēnpuxim wara'at tağtağtağ ma ip jewağuyğuy itabutbūcayū. Warara'acat ixeyū ağuy-mubabi'ūm'ūm. Soat em jewağuy muwarururun ip- - "Wuykukukat wemumuojuy je'gūm xe'e owebe?" i'e'e'ukayū- -itabutbūcayū. Itabut cīcā gū ip- -itabut'ūm'ūm ma. Imēnpuye jemumuojuy je'jat gū ip Deus xewi.

⁹ ¹¹ Itabucat ibubut kuğ'ūm pima, icokcok cuy jeenuy, ade ibubut kukat co'i Deus xe buye. Ğuyjom Deus wara'at je'gūm cebe ibubun. Ibubut adeat pit dao ma i'ūm kadai'ip e'ūap co'i. Kaxi cēm cēm. Kaxiepi bima jeditedudum kaxie pibun. Dit at'an. Titip gū e'em. Imēnpuxim ibubut adeat je'ū wara'at pu

ojuy kapikpiğ cîcā bima. Imēneju itabucat ibubut ade bima, icokcok cuy jeenuy, ka'ūma kukat co'i Deus xe buye.

¹² Ipiatpi'ajo am wuyetaxi bima wuycokcoğ acesop- -Jesus kay wuyetabucap epere'ūm pima dak. Wuybuyxijo epere buje:

— Soat em eyetait epesop oxe ma — i je'e Deus wuywebe.

Imēn Deus e'em soat pe- -ikukpin jekukayū be- -jekay itabucayū be. Imēneju wuycokcok wuyju e'em, ipiatpi'ajojom ma'ğū wuyju. ¹³ Deus ikērēat muğēğēan ġu wuywebe. Imēnpuye:

— Deus ikērēat muğēan owebe — i'ūmġu juy epe'e.

Warara'acayū ikērēat muğēğēan wuywebe. Deus pit ka'ūma. ¹⁴ Wuyju ma wuybikuy ikērēat muğē ām. Wuyukpiwatpin ma wuyju ikērēat mujurūğrūğ, ikērēat muğē pin puye. Imēn wuyju jewemuğuykukukum ikērēat muğē ām. ¹⁵ Wuyju ikērēat muğē pin wuybikuy ikērēat muğē ām puye. Soat em wuyju ikērēat mujurūğrūğ. Ikērēat mujurūğrūğxian acesop. Ikērēat mujurūğrūğxian pima bit, "Soat em wūy ma juy epesop owi eye'ū buje" i'e'em Deus wuywebe.

¹⁶ Okitpitpiyū, eykukpin cîcā oxe. Jewemuğuykukukum ġu juy epesop. ¹⁷ Wuyebay kaxiaat o'ğubapuk, kaxiepiat tak. Kasopta dak o'tamubapuk. Kaxiepiat jewarururun, kaxiaat tak: Deus pit jewarururun ġu. Soat em ma ixē xipacat ūmūm wuywebe. Cemumuūm ikērēat kuğ ġu. Xipat soat tağ. Soat wuyju ikuğiat ixē emumubapukpuk ma. Soat em ma xipan wuykuğ. Xipat'ūmat ġu iūmūm wuywebe- -xipacat acā. ¹⁸ Jekpiwatpin ma ixē wuynaē jebekitkiyūm kawēn icēmat kay wuyetabun puje. Ixe juk wuynaē warara'acat kukat podi ma wuykukam xipan.

¹⁹ Okitpitpiyū, dao ġu juy epeyekawēn. Dao ġu dak cuy eyetakomān. Dao ma bit cuy epekūyjo. Ğebum cuy epesop iboap kay. ²⁰ Wuyetakoma bima cūğ ġu wuyju jekukum- -Deus bikuyap tağ ġu dak. Imēnpuye eyetakomān ġu juy epesop. ²¹ Imēneju ikērēat

muḡēḡēap cuy epeyepere. Warēmtaḡ eyekuap tak cuy epeyepere. Yoboḡan pin ḡu juy epesop. Deus bikuyap taḡ cuy epeku. Ixe wuymukūyjojom jekawēn. Imēnpuye eyetabun cuy epesop cekawēn kay. Ixe wuydaxi-jojom jekawēn kay wuyetabut pima.

²² Ixe ekawēn cocomat ḡu juy epesop. Cekawēn taḡ cuy epeku. Ya'ijojom acā bima bit eyju jewemuḡuykukukum. ²³ Pūḡpūḡpūḡ Deus ekawēn cocom ā. Inaka cekawēn taḡ ḡu ip jekukum. Ixeyū waroa kukat puxim. ²⁴ Dao ma ip jewejojom waroa be. Jewejo buje waroa muxipanpan ip. Akiju ip cēmcēm. Dao ma ip yaḡuyba'ūm'ūm jedopa kay. Imēnpuxim Deus ekawēn coco'ukayū'in. Dao ma ip cekawēn cocom. Cekawēn co'isum pit yaḡuyba'ūm'ūm ip cekawēn kay. Cekawēn taḡ ḡu dak jekukum ixeyū ma. ²⁵ Warara'acayū bit daodaodao ḡu Deus ekawēn cocom. Jewaḡuyḡuy ip dopdom cekawēn kay. Yaḡuyba'ūm'ūm ḡu ip cekawēn co'isum. Soat kabia cekawēn cocom ip. Kūyjobit cīcā ip cekawēn kay. Ixe ekawēn cedaḡ ma wuymutaybitbin. Soat taḡ xipat ixē ekawēn. Wuya'ōmucanucan wuywebe ikērēat muḡēap puxim. Deus ixeyū ḡucokcoḡ soat taḡ ja'ō daḡ ip jekukum puye.

²⁶ Kawēnkērēat epere'ūm pima, te'e ma wuyju e'em "Ocetabut Deus kay" i. Kawēnkērēat epere'ūm pima, jewemuḡuykukukum wuyju. ²⁷ Deus wuyebay. Ixe wuymutaybitbin apēn itabucat cuy jeku iam. Deus kay wuyetabut pima, cebay'ūmat asubuywan. Itop'ūm e'ūibit tak asubuywan- -mudiat. Itabut'ūmat puxim ḡu juy ajeku. Ikērēat tak cuy aḡujurūḡ ḡu- -pūḡ em tak ka'ūma. Wuyaḡuyisum cuy ajeku. Imēn jekukum pima, cūḡ ma wuyju jekukum Deus xe. Imēn jekukum pima:

— Icēmān eyetabut okay — i'e'em Deus wuywebe.

2 Okitpitpiyū, iwarum ḡu juy soat epejukuk- -totidipat, totiokokat tak. Eyetabut wuykukukat kay- -Jesus Cristo kay. Ka'ūma ma ixē jo'iat

jedipap kuġat. Imēneju pūġ pe ma juy soat epejukuk- -totidipat, totiokokat tak. ²Ibubut adeat aco'i jajēm eykay eyju awerom pima. Cekaxima idipat kuġ ip. Pūmūn kuġ ip- -teibogāt kuġ. Ibubut-ūmat tak aco'i jajēm. Cekamixa teiboġ ġu- -idip ġu. ³Xipan aco'i epejukuk ibubut adeat. Xipan ġu bit aco'i ibubut'ūmat epejukuk.

— Xik'i juy abik ya'ōbuyxiat tūyap pe — i aco'i epe'e ibubut adeat pe.

— Cūġ'i juy eġuy — i aco'i epe'e ibubut'ūmat pe. — Xik'i abik ipi ju ma — i aco'i epe'e cebe. ⁴Imēn ey'e buje iwarum ma eyju ip ikuġ. Iwarum ip ikuġ pima, cūġ ġu Deus xe.

— Teku ikērēat kuġ Deus xe — i eyju e'em cekamixa jojoap tomuju ma.

Imēn xipat ġu Deus xe.

⁵Okitpitpiyū, eya'ōpicūġcūġ cuy epesop wa'ō kay. Ibubut'ūmayū o'taē Deus itabut am Jesus kay. Itabut cīcā ip cekay. Imēnpuye ixeyū o'taē soat em top am ip jexe, ixē soat kukukan pima.

— Okayayū acā jeedop oxe ōn soat kukukan pima — i juk adi o'e Deus kuyje.

Imēn Deus ma ibubut'ūmayū o'taē top am ip jexe.

⁶Eyju bit imubuyxi'ūm'ūm ip. Ibubut'ūmayū ġu eymudadaybotbon- -ibubut adeayū acā. Ixeyū ma eymukurururuġ ibimāmāmāayū ekawēn coco'ukat topabe ixeyū ipiat'ajoan eywebe.

⁷— Ka'ūmġu Jesus co'iat xipacat — i wuyju e'em.

— Jesus ebekitkiyū eyju — i'e'em Deus wuywebe.

Ibubut adeayū bit Jesus muymuy.

⁸— Xipan cuy eyxeat epejukuk xipan eywekukap puxim — i juk o'e wuykukukat.

Imēn e'em Deus ekawēntup. Soat em iboap ekawēn taġ jekukum pima, xipan eyju jekukum. Soat ka kukukayū kukukat a'ō daġ eyju jekukum. ⁹Cekamixa jojoap tomuju iwarum ijodiacat kuġ pima bit, ikērēat kuġ eyju Deus xe. Iwarum ip ikuġ pima, Deus pe wuyawēwēap ekawēn taġ ġu eyju jekukum. ¹⁰Ade opop Deus pe wuyawēwēap ekawēn. Pūġ ekawēn mu-

pubun puje, wuyukpiwat ma kuka ace Deus xe soat ekawēn mupubutbun'ukat puxim. ¹¹ "Warara'acat tayxi kaykay ġu juy epesop" io'e iat "Warara'acat epeyaoka ġu juy" i dak o'e. Wara'acat aoka buje yukpiwat ma je'e Deus xe warara'acat tayxi eju cepo'ibit ġu ma'ġu. Ixe ikērēat kuġ Deus xe, pūġ ekawēn mupubut puje. ¹² Deus ekawēn taġ cuy ajeku. Ixe ekawēn taġ wuyeku buje, Deus wuya'ōmucanucan wuywebe ikērēat muġēap puxim. Soat em wuya'ōmucanucan "Eyju ikērēat kuġ oxē" i'eap puxim wuywebe. Imēnpuye eyekawēntim cuy epeku. Xipan cuy epesop. ¹³ Warara'acat kay wuyetabotaidabotbot'ūm pima, Deus tak itabotaidabotbot ġu je'e wuykay. Cekay ip wuyetabotaidabotbot pima bit, "Eyju ikērēat kuġ oxē", i'ūmgū Deus je'e wuywebe- "Wetabotaidabotbot eykay", i acā.

¹⁴ Okitpitpiyū, "Ocetabut Jesus kay" i'eap tomuju acā ġu Deus wuydaxijojom. Itabut'ūmat ekukuap co'i wuyju jekukum pima, te'e ma wuyju e'em "Ocetabut Jesus kay" i. ¹⁵ Toti'ūm pima, ixaxet'ūm pima dak, apēn xe'e kuka wuykitpitpiyū ajukuk? Cesaysey'ūm pima, ixaxet'ūm pima dak, apēn xe'e kuka wuyixityū ajukuk? ¹⁶ Say'ūm'ūm pima, doti'ūm'ūm pima dak, te'e ma kuka ace cebe ip:

— Deus cuy xipan jeykuk — i. — Xipan cuy eyesaysum epeku — i dak. — Xipan cuy epeyekōn — i dak.

¹⁷ Xipan'ūm warara'acat kuġ pima, te'e ma wuyju e'em "Ocetabut Jesus kay" i- jewexe wuyetabut Deus kay.

¹⁸ Warara'acat aco'i e'em wuywebe: — Ēn ma etabut — i. — On pit xipan warara'acat kuġ — i. On pit e'em eywebe:

— Warara'acat itaybit ġu wuyetabut Jesus kay iam, wuyju xipan warara'acat kuġ'ūm pima bit — i. — Itaybit je'e ip wuyetabut cekay iam wuyju xipan warara'acat kuġ pima — i ōn e'em eywebe.

¹⁹ Eyetabut pūġ ma Deus kake iap kay. Imēn xipat cīcā. Ibiōġbuk kērēayū dak itabut pūġ ma Deus kake iap kay. Imēnpuye ip ikarabakbak jejarara pibun.

²⁰ Eyağuyba'arēm cīcā. Te'e ma wuyju e'em: — Oce-
tabut Jesus kay — i, xipan warara'acat kuğ'ūm pi-
ma. Iboap iba'arēm aco'i eyxe. Imēnpuye Abraão
oğuwēn eywebe eymukūyjo am. ²¹ Ixe Abraão jekpot
o'jomōğ yawajeat'a jeje- -wita'a jeje. Isaque o'jomōğ.
Daxa jeje o'jomōğ Deus etabutpe yaoka am.

— Abraão cūğ ma oxe — i juk adi o'e Deus
Abraão ekūyjobicap co buje.

²² Apēn cuk adi itabut osunuy iap tağ oeku. Biğ ma
Deus kay itabucap yoboğ o'e, jetabucap tağ oeku
buye. ²³ Deus ekawēntup e'em: Abraão itabut osunuy
Deus kay, i. Imēnpuye:

— Cūğ ma ēn oxe — io'e Deus cebe, i.

Jekpot aoka ojuy bima itabut osunuy Deus ekawēn
kay. Imēnpuye:

— Abraão obure — i juk adi o'e Deus.

²⁴ — Ēn cūğ ma oxe — i'e'em Deus wuywebe
wuyetabut puje acā ġu.

Wuyetabucap tağ wuyeku buje bit: — Cūğ ma ēn
oxe — i'e'em wuywebe.

²⁵ Imēnpuxim Raabe jetabucap tağ oeku kuyje
yapoan ma'ğū. Ixe Raabe Josué emumujuyū o'ğunēm
jeduk'a be. Ğuyjom ip o'ğuju wara'at e dağ yaokaap
puxim. Imēnpuye:

— Cūğ ma ēn oxe — io'e Deus Raabe be.

²⁶ Wuybiōğbukbek'ūm pima, te'e ma kuka wuyje-
bit kuğ ace. Ace'ū kuka. Imēnpuxim wuyetabucap
tağ jekukum'ūm pima, te'e ma kuka ace: — Oceta-
but Jesus kay — i.

3 Okitpitpiyū, warēmtağ ma wuyju jekukum
pima, xipat ġu Deus xe. Itabucayū mutay-
bitbin'ukat warēmtağ ma jekukum pima bit, ibodi
ma xipat ġu cexe. Imēneju ade ġu juy ey'in itabu-
cayū mutaybitbin'ukan je'e. ² Soat wuyju imudopat-
pan soat kabia. Soat em wuyekawēntip pima bit
kuka ikērēat kuğ ġu ajop Deus xe. Ka'ūma em wuye-
kawēnkērē bima wuya'ōbaca kuka ajop ikērēat muju-

rūgap puxim. ³ Cavarō biḡe asubiḡemuōm wuyōhō bi be ixeyū be kūyjobit am wuya'ō kay. Wuyju pinap taḡ cucum ip, ibiḡe yopīt ma'ḡu. ⁴ Imēnpuxim kobexixi yoboḡ cīcāat. Imu'abicūḡcūḡap'ip pit yop'īt ma. Kabidoxixi kobexixi mujujum. Imēnpit iboap'im acā kobexixi mu'abicūḡcūḡ wuyju pinap taḡ, yop'īt ma'ḡu. ⁵ Imēnpuxim wuykō dak ikō'īt ma. Inaka wuykōm ma soat em xipan jewemuwēnuwēn wuyju.

Daxae ie'īt ma. Inaka yopmupik put yop'ade. Wūy jījā imupikupiḡ yopīt ma'ḡu o'jesop. ⁶ Wuykō ikō'īt ma. Inaka wuykōm ma wuyju ikērēat mubapukpuḡ soat em. Wuyekawēnkērē bima, wuyaḡuymukērērērēn apēn daxae yopmukērērēnap puxim. Bekin pin ma wuyekawēnkērē. Aypan pima bin ma dak wuyekawēnkērē. Daxa boḡ taḡwiat e buxim wuykō. ⁷ Wuykō muwaḡōn pa'ore wuywebe wuyekawēnkērēap puxim. Awaydip taḡat'it'it imuwaḡōn put wuywebe. Wasū dak imuwaḡōn put wuywebe, ka'oririt taḡ wururuḡ'ukat tak. Axima dak ibu but wuywebe wuyōhōm. ⁸ Wuykō bit imuwaḡōn pa'ore wuywebe. Wuykō xipat ḡu. Wuyekawēnkērēap cepere ba'ore wuywebe. Wuybu'u bima dak acede ma. Wuyekawēnkērēap xipat ḡu puybu nūydi buxim. ⁹ Wuykōm: — Ēn xipat cīcā — i wuyju e'em wuykukukat pe-wuyebay be-kabi beat pe. Wuykōm: — Wūy ma juy eḡuy Deus wi ipiat'ajojom — i wuyju e'em warara'acat pe-jebuxim Deus emumuḡē be. ¹⁰⁻¹² Xepxepi ḡu diajēm-jēm idi'a bewi-pūḡti acā. Tikōjōjēkati diajēm-jēm pima, tikuati ḡu kuka o'tiajēm. Wuykō bit idi'a buxim ḡu. Okitpitpiyū, murusu'ip taḡwi asāo'a bubum ḡu wuyju. Gudup'ip taḡwi keḡebiit'a bubum ḡu dak. Tikuati atibu ḡu tiyuati bewi. “Ēn xipat cīcā” i'e'eap cēm-cēm wuybi bewi. “Wūy ma juy eḡuy Deus wi ipiat'ajojom” i'e'eap tak cēm-cēm wuybi bewi. Okitpitpiyū, imēn xipat ḡu jījā.

¹³ Okitpitpiyū, xipacat cuy aḡujurūḡ. Cūḡ ma juy ajeku warara'acat etabutpe. Yoboḡan pin ḡu juy ajeku. Wuyju cedaḡ jekukum pima, warara'acat je'e “Teyūku itaybit cīcā” i. ¹⁴ Wuya'ōtarek pima, te'e ma kuka ace “Ocetaybit cīcā” i, yoboḡan pin pima

dak, jewekay acā ġebum pima dak, wuyetabutkarey warara'acat kay bima dak.

— Dapxi ên — i'ümġu juy ace icēmān e'e'ukat pe.

¹⁵ Wuyetabutkarey warara'acat kay bima, jewekay acā ġebum pima dak, Deus pe wuymutaybitbinap taġ ġu wuyju jekukum- -Deus kay'ūmat pe wuymutaybitbinap taġ acā. Imēn jekukum pima awaydip taġ omuyku iat puxim wuyju- -ibiōġbuk kērēayū kukukat pe wuymutaybitbinap taġ acā. ¹⁶ Wuyetabutkarey bima, jewekay acā ġebum pima dak, soat pabin ma dak kuka ikērēat aġujurūġrūġ, jewewa'ōxikxiġ tak kuka ajop. ¹⁷ Deus pe wuymutaybitbinap taġ jekukum pima bit, ikērēat aceġujurūġ ġu. Wuyaġuyisum cuy ajeku. Kaba'ūm acesop wuyeweweju; wuya'ōpuruġ ġu dak warara'acat ajukuk; wuy mucokcokap kay acā ġu ġebum acesop- -warara'acat mucokcokap kay dak; warara'acat kay wuyetabotaidabotbon tak ajop; xipacat tak aceġujurūġ; jewexe xipacat kuġ ġu ajop warara'acat muġuykuku ojuy ¹⁸ Itakomaat mudinudin'ukat kadai daidada'ukat puxim. Taidada'ukat kadai daidadam jeku be ġuyjom kake i'e am jexan. Imēnpuxim itakomaat mudinudin'ukat itakomaayū mudinudin ixeyū be i'e am cūġayūm Deus xe.

4 Apēnpuye eyju jewewa'ōxikxiġ? Soat eyju ikērēat kay. Soat em ikērēat kay ġebum eyju. Imēnpuye eyju jewewa'ōxikxiġ, jewewa'ōdawutwun tak. ² Eybutut ade pin. Ikuġ ġu bit. Imēnpuye eyju warara'acat aoka pin ibutut pu ojuy. Eyetabikuku jījā warara'acat pubut kay. Imēnpit epejat ġu. Imēnpuye eyju jewewa'ōxikxiġ, jewewa'ōdawutwun tak. Eymukaypinput kuġ ġu eyju, Deus xewi iojuyjuy'ūm puye. ³ Deus xewi iojuy buje dak, epejat ġu ikērēat muġē ām epejoojuy buye. Eyju iojuyjuy Deus eku kuap taġ ġu jeku am- -eyekupinap taġ acā. Eyetabikukuap tomuju ma eyju iojuyjuy Deus xewi. ⁴ Deus cuk epeyepere apēn ayacat jektop o'jepere wara'acat

eju jepo am iat puxim. Deus kay'ūmat purem pima, Deus kay wuyetakomām tak ajop. Eyetaybit ġu aco'i iboam. Deus kay'ūmat purem pin pima, Deus kay ġu dak epesop. ⁵ Imēn e'em Deus ekawēntup:

Deus jebiōgbuk o'ġuōm wuywebe, i.
Wuykukpin cīcā cexe, i. Ibikuy jījā
wuywebe kūyjobit am jebiōgbuk a'ō
kay, i. Wuyju kūyjobit'ūm pima,
Deus itabutkarey wuykay, i.

Te'e ma aco'i eyxe bit iboap ekawēn ibararak. ⁶ Warrara'acat podi ma Deus pit wuybuywatwan. Imēnpuye Deus ekawēntup e'em:

“Soat podi ma wa'ōbuyxi” i'e'e'ukat
kay ġu Deus, i. “Obuywan cuy ece
wa'ōbaca'ūm puye” i'e'e'ukat puy-
watwan pit, i.

⁷ Imēneju kūyjobin cuy epesop Deus a'ō kay.

— A'ō kay bit oceju kūyjobit ġu — i juy epe'e Satanás pe-ibiōgbuk kērēayū kukukat pe.

Imēn i'e buje, jenapōn eyxewi. ⁸ Deus kay juy epesop. Eyju ixe kay bima, ixe dak eykay je'e. Epeyewemuisun cuy Deus etabutpe. Ikērēat muġēġēap cuy epeyepere cūġ ma eyeku am. Eyekawēnkērēap tak cuy epeyepere soat em ma eyetabut am Deus kay. ⁹ Eyju ikērēat kuġ-ade. Imēnpuye eyġuycūġcūġ cuy epesop. Epetōtōn cuy. Eybidewayap cuy epeyepere wa am. Eycokcokap tak cuy epeyepere eyġuycūġ ey'e am. ¹⁰ “Bay, obuywan cuy ece, wa'ōbaca'ūm puye” i ey'e buje, Deus jeybuywan. Jeymuisun tak.

¹¹ Okitpitpiyū, epewewemuymuy ġu juy. Eykitpit muymuy bima, wuyawēwēap ekawēn mupubutbun tak eyju. “Okitpit ikērēat kuġ Deus xe” i'e buje, “Wuyawēwēap ekawēn kawēn ikērē” i dak eyju e'em. “Wuyawēwēap ekawēn kawēn ikērē” i'e buje, iboap ekawēn taġ ġu eyju jekukum-iboap ekawēn mupubutbun acā. ¹² Deus ekawēn acā cūġ ma wuyawēwēm. Ixe be acā wuydaxijo but. Ixe be acā wuymu'ūm put. Imēneju:

— Teku ikērēat kuġ Deus xe — i'ūmġu juy ace.

Deus acā itaybit abuyū ikērēat kuḡ iam- -wuyju bit ka'ūma.

¹³ Okitpitpiyū, eya'ōpicūḡcūḡ puk wekawēn kay. Te'e ma eyju kawēnwēn eyewewēju.

— Gasū, kuyaje aco'i aceju wara'atka kay — i aco'i eyju e'em eyewewebe. — Ihibun iboka be ace-sop tarekrek teidadam — i aco'i eyju e'em. — Ade jījā acejat wuyedinheiom — i aco'i eyju e'em. Imēn te'e ma eyju kawēnwēn eyewewēju. ¹⁴ Wuyetaybit ḡu xipat tu je'bapuk wuywebe kuyaje iam, xipat ḡu xe'e je'bapuk wuywebe iam. Wuyetaybit ḡu puḡūn ace'ū iam. Kabidiḡ puxim wuyju. Tiḡ'ajēm'i-sum dao ma diḡ'ūm'ūm. Dao ma diḡwatwan. Kabi-diḡwacap puxim wuyju dak. Dao ma ace'ū. ¹⁶ Imēneju:

— Deus ibikuy bima acā iboam ace'e kuyaje — i juy epe'e eyewewebe. — Deus ibikuy bima acā, kuyaje buk wuyekapikap kuḡ acesop — i juy epe'e eyewewebe. ¹⁶ — Kuyaje juy iboka be acesop wuyekapikap kuḡ — i te'e ma eyju bit e'em.

Yoboḡan pin eyju. Te'e ma eyju xipan jewemuwēnuwēn. Xipat ḡu boap. ¹⁷ Xipacat mujurūḡ ām wuyetaywuyetaybit pima, ikērēat kuḡ acesop imujurūḡ'ūm pima.

5 Ibubut adeayū, eya'ōpicūḡcūḡ cuy epesop wa'ō kay. Gasū eybubut ade. Guyjom pit ka'ūma kuḡ epesop. Ipiatpi'ajojom ā epesop. Imēnpuye epeyewāwā juy. Wawa juy epesop. ² Eybubut oioroḡ- -teiboḡat. Ixiwa'abīt eydoti o'jo'o'o- -idip cīcāat. ³ Yoptite opop kuy soat taḡ eyedinheiro daḡ- -isurūḡat taḡ. Eyeouro daḡ tak yoptite opop. Te'e ma eyju ikuḡ. Yoptiteat cocom pima warara'acat je'e:

— Tacup ma poro teku osunuy — i. — Teku jebubut o'ḡuwaje jemucokcok am acā — i je'e ip. — Ajo xe'e o'ḡūm tadaybotbocayū be? Ka'ūma ma — i je'e ip.

Daxa be wuymupikupikap puxim ipiat epesupi'ajojo. Eybubut muwajeje'uk epesop. Gasū bit Deus je'e eywebe:

— Ikērēat kuḡ eyju oxē — i.

⁴ Teidada'uk ḡu epesop eykat pe kapikpik'ukayū be cekapikaptei ip. Eya'ōpicūḡcūḡ cuy epesop. Deus pe jemāmāmām ip eywebe kapikpik'ukayū jekapikaptei kuḡ'ūm puye. Imēnpuye eymuymuy ip Deus pe. Deus ixeyū emāmāap cocom.

— Ocekariwa ocemudadaybotbon cīcā — i'e'em ip Deus pe. — Ipiat cuy esupi'ajoat ocekariwa be teidadam'ūm puye — i'e'em ip cebe-Deus pe.

Ixe Deus soat podi ma ya'ōbacaat. ⁵ Ijodi bima eybubut ade juk adi epesop. Eycokcoḡ cuk adi epesop soat kuḡ puye eybubut kuḡ. Eybeḡbeḡ cuk adi epesop ikuat o'o am. Gasū bit Deus jeymuju ipiat'ajojoap kay.

⁶ — Ikērēat kuḡ eyju Deus xe — i napa ma juk adi epe'e'e ikērēat kuḡ'ūmat pe.

Ikērēat kuḡ'ūmayū aokaka'uk epesop. Ceweikek ḡu ip osodop.

— Deus pit ipiat supi'ajojoat eywebe — i ōn e'em jebubut kay itabucayū be.

⁷ Imēneju eyukpiceḡēm ḡu juy epesop wuykukukat Jesus ajēmap wiwi am, okitpitpiyū. Ixe ajēmap wiwim cuy epesop apēn kat iwat jekat peat'a wiwim iat puxim. Kat iwat muba'at ajēmap wiwim. Muba'at ajēmjēm taida buje. Jekat'a op puje waram ajēmjēm. Yukpiceḡē ḡu kat iwat muba'at ajēmap wiwi am. ⁸ Ixe buxim eyju dak eyukpiceḡēm ḡu juy epesop wuykukukat Jesus ajēmap wiwi am. Epejowiwi juy. Gaxīn ma jajēm. Imēneju eycokcoḡ cuy epesop ixe wiwi am.

⁹ Okitpitpiyū, jemāmāmām ḡu juy epesop eyewejeju Deus pe "Ikērēat kuḡ eyju oxē" i'eap puxim eywebe. Gaxīn ma ixe jajēm. Ixe acā itaybit abuyū ikērēat kuḡ iam. Wuyju bit ka'ūma. ¹⁰ Okitpitpiyū, ḡebum cuy epesop Deus ekawēn muwēnuwēn'ukayū'ūm'ūm kay- -kuyjeayū'ūm'ūm kay. Wuykukukat a'ōbi imuwēnuwēn ip oekuku. Itaxi osodop ip ipiat-

pi'ajo am. Deus kay jetabucap o'jepere ġu ip ipiat-pi'ajojom ma'ġu ip. Ixeyū'ūm'ūm ekukuap puxim cuy epekukuku.

¹¹ — Icocok cīcā ip osodop ipiat kay itaxiayū'ūm'ūm — i wuyju e'em.

Ġebum cuy epesop iboap kay. Jó itaxi osunuy ipiat-pi'ajojo am. Deus kay jetabucap o'jepere ġu ipiat-pi'ajojom ma'ġu. Eyetaybit wuykukukat cuk adi ixē o'jukukuk xipan iam. Soat ibubut oi'ūm. Inaka Deus wara'at o'ġūm cebe oi'ūmiat tieġ. Wuykukukat itabotaidabotbot cīcā wuykay. Ixe xipan wuykuġ wuykukpin cīcā cexe buye.

¹² Okitpitpiyū, eya'ōpicūġcūġ cuy epesop wa'ō kay. "Wa'ō daġ oce" i'e'em pima, "Deus etabutpe icēmān ōn e'em" i'ūmġu juy epe'e.

— Kabi beat etabutpe icēmān ōn e'em — i'ūmġu dak cuy epe'e. — Ipi o'ġuġēiat etabutpe icēmān ōn e'em — i'ūmġu dak cuy epe'e.

— Oce ġu juy — i juy epe'e'e em'ūm pima. — Oce juy — i bit cuy epe'e'e em pima.

Icēmān acā juy epeyekawēn eyewewēju. Eya'ō daġ cuy epe'e'e soat em. Imēn e'em pima, Deus ipiat supi'ajoat ġu eywebe.

¹³ Wuyju ipiatpi'ajojom pima, Deus eju juy acekawēn. Wuycocok pima dak cuy acebibododon cebe "Soat podi ma ēn xipan ocekuġ" i'e am cebe.

¹⁴ Wuyewātaxipipi bima itabucayū kukukayū juy atakoy yajēm ām wuyduk'a be. Iwātaxipiat mu'adaap joojuy ip Deus xewi. Ixēpti juy timōġ ip iwātaxipiat a be Deus pe imu'ada am.

— Wuykukukat Jesus a'ōbi oceju timōġmōġ a be — i juy je'e ip cebe- iwātaxipiat pe.

¹⁵ Imēn iojuy buje, Deus iwātaxipiat ġu'ada wuykukukat Jesus kay itabut ip puye. Wuykukukat Jesus iwātaxipiat ġu'ada. Apēn cuk adi ikērēat o'ġujurūġ-rūġ iap ju'uk cebewi- soat ju'uk. ¹⁶ Imēneju apēn cuk adi ikērēat aġujurūġrūġ iap cuy aġuwēn wuyewewebe. Wuyewebeam cuy acekawēn Deus eju ixē be wuymu'adam. Deus ja'ōbacaap ġubapuk wuywebe wuyju iboap ojuyjuy cexewi bima, ixē bikuyap taġ wuyju jekukum pima dak. ¹⁷ Wuybuxim Elias tak ijo-

dian osunuy- -Deus ekawēn muwēnuwēn'ukat kuyjeat. Ixe o'jekawēn Deus eju.

— Muba'at cuy eğudot ġu ocekey — io'e Deus pe.

Muba'at oajēm ġu Deus ixē ekawēn o'ya'ijojo buye. Ibun cîcâ muba'at'ûmap. Muba'at ajēmjēm ġu oeku ebapûğ koato. 6 kaxi dak ka'ûmġu. ¹⁸ O'jekawēn ma'ğuto Deus eju Elias.

— Muba'at cuy waram eğudot ocekey — io'e cebe.

Waram ġuto kabi beat muba'at o'ğudot. Kadai waram o'yaypan. Elias puxim wuyju dak cuy wuyemuojuyjuy ajowiwi Deus xewi.

¹⁹ Okitpitpiyû, pûğ'in ey'in kawēn icēmat kayap epere buje juy ixē epeyawē waram ġuto kûyjobit am kawēn icēmat kay. ²⁰ Ikērēat mujurûğrûğ'ukat cuy epeğuypit cedağ ġuiat e dağwi. Imuypit puje, Deus idaxijo. Iğuju ġu ipiat'ajojoap kay. Ikērēat ju'uk cebewi. Ade jîjâ ju'uk cebewi. Gebum cuy epesop iboap kay.

Ibûrû ma.

PEDRO EMUDUPMUBARARAKTUP KOAPATUP

1 Õn Pedro. Jesus Cristo emumuju òn. Ixe onaē owebe Deus a'òbi kawèn idipat muwèn àm soat ka watwat pe. Eyju dak Deus ebekitkit. Ijudup mubarararaḡ òn eywebeaptum. Eyipi be ḡu eyju dopdom. Soat eipi daḡ eyju jepōḡpōḡpōḡ- -Ponto eipi daḡ, Galácia eipi daḡ tak, Capadócia eipi daḡ tak, Ásia eipi daḡ tak, Bitínia eipi daḡ tak. ²Deus wuyebayat. Ixe juk eynaē soat taḡ eyisu eydop am.

— Teyūku webekitkiyūm je'e — io'e Deus jewebe ma. — Okpot a'ò kay kūyjobin jeedop ip- -Jesus Cristo a'ò kay — i juk o'e jewebe ma kuyje ma. — Obiōḡbuk ixeyū ḡuisun soat taḡ, okpot o'jedoyekeren puye — i juk o'e jewebe ma Deus.

— Bay, xipan cuy ebekitkit ejukuk- -soat ka daḡ cepōḡpōḡ'ibiyū — i òn e'em Deus pe. — Ixeyū aḡuy- -mubabibin cuy eḡuy — i òn e'em cebe.

³ — Èn soat podi ma xipat — i juy ace Deus pe- -wuykukukat ebay be- -Jesus Cristo ebay be. Ixe Deus waram ḡuto Jesus Cristo o'ḡutait ce'ūap to- -mukadi. Ixe ja'òbacaap o'ḡuōm wuywebe wuyaḡuyi- -sum jeku am, ixe itabotaidabotbot cīcā wuykay buye. Imēneju soat em ixe xe wuyetait acesop iap wiwim cīcā wuyju, Deus ja'ò daḡ e'em soat em puye. ⁴Deus xipacat muxipanpan jebekitkit pe iūm àm. Kabi be ma Deus iboap muxipanpan wuywebeam. Deus emu- -muūm pit cekērèn pa'ore ma. Iokoḡ ḡu ma dak. Ie- -rep ḡu dak. Iboap ma acejat. Imēneju iboap cuy ajo- -wiwi jījā. ⁵Eywebe iūmap kuy ixipan oḡop Deus xe. Eyetabut pima, Deus soat em aḡ eykay. Ixe dak ja'ò- -bacaap muōmōm eywebe. Guyjom Deus apèn ixe wuydaxijojom soat em jexe wuydop am iap ḡubapuk soat ipi juayū be. Iboap wiwim cīcā eyju.

⁶Iboap kay juy ḡebum epesop eycokcok am. Imēnpit ijodi bima darem ma eyḡuycūḡ epesop ipiat- -pi'ajojom puye. Soat taḡwi xipat'ūmat jebapukpuḡ

eywebe. ⁷ Ouro kay jĭjā wuyju. Wuyetabut cĭcā Jesus kay bima bit, ouro kaypinap podi ma wuyju cekay. Wuyju ouro mudaxipxim wuyetaybit am teku imuwekoykeyat ġu ouro ma iam. Ouro buyxijojoap puxim Deus ipiatpi'ajojoan eywebe eyetabucap puyxijo am. Ouro imu'ūm put wuywebe. Eybu'u'ūm pima bit Jesus kay ipiatpi'ajojom ma'ġu eyju, eyetabucap imu'ūm pa'ore je'e. Eybu'u'ūm pima:

— Xipat eyju oce — i je'e Deus eywebe.

Imēn je'e eywebe Jesus Cristo muajēm puje. Jesus co'i eydip epesop. Cejo'i eya'ōbuyxi epesop. ⁸ Ixe Jesus Cristo juk adi epejojojo ġu. Inaka ixē ikukpin cĭcā eyxe. Ġasū dak ixē jojom ġu eyju. Inaka eyetabut cĭcā cekay. Imēneju eycokcok cĭcā ma. Kabi beacat cokcokap co'i eyju dak eycokcok. Eycokcokap imuwēn pa'ore eywebe yoboġ cĭcā eycokcokap puye. ⁹ Eyju juk adi eyetabut epesop Jesus kay. Imēnpuye Deus cuk eydaxijo. Ġasū eycokcok cĭcā eyetaybit Deus kuy juk ocedaxijo iam puye. Jemudaxijoyū bit pūġ em tak je'pere ġu ma.

¹⁰ Ġebum cĭcā osodop ip Deus ekawēn muwēnuwēn'ukayū apēn Deus ipi juacat idaxijo iap kaykuyjeayū. Itaybit pin cĭcā osodop ip iboam.

— Apēn xe'e Deus xipan jebekitkit jukuk? — i'e'e'uk osodop ip. — Deus ipi juacayū idaxijo — i'e'e'uk ip osodop taxijo awap.

¹¹ Cristo biōġbuk osunuy cebe ip-jewemuwēnuwēn ma cebe ip Cristo ma.

— Deus emunaē juy ipiat supi'ajojo — i juk adi o'e cebe ip. — Ipiatpi'ajojo epere buje bit soat xe warara'acat podi ma ya'ōbuyxian je'e — i juk adi o'e cebe ip.

Iboap ekawēn co buje:

— Abu muwēnuwēn xe'e Cristo biōġbuk wuywebe? — io'e ip jewebe ma. — Puġūn xe'e imēġap je'bapuk? — io'e ip jewebe ma.

¹² — Eyetabēġ pima ġu ipiat supi'ajoat ip wemu-naē be-ġuyjom acā — i juk adi o'e Deus jekawēn muwēnuwēn'ukayū be.

Imēn jekpot o'ġuwēn cebe ip. Kuyjeayū iboap ekawēn muwēnuwēn'uk ip osodop Deus ekawēn muwēn-

uwēn'ukayū. Gasū dak kawēn idipat muwēnuwēn'ukayū iboap ekawēn ma juk adi o'ḡuwēnuwēn eywebe Ibiōḡbuk xipacat a'ōbi- -kabi kadiwi Deus o'ḡudot'iat a'ōbi. Kabi beacayū dak itaybin ojuy osodop ip iboap ekawēn- -Deus ekawēn tojotjot'ukayū.

¹³ Imēneju eyaḡuykerem cuy epesop. Deus xipat cīcāat je'ḡūm eywebe waram Jesus Cristo ajēm puje. Yajēmap wiwim cīcā juy epesop. Wara'at kay ḡu juy ḡebum epesop- -ixe kay acā. ¹⁴ Kūyjobin cuy epesop Deus a'ō kay. Deus e'eam eyetaybit'ūm pima, juk adi ikērēat muḡēḡēm acā epesop. Imēn ḡu juy epeku ḡasū bit. ¹⁵ Deus ikērēat kuḡ ḡu. Soat taḡ iisu. Ixe juk eynaē soat taḡ eyisuan jebuximayūm. Imēnpuye juy eyaḡuyisum epeku. Eyekawēnkērēm ḡu dak cuy epesop. ¹⁶ Imēn e'em Deus ekawēntup:

Ōn ma ikērēat ojukuk ḡu- -pūḡ em
tak ka'ūma ma, i. Imēnpuye eyju dak
ikērēat epejukuk ḡu, i.

¹⁷ — Bay — i wuyju e'em cebe, Deus eju oceju kawēnwēn pima. Ixe Deus pūḡ taḡ ma soat kuḡ ipi juacat kuḡ. Apēn ijodi bima juk adi ajeku iaptei ideida soat pe wuywebe. Xipacat je'ḡūm cedaḡ ma jekuku'ukayū be cedaḡ ma cekukuaptem. Ipiat supi'ajojoat ikērēat mujurūḡrūḡ'ukat pe bit ikērēat mujurūḡrūḡaptem. Imēneju ibuyxim cuy ixē epejukuk ijodi bima. ¹⁸ Kuy bima warēmtaḡ ma juk adi epekukuku eydobuyū'ūm'ūm ekukuap puxim. Ikērēat mujurūḡrūḡ cuk adi epekukuku. Deus pit eydaxijoaptei o'teida waram warēmtaḡ ma eyekuap puxim. Ourom ḡu o'teida, pratam ḡu dak. Ouro ikoro ḡu. Prata dak ikoro ḡu. Soat em ḡu teiboḡ ip. ¹⁹ Wuydaxijoaptei bit teiboḡ cīcā osodop. Wuydaxijoaptei Cristo e'ūap osunuy. Cedoyekererenap osodop. Kuyjeayū ovelha aokaka'uk osodop ip Deus pe ikērēat ukaptem. Idip cīcāat aokaka'uk osodop ip. Iwātaxipi'ūmat acā yokaka'uk ip osodop. Ikērēat kuḡ'ūmat acā. Imēnpuxim Cristo dak oe'ū, ikērēat kuḡ ḡu ma'ḡu. ²⁰ Ipi muḡē awap Deus jekpot muy ojuy osunuy ipi juacayū daxijojo'ukan. Kuyje ḡu bit ixē o'ḡudot ijodi- -ḡaxīsūn ma. Ibapūḡ ma ixē o'ḡudot ijodi eydaxijo am. ²¹ Deus

ixe o'ğutait ce'ūap tomukadi. Ixe dak o'jomuy soat podi ma ya'ōbuyxiam, soat podi ma idipam tak. Imēneju eyetabut cīcā Deus kay. Ixe jojoap wiwim cīcā eyju.

²² Kawēn icēmat kay juk adi epesop kūyjobin. Imēnpuye soat tağ eyisu Deus xe-ikērēat kuğ ġu ma. Eykitpitpiyū dak ikukpin cīcā eyxe-itabucayū. Jewexe ġu juy xipan epeyewekuk-icēmān. ²³ Koap cuk akap wuyebay wuymujurūğ puje. Wuyebay bit je'ū'ūm ijodiat. Wuyju dak je'ū'ūm ma. Imēn ma koap wuykapap. Ğasū bit waram akap Deus ebekitkiyūm. Deus pit je'ū'ūm ġu. Wuyju bit ġuto waram kapkam Deus ebekitkiyūm ixē ekawēn kay wuyetabun pima. Ixe ekawēn itaicat puxim, Deus soat em itait puye. Ixe ekawēn pit i'ūm ġu. ²⁴ Imēn e'em Deus ekawēntup:

Ipi juacayū warēmtaksuğtit puxim, i.
Ibun ġu titip, i. Warēmtaksuğtit dao
ma jedite'ū'ūm, i. Dao ma jeditedu-
dum tak e'em, i. ²⁵ Deus ekawēn pit
i'ūmġu-soat em dopdom, i.

Ixe ekawēn cuk adi epeya'i'jojo kawēn idipat co buje.

2 Ikērēat muğēğēap cuy epeyepere. Napa ġu dak cuy epe'e. Jewexe ġu dak cuy epekuku warara'acat muğuykukuap ojoy. Eyetabutkarey ġu dak cuy epesop warara'acat kay. Warara'acat muy-muy ġu dak cuy epesop. Wuyetabut'ūm pima iboap kuğ ma juk adi ajeku-ikērēat kuğ. Ğasū bit soat iboap acepere juy. ² · ³ Kuy eyetaybit wuykukukat soat em xipan cīcā wuykuğ iam. Imēn e'em tak Deus ekawēntup. Imēnpuye ixē ekawēn kay juy epesop ikap'isuat jexi kūmti kayap puxim. Ka'ūmġu xipat'ūmap opop ixē ekawēn tağ pit. Apēn wuyxi kūmti wuymuaypapanap puxim ixē ekawēn wuymuisusun soat tağ. Ixe ekawēn kay juy epesop biğ ma eyetabut am Jesus kay, Deus pe eydaxijo am tak.

⁴ Kuy eyetabut wuykukukat kay. Ixe wita'a buxim. Inaka wita'a buxim ġu ma ixe bit soat em itait. Itabut'ūmayū itakoma ixe kay. Xipat ġu cexe ip. Deus xe bit ixe soat podi ma xipat. Deus cuk ixe o'taē soat ipi juacayū daxijo am. ⁵ Jesus Cristo kay eyetabut pima, Deus eykukukat e'em apēn uk'a beat'a wita'a jexeat'a muycemucem iap puxim. Inaka eyetait. Deus eju kawēnwēnap'a ma wita'a muġēġē. Cekay itabucayū bit ixe nūynūyap wita'a muġēġē buxim, ixe biōġbuk omuy wuywebe buye. Eyju paīyū. Soat taġ eyisu ikērēat kuġ ġu buye. Paīyū buxim eyju dak kapikpiġ Deus peam, ixe biōġbuk a'ōbacaap kuġ. Ixeyū emumuūmap puxim eye-mumuūmap tak Deus mucokcoġ, Jesus Cristo kay eyetabut puye. ⁶ Imēn e'em Deus ekawēntup:

Ixe juk otaē uk'a muymuy'ukayū wita'a naēap puxim- -yadeiboġ cīcāat'a naēap puxim- -wara'at'a muycemucemap'a naēap puxim, i. Ixe oġuju Siāo ka jo'iatka be, i. Ixe ojomuy soat kukukan warara'acat podi ma ya'ōbuyxian, i. Iġuycūġ ġu jeedop ip jetabucap kuġ ixe kay itabucayū- -icokcoġ ma, i.

Imēn e'em Deus ekawēntup.

⁷ Eyju eyetabut Jesus kay. Itabut'ūmayū bit ka'ūma. Jesus yadeiboġ cīcāat'a buxim eyxe- -wita'a buxim. Itabut'ūmayū xe bit, ka'ūma. Cekay ġu ip. Imēn e'em Deus ekawēntup:

Uk'a muymuy'ukayū ibo'a kay ġu osodop ip- -wita'a kay ġu, i. Ibo'a bit wara'at'a muycemucemap'am o'e, i.

⁸ Wara'atup e'em imēn- -Deus ekawēntup:

Ibo'a be jepenpenpen ip adeayū, i. Ibo'a bit ixeyū ġuy'at- -itabut'ūmayū ġuy'at, i.

Imēnpuxim Cristo soat kukukan je'e adeayū itabut ġu ma'ġu cekay. Jepenpenpen ip iap puxim itabut'ūmayū ibu'u kūyjobit am Deus a'ō kay. Deus imēn ibikuy osunuy kūyjobit'ūmayū beam.

⁹ Eyju bit Deus emunaēyū apēn kuyje ixe pūg ti-watwat o'taē iap puxim. Paīyū eyju- -soat kukukat pe kapikpik'ukayū. Soat tağ eyisu. Deus ebekitkiyū eyju. Ixe juk eynaē, eywebe "Deus idip cīcāat e'em" i'e am soat pe, "Ka'ūmğū i'e ba'oreat Deus pe" i'e am tak. Ixe juk eynaē eywebe kabiok tağ eyekup epere am kabia dağ eyeku am, idip cīcāat tağ eyeku am. ¹⁰ Kuy bima Deus ebekitkin ġū epesop. Gasū bit ixe ebekitkit eyju. Kuy bima eydadaybot ma juk adi epekuku eybu'u Deus pe jeykukan puye. Gasū bit Deus xipan eykuğ.

¹¹ Okitpitpiyū, ōn jeyawē, eykukpin oxē buye. Ijodi bima powatwat puxim eyju jeka be'ūmayū buxim. Ibun ġū ijodi epesop- -darem ma. No-pağōğōm pima, ağ'ūm pima, cekay itakomaat kuka sorara o'yaoka. Imēnpuxim wuyju dak wuyağuybin ma jekukum pima kuka ikērēat muğēğē'ukan ace. Ikērēat cuy ağūğē ġū i'e'em ōn pit.

¹² Eymuymuy ojuy jījā ip itabut'ūmayū.

— Itabucayū ikērēat mujurūğrūğ — i napa ma e'em ip.

Ixeyū etabutpe bit cuy cedağ epekuku. Cedağ ma eyekukuap co buje: — Eyju cedağ ma jekukum — i je'e eymuymuy ojuyayū. — Soat podi ma ēn xipat — i dak je'e ip Deus pe ixe ajēmap kabia be.

¹³ Wuykukukat ebekitkit eyju- -Jesus ebekitkit. Kūyjobin cuy epesop ijodiacat kukukayū a'ō kay itabut'ūmayū be Jesus muymuyap puxim. Kūyjobin cuy epesop César a'ō kay. Ixe César soat kaka wat kukukayū kukat. ¹⁴ Kūyjobin cuy epesop iecuğap a'ō kay dak. Deus a'ōbi César juk ixeyū o'jomuy eykukan. César a'ōbi ipiatpi'ajojoan ip ikērēat mujurūğrūğ'ukayū be. Xipacat mujurūğrūğ'ukayū be bit — Xipat cīcā eyju ocexe — i'e'em ip.

¹⁵ Eymuymuy ojuy ip kawēn icēmān itaybit'ūmayū. Eyju xipacat mujurūğrūğ pima bit, eymuymuy ba'ore epe'e cebe ip. Imēneju Deus ibikuy eywebe xipacat mujurūğ ām. ¹⁶ Kariwa jebekitkit mujēmjēm jetabixewi yukpiwatpin ma jekupinap tağ jeku am. Wuyju dak ixeyū buxim ma Jesus kay wuyetabun puje

wuyukpiwatpin ma wuyeku but. "Ocekpiwatpin ma ocek but" i'ûmġu juy epe'e ikêrêat muġĕap ojuy. Eyukpiwatpi ġu juy epeku- -Deus ukpiwatpi acâ. ¹⁷ Soat ma ibuyxin cuy epejukuk. Ikukpin cuy itabucayû epejukuk- -eykitpitpiyû. Icêmân cuy eypararam epesop Deus puxim. Ibuyxim cuy epejukuk soat kaka wat kukayû kukat.

¹⁸ Kapikpiġ eyekariwa beam pima, kûyjobin cuy epesop ya'ô kay. Soat em cuy kûyjobin epesop eyekariwa a'ô kay- -ixeyû xipan eykuġ pima, warêmtaġ eykuġ pima dak- -ya'ôdidim eykuġ pima, ya'ôpuruġ pima dak. ¹⁹ Warara'acayû te'e ma ipiat supi'ajojoat eywebe eyju Deus bikuyap taġ jekukum puye. Eyju bit eyetaybit imên Deus cekay iam. Ipiat kuġ eyetaxi bima bit, Deus xipacat je'ġûm eywebe. ²⁰ Ikêrêat muġĕġĕapteim eyekariwa be eymupokupok puje, xipacat je'ġûm ġu Deus eywebe, eyetaxim ma'ġu ipiatpi'ajojom. Xipacat muġĕġĕapteim pit eyekariwa be eymupokupok puje, xipacat je'ġûm Deus eywebe, eyetaxi ma'ġu ipiatpi'ajojom. ²¹ Deus cuk eynaë ipiatpi'ajoam. Cristo juk adi ipiat o'supi'ajojo eywebeam. Ipiat o'supi'ajojo eywebe daxaboġ pe eyjuap puxim. Ixe juk adi ipiat o'supi'ajojo ikêrêat kuġ ġu ma'ġu. Deus cuk eynaë ixe ekukuap puxim eyeku am. ²² Ixe Cristo ikêrêat o'jukuk ġu- -pûġ em tak ka'ûma. Napapa'uk ġu dak osunuy. ²³ Warara'acayû be ixe muymuy buje, ixe bit ip o'jomuymuy ġu. Ixe ipiatpi'ajojom pima:

— Deus cuy ipiat supi'ajojoat eywebe owebe ipiat'ajojoapteim — i'ûmġu o'e jekay itakomaayû be. — Deus soat em aġ okay — i bit o'e jewebe ma. — Deus ma ideida soat pe apên ijodi bima juk adi oekuku ip iaptei — io'e jewebe ma.

Te'em pit ideida ġu- -cûġ ma. ²⁴ Cristo apên cuk adi ikêrêat aġuġĕġĕ iap o'ġuymûġ jewekay korosa be bima. Oe'û ikêrêat uk am wuywebewi. Oe'û ja'ôbacaap ûm âm wuywebe ikêrêat muġĕap puxim. Oe'û wuywebe cûġ ma wuyeku am Deus etabutpe. Ixe juk wuyumu'ada tapoa kûybut pibun, ipiat o'supi'ajojo buye. Imênpuye waram ġuto wuyetait ace'e wuye'ûap

tomukadi. ²⁵ Ovelha buxim cuk adi epesop- e bidase-
wi oitabidaoiat puxim. Gasū bit Deus kuy juk eydu-
jupit eykukukat kay ixe nomuju eyeku am- -eykay
aġat kay juk eydujupit.

3 Itoptepayū awēm ōn ġasū. Tū'ū'ūyū, kūyjo-
bin cuy epesop eyitopyū a'ō kay. Ibu'un
mabuk ip kūyjobit am Deus ekawēn kay- -kawēn i-
cēmat kay. Eyju cedaġ ma jekukum pima bit ita-
but je'e ip, e'em ġu ma'ġu cebe ip. Eyju cūġ ma
jekukum pima, eyitopyū je'e jewebe ma:

² — Otayxi warēmtaġ ġu jekukum — i. — Ibuyxi
soat xe cūġ ma jekukum puye — i je'e ip jewebe
ma.

Imēnpuye itabut je'e ip Jesus Cristo kay. ³ Jewemu-
dimudim ġu bit cuy epesop soat pe eyjo am. Iwarum
ġu dak cuy epeyawamusēm soat pe eyjo am. Ouro
muġēġēbu kuġ ġu dak cuy epeku ibusopsepatpu kuġ
ġu dak, teiboġat kuġ ġu dak eyesay kuġ soat pe eyjo
am. ⁴ Wuyesay dao ma i'ūm, ouro muġēġēbu dak.
Soat em ġu ikoro ip. Kacūġtaġ eydipap ma yoboġ ġu
Deus xe. Eyekawēntip pit yoboġ cexe. Kacūġtaġ ġu
bit cuy epeyewemudim- -badi acā. Eya'ō'ūm'ūm
pima bit eydip cīcā epesop Deus xe, eykukput pima
dak. ⁵ Imēn ma oekuku ip kuyjeayū aoyū- -Deus kay
itabucayū- -Deus xewi xipacat wiwi'ukayū. Xipat oso-
dop Deus xe, jektopyū a'ō kay kūyjobit ip puye. ⁶ I-
mēn ma juk adi oeku Sara dak. Jektop a'ō kay juk
adi kūyjobit osunuy- -Abraão a'ō kay.

— Okukukat — i juk adi o'e cebe- -jektop pe.
Eyju xipacat mujurūġrūġ pima, Sara iyū buxim epe-
sop eyparara'ūm pima dak soat puxim.

⁷ Itayxixeyū awēm ōn ġasū. Tapupuyū, ġebum
cuy epesop eybuxim ġu eytayxiyū ibaca ġu iap kay.
Imēnpuye ibuyxim cuy ixeyū epejukuk. Apēn Deus
jeydujuu jewekay iap co'i ma ixe eytayxi dak idujuu
jewekay. Eytayxi dak idujuu jewekay, eyekukuap co'i
eytayxi dak Deus bikuyap taġ jekukum pima. Imēn-

puye ibuyxim cuy ixeyū epejukuk eybu'up puxim jekawēn ām Deus eju.

⁸ Āmām ōn eyawēm ḡasū. Pūḡ taḡ ma juy epeye-waḡuy. Jewaḡuyccocom cuy epesop. Eykukpin cuy epeyewekuk. Eyewekukpin tak cuy epesop eyewewēju. Yoboḡan pin ḡu juy epesop eyewewekay. ⁹ Deus pe eynaē buje:

— Xipat cīcāat oḡūm eywebe — i juk o'e eywebe.

Imēnpuye wara'acat ikērēm eykuḡ pima, ikērēm ḡu eyju bit epejukuk, xipan acā. Eymuymuy bima dak, eyju bit epejomuymuy ḡu-xipan acā ixe epeḡuwēnuwēn. ¹⁰ Imēn e'em Deus ekawēntup:

Soat em wuycokcok pin pima, ikērēm ḡu juy acekawēn; napa ḡu dak ace, i.

¹¹ Ikērēat mujurūḡrūḡap tak cuy acepere, i. Xipacat acā juy aḡujurūḡ, i. Acewa'ōdawut ḡu juy, i. Kaba'ūm cuy ajop soat eju, i.

¹² Wuykukukat soat em aḡ cūḡayū kay xipan ikuk am ip, i. Jewēju ip kawēnwēnap cocom soat em ma, i. Ikērēat mujurūḡrūḡ'ukayū kay bit itakoma, i.

Imēn e'em Deus ekawēntup.

¹³ Eyju xipacat mujurūḡ pin pima, abu kuka ipiat o'supi'ajoat eywebe? ¹⁴ Itabut'ūmayū ma ipiat supi'ajoat eywebe cūḡ ma'ḡu jekukum eyju. Deus pit ḡaxīn ma xipat cīcāat je'ḡūm eywebe. Imēnpuye eycokcoḡ cuy epesop. Eypararam ḡu juy epesop soat puxim. Epeyekuy ḡu dak cuy eywebe ipiat'ajoanayū buxim. ¹⁵ Ibuyxim cuy Cristo epejukuk. Ixe be juy epeyewekukat. "Apēnpuye dak eyetabut Jesus kay?" i'e buje eywebe, eybisūsūn ḡu juy epesop imuwēḡām cebe ip. ¹⁶ Eya'ōpuruḡ ḡu bit cuy ixeyū epeḡukūyjo iboam-eya'ōdidin ma. Ibuyxim ma epeḡukūyjo ip. Apēn cūḡ ma eyxe iap taḡ cuy epeku eymuymuy ojuyayū musūsūn ām. "Cristo ebekitkit tak ikērēat mujurūḡrūḡ" i'e ojuy ip napa ma. Cūḡ ma eyju jeku-

kum pima bit, ibisūsūn je'e ip eymuymuy ām. ¹⁷ Wara'acayū ipiatpi'ajojoan wuywebe bima, xipacat mujurūgrūg ma'gu wuyju, xipat je'e wuywebe, Deus tak ibikuy ma osunuy wuywebe ipiat'ajoan puye. Ikērēat mujurūgrūgāpteim ipiatpi'ajojoan ip wuywebe bima bit, xipat gu je'e wuywebe. ¹⁸ Ġebum cuy epe-sop apēn Cristo oe'ū iap kay. Ixe ma oe'ū soat peam wuywebeam. Oe'ū ikērēat uk am soat pewi wuywebe-wi. Pūg em ma oe'ū. Waram pit je'ū gu. Xipacat oe'ū xipat'ūmayū beam. Oe'ū wuydujowat am Deus kay. Itakomaayū ixe'ūm o'yaoka ijodi bima- -ijebitbet pima. Inaka waram guto ibiōgbuk oōm cebe imutait am ce'ūap tomukadi. Waram o'jetait. ¹⁹ Jebiōgbuk oōm puje, o'kop ipiat'ajojoap kay. Kawēn idipat o'gu-wēn ipiatpi'ajojoayū be- -ibiōgbuk taomūnmūnayū be. ²⁰ Deus a'ō kay kūyjobit'ūm osodop ip Noé kobexixi muḡēgēm pima. Deus ipi juayū muy'ū pin gu osunuy. Yukpicegēm gu ikuḡ ip osunuy. Kūyjobin i'eap wiwim osunuy. Tūybe ip jekūyjobin iān o'e. Imēnpit ade gu kūyjobit osodop ip- -8 be ma. 8 be ma oōm kobexixi be. 8 be ma Deus o'taxijo idibi be yakōmap puxim. Oōm ip kobexixi be. Uhum oekuku ip kobexixi be idibi adopa daḡ. ²¹ Jemubatisasanan pima wuyju ḡebum ibiati kay- -Noé o'taxijo iati kay. Wuymubatisasanan wuyju wuyewewuy am gu. Wuyju jemubatisasanan "Deus cuk ocedaxijo" i'e am soat pe. Jemubatisasanan pima:

— Cūg ma oñ Deus xe ḡasū bit — i wuyju e'em soat pe. — Deus bikuyap taḡ oceku ḡasū bit — i wuyju e'em jemubatisasanan pima.

Deus wuydaxijojom wuymubatisasanan pima, ixe waram Jesus Cristo o'gutait puye. ²² Ixe Jesus Cristo juk o'jeu kabi kay. ḡasū omuy Deus xe iba'at kadi. Soat ip kūyjobit ḡasū bit ixe Jesus Cristo a'ō kay- -Deus ekawēn tojotjot'ukayū, kabi beayū dak ya'ōbuyxiayū, Deus a'ōbacaap kukayū dak.

4 Gebum cuy epesop apên Cristo juk adi ipiat o'supi'ajojo iap kay. Ixe'üm oe'ü wuywe-beam.

— Obu'u ipiat'ajoam — i'ümġu juk ixe bit o'e. Imênpuye eyju dak: — Ocebu'u ipiat'ajo am — i'ümġu juy epe'e. Apên ixe juk adi ipiat o'supi'ajojo iap kay ġebum pima, wuybu'u acesop ikêrêat kuk am. ² Ijodi eyju bima eybikuyap taġ cuk adi epekuku ikêrêat muġêġem. Deus bikuyap taġ acâ juy epeku ġasû bit. ³ Kuy bima itabut'ümayü buxim cuk adi epekuku. Ikêrêat acâ juk adi epeġuġêġê. Aoyü kaykay jijâ juk adi epesop. Eywemucokcok am acâ juk adi epekuku. Eyetabikuku jijâ dak cuk adi epesop ikêrêat kay. Eyka'okêrê dak cuk adi epekuku. Ayacat muwadaiwadai acâ dak cuk adi epesop. Jeweka'oap puyxi-jojom tak cuk adi epekuku. Ibuyxim tak cuk adi epejukuk jewexe deusayü. Iboap ikêrê jijâ Deus xe. ⁴ Ġasû bit itabut'ümayü xe eywaru jijâ, eybu'u ikêrêat mujurüġ âm ceweju ip puye. Eybu'u je'awero am ceweju ip ikêrêm jeku am. Eybu'u yadaodaoat puxim jeku am ceweju ip. Imênpuye soat em ip eymuymuy. ⁵ Ixeyü bit apên ijodi bima juk adi oekuku ip iap ġuwên Deus pe. Deus ideida soat ekukuaptei. Xipacat je'ġüm cedaġ jekuku'ukayü be. Ipiat pit supi'ajoat warêmtaġ jekuku'ukayü be. Imên ideida cebe ip. Itabêġayü be ideida, ce'ü'üayü be dak. ⁶ Kuyjeayü'üm'üm oe'ü'ü. Apên ijodi bima juk adi oekuku ip iaptei Deus o'teida ixeyü be apên soat pe teidadam iap puxim. Inaka Cristo kawên idipat cuk adi o'ġuwên cebe ip itabêġ ip pima. O'ġuwên ixeyü be jebuxim waram ġuto itait top am ip Deus xe ce'üap tomukadi.

⁷ Soat ġaxîn ma i'üm. Imênpuye jewawêwêm cuy epesop. Xetpin ġu juy epesop soat em kawên âm Deus eju. ⁸ Eykukpin cîcâ juy epeyewekuk. Wuykukpin jewewekuġ iap soat podi ma xipat Deus xe. Wuykukpin jewewekuġ pima, ġebum ġu acesop apên wuybure juk adi ikêrêat o'ġujurüġ iap kay. ⁹ Xipan cuy powatwat epejukuk eyduk'a be yajêm puje. Mâmâmâm ġu juy ip epejukuk. ¹⁰ Deus xipacat ümüm wuywebe iwaruruat ümüm. Soat wuyju kuy iboap ajat

Deus xewi. Wuybu'um ġu juy ajop ġasū bit ikuk am. Iboap kuġ cuy warara'acat asubuywan. ¹¹ Warara'acat mukūyjojom pima, Deus ekawēn cuy aġuwēn cebe ip. Warara'acat puywatwan pima dak, Deus a'ōba-caan ma asubuywan. Imēn wuyju Deus xewiat kuġ pima:

— Ka'ūmġu Deus jo'iat xipacat — i je'e ip-soat wuyjojoayū. — Jesus Cristo xipat cīcā, cebekitkit tak xipat — i je'e ip.

— Ēn soat podi ma edipap kuġ — i juy acece ixe Jesus Cristo be. — Ēn soat podi ma a'ōbuyxi — i dak cuy acece cebe.

Soat em ma juy ace imēn.

¹² Oburereyū, oxe ikukpinayū, ipiatpi'ajojom cīcā eyetabucap puyxijo am pima, eyaġuybabi'ūm ġu juy epesop.

— Apēnpuye dak oceju ipiat'ajojom? Warara'acat ipiatpi'ajojom ġu! — i'ūmġu juy epe'e eyewewe-be.

¹³ Ġasū eyju Cristo aġuywaġōm ipiat kuġ. Guyjom pit ixe jedipap ġubapuk. Imubapuk puje eyju dak ixe dipap kuġ epesop. Eycokcokap yoboġ cīcā je'e ġebuġe. ¹⁴ Itabut'ūmayū eymuymuy Cristo ebekitkit eyju buye. Eymuymuy bima juy eycokcoġ epesop. Ixeyū eymuymuy bima, ġebum cuy epesop Deus biōġbuk nuynuy wuywebe iap kay. Warara'acat podi ma idipat nuynuy wuywebe iap kay ġebum cuy epesop. ¹⁵ Wara'acat cuy epeyaoka ġu. Warara'acat pubut tak cuy epetujupa'um ġu. Wuyeipi kukat epeya'ōmutorok ġu dak cuy. Warara'acat ekawēn mukērērēn ġu dak cuy. Imēn eyeku buje bit, cedaġ ma kuka warara'acat ipiat o'supi'ajoat eywebe. ¹⁶ Eyju Cristo ebekitkit puye acā ipiatpi'ajojom pima bit, eysūsūn ġu juy epesop.

— Bay, ocecokcok cīcā Cristo ebekitkit puye, ipiatpi'ajojom ma'ġu oceju — i bit cuy epe'e Deus pe.

¹⁷ Ġaxīn ma Deus ideida soat pe apēn ijodi bima juk adi oekuku ip iapteim. Xipacat je'ġūm cedaġ ma oekuku'iyū be cekukuapteim. Ipiat supi'ajoat kūyjo-

bit'ūmayū be warēm taḡ cekukuapteim. Koap jebekitkit pe ideida. Wuywebe ipiatpi'ajoan pima, ibodi ma ipiat supi'ajoat ja'ō kay kūyjobit'ūmayū be--kawēn idipat kay'ūmayū be. ¹⁸ Imēn e'em Deus ekawēntup:

Iba'ore xipacat mujurūḡrūḡ'ukat taxi-
jo am, i. Ja'ō kay'ūmat pit Deus ida-
xijo ḡu, i. Ikērēat mujurūḡrūḡ'ukat
idaxijo ḡu, i.

Imēn e'em Deus ekawēntup.

¹⁹ Wuyju Deus bikuyap taḡ ipiatpi'ajojom pima, ixe juy wuykuk. Wuyetabun cīcā juy ajop cekay--wuymuḡēat kay. Xipacat mujurūḡrūḡ cuy ajeku. Ixe soat em ja'ō daḡ e'em wuywebeam. Ixe soat em xipan wuykuḡ.

5 Aypapayū, jeyawē ōn ḡasū, eyju itabucayū kukukayū buye. Eybuxim ōn tak itabucayū kukukat. Apēn Cristo juk adi ipiat o'supi'ajojo iap muwēnuwēn ōn, wetabun cuk adi o'supi'ajojo buye. Wetam cuk adi ojojjo. Ḡuyjom pit Deus Cristo soat podi ma idip iap ḡubapuk soat pe. Iboap mubapuk puje, ōn tak ixe jo'i oce odip. ² Deus cuk eynaē jebekitkit kukukayūm. Imēnpuye xipan cuy ixeyū epejukuk ovelha kukuk'ukat puxim. Eybu'uap tomuju ḡu juy ixeyū epejukuk--eybikuyap tomuju acā juy epejukuk ip. Deus bikuyap taḡ cuy ixeyū epejukuk. Dinheiro buap ojuy ḡu ixeyū epejukuk--ixeyū buywat am acā. ³ Imuohom cīcā ḡu juy ixeyū epejukuk. Cūḡ ma juy epeku ixeyū dak eyekuap puxim ceku am. ⁴ Cristo wuykukukat yoboḡat ovelhayū kukuk'ukayū kukat puxim. Ijodi waram ixe ebapuk puje, soat em ixe aḡuywaḡōm epesop soat kukukayūm. Imēn ma cūḡ ma eyekukuapte ipejat apēn ijodiayū kukukayū ouro muḡēḡēbu bubum ja beam iap puxim. Soat iboap kuḡ epesop idip cīcāat kuḡ.

⁵ Yaypan'isuayū, ōn jeyawē ḡasū. Kūyjobin cuy epesop aypapayū a'ō kay. Yoboḡan pin ḡu juy epe-

sop. Jewebuywatwan pit cuy epesop. Eybuyxim tak cuy epeyewekuk. Imên e'em Deus ekawëntup:

Deus itakoma yoboğan pinayū kay, i.
Yoboğan pin'ūmayū buywatwan pit
soat em, i.

⁶ Imênpuye yoboğan pin ġu juy epesop. Deus soat podi ma ya'ōbaca. Eyju yoboğan pin'ūm pima, Deus jeymuwexat ya'ōbuyxiayūm. Ixe ibikuy bima, ixe jeymuy ya'ōbuyxiayūm- -yoboğayūm. ⁷ Soat kay eyağuybabi'ūm pima:

— Bay, wağuy mubabin cuy ece wağuybabi'ūm cīcā buye — i juy epe'e Deus pe.
Imên cuy epe'e cebe, ixe soat em xipan wuykuğ puye.

⁸ Eyağuy san cuy epeku. Apên wida jededem puybit pu ojuy iap puxim Satanás tak wuydobatban jekukum wuyetabucap mu'ūm ojuy. Imênpuye ağ cuy epesop ixe be eymubu'unap puxim Jesus kay.

⁹ Eya'ōpicūğcūğ ġu juy Satanás a'ō kay- -ibiōğbuk kērēayū kukukat a'ō kay.

— Ap! A'ō kay ġu oce — i epe'e'e cebe soat em.

Eybu'um ġu juy epesop eyetabut am Jesus Cristo kay. Eybuxim eykitpitpiyū dak ipiatpi'ajojom- -soat ka watwat- -itabucayū. Kuy eyetaybit iboam. ¹⁰ Darrem ma eyju ipiatpi'ajojom. Warara'acat podi ma Deus xe wuykukpin. Ixe juk eynaē jejo'ian eydip am, Cristo eju mūğ'i eyju jekukum puye. Soat em Deus soat tağ jeymuisun. Ixe eybuywatwan eybu'uap puxim eyetabut am Jesus Cristo kay. Ixe soat em eya'ōmucanucan. Apên ixe soat podi ma jedipap kuğ iap ebapuk puje ixe jo'ian epesop eydip. Ixe dipap i'ūm'ēm ġu. ¹¹ Ixe ma soat kukukan jeenuy soat em. Soat kaka dağayū jewağuycom jeedop ip kūyjobit ixe a'ō kay. Ka'ūma ma kūyjobit'ūmat jeenuy. Imên cuy jeenuy.

¹² Tup'ade ġu òn tupmubarararağ eywebeaptum. Ijudup otupmuju Silas bui be eywebeaptum. Wuykitpit Silas soat em ma ja'ō dağ e'em. Eymucokcoğ ojuy òn. Soat em Deus xipan wuykuğ. Napapa'uk ġu

ixe bit. Icēmān acā e'em wuywebe. Imēnpuye ixe ekawēn taḡ cuy epeku.

¹³ Oxeayū kato mujujum eywebe- -eykitpitpiyū, itabucayū, Deus emunaēyū, Babilōnia ka watwat. Okpot co'iat Marcos tak kato mujujum eywebe. ¹⁴ E-peyewakobot cuy eyeweweju eykukpinap mubapuk am soat pe.

Ōn kawēnwēn Deus eju eywebeam, Cristo ebekitkit eyju buye.

— Bay, ebekitkit cuy eyaḡuymubabibin — i ōn e'em cebe.

Ibūrū ma.

PEDRO EMUDUPMUBARARAKTUP XEPXEPATUP

1 Simão Pedro òn. Jesus buywatwat'ukat òn. Deus emumuju òn. Cartadup mubarararağ òn soat peaptum- -Jesus Cristo kay itabucayū beaptum. Jesus Cristo wuydaxijojo'ukat. Deus co'i ma ixe dak cūğ ma e'em. Ixe juk eymutabun ocemutabunap puxim. Ixe kay wuyetabut pima, teiboğ cīcāat wuyju ikuğ iap puxim. ² Eyju kūyjobit e'em Deus a'ō kay, wuykukukat Jesus a'ō kay dak.

— Bay, soat em ebekitkit ağuy mubabibin cuy eğuy — i òn e'em Deus pe. — Soat em xipan cuy ixeyū ejukuk — i òn e'em cebe.

³ Deus cuk wuynaē jejo'i wuywebe idipat kuk am, jejo'i xipacat muğē ām tak. Ixe dak cuk ja'ō-bacaap o'ğūōm wuywebe. Imēnpuye soat em ixe a'ō dağ wuyeku but ijodi bima. Ya'ō dağ jeku am iba'ore ġu wuywebe, wuyetaybit wuynaēan puye.

⁴ — Ojo'i eyju dak epesop xipacat muğēğē'uk-ayūm — i juk adi o'e Deus wuywebe. — Ojo'i eyju dak epesop eydipap kuğ — i dak cuk adi o'e wuywebe.

Iboap ekawēn kay wuyetabut pima, wuycokcok cīcā acesop teiboğ cīcāat kukat puxim. Xipat cīcāat tak cuk o'ğūm wuywebe. Ixe emumuūm kuğ pima, ikērēat kay ġu ace'e, ixe ekawēn kay wuyetabut pima dak. Itabut'ūmat puxim ġu aceku. Deus kay'ūmat ağuy dağ ġu dak acesop jewağuyğuy- -Deus ağuy dağ acā. ⁵ Imēneju evetabut pima, xipacat tak cuy epeğūğēğē. Xipacat muğēğēm pima, eyetaybin tak cuy epesop Deus e'e am. ⁶ Eyetaybit Deus e'e am pima, jewawēwēm tak cuy epesop eywebe ikērēat muğēap puxim. Jewawēwēm pima, eybu'um ġu dak cuy epesop Jesus kay, ipiatpi'ajojoan ma'ğū ip eywebe. Eyetabut am eybu'u'ūm pima, Deus ağuy dağ tak cuy epeyewağuyğuy. ⁷ Deus ağuy dağ jewağuyğuy bima, eykukpin tak cuy eykitpitpiyū epejukuk. Eykukpin eykitpitpiyū kuğ pima, warara'acat tak cuy

eykukpin epejukuk. ⁸ Imēn cuy epekuku. Imēn jekukum pima, eyjojoayū je'e:

— Teyūku cedağ ma jekukum itabut wuykukukat Jesus Cristo kay buye — i. — Warēmtağ ġu ip jekukum itabut cekay buye — i je'e ip.

⁹ Iboap ekawēn tağ jekuku'uk'ūmayū bit itabibacoyat puxim. Ita'ūmat puxim tak ip. Yağuyba'ūm ip Deus cuk ikērēat o'ju'uk ocwebewi iap kay.

¹⁰ Okitpitpiyū, biğ ma juy Deus a'ō dağ epeku. Biğ ma juy ixē bikuyap tağ epeku. Ixē juk wuynaē, wuynomuwā dak imēn ma wuyeku am. Imēn eyeku buje, epeyepere ġu eyetabucap. ¹¹ Ixē bikuyap tağ eyeku buje: — Epesop cuy okay — i je'e wuykukukat Jesus Cristo eywebe.

Wuydaxijojo'ukat imēn je'e eywebe.

— Soat em soat kukukayūm epesop oweju — i dak je'e eywebe. — Xipat oxē eywebe ixeyū kukuk'ukayūm oweju — i dak je'e eywebe.

¹² Kuy juk eyetaybit epesop kawēn icēmān. Eyetabut cīcā iboap ekawēn kay. Inaka soat em iboap ekawēn oğuwēn eywebe eyağuyba'ūmap puxim. Epeyepere ġu juy ixē ekawēn. ¹³ Wetabēğ pima, cūğ ma owebe waram ixē ekawēn muwēn ām eywebe eyağuyba'ūmap puxim. ¹⁴ Wetaybit ġaxīn ma oje'ū iam, wuykukukat Jesus Cristo kuy juk ibapuğ ma omukūyjo buye. ¹⁵ Imēnpuyē wa'ōbu'u ġu soat em ixē ekawēn muwēn ām eywebe eyağuyba'ūmap puxim we'ū buje.

¹⁶ — Wuykukukat Jesus Cristo waram jajēm — i juk adi ocece eywebe. — Ġuyjom ixē ja'ōbacaap ġu bapuk soat pe ijo am — i juk adi ocece eywebe. Ocekpiwatpi ġu juk adi iboap oceğuwēnuwēn eywebe. Ocetam ixē soat podi ma ya'ōbaca iap ocejojojo. ¹⁷ Deus soat podi ma ya'ōbuyxiat- wuyebayat. Soat podi ma ixē idip. Imēnpit:

— Ojo'i ma ēn tak soat podi ma a'ōbuyxi — i juk adi o'e Deus jekpot pe. — Ojo'i ma ēn tak soat podi ma edip — i juk adi o'e cebe.

Imēn e'em pima, ixē xe juk ocesop cekawēn cocom. Kabi kadiwi juk o'jekawēn.

— Ite okpot ikukpinat — i juk adi o'e ocewebe.
— Ocokcok cīcā cekay — i juk adi o'e.

¹⁸ Oceju ma kabi kadiwiat oceya'ījojo wuykukukat Jesus xe bima, co'a jeje bima, Jesus ebapukap'a jeje bima.

¹⁹ Kuy juk ocetabut Deus ekawēn muwēnuwēn-'ukayū'ūm'ūm ekawēn kay. Kabi kadiwiat a'ījojo buje bit, biḡ ma juk ocetabut ocesop. Gebum cuy epesop ixeyū'ūm'ūm ekawēn kay. Ixeyū'ūm'ūm ekawēn lâmpada buxim- -kabiok peat puxim. Kabiam pima kabiada jedaebapukpuḡ. Iḡoda buxim Jesus Cristo jajēm waram. Ixe ajēmap wiwim pima, ḡebum cuy epesop cekawēn muwēnuwēn-'ukayū'ūm'ūm ekawēn kay. ²⁰ Deus ekawēn muwēnuwēn-'ukayū jekpiwatpi ḡu apēn ḡuyjom je'bapuk wuywebe iap o'ḡuwēnuwēn- -pūḡ em tak ka'ūma. Wuywebe dak wuyukpiwatpi ḡu iboap ekawēn muwēn put. Gebum cuy epesop iboap kay. ²¹ Jekpiwatpi ḡu juk adi apēn ḡeyjom je'bapuk wuywebe iap o'ḡuwēnuwēn ip. Deus biōḡbuk a'ōbi ma o'ḡuwēnuwēn ip- -Xipat cīcāat a'ōbi.

2 Kuyje Judeuyū parakpe osodop ip jewexe Deus ekawēn muwēnuwēn-'ukayū. Imēnpuxim ḡasū dak warēmtaḡ ma eymutaybitbin-'ukayū jajēm eykay. Napa ma jeymutaybin ip. Xipat'ūmān ip jeymutaybin. Ja'ījojo-'ukayū ḡubu'un ip Jesus kay itabut am. Wuykukukat kuy ikērēat o'ju'uk cebewi ip. Inaka ibu'u je'e ip Deus pe ikērēat uk an jewebewi. Imēnpuye Deus dao ma ixeyū ḡuju ipiatpi'ajojoap kay. Soat em jeedop ip ipiat'ajojom. ² Adeayū bit ixeyū buxim jekpiwatpi ma jekuku ip ikērēat muḡēḡēm. Ixeyū ekukuap co buje, warara'acayū dak napa ma je'e: — Jesus e icēmat e ḡu — i. — Jesus ebekitkit tak ikērēat muḡēḡēm itabut'ūmat co'i — i dak je'e ip napa ma. ³ Jaḡuybi ma ip jekawēn eyweju warēmtaḡ ma eymutaybin am, eyedinheiro kay jeta-bikuap tomuju ma. Napa ma je'e ip eywebe.

— Ikērēat kuḡ ip oxe — i juk adi o'e Deus kuyje ma ixeyū muwēnuwēn.

Deus itanomudipdip ḡu cekay ip. Aḡ ma. Soat com. Ixeyū ḡuju ipiat'ajojoap pe.

⁴ Jekawēn tojtjot'ukayū be ikērēat muḡē buje, Deus ibu'u ḡu osunuy ipiatpi'ajoan cebe ip. Itabotaidabotbot ḡu o'e cekay ip. Ipiat'ajojoap kay ip o'ḡuju. Iboce ma ip taomūnmūn correntebum kabiokboḡ pe. Guyjom Deus soat ideida apēn ijodi bima juk adi oekuku ip iapteim. Xipacat je'ḡūm cedaḡ oekuku'iaiyū be. Ipiat supi'ajoat warēmtaḡ oekuku'iaiyū be bit. Teidadaap kabia wiwim ip. ⁵ Kuyjeayū be ikērēat muḡē buje dak, ibu'u ḡu osunuy ipiatpi'ajoan cebe ip. Itabotaidabotbot ḡu o'e cekay ip. Muba'atxiri o'ḡuajēm ikērēat mujurūḡrūḡ'ukayū muap am. Noé acā o'taxijo yakōmap puxim. Ixe Noé xipat'ūmayū mukūyjom oekukuku muba'at ajēm awap.

— Ikērēat mujurūḡrūḡap cuy epeyepere Deus pe eymucūḡ ām — i'e'em oekukuku.

Ixe badipyū dak o'taxijo. ⁷ beayū o'taxijo.

⁶ — Eyju ikērēat kuḡ oxe — i juk adi o'e Deus. Sodoma ka watwat pe, Gomorra ka watwat pe dak. Daxam ip o'ḡuap. O'ḡuap ip ikērēat mujurūḡrūḡ'ukayū mutaybit am eyju dak ōn jeymuap ma iam. ⁷ Ló bit o'tujujēm Sodoma ka bewi ce'ūap puxim. Ixe Ló cūḡ ma osunuy Deus xe. Yaḡuybabi'ūm osunuy Sodoma ka watwat ikērēat muḡēḡēap cocom puye, ibo ka watwat ikērēat kay acā ḡebumap cocom puye dak. ⁸ Ixe Ló xipat osunuy. Soat kabia yukpiceḡē osunuy jeka watwat ikērēat muḡēḡēap cocom puye, cekawēnkērēap cocom puye dak. ⁹ Wuykukukat itaybit cīcā ja'ōkayayū daxijo am ipiatpi'ajoap puxim. Ja'ō kay'ūm cīcāyū be bit ipiat supi'ajoat. Ixe yaḡuyba'ūm ḡu ixeyū muju am ipiat'ajojoap kay warēmtaḡ ma oekuku ip iap teidadaap kabia be. ¹⁰ Warara'acat podi ma ipiat supi'ajoat jekpiwatpi ikērēat muḡēḡē'ukayū be- ja'ō kay'ūmayū be dak.

Ixeyū warēmtaḡ ma wuymutaybitbin'ukayū isūsūn ḡu ikērēat mujurūḡ ām. Jewexe ip ya'ōbuyxi. Ibuyxin ḡu ip Deus ekawēn tojtjot'ukayū kuḡ. Imuy-muy acā ip. ¹¹ Warēmtaḡ wuymutaybitbin'ukayū bodi

ma ya'òbaca Deus ekawèn tojotjot'ukayū. Ixeyū bodi ma ya'òbuyxi dak ip. Inaka warēmtağ wuymutaybitbin'ukayū muymuy ġu ip Deus etabutpe.

— Teyūku xipat ġu ocexe — i'ūmġu e'em ip Deus pe. — Deus cuy ipiat supi'ajoat cebe ip — i bit e'em ip.

¹² Puca kake yaokaam acā- wuyxan acā. Ixeyū warēmtağ ma wuymutaybitbin'ukayū puca buxim jekpiwan ma jekukum. Itaekat puxim ip jekukum. Jetaybit'ūmap waywayway ip. Puca aokaap puxim Deus ixeyū ġu'ūm. ¹³ Apèn cuk adi ipiat o'supi'ajoat ip warara'acat pe iaptei ideida ip. Ipiat'ajojo am ip ideida. Deus ipiat supi'ajoat cebe ip. Ikērēat muğēğēm ip kabiabun soat etabun. Jemucokcok am ip ikērēat muğēğēm soat em. Isūsūn ġu ip ikērēat mujurūğ ām soat etabutpe. Lokokat puxim ip ikērēat mujurūğrūğ xi ip puye. Eyju Jesus oe'ū wuywebeam iap kay wuyeğebuap'a o'om pima, te'e ma ip jekōnkōn eyweju, ikērēat muğēğē ip jemucokcok am puye. Icockok cīcā ip warara'acat muğuykuku am oceju xipat iam. ¹⁴ Ayacat co'isum ip itabiku cekay. Taobireren'ūma ip xipat'ūmap muğēğēm. Itabutbūcayū muğuykukukum ip. Dinheiro buap kay acā ip ġebum.

— Ipiat osupi'ajoat eywebe — i juk adi o'e Deus ixeyū be.

Cemunēm ām je'e ip iba'ore ipiat'ajoap puxim.

¹⁶ Kawèn cūğat kay ip oibu'un cūğat e dağwi itabidaoat puxim. Balaão ekukuap puxim ip jekukum-Beor ipot ekukuap puxim. Ixe Balaão dinheiro bu ojuy oekukuku xipat'ūmap muğēğēapteim. ¹⁶ Deus pit jumento o'ğuydeat Balaão mukorēm ām, kūyjobit'ūm puye.

— Kūyjobin cuy eğuy Deus a'ō kay — i juk o'e jumento jekukat pe.

Jekukat a'ōm o'jekawèn Deus a'ōbi. Imèn Deus jumento be Balaão o'ğukorēmat. Jekawèn muwēnuwēn'ukat o'ğukorēmat ikērēat kay imubu'unap ojuy.

¹⁷ Idi'a ti'ūmat puxim warēmtağ wuymutaybitbin'ukayū. Kabikerereat puxim tak ip- kabido ixixiğiat puxim. Te'e ma idibi wiwim iap puxim te'e ma dak eyju ixeyū bi bewi icēmat cēmcēmap wiwim.

Deus kabiok cīcāatka o'sukanaē tibira jījāat puxim cebeam ip soat em top am ip. ¹⁸ Cedaḡ ḡu ip kawēn-wēn eyweju, yoboḡan pin ip puye, yakpidapi ip e'em puye dak.

— Xipat ma wuyju Deus xe ikērēat muḡēḡēm wuymucokcok am ma'ḡu wuyju, aoyū kaykay ma'ḡu wuyju — i napa ma e'em ip eywebe.

Imēn ikērēat muḡēḡē'ukayū xewi pu'un ojuyacayū muḡuykukukum ip waram ḡuto warēmtaḡ ceku am.

¹⁹ — Warēmtaḡ ma juy ajeku- -wuyekupinap taḡ.

Deus wuydaxijo ma — i napa ma ip e'em.

Iba'ore cebe ip cedaḡ ma jeku am. Xipacat kay bima, xipacat acā juy aceḡuḡē. Xipat'ūmat kay bima bit, xipat'ūmat acā aceḡuḡē. Iba'ore cebe ip cūḡ ma jeku am xipat'ūmat kay buye. ²⁰ Pūḡpūḡpūḡ ikērēat muḡēḡēap epereperem o'e. Xipacat mu'ūm ojuyayū ekukuap epereperem ip o'e wuykukukat a'ō kay kūy-jobit am- -wuydaxijojo'ukat Jesus Cristo a'ō kay. Ita-but ip o'e cekay. Imēnpit waram ḡuto oibu'un ya'ō kay. Imēnpuye waram ḡuto ikērēat muḡēḡēm ip o'e. Waram ḡuto itabut'ūmat ekukuap puxim ip jekukum o'e. Tadaybot ip osodop kuy bima jetabut awap. Waram ḡuto ikērēat mujurūḡ puje bit, ibodi ma ip tadaybotbot o'e. ²¹ Kawēn cūḡan itaybit'ūm pima, Deus yopīt ma kuka juk ipiat o'supi'ajoat cebe ip ce'ū buje, itaybit'ūm puye. Imēnpit itaybit ip osodop kawēn cūḡan, kuy ip o'ya'ijojo buye. Darem ma ixe ekawēn taḡ oekuku ip- -Deus ekawēn taḡ. Ibo ekawēn ikērē ḡu- -soat taḡ xipat. Inaka waram ip oibu'un. Deus yoboḡ ma ipiat supi'ajoat cebe ip ce'ū buje, cūḡat a'ō kay ip oibu'un puye. ²² Imēn wuyju e'em:

— Cedadat puje akurice waram jedat o'om — i. — Idibi be dajebaro akōm epere buje, jepitpin kaerep kay waram jewemukotektekteḡ kaerep pe — i. Icēmat a'ō kay oibu'un'iyū ixeyū buxim.

3 Oburereyū ikukpinayū, ijudup xepxepatup cartadup wemudupmubararaktup eywebeap-tup. Ijoptupyū otupmubararak eywebe xipacat kay

acā ġebum am. Kuy otupmubararak eywebe eyaġuyba'ūmap puxim waram Jesus Cristo jajēm iap kay. ² Kuyje ma juk adi Deus ekawēn muwēnuwēn'ukayū'ūm'ūm ixe waram jajēm iap o'ġukūyjojo- -soat taġ iisuayū'ūm'ūm. Ġebum cuy epesop ixeyū'ūm'ūm ekawēn kay. Ġasū dak wuykukukat warara'acayū o'ġudot jekawēn muwēn ām eywebe. Wuydaxijojo'ukat o'ġudot ip. Ġebum cuy epesop ixeyū ekawēn kay dak. ³ Āmap kabia bima ikērēat muġēġēxiayū jajēm eykay jemucokcok am ikērēat muġēġē'ukayū. Iboam cuy ōn eymukūyjojom. Cristo waram jajēm iap ip jowayway.

⁴ — “Waram ġuto oajēm eykay,” i te'e ma Cristo juk adi o'e eywebe — i napa ma ip je'e eywebe. — Pu iġuje? — i je'e ip. — Wuyebayū'ūm'ūm pit kuy oe'ū'ū. Inaka oajēm ġu buk — i je'e ip iwayway am. — Ġasū soat ibit ma apēn ipi muġē buje osodop iap co'i ma — i je'e ip Cristo waram jajēm iap wayway am.

⁵ Ja'ōm acā Deus kabi o'ġujurūġ, ipi dak. Idibi ma o'timuwexat ipim. Idibi parakpewi ma ipi o'ġubapuk.

⁶ Idibim tak kuyjeayū o'ġuap- -ipi juayū o'ġuap. Muba'atxiri o'ġuajēm soat muap am. ⁷ Ġasū dak Deus a'ōbi ma kabi jemōġap pe opop Deus a'ōbi. Deus a'ōbi ipi dak opop jemōġap pe ma. Ġuyjom pit ja'ōm ma'ġuto idibi ġu'ūm daxam. Ja'ōm ma ipi dak ġu'ūm. Imu'ūm puje, ipiat supi'ajoat kūyjobit'ūmayū be- -ikērēat mujurūġrūġ'ukayū be. Waram Cristo jajēm iap waywayway'ukayū jekpiwan ma yaġuyba'ūm iboap ekawēn kay.

⁸ Wuykukukat xe bit pūġ kabia mil koato jo'i. Mil koato dak pūġ kabia jo'i cexe. Eyaġuyba'ūm ġu juy epesop iboap kay, oburereyū.

⁹ — Ocepit ma eykay — i juk adi a'ġu o'e wuykukukat.

— Ibun cīcā omuyku — i te'e ma e'em yajēmap waywayway'ukayū bit.

Ixe ibu'u kūyjobit'ūmayū mu'ūm ām. Ibikuy soat pe ikērēat mujurūġrūġap epere am. Imēnpuye ibun omuyku. Yukupceġē ġu wuykuġ.

¹⁰ Imēnpit wuykukukat jajēm. Uk'a iwat aġ'ūm

pima ibukurukat ajēmjēm. Imēnpuxim itabut'ūmayū aḡ'ūm pima, wuykukukat jajēm. Yajēmap kabia be kabi i'ūm. Ya'ōkareyat ipararu jījāat pibun ma i'ūm. Soat kabi beat tak ipik ma. I'ūm. Ipi dak i'ūm--soat ipi daḡat tak. ¹¹ Deus imēn soat ḡu'ūm. Eyetaybit iboam. Imēnpuye ikērēat epeḡuḡē ḡu juy- -pūḡ em tak ka'ūma. Deus a'ō daḡ acā juy epekuku soat kabia. ¹² Deus pe waram Jesus Cristo mudocap kabia juy epejowiwi. Eywebe i'e but iap cuy epe'e'e. Dao ma kuka a'ḡu oajēm. Ixe ajēm puje, kabi ipik. I'ūm. Kabi beat iero je'e taxipap pibun.

¹³ — Kabi iisuat oḡuḡē — i juk adi a'ḡu o'e Deus pit. — Ipi dak wara'at oḡuḡē iisuat — i juk adi a'ḡu o'e. — Cedaḡ ma jekuku'ukayū acā jeedop ipi iisuat pe — i juk adi a'ḡu o'e. Iisuat wiwim cīcā wuyju.

¹⁴ Oburereyū ikukpinayū, ixe ajēmap kabia wiwim wuyju. Imēnpuye ikērēat epeḡujurūḡ ḡu. Deus a'ō daḡ cuy epekuku soat kabia. Imēn eyeku buje, ikērēat kuḡ ḡu epesop Deus etabun. Eysisun ma epesop itabun. Kaba'ūm cuy epesop ixe eju. ¹⁵ Wuykukukat ibun ma omuyku warara'acat taxijo pin puye. Yukpiceḡē ḡu wuykuḡ. Gebum cuy epesop iboap kay. Wuykitpit ikukpinat Paulo dak cuk imēḡaptup o'tupmubararak eywebeaptum Deus kuy ixe o'ḡutaybin puye. Imēn ixe dak cuk adi eymutaybitbin osunuy. ¹⁶ Ixe juk adi wuykukukat jajēm iaptup o'tupmubararak. Pūḡpūḡ ixe emudupmubararaktup peat ekawēn cekawēn pa'arēm. Iba'ore wuywebe wuyekūyjo am. Imēnpuye warēmtaḡ ma itaybit'ūmayū wuymutaybitbin ixe emudupmubararaktup peat ekawēn--itabutbūcayū dak. Wara'atup peat ekawēn warēmtaḡ ma ip wuymutaybitbin Deus ekawēntup peat ekawēn. Imēneju ixeyū ma jemujuat ipiat'ajojoap pe. Soat em ipiat'ajojom jeedop ip je'ū buje.

¹⁷ Oburereyū, eyju bit eyetabutbūt ḡu. Eyetabut cīcā ma. Yoboḡ cīcā eyju eyetabucap kuḡ. Kuy eyetaybit cedaḡ ḡu wuymutaybitbin'ukayū omuyku iam. Imēnpuye eyday'em'um cuy epesop ixeyū be eyumbu'unap puxim kawēn icēmat kay. Deus a'ō kay'ūm cīcā ip. ¹⁸ Biḡ ma juy Jesus Cristo ekawēn taḡ epe-

ku- -wuydaxijojo'ukat ekawēn taḡ. Biḡ ma juy cekawēn taḡ epeku biḡ ma ixē be xipan eykuk am. Biḡ ma juy eyetabun cekay.

— Soat podi ma ēn edipap kuḡ — i juy ace wuydaxijojo'ukat pe- -wuykukukat Jesus Cristo be. Imēn ma wuyju e'em cebe ḡasū. Imēn cuy acece soat em cebe.

Ibūrū ma.

JOÃO EMUDUPMUBARARAKTUP KOAPATUP

1 Joãoyū oceju. Cartadup mubarararaḡ oceju Jesus Cristo muwēn ām eywebe. Ixe ekawēn kay wuyetabut pima, wuyaḡuyisum ajeku ijodi bima. Ixe xe wuyetait acesop wuye'ū buje dak. Ixe itait osunuy ipi mujurūḡ awap. Ixe ekawēn cuk adi oceya'ījojo ijodi bima. Ocetam cuk adi ocejojojo ixe. Icēmān ixe ocejojojo ocetam. Ixe eju ma juk adi oce-kukuku. ² O'jebapuk ocekey. Cebapuk puje, ocejojojo. Imēneju ixe ma oceḡuwēn eywebe. Ixe kay itabucayū yaḡuyisum jekukum ḡasū. Deus xe itait jeedop ip je'ū buje dak. Ixe wuymuisusun soat em Deus xe wuydop am wuye'ū buje. Wuyebay xe osunuy kuyje. ḡasū bit o'jebapuk ocekey. ³ Apēn cuk adi ocejojojo iap muwēnuwēn oceju eywebe. Apēn cuk adi oceya'ī-jojo iap tak imuwēnuwēn oceju eywebe. Iboap muwēnuwēn oceju eywebe dak ocebuxim Deus eju jeburerem am. Oceju Deus eju jeburerem. Ixe ipot eju dak oceju jeburerem ma- -Jesus Cristo eju. Iboap muwēnuwēn oceju eywebe dak ocebuxim ixeyū eju jeburerem am. ⁴ Ijudup mubarararaḡ oceju eywebeaptum eymucokcok am. Wuycokcoksū ḡu ace'e- -wuycokcok cīcā ma. Darem ḡu dak wuycok-coḡ acesop- -soat em ma.

⁶ Deus kabia buxim e'em. Ikērēat kuḡ ḡu ixe. Ka'ūmḡu kabiok Deus xe. Ikērēat o'jukuk ḡu- -pūḡ em tak ka'ūma. Jesus Cristo juk adi iboap o'ḡu-wēnuwēn ocewebe. Iboap ekawēn muwēnuwēn ma oceju dak eywebe. ⁶ "Deus eju jeburerem oceju" i wuyju e'em pima ikērēat mujurūḡrūḡ ma'ḡu wuyju, napa ma wuyju e'em. Cūḡ ḡu dak wuyju jekukum. ⁷ Deus pit ikērēat mujurūḡrūḡ ḡu. Ixe kabia daḡ jekuku'ukat puxim. Cedaḡ ma jekukum. Ixe ekukuap puxim wuyju jekukum pima, jeburerem kuka ajeku wuyewewēju. Pūḡ taḡ ma kuka ajeku. Deus ikērēat uk'uḡ wuywebewi- -soat uk'uḡ. I'uk'uḡ wuywebewi

korosa be ipot o'jedoyekereren puye. Jesus Deus ipot. Ixe wuymuisusun soat tağ.

⁸ "Ikêrêat kuğ ġu òn pit" i'e'em pima, jewemuğuykukukum wuyju. Napa ma wuyju e'em:

— Ikêrêat kuğ ġu òn pit — i.

⁹ Apên cuk adi ikêrêat ağujurûğrûğ ap cuy ağuwên Deus pe. Imuwên puje, ixe ikêrêat ju'uk wuywebewi. Soat ju'uk ikêrêat, ixe soat em apên cuk adi o'e'e iap tağ e'em puye. Cûğ ma ixe wuykuğ. Ixe wuymuisusun soat tağ wuywebe waram ikêrêat kukap puxim.

¹⁰ — Soat ipi juacat ikêrêat mujurûğrûğ — i'e'em Deus.

Wuyju e'em pima:

— Òn pit ikêrêat mujurûğrûğ ġu — i; — Deus napa ma e'em — i dak wuyju e'em.

Imên e'em pima, wuybinünpe ġu Deus ekawên òm-òm.

2 Bekitkit, cartadup mubarararağ òn eywebeaptum eywebe ikêrêat mujurûğrûğap puxim. Wuywebe ikêrêat mujurûğ puje bit, wuywebeam Jesus Cristo kawênwên wuyebayat eju. Ixe Jesus Cristo soat podi ma cûğ ma. ² Ixe ma oe'û ikêrêat muğğēap teida am. Imên puye Deus ikêrêat uk'uğ wuywebewi.

— Wuywebewi acā — i'ûmğū òn pit e'em. — Soat pewi ipi juacayū bewi ixe ikêrêat uk'uğ — i òn e'em.

³ Deus ekawên kay kûyjobit pima dak, wuyetaybit ma wuyju Deus bureyū iam. ⁴ Ixe ekawên kay kûyjobit'ûmat pit napa ma e'em:

— Deus bure òn — i.

İcēm ġu e'em kûyjobit'ûm puye. ⁵ · ⁶ Ixe ekawên kay kûyjobicayū bit warara'acat kayap podi ma Deus kay ip. Cekawên kay kûyjobin pima, wuyetaybit acesop Deus eju mûğ'i wuyju jekukum iam. "Deus eju mûğ'i oceju jekukum" i wuyju e'em pima, Jesus Cristo ekukuap puxim cuy ajeku. Ixe

ekukuap puxim jekukum pima, wuyetaybit acesop Deus eju mûg'i wuyju jekukum iam.

⁷ Oburereyū ikukpinayū, apên cuk adi ocece eywebeaptum. Iboap ekawên kawên iisuat ġu. Kuy bima juk adi iboap ekawên epeya'ijoyo- xipan cuy epeyewekuk iap ekawên. ⁸ Iboap ekawên kawên iisuat puxim o'e Jesus ekukuap co buje. Ixe ekukuap kay ġebum pima, wuyetaybit ace'e iboap ekawên. Iboap ekawên icēmân. Jesus Cristo iboap ekawên taġ oekukuku- xipan soat kuġ ijodiacat kuġ. Jesus kabia buxim. Ixe ekawên taġ jekuku'ukayū kabia daġ jekuku'ukayū buxim. Ixe ajēm puje, kabiokat kapkam iap puxim, ixe ekawên taġ jekuku'ukayū ade buye.

⁹ Jekitpit kay itakomaat napa ma e'em: — Deus ekawên taġ ôn jekukum — i, ikêrêat mujurūġrūġ'uk puye. Kabiok taġ jekuku'ukat puxim ixe. ¹⁰ Wuyxe wuykitpit ikukpin pima, Deus ekawên taġ wuyju jekukum. Soat ekawên taġ jekuku'ukat kabia daġ jekuku'ukat puxim. Imēnpuye ikêrêat mujurūġrūġan ġu warara'acat pe. ¹¹ Jekitpit kay itakomaat pit kabiok taġ jekuku'ukat puxim. Kabiok taġ jekuku'ukat itaybit ġu poma oju iam. Imēnpuxim jekitpit kay itakomaat warēmtaġ jekukum Deus kay kūyjobit'ūm puye.

¹² Bekitkiyū, eyju'in ġaxīn ma juk eyetabut Jesus kay. Ijudup mubarararaġ ôn eywebeaptum ġasū eywebewi Deus ikêrêat o'ju'uk puye. O'ju'uk Jesus Cristo oe'ū buye. ¹³ Baybayū, eyju'in cuk kuyje ma eyetabut Jesus kay. Ijudup mubarararaġ ôn eywebeaptum eyju Jesus Cristo bureyū buye. Ixe Jesus Cristo ipi mujurūġ'isum itabêġ osunuy. Tapupuyū, eyju'in ġasū ma eyetabut Jesus kay. Ijudup mubarararaġ ôn eywebeaptum kuy juk ikêrêat mujurūġrūġ'ukayū kukukat a'ôbacaap epeġu'ūm puye- -soat podi ma ikêrêat kukukat a'ôbacaap epeġu'ūm.

¹⁴ Warara'acayū ey'in kuy ma eyetabun. Ijudup mubarararaġ ôn eywebeaptum eyju Jesus Cristo bureyū buye. Ipi mujurūġ awap ixe itabêġ osunuy. Warara'acayū ey'in kapusukuruy eyetabun. Ijudup mubarararaġ ôn eywebeaptum eya'ôbaca buye. Soat em

eyju ġebum Deus ekawēn kay. Soat podi ma ikērēat kukukat a'ōbacaap epeġu'ūm- -ikērēat mujurūġrūġ-'ukayū kukukat a'ōbacaap epeġu'ūm.

¹⁵ - ¹⁶ Deus kay itakomaayū ibikuy jījā ikērēat mujurūġ ām. Jeakaġ cīcā ip ikērēat kay. Imēnpuye itabikuku jījā ip ikērēat kay. Yoboġan pin ip adeayū xe. Imēn jekukum pima wuyebayat bikuyap taġ ġu epeku- -itabut'ūmat ekukuap taġ acā. Imēne-ju eyetabikukum ġu juy epesop Deus kay'ūmayū emumutabikukunap kay. Ixeyū ekukuap puxim ġu juy epeku. Ixeyū ekukuap puxim eyeku pin pima, wuyebayat ikukpin ġu eyxe. ¹⁷ Itabut'ūmayū e'eap i'ūm. Iteyū emumutabikukunap tak i'ūm. Deus bikuyap taġ jekuku'ukayū bit i'ūm ġu. Soat em itabēġ jeedop ip Deus xe.

¹⁸ Bekitkit, ġaxīn ma soat i'ūm. Cristo kay itakoma jījāat omuyku iap awēġ kuy epeyawēġcoco. Cristo kay'ūmayū kuy o'jebapuk ijodi- -ade. Imēnpuye wuyetaybit ġaxīn ma ipi i'ūm iam. Cristo soat kukukan iap kabia omuyku. ¹⁹ Ixeyū Cristo kay'ūmayū o'jēm wuyxewi. Wuykadiayū ġu ip osodop- -wuykadi'ūmayū ma. Imēnpuye o'jēm ip wuyxewi. Wuykadiayū bima kuka adi oibu'un ġu ip wuyxe. Ibu'un'ūm pima wuyxe ma kuka adi ip osodop. Imēnpit o'jēm ip wuyxewi. Imēnpuye wuyetaybit wuykadi ġu teyūku iam.

²⁰ Deus Ibiōġbuk xipacat cuk o'ġuōm eywebe Cristo kay eyetabucap tomuju. Imēnpuye soat eyju eyetaybit kawēn icēmān. ²¹ Kawēn icēmān itaybit-'ūmayū ġu eyju. Ijudup mubarararaġ ōn eywebeap-tum eyetaybit puye kawēn icēmān. Napa e'e'ukat pi bewi ġu kawēn icēmān cēm cēm. Eyetaybit iboam.

²² Abuyū dapxiyū iap oġuwēn eywebe. "Jesus Deus emunaē ġu" i'e'e'ukayū dapxiyū. "Deus Jesus ebay ġu" i'e'e'ukayū dapxiyū, "Jesus Deus ipot ġu" i'e'e'ukayū dak. Ixeyū Cristo kay itakoma jījāayū. ²³ Adeayū etabutpe "Wetabut ġu Jesus Deus ipot iap kay" i'e'e'ukayū Deus bureyū ġu. Adeayū etabutpe

“Wetabut Jesus Deus ipot iap kay” i'e'e'ukayū bit Deus burem e'em.

²⁴ Kawēn idipat cuk epeya'ījojo eyetabut'isum. Iboap ekawēn taḡ cuy epeku. Iboap ekawēn taḡ jekukum pima, Cristo eju mūḡ'i epekuku soat em- -cebay bikuyap taḡ tak.

²⁵ — Eyaḡuyisum eyju jekukum ijodi bima — i juk adi o'e Cristo wuywebe. — Soat em Deus xe eye-tait epesop eye'ū buje dak — i juk adi o'e Cristo wuywebe.

²⁶ Itabut'ūmayū ma eymuḡuykukuku ojuy jekukum. Imēnpuye ijudup mubarararaḡ ōn eymukūyjoaptum. ²⁷ Eyju bit Deus biōḡbuk kukayū Cristo Deus biōḡbuk o'ḡuōm eywebe buye. Ixe biōḡbuk nuynuy eywebe. Imēnpuye:

— Ocemutaybitbin'ukat cuy eḡudot oce kay — i'ūmḡu juy epe'e'e.

Eywebe dopdop'ukat acā eymutaybitbin soan. Napa ḡu xeku eymutaybitbin- -icēmān.

— Deus biōḡbuk pe eymutaybitbinap taḡ cuy epekuku — i ōn e'em eywebe.

Cristo eju mūḡ'i dak cuy epekuku.

²⁸ Bekitkit, soat em cuy Cristo eju mūḡ'i epeku. Ixe waram je'bpuk ijodi. Ixe eju mūḡ'i jekukum pima, wuya'ōcam acesop ixe ajēm puje. Wuysūsūn ḡu acesop ixe ajēm puje. Acejemunēm ḡu cebuxim.

²⁹ Eyetaybit Deus cūḡ ma iam. Imēnpuye eyetaybit cūḡ ma jekuku'ukayū ixe ebekitkiyū iam.

3 Gebum cuy epesop wuyebayat xe wuykukpin cīcā iap kay. Deus e'em wuywebe:

— Webekitkit eyju — i.

İcēmān Deus ebekitkit wuyju. Deus kay'ūmayū bit itaybit ḡu Deus ebekitkit wuyju iam, Jesus Deus ipot iam itaybit'ūm ip puye. ² Oburereyū ikukpinayū, ḡa-sū wuyju Deus ebekitkit. Wuyetaybit ḡūḡūn ma apēn ḡuyjom acesop iam. Waram Cristo ebapuk puje bit, ixe jo'iaiyūm acesop. Wuyetaybit ace'e apēn ixe

omuyku iam, ixe ajojojo buye. Ixe jo'iyūm acesop ixe ajojojo buye. ³ Cristo jo'i acesop iap wiwim cīcā wuyju. Cristo ikērēat kuḡ ḡu. Ikērēat o'jukuk ḡu-pūḡ em tak ka'ūma. Soat taḡ iisu. Imēnpuye wuyju dak wuybu'u ikērēat mujurūḡ ām. Wuyaḡuyisum cuy ajeku.

⁴ Ikērēat mujurūḡrūḡ'ukat kūyjobit ḡu Deus a'ō kay. Ikērēat mujurūḡrūḡap Deus a'ō kay kūyjobit-ūmap co'i. ⁵ Cristo o'jebapuk wuykay ikērēat uk am soat pewi ijodiacat pewi. Eyetaybit iboam. Ixe bit ikērēat kuḡ ḡu. Ka'ūmḡu ikērēat cebe. ⁶ Cristo eju mūḡ'i jekuku'ukatibun ḡu jekukum ikērēat mujurūḡrūḡ. Ikērēat mujurūḡrūḡ'ukat pit itabut ḡu o'e Cristo kay. Ibu'u jījā mabuk Cristo a'ō daḡ jeku am.

⁷ Bekitkit, eyday'em'um cuy epesop itabut'ūmayū be eymuḡuykukuap puxim. Cūḡ ma jekuku'ukayū ma cūḡ ma Deus xe Cristo buxim. ⁸ Ikērēat mujurūḡrūḡ'ukayū bit Satanás ebekitkit-ibiōḡbuk kērēayū kukukat ebekitkit. Ixe Satanás ikērēat mujurūḡrūḡ'uk osunuy ipi mujurūḡ'isum. Deus ipot osodot ijodi ixe e'eap mu'ūm ām.

⁹ Deus ebekitkitibun ḡu jekukum ikērēat mujurūḡrūḡ, Deus biōḡbuk nuynuy cebe ip puye. Iba'ore cebe ipibun ikērēat kuk am Deus ixeyū ebay buye. ¹⁰ Ibapuk cīcā wuyxe abuyū Deus ebekitkit iap, abuyū Satanás ebekitkit iap tak. Cūḡ ḡu jekuku'ukayū Deus ebekitkit ḡu. Warara'acat kay itakomaayū dak Deus ebekitkit ḡu ip.

¹¹ — Xipan cuy epeyewekuk — i ōn e'em eywebe.

Jesus Cristo kay eyetabut'isum cuk iboap ekawēn epeya'ījojo. ¹² Caim ekukuap puxim ḡu juy ajeku. Ixe Caim ikērēat mujurūḡrūḡ'ukayū kukukat ebekit osunuy- -Satanás ebekit. Ixe jekitpit'ūm o'yaoka. Caim ma cekawēnkērē osunuy. Ikitpit pit cekawēntip osunuy. Imēnpuye Caim itabutkarey o'e jekitpit kay. Imēnpuye o'yaoka.

¹³ Okitpitpiyū, itabut'ūmayū itakoma eykay bima, "Pēnpuye xe'e itakoma ip wuykay?" i'ūmḡu juy

epe'e eyewewebe. ¹⁴ Ipiat'ajojoap kay cumayū eku-kuap puxim ġu wuyju jekukum. Wuyaġuyisum ma wuyju jekukum. Wuyxe warara'acat ikukpin-itabucat. Imēnpuye wuyetaybit aceju ġu ipiat'ajojoap kay iam. Ikērēm warara'acat kukuk'ukat pit yaġuyisum ġu jekukum. Imēnpuye ixē je'ju ipiat'ajojoap kay. ¹⁵ Jekitpit kay itakomaat ikērēat kuġ Deus xe wara'acat o'yaokaiat co'i. Ikērēat mujurūġap epe-re'ūm pima, warara'acat o'yaokaiat yaġuyisum ġu jekukum ijodi. Eyetaybit iboam. Deus xe ġu jeenuy je'ū buje dak. ¹⁶ Cristo oe'ū wuye'ūap puxim. Imēnpuye wuyetaybit Cristo xe wuykukpin cīcā iam. Wuyju dak wuybu'un ġu juy ajop wuye'ū ām warara'acat e'ūap puxim-itabucat e'ūap puxim ixeyū ikukpin wuyxe buye. ¹⁷ Wuyju dak wuyetabotaidabotbon cuy ajop ibubut'ūmayū kay-itabucayū kay-wuykitpit-piyū kay. Wuybubut ade bima, i'in cuy aġūm ixeyū be. Iūm ām wuybu'u bima bit, te'e ma wuyju e'em "Deus ikukpin ocexe" i. ¹⁸ Bekitkit, warara'acat puywan'ūm pima, te'e ma kuka ace cebe ip "Eyukpin oxe" i. Icēmān warara'acat ikukpin wuyxe bima, xipan cuy ixeyū ajukuk, wuybubut'in tak cuy aġūm cebe ip.

¹⁹ Xipan warara'acat kuġ pima, wuyetaybit kawēn icēmat taġ wuyju jekukum iam. Imēnpuye:

— Kawēn icēmat taġ paxi juk adi oceku? — i'ūmġu ace'e Deus pe cetabutpe bima.

Imēnpuye wuypararam ġu ajop ixē etabixē bima. ²⁰ Ikērēat mujurūġ puje dak, "Oceju ikērēat kuġ Deus xe" i wuyju e'em wuywebe ma. Deus pit wuyetaybicap podi ma itaybit. Ixē itaybit teyūku ibu'u o'e ip ikērēat mujurūġ ām iam. Imēnpuye:

— Oceju ikērēat kuġ Deus xe — i'ūmġu juy ace. Wuypararam ġu juy ajop Deus etabutpe. ²¹ Oburereyū ikukpinayū, ikērēat kuġ paxi wuyju iap kay wuyaġuykoreren'ūm pima, wuya'ōcam cuy ajop Deus etabixē. ²² Ixē xewi wuyemukaypinut acejat. Ixē ekawēn kay kūyjobit pima, kuka wuyemuojuyjuy acejat cexewi ixē bikuyap taġ jekukum pima dak.

²³ — Eyetabun cuy epesop okpot kay- -Jesus Cris-

to kay — i'e'em Deus wuywebe. — Ikukpin cuy epeyewekuk — i dak.

Imên Deus e'em wuywebe. Imên Cristo dak cuk adi o'e wuywebe. ²⁴Deus ekawên kay kūyjobicat Deus eju mūg'i jekukum. Deus tak jekukum mūg'i ceweju ip- -jebekitkiyū eju. Ixe jebiōgbuk o'gūōm wuywebe. Wuyetaybit Deus soat em jekukum mūg'i wuyweju iam ibiōgbuk nuynuy wuywebe buye.

4 Oburereyū ikukpinayū, wuymuḡuykukuku-
'ukayū omuy soat kaka daḡ- -ade. Imên-
puye soat ekawên kay bit eyetabun ḡu juy epesop-
"Deus biōgbuk omuy ocewebe" i'e'e'ukayū ekawên
kay. Koap eya'ōpicūḡcūḡ cīcā juy epesop ixeyū eka-
wên kay.

— Deus ekawên taḡ paxi ite wuymutaybitbin-
cekawên taḡ ḡu xe'e? — i juy epe'e eyewewebe.

— Deus biōgbuk omuy ocewebe — i'e'em ip
napa ma.

²Eyetaybit put abuyū ixeyū'in Deus a'ōbi wuymu-
taybitbin iam, abuyū ixeyū'in jekpiwatpi wuymutay-
bitbin iam tak. "Jesus Deus emunaē" i'e'e'ukayū
Deus a'ōbi wuymutaybitbit'ukayū, "Jesus ijodian
o'e" i'e'e'ukayū dak. Deus biōgbuk omuy ixeyū be.
³"Jesus ijodian ḡu o'e" i'e'e'ukayū bit Deus a'ōbi
ḡu wuymutaybitbin- -ja'ōbi acā. Deus biōgbuk nuyn-
nuy ḡu cebe ip. Cristo kay itakoma jījāat a'ōbi ixeyū
wuymutaybitbin. "Ḡaxīn ma Cristo kay'ūm cīcāat
omuyku" iap awēḡ kuy juk epeyawēḡcoco. Kuy ijodi
ma omuy.

⁴Bekitkit, Deus ebekitkiyū eyju bit. Cristo
kay'ūm cīcāat itabut'ūmayū kukat. Ixe ya'ōbaca.
Deus biōgbuk pit ixē bodi ma ya'ōbaca- -eywebeat.
Imēneju jewexe Deus ekawên muwēnuwēn'ukayū a'ō-
bacaap kuy epeḡu'ūm. ⁵Apēn itabut'ūmayū e'e am
ma ip kawēnwēn soat em jewexe Deus ekawên mu-
wēnuwēn'ukayū. Itabut'ūmayū ixeyū ekawên kay

jijã, itabut'ũmayũ kukukat kadi ip puye. ⁶Wuyju bit Deus kadiayũ. Deus bureyũ wuyekawên coco'uk. Deus bure'ũmayũ bit wuyekawên coco'uk ġu. Imêneju wuyetaybit abuyũ Deus biôġbuk a'ôbi icēmãn wuymutaybitbin iam, abuyũ cedaġ wuymutaybitbin iam tak.

⁷Oburereyũ ikukpinayũ, Deus ibikuy wuywebe xipan jewekuk am. Imēnpuye xipan cuy acewewuk. Xipan warara'acat kukuk'ukayũ Deus ebekitkit. Deus bureyũ ixeyũ. ⁸Deus xe soat ijodiat ikukpin. Jekpi-watpi ma wuykay. Imēnpuye ikukpin warara'acat kuġ'ũm pima Deus burem ġu kuka ace. ⁹Wuykay jekpot mudot puje, Deus jexe wuykukpinap o'ġubapuk wuywebe. Pũġ ma Deus ipot. O'ġudot ijodi wuykay soat em wuyetait wuydop am cexe wuye'ũ buje. Imēneju wuyetaybit wuykukpin cĩcã Deus xe iam. ¹⁰Wuyxe Deus ikukpin ġu osunuy kuyje. Ixe xe bit wuykukpin cĩcã ajop. Imēnpuye jekpot o'ġudot wuykay. O'ġudot ikērēat uk am wuywebewi. Deus ikērēat uk'uġ wuywebewi ipot oe'ũ buye. Oe'ũ ikērēat muġēġēap teida am.

¹¹Oburereyũ ikukpinayũ, Deus xe wuykukpin cĩcã ajop. Imēnpuye wuyju dak xipan cuy acewewuk. ¹²Wuywebe Deus ijo ba'ore. Xipan jewekuġ pima, Deus wuyweju mũġ'i jekukum. Deus wuyweju mũġ'i jekukum pima, xipan warara'acat ajukuk apên Deus xipan wuykuġ iap puxim. ¹³Deus cuk jebiôġbuk o'ġuôm wuywebe. Imēnpuye wuyetaybit Deus eju mũġ'i wuyju jekukum iam, ixe wuyweju mũġ'i jekukum iam tak. ¹⁴Deus ipot e'eap cuk adi ocejojojo. Imēnpuye:

— Deus jekpot o'ġudot wuydaxijo am--soat taxijo am--ipi watwat taxijo am — i oceju e'em soat pe.

¹⁵Wuybisũn'ũm pima "Jesus Deus ipot" i'e am warara'acayũ be, soat em Deus jekukum wuyweju; wuyju dak soat em jekukum ceweju--Deus eju.

¹⁶Deus jekpot o'ġudot wuydaxijo am. Imēnpuye wuyetaybit Deus xe wuykukpin cĩcã iam. Wuyetabut tak Deus xe wuykukpin cĩcã iap kay.

Soat ipi watwat ikukpin Deus xe. Xipan warara'acat kuḡat Deus eju mūḡ'i jekukum. Deus tak jekukum mūḡ'i ceweju. ¹⁷ Deus eju mūḡ'i jekukum pima ixe buxim wuyju dak xipan warara'acat ajukuk. Deus ipiat supi'ajoat kūyjobit'ūmayū be ikērēat mujurūḡrūḡ'ukayū be. Ipiat'ajoan pima wuypararam ḡu acesop ixe etabixe. Wuya'ōcam acesop cetabixe. Ijodi bima Cristo ekukuap puxim wuyju dak jekukum puye, wuya'ōcam acesop cetabixe. ¹⁸ Wuyxe warara'acat ikukpin pima, wuypararam ḡu kuka ace Deus etabixe. Deus buxim ikukpin warara'acat kuḡ pima bit, wuypararaap ajukuk ḡu wuyweju. Wuyparara bima bit:

— Ipiat supi'ajoat xe'e Deus wuywebe? — i kuka ace wuywebe ma.

Wuyparara bima, iba'ore wuywebe Deus puxim warara'acat kuk am ikukpin.

¹⁹ Kuyje Deus xe wuykukpin cīcā ajop. Imēnpuye wuyju dak ḡasū wuyxe Deus ikukpin cīcā, warara'acayū dak ikukpin wuyxe. ²⁰ Warara'acat kay itabucat kay wuyetakoma bima, napa ma wuyju e'em:

— Deus ikukpin oxe — i.

Ka'ūma ma Deus o'jojoko buk. Deus ma ijojom ḡu wuyju. Wuyxeacat pit ijojom soat em. Wuyxe wuyemumujoyū ikukpin'ūm pima, iba'ore wuywebe ikukpin wuyemumujojō'ūm kuk am.

²¹ — Deus ikukpin eyxe bima, xipan cuy eykitpitpiyū dak epejukuk — i juk adi o'e'e Cristo wuywebe.

5 Jesus Deus emunaē iap ka, itabucayū Deus ebekitkiyū. Wuyxe bekitkiyū ebay ikukpin pima, ixe ebekitkiyū dak ikukpin ma wuyxe. ² Wuyxe Deus ikukpin pima, ixe ekawēn taḡ jekukum pima dak, wuyetaybit acesop wuyxe Deus ebekitkiyū ikukpin iam. ³ · ⁴ Soat pe Deus ebekitkit pe Deus kay'ūmayū a'ōbacaap mu'ūm put. Wuyju itabut'ūm-

ayū a'ōbacaap mu'ūmu'ūm Jesus kay wuyetabut puye. Iba'ore ġu wuywebe kūyjobit am ya'ō kay, ixe a'ōbacaap kuġ puye. Deus wuyxe ikukpin pima, cekawēn taġ ajeku. Deus ikukpin wuyxe bima, "O-cebu'u ixe ekawēn kay kūyjobit am," i'ūmġu kuka ace. ⁶ Abu-be Deus kay'ūmayū a'ōbacaap mu'ūm put? Jesus Deus ipot iap kay itabucayū be acā.

⁶ Jesus Deus emunaē ma. Ixe Jesus oajēm Deus bikuyap taġ jeku am. Imēnpuye soat em kūyjobit osunuy Deus a'ō kay. Imēnpuye idibi be o'jewemubatisanat. Oe'ū korosa be. O'jedoyekereren korosa be soat em wuydop am Deus xe. Soat em ma Deus emunaē osunuy. Je'ū buje dak Deus emunaē osunuy. Ġasū dak Deus emunaē. ⁷⁻⁸ Ixe Jesus oajēm wuymutaybit am "Ōn Deus ipot" iam. Wuyetaybit ixe Deus ipot iam apēn ixe idibi be o'jewemubatisanat iap kay ġebum pima, apēn ixe o'jedoyekereren iap kay dak. Cewemubatisanap acā ġu wuymutaybitbin icēmān Jesus Deus ipot iam. Cedoyekererenap tak iboam wuymutaybitbin. Deus biōġbuk tak wuymutaybitbin Jesus Deus ipot iam. Ixe biōġbuk icēmān e'em wuywebe. ⁹ Ijodiacat Jesus Deus ipot iap muwēnuwēn wuywebe. Wuyetabut ixeyū ekawēn kay. Deus tak Jesus okpot iap o'ġuwēnuwēn wuywebe. Ijodiacayū e'eap podi ma icēmān Deus e'em. Imēnpuye wuyetabun cuy ajop ixe ekawēn kay. ¹⁰ Deus o'e:

— Jesus okpot icēmat — i.

Ixe ipot kay itabucat e'em jewebe ma:

— Cūġ ma o'e owebe wetabut am Deus ipot kay — i.

Deus kay itabut'ūmat pit napa ma e'em: — Deus dapxi — i. Tūybe Deus dapxi iān e'em itabut'ūmat, Deus e'eap kay itabut'ūm puye—"Jesus okpot" i'e'eap kay itabut'ūm puye.

¹¹ — Eyaġuyisum epeku ijodi bima okpot oe'ū eywebeam puye — i'e'em Deus soat pe wuywebe. — Soat em eyetait epesop oxe eye'ū buje dak — i'e'em wuywebe.

¹² Ipot kay itabucayū ma yaġuyisum jekukum ijodi Soat em Deus xe itait jeedop ip je'ū buje dak. Ita-

but'ūmayū bit yağuyisum ġu jekukum ijodi. Soat em Deus wi wūy ma jeedop ip ce'ū buje dak.

¹³ Eyetabut Deus ipot kay. Imēnpuye eyağuyisum eyju jekukum ijodi bima. Eye'ū buje dak soat em eyetait epesop Deus xe. Ijudup mubarararağ ōn iboam eymutaybit am. ¹⁴ Deus eju wuyju kawēnwēn. Ixe bikuyap tağ cexewi iojuyjuy bima, ixe wuyekawēn cocom. Wuyetaybit iboam. Imēnpuye wuyparara ġu kawēn âm ceweju. Ijudup mubarararağ ōn eymutaybit am iboam. ¹⁵ Wuyetaybit ixe soat em wuyekawēn cocom iam. Wuyekawēn cocom cexewi wuyju iojuyjuy bima. Imēnpuye wuyetaybit ixe xewi wuyemukaypin ajat iam.

¹⁶ - ¹⁷ Wuykitpit pe ikērēat mujurūğ puje, acekawēn cuy Deus eju ixe beam. Deus iboap ju'uk cebewi ikērēat. Ixe soat em itait jeenuy Deus xe ce'ū buje. Cūğ ġu wuyju jekukum pima ikērēat mujurūğrūğ wuyju Deus xe. Pūğ pit ikērēan jijā Deus xe ikērēat mujurūğrūğap. Wara'at podi ma ikērē cexe. Wuybure iboap muğēğēm pima, ikērēat muğēğēm pima, "E-peyekawēn cuy Deus eju ixe beam," i'ūmğu ōn e'em eywebe. Iboap muğēğēxiat soat em ipiatpi'ajojom jeenuy. Deus wi wūy ma jeenuy ce'ū buje dak.

¹⁸ Deus ebekitkiyūibun ġu ikērēat mujurūğrūğ Deus ipot ağ ip cekay buye. Ikērēat mujurūğrūğ'ukayū kukukat pe Deus ebekitkit kuk pa'ore, Deus ipot ağ ip cekay buye.

¹⁹ Wuyetaybit Deus a'ō kay wuyju iam. Warara'acayū bit ikērēat mujurūğrūğ'ukayū kukukat a'ō kay acā- itabut'ūmayū.

²⁰ Wuyju acā wuyetaybit Deus ipot kuy oajēm ijodi iam. Ixe juk adi wuymutaybitbin oeku apēn Deus omuyku iam. Imēnpuye wuyetaybit apēn Deus omuyku iam. Ixe acā Deusat. Soat em Deus eju mūğ'i wuyju jekukum- -cūğat eju. Ixe ipot eju dak mūğ'i wuyju jekukum- -Jesus Cristo eju. Ixe acā Deusat. Ixe eju mūğ'i jekuku'ukayū yağuyisum jekukum ijodi. Soat em itait jeedop ip Deus xe ce'ū buje dak.

²¹ Bekitkiyū, eyetabun ġu juy epešop Deus pabi
kuġ ojuyacat kay!
Ibūrū ma.

JOÃO EMUDUPMUBARARAKTUP IPIDASEATUP

¹ Tū'ū, ijudup mubarararaḡ òn ewebeaptum, e'iyū beaptum tak. Jesus kay itabucayū kukukat òn. Eykukpin oxe. Warara'acayū xe dak eykukpin-soat xe. ² Eykukpin ocexe, wuyju kawēn icēmat kay buye. Soat em wuyju ḡebum iboap ekawēn kay. Wuyaḡuy-ba'ūm ḡu iboap ekawēn kay. Soat em iboap ekawēn taḡ ajeku.

³ — Bay, xipan cuy wuykuk — i òn e'em Deus pe-wuyebay be, Jesus Cristo be dak-Deus ipot pe. — Etabotaidabotbon cuy eḡuy wuykay — i òn e'em cebe. — Wuyaḡuymubabibin cuy eḡuy — i òn e'em cebe.

Wuyju kawēn icēmat taḡ jekukum pima, imēn ip wuykuḡ, xipan warara'acat kuḡ pima dak.

⁴ E'iyū ekukuap awēḡ oyawēḡtobuxik. Pūḡ ḡu ixeyū'in kawēn icēmat taḡ jekukum-wuyebay be wuyawēwēap ekawēn taḡ. Ocokcok cīcā oce ixeyū awēḡtobuxik puje.

⁵ — Tū'ū ikukpinat, xipan cuy epeyewekuk — i òn e'em ewebe.

Iboap ekawēn kawēn iisuat ḡu-kawēn kuyat. Kuy bima xipan cuy epeyewekuk iap ekawēn aya'ījojo-Jesus kay wuyetabun'isum. ⁶ Xipan cuy epeyewekuk iap ekawēn kuy epeya'ījojo Jesus Cristo kay eyetabun'isum. Xipan jewekuḡ pima Deus ekawēn taḡ tak kuka ajeku.

⁷ Wuymuḡuykuku'ukayū o'jepōḡpōḡpōḡ soat kaka daḡ.

— Jesus Cristo ijodian ḡu o'e — i'e'em ip. Imēnie'e'ukat wuymuḡuykukuku'ukat. Cristo kay itakoma jījā ip. ⁸ Imēneju eyday'em'um cuy epesop ixeyū be eymuḡuykukuap puxim. Ixeyū be eymuḡuykuku buje, eyekapikapte i epejat ḡu Deus xewi. Eymuḡuykuku'ūm pima bit, Deus jeymucokcoḡ cīcā eywebe eyekapikapte ūm puje-soatei ūm puje.

⁹ Cristo be wuymutaybitbinap kay'ūmayū ma

Deus bikuyap tağ ġu jekukum- -wara'at tağ acá. Deus bure ġu ip. Itabut ġu ip Deus kay. Cristo be wuymutaybitbinap tağ jekuku'ukat pit pūğ tağ ma jekukum Deus eju. Deus tak pūğ tağ ma jekukum ixeyū eju. Deus ixeyū bure e'em. ¹⁰ Cristo ekawēn imutaybitbin'ūmat a'ō kay ġu juy epesop. Ixeyū juy epeğūōm ġu eyduk'a be, eykay yajēm puje ip.

— Deus xipan cuy jeykuk — i'ūmğū dak cuy epe'e cebe ip eyxewi ijēm puje.

¹¹ Wuyduk'a be ixeyū muōm puje, wuyju dak ixeyū bureyūm kuka acesop ikērēat muğēğēm.

¹² Soat muwēn pin puk ōn eywebe. Imēnpit obu'u oce soat muwēn ām eywebe taperadup pe. Cu oju bit a'ğū ōn eyka be eyjom kawēn ām eyweju. Kawēnwēn pima, wuycokcokap yoboğ je'e.

¹³ Ekibit iyū kato mujujum eywebe. Ekibit tak Deus emunaē. Ijudup mubarararağ ōn eywebeaptum. Ibūrū ma.

JOÃO EMUDUPMUBARARAKTUP KANOMŪMATUP

¹ Gaio, ijudup mubarararağ òn ewebeaptum. Jesus kay itabucayū kukukat òn. Ekukpin oxe icēmat a'ō kay wuyetabut puye.

² Obure ikukpinat, ewebeam òn kawēnwēn Deus eju.

— Bay, xipan cuy Gaio ejukuk iwātaxipinap puxim — i òn e'em cebe.

Wetaybit etabut cīcā Jesus kay iam, kuy juk awēğ oyawēğtobuxik puye. ³ Wuykitpitpiyū'in oajēm okay-exewiayū. Awēğ ip o'yawēğmuwēn owebe.

— Gaio soat em kawēn icēmat tağ jekukum — i juk o'e ip owebe. — Cūğ ma ixe jekukum — i juk o'e ip owebe.

Ocokcok cīcā oce awēğtobuxik puje. ⁴ Ebekitkiyū kawēn icēmat tağ jekukum iap awēğ tobuxik puje, soat podi ma ocokcok oce.

⁵ Obure, ekukpin oxe. Ēn xipan wuykitpitpiyū kuğ wara'at ka watwat ma'ğu ip. Cūğ ma ewebe xipan ixeyū kuk am.

⁶ — Gaio juk adi xipan cīcā ocekek — i juk o'e ip itabucayū-exewi oajēmiayū.

Exewi waram ijēm pin pima wara'atka kay iju am, ibuibibuğ ğu juy ip eğuju. Imēn cūğ ma Deus xe, Deus peam kapikpiğ ip puye. ⁷ Cēmcēm ip Cristo muwēn âm acā. Itabut'ūmayū ğu iūmūm cebe ip ibubun-itabucayū acā. ⁸ Imēneju ixeyū buywan cuy ace-wuyju ma, itabucayū. Kawēn icēmat muwēn âm ip cum. Ibuywatwan pima, Deus xe wuyju dak kawēn icēmat muwēnuwēnat puxim cum ğu ma'ğu wuyju ixeyū eju.

⁹ Carta yopīcat kuy otupmuju ekay exe itabucayū beaptum. Diótrfes pit itabucayū kukat ojuy o'e warara'acayū xe-itabucayū xe. Ixe Diótrfes kūyjobit'ūm wa'ō kay. ¹⁰ Imēnpuye apēn ixe Diótrfes cuk adi xipan ğu wawēğ o'ğuwēnuwēn iap oğuwēn eywebe

eykay wajēm puje, apēn ixe juk adi ocemuymuy iap tak oḡuwēn eywebe. Omuymuy ā ḡu ixe bit. Warara'acayū kuḡ tak xipan ḡu. Wuykitpiyū ajēm puje, ḡuōm ḡu jedukā be. Guōmat ḡu dak ip Deus eju kawēnwēnap'a be. Gujēmjēm tak ip ya bewi.

¹¹ Obure ikukpinat, xipāt'ūmat ekukuap puxim ḡu juy ejeku- -xipacat ekukuap puxim acā. Xipacat mujurūḡrūḡ'ukayū Deus ebekitkiyū e'em. Ikērēat mujurūḡrūḡ'ukayū bit cebekitkiyū ḡu.

¹² Soat wuyjuyū e'em:

— Demétrio xipāt cīcā — i.

— Kawēn icēmat taḡ ixe jekukum soat em — i'e'em ip.

— Ixe xipāt cīcā — i oceju dak e'em.

Eyetaybit icēmān oceju e'em iam.

¹³ Soat muwēn pin puk ōn eywebe. Imēnpit obu'u soat muwēn ām taperadup pe. ¹⁴ Gaxīn ma a'ḡu ōn cu ojuy eyka be eyjom. Acejekawēn cuy wuyewewēju.

¹⁵ — Gaio juy eyaḡuymubabin yaḡuybabi'ūmap puxim — i ōn e'em Deus pe.

Kato'i o'e ewebe ebureyū. Kato'i juy ece wuybureyū be- -iboceayū be- -exeayū be. Ijudup mubarararaḡ ōn eywebeaptum.

Ibūrū ma.

JUDAS EMUDUPMUBARARAKTUP CARTADUP

¹ Ōn Judas, Jesus Cristo buywatwat'ukat ōn. Tiago kitpit ōn. Cartadup mubarararaġ ōn eywebeaptum. Deus cuk eynaē jebekitkiyūm. Ixe Deus wuyebayat. Ixe xe eykukpin cīcā. Jesus Cristo dak soat em aġ eykay xipan eykuk am.

² Kawēnwēn ōn Deus eju eywebeam.

— Bay — i ōn e'em cebe. — Etabotaidabotbon cuy eġuy ebekitkit kay — i ōn e'em cebe. — Ixeyū aġuymubabibin cuy eġuy — i ōn e'em cebe. — Ikkupin cuy ixeyū ejukuk — i ōn e'em cebe. Kuy a'ġu ixē xipan eykuġ. Inaka kawēnwēn ōn cewēju biġ ma ixē be xipan eykuk am.

³⁻⁴ Oburereyū ikukpinayū, kuy juk cartadup mubararak ojuy oġuy eywebeaptum--Deus eydaxijom apēn cuk odaxijo iap puxim iaptup. Imēnpit Deus kay itabut'ūmayū oajēm wuykay. Ajojojo'ūma ip yajēm puje. Iba'arēm ma ip oajēm. Cekawēnwarun ma ip.

— Deus xipacat je'ġūm wuywebe soat em ikērēat mujurūġrūġ ma'ġu wuyju — i napa ma e'em ip wuywebe.

Imēn ip Deus xipacat ūmūm wuywebe iap ekawēn muwarururun, ikērēat mujurūġrūġxi ip puye. Jesus Cristo acā wuykukukat. Soat podi ma ixē itaybit wuymutaybin am.

— Eykukukat ġu oceukukat pit — i'e'em ip, Jesus Cristo kay'ūm ip puye.

Imēn e'em Deus ekawēntup:

Deus ixeyū ġuju ipiat'ajojoap kay
ikērēat kuġ puye, i. "Xipat ġu eyju
oxe" i je'e Deus cebe ip, i.

Iboap kuyje ma ibararak osodop Deus ekawēntup pe. Deus cuk adi eymutabun Jesus Cristo kay. Ixe ebekitkiyū eyju ġasū. Ipi'ūm puje dak ixē ebekitkiyūm epešop. Imēneju apēn Deus wuydaxijom iaptup ġu otupmubararak eywebeaptum. Eýbu'um ġu juy epe-

sop eyetabut am Jesus kay iaptup acā otupmubarak. Eyday'em'um cuy epesop Deus kay'ūmayū be eymubu'unap puxim iaptup otupmubararak.

⁵ Kuyje Deus Israel naxeḡebitbit o'taxijo. O'tujujēm ip Egito eipi bewi. Itabut'ūmayū bit o'ḡuy'ū'ū. Warara'acayū dujujēm puje o'ḡuy'ū'ū. Kuy eyetaybit iboam. Inaka xipat eywebe soat em ma ḡebum am iboap kay. Imēnpuye waram iboap oḡuwēn eywebe. ⁶ Pūḡpūḡ Deus ekawēn tojtjot'ukayū'in Deus co'i i'e pin ip o'e.

— Deus co'i oca'ōbuyxi — i napa ma ip o'e. Jewexe ip Deus co'i osodop ya'ōbuyxi. Imēneju Deus ixeyū o'ḡuju ipiat'ajojoap kay. Kabiokboḡ pe ip o'ḡuju. Taomūnmūn ip dopdom kabiokboḡ pe. Ijēm pa'o-re ip. Jesus Cristo ajēm puje ipiat supi'ajo cebe ip. Ḡebum cuy epesop ixeyū kay- -jewexe Deus co'i ya'ōbuyxiayū kay. ⁷ Sodomā ka watwat ikērēat mujurūḡrūḡxi ip osodop, Gomorra ka watwat tak, ibo ka xeatka watwat tak. Jewenūn'o'o'uk ip osodop aḡokat-kayū. Powatwat kay dak osodop ip tūn'o am. Nūn'o'oxi ip osodop. Deus ipiat o'supi'ajojoat Sodomā ka watwat pe apēn cuk adi ipiat o'supi'ajojoat jekawēn tojtjot'ukayū xipat'ūmayū be iap puxim. Daxaboḡ pe ip o'ḡuju soat em ipiat'ajo am. O'ḡuju warara'acat mutaybit am ipiat osupi'ajoat soat ikērēat mujurūḡrūḡ'ukayū be iam. Ḡebum cuy epesop iboap kay.

⁸ Gaxīn ma eykay oajēmiayū kuyjeayū buxim soat em ikērēat mujurūḡrūḡ- -Deus kay'ūmayū. Jebinūnpe ip ikērēat muḡēḡēm warēmtaksuḡat cocom jexey jo'iat pe buye. Deus soat podi ma ya'ōbaca iap waywayway acā ip, ya'ō kay'ūm puye ip. Kabi beacat muymuy dak ip- -idip cīcāayū muymuy. ⁹ Imēn ḡu juk adi oeku Miguel. Deus ekawēn tojtjot'ukayū kukukat putet Miguel i omuy. Ibiōḡbuk kērēayū kukukat jewa'ōxikxiḡ o'e Miguel eju abu wuy'in Moisés'ūm jebit jokot iam. Jewa'ōxikxiḡ pima:

— Ōn pit jemukorēm ḡu — io'e Miguel. — Okukukat cuy jemukorēm — i acā o'e Miguel.

Ibiōḡbuk kērēayū kukukat o'jomuymuy ḡu Miguel.

¹⁰ Ixeyū Deus kay'ūmayū bit jetaybit'ūmap muymuy

ip. Jekpiwatpi ma itaybit ip soan itaekat puxim. Jeytaybicap ġu'ūmat ip. ¹¹ Karem ġu ipiat supi'ajojo ip. Caim e daġ ip jekukum. Balaão buxim xipacap o'ġudopat ip ikērēat kay jījā ip dinheiro bu pinap tomuju ma. Kūyjobit'ūm cīcā ip Deus a'ō kay Coré buxim. Imēnpuye Deus o'ġu'ūm ip. ¹² Te'e ma ip je'awerorom eyweju Jesus oe'ū iap kay ġebumiat'a o am. Iokokat puxim ip eyparakpe. Isūsūn ġu ip pūġxirim ma jeka'on ma soat etabutpe. Warara'acat kay ġu ip ġebum- -jewekay acā. Warara'acat kuġ ġu ip xipan- -jewekuġ acā. Kabikerereat puxim ip- -muba'at'ūmat puxim- -kabido emumukap puxim. Ya'a'e'ūmat'ip puxim tak ip- -ya'a'eat ekaxi be ya'a'e ġu iat'ip puxim. Yop'uk'ukat'ip puxim tak ip. Tūybi'uk'ukat puxim ip- -yope'ūat puxim. ¹³ Tipodoyboġat puxim ip. Tipodoy iokokat muymūġmūġ ka'oririt eju. Imēnpuxim isūsūn'ūma ikērēat mujurūġrūġ ip soat etabutpe. Te'e ma ip jekukum kasopta te'e ma jedaekuku'ukata buxim. Deus kabiokat o'ġuxipan ixeyū dopdop am. Kabiokboġ pe ma jeedop ip soat em.

¹⁴ - ¹⁵ Kuyje ma Enoque ixeyū o'ġuwēn- -Deus kay'ūmayū o'ġuwēn. Kuy ma ixeyū o'ġuwēn ixeyū kap awap ma. Ixe Enoque Adāo naxeġebit osunuy. Adāo ipotpet o'e. Ixe ipot ipotpet o'e. Ixe ipotpet o'e. 6 be ipotpet ibima, Enoque o'jebapuk.

— Xeyūku Deus kay'ūm cīcāyū — i juk adi o'e Enoque kuyje ixeyū muwēnuwēn. — Isūsūn ġu ip ikērēat mujurūġ am Deus etabutpe — i juk adi o'e. — Cekawēnkērē jījā ip — i juk adi o'e. — Deus muymuyxi ip — i juk adi o'e. — Imēneju wuykukukat omuyku jekawēn tojotjot'ukayū eju- -adeayū eju- -soat taġ iisuayū eju — i juk adi o'e. — Yajēm puje, “Eyju ikērēat kuġ oxe,” i je'e Deus jekay'ūmayū be — i juk adi o'e. — Deus jekay'ūmayū ġuju ipiat'ajojoap pe — i juk adi o'e Enoque.

¹⁶ Ixeyū Deus kay'ūmayū jetakomaap pibun ma jenuycaw ma ip kawēnwēn. Soat em ip warara'acat muymuy. Jewemukokcokcoġ ma ip jekukum. Jewewuju ma e'em ip:

— Xipat ōn — i.

— Xipat ên — i'e'em ip warara'acat pe jebubut ūmap ojuy.

¹⁷⁻¹⁸ Wuykukukat a'ôbi jekuku'ukayū kay juk ey-mukūyjojo Jesus Cristo emumujuyū.

— Āmap kabia bima itabut'ūmayū jebapuk eykay- -jewemucokcok'ukayū — i juk adi o'e ip ey-webe eymukūyjojom eywaywayway'ukayū.

Imên o'e ip eywebe kuy bima- -ixeyū ajēm awap ma. Gebum cuy epesop ixeyū ekawên kay, oburereyū. ¹⁹ I-xeyū Deus kay'ūmayū Jesus kayayū mubu'u'un jebu-reyū kay cewejak'ūm âm. Deus bikuyap tağ ġu ip jekukum- -jebikuyap tağ acā. Deus biōğbuk kuğ ġu ip. ²⁰ Oburereyū, kuy juk eyetabut Jesus Cristo kay. Biğ ma juy eyetabun epesop cekay ġasū bit. Ixe kay wuyetabucap soat podi ma xipat. Kawênwên cuy epesop Deus eju ixē biōğbuk a'ôbacaan. ²¹ Eybu'um ġu juy epesop Deus pe eykukan xipan. Wuykukukat Jesus Cristo itabotaidabotbot wuykay. Ixe wuydujuu jewekay. Soat em ixē xe acesop. Iboap cuy epejowiwi jijā.

²² Pūğpūğayū soat em jewağuymuwarururun, ita-butbūt ā buye. Eya'ôpuruğ ġu juy ip epejukuk- -eya'ôdidim ma. ²³ Ixeyū juy epetaxijo daxaboğ pe ijuap puxim. Warara'acayū isūsūn ġu ikērēat muju-rūğ âm. Iokokat puxim ip. Te'e ma ip jewemucok-cokcoğ. Ixeyū dak cuy eya'ôpuruğ ġu epejukuk- -eya'ôdidim ma. Eyetakomām cuy epesop ixeyū emuğēğē kay eywebe dak ixeyū buxim ikērēat muğēap puxim.

²⁴ Deus itaybit cīcā wuya'ômubacan am wuywebe ikērēat muğēap puxim. Ixe wuydujuu jeka kay soat em wuynuy âm jexe. Ikērēat kuğ ġu ajop ġebu je bit. Soat tağ wuyisu acesop. Soat em wuycokcok acesop ixē xe. Ixe xe acesop iap soat podi ma idip.

²⁵ — Ên acā Deusat — i juy acece cebe. — Ka'ūmğū wara'at — i dak cuy acece cebe. — Ên acā wuydaxijojo'ukat, Jesus Cristo kay ocetabut puye, ocekukukat kay — i juy acece cebe. — Soat podi ma ên xipat ocexe — i dak. — Soat podi ma ên a'ôbuyxi jijā — i dak. — Soat podi ma ên a'ôba-

caap kuḡ — i dak. — Soat podi ma ēn soat kukukat
— i dak cuy acece cebe- -Deus pe.

Imēn ma o'e'e ip kuyje, ipi muḡē awap. Ġasū dak
imēn ma wuyju e'em. Soat em ma juy imēn acece
cebe.

Ibūrū ma.

JOÃO BE DEUS O'ĠUBAPUKIAPTUP

1 Deus apĕn ġaxĭn ma juy je'bapuk iap o'ġu-wĕn Jesus Cristo be ixē be iboap muwĕn ām jebuywatwat'ukat pe- -Joāo be. Deus a'ōbi Jesus Cristo iboap o'ġubapuk Joāo be cexey jo'iat pe. Ibocewi jekawĕn tojtot'ukat o'ġuju Joāo kay. Kabi bewiat o'ġuju cekay. O'ġuju imukūyjo am apĕnape cexey jo'ian ixē be warara'acayū mukūyjo am iboam. ²Deus jekawĕn o'ġuwĕn ixē Joāo be. Jesus Cristo kawĕn icĕmat o'ġuwĕn cebe. Joāo soat o'jojojoiap o'ġuwĕnuwĕn, soat o'ya'ijojoiap tak o'ġuwĕnuwĕn. Iboap ekawĕn ibararak opop ijudup pe. ³Ijudup coco'ukayū icokcok je'e. Apĕn ġaxĭn ma je'bapukiaptup peat ekawĕn a'ijojoi'ukayū dak icokcok je'e. Ijudup peat ekawĕn kay kūyjobicayū dak icokcok je'e. Ġaxĭn ma je'bapuk apĕn ibararak ijudup pe iap taġ.

⁴Ōn Joāo. Ōn ijudup mubarararaġ Āsia eipi watwat peaptum- -7 beatka watwat peaptum- -Jesus kay itabucayū beaptum.

— Bay, xipan cuy ebekitkiyū ejukuk — i ōn e'em cebe. — Ebekitkiyū aġuymubabibin cuy eġuy — i ōn e'em cebe.

Ixe Deus itait ġasū. Kuyje dak itait osunuy. Ġaxĭn ma jeedot ġuto wuykay. 7 be omuy ibiōġbuk Deus abikbikap topabe. Ixeyū juy xipan jeykuk. Eyaġuymubabibin cuy jeedop ip. ⁵⁻⁶Jesus Cristo dak xipan jeykuk. Ixe eyaġuymubabibin cuy jeenuy. Ixe soat em icĕmān e'em. Ixe koam o'jetait je'ūap tomukadi. Ixe Jesus Cristo ya'ōbuyxi soat ka kukat a'ōbuyxiap podi ma.

Ixe xe wuykukpin cĭcā. Korosa be o'jedoyekereren. Oe'ū ikĕrĕat uk am wuywebewi.

— Paīyū buxim Deus peam epeyekapikpikwebay beam — i juk adī o'e wuywebe.

Ixe soat em ma soat ipi juayū kukan jeenuy. Imĕnpuye:

— Ka'ūmġu omuy ejo'iat idipat — i juy acece

ixe Jesus Cristo be soat em ma. — Ka'ūma ma ejo'iat omuy ya'ōbacaat — i dak cuy acece cebe. Imēn cuy acece soat em ma.

⁷ Aḡ cuy epesop. Kabikerereat taḡ ixe Jesus omuyku. Soat ma ixe jojo. O'ya'ōxamutok'iaiyū dak ixe jojo ma. Soat tiwatwat jeetōtōn ixe dobuxik puje. Jeetōtōn ip jeḡuycūḡap pibun. Imēn ma juy jeedop ip. Imēn je'e.

⁸ — Soat ka'ūm pima ōn kuy kake — i'e'em wuykukukat Deus. — Soat i'ūm puje dak ōn pit kake. Ka'ūma kake bimaat ōn. Soat'ūm pimaat tak ōn ma — i'e'em wuykukukat Deus. Ixe Deus soat podi ma ya'ōbaca. Itait ḡasū. Kuyje dak itait osunuy. Ḡaxīn ma jeedot ḡuto wuykay.

⁹ On João-eywaḡo. Eybuxim ōn tak Jesus eju mūḡ'i jekukum. Eybuxim ōn tak ipiat'ajojom. Ōn tak soat kukukan oḡuy Jesus eju ixe soat kukukan pima. Ōn tak eybuxim wukpiceḡē ḡu wetabucap kuḡ. Tip'aweroro be juk adi oḡuy. Patmos i osunuy tip'aweroro butet. Iboce ip omuju Deus ekawēn cuk adi oḡuwēnuwēn puye- -Jesus ekawēn cuk adi oḡuwēnuwēn puye- -kawēn icēmat. ¹⁰ Muto'o bima wukpiwan ḡu juk adi ocewaḡuy- -wuykukukat ekabia be. Deus biōḡbuk cuk adi waḡuyda. Ya'ōberenat'a'ō oya'ījojo onōḡpikadiwi jededem- -parasuy jo'iat'a'ō.

¹¹ — Ḡaxīn ma ejojoiaptup cuy etupmubararak — io'e owebe parasuy jo'iat'a'ō. — Ibodup cuy etupmuju Jesus kay itabucayū beaptum- -7 beat ka watwat peaptum — i juk o'e owebe. — Etupmuju juy Ásia eipi watwat peaptum- -Ēfeso ka watwat peaptum, Esmirna ka watwat peaptum tak, Pérgamo ka watwat peaptum tak, Tiatira ka watwat peaptum tak, Sardes ka watwat peaptum tak, Filadélfia ka watwat peaptum tak, Laodicéia ka watwat peaptum tak — i juk o'e owebe.

¹² Korepēn'i oce abu paxi kawēnwēn oweju iam. 7 be lamparina'a mūn ojojojo- -ouro muḡēḡē. ¹³ Cepidase ip ijodiat co'iat cūḡ'i osunuy. Jesay kuḡ osunuy iberenat kuḡ. Ouro muḡēḡēbu kuḡ osunuy jekūmpi daḡ. ¹⁴ Yaoparut o'yanuy lā buxim- -kabidiḡpu

buxim- -aopaopu buxim. Itasop o'sutanuy daxae buxim. ¹⁵ Suisopsep o'suinuy bronze buxim- -icaat puxim- -daxa be o'jeieerotiat puxim- -o'ğusopsupiat puxim. Ixe a'ō ya'ōboğ osunuy ti'acap'a'ō buxim. Jororoh. Cororoğiat puxim. ¹⁶ Kasopta kuğ osunuy jeba'at kadi- -7 beata kuğ. Ibi bewi jekawēn cēm cēm osunuy. Payao buxim osodop cekawēn- -xepxep kadi ma tūybibiatiat puxim. Topasop o'topanuy kaxicuğat kaxi jo'i.

¹⁷ Ixe dobuxik puje oat cewap ce'uat puxim. I'at puje o'jewebumōğ wabi jeje iba'at kadi.

— Epararam ġu juy eğuy — io'e owebe. — Ka'ūma kake bimaat ōn. Soat i'ūm puje dak ōn acā ocepoyat — io'e owebe. ¹⁸ — Soat em ma ōn weta-bēğ. Kuy juk adi we'ū ojop. Ğasū bit ocetait waram. Waram pit oje'ū ġu. Wa'ōbi ma ijodiatat je'ū'ūm. Wa'ōbi ma ce'ū'ūayū dopdopap pe jeedop ip — io'e owebe. ¹⁹ — Ğaxīn ma ejojojoiaptup cuy etupmubarak, ġasū jebapukpuğ ewebe iaptup tak, ġuyjom je'bapuk ewebe iaptup tak — io'e owebe. ²⁰ — Kasopta kuğ ōn oba'at kadi- -7 beata — io'e owebe. — Lamparina mūn tak 7 be opop. Iboap ejojojo kuy — io'e owebe. — Apēğap ibo iam pit etaybit ġu. Iboam pit ōn jemutaybin — io'e owebe. — Lamparina mūn Jesus kay itabucayū buxim- -7 beatka watwat puxim- -Deus ekawēn tojotjot'ukayū buxim — io'e.

Imēn onōğpikadiat o'jekawēn owebe- -Jesus o'jekawēn owebe.

2 — Cartadup cuy etupmubararak Ēfeso ka watwat kukukat awēwēaptum- -Jesus kay itabucayū kukukat awēwēaptum — io'e owebe onōğpikadiat.

Ōn ma kasopta kuğ oba'at kadi. 7 beata kuğ ōn. Lamparina'a mūn pidase ōn cūğcūğ- -7 beayū pidase- -ouro muğēğēyū pidase. Jeyawē ōn. ² Wetaybit cūğ ma juk adi epekuku iam. We-

taybit cuk adi epeyekapikpik cīcā iam. Eyetaxi dak cuk adi epesop ipiat'ajojom. Xipat'ūmayū kay ġu jījā dak eyju. Jewexe Jesus emumujūyū dak cuk adi epesubuyxijojo- -“Jesus a'ōbi oceju kawēn idipat muwēnuwēn eywebe” i napa ma e'e'ukayū. Eyetaybit napa ma e'em ip iam. ³Itabut'ūmayū juk adi ipiat o'supi'ajojoat eywebe, eyetabut okay buye. Eyetaxi bit epesop ipiat'ajojom. Eybu'u ġu juk adi epesop eyetabut am okay. ⁴Imēnpit soat ġu eyekukuap xipat oxe. Koap pima okukpin cīcā oġuy eyxe. Ġasū bit ka'ūma. Okukpinsū ma eyxe ġasū bit. Imēn xipat ġu. ⁵Gebum cuy epesop apēn koap pima okukpin cīcā eyju okuk iap kay- -apēn ġasū bit eyju okukpin ġu iap kay dak. Warēmtaġ ma okukap cuy epeyepere. Waram ġu-to okukpin cīcā juy epesop okuġ. Eywebe warēmtaġ ma okukap eperē'ūm pima bit, ōn ma ojet eykay. Apēn wuyju lamparina'a mūn muwedewedem wara'at muy ām tūyap pe iap puxim eyju ġu webekitkiyūm epesop. Jeymuwedewede ōn. Warara'acayū ma ojomuy webekitkiyūm eydieġ. ⁶Obuxim eyju dak Nicolai a'ōkayayū ekawēn kay'ūm cīcā. Iboap xipat oxe.

⁷Deus biōġbuk imēn Jesus a'ōkayayū awēwēm. Eyetaybin pin eyawēwē ām pima, eya'ōpicūġcūġ cuy epesop.

Imēn ma ōn Ēfeso ka watwat kukukat awēwēm — i juk o'e owebe onōġpikadiat- -Jesus. — Owebe yawēwēaptup cuy etupmubararak ixe beaptum — i juk o'e owebe.

⁸ — Cartadup cuy etupmubararak Esmirna ka watwat kukukat awēwēaptum- -Jesus kay itabucayū

kukukat awēwēaptum — i juk o'e owebe Jesus.

Ka'ūmġu bimaat ōn. Soat i'ūm puje dak ōn ma oġuy. Kuy juk ade we'ū ojop. Gasū bit ocetait waram. Jeyawē ōn. ⁹ Wetaybit eyju ipiat'ajojom iam. Wetaybit eydadaybot iam tak. Deus xe bit soat kuġ eyju. Jewexe Judeuyū eymuymuy. "Judeuyū oceju- -Deus ebekitkiyū," i napa ma e'em ip. Satanás a'ō kayayū ixeyū bit. ¹⁰ Eyparam ġu epesop ipiat'ajoap puxim. Ibiōġbuk kērēayū kukukat ipiat supi'ajojoat eywebe eyetabucap puyxijom. Ixe a'ō kayayū warēmtaġ ma jeymuōm daomūnmūnap'a be. Inaka ibun ġu ipiat epesupi'ajojo- -10 kabia ma. Wa'ō daġ cuy epeku soat em. Eye'ū buje dak, wa'ō daġ cuy epeku. Wa'ō daġ eyeku buje, soat em epesop oxe eyetait. Soat em eyetait oxe iap idip cīcā ipi kukukat a daġat puxim- -coroa buxim. ¹¹ Deus biōġbuk imēn Jesus a'ō kayayū kukukat awēwēm. Eyetaybin pin eyawēwē ām pima, eya'ōpicūġcūġ cuy epesop.

Wa'ō kay jījāayū bit waram je'ū ġu. Waram warara'acayū e'ū buje, je'ū ġu ip.

Imēn ma ōn Esmirna ka watwat kukukat awēwēm — i juk o'e owebe onōġpikadiwiat- -Jesus. — Owebe yawēwēaptup cuy etupmubararak ixe beaptum — i juk o'e owebe.

¹² — Cartadup cuy etupmubararak Pérgamo ka watwat kukukat awēwēaptum- -Jesus kay itabucayū kukukat awēwēaptum — i juk o'e owebe onōġpikadiwiat- -Jesus.

Ōn ma payao kuġ- -xepxep kadi tūy-bibiat kuġ. Jeyawē ōn. ¹³ Wetaybit poce eyju dopdom iam. Satanás a'ō kayayū parakpe eyju. Wa'ō kay acā

eyju bit kūyjobit. Itakomaayū Antipas o'yaoka eyka be- -Satanás a'ō kayayū dopdopap ka be. Ixe Antipas cedağ ma juk adi omuwēnuwēn. Eyju bit cuk adi eybu'u ġu epesop eyetabut am okay ixē a'ġu ip o'yaoka ma. ¹⁴ Imēnpit soat ġu eyekukuap xipat oxe. Pūğpūğ ey'in Balaão emumutaybitbinap tağ jekukum. Ixe Balaão o'jeka-wēn Balaque be. "Warēmtağ cuy Israel naxeğebitbit eğutaybin ixeyū be ikērēat muğē ām," io'e Balaão Balaque be. Imēnpuye "Xipat eywebe deusbaroyū wap iēnmōğ'ibitēn o am," i napa ma o'e cebe ip. "Xipat eywebe warara'acat tayxi eju jepo am- -warara'acat itop eju dak," i napa ma o'e cebe ip. ¹⁵ Ixe buxim pūğpūğ ey'in Nicolai a'ō kayayū emumutaybitbinap tağ jekukum, warēmtağ ma'ġu ip imutaybitbin. ¹⁶ Ikērēat mujurūğrūğap cuy epeyepere. Cepere'ūm pima bit, ġaxīn ma ojot eykay ipiat'ajoan eywebe. Ixeyū eju nopāğōğōm oce- -warēmtağ imutaybitbinayū eju. Yaokakam ip oce wekawēn- -payao buximan - -xepxep kadi tūyan.

¹⁷ Deus biōğbuk imēn Jesus kay itabucayū kukukat awēwēm. Eyetaybit pin eyawēwē ām pima, eya'ōpicūğcūğ cuy epesop.

Wa'ō kay jījāayū be manada otaūm ixatam ip tamunēm'ibita. Karatūğ'a buximat'a dak oyaūm soat pe ixeyū be yarucat'a- -yadeiboğat'a. Ibutet iisuat ibararak opop iğo'a be. Ka'ūma ma itaybit ixē buten. Yabuat acā itaybit je'e ixē buten.

Imēn ma ōn Pérgamo ka watwat kukukat awēwēm — io'e Jesus owebe- -onōğpikadiwiat. — Owebe yawē-

wēaptup cuy etupmubararak ixe beaptum — i juk o'e owebe.

¹⁸ — Cartadup cuy etupmubararak Tiatira ka watwat kukukat awēwēaptum- -Jesus kay itabucayū kukukat awēwēaptum — i juk o'e onōḡpikadiwiat owebe- -Jesus.

Deus ipot ōn. Wetasop daxae buxim. Wui suisopsep bronze buxim- -o'ḡu- sopsep ip iat puxim. Jeyawē ōn.

¹⁹ Wetarybit cūḡ ma eyju jekukum iam. Deus ikukpin cīcā eyxe. Eyeta- but cīcā ixe kay. Kapikpiḡ eyju. Eye- taxi dak ipiat'ajojom ma'ḡu. Koap pi- maap podi ma ḡasū dak eyju xipacat mujurūḡrūḡ.

²⁰ Imēnpit soat ḡu eyeku- kuap xipat oxe. Jezabel warēmtaḡ ma obuywatwat'ukayū mutaybitbin. E ie- kērēat taḡ webekitkit muykukum. Ixe napa ma e'em "Deus ekawēn muwēn- uwēn'ukat ōn," i. Webekitkit muḡuy- kukukum ixe ayacat. "Xipat eywebe warara'acat tayxi eju jepo am, wara- ra'acat itop eju dak," i napa ma e'em cebe ip. "Xipat eywebe deusba- royū wap iēnmōḡ'ibitēn o am," i napa ma e'em cebe ip. Eyju bit epeḡujēm ḡu eyxewi. Āḡ jeenuy jekpiwan.

²¹ I- bun ma ipiat osupi'ajoat ḡu cebe. Tūybe ḡasū paxi ikērēat mujurūḡ- rūḡap jepere iān oce. Ixe bit ibu'u je- perem.

²² Imēneju ixe ayacat ōn ma ojojik kama jo'iat pe. Ijoce ipiat su- pi'ajojo jījā ceweju o'jepo'iyū dak. Ixeyū be ikērēat mujurūḡrūḡap epe- re'ūm pima, ipiat'ajojom cīcā jeedop ip.

²³ I'iyū dak oyaokaka- -ya'ōkayayū. Ixeyū aoka buje, Jesus a'ō kayayū itaybit je'e Deus itaybit apēn ijodia- cat jewaḡuyḡuy iam. Apēn ip ibikuy iam tak itaybit je'e ip. Apēn ijodi

bima juk adi oekuku ip iaptei bit òn ma oteida soat pe.

²⁴ Warara'acat'in ey'in pit warēm-taḡ ma eymutaybitbin'ukayū a'ō kay ḡu juk adi epesop- -Tiratira ka wat-wat'in. Satanás pabi kuḡ ḡu buk eyju. Ixe babi kukayū soat ḡu Satanás babim itaybit. Eyju bit eybu'u ixe babi kuk am. ²⁵ Wajēmap wiwim pima kuy eyetaybicap ekawēn taḡ cuy epeku. Wara'at ekawēn ḡu bit oḡuwēn eywebe iboap ekawēn taḡ eyeku am. ^{26 - 28} "Èn ma soat ka watwat kukukan cuy ece," i juk o'e webay owebe. "Eyju soat ka watwat kukayūm epesop oweju," i oce wa'ō kay jījāayū be. Ya'ōca ip jeedop ixeyū kukukan yopcaat'ip kukat puxim. Pipim'ūm kūyjobit'ūmayū a'ōbacaap ḡu'ūm ip itiḡ'a kakaap puxim. "Eyju ma soat ka watwat kukukayūm cuy epesop oweju," i oce wa'ō kay jījāayū be- -āmap kabia wiwim pima wa'ō daḡ jekuku'ukayū be. Kabiada dak otaūm cebe ip- -kasopta- -wa'ō kay jījāayū be. ²⁹ Deus biōḡbuk imēn Jesus a'ō kayayū awēwēm. Eyetaybin pin yawēwēam pima, eya'ōpicūḡcūḡ cuy epesop.

Imēn ma òn Tiatira ka watwat kukukat awēwēm — io'e onōḡpikadiwiat owebe- -Jesus. — Iboaptup cuy etupmubararak ixe awēwēaptum — i juk o'e owebe.

3 Cartadup cuy etupmubararak Sardes ka watwat kukukat peaptum- -Jesus kay itabucayū kukukat peaptum — i iuk o'e owebe onōḡpikadiwiat- -Jesus.

Òn ma Deus biōḡbuk kuḡ- -7 beayū kuḡ. Kasopta kuḡ tak òn- -7 beata

kuḡ. Jeyawē ōn. Ōn wetaybit warēm-taḡ ma eyju jekukum iam. Adeayū napa ma e'em "Sardes ka watwat itabut cīcā Jesus kay," i. Ōn pit wetaybit eyetabutsū ma cekay iam. Ce'ūat puxim eyju cexe. ² Ce'ūat puxim ḡu juy epesop. Eyetabun cuy epesop cekay kuyjeap puxim. Eyaḡuysan cuy epeku. Eybu'um ḡu juy epesop cekawēn taḡ eyeku am. Soat ḡu bit xipat Deus xe apēn cuk adi epekukuiap. Wetaybit iboam. ³ Gebum cuy epesop kuy eyetaybicap kay, kuy epeya'ijoioiap kay dak. Kawēn icēmat cuk adi epeya'ijojo. Gebum cuy epesop iboap ekawēn kay. Kūyjobin cuy epesop iboap ekawēn kay. Ikērēat mujurūḡ-rūḡap pit cuy epeyepere. Ixecat puxim eyju. Eyju aḡ'ūm pima ojut eykay. Ibukurukat puxim ojut eykay. Eyetaybit ḡu epe'e puju paxi oajēm iam. ⁴ Pūḡpūḡ pit ey'in ikērēat o'jukuk ḡu Sardes ka watwat'in. Ixeyū bit yaḡuyisuayū. Cesay isuayū buxim ip. Ixeyū ma oweju ma jeku jesay irucat kuḡ- -iisuat kuḡ, "Cedaḡ ip oxe" i'e'em Deus cebe ip puye. ⁵ Wa'ō kay jījāayū jesay irucat kuḡ jeku. Ixeyū butet oju'uk ḡu soat em itait jeedop ip Deus xe iaptup pawi. Soat em ibararak jeedop ixeyū butet iḡodup pe. "Teyūku webekitkit," i oce webay be, ixekawēn tojtjot'ukayū be dak.

⁶ Deus biōḡbuk imēn Jesus a'ō kayayū awēwēm. Eyetaybin pin yawēwē ām pima, eya'ōpicūḡcūḡ cuy epesop.

Imēn ma ōn Sardes ka watwat kukukat awēwēm — io'e onōḡpikadiwiat owebe- -Jesus. — Iboaptup cuy etupmubararak ixekawēwēaptum — i juk o'e owebe.

⁷ — Cartadup cuy etupmubararak Filadélfia ka watwat kukukat awēwēaptum- -Jesus kay itabucayū kukukat awēwēaptum — i juk o'e owebe.

Ōn pit ikērēat kuḡ ḡu. Ōn soat em icēmān e'em. Chave kuḡ ōn- -Davi bubun osunuyiat kuḡ. Iju chavem owebe tomudip puje, kuka ip o'tomudip'uk ḡu. Owebe tomudip'uk puje dak, kuka ip o'tomudip ḡu. Jeyawē ōn. ⁸ Wetaybit apēn eyju jekukum iam. Eya'ōbaca'ūm'ūm ma. Owebe eymutaybitbinap taḡ pit cuk adi epekuku. Soat em epesop kūyjobit wa'ō kay. Ōn xīntabi o'ḡukoce eywap. Soat pe bit tomudip pa'ore. Owebe acā tomudip put. ⁹ Eya'ōpicuḡcūḡ cuy epesop wa'ō kay. Satanás a'ō kayayū napa ma e'em "Judeuyū oceju- -Deus ebekitkit," i. Napa ma e'em ip. Wa'ōbi ip jēḡ'aecōḡcōḡ eywap. Itaybit je'e ip eykukpin cīcā oxe iam.

¹⁰ "Eyukpiceḡēḡēm ḡu juy epesop okay eyetabucap kuḡ ipiat'ajojom ma'ḡu eyju," i juk oce eywebe. Eyukpiceḡēḡēm ḡu okay juk adi epesop. Imēnpuye ipiat osupi'ajoat soat ipi daḡacat pe ixeyū etabucap puyxijom. Eyju bit ōn jeydaxijo ixeyū ipiatpi'ajojom pima. ¹¹ Ḡaxīn ma oajēm eykay. Xipat cīcāat kuḡ eyju- -wa'ō kay jījāaptei kuḡ. Iboap cuy epeḡuxipan cīcā warara'acat pe tujupa'umap puxim. ¹² Wa'ō kay jījāayū a'ōmucanucan cuy oḡuy. Deus eju kawēnwēnap'a beat'ip puxim jeedop ip- -warara'acat'ip muycemucemap'ip puxim. Waram pit jejēm ḡu ip Deus xewi. Deus putet osubutetmubararak cebe, Deus ka butet tak. Jerusalém i ika butet- -ika isuatka butet. Iboka sukakop Deus

xewi. Obutet iisuat tak osubutetmubararak cebe.

¹³ Deus biōgbuk imēn Jesus a'ō kayayū awēwēm. Eyetaybit pin yawēwē ām pima, eya'ōpicūgcūg cuy epe-sop.

Imēn ōn Filadélfia ka watwat kukukat awēwēm. Owebe yawēwēaptup cuy etupmubararak cebeaptum — i juk o'e onōgpikadiwiat owebe- -Jesus o'e owebe.

¹⁴ — Cartadup cuy etupmubararak Laodicéia ka watwat kukukat awēwēaptum- -Jesus kay itabucayū kukukat awēwēaptum — i juk o'e owebe onōgpikadiwiat- -Jesus.

“Imēn cuy jeenuy” i ōn e'em. Imēnpuye “Amém” i obutet. Soat em wa'ō dağ ōn e'em. Soat em icēmān ōn e'em. Deus pe soat muğēap awap kuy juk kake oğuy. Jeyawē ōn. ¹⁵ - ¹⁶ Wetaybit warēmtağ cīcā eyju jekukum iam. Taxipat puxim ġu eyju- -icukat puxim ġu dak. Taxiptoktokat puxim eyju, icukgūgūnat puxim tak. Okukpin ġu eyju okuğ. Warēmtağ ġu dak eyju okuğ. Xipat ma kuka juk o'e warēmtağ okuğ pima, ikukpin okuğ pima dak. Imēnpit okukpin ġu eyju okuğ. Imēnpuye ġaxīn ma ipiat osupi'ajoat eywebe, iko'ōmat o buje jedadacap puxim. ¹⁷ “Soat kuğ oceju bit,” i te'e ma eyju e'em. “Ocebubut ade oceju bit,” i te'e ma eyju e'em, “Xipat cīcā oceju,” i dak, “Soat kake ocexe,” i'e'em eyju te'e ma. Eyetaybit ġu eyju tadaybocat puxim iam. Iokokat puxim eyju- -iğēmat puxim- -ibisōat puxim. Tadaybocat puxim eyju, toti'ūmat puxim tak. Ita'ūmat puxim tak eyju. ¹⁸ Ōn pit jeyawē. Ouro juy epejat oxewi- -iwekoykey'ūmat. Iboap kuğ pima icēmān ibubut adeayūm

epe'e. Eyesay irucat tak cuy epejat oxewi eywebe imuōm ām eyesay'ūmap puxim, eysūsūnap puxim. Posūg tak cuy epejat oxewi itapiatkayat eyeta be imōg ām xipan eyecoat am. ¹⁹ Oxe ikukpinayū bit oğukorēm cedağ'ūm jekukum pima. Ipiat osupi'ajoat cebe ip waram guto cūg ma ceku am ip. Imēnpuye juy wa'ō kay epe'e waram. Ikērēat mujurūgrūgāp cuy epeyepere. ²⁰ Ya'ōpicūg cūg cuy epesop wa'ō kay. Tağtağtağ'i ōn e'em xīntabi be. Wa'ī-jojoat pe tomudip'uk puje, oōm tuk'a be. Jekōnkōn'uk oğuy ixe eju. Ixe dak jekōnkōn'uk jeenuy oweju. ²¹ "Epabik cuy oxe -wabikbikap pe," i oce wa'ō kay jījāayū be. Ixeyū buxim ōn tak cuk adi oğuy webay a'ō kay kūyjobit. Imēnpuye gāsū ōn xik'i webay xe-yabikbikap pe.

²² Deus biōgbuk imēn Jesus a'ō kayayū awēwēm. Eyetaybin pin yawēwē ām pima, xipan cuy epeya'ōpicūg.

Imēn ōn Laodicēia ka watwat kukukat awēwēm. Owebe yawēwēaptup cuy etupmubararak cebeaptum — i juk o'e onōgpikadiwiat owebe- -Jesus o'e owebe.

4 Gebuje wara'at ma ojojojo wexey jo'iat. Kabi beat exīntabi ojojojo ikoce. Waram parasy jo'iat a'ō oya'ījojo- -kuy oya'ījojoiat'a'ō ma. Waram guto o'jekawēn owebe.

— Eceu juy ijoce — io'e owebe. — Apēn gūyjom je'bpuk iap oğubapuk ewebe etaybit am — io'e owebe.

² Deus biōgbuk wağuyda gēbujē bit. Iboce yabikbikap osunuy- -idip cīcāat kabi be. Pūg xik'i osunuy cebe. ³ Ixe dopa topasopsep o'topanuy wita'a buxim - -yadip cīcāat'a buxim- -jaspe'a buxim, sardōnio'a

buxim tak. Ixe abikbikap akokorenen konopsanobu o'jebueku. Ibusopsep o'jebueku esmeralda'a buxim. ⁴Idip cīcāat akokorenen warara'acat abikbikap osodop 24 be. Ya'ōbuyxiayū osodop ixeyū jeje kaxikxik'i- -24 beat ceje. Jesay irucat kuḡayū osodop ip. Ouro muḡēḡē kuḡ tak ip osodop jabi jeje- -idip cīcāat kuḡ. ⁵Yabikbikap pewi xiririkiat cēm̄cēm'uk osunuy, tū-mūn'a'ō dak, poroḡiat tak. Wexiktak puximat tak osunuy yabikbikap wap isopat, 7 be. Ixeyū jojom pima wuyju ḡebum Deus biōḡbuk kay- -7 beayū kay. ⁶Iodi buximati o'tinuy yabikbikap wap- -vidro muḡēḡē. Tixiriruk o'tinuy cristal'a buxim.

Ebadipdip tak osodop ip itabēḡayū yabikbikap akokorenen- -idip cīcāat akokorenen. Soat kadi osodop ip. Ita'ade osodop ip. Soat kadi osodop ita ip- -cewap, yakpidakadi. ⁷Pūḡ ixeyū'in leāo buxim osunuy. Wara'at ixeyū'in biopak puxim osunuy- -aḡokatkat yoboḡat puxim. Wara'at ixeyū'inat topa aḡokatkat topa buxim o'topanuy. Wara'at ixeyū'in dace buxim osunuy- -pupumat puxim. ⁸Soat ip ceḡebabe osodop. 6 be o'ceḡebadop ip. Soat taḡ itate ip osodop- -badi, kacūḡkadi dak. Soat em ip jebibododon. Ixima daḡ tak ibu'u em ḡu ip jebibododon, kabiam tak. Imēn ip ibibodo:

Wuykukukat Deus soat podi ma ya'ō-baca, i'e'em ip jebibododon. Soat taḡ iisu, i. Soat taḡ iisu, i. Soat taḡ iisu, i jebibododon ip. Ipi ka'ūm pima itait osunuy, i. Ḡaxī dak itait, i. Ḡaxīn ma jeedot waram wuykay, i.

Imēn ip ibibodo.

⁹ — Ēn pit soat podi ma edip — i'e'em ip Deus pe jebibododon ebadipdip itabēḡayū. — Ēn pit soat podi ma a'ōbuyxi — i dak e'em ip jebibododon. — Ēn pit soat podi ma xipan ocekuḡ — i dak e'em ip jebibododon.

Yabikbikap cejeat peam cebibododon ip puje soat em itabēḡat peam, ¹⁰ 24 beayū aypapayū piḡ'i at'an ip cewap- -yabikbikap cejeat wap.

— Ēn pit soat podi ma xipat — i'e'em ip cebe. Jabi jejeat mōḡmōḡ ip yabikbikap cejeat wap- -idip

cicāat -ouro muḡēḡē. Imōḡmōḡ ip cewap “En acā ocekukukat” i'e am cebe.

¹¹ Imēn ip jebibododon cebe:

En acā soat kukukat, i. En acā Deus-at, i. En cuk soat eḡuḡē, i. Soat kake a'ōbin ma, i. En ipi juacat mutaicin, i. En soat podi ma edipap kuḡ, i. Soat podi ma a'ōbuyxi, i. En acā soat podi ma a'ōbacaap kuḡ, i.

Imēn ip jebibododon cebe -yabikbikap cejeat pe.

5 Gebuje taperadup otupcoco tup'amūnmūn-atup. Yabikbikap cejeat pui beatup otupcoco -iba'at kadiat pui beatup. Tupararak o'tuptop xep-xep kadi ma. Tupmuymūḡmūḡap osodop serabu jo'ian. ⁷ em o'tupmuymūḡmūḡ ip. ² Deus ekawēn tojotjot'ukat tak ojojoho ya'ōbacaat.

— Abu itaybit tupmuywut am? Ka'ūma ma — io'e ixe ya'ōberen.

³ Imēnpit itaybicat ka'ūmḡu osunuy. Kabi be ka'ūmḡu. Ipi ju dak ka'ūmḡu. Ipi diotpe dak ka'ūmḡu. Ka'ūma ma itaybit tupmuywut am tup co am. ⁴ Otōn cīcā ka'ūmḡu buye itaybicat tupmuywut am tup co am. ⁵ Imēnpuye aypaat o'e owebe:

— Wa ḡu! Ak'i juy ece. Judá diwat pe iba'ore ḡu tupmuywut am — io'e. — Ixe acā itaybit tupmuywut am. Ixe be ma tup co but — io'e. — ⁷ beat imuywut put ixe be — io'e owebe. — Ixe leāo buxim ya'ōca. Ya'ōbuyxi jījā ixe Davi naxeḡebit — io'e owebe.

⁶ Gebuje mēmē ojojoho -ovelha. Cūḡ'i osunuy yabikbikap pidase. Ebadipdip itabēḡayū ixe akokorenen osodop ya'ōbuyxiayū dak. Kuy bima ce'ū osunuyiat puxim osunuy. ⁷ be osodop yakanasūyū. Ita dak ⁷ be ma o'sutanuy. ⁷ be itateat puxim Deus biōḡbuk-soat ka kay imujumayū. ⁷ Mēmē o'ju yabikbikap cejat topabe. Ibodup o'tupu ibui bewi iba'at kadiatup. ⁸ Tupu buje ebadipdip itabēḡayū piḡ'i o'at ipi ju mē-

mē wap. Ya'ōbuyxiayū dak piḡ'i o'at ip cewap ya'ōbuyxi jījā cexe ip puye. Soat ip harpa'a kuḡ osodop yamuyde am. Wa'e buximat kuḡ tak ip osodop-ouro muḡēḡē kuḡ. Topapūn osodop tide'okuatim. Deus ebekitkit kawēnwēn ceweju iap tide'okuati buxim.

⁹ Pibodo iisuan o'jebibododon ip. Imēn ibibodo ip:

Kuy juk e'ū eḡuy, i. Pūḡ ḡu juk eta-xijo e'ūap puye soat tiwatwayū'in, soat a'ōm kawēnwēn'ukayū'in tak, soat iwarururuayū'in tak, soat kaka daḡayū'in tak, i. Imēnpuye etaybit tupu am, i. Etaybit tupmuywut am tak, i. ¹⁰ A'ōbi ma soat eipi juayū kukayūm jeedop ip Deus eju, i. Paīyū buxim kapikpiḡ jeedop ip Deus peam -ocekukukat peam, i.

Imēn ip ibibodo.

¹¹ Waram ḡuto oceak. Deus ekawēn tojtjot'ukayū oya'ījojo. De'at ḡu ip osodop-kiiii iān. Imuweḡūn pa'ore osodop ip. Ade jījā ma ip. Kacūḡcūḡ'i ip osodop yabikbikap akokoreren. Ebadipdip itabēḡayū akokoreren tak, ya'ōbuyxiayū akokoreren tak. ¹² Ya'ōberen o'jebibododon ip. Imēn ibibodo ip:

Ovelha buxim oe'ūiat soat podi ma jedipap kuḡ, i. Soat podi ma ja'ōba-caap kuḡ, i. Soat podi ma xipacap kuḡ, i. Soat podi ma jetaybitbicap kuḡ, i. Soat podi ma ja'ōcaap kuḡ, i. Soat podi ma ja'ōbuyxiap kuḡ, i. Soat podi ma jedipap kuḡ, i. Soat kayap podi ma ocecokcok cekay, io'e ip jebibodo be.

Imēn ibibodo ip.

¹³ Soat ma ip jebibododon o'e ḡe buje bit wa'ōpiju-kabi beacayū, ipi juacayū dak, ipi diotpeacayū dak, tiboḡ cīcāti daḡacayū dak-soat kakeayū. Imēn ibibodo ip:

Soat podi ma ēn pit xipap, i. Soat podi ma ēn pit a'ōbuyxi, i. Soat podi ma ēn pit edip, i. Soat podi ma ēn pit a'ōbaca, i. Imēn cuy acece ewebe

soat em, i. Soat em tak wuybu'um ġu
acesop imēn i'e am ewebe, io'e ip je-
bibodo be xik'i yabikbikap peat pe-
mēmē be- -ovelha buxim oe'ūiat pe.

¹⁴ — Imēn cuy ace — i o'jede ebadipdip ita-
bēġayū.

Ya'ōbuyxiayū dak piġ'i o'at'at ip topabe-
aypapayū. Piġ'i o'at'at ip "Soat podi ma ēn xipat"
i'e am cebe.

6 Mēmē tupmuymūġmūġap o'ġuywut wetabut-
pe. Koapat o'ġuywut. 7 be osodop ip tup-
muymūġmūġap.

— Ejot cuy — io'e ya'ōberen ebadipdipayū'in-
itabēġayū'in.

Nobano a'ō buxim o'ya'ōnuy ya'ōpuruġ.

² Waram ġuto oceak. Cavaro ojojojo irucat. Yakpi
jejeat daruk kuġ oeku. Ixe xeat ouro muġēġē o'jomōġ
ya be- -ipi kukukat a beat- -idip cīcāat. O'jēm soat
a'ōbacaap mu'ūmu'ūm. Soat a'ōbacaap mu'ūm ām
o'jēm.

³ Gebuje mēmē wara'at o'ġuywut tupmuymūġ-
mūġap. Xepxep o'ġuywut kuy.

— Ejot cuy — io'e wara'at itabēġayū'in ebadip-
dipayū'in.

⁴ Wara'at osodot cavaro ipakpukat. Ixe xeat ja'ō-
bacaap o'ġūm yakpi jejeat pe.

— A'ōbi nopagōġōm je'e ip jeweweju ipi daġa-
cayū — io'e cexeat yakpi jejeat pe. — Ka'ūma ip
kaba'ūm je'e wara'at eju. A'ōbi jenopagōġōm je'e ip
soat — io'e cebe.

Payao o'ġūm cebe yoboġat.

⁵ Gebuje mēmē wara'at o'ġuywut tupmuymūġ-
mūġap. Ebpūġ kuy o'ġuywut.

— Ejot cuy — io'e wara'at ebadipdipayū'in ita-
bēġayū'in.

Waram ġuto oceak. Wara'at ojojojo cavaro iokat.
Yakpi jejeat imupesarurunap kuġ oeku jebui be.

⁶ Wuya'ijoiat oya'ijojo. Ebadipdip itabēgayū parakpe-wi oya'ijojo.

— Pūḡ litrom trigodadei tadeiboḡ cīcā je'e- -pūḡ kabia ekapikapteim je'e — io'e. — Eba-pūḡ litrom cevadadadei dak tadeiboḡ cīcā je'e- -pūḡ kabia ekapikapteim je'e — io'e. — Oliveira'a xepi bit etimukērēn ḡu juy — io'e. — Uva'abidi dak etimukērēn ḡu juy — io'e.

⁷ Gebuje mēmē wara'at o'ḡuywut tupmuymūḡ-mūḡap. Ebadipdip o'ḡuywut kuy. Eba-pūḡ mabuk opop imuywut'ūmat.

— Ejot cuy — io'e wara'at ebadipdipayū'in itabēgayū'in.

⁸ Gebuje waram ḡuto oceak. Cavarō ipekpukat ojojojo. Yakpi jejeat putet Ce'ūap i osunuy. Ixe do-batban oekuku ip ce'ū'ūayū dopdopap pewiayū. Ce-xeat o'jekawēn cebe ip.

— Adeayū juy epeyaoka ipi juayū — io'e cebe ip. — Ebadipdip tobuxik puje, pūḡ cuy epeyaoka — io'e cebe ip. — Nopaḡōḡōm ip epeḡuap, repibun tak — io'e. — Wātaxipi pibun tak epeḡuap ip, awaydip taḡan tak, ika'uan — io'e cebe ip.

⁹ Gebuje mēmē wara'at o'ḡuywut tupmuymūḡ-mūḡap. Ebadipdip o'ḡuywut kuy. Xepxep mabuk o'jepoyat imuywut'ūmat. O'yaokaka ip iayū'ūm'ūm biōḡbuk ojojojo wūnca mupikupikap'a diotpe caixa'a diotpe. Itakomaayū juk ixeyū o'yaoka Deus ekawēn o'ḡuwēnuwēn ip puye, cekawēn taḡ oekuku ip puye dak. ¹⁰ Ya'ōberen o'jewāwā ip:

— Ocekukukat, ēn soat podi ma a'ōbaca — io'e ip. — Soat taḡ eisu — io'e ip ya'ōberen. — Icēmān e'e'ukat ēn. Puḡūn xe'e ipiat ecesupi'ajojoat kūyjobit'ūmayū be? — io'e ip. — Puḡūn xe'e ipiat ecesupi'ajojoat ocaokaayū be? — io'e ip ya'ōberen.

¹¹ Iboceat cesay o'ḡūm cebe ip soat pe-irucat.

— Epeyebodoy buk yopūt — io'e cebe ip. — Itakomaayū buk eykitpitpiyū yaoka ma — io'e cebe ip. — Eybure kapikpik'ukayū'in yaoka mabuk ip apēn cuk adi ip eyaoka iap puxim — io'e cebe ip. — Ixeyū aoka'ūm pima bit cuy epeyebodoy — io'e cebe ip.

¹² Gebuje mēmē wara'at o'ḡuywut tupmuymūḡ-mūḡap. 6 be o'ḡuywut kuy. Pūḡ ma omuy imuy-wut'ūmat. Imuywut puje ipi o'jexixi jījā ma. Kaxiepiat iok o'e paḡo iokat puxim- -mudiuhu doti buxim. Kaxiaat tak ipakpuk o'e doy buxim. ¹³ Kasopta dak o'ta'at'at kabi bewi. O'ta'at'at ipi ju. O'ta'at'at figo'a muy'at'acap puxim- -yaticat'a muy'at'acap puxim- -kabidoxixi be yamuy'at'acap puxim. ¹⁴ Kabi dak o'je'arabot apēn wuyju taperadup mu'arabot-boniap puxim. Co'a dak o'jeaewede jenuyap pewi soat'a. Tip'aweroro dak o'jedipewede jediptūyap pewi soat.

¹⁵ Gebuje soat ipi juayū kukukayū o'jewemunēm - -iecuḡapyū dak, sorarayū kukukayū dak, ibubut adeayū dak, ya'ōcayū dak. Soat ipi juayū o'jewemunēm: jekpiwatpi ma kapikpik'ukayū, tei'ūm kapikpik'ukayū dak. Soat ip o'jewemunēm co'a kūy daḡ, co'a binūnpe dak. ¹⁶ Te'e ma ip o'jewāwā ya'ōberen wita'a be, co'a be dak.

— A'a'at cuy ocejeje ocemunēm ām — i te'e ma o'e ip co'a be, wita'a be dak. — Ocemunēm cuy epe'e xik'i yabikbikap pe iat pe ocedobuxikap puxim — i te'e ma o'e ip. — Ocemunēm cuy epe'e mēmē itakoma ocekey buye — i te'e ma o'e ip. ¹⁷ — Mēmē itakoma jījā ocekey, ya'ō kayayū dak — io'e ip. — Ixeyū etakomaap ebapukap kabia ajēm puje, ka'ūma ma jepoyat. Soat i'ūm — io'e ip.

7 Gebuje Deus ekawēn tojtot'ukayū ojojojo ebadipdipayū. Kacūḡcūḡ'i osodop ip ipi'abi daḡ. Kabido ixikixik'uk osodop ip ebadipdip kadi-wiatpido. Kabido ixikixik'uk ip osodop ipi kay ibido kopap puxim, tiboḡcīcāati kay dak, tūmūn'ip'ip kay dak. ² Wara'at ojojojo ḡebuje bit Deus ekawēn tojtot'ukat. Kaxi jēmjemap kadiwi oajēm. Oajēm teku Deus ebekit iam imubararakap kuḡ jebui be- -teku soat em itaicat ebekit iam imubararakap kuḡ. Ya'ōberen o'jewāwā jebadipyū be- -Deus ekawēn tojt-

jot'ukayū be- -ebadipdipayū be. Deus kuy juk ja'ōba-
caap o'gūm ixeyū be. Ja'ōbi ixeyū o'gūju ipi mukē-
rērēn ām, tiboġcīcāati mukērērēn ām tak.

³ — Deus buywatwat'ukayū dopa'a osetopa'amubarak tekun Deus ebekit iam — io'e cebe ip. — Ocewebe ixeyū dopa'a mubarak'ūm pima bit, ipi epeġukērērēn ġu, tiboġcīcāati dak epetimukērērēn ġu, tūmūn'ip'ip tak epoyopmukērērēn ġu — io'e cebe ip.

— Ha'a — io'e ip.

⁴ Pebūrū iteyū Deus ebekitkiyū iap o'ġuwēn owebe- -o'topa'amubarak ip iap. Tak ġu o'topa'amubarak ip- -ade jījā ma- -144,000 be. Kiiian. Soati watwat'in o'topa'amubarak ip- -Israel naxeġebitbiyū'in. ⁵ · ⁸ 12,000 be o'topa'amubarak ip Judā diwatwat'in; 12,000 be Rubem diwatwat'in tak; 12,000 be Gade diwatwat'in tak; 12,000 be Aser diwatwat'in tak; 12,000 be Naftali diwatwat'in tak; 12,000 be Manassés diwatwat'in tak; 12,000 be Simeão diwatwat'in tak; 12,000 be Levi diwatwat'in tak; 12,000 be Issacar diwatwat'in tak; 12,000 be Zebulom diwatwat'in tak; 12,000 be José diwatwat'in tak; 12,000 be Benjamim diwatwat'in tak. Ibūrū ma ip o'topa'amubarak teyūku Deus ebekitkiyū iam.

⁹ Waram ġuto oceak. Tak ġu wuyjuyū io'e kiii. Ade jījā osodop ip. Imuweġūn pa'ore ma osodop ip, ade jījā buye. Soat eipi watwat'in osodop ip, soat tiwatwat'in tak, soat iwarururuyū'in tak, soat a'ōm kawēnwēn'ukayū'in tak. Mēmē abikbikap wap osodop ip jesay kuġ- -irucat kuġ. Kosunano kuġ osodop ip jebui be.

¹⁰ — Deus acā wuydaxijojom — io'e ip ya'ōberēn. — Mēmē dak wuydaxijojom — io'e ip. — Ixe ma xik'i jabikbikap pe — io'e ip ya'ōberēn.

¹¹ Deus ekawēn tojtjot'ukayū dak kacūġcūġ'i osodop ip yabikbikap akokorerēn- -ya'ōbuyxiayū dak, ebadipdip itabēġayū dak. Piġ'i o'at ip yabikbikap wap “Ēn soat podi ma xipat” i'e am Deus pe.

¹² O'jebibododon ip Deus pe. Imēn ibibodo:

Imēn cuy jeenuy, i. Deus ma soat podi ma xipat, i. Ixe ma soat podi

ma jedipap kuḡ, i. Ixe ma soat podi ma itaybitbit, i. "Xipat cīcā ēn oce-xe" i juy ace cebe, i. Soat podi ma ja'ōbuyxiap kuḡ, i. Soat podi ma ja'ō-bacaap kuḡ, i. Soat podi ma jebacaap kuḡ tak, i. Imēn ma ixē ḡasū. Kuyaje dak imēn jeenuy. Soat i'ūm puje dak, imēn ma jeenuy, i. Imēn cuy jeenuy, io'e ip jebibododon.

¹³ — Abuyū suteyū cesayrurucayū? — i juk o'e owebe ya'ōbuyxiat, aypaat. — Pomawi ip osodot? — io'e owebe.

¹⁴ — Bay'a, ōn ma wetaybit ḡu. Ēn acā etaybit — i juk oce cebe.

— Ixeyū ipiat'ajojom cīcā juk adi osodop — io'e owebe. — Inaka ibu'u ḡu o'e ip kūyjobit am Jesus a'ō kay — io'e. — Mēmē o'jedoyekereren wuywe-beam iap kay itabut ip. Imēnpuye soat taḡ iisu ip doti iwuy'isuat puxim. Soat taḡ ip ikērēat kuḡ ḡu — io'e owebe. ¹⁵ — Imēnpuye ip kacūḡcūḡ'i Deus abik-bikap wap ḡasū — io'e owebe. — Deus buywatwan ip kabiam, kabiḡ tak — io'e. — Deus xe ip nuynuy ḡasū. Yabikbikap peat soat em aḡ cekay ip xipat-ūmat ebapukap puxim — io'e. ¹⁶ — Waram pit irem ḡu ip. Soat em ibeḡbeḡ ma. Ibipuruḡ ḡu dak ip jeedop. Kajepi kuḡ cīcā ḡu dak ip jeedop — io'e owebe. ¹⁷ — Mēmē ma ixeyū kukukan jeenuy apēn ōhō iwat xipan jeōhōyū kukap puxim. Ixeyū idujowat wuy-mu-taicinapti kay tikōn ām. Deus itadisup ip. Waram pit ip jeetōn ḡu — io'e owebe.

8 Gebuje mēmē wara'at o'ḡuywut tupmuy-mūḡmūḡap. Āmap o'ḡuywut. 7 be o'ḡuywut kuy. Ka'ūmḡu wara'at o'e. Kuy oi'ūm. Darem ma ip osodop mūḡ kabi beacayū- -meia hora ma. ²Deus ekawēn tojotjot'ukayū ojojojo ḡebuje- -7 beayū- -Deus xe kacūḡcūḡ'iayū. Jexeat parasuy jo'iat o'ḡūm cebe ip. Pūḡ pepepe ma o'ḡūm cebe ip.

³ Wara'at oajēm tōmte'okuatōm mupikupikap'a kay Deus ekawēn tojtjot'ukat- -caixa'a kay. Cūḡ'i osunuy iboce. Tōmte'okuatōm mūn'a kuḡ oajēm- -ouro muḡēḡē'a'a kuḡ. Iboceat tōmte'okuatōm o'tōm- -ūm cebe tōm'ade.

— Deus ebekitkit kawēnwēn ceweju soat ip — io'e cebe iboceat. — Ixeyū ekawēn cuy eḡuwekoy tōmte'okuatōm eju tōmupikupikap'a be ouro mu- -ḡēḡē'a'a be Deus abikbikap wap — io'e cebe.

⁴ O'tōmuwekoy Deus ebekitkit ekawēn eju. O'- -tōmupik. Tōmte'okuatōmtiḡ o'jediḡeu Deus kay ceka- -wēn tojtjot'ukat pui bewi- -Deus wap cūḡ'iat pui be- -wi. Deus ebekitkit ekawēn tak o'jeu cekay tiḡ eju.

⁵ Deus ekawēn tojtjot'ukat daxa o'jat tōmte'okuat- -om mupikupikap'a bewi. Tōmte'okuatōm mūn'a o'yamunopapūn daxam. O'yaxik ipi kay. Yaxik puje, poroḡiat o'e soat taḡ ipi daḡ. Poroḡiat o'e soat taḡ ya'ōpararu, xiririkiat tak. Nobano dak o'e soat taḡ ipi daḡ. Ipi dak o'jexixi jījā. Tūmūn'a'ō o'jedede soat taḡ ipi daḡ.

⁶ Gebuje Deus ekawēn tojtjot'ukayū parasuy jo'iat o'jat imuyde am- -7 beayū.

⁷ Koapat jeparasuy jo'iat o'ḡuyde. Akadadada o'- -jedaedu daxa eju- -ade. Doy eju iwekoykey o'e. Kabi beat iwekoykeyat o'ḡuy'at ipi kay. Ade o'ḡupik ipi'in. Pūḡ eipi o'ḡupik ebapūḡ eipiayū'in. Xepxep pit o'jeipiepyat ipi'ūmat eipi. Tūmūn'ip'ip tak o'yopmupik yop'ade. Pūḡ'ip'ip'ip o'yopmupik eba- -pūḡayū'ip'in. Xepxep pit o'jeipepyat ipik'ūmat'ip. Kapi'idip tak o'tipik soatip. Ka'ūma ma o'jedipe- -pyat.

⁸ Gebuje wara'at jeparasuy jo'iat o'ḡuyde Deus ekawēn tojtjot'ukat. Xepxep o'e ip imuydedem kuy. Kabi beat co'a jo'iat'a o'yamuakōm tiboḡcīcāati be. Apikpiḡ pima o'yamuakōm. Ti'ade o'jediewexaxat toy. Pūḡti o'jediewexat toy. Xepxepiti bit idibi ma- -buk o'tinuy. O'jediewexat ḡu toy. ⁹ Tiboḡcīcāati daḡayū oap ade- -idibi tiyuati daḡacayū. Pūḡ'ūm oe'ū ebapūḡayū'in. Tak ḡu kobexixi dak o'ḡuyubaḡbaḡbaḡ. Ade jījā. Kiiian. Pūḡ ma o'ḡuyubaḡbaḡbaḡ eba- -pūḡayū'in- -tiboḡcīcāati adopa daḡat.

¹⁰ Gebuje wara'at jeparasuy jo'iat o'ğuyde Deus ekawên tojtjt'ukat. Ebpūğ o'e ip imuydedem kuy. Kasopta o'ta'at kabi kadiwi taboğata. Tasop o'tanuy wexiktak puxim. Idibi be o'taakôm. Pūğti be o'taakôm ebapūğtiayūdi be. Idi'a'a be dak o'taakôm. Pūğti'a be o'taakôm ebapūğtiayūdi'a be. ¹¹ Tacupata i iğoda butet omuy--kasopta butet. Ixeda akôm puje idibi dak ticup o'e pūğ kadi. Pūğti ticup o'e ebapūğayūdi'in. Ade oap ipi watwat tikôn puje. Oap ip ticup pibun.

¹² Gebuje wara'at jeparasuy jo'iat o'ğuyde Deus ekawên tojtjt'ukat. Ebadipdip o'e ip imuydedem kuy. Pūğ kadi kaxiepiat o'sutamukêrêrên. Kaxiaat tak o'sutamukêrêrên ip pūğ kadi. Kasopta dak o'sutamukêrêrên ip pūğ kadi. Imênpuye kaxiepipū ma o'e kaxi takêrê buye. Kaxiamat tak yopît ma kabiam o'e. Kasopta dak yopît ma kabiam o'e. Kabiok oeku ebadipdip hora bima kabia bun. Kabiok oeku ebadipdip hora bima ixima bun.

¹³ Waram ğuto oceak. Dace oceğebaa'ijjojo. Um cîcâ jepupupum oeku. Ya'ôberen ixé dace o'jewāwā.

— Karem ğu ipi juayū! — io'e ya'ôberen. — Ipiatpi'ajojom cîcâ jeedop ip — io'e ya'ôberen. — Karem ğu ipi juayū — io'e. — Ipiat'ajojom cîcâ jeedop ip — io'e. — Warara'acat ğasū jeparasuy jo'iat ğuyde Deus ekawên tojtjt'ukayū — io'e. — Ebpūğayū mabuk jeparasuy jo'iat ğuyde — io'e. — Ixeyū be imuyde buje, ipiat supi'ajo jîjâ ipi juayū — io'e ixé dace.

9 Gebuje wara'at jeparasuy jo'iat o'ğuyde Deus ekawên tojtjt'ukat. Pūğpōğbi o'e ip imuydedem kuy. Kasopta jo'iat ojojojo- kabi kadiwi o'takopiata jo'iat. Kabi beat chawe o'ğūm ixé be ikūybioreğ cîcâatkūy domudip'ukap echave. ² Kasopta jo'iat iğo kūy o'sukūynomudip'uk ibo echavem. Ikūynomudip'uk puje, o'tiğcēm ikūy bewi. Waên yoboğat peatiğ puxim o'tiğcēm. Iğodiğ kaxi o'ğupinēm tiğboğ cîcâ buye. Soat tağ o'e kabiok. ³ Arōxêkxêk co'iaiyū o'kop ixé diğ eju. Ipi kay ip o'kop. Dat puxim ip tōğtapi osodop Deus a'ôbi.

Apocalipse 9

⁴ — Kapī'idip cuy epetimukērēri kabi beat cebe ip- -arōxēkxēk co'iaiy mūn'ip'ip tak cuy epeyopmukērērēn Wara'at tak cuy epeḡukērērēn ḡu ka Teku Deus ebekit iam topa'a bararak' juy epeju — io'e. — Ixeyū be acā juy pi'ajoat — io'e cebe ip- -arōxēkxēk c Gasū bit puk yaoka pi ma eywebe — i Ipiat pit epesupi'ajojoat cebe ip 5 ka io'e cebe ip.

Ixeyū arōxēkxēk co'iaiyū tōḡtapi puxim. ⁶ Deus ebekitkit'ūmayū be ipia ip dat tōḡtapi jo'i 5 kaxi bima- -topa' ayū be. Imēnpuye je'ūap kudadam i je'ūap ip tobuxik ḡu. Je'ū ojuy ma'ḡu ka ce'ū ba'ore je'e ip.

⁷ Ixeyū arōxēkxēk co'iaiyū cavaroyū ip- -jenopaḡōḡōm cumayū buxim- -icaat be. Jadaḡat kuḡ ip oeku ouro muḡē Aḡokatkat topa buxim ip o'topadop. puxim ip o'yadaptop. Leāo nūy buxim ⁹ Icaat kuḡ oeku ip jekūm'a eju- -ferro Carro jenopaḡōḡōap kay daodaodao r a'ō buxim o'ceḡeba'a'ōnuy- -cavaroyū xiḡiap a'ō buxim. ¹⁰ Dat puxim ip oeku jekpu be. Jenōḡtapiian ma juk adi oe pi'ajojoan topa'a bararak'ūmayū be. 5 adi oekuku ip ipiatpi'ajojoan cebe ij kukat ikūybioreḡ cīcāatkūy beayū ku Ixe butet Abadom i omuy Judeuyū a'ōm. Apoliāo i omuy ibutet Grego wuymu'ūm'ūm'ukat iape wuya'ōm.

¹² Kuy pūḡ o'kap ipararu jījāat. 2 omuyku.

¹³ Gebuje wara'at jeparasuy jo'iat ekawēn tojotjot'ukat. 6 be o'e ip im Tōmte'okuatōm mupikupikap'a bewiat' ouro muḡēḡē'a bewiat'a'ō- -Deus abi a'ō. ¹⁴ Ixe a'ō o'jekawēn ixe Deus el'ukat pe- -imuyde isuat pe.

— Ebureyū juy eḡuwekap — io'e.

omuy ip taomūnmūn — io'e. — Taomūnmūn ip omuy Eufratesdi xe- -tiboḡati xe — io'e.

¹⁵ Kabi beat a'ōbi ixeyū Deus ekawēn tojtotjot'uk-ayū soat kuḡ ip osodop jebui be. Soat kuḡ ip osodop pūḡ yaoka am ebapūḡayū'in- -ipi watwat'in. Deus epeju i'eap wiwim ip osodop. Wara'at koato be ḡu jeeju ip ixeyū aoka am, wara'at kaxi be ḡu dak, wara'at kabia be ḡu dak, wara'at ehora be ḡu dak. Deus pe "Epeju" i'e buje acā jeeju ip ixeyū aoka am. Ixeyū ebadipipayū o'ḡuwekap. ¹⁶ Pebūrū ixeyū esorarayū iap awēḡ oyawēḡtobuxik kuy. Tak'ūm ip osodop- -ade jījā. Kiiiiiān. 200,000,000 be ip osodop- -cavaro akpi jejeayū- -nopagōḡō'ukayū. ¹⁷ Sorarayū ōhōyū ojojojo wexey jo'iat pe cavaroyū. Ixeyū akpi jejeayū dak ojojojo. Soat yakpi jejeayū icaat kuḡ ip osodop jekūm'a eju. Pūḡpūḡ ikūm'a ejuat ipakpuk osunuy daxa buxim. Warara'acat iremrum osunuy wita'a buxim- -yadeiboḡat'a buxim- -safira'a buxim. Warara'acat ipekpuḡ osunuy enxofrenōm puxim. Cavarō'a leāo'a buxim o'yanuy. Ibi daḡwi diḡ cēmcēm o'e daxadiḡ, enxofrenōmtiḡ tak. Daxa dak cēmcēm o'e ibi bewi. ¹⁸ Ade jījā ipi watwat oap ip cavaro bi daḡwi ijēm'ibit pibun- -daxae pibun, daxadiḡ pibun tak, enxofrenōmtiḡ pibun tak. Pūḡ'ūm oe'ū ebapūḡayū'in. Xepxep o'jepoyat. Imēn ma ip oap. Xere'ūma ipi watwat oap. Ade jījā. ¹⁹ Cavaroyū ipi watwat o'yaoka jebi bewi o'jēm ian, jedoaybu bean tak. Ipiat o'supi'ajojoat ip ipi watwat pe puybu nuypi jo'i.

²⁰ Cavaroyū ipiatpi'ajojoanap epere buje, jemu- muḡē kay jetabucap o'jepere ḡu ip- -o'jepoyat'iaiyū. Wuyju Deus kay iap co'i ip osodop jemumuḡē kay jījā. Jemumuḡē kay jījā ip osodop- -ouro muḡēḡē kay, prata muḡēḡē kay dak, bronze muḡēḡē kay dak, wita'a muḡēḡē kay dak, ip muḡēḡē kay dak. Ibiōḡbuk kērēayū kay dak ip osodop. Ixeyū emumuḡēḡē be ijo ba'ore, cekūyjo ba'ore dak ip, cexiḡxīḡ pa'ore dak ip. Inaka tūybe iteyū deusyū iān o'e ip. Oe'ū'ū ḡu ip arōxēkxēk co'iaiyū nūy pibun, cavaro nūy pibun tak. Imēnpit jetabucap o'jepere ḡu ip jemumuḡēḡē kay. Deusat kay ḡu ip o'e. ²¹ Wara'acat aokakaap ip o'je-

pere ġu. Jebukaypacap tak o'jepere ġu ip. Warara'acat tayxi kaykayap tak o'jepere ġu ip. Warara'acat itop kaykayap tak o'jepere ġu ip. Warara'acat pubut tujupa'um'umap tak o'jepere ġu ip. Oibu'un ġu ip ikērēat muġēġēm.

10 Gebuje wara'at ojojoho Deus ekawēn tojotjot'ukat- -ya'ōbacaat. Kabi kadiwi kom pima ojojoho. Ixe esay kabikerereat co'i osunuy. Koropsanobu o'jebueku yakokoreren. Ixe dopa kaxiepiat puxim o'topanuy. Ixe dao daxae iecūġat puxim o'taonuy- -isopat puxim. ² Livrodup kuġ osunuy jebui be- -tup'icatup kuġ- -tupayaatup kuġ. Jei o'suimōġ tibog cīcāati be jedaoat kadiat i. Jedao'ūġat kadiat i bit o'suimōġ ipi be. ³ Ya'ōberen o'jewāwā leāo ewāwāap puxim. Cewāwā buje 7 be xiririkpaw'iat o'ya'ōbu ya'ōberen. O'jepaw ya'ōberen. ⁴ Cepaw isum apēn cuk ip o'e iaptup kuka otupmubararak. Kabi beat pit o'jekawēn owebe.

— Apēn 7 be xiririkpaw'iat o'e ewebe iaptup ġu juy etupmubararak — io'e owebe. — Etupmubararak ġu juy warara'acat pe itaybicap puxim — io'e owebe.

⁵ Gebuje o'jebaepacūġ kabi kay Deus ekawēn tojotjot'ukat jeba'at kadi- -tibog cīcāati be cūġ'iat- -ipi be cūġ'iat- -kuy ojojohoiat. ⁶ O'jekawēn Deus a'ōpiju. Ixe Deus soat em itait. Je'ū ġu ixe bit. Ixe juk kabi o'ġuġē, soat kabi beacat tak. Ipi dak cuk o'ġuġē, soat ipi juacat tak. Tibog cīcāati dak o'timūġē soat tidaġacat tak.

— Ġasū bitibun ġu jeku — io'e Deus a'ōpiju. ⁷ — “Soat je'bapuk obikuyap taġ,” i juk o'e Deus jebuywatwat'ukayū be- -jekawēn muwēnuwēn'ukayū be — io'e owebe. — Apēn Deus ibikuy osunuy iap iba'arēm osunuy soat pe kuy bima — io'e. — Ixe ekawēn tojotjot'ukat pe jeparasuy jo'iat muyde buje bit, soat je'bapuk apēn ibikuy osunuy iap taġ- -kanomūmat pe jeparasuy jo'iat muyde buje — io'e owebe.

⁸ Kabi kadiwiat a'ò waram oya'ijjojo. Waram o'jekawèn owebe.

— Tupayaatup cuy etupu- -tup'icatup- -Deus ekawèn tojotjot'ukat pui bewi- -ipi be cūg'iat pui bewi- -tiboğ cīcāati be cūg'iat pui bewi — io'e owebe.

⁹ Oju cekay.

— Ma — i oce cebe. — Etupūm owebe, — i oce cebe.

— Juku — io'e. — Etupu — io'e owebe. — Etup'o — io'e. — Ebi be bima tupkurukuru je'e eit puxim — io'e. — Edada be bit, tupsak je'e — io'e.

¹⁰ Otupu ibui bewi tup'icatup, tupayaatup. Otupkūn. Otup'o. Tupkurukuru o'e obi be bima. Tupkūn puje bit o'e tupsak odada be.

¹¹ — Waram tak cuy apēn Deus adeayū idaxijo iap ekawèn cuy eğuwēnuwēn soat pe — io'e owebe. — “Ixe soat tiwatwayū'in idaxijo pin,” i juy ece, “soat ka watwayū'in tak, soat eipi watwayū'in tak, soat a'ôm kawēnwēn'ukayū'in tak,” i juy ece soat pe — io'e owebe.

11 Gebuje kabi beat imuweğūngūnap'ip o'yop-ūm owebe.

— Deus eju kawēnwēnap'a juy eyamuweğūn- -yaboğat'a — io'e owebe. — Wūnca mupikupikap'a dak cuy eyamuweğūn- -caixa'a — io'e. — Pebūrū paxi e'em “Ēn xipat cīcā,” i Deus pe ceweju kawēnwēnap'a be? Ixeyū dak cuy eğuweğūn — io'e owebe.

² — Kacūgkadiat pit cuy eğuweğūn ġu- -yakokorerenayū yanaxinōm — io'e. — “Wekawēn kay'ūmayū jeōm oweju kawēnwēnap'a naxinōm pe,” i juk o'e Deus — io'e owebe. — 42 kaxi bun warēmtağ ma jeku ip Deus ka dağ- -ikērēat kuğ ġuiat ka dağ — io'e owebe. ³ — Xepxepayū oğuju wekawēn muwēn ām — io'e. — Ikurususucat kuğ jeku ip jesay kuğ oceğuycūğ eykay eyju warēmtağ ma jekukum puye iap mubapuk am soat pe. Ibun cīcā jeedop ip Deus ekawēn muwēnuwēn- -1,260 kabia bun — io'e.

⁴Ixeyū xepxepayū oliveira'ip puxim wekawēn muwēnuwēn'ukayū. Lamparina'a mūn puxim tak ip - ipi juacat kukat etabun anuynuyat'a buxim. ⁵Warara'acayū warēmtaḡ ixeyū xepxepayū kuk ojuy bima, daxa cēmcēm ikōmbie daḡwi yaoka am. Imēnpuye je'ū ip warēmtaḡ ikuk ojuyayū. ⁶Ixeyū a'ōbi muba'at ajēmjēm ḡu Deus ekawēn muwēnuwēn ip pima. Deus a'ōbacaap kuḡ ip xepxepayū. Idi'a dak ip idimuwxat toy ja'ōbi. Ja'ōbi ip warēmtaksuḡat ḡudot ipi juayū mu'ūm ām, ku beacat mu'ūm ām tak, ku muypi'ūm ām. Imudot pin pima, ip ḡudot.

⁷Deus ekawēn muwēn eperē isum yoboḡ cīcāat jajēm ipararu jījāat. Jajēm ikūybioreḡ cīcāatkūy bewi. Jebacacan je'e xepxepayū eju. Xepxepayū a'ōbacaap ḡu'ūm ipararu jījāat. Yaoka ip. ⁸Ixeyū'ūm'ūm jebit po'i jeedop akidaḡ ikaboḡatka be-korosa be ixeyū kukukat o'subamupaya ip iatka be. Po'i jeedop ip uk'a ukpibubu be soat pe ijo am. Ibo ka watwat kay ḡebum pima:

— Sodoma ka watwat co'i ip ikērēat kuḡ — i wuyju e'em. — Egito eipi watwat co'i ip ikērēat kuḡ — i dak.

⁹Ibun'ūma jeak ip adeayū ixeyū'ūm'ūm jebit kay-ebapūḡ kabia bun ma, ipidaseat kabia dak. Adeayū jeak ixeyū'ūm'ūm kay-soat eipi watwat'in, soati watwat'in tak, soat a'ōm kawēnwēn'ukayū'in tak, soat iwarururuayū'in tak. Ikot an ḡu ip.

— Ixeyū'ūm'ūm cuy epejokot ḡu — i je'e ip soat.

¹⁰Icokcok cīcā je'e ip ipi juacayū xepxepayū'ūm'ūm oe'ū iap kay-Deus ekawēn muwēnuwēn'ukayū'ūm'ūm oe'ū iap kay. Peta ḡuḡē ip jecokcokap pibun ma. Iūmūmap je'ḡūm ip jewewebe jecokcokap pibun. Deus ekawēn muwēnuwēn'ukayū ipiat o'supī'ajoat ipi watwat kay-ixeyū xepxepayū. Imēnpuye icokcok je'e ip xepxepayū'ūm'ūm e'ūap kay. ¹¹Xet. Xet. Xet. Kabiam. Kaxicuḡ pima, puw, Deus o'jepuw cekay ip jebidom. Waram ip o'jetait. Kirik'āy. O'āy'āy ip. Imēnpuye iparara jījā ip o'e waram ip o'jetait iap o'tobuxik puye. ¹²Kabi beat

ya'oberen o'jewāwā xepxepayū be -Deus ekawēn mu-
wēnuwēn'ukayū be -waram o'jetait'iaiyū be.

— Epeyeu juy ijodi — io'e cebe ip.

Jekay itakomaayū etabun ma ip o'jeu kabi kay
ġebuġe bit. Kabikererereat taġ ip o'jeu.

¹³ Ceu isum ip ipi o'jexixi jījā. Pūġ kadi o'suka-
mu'ūm 10 beatka'in. Tak ġu oap ip ipi exixi buġe.
Ade jījā oap ip. 7,000 beayū'ūm'ūm oap ip. Iparara
jījā o'e ip o'jepoyat'iaiyū.

— Deus soat podi ma ya'ōbaca — io'e ip jeparara
pibun. — Kabi beacayū kukukat soat podi ma
ya'ōbaca — io'e ip jeparara pibun.

¹⁴ Kuy xepxep o'kap ipararu jījāat. Aġ cuy epe-
sop imēnpit. Wara'at cuy omuyku ipararu jījāat.
Ebaġūġ jeedop ip.

¹⁵ Ġebuġe wara'at jeparasuy jo'iat o'ġuyde Deus
ekawēn toġotġot'ukat. 7 be kuy imuydedem o'e.
Ka'ūmġu wara'at. O'e kuy.

— Ġasū Deus soat kukukan o'e — io'e kabi
beayū ya'oberen. — Ixe emunaē dak soat kukukan
o'e ġasū — io'e ip. — Soat em ixe soat kukukan jee-
nuy. Puġūn xe'e ixe soat kukukan iap i'ūm? Ka'ūma
em ma — io'e ip.

¹⁶ Ya'ōbuyxiayū dak piġ'i o'at'at ip jedop am ipi
ju Deus wap “Ēn xipat” i'e am cebe-24 beayū,
Deus xeayū, jabikbikap ceġe kaxixik'iaiyū.

¹⁷ Ocekukukat, ēn acā Deusat, io'e ip.

Ēn soat podi ma a'ōbaca, io'e ip. Ġa-
sū ēn etabēġ, i. Kuyġe dak cuk adi
etabēġ eġuy, i. Kuy ġuk a'ōbacaap
eġubapuk soat pe, i. Imēnpuyē “Ēn
xipat cīcā,” i oceġu e'em ewebe, i.
Soat kukukan ece ġasū, io'e ip. ¹⁸ E-
kay itabut'ūmayū itakoma jījā ekay,
etakomaap mubapukap ehora oajēm
puyē, i Ġasū ipiat esupi'ajoġoat a'ō-
kay'ūmayū be, i. Imēnpuyē itakoma
jījā ip ekay, i. Apēn cuk adi oekuku
ip ipi ju bima iaptei eteida soat pe
ce'ū'ūayū be, i. Cedaġ ma ġuk adi oe-

kuku ip iaptei eteida ebuywatwat'ukayū be -ekawēn muwēnuwēn'ukayū be dak, soat ebekitkit pe dak, ibuyxim ekukuk'ukayū be dak, i. Soat pe cedaḡ ma eteida- -yoboḡayū be, ka'ūmaayū be dak, i. Ḡasū dak ipi mu'ūmu'ūm'ukayū eḡu'ūm- -a'ōkay-ūmayū, io'e.

Imēn o'e ip ya'ōbuyxiayū Deus pe.

¹⁹Deus nuynuyap'a exīntabi o'jekoce ḡebuje- -kabi beat'a. Deus ekawēn kukatopa mūn'a yabapuk o'e soat pe- -witadopa be ibararak iat mūn'a- -caixa'a- -ouro muḡēḡē'a. Iḡo'a jo isum xiririkiat o'jepaw ya'ōpuruḡ. Kōnēkōnēk io'e. Xiririk xiririk io'e. Ipi o'jexixi jījā. Akadadada o'ta'at ipi be ta'ade.

12 Gebuje wara'at ipararuat ojojoho kabi be yoboḡat. O'jebapuk omukūyjo am apēn ḡuyjom je'bapuk iam. Koam ayacat ojojoho. Iekabek oeku kaxiepiat kuḡ. Kaxiaat ixē i diotpe osunuy. Ouro muḡēḡē osunuy ya be- -12 be kasopta kuḡat. ²Yukreḡ osunuy. It kam pasuḡ osunuy. Ya'ōberen o'jewāwā je'it pibun.

³Gebuje wara'acat o'jebapuk kabi be omukūyjo am apēn ḡuyjom je'bapuk iam. Seḡemoxixi jo'iat ojojoho ipakpukat. 7 be ya'a o'yanuy. Soat'a be ouro muḡēḡē kukukuḡ osunuy. 10 be yakanasū. ⁴Ta'adeata kuḡ oeku jenomuju jedoaybu eju kasopta. Pūḡta o'ta'uk kasopta ebapūḡayūda'in. Tamuy'at'an oeku ipi kay. Cū. O'jecūḡ yukreḡat tobuxik puje. Ixē wap cūḡ'i osunuy i'it oap ojuy. Ikap isum i'it o ojuy osunuy. ⁵Ayacat o'su'itkap aḡokatkat. Ixē aḡokatkat soat ka kukukan jeenuy ḡuyjom. Ya'ōpuruḡ ip jukuk jebui be icaat kukat puxim. Ka'ūma ma kūyjobit'ūm jeenuy ixē a'ō kay. Soat ya'ō kay jeedop ip kūyjobit. Bekicat kap isum Deus pit o'takoy. Kabi kay o'tujuu soat em jeenuy ām jexe. O'tujuu seḡemoxixi be i'oap puxim. ⁶Ayacat tak o'jenapōn uk'a'ūmat kay. Iboce

kuy juk Deus soat o'gumuxipan tūy ām. Deus xipan jukuk iboce. 1,260 kabia bun xipan jukuk.

⁷ Gebuje nopaḡōḡōm o'e ip jeweweju ma kabi beacayū. Miguel a'ōkayayū nopaḡōḡōm o'e seḡemoxixi a'ōkayayū eju. Miguel a'ōkayayū Deus ekawēn tojotjot'ukayū. Seḡemoxixi a'ōkayayū Deus ekawēn tojotjot'uk osodop ip kuy bima. Ḡasū bit oibu'un ip Deus ekawēn tojotjon. ⁸ Miguel a'ōkayayū seḡemoxixi a'ōkayayū a'ōbacaap o'ḡu'ūm. Top pa'ore o'e ip kabi be. Deus oibu'un ip ikuḡ. ⁹ Seḡemoxixi o'ḡujēm ip kabi bewi. Kuyje seḡemoxixi puybum osunuy--Deus ekadai be osunuyiat. Ibiōḡbuk kērēayū kukukat ixē. Satanás i ibutet. Ibutet ade. Soat ipi watwat muḡuykukuku'ukat ixē. Ixē ma o'joxik ip kabi bewi. Ipi kay o'joxik ip ya'ōkayayū eju.

¹⁰ Gebuje kabi beat oya'ijojo. Ya'ōberen o'jekawēn. Imēn ixē o'e:

— Ḡasū bit Deus ipi juacayū daxijojoapi oibu'un — io'e. — Kuy juk ja'ōbacaap o'ḡubapukpuk soat pe — io'e. — Ixē acā soat kukukan o'e — io'e. — Deus emunaē dak ja'ōbacaap o'ḡubapukpuk soat pe--Cristo — io'e. — “Soat podi ma wa'ōbaca,” io'e soat pe — io'e. — Wuykitpitpiyū muymuy'ukat o'joxik kabi bewi — io'e. — Ixē te'e ma imuymuy'uk ip osunuynuy Deus pe — io'e. — “Ikērēat kuḡ eyju Deus xe,” i te'e ma e'e'uk osunuynuy. Soat em wuykitpitpiyū muymuy'uk osunuynuy--kabiabun, iximabun tak — io'e. — Deus ixē bit o'joxik kabi bewi — io'e. ¹¹ — Iparara ḡu ip osodop warara'acat pe jaokaap puxim wuykitpitpiyū Jesus kayayū — io'e. — Jetabucap o'jepere ḡu ip jaokaap puxim. Itabut osodop ip mēmē buxim o'jedoyekereren je'ū ām wuywebeam iap kay — io'e. — Ibu'u ḡu o'e ip kawēn icēmat muwēn ām — io'e. — Imēnpuye jemuy-muy'ukat a'ōbacaap o'ḡu'ūm ip — io'e. ¹² — Imēneju: “Kabi icokcok cuy jeenuy,” i ōn e'em. “Kabi beacayū dak icokcok cīcā juy jeedop ip,” i ōn e'em — io'e. — Karem ipi juacat, tiboḡ cīcāati beacat tak — io'e. — Ipiat'ajojom cīcā ip jeedop, ibiōḡbuk kērēayū kukukat kuy o'kop cekay ip puye — io'e. — Itaybit darem ma ipiat osupi'ajojoat Jesus kay itabu-

cayū be iam — io'e. — Imēnpuye itakoma jījā o'e — io'e.

¹³ Ipi be juk oxik ip iam itaybit pima, ayacat tobatban oeku- -aḡokatkat'it'it kukat tobatban- -ikap'isuat kukat tobatban. Tobatban oeku yaoka ojuy. ¹⁴ Inaka Deus dace buximat eḡeba o'ceḡebaūm ayacat pe. O'ceḡebaūm cebe pupupum jenapōn ām jeka kay- -uk'a'ūmatka kay. Ibo ka be Deus xipan ixē jukuk. Ebaḡūḡ koato bun xipan jukuk, ipidaseat koato dak. Cekaykay ba'ore jeenuy puybu jo'iat pe. ¹⁵ Seḡemoxixi bit idibi o'timujēm jekōmbie daḡwi. Idixidi buxim o'timujēm. O'timujēm wūy jījā ayacat tujowacap ojuy. ¹⁶ Ipi bit ayacat o'taxijo. O'jedeḡ idibi ōm ām seḡemoxixi kōmbie daḡwiati ōm ām. ¹⁷ Imēnpuye seḡemoxixi itakoma jījā o'e ayacat kay. O'ju nopagōḡō ām ixē uktakyū eju- -soat eju- -Deus ekawēn kay kūyjobicayū eju- -Jesus ekawēn taḡ jekuku'ukayū eju. ¹⁸ Seḡemoxixi bit ka'oririt pe osunuy. Cūḡ'i osunuy ka'ūma kuḡ ma- -ibuipuk ma.

13 Gebuje ipararu jījāat ojojōjo. Tiboḡ cīcāati bewi jehum o'e kapurūḡ kay. 7 be ya'a. 10 be yakanasūyū. Ouro muḡēḡē kukukuḡ osunuy soat'a kanasū daḡ warara'acat kukuk'ukat'a daḡat puxim. Deus muymuyap ibararak osodop soat'a daḡ. ² Ixe ipararu jījāat leopardo buxim osunuy- -wida buxim. Ixe i urso i buxim- -widabaro i buxim. Leāo bi buxim o'subinuy. Seḡemoxixi ja'ōbacaap o'ḡūm ipararu jījāat pe. Jabikbikap tak o'ḡūm cebe. Imēnpuye seḡemoxixi jo'i o'e ya'ōca. Kūyjobit o'e ip seḡemoxixi a'ōkayayū ipararu jījāat a'ō kay dak. ³ Pūḡ'a wero-wero kuḡ o'yanuy ipararu jījāat'a. Ce'ūat'a jo'i o'yanuy. Weroweroboḡ pit kuy oiyo. Imēnpuye:

— Apēnpuye xe'e oe'ū ḡu werowero pibun? — io'e ip jewewebe ipi daḡacat.

Itabēḡbēḡ o'e ip yajōjom. Kūyjobit ip o'e ya'ō kay oe'ū ḡu buye. ⁴ Seḡemoxixi ja'ōbacaap o'ḡūm ipararu jījāat pe. Imēnpuye soat ipi juacat itabut cīcā osodop

seğemoxixi kay. Ipararu jījāat a'ō kay dak ip osodop.

— Soat podi ma ipararu jījāat ja'ōbacaap kuğ — i te'e ma o'e ip. — Ka'ūma be ma ixe a'ōbacaap mu'ūm put — i te'e ma o'e ip.

Tūybe seğemoxixi Deus iān o'e ip.

⁵ Seğemoxixi o'jekawēn ipararu jījāat pe.

— Deus cuy ejomuymuy — io'e cebe. — Eka-wēnkērēm cuy eğuy — io'e cebe. — Quarenta e dois kaxi bun cuy ejeku ipi dağayū paraktağ — io'e cebe.

⁶ Imēnpuye ipararu jījāat Deus o'jomuymuy jījā. Deus o'subutetmuymuy. Deus nuynuyap tak o'jomuymuy jījā. Kabi beayū dak o'jomuymuy jījā.

⁷ — Deus ebekitkit eju juy nopagōğōm eğuy — io'e seğemoxixi cebe. — Eğubu'un cuy ip Deus kay — io'e ipararu jījāat pe.

Seğemoxixi ja'ōbacaap o'ğūm cebe soat tiwat-wat'in ya'ō kay i'e am, soat eipi watwat'in tak, soat a'ōm kawēnwēn'ukayū'in tak, soat iwarururuayū'in tak. Soat ip kūyjobit o'e ya'ō kay. ⁸ Imēnpuye jewemuğuykukukum ip je'e ipi juacayū. Tūybe Deus iān je'e ip ipararu jījāat pe.

— Ēn acā Deusat — i te'e ma je'e ip.

Ixe kay ip itabut je'e apēn wuyju wuyetabut Deus kay iap puxim. Mēmē buxim oe'ūiat pubutup pe ibutetet ġu ip- -abuyū Deus xe itait jeedop iaptup pe. Iğodup pe osodop ġu ibutet ip ipi muğē'isum ma.

⁹ Iboam eyetaybit pin pima, eya'ōpicūgcūğ cuy epesop. ¹⁰ Taomūnmūn ijuibit taomūn ma ip. Payaom yaoka'ibit yaokan ma ip payaom. Imēnpuye yukpicēğēm ġu juy jeedop ip Deus ebekitkit jetabucap kuğ ipiat'ajojom ma'ğū ip. Itabut cīcā juy jeedop ip cekay.

¹¹ Gebuje wara'at ojojojo ipararu jījāat. Xepxep osodop ip ġasū. Ipi bewi o'jēm badiwi. Xepxep akanasū o'yakanasūnuy. Cordeiro'it'it akanasū jo'i. Seğemoxixi ekawēn co'i o'jekawēn kawēnkērē. ¹² Ya'ōbaca jījā osunuy koapat ipararu jījāat a'ōbacaap co'i. Ja'ōbacaap mubapukpuğ osunuy koapat ipararu jījāat etabutpe.

— Koapat ipararu jījāat a'ō kay juy epesop — io'e soat ipi juayū be. — Werowero pibun oe'ū pin

iat a'ō kay juy epesop — io'e cebe ip. — Kuy oiyo iat a'ō kay juy epesop — io'e cebe ip.

Imēnpuye ya'ō kay o'e ip ipararu jījāat a'ōbi. ¹³Wuywebe imuḡē ba'oreap mubapukpuḡ oekuku koapat ipararu jījāat. Ja'ōbacaan daxe o'ḡukopkop kabi bewi. Ipi kay o'ḡukopkop soat etabutpe ixeyū mutabut am jewekay. ¹⁴Soat ipi juayū o'ḡuḡuykuku-ku iba'oreap o'ḡubapuk puye. Wuywebe i'e ba'oreat mubapukpuḡ osunuy koapat ipararu jījāat etabutpe.

— Koapat ipararu jījāat puximat cuy epeḡuḡē wita'am — io'e soat ka watwat pe. — Payaom wero-wero ip o'ḡuḡēiat puximat cuy epeḡuḡē — io'e. — Oe'ū ḡuiat puximat cuy epeḡuḡē — io'e.

Imēnpuye ixē buximat o'ḡuḡē ip wita'am. ¹⁵Ka-nomūmat ipararu jījāat ya'ōbacaap o'jat koapat pewi ja'ōbacaan. Ya'ōbacaap o'jat koapat puximat mutait am. Imēnpuye o'jetait koapat puximat-wita'a muḡēḡē. Cekawēn put o'e. Jekay itabut'ūmayū dak yaoka but o'e cebe.

¹⁶⁻¹⁷ — Obutet cuy epesubutetmubararak eybū-nū'a be eyba'at kadi, eydopa'a be dak — io'e. — Obutet mubararak'ūm pima, wenūmero ma epeḡubararak eydopa'a be, eybūnū'a be dak — io'e.

Imēn ixē o'e soat pe ipi juayū be-ya'ōbuyxiayū be, ya'ōbuyxi'ūmayū be dak; yopīcayū be, kariwayū be dak; jekpiwatpin ma kapikpik'ukayū be, tei'ūma kapikpik'ukayū be dak. Cewebubut pu ba'ore osodop ip topa'a bararak'ūm pima, ibūnū'a bararak'ūm pima dak. Tarekrek tak teida ba'ore ip osodop ixē butet ibararak'ūm pima, ibutet enūmero ibararak'ūm pima dak.

¹⁸Wuyetaybitbicap cuy ajat wuyetaybit am iboam. Wuyetaybit pima bit ixē enūmero imuweḡūn put kuka o'e wuywebe. Aḡokatkat putet co'i ixē enūmero. Ixē enūmero 666.

14 Deus omukūyjojom mabuk osunuy apēn jebapuk āmap kabia be iam. Apēn jebapuk āmap kabia bima iap cocom mabuk oḡuy wexey

jo'iat pe. Mēmē buxim oe'ūiat ojojoho. Cūg'i osunuy co'a bicūgpe- -Siāo'a bicūgpe- -Jerusalēm ka beat'a bicūgpe. Adexiri osodop ixe eju- -144,000 beayū. Mēmē butet ibararak osodop topa'a be ip. Ixe ebay butet tak ibararak osodop topa'a be ip. ²Kabi kadi-wiat'a'ō dak oya'ījojo. Ya'ōboğ o'ya'ōnuy ti'acap'a'ō jo'i. Ya'ōpuruğ tak o'ya'ōnuy xiririkiat'a'ō jo'i. Ya'ōdip cīcā dak o'ya'ōnuy adedeayū jebubut'uk muydedem pimaap a'ō buxim- -harpa muydedem ip pimaap a'ō buxim. ³Ixeyū 144,000 beayū pibodo iisuan ip o'jebibododon. Deus abikbikap wap kacūg-cūg'i osodop ip jebibododon, ebadipdip itabēgayū wap tak, 24 beayū ya'ōbuyxiayū wap tak. Ka'ūma be ma itaybit put ibo pibodom. 144,000 beayū be acā itaybit put- -Deus emudaxijoyū be acā- -ipi ju oekuku'iaiyū be acā. ⁴Ixeyū 144,000 beayū o'jewemukērē-rēn ġu- -pūğ em tak ka'ūma. Soat tağ iisu ip osodop ayacat eju o'jepo ġu bukiat puxim. Mēmē badiptatam oekuku ip soat tağ. Deus ixeyū o'taxijo kūyjobit'ūmayū parakpewi- -ipi juacayū parakpewi. Ixeyū ma koam o'jewejak Deus kay soat em jedop am cexe. Mēmē kay dak o'jewejak ip soat em jedop am cexe. ⁵Napapa'uk ġu ip osodop. Soat tağ ip iisu.

⁶Gebuje wara'at ojojoho Deus ekawēn tojtjot'ukat. Um oeku eium. Kopkom oeku kawēn idipat muwēn ām soat pe ipi juayū be- -soat iwarururuayū be, soat tiwatwat pe dak, soat a'ōm kawēnwēn'ukayū be dak, soat eipi watwat pe dak. Kawēn idipat i'ūm ġu. Soat em itabucayū ibo muwēnuwēn jeedop. I'ūm ġu cekawēn- -kawēn idipat.

⁷ — Ibuyxim cuy Deus epejukuk — io'e ya'ōberen um cīcāat. — “Deus soat podi ma ya'ōbaca,” i juy epe'e'e — io'e. — Gaxīn ma ixe Deus ideida soat pe apēn ipi dağ pima juk adi oekuku ip iaptei — io'e. — Xipacat je'ġūm xipacayū be. Ipiat supi'ajoat ikērēat mujurūğrūğ'ukayū be bit — io'e. — “Warara'acat podi ma ēn xipat,” i juy epe'e Deus pe — io'e. — Ixe Deus kabi o'ġujurūğ, ipi dak — io'e. — Tiboğ cīcāati dak o'timujurūğ — io'e. — Idi'a dak o'ti'amujurūğ — io'e.

⁸ Wara'at Deus ekawēn tojtjt'ukat koapat nomuju oeku. Um oeku eium.

— Babilônia ka watwat puximayū a'ōbacaap oi'ūm — io'e. — Ikērēat muḡēḡē'uk osodop ip soat ka watwat eju — io'e. — Warara'acat tayxi eju jepopo'ukap puxim ikērēat muḡēḡē'uk ip osodop, warara'acat itop eju jepopo'ukap puxim tak — io'e. — Ḡasū bit ixeyū a'ōbacaap oi'ūm — io'e.

⁹⁻¹⁰ Wara'at Deus ekawēn tojtjt'ukat ojojosoat taḡ iisuayū. Ebapūḡ ip um oekuku eium.

— Ipararu jījāat pe “Ēn xipat cīcā” i'e'e'ukayū ipiat supi'ajojo jījā-ixe jo'iat pe “Ēn xipat cīcā” i'e'e'ukayū dak — io'e. — Ibutet pararak topa'a beayū dak ipiat supi'ajojo jījā-ibutet pararak ibūnū'a beayū dak — io'e. — Deus itakoma jījā je'e ixeyū kay. Itabotaidabotbot ḡu je'e ixeyū kay-pūḡ kay dak ka'ūma. Iba'ore je'e cebe ip jenapōn ām ipiat'ajojoap puxim — io'e. — Ipiat supi'ajojo jījā ma ip. Daxa be ipiat supi'ajojo ip, enxofre isopat pe dak — io'e. — Deus ekawēn tojtjt'ukayū etabutpe ipiat supi'ajojo ip, soat taḡ iisuayū etabutpe. Mēmē etabutpe dak ipiat supi'ajojo ip — io'e. ¹¹ — Ixeyū beaptiḡ jediḡeuhum soat em daxadiḡ. Ka'ūmḡu kabi daḡ tiḡ'ūmat. Soat em ma tiḡteḡ e'em. Iximabun, kabiabun tiḡteḡ e'em — io'e. — Ixeyū be ipiatpi'ajojoap tak i'ūm ḡu. Cebodoy ba'ore cebe ip. Kabiabun ipiat'ajojom ip jeedop, iximabun tak-ipararu jījāat pe “Ēn xipat” i'e'e'ukayū, ixe jo'iat pe imēn i'e'e'ukayū dak-topa'a be ibutet pararakayū — io'e.

¹² Apēn ibutet pararak ibūnū'a beayū ipiat supi'ajojo jījā iap kay ḡebum pima, yukpiceḡēm ḡu juy jeedop ip jetabucap kuḡ Deus ebekitkiyū-Deus a'ō kay kūyjobicayū-Jesus kay jetabucap kukayū.

¹³ Ḡebuḡe kabi kadiwiat'a'ō oya'ijojo.

— Pūḡpūḡ xipacayū'in mabuk yaoka ip ḡasū itakomaayū jetabucap epere'ūmayū, ipararu jījāat putet mubararakan ibu'u'uayū — io'e. — Icockok ip jeedop o'yaoka ma'ḡu ip — io'e. — Iboap cuy eḡubararak taperadup pe — io'e.

— Icēmān ēn e'em — i Deus biōḡbuk o'jede. — Icockok cīcā ma ip jeedop — io'e. — Ipi ju bima o'.

jekapikpik cīcā ip wuykukukat peam — io'e cebe-
kabi beat pe. — Ce'ū buje bit ip jeeboday — io'e.
— Kapikap kay ġu ip je'e — io'e cebe. — Jeka-
ba'ūm ip — io'e. — Xipan cīcā ip o'jekapikpik iap-
teim tak ip idujuu jeweju — io'e cebe.

Imēn Deus biōġbuk o'jede kabi kadiwiat a'ō
wa'ōpiju.

¹⁴ Apēn jebapuk āmap kabia bima iap cocom
mabuk oġuy wexey jo'iat pe. Aġokatkat co'iat ojojo-
jo. Xik'i osunuy kabikerereat ceje. Ouro muġēġē kuġ
jabe osunuy. Pēġap kuġ osunuy jebui be-
-tūybiat kuġ.

¹⁵ Deus ekawēn tojtjt'ukat o'jēm Deus eju ka-
wēnwēnap'a bewi. O'jewāwā ya'ōberen kabikerereat
cejeat pe.

— Epēġām cuy etiptakat soat eipi daġatip, kuy
o'taop puye — io'e ya'ōberen. — Ġasū ma juy etip-
takat — io'e.

¹⁶ Imēnpuye cococo'i o'e. Tiptakatkan o'e je-
pēġām kabikerereat cejeat. Jepēġap o'ġuyco. Soat
eipi daġatip takatkan o'e. Pere. Soat o'tiptakat. Kuy
o'jepere.

¹⁷ Ġebuje wara'at ojojojo Deus ekawēn tojtjt-
'ukat. Ixe dak o'jēm Deus eju kawēnwēnap'a bewi-
kabi beat'a bewi. Ixe dak pēġap kuġ osunuy tūybi-
biat kuġ.

¹⁸ Ibocewi wara'at Deus ekawēn tojtjt'ukat o'-
jēm tōmte'okuatōm mupikupikap'a xewi. Ixe daxa
kukuk'ukat osunuy tōmte'okuatōm mupikupikap'a
beat taxa kukuk'ukat. Ixe o'jewāwā ya'ōberen jebure
be-
-pēġap kukat pe.

— Epēġām cuy uva'adot eyadot'aġobidakat —
io'e. — Soat eipi daġatip pe juy eyadot'aġobidakat
— io'e. — Kuy o'yaop — io'e ya'ōberen.

¹⁹ Imēnpuye cocococo'i o'e. Yaġobidakatkan oeku
soat eipi daġ uvadip taġ. Perek. O'jepere. O'yamōġ
yamucakcakkap'a be yabidi'uk am. Deus ipiat su-
pi'ajojoat kūyjobit'ūmayū be apēn ip uva'a mucak-
cakcaġ iap puxim. ²⁰ Ikaboġatka etakobe yamucak-
cakcaġ ip osodop. Xere ġu o'yabidijēm uva'abidi.

Yamucakcakcakap'a bewiapti kŭyjobit'ūmayū'ūm'ūm toy buxim. Xere ġu toy o'toyjēm. Kiiii iān toy. 3000 quilometrom o'toyjēm. Toydibida pūġ metro ipidase dak o'jedoyeku- -Deus ekawēn kay kŭyjobit'ūmayū'ūm'ūm toy.

15 Gebuje wara'at ipararuat ojojoho kabi be yo-boġat. O'jebapuk omukŭyjo am apēn ġuyjom je'bapuk iam. 7 be ojojoho Deus ekawēn tojot-jot'ukayū. Omukŭyjojoap iba'arēm mabuk osunuy oxe. Yoboġ osunuy. Ipararu jījāat osunuy. Warēmtaksuġat kuġ ip oekuku- -āmap kuġ. Ipi kay ixik puje Deus jetakomaap ġu'ūm.

— Eyju ma warēmtaksuġat epejoxik kŭyjobit'ūmayū be — io'e Deus cebe ip. — Wa'ōbi ma ipiat cuy epesupi'ajojoat cebe ip — io'e. — Ixeyū acā ojojohat wetakoma eykay iap mubapuk am soat pe kŭyjobit'ūmayū be — io'e Deus cebe ip- -7 beayū be.

² Gebuje iodi buximat ojojoho- -vidro muġēġē. Vidro iwekoykey osunuy daxa eju. Ixiriruk osunuy. Ipararu jījāat a'ō kay'ūmayū dak ojojoho- -ixe jo'iat a'ō kay'ūmayū dak- -jebutet enūmero kukat a'ō kay'ūmayū. Kacūġcūġ'i ip osodop iodi buximat xe- -vidro muġēġē xe. Harpa'a muydedem ip osodop- -Deus emuaūm muydedem. ³ Moisés bibodom ip o'jebibododon- -wuykukukat puywatwat'ukat pibodom. Mēmē buxim oe'ūiat pibodom tak ip o'jebibododon. Ibom o'jebibododon ip:

Ocekukukat, ēn acā Deusat, i. Ēn soat podi ma a'ōbacaap kuġ, i. Yoboġ cīcā eġuġēġēiat, i. Ocecokcok cīcā ġebum am emumuġē kay, i. Ēn soat tiwatwat kukukat, i. Soat em cūġ ma ēn ocekuġ, i. Icēmān acā ēn e'em, i. 'Abu ibuyxim ġu ekuġ? Soat ma ibuyxim ekuġ, i. Abu kuka i'e pin ġu "Ēn soat podi ma a'ōbaca" i? Soat ma imēn i'e pin, i. Ēn acā ikērēat

kuḡ ḡu, i. Soat taḡ eisu, i. Soat tiwat-wat jajēm “Ēn xipat cīcā” i'e am ewebe, i. Soat em cūḡ ma ēn wuykuḡ iap cocom soat ipi juacayū, i.

Ibom o'jebibododon ip. ⁵ Cebibododon epere buje, Deus eju kawēnwēnap'a oyajojo. Xīntabi ekoce buje oyajojo. Torojo'a o'yanuy ibo'a be -Deus nuynuyap cīcāap'a. ⁶ ⁷ beayū o'jēm Deus eju kawēnwēnap'a bewi Deus ekawēn tojtjt'ukayū. Warēmtaksuḡat kuḡ ip osodop ipiat'ajoan kūyjobit'ūmayū be. Cesaysopsepat kuḡ ip osodop irucat kuḡ, iarixiḡsūḡat kuḡ. Ouro muḡēḡē kuḡ ip osodop jekūm'a eju. ⁷ Pūḡ ebadipdip itabēḡayū'in bacia'a jo'iat'a o'yaūmūm soat pe 7 beayū be -ouro muḡēḡē'a. Soat ip yakuḡ pūḡ-pūḡpūḡ jebui wedim. Yanopapūn ip o'yadop Deus etakomaap kuḡ -soat em itaicat etakomaap kuḡ. ⁸ Deus soat podi ma jedipap kuḡ iaptiḡ o'jediḡepōḡ-pōḡ soat'abi daḡ Deus eju kawēnwēnap'abi daḡ, Deus soat podi ma ja'ōbacaap kuḡ iaptiḡ tak. Soat iōm pa'ore ip osodop badiat'abi be 7 be Deus ekawēn tojtjt'ukayū be warēmtaksuḡat xikap epere'ūm pima - -ipiatpi'ajojoan epere'ūm pima.

16 Gebuje Deus eju kawēnwēnap'abi oya'i'jojo. O'jekawēn ya'ōberen 7 be Deus ekawēn tojtjt'ukayū be.

— Epeju juy — io'e cebe ip. — Bacia'a buximat'a beati juy epetixik ipi kay- -Deus etakomaapti — io'e. — Deus etakomaapti juy epetidi soat kūyjobit'ūmayū be — io'e. — Epeju — io'e.

² Koapat o'ju Deus ekawēn tojtjt'ukat. Jebacia'a buximat beati o'tidi ipi watwat kay. Imēnpuye weroweropi o'jebak cebe ip -topa'a be ipararu jījāat putet kukayū be -ixe jo'iat a'ō kayayū be dak. Ipi jījā osodop, ierep cīcā dak, iohe ḡu dak. Kuy pūḡ ma jebacia'a buximat beati o'tixik.

³ Gebuje wara'at o'tidi jebacia'a buximat peati. O'tidi tiboğ cīcāati be tiyuati be. Imēnpuye o'jediewexat. Ce'ūatoy buxim o'e. Imēnpuye idibi dağacat oap soat. Soat ip oap idibi dağayū'ūm'ūm. Kuy xep-xepayū jebacia'a buximat peati o'tidi.

⁴ Gebuje wara'at jebacia'a buximat peati o'tidi idibi kay- -tiyu'ūmati kay. Idi'a dağ tak o'tidi. Imēnpuye o'jediewexat. Toy o'jediewexat. ⁵ Wara'at Deus ekawēn tojtjot'ukat o'jekawēn Deus eju ġebuje bit. Ixe idibi kukukat osunuy- -soati kukukat. Ixe ekawēn oya'ījojo.

— En ikērēat kuğ ġu- -pūğ em tak ka'ūma — io'e Deus pe. — Cūğ ma ēn ipiat'ajoan kūyjobit'ūmayū be soat pe — io'e. — Soat em ma etait. Kuyje dak cuk adi etait eğuy — io'e. ⁶ — Kūyjobit'ūmayū ma juk adi ebekitkiyū'ūm'ūm o'yaoka. O'toymukereren ip. Ekawēn muwēnuwēn'ukayū'ūm'ūm tak o'yaoka ip — io'e. — Ġasū bit cuy etoykōnat cebe ip toymukererenapteim — io'e. — Ikērēm cuk adi ip oekuku iaptei bubum ip ġasū exe-wi — io'e Deus pe.

⁷ Tōmte'okuatōm mupikupikap'a xeat'a'ō dak o'jekawēn wa'ōpiju.

— Ocekukukat, ēn acā Deusat — io'e. — En soat podi ma a'ōbaca — io'e. — En cedağ ma ipiat'ajojoan kūyjobit'ūmayū be — io'e. — Cūğ cīcā ewebe ipiat'ajoan cebe ip kūyjobit'ūm cīcā ip puye — io'e.

Kuy ebapūğayū jebacia'a buximat peati o'tidi Deus ekawēn tojtjot'ukayū.

⁸ Gebuje wara'at jebacia'a buximat peati o'tidi kaxiepiat etabe. Imēnpuye adedeayū oipik ipi wat-wat. ⁹ Kūyjobit'ūmayū oipik cīcā kaxie pibun. Imēnpuye ip Deus o'jomuymuy jījā, ixe warēmtaksuğati o'tidiat cebe ip puye. Imēnpit ikērēat muğēğēap o'jepere ġu ip. “En soat podi ma a'ōbaca,” i'e bu'u'u jījā ip osodop Deus pe.

Kuy ebadipdipayū jebacia'a buximat peati o'tidi Deus ekawēn tojtjot'ukayū.

¹⁰ Gebuje wara'at jebacia'a buximat peati o'tidi ipararu jījāt abikbikap pe- -idip cīcāat pe. Imēnpuye

kabiokboğ o'e cekay. Soat ya'ō kayayū kay dak kabokboğ o'e. Jekō ip o'sukōaha ipibun ma. ¹¹ Deus tak o'jomuymuy jījā ip kūyjobit'ūmayū. Kabi beacat kukukat o'jomuymuy jījā ip ipiat o'supi'ajo ip puye, werowero kuğ ip puye dak- -soat tağ ipi jījāat kuğ puye. Inaka oibu'un'ūma ip ikērēat muğēgēm. O'jēm'ūma ip e iekērēat e dağwi.

Kuy 5 be jebacia'a buximat peati o'tidi.

¹² Gebuje wara'at jebacia'a buximat peati o'tidi. O'tidi idibi be- -tiboğati be- -Eufratesti be. Imēnpuye o'tiap. Idibi o'tiapat tağ e o'jeeebapuk. O'tiap ipi juayū kukukayū beapem- -kaxi jēmap pewiacat peapem. ¹³ Ebapūğ ibiōğbuk kērēayū dak ojojajo. Muo buxim ip osodop. Pūğ o'jēm seğemoxixi kōmbie dağwi. Wara'at o'jēm ipararu jījāat kōmbie dağwi. Wara'at o'jēm jewexe Deus ekawēn muwēnuwēn'ukat kōmbie dağwi. ¹⁴ Ixeyū ibiōğbuk kērēayū wuywebe i'e ba'o-reat mubapukpuğ. Ixeyū ebapūğayū cucum soat ka kay ika kukukayū mu'awero am nopagōğō ām. Nopagōğōm ip je'e. Nopagōğōm pima Deus soat podi ma wa'ōbaca iap ġubapuk soat pe.

¹⁵ — Eya'ōpicūğcūğ cuy epesop — i'e'em Cristo wuywebe. — Ibukurukat puxim oajēm — i'e'em. — Adeayū ağ'ūm pima oajēm tujupa'um'um'ukat puxim — i'e'em. — Icocok ip je'e wajēmap wiwi'ukayū- -jewemukērērērēn'ūmayū — i'e'em. — Totiteayū buxim ip je'e wajēm puje — i'e'em. — Isūsūn ġu ip je'e — i'e'em Cristo.

¹⁶ Ixeyū ibiōğbuk kērēayū soat ka kukukayū o'ğū'awero ip pūğka be ma. Ixe ka butet Armagedom i omuy Hebreu a'ōm- -Judeuyū a'ōm.

Kuy seis beayū jebacia'a buximat peati o'tidi.

¹⁷ Gebuje kanomūmat jebacia'a buximat peati o'tidi eiumwi. Deus eju kawēnwēnap'a bewiat o'jewāwā ya'ōberen- -Deus abikbikap xeat.

— Kuy o'e — io'e.

¹⁸ Imēn i'e buje, xiririk. Paw. O'jepaw. Xiririk-pawiat o'jepaw ya'ōpuruğ cīcā. Tūmūn'a'ō dak o'jede ya'ōberen. Poroğiat tak o'jede ya'ōpuruğ. Ipi dak o'jexixi jījā. Puje buk a'ğū o'jebapuk iboap? Ka'ūma ma. Ğasū acā. Ipi mubapuk pujeap a'ğū iboap

ka'ümġu. Soat podi ma ipararuat o'jebapuk ġebuġe.
¹⁹ Babilônia ka dak o'sukamuwe'ut'ut ipi exixi buġe.
 Ebapūġkam o'jekaewexat. Deus soat eipi daġatka
 dak o'sukamu'üm. Deus o'jeġebu Babilônia ka wat-
 wat kay. Ikērēat mujurūġrūġxiayū kay o'jeġebu. Wa-
 rara'acat peap podi ma ipiat o'supi'ajoat cebe ip.
 Jetakomaap mu'üm puġe acā oibu'un ipiat'ajoan
 cebe ip kūyjobit'ūmayū be. ²⁰ Pa'üm. O'jepa'üm soat
 tip'aweroro. Pa'üm. Co'a dak o'jeaepa'üm. ²¹ Akada-
 dada dak o'ta'at'at kabi bewi tapoxiata. Pūġpūġta
 tapoxi jījā o'tadop- -40 kiloata. O'ta'at'at ipi juacayū
 be- -kūyjobit'ūmayū be. Itakoma o'e ip Deus kay
 ipiat'ajojom puġe, warēmtaksuġat puġe dak, akada-
 dada buye dak. Deus o'jomuymuy jījā ip.

17 Gebuġe 7 beayū'in oajēm okay- -Deus eka-
 wēn tojtjt'ukayū'in- -bacia'a buximat kuk-
 ayū'in.

— Ejot — io'e owebe. — Apēn Deus iboka suka-
 mu'üm cīcā iap cuy oġubapuk ewebe — io'e. — Ibo
 ka omuy idibi xe- -ti'adeati xe — io'e. — Ikērēat
 muġēġēm cīcā ip ibo ka watwat — io'e. — Apēn ya-
 poat wara'at kaykaykay ma jepo am iap puxim wa-
 ra'at kaykaykay ma e'em ip itabut. Tūybe Deusat
 iān e'em ip — io'e. — Imēnpuġe Deus ibo ka suka-
 mu'üm cīcā — io'e owebe. ² — Ikērē jījāat o'ġuġē ip
 ibo ka watwat eju soat ka kukukayū- -yapoat co'iaiyū
 eju — io'e. — Ixe adeayū be ikērēat o'ġujurūġat
 apēn itabut'ūmayū jebureyū muka'o'on iap puxim —
 io'e. — Imēnpuxim ibo ka watwat tak ade kūyjo-
 bit'ūmayū be ikērēat o'ġujurūġat — io'e owebe.

³ Gebuġe okpiwan ġu juk ocewaġuy. Deus biōġbuk
 cuk waġuyda. Deus ekawēn tojtjt'ukat odujowat
 uk'a'ūmat pe. Ayacat ojojojo iboce. Xik'i osunuy wa-
 ra'at ipararu jījāat akpi jeje- -ipakpukat akpi jeje.
 Deus muymuyap ekawēn ibararak osunuy ixe daġ
 soat taġ. 7 be ya'a o'yanuy. 10 be yakanasū o'yaka-
 nasūnūy. ⁴ Ayacat esay ipakpuk osunuy. Ouro muġē-

gēbu kuḡ osunuy soat taḡ jesay daḡ. Wita'a kuḡ tak osunuy- -yadeiboḡ cīcāat'a kuḡ. Pérola'a kuḡ tak osunuy yadeiboḡ cīcāat'a kuḡ. Bacia'a buximat'a kuḡ osunuy jebui be-ouro muḡēḡē'a kuḡ. Yanopapūn o'yanuy xipat'ūmap kuḡ, wuymusūsūsūnap kuḡ tak, ixe aḡokatkayūxi jījā buye. ⁵ Topa'a be ibutet ibararak osunuy. Ka'ūma ma itaybit apēnape ibutet iam. Babilônia ka ikaboḡatka i ikabutet osunuy. Aḡokatkayū xiayū kukat i dak ibutet osunuy. Xipat'ūmayū kukat i dak ibutet osunuy. Jekpiwatpin ma jewaḡuy-mukērērērēn'ukat i dak ibutet osunuy. Ebaḡpūḡputet ibutet. ⁶ Ayacat ika'oat puxim icokcok osunuy ade Deus ebekitkiyū'ūm'ūm o'toymukereren puye. Ixe ayacat ojojojo. Ayacat ixeyū'ūm'ūm o'yaoka, Jesus kay jījā ip puye, jetabucap o'jepere ḡu ip puye. Oparara jījā ojeku ixe jo buje.

⁷ — Pēnpuye eparara ixe buxim? — io'e owebe Deus ekawēn tojotjot'ukat. — Ajo iba'arēm exe iam cuy ōn jemukūyjo — io'e owebe. — Abu-buxim ixe ayacat iam tak ōn jemukūyjo — io'e. — Abu-buxim ipararu jījāat iam tak ōn jemukūyjo — io'e. — Apēnape subo iam tak ōn jemukūyjo- -ayacat kuḡ jekpi jeje iam — io'e. — Apēnape 7 be ya'aat iam tak ōn jemukūyjo — io'e. — Apēnape 10 be yakanasūat iam tak ōn jemukūyjo — io'e owebe. ⁸ — Ixe ipararu jījāat kuy bima itait osunuy. Ḡasū bit itait ḡu o'e. Ḡaxīn ma ixe jeejēm ikūybioreḡ cīcāatkūy bewi. Imēnpit Deus ixe ḡu'ūm — io'e. — Abuyū soat em itait jeedop Deus xe iaptup pe ibutet pararak'ūmayū iparara jījā je'e ipararu jījāat co buje — io'e. — Ibutetpararak ḡu ip ipi muḡē'isum ma — io'e. — Ixe ipararu jījāat itait osunuy kuy bima. Ḡasū bit itait ḡu o'e. Waram ḡuto jebapuk — io'e.

⁹ — Itaybit cīcāat acā itaybit e'em apēnape ojojojo iam- -yaḡuybabiāt acā — io'e owebe. — 7 be ya'aat puxim 7 be ma co'a dak. Ayacat xik'i iḡo'a jeje- -7 beat'a jeje. Ika kukayū buxim tak ip ya'a — io'e owebe. ¹⁰ — 5 be ixeyū'in ibaca'ūm o'e ip. Ka'ūma ma kūyjobit ixeyū a'ō kay ḡasū bit — io'e. — Pūḡ ma ixeyū'in ya'ōbacaat ḡasū — io'e. — Adeayū ixe a'ō kay o'e kūyjobit — io'e. — Wara'at

ixeyū'in oajēm ġu buk adeayū kukukan. Ixe ajēm puje bit, darem ma adeayū kukukan jeenuy — io'e owebe. ¹¹ — Ipararu jījāat kanomūm adeayū kukukan je'e- -kuy bima itait osunuyiat- -ġasū itait ġu iat — io'e. — 7 beayū nomukadi ixē dak adeayū kukukan je'e. Deus ixē dak ġu'ūm — io'e owebe.

¹² — 10 beat yakanasū eyakanasūjojo — io'e. — Ixeyū yakanasūyū 10 beayū buxim ika kukukayū buxim. Adeayū kukukayūm ġu buk o'e ip. Guyjom acā je'e ip — io'e. — Darem ma ikukukayūm ip jeedop ipararu jījāat eju- -pūġ hora ma — io'e owebe. ¹³ — Jewaġuyocom ip 10 beayū. Imēnpuye ja'ōbacaap ūmūm ip ipararu jījāat pe. Imēnpuye ixeyū a'ōbi jeku ipararu jījāat — io'e owebe. ¹⁴ — Ixeyū 10 beayū nopaġōġōm ip je'e mēmē buxim oe'ūiat eju. Mēmē nopaġōġōm je'e ixeyū a'ōbacaap mu'ūm ām — io'e. — Nopaġōġōm je'e jemunomuwayū eju, jemunaēyū eju- -ja'ōkayayū eju. Ixeyū a'ōbacaap ġu'ūm mēmē. Ixe soat podi ma ya'ōbacaat. Adeayū kukayū kukat ixē. Imēnpuye ixeyū a'ōbacaap ġu'ūm — io'e owebe.

¹⁵ — Idibi dak cuk etijojo — io'e owebe Deus ekawēn tojtjot'ukat. — Ayacat xik'i osunuy ixedi adopa daġ — io'e. — Ixedi soat tiwatwat puxim, soat eipi watwat puxim tak, soat iwarururuayū buxim tak, soat a'ōm kawēnwēn'ukayū buxim tak — io'e owebe. ¹⁶ — 10 be yakanasūat tak cuk ejojojo — io'e owebe. — Ixeyū yakanasūyū itakoma jeedop ip ayacat kay- -aġokatkayūxi kay. Ipararu jījāat tak itakoma je'e cekay — io'e. — Soat ibubut ju'uk ip cexewi. Cesay'ūm suiwat ip. Ixe aokam ip. Ixe'ūm ēn suēn'o ip. Cepoyat ip ġupik daxa be — io'e. ¹⁷ — Deus ixeyū o'ġubikuy jebikuyap taġ jeku am. Ixeyū o'ġubikuy jewaġuyco am jeweweju. Imēnpuye Deus bikuyap taġ yaoka ip. Imēnpuye "Wuya'ōbacaap cuy aġūm ipararu jījāat pe," i je'e ip jewewebe ika kukukayū. "Wuya'ōbi juy ixē je'ku" i je'e ip jewewebe ma. Imēn ma soat jebapuk apēn cuk adi Deus o'e'e iap taġ — io'e owebe.

¹⁸ — Ixe ayacat- -ejojojoiat- -ikaboġatka buxim — io'e owebe. — Adeayū kukukayū emukakukpinputka

buxim — io'e owebe. — Adeayū kukukayū cucum ibo ka be ikērēat muḡē ām — io'e owebe Deus eka-wēn tojtjt'ukat.

18 Iboap co buje, wara'at ojojojo Deus ekawēn tojtjt'ukat. Kopkom o'e kabi kadiwi. Ya'ōbacaat osunuy. Isopsep osunuy. Imēnpuye jesop-sepap kabiam soat eipi o'ḡukabia.

² — O'suka'ūm cīcā ma — io'e ya'ōberen. — Babilōnia ka o'suka'ūm cīcā ma — io'e. — Kuy bima ya'ōbacaayū cucu'uk ip oosodop ibo ka be — io'e. — Ḡasū bit ibiōḡbuk kērēayū acā o'jepoyat ibo ka be, axikyū ikērē jījāayū dak — io'e. — Wasūyū dak o'jepoyat ibo ka be -i'oibit'ūmat — io'e. ³ — Ibo ka watwat ikērēat o'ḡujurūḡrūḡat soat ka watwat pe wuybureyū muka'o'onap puxim, — io'e. — Jekpi-watpin ma ikērēat muḡēḡē'uk ip osodop ibo ka watwat eju. Ika kukukayū dak ikērēat mujurūḡrūḡ'uk ip osodop ibo ka watwat eju. Tarekrek kukukayū dak jewemukariwawan'uk ip osodop ixeyū ikērēat muḡēḡēaptei bubum — io'e.

⁴ Wara'at a'ō dak oya'ījojo kabi kadiwiat a'ō.

— Bekitkit, epewat cuy ite ka bewi — io'e. — Epejēm cuy ite ka watwat xewi — io'e. — Ixeyū buxim ḡu juy epesop — io'e. — Ixeyū burem ḡu juy epesop ikērēat mujurūḡrūḡ — io'e. — Ixeyū eju ikērēat mujurūḡrūḡ pima, Deus ipiat supi'ajoat eywebe apēn ipiat supi'ajoat ixeyū be iap co'i — io'e. ⁵ — Ibo ka watwat xipāt'ūmap muḡēḡēxi. Imu'awero buje, kabi tēḡ kuka o'e xipāt'ūmap — io'e. — Deus o'jeḡebu apēn cuk adi ikērēat o'ḡujurūḡrūḡ ip iap kay — io'e. ⁶ — Apēn ip cuk adi warēmtaḡ eykukaptei juy epeteida cebe ip — io'e. — Xepxepetim pit cuy epeteida cebe ip — io'e cebe. — Tipiati juk ip o'ti-muḡē eywebe tikōḡaptim. Tipi jījāati juy epetimuḡē cebe ip tikōḡaptim — io'e. — Ibodim cuy bacia'a epeyamunopapūn ixeyū muka'onaptim — io'e. ⁷ — Ipiat cuy epesupi'ajoat cebe ip, idip cīcā ip osodop jewexe iapetim — io'e. — Epeḡḡūycūḡcūḡ cuy ip

teiboğ cîcâat pupu'uk ip osodop iapteim — io'e. — “Soat kuğ òn ika kukukat co'i,” i te'e ma o'e ip je-webe ma. “Itayxibuk ġu òn,” i te'e ma o'e. “Ipiat osupi'ajo ġu- -pũğ em tak ka'ũma ma,” i te'e ma o'e jewebe ma. “Oğuycũğ ġu juy oce,” i te'e ma juk adi o'e'e. ⁸ Te'e ma imèn cuk adi o'e'e — io'e. — Imèn-puye pũğ kabiam ma soat ipiat je'bapuk cebe- -warêmtaksuğpi. Iwâtaxipi dak je'e. Ipiat tak supi'ajo. Re dak supi'ajo — io'e. — Daxa be ipik — io'e. — Soat iboap je'bapuk cebe wuykukukat ya'òca buye. Ixe wuykukukat Deusat- -soat podi ma ya'òbacaat. Wuykukukat apèn ipi ju bima juk adi oekuku ip iap-tei ideida soat pe — io'e.

Imèn Deus ekawèn tojotjot'ukat ya'òberen o'e owebe.

⁹ Babilônia ka pikpiğaptiğ co buje, iğuycũğ cîcâ je'e ika kukukayũ- -iğo ka watwat puxim jemucokcok am ikêrêat mujurũğrũğ'ukayũ- -yapoat eju jepopo- 'ukayũ buximayũ. Jeetôn ip ibo ka pikpiğaptiğ co buje. ¹⁰ Wũy ma ip jeedop kacũğcũğ'i ikapikap co-com. Wuywebe dak xe'e je'e imèn iap puxim iparara ip.

— Tadaybot cîcâ opop ip pikpiğ! — i je'e ip tiğ-cocoayũ. — Karem ip ipiat'ajojom — i je'e ip. — Kuy bima ikaboğ cîcâatkam o'sukadop — i je'e ip. — Soat pe bit ibo ka ikamu'ũm pa'ore o'sukadop — i je'e ip. — Deus pe bit pũğ hora ma o'sukamu'ũm — i je'e ip.

¹¹ Ibo ka pikpiğaptiğ cocom pima, iğuycũğ cîcâ je'e ip tarekrek kuğ topibiyũ dak. Ka'ũmğũ o'e tarekrek pupu'ukayũ, oipik ip puye. Imènpuye cewebu-but pu ba'ore o'e ip. Ka'ũmğũ ip o'e ibubut pu-puayũ. Imènpuye je'tôn ip. ¹² Imèn je'e ip tõtôn:

— Abu xe'e ġasũ je'jat wuyeuro, wuyprata dak? — io'e ip jewewebe. — Abu xe'e ġasũ yadei-boğat'a yabu wuyxewi, pérola'a dak? — io'e ip jewewebe. — Abu xe'e pağo je'jat wuyxewi- -iarixiğat, ipakpukat tak, lâ ipakpukat tak? — io'e jewewebe. — Abu xe'e ġasũ soat'ip yopu wuyxewi- -ip warêmtaksuğat'ip? — io'e. — Abu xe'e ġasũ marfim muğëğë je'jat wuyxewi? — io'e. — Abu xe'e yoptei-boğ cîcâat'ip muğëğë je'jat wuyxewi? — io'e. — Abu

xe'e ġasū icaat muġēġē je'jat wuyxewi- -bronze muġēġē, ferro muġēġē dak, mármore muġēġē dak? — i'e'em ip tōtōn. ¹³ — Abu xe'e wuyxat mukunukunap je'jat wuyxewi- -canela? — io'e ip. — Abu xe'e ġasū tibu wuyxewi tide'oati, mirradi dak? — i. — Abu xe'e tōmpu wuyxewi pāo'anōm? — i. — Abu xe'e tibu wuyxewi uva'abidi, oliveira xepti dak? — i. — Abu xe'e tōmpu wuyxewi trigonōm? — i. — Abu xe'e tabu wuyxewi trigoda? — i. — Abu xe'e ġasū gado je'jat wuyxewi, ovelha dak, cavarō dak? — i. — Abu xe'e carro je'jat wuyxewi cavarō imupuxikpu-xiġat? — i. — Abu xe'e wuyjuyū je'jat wuyxewi je-buywatwat'ukan? — i.

Imēn je'e ip tarekrek kuġ topibiyū jewewebe. Imēn je'e ip tōtōn pima jebubut pupu'ukayū'ūm'ūm oipik puye. ¹⁴ Imēn je'e ip ibo ka watwat pe:

— Soat eyetabikukuap kuy oi'ūm — i je'e ip ibo ka watwat pe. — Soat eybubut oi'ūm — i je'e. — Kuy bima ade idipat kuġ epesop, ade ouro dak — i je'e ip. — Ġasū bit soat oi'ūm — i je'e ip. — War-ram pit epetobuxik ġu — i je'e ip ibo ka watwat pe.

¹⁵ Ibo ka be ip o'jekariwawan. Ġasū bit wūy wi ma ip o'e ikadiġ cocom. Wuyju dak xe'e acepik iap ip imuparararan. Jewāwā ip. Je'tōn tak ip.

¹⁶ — Tadaybotbot cīcā ip opop pikpiġ ibo ka watwat'ūm'ūm — i je'e ip. — Karem ip oipik — i je'e ip. — Kuy bima teiboġ cīcāat kuġ oekuku ip jessay kuġ- -paġo iadixiġat kuġ — i. — Ipakpukġūġūnat kuġ tak oekuku ip, ipakpukat kuġ tak, lā muġēġē kuġ tak — i je'e ip. — Ouro muġēġē kuġ tak ip oekuku jemujoipin am — i je'e ip. — Wita'a'it'it'a muġēġē kuġ tak ip oekuku jemujoipin am, pérola'a muġēġē kuġ tak — i je'e ip. ¹⁷⁻¹⁸ — Soat o'jepa'ūm pūġ hora ma — i je'e ip. — Soat jekariwaap oi'ūm — i je'e ip.

Ibo ka wi wūy ma dak ip osodop ibo ka pik-piġaptiġ cocom kobexixi kukuk'ukayū, kobexixi daġ cucu'ukayū dak, kobexixi mudidimyū dak, kobexixi bewi yajēm'ibiyū be tarekrek ūmūm'ukayū dak.

— Ibo ka soat ka podi ma ikadip o'sukadop —

io'e ip tiğ cocom pima. — Ka'ümğū ağoka iboka jo'iatka ikadip cīcāatka — io'e ip.

¹⁹ Jebabim ip o'jewa'amudididiğ ka'winōm jeğuy-cūğap mubapuk am. O'tōn cīcā ip iğuycūğ cīcā buye.

— Tadaybot cīcā ip opop pikpiğ ibo ka watwat'ūm'ūm — io'e ip. — Karem ip oipik — io'e ip. — Kuy bima o'jekariwawan ip soat kobexixi kukuk'ukayū ibo ka watwat cedinheiroboğ cīcā buye — io'e ip. — Pūğ hora ma oi'ūm soat. Soat ibo ka watwat pubut oipik pūğ hora ma — io'e ip.

²⁰ — “Eyju bit eycokcoğ cuy epesop,” i ōn pit e'em kabi beacat pe — io'e kabi beat owebe. — “Eycokcoğ cuy epesop,” i ōn e'em Deus ebekitkiyū be, Deus emumujuyū be dak, Deus ekawēn muwēnuwēn'ukayū be dak. “Eycokcoğ cuy epesop, Deus ipiat o'supi'ajoat ibo ka watwat pe ikērēm cīcā ip osodopdopdopiateim,” i ōn e'em. “Apēn ip cuk adi ikērēm eykukapteim ipiat o'supi'ajoat cebe ip,” i ōn e'em — io'e owebe kabi beat.

²¹ Gebuje Deus ekawēn tojotjot'ukat wita'a o'yabu ya'ōbacaat. Yaboğ cīcāat'a o'yabu-tūmūntata mucakcakcakap'a jo'iat'a. O'yaxik idibi be tiyuati be.

— Apēn iğō'a oyaxik iap co'i Deus tak Babilōnia ka sukaxik — io'e. — Waram pit acesukajo ġu ibo ka — io'e. ²² — Waram pit harpa muydede'ukat'a'ō aceya'ījo ġu ibo ka be — io'e. — Wara'at pubut'uk muydede'ukat'a'ō dak aceya'ījo ġu — io'e. — Tūmūn'uk'uk muydede'ukat'a'ō aceya'ījo ġu, parasuy jo'iat muydede'ukat'a'ō dak — io'e. — Warēmtak-suğ pikpik'ukat acetobuxik ġu ibo ka be — io'e. — Waram aceya'ījo ġu tūmūntata mucakcakcakap'a'ō dak ibo ka be — io'e. ²³ — Waram acejojo ġu lamparina'ae ibo ka be — io'e. — Waram aceya'ījo ġu jebumūn'isuayū icokcokap'a'ō ibo ka be — io'e. — Ibo ka beayū kariwayayū warara'acat podi ma ibubut ade ip osodop — io'e. — Soat kaka dağayū muğuykukuku'uk ip osodop jebukaypacam ma — io'e. ²⁴ — Deus pit ipiat o'supi'ajoat Babilōnia ka watwat pe jekawēn muwēnuwēn'ukayū'ūm'ūm ao-

kakaapteim- -jebekitkiyū'ūm'ūm aokakaapteim- -soat
kaka watwat'ūm'ūm aokakaapteim — io'e.

19 Iboap tomukadi, ya'ōberenat'a'ō oya'ijojo
ade jījā kabi beacayū a'ō.

— “Deus xipat cīcā,” i juy ace — io'e ip. —
Deus acā wuydaxijojo'ukat — io'e ip. — Soat podi
ma jedipap kuḡ ixē — io'e ip. — Soat podi ma ja'ō-
bacaap kuḡ — io'e ip. ²— Ixē cūḡ ma ipiat'ajojoan
kūyjobit'ūmayū be — io'e ip. — Cedaḡ ma ipiat'ajo-
joan cebe ip — io'e ip. — Ipiat o'supi'ajoat aḡokat-
kayūxiat pe, soat ipi juayū be ikērēat o'ḡujurūḡrūḡat
puye- -ikērēat mujurūḡrūḡxi ma jewaḡuy mukērērē-
rēnat puye dak — io'e ip. — Deus ipiat o'supi'ajoat
cebe, jebuywatwat'ukayū'ūm'ūm o'yaokaat puye —
io'e ip.

³ Waram ḡuto o'jewāwā ip ya'ōberen.

— “Deus xipat cīcā,” i juy ace! — io'e ip ya'ō-
beren. — Apēn soat em kapiktiḡ jediḡeuhum iap pu-
xim, soat em cuy ipiat'ajojom tak jeedop ip Babilō-
nia ka watwat puximayū — io'e ip.

⁴— Imēn cuy jeedop ip — i dak o'e 24 be
aypapayū- -ya'ōbuyxiayū.

— “Deus xipat cīcā,” i juy ace — io'e ip eba-
dipdip itabēḡayū dak.

O'jēḡ'aecōḡcōḡ ip Deus wap: — Ocecokcok cīcā
ekay — i'e'em cebe.

Jabikbikap ceje xik'iat wap o'jēḡ'aecōḡcōḡ ip.

⁵ Deus abikbikap pewi o'ya'ōajēm.

— “ ‘Deus xipat cīcā,’ i juy epe'e,” i ōn e'em
soat ixē buywatwat'ukayū be, soat kaka daḡayū be
dak — io'e Deus xeat. — “ ‘Deus xipat cīcā,’ i juy
epe'e,” i ōn e'em soat pe ibuyxim Deus kukayū be-
ya'ōbuyxiayū be, ya'ōbuyxi'ūmayū be dak — io'e.

⁶ Ḡebye wara'at'a'ō oya'ijojo. Adeayū e'awero
bujē iap'a'ō buxim o'ya'ōnuy. Ti'acap'a'ō buxim tak
o'ya'ōnuy- -ya'ōboḡ cīcāat'a'ō buxim. Konēkonēk-
'iat'a'ō buxim tak o'ya'ōnuy ya'ōpuruḡ.

— Gasū bit ocekekukat soat ipi juacat kukukan o'e — io'e ip. — Ixe acā Deusat ocexe — io'e ip. — Ixe soat podi ma ya'ōbacaat — io'e ip. — Imēnpuye: “Deus xipat cīcā,” i juy ace! — io'e ip. ⁷⁻⁸ — Mēmē buxim oe'ūiat gāxīn ma jewebumūn — io'e ip. — Ixe wadip kuy o'jewemuxipan jewebumūn ām ce-weju — io'e ip. — Imēnpuye wuycockoḡ cīcā juy ajop — io'e ip. — Iwadip kuy jesay o'jat jewebumūnap esay- paḡo iarixiḡat muḡēḡē, isopsupat muḡēḡē, iwekoykey'ūmat muḡēḡē — io'e ip. — Imēnpuye juy acewemucokcoḡ! — io'e ip. (Iwadip paḡo iarixiḡat kuḡ soat Deus ebekitkiyū i-dipat muḡēḡēm iape).

⁹ — Deus emunomuwayū icokcok cīcā — io'e waram Deus ekawēn tojotjot'ukat owebe. — Ixe juk o'tomuwā ip jekōn ām mēmē buxim oe'ūiat ewebumūnap epeta be — io'e. — Ickokcok cīcā ip iaptup cuy etupmubararak — io'e owebe. — Deus ma imēn cuk omukūyojo — io'e owebe Deus ekawēn tojotjot'ukat.

¹⁰ Ixe be omukūyoju buje ocēḡ'aecōḡcōḡ cewap soat podi ma a'ōbuyxi ēn i'e am cebe.

— Owap pit cuy ecēḡ'aecōḡcōḡ ḡu — io'e owebe. — Ebuxim ma ōn tak Deus buywatwat'ukat, wuykit-pitpiyū buxim tak — io'e. — Jesus ekawēn kay jījāayū buxim ōn tak kawēn icēmat kay jījāayū buxim — io'e owebe. — Deus wap acā juy ecēḡ'aecōḡcōḡ “Soat podi ma a'ōbuyxi ēn” i'e am cebe — io'e owebe.

Jesus kawēn icēmat muwēnuwēn oekukuku. Gasū dak Deus ekawēn muwēnuwēn'ukayū icokcok cīcā iboap ekawēn muwēn ām, kawēn icēmat cece ip puye.

¹¹ Ḡebuḡe kabi ikoce otobuxik. Cavarō ojojōjo irucat. Cavarō akpi jejeat ojojōjo irucat akpi jejeat. Ixe butet soat em ja'ō daḡ jekuku'ukat i osunuy. Icēmat e'e'ukat i dak ibutet osunuy. Xepxepetet osunuy. Ixe cūḡ ma ipiat'ajoan kūyjobit'ūmayū be. Cedaḡ ma nopāḡōḡōm jekay itakomaayū eju. ¹² Ixe eta itasop osutanuy daxanabōē buxim. Ade ouro muḡēḡē kuḡ osu-

nuy ya daḡ ika kukukat puxim. Ibutet ibararak osunuy topa'a be. Ixe acā itaybit jebuten. Warara'acayū bit itaybit ḡu. ¹³ Iekabek kuḡ osunuy. Toy kuḡ osunuy iekabek soat taḡ. Ixe butet Deus ekawēn i osunuy. ¹⁴ Ixe nomuju oekuku ip sorarayū kabi beayū. Cavaroyū akpi jeje ip oekuku ixeyū dak-irucayū akpi jeje. Cesay kuḡ ip osodop irucat kuḡ-iarixiḡat muḡēḡē kuḡ- xipat cīcāat kuḡ. ¹⁵ Ibi bewi payao cēm-cēm osunuy yoboḡat, tūybibiat. Ixem payaom Deus a'ōkay'ūmayū a'ōbacaap o'ḡu'ūm. Ya'ōpuruḡ ixeyū kukukan jeenuy-icaat kukat puxim. Soat podi ma ya'ōbaca ixe. Kūyjobit'ūmayū aokam jetakomaap mubapuk puje. Ixeyū'ūm'ūm toy toy'ade je'e uva'a mucakcakcap'a bewiati buxim. ¹⁶ Ixe butet ibararak opop jeekabek taḡ jedao daḡ tak. Ika kukukayū kukukat i ibutet. Ya'ōbuyxiayū kukukat i dak ibutet. Xepxepetet osunuy.

¹⁷ Ḡebuje Deus ekawēn tojotjot'ukat ojojojo. Cūḡ'i osunuy kaxiepiat eta be. Ya'ōberen o'jewāwā soat wasūyū kay-umayū kay-iḡēmat'o'o'ukayū kay.

— Epesot cuy — io'e ya'ōberen cebe ip, wasūyū be. — Epeye'awero juy peta be-Deus emumuḡū be -yoboḡat pe — io'e cebe ip-iḡēmat'o'o'ukayū be.

¹⁸ — Epesot cuy ika kukukayū'ūm'ūm ēn o am, sorarayū kukukayū'ūm'ūm ēn o am tak, sorarayū'ūm'ūm ēn o am tak, cavaroyū'ūm'ūm ēn o am tak, cavaroyū akpi jeje oekuku'iyū'ūm'ūm ēn o am tak — io'e cebe ip-wasūyū be. — Epesot cuy soat'ūm'ūm ēn o am- - tei'ūm kapikpik'ukayū'ūm'ūm ēn o am, ja'ōbi kapikpik'ukayū'ūm'ūm ēn o am tak; ya'ōbuyxiayū'ūm'ūm ēn o am, yopīcayū'ūm'ūm ēn o am tak — io'e cebe ip-wasūyū be.

¹⁹ Ibocewi waram ḡuto ipararu jījāat ojojojo. Ixe ipararu jījāat o'je'awero ika kukukayū eju, ixeyū a'ōkayayū eju dak. Kuy juk ip o'jewemu'awero nopāḡōḡō ām cavaroyū irucat akpi jejeat eju, ixe a'ōkayayū eju dak. O'jenopāḡōḡōm cīcā ip. ²⁰ Cavaroyū akpi jejeat o'e jījā ipararu jījāat pe. O'taomūn. Jewexe Deus ekawēn muwēnuwēn'ukat tak o'taomūn. Ipararu jījāat etabutpe wuywebe i'e ba'oreat mubapukpuk'ukat o'taomūn. Jedopa'a daḡ ipararu jījāat

putet kukayū o'ḡuḡuykukuku wuywebe i'e ba'oreat mubapukpuḡ puye. Ipararu jījāat pe "Ēn xipat cīcā" i te'e ma i'e'e'ukayū o'ḡuḡuykukuku. Ipararu jījāat o'joxik daxaboḡ pe, enxofre nōm sop pe. Jewexe Deus ekawēn muwēnuwēn'ukat tak o'joxik ibo be. Itabēḡ ma ip o'joxik ibo be. ² Cavarō irucat akpi jejeat ixik'ibiyū a'ōkayayū dak o'yaoka. Payaom ip o'yaoka jebi bewi ijēm'ibin. Wasūyū o'subibu'u'un iēn.

20 Gebuje Deus ekawēn tojtjot'ukat ojojojo wara'at. Kopkom o'e kabi kadiwi. Chaveboḡ kuḡ osunuy jebui be-ikūybioreḡ cīcāatkūy nomudip'ukap kuḡ. Correntebu kuḡ tak osunuy ibupoxi jījāatpu kuḡ. ² Ixe Deus ekawēn tojtjot'ukat seḡemo-xixi o'ḡukirik-ibiōḡbuk kērēayū kukukat o'ḡukirik. Satanás i ibutet. Ixe o'ḡukirik ade koato tūy ām-1000 be koato tūy ām. ³ Imukirik puje o'joxik ikūybioreḡ cīcāatkūy be. Chavem tak o'sukūynomudip. O'sukūymuymūḡmūḡ tak ijēmap puxim waram soat ka daḡayū muḡuykukukuap puxim. Jeejēm ḡu 1000 be koato dak. 1000 be koato kap puje bit waram ixē ḡujēm darem ma tūy ām.

⁴ Gebuje yabikbikapyū ojojojo idip cīcāayū. Ixeyū jeje kaxikik'iaiyū dak ojojojo. Deus ja'ōbacaap o'ḡūm cebe ip.

— Apēn ipi juayū juk adi oekuku ip iaptei juy epeteida wa'ōbi — io'e Deus cebe ip. — Xipacat cuy epeḡūm cedaḡ ma jekuku'ukayū be — io'e. — Ipiat pit cuy epesupi'ajoat warēmtaḡ jekuku'ukayū be — io'e Deus.

Jesus kay jījā osodop iayū'ūm'ūm piōḡbuk tak ojojojo. Kuy juk itakomaayū ixeyū'ūm'ūm o'yaoka. O'ya'uk'uk ip Jesus ekawēn muwēnuwēn osodop puye- -kawēn icēmat muwēnuwēn osodop puye- -Deus ekawēn muwēnuwēn osodop puye. Ipararu jījāat wap tak o'jēḡ'aecōḡcōḡ ḡu ip- -pūḡ em tak ka'ūma. Ixe buximat wap tak o'jēḡ'aecōḡcōḡ ḡu ip. Ibutet tak o'-subutetmubararakat ḡu jedopa'a be, jebūnū'a be dak

ka'ūma. Waram ip o'jetait. Soat em itait jeedop ip Cristo xe. Ixe eju dak adeayū kukukayūm jeedop ip 100 koato bun. ⁶ Imēn Deus Jesus kay jījā osodop iayū'ūm'ūm ġutait waram. Warara'acayū'ūm'ūm pit waram ġutait 1000 koato kap puje acā- -kūy-jobit'ūmayū'ūm'ūm. ⁶ Icokcok jeedop ip Deus emumutaityū- -koam o'ġutait'iaiyū. Xipat cīcāat kuġ ip jeedop- -Deus xewiat kuġ. Waram kūyjobit'ūmayū e'ū buje, ixeyū bit je'ū ġu. Deus buywatwat'ukayūm ip jeedop paī buxim- -Cristo buywatwat'ukayūm tak. Cristo eju adeayū kukukayūm ip jeedop 1000 koato bun.

⁷ 1000 koato kap puje Deus Satanás ġujēmat daomūnmūnap'a bewi- -ikūybioreġ cīcāatkūy bewi. ⁸ Ixe Satanás je'ju soat ka daġayū muġuykukukum. Gogue a'ōkayayū ġuġuykukuku. Magogue a'ōkayayū dak ġuġuykukuku. Soat ka watwat ġu'awero. Nopaġōġō ām Deus a'ōkayayū eju ip ġu'awero. Tak ġu ma jeedop ip. Ka'oririt co'iān ip jeedop adeap kuġ. Imuwēġūn pa'ore ma ip jeedop ade jījā buye. ⁹ Jepōġpōġ ip soat ka daġ Satanás a'ōkayayū. Deus ebekitkiyū ip yakodip yaokaap ojuy. Deus xe ikakukpinatka dak ip ikaakodip ika watwat aokaap ojuy. Imēnpit' daxa je'kop kabi kadiwi yaoka ojuyayū mupik am. Soat ixeyū ġu'ūm Satanás a'ōkayayū. ¹⁰ Deus ibiōġbuk kē-rēayū kukukat joxik daxaboġ pe-iodi jo'iat pe-enxofre nōm sop pe. Adeayū muġuykukuku'uk osunuyiat joxik ibo be. Kuy bima juk ipararu jījāat o'joxik ibo be, jewexe Deus ekawēn muwēnuwēn'ukat tak. Ipiat'ajojom cīcā ip jeedop ibo be. Kabia bun ipiat'ajojom ip jeedop, ixima bun tak. Soat em ma ipiat'ajojom ip jeedop. Ipiat'ajojoap i'ūm ġu cebe ip.

¹¹ Ġebuġe yabikbikap ojojoko idip cīcāat, yoboġat, irucat. Ixe jeje xik'iat tak ojojoko. Ipi o'jenapōn itabi-xewi, kabi dak. Ijojom ġu ip osodop ġebuġe bit. ¹² Oe'ū'ū'iaiyū ojojoko ġebuġe- -yoboġayū'ūm'ūm, ka'ūmaayū'ūm'ūm tak. Kacūġcūġ'i ip osodop yabikbikap wap. Deus jebubutupyū o'tupmupaya livrodupyū. Wara'atup o'tupmupaya ġebuġe. Soat em itait jeedop

ip Deus xe iayū butet kukatup o'tupmupaya. Apên ijodi bima juk adi oekuku ip iap ibararak osunuy ibodup pe. Deus o'teida soat pe oe'ū'ū'iyū be apên ijodi bima juk adi oekuku ip iapteim. Xipacat o'gūm cedağ ma oekuku'iyū be. Ipiat pit o'supi'ajoat ikērēm oekuku'iyū be. ¹³ Kuy juk tiyuati be oakōm'iyū'ūm'ūm tak o'jebapuk kabi beat wap-yabikbikap ceje xik'iat wap. Kuy juk ipi be o'jokot ip'iyū'ūm'ūm tak o'jebapuk cewap-kuy juk ipiat'ajojoap pe o'joxik ip iayū'ūm'ūm tak. Xipacat o'gūm cedağ ma oekuku'iyū be. Ipiat pit o'supi'ajoat ikērēm oekuku'iyū be. ¹⁴ Deus wuyuy'ū'ūap o'joxik daxaboğ pe -iodi jo'iat pe. Ce'ū'ūayū dak o'joxik ibo be. Daxaboğ pe ixeyū xikap xepxep em wuye'ūap co'i. ¹⁵ Soat em itait jeedop ip Deus xe iaptup pe ibutet pararak'ūmayū bit o'joxik daxaboğ pe -iodi jo'iat pe.

21 Gebuje kabi iisuat ojojoko, ipi iisuat tak. Kuyat kuy o'jepa'ūm-kabi, ipi dak. Tiyuati dak o'jediepa'ūm. ² Ikaisuatka dak osukajoko-Jerusalém ka. Ōn, João, osukajoko. Kakopkom o'e kabi kadiwi-Deus xewi. Ikadip cīcā o'sukadop apên ayacat jewemudipudim jewebumūn ām iap co'i. ³ Yabikbikap cejeat o'jekawēn ya'ōberen.

— Gasū bit Deus jemumuğēğēyū xe jeenuy — io'e. — Cebekitkiyūm je'e ip — io'e. — Deus tak ixeyū xe jeenuy soat em — io'e. — “Ekay acā ocetabut ēn acā Deusat puye,” i je'e ip cebe — io'e. ⁴ — Itadisup ip itōnap etadi. Ka'ūmğū je'e wuye'ū'ūap — io'e. — Wuyğuyçūğap tak ka'ūmğū je'e. Wuytōnap tak ka'ūmğū je'e. Ipiat'ajojoap tak ka'ūmğū je'e wuywebe — io'e. — Kuyatokok pit oi'ūm kuy — io'e.

⁵ — Gasū bit ōn soat oğuisun — io'e yabikbikap cejeat. — Apên cuk adi eya'ījojoiaptup cuy etupmubararak iboap ekawēn icēmān puye — io'e owebe. — Soat je'babuk iboap ekawēn tağ. Imēnpuye cūğ ma

eywebe eyetabut am iboap ekawēn kay — io'e owebe. ⁶ — Soat kuy oḡuḡē — io'e. — Soat ka'ūm pima ōn kuy kake. Soat i'ūm puje dak ōn pit kake — io'e. — Ka'ūma kake bimaat ōn. Soat'ūm pimaat tak ōn ma — io'e owebe. — Tideihem ḡu idibi otiūm ibipurukayū be -wuymutaicinapti'a bewiati — io'e. ⁷ — Xipat cīcāat oḡūm wa'ōkay jījāayū be — io'e. — Ōn acā Deusat oḡuy cexe ip. Okpotpoyūm ip jeedop — io'e. ⁸ — Wa'ō kay'ūmayū kūyjobit'ūmayū bit daxaboḡ pe ip jeedop iodi jo'iat pe -ikērēat muḡēḡēap epere'ūmayū -jetabucap o'jepere'iyū dak, kawēn icēmat muwarururun'ukayū dak, warara'acat aoka-ka'ukayū dak, aoyūxiayū dak, ibukaypacayū dak, deusbaroyū kay itabucayū dak, dapxiyū dak — io'e. — Daxaboḡ pe ip jeedop soat em -enxofre nōm sop pe — io'e. — Deus pe ixeyū xik puje ibo be waram je'ū'ūap je'e cebe ip — io'e.

⁹ Gebuje wara'at oajēm okay Deus ekawēn tojtjt'ukayū'in- -7 beayū'in- -bacia'a jo'iat kukayū'in- -warēmtaksuḡat kukayū'in- -āmām o'joxik iat kukayū'in.

— Ejot — io'e owebe. — Iwadip oḡubapuk ewebe- -mēmē buxim oe'ūiat eju jewebumūnat — io'e.

¹⁰ Waram ḡuto Deus biōḡbuk waḡuyda. Deus ekawēn tojtjt'ukat odujuu co'a jeje- -um cīcāat'a jeje. Jerusalēm ka o'sukamubapuk owebe- -ikaisuatka- -soat taḡ ikaisuatka- -Deus xewi ikakop'ibitka.

¹¹ — Deus soat podi ma ja'ōbacaap kuḡ — i'e'em ibo ka jojo'ukayū. Ikasopsup o'sukadop Deus dipap kuḡ.

Ikasopsup o'sukadop wita'it'it'a buxim- -yadeiboḡ cīcāat'a buxim- -jaspe'a buxim. Ikaxiriruk tak o'sukadop cristal'a buxim. ¹² Korara osodop ika akokoreren- -yoboḡat- -um cīcāat. 12 be osodop ip korara exīntabi. 12 beayū iḡo exīntabi wiwi'ukayū osodop- -Deus ekawēn tojtjt'ukayū. Israel ipotpoyū butet ibararak osodop xīntabi be 12 beayū butet. ¹³ Ebpūḡ osodop ip pūḡ kadi xīntabi. Ebpūḡ osodop ip kaxi jēmap kadi. Kaxi'at'acat kadi dak ebpūḡ.

Kaxi'at'acap joreġat kadi dak ebapūġ ma. Kaxijēm-ap joreġat kadi dak ebapūġ ma. ¹⁴ Ibo ka ekorara o'ġuġē ip 12 beat'a jeje wita'a jeje. Ibo'a be mēmē buxim oe'ūiat emumujuyū butet ibararak osodop-12 beayū butet.

¹⁵ Deus ekawēn tojtjot'ukat imuweġūġūnap'ip kuġ osunuy jebui be-oweju kuy o'jekawēniat. Ouro muġēġē'ip kuġ osunuy. Ibo'ip kuġ osunuy ika muweġūn ām, ika exīntabi muweġūn ām tak, cekorara muweġūn ām tak. ¹⁶ Ibo ka soat kadi jeweka'abiweġūġūn o'sukadop. Ixe'im Deus ekawēn tojtjot'ukat o'sukamuweġūn. Pūġ kadi 2,200 quilometro o'sukadop. Ika'a bicūġkadi ika'a'ōxakadiwi dak ibuġūn ma o'sukadop. ¹⁷ Korara dak o'ġuweġūn. 64 metro yabijodekadi osunuy. Ixe'im o'ġuweġūn. Pebūrū metro osunuy iap o'ġuwēn owebe Deus ekawēn tojtjot'ukat. ¹⁸⁻²⁰ Ibo ka soat taġ ikaisu o'sukadop. Ouro muġēġēka o'sukadop- iwekoykey'ūmat muġēġēka. Ikaxiriruk o'sukadop vidro buxim. Ixe ekorara jaspē'a muġēġē osunuy. Korara o'jomuymuy ip wita'a daġ-12 beat'a daġ. Iġo'a daġ yadeiboġ cīcāat'a o'yamuy-muy ip ya'īcat'a yamudim am. Koam jaspē'a o'yamuy ip. Jaspē'a nomuju safira'a o'yamuy ip. Safira'a nomuju ágata'a o'yamuy ip. Ágata'a nomuju esmeralda'a o'yamuy ip. Esmeralda'a nomuju sardōnio'a o'yamuy ip. Sardōnio'a nomuju sárdio'a o'yamuy ip. Sárdio'a nomuju cristólito'a o'yamuy ip. Crisólito'a nomuju berilo'a o'yamuy ip. Berilo'a nomuju topázio'a o'yamuy ip. Topázio'a nomuju crisópraso'a o'yamuy ip. Crisópraso'a nomuju jacinto'a o'yamuy ip. Jacinto'a nomuju amestista'a o'yamuy ip. Ibūrū'a ip o'yamuy ya'īcat'a 12 beat'a. Idip cīcā korara osodop yamuy buje. ²¹ Xīntabi pérola'a muġēġē osodop 12 be. Pūġpūġpūġ xīntabi pūġ'a ma imuġēġē osunuy pérola'a ma. Ika ukpibu ouro muġēġē osunuy-iaġuat. Ixiriruk osunuy vidro buxim.

²² Deus eju kawēnwēnap'a do buxik ġu ibo ka be, wuykukukat Deus ibo ka be nuynuy buye. Ixe soat podi ma ya'ōbaca. Mēmē buxim oe'ūiat tak iġo ka be nuynuy. Imēnpuye ya'ūmġu Deus eju kawēnwēnap'a. ²³ Kaxi ġu iġo ka mukabiahām. Kaxiaat tak

ka'ūma. Deus jedipam ma ikamukabiahām, mēmē dak. Lâmpada'a bodi ma idip Deus dipap, mēmē dipap tak. ²⁴ Jekukum ip je'e ibo kabia dağ soat ka dağayū. Ibo ka ekabia soat ipi juayū ġukabia.

— Deus ocebodi ma ya'ōbuyxiat- -mēmē buxim oe'ūiat tak — i je'e ip ijodi bima ya'ōbuyxi osodop'iyū. — Deus ocebodi ma ya'ōbacaat mēmē buxim oe'ūiat tak — i je'e ip ijodi bima ya'ōca osodop'iyū.

²⁵ Kabia bun ibo ka exīntabi ikoce. Soat em ma ikoce. Nomudip ġu ma ip, kabiok ġu buye. Soat em kabia. ²⁶ Ja'ōbuyxiap ip idojot ibo ka be soat ka watwat.

— Ēn ocebodi ma a'ōbuyxi, mēmē buxim oe'ūiat tak — i je'e ip Deus pe. — Ēn ocebodi ma a'ōbacaat — i dak je'e ip cebe.

Soat jebubut ip idojot teiboğat. Soat je'ġūm ip Deus pe, mēmē buxim oe'ūiat pe dak. ²⁷ Soat tağ iisu'ūmat pit jeōm ġu ibo ka be. Wuysūsūğat muğēğē'ukat tak ka'ūma ma. Napapa'ukat tak ka'ūma ma. Mēmē buxim oe'ūiat pubutup pe ibutet pararakayū acā jeōm- -soat em itait jeedop ip Deus xe iatup pe ibutet pararakayū acā.

22 Wuymutaicinapti dak o'timubapuk owebe Deus ekawēn tojtjt'ukat. Tixiriruk o'tinuy cristal buxim. Deus abikbikap pewi dijēmjēm, mēmē buxim oe'ūiat abikbikap pewi dak. ² Ixedi jediekukum ika ukpibu dağ. Wuymutaicinap'ip opop tiwābu dağ, jodiwinābudaku. 12 em pūğ koato be ya'a'e nuynuy. Soat kaxi ya'a'e nuynuy. Iboyūdup soat ka dağayū mu'ada'adaaptup. ³ Deus xe ikērēat pit opop ġu ibo ka be- -pūğ tak ka'ūma.

Deus abikbikap jeedop ibo ka be, mēmē buxim oe'ūiat abikbikap tak. Cebeam kapikpik'ukayū soat em je'e cebe: — Ēn soat podi ma xipat — i.

⁴ Mēmē buxim oe'ūiat topajo ip. Ixe butet je'e ibararak topa'a be ip. ⁵ Kabiok ġu je'e ibo ka be. Lampa-

rina'a kuḡ ḡu dak jeedop ip ibo ka watwat. Kaxie dak ka'ūma ma. Wuykukukat Deus ma ibo ka watwat mukabiaha'ukan jeenuy. Ixe eju adeayū kukukayūm jeedop ip soat em.

⁶⁻⁷ Gebuje Deus ekawēn tojtjtot'ukat o'jekawēn oweju.

— “Gaxīn ma ḡuto waram oajēm,” i'e'em Jesus — io'e owebe. — Iboap ekawēn pit icēmān — io'e. — Xipat ewebe etabut am iboap ekawēn kay — io'e. — Deus jekawēn muwēnuwēn'ukayū mutaybitbin apēn ḡuyjom je'bpuk iam — io'e owebe. — Ixe juk jekawēn tojtjtot'ukat o'ḡudot emutaybit am apēn ḡaxīn ma je'bpuk iam — io'e. — Icokcok jeedop ip iju dup peat ekawēn kay kūyjobicayū dak — io'e.

⁸ Ōn João. Ōn ma juk soat iboap ojojjo. Soat iboap oya'ījojjo. Soat co epere buje, ocēḡ'aecōḡcōḡ pin cuk Deus ekawēn tojtjtot'ukat wap-soat cuk adi iboap o'ḡubapuk owebe iat wap. “Ēn xipat cīcā” i'e am cebe ocēḡ'aecōḡcōḡ.

⁹ — Owap pit cuy ecēḡ'aecōḡcōḡ ḡu! — i bit o'e owebe. — Ōn tak ebure ma, wuykitpitpiyū bure dak — io'e. — Deus ekawēn muwēnuwēn ōn eybuxim — io'e. — Pūḡ taḡ ma wuyju kūyjobit ijudup peat ekawēn kay — io'e owebe. — Deus wap acā ecēḡ'aecōḡcōḡ “Ēn xipat cīcā” i'e am cebe — io'e. ¹⁰ — Gaxīn ma soat je'bpuk ijudup peat ekawēn taḡ ma — io'e. — Imēnpuye ebu'um ḡu juy eḡuy apēn ḡuyjom je'bpuk iap muwēn ām itaybit'ūmayū be — io'e. ¹¹ — Apēn ip jekukum ḡasū iap puxim jeeku ip ipi juayū. Ikērēat mujurūḡrūḡ ma jeedop ip ikērēat mujurūḡrūḡ'ukayū. Ikērēat kay acā jeedop ip ḡebum ikērēat kay ḡebumayū. Xipacat muḡēḡēm pit jeedop ip xipacat muḡēḡē'ukayū. Soat taḡ iisu jeedop ip soat taḡ iisuayū — io'e owebe.

¹² — “Eya'ōpicūḡcūḡ cuy epesop,” i'e'em Jesus. “Gaxīn ma ḡuto oajēm,” i'e'em. “Wetaybit cīcā eye-kukuam,” i'e'em. “Apēn ipi daḡ pima juk adi oekuku ip iaptei ōn ma oteida soat pe ipi juayū be,” i'e'em Jesus. “Xipacat oḡūm xipacayū be,” i'e'em. “Ipiat pit osupi'ajoat xipat'ūmayū be,” i'e'em Jesus

— io'e owebe. ¹³ — “Soat ka'üm pima òn kuy kake. Soat i'üm puje dak òn pit kake,” i'e'em Jesus — io'e. — “Ka'üma kake bimaat òn. Soat'üm pimaat tak òn ma. Koapat òn. Kanomūmat tak òn ma,” i'e'em Jesus — io'e.

¹⁴ Icokcok jeedop ip jesay iwuywuyat kukayū-
iisuat kukayū.

— Eyesay iisuat pima, “Eymutaicinap'a epeya'o juy. Ya'o pi ġu eywebe,” i je'e Deus eywebe. “Epeōm cuy okay ikaboġatka exĩntabi daġwi,” i je'e eywebe. ¹⁵ Wūy ma ikaboġatka wi jeedop ip ikērēat muġēġēap epere'ūmayū bit, ibukaypacayū dak, ikērēat muġēġē'ukayū dak, wara'acat o'yaoka'ibiyū dak, deusbaroyū kay itabucayū dak, napapa'ukayū dak, warara'acat muġuykukuku'ukayū dak — io'e.

¹⁶ — Jesus òn — i'e'em. — Òn cuk wekawēn to-
jotjot'ukat oġudot eymukūyjo am apēn ġuyjom je'ba-
puk iam — i'e'em. — Okay itabucayū mukūyjo am
oġudot — i'e'em. — Ipi kukat Davi naxeġebit òn —
i'e'em. — Kasopta buxim òn-tasopata buxim-
kabiada buxim — i'e'em Jesus.

¹⁷ — Ejot cuy! — i'e'em Deus biōġbuk, iwadip
tak.

— Ejot cuy! — i juy je'e ip ijop ekawēntup co-
co'ukayū dak.

Ibipurukat cuy jeedot. Tikōn pinayū wuymuta-
icinap̄ti idikōn. Tidei'ūma idikōn ip.

¹⁸ João òn. Ijoptup ekawēn coco'ukayū oyawē ġa-
sū. Kaypatpan ġu òn e'em. Icēmān òn e'em. Apēn
Deus warēmtaksuġpi sup̄i'ajoat kūyjobit'ūmayū be
iap ibararak opop ijudup pe.

— Eyabewiat ekawēn iboap ekawēn muacokcoġ
pima, Deus imēn ma ipiat sup̄i'ajoat eywebe — i òn
e'em eywebe.

¹⁹ Ijudup ekawēn'in imuwēn pu'u bima bit ya'opi
je'e eywebe wuymutaicinap'a. Epeōm ġu ikaisuatka
be-Deus ka be. Apēn ibo ka ikadip cīcā iap ibara-
rak opop ijudup pe.

²⁰ — Ġaxīn ma ġuto oajēm waram — i'e'em soat



iboap o'ḡuwēniat. — Oajēm ma — i'e'em ixe- -Jesus e'em.

— Imēn cuy jajēm — i òn tak e'em.



— Ejot cuy! — i òn e'em wuykukukat Jesus pe.


²¹ — Jesus, xipan cuy soat ebekitkiyū ejukuk — i òn e'em wuykukukat Jesus pe.

Ibūrū ma.



O MUNDO DO NOVO TESTAMENTO






PALESTINA DO NOVO TESTAMENTO

Nº 2





**JERUSALÉM
E ARREDORES**

Nº 3

